

儒

藏





精華編八九冊  
經部春秋類

# 儒藏

北京大學《儒藏》編纂與研究中心



**圖書在版編目(CIP)數據**

儒藏. 精華編. 八九/北京大學《儒藏》編纂與研究中心編. —北京:北京大學出版社, 2010. 1

ISBN 978-7-301-11807-8

I. 儒… II. 北… III. 儒家 IV. B222

中國版本圖書館 CIP 數據核字(2009)第 081554 號

**書 名:** 儒藏(精華編八九)

**著作責任者:** 北京大學《儒藏》編纂與研究中心 編

**責任編輯:** 王 應

**標準書號:** ISBN 978-7-301-11807-8/B·0493

**出版發行:** 北京大學出版社

**地 址:** 北京市海淀區成府路 205 號 100871

**網 址:** <http://www.pup.cn>

**電子郵箱:** [dianjiwenhua@163.com](mailto:dianjiwenhua@163.com)

**電 話:** 郵購部 62752015 發行部 62750672 編輯部 62765691

出版部 62754962

**印 刷 者:** 北京中科印刷有限公司

**經 銷 者:** 新華書店

787 毫米×1092 毫米 16 開本 63.25 印張 860 千字

2010 年 1 月第 1 版 2010 年 1 月第 1 次印刷

**定 價:** 500.00 元

---

未經許可,不得以任何方式複製或抄襲本書之部分或全部內容。

版權所有,侵權必究 舉報電話: 010-62752024

電子郵箱: [fd@pup.pku.edu.cn](mailto:fd@pup.pku.edu.cn)



教育部哲學社會科學研究重大課題攻關項目



「十五」國家重點圖書出版規劃項目·重大工程出版規劃  
國家社會科學基金重大項目  
北京大學「九八五工程」重點項目



《儒藏》精華編第八九冊

首席總編纂 季羨林

項目首席專家 湯一介

總編纂 湯一介 龐樸 孫欽善 安平秋  
(按年齡排序)

本冊主編 姜廣輝

## 《儒藏》精華編凡例

一、中國傳統文化以儒家思想為中心。《儒藏》為儒家經典和反映儒家思想、體現儒家經世做人原則的典籍的叢編。收書時限自先秦至清代結束。

二、《儒藏》精華編為《儒藏》的一部分，選收《儒藏》中的精要書籍。

三、《儒藏》精華編所收書籍，包括傳世文獻和出土文獻。傳世文獻按《四庫全書總目》經史子集四部分類法分類，大類、小類基本參照《中國叢書綜錄》和《中國古籍善本書目》，於個別處略作調整。凡單書已收入入選的個人叢書或全集者，僅存目錄，並注明互見。出土文獻單列為一個部類，原件以古文字書寫者一律收其釋文文本。韓國、日本、越南儒學者用漢文寫作的儒學著作，編為海外文獻部類。

四、所收書籍的篇目卷次，一仍底本原貌，不選編，不改編，保持原書的完整性和獨立性。

五、對入選書籍進行簡要校勘。以對校為主，確定內容完足、精確率高的版本為底本，精選有校勘價值的版本為校本。出校堅持少而精，以校正誤為主，酌校異同。校記力求規範、精煉。

六、根據現行標點符號用法，結合古籍標點通例，進行規範化標點。專名號除書名號用角號（《》）外，其他一律省略。

七、對較長的篇章，根據文字內容，適當劃分段落。正文原已分段者，不作改動。千字以內的短文一般不分段。

八、各書卷端由整理者撰寫《校點說明》，簡要介紹作者生平、該書成書背景、主要內容及影響，以及整理時所確定的底本、校本（舉全稱後括注簡稱）及其他有關情況。重複出現的作者，其生平事蹟按出現順序前詳後略。

九、本書用繁體漢字豎排，小注一律排為單行。



## 鳴謝

《儒藏》精華編惠蒙善助，共襄斯文；謹列如左，用伸謝忱。

本煥法師

壹佰萬元

北京大學《儒藏》編纂與研究中心

本冊審稿人  
本冊責任編委

張忱石  
李峻岫

《儒藏》精華編第八冊

經 部 春秋類

穀梁傳之屬

春秋穀梁傳注疏〔東晉〕范甯集解

〔唐〕楊士勛疏

春秋穀梁經傳補注〔清〕鍾文烝



# 春秋穀梁傳注疏

〔東晉〕范甯集解

〔唐〕楊士勛疏

浦衛忠校點



# 目錄

校點說明	一	春秋穀梁注疏莊公卷第五	六
欽定四庫全書總目《春秋穀梁傳注疏》	一	春秋穀梁注疏莊公卷第六	六
二十卷	一	春秋穀梁注疏莊公卷第七	八
春秋穀梁傳注疏序	一	春秋穀梁注疏僖公卷第八	一〇七
春秋穀梁傳注疏校勘記序	一三	春秋穀梁注疏僖公卷第九	一二三
春秋穀梁注疏隱公卷第一	一	春秋穀梁注疏僖公卷第十	一四一
（起元年，盡三年）	一	春秋穀梁注疏文公卷第十一	一六〇
春秋穀梁注疏隱公卷第二	一七	春秋穀梁注疏文公卷第十二	一七四
（起四年，盡十一年）	一七	春秋穀梁注疏宣公卷第十三	一八九
春秋穀梁注疏桓公卷第三	三一	春秋穀梁注疏成公卷第十四	二二一
（起元年，盡七年）	三一	春秋穀梁注疏成公卷第十五	二二一
春秋穀梁注疏桓公卷第四	四六		
（起八年，盡十八年）	四六		

春秋穀梁注疏成公卷第十四

(起九年，盡十八年)……………二二六

春秋穀梁注疏襄公卷第十五

(起元年，盡十五年)……………二四三

春秋穀梁注疏襄公卷第十六

(起十六年，盡三十一年)……………二五九

春秋穀梁注疏昭公卷第十七

(起元年，盡十三年)……………二七七

春秋穀梁注疏昭公卷第十八

(起十四年，盡三十二年)……………二九五

春秋穀梁注疏定公卷第十九

(起元年，盡十五年)……………三一二

春秋穀梁注疏哀公卷第二十

(起元年，盡十四年)……………三三二



## 校點說明

《春秋穀梁傳》（以下簡稱《穀梁傳》）是儒家經典《春秋》的三傳之一，它以獨特的見解，闡述了儒家思想的基本觀念。

關於《穀梁傳》的成書、傳人，前人語焉不詳，且多異說。現在一般認為，《穀梁傳》是穀梁後學著於竹帛，而以其師名傳。關於穀梁子其人其名，歷史上有多種說法。《論衡·案書篇》云：「公羊高、穀梁寔、胡毋氏皆傳《春秋》，各門異戶。」《漢書·藝文志》載《穀梁傳》十一卷，云「穀梁子，魯人」。顏師古注曰：「名喜。」王先謙《漢書補注》說：「錢大昭曰：『喜，閩本作嘉。』朱一新曰：『汪本作嘉。』周壽昌曰：『桓譚《新論》：魯穀梁赤作《春秋》，殘略多所遺失。』是穀梁名赤。應劭《風俗

通》、蔡邕《正交論》同。《論衡·案書篇》作「穀梁寔」，阮孝緒《七錄》云：「名俶，字元始。」楊士勛《穀梁疏》引作「淑」，則「俶」字之誤。皆與顏氏名「喜」之說異。葉德輝曰：「《釋文·敘錄》引糜信云：穀梁赤與秦孝公同時。」「《元和姓纂》卷十「穀梁」姓下引尸子云：「穀梁俶傳《春秋》十五卷。」按尸子為六國時人，見聞較確，則以名俶者是也。」但皮錫瑞認為：「名赤見《新論》，為最先，故後人多從之。而據《新論》，後《左氏》百餘年，年代不能與子夏相接，而與秦孝公同時頗合。」（皮錫瑞：《經學通論》）《四庫全書總目》兼採這兩說：「穀梁子名俶，字元始。一名赤。」穀梁子生活的時代，我們也只能籠統地定為戰國時期，認為糜信所說的穀梁子為秦孝公時人的說法較為可信。尸子與商鞅同時，《穀梁傳》載尸子之語，《元和姓纂》又引尸子云「穀梁俶傳《春秋》十五卷」，可見尸子與《穀梁傳》的關係較為密切。根據《穀梁傳》傳授源流的記述，穀梁子是荀子先師。荀子生活在戰國末

期，秦孝公之後，所以，認為穀梁子是秦孝公時人是比較可信的。

但是，認為穀梁子是戰國秦孝公時代的人，並不能說《穀梁傳》的成書就在秦孝公時。《穀梁傳》曾歷引沈子曰、尸子曰、穀梁子曰，假令《穀梁傳》是穀梁子自作，不會自引其說。所以，《穀梁傳》的成書，只能在穀梁子之後。其著於竹帛，成為定本，至少是在魯申公時（詳說見浦衛忠著：《春秋三傳綜合研究》，文津出版社一九九五年版）。

本次校點，以中華書局一九七九年十一月影印原世界書局縮印阮刻本《春秋穀梁傳注疏》為底本，對校敦煌卷子伯二五三六號《春秋穀梁經傳》（起莊公十九年「賡淺事也」，至閔公二年末。莊公第三、閔公第四合為一卷。西泠印社出版社二〇〇四年版，簡稱「敦煌寫本」）、《監本附音春秋穀梁傳注疏》（國家圖書館藏宋刊元修二十卷本，《中華再造善本》，北京圖書館出版社二〇〇三年影印版，簡稱「宋刻元修本」）、《春秋穀梁疏》（北京大學

藏十二卷單疏鈔本，闕卷一至卷五，簡稱「單疏本」；參校《春秋穀梁傳》（四部叢刊本，上海涵芬樓借常熟瞿氏鐵琴銅劍樓藏宋余仁仲家塾刊本景印）、唐陸德明《經典釋文》（上海古籍出版社一九八五年十月影印北京圖書館藏宋元遞修《經典釋文》單刻本，簡稱「釋文」）、鍾文丞《春秋穀梁經傳補注》（《四部備要》本，中華書局、中國書店一九八九年影印，簡稱「穀梁補注」）。參考了夏先培整理北京大學出版社《十三經注疏》繁體豎排本（二〇〇〇年版，簡稱「夏校」），阮元《十三經注疏校勘記》（簡稱「阮校」）、孫詒讓《十三經注疏校記》（雪克輯點，齊魯書社一九八三年版，簡稱「孫校」）和王引之《經義述聞》（江蘇古籍出版社一九八五年版）。另參考了文廷海先生的《北大版全新整理本〈春秋穀梁傳注疏〉校點舉誤》和日本學者野間文史所著《評李學勤主編之〈標點本十三經注疏〉》（載《古史考》第九卷，海南出版社二〇〇三年版），汲取了他們的研究成果。

在校點過程中，發覺中華書局影印版阮刻《十三經注疏》並非一個很好的底本。上個世紀六十年代學者已有評論，近年來呂友仁先生也曾就十行本與八行本作過精闢論述。中華書局一九七九年影印該刻本時曾有《影印說明》，指出：「影印前曾與清江西書局重修阮本及點石齋石印本核對，改正文字訛脫及剪貼錯誤三百餘處。」筆者在校點中也發現，有阮元出校勘記不誤而正文有誤者，蓋版刻者失之。校點中均有注明。此外，中華書局影印本《春秋穀梁傳注疏》的體例也有不同，可以明顯看出其疏漏之處，如各卷標目多有不同：卷五至卷十四、卷十七至卷二十無「附音」二字；卷四、卷十六無「第」字，疑非完本。這些在校記中都作了分別說明。

北京大學藏單疏鈔本與阮元所據何煌之單疏本（即何校本）亦有相異之處。因為阮元並未見到何煌所據單疏本之原本，只是依據何煌校本出校，所以，何煌所據之單疏本與北大藏單疏鈔本之差

異，究為傳抄之誤，抑或確為兩本之異，已難確認。古人云：校書如掃落葉。因此，很難畢其功於一役。本次校點也還有值得商榷之處，期待諸位同仁畫上「點睛」之筆。

校點者 浦衛忠





欽定四庫全書總目

《春秋穀梁傳注疏》二十卷

晉范甯集解，唐楊士勛疏。其傳，則士勛疏稱：「穀梁子名俶，字元始，一名赤。受經於子夏，爲經作傳。」則當爲穀梁子所自作。徐彥《公羊傳》疏又稱，公羊高五世相授，至胡毋生乃著竹帛，題其親師，故曰《公羊傳》。《穀梁》亦是著竹帛者題其親師，故曰《穀梁傳》。則當爲傳其學者所作。案《公羊傳》「定公即位」一條引「子沈子曰」，何休《解詁》以爲後師。按此注在隱公十一年所引子沈子條下。此傳「定公即位」一條，亦稱「沈子曰」。公羊、穀梁既同師子夏，不應及見後師。又「初獻六羽」一條，稱「穀梁子

曰」。傳既穀梁自作，不應自引己說。且此條又引「尸子曰」，尸佼爲商鞅之師，鞅既誅，佼逃於蜀。其人亦在穀梁後，不應預爲引據。疑徐彥之言爲得其實，但誰著於竹帛，則不可考耳。

《漢書·藝文志》載《公羊》、《穀梁》二家經十一卷，傳亦各十一卷。則經、傳初亦別編。范甯《集解》，乃併經注之，疑即甯之所合。定公元年「春王三月」一條，發傳於「春王」二字之下，以「三月」別屬下文，頗疑其割裂。然考劉向《說苑》，稱文王似元年，武王似春王，周公似正月。向受《穀梁春秋》，知《穀梁》經文以「春王」二字別爲一節，故向有此讀。至「公觀魚于棠」一條、「葬桓王」一條、「杞伯來逆叔姬之喪以歸」一條、「曹伯廬卒于師」一條、「天王殺其弟佞夫」一條，皆冠以「傳曰」字。惟桓王一條

與《左傳》合，餘皆不知所引何傳。疑甯以傳附經之時，每條皆冠以「傳曰」字，如鄭玄、王弼之《易》有「彖曰」、「象曰」之例，後傳寫者刪之，此五條，其削除未盡者也。甯注本十二卷，以兼載門生故吏子弟之說，各列其名，故曰《集解》。《晉書》本傳稱甯此書爲世所重，既而徐邈復爲之注，世亦稱之。今考書中乃多引邈注，未詳其故。又《自序》有「商略名例」之句，疏稱甯別有《略例》百餘條，此本不載，然注中時有「傳例曰」字，或士勛割裂其文，散入注、疏中歟？士勛始末不可考。孔穎達《左傳正義序》稱與故四門博士楊士勛參定，則亦貞觀中人。其書不及穎達書之賅洽。然諸儒言《左傳》者多，言《公》、《穀》者少，既乏憑藉之資，又《左傳》成於衆手，此書出於此人，復鮮佐助之力，詳略殊觀，固其宜也。其疏「長狄眉

見於軾」一條，連綴於「身橫九畝」句下，與注相離。蓋邢昺刊正之時，又多失其原第，亦不盡士勛之舊矣。

## 監本附音春秋穀梁傳注疏序<sup>①</sup>

國子四門助教楊士勛撰，國子博士兼太子

中允贈齊州刺史吳縣開國男陸德明釋文<sup>②</sup>

### 春秋穀梁傳序<sup>③</sup>

【疏】釋曰：此題，諸本文多不同，晉、宋古文多云「春秋穀梁傳序」，俗本亦有直云「穀梁傳序」者。然「春秋」是此書之大名，傳之解經，隨事則釋，亦既經傳共文，<sup>④</sup>題名不可單舉，又此序末云「名曰《春秋穀梁傳集解》」，故今依上題焉。此序大畧凡有三段：第一段自「周道衰陵」，盡「莫善於《春秋》」，釋仲尼脩《春秋》所由及始隱終麟之意。夫聖哲在上，動必合宜，而直臣良史克施有政，故能使善人勸焉，淫人懼焉。洎乎周德既衰，彝倫失序，居上者無所懲艾，處下者信意愛憎，致令九有之存唯祭與號，八表之俗或狄或戎。故仲尼就大師而正《雅》、《頌》，因魯史而脩《春秋》，其始隱終麟，范自具焉。第二自「春秋」之傳有三，盡「君子之於《春秋》，沒身而已」，釋三傳所起及是非得失。仲尼卒而微言絕，秦正起而書記亡。其《春秋》之書，異端競起，遂有鄒氏、夾氏、左氏、公羊、穀梁五家之傳。鄒氏、夾氏，口說無文，師既不傳，道亦尋

廢。左氏者，左丘明與聖同恥，恐諸弟子各安其意，為經作傳，故曰《左氏傳》。其傳之者，有張蒼、賈誼、張禹、翟方進、賈逵、服虔之徒。漢武帝置五經博士，《左氏》不得立於學官。至平帝時，王莽輔政，方始得立。公羊子名高，齊人，受經於子夏，故《孝經說》云《春秋》屬商是也，為經作傳，故曰《公羊傳》。其傳之者，有胡毋子都、董仲舒、嚴彭祖之類。其道盛於漢武帝。穀梁子名俶，<sup>⑤</sup>字元始，魯人，一名赤，受經于子夏，為經作傳，故曰《穀梁傳》。傳孫卿，<sup>⑥</sup>孫卿傳魯人申公，申公傳博士江翁。其後魯人榮廣大善《穀梁》，又傳蔡千秋。漢宣帝好《穀梁》，擢千秋

① 「監本附音」、「序」，阮校：「閩、監、毛本無。」

② 此銜名二行，阮校：「閩、監、毛本作『晉范甯集解，唐楊士勛疏』。」

③ 「傳」，阮校：「閩、監、毛本上空二字。石經此六字八分書，稍大，上不空字。十行本與石經合。《釋文》無「傳」字。」

④ 「共」，原作「其」，阮校：「何校本「其」作「共」，是也。」今據改。

⑤ 「俶」，原作「淑」，阮校：「按：作「俶」是也。齊召南云：《爾雅》「俶」訓「始」，故字元始。」今按：宋刻元修本作「俶」，據改。

⑥ 「傳」，原無，據宋刻元修本補。

爲郎，由是《穀梁》之傳大行於世。然則三家之傳，是非無取，自漢以來，廢興由於好惡而已。故鄭玄《六藝論》云：「《左氏》善於禮，《公羊》善於讖，《穀梁》善於經。」是先儒同遵之義也。言「《左氏》善於禮」者，謂朝聘、會盟、祭祀、田獵之屬不違周典是也。「《公羊》善於讖」者，謂黜周王魯及龍門之戰等是也。「《穀梁》善於經」者，謂「大夫曰卒」，「諱莫如深」之類是也。其三傳是非，序文自具。第三自「升平之末」，盡「《穀梁傳集解》」，釋已注述之意，並序《集解》之人。案《晉書》范甯字武子，順陽縣人，爲豫章太守，父名汪。<sup>①</sup>長子名泰，字伯倫；中子名雍，字仲倫；小子名凱，字季倫。其從弟則注云「邵曰」是也，言「先君」則父汪是也。以傳《穀梁》者雖多，妄引三傳，<sup>②</sup>辭理典據不足可觀，故與門徒商畧名例，傳示同異也。所云名例者，即范氏所據，別爲《畧例》一百餘條是也。其《春秋》及經傳之名，在後別釋。謂之序者，序述經傳之旨，并明已注作之意也。

昔周道衰陵，乾綱絕紐，○乾，其連反，天也。紐，女久反。禮壞樂崩，彝倫攸斁。○彝倫，以之反，彝，常；倫，理也。攸斁，丁故反，字書作殫，敗也。弑逆篡盜者國有，○弑，申志反，又作殺，音同。篡盜，初患反，《爾雅》云：「取也。」淫縱破義者比肩。○淫縱，子用反。

【疏】「昔周」至「比肩」。○釋曰：仲尼之脩《春秋》，因衰亂而作，故序先述周道衰也。云「昔」者，范氏晉世之人，仰追周代，故曰「昔」。云「周道衰陵」者，總述幽厲以來也。指衰極言之，則平、桓之世也。知者，幽、厲雖則失道，名器未失，詩猶人《雅》；平王東遷之後，下同於《國風》，政教所被，纔及郊畿，仲尼脩《春秋》，以平王爲始，知衰極是平、桓也。「衰陵」謂衰弱陵遲。云「乾綱」者，乾爲陽，喻天子，坤爲陰，喻諸侯；天子總統萬物，若綱之紀衆紐，故曰「乾綱」。云「絕紐」者，紐是連繫之辭，故昭十三年《左傳》云：「再拜皆厭紐。」《玉藻》云：「紐約用組。」諸侯背叛，四海分崩，若紐之絕，故曰「絕紐」。云「禮壞樂崩」者，通言之耳。知非樂是陽，故以「崩」言之，禮是陰，故以「壞」言之者，正以《詩序》云「微子至於戴公，其間禮樂廢壞」，明知通矣。云「彝倫攸斁」者，《尚書·洪範》文也。禮以安上治民，樂以移風易俗，禮樂崩壞，故常道所以敗也。「弑」謂臣弑君，「逆」謂子弑父，「篡」謂以庶奪正，「盜」即哀四年傳云「春秋有三盜」是也。

是以妖災因釁而作，○釁，許靳反。民俗

①「汪」，原作「注」，據宋刻元修本、《晉書》本傳改。下「父汪」之「汪」字同。

②「三」，宋刻元修本作「二」。

染化而遷，陰陽爲之愆度，○爲之，于僞反，下同。

七耀爲之盈縮，<sup>①</sup>○縮，所六反。川岳爲之崩竭，鬼神爲之疵厲。○疵，才斯反。厲音例，又作癘。

【疏】「是以」至「疵厲」。○釋曰：宣十五年《左傳》云：「天反時爲災，地反物爲妖，人反德爲亂，亂則妖災生。」是妖災因釁而起也。云「陰陽愆度」者，謂冬溫夏寒，失其節度。云「七耀盈縮」者，謂日月薄食，若晦食則是月行疾，食朔與二日是月行遲。又《五行傳》云：「晦而月見西方謂之朏，朔而月見東方謂之側匿。朏則侯王其荼，<sup>②</sup>側匿則侯王其肅。」是由君行使之然也。五星亦有遲疾，故襄二十八年《左傳》云「歲在星紀，而淫於玄枵」是也。謂之「七曜」者，日月五星皆照天下，故謂之「七曜」。五星者，即東方歲星，南方熒惑，西方太白，北方辰星，中央鎮星是也。云「川岳崩竭」者，謂《周語》云幽王之時，三川震，<sup>③</sup>伯陽父曰：「昔伊洛竭而夏亡，河竭而商亡。」「岳」是山之類，即梁山、沙鹿崩是也。云「鬼神疵厲」者，舊解以爲「鬼神」即宗廟是也，「疵厲」謂災變也。言人棄常制，致宗廟之災，即桓宮、新宮災是也。今以爲「鬼神爲之疵厲」，即《國語》云「杜伯射宣王於鎬」，《左傳》云「伯有之鬼爲厲」是也。

故父子之恩缺，則《小弁》之刺作；

○缺，丘悅反。弁，步寒反。刺，七賜反。此所引皆《詩》

篇名，《谷風》在《邶風》，餘皆《小雅》。君臣之禮廢，則《桑扈》之諷興；<sup>①</sup>○扈音戶。諷，方鳳反，又作風。夫婦之道絕，則《谷風》之篇奏；骨肉之親離，則《角弓》之怨彰；君子之路塞，則《白駒》之詩賦。

【疏】「故父」至「詩賦」。○釋曰：今范引此者，即周道之衰微，廢此五事，爲此仲尼作《春秋》也。故《孔叢》云「孔子讀《詩》至《小雅》，廢卷而歎，感《詩》脩《春秋》是也。云「《小弁》之刺作」者，《小弁》，《詩·小雅》，周幽王廢太子宜臼，故太子之傳作詩以刺之。云《桑扈》之諷興者，《桑扈》亦《詩·小雅》，刺幽王君臣上下動無禮文焉，故作是詩以諷之。云「《谷風》之篇奏」者，《谷風》，衛人刺其君無德，故令國內之人得其新婚者並棄其舊室，風俗衰壞，故作是詩以刺之。言「奏」者，謂奏進此詩，與上文「作」、「興」不異，但述作之體，欲辟文耳。云

① 「耀」，阮校：「閩、監、毛本作「曜」。《釋文》：「七耀，本又作曜。」

② 「荼」，原作「恭」，宋刻元修本作「茶」。阮校：「何校本「恭」作「茶」。今據改。

③ 「三」，原作「二」，宋刻元修本作「三」。阮校：「毛本「二」改「三」，是。」今據改。



「《角弓》之怨彰」者，《角弓》、《詩·小雅》，以幽王不親九族，故作詩以刺之，言族人怨之彰顯，故云「《角弓》之怨彰」。云「《白駒》之詩賦」者，《白駒》、《詩·小雅》，宣王之末，不能任賢，致使賢人乘白駒而去也。此引《詩》之次，先云《小弁》，後言《白駒》者，以父子是人倫之端首，六親之莫大，故先言之；其次則有君臣，若君臣禮廢，則上下無序，故次《桑扈》；夫婦者，生民之本，室家之原，欲見從近及遠，故夫婦先九族，是以《谷風》在《角弓》之上；《白駒》是賢人棄君，又非親戚，故最後言之。或當隨便而言，更無次第之例。知者，《白駒》是宣王之詩，而言在幽王之詩下，是無先後之次也。

**天垂象，見吉凶。** ○見，賢徧反。聖作訓，紀成敗。欲人君戒慎厥行，○行，下孟反。增脩德政。

【疏】「天垂」至「德政」。○釋曰：《易》稱：「在天成象，在地成形。」成象則日月之曜，成形則山川之形。「見吉凶」者，即上「七曜爲之盈縮，川岳爲之崩竭」是也。獨言天象者，舊解云，尊作法之本，明聖人與天地合其德，與日月齊其明，以爲川岳崩竭，亦是天使爲之，故總言「垂象」以包之。云「聖作訓，紀成敗」者，謂若《春秋》書日食、星隕、山崩、地震，記災錄異，善惡褒貶等，皆所以示禍福成敗之原，存亡得失之本，欲使人君戒慎其所行，改脩德

政，以消災咎也。

蓋誨爾諄諄，聽我藐藐，○藐，亡角反。履霜堅冰，所由者漸。

【疏】「蓋誨」至「者漸」。○釋曰：言此者，明聖人雖作法，愚主不能用也。①言我教誨汝王諄諄然，何故聽我言藐藐然而不入？此《詩·大雅·抑》篇，刺厲王之詩也。云「履霜堅冰」者，《易·坤卦》初六爻辭，象曰：「履霜堅冰，陰始凝也。馴至其道，至堅冰也。」引之者，取積漸之義也。

四夷交侵，華戎同貫，幽王以暴虐見禍，平王以微弱東遷。征伐不由天子之命，號令出自權臣之門，故兩觀表而臣禮亡，○觀，古亂反。朱干設而君權喪。○喪，息浪反，下「道喪」同。下陵上替，僭逼理極。○替，他計反。僭，子念反。天下蕩蕩，王道盡矣。

【疏】「四夷」至「盡矣」。○釋曰：云「四夷」者，東夷、西戎、南蠻、北狄之總號也。云「交侵」者，謂交相侵伐也。云「華戎同貫」者，謂諸夏與夷狄無異也。舊解

①「主」，原作「上」，據宋刻元修本改。

「四夷交侵，華戎同貫」，指謂當春秋之時，今以爲文勢在幽王之上，則當亦兼據幽、厲以來，故《節》詩刺幽王云「斬伐四國」，又曰「國既卒斬」，及宣王、幽王並爲夷狄所敗，則此段序意論衰之積漸，不直據春秋之時明矣。云幽王見禍，平王東遷者，《周本紀》：幽王既得褒姒，廢申后而黜太子宜臼，申侯與鄩人及犬戎殺幽王於驪山之下，盡取周賄而還。乃與諸侯就申立太子宜臼，是爲平王東遷洛邑是也。云「兩觀」已下者，昭二十五年《公羊傳》云：「子家駒謂昭公曰：『諸侯之僭天子，大夫之僭諸侯，久矣。』」公曰：「吾何僭哉？」子家駒曰：「設兩觀，乘大路，朱干玉戚以舞《大夏》，八佾以舞《大武》。」然則諸侯不立兩觀，周衰，諸侯僭而置之，是臣無有事君之禮也。天子之舞始設朱干，諸侯今亦用之，是君之權喪失也。云「僭逼理極」者，謂僭上逼下之理至極也。據君失權言之是逼下，以臣陵君是僭上。或以爲直據臣言之，理亦通也。云「王道盡矣」者，言法度廢壞盡也。

孔子觀滄海之橫流，迺喟然而歎曰：

○喟，起愧反，又苦怪反。「文王既沒，文不在茲乎！」言文王之道喪，興之者在己，於是就大師而正《雅》、《頌》，○大師音泰。因魯史而脩《春秋》，列《黍離》於《國風》，齊王德於邦

君，所以明其不能復雅，○復，扶又反。政化不足，以被羣后也。○被，皮義反。

【疏】「孔子」至「后也」。○釋曰：舊解引楊雄《劇秦篇》曰：「當秦之世，海水羣飛。」海水喻萬民，「羣飛」言散亂。又引《孟子》云：「當堯之世，洪水橫流。」言不復故道，喻百姓散亂，似水之橫流。今以爲滄海是水之大者，滄海橫流，喻害萬物之大，猶言在上殘虐之深也。云「就大師而正《雅》、《頌》」者，大師，樂官也。《詩》者，樂章也。以大師掌《詩》樂，故仲尼自衛反魯，就而正之。直言《雅》、《頌》者，舉《雅》、《頌》，則《風》詩理在可知。又《雅》、《頌》之工大，故仲尼先用意焉。知非爲師摯理之，故仲尼不正者，師摯直闕《關雎》之音而已，《詩》之顛倒，仍是仲尼改正，故此序云仲尼「列《黍離》於《國風》」。杜預注《左氏》云「後仲尼刪定，故不同」是也。然則作《詩》之體，《風》、《雅》先定，《黍離》若是《風》體，大師不得列之於《雅》、《頌》之中，若是《雅》、《頌》之體，仲尼亦不得退之於《風》詩之中。而云「列《黍離》於《國風》」者，詩人詠歌，實先有《風》、《雅》之體，《黍離》既是《國風》，誠不可列之於《雅》、《頌》。但天子不風，諸侯不雅，仲尼刊正，還同《國風》，亦是仲尼列之。

① 「二」，原作「三」，據宋刻元修本改。

於時則接乎隱公，故因茲以託始，該二儀之化育，贊人道之幽變，舉得失以彰黜陟，明成敗以著勸誡，拯頽綱以繼三五，○拯，拯救之拯。頽，徒回反。鼓芳風以扇遊塵。

【疏】「於時」至「遊塵」。○釋曰：平王四十九年，隱公之元年，故曰「接乎隱公」。亦與惠公相接，不託始於惠公者，以平王之初，仍賴晉鄭，至於末年，陵替尤甚，惠公非是微弱之初，故不託始於惠公。隱公與平王相接，故因茲以託始也。「該」者，備也。「二儀」謂天地，言仲尼脩《春秋》，濟羣物，同於天地之化育。云「舉得失以彰黜陟」者，謂若儀父能結信於魯，書字以明其陟，杞雖二王之後，而後代微弱，書子以明其黜。云「明成敗以著勸誡」者，成敗黜陟，事亦相類。謂若葵丘書日，以表齊桓之功，戎伐凡伯，言戎以明衛侯之惡。又定、哀之時為無賢伯，不屈夷狄，不申中國，皆是書其成敗，以著勸善懲惡。云「拯頽綱以繼三五」者，於時王侯失位，上下無序，綱紀頽壞，故曰「頽綱」。今仲尼脩《春秋》，祖述堯舜，憲章文武。「拯」者救溺之名，言欲拯此頽綱，以繼三王五帝。先言三王者，欲見三王可以繼五帝，從小至大之意，或亦隨便而言。云「鼓芳風以扇遊塵」者，舊解以正樂為芳風，淫樂為遊塵。樂可以降天神，出地祇，故云「芳風」。淫樂鬼神不享，君子不聽，故曰「遊塵」。或以為善之顯著

者為芳風，惡之煩碎者為遊塵，理亦足通耳。但舊解云范氏別錄如此，故兩存之。

一字之褒，寵踰華袞之贈。○袞，古本反。

袞冕，上公之服。片言之貶，辱過市朝之撻。

○貶，彼檢反。市朝，直遙反。撻，吐達反。德之所助，雖賤必申。義之所抑，雖貴必屈。故附勢匿非者無所逃其罪，○匿，女力反。潛德獨運者無所隱其名，信不易之宏軌，百王之通典也。

【疏】「一字」至「典也」。○釋曰：言仲尼之脩《春秋》，文致褒貶。若蒙仲尼一字之褒，得名傳竹帛，則寵踰華袞之贈，若定十四年石尚欲著名於《春秋》是也。若被片言之貶，則辱過市朝之撻，若宣八年仲遂為弑君不稱公子是也。言「華袞」則上比王公，稱「市朝」則下方士庶。袞則王公之服而有文華。或以對「市朝」言之，「華袞」當為二，非也。云「德之所助，雖賤必申」者，謂若吳是東夷，可謂賤矣，而襄二十九年因季札之賢而進稱爵，是其申也。云「義之所抑，雖貴必屈」者，謂若秦術是卿，可謂貴矣，而文十二年以其敵晉而略稱名，是其屈也。云「故附勢匿非者無所逃其罪」者，舊解若公子翬假桓公之勢，匿情於隱，可謂非人臣也，故隱四年、十年皆貶之，是

不得逃其罪也。云「潛德獨運者無所隱其名」者，謂若公弟叔肸不食逆主之祿，潛德昧身，不求寵榮之名，獨運其道，宣十七年著名《春秋》，是無所隱其名也。或以爲「匿非」謂隱匿其非，便於舊解。

先王之道既弘，麟感而來應。<sup>①</sup> ○麟，本

又作麟，呂辛反，瑞獸也。應，應對之應。因事備而終篇，故絕筆於斯年。成天下之事業，定天下之邪正，○邪，似嗟反。莫善於《春秋》。

【疏】「先王」至「春秋」。○釋曰：「先王」謂文武。言仲尼脩《春秋》，貴仁重德，崇道抑邪，弘大先王之道，麟感化而至。杜預解《左氏》，以爲獲麟而作《春秋》。今范氏以作《春秋》然後麟至者，以麟是神靈之物，非聖不臻。故《論語》云：「鳳鳥不至，河不出圖，吾已矣夫。」《禮器》云：「升中於天，而鳳皇降，龜龍假。」《公羊傳》曰：「麟有王者則至。」《援神契》曰：「德至鳥獸則麒麟臻。」是非有明王，則五靈不至也。當孔子之世，周室陵遲，天下喪亂，豈有神靈之物無故而自來？明爲仲尼脩《春秋》，麟應而至也。然則仲尼並脩六藝，何故不致諸瑞者？先儒鄭衆、賈逵之徒，以爲仲尼脩《春秋》，約之以《周禮》，脩母致子，故獨得麟也。或可仲尼脩六藝，不可五靈俱來，偶然麟應，餘不至也。「因事備」者，謂從隱至哀，文武之道協，嘉瑞來臻，是事備也。「終篇」者，謂絕筆

於獲麟也。

《春秋》之傳有三，而爲經之旨一，臧否不同，○臧，子郎反。否音鄙，又方九反。臧否猶善惡也。褒貶殊致。

【疏】「春秋」至「殊致」。○釋曰：聖人作法，本無二意，故傳雖有三，而經旨一也。云「臧否不同，褒貶殊致」者，「臧」謂事有所善，「否」謂理有所惡，以臧否既異，故褒貶亦殊。謂若隱元年《左氏》貴儀父結盟，《公羊》善其趣聖，僖元年《公羊》善齊桓存邢，故稱「師」，《穀梁》以爲不足乎揚，故貶之；隱二年夫人子氏薨，《左氏》以爲桓母，《公羊》以爲隱母，《穀梁》以爲隱妻，是三傳異也。

蓋九流分而微言隱，異端作而大義乖。

【疏】「蓋九」至「義乖」。○釋曰：《漢書·藝文志》云，孔子既沒，諸弟子各編成一家之言，凡爲九。一曰儒家流，凡五十三家，<sup>②</sup>八百三十六篇。人揚雄一家，三十八篇。「蓋出於司徒之官，助人君順陰陽，明教化，游心於

① 「感」，阮校：「石經、閩、監、毛本『感』下有『化』字。」

② 「三」，原作「二」，《漢書·藝文志》作「三」。阮校：「何校本『二』作『三』，是也。」今據改。

六藝之中，①留意於仁義之際，祖述堯舜，憲章文武，宗師仲尼，以重其言，於道最爲高也。」二曰道家流，凡三十七家，九百九十三篇。「其本蓋出於史官，歷記成敗存亡禍福古今之道，然後知秉要執本，清虛以自守，卑弱以自持，此人君南面之術也。合於堯之克讓，《易》之謙謙，一謙而四益。此其所長也。」三曰陰陽家流，凡二十一家，②三百六十九篇。「蓋出於羲和之官，敬順昊天，歷象日月星辰，敬授民時，此其所長也。及拘者爲之，則牽於禁忌，泥於小數，舍人事而任鬼神也。」四曰法家流，凡十家，二百一十七篇。「蓋出於理官，信賞必罰，以輔禮制。《易》曰：『先王以明罰飭法。』此其所長也。及刻者爲之，則無教化，去仁愛，專任刑法也。」五曰名家流，凡七家，三十六篇。「蓋出於禮官，古者名位不同，禮亦異數。孔子曰：『必也正名乎！名不正則言不順，言不順則事不成。』此其所長也。」六曰墨家流，凡六家，八十六篇。「蓋出於清廟之官。茅屋采椽，是以貴儉；養三老五更，是以兼愛；選士大夫射，是以上賢；宗祀嚴父，是以右鬼；順四時而行，是以非命；以孝視天下，是以上同。及蔽者爲之，見儉之利，因以非禮；推兼愛之意，而不知別親疏。」七曰縱橫家流，凡十二家，百七篇。「蓋出於行人之官。孔子曰：『誦《詩》三百，使於四方，不能專對，雖多，亦奚以爲？』又曰：『使乎，使乎！』言其當權事制宜，受命不受辭。此其所長也。及邪人爲之，則尚詐譖而棄其信。」八曰雜家流，凡二十家，四百三篇。「蓋出於議官，兼

儒、墨，合名、法，知國體之有此，見王治之無不貫，此其所長也。」九曰農家流，凡九家，百一十四篇。「蓋出於農耰之官，播百穀，勸農桑，以足衣食。故八政一曰食，二曰貨。孔子曰：③『所重民食。』此其所長也。及鄙者爲之，以爲無所事聖王，欲使君臣並耕，悖上下之序也。」此九家之術，「皆起於王道既微，諸侯力政，各引一端，崇其所善，以此馳說，取合於諸侯」。云「微言隱」者，仲尼沒而微言絕，故云「隱」也。云「異端起而大義乖」者，謂同說儒家，三傳各異，俱述經旨，而理味有殊也。「微言絕，大義乖」，亦《藝文志》文。李奇云：「隱微不顯之言也。」

《左氏》以鬻拳兵諫爲愛君，○鬻音育。拳音權。文公納幣爲用禮。《穀梁》以衛輒拒父爲尊祖，不納子糾爲內惡。○糾，居黝反。《公羊》以祭仲廢君爲行權，○祭，側界反。妾母稱夫人爲合正。以兵諫爲愛君，是人主可得而脅也；以納幣爲用禮，是居喪可得而婚也；以拒父爲尊祖，是爲子可得而叛

①「游心」，阮校：「今本《漢書·藝文志》作『游文』。」

②「二」，原作「三」，據宋刻元修本及《漢書·藝文志》改。

③「曰」，原脫，夏校據《漢書·藝文志》補，今從之。

也；以不納子糾爲內惡，是仇讎可得而容也；以廢君爲行權，是神器可得而闕也；

○闕，本又作窺，去規反。以妾母爲夫人，是嫡庶可得而齊也。○嫡，丁歷反，本又作適，亦同。若此之類，傷教害義，不可強通者也。○強，其丈反。

【疏】「左氏」至「者也」。○釋曰：鬻拳兵諫在莊十九年，文公納幣在文二年，衛輒拒父在哀二年，不納子糾在莊九年，祭仲廢君在桓十一年，妾母稱夫人在隱二年。

凡傳以通經爲主，經以必當爲理。

○當，丁浪反，下同。夫至當無二，而三傳殊說，庸得不棄其所滯，擇善而從乎？既不俱當，則固容俱失。若至言幽絕，擇善靡從，庸得不並舍以求宗，據理以通經乎？○舍以音捨。雖我之所是，理未全當，安可以得當之難，而自絕於希通哉！

○難，乃旦反。

【疏】「凡傳」至「通哉」。○釋曰：三傳殊異，皆

以通經爲主。「當」者，謂中於道也。言聖人之經，以必中爲理。其理既中，計無差二，而三傳殊說，故范氏言不得不擇善而從之。云「三傳殊說」者，若隱二年子氏之說，僖八年用致夫人之談是也。擇善而從之，季姬之遇鄫子，注云《左氏》「近合人情」，是也。「並舍以求宗，據理以通經乎」者，謂若子糾、衛輒，范氏注別起異端，季子潛刃，注云「傳或失之」；天子六師，方伯一軍，示以凝滯，南季之聘，傳言「非正」，范所不取，是也。

而漢興以來，環望碩儒，○環，古回反。各

信所習，是非紛錯，○錯，七洛反。準裁靡定。

○裁，在代反，又音才，下同。故有父子異同之論，

石渠分爭之說。○父子異同，謂劉向好《穀梁》，劉

歆善《左氏》。之論，力困反。石渠，其居反，閭名，漢宣帝

時使諸儒講論同異於石渠閣也。分爭，爭鬪之爭。廢興

由於好惡，○好，呼報反。惡，烏路反。盛衰繼之

辯訥。○《字書》云：「訥，或作訥，乃骨反。」《字詁》

云：「訥，遲於言也。」包咸《論語注》云：「遲鈍也。」斯

蓋非通方之至理，誠君子之所歎息也。

【疏】「而漢」至「息也」。○釋曰：舊解云，「環

望」者，據容貌言之。「碩儒」者，大德之稱，或當「瓌望」猶美望也。云「各信所習，是非紛錯」者，若賈誼、劉歆之類，服虔、鄭衆之徒，皆說《左氏》之美，不論二傳之得也。云「父子異同之論」者，若劉向注意《穀梁》，子歆專精《左氏》，是其異也；賈景伯父子及陳元父子皆習《左氏》，不學二傳，是其同也。或解「異同」總據劉向父子言之，理亦通。云「石渠」者，漢之學名，論事校文多在其內，故張平子云：「天祿石渠，校文之處。」「分爭」者，若劉歆欲專立《左氏》，而移書大常，諸儒不從，反為排擯；陳元上疏論二傳之短，亦被喧囂是也。云「廢興由於好惡」者，若景帝好《公羊》，胡毋之學興，仲舒之義立；宣帝善《穀梁》，而千秋之道起，劉向之意存也。云「盛衰繼之辯訥」者，若武帝時《公羊》師董仲舒有才辯，《穀梁》師江翁性訥，《公羊》於是大興，《穀梁》遂爾寢廢；其後魯人榮廣善《穀梁》，與《公羊》師眭孟辯論大義，眭孟數至窮屈，《穀梁》於是又興，《公羊》還復浸息。道有升降，在乎其人，不復論其得失，故云可歎息也。

《左氏》豔而富，其失也巫。○豔，移驗反。巫音無。《穀梁》清而婉，其失也短。○婉，於阮反。《公羊》辯而裁，其失也俗。若能富而不巫，清而不短，裁而不俗，則深於其道者也。故君子之於《春秋》，沒身而已矣。

【疏】「左氏」至「已矣」。○釋曰：左丘明身為國史，躬覽載籍，屬辭比事，有可依據。楊子以為品藻，范氏以為富豔。「豔」者，文辭可美之稱也。云「其失也巫」者，謂多敘鬼神之事，預言禍福之期，申生之託狐突，荀偃死不受含，伯有之厲，彭生之妖是也。云「清而婉」者，辭清義通，若論隱公之小惠，虞公之中知是也。云「其失也短」者，謂元年大義而無傳，益師不日之惡畧而不言是也。云「辯而裁」者，「辯」謂說事分明，「裁」謂善能裁斷，若斷元年五「始」，益師三「辭」，「美惡不嫌同辭，貴賤不嫌同號」是也。舊解以為「裁」謂才辯，恐非也。云「其失也俗」者，若單伯之淫叔姬，鄆子之請魯女，論叔術之妻嫂是非，說季子之兄弟飲食是也。云「沒身而已矣」者，三傳雖說《春秋》，各有長短，明非積年所能精究，故要以沒身為限也。

升平之末，歲次大梁，先君北蕃迴軫，

○蕃，方元反，又作藩。頓駕于吳，乃帥門生故

吏、我兄弟子姪，○姪，徒節反，《字林》丈一反。①

杜預注《左氏傳》云：「兄子曰姪。」研講六籍，次及

三傳。《左氏》則有服、杜之注，《公羊》則有何、嚴之訓。釋《穀梁傳》者雖近十家，○近，

① 「丈」，原作「文」，據宋刻元修本改。



附近之近。皆膚淺末學，不經師匠。辭理典據，既無可觀，又引《左氏》、《公羊》以解此傳，文義違反，斯害也已。

【疏】「升平」至「也已」。○釋曰：此范氏言已注述之意也。「升平」者，晉之年號。「歲」謂大歲也。「大梁」是十二次名也。「先君」謂甯之父汪也。「門生」，同門後生。「故吏」謂昔日君臣，汪、徐之屬是也。「兄弟子侄」，即邵、凱、雍、泰之等是也。「六籍」者，謂《易》、《詩》、《書》、《禮》、《樂》與《春秋》也。「服、杜」者，即服虔、杜預也。「何、嚴」者，即何休、嚴彭祖也。「近十家」者，魏晉已來注《穀梁》者，有尹更始、唐固、麋信、孔演、江熙、程闡、徐仙民、徐乾、劉瑤、胡訥之等，故曰「近十家」也。范不云注二傳得失，直言注《穀梁》膚淺末學者，舊解以為服、杜、何、嚴皆深於義理，不可復加，故不論之；以注《穀梁》者，皆不經師匠，故偏論之。或當方便注《穀梁》，故言其短也。

於是乃商略名例，敷陳疑滯，博示諸儒同異之說。昊天不弔，大山其頽。○昊天，胡老反。《詩》云：「欲報之德，昊天亡極。」本又作旻，亡巾反。匍匐墓次，死亡無日。○匍音蒲，又音扶。跂及，蒲北反，又音服。日月逾邁，○逾音榆。跂及

視息。○跂，丘弭反，又丘豉反。乃與二三學士及諸子弟各記所識，并言其意。業未及終，嚴霜夏墜，○墜，直類反。從弟彫落，○從，才用反。二子泯沒。○泯，忘忍反，又作泯。天實喪予，○喪，息浪反。何痛如之！今撰諸子之言，各記其姓名，名曰《春秋穀梁傳集解》。

【疏】「於是」至「集解」。○釋曰：「商畧名例」者，即范氏別為《畧例》百餘條是也。言「旻天」者，①以父卒，故以殺方言之。「旻天不弔」，哀十六年《左氏》文也。云「大山其頽」者，《禮記·檀弓》文也。「集解」者，撰集諸子之言以為解，故曰集解。杜預云：「集解者，謂集解經傳。」與此異也。

①「旻」，阮校：「閩、監、毛本作「旻」，下「旻天不弔」同。」





## 春秋穀梁傳注疏校勘記序

《六藝論》云「《穀梁》善于經」，豈以其親炙於子夏，所傳爲得其實與？公羊同師子夏，而鄭氏《起廢疾》則以穀梁爲近孔子，公羊爲六國時人，又云「傳有先後」，然則穀梁實先於公羊矣。今觀其書，非出一人之手，如隱五年、桓六年並引尸子說者，謂即尸佼。佼爲秦相商鞅客，鞅被刑後遂亡逃入蜀，而預爲徵引，必無是事。或傳中所言者非尸佼也。自漢宣帝善《穀梁》，於是千秋之學起，劉向之義存，若更始、唐固、麋信、孔衍、徐乾皆治其學，而范甯以未有善釋，遂沈思積年，著爲《集解》。《晉書·范

傳》云：「徐邈復爲之注，世亦稱之。」似徐在范後，而書中乃引邈注一十有七，可知邈成書於前，范甯得以摭拾也。<sup>①</sup>讀《釋文》所列經解傳述人，亦可得其後先矣。《漢志》經、傳各自爲帙，今所傳本未審合併於何時也。《集解》則經、傳並釋，豈即范氏之所合與？范注援漢、魏、晉各家之說甚詳。唐楊士勛疏分肌擘理，爲《穀梁》學者未有能過之者也。但晉豕魯魚，紛紛錯出，學者患焉。康熙間長洲何煌者，焯之弟，其所據宋槧經注殘本、宋單疏殘本並希世之珍，雖殘編斷簡，亦足寶貴。元曾校錄，今更屬元和生員李銳合唐石經、元版注疏本及閩本、監

① 「范甯得以摭拾」，孫校：「柳興恩《穀梁大義述》云：案《序》疏云「故吏謂昔日君臣、江、徐之屬是也」，則江熙、徐乾、徐邈皆范氏故吏，于講席故亦說《穀梁》，甯得以摭拾之，未必邈書定前成也。」

本、毛本以校宋十行本之訛，元復定其是非，成《穀梁注疏校勘記》十二卷、《釋文校勘記》一卷。阮元記。

### 引據各本目錄

#### 單經本

唐石經凡十二卷。顧炎武《金石文字記》曰：「襄、昭、定、哀四公卷，朱梁補刻。」錢大昕《金石文跋尾》曰：「襄公篇朱梁重刻，成公篇重刻者居其半，僖公篇亦似後來重刻，却不避城字。炎武謂昭、定、哀三卷亦朱梁補刻，則考之未審矣。」

#### 經注本

宋槧殘本余仁仲萬卷堂藏本。兼載《釋文》。宣公以前缺，自宣公以後分卷與石經合。今據何煌校本。

#### 單疏本

鈔宋殘本章丘李中麓藏。文公以前缺，自文公以後分

卷亦與石經合。亦據何煌校本。

#### 注疏本

元本亦據何煌校本。

十行本凡二十卷。閩、監、毛三本同。又何煌所記諸舊本尚有南監本一種，今案南監本即十行本，故不別出。

#### 閩本

#### 監本

#### 毛本

# 監本附音春秋穀梁注疏隱公卷第一<sup>①</sup>

起元年，盡三年

范甯集解 楊士勛疏<sup>②</sup>

## 春秋穀梁傳隱公第一

【疏】「春秋」至「第一」。○釋曰：「春秋」者，此書之大名。傳之解經，隨條即釋，故冠大名於上也。名曰「春秋」者，以史官編年記事，年有四時之序，春先於夏，秋先於冬，故舉「春秋」二字以包之。賈逵云：「取法陰陽之中。」知不然者，以《孝經》云「春秋祭祀，以時思之」，豈是取法陰陽之中？故知非也。《玉藻》云：「動則左史書之，言則右史書之。」左史所書，《春秋》是也。右史所書，《尚書》是也。則《春秋》立名，必是仲尼以往，三代以來，不審誰立之耳。仲尼所脩謂之經。「經」者，常也，聖人大典，可常遵用，故謂之經；穀梁所脩謂之傳，不敢與聖人同稱，直取傳示於人而已，故謂之傳。《魯世家》：「隱公名息姑，惠公之子，周公八世孫，以平王四十九年即位。」隱者，諡也。《周書·謚法》曰：「隱拂不成曰隱。」魯雖侯爵，據臣子言之，故謂之公。《說文》「第」訓次。謂次第之中當其一，故謂之第一。

監本附音春秋穀梁注疏隱公卷第一

元年，春，王正月。隱公之始年，周王之正月也。杜預曰：「凡人君即位，欲其體元以居正，故不言一年一月也。」○正音征，又如字，後皆放此。

【疏】注「隱公」至「月也」。○釋曰：何休注《公羊》，取《春秋緯》「黃帝受圖，立五始」，以為元者氣之始，春者四時之始，王者受命之始，正月者政教之始，公即位者一國之始，五者同日並見，相須而成。又云：「惟王者然後改元立號，《春秋》託新王受命於魯，故因以錄即位。」《公羊》又引「王者孰謂？」<sup>③</sup>謂文王也，故范云「隱公之始年，周王之正月」以異之。不然，公者不嫌非隱，何煩此注？明知為排《公羊》說也。所書之公即魯隱，所用之歷即周正，安在黜周王魯也？又所改正朔，雖是文王頒於諸侯，非復文王之歷，用今王之歷，<sup>④</sup>言文王之正，非也。又何休言諸侯不得改元，則元者王之元年，非公之元年。公之即位，不在王之元年，安得同日並見，共成一體也？言既不經，故范所不信。元年實是一年，正月實為一月，而別為立名，故范引杜預之言以解之。元者氣之本，善之

① 「監本附音」，阮校：「閩、監、毛本無，後卷並同。」

② 「范甯集解楊士勛疏」，阮校：「閩、監、毛三本『范』上有『晉』字，『楊』上有『唐』字。後卷並同。」

③ 「引」，宋刻元修本作「云」。

④ 「用」，宋刻元修本作「受」。

長，人君當執大本，長庶物，欲其與元同體，故年稱元也。正者直方之間語，直其行，方其義，人君當秉直心，仗大義，欲其常居正道，故月稱正也。以其君之始年，歲之始月，故特立此名以示義。其餘皆即從其數，不復改也。

雖無事，必舉正月，謹始也。謹君即位之始。

【疏】「雖無」至「始也」。○釋曰：此言「無事」，直據正月無即位之事，非是通一時無事也。云「謹始也」者，謹人君即位之始。

公何以不言即位？據文公言即位。

【疏】注「據文公言即位」。○釋曰：不據桓公者，文公繼正即位，正也；桓繼故即位非正，故不據之。

成公志也。成隱讓桓之志。焉成之？言

君之不取為公也。言隱意不取為魯君也。公，君也。上言君，下言公，互辭。○焉，於虔反。君之不取

為公，何也？將以讓桓也。讓桓正乎？

曰不正。隱長桓幼。○長，丁丈反，又作丈，音同。

【疏】注「隱長桓幼」。○釋曰：傳云讓桓不正，注何以知隱長桓幼，不是隱嫡桓庶者？若隱嫡桓庶，先君焉得欲立之？隱焉得探先君邪心而讓之？傳言天倫，則貴賤相似可知。又云受之天子，隱非嫡明矣。

《春秋》成人之美，不成人之惡。隱不正而成之，何也？將以惡桓也。不明讓者之善，則取者之惡不顯。○之惡，烏各反，下注「之惡」同。惡桓，烏路反，下「其惡桓」同。

【疏】「《春秋》成人之美」，下云「《春秋》貴義而不貴惠」，顯言「《春秋》者，讓者，人之善事，而傳稱小道，危疑之理，恐人不信，故廣稱《春秋》之理以明之。下既以隱為善，又惡其不正，亦恐人不信，故言《春秋》貴義而不貴惠也。○注「不明」至「不顯」。○釋曰：謂不言公之即位，是明讓者之善，讓者之善既明，則取者之惡自然顯也。

其惡桓何也？隱將讓而桓弑之，則桓

惡矣。桓弑而隱讓，則隱善矣。善則其不

正焉何也？據善無不正。○弑，申志反，又作殺，如

字，後皆同。《春秋》貴義而不貴惠，惠謂私惠。

信道而不信邪。信，申字，古今所共用。○信音申。

邪，似嗟反，下及注皆同。孝子揚父之美，不揚父

之惡。先君之欲與桓，非正也，邪也。雖

然，既勝其邪心以與隱矣，終歸之於隱，是以正道制邪心。已探先君之邪志而遂以與桓，則是

成父之惡也。兄弟，天倫也。兄兄弟後，天之倫次。○探，吐南反。爲子，受之父；爲諸侯，受之君。隱爲世子，親受命於惠公，爲魯君，已受之於天王矣。已廢天倫而忘君父，以行小惠，曰小道也。弟先於兄，是廢天倫。私以國讓，是忘君父。

【疏】「小道也」。○釋曰：伯夷、叔齊及大伯等讓國，史傳所善，今隱讓國，而云「小道」者，伯夷爲世子，其父尚存，兄弟交讓而歸周，父沒之後，國人立其中子，可謂求仁而得仁，故以爲善。今隱公上奉天王之命，下承其父之託，百姓已歸，四鄰所與，苟探先君之邪心，而陷父於不義，開篡弑之原，啓賊臣之路，卒使公子翬乘釁而動，自害其身，故謂之「小道」。至於大伯，則越禮之高，以興周室，不可以常人難之。

若隱者，可謂輕千乘之國，蹈道則未也。未履居正之道。○乘，繩證反。公侯之國賦千乘。蹈道，上徒報反，履行之名也，下如字。

三月，公及邾儀父盟于昧。邾，附庸之國。昧，魯地。○邾音誅，國名。儀父，凡人名字皆音甫，後放此，更不重音。昧音蔑，地名，《左氏》作蔑，注下皆同。及者何？內爲志焉爾。內謂魯也。儀，字也。父猶傅也，男子之美稱也。傅，師傅。附庸之君，

未王命，例稱名。善其結信於魯，故以字配之。○美稱，尺證反。其不言邾子何也？據莊十六年「邾子卒」，稱邾子。邾之上古微，未爵命於周也。邾自此以上是附庸國。○上，時掌反。不日，其盟渝也。日者所以謹信，盟變，故不日。七年「公伐邾」是也。○不日，人實反。不日，謂不書日也。《穀梁》皆以日月爲例，他皆放此。渝，羊朱反，變也。

【疏】「及者」至「渝也」。○釋曰：此云「及」，傳云「內爲志焉爾」。二年「公會戎于潛」，傳云「會者外爲主焉」，則下六年「公會齊侯，盟于艾」，亦是外爲主，「公及戎盟于唐」，亦是內爲志。外內之意別，故傳辨彼我之情也。案齊侯祿父則以父爲名，此父爲傅者，以《春秋》之例，諸侯卒例名，經云「齊侯祿父卒」，無取字義，故知父是名也。今儀父既有所善，故知父是男子之美稱也。經善其結信，貴而字之。傳又云「不日，其盟渝也」，經傳相違者，以附庸之君能結信於魯，故以美稱稱之，但結盟之後，信義不固，魯更伐邾，故去日以惡之。所謂善惡兩舉，《春秋》之義也。知非例不日者，案二年「秋，八月，庚辰，公及戎盟于唐」，六年「夏，五月，辛酉，公會齊侯，盟于艾」，彼皆書日，故知非例不日。今此不日，故知爲渝盟畧之也。《左氏》惟大夫卒及日食以日月爲例，自餘皆否。此傳凡是書經皆有日月之例者，以日月相承，其事可悉，史官記事，必當具文，豈有大聖脩撰而或詳或畧？故知

無日者，仲尼畧之，見褒貶耳。○注「附庸」至「配之」。

○釋曰：案莊五年「秋，邾、魯來朝」，稱名，故知此「善其結信於魯，故以字配之」也。不善彼朝而善此盟者，朝事大國，附庸常禮，齊盟結信，所以安社稷，故貴之也。昧，地名也。

夏，五月，鄭伯克段于鄆。段有徒衆，攻之

爲害必深，故謹而月之。鄆，鄭地。○鄆音偃，地名。

【疏】注「段有」至「鄭地」。○釋曰：案下四年

「九月，衛人殺祝吁于濮」，傳曰：「其月，謹之也。」范云：「討賊例時也。衛人不能即討祝吁，致令出入自恣，故謹其時月所在，以著臣子之緩慢也。」此云「爲害必深，故謹而月之」。彼祝吁以二月弑君，衛人以九月始討，傳云「其月，謹之也」，明知謹臣子之緩慢。此無歷時之事，傳云「段之有徒衆也」，故知爲害必深，故謹而月爾。莊九年「齊人殺無知」，不書月者，無知雖復歷年，時月尚淺，又無重害，故直書時也。宣十一年「楚人殺陳夏徵舒」，書月者，爲陳不能討，而外藉楚力，故禍害深也。

克者何？能也。何能也？能殺也。

何以不言殺？見段之有徒衆也。言鄭伯能殺，則邦人不能殺矣。知段衆力彊盛，唯國君能殺之。

○見，賢徧反。

【疏】注「言鄭」至「殺之」。○釋曰：國君之討，

必藉衆力，若使鄭伯獨行，理不能殺。而云「唯國君能殺之」者，段藉母弟之權，乘先君之寵，得衆人之情，遂行弑君之計。百姓畏憚，莫不斂手。而鄭伯既爲人君，有威怒之重，自爲戎首，設賞罰之柄，故軍師用命，戰士爭先。注論克段之本，故云「唯國君乃能殺之」也。

段，鄭伯弟也。何以知其爲弟也？殺

世子、母弟目君。以其目君，知其爲弟也。

母弟，同母弟也。目君，謂稱鄭伯。

【疏】「段鄭」至「弟也」。○釋曰：殺世子、母弟

皆目君。傳何以知非世子者？《左氏》、《公羊》亦以段爲鄭伯之弟，故此傳亦同之。舊解以爲「世子申生」，傳曰：「目晉侯，斥殺，惡晉侯也。」宋公殺世子，傳無明解，同例可知，故范云：「誣之罪，不子明矣。」然則書殺世子例目君稱世子，其罪誅者即不書。今段目君而不云世子，是弟可知，理亦通耳。不及取二傳爲證，後進易曉。宣十七年「公弟叔聃卒」，傳曰：「賢之也。」彼爲賢稱弟，則不賢去「弟」，乃是其常。而下傳云「弗謂弟，貶之也」者，天王殺其弟佖夫，彼佖夫無罪而稱弟，今段不稱公子，又不稱弟，故云「貶之」。又且相殺之例，與尋常異，故知去「弟」者貶之也。

段，弟也，而弗謂弟；公子也，而弗謂

公子，貶之也。段失子弟之道矣，賤段而甚

鄭伯也。賤段謂不稱公子、公弟。甚鄭伯，謂目君也。

何甚乎鄭伯？甚鄭伯之處心積慮，成於殺

也。雍曰：「段恃寵驕恣，彊足當國，鄭伯不能防閑以

禮，教訓以道，縱成其罪，終致大辟，處心積思，志欲殺弟。」○大辟，婢亦反。思，息吏反。于鄆，遠也，猶

曰取之其母之懷中而殺之云爾，甚之也。段

奔走乃至於鄆，去已遠矣，鄭伯猶追殺之，何以異於探其母懷中赤子而殺之乎？君殺大夫例不地，甚鄭伯之殺弟，故謹其地。

【疏】注「段奔」至「其地」。○釋曰：僖十年「晉

殺其大夫里克」，昭十四年「莒殺其公子意恢」，例不地，故知此書地是謹之也。又昭十一年「楚子虔誘蔡侯般，殺之于申」，傳曰「稱地，謹之也」，明此稱地亦是謹耳。

然則爲鄭伯者宜奈何？緩追逸賊，親

親之道也。君親無將，將而必誅焉。此蓋臣子之道，所犯在己，故可以申兄弟之恩。

【疏】注「君親」至「之恩」。○釋曰：莊三十二年《公羊傳》文。

秋，七月，天王使宰咺來歸惠公仲子之  
贈。宰，官。咺，名。仲，字。子，宋姓也。婦人以姓配

字，明不忘本，示不適同姓也。妾子爲君，贈當稱謚，成風是也。仲子乃孝公時卒，故不稱謚。贈例時，書月，以謹其晚。○宰咺，況阮反，注同。仲子，惠公之母也，與《左氏》不同。①贈，芳鳳反，注及下同。②

【疏】「七月」至「之贈」。○釋曰：《公羊傳》云：

「仲子者何？桓之母也。何以不言及仲子？仲子微也。」《左氏》亦以仲子爲桓之母。今《穀梁》以爲孝公之妾，惠公之母者，以文九年「秦人來歸僖公成風之櫬」，彼若兼歸二櫬，則先書成風，既經不先書成風，明母以子氏，直歸成風櫬服而已。成風既是僖公之母，此文正與彼同，故知仲子是惠公之母也。鄭《釋廢疾》亦云：「若仲子是桓之母，桓未爲君，則是惠公之妾，天王何以贈之？則惠公之母，亦爲仲子也。」鄭云「亦爲仲子」者，以《左氏》、《公羊》皆言「仲子，桓公母」故也。然則魯女得並稱伯姬、叔姬，宋女何爲不得並稱仲子也？又仲子不稱夫人者，文九年「秦人來歸僖公成風之櫬」，傳稱「秦人弗夫人也，即外之弗夫人而見正焉」，則此不稱夫人，理亦當然也。文五年「春，王正月，王使榮叔歸含且贈」，傳曰：「其不言來，不周事之用也。」仲子乃孝公時卒，而云「來」者，秦人能遠慕中華君子，恕而不責其晚，故言來，又書時，今平

①「不」，原作「傳」，夏校據《釋文》等改，今從之。

②「注」，原無，夏校據《釋文》補，今從之。



王能崇禮諸侯，因惠公之喪而來歸贈，故亦恕而不責，言來也。秦近西戎，能慕中國，故時而不月。京師路近，故謹而月之。范以不責秦而不書月，故知書月者是謹譏之文。文五年傳云「不周事之用也」，而經書月，則周事之用合書時，故注云「贈例時，書月，以謹其晚」也。

**母以子氏**，妾不得體君，故以子爲氏。平王新有幽王之亂，遷于成周，欲崇禮諸侯，仲子早卒，無由追贈，故因惠公之喪而來贈之。仲子者何？惠公之母，孝公之妾也。禮，贈人之母則可，贈人之妾則不可。君子以其可辭受之。其志，<sup>①</sup>不及事也。常事不書。贈者何也？乘馬曰贈，衣衾曰綹，貝玉曰含，錢財曰賻。四馬曰乘。含，口實。○乘，繩證反。綹音遂。含，戶暗反，又作哈。賻，音附。

【疏】「贈者」至「曰賻」。○釋曰：《士喪禮》贈用兩馬，此用乘馬者，禮：大夫以上皆乘四馬。故贈用乘馬。馬數雖同，其馬大小則異。故何休云「天子馬曰龍，高七尺以上。諸侯曰馬，高六尺以上。卿大夫、士曰駒，高五尺以上」是也。《士喪禮》贈并有玄纁束。<sup>②</sup>《公羊傳》亦云：「贈者以馬，以乘馬束帛。」何休云：「束帛謂玄三纁二，玄三法天，纁二法地。」是也。謂之「贈」者，何休

云「贈猶覆也」，當覆被亡者之身。休又云：「賻猶助也，皆助生送死之禮。綹猶遺也，遺是助死之禮，知生者贈賻，知死者贈綹耳。」或當「綹」者衣服之名，故送死之衣亦名綹也。衣多少之數，《喪大記》小斂之衣皆十九稱，大斂之衣君百稱，大夫五十稱，士三十稱，天子蓋百三十稱。斂衣稱數不同，則所歸綹服亦當有異，但所歸者未必具其稱，先儒無說，不敢斷其多少也。「含」者，實口之名。《周禮·玉府》「大喪共含玉」，則天子用玉。《禮·雜記》論諸侯弔含之事，云將命者執璧委於殯東，是諸侯用璧。《士喪禮》含用米貝，是士用米貝。《莊子》云：「徐徐別其煩，<sup>③</sup>無傷口中珠。」或大夫用珠也。其多少之數，《士喪禮》用貝三，則天子以下同用三明矣。何者？實口當無多少之異故也。舊說云「大夫當五，諸侯當七，天子當九」，非也。《檀弓》含用米貝，以《喪大記》約之，則天子米當用黍，諸侯用粱，大夫、士用稷也。案《雜記》之文，諸侯含必當用璧。文五年注云：「諸侯含用玉。」又此傳直云

① 「其志」，王引之《經義述聞》：「『其志』二字與上句文義不屬，『其』疑當爲『且』，形相似而說也。」

② 「束」下，阮本盧宣旬補校云：「束下當有『帛』字。」

③ 「徐徐」，孫校：《莊子·外物篇》不重「徐」字。

「貝玉曰含」者，璧亦是玉之別，故周禮，<sup>①</sup>子男執璧，亦同謂之玉。故傳舉「貝玉」總之也。或以爲《禮緯》天子用珠，諸侯用玉，大夫用璧，士用貝，又此傳「貝玉曰含」，故范氏不取《禮記》之文，而云諸侯含用玉也。若從前解《禮緯》之文，特爲先代法，則於理通耳。

九月，及宋人盟于宿。及者何？內卑

者也。宋人，外卑者也。卑者之盟不日。卑者謂非卿大夫也。凡非卿大夫盟，信之與不，例不日。

【疏】「及者」至「不日」。○釋曰：盟會言及，別

內外。尊卑言及，上下序。此言及者，是魯之微人。傳云「卑者之盟不日」，則公卿之盟書日可知。故文二年「三月，乙巳，及晉處父盟」，莊二十二年「秋，七月，丙申，及齊高偃盟」，彼雖不言公，以公實在，故亦書日。又二年「秋，八月，庚辰，公及戎盟于唐」，襄三年「六月，公會」云云，「己未，同盟於雞澤」，是稱公而書日。襄二十七年「秋，七月，辛巳，豹及諸侯之大夫盟於宋」，是卿盟亦日。此不書日，是卑者例不書日。八年傳云「外盟不日」，詳內而畧外也。其間有內之公卿不日，外盟亦日，皆當條別有義耳。定十一年注云：「平不日，亦有惡矣。」則平亦有日月之例也。

宿，邑名也。

冬，十有二月，祭伯來。來者，來朝

也。其弗謂朝何也？寔內諸侯，非有天子之命，不得出會諸侯。不正其外交，故

弗與朝也。天子畿內大夫有采地，謂之寔內諸侯。

○祭，側界反。朝，直遙反。寔音縣，古縣字，一音環，又音患。寔內，圻內也。畿，本或作圻，音祈。聘弓鏃，

矢不出竟場，束脩之肉不行竟中，有至尊者，不貳之也。聘遺所以結二國之好，將彼我之意。

臣當稟命於君，無私朝聘之道。○鏃音候，又音侯。竟音境，本或作境。場音亦。遺，唯季反。好，呼報反。稟，彼錦反。

【疏】「來者」至「之也」。○釋曰：天子畿內，大

夫奉王命，當言「聘」。此不奉王命，據無君言之，<sup>②</sup>故傳云「不與朝也」。<sup>③</sup>「寔內」者，王都在中，諸侯四面遠之，故曰寔內也。「祭伯」者，范雖不注，傳云「諸侯」，則「伯」爲爵也。「聘弓鏃矢」者，麋信云：「聘，問也。古者以弓矢相聘

<sup>①</sup>「周」，原作「同」，阮校：「『同』乃『周』字之誤。」今據

改。

<sup>②</sup>「無」，原作「之」，阮校：「閩、監、毛本作『無』。」今據改。

<sup>③</sup>「不」，阮校：「按傳作『弗』。」

問，故《左傳》云「楚子問郤至以弓」。《爾雅·釋器》云：「金鏃翦羽謂之鏃。」郭璞云：「今之鏃箭是也。」①「束脩之肉」者，脩，脯也，謂束脯之肉也。臣無竟外之交，故弓矢不出竟場。在禮，家施不及國，故束脩之肉不行竟中。謂之「竟場」者，「竟」是疆界之名，至此易主，故謂之「疆場」。「不貳之」者，言臣當一稟君命，無自專之道也。范注「莒慶」之下，引《禮》「束脩之問不出竟」。董仲舒曰：「大夫無束脩之饋。」言雖有異，其意皆同也。

**公子益師卒。大夫日卒，正也。**君之卿佐，是謂股肱。股肱或虧，何痛如之？故錄其卒日以紀恩。不日卒，惡也。罪，故畧之。

【疏】「大夫」至「惡也」。○釋曰：五年「冬，十有二月，辛巳，公子彊卒」，僖十六年「三月，壬申，公子季友卒」，皆書日。今不書日，故云惡之。益師之惡，經傳無文，蓋《春秋》之前有其事也。麋信云：「益師不能防微杜漸，使桓弑隱。若益師能以正道輔隱，則君無推國之意，桓無篡弑之情。」所言亦無案據也。何休云：「《公羊》以爲日與不日，爲遠近異辭。若《穀梁》云益師惡而不日，則公子牙及季孫意如何以書日乎？」鄭君釋之曰：「公子牙，莊公弟，不書弟，則惡明也，故不假去日。季孫意如，則定公所不惡，故亦書日。」是鄭意亦以爲惡，故不日也。

二年，春，公會戎于潛。凡年首，月承於時，

時承於年，文體相接。《春秋》因書王以配之，所以見王者上奉時承天，而下統正萬國之義。然《春秋》記事有例時者，若事在時例，則時而不月；月繼事末，則月而不書王。書王必皆上承春，而下屬於月。文表年始，事莫之先，②所以致恭而不黷者，他皆放此。唯桓有月無王，以見不奉王法爾。南蠻、北狄、東夷、西戎，皆底羌之別種。潛，魯地。會，例時。○見王，賢徧反，下同。屬，章玉反。黷，徒木反。放，甫往反，後此例不音。底，丁兮反，本又作氏。種，章勇反。

【疏】注「凡年」至「例時」。○釋曰：《春秋》二百四十二年，無王一百有八。桓無王者，以見不奉王法。餘公無王者，爲無正月，不得言王。凡書首時者六十有二，若以正月首時者，亦得書王。何者？以時雖無事，年時月皆備，故亦書王，則莊「十有一年春」，③王正月，「十有九年，春，王正月」，皆月下無事而書王是也。若月承於時，時承於年，年下有事，書王配之者，則莊「三年，春，王正月，朔會齊師伐衛」，「八年，春，王正月，師次于郎」是也。雖非正月，但月承於時，時承於年，又事繫月下，即亦稱

①「鏃」，原作「鏃」，據《爾雅》郭注及孫校改。

②「文表」至「之先」，《穀梁補注》引作「表年始事文莫之先」。

③「一」，宋刻元修本作「二」。

王，則「三年，春，<sup>①</sup>王二月，己巳，<sup>②</sup>日有食之」，莊「六年，春，王二月，王人子突救衛」是也。注又云《春秋》記事有例時者，謂若朝會侵伐之類。知者，「十一年，春，滕侯、薛侯來朝」，傳曰：「諸侯來朝，時，正也。」莊十年「二月，公侵宋」，傳曰：「侵時，惡之，故謹而月之。」二十三年「春，公至自齊」，傳曰：「往時，正也。」故此年「春，公會戎于潛」，五年「春，公觀魚于棠」，皆不書月是也。其有書月之類，皆有故始書耳。注又云「月繼事末，則月而不書王」者，謂年首已有事，下雖有月，亦不得書王。若「八年春，宋公、衛侯遇于垂」，下文「三月，鄭伯使宛來歸郕」是也。「致恭而不黷者」也，謂恭敬於王，不敢黷慢者也。「會例時者，四年「夏，公及宋公遇於清」，九年「冬，公會齊侯于防」是也。若然，十年「春，王二月，公會齊侯、鄭伯于中丘」，十一年「夏，五月，公會鄭伯于時來」而書月者，范云：「天告雷雨之異，<sup>④</sup>而不知戒懼，反更數會，故危之。」是有故始書月，明無故例時也。

會者，外爲主焉爾。知者慮，察安審危。

○知音智。義者行，臨者能斷。○斷，丁亂反。仁者守，衆之所歸，守必堅固。○守如字。有此三者，然後可以出會。會戎，危公也。無此三者，不可以會，而況會戎乎！

【疏】注「無此」至「戎乎」。○釋曰：傳云「知者

慮」，謂卿爲司徒，主教民，察民之安危也。「義者行」，謂卿爲司馬，司馬主斷制也。<sup>⑤</sup>「仁者守」，謂卿爲司空，司空主守也。人君之行，二卿從，一卿守，然後可會中國之君。桓無三臣之策而出會齊侯，<sup>⑥</sup>身死於外，故重起例，明其不可。<sup>⑦</sup>是以此注云：「無此三臣，不可以會，而況會戎乎！」兼爲桓公生此意也。此既危公而不月者，徐邈云：「會戎雖危，有三臣之助，不至于難，故不月也。」理或然焉。

夏，五月，莒人入向。人例時，惡甚則日，次惡則月，他皆放此。○莒音舉，向，舒亮反。惡，烏各反，並同。

①「春」，原無，阮校：「毛本『王』上增『春』字。」今據補。

②「己」，原作「乙」，阮校：「浦鏜云『己』誤『乙』。」今據改。

③「二十三年春」，阮校：「案『春』字乃承上文經而誤衍也，否則『夏』字之訛。」

④「告」，原作「言」，阮校：「閩、監、毛本『言』作『告』，是也。」今據改。

⑤「制」，宋刻元修本作「割」。

⑥「桓」，原作「相」，據宋刻元修本改。

⑦「明」，原作「時」，阮校：「閩、監、毛本『時』作『明』，是也。」今據改。

【疏】注「人例」至「放此」。○釋曰：「人例時」者，以侵伐既時，則入亦時也。故五年「秋，衛師入鄆」，十年「秋，宋人、衛人入鄆」，皆不月是也。「惡甚則日」者，八年「庚寅，我入鄆」，傳曰：「日人，惡入者也。」十年「冬，十月，壬午，齊人、鄭人入鄆」，傳曰：「日人，惡入者也。」經書日，傳特發云「惡入」也，則書日是大惡之例。書日既為大惡，則書月者次惡，書時有小惡。知書時亦惡者，傳云「入者內弗受也」，則稱入者亦是惡也。「內不受」，此已發例，下「入極」復言之者，「向」者佗人我，「極」者我入佗，恐內外不同，故兩發以同之。或以為書時者無惡，但事自惡耳。

入者，內弗受也。人無小大，苟不以罪，則義皆不可受。向，我邑也。自魯而言，故曰我也。

無佻帥師入極。二千五百人為師。○佻音該，又戶楷反，《左氏》作駭。入者，內弗受也。極，國也。諱滅同姓，故變滅言入。傳例曰：「滅國有三術，中國日，卑國月，夷狄時。」極，蓋卑國也。內謂所入之國，非獨魯也。

【疏】注「滅國有三術」至「非獨魯也」。○釋曰：宣十五年、襄六年傳文也。

苟焉以人人為志者，人亦人之矣。不稱氏者，滅同姓，貶也。

【疏】「滅同姓貶也」。○釋曰：《左氏》無駭八年乃賜族，則為無族可稱。此傳云「不稱氏者，滅同姓，貶也」，則以無佻舊有氏。《公羊》：「無駭者何？展無駭也。何以不氏？貶。曷為貶？疾始滅也。」然則此傳貶意雖與《公羊》異，或當先號展氏也。

秋，八月，庚辰，公及戎盟于唐。傳例曰：「及者，內為志焉爾。」唐，魯地。

九月，紀履緌來逆女。不親逆則例月，重錄之。親迎則例時。○履緌音須，《左氏》作裂繻，下注同。

【疏】注「不親」至「例時」。○釋曰：莊二十四年「夏，公如齊逆女」，書時。此則書月，故云不親逆例月，親逆例時也。

逆女，親者也。親者謂自逆之也。使大夫，

非正也。以國氏者，為其來交接於我，故君

子進之也。傳例曰：「當國以國氏，卑者以國氏，進

大夫以國氏。」國氏雖同，而義各有當。公子公孫，篡君代位，故去其氏族國氏，以表其無禮，齊無知之徒是也。若

庶姓微臣，雖為大夫，不得爵命，無代位之嫌，既不書其氏族，當知某國之臣，故國氏以別之，宋萬之倫是也。履緌以名繫國，著其奉國重命，來為君逆，得接公行禮，故以國氏重之。成九年，宋不書逆女，以其逆者微。今書履緌，亦足知其非卑者。《公羊傳》曰：「《春秋》貴賤不嫌同

號，美惡不嫌同辭。《左氏》舍族之例，或厭以尊君，或貶以著罪。此傳隱公去即位以明讓，莊公去即位以表繼弑，文同而義異者甚衆，故不可以一方求之。○爲其于僞反，注「來爲」同。有當，丁浪反。故去，起呂反，下同。以別，彼列反。美惡，烏路反，又如字。舍族音捨。或厭，於葉反。

【疏】注「傳例」至「求之」。○釋曰：齊無知、衛祝吁弑君取國，以國氏，齊公子商人、楚公子比亦弑君取國，不以國氏者，商人不欲以嫌代嫌，楚公子比不是弑君之主，故皆稱公子，不以國氏也。此云「履綸」，知非卑者，傳云「逆之道微」，指言不親逆，畧之不稱使，非謂履綸卑也。注廣引《公羊》、《左氏》者，以證國氏不同之意，并明褒貶殊致也。「貴賤不嫌同號，美惡不嫌同辭」，隱七年《公羊傳》文也。滕是小國，爵稱侯，齊是大國，亦止稱侯，是貴賤不嫌同號。文公繼嗣君而稱即位，桓公繼弑君亦言即位，是美惡不嫌同辭。「或厭以尊君」，成十四年「僑如以夫人婦姜氏至自齊」，宣元年「遂以夫人婦姜至自齊」是也。「或貶以著罪」，若四年「鞏帥師會宋公」云云伐鄭，襄二十七年「豹及諸侯之大夫盟於宋」是也。「不可以一方求之」者，言國氏雖同，本意各異，故不可以一方求之，是以廣引文同義異以爲證也。

冬，十月，伯姬歸于紀。伯姬，魯女。禮：

婦人謂嫁曰歸，反曰來歸，嫁而曰歸，明外屬也。

反曰來歸，明從外至。反謂爲夫家所遣。

【疏】「禮婦」至「來歸」。○釋曰：「婦人謂嫁曰歸」，此伯姬歸于紀是也。「反曰來歸」，宣十六年「鄭伯姬來歸」是也。

從人者也。婦人在家制於父，既嫁制於夫，夫死從長子。婦人不專行，必有從也。伯姬歸于紀，此其如專行之辭，何也？曰：非專行也，吾伯姬歸于紀，故志之也。其不言使，何也？怪不言使履綸來逆女。○長，丁丈反。

【疏】「專行之辭」。○釋曰：麋信云：「不稱使者，似若專行也，謂決魯夫人至并稱逆者，此直云「伯姬歸」，故問之。下云「吾伯姬歸，故志之也」，明佗逆者不足錄，故與內夫人至異也。」

逆之道微，無足道焉爾。言君不親迎，而大夫來逆，故曰微也。既失其大，不復稍明其細，故不言使履綸也。○迎，魚敬反。復，扶又反。

【疏】「逆之道微」。○釋曰：成八年「宋公使公孫壽來納幣」，注云：「婚禮不稱主人，宋公無主婚者，自命之，故稱使。」此紀侯有母，母使履綸，文不稱使，正是常事，而云「逆之道微」，故去使者。納幣禮合使卿，宋公身

自命之，故云使。逆女非親不得，故云「逆之道微」，而去「使」文也。以逆女與納幣異，故彼此不同耳。

**紀子伯莒子盟于密。**密，莒地。○子伯如

字，長也，《左氏》作子帛。或曰，紀子伯莒子而與

之盟。紀子以莒子爲伯，而與之盟。伯，長也。或曰，

年同爵同，故紀子以伯先也。年爵雖同，紀子自以爲伯而先。

【疏】「或曰」至「先也」。○釋曰：上文「伯莒子」

者，謂紀子推先莒子爲伯而與之盟。下文「以伯先」者，謂紀子自以爲伯而居先。再言「或曰」者，失其真故也。

十有二月，乙卯，夫人子氏薨。夫人薨，例

日。夫人曰薨，從夫稱。○稱，尺證反。

【疏】「夫人子氏薨」。○釋曰：《左氏》以子氏爲

桓公之母；《公羊》以爲隱公之母；《穀梁》知是隱公之

妻者，以隱推讓，據其爲君而亦稱公，故其妻亦稱夫人也。

夫既不葬，故其妻亦不葬，以經文上下符合，故爲隱妻。

而《左氏》桓未爲君，其母稱夫人，是亂嫡庶也。《公羊》以

爲隱母，則隱見爲君，何以不書葬？若以讓不書葬，何爲

書夫人子氏薨？故穀梁子以爲隱妻也。

夫人薨，不地。夫人無出竟之事，薨有常處。

○處，昌慮反。夫人者，隱之妻也。卒而不書

葬，夫人之義，從君者也。隱弑，賊未討，故不書葬。

**鄭人伐衛。**傳例曰：「斬樹木、壞宮室曰伐。」

伐例時。○壞音怪，又戶怪反。

【疏】「傳例」至「例時」。○釋曰：「傳例曰」者，

五年傳文也。伐既例時，此「伐衛」文承月下者，日月自爲魯夫人薨，故上注云「夫人薨，例日」是也。

三年，春，王二月，己巳，日有食之。杜

預曰：「日行遲，一歲一周天。月行疾，一月一周天。一

歲凡十二交會。然日月動物，雖行度有大量，不能不小有

盈縮，故有雖交會而不食者，或有頻交而食者。唯正陽之

月，君子忌之，故有伐鼓用幣之事。」京房《易傳》曰：「日

者陽之精，人君之象。驕溢專明，爲陰所侵，則有日有食

之災。不救，必有篡臣之萌。其救也，君懷謙虛下賢，受

諫任德，日食之災爲消也。」○日有食之，本亦作蝕，音同，

後皆倣此。量音亮。下，退嫁反。爲消，于僞反。

【疏】「二月」至「食之」。○釋曰：此經不書朔。

傳云「食晦日也」，則此食必當晦日，但不知是何月晦也。

徐邈云：「己巳爲二月晦，則三月不得有庚戌也。明宣

①「未」，宋刻元修本作「不」。



十年四月丙辰、<sup>①</sup>十七年六月癸卯，皆是前月之晦也。則此己巳正月晦，冠以「二月」者，蓋交會之正，必主於朔，今雖未朔而食，著之此月，所以正其本，亦猶成十七年十月壬申而繫之十一月也。取前月之日，而冠以後月，故不得稱晦。以其不得稱晦，知非二月晦也。」未審范意如何。《穀梁》之例，書日食凡有四種之別，故此二月，己巳，日有食之，傳云：「言日不言朔，食晦日也。」桓十七年「冬，十月，朔，日有食之」，傳云：「言朔不言日，食既朔也。」彼是二日食矣。又莊十八年「三月，日有食之」，傳云：「不言日，不言朔，夜食也。」又桓三年「七月，壬辰，朔，日有食之，既」，傳云：「言日言朔，食正朔也。」是有四種之別。《公羊》以爲此二月己巳不言朔者，是二日食也，《左氏》以爲不言朔者，史失之，並非《穀梁》意耳。○注「杜預」至「消也」。○釋曰：依歷家之說，日一日一夜行天一度，月一日一夜行天十三度十九分度之七。天有三百六十五度四分度之一，故日行一歲一周天，計月逐及日之時，不啻周天，但舉其大率耳。日月相及而爲交會，謂之一月。計一年之中有十二交會，則應每月常食，而有有食之時，故解之。但日月動物，其行也或盈或縮，故雖交會而有有食之時，或亦有頻交而食也。雖交會而不食者，謂《春秋》二百四十二年，唯三十七日食是也。「頻交而食」者，則襄二十一年九月、十月食，二十四年七月、八月食是也。京房，漢人，字君明，頓丘人也。本姓李，推律自定爲京氏，爲《易》作傳，故曰京房《易傳》也。

言日不言朔，食晦日也。其日有食之何也？吐者外壤，食者內壤，凡所吐出者，其壤在外，其所吞咽者，壤入於內。○壤，而丈反。吞，勅恩反，又音天。咽，於見反。闕然不見其壤，有食之者也。今日闕損，而不知壤之所在，此必有物食之。○見如字，又賢徧反。有，內辭也；或，外辭也。邵曰：「食者內壤，故曰內辭。吐者外壤，故曰外辭。傳無外辭之文者，蓋時無外壤也。而曰「或外辭」者，因事以明義例爾。猶傳云「三穀不升謂之饑」，<sup>②</sup>四穀不升謂之康，亦無其事。」○饑，渠各反。有食之者，內於日也。內於日，以壤不見於外。○見，賢徧反，又如字。其不言食之者，何也？知其不可知，知也。○「不可知，知也」，上知如字，下知音智。

【疏】「其日」至「知也」。○釋曰：傳問經意，其稱「日有食之」，何也？傳又申說之。「吐者外壤」，謂凡

①「則三月」至「也明」，《穀梁補注》引作「則三月不得有庚戌明也」。

②「三」，原作「二」，據襄二十四年傳文及楊疏、阮校，此「二」當爲「三」之訛。今據改。



所吐出，其壤在外也。「食者內壤」，謂凡吞食者，壤入於內也。「闕然不見其壤，有食之者也」者，謂日既闕損，不知壤之所在，必有物食之。「有，內辭也」，或，外辭也」者，謂日食有兩種之辭，據書內壤，故言有內辭，不書外壤，故曰或外辭也。「有食之者，內於日也」者，謂日食既有二辭，今直云「有食之者」，為日之所壤，在於內也。「其不言食之者，何也」者，謂經不書月食日也。「知其不可知，知也」者，謂聖人慎疑，作不知之辭者知也。壤字，為《穀梁》音者皆為傷，徐邈亦作傷。<sup>①</sup>麋信云：「齊魯之間謂鑿地出土、鼠作穴出土皆曰壤。」或當字從壤，蓋如麋信之言也。○注「三穀」至「其事」。○釋曰：襄二十四年傳文也。彼云：「一穀不升謂之暵，二穀不升謂之饑，三穀不升謂之饑，四穀不升謂之康，五穀不升謂之大侵。」

三月，庚戌，天王崩。平王也。高曰崩，梁

山崩。<sup>②</sup>厚曰崩，沙鹿崩。尊曰崩。天子之崩，

以尊也。其崩之，何也？以其在民上，故

崩之。其不名，何也？大上，故不名也。夫

名者所以相別爾，居人之大，在民之上，故無所名。○大，並如字。夫音符，發句之端，皆同。別，彼列反。

夏，四月，辛卯，尹氏卒。文三年「王子虎

卒」，不日。此日者，錄其恩深也。○尹，如字，周大夫也，

《左氏》作君氏。

【疏】注「文三」至「深也」。○釋曰：范云「恩深」者，王子虎即叔服也，會葬在文元年，三年王子虎始卒，其恩已殺，故直錄其卒而不書其日。尹氏三月詔魯人弔，四月卒，故痛而日之，是恩深於叔服也。

尹氏者，何也？天子之大夫也。外大夫不卒，此何以卒之也？於天子之崩為魯主，故隱而卒之。隱猶痛也。《周禮·大行人》職曰：「若有大喪，則詔相諸侯之禮。」然則尹氏時在職而詔魯人之弔者。不書官名，疑其譏世卿。○相，息亮反。

【疏】注「隱猶」至「世卿」。○釋曰：「詔魯人之弔」者，叔孫得臣如京師，經書名氏，今不見其名，蓋微者也。「疑其譏世卿」者，《穀梁》無傳，唯據《公羊》，故云疑也。

秋，武氏子來求賻。王天使不正者月，<sup>③</sup>今無君，不稱使，故亦畧而書時。

①「傷」，夏校引段玉裁云：「『傷』當作『場』。下『日壤』，『從壤』並當作『場』。『場』俗作『場』。」

②「山」，宋刻元修本作「日」。

③「王天使不正者月」，宋刻元修本作「天王使不正者月」。阮校云：「閩、監、毛本『者』作『稱』。」

【疏】注「天王」至「書時」。○釋曰：桓十五年二月，天王使家父來求車，是不正也。文九年，「春，毛伯來求金」，與此武氏子並不月者，皆爲無君不稱使，畧而稱時也。正而時者，則凡伯南季是也。祭伯來，私出竟，故書月以表不正。祭叔來聘，亦不請於王，不正可知，故不復月。等不請王命，祭伯襄內諸侯，故不言朝；祭叔大夫，故不言使而言聘也。

武氏子者，何也？天子之大夫也。天子之大夫，其稱武氏子，何也？未畢喪，孤未爵，平王之喪在殯。未爵使之，非正也。其不言使，何也？據桓十五年「天王使家父來求車」稱使。無君也。桓王在喪未即位，故曰無君。歸死者曰賻，歸生者曰賵。曰歸之者，正也；求之者，非正也。喪事無求，而有賵賻。周雖不求，魯不可以不歸。魯雖不歸，周不可以求之。求之爲言得不得未可知之辭也。交譏之。

【疏】「未可」至「譏之」。○釋曰：王者有求，得在不疑，而云「未可知」者，以王者求之非道，容有辭說，故云「未可知」也。「交譏之」者，交猶俱也，指事而書，則周、魯之非俱見也。

八月，庚辰，宋公和卒。天子曰崩，諸侯曰薨，

大夫曰卒，周之制也。《春秋》所稱，曲存魯史之義，內稱公而書薨，所以自尊其君，則不得不畧外諸侯書卒以自異也。至於既葬，雖邾、許子男之君，皆稱謚而言公，各順臣子之辭，兩通其義。鄭君曰：「《禮·雜記上》曰：『君薨，赴於他國之君，曰：寡君不祿，敢告於執事。』《曲禮下》曰：『壽考曰卒，短折曰不祿。』君薨，赴而云「不祿」者，臣子之於君父，雖有壽考，猶若短折，痛傷之至也。若赴稱「卒」，是以壽終，無哀惜之心，非臣子之辭。鄰國來赴，書以「卒」者，無老無幼，皆以成人之稱，亦所以相尊敬。」○謚，市至反，後皆同。短，于緩反。折，時設反，下同。有壽，市又反，又如字。

【疏】注「天子」至「尊敬」。○釋曰：《曲禮》與《公羊傳》文也。何休稱死而異名者，別尊卑也。葬不別者，從恩殺畧也。

諸侯曰卒正也。正謂承嫡。

【疏】「諸侯曰卒正也」。○釋曰：據正始，故發傳也。○注「正謂承嫡」。○釋曰：僖十七年「冬，十有二月，乙亥，齊侯小白卒」，彼非正而書日者，以莊九年「齊小白入于齊」，國氏及入，則不正之事已見，故於卒不復見之，而依常書日耳。注「外盟不日」者，八年傳文也。

冬，十有二月，齊侯、鄭伯盟于石門。傳

例曰：「外盟不日。」石門，齊地。

### 癸未，葬宋繆公。日葬，故也，危不得

葬也。天子七月而葬，諸侯五月而葬，大夫三月而葬。

傳例曰：「諸侯時葬，正也。月葬，故也。日者，憂危最甚，不得備禮葬也。」他皆放此。徐邈曰：「文元年傳曰『葬曰會』，言有天子諸侯之使，共赴會葬事。故凡書葬，皆據我而言葬彼。所以不稱宋葬繆公，而言『葬宋繆公』者，弔會之事，贈綏之命，此常事，無所書，故但記卒記葬，錄魯恩義之所及，則哀其喪而恤其終，亦可知矣。若存沒隔絕，情禮不交，則卒葬無文。或有書卒不書葬，蓋外雖赴卒，而內不會葬，無其事則闕其文，史策之常也。《穀梁傳》稱『變之不葬有三，弑君不葬，<sup>①</sup>國滅不葬，失德不葬』，言夫子脩《春秋》，所改舊史以示義者也。弑君之賊，天下所當同誅，而諸侯不能治，臣子不能討，雖葬事是供，義何足算？亡國之君，喪事不成，則不應書葬。失德之主，無以守位，故沒葬文。傳於宋襄公著失民之咎，宋共公發非葬之問，言伯姬賢而不答，共公不能弘家人之禮，然則為君者外之不足以全國，內之不足以正家，皆所謂失德而終禮，宜貶者也。于時諸國多失道，不可悉去其葬，故於二君示義，而大體明矣。」○繆音穆，本亦作穆。之使，所吏反，下同。策，本又作策，初革反。算，素緩反，數也。宋共公音恭，本又作恭。去，起呂反。

【疏】注「天子」至「明矣」。○釋曰：「天子七月

而葬」云云，隱元年《左傳》文。「諸侯時葬，正也」，襄七年傳文。「月葬，故也」，隱五年傳文。「日者憂危最甚」，此傳云「日葬，故也，危不得葬也」是也。「變之不葬有三」云云，昭十三年傳文。「弑君不葬」者，若十一年「公薨」，不書葬是也。「國滅不葬」者，若紀侯大去其國，雖賢，終不書葬是也。其陳哀、蔡靈書葬者，閔二國，不與楚滅之也。「失德不葬」者，僖二十三年宋公茲父卒，成十五年宋公固卒是也。「外之不足以全國」者，謂宋襄也。「內之不足以正家」者，謂宋共也。

①「弑君」，阮校：「《釋文》出『殺君』，是陸所據本與此不同。」

## 監本附音春秋穀梁注疏隱公卷第二

起四年，盡十一年

范甯集解 楊士勳疏

四年，春，王二月，莒人伐杞，取牟婁。傳

例曰：「取，易辭也。」伐國不言圍邑，言圍邑，皆有所見。伐國及取邑例時，此月者，蓋爲下戊申衛君完卒日起也。凡例宜時而書月者，皆緣下事當日故也。日必繼於月，故不得不書月。事實在先，故不得後錄也。他皆放此。○杞音起。牟，亡侯反。易，以鼓反。見，賢徧反。蓋爲，于僞反。

【疏】注「傳例」至「放此」。○釋曰：「取，易辭

也」，十年傳文。「伐國不言圍邑」，五年傳文。「伐國及取邑例時」者，案六年「冬，宋人取長葛」，僖二十六年「冬，公以楚師伐齊，取穀」，宣九年「秋，取根牟」，皆不月，是例時也。其取須句，以其再取，故曰：「取鄆、取鄆」，皆內之叛邑，爲害重大，故月；取郕、取防，惡乘人之敗，故曰：「明常例則時。」

傳曰，言伐言取，所惡也。稱「傳曰」者，穀梁子不親受于師，而聞之於傳者。既伐其國，又取其土，明伐不以罪，而貪其利。兩書取伐，以彰其惡。○所惡，烏

路反，又如字。於傳，直專反。諸侯相伐取地於是始，故謹而志之也。《春秋》之始。

【疏】「諸侯」至「志之也」。○釋曰：外取邑不志，今志之者，爲人《春秋》以來，最是取地之始，故志之也。

戊申，衛祝吁弑其君完。弑君日與不日，從其君正與不正之例也。祝吁，衛公子。○祝吁，香于反。

《左氏》、《公羊》及《詩》作州吁。完音丸。大夫弑其君，以國氏者，嫌也，弑而代之也。凡非正嫡，則謂之嫌。

夏，公及宋公遇于清。遇，例時。清，衛地。

【疏】注「遇例時」。○釋曰：「八年春，宋公、衛侯遇于垂」與此皆不月，知例時也。

及者，內爲志焉爾。元年，與宋人盟于宿，故今復尋之。○復音扶又反。

【疏】「及者」至「焉爾」。○釋曰：重發傳者，嫌盟遇禮異，故重發以同之。

遇者，志相得也。八年傳曰：「不期而會

①「鄆」，宋刻元修本作「鄆」。

遇。」<sup>①</sup>今日「內爲志」，非不期也。然則遇有二義。

【疏】注「遇有二義」。○釋曰：即八年與此雖同「志相得」，而期不期異，故云「有二義」。傳「祝吁之挈」者，徐邈以挈爲舉，即是提挈之稱。范云：「不書氏族，提挈其名而道之。」則挈爲單挈，不具足之辭。

宋公、陳侯、蔡人、衛人伐鄭。

秋，鞏帥師會宋公、陳侯、蔡人、衛人伐鄭。鞏者何也？公子鞏也。其不稱公子，

何也？據莊二年「公子慶父帥師伐於餘丘」，<sup>②</sup>稱公子。

○鞏音暉，下同。貶之也。杜預曰：「外大夫貶皆稱人，內大夫貶皆去族稱名。記事之體，他國可言某人，而已之卿佐，不得言魯人。」○去，起呂反。何爲貶之也？與于弑公，故貶也。○與音預。

九月，衛人殺祝吁于濮。濮，陳地水名。

○濮音卜。稱人以殺，殺有罪也。有弑君之罪者，則舉國之人皆欲殺之。祝吁之挈，失嫌也。不書氏族，提挈其名而道之也。衆所同疾，威力不足以自固，失當國之嫌。○挈，本又作繫，苦結反，注同。

其月，謹之也。討賊例時也。衛人不能即討祝吁，致令出入自恣，故謹其時月所在，以著臣子之緩慢也。

○令，力呈反，下同。

【疏】注「討賊」至「慢也」。○釋曰：莊九年「春，齊人殺無知」，直時不月。又此傳云：「其月，謹之。」知其例合書時，但祝吁以二月弑君，衛人九月始討，譏其緩慢，故謹而月之。于濮者，譏失賊也。譏其不即討，乃令至濮。

冬，十有二月，衛人立晉。立，納，人皆篡也。大國篡例月，小國時。

【疏】注「立納」至「國時」。○釋曰：案莊九年「齊小白入于齊」，傳曰：「以惡曰入。」文十四年「晉人納捷菑」，傳曰：「不正也。」此云立者，不宜立者也。是三者皆爲篡也。「大國篡例月」者，即此「冬，十有二月，衛人立晉」是也。「小國時」者，昭元年「秋，莒去疾自齊入于莒」是也。齊小白入于齊，齊是大國而不月者，與公伐齊同時，既例不月，故小白亦不月。王子猛不月者，王猛雖則非正，事異諸侯，故不書月也。

衛人者，衆辭也。立者，不宜立者也。嗣子有常位，故不言立。晉之名，惡也，惡，謂不正。○惡也，烏各反。其稱人以立之，何也？

① 「不期而會遇」，隱公八年傳文作「不期而會曰遇」。  
② 「二」，原作「三」，據宋刻元修本改。

得衆也。得衆，則是賢也。賢則其曰不宜立何也？《春秋》之義，諸侯與正而不與賢也。雍曰：「正謂嫡長也。夫多賢不可以多君，無賢不可以無君。立君非以尚賢，所以明有統也。建儲非以私親，所以定名分。名分定，則賢無亂長之階，而自賢之禍塞矣。」君無嬖幸之由，而私愛之道滅矣。」○嫡，丁歷反。長，丁丈反，下同。儲，直魚反。分，扶問反。嬖，必計反。

【疏】「春秋之義」。○釋曰：言《春秋》者，得衆而言立，恐理不相合，故廣稱《春秋》以包之。

五年，春，公觀魚于棠。傳例曰：「公往時，正也。」正謂無危事耳。棠，魯地。○觀魚，如字，《左氏》作矢魚。

【疏】注「傳例」至「魯地」。○釋曰：莊二十三年傳文也。正謂無危事，此公雖以非禮觀魚，不至於危，故亦時而不月。

傳曰，常事曰視，視朔之類是。非常曰觀，觀魚之類是。禮：尊不親小事，卑不尸大功。尸，主。魚，卑者之事也。《周禮》：「敝人中士，下士。」○敝音魚。公觀之，非正也。

夏，四月，葬衛桓公。月葬，故也。有祝

吁之難，故十五日乃葬。○難，乃旦反。

【疏】「月葬，故也」。○釋曰：重發傳者，前起日例，今起月例，故重發之。

秋，衛師入郕。人者，內弗受也。郕，國也。將卑師衆曰師。書其重者也。將卑謂非卿。○郕音成。將卑，子匠反，注同。

九月，考仲子之宮。失禮宗廟，功重者月，功輕者時。莊二十三年「秋，丹桓宮楹」是也。

【疏】傳「人者」至「受也」。○釋曰：重發傳者，前起者邑，今是國，故重發之。○「九月」至「之宮」。○釋曰：考者謂立其廟祭之，成爲夫人也。此所以書之者，仲子，孝公之妾，惠公之母。惠公雖爲君，其母唯當惠公之世得祭，至隱不合祭之，故書以見譏也。不言立者，不宜立。爲庶母築宮，得禮之變，但不合於隱之世祭之，故止譏其考，不譏立也。《公羊》、《左氏》妾子爲君，其母得同夫人之禮。今《穀梁》知不然者，《喪服》記云：「公子爲其母，練冠，麻，麻衣緣緣。既葬，除之。」傳曰：「何以不在五服之中也？君

①「塞」，原作「寒」，據《穀梁補注》改。

之所不服，子亦不敢服也。」鄭玄云：「公子，<sup>①</sup>君之庶子。」是貴賤之序，嫡庶全別。安得庶子爲君，即同嫡夫人乎？故穀梁子以爲「於子祭，於孫止」。

考者何也？考者成之也，成之爲夫人

也。立其廟，世祭之，成夫人之禮。禮：庶子爲

君，爲其母築宮，使公子主其祭也。公當奉宗

廟，故不得自主也。<sup>②</sup>公子者，長子之弟及妾之子。

○爲，于僞反。長，丁丈反。於子祭，於孫止。貴賤

之序。仲子者，惠公之母，隱孫而脩之，非隱

也。非，責也。三年父喪畢，不於三年考者，又有天王

崩。至此服竟，乃脩之。

初獻六羽。羽，翟羽，舞者所執。獻者，下奉上

之辭，作之於廟，故言獻。

【疏】「初獻六羽」。○釋曰：凡言初者，有二種

之意。若尸子所言者，則是復正之初也。若初稅畝，是議事之初。范知羽是翟羽者，以《衛詩·簡兮》云「左手執籥，右手秉翟」，故知羽即翟也。范又云：「作之於廟，故言獻。」齊侯來獻戎捷，非於廟，亦言獻者，此是獻薦宗廟之事，故范據廟言之。其實外來者，尊魯並稱獻也。若然，「齊人來歸衛寶」，不言獻者，彼實非齊獻，諱其逆天子之命，假齊爲辭，故與常文異也。或以爲「戎捷」，齊侯尊

魯，故特言獻。「衛寶」，以平等相遺，故言歸，理亦通也。

初，始也。遂以爲常。穀梁子曰：「舞

《夏》，天子八佾，諸公六佾，諸侯四佾。」言穀

梁子者，非受於師，自其意也。夏，大也。大謂大雉。大

雉，翟雉。佾之言列，八人爲列，又有八列，八八六十四人

也。並執翟雉之羽而舞也。天子用八，象八風。諸公用

六，降殺以兩也。不言六佾者，言佾則干在其中，<sup>③</sup>明婦人

無武事，獨奏文樂。○舞《夏》，戶雅反，注及下同。佾音

逸，列也。殺，色界反。

【疏】注「獨奏文樂」。○釋曰：禮有文舞，有武

舞，文舞者羽籥是也，武舞者干戚是也。凡舞所以象人之

德，故襄二十九年《左傳》稱吳季札觀樂，「見舞《韶箒》者，

曰：「德至矣哉！大矣，如天之無不幬也，如地之無不

載也。雖甚盛德，其蔑以加於此矣。」是其證也。今仲子

特爲築宮而祭之，婦人既無武事，不應得用干戚，故云「獨

①「公子」，原作「子」，據宋刻元修本及《儀禮·喪服》鄭

注改。

②「自」，原作「日」，據宋刻元修本改。

③「干」，阮校：「閩、監、毛本『干』作『羽』。」補校：「此

「干」字作「羽」，則上「不言六佾者」，「佾」字亦當作

「羽」。

奏文樂」。何休、徐邈之等並同范說，則是相傳爲然。

初獻六羽，始僭樂矣。下犯上謂之僭。

○僭，子念反。尸子曰：「舞《夏》，自天子至

諸侯皆用八佾。初獻六羽，始厲樂矣。」言時諸侯僭侈，皆用八佾，魯於是能自減厲，而始用六。穀梁子言其始僭，尸子言其始降。○侈，昌是反，又尸是反。

邾人、鄭人伐宋。邾主兵，故序鄭上。

螟。蟲災也。甚則月，不甚則時。甚則

即盡，不及歷月。《禮·月令》曰：「仲春行夏令，則蟲螟爲害。」○螟，亡丁反。

冬，十有二月，辛巳，公子彊卒。杜預曰：

「大夫書卒，不書葬。葬者，自其臣子事，非公家所及。」

○彊，苦侯反。隱不爵命大夫，其曰公子彊，何也？據八年無佻卒，不稱公子。先君之大夫也。隱不成爲君，故不爵命大夫，公子不爲大夫，則不言公子也。

【疏】「先君」至「夫也」。○釋曰：公子益師亦是

先君之大夫，而獨言公子彊者，益師有罪而不日，故傳畧之。彊無罪而文詳，故因見爵命之例，其實益師亦先君之大夫也。

宋人伐鄭，圍長葛。長葛，鄭邑。圍例時。

【疏】注「圍例時」。○釋曰：僖二十三年「春，齊

侯伐宋，圍閔」，宣十二年「春，楚子圍鄭」是也。但此爲久圍，故謹而月之耳。或解上文日月者，爲公子彊卒。此雖例時，不可去上文日月，其實日月不爲圍長葛也。

伐國不言圍邑，據莊二年「公子慶父帥師伐於餘丘」，不言圍也。伐國不言圍邑，書其重也。此其言

圍，何也？久之也。宋以此冬圍之，至六年冬乃取

之。古者師出不踰時，重民之命，愛民之財，乃暴師經年，僅而後克，無仁隱之心，而有貪利之行，故圍伐兼舉以明之。○暴，步卜反，本或作曝，暴露也。僅，渠吝反。行，下孟反。

【疏】「伐國」至「之也」。○釋曰：伐國不言圍邑

者，舉重也。其言圍者，各有所爲。此則五年圍，六年乃取，爲久之，故書圍也。僖六年，齊侯以下「伐鄭，圍新城」，傳云：「著鄭伯之罪也。」二十三年「春，齊侯伐宋，圍閔」，傳曰：「不正其以惡報惡也。」是書圍者，各有所爲。襄十二年「莒人伐我東鄙，圍郕」，書圍者，爲季孫宿救郕張本也。襄十六年「齊侯伐我北鄙，圍成」，十七年「齊侯伐我北鄙，圍桃。齊高厚帥師伐我北鄙，圍防」，並書圍者，爲十八年諸侯同圍之起也。①

①「起」，阮校：「閔、監、毛本作「地」，是也。」



伐不踰時，戰不逐奔，誅不填服。<sup>①</sup>來服

者，不復填厭之。○填音田。復，扶又反，下同。厭，於甲

反。苞人民、毆牛馬曰侵。斬樹木、壞宮室

曰伐。制其人民，毆其牛馬，賊去之後，則可還反。樹木

斬不復生，宮室壞不自成，故其爲害重也。<sup>②</sup>○毆，丘于

反，注同。壞音怪，一戶怪反，六年同。

【疏】「苞人」至「曰伐」。○釋曰：案《左傳》：

「有鍾鼓曰伐，無曰侵。」《公羊傳》：「桷者曰侵，精者曰

伐。」又何休《廢疾》云：「廢焚，孔子曰：『傷人乎？』不

問馬。今《穀梁》以「苞人民」爲輕，「斬樹木、壞宮室」爲

重，是理道之不通也。」所以《穀梁》不從二傳者，鄭玄云：

「苞人民，毆牛馬，兵去則可以歸還，其爲害輕。<sup>③</sup>壞宮室，

斬樹木，則樹木斷不復生，宮室壞不自成，爲毒害更重

也。」是鄭意亦以斬樹木壞宮室爲重，是亦一家之義，故與

二傳不同。

六年，春，鄭人來輸平。杜預曰：「和而不

盟曰平。」○輸平，失朱反，<sup>④</sup>墮也，《左氏》作渝平。輸

者，墮也；平之爲言，以道成也。來輸平

者，不果成也。《春秋》前魯與鄭平，四年，鞏與宋伐

鄭，故來絕魯，壞前平也。○墮，許規反，壞毀之也。

夏，五月，辛酉，公會齊侯盟于艾。艾，魯

地。隱行皆不致者，明其當讓也。○艾，五蓋反。

【疏】注「艾魯」至「讓也」。○釋曰：知非惰者，

以隱讓國賢君，不應終始俱惰，明爲讓不致也。

秋，七月。無事書首月，不遺時也。他皆放此。

【疏】注「無事」至「放此」。○釋曰：九年傳云：

「無事焉，何以書？不遺時也。」然則《春秋》四時具，始得

成年，若闕一時，不書首月，則是遺時也。

冬，宋人取長葛。前年冬圍，至今乃得之。上

有伐鄭圍長葛，言長葛則鄭邑可知，故不繫之鄭。外取

邑不志，此其志，何也？久之也。

七年，春，王三月，叔姬歸于紀。叔姬，伯

姬之娣。至此歸者，待年於父母之國，六年乃歸。媵之爲

①「填」，孫校：「疑與『殄』通。」

②「苞人民」至「重也」，王引之《經義述聞》：「范說非

也。『苞』讀爲『俘』。俘，取也。《衆經音義》卷十三引

賈逵《國語》注曰：『伐國取人曰俘。』作『苞』者，假借

字也。」

③「害輕」，原無，阮校：「何校本下有『害輕』二字，是

也。」今據補。

④「失」，原作「夫」，據宋刻元修本及《釋文》改。

言送也，從也。不與嫡俱行，非禮也。親逆例時，不親逆例月。許慎曰：「侄娣年十五以上，能共事君子，可以往，二十而御。」《易》曰：「歸妹愆期，遲歸有時。」《詩》云，韓侯取妻，「諸娣從之，祁祁如雲」。娣必少於嫡，知未二十而往也。○娣，徒細反。女弟曰娣。媵，以證反，又繩證反。從，才用反，下同，一音如字。上，時掌反。共事音恭，本亦作供。愆，起虔反。取，七喻反。少，詩照反，下文及注同。

【疏】注「叔姬」至「往也」。○釋曰：「六年乃歸」者，伯姬二年嫁于紀，叔姬此年始去，故云六年也。所引《易》文，《歸妹》九四爻辭也。王弼云：「夫以不正無應而適人也。必須彼道窮盡，無所與交，然後乃可以往。故愆期遲歸，以待時也。」其卦䷵兌下震上。所引《詩》者，《大雅·韓奕》之篇。引此二文者，言夫人有侄娣，必當少於嫡，知未二十而往也。一解引《易》者，證待年于父母國，與嫡俱行也。

其不言逆，何也？據莊二十七年莒慶來逆叔姬，言逆。逆之道微，無足道焉爾。逆者非卿。

滕侯卒。滕侯無名。自無名，非貶之。○滕，徒登反。

【疏】「滕侯無名」。○釋曰：《左氏》以滕侯無名為未同盟，故薨不得以名赴。《公羊傳》云：「滕侯何以不名？微國也。微國則其稱侯何？」《春秋》貴賤不嫌同

號，美惡不嫌同辭。」今《穀梁》以為用狄道也，故無名者。若《左氏》以為未同盟，故不名。何為《春秋》之內，亦有不盟而書名者？若《公羊》以為微國不名，則邾子克，許男新臣何以名？故穀梁子以為用狄道也，本來無名字。

少曰世子，長曰君，狄道也。其不正者名也。戎狄之道，年少之時稱曰世子，長立之號曰君。其非正長嫡，然後有名爾。責滕侯用狄道也。○長曰，丁丈反，注同。嫡，本又作適，丁歷反。

夏，城中丘。城例時。中丘，魯地。城為保民為之也。建國立城邑有定所，高下大小存乎王制。刺公不脩勤德政，更造城以安民。○為，于偽反，下「為其同。刺，七賜反。

【疏】注「建國」至「安民」。○釋曰：《禮記·王制》無此文。言「存乎王制」者，謂王者之法制也。「高下」者，《考工記》云：「王宮門阿之制五雉，宮隅之制七雉，城隅之制九雉。門阿之制，以為都城之制；宮隅之制，以為諸侯之城制」是也。「大小」者，即《左傳》云「大都不過參國之一，中五之一，小九之一」是也。此「城中丘」與九年「夏，城郎」例時者，功役之事，總指天象故也。

民衆城小則益城，益城無極。凡城之

①「七」，原作「九」，據宋刻元修本改。

志，皆譏也。夫保民以德，不以城也。如民衆而城小，輒益城，是無限極也。此發凡例，施之於城內邑。

齊侯使其弟年來聘。聘例時。凡聘，皆使卿執玉帛以相存問。

【疏】注「聘例」至「存問」。○釋曰：此「齊侯使弟年」，下「冬，天王使凡伯」，皆不書月，故「例時」也。禮：小聘曰問，使大夫；大聘使卿。此既名見於經，明是卿也。案禮，聘則執玉以致命，執帛以致享，故云「執玉帛以相存問」。

諸侯之尊，弟兄不得以屬通。禮：非始封之君，則臣諸父。昆弟，匹敵之稱。人臣不可以敵君，故不得以屬通，所以遠別貴賤，尊君卑臣之義。○稱，尺證反。別，彼列反，下同。其弟云者，以其來接於我，舉其貴者也。弟是臣之親貴者，殊別於凡庶。

【疏】「舉其貴者也」。○釋曰：叔肸稱弟，傳云「賢也」；此年稱弟，傳云「舉其貴者」，則稱弟有二義也。

秋，公伐邾。

冬，天王使凡伯來聘，凡氏。伯，字。上大夫也。戎伐凡伯于楚丘以歸。凡伯者，何也？天子之大夫也。國而曰伐，此一人而

曰伐，何也？大天子之命也。伐一人而同一國，尊天子之命。戎者，衛也。戎衛者，爲其伐天子之使，貶而戎之也。楚丘，衛之邑也。

以歸，猶愈乎執也。大天子之使過諸侯，諸侯當候在疆場，膳宰致餼，司里授館，猶懼不敬，今乃執天子之使，無禮莫大焉。昭十二年「晉伐鮮虞」，傳曰：「晉，狄之也。」今不曰衛伐凡伯，乃變衛爲戎者，伐中國之罪輕，故稱國以狄晉，執天子之使罪重，故變衛以戎之。以一人當一國，諱執，言以歸，皆尊尊之正義，《春秋》之微旨。○之使，所吏反，注同。愈，羊主反。過，古卧反；上古禾反。②疆，本又作壇，亦作强，音姜。場音亦。餼，許氣反，牲腥曰餼。伐，鮮音仙。

【疏】「戎者衛也」。○釋曰：麋信云：「不言夷狄，獨言戎者，因衛有戎邑故也。」范意或然。○注「云天子」至「不敬」。③○釋曰：《國語》云，定王使單襄公聘于宋，遂假道于陳，以聘于楚。陳人候不在疆，膳宰不致餼，司里不授館。單子歸，以告王曰：「陳侯不有大咎，國必亡。」王曰：「何故？」對曰，云云，「是棄先王之法制

- ①「大」，阮校：「閩、監、毛本作『夫』，是也。」
- ②「上古禾反」，《釋文》作「又古禾反」，是。
- ③「云」，宋刻元修本作「夫」。

也。周之秩官有之，敵國賓至，司里授館，甸人積薪，膳宰致飧，廩人獻饌，賓人如歸。今臣承王命以過陳，司事莫至，是蔑先王之官也。」是文出於彼。

八年，春，宋公、衛侯遇于垂。垂，衛地。不期而會曰遇。遇者，志相得也。

三月，鄭伯使宛來歸郕。<sup>①</sup>凡有所歸例時。郕，鄭邑。○宛，於阮反。郕，彼病反，一音丙，《左氏》作枋。

【疏】注「凡有所歸例時」。○釋曰：宣十年春「齊人歸我濟西田」，定十年夏「齊人來歸鄆、讙、龜陰之田」，並不書月，故知「例時」也。此月者，爲下入郕月也。一解以擅易天子之田，故謹而月之也。

名宛，所以貶鄭伯，惡與地也。去其族，惡擅易天子邑。○惡與，烏路反，注及下同。去，起吕反。<sup>②</sup>擅，市戰反。

庚寅，我入郕。徐邈曰：「入承鄭歸郕下，嫌内外文不別，故著我以明之。」○別，彼列反。入者，內弗受也。日入，惡入者也。郕者，鄭伯所受命於天子，而祭泰山之邑也。王室微弱，無復方岳之會，諸侯驕慢，亦廢朝覲之事，故鄭以湯沐之邑易魯朝宿之田也。諸侯有大功盛德於王室者，京師有朝宿之

邑，泰山有沐浴之邑，所以供祭祀也。魯，周公之後，鄭，宣王母弟，若此有賜邑，其餘則否。許慎曰：「若令諸侯京師之地皆有朝宿之邑，<sup>③</sup>周有千八國諸侯，盡京師之地，不足以容，不合事理。」○復，扶又反。廢朝，直遙反，下同。覲，巨靳反。諸侯春見天子曰朝，秋見曰覲。令，力呈反。

【疏】「入者內弗受也」。○釋曰：重發傳者，嫌易田與兵人異，故重發以明之。○注「周有」至「事理」。○釋曰：《孝經說》文。

夏，六月，己亥，蔡侯考父卒。諸侯曰卒，正也。

【疏】「日卒正也」。○釋曰：重發之者，宋公起例之始，蔡侯嫌爵異，故重發以明之。舉此二者，足以包宿男，故宿男不復發傳也。

辛亥，宿男卒。宿，微國也。未能同盟，故男卒也。

①「歸郕」，阮校：「《左氏》作「歸枋」，惠棟云：古「方」、「丙」同字。」

②「吕」，原作「已」，據宋刻元修本及《釋文》改。

③「令」，原作「今」，據《釋文》改。

【疏】「未能同盟」。○釋曰：杜預以元年盟于宿，宿亦與盟，則以宿爲宿男之國。此傳云「未能同盟」，則以彼宿爲地名，與杜異也。

秋，七月，庚午，宋公、齊侯、衛侯盟于瓦屋。宋序齊上，王爵也。瓦屋，周地。外盟不日，此其日，何也？據僖十九年「夏，六月，宋公、曹人、邾人盟於曹南」，不日。

【疏】注「據僖」至「不日」。○釋曰：不據石門而引曹南者，以曹南三國與此相合，故引之也。

諸侯之參盟於是始，故謹而日之也。世

道交喪，盟詛滋彰，非可以經世軌訓，故存日以記惡，蓋《春秋》之始也。○參，七南反。喪，息浪反。詛，莊慮反，下文同。誥誓不及五帝，五帝，謂黃帝、顓頊、帝嚳、帝堯、帝舜也。誥誓，《尚書》六誓七誥是其遺文。五帝之世，道化淳備，不須誥誓而信自著。○誥，古報反。誓，市制反。五帝，孔安國云：「少昊、顓頊、高辛、唐、虞。」鄭玄有黃帝無少昊，餘同。范依鄭。顓頊，上音專，下音許玉反。帝嚳，苦篤反，高辛名。

【疏】注「五帝」至「自著」。○釋曰：五帝雖有軍旅會同，不須誥誓而信自著也。六誓者，即《尚書·甘誓》、《湯誓》、《牧誓》、《泰誓》、《費誓》、《秦誓》也。七誥者，即《湯誥》、《大誥》、《康誥》、《酒誥》、《召誥》、《洛誥》、

《康王之誥》是也。

盟詛不及三王，三王，謂夏、殷、周也。夏后有鈞臺之享，商湯有景亳之命，周武有盟津之會。衆所歸信，不盟詛也。○夏，戶雅反。鈞音均。亳，步各反。盟津音孟，本亦作孟。

【疏】注「三王」至「詛也」。○釋曰：經史通以王爲夏、殷、周也。盟津之會，昭四年《左傳》文。三王，衆所歸信，故不設盟詛也。《尚書》舜命禹征有苗而戒於衆，則亦誓之類。《周禮·秋官》司盟官掌盟載之約，則是盟事。而云「誥誓不及五帝，盟詛不及三王」者，舜是五帝之末，命禹徂征，是禹之事，故云「不及五帝」；周公制盟載之法者，謂方岳及有疑會同始爲之耳，不如《春秋》之世屢盟，故云「不及三王」也。

交質子不及二伯。二伯，謂齊桓、晉文。齊桓有召陵之師，晉文有踐土之盟。諸侯率服，不質任也。○交質音置，注同。二伯如字，又音霸。召，上照反。

【疏】注「二伯」至「任也」。○釋曰：經典言五伯者，皆謂夏伯昆吾，商伯大彭、豕韋，周伯齊桓、晉文。今此傳以周末言之，故知謂齊桓、晉文也。其「召陵之師」、「踐土之盟」，亦昭四年《左傳》文也。

八月，葬蔡宣公。月葬，故也。  
九月，辛卯，公及莒人盟于包來。包來，

宋邑。○包音苞，一音浮，《左氏》作「浮來」。可言公及人，不可言公及大夫。稱人，衆辭。可言公及人，若舉國之人皆盟也。不可言公及大夫，如以大夫敵公故也。

螟。○螟，亡丁反。

冬，十有二月，無佻卒。無佻之名，未

有聞焉。未聞者，不知爲是隱之不爵大夫，爲是有罪貶去氏族。穀梁子不受之於師，故曰未有聞焉。○去，起呂

反。或曰，隱不爵大夫也。若俠卒是。○若俠音

協，九年經同。或說曰，<sup>①</sup>故貶之也。若無佻帥師人極是。

【疏】「或曰」至「貶之也」。○釋曰：若是不爵命

大夫，二年傳不得云貶。彼人極爲貶去氏，則此亦爲貶去氏，就二說之中，後「或曰」是也。「公子益師卒」，傳曰：「不日，惡也。」則此不日亦惡可知矣。

九年，春，天王使南季來聘。南，氏姓

也。季，字也。南季，天子之上大夫。氏以爲姓也。

所以別姓者，經有「王季子來聘」，「祭伯來」，王、祭皆非姓也，嫌與同，故別之也。季云字者，明命爲大夫，不以名通也。○別，彼列反。祭伯，側界反，下同。凡國名、邑名及人名氏皆於始音，後不復出。若假借之字，時復重音，後

放此。聘，問也。聘諸侯，非正也。《周禮》：

天子「時聘以結諸侯之好」，<sup>②</sup>殷親以除邦國之慝，問問以諭諸侯之志，歸賑以交諸侯之福，賀慶以贊諸侯之喜，致禴以補諸侯之災。許慎曰：「禮：臣病，君親問之，天子有下聘之義。」傳曰「聘諸侯，非正」，甯所未詳。○好，呼報反。覲，他弔反。慝，他得反，惡也。問問，問廟之間。賑，市軫反，祭肉也。禴，戶外反，或古外反。

【疏】注「周禮」至「未詳」。○釋曰：范所引者，

《周禮·大行人》文也。鄭玄云：「時聘者，亦無常期。天子有事，諸侯使大夫來聘，親以禮見之，禮而遣之，所以結其恩好也。殷覲謂一服朝之歲也。覲，惡也。一服朝之歲，五服諸侯皆使卿以聘禮來覲天子，天子以禮見之，命以禮政禁之事，<sup>③</sup>所以除其惡行。問問者，問歲一問諸侯，而有省之屬。<sup>④</sup>論諸侯之志者，諭言語，諭書名其類也。歸賑以交諸侯之福者，交或往或來者也。賀慶以贊

①「或說曰」，王引之《經義述聞》：「上云「或曰」，則下亦當然，不得又稱「或說曰」也。」「說」蓋衍文。」

②「天子」，《穀梁補注》：「《周禮》下有「天子」二字，大謬。」

③「禮」，《周禮·大行人》鄭注無此字。

④「而有省之屬」，《周禮·大行人》鄭注作「謂存省之屬」。

諸侯之喜者，<sup>①</sup>贊，助也。致禴，凶禮之弔禮、禴禮也。補諸侯之災者，若《春秋》澶淵之會，謀歸宋財。然「時聘」、「殷覲」二者，是諸侯臣使於王也。其「間問」、「歸賑」、「賀慶」、「致禴」四者，王使臣使於諸侯也。<sup>②</sup>范此注引《周禮》者，證有下聘之義也，而傳云「非正也」，故云「甯所未詳」。然則答鄭玄之駁，<sup>③</sup>則云叔服重天子之禮者，以此傳既非，故別爲之說。

三月，癸酉，大雨震電。震，雷也。電，霆也。○電，徒練反。霆，徒丁反，又徒頂反。

【疏】「震雷也電霆也」。○釋曰：《說文》云：「震，霹靂也。」陰擊陽爲電，電者即雷之光，與此傳異者，《易·說卦》「震爲雷」，故何休亦以震爲雷。霆者，霹靂之別名，有霆必有電，故傳云「電，霆也」。或當電、霆爲一也。

庚辰，大雨雪。志疏數也。八日之間，

再有大變，陰陽錯行，故謹而日之也。劉向云：「雷未可以出，電未可以見。雷電既以出見，則雪不當復降，皆失節也。雷電，陽也；雨雪，陰也。雷出非其時者，是陽不能閑陰，陰氣縱逸而將爲害也。」○雨，于付反。數，色角反。向，舒亮反。見，賢徧反。復，扶又反。

【疏】「志疏數也」。○釋曰：謂灾有遠近，遠者爲疏，近者爲數也。○注「劉向」至「害也」。○釋曰：

何休云：「夏之正月，未可大雨震電，此陽氣大失其節。猶隱公久居其位，不反於桓，失其宜也。異發於九年者，陽數可以極，而不還國於桓之所致。」大雨雪者，「盛陰之氣大怒，此桓將怒而弑隱公之象」。劉向之言，與何休意不甚異，但取變異之象少差耳。

雨月，志正也。雨得其時則月。

【疏】注「雨得其時則月」。○釋曰：雨得其時則月者，若僖三年夏「六月，雨」是也。

俠卒。俠者，所俠也。俠，名也。所，其氏。

【疏】「俠者，所俠也」。○釋曰：徐邈引尹更始云「所者，俠之氏」，今范亦云「所，其氏」，則所者是俠之氏族，但未備爵命，故畧名耳。麋信以爲所非氏，所謂斥也。

弗大夫者，隱不爵大夫也。俠不命爲大夫，故不氏。隱之不爵大夫，何也？曰，不成爲君也。明將立桓。

①「賀慶」至「喜者」，《周禮·大行人》鄭注無此句。

②「然時聘」至「諸侯也」，孫校：「范意似以六者同爲王使于諸侯，與鄭不必同也。」

③「鄭玄」，孫校：「柳興恩《穀梁大義述》云：『鄭玄當作薄氏，《隋書·經籍志》薄叔玄《問穀梁義》二卷，梁四卷。』」

夏，城郎。郎，魯邑。

秋，七月。無事焉，何以書？不遺時

也。四時不具，未成年也。

冬，公會齊侯于防。防，魯地也。會者，外

爲主焉爾。

【疏】「會者」至「焉爾」。○釋曰：重發傳者，嫌華戎異故也。

十年，春，王二月，公會齊侯、鄭伯于中

丘。隱行自此皆月者，天告雷雨之異，以見篡弑之禍，而不知戒懼，反更數會，故危之。○見，賢偏反。數，色角反。

夏，鞏帥師會齊人、鄭人伐宋。鞏，隱之罪人也，故終隱之世貶之。

六月，壬戌，公敗宋師于菅。敗例日與不日，皆與戰同。菅，宋地。○公敗，必適反，又皮適反，後亦同。于菅，古顏反。

【疏】注「敗例」至「宋地」。○釋曰：莊十年傳例曰「不日，疑戰也」者，言不克日而戰，以詐相襲，則不疑當書日。故桓十年「冬，十有二月，丙午，齊侯、衛侯、鄭伯來戰于郎」，范云「結日列陳，則日」，是也。今注云「與戰同」，則此敗宋師，是克日而戰也。

內不言戰，舉其大者也。戰然後敗，故敗大於戰。

辛未，取郕。○郕，古報反，《字林》工於反。

辛巳，取防。取邑不日，此其日，何

也？據僖三十三年，「伐邾，取訾婁」不日。○訾，子斯反。

不正其乘敗人而深爲利，取二邑，故謹

而日之也。禮不重傷，戰不逐北，○公敗宋師于菅，復取其二邑，貪利不仁，故謹其日。○重，直用反。逐北如

字，又音佩，本又作「逐奔」。復，扶又反。

【疏】注「禮不」至「逐奔」。○釋曰：「不重傷」，僖二十二年《左傳》文也。「不逐奔」，上五年傳文。

秋，宋人、衛人人鄭。

宋人、蔡人、衛人伐載。鄭伯伐取之。

凡書取國，皆滅也。變滅言取，明其易。○載如字，本或作戴。易，以鼓反，下文同。不正其因人之力而易

取之，故主其事也。三國伐載，自足以制之，鄭伯不能矜人之危，而反與共伐，故獨書「鄭伯伐取之」，以首其

①「逐北」，疏引起訖作「逐奔」，《釋文》云：「一本作『逐奔』。」



惡。其實四國共取之。○惡，烏各反。

冬，十月，壬午，齊人、鄭人入郕。人者，內弗受也。日入，惡入者也。郕，國也。

○惡，烏路反。

十有一年，春，滕侯、薛侯來朝。天子

無事，諸侯相朝，正也。事謂巡守、崩葬、兵革之事。○薛，息列反。守音狩，本亦作狩。

【疏】「十有一年」。○釋曰：言「有」者，十是盈

數，更以奇從盈，故言「有」，欲見一者非十中之物也。

○注「事謂」至「之事」。○釋曰：《書》云：「肆覲東后。」是天子巡守，當方諸侯有事。許慎、鄭玄皆以爲天子喪葬，諸侯親奔，故范亦以爲天子崩葬爲諸侯之事也。桓五年諸侯從王伐鄭，是天子舉兵革，諸侯亦有事也。言無此等事，諸侯得相朝，若有，即不得也。

考禮脩德，所以尊天子也。諸侯來朝，

時，正也。朝宜以時，故書時則正也。

【疏】「考禮脩德」。○釋曰：諸侯相朝，所以正

班爵，奉王命，故云「考禮脩德」也。

植言，同時也。植言，謂別言也。若「穀伯綏來

朝，鄧侯吾離來朝」，同時來，不俱至。○植音特，獨也，本或作特。累數，皆至也。累數，總言之也。若「滕侯、

薛侯來朝」，同時俱至。○數，所主反。

夏，五月，公會鄭伯于時來。時來，鄭地。

秋，七月，壬午，公及齊侯、鄭伯入許。

冬，十有一月，壬辰，公薨。公薨不地，

故也。不地，不書路寢之比。○比，必利反。隱之，

不忍地也。隱猶痛也。其不言葬，何也？君

弑，賊不討，不書葬，以罪下也。責臣子也。隱

十年無正，隱不自正也。無正，謂不書正月。元

年有正，所以正隱也。明隱宜立。

## 監本附音春秋穀梁注疏桓公卷第三

起元年，盡七年

范甯集解 楊士勳疏

### 桓公

【疏】《魯世家》：桓公名允，惠公之子，隱公之弟，以桓王九年即位。《世本》作軌。《謚法》：「辟土服遠曰桓。」

元年，春，王正月。①桓無王，其曰王，

何也？謹始也。諸侯無專立之道，必受國於王。若桓初立，便以見治，故詳其即位之始，以明王者之義。

【疏】「桓無」至「始也」。○釋曰：徐邈云：「桓

公篡立，不顧王命，王不能討，故無王。又且桓公終始十八年，唯元年、二年、十年、十八年有王，自外皆無王，故傳據以發問，而曰「桓無王」。又范氏例云：「《春秋》上下無王者，凡一百有八。桓無王者，見不奉王法，餘公無王者，爲不書正月，不得書王。桓初即位，若已見治，故書王以示義。二年書王，痛與夷之卒，正宋督之弑，宜加誅也。十年有王，正曹伯之卒，使世子來朝，王法所宜治也。十八年有王，取終始治桓也。」是解元年有王爲謹始也，餘

年無王爲不奉王法也。若然，桓爲弑君而立，故十四年沒其王文，宣公亦篡位而立，不去王者，桓弑賢兄讓國之主，害成立之君，宣篡未踰年之子，又無爲臣之義，以輕重既異，故去王亦殊也。杜預注《左氏》桓十四年無王者，「失不班歷」也。何休注《公羊》，意與《穀梁》同，唯解有王者別，云：「二年有王者，見始也。十年有王，數之終也。十八年有王，桓之終也。明終始有王，桓公無之耳。」

其曰無王，何也？桓弟弑兄，臣弑君，天子不能定，諸侯不能救，百姓不能去，以爲無王之道，遂可以至焉爾。元年有王，所以治桓也。

公即位。杜預曰：「嗣子位定於初喪，而改元必須踰年者，繼父之業，成父之志，不忍有變於中年也。諸侯每首歲必有禮於廟，諸遭喪繼位者，因此而改元即位，百官以序，故國史亦書即位之事於策。」○去，上聲。

【疏】注「杜預」至「於策」。○釋曰：《尚書·顧命》云：「乙丑，成王崩，俾爰齊侯、呂伋以二千戈、虎賁

①「正月」，原在下「公即位」上。《穀梁補注》：「舊本『正月』二字退在下經『公』字上，以『王』字斷句。此以傳合經者之誤，今移而改正之。」今據改。

百人逆子釗于南門之外，延入翼室，恤宅宗。」孔安國云：「明室，路寢。外之使居憂，<sup>①</sup>為天下宗主。」天子初崩，嗣子定位，則諸侯亦當然也。其改元必須踰年者，孝子之情，不忍有變於中年也。然嗣子不忍變於中年，故踰年即位。<sup>②</sup>桓公既無惻痛之情，朝死夕忘，亦於踰年即位者，聖人立法，即位必待踰年，桓雖不仁，未可獨當年即位。即位既是踰年，故史官從其實而書之。

繼故不言即位，正也。故，謂弒也。繼故

不言即位之為正，何也？曰，先君不以其

道終，則子弟不忍即位也。哀痛之至，故不忍行

即位之禮。繼故而言即位，則是與聞乎弒也。

繼故而言即位，是為與聞乎弒，何也？曰，

先君不以其道終，已正即位之道而即位，是

無恩於先君也。推其無恩，則知與弒也，此明統例

耳。與弒尚然，況親弒者？○與聞音豫，下文及注「與

弒」皆同。【疏】注「推其」至「弒者」。○釋曰：桓是親

弒之主，而傳論與弒之事，故知傳意本「明統例」爾，故云

「與弒尚然，況親弒者」。

三月，公會鄭伯于垂。垂，衛地也。傳例

曰：往月，危往也。桓大惡之人，故會皆月以危之。

【疏】注「垂衛」至「危之」。○釋曰：傳例者，定

八年傳文也。此「三月，公會鄭伯于垂」，二年「三月，公會齊侯、陳侯、鄭伯于稷」，是「會皆月以危之」。

會者，外為主焉爾。鄭伯所以欲為此會者，為

易田故。○為易，于偽反。

【疏】「會者」至「焉爾」。○釋曰：重發傳者，嫌

易田與直會異故也。

鄭伯以璧假許田。假不言以，言以非

假也。實假，則不應言以璧。非假而曰假，諱易

地也。禮：天子在上，諸侯不得以地相與

也。諸侯受地於天子，不得自專。無田則無許可

知矣。不言許，不與許也。但言以璧假許，而不

繼田，則許屬鄭也。今言許田，明以許之田與鄭，不與許

邑也。諸侯有功，則賜田以祿之。若可以借人，此蓋不欲

以實言。○借，子夜反。許田者，魯朝宿之邑也。

邠者，鄭伯之所受命而祭泰山之邑也。用

見魯之不朝於周，而鄭之不祭泰山也。朝天

①「外」，夏校：《尚書·顧命》孔傳作「延」。

②「踰」，原作「嗣」，阮校：「閩、監、毛本「嗣」改「踰」，是也。」今據改。

子所宿之邑謂之朝宿，泰山非鄭竟內，從天王巡守，受命而祭也。擅相換易，則知朝祭並廢。○魯朝，直遙反，下皆同。邠，彼病反，又音丙。<sup>①</sup>見，賢徧反。竟音境。從，在用反。守音狩。擅，市戰反。換，一本亦作道，胡喚反。

【疏】「許田」至「山也」。

○釋曰：經文無邠，而

傳言之者，經諱易天子之地，故以壁假爲文。若以地易地，不得云假，故經無邠文。傳本魯鄭易田之由，不得不言邠也。<sup>②</sup>先儒解《左氏》者，皆以爲鄭受天子祊田，爲湯沐之邑。後世因立桓公、武公之廟，故謂之泰山之祀。案此傳及注意，則以爲祭泰山之邑，謂從王巡狩，受命而祭泰山也。《公羊》以爲「田多邑少稱田，邑多田少稱邑」。<sup>③</sup>《左氏》無傳，或當史異辭。《穀梁》以爲言田者，則不德其邑，<sup>④</sup>是三傳之說各異也。

夏，四月，丁未，公及鄭伯盟于越。越，衛地也。及者，內爲志焉爾。越，盟地之名也。

秋。大水。《禮·月令》曰：

「季秋行夏令，則

其國大水。」大水例時。

【疏】注「大水例時」。

○釋曰：莊七年與此皆云

「秋，大水」，不書月，是例時也。

高下有水災曰大水。

冬，十月。無事焉，何以書？不遺時

也。《春秋》編年，四時具而後爲年。編，錄。

○編，必連反，《字林》、《聲類》、《韻集》皆布千反，《史記音義》甫連反。

二年，春，王正月，戊申，宋督弑其君與

夷。宋督，宋之卑者，卑者以國氏。○督，丁毒反。與如

字，又音餘。

【疏】注「宋督」至「國氏」。

○釋曰：知是卑者，

「祝吁弑其君」取國，傳以「失嫌」言之，<sup>⑤</sup>「履綸來逆」，傳稱「進之也」。此督與宋萬既不取國，又無可進，明卑者可知也。

桓無王，其曰王，何也？正與夷之卒

也。諸侯之卒，天子所隱痛，姦逆之人，王法所宜誅，

故書王以正之。及其大夫孔父。孔父先死，其

①「丙」，原作「內」，據宋刻元修本及《釋文》改。

②上「不」字，原作「五」，阮校：「閩、監、毛本『五』改

「不」，是也。」今據改。

③「公」，原脫，阮校：「閩、監、毛本不脫。」今據補。

④「德」，阮校：「毛本『德』字空。浦鏜云『得』之誤，是

也。」

⑤「嫌」，原作「如」，阮校：「閩、監、毛本『如』改『嫌』，是

也。」今據改。

曰及，何也？書尊及卑，《春秋》之義也。邵曰：「會盟言及，別內外也。尊卑言及，上下序也。」○別，彼列反。

【疏】注「邵曰」至「序也」。○釋曰：「及」有二義，故范引邵云：「會盟言及，別內外也。尊卑言及，上下序也。」別內外者，謂魯與他人會盟，皆先魯以及他，若隱元年「公及邾儀父盟于昧」，及宋人盟于宿是也。「上下序」者，此孔父、荀息、仇牧皆先言君，後言臣是也。

孔父之先死，何也？督欲弑君，而恐不立，於是乎先殺孔父。孔父閑也。閑，謂扞禦。○殺並如字。扞，下旦反。何以知其先殺孔父也？曰，子既死，父不忍稱其名；臣既死，君不忍稱其名，以是知君之累之也。累，謂從也。

【疏】「知君之累之也」。○釋曰：糜信云：「累者，從也。謂孔父先死，殤公從後被弑。」范注雖不明，理亦當然也。

孔，氏；父，字謚也。孔父有死難之勳，故其君以字為謚。○難，乃旦反。

【疏】「孔氏父字謚也」。○釋曰：孔父新死未葬，而得有謚者，舊解謂三月既葬之後，嗣君謚之，但赴者

以正月者亂，故書弑在前，使者以葬後始來，故得稱謚。或當孔父以字為謚，得據後言之，故云「字謚」也。○注「孔父」至「為謚」。○釋曰：謚者大夫之常事，而云「死難之勳」者，字者褒德，非可虛加，若使孔父無死難之勳，唯有凡平之謚，焉得以字為之文？傳特言「字謚」也，明知有義，故注者原之。

或曰，其不稱名，蓋為祖諱也。孔子故宋也。孔子舊是宋人，孔父之玄孫。○為，于偽反。

【疏】注「孔子」至「玄孫」。○釋曰：案《世本》：孔父嘉生木金父，木金父生祁父，其子奔魯，為防叔，生伯夏，伯夏生叔梁紇，叔梁紇生仲尼，是孔父嘉為孔子六世祖。范云「玄孫」者，以玄者親之極至，來孫、昆孫之等亦得通稱之，亦如《左傳》蒯聵禱文王稱曾孫之類是也。

滕子來朝。隱十一年稱侯，今稱子，蓋時王所黜。【疏】注「隱十」至「所黜」。○釋曰：周公之制，爵有五等，所以擬其黜陟。今傳無貶爵之文，明降爵非《春

①「孔氏父」，阮校：「段玉裁云：『氏』字衍。孔父者，字謚也。字謚者，以字為謚也。《左傳》曰：『諸侯之制，以字為謚。』亦見《儀禮》鄭注。」

②「月者」，阮校：「齊召南云當作『月告』。」

③「文」，宋刻元修本作「又」，屬下。

秋之義。又且此時周德雖衰，尚爲天下宗主，滕今降爵，明是時王所黜也。

三月，公會齊侯、陳侯、鄭伯于稷，以成宋亂。稷，宋地也。以者，內爲志焉爾。公爲志乎成是亂也。欲會者，外也。欲受賂者，公也。

【疏】「以者」至「焉爾」。○釋曰：十四年傳云：「以者，不以者也。」僖二十一年傳云：「以，重辭也。」此傳云「以者，內爲志焉爾」，則「以」有三種之義。范於僖二十一年注云「以有二義矣」者，以「內爲志焉」與「不以」者，正是一事耳。「以成宋亂」者，公也，非諸侯故也，是以云「內爲志焉爾」，其實以者仍是不以之例，故注彼爲二事焉。○注「欲會」至「公也」。○釋曰：以經言「會」，故知「欲會者，外也」。「以者，內爲志」，故知「欲受賂者，公也」。

此成矣，取不成事之辭而加之焉。於內之惡，而君子無遺焉爾。取不成事之辭，謂以成宋亂也。桓姦逆之人，故極言其惡，無所遺漏也。江熙曰：「《春秋》親尊皆諱，<sup>①</sup>蓋患惡之不可掩，豈當取不成事之辭，以加君父之惡乎？案宣四年「公及齊侯平莒及郟」，傳曰：「平者，成也。」然則成亦平也。公與齊、陳、鄭欲平宋亂，而取其賂鼎，不能平亂，故書「成宋亂」。取郟大鼎，納于大廟，微旨見矣。尋理推經，傳似失之。」徐

邈曰：「宋雖已亂，治之則治。治亂成不，繫此一會。若諸侯討之，則有撥亂之功，不討，則受成亂之責。辭豈虛加也哉！」《春秋》雖爲親尊者諱，<sup>②</sup>然亦不沒其實，故納鼎于廟，躋僖逆祀，及王室之亂，昭公之孫，皆指事而書。哀七年傳所謂有一國之道者，有天下之道者也。君失社稷，猶書而不隱，況今四國羣會，非一人之過，以義致譏，輕於自己兆亂。以此方彼，無所多怪。」○鄭音談。大廟音泰，下文及注同。見，賢徧反。躋，子兮反。

【疏】注「取不」至「多怪」。○釋曰：江熙云「微旨見矣」者，傳意成宋亂者，<sup>③</sup>謂成就宋亂。江熙以爲加君父之惡大切，<sup>④</sup>故以成爲平，直書取郟大鼎，納於大廟，足以示譏，是微旨見矣。言此傳成亂之辭爲微旨。徐邈引傳所謂有一國之道云云者，言諸侯專一國，猶似天子專天下，其有失社稷，猶得書之，故此亦得云「成宋亂」也。

①「諱」，原作「謂」，阮校：「閩、監、毛本『謂』作『諱』，是也。」今據改。

②「爲」，原作「受」，阮校：「閩、監、毛本『受』改『爲』。」今據改。

③「亂」，原作「辭」，阮校：「閩、監、毛本『辭』改『亂』，下『成宋辭也』同。是也。」今據改，下同。

④「切」，原作「初」，阮校：「閩、監、毛本『初』作『切』，是也。」今據改。

夏，四月，取郕大鼎于宋。戊申，納于太廟。傳例曰：「納者，內不受也。」<sup>①</sup>日之，明惡甚也。太廟，周公廟。○郕，古報反。

【疏】注「傳例」至「公廟」。○釋曰：宣十一年傳文也。然此傳亦有「弗受」之文，而引傳例者，凡傳言「內弗受」者，指說諸侯相人之例。今此言「不受」者，謂周公也。恐其不合，故引例以明之。

桓內弑其君，外成人之亂，受賂而退，以事其祖，非禮也。其道以周公爲弗受也。郕鼎者，郕之所爲也。曰宋，取之宋也。此鼎本郕國所作，宋後得之。以是爲討之鼎也。討宋亂而更受其賂鼎。○爲討之鼎，如字，麋氏云：「討或作糾。」<sup>②</sup>孔子曰：「名從主人，物從中國。」故曰郕大鼎也。主人，謂作鼎之主人也，故繫之郕。物從中國，謂是大鼎。

【疏】「名從」至「大鼎也」。○釋曰：「名從主人」者，謂本是郕作，繫之於郕。「物從中國」者，謂鼎在宋，從宋號也。言「物從中國」者，廣例耳，通夷狄亦然。其意謂鼎名從作者之主人，不問華戎，皆得繫之，若《左傳》稱「甲父之鼎」是也。「物從中國」者，謂中國號之大鼎，縱夷狄亦從中國之號，不得改之。若傳稱吳謂義稻爲伊緩，<sup>③</sup>夷

狄謂大原爲大鹵，以地形物類，須從中國之號，故不得謂之伊緩、大鹵也。何休云：「周家以世孝，天瑞之鼎。諸侯有世孝者，天子亦作鼎以賜之。禮：祭，天子九鼎，諸侯七，卿大夫五，元士三也。」故郕國有之。

秋，七月，紀侯來朝。隱二年稱子，今稱侯，蓋時王所進。○紀侯，《左氏》作杞侯。朝時，此其月，何也？據隱十一年「春，滕侯、薛侯來朝」，稱時。桓內弑其君，外成人之亂，於是爲齊侯、陳侯、鄭伯計數日以賂。<sup>④</sup>桓既罪深責大，乃復爲三國計數至日以責宋賂。○爲齊，于僞反，下同。數，色主

①「受」，原作「爲」，阮校：「閩、監、毛本『爲』作『受』，是。」今據改。

②「糾」，宋刻元修本作「紂」，義爲長。

③「義稻」，夏校：「當爲『善稻』之訛。《公羊傳》襄公五年作『善稻』，當據改。」

④「計」，原作「討」，宋刻元修本作「計」。王引之《經義述聞》：「石經『討』作『計』。引之謹案：傳文及注『討』字，皆當作『計』。」又《穀梁補注》：「傳及注『計』字，各本皆誤作『討』，今依《音義》、《唐石經改正》。」今據改。

反，注同。復，扶又反。己即是事而朝之，惡之，故謹而月之也。己，紀也。桓與諸侯校數功勞，以取宋賂，不知非之爲非，貪愚之甚。紀不擇其不肖而就朝之。○惡，烏路反。

【疏】「謹而月之也」。○釋曰：桓雖不君，臣不得不臣，所以極言君父之惡，以示來世者。桓既罪深責大，若爲隱諱，便是長無道之君，使縱以爲暴，故《春秋》極其辭以勸善懲惡也。○注「己紀也」。○釋曰：桓十三年注云「紀當爲己」，與此異者，觀經而說，故兩注不同。

蔡侯、鄭伯會于鄧。鄧，某地。○某地，不知其國，故云某，後放此。

九月，入杞。我人之也。不稱主名，內之卑者。

【疏】「我人之也」。○釋曰：何嫌非我而發傳者，以隱八年云「我入邴」，此直云「入杞」，恐非我，故發之。

公及戎盟于唐。

冬，公至自唐。告廟曰至。傳例曰：「致君者，始其往而喜其反。」此致君之意義也。離不言會，故以地致。

【疏】注「告廟」至「地致」。○釋曰：「傳例」者，襄

二十九年傳文也。「離不言會」者，即《左傳》所云「特相會往來稱地」，亦此類也。

桓無會，而其致，何也？遠之也。桓會甚衆，而曰無會，善無致會也。弑逆之罪，非可以致宗廟，而今致者，危其遠會戎狄，喜其得反。

【疏】注「桓會甚衆」。○釋曰：謂元年會于垂，二年會于稷是也。

三年，春，正月，公會齊侯于贏。贏，齊地。○贏音盈。

夏，齊侯、衛侯胥命于蒲。蒲，衛地。胥之爲言，猶相也。相命而信諭，謹言而退，以是爲近古也。申約言以相達，不歃血而誓盟。古，謂五帝時。○近，附近之近。約如字，又於妙反。歃，本又作插，<sup>①</sup>所洽反。

【疏】注「古謂五帝時」。○釋曰：知古非三王者，以傳云「誥誓不及五帝，盟詛不及三王」，今「謹言而退」，非誥誓之辭，「相命而信諭」，無盟詛之事，二國能行三王五帝之法，而傳云「近古」，明知謂五帝也。

是必一人先，其以相言之，何也？不

①「插」，宋刻元修本及《釋文》作「啗」。



以齊侯命衛侯也。江熙曰：「夫相與親比，非一人之德，是以同聲相應，同氣相求。齊衛胥盟，雖有先倡，倡和理均。若以齊命衛，則功歸于齊，以衛命齊，則齊僅隨從。言其相命，則泯然無際矣。」○比，毗志反。應，應對之應。僅，巨靳反。泯，亡忍反。

【疏】注「同聲」至「相求」。○釋曰：《易·文言》文也。今二國相命，則大者宜倡，小者宜和，大則齊也，小則衛也。故傳云「不以齊侯命衛侯也」，明齊大也。但倡和理均，故直以「相命」言之。倡則同聲相應，和則同氣相求，聲氣相通，而相命之情見矣。

六月，公會杞侯于郕。郕，魯地。○郕音成。

秋，七月，壬辰，朔，日有食之，既。言

日言朔，食正朔也。朔日食也。既者盡也，有繼之辭也。盡而復生謂之既。○復音扶又反。

【疏】「既者盡也」。○釋曰：其日食或盡或不盡者，歷家之說，以為交正在朔，則日食既，前後望月不食，交正在望，則月食既，前後朔日不食。

公子翬如齊逆女。翬稱公子者，桓不以為罪人也。逆女，親者也。使大夫，非正也。

九月，齊侯送姜氏于謹。已去齊國，故不言女。未至于魯，故不稱夫人。謹，魯地。月者，重錄之。

○于謹，音歡。

【疏】「使大夫非正也」。○釋曰：重發傳者，履綸外之始，翬是內之初，故重發以明外內不異也。

禮：送女，父不下堂，母不出祭門，諸

母兄弟不出闕門。祭門，廟門也。闕，兩觀也，在祭門之外。○觀，古亂反。父戒之曰：「謹慎從爾

舅之言。」母戒之曰：「謹慎從爾姑之言。」

諸母般申之曰：①「謹慎從爾父母之言。」

般，囊也，所以盛朝夕所須，以備舅姑之用。○般，步干反。一本作鞶，音同。盛音成。

【疏】注「般囊」至「之用」。○釋曰：《士婚禮》

云：「父送女，命之曰：『戒之敬之，夙夜無違命。』母施衿結帨，曰：『勉之敬之，夙夜無違宮事。』庶母及門內施般，申之以父母之命，曰：『敬恭聽宗爾父母之言，夙夜無愆，示諸衿般。』鄭玄云：「般，囊也。男子般革，婦人般絲，所以盛帨巾之屬，為謹敬也。」後戒辭與此不同，此注又與鄭異者，彼是士禮，此即是諸侯之禮，故異辭也。般盛帨巾，亦得備舅姑之用，則范、鄭二注不有違也。或

①「諸母般申之曰」，孫校：「柳曰：徐邈本作『諸母施鞶紳戒曰』。」

以爲傳並釋禮意，故與本文不同也。引此戒辭及上父母不出祭門，諸母兄弟不出闕門者，並證送女踰竟，非禮之事也。凡親迎之禮，必在廟也，故云「不出祭門」。言「不出闕門」者，則已出廟門之外矣。

送女踰竟，非禮也。○踰竟音境。

公會齊侯于謹。無譏乎？齊侯送女踰竟，遠至于謹，嫌會非禮之人，當有譏。曰，爲禮也。齊侯來也，公之逆而會之可也。爲親逆之禮。

夫人姜氏至自齊。其不言輦之以來，何也？據宣元年「遂以夫人婦姜至自齊」。公親受之于齊侯也。重在公。子貢曰：「冕而親迎，不已重乎？」冕，祭服。○迎，魚敬反，一本作逆。孔子曰：「合二姓之好，以繼萬世之後，何謂已重乎？」○好，呼報反。

【疏】「子貢」至「重乎」。○釋曰：引之者，以齊侯送女，公親受之，於禮爲可，故發「冕而親迎」之間。

冬，齊侯使其弟年來聘。

有年。有年，例時。

【疏】注「有年例時」。○釋曰：凡書「有年」者，

冬五穀畢入，<sup>①</sup>計用豐足，然後書之，不可繫以日月，故例時也。宣十六年「冬，大有年」亦時，是其證也。五穀皆熟，爲有年也。

四年，春，正月，公狩于郎。春而言狩，蓋用冬狩之禮。蒐狩例時，而此月者，重公失禮也。莊四年「冬，公及齊人狩于郕」，傳曰：「齊人者，齊侯也。其曰人，何也？卑公之敵，所以卑公也。」然則言齊人者，所以人公，則譏已明矣。狩得其時，故不月。

【疏】注「春而」至「不月」。○釋曰：《周禮》有四時之田，春蒐，夏苗，秋獮，冬狩，皆用夏之四仲之月。然周正月，則是夏之十一月，故《左氏》以此狩爲得時。今范云「春而言狩，蓋用冬狩之禮」，以爲失時者，蓋周公未制禮之時，權用此法，故得時節不同，其名亦異。仲尼脩《春秋》，改周之文，從殷之質，因以爲《春秋》制也。故何休注《公羊》，亦云：「夏時不田，春秋制也。」范以春狩爲失時，又云「蒐狩例時」者，昭八年「秋，蒐于紅」，又莊四年冬狩得其時，雖譏公而不月，是例時也。《左傳》《周禮》《爾雅》並云：「春曰蒐，夏曰苗，秋曰獮，冬曰狩。」《公

①「五穀」，原作「下穀」，阮校：「閩、監、毛本『下』作『五』，是也。」今按：據下文「五穀皆熟」，則作「五」爲是，據改。

羊》之文則「春日苗，秋曰蒐，冬曰狩」。此傳之文則「春日田，夏日苗，秋曰蒐，冬曰狩」。所以文不同者，《左氏》之文，是周公制禮之名；二傳之文，或《春秋》取異代之法，或當天子諸侯別法。經典散亡，無以取正也。

### 四時之田，皆爲宗廟之事也。春日田，

取獸於田。○爲，于僞反。夏日苗，因爲苗除害，故曰苗。秋曰蒐，蒐擇之，舍小取大。○蒐，所由反，麋氏本又作搜，音同。舍音捨。冬曰狩。狩，圍狩也。冬物畢成，獲則取之，無所擇。

【疏】注「冬物」至「所擇」。○釋曰：四時田獵，若用時王之正，則周之冬是夏之秋。而云「畢成」者，冬是一總名，周之十二月，夏之十月，萬物已收，故得以「畢成」言之。

### 四時之田用三焉，唯其所先得，一爲乾

豆，上殺中心，死速，乾之以爲豆實，可以祭祀。○中，丁仲反，下同。

【疏】注「上殺」至「祭祀」。○釋曰：何休云：「自左驪射之，達于右驪，①中心，死疾，故乾而豆之，以薦宗廟。豆，祭器名，狀如鐙。天子二十有六，諸公十有六，諸侯十有二，卿上大夫八，下大夫六，士三也。」大夫以上，《禮器》之文，士三者，相傳爲說。

二爲賓客，次殺射髀髀，死差遲。○射，食亦反。髀，步啓反，又必邇反。髀，若嫁反。差，初賣反。

【疏】注「次殺」至「差遲」。○釋曰：何休云：「自左驪射之，達於右髀，遠心，死難，故爲次殺。」《毛傳》云：「次殺者，射右耳本次之。」今注云「射髀髀」，則與彼異也。髀髀者，案《儀禮》「髀，骨膝以上」者是也。②

三爲充君之庖，下殺中腸汚泡，死最遲。先宗廟，次賓客，後庖廚，尊神敬客之義。○庖，步交反。汚，污穢之汚。③泡，普交反，又百交反。

【疏】注「下殺」至「之義」。○釋曰：何休云：「自左驪射之，達於右髀。」《毛傳》云：「左髀達於右髀爲下殺。」此云「中腸」，同彼二說，並無妨也。

夏，天王使宰渠伯糾來聘。宰，官也。渠，氏也。天子下大夫，老故稱字。下無秋冬二時，甯所未詳。

【疏】注「宰官」至「未詳」。○釋曰：《公羊傳》曰：「伯糾者何？下大夫也。」何休云：「稱伯者，上敬

①「右驪」，《春秋公羊傳注疏》卷四阮校云：「閔、監、毛本作「右驪」，按《釋文》作「右驪」，云「本又作驪」。依《說文》當作「驪」。」

②「膝」，原作「膝」，阮校：「閔、監、毛本「膝」改「膝」，是也。」今據改。

③「污穢之汚」，原作「汙穢之」，下「汙」字闕，據《釋文》補改。

老也。今范亦同之矣。何休之意，又以爲伯仲叔季之字配采地及氏者，皆爲上大夫，則祭伯、南季之類是也，兼名及字配官氏者，則爲下大夫，即此宰渠伯糾、叔服之類是也。范雖直以叔服爲字，觀上下之注，義亦似然，故此注云伯糾下大夫。文元年注毛伯，「天子上大夫也」，隱九年注「南季，天子上大夫」，是其說耳。何休又云：「桓無王而行，天子不能誅，反下聘之，故去二時以見貶。」范以五年亦使臣聘，何以四時皆具，七年不遣臣聘，何因亦無二時，故直云「甯所未詳」也。

五年，春，正月，甲戌、己丑，陳侯鮑卒。

鮑卒，何爲以二日卒之？《春秋》之義，信

以傳信，疑以傳疑。明實錄也。○傳，直專反。

陳侯以甲戌之日出，己丑之日得，不知死之日，故舉二日以包也。國君獨出，必辟病潛行。

○必辟音避，本又作避。

【疏】「甲戌」至「鮑卒」。○釋曰：《公羊》以爲鮑

之狂，故甲戌日亡，己丑日死。孔子疑之，故以二日卒之。此傳之意，言陳侯辟病，以甲戌日出，己丑之日得之，不知死之日，故舉二日以包之。《左傳》以爲再赴，故兩日並書。是三傳異說。○「信以」至「包也」。○釋曰：既云

「信以傳信，疑以傳疑」，則是告以虛事。而注云「實錄」者，告以實則以一日卒之，告以虛則二日卒之。二者皆是

據告，而即是實錄之事。

夏，齊侯、鄭伯如紀。外相如不書，過我則書，

例時。○過我，古禾反，下文及注同。

【疏】注「外相」至「例時」。○釋曰：「過我」者，

約州公之傳得知也。然紀國在齊之東，鄭在魯之西北。鄭欲如紀，則直過齊，何以二君並得過魯者？蓋齊侯出竟西行而逢鄭伯，遂與至紀，途過於魯，故得記之。知「例時」者，此與州公皆不書月，故知之。

天王使任叔之子來聘。任叔，天子之大夫。

○任叔音壬。《左氏》作仍叔。任叔之子者，錄父

以使子也。故微其君臣，而著其父子，不正

父在子代仕之辭也。錄父使子，謂不氏名其人，稱父言子也。君聞劣於上，臣苟進於下，蓋參譏之。

【疏】注「參譏之」。○釋曰：「君聞劣於上，臣苟

進於下」，止是二譏，而言「參」者，舊解傳言「微其君臣，而著其父子」，是刺其父之不肖，而令苟進，更又刺其君臣，故曰「參譏之」。或以爲參者，交互之義，不讀爲三，理亦得通。城祝丘者，《左氏》之例，凡城邑，則有時與不時之

① 「四」，宋刻元修本作「日」。

② 「魯」，《穀梁補注》作「齊」。

例。此傳則不然，但書之者，即是譏責，故注云：「譏公不脩德政，恃城以安民。」

### 葬陳桓公。

城祝丘。譏公不脩德政，恃城以安民。

秋，蔡人、衛人、陳人從王伐鄭。王親自

伐鄭。○從，才用反，又如字，下同。

【疏】注「王親自伐鄭」。○釋曰：以舉從者之辭，嫌非自伐，故云「親自伐鄭」。

舉從者之辭也。使若王命諸侯伐鄭，書從王命者，三國也。

【疏】「舉從者之辭也」。○釋曰：麋信曰：「舉從者之辭，謂解經稱人也。」徐邈云：「舉從者之辭，謂王不能以威致三國，三國自以義從耳。」范以二者不通，故為別解。言舉從者之辭，謂若王不親伐，直舉三國從王命之辭也。故下句云「其舉從者之辭，何也？」為天王諱伐鄭也。是也。

其舉從者之辭，何也？為天王諱伐鄭也。諱自伐鄭。○為，于僞反。鄭，同姓之國也，

在乎冀州，於是不能服，為天子病矣。鄭，姬姓之國，冀州則近京師，親近猶不能服，則疏遠者可知。○冀州，案鄭本京兆鄭縣，是雍州之域，後徙河南新鄭，為豫州之境。冀在兩河之間，非鄭都也。冀州言去京師近也。麋氏

云：「韓侯滅鄭，韓都冀州，故以目鄭。」近，附近之近。

【疏】「在乎冀州」。○釋曰：徐邈云：「新鄭屬冀州。」案《爾雅》：「兩河間曰冀州。」新鄭在河南，不得屬冀州，是徐之妄也。麋信云：「鄭在冀州者，韓哀侯滅鄭，遂都之。韓，故晉也。傳以當時言之，遂云冀州。」然則王伐鄭之時，本未有韓國，何得將後代之事以為周世之名？若以韓侯從冀州都鄭，則曰冀州，大伯從雍州適吳，豈得謂吳為雍州也？是麋信之謬矣。蓋冀州者，天下之中州，自唐虞及夏殷皆都焉，則冀州是天子之常居。以鄭近王畿，故舉冀州以為說。故鄭衍著書云：「九州之內，名曰赤縣。」赤縣之畿，從冀州而起，故後王雖不都冀州，亦得以冀州言之。

大雩。雩者，旱祭請雨之名。傳例曰：「雩，得雨曰雩，不得雨曰旱。」月雩，正也。時雩，不正也。《禮·月令》曰：「仲冬行夏令，則其國乃旱。」○雩音于，祭名。

【疏】注「雩者」至「乃旱」。○釋曰：何休云：「祭言大雩，大旱可知也。君親之南郊，以六事謝過自責。曰政不一與？民失職與？宮室榮與？婦謁盛與？苞苴行與？讒夫倡與？」①使童男女各八人舞而呼雩，故謂之雩。賈逵云：「言大雩者，別於山川之雩。」《左氏》說不為旱者，亦稱大雩。則雩稱大者，或如賈言也。名之為

①「倡」，孫校：「《公羊》注作「昌」。」

零者，鄭玄云：「零之言吁也，吁嗟以求雨。」服虔、杜預以爲零之言遠也，遠爲百穀祈膏雨也。未知二說誰當。范言天爲大旱，<sup>①</sup>以六事謝過，或如何說。舞而吁零，理恐不然。云「傳例曰」者，僖十一年傳文也。云「月零，正也。時零，不正也」，定元年傳文。此零不月者，何休云：「譏公驕溢也。」案《穀梁傳》意，月零則正，時零則非正，不論驕溢之事，則何休之言，不可通於此也。

螽。螽蟴之屬。《禮·月令》曰：「仲冬行春令，則蟲蝗爲敗。」○螽音終。螽，相容反。蟴音堵。蝗，華孟反。螽，蟲災也。甚則月，不甚則時。

【疏】「甚則月」。○釋曰：重發傳者，經書時零非正，故不月。螽災與之同不月，嫌其甚而不月，故發以明之。冬，州公如曹。外相如不書，此其書，何也？過我也。過我，六年寔來是也。將有其末，故先錄其本。

【疏】注「過我」至「其本」。○釋曰：齊侯、鄭伯如紀，無寔來，亦言「過我」者，不必悉有下事。此因有下事，故以相發明。其齊侯、鄭伯直途過於魯，不入國都，故不言「寔來」也。

六年，春，正月，寔來。來朝例時，月者，謹其無禮。○寔，常式反。朝，直遙反，下七年同。

【疏】注「來朝」至「無禮」。○釋曰：二年「紀侯

來朝」，傳曰：「朝時，此其月，何也？惡之，故謹而月之也。」彼書月是惡，則此月亦惡也。今州公不以禮朝，又至魯不反，是無禮之事，故云「謹其無禮」也。

寔來者，是來也。何謂是來？謂州公也。其謂之是來何也？以其畫我，故簡言之也。諸侯不以過相朝也。畫是相過，去朝遠。

○畫音獲，注同。以過，古禾反，注同。

夏，四月，公會紀侯于郕。○紀侯，《左氏》作「杞侯」。

秋，八月，壬午，大閱。蒐閱例時。○閱音悅。

【疏】注「蒐閱例時」。○釋曰：傳云「謹而日之」，知不以月爲正。而云「例時」者，以四年公狩于郎書月以刺不正，故知蒐閱例時也。大閱者何？閱兵車也。閱爲簡練。脩教明諭，國道也。脩先王之教，以明達於民，治國之道。平而脩戎事，非正也。邵曰：「禮因四時田獵，以習用戎事，存不忘亡，安不忘危之道。平謂不因田獵，無事而脩之。」其日，以爲崇武，故謹而日之。蓋以觀婦人也。○觀，古亂

①「天」，宋刻元修本作「夫」。

反，視也。

蔡人殺陳佗。陳佗者，陳君也。其曰陳佗，何也？匹夫行，故匹夫稱之也。其匹夫行奈何？陳侯憙獵，淫獵于蔡，與蔡人爭禽。蔡人不知其是陳君也，而殺之。淫獵謂自放恣，遺失徒衆。○陳佗，徒河反。行，下孟反。憙，虛記反。何以知其是陳君也？兩下相殺，不道。兩大夫相殺，不書《春秋》。其不地於蔡也。

【疏】「其不地於蔡也」。○釋曰：宣十八年「邾人戕繒子于繒」，書地，今不地，故決之云：「其不地，於蔡也。」言在蔡，故不地耳。

九月，丁卯，子同生。子同，桓公嫡子，莊公。○嫡，丁歷反，或作適。疑，故志之。莊公母文姜淫于齊襄，疑非公之子。<sup>①</sup>

【疏】「疑故志之」。○釋曰：文姜以桓三年入，至今四年矣，未有適齊之云，<sup>②</sup>而云疑者，蓋文姜未嫁之時，已與襄公通，後桓公殆為妻淫見殺，<sup>③</sup>則其間雖則適魯，襄公仍尚往來，故疑之也。子同生，《公羊》以為久無嫡子，喜國有正，故書之。《左傳》以為備用大子之禮，故書。此傳云「疑，故志之」，是三傳異也。

時曰，同乎人也。時人僉曰，齊侯之子，同於他人。○僉，七廉反。

冬，紀侯來朝。

七年，春，二月，己亥，焚咸丘。日之謹其惡。○惡，烏各反。

【疏】注「日之謹其惡」。○釋曰：侵、伐、圍、例時，故知書日，謹其惡也。

其不言邾咸丘，何也？據襄元年「圍宋彭城」，言宋。疾其以火攻也。不繫於國者，欲使焚邑之罪與焚國同。

夏，穀伯綏來朝，鄧侯吾離來朝。其名，何也？據隱十一年滕、薛來朝，不名。失國也。禮：諸侯不生名，失地則名。

【疏】注「禮諸至則名」。○釋曰：《曲禮》云「諸侯不生名，失地，名；滅同姓，名」是也。

失國則其以朝言之，何也？據文十二年

①「之」，原作「乏」，據宋刻元修本改。

②「云」，宋刻元修本作「文」。

③「殆」，宋刻元修本作「終」，阮校：「監、毛本『殆』作『始』，何校本作『終』。」

「邾伯來奔」，不名。

【疏】注「據文」至「不名」。○釋曰：哀十年「邾子益來奔」，昭二十三年「莒子庚與來奔」，彼來奔書名，彰其失地，則與此穀、鄧書名同，而范不據之。文十二年「邾伯來奔」，無名而反據之者，以邾、莒二國，更無所見，故依常書名言奔，表其失地，其邾伯與穀、鄧別有所見，與常例違，故據之以相決。何則？邾伯不言名而云來奔，穀、鄧書名而稱朝，二者相反，故特據之。邾伯與魯同姓，故不名以表其親，言奔以明失國。穀、鄧與魯有好，故言名以彰失國，稱朝以見和親。但入春秋以來，雖無同好之事，蓋春秋前有之。

嘗以諸侯與之接矣。雖失國，弗損吾異日也。待之以初也。下無秋、冬二時，甯所未詳。



監本附音春秋穀梁注疏桓公卷第四<sup>①</sup>

起八年，盡十八年

范甯集解 楊士勛疏

八年，春，正月，己卯，烝。春祭曰祠，薦尚韭卵。夏祭曰禴，薦尚麥魚。秋祭曰嘗，薦尚黍肫。冬祭曰烝，薦尚稻鴈。無牲而祭曰薦，薦而加牲曰祭，禮各異也。失禮祭祀例日，得禮者時，定八年冬「從祀先公」是也。僖八年「秋，七月，禘于大廟」，月者，謹用致夫人耳。禘無違禮。○烝，之承反。曰禴，餘若反，又作杓。黍肫，本又作豚，徒門反。大廟音泰，下同。

【疏】注「春祭」至「違禮」。○釋曰：所言四時祭名者，《周禮·大宗伯》及《爾雅》並有其事。薦尚韭卵之等，《禮記·王制》之文。何休云：「祠猶食也，猶繼嗣也。春物始生，孝子思親，繼嗣而食之也。」杓者，「麥始熟可杓也」。<sup>②</sup>嘗者，「黍先熟，可得薦，故曰嘗」。「烝，衆也。所薦衆多，芬芳備具，故曰烝。」郭璞等注《爾雅》，與何解四時祭名少異，但范之所引者，並與何氏同，故從何說。又云：「天子四祭四薦，諸侯三祭三薦，大夫士再祭再薦。天子諸侯卿大夫牲用太牢，天子元士諸侯卿大夫少

牢，諸侯之士特豕。天子之牲角握，諸侯角尺，卿大夫索牛。」此記異聞耳，未知范意與之同否。定八年「冬，衛侯、鄭伯盟于曲濮」，下即云「從祀先公」，是時而不月也。得禮例時，引定八年爲證，失禮例日，不引其文者，凡烝合在夏之十月，故何休云「祭必於夏之孟月者，取其見新物之月」是也。今正月爲之，違月隔年，故傳曰：「春興之，志不時也。」下文「夏，五月，丁丑，烝」，傳曰：「志不敬也。」二烝並書日以見非禮，此文即是非禮例日之證，故不復更引他文。其文二年「丁卯，大事于太廟」，亦是失禮書日也。正月烝，傳云「不時」，五月烝，傳云「不敬也」者，一失禮尚可，故以「不時」言之，再失禮重，故以「不敬」釋之。又注云，言禘無違禮。<sup>③</sup>案《明堂位》「季夏六月以禘禮祀周公於大廟」，僖公七月而禘，則是不時，而云「無違」者，周之七月，夏之五月，若值月前節却，則以四月相校不多，比之隔年再烝，失禮尚可，故曰「無違」也。文二年八月，則是夏之六月，而禘嘗者，亦是失禮，故書日，表逆祀及失

① 「卷第四」，原作「卷四」，今依例補。

② 「杓」，段玉裁云：「下『杓』字當作『杓』，說詳《公羊校勘記》。」

③ 「言禘無違禮」，原作「禘○無違禮」，宋刻元修本「禘」、「無」之間空格。阮校：「閩、監、毛本作『言禘無違禮』，是也。」今據改。

時也。宣八年六月有事于大廟，是得時而書日者，譏宣公卿死不廢繹也。

烝，冬事也。春興之，志不時也。

天王使家父來聘。家父，天子大夫。家，氏。父，字。

【疏】注「家父」至「父字」。○釋曰：何休云，中大夫，故不稱伯仲。范意或然。

夏，五月，丁丑，烝。烝，冬事也，春夏

興之，黷祀也，志不敬也。○黷，徒木反。<sup>①</sup>

秋，伐邾。

冬，十月，雨雪。《禮·月令》曰：「孟冬行秋令，則霜雪不時。」○雨，于付反。

祭公來，遂逆王后于紀。祭公，襄內諸侯，

爲天子三公者。親逆例時，不親逆例月，故《春秋左氏》說曰：「王者至尊無敵，無親逆之禮。祭公逆王后，未致京師而稱后，知天子不行而禮成也。」鄭君釋之曰：「大姒之家在郃之陽，<sup>②</sup>在渭之涘，文王親迎于渭，即天子親迎之明文矣。天子雖尊，其于后猶夫婦。夫婦叛合，<sup>③</sup>禮同一體，所謂無敵，豈施此哉！」《禮記·哀公問》曰：「冕而親迎，不已重乎？」孔子愀然作色而對曰：「合二姓之好，以繼先聖之後，以爲天地宗廟社稷之主，君何謂已重

焉？」此言親迎，繼先聖之後，爲天地宗廟社稷之主，非天子則誰乎？」○祭公，側界反。寰音縣，又音環。親迎，魚敬反，注皆同。大姒音似，大姒，文王妃也。郃音洽，本又作洽。<sup>④</sup>渙音仕。愀，在九反，又親小反。之好，呼報反。

【疏】注「祭公」至「誰乎」。○釋曰：此注之意，言《左氏》天子不合親迎，故引鄭君之釋，以明天子合親迎也。然文王之逆大姒時爲世子耳，得證天子之禮者，文王之爲世子，而聖賢相配，宜爲後王之法。故有「造舟爲梁」，又入《大雅》，明天子之法。又且魯不祭地，而云天地之主，是王者親逆之明文也。案《士昏禮》「士衣爵弁，是助祭之服，則大夫以上及五等諸侯，冕而親迎，亦當用助祭之服也。」

其不言使焉，何也？據四年「天王使宰渠伯糾」稱使。

【疏】注「據四」至「稱使」。○釋曰：此年「天王家父來聘」，五年「天王使任叔之子來聘」，范不據之，而遠

①「木」，原作「本」，據宋刻元修本及《釋文》改。

②「在郃之陽」，阮校：「《釋文》出「在郃」，本又作洽」。案：「郃」即「郃」，誤。

③「叛合」，阮校：「閩、監、毛本「叛」作「配」。按：今

《儀禮》作「胖合」，古本只作「半合」，或作「判合」。「洽」，宋刻元修本作「洽」。

據四年宰渠伯糾者，彼宰是官，此公亦是官故也。或亦隨便而言，無例矣。

不正其以宗廟之大事即謀於我，故弗

與使也。時天子命祭公就魯共卜，擇紀女可中后者便逆之，不復反命。○復，扶又反。遂，繼事之辭也。

其曰遂逆王后，故畧之也。以其遂逆無禮，故不書逆女而曰王后。畧謂不以禮稱之。

【疏】「遂繼事之辭也」。○釋曰：依范氏《畧例》，凡有十九「遂」事，傳亦有釋之者，亦有不釋者，此是例之首。又天子大夫嫌與諸侯臣異，故發「繼事之辭」。

莊十九年公子結言「遂」，傳云「以輕事遂乎國重，辟要盟也」。理在可知，故省文也。僖二十八年「諸侯遂圍許」，會溫已訖，中間有事，必恐不相繼，故發傳以明之。曹伯襄「遂會諸侯圍許」，恐彼釋而「遂」與常例異，故重發之。僖四年「遂伐楚」，恐華戎異，故重發以同之。宣元年「楚子、鄭人侵陳，遂侵宋」，嫌尊卑異，故亦發之。宣十八年歸父「遂奔齊」，嫌出奔不得同於繼事，故發之。襄十二年季孫宿「遂入鄆」，嫌不受命，與常例不同，故發之。自餘不發者，並可知故也。

或曰：天子無外，王命之則成矣。四

海之濱，莫非王臣。王命紀女爲后，則已成王后，不如諸侯人國乃稱夫人。或說是。

九年，春，紀季姜歸于京師。季姜，桓王后，書字者，申父母之尊。姜，紀姓。爲之中者，歸之也。中，謂關與婚事。○之中，丁仲反，又如字，注同。與音豫。

【疏】「爲之」至「之也」。○釋曰：劉夏逆王后，經不言歸，則是魯不關與婚事。而范氏《畧例》云：「逆王后有二者，以書逆王后，皆由過魯。若魯主婚而過我，則言歸。若不主婚而過我，則直言逆。」雖詳畧有異，俱是過魯，故范以二例總之。

夏，四月。

秋，七月。

冬，曹伯使其世子射姑來朝。朝不言使，言使非正也。使世子伉諸侯之禮而來朝，曹伯失正矣。諸侯相見曰朝。以待人父之道待人之子，以內爲失正矣。內失正，曹伯失正，世子可以已矣。則是

① 「戎」，原作「成」，宋刻元修本作「戎」。阮校：「毛本『成』改『戎』，是。」今據改。

故命也。<sup>①</sup>父有爭子，則身不陷於不義。射姑廢曹伯之命可。○射音亦，麋氏本即作亦。朝，直遙反。伉，苦浪反，本又作亢。爭，諫爭之爭。

【疏】「言使非正也」。○釋曰：季姬「使鄆子來朝」，復云「非正」者，嫌婦人所使與父命子異，故兩見之。使世子朝言「非正」者，禮：諸侯世子誓於天子，攝其君，則下其君一等，未誓則以皮帛繼子男。此謂會同急趨王命者也。今曹伯或有疾，朝雖闕朝魯，<sup>②</sup>未是急事，而使世子攝位來朝，故云非正也。《公羊》以爲世子不合朝，惟《左氏》以爲得行朝禮。

尸子曰：「夫已，多乎道。」邵曰：「已，止也。止曹伯使朝之命，則曹伯不陷非禮之愆，世子無苟從之咎，魯無失正之譏。三者正，則合道多矣。」○愆，去虔反。

十年，春，王正月，庚申，曹伯終生卒。桓無王，其曰王，何也？正終生之卒也。徐乾曰：「與夷見弑，恐正卒不明，故復明之。」○復，扶富反。

【疏】注「徐乾」至「明之」。○釋曰：案范答薄氏之駁云，「曹伯亢諸侯之禮，使世子行朝，故於卒示譏，則傳云正者，謂正治其罪」，則與徐解不同。而引其說者，以徐乾之說得通一家，故引之。范意仍與徐異。或以范意

權答薄氏，故云譏曹伯，若正說仍與徐同。

夏，五月，葬曹桓公。

秋，公會衛侯于桃丘，弗遇。桃丘，衛地。桓弑逆之人，出則有危，故會皆月之。衛侯不來，無危，故時。弗遇者，志不相得也。弗，內辭也。倡會者衛，魯至桃丘而衛不來，故書弗遇以殺恥。

【疏】「弗遇」至「辭也」。○釋曰：遇者，志相得之名，故此弗遇，志不相得也。「弗，內辭也」者，其實魯公弗被遇，託言衛侯不遇，故云：「弗，內辭也。」○注「倡會」至「殺恥」。○釋曰：以經書「會」，故知倡會者衛。託言衛侯不遇，則若衛侯不蒙魯公之接，故云「殺恥」也。

冬，十有二月，丙午，齊侯、衛侯、鄭伯來戰于郎。結日列陳則日。傳例曰：「不日，疑戰也。」○陳，直覲反。來戰者，前定之戰也。先已結期戰。○先，蘇薦反。內不言戰，言戰則敗也。兩敵故言戰，《春秋》不以外敵內，書戰則敗。不言其

①「故」，阮校：「石經作『放』。段玉裁云：『《太平御覽》百四十七卷引同。』」今按：《穀梁補注》亦作「放」。

②「朝雖闕朝魯」，《穀梁補注》引作「雖闕朝魯」。

人，以吾敗也。不言及者，爲內諱也。○爲，于僞反。

【疏】「來戰」至「諱也」。○釋曰：「內不言戰」，又發傳者，公敗宋師，起例之始。此戰沒公，故重發例以明之也。「不言其人」者，謂不稱公也。「不言及」者，謂不云及齊侯、衛侯、鄭伯也。傳與下十七年傳文同，但觀經立說，故二處有異耳。

十有一年，春，正月，齊人、衛人、鄭人盟于惡曹。惡曹，地闕。

夏，五月，癸未，鄭伯寤生卒。○寤，吾故反。

秋，七月，葬鄭莊公。莊公殺段，失德不葬，而書葬者，段不弟，於王法當討，故不以殺親親貶之。○弟，下並音悌，又如字。

【疏】注「不以」至「貶之」。○釋曰：此據晉侯殺世子申生不言葬而發。

九月，宋人執鄭祭仲。祭，氏。仲，名。執大夫有罪者例時，無罪者月，此月者，爲下盟。○祭，側界反。

【疏】注「祭氏」至「下盟」。○釋曰：知仲名者，以仲立惡黜正，無善可褒，故知仲名也。云「有罪者例時」者，莊十七年「春，齊人執鄭詹」，經不書月，傳曰：「以人執，與之辭也。」是執有罪書時之文也。言「無罪者月」者，

成十六年「九月，晉人執季孫行父，舍之於荅丘」，彼雖爲危書月，亦是無罪之例也。今祭仲有罪，而經書月，故注解之「書月者，爲下盟」耳。案襄二十七年「秋，七月，辛巳，豹及諸侯之大夫盟於宋」，書日，下云「柔會宋公、陳侯、蔡叔，盟于折」，不日者，柔是大夫之未命者也，不得同正大夫。又下貴於士，故雖得書名，仍從卑者之盟不日之例也。

宋人者，宋公也。其曰人，何也？貶之也。惡其執人權臣，廢嫡立庶。○惡，烏路反。嫡，丁歷反。

突歸于鄭。突，鄭厲公，昭公之弟，莊公之子。

曰突，賤之也。曰歸，易辭也。傳例曰：「歸爲善，自某歸次之。」此傳曰：「歸，易辭也。」然則歸有二義，不皆善矣。突篡兄之位，制命權臣，則歸無善。○易，以豉反，下文及注同。篡，初患反。

【疏】注「傳例」至「無善」。○釋曰：成十六年「曹伯歸自京師」，傳云：「歸爲善。」注云：「謂直言歸而不言其國，即曹伯歸自京師，不言于曹是。」自某歸次之，①注云：「若蔡季自陳歸于蔡，衛侯鄭自楚復歸于衛

①「某」，原作「來」，阮校：「按成公十六年傳「來」作「某」。今據改。」

是。」據彼傳文，則歸爲善。今傳曰「歸，易辭」，故解之。言歸有二意，善者謂之歸，易者亦謂之歸也。是稱歸有二，突惡而稱歸，是惡辭，非善也。

祭仲易其事，權在祭仲也。死君難，臣道也。今立惡而黜正，惡祭仲也。易辭，言廢立在此。○難，乃旦反。惡祭，烏路反。

鄭忽出奔衛。忽，鄭昭公。鄭忽者，世子忽也。其名，失國也。其名，謂去世子而但稱忽。○去，起吕反。

【疏】注「其名」至「稱忽」。○釋曰：鄭忽先君已葬而經不稱世子者，①《穀梁》之意，先君雖葬，而嗣子未踰年，亦宜稱子，即僖二十五年秋「葬衛文公」②冬，十有二月，癸亥，公會衛子、莒慶，盟于洮」是也。雖則踰年，先君未葬，亦不得成君，故下十二年「丙戌，衛侯晉卒」，十三年衛惠公稱侯，而注云「衛宣未葬，而嗣子稱侯以出，其失禮明矣」是也。計鄭忽父雖葬訖，仍未踰年，於例宜合稱子，但范以忽十五年歸國，稱世子復歸，故於此決其去世子而但稱忽也。稱謂與常例違者，此年書名，表其失國，十五年稱世子，明其反正，故與常例不同。

柔會宋公、陳侯、蔡叔，盟于折。蔡叔，蔡大夫名，未命，故不氏。折，某地。○折，之設反，又時設反。柔者何？吾大夫之未命者也。

【疏】「柔者」至「者也」。○釋曰：重發傳者，隱不成爲君，不爵大夫，故俠卒不氏。今桓成爲君，而有不命大夫，嫌有罪則故明之。③

公會宋公于夫鍾。夫鍾，郕地。○夫音扶，麋氏本鍾作童，音鍾。

冬，十有二月，公會宋公於闕。闕，魯地。○闕，口暫反。

十有二年，春，正月。

夏，六月，壬寅，公會紀侯、莒子，盟于曲池。曲池，魯地。

秋，七月，丁亥，公會宋公、燕人，盟于穀丘。穀丘，宋地。○燕音煙，國名。

八月，壬辰，陳侯躍卒。陳厲公也。○躍，

①「經」，原作「怪」，阮校：「『怪』當作『經』，閩、監、毛本不誤。」今據改。

②「衛」，原作「微」，阮校：「『微』當作『衛』，閩、監、毛本不誤。」今據改。

③「而有不命大夫嫌有罪則故明之」，《穀梁補注》引作「而有未命大夫嫌有罪故明之」。

餘若反。

公會宋公于虛。虛，宋地。○虛如字，又去魚反。

冬，十有一月，公會宋公于龜。龜，宋地。

丙戌，公會鄭伯，盟于武父。武父，鄭地。

○父音甫。

丙戌，衛侯晉卒。再稱日，決日義也。

明二事皆當日也。晉不正，非日卒者也。不正，前見矣，隱四年「衛人立晉」是也，與齊小白義同。○見，賢徧反。

【疏】「再稱」至「義也」。○釋曰：「決日」者，謂

二事決宜書日，故經兩舉日文也。月則不然，縱有兩事合月，但舉一月以包之。其有蒙日明者，則亦不兩舉，故范答薄氏云：「獲且之卒，異於日食之下，可知日是也。」<sup>①</sup>

○注「明二」至「義同」。○釋曰：納、入、立皆篡。隱四

年書「衛人立晉」，是不正前已見，故今書日。莊九年書

「齊小白入於齊」，是其惡已見，故僖十七年小白卒書日，

與此同也。

十有二月，及鄭師伐宋。丁未，戰于

宋。非與所與伐戰也。非，責。不言與鄭戰，

恥不和也。於伐與戰，敗也。內諱敗，舉其

可道者也。於伐宋而與鄭戰，內敗也。戰輕於敗，戰

可道而敗不可道。

【疏】「非與」至「者也」。○釋曰：麋信云：「此傳解經書下日之意也。非責魯，<sup>②</sup>言責魯又與其所與伐者戰也，<sup>③</sup>謂還與鄭戰。」然則責其還與鄭戰，<sup>④</sup>于理是也。言解經下日之意，則非也。何者？十三年公會紀侯鄭伯已巳云云戰，彼亦下日，豈又是責魯乎？麋信之說非也。蓋責與人同伐，反與之交戰，是危之道，故經舉戰伐以責之。既責魯，不顯言與鄭戰者，諱不和也。

十有三年，春，二月，公會紀侯、鄭伯。

己巳，及齊侯、宋公、衛侯、燕人戰。齊師、

宋師、衛師、燕師敗績。徐邈曰：「僖九年傳曰：

「禮：柩在堂上，孤無外事。」今衛宣未葬，而嗣子稱侯以出，其失禮明矣，宋、陳稱子而衛稱侯，隨其所以自稱者而書之，得失自見矣。」○柩，其救反。見，賢徧反。

【疏】注「徐邈」至「見矣」。○釋曰：宋稱子在僖

九年，陳稱子在二十八年。「得失自見」者，彼二君稱子是

①「獲且」至「是也」，《穀梁補注》引作「獲且之卒，連於日食之下，可知同日是也」。

②「非責魯」，《穀梁補注》引作「非責也」。

③「又」，宋刻元修本作「反」。阮校：「何校本作「反」。」

④「然則」，《穀梁補注》引作「其言」。

其得，今衛惠稱侯是其失也。僖三十三年「晉人及姜戎敗秦師于殽」，傳云：「晉人者，晉子也。」不正其釋殽，故貶之。此衛侯亦釋殽，所以不貶者，晉爲大國，不勞自戰，無故釋殽自戰，故貶稱人。今衛侯初立，須求好諸侯，今從齊、宋之命，未是大過，故譏而不貶。議者，據經稱侯，即是足見其惡。

其言及者，由內及之也。其曰戰者，由外言之也。內不言戰，言戰則敗。今魯與紀、鄭同討，以有紀、鄭，故可得言戰。

【疏】「其言」至「之也」。○釋曰：言「由內及之也」者，以文承紀、鄭之下，恐非獨內及，故特言之。又且下云「其曰戰者，由外言之也」。是戰從外稱，及是內辭。欲分別二事，故內外兩舉。傳「其不地，於紀也」者，《春秋》考異鄭云「時戰在魯之龍門」，故何休難云：「在紀無爲不地。」鄭玄云：「紀當爲己，在龍門城下，故不地。」何休注《公羊》亦云「戰魯龍門，兵攻城池，恥之」，故不地。是皆以紀爲己，非紀國也。

戰稱人，敗稱師，重衆也。其不地，於紀也。《春秋》戰無不地，即於紀戰，無爲不地也。鄭君曰：「紀當爲己，謂在魯也，字之誤耳。得在龍門，城下之戰迫近，故不地。」

### 三月，葬衛宣公。

夏，大水。  
秋，七月。  
冬，十月。

十有四年，春，正月，公會鄭伯于曹。

無冰。皆君不明去就，政治舒緩之所致。①《五行傳》曰：「視之不明，是謂不哲，厥咎舒，厥罰常燠。」○哲，陟列反，一本作哲，之列反。燠，於六反，煖也，下文同。

【疏】「無冰」。○釋曰：舊解傳云「無冰時煖也」，②謂無冰書時，燠，煖也。時字上讀爲句。因即解成元年正月公即位，二月葬宣公，三月作丘甲，「無冰」在其中，不是爲無冰書月可知也。此「正月，公會鄭伯於曹」，下云「無冰」，則「正月」者，直爲公會鄭伯，不爲無冰。何者？無冰一時之事，固當不得以月書也。徐邈亦然。今以爲成元年傳云「加之寒之辭也」，則無冰亦當蒙月也。傳云「無冰時燠也」者，謂今所以無冰者，正由時燠也。

- ①「政治舒緩之所致」，原作「政治紀緩之所置」，阮校：「閩、監、毛本『紀』作『舒』，『置』作『致』，是也。疏引同。」今據改，下疏标注起訖同。
- ②「云」，阮校：「閩、監、毛本作『文』。」



於字下讀，<sup>①</sup>理亦足通。○注「皆君不明去就政治舒緩之所致五行」至「罰常燠」。○釋曰：徐邈云：「無冰者，常陽之異，此夫人淫佚，陰為陽行之所致也。」何休注《公羊》亦然。今范云「皆君不明去就，政治舒緩之所致」，則非獨為夫人也。蓋為桓公闇於去就，不達是非，外不能結好鄰國，內不能防制夫人，又成亂助篡，貪賂廢祀，以火攻人，反與伐戰。此等皆是不能去就，<sup>②</sup>政教舒緩，故又引《洪範五行傳》曰：「視之不明，是謂不哲。」言人君愚闇，察視不明，是謂不昭哲也。其咎過在於舒緩，其天降譴罰，<sup>③</sup>常在時燠也。

無冰，時燠也。

夏五，夏五，本或有月者非。鄭伯使其弟禦來盟。諸侯之尊，弟兄不得以屬通。其弟云者，以其來我，舉其貴者也。來盟，前定也。不日，前定之盟不日。言信在前，非結於今。

○禦，魚呂反，本亦作御，《左氏》作語。

【疏】「諸侯」至「不日」。○釋曰：重發不以屬通例者，前「弟年來聘」，今「禦來盟」，嫌不同，故重發之。此云「前定之盟不日」，則成十一年「己丑，及郤犇盟」，是後定可知也。

孔子曰：「聽遠音者，聞其疾而不聞

其舒。疾謂激揚之聲，<sup>①</sup>舒謂徐緩。望遠者，察其貌而不察其形。」貌，姿體。形，容色。立乎定，哀，以指隱、桓、隱、桓之日遠矣，夏五，傳疑也。孔子在於定、哀之世，而錄隱、桓之事，故承闕文之疑不書月，明皆實錄。○傳，直專反。

【疏】注「明皆實錄」。○釋曰：言孔子承闕文之疑，不止「夏五」一事，故云「皆」也。

秋，八月，壬申，御廩災。御廩，藏公所親耕以奉粢盛之倉也。內災例日。○廩，力甚反。

【疏】注「御廩」至「例日」。○釋曰：御廩者，藏公所親耕之物，御用於宗廟，故謂之御廩。《祭義》云：「古者天子為藉千畝，冕而朱紘，躬秉耒，諸侯為藉百畝，冕而青紘，躬秉耒，以事天地山川社稷先古。」是公所親耕也。「內災例日」者，成三年「甲子，新宮災」，此云「壬

①「於」，據上文疑為「時」字之訛。

②「能」，宋刻元修本作「明」。

③「謹」，原作「謂」，阮校：「浦鏜云「謂」當「謹」誤，是也。」今據改。

④「激」，原作「溉」，阮校：「閩、監、毛本「溉」作「激」，是也。」今據改。

申，御廩災」，是例日也。

乙亥，嘗。御廩之災不志。以其微。

【疏】注「以其微」。○釋曰：舊解云：「災是大事，嘗亦不小，而云微者，周之八月，夏之六月，其六月之末，容得立秋之節祭，未足可書，比之災則爲微，當合舉重，而今並書之者，是未易災之餘可志，而已見其不敬，故兼志之。」如此解，則傳云「御廩之災不志」者，謂不當兼志之也。今以爲微者，直謂御廩災也，故徐邈云「不足志」是也。徐又云：「而嘗可也，言可以嘗。」可「上屬，與范注違，不得取之。」

此其志，何也？以爲唯未易災之餘而

嘗可也，志不敬也。鄭嗣曰：「唯以未易災之餘而嘗，然後可志也。用火焚之餘以祭宗廟，非人子所以盡其心力，不敬之大也。」○盡，注忍反。天子親耕，以共粢盛。天子親耕，其禮三推。黍稷曰粢，在器曰盛。○共音恭，一本作供。① 粢音咨。推，昌誰反，一音他回反。

【疏】注「天子」至「曰盛」。○釋曰：《月令》：

天子於孟春之月，「乃擇元辰，天子親載耒耜，措之參保介之御間，帥三公九卿、② 諸侯、大夫躬耕帝藉。天子三推，公五推，卿諸侯九推」，是其文也。

王后親蠶，以共祭服。王后親蠶，齊戒躬桑，

夫人三練，③ 遂班三宮。朱綠玄黃，以爲黼黻文章，服既成，君服以祀之。○齊戒，側皆反，本亦作齋。纁，先刀反。黼音甫，亦作黼。④ 黻音弗，俗作紱。⑤

【疏】注「王后」至「祀之」。○釋曰：王后親蠶，齊戒躬桑，《月令》文。夫人三練，遂班三宮云云，《祭義》文。故彼云：「古者天子諸侯必有公桑蠶室，近川而爲之，築宮仞有三尺，棘牆而外閉之。及大昕之朝，君皮弁素積，卜三宮之夫人世婦之吉者，使人蠶于蠶室，奉種浴于川，桑于公桑，風戾以食之。」鄭玄云：「大昕，季春朔日之朝也。諸侯夫人三宮，半王后也。」又云：「及良日，夫人練，三盆手，遂布于三宮夫人世婦之吉者，使練，遂朱綠之，玄黃之，以爲黼黻文章。服既成，君服以祀先王先公，敬之至也。」鄭玄云「三盆手者，三淹也。凡纁，每淹，大總而手振之以出緒也」是也。

國非無良農工女也，以爲人之所盡事

① 「供」，宋刻元修本作「恭」。

② 「帥」，原作「師」，阮校：「閩、監、毛本「師」作「帥」，是也。」今據改。

③ 「練」，阮校：「閩、監、毛本「練」作「纁」，疏同。《釋文》出「三纁」，「練」乃誤字。」

④ 「黼」，宋刻元修本及《釋文》作「黼」。

⑤ 「紱」，宋刻元修本作「紱」。

其祖禰，不若以己所自親者也。凱曰：「夫治人之道，莫急於禮。禮有五經，莫重於祭。祭者非物自外至者也，由中出者，身致其誠信，然後可以交於神明，祭之道也。」○禰，乃禮反。

【疏】注「禮有」至「道也」。○釋曰：《祭統》文。鄭玄云：「五經者，吉、凶、賓、軍、嘉也。莫重於祭，謂以吉禮爲首也。《大宗伯》職曰，以吉禮事邦國之鬼神祇。」

何用見其未易災之餘而嘗也？曰，甸粟而內之三宮，三宮米而藏之御廩。甸，甸師，掌田之官也。三宮，三夫人也。宗廟之禮，君親割，夫人親春。○親春，傷容反。

【疏】注「甸甸」至「親春」。○釋曰：傳言「甸粟」，知是掌田之官也。禮：王后六宮，諸侯夫人三宮也。故知「三宮」是三夫人宮也。「禮，宗廟之禮，君親割，夫人親春」者，<sup>①</sup>文十三年傳文。傳「兼甸之事焉」者，<sup>②</sup>納粟者甸師，而夫人親春，是兼之也。

夫嘗，必有兼甸之事焉。<sup>③</sup>夫人親春，是兼甸之事。○兼甸如字，一本作甸，十日爲甸，注亦然。

壬申，御廩災，乙亥，嘗，以爲未易災之餘而嘗也。鄭嗣曰：「壬申、乙亥相去四日，言用日至少而功多，明未足及易而嘗。」

冬，十有二月，丁巳，齊侯祿父卒。

宋人以齊人、蔡人、衛人、陳人伐鄭。以者，不以者也。民者，君之本也。使人以其死，非正也。不以者，謂本非所得制，今得以之也。刺四國使宋專用其師，輕民命也。○刺，七賜反。

十有五年，春，二月，天王使家父來求車。古者諸侯時獻于天子，以其國之所有，故有辭讓，而無徵求。求車，非禮也。求金，甚矣。文九年「毛伯來求金」。

【疏】「求車」至「甚矣」。○釋曰：求賻、求金並發傳者，以所求不同，故各發之。不云「求賻，甚」，而云「求金，甚」者，喪事有賻，但求之非禮，金非喪所供，故以

①「禮宗」至「春者」，文十三年傳文作「禮：宗廟之事，君親割，夫人親春，敬之至也」。范注蓋約其文。

②「甸」，王引之《經義述聞》：「今本正文及注內「甸」字皆作「甸」，乃涉上文「甸」字而誤。……《釋文》及唐石經並作「甸」。《釋文》曰：「甸，如字，十日爲甸。一本作「甸」。」

③「甸」，阮校：「石經「甸」作「甸」。」

爲甚。傳「反正也」者，釋其稱世子也。<sup>①</sup>

三月，乙未，天王崩。桓王。

夏，四月，己巳，葬齊僖公。

五月，鄭伯突出奔蔡。譏奪正也。禮：

諸侯不生名。今名突，以譏之。

鄭世子忽復歸于鄭。反正也。

許叔入于許。傳例曰：「大夫出奔反，以好曰

歸，以惡曰入。」

【疏】注「傳例」至「曰入」。○釋曰：莊九年傳文。

許叔，許之貴者也，莫宜乎許叔。其曰

入，何也？其歸之道，非所以歸也。泰曰：

「許國之貴，莫過許叔。叔之宜立，又無與二。而進無王命，退非父授，故不書曰歸，同之惡人。」

公會齊侯于蒿。○蒿，《左氏》作艾，公羊作

鄆。

邾人、牟人、葛人來朝。何休曰：「桓公行

惡，而三人俱朝事之，三人爲衆，衆足責，故夷狄之。」

○行，下孟反，又如字。

秋，九月，鄭伯突入于櫟。櫟，鄭邑也。突

不正，書入，明不當受。○櫟，力狄反。

【疏】注「櫟鄭」至「當受」。○釋曰：案「齊小白

入于齊」，傳曰：「以惡曰入。」「衛侯朔入衛」，<sup>②</sup>傳曰：

「入者，內弗受也。」蓋舊爲國君而入者，則是內不受，若

「衛侯朔入于衛」，「鄭伯突入于櫟」是也。公子不正取國

者，則是以惡故曰入，<sup>③</sup>若「許叔入于許」，「齊小白入于齊」

是也。觀范之注，其事必然，但舊無此解，不敢輒定。或

當以惡人者，即內不當受，傳文互舉之，其實不異，理亦通

耳。

冬，十有一月，公會宋公、蔡侯、陳侯于

袤，伐鄭。袤，宋地。○袤，昌氏反。地而後伐，

疑辭也，非其疑也。鄭突欲篡國，伐而正之，義也。

不應疑，故責之。

十有六年，春，正月，公會宋公、蔡侯、

衛侯于曹。

夏，四月，公會宋公、衛侯、陳侯、蔡侯

伐鄭。蔡常在衛上，今序陳下，蓋後至。

①「傳反正也者釋其稱世子也」，阮校：「浦鏜云：當

在下「鄭世子忽復歸於鄭」傳下。」

②「入」下，《穀梁補注》有「于」字。

③「故」，宋刻元修本作「入」。阮校：「何校本「故」作

【疏】注「蔡常」至「後至」。○釋曰：桓五年「蔡人、衛人、陳人從王伐鄭」，此春「公會宋公、蔡侯、衛侯于曹」，是蔡常在衛上，今在下，故知後至。

秋，七月，公至自伐鄭。桓無會，其致何也？危之也。桓公再助篡伐正，危殆之甚，喜得全歸，故致之。

【疏】注「桓公」至「致之」。○釋曰：公與諸侯此年為突伐鄭，前年雖為忽討突，疑而不用心，亦是其助，故云「再助」也。范答薄氏駁云：「明桓伐突非本心，故言再助是也。」范必知前年為忽伐鄭，而此年為突伐鄭者，以前年責其疑，若是伐嫡而疑，則不足可責，明是為忽討突也。此年傳云：「桓無會，其致何也？危之也。」若是助嫡，則不須云危，故知是助突討忽也。

冬，城向。○向，舒尚反。<sup>①</sup>

十有一月，衛侯朔出奔齊。朔，惠公名。

朔之名，惡也，天子召而不往也。

【疏】「朔之」至「往也」。○釋曰：不云失地，而言惡者，以朔不奉王命，重於失地，故直云惡也。

十有七年，春，正月，丙辰，公會齊侯、

紀侯，盟于黃。黃，齊地。

二月，丙午，公及邾儀父盟于越。越，魯

地。○越，翠軌反。

夏，五月，丙午，及齊師戰于郎。內諱敗，舉其可道者也。敗恥大，戰恥小。○戰于郎，《左氏》作于奚。不言其人，以吾敗也。言人則微者，敗於微者，其恥又甚，故言師。不言及之者，為內諱也。及當有人，公親帥之，恥大不可言。<sup>②</sup>○為，于偽反。

【疏】注「公親帥之」。○釋曰：知非卿帥而言公者，《春秋》之義，唯為親尊諱，不為卿諱。又傳云「為內諱」，則是公可知。

六月，丁丑，蔡侯封人卒。

秋，八月，蔡季自陳歸于蔡。蔡季，蔡之貴者也。自陳，陳有奉焉爾。陳以力助。

癸巳，葬蔡桓侯。徐邈曰：「葬者臣子之事，故書葬皆以公配諡。此稱侯，蓋蔡臣子失禮，故即其所稱以示過。」

【疏】葬蔡桓侯。○釋曰：何休云：「蔡季賢

<sup>①</sup>「尚」，《釋文》作「亮」。

<sup>②</sup>「大」，原作「有」，據宋刻元修本改。

而桓侯不能用，故抑之。」杜預云：「疑謬誤。」范以爲臣子失禮稱侯，既就其所稱以示過。三傳無文，各以意說。

及宋人、衛人伐邾。

冬，十月，朔，日有食之。言朔不言日，食既朔也。既，盡也。盡朔一日，至明日乃食，是月二日食也。

【疏】注「既盡」至「食也」。○釋曰：知二日者，以傳云「食既朔」也。言食盡朔，是二日明矣。

十有八年，春，王正月，公會齊侯于

濼。此年書王，以王法終始治桓之事。○濼，力沃反，又音洛，舊音匹沃反。公與夫人姜氏遂如齊。公本與夫人俱行，至濼，公與齊侯行會禮，故先書會濼，既會而相隨至齊，故曰遂。遂，繼事之辭，他皆放此。濼之會，不言及夫人，何也？據夫人實在，當言公及夫人姜氏會齊侯于濼。

【疏】注「據夫」至「于濼」。○釋曰：決僖公十一年「公及夫人姜氏會齊侯于陽穀」是也。《公羊》以爲此不言及，夫人外公也。《左氏》無正文。或當以公男女無別，故不言及，並與《穀梁》異。

以夫人之伉，弗稱數也。濼之會，夫人驕伉，不可言及，故舍而弗數。今書遂如齊，欲錄其致變之

由，故不可以不書。實驕伉而不制，故不言及。○伉，本又作亢，苦浪反。數，色戶反。③舍音捨。

夏，四月，丙子，公薨于齊。夫人與齊謀殺之，不書，諱也。魯公薨，正與不正皆日，所以別内外也。○別内外，彼列反。其地，於外也。薨稱公，舉上也。公，五等之上。

【疏】「其地」至「上也」。○釋曰：據隱、閔不地，故決之也。其外諸侯之卒皆不言公，尊內，故舉五等之上也。

丁酉，公之喪至自齊。

秋七月。

冬，十有二月，己丑，葬我君桓公。葬我君，接上下也。言我君，舉國上下之辭。

【疏】「葬我」至「下也」。○釋曰：公者，臣子之

①「王正月」，王引之《經義述聞》認爲：「是年經文無

「王」字，「王」字應是衍文，「范所見本已增「王」字」。

②「始」，原無，阮校：「嚴杰云元本《左傳》桓三年正義

引「治」字上有「始」字，是也。」今據補。

③「戶」，原作「祖」，據宋刻元修本及《釋文》改。

稱也。我君者，接及舉國上下之辭。

君弑，賊不討，不書葬，此其言葬，何也？據隱公不書葬。不責踰國而討于是也。

禮：君父之讎，不與共戴天。而曰「不責踰國而討于是」者，時齊強大，非已所討，君子即而恕之，以申臣子之恩。

【疏】「不責」至「是也」。○釋曰：不責其討而譏其狩于郕者，齊魯大小不敵，故恕而免之；公雖不能報，理當絕交，而與之同狩，故譏之也。

桓公葬而後舉謚。謚所以成德也，於

卒事乎加之矣。謚者行之迹，所以表德。人之終卒，事畢於葬，故於葬定稱號也。昔武王崩，周公制謚法，大行受大名，小行受小名，所以勸善而懲惡。禮：天子崩，稱天命以謚之。諸侯薨，天子謚之。卿大夫卒，受謚於其君。○行之，下孟反。下同。稱，尺證反。

【疏】注「謚者」至「其君」。○釋曰：以《左傳》無駭卒，羽父請謚於隱公，是大夫謚諸侯賜之。諸侯既有王者，故知天子賜之。《禮記》云：「天子稱天以誅之。」又《公羊》說天子謚於南郊，在天子上者唯天耳，故知稱天命以謚。

知者慮，義者行，仁者守。有此三者備，然後可以會矣。桓無此三者而出會大國，所以

見殺。○知音智，守如字，又音狩。

【疏】「知者」至「會矣」。○釋曰：復發傳者，隱公表會戎之危，此明桓公見殺之事，故重發之也。

# 監本春秋穀梁注疏莊公卷第五<sup>①</sup>

起元年，盡十八年

范甯集解 楊士勛疏

莊公

【疏】《魯世家》：莊公名同，桓公之子，以莊王四年即位。《謚法》：「勝敵克壯曰莊。」

元年，春，王正月。繼弑君，不言即位，正也。

【疏】「繼弑」至「正也」。○釋曰：桓繼弑即位，非正，故此言正以明之。傳「始人之也」，<sup>②</sup>既以人道錄之，又不言氏姓貶之者，公以練祭，感母不與，故以人道錄之，但以妻殺夫，罪同至逆，不可不貶，故又以人道絕之，所以進退見法也。計桓公以十八年四月薨，至此年三月，未是練時，而云練祭感母不與者，至四月則當練，今方至練，故感之而思母。故何休云：「月者，起練祭左右。」是其意亦以四月為練也。

繼弑君不言即位之為正，何也？據君不

絕。曰，先君不以其道終，則子不忍即位也。

三月，夫人孫于齊。桓公夫人文姜也。哀姜有殺子之罪輕，故僖元年曰「夫人氏之喪至自齊」，去「姜」以貶之。文姜有殺夫之罪重，故去「姜氏」以貶之。此輕重之差。○孫音遜，本亦作遜。<sup>③</sup>去，起呂反，下「去姜」同。孫之為言猶孫也，孫，孫遁而去。○遁，徒困反。諱奔也。接練時，錄母之變，始人之也。夫人初與桓俱如齊，今又書者，於練時感夫人不與祭，故始以人道錄之。○與祭音豫。

不言氏姓，貶之也。人之於天也，以道受命；於人也，以言受命。臣子則受君父之命，婦受夫之命。

① 今按：此本各卷標目多有不同。卷五至卷十四、卷十七至卷二十無「附音」二字；卷四、卷十六無「第」字。疑非完本。

② 「傳始人之也」，阮校：「閩、監、毛本以此下疏文移屬下注「以人道錄之」下，「傳」誤作「注」。案：此傳在下，疏當下屬，此本誤也。」

③ 「亦作遜」，阮校引段玉裁云：「古經典無「遜」字，「亦作遜」者非是。」



【疏】傳「人之」至「受命」。<sup>①</sup> ○<sup>②</sup>釋曰：天之道，

臣事君，子事父，妻事夫也。夫者妻之天，故曰「人之於天也，以道受命」，謂事夫之道也。臣子之法，當受君父教令，故曰「於人也，以言受命」。「不若於道者，天絕之也」，謂文姜殺夫，是不順於道，故天當絕之。「不若於言者，人絕之也」，謂臣子不順君父之命，則君父當絕之。「臣子大受命」，謂君父既絕天人，臣子受君父之命，故不得不貶也。其注云「臣子則受君父之命」者，解經中「以言受命」也。云「婦受夫之命」者，解「以道受命」也。恐此說非也，但舊爲此解，不得不述。或當「人之於天也，以道受命」，謂順天道以事夫也。「於人也，以言受命」，謂臣受君命也。不順於道者天絕之，天道妻當事夫，今夫人反弑公，是不順天也，故天絕之。不順於言者，人絕之，謂婦當受夫之命，夫人不受夫命，是不順人也，故人絕之。「臣子大受命」者，臣謂羣下，子謂莊公，上受命於天，下受命於君，是大受命也。以其受君天之命，故臣子得貶退夫人也。

不若於道者，天絕之也。若順。不若於

言者，人絕之也。臣子大受命。言義得貶夫人。

夏，單伯逆王姬。單，姓也。伯，字。○單音

善。單，姓；伯，字；《左氏》以爲王卿士。逆王姬，《左氏》作送王姬。單伯者何？吾大夫之命乎天子者也。命大夫，故不名也。諸侯歲貢士于天

子，天子親命之，使還其國。爲大夫者不名，天子就其國命之者，以名氏通也。

【疏】注「諸侯」至「通也」。○釋曰：知諸侯貢士

于天子者，傳稱「國、高在」，又何休云「大國舉三人，次國舉二人，小國舉一人」，是有貢士之法。今單伯，天子命大夫，故不名，知書名者，就國命之。

其不言如，何也？據僖三十年「公子遂如京

師」，言「如」。其義不可受於京師也。其義不

可受於京師，何也？曰，躬君弑於齊，<sup>④</sup>使

之主婚姻，與齊爲禮，其義固不可受也。

禮：尊卑不敵，天子嫁女于諸侯，必使同姓諸侯主之。魯桓親見殺于齊，若天子命使爲主，則非禮大矣。《春秋》

①「傳人之至受命」，阮校：「此疏闕、監、毛本在注「義得貶夫人」下，「傳」作「注」誤。」

②「○」，原無，據全書體例補。下同，不另出校。

③「三十年」，原作「二十九年」，阮校：「毛本「二」作「三」，案當作「三十」。」今按：「公子遂如京師」在僖

公三十年，據改。

④「躬君」，《穀梁補注》作「君躬」。又王引之《經義述聞》曰：「躬君弑於齊」當作「君躬弑於齊」。唐初「君」字已誤倒於「躬」字之下。」

爲尊者諱，故不可受之于京師。○弑又作殺。爲尊，于僞反，下「爲之築」同。

【疏】注「禮尊」至「京師」。○釋曰：天子嫁女于諸侯，必使同姓諸侯主婚之意者，天子與諸侯尊卑不敵，若行君臣之禮，則廢婚姻之好，若行婚姻之好，則廢君臣之禮，故使諸侯主之。

秋，築王姬之館于外。築，禮也。于外，非禮也。外，城外也。

【疏】「于外非禮也」。○釋曰：《左氏》以爲築于外，禮也。此云「非禮」者，以主王姬者，必自公門出，今築之于外，則是營衛不固，是輕王女，故云「非禮」。謂非正禮耳，於變禮則通也。

築之爲禮，何也？主王姬者，必自公

門出。公門，朝之外門。主王姬者，當設几筵于宗廟以俟迎者，故在公門之內築王姬之館。○朝之，直遙反，下「於朝」同。迎，魚敬反，下同。於廟則已尊，於寢則已卑。爲之築，節矣。築之外，變之正也。築之外，變之爲正，何也？仇讎之人，非所以接婚姻也。衰麻，非所以接弁冕也。親迎服祭服者，重婚姻也。公時有桓之喪。○衰，七回反。弁，皮彥反。

【疏】注「親迎」至「之喪」。①○釋曰：禮稱冕而親迎，是服祭服也。弁冕者，連言之。《周禮》「弁師掌王之五冕」，故傳亦通言之。

其不言齊侯之來逆，何也？不使齊侯得與吾爲禮也。

【疏】「不使」至「禮也」。○釋曰：二十四年「夏，公如齊逆女」，傳云：「親迎，恒事也，不志。此其志，何也？不正其親迎於齊也。」然則不言齊侯之來逆，乃是常事不錄，而云「不使齊侯得與吾爲禮也」者，《春秋》之例，得常不書。莊公親逆，是禮而書，故知非其逆於齊也。今王姬嫁於齊，而使魯爲主，齊侯如魯親逆，當合書經。但齊是魯讎，不使齊侯得與吾爲禮，故不書之耳。舊解齊侯親逆不至京師，文王親逆不至于治，則天子諸侯親迎，皆不至婦家矣。今恐不然。何者？此時王姬魯主婚，故不至京師。《詩》稱「親迎于渭」者，爲「造舟爲梁」張本，焉知文王不至大妣之家？畧舉所疑，遺諸來哲。

冬，十月，乙亥，陳侯林卒。諸侯日卒，正也。

【疏】「日卒正也」。○釋曰：重發之者，此共「錫

①「注」，原無，夏校據阮本體例補，今從之。

命」相連，恐日月之爲「錫命」而錄，故傳明之。

王使榮叔來錫桓公命。榮，氏；叔，字；

天子之上大夫也。禮有九錫，一曰輿馬，二曰衣服，三曰樂則，四曰朱戶，五曰納陛，六曰虎賁，七曰弓矢，八曰鈇鉞，九曰桓鬯，皆所以褒德賞功也。德有厚薄，功有輕重，故命有多少。何休曰：「桓弑逆之人，王法所宜誅絕，而反錫命，悖亂天道，故不言天王也。」文五年「王使榮叔歸含且贈」，則曰「含者，臣子之職也，以至尊行卑事」，故不言天王也。三月「王使毛伯來會葬」，又曰「刺比失禮」，故亦不言天王也。甯案，僖二十四年「天王出居于鄭」，不可最大矣。禮，天子既有贈含之制，傳但譏二事共一使耳，言「且」所以示譏，一事無再貶之道也。以天王之尊，會人妾祖母之葬，誠失禮矣。孰若使任叔之子來聘，使家父來求車之不可乎？此三者皆言天王，明非義之所存。舊史有詳畧，夫子因而弗革，故知曲說雖巧，致遠則滯矣。○錫，星歷反。賁音奔。鈇，方胡反。鉞音越。桓音巨，黑黍。鬯，勑亮反，香酒也。悖，補對反。含，胡暗反。贈，芳鳳反。刺，七賜反。一使，所吏反。任音壬。滯，乃計反，一本作泥。

【疏】注「禮有」至「多少」。○釋曰：「九錫」者，

出《禮緯》文也。此九錫與《周禮》九命異。何休注《公羊》，既引九錫之文，即云「百里不過九命，七十里不過七命，五十里不過五命」，其意以九錫即是九命也。今知何說非者，案《大宗伯》「以九儀之命，正邦國之位，一命受

職，再命受服，三命受位，四命受器，五命受則，六命賜官，七命賜國，八命作牧，九命作伯」，其言與九錫不同，明知異也。今范引九錫之下直云「皆所以褒德賞功也。德有厚薄，功有輕重，故命有多少」，則亦以九錫異也。但此九錫亦是賜命之類，故引之。或以范亦與何同，恐非也。《白虎通》云：「能安民者賜車馬，能富民者賜衣服，能和民者賜樂則，民衆多者賜朱戶，能進善者賜納陛，能退惡者賜虎賁，能誅有罪者賜鈇鉞，能征不顯者賜弓矢，<sup>①</sup>孝道備者賜桓鬯。」亦是有功特賜，不關九命之事也。舊說解九錫之名，一曰輿馬，大輅、戎輅各一，玄馬二也。二曰衣服，謂玄衮也。三曰樂則，謂軒縣之樂也。四曰朱戶，謂所居之室朱其戶也。五曰納陛，謂從中階而升也。六曰虎賁，謂三百人也。七曰弓矢，彤旅之弓矢也。八曰鈇鉞，謂大柯斧，賜之專殺也。九曰桓鬯，謂賜桓鬯之酒，盛以圭瓚之中，以祭祀也。

禮有受命，無來錫命。錫命，非正也。

賞人於朝，與士共之，當召而錫也。《周禮·大宗伯》職曰「王命諸侯則儔之」，是來受命。○朝，直遙反。儔，必刃反。生服之，死行之，禮也。生不服，死追錫之，不正甚矣。

①「不顯」，阮校：「何校本「顯」作「順」。按：今《白虎通》作「義」。」

【疏】「不正甚矣」。○釋曰：文公踰年而賜，成公八年乃賜，桓公死後追賜，三者異時，嫌不得相蒙，故並皆發傳。此追命失禮最大，故以「甚」言之。

王姬歸于齊。爲之中者歸之也。

【疏】「爲之中者歸之也」。○釋曰：十一年「王姬歸于齊」，傳曰「過我也」，此云「爲之中者歸之」，發傳不同者，此王姬由魯而嫁，故曰「爲之中者」，彼王姬非魯主婚，故直云「過我也」。

齊師遷紀、邢鄆部。紀，國也。邢鄆部，

國也。當言改以明之。郊牛之口傷，此國以三言爲名。○邢，步丁反。鄆，子移反。鄆音吾。或

曰，遷紀于邢鄆部。十年「宋人遷宿」，傳曰：「遷，亡辭也。其不地，宿不復見矣。」齊師遷紀，四年復書「紀侯大去其國」者，紀侯賢，不與齊師之亡紀，故變文以見義。邢鄆部之君，無紀侯之賢，故不復見，從常例也。若齊師遷紀于邢鄆部，當言「于」以明之，又不應復書地，當如宋人遷宿、齊人遷陽。「或曰」之說，甯所未詳。○復，扶又反。見，賢徧反。

【疏】注「不應復書地」。○釋曰：此范難「或曰」之說，言宿、陽既亡不地，則此亦不應復書地，何書「於邢鄆部」乎？

二年，春，王二月，葬陳莊公。

夏，公子慶父帥師伐於餘丘。慶父，名，字仲父。國而曰伐。於餘丘，邾之邑也。其曰伐，何也？公子貴矣，師重矣。而敵人之邑，公子病矣。病公子，所以譏乎公也。其一曰，君在而重之也。邾君在此邑，故不繼于邾，使若國。

【疏】注「邾君」至「若國」。○釋曰：觀傳上文「其曰伐，何也？公子貴矣」云云，「所以譏乎公」也，則是解其稱伐之意。而范注解「一曰」之義，則似解不繼于邾者，一曰君在而重之也，亦是解其稱伐之意。言邑而稱伐者，爲君在重之，使若國然，故邑亦稱伐，是上下不相違也。

秋，七月，齊王姬卒。爲之主者，卒之也。主其嫁則有兄弟之恩，死則服之。服之，故書卒。《禮記》曰：「齊告王姬之喪，魯莊公爲之大功。」○爲之大功，于僞反。

【疏】「秋七月」云云。○釋曰：何休云：「內女卒日，此不日者，<sup>①</sup>恩實輕於內女。」案成八年「冬，十月，癸

<sup>①</sup>「內女卒日此不日者」，《穀梁補注》引作「內女卒例日外女卒不日者」。

卯，杞叔姬卒」，書日。此不書日，是輕於內女也。

冬，十有二月，夫人姜氏會齊侯于禚。禚，齊地。○禚，章畧反。婦人既嫁不踰竟，踰竟，非正也。婦人不言會，言會，非正也。饗，甚矣。饗在四年。○踰竟，音境，後「踰竟」例皆同。

乙酉宋公馮卒。○馮，皮冰反。

【疏】「乙酉宋公馮卒」。○釋曰：案《世本》：

馮是宋莊公，穆公之長子。宋督既弑與夷，則馮是當正，故亦書日卒也。

三年，春，王正月，溺會齊侯伐衛。徐邈曰：「傳例曰：『往月，危往也。』齊受天子罪人，爲之興師，而魯與同，其理危也。」○溺，乃狄反。

【疏】注「傳例」至「往也」。○釋曰：定八年傳文。會例時，齊魯黨大是罪人，<sup>①</sup>故書月以見危也。

溺者何也？公子溺也。其不稱公子，何也？據二年「公子慶父帥師伐於餘丘」，稱公子。

惡其會仇讎而伐同姓，故貶而名之也。○惡，烏路反。

夏，四月，葬宋莊公。月葬，故也。

五月，葬桓王。傳曰，改葬也。若實改葬，當言改以明之。郊牛之口傷，<sup>②</sup>改卜牛是也。傳當以七年乃葬，故謂之改葬。

【疏】傳曰改葬也。○釋曰：傳云「改葬」，而范達之者，以經不言「改」，故知非改葬也。傳言「改」者，以見喪踰七年，已行吉禮，今始反服喪服，故謂之「改葬」。又《感精符》云：「恒星不見，夜中，星隕如雨，而王不懼，使榮叔改葬桓王冢，奢麗大甚。」如讖之言，則改葬桓王在恒星不見之後，故范謂此時非改葬也。

改葬之禮，總，舉下，緬也。總者五服最下，言舉下緬上，從總，皆反其故服。因葬桓王，記改葬之禮，不謂改葬桓王當服總也。猶「晦，震夷伯之廟」，因明天子諸侯之制，不謂夷伯非魯之大夫也。甯之先君，與蔡司徒論之詳矣。江熙曰：「葬稱公，舉五等之上，改葬禮總，舉五服之下，以喪緬貌遠也。天子諸侯易服而葬，以爲交於神明者，不可以純凶，況其緬者乎？是故改葬之禮，其服唯輕。言緬，釋所以總也。」○總，息詞反。緬，亡善反，遠也。

【疏】注「總者」至「總也」。○釋曰：五服者，案

①「大是」，阮校：「閩、監、毛本『是』作『惡』，何校本『大是』作『天是』，云『是』疑『子』。」

②「郊牛」，宋刻元修本作「郊生」。

《喪服》有斬衰、齊衰、大功、小功、緦麻是也。改葬之禮，各從本服，但緦麻者是五服之下，故傳云，改葬之禮，緦者舉下以緦上也。不謂改葬桓王之時，唯服緦耳。蔡司徒者，謂蔡謀也。<sup>①</sup>江熙以爲改葬之禮，其服唯輕，故云「天子諸侯易服而葬」，以證唯緦耳。知「天子諸侯易服而葬」者，《檀弓》云：「弁經葛而葬，與神交之道也。」鄭玄云：「接神之道，不可以純凶，天子諸侯，變服而葬，冠素弁，以葛爲環經。既虞，卒哭，乃服受服也。」變服者，謂未葬以前服麻，葬則易之以葛也。

或曰，卻尸以求諸侯。停尸七年，以求諸侯會葬，非人情也。○卻尸，去畧反，又去逆反。杜預云：「尸，未葬之通稱。」天子志崩不志葬，必其時也。何必焉？舉天下而葬一人，其義不疑也。志葬，故也，危不得葬也。曰，近不失崩，不志崩，失天下也。京師去魯不遠，赴告之命，可不踰旬而至。史不志崩，則亂可知。

【疏】注「京師」至「可知」。○釋曰：王城去魯纔餘千里，赴喪者旬日而至，史不記崩，亂可知也。

獨陰不生，獨陽不生，獨天不生，三合然後生。徐邈曰：「古人稱萬物負陰而抱陽，沖氣以爲和。然則傳所謂天，蓋名其沖和之功，而神理所由也。」

會二氣之和，極發揮之美者，不可以柔剛滯其用，不得以陰陽分其名，故歸於冥極而謂之天。凡生類稟靈知於天，資形於二氣，故又曰獨天不生，必三合而形神生理具矣。○揮，許歸反。冥，亡丁反。稟，使錦反。知於音智。故曰母之子也可，天之子也可，尊者取尊稱焉，卑者取卑稱焉。王者尊，故稱天子。衆人卑，故稱母子。○母之子也可，絕句，下倣此。尊稱，尺證反，下「卑稱」同。

【疏】傳「獨陰不生」至「稱焉」。○釋曰：凡物之生，皆資二氣之和，稟上天之靈知，不可以柔剛滯其用，不得以陰陽分其名，故云「三合然後生」也。雖資三合，然終推功冥極，故云「天之子」也。託之人事，故又曰父之子、母之子也。天則感生者衆，言天足以兼父，不得云「父子」，而曰「天子」，衆人或知母而不知父，故云「母子」，亦不云「父子」也。衆人亦稟天氣而生，不云「天子」者，天子取尊稱，故稱「天子」，衆人取卑稱，故稱「母子」也。傳因論天子崩葬，故明其別稱也。然則陰能成物，陽能生物，

①「蔡謀」，阮校：「何校本「謀」改「謨」。按：蔡謨字道明，謚文穆，《晉書》有傳。」

②「玄」，原作「云」，阮校：「閩、監、毛本上「云」作「元」。「元」即爲「玄」之避諱字，今據改。」

天能養物，而總云生者，凡萬物初生，必須三氣合，四時和，然後得生，不是獨陽能生也。<sup>①</sup>但既生之後，始分繫三氣耳。注云「不可以剛柔滯其用，不得以陰陽分其名」者，《易·繫辭》云「一陰一陽謂之道」，王弼云「一陰一陽者，或謂之陰，或謂之陽，不可定名也。夫為陰則不能為陽，為柔則不能為剛。唯不陰不陽，然後為陰陽之宗」，不柔不剛，然後為剛柔之主，故無方無體，非陽非陰，始得謂之道，始得謂之神」是也。柔剛者，<sup>②</sup>即陰陽之別名也。故《繫辭》又云：「動靜有常，剛柔斷矣。」注云：「陽動陰靜，剛柔之斷也。」是剛則陽，柔則陰也。

其曰王者，民之所歸往也。

秋，紀季以鄆人于齊。季，紀侯弟。○以

鄆，下圭反。鄆，紀之邑也。人于齊者，以鄆事

齊也。人者，內弗受也。雍曰：「紀國微弱，齊將

吞并。紀季深覩存亡之機，大懼社稷之傾，故超然遐舉，

以鄆事齊，庶胤嗣不泯，宗廟永存。《春秋》賢之，故褒之

以字。齊受人之邑而滅人之國，故於義不可受也。」○并，

必性反。泯，彌忍反。

【疏】「人者內弗受也」。○釋曰：重發之者，此

齊不可受，嫌違例，故重發之。

冬，公次于郎。次，止也。有畏也，欲

救紀而不能也。畏齊。

四年，春，王二月，夫人姜氏饗齊侯于祝丘。饗，食也，兩君相見之禮。凡會書月，著時，事有危，雖於公發例，亦無所不關。祝丘，魯地。○饗，本又作享，香丈反。著，張畧反，又張慮反。

【疏】「饗食」至「魯地」。○釋曰：「饗，食也」者，烹大牢以飲賓，故云兩君相見之禮。夫人與齊侯非禮饗食，故云「著時，事有危」。此與二年禚之會書月以著危，而五年「夏，夫人姜氏如齊師」不書月者，何休云：「再出書月重之，三出不月者，省文，從可知也。」事或然矣。

饗，甚矣。以非禮尤甚，故謹而月之。饗齊侯，所以病齊侯也。

三月，紀伯姬卒。隱二年履緌所逆者。內女卒例日，伯姬失國，畧之，故月也。○綸音須。

【疏】注「隱二」至「月也」。○釋曰：僖九年「秋，七月，乙酉，伯姬卒」，是例日也。此不日，明為失國畧之也。

外夫人不卒，此其言卒，何也？吾女也。適諸侯則尊同，以吾為之變，卒之也。

①「能」，阮校：「閩、監、毛本『能』作『得』。」

②「柔剛者」，阮校：「閩、監、毛本作『剛柔者』。」



禮：諸侯絕傍替，姑姊妹女子子嫁於國君者，尊與己同，則爲之服大功九月，變不服之例。然則適大夫者不書卒。○爲，于僞反。替，居其反。

【疏】注「禮諸」至「書卒」。○釋曰：莒慶、高固並逆叔姬，經無卒文，是適大夫不書卒也。

夏，齊侯、陳侯、鄭伯遇于垂。傳例曰：「不期而會曰遇，遇者，志相得也。」

紀侯大去其國。大去者，不遺一人之辭也。言民之從者，四年而後畢也。紀侯賢而齊侯滅之，不言滅而曰大去其國者，不使小人加乎君子。不曰滅而曰大去其國，蓋抑無道之強，以優有道之弱。若進止在己，非齊所得滅也。何休曰：「《春秋》楚世子商臣弑其君，其後滅江，六，不言大去。又大去者，於齊滅之不明，但知不使小人加乎君子，而不言滅，縱失襄公之惡，反爲大去也。」鄭君釋之曰：「商臣弑其父，大惡也，不得但爲小人。江、六之君，又無紀侯得民之賢，不得變滅言大去也。元年冬「齊師還紀」，三年「紀季以鄆入于齊」，今「紀侯大去其國」，是足起齊滅之矣。即以變滅言大去，爲縱失襄公之惡，是乃經也，非傳也。且《春秋》因事見義，舍此以滅人爲罪者自多矣。」○縱，子用反。見，賢徧反。舍音捨。

【疏】注「舍此」至「多矣」。○釋曰：此是鄭難何

休云「縱失襄公之惡也」，言《春秋》有因事見義者，不得不舍此以滅人爲罪也。若僖五年「晉人執虞公」，十九年「梁亡」之類是也。

六月，乙丑，齊侯葬紀伯姬。外夫人不書葬，此其書葬，何也？吾女也。失國，故隱而葬之。隱，痛也。不曰卒而曰葬，閔紀之亡也。

【疏】注「曰葬」至「亡也」。○釋曰：知非爲危者，紀國已滅而齊葬之，非復紀之臣子能葬，故知閔之，非爲危也。又三十年「八月，癸亥，葬紀叔姬」，傳曰：「日葬，閔紀之亡也。」<sup>①</sup>知此亦是閔之也。不於卒閔之者，葬者送終大事故也。

秋，七月。

冬，公及齊人狩于郕。郕，齊地。○狩音獸。郕，古報反，《左氏》作漾。齊人者，齊侯也。其曰人，何也？卑公之敵，所以卑公也。內無貶公之道。何爲卑公也？不復讎而怨不釋，刺釋怨也。○怨，紆元反，又紆願反，後同。刺，

①「紀」，原作「細」，宋刻元修本作「紀」。今按：莊三十年作「閔紀之亡也」，則此當爲「紀」。據改。



七賜反。

五年，春，王正月。

夏，夫人姜氏如齊師。師而曰如，衆

也。言師衆大如國，故可以言如。若言如齊侯，則不可。

【疏】傳「師而曰如衆也」。○釋曰：解經二年

「夫人姜氏會齊侯于禚」，四年「夫人姜氏饗齊侯于祝丘」，不言「如」，此言「如齊師」者，言齊師衆大如國，故可言如，若指齊侯，則於文不可言「如齊侯」也。

婦人既嫁不踰竟，踰竟，非禮也。

【疏】傳「不踰竟」。○釋曰：復發傳者，嫌師與國異也。

秋，邠黎來來朝。黎來，名也。○邠，五兮反，

國名。黎，郎兮反；黎來，邠君名。朝，直遙反。邠，

國也。黎來，微國之君，未爵命者也。

冬，公會齊人、宋人、陳人、蔡人伐衛。

納惠公朔。是齊侯宋公也，其曰人，何也？

人諸侯，所以人公也。其人公，何也？逆

天王之命也。王不欲立朔也。

【疏】傳「是齊侯宋公」。○釋曰：四國皆從貶，

而獨言齊、宋者，齊爲兵主，宋是大國，則陳、蔡亦從也。

六年，春，王三月，王人子突救衛。徐邈

曰：「諸侯不奉王命，朔遂得篡，王威屈辱，有危，故月也。救衛於義善，故重子突。功不立，故著其危。」

【疏】注「有危故月」。○釋曰：日月之例見危

者，唯施於內，今施之於外者，范答薄氏云：「王者安危，天下所繫，故亦與內同也。」<sup>①</sup>

王人，卑者也。稱名，貴之也。何休以爲

稱子則非名也。鄭君釋之曰：「王人賤者，錄則名可。

今以其銜命救衛，故貴之。貴之則子突爲字可知明矣。

此「名」當爲「字」誤爾。」徐乾曰：「王人者，卑者之稱也。

當直稱王人而已，今以其能奉天子之命，救衛而拒諸侯，

故加名以貴之。僖八年「公會王人、齊侯」，是卑者之常

稱。」○卑者之稱，尺證反，下「常稱」同。

【疏】注「鄭君」至「稱也」。○釋曰：鄭答何休

云，傳文「稱名，貴之」者，「名」當爲「字」，則鄭玄以子突非

名。徐乾云「故加名以貴之」，則子突非字。二者不同者，

鄭意若以子突爲名，則書名者乃士之常稱，傳何以云「貴

之」？故知子突是字。徐乾意稱人則王之卑者，不合書

① 「王者」至「同也」，阮校：「閩、監、毛本『安危天下』作

「天下安危」，無「也」字。」

名，僖八年「公會王人于洮」是也，今稱名即是貴之。故二說不同。或以爲突是名，子是貴，理亦通，但注意似不然。

### 善救衛也。

【疏】傳「善救衛也」。○釋曰：計王者有伐無救，而云善者，朔叛逆王命，天子廢之，立其嗣子，而遣師往救，有存諸侯之功，故曰善，不可以大平之法格之。救者善，則伐者不正矣。

夏，六月，衛侯朔入于衛。其不言伐衛納朔，何也？據九年「伐齊納糾」言納。不逆天王之命也。不與諸侯得納王之所絕。人者，內弗受也。何用弗受也？爲以王命絕之也。朔之名，惡也。朔入逆，則出順矣。朔出入名，以王命絕之也。

【疏】傳「朔入逆」云云。○釋曰：朔出奔之時，傳曰：「朔之名，惡也。」此云順者，謂比之人國爲順。彼辟天子之召，仍是惡也，故稱名耳。一解此當文自相比，朔入爲逆，則出當爲順矣。

秋，公至自伐衛。惡事不致，此其致，何也？據襄九年，時有穆姜之喪，會諸侯伐鄭，不致。

不致，則無用見公之惡事之成也。○見，賢徧反。

螟。○螟，亡丁反。

冬，齊人來歸衛寶。以齊首之，分惡於齊也。使之如下齊而來我然，惡戰則殺矣。若衛自歸寶於齊，過齊然後與我，齊首其事，則我與王人戰，罪差減。○分惡，烏各反，下同。殺，色界反，舊色例反。過，古禾反。差，初賣反。

七年，春，夫人姜氏會齊侯于防。防，魯地。婦人不曾會，非正也。

夏，四月，辛卯，昔，恒星不見。恒星者，經星也。經，常也，謂常列宿。○昔如字，或作寤，同。不見，賢徧反，下不音者同。列宿，夙又反，下皆同。

【疏】注「謂常列宿」。○釋曰：周之四月，夏之二月。「常列宿」者，謂南方七宿也。

日入至於星出謂之昔。不見者，可以

①「昔」，阮校：「《釋文》：『昔』，本或作『寤』。按：古多假『昔』爲『夕』，段玉裁說見《公羊校勘記》。」

見也。

夜中，星隕如雨。如，而也，星既隕而復雨。

○隕，云敏反。復，扶又反。其隕也如雨，是夜中

與？星既隕而雨，必晦暝，安知夜中乎？○與音餘。

暝，亡定反。

【疏】傳「其隕」云云。○釋曰：「其隕如雨，是夜

中與」，謂星隕而天必晦暝，何知是夜中乎？《春秋》之意，著以傳著，疑以傳疑，皆以實錄，故知夜中。《春秋》

著以傳著，疑以傳疑。明實錄也。○傳，直專反。

中之幾也，而曰夜中，著焉爾。幾，微也。星既

隕而雨，中微難知，而曰夜中，自以實著爾，非億度而知。

○度，徒各反。

【疏】「中之幾也」至「著焉爾」。○釋曰：謂雨晦

暝幾微也。「中微難知，而曰夜中」者，是事之著見焉爾，非億度而知也。

何用見其中也？

【疏】「何用見其中也」。○釋曰：謂經以何事知

其夜中者，以失星變之始，而錄其已隕之時，揆度漏刻，則正當夜中矣。

失變而錄其時，則夜中矣。失星變之始，而

錄其已隕之時，檢錄漏刻，以知夜中。其不曰恒星之隕，何也？

【疏】「其不」至「何也」。○釋曰：解經上文云

「恒星不見」，下文「其不曰恒星之隕」者，又自解之，我知恒星之不見，而不知其隕者是何星，故不得言之也。又解不言雨星，而言隕星意，言我見從上而隕，又下接於地，則可以雨說之也。今唯見其下，不見其上，故曰隕星，又總說隕之與雨二者之別，「著於上，見於下」，<sup>①</sup>謂之雨，著於下，<sup>②</sup>不見於上，謂之隕，豈雨說哉？言不見在上，故不可以雨說之。徐邈云：「著於上，謂雲著上。」

我知恒星之不見，而不知其隕也。我

見其隕而接於地者，則是雨說也。言我見從上來，接於下，然後可言雨星。今唯見在下，故曰隕星。

○我見，見音如字，注同。雨，于付反，注同。著於上，

見於下，謂之雨；著於下，不見於上，謂之

隕，豈雨說哉？解經不得言雨星，而言隕星也。鄭

①「下」，原作「上」，阮校：「閩、監、毛本次「上」字作

「下」。今據改。

②「著於下」，原作「著其直見於下」，阮校：「閩、監、毛

本無「其直見」三字。」今據刪改。

君曰：「衆星列宿，諸侯之象。不見者，是諸侯棄天子禮義法度也。」劉向曰：「隕者象諸侯隕墜，失其所也。又中夜而隕者，①象不終其性命，中道而落。」○見于下，如字，或賢徧反。不見，賢徧反。隊，直類反。

秋，大水。高下有水災，曰大水。

【疏】傳「高下」云云。○釋曰：復發傳者，嫌大水無麥、苗，異於常，故重發之。

無麥、苗。麥、苗同時也。麥與黍稷之苗同時死。

冬，夫人姜氏會齊侯于穀。穀，齊地。婦人不合，會非正也。

【疏】傳「會非正也」。○釋曰：再發傳者，防是魯地，穀是齊邑，故重發之。

八年，春，王正月，師次于郎，以俟陳人、蔡人。時陳、蔡欲伐魯，故出師以待之。次，止也。俟，待也。

甲午，治兵。出曰治兵，習戰也。人曰振旅，習戰也。○振，整也。旅，衆也。

【疏】傳「習戰也」。○釋曰：此治兵振旅，皆云「習戰」者，《周禮》仲秋教治兵，仲春教振旅，出入幼賤雖

殊，同是教戰之法，故此傳二者皆以「習戰」言之。《公羊》以「治兵」爲「祠兵」，亦云「其禮一也」。《周禮》仲秋教治兵，此非秋，亦云治兵者，《周禮》四時講武，故各立別名，此據出師之事，故雖春亦得以治兵爲名。

治兵而陳，蔡不至矣。兵事以嚴終，以嚴整終事，故敵人不至。故曰善陳者不戰，此之謂也。善爲國者不師，導之以德，齊之以禮。江熙曰：「鄰國望我，歡若親戚，何師之爲？」○陳，直觀反，下文皆同。導，②徒報反，下同。善師者不陳，師衆素嚴，不須耀軍列陳。江熙曰：「上兵伐謀，何乃至陳？」善陳者不戰，軍陳嚴整，敵望而畏之，莫敢戰。善戰者不死，投兵勝地，故無死者。江熙曰：「辟實攻虛則不死。」善死者不亡。民盡其命，無奔背散亡者也。江熙曰：「見危授命，義存君親，雖沒猶存。」○盡，津忍反。背音佩。

【疏】傳「善爲」至「不亡」。○釋曰：「善爲國者不師」，謂有明王時，導之以德，齊之以禮，不起軍師，而四海賓服，則黃帝堯舜時是也。「善師者不陳」，若齊桓公伐

①「中夜」，阮校：「閩、監、毛本『中夜』作『夜中』。」

②「導」，原作「道」，據宋刻元修本及上文改。

楚，不設行陳而服罪也。「善陳者不戰」，即此魯能嚴整終事，而陳、蔡不至也。「善戰者不死」，若文王伐崇，因壘而崇自服也。「善死者不亡」，若柏舉之戰，<sup>①</sup>吳雖入楚，父老致死，還復楚國也。此引文為證頗允，傳文一准此解，則與注少僻，但舊有此說，故今亦存之。其注虛，觀文則曉，故不復煩釋。

夏，師及齊師圍郕，郕降于齊師。其曰

降于齊師何？不使齊師加威於郕也。郕，同姓之國，而與齊伐之，是用師之過也。故使若齊無武功而郕自降。○降，戶江反，皆同。

秋，師還。還者，事未畢也，遯也。郕已降而以未畢為文者，蓋辟滅同姓之國，示不卒其事。○還音旋。遯，徒困反。

冬，十有一月，癸未，齊無知弑其君諸兒。大夫弑其君，以國氏者，嫌也，弑而代之也。○兒如字，音五兮反。<sup>②</sup>

九年，春，齊人殺無知。無知之挈，失嫌也。

【疏】傳「無知之挈失嫌也」。○釋曰：重發之者，月與不月，地與不地之異，故重發之。

稱人以殺大夫，<sup>③</sup>殺有罪也。○挈，苦結

反。

公及齊大夫盟于暨。暨，魯地。○暨，其器

反，《左氏》作莢。公不及大夫。《春秋》之義，內大夫可以會諸侯，公不可以盟外大夫，所以明尊卑、定內外也。今齊國無君，要當有任其盟者，故不得不以權通。大夫

不名，無君也。禮：君前臣名。齊無君，故大夫不

名。盟納子糾也。不日，其盟渝也。變盟立小白。○渝，羊朱反。當齊無君，制在公矣。當可

納而不納，故惡內也。○惡，烏路反，下及注「惡內」皆同。

夏，公伐齊，納糾。不言子糾而直云糾者，盟

繫在於魯，故挈之也。《春秋》於內公子為大夫者，乃記其奔。子糾不為大夫，故不書其奔。鄭忽既受命嗣位，是以書其出。然則重非嫡嗣，官非大夫，皆事例所畧，故許叔、蔡季、小白、重耳，通亦不書出。○糾，居黝反，《左氏》作子糾。嫡，丁歷反。重，直龍反。

①「柏舉」，《穀梁補注》作「伯舉」。

②「音」上，宋刻元修本有「一」字。

③「大夫」，王引之《經義述聞》引王念孫曰：「『大夫』二字，涉上下文而衍。傳七年疏引此無『大夫』二字。」

【疏】注「不言」至「書出」。○釋曰：下文「取子糾殺之」稱子，此直云糾，故解其意，欲明繫在魯，故挈之。又解子糾不書出奔之意，言內公子爲大夫者，乃記其奔，若閔二年「公子慶父出奔莒」是也。子糾不書出，是不爲大夫也。

當可納而不納，齊變而後伐。故乾時

之戰不諱敗，惡內也。何休曰：「三年「溺會齊師伐衛」，故貶而名之，四年「公及齊人狩于郕」，故卑之曰人。今親納讎子，反惡其晚，恩義相違，莫此之甚。」鄭君釋之曰：「於讎不復，則怨不釋，而魯釋怨，屢會仇讎，一貶其臣，一卑其君，亦足以責魯臣子，其餘則同，不復譏也。至於伐齊納糾，譏當可納而不納爾。此自正義，不相反也。」甯謂讎者無時而可與通，縱納之遲晚，又不能全保讎子，何足以惡內乎？然則乾時之戰不諱敗，齊人取子糾殺之，皆不迂其文，正書其事，內之大惡，不待貶絕，居然顯矣。二十四年公如齊親迎，亦其類也。惡內之言，傳或失之。○敗惡，烏路反，注同。復，扶又反。迂音于，一音紆，<sup>①</sup>又於武反。迎，魚敬反。

【疏】注「內之」至「亦其類也」。○釋曰：范既不從傳文，以爲大惡。又莊公親逆，未是大罪，而云「亦其類」者，以公忘父之仇，而援舉兵動衆，既不能強，爲齊所敗，是大惡也，魯與齊爲讎，而公娶其女，雖得親迎之常，甚失結婚之義，故云「亦其類」也。

齊小白入于齊。大夫出奔反，以好曰

歸，成十四年「衛孫林父自晉歸于衛」是也。以惡曰入。齊公孫無知弑襄公，公子糾、公子小白不能存，出亡。子糾奔魯，小白奔莒。齊人殺無知，而迎公子糾於魯。公子小白不讓公子糾，先入，又殺之于魯，故曰「齊小白入于齊」，惡之也。○惡，烏路反。

秋，七月，丁酉，葬齊襄公。諸公子爭立，國亂，故危之。

八月，庚申，及齊師戰于乾時，我師敗績。不言及者主名，內之卑者。乾時，齊地。

【疏】注「內之卑者」。○釋曰：桓十七年「及齊師戰于郎」，注云，公親帥之，諱，故不言公。此亦云及，知非公者，彼傳云，不言敗，爲內諱也。以其諱，故知公也。今經書敗，傳又不釋之，故知是「內之卑者」。

九月，齊人取子糾殺之。言子糾者，明其貴，宜爲君。

①「紆」，原作「紆」，據宋刻元修本及《釋文》改。

【疏】注「明其貴」。○釋曰：《公羊》云：「其稱子糾何？貴也。其貴奈何？宜爲君也。」是其貴，故以子某稱之，如子般、子野之類也。

### 外不言取。

【疏】「外不言取」。○釋曰：取是內取，故外不得言取。今云取者，惡內也。一解「外不言取」者，謂楚人殺微舒、慶封，並不言取。此雖是何休之義，亦得通一家，故并錄之。

言取，病內也。取，易辭也，猶曰取其子糾而殺之云爾。猶言自齊之子糾，今取而殺之，言魯不能救護也。○易，以豉反。十室之邑，可以逃難。百室之邑，可以隱死。以千乘之魯而不能存子糾，以公爲病矣。○難，乃旦反，下同。乘，繩證反。

冬，浚洙。浚洙者，深洙也。著力不足也。畏齊難。○浚音峻，深也。洙音殊，杜預云：「水名。」

十年，春，王正月，公敗齊師于長勺。長勺，魯地。○勺，時酌反。不日，疑戰也。疑戰者，言不尅日而戰，以詐相襲。疑戰而曰敗，勝內也。

勝內，謂勝在內。

### 二月，公侵宋。

【疏】「三月公侵宋」。○釋曰：舊說以爲公與宿盟，宋方病宿，故公侵之。若此則是公之無惡，傳何惡公也？公與宿盟，經無其事，爲宿侵宋，傳無其文，是舊說妄也。隱元年「盟於宿」，范以爲地，是公不與宿盟也。但不知何爲侵耳。

侵時，此其月，何也？乃深其怨於齊，又退侵宋以衆其敵，惡之，故謹而月之。○惡，烏路反。

三月，宋人遷宿。遷，亡辭也。爲人所遷，則無復國家，故曰亡辭。閔二年「齊人遷陽」亦是也。○復，扶富反，下文及注同。

【疏】傳「遷亡辭也」。○釋曰：《春秋》言遷有二種之例，一表亡辭者，此文是也；二見存亡國者，「邢遷于夷儀」是也。不於元年「遷紀」發傳者，彼以紀侯賢，經變文以示義，非正，故不發之。「遷陽」不發，從此省文也。遷文三起例者，此是亡辭之始，邢是復國之初，許獨

①「正」下，《穀梁補注》有「例」字。

②「遷文三起例者」，《穀梁補注》作「遷有二種傳文三起例」。

自不月，故三發之也。范《畧例》云：「凡遷有十，亡遷有三者，齊人遷陽，宋人遷宿，齊師遷紀是也。好遷有七者，邢遷夷儀，衛遷帝丘，蔡遷州來，許遷于葉，許遷于夷，許遷白羽，許遷容城是也。餘遷皆月，許四遷不月者，以其小，畧之如邑也。遷紀不月者，文承月下，蒙之可知也。」

其不地，宿不復見也。國亡不復見。經不言滅者，言滅則弑其君，滅其宗廟社稷，就而有之，不遷其民。○見，賢徧反。遷者，猶未失其國家以往者也。謂自遷者，僖元年「邢遷于夷儀」，成十五年許遷于葉之類是也。彼二傳曰「遷者，猶得其國家以往者也」，此傳云「遷者，猶未失其國家以往」，互文也。○葉，舒涉反。夏，六月，齊師、宋師次于郎。次，止也。畏我也。

公敗宋師于乘丘。乘丘，魯地。○乘，繩證反。不日，疑戰也。疑戰而曰敗，勝內也。

秋，九月，荆敗蔡師于莘。莘，蔡地。

○莘，所巾反。以蔡侯獻武歸。荆者楚也。何爲謂之荆？狄之也。何爲狄之？聖人立，必後至，天子弱，必先叛，故曰荆，狄之也。蔡侯何以名也？據僖十五年秦「獲晉侯」不

名。○獻武，本亦依《左氏》作舞。絕之也。何爲絕

之？獲也。中國不言敗，據宣十二年「晉荀林父

帥師及楚子戰于郟，晉師敗績」，不言敗晉師。○郟，皮必

反。又扶必反，一音弼。敗績如字。此其言敗，何

也？中國不言敗，蔡侯其見獲乎？其言

敗，何也？釋蔡侯之獲也。以歸，猶愈乎

執也。爲中國諱見執，故言以歸。○爲，于僞反。

冬，十月，齊師滅譚，譚子奔莒。桓十一

年「鄭忽出奔衛」，傳曰：「其名，失國也。」十六年「衛侯

朔出奔齊」，傳曰：「朔之名惡也。」然則出奔書名有二

義，譚子國滅不名，蓋無罪也。凡書奔者，責不死社稷。

不言出者，國滅無所出也。他皆放此。

【疏】注「有二義」。○釋曰：禮言失地名，故鄭忽

失國而名也。傳曰：「朔之名惡也。」是衛侯爲惡而名，

故云「有二義」。滅國無文，故注又云譚子無名，蓋無罪

也。雖無罪不名，以其不能死社稷，書奔，是譏也。

十有一年，春，王正月。

夏，五月，戊寅，公敗宋師于鄆。鄆，魯地。

○敗，必邁反，下及注同。鄆，子移反。內事不言戰，

舉其大者。其日，成敗之也。結日列陳，不以詐



相襲，得敗師之道，故曰成也。○列陳，直觀反。宋萬之獲也。

【疏】傳「宋萬之獲也」。○釋曰：傳言獲宋萬而

經不書者，此時尚卑，故不書。反國爲卿，始弑君，是故書之。雖書，以新升爲卿，宋賜族，<sup>①</sup>故經不言氏，傳以爲「宋之卑者」是也。

秋，宋大水。外災不書，此何以書？

王者之後也。高下有水災，曰大水。

【疏】傳「高下」云云。○釋曰：重發傳者，嫌外

災與內異也。

冬，王姬歸于齊。其志，過我也。○過，

古禾反。

十有二年，春，王三月，紀叔姬歸于鄫。

鄫，紀邑也。紀季所用入于齊者，紀國既滅，故歸鄫。國

而曰歸，此邑也，其曰歸，何也？吾女也。

失國，喜得其所，故言歸焉爾。江熙曰：「四年

齊滅紀，不言滅而言大去者，義有所見爾，則國滅也。叔姬來歸不書，非歸寧，且非大歸也。叔姬守節，積有年矣。紀季雖以鄫入于齊，不敢懷貳。然襄公豺狼，未可聞信。桓公既立，德行方宣於天下，是以叔姬歸于鄫，魯喜其女

得申其志。」○見，賢徧反。豺，仕皆反。行，下孟反。

夏，四月。

秋，八月，甲午，宋萬弑其君捷。<sup>②</sup>捷，宋

閔公。宋萬，宋之卑者也。

【疏】傳「宋之卑者」。○釋曰：傳言「宋之卑者」，解不稱氏之意，與宋督同，別於無知、祝吁也。

卑者以國氏。及其大夫仇牧。以尊及

卑也。仇牧，閑也。仇牧扞衛其君，故見殺也。桓

二年傳曰：臣既死，君不忍稱其名。今仇牧書名，則知宋君先弑。○仇牧音目。扞，曷旦反。

【疏】傳「仇牧閑也」。○釋曰：復發傳者，孔父

先君死，發傳以明閑。此則後君死，故又發傳。荀息雖同後死之例，<sup>③</sup>但仇牧是卑者所殺，荀息爲尊卿殺之，故又發傳也。

冬，十月，宋萬出奔陳。宋久不討賊，致令得

①「宋」，宋刻元修本作「未」。

②「捷」，阮校：「《公羊傳》「捷」作「接」。古音姜聲，捷聲同部。徐彥疏引《長義》云：「《穀梁》亦作接。」

③「後」，原作「復」，阮校：「何校本「復」作「後」，是也。」今據改。

奔，故謹而月之。○令，力呈反。

【疏】注「宋久」至「月之」。○釋曰：無知八年冬弑君，九年春始被殺，而經不書月。此宋萬八月弑君，十月出奔，而云「久不討賊」，「故謹而月之」者，以祝吁書月，傳云「謹之」，則此書月，亦是謹之可知也。然則無知既經三月，齊人殺得之，<sup>①</sup>故直書時，此宋人不能即討，令得奔，故謹而月之。

十有三年，春，齊人、宋人、陳人、蔡人、邾人會于北杏。北杏，齊地。

【疏】「會于北杏」。○釋曰：鄭《釋廢疾》數九會，則以柯之明年爲始。范今數衣裳，則通言北杏之會。二說不同者，<sup>②</sup>鄭以孔子云「九合諸侯」，北杏之會，經無諸侯之文，故不數之；范以傳文直云「衣裳之會」，不論諸侯多少，北杏傳云「齊侯、宋公」也，故並以北杏數之。范亦以傳云「衣裳之會十有一」，「兵車之會四」，故與鄭不同。

是齊侯、宋公也。其曰人，何也？始疑之。何疑焉？桓非受命之伯也，將以事授之者也。言諸侯將權時推齊侯使行伯事。曰，可矣乎？未乎？邵曰：「疑齊桓雖非受命之伯，諸侯推之，<sup>③</sup>便可以爲伯乎？未也？」舉人，衆之辭也。稱人，言非王命，衆授之以事。

【疏】「舉人衆之辭也」。○釋曰：經不書某侯某侯，云某人某人者，是衆授之辭也。經以衆授爲文，明非王命，是未得王命，未可以爲伯，覆上「未乎」之意也。

夏，六月，齊人滅遂。遂，國也。其不日，微國也。

秋，七月。

冬，公會齊侯，盟于柯。柯，齊地。○柯，古河反。曹劌之盟也，信齊侯也。曹劌之盟，經傳無文，蓋有信者也。《公羊傳》曰：「要盟可犯，而桓公不欺。曹子可讎，而桓公不怨。桓公之信著於天下，自柯之盟始。」○劌，居衛反。要盟，於遙反。

【疏】注「曹劌」云云。○釋曰：傳云「曹劌之盟也」，而注云「經傳無文」者，謂曹劌與齊侯盟爲信之事，《穀梁》經傳不說也。注又云：「蓋有信者也。」故即引《公羊》桓公爲信之事以結之。一解云「經傳無文」者，不

①「殺得」，《穀梁補注》作「得殺」。

②「二」，原作「三」，阮校：「何校本『三』作『二』，是也。」今據改。

③「諸侯」，原作「侯」，阮校：「閩、監、毛本上有『諸』字。」今據補。

如《公羊》具說劇盟之狀也，與前解少異耳，大旨亦同。「要盟可犯，而桓公不欺」，曹子手劍劫齊侯共盟，使歸汶陽之田，而齊侯終亦還之是也。「曹子可讎，而桓公不怨」，謂以臣劫君，是「可讎」也，桓公終不罪曹子，是「不怨」也。

桓盟雖內與，不日，信也。公盟例日，外諸侯盟例不日，桓大信遠著，故雖公與盟猶不日。○與音預，注同。

十有四年，春，齊人、陳人、曹人伐宋。

【疏】傳「齊人」至「伐宋」。○釋曰：蓋同《左氏》背北杏會故也。

夏，單伯會伐宋。會，事之成也。伐事已成，單伯乃至。○單音善。

【疏】傳「會事之成也」。○釋曰：此解經言「會伐宋」之意，以諸侯伐事已成，而單伯始至，故云「會伐宋」。

秋，七月，荆入蔡。荆者，楚也。其曰荆，何也？州舉之也。

【疏】傳「州舉之也」。○釋曰：糜信云：「楚子食淫，為息媯滅蔡，故州舉之。」是取《左傳》之說，非也。十年傳云：「聖人立，必後至，天子弱，必先叛，故曰荆，狄之也。」則此亦與彼同耳。

州不如國，言荆不如言楚。國不如名，言楚不如言介葛廬。○介音界。名不如字。言介葛廬不如言邾儀父。

冬，單伯會齊侯、宋公、衛侯、鄭伯于鄆。鄆，衛地。○鄆音絹。復同會也。諸侯欲推桓以為伯，故復同會于此以謀之。○復，扶又反。

十有五年，春，齊侯、宋公、陳侯、衛侯、鄭伯會于鄆。復同會也。為欲推桓為伯，故復會於此。○復，扶又反。為欲，于偽反。

【疏】傳「復同會也」。○釋曰：重發傳者，諸侯至此方信齊桓，故更發之也。

夏，夫人姜氏如齊。婦人既嫁不踰竟，踰竟，非禮也。

【疏】傳「踰竟非禮也」。○釋曰：重發之者，此非淫，恐異，故發傳同之。

秋，宋人、齊人、邾人伐鄆。宋主兵，故序齊上也。班序上下，以國大小為次，夷狄在下，征伐則以主兵為先，《春秋》之常也，他皆放此。

鄭人侵宋。

冬，十月。

十有六年，春，王正月。

夏，宋人、齊人、衛人伐鄭。

秋，荆伐鄭。

冬，十有二月，會齊侯、宋公、陳侯、衛侯、鄭伯、許男、曹伯、滑伯、滕子，同盟于幽。幽，宋地。○滑，于八反。同者，有同也，同尊周也。

【疏】傳「同者」至「周也」。○釋曰：《公羊傳》云：「同盟者何？」同欲也。《左傳》云：「同盟于幽，鄭成也。」此云同盟者，「同尊周也」。見三傳意各異也。所謂「同尊周也」者，諸侯推桓爲伯，使翼戴天子，<sup>②</sup>即是尊周之事。

不言公，外內寮一疑之也。十三年春，會于北杏，諸侯俱疑齊桓非受命之伯，欲共以事推之可乎？今于此年，諸侯同共推桓，而魯與齊讎，外內同一疑公可事齊不？會不書公，以著疑焉。同官爲寮，謂諸侯也。至二十七年，同盟于幽，遂伯齊侯。○寮一，力彫反。

【疏】傳「不言」至「之也」。○釋曰：舊解謂會于北杏，不言諸侯，是外疑也。<sup>③</sup>今此會不言公，是內疑之也。自此以後，外內不復疑之，故曰「一疑」也。直據傳

文，事欲似然，推尋范注，必不得爾。何者？注云「外內同一疑公可事齊不？會不書公，以著疑焉」，何指北杏與此爲一疑也，故今更別說，言此會公實與之，而經不言公者，外內寮一疑之。寮謂諸侯也。言外內諸侯同一疑公，不知可事齊乎，不可事齊乎？故去公以著疑也。云「外內」者，諸侯之國，或遠或近，故以「外內」總之也。若然，十三年「公會齊侯，盟于柯」，所以云公者，彼柯盟曹劌要齊歸魯汶陽之田，非事齊之事，縱與之盟，不足爲恥也。此幽盟欲推齊爲伯，與共尊事之，魯既與齊爲讎，又內外一疑，故經不言公，以示意也。

邾子克卒。其曰子，進之也。附齊而尊周室，王命進其爵。

十有七年，春，齊人執鄭詹。人者，衆辭也。以人執，與之辭也。與令得執。○詹，者廉反。令，力呈反。鄭詹，鄭之卑者。

① 「何」，原作「加」，阮校：「按：《公羊傳》「加」作「何」。今據改。」

② 「戴」，原作「載」，阮校：「閩、監、毛本「載」作「戴」，是。」今據改。

③ 「疑」下，《穀梁補注》有「之」字。

【疏】傳「齊人」至「卑者」。<sup>①</sup>○釋曰：稱人者，衆所欲之辭，故云與之，謂與齊得執也。知鄭詹是鄭之卑者，大夫卑者以國氏，今經直云鄭詹，故知卑者也。然則卑者可知而重發傳者，嫌有罪去氏也。知非有罪去氏者，外大夫身有罪，例不去氏，即祭仲之類是也。宛所以去氏者，爲貶鄭伯也。

卑者不志，此其志，何也？以其「逃來」志之也。「逃來」則何志焉？將有其末，不得不錄其本也。末謂逃來。鄭詹，鄭之佞人也。○佞，乃定反。

夏，齊人殲于遂。殲者，盡也。然則何爲不言遂人盡齊人也？無遂之辭也。無遂則何爲言遂？其猶存遂也。以其能殺齊戌，故若遂之存。○殲，子廉反，盡也，「遂人盡齊人」絕句。存遂奈何？曰，齊人滅遂，使人戍之。遂之因氏飲戍者酒而殺之，齊人殲焉。此謂狎敵也。狎猶輕也。○飲，於鳩反。狎，戶甲反。

秋，鄭詹自齊逃來。逃義曰逃。齊稱人以執，是執有罪也。執得其罪，故曰義也。今而逃之，是

逃義也。

冬，多麋。京房《易傳》曰：「廢正作淫，爲火不明，則國多麋。」○麋，亡悲反。

【疏】注「京房」云云。○釋曰：火不明者，謂五行與五事、五常相配，則視與禮同配南方。言火不明，猶言視與禮不明也。

十有八年，春，王三月，日有食之。不言日，不言朔，夜食也。何以知其夜食也？曰，王者朝日。《王制》曰「天子玄冕而朝日於東門之外」，故日始出而有虧傷之處，是以知其夜食也。何休曰：「《春秋》不言月食日者，以其無形，故闕疑。其夜食何緣書乎？」鄭君釋之曰：「一日一夜合爲一日。今朔日日始出，其食虧傷之處未復，故知此自以夜食。夜食則亦屬前月之晦，故穀梁子不以爲疑。」○朝，直遙反。處，昌慮反。

【疏】注「王制」至「夜食」。○釋曰：此是《禮記·玉藻》文，而云「王制」者，謂王者之法制，非謂王制之篇也。此魯事而輒言天子朝日者，言王者朝日，所以顯諸侯朝朔也。天子朝日於東門之外，服玄冕，其諸侯則《玉藻》云「皮弁以聽朔於大廟」，與天子禮異。其禮雖異，皆早早

①「齊人」，夏校改爲「人者」。

行事，<sup>①</sup>而昨夜有虧傷之處尚存，<sup>②</sup>故知夜食也。徐邈云：「夜食則星無光。」張靖策《廢疾》云：「立八尺之木，不見其影。」並與范意異也。

故雖爲天子，必有尊也。貴爲諸侯，必有長也。故天子朝日，諸侯朝朔。○長，丁丈反。

夏，公追戎于濟西。其不言戎之伐我，

何也？以公之追之，不使戎邇於我也。邇

猶近也。不使戎得逼近於我，故若人竟望風退走。<sup>①</sup>

○濟，子禮反。濟，水名。邇如字，邇，近也；一本作介，

音界，亦近也。竟，音境。于濟西者，大之也。何

大焉？爲公之追之也。言戎遠來至濟西，必大有

徒衆，以公自追之，知其審然。○爲，于僞反。

秋，有蜃。蜃，短狐也，蓋含沙射人。京房《易傳》

曰：「忠臣進善，君不識，厥咎國生蜃。」○蜃，本亦作蜮，

音或，短狐，《本草》謂之射工。射人，食亦反，下文同。

【疏】傳「秋有蜃」。○釋曰：《洪範五行傳》云：

「蜃如鼃，三足，生於南越。南越婦人多淫，故其地多蜃

也。」陸機《毛詩義疏》云：「蜃，短狐，一名射影。在江淮

水中，人在岸上，影見水中，投人影則殺之，故曰射影。或

謂含沙射人，人人皮肌，其瘡如疥。」范引京房《易傳》，則與

《五行傳》說異。又云「蓋含沙射人」，則與陸機說或同也。

一有一亡曰有。蜃，射人者也。○亡音無，又如字。

【疏】傳「一有一亡曰有」。○釋曰：舊解「一

有」，南越所生是也，「一亡」，魯國無是也。今以爲「一有

一亡曰有」者，謂或有有時，或有無時，言不常也，故書曰

有。若蜃蠃之類，是常有之物，不言有也。上十七年云

「多麋」者，魯之常獸，是歲偏多，故書多也。蜃蠃不言多

者，蜃蠃是微細之物，不可以數言之，故不言多也。又每

年常有，不得言有也。所以異於蜚蜃與麋也。

冬，十月。

①「早早」，宋刻元修本作「早旦」。

②「存」，原作「有」，宋刻元修本作「存」。阮校：「監、毛

本下「有」字作「存」。今據改。

③「策」，孫校：「柳云：『策』當作『箋』。」

④「若」，原作「君」，宋刻元修本作「若」。阮校：「監、毛

本「君」作「若」。今據改。

# 監本春秋穀梁注疏莊公卷第六

起十九年至三十二年，盡閔二年<sup>①</sup>

范甯集解 楊士勛疏

十有九年，○傳本或分此以下為莊公與閔公同卷。春，王正月。

夏，四月。

秋，公子結媵陳人之婦于鄆，遂及齊

侯、宋公盟。媵，淺事也，不志。此其志，何

也？辟要盟也。魯實使公子結要二國之盟，欲自託

於大國，未審得盟與不，故以媵婦為名，得盟則盟，不則止，此行有辭也。○媵，以證反，又繩證反，《爾雅》云：

「送也。」要，於遙反，注同。

【疏】傳「辟要盟也」。○釋曰：文十六年：「季

孫行父會齊侯于陽穀，齊侯弗及盟。」此若齊、宋不許，亦當云「弗及盟」，而云「辟要盟也」者，彼以行父失辭，又無媵事，故云「弗及盟」；此有媵事，若齊、宋不許，則直書媵事而已，故云「辟要盟也」。

何以見其辟要盟也？媵，禮之輕者

也。盟，國之重也。以輕事遂乎國重，無

說。以輕遂重，無他異說，故知辟要盟耳。○見，賢偏

反。其曰陳人之婦，畧之也。但為遂事，假錄媵

事耳，故畧言「陳人之婦」，不處其主名。○為，于偽反。

【疏】注「但為」至「主名」。○釋曰：「假錄媵事」

者，媵是小事，不合書經。今既書之，故云假，非謂無媵事也。「不處其主名」者，謂不言陳侯夫人，而云「陳人之婦」，是不處其主名也。

其不日，數渝，惡之也。○數音朔。惡，烏

路反。

【疏】傳「數渝惡之也」。○釋曰：數，疾也。謂

秋共盟，冬而見伐，變盟之疾，故不書日以惡之也。或以為「數渝」，為今冬伐我西鄙，明年齊又伐我，故云數，理亦通也。

夫人姜氏如莒。婦人既嫁不踰竟，踰

竟，非正也。

【疏】傳「不踰竟」。○釋曰：重發傳者，嫌此適

①「起」，原無，今依全書體例補。

異國恐別，故發傳以同之。

冬，齊人、宋人、陳人伐我西鄙。其曰

鄙，遠之也。其遠之，何也？不以難邇我

國也。○難，乃旦反。邇如字，本又作介，音界。

二十年，春，王二月，夫人姜氏如莒。夫

人比年如莒，過而不改，無禮尤甚，故謹而月之。○莒音

舉。婦人既嫁不踰竟，踰竟，非正也。○竟音境。

【疏】傳「不踰竟」。○釋曰：重發傳者，比再如

莒，失禮之甚，故詳之。

夏，齊大災。其志，以甚也。外災不志。

甚，謂災及人也。外災例時。

【疏】傳「其志以甚也」。○釋曰：范例云：「災

有十二，內則書日，外則書時，國曰災，邑曰火。」內則書日，新宮、御廩之類是也。其外則時者，則「宋大水」、「齊大災」之等是也。昭十八年不書時，以四國同日故也。其外災志者，皆發傳，故十一年「宋大水」，傳曰「王者之後也」；襄九年「宋災」，嫌火與水異，傳曰「故宋也」；宣十六年「成周宣榭災」，傳曰「以樂器所藏，目之也」；此書「齊大災」，傳曰「其志，以甚也」；昭十八年「宋、衛、陳、鄭災」，傳曰「其志，以同日也」；其九年「陳火」，傳曰「閔陳而存之也」是也。

秋，七月。

冬，齊人伐我。

二十有一年，春，王正月。

夏，五月，辛酉，鄭伯突卒。

秋，七月，戊戌，夫人姜氏薨。婦人弗

目也。鄭嗣曰：「弗目，謂不目言其地也。婦人無外事，

居有常所，故薨不書地。僖元年傳曰：「夫人薨，不地。」

此言弗目，蓋互辭爾。定九年「得寶玉、大弓」，傳曰：

「弗目，羞也。」蓋此類也。」江熙曰：「文姜有弑公之逆，

而弗目其罪。」○弗目，謂不題目文姜薨所也，一曰弗目其罪。

【疏】傳「婦人弗目也」。○釋曰：隱二年「夫人

子氏薨」，著不地之例。此復發傳者，嫌有罪去地，故發之也。不曰「夫人」而言「婦人」者，以文姜失夫人之道，故經書「薨」，傳以「婦人」言之。或是經無變文，蓋傳通言之，無異意也。○注「弗目其罪」。○釋曰：江熙云「不目其罪」者，謂稱夫人薨，與常例不異是也。

冬，十有二月，葬鄭厲公。

二十有二年，春，王正月，肆大眚。肆，

失也。眚，災也。《易》稱「赦過宥罪」，《書》稱「眚災



肆赦」，經稱「肆大眚」，皆放赦罪人，蕩滌衆故，有時而用之，非經國之常制。○肆音四。眚，所景反。宥音又。滌音狄。

【疏】注「易稱」云云。○釋曰：肆，失也。眚，災也。言「肆大眚」者，謂放失大罪惡。災猶罪惡也。言放失大罪惡，明小惡亦赦之也。《易》稱「赦過宥罪」者，《解卦》辭也。《象》曰：「雷雨作，解，君子以赦過宥罪。」解卦坎下震上，震爲雷，坎爲雨，雷動雨下，而萬物解散，故君子以此卦象而放赦罪人。《書》稱「眚災肆赦」，《舜典》文。孔安國云：「眚，過；災，害；肆，緩也。過而有害，當緩赦之。」此傳云「肆，失也」，則亦緩之類，以經稱「肆大眚」，故以眚爲災也。《尚書》「眚災」連文，故孔氏以眚爲過，其大意亦不異也。○注「蕩滌衆故」。○釋曰：傳「爲嫌天子之葬也」者，二事相須，注以「肆大眚」不可特爲夫人，故云「蕩滌衆故」。傳意原魯所以肆大眚者，爲嫌天子之葬也，故注與傳兩言之。

災，紀也。失，故也。災謂罪惡。紀，治理也。有罪當治理之，今失之者，以文姜之故。爲嫌天子之葬也。文姜罪應誅絕，誅絕之罪不葬。若不赦除衆惡，而書葬者，嫌天子許之，明須赦而後得葬。○爲，于僞反。

癸丑，葬我小君文姜。小君，非君也。

不治其民。其曰君，何也？以其爲公配，可以言小君也。

陳人殺其公子禦寇。禦寇，宣公之子。○禦，魚呂反，又作御。言公子而不言大夫，公子未命爲大夫也。其曰公子，何也？公子之重視大夫，視此。①命以執公子。大夫既命，得執公子之禮。一本「大夫命以視公子」。

夏，五月。以五月首時，甯所未詳。

【疏】傳「夏五月」。②○釋曰：何休云：「譏莊公娶讎女，不可以事先祖，猶五月不宜以首時。」杜預云：「莊公獨稱「夏五月」者，疑謬誤也。」范以二者皆無憑，故云「甯所未詳」也。

秋，七月，丙申，及齊高傒盟于防。不

①「此」，敦煌寫本作「比也」，《穀梁補注》作「比」，「傳」，夏校：「此爲經文，「傳」字誤。下二十三年「公至自齊」、「祭叔來聘」、「蕭叔朝公」，二十四年「覲用幣」、「曹羈出奔陳」、「赤歸於曹」，二十五年「鼓，用牲於社」，三十一年「冬不雨」，三十二年「子般卒」、「公子慶父如齊」，閔公元年「季子來歸」，均誤加「傳」字。」

言公，高傒伉也。書日，則公盟也。高傒驕伉，與公敵體，<sup>①</sup>恥之，故不書公。○傒音奚。伉，苦浪反。

【疏】注「書日」至「書公」。○釋曰：微者盟，例不日，「及宋人盟于宿」是也。此既書日，明公在可知。知非卿者，若卿則與高傒敵，何以直言及，故知非卿也。「公及莒人盟于包來」，言公者，彼稱人，是舉國之辭，故可以言公。此若云「公及高傒」，則高傒得敵公，故不言公也。「公會楚公子嬰齊」，不沒公者，彼以前驕伉，後服罪，故不去公，以見別意也。

冬，公如齊納幣。納幣，大夫之事也。

禮有納采，采擇女之德性也。其禮用鴈爲贊者，取順陰陽往來。○贊音至。有問名，問女名而卜之，知吉凶也，其禮如納采。有納徵，徵，成也，納幣以成婚。

【疏】傳「有納徵」。○釋曰：此傳釋諸侯不云「納幣」，而云「納徵」者，以《士婚禮》有「納徵」之文，欲明用幣雖異而禮同也。

有告期。告迎期。○迎，魚敬反。四者備，

【疏】傳「四者備」。○釋曰：《士婚禮》「下達」之後，有納采、問名、納吉、納徵、請期、親迎六禮。此傳不云納吉者，直舉四者，足以譏公，故畧納吉不言之。或以爲諸侯與士禮異者，非也。

而後娶，禮也。公之親納幣，非禮也，

【疏】傳「納幣，非禮也」。○釋曰：納幣非禮，是譏喪娶。而注云「傳無譏文」者，傳上云「公之親納幣，非禮」，不云喪娶之事，故云「無譏文」也。然宣元年貶夫人去氏，此則全無譏者，彼以「夫人不能以禮自固，故與有貶」，仍未是貶公之事，故彼注云「不譏喪娶者，不待貶絕而罪惡自見」是也。

故譏之。公母喪，未再替而圖婚，傳無譏文，但譏親納幣者，喪婚不待貶絕而罪惡見。○見，賢徧反。

二十有三年，春，公至自齊。

【疏】傳「公至自齊」。○釋曰：二十七年傳云「桓會不致」，此與下文「觀社」皆書「公至自齊」者，《公羊傳》云，桓會不致，此「何以致？危之也」。徐邈亦云：「不以禮行，故致以見危。」范此雖無注，下云：「公怠棄國政，比行犯禮，憂危甚矣。」則亦以二者爲憂危致之也。若然，定八年傳稱「致月，危致也」，下傳云「致月，有懼焉爾」，此若致以見危，所以不月者，以二者皆非禮而行，不假書月，危懼可知，傳以危而不月，嫌與例乖，故發傳詳之。或以爲二者皆非禮之行，與好會異，故致之，非是見危，理亦通也。

①「體」，敦煌寫本作「礼」。

**祭叔來聘。**祭叔，天子寰內諸侯。叔，名。

○祭，側界反。寰音縣，又音環。

【疏】傳「祭叔來聘」。○釋曰：范云：「祭叔，

天子寰內諸侯。叔，名。」則范意將此祭叔與隱元年祭伯同是畿內諸侯。而此云「來聘」，彼傳責其不稱朝者，祭伯者，祭國伯爵也，寰內諸侯，時不為王之卿大夫，欲外交鄰好，而來通魯，以其無王命，故不得言聘；不仕王朝，故得責其不稱朝也。今祭叔見是天子大夫，而恣意任情，欲外接諸侯，雖請王命，非王本心，故不稱使，見其擅命。言聘，表其請王，猶《左氏》公子翬強請，故得書經而去其族也。案隱元年注云，祭伯「畿內大夫有采地」者，既有采地，則似祭伯亦仕王朝者，以祭伯本為人仕王朝，故畿內授地。今雖不仕，亦得以大夫言之。或以為祭叔亦無王命，以是天子大夫假王命而來，魯受其聘，故得書聘，以本非王命，故不稱使也；祭伯雖是天子卿大夫，欲同諸侯之例而來朝魯，以不奉王命，故不得稱聘；寰內諸侯，不合外交，故亦不得云朝，是亦得通一家也。徐邈云「祭叔為祭公使」，則徐意以祭叔為祭之大夫也。范以叔為名，似同徐說。但舊解不然，故今亦同之。

**其不言使，何也？天子之內臣也。不**

**正其外交，故不與使也。**何休曰：「南季、宰渠伯

糾、家父、宰周公來聘，皆稱使，獨于此奪之，何也？」鄭君釋之曰：「諸稱使者，是奉王命，其人無自來之意。今祭

叔不一心於王，而欲外交，不得王命來，故去使以見之。」

○去，起吕反。見，賢徧反。

**夏，公如齊觀社。**常事曰視，視朔是也。

**非常曰觀。**

【疏】傳「非常曰觀」。○釋曰：復發傳者，嫌觀

魚、觀社異，故發之也。《春秋》之例，常事不書，視朔既書，而范云常事謂視朔者，視朔之禮，實是常事，但公廢之，即為非常，故書之。

**觀，無事之辭也。**言無朝會之事。○朝，直遙

反。下同。以是為尸女也。尸，主也。主為女往爾，以觀社為辭。○主為，于僞反。無事不出竟。

**公至自齊。**公如，陳公行例。往時，正

也。正謂無危懼也，皆放此。致月，故也。如，<sup>①</sup>

往月、致月，有懼焉爾。

**荆人來聘。善累而後進之。其曰人，**

①「公如」至「故也如」，王引之《經義述聞》曰：「謹案：

下「如」字蓋衍。「公如」乃統下之辭，故范注曰「陳公行例」，則下文但分言「往」與「致」，不須更言「如」矣。」

何也？舉道不待再。明聘問之禮，朝宗之道，非夷狄之所能，故一舉而進之。

【疏】傳「善累」云云。○釋曰：不言楚人而云

「荆人」者，傳稱「州不若國」，楚既新進，若稱國繫人，嫌其大褻，故直舉州稱人言聘以進之。

公及齊侯遇于穀。及者，內爲志焉爾。

【疏】傳「內爲志焉爾」。○釋曰：重發傳者，公

爲淫如齊，嫌異於常，故重發之。遇者，志相得也。

蕭叔朝公。

【疏】傳「蕭叔朝公」。○釋曰：書名者，附庸常

例。儀父稱字，傳言「貴之」。此傳直云「微國」，不言貴之，則「叔」名也。重發傳者，嫌名字異故也。

微國之君，未爵命者。其不言來，於外

也。言於穀朝公也。朝於廟，正也。於外，非正

也。

秋，丹桓宮楹。楹，柱。禮：天子、諸侯

黝堊，黝堊，黑色。○黝，於糾反，又於柳反。注同。

堊，烏路反，又烏各反。范云：「黝堊，黑色。」案，黝，黑也；堊，白土。

【疏】注「黝堊黑色」。○釋曰：徐邈云：「黝，黑柱也。堊，白壁也。」謂白壁而黑柱。今范同以黝堊爲黑色者，以此傳爲丹楹而發，何得有壁事而在其間？故同爲黑色也。

大夫倉，士黈。黈，黃色。○黈，他苟反，黃色也。麋氏云張斗反。丹楹，非禮也。

冬，十有一月，曹伯射姑卒。○射音亦，本或作亦。

十有二月，甲寅，公會齊侯，盟于扈。桓

盟不日，此盟日者，前「公如齊觀社」，傳曰：「觀，無事之辭。以是爲尸女也。」公怠棄國政，此行犯禮，憂危甚矣。霸主降心，親與之盟，實有弘濟之功，而魯得免於罪。臣子所慶，莫重於此，時事所重，文亦宜詳，故特謹日以著之。○扈音戶。

【疏】注「桓盟」至「著之」。○釋曰：《公羊傳》云：「桓盟不日，此何以日？危之也。」今范知喜得霸主與盟，故詳而日之者，傳雖有「桓盟不日，信之」文，亦有「不日，數渝，惡之」事，又葵丘以極美齊桓而書日，故知此間書日，喜霸者與盟也。此時齊桓威德既盛，與公結盟，實有弘濟之功，何得爲有危事？故范以臣子所慶，文亦宜詳也。

二十有四年，春，王三月，刻桓宮桷。

禮：天子之桷，斲之礱之，加密石焉。以細

石磨之。○刻音克。桷音角，椽也；方曰桷，圓曰椽。

斲，丁角反，削也。礱之，力公反，磨也。①諸侯之桷，

斲之礱之。大夫斲之，士斲本。刻桷，非正

也。夫人，所以崇宗廟也，取非禮與非正，

而加之以於宗廟，以飾夫人，非正也。非禮謂娶

讎女，非正謂刻桷丹楹也。本非宗廟之宜，故曰加，言將

親迎，欲為夫人飾，又非正也。○迎，魚敬反，下皆同。

【疏】注「又非正也」。○釋曰：娶讎女、刻桷兩

事俱非，故曰「又」也。或以為「又」者，並謂崇飾夫人，理亦通也。所以不直言非禮，云「又非正」者，見莊有二種之惡，故「非禮」、「非正」，兩舉之也。

刻桓宮桷，丹桓宮楹，斥言桓宮，以惡

莊也。不言新宮而謂之桓宮，以桓見殺於齊，而飾其宗廟，以榮讎國之女，惡莊不子。○惡，烏路反，下同。

【疏】注「不言新宮」。○釋曰：新宮，桓公之宮。

以是禰宮，不忍斥之，故謂之新宮。今惡莊公不子，故斥言桓宮，以見非正也。

葬曹莊公。

夏，公如齊逆女。親迎，恒事也，不志，

【疏】傳「親迎」至「不志」。○釋曰：文四年傳

云：「其不言公，何也？非成禮於齊也。」似不成禮於

齊，即合志，而此云常事不志者，彼亦是非禮而書，就書之

中更自別見。言逆婦既書於經，所以不云公者，為成禮於

齊，故變文與莊公異也。

此其志，何也？不正其親迎於齊也。

秋，公至自齊。迎者，行見諸，舍見諸。

諸，之也。言瞻望夫人乘車。○乘，繩證反。先至，非

正也。

八月，丁丑，夫人姜氏入。哀姜。人者，

內弗受也。

【疏】傳「人者內弗受也」。○釋曰：重發傳者，

嫌夫人與他例異故也。

日入，惡人者也。何用不受也？以宗

廟弗受也。其以宗廟弗受，何也？娶仇人

子弟，以薦舍於前，其義不可受也。薦，進。

舍，置。○惡人，烏路反，一音如字。

①「也」，原作「之」，據《釋文》改。

戊寅，大夫宗婦覲，用幣。宗婦，同宗大夫之婦。○覲用，徒歷反，見也。

【疏】傳「覲用幣」。○釋曰：舊解不言見而言覲，覲者私事，大夫公然行之，故言覲以明其私也。見者，正也，故會于沙隨，云「不見公」，傳曰：「可以見公而不見，議在諸侯也。」是覲與見別也。今以爲不然者，三傳之文，並不云覲，見事別，何得言私爲覲，正爲見乎？恐別有案據，遂存之，以示疑耳。

覲，見也。禮：大夫不見夫人。

【疏】傳「大夫不見夫人」。○釋曰：既云「不見夫人」，又說「男子之贊」者，更釋用幣非禮之意也。言男子之贊，羔鴈之等，婦人之贊，棗栗之類，欲見俱不得用幣。

不言及，不正其行婦道，故列數之也。

男子之贊，羔、鴈、雉、踞。贊，所以至者也。①上大夫用羔，取其從羣，帥而不黨也。②下大夫用鴈，取其知時，飛翔有行列也。士冬用雉，夏用踞，取其耿介，交有時，別有倫也。踞，腊也。雉必用死，雉其不可生服也。③夏用踞，備腐臭也。○數，色主反。踞，其居反，腊也，乾雉也，士夏執之，備腐臭也。《說文》云：「北方謂鳥腊曰踞。」傳曰：「堯腊，舜始踞。」別，彼列反。爲其，于僞反。腐，符甫反。婦人之贊，棗、栗、鍛脩。棗取其早

自矜莊，栗取其敬栗，鍛脩取斷，斷自脩整。④○鍛，丁亂反，脯也。鍛而加薑桂曰脩。脩飭，本或作勅，同，恥力反，一本作飾，申職反，或作整，音征領反。用幣，非禮也。用者，不宜用者也。大夫，國體也，國體謂爲君股肱。○股音古。肱，古弘反。而行婦道，惡之，故謹而日之也。○惡，烏路反。大水。

冬，戎侵曹，曹羈出奔陳。

【疏】傳「曹羈出奔陳」。○釋曰：《公羊》以爲曹羈是曹大夫，三諫不從而去之也。杜預注《左傳》，以爲羈是曹之世子。此處雖無傳，案下二十六年傳意則與《公羊》同也。

①「所」下，《穀梁補注》有「執」字。

②「取其從羣帥而不黨也」，《穀梁補注》作「取其從帥群而不黨也」。孫校：「此注全本《士相見禮》鄭注，今本有訛奪。」

③「雉」，敦煌寫本、宋刻元修本作「爲」。

④「早自」，原作「早目」，據宋刻元修本、《穀梁補注》改。「鍛脩取斷斷自脩整」，敦煌寫本作「也斷脩取斷斷自脩勅也」，上「也」字屬上。

## 赤歸于曹。郭公。

【疏】傳「赤歸于曹郭公」。○釋曰：薄氏駁云：

「赤若是諸侯，不能治國，舍而歸曹，應謂之奔，何以詭例言歸乎？」徐乾又云：「不言郭公，疑是魯之微者，若是微者，則例所不書，何得以微者爲譬？」二事俱滯，而范從之者，凡諸侯出奔其國者，或爲人所滅，或受制強臣，迫逐苟免，然後書出。今郭公在國，不被迫逐，往曹事等如歸，故以易辭言之，不得云出奔也。凡內大夫未得命者，例但書名。若使赤直名而無所繫，別文同俠等，<sup>①</sup>故又云郭公也。徐乾之說理通，故范引而從之。

## 赤蓋郭公也，何爲名也？禮：諸侯

無外歸之義，外歸，非正也。徐乾曰：「郭公，郭國之君也，名赤。蓋不能治其國，舍而歸于曹。君爲社稷之主，承宗廟之重，不能安之，而外歸他國，故但書名，以罪而懲之。不直言赤，<sup>②</sup>復云郭公者，恐不知赤者是誰，將若魯之微者故也。以郭公著上者，則是諸侯失國之例，是無以見微之義。」○羈，居宜反。郭公，《左氏》如字，《公羊》音號。舍音捨。懲，直升反。復，扶又反。著，張慮反，又張畧反。見，賢徧反。

二十有五年，春，陳侯使女叔來聘。女，氏。叔，字。○女音汝。其不名，何也？據成三年「晉侯使荀庚來聘」稱名。天子之命大夫也。

【疏】傳「天子之命大夫也」。○釋曰：言「命大夫」，即是單伯之等，故知叔是字。祭仲傳無文釋，故知仲是名也。

夏，五月，癸丑，衛侯朔卒。惠公也，犯逆失德，故不書葬。

六月，辛未，朔，日有食之。言日日言朔，食正朔也。

鼓，用牲于社。鼓，禮也。用牲，非禮也。天子救日，置五麾，陳五兵、五鼓。麾，旌幡也。五兵，矛、戟、鉞、楯、弓矢。○麾，毀爲反。幡，芳元反。矛，亡侯反。鉞音越。楯，時準反，又音允。諸侯置三麾，陳三鼓、三兵。<sup>③</sup>大夫擊門。士擊

①「別」，宋刻元修本作「則」。

②「不」，阮校引段玉裁云：「『不』字疑衍。」

③「陳三鼓三兵」，王引之《經義述聞》：「本作『陳三兵三鼓』，與上文文同一例。唐石經『兵』、『鼓』二字互誤，而各本皆從之。《北堂書鈔》武功部八、《太平御覽》天部四、兵部七十二、《開元占經》日占六，引此並作『陳三兵三鼓』。」

柝。言充其陽也。凡有聲皆陽事，以壓陰氣。柝，兩木相擊。充，實也。○柝，吐洛反。壓，於甲反，又於涉反。

【疏】傳「鼓用」至「陽也」。○釋曰：案范三十年

注云：「救日用牲。既失之矣，非正陽之月，而又伐鼓，亦非禮。」今伐鼓於建巳之月，故曰「禮也」。用牲非常，故云「非禮也」。五麾者，糜信云：「各以方色之旌置之五處也。」五兵者，徐邈云：「矛在東，戟在南，鉞在西，楯在北，弓矢在中央。」糜信與范數五兵與之同，是相傳說也。五鼓者，糜信、徐邈並云：「東方青鼓，南方赤鼓，西方白鼓，北方黑鼓，中央黃鼓。」案五兵，兵有五種，未審五鼓是一鼓有五色，爲當五種之鼓也？何者？《周禮》有六鼓，雷鼓、靈鼓、路鼓、鼗鼓、鼙鼓、晉鼓之等。若以爲五種之鼓，則不知六鼓之內，竟去何鼓？若以爲一種之鼓，則不知六鼓之內，竟取何鼓？又《周禮》云「雷鼓鼓神祀」，則似救日之鼓用雷鼓，但此用之於社。《周禮》又云，「靈鼓鼓社稷祭」，①則又似救日食之鼓用靈鼓。進退有疑，不敢是正，故直述之而已。檢糜、徐兩家之說，則以五鼓者，非六鼓之類，別用方色鼓而已。諸侯三者，則云降殺以兩去黑黃二色。是非六鼓之類也。下云「大夫擊門，士擊柝」，則此陳五鼓，亦擊之也。但擊之時，陳列於社之塋域，因五兵五麾是陳，故亦以陳言之，非謂直陳而不擊也。

伯姬歸于杞。其不言逆，何也？逆之

道微，

【疏】傳「逆之道微」。○釋曰：重發傳者，紀伯姬釋不稱使之微，此解不言逆之微，故別發傳。

無足道焉爾。

秋，大水。鼓，用牲于社、于門。門，國門也。高下有水災，曰大水。既戒鼓而駭衆，用牲可以已矣。救日以鼓兵，救水以鼓衆。

【疏】傳「高下」云云。○釋曰：重發之者，此有用牲之失，嫌異常水，故更發之。「既戒鼓駭衆」者，謂既警戒擊鼓，而駭動衆人，則用牲可以已矣。知不合用牲者，用者不宜用，故知不合也。又云「救日以鼓兵」者，謂伐鼓以責陰，陳兵示禦侮。「救水以鼓衆」者，謂擊鼓聚衆也。皆所以發陽也。

冬，公子友如陳。

二十有六年，春，公伐戎。

夏，公至自伐戎。

曹殺其大夫。言大夫而不稱名姓，無

①「社稷祭」，《穀梁補注》引無「稷」字。



命大夫也。無命大夫而曰大夫，賢也。爲

曹羈崇也。徐邈曰：「于時微國衰陵，不能及禮。其

大夫降班失位，下同於士，故畧稱人，而傳謂之「無命大夫」也。莒慶、莒挐、邾庶其、邾快，皆特以事書，非實能貴，故畧名而已。楚雖荆蠻，漸自通于諸夏，故莊二十三年書「荆人來聘」，文九年又褒而書名。國轉疆大，書之益詳。然當僖公、文公之世，楚猶未能自同于列國，故得臣及椒並畧名。惟屈完來會諸侯，以殊禮成之。楚莊王之興，爲江漢盟主，與諸夏之君權行抗禮，其勢彊于當年，而事交於內外，故《春秋》書之，遂從中國之例。夫政俗隆替，存乎其人。三后之姓，日失其序，而諸國乘間，與之代興，因詳畧之文，則可以見時事之實矣。秦爵、伯也，上據西周，班列中夏，故得稱師，有大夫，其大夫當名氏，而文十二年秦術畧名，蓋于時晉主魯盟，而秦方敵晉，則魯之于秦，情好疏矣。禮以飾情，情疏則禮畧，《春秋》所以畧文乎？又吳札不書氏，以成尊于上也。宋之盟，叔孫豹不書氏，以著其能恭。此皆因事而爲義。」○爲曹，于僞反。挐，女居反，又女加反。快，苦夬反。諸夏，戶雅反，下同。屈，君勿反。情好，呼報反。

【疏】傳「爲曹羈崇也」。○釋曰：薄氏駁曰：

「曹羈出奔，經無歸處，曹自殺大夫，何以知是羈也？」又云：「術之名，爲晉貶秦，然楚亦敵晉，何以不畧而貶之？」文此注雖多，①未足通崇之義，徒引證據，何益於此

哉！「范答之曰：「羈，曹之賢大夫也。曹伯不用其言，乃使出奔他國，終於受戮，故君子愍之。書殺其大夫，即是崇賢抑不肖之義也。案大夫出奔，或書出，不書入，秦后子是也，或書入，不書出，蔡季是也。史有闕漏，非是一般，何得以無歸之文，則怪其非羈也？秦以交疏之故而畧其臣，楚與諸夏會同，所以不畧也。」是范氏論崇曹羈之事也。曹羈三諫不從者，是《公羊》之說也。○注「徐邈」至「爲義」。○釋曰：「莒慶、莒挐、邾庶其、邾快皆特以事書」者，謂莒慶來逆女，莒挐爲魯所獲，庶其、邾快來奔於魯，故書以著罪，是皆以事書之，非能貴也。秦稱師者，僖二十八年城濮之戰是也。亦既稱師，明當有大夫，而秦術無氏，故知《春秋》所畧也。又云「吳札不書氏，以成尊於上」者，襄二十九年傳文，謂進吳稱子許夷狄者，不壹而足，不可復進其臣，不書季札之氏，所以成尊於上也。「叔孫豹不書氏，以著其恭」者，襄二十七年傳文。彼傳以「溴梁之會，諸侯在而不曰諸侯大夫，大夫不臣也。意趙武恥之。」②豹云者，恭也。是其恭，故不書氏以見意也。

秋，公會宋人、齊人伐徐。

冬，十有二月，癸亥，朔，日有食之。

① 「文」，宋刻元修本作「又」。

② 「意趙武恥之」，襄二十七年傳文作「晉趙武恥之」。

二十有七年，春，公會杞伯姬于洮。伯姬，莊公女。洮，魯地。○洮，他刀反，本或作桃。

夏，六月，公會齊侯、宋公、陳侯、鄭伯，同盟于幽。同者，有同也，同尊周也。

【疏】傳「同者」云云。○釋曰：「同尊周也」，復發傳者，前同盟于幽，諸侯尚有疑者，今外內同心，推桓爲伯，得專征伐之任，成九合之功，故傳詳其事也。

於是而後授之諸侯也。其授之諸侯，何也？齊侯得衆也。桓會不致，安之也。桓盟不日，信之也。信其信，仁其仁。

【疏】傳「信其信仁其仁」。○釋曰：謂諸侯信齊桓之信，仁齊桓之仁。下文「未嘗有敵血之盟」，是其信也。「未嘗有大戰」，是其仁也。「衣裳之會十有一」者，謂從北杏至葵丘也。《論語》稱「九合諸侯」者，實與陽穀二會，管仲不欲，故去之，自外唯九合也。兵車之會四者，洮、鹹、牡丘、淮也。不數侵蔡伐楚者，以二者征伐，非會故也。鄭玄《釋廢疾》云：「自柯之明年，葵丘以前，去貫與陽穀，固已九合矣。」則鄭意不數北杏，自外與范注同也。不數北杏，所以得九合諸侯者，先師所說不同。或云「去貫與陽穀」，與，猶數也，言數陽穀，故得爲九也。或云葵丘會盟異時，故分爲二。或取公子結與齊桓、宋公盟爲

九。故先師劉炫難之云：「貫與陽穀，並非管仲之功，何得去貫而數陽穀也？若以葵丘之盟，盟會異時而數爲二，則首戴之會，亦可爲二也。離會不數，鄆盟去公子結，則唯有齊、宋二國之會，安得數之？」二三之說，並無憑據，故劉氏數洮會爲九。以數洮會爲九，兵車之會，又少其一，故劉以傳誤解之，當云兵車之會三。案洮會下亦無云兵車之會，則傳文不應兩處皆誤，是亦可疑也。

衣裳之會十有一，未嘗有敵血之盟也，信厚也。十三年會北杏，十四年會鄆，十五年又會鄆，十六年會幽，二十七年又會幽，僖元年會榿，<sup>①</sup>二年會貫，三年會陽穀，五年會首戴，七年會寧母，九年會葵丘。○敵，所治反。于扞，他貞反，又勅丁反，本亦作榿。寧如字，又音甯。毋音無，又茂后反。兵車之會四，未嘗有大戰也，愛民也。僖八年會洮，十三年會鹹，十五年會牡丘，十六年會淮。於末年乃言之。不道侵蔡伐楚者，方書其盛，不道兵車也。此則以兵車會，而不用征伐。○鹹音咸。牡，茂后反。

秋，公子友如陳，葬原仲。原仲，陳大夫，原，

①「會榿」，敦煌寫本作「會于扞」。阮校：「《釋文》出「于扞」，云：『本亦作榿。』案：今本無「于」字，當是所據本有不同。」

氏。仲，字。言葬不言卒，不葬者也。外大夫例不書卒。

【疏】注「外大夫」云云。○釋曰：葬亦不書，止云「例不書卒」者，以內大夫書卒，尚不書葬，況外大夫卒亦不書，明不合書葬，故云「外大夫例不書卒」，欲見必不得書葬之意也。

不葬而曰葬，諱出奔也。言季友辟內難而出，以葬原仲爲辭。○難，乃且反。

【疏】傳「諱出奔也」。○釋曰：范知「辟內難而出」者，《公羊傳》以夫人哀姜淫於二叔，此上傳亦云子般卒，而公子慶父出奔，則慶父之讐，季子素知，季子出則殊其文，人則貴之，稱季子，明其無罪，故知辟難也。

冬，杞伯姬來。歸寧。

莒慶來逆叔姬。慶，名也，莒大夫也。叔姬，莊公女。《禮·檀弓》記曰：「陳莊子死，赴於魯。魯人欲勿哭，繆公召縣子而問焉。縣子曰：『古之大夫，束脩之問不出竟，雖欲哭之，安得而哭之？』今之大夫，交政於中國，雖欲勿哭，安得而勿哭？」則大夫越竟逆女，非禮也。董仲舒曰：「大夫無束脩之餽，無諸侯之交，越竟逆女，紀罪之。」○繆音穆。縣音玄。竟音境。焉，於虔反。餽，巨愧反。越竟，本或作疆，居良反。諸侯之嫁子於大夫，主大夫以與之。君不敵臣。來者，接內

也。不正其接內，故不與夫婦之稱也。接內，謂與君爲禮也。夫婦之稱，當言逆女。○稱，尺證反。

杞伯來朝。杞稱伯，蓋時王所紂。○朝，直遙反。紂，本又作黜，勅律反。

公會齊侯于城濮。城濮，衛地。○濮音卜。

二十有八年，春，王三月，甲寅，齊人伐衛，衛人及齊人戰，衛人敗績。於伐與戰，安戰也？問在何處戰。○處，昌慮反。

【疏】傳「於伐」云云。○釋曰：「於伐與戰，安戰也」，謂於伐衛之時，兩國相與交戰，①問在何處戰也。「戰衛」，謂在衛國之都也。知國都者，若在他所，則應云地。今不書地，故知衛都耳。猶桓十三年戰于龍門，爲近不地，相似也。

戰衛。戰則是師也，其曰人，何也？微之也。何爲微之也？今授之諸侯，而後有侵伐之事，故微之也。其人衛，何也？以其人齊，不可不人衛也。齊桓始受方伯之任，

①「兩國」，阮校：「監、毛本作『國都相與交戰』，是也。」

未能信著鄰國，致有侵伐之事，貶師稱人，以微之也。人不可以敵于師，師不可以與人戰，故亦以衛師爲人，衛非有罪。衛小齊大，其以衛及之，何也？以其微之，可以言及也。其稱人以敗，何也？

【疏】傳「其稱人以敗何也」。○釋曰：據桓十三年戰稱人，敗稱師，故發違例之問也。

不以師敗於人也。人輕而師重。

夏，四月，丁未，邾子貜卒。○瑣，素禾反。

秋，荆伐鄭。荆者，楚也。其曰荆，州舉之也。

【疏】「荆州舉之也」。○釋曰：前書荆人來聘，聘是善事，故進之。今伐中國，不足可褒，故州舉之也。

公會齊人、宋人救鄭。善救鄭也。

冬，築微。微，魯邑。○微，《左氏》作麋。山

林藪澤之利，所以與民共也。虞之，非正也。虞，典禽獸之官。言規固而築之，又置官司以守之，是不與民共向利也。築不志，凡志皆譏也，築例時。○藪，素后反。

【疏】傳「虞之非正也」。○釋曰：成十八年「築

鹿囿」，此築邑並云「虞之，非正也」者，彼直築囿以虞之，此築邑置官司以虞之，囿邑既殊，俱是虞之非正，故再起傳例。○注「虞典」至「例時」。○釋曰：《周禮》澤虞掌田獵之事，《左傳》「皮冠以招虞人」，是虞人典禽獸之官也。知「築不志，凡志皆譏也」者，三十一年「築臺于秦」，傳曰：「君子危之，故謹而志之也。」知志則譏也。此年與三十一年「春，築臺于郎」，「秋，築臺于秦」，皆不書月，是例時。

大無麥、禾。大者，有顧之辭也。

【疏】傳「大者有顧之辭也」。○釋曰：經言「大無麥、禾」者，謂一災不書，待冬無禾，然後並錄無麥，故經稱大，而傳云「有顧之辭」也。顧猶待也。徐邈云：「至冬無禾，於是顧錄無麥。」其意亦謂待無禾，然後顧錄無麥，故云大是也。莊七年「秋，大水」，「無麥、苗」，此經不言大水者，彼傳云：「麥、苗，同時也。」是麥與黍稷之苗，同時爲水而死，故繫大水言之。此至冬始書「大無麥、禾」，則禾之死，未必田大水，故不繫之。徐邈云：「不言水旱者，麥禾自死，不由水旱是也。」或以爲言無禾，則大水可知，故省文。若然，七年何以不省文而言大水？

①「十三」，原作「十二」，據宋刻元修本改。

②「田」，阮校：「『田』當作『由』」。閩、監本「田大」作「由夫」，毛本作「繇夫」，並非。

不言饑者，舊解以爲下傳云不書如，爲內諱，則此不言饑是諱也。或當雖無麥，禾，得臧孫之告糴，不至饑也。

於無禾及無麥也。一災不書，於冬無禾，而後顧錄無麥，故言大，明不收甚。<sup>①</sup>

臧孫辰告糴于齊。臧孫辰，魯大夫臧文仲。

○糴音狄。國無三年之畜，曰國非其國也。

一年不升，告糴諸侯。告，請也。糴，糴也。

不正，故舉臧孫辰以爲私行也。爲內諱，故不稱使，使若私行。○畜，勅六反，下同。爲內，于僞反，下文

「爲內」同。國無九年之畜曰不足，無六年之畜曰急，無三年之畜曰國非其國也。諸侯

無粟，諸侯相歸粟，正也。臧孫辰告糴于齊，告然後與之，言內之無外交也。古者稅什一。宣十五年注詳矣。○稅，始銳反。什一，十而稅一。

【疏】注「宣十五年注詳矣」。○釋曰：彼傳云

「古者什一」，注云「一夫一婦佃田百畝，又受田十畝以爲公田，公田在內，私田在外，此一夫一婦爲耕一百一十畝也。八家共一井之田，餘二十畝者，以爲廬舍」是也。

豐年補敗，敗謂凶年。不外求而上下皆

足也。

【疏】傳「上下皆足也」。○釋曰：上謂君也，下謂民也。

雖累凶年，民弗病也。一年不艾而百姓饑，

【疏】傳「一年不艾」。○釋曰：糜信云：「艾，穫也。」

君子非之。不言如，爲內諱也。○艾，牛蓋反。

二十九年，春，新延廩。

【疏】傳「新延廩」。○釋曰：不言作者，僖二十九年「新作南門」，傳曰：「作，爲也，有加其度也。」彼謂「加其度」，更增大之，故云作。此直改新，故不言作。延廩

者，法廩也。《周禮》：「天子十二閑，馬六種。邦國六閑，馬四種。」每廩一閑。言「法廩」者，六閑之舊制也。○廩，九又反。六種，之勇反。下皆同。

【疏】注「周禮」至「舊制」。○釋曰：自「每廩一閑」以上，《周禮·校人》有其事。「馬六種」者，彼《校人》

① 「甚」，敦煌寫本作「故也」。

云「辨六馬之屬。種馬一物，戎馬一物，齊馬一物，道馬一物，田馬一物，駕馬一物」是也。鄭云：「玉路駕種馬，戎路駕戎馬，金路駕齊馬，象路駕道馬，田路駕田馬，駕馬給宮中之役。」<sup>①</sup>是天子六種之馬，分爲左右廄，故十二閑也。彼又云：「邦國六閑，馬四種。家四閑，馬二種。」鄭玄云，諸侯齊馬、道馬、田馬各一閑，駕馬則分爲三。大夫則田馬一閑，駕馬分爲三。是天子十二閑，馬六種。邦國六閑，馬四種也。

其言新，有故也，言改故而新之。有故則

何爲書也？古之君人者，<sup>②</sup>必時視民之所

勤。民勤於力，則功築罕。罕，希。○罕，呼旦

反。民勤於財，則貢賦少。民勤於食，則百

事廢矣。凶荒殺禮。○殺，所界反。冬築微，春

新延廄，以其用民力爲已悉矣。悉，盡。

夏，鄭人侵許。

秋，有蜚。《穀梁》說曰：「蜚者，南方臭惡之氣

所生也，象君臣淫佚，有臭惡之行。」○蜚，扶味反。行，下

孟反。一有一亡曰有。○亡如字，又音無。

冬，十有二月，紀叔姬卒。紀國雖滅，叔姬

執節守義，故繫之紀，賢而錄之。

【疏】注「賢而錄之」。○釋曰：內女嫁於大夫，則不書卒，爲媵亦如之。今既書卒，故知賢也。

城諸及防。諸，防皆魯邑。可城也。

【疏】傳「可城也」。○釋曰：《左氏》之例，城有時與不時，隱七年傳云：「凡城之志，皆譏也。」此云「可城也」者，傳以得土功之節者則譏之淺，失土功之時者責之深，故傳云「可城也」，不謂此城無譏也。

以大及小也。傳例曰：「凡城之志，皆譏。」今云可者，謂冬可用城，不妨農役耳，不謂作城無譏。

三十年，春，王正月。

夏，師次于成。次，止也，有畏也，欲救

鄆而不能也。不言公，恥不能救鄆也。畏齊。

○鄭音章。

秋，七月，齊人降鄆。降猶下也。鄆，

紀之遺邑也。○降，戶江反。下，遐嫁反。

八月，癸亥，葬紀叔姬。不日卒而日

①「官」，原作「官」，阮校：「嚴杰云：依《周禮》注「官」當作「官」。今據改。」

②「人」，敦煌寫本作「民」。

葬，閔紀之亡也。

九月，庚午，朔，日有食之，鼓，用牲于

社。救日用牲，既失之矣，非正陽之月，而又伐鼓，亦非禮。

冬，公及齊侯遇于魯濟。濟，水名。○濟，

子禮反。及者，內爲志焉爾。遇者，志相得也。

【疏】傳「及者」至「得也」。○釋曰：重發傳者，

齊爲伯者，嫌與諸侯異也。

齊人伐山戎。齊人者，齊侯也。其曰

人，何也？愛齊侯乎山戎也。不以齊侯敵乎山戎，故稱人。其愛之何也？桓內無因國，外無

從諸侯，而越千里之險，北伐山戎，危之也。

內無因緣山戎左右之國爲內間者，外無諸侯者，不煩役寮國。○從，才用反。內間，問廁之間。則非之乎？

善之也。遠伐山戎雖危，勤王職貢則善。何善乎

爾？燕，周之分子也。<sup>①</sup>燕，周大保召康公之後，

成王所封。分子，謂周之別子孫也。○燕音烟，注及後同。分，扶問反，又如字，本或作介，音界。大音泰。

召，上照反。

【疏】注「燕周」至「孫也」。○釋曰：燕是召康公之後，成王所封者，《世家》文也。分者，別也。燕與周同姓，故知別子孫也。

貢職不至，山戎爲之伐矣。言由山戎爲害，伐擊燕，使之隔絕於周室。○爲之，如字。

三十有一年，春，築臺于郎。

夏，四月，薛伯卒。

築臺于薛。薛，魯地。<sup>②</sup>

六月，齊侯來獻戎捷。獻，下奉上之辭也。

《春秋》尊魯，故曰獻。○捷，在接反。戎，菽也。捷，獲

也。齊侯來獻捷者，內齊侯也。不言使，內

與同，不言使也。泰曰：「齊桓內救中國，外攘夷

狄，親倚之情，不以齊爲異國，故不稱使，若同一國也。」

①「分」，阮校：「《釋文》：「分，本或作介，注同。」案：

姚鼐云：「其文蓋本爲「周之別子」，古「別」字作

「兆」，故傳本或作「分」，或作「介」，皆以古字形近而誤。范甯時傳本未誤，故注云：「謂周別子孫也。唐

以後其文舛失，故疏解失之。」

②「地」，敦煌寫本作「邑也」。

○攘，如羊反。倚，於綺反。下文及注同。

獻戎捷，軍得曰捷，戎，菽也。菽，豆。

【疏】傳「齊侯」至「菽也」。○釋曰：徐邈云：

「齊還經魯界，故使人獻捷。不入國都而言來獻，敬重霸主，親而內之也。」糜信亦云：「言內齊侯者，解經稱來之意也。」范雖不注，理亦合當然矣。僖二十一年「楚人使宜申來獻捷」，彼亦稱來者，宜申止來鄉魯，<sup>①</sup>接公行禮，故得稱來，與齊侯異也。又云「不言使，內與同」者，謂內齊侯與同一國，故不稱使也。「戎菽」也者，舊解謂順經意而惜齊侯，故傳依違其文，釋之爲菽。其實宋是中國，故捷不繫國。戎是夷狄，故繫之戎也。案《管子》云「出戎菽及冬葱，布之天下」，則以戎爲豆也。故徐邈云：「今之胡豆也。」舊解以爲依違其文，恐失傳旨。僖二十一年傳云：「其不曰宋捷，何也？不與楚捷于宋也。」范云：「據莊三十一年『齊侯來獻戎捷』。」據彼傳及注意，則似不以戎爲豆。今疑不敢正，故兩載之。此書月，彼不書月者，徐邈云：「霸主服遠之功重，故詳而月之也。」一解齊侯此時克山戎，並得胡豆來，故傳云「戎菽」，謂克戎之菽，齊侯此時並得戎菽，於文亦僻也。

秋，築臺于秦。秦，魯地。<sup>②</sup>不正罷民三

時，虞山林藪澤之利。且財盡則怨，力盡則

懟。懟，恚恨也。○罷音皮，下同。懟，直類反，怨也。

君子危之，故謹而志之也。或曰，倚諸桓也。桓外無諸侯之變，內無國事，越千里之險，北伐山戎，爲燕辟地。辟，開。○爲，于僞反。辟，婢亦反。<sup>③</sup>魯外無諸侯之變，內無國事，一年罷民三時，虞山林藪澤之利，惡內也。譏公依倚齊桓，而與桓行異。○惡，烏路反。行，下孟反。冬，不雨。

【疏】傳「冬不雨」。○釋曰：徐邈云：「僖十一年傳曰：『雩不得雨曰旱。』然則此云不雨者，或當不雩也。」范意亦未必然，或當不言旱不爲災也。

三十有二年，春，城小穀。小穀，魯邑。

夏，宋公、齊侯遇于梁丘。遇者，志相

得也。

【疏】傳「遇者志相得也」。○釋曰：重立傳

①「止」，《穀梁補注》作「身」。

②「地」，敦煌寫本作「邑也」。

③「婢」，原作「煙」，據《釋文》改。



者，<sup>①</sup>外與伯者遇，嫌異，故發之。梁丘在曹、邾之間，去齊八百里。非不能從諸侯而往也，辭所遇，遇所不遇，大齊桓也。辭所遇，謂八百里間，諸侯必有願從者而不之。遇所不遇，謂遠遇宋公也。○能從，才用反，或如字，注同。

秋，七月，癸巳，公子牙卒。牙，慶父同母弟。

何休曰：「傳例：『大夫不日卒，惡也。』牙與慶父共淫哀姜，謀殺子般，而日卒，何也？」鄭君釋之曰：「牙，莊公母弟，不言弟，其惡已見，不待去日矣。」甯案，傳例：「諸侯之尊，弟兄不得以屬通。」蓋以禮，諸侯絕替而臣諸父昆弟，稱昆弟，則是申其私親也。宣十七年「公弟叔肸卒」，傳曰：「其曰公弟叔肸，賢之也。」然則不稱弟，自其常例耳。鄭君之說，其所未詳。○見，賢徧反。去，起吕反。替音期。肸，許乙反。

【疏】注「甯所未詳」。○釋曰：范既引鄭君之說，又云未詳者，范以僖十六年傳稱：「公弟叔仲，賢也。大夫不言公子、公孫，疏之也。」若牙實有罪，則應去公子以見疏，今書公子，故云未詳也。或申鄭君義云，牙不去公子，為親者諱。然則鄭意若以為諱，何得云「其惡已見」？是鄭權答何休之難，不顧上下之理，故范云未詳也。「公子季友卒」不稱弟者，季子雖賢，兄已卒故也。

八月，癸亥，公薨于路寢。公薨皆書其所，

謹凶變。路寢，正寢也。寢疾居正寢，正也。男子不絕于婦人之手，以齊終也。齊，繫。○齊，側皆反，本亦作齋。

【疏】傳「以齊終也」。○釋曰：齊者，齋繫之名，故記稱齋之為言齊也。是齊、齋意同，故范訓為繫。或古者齊、齋同字，此傳齊即讀為齋，理亦通也。

冬，十月，乙未，子般卒。在喪，故稱子。般，其名也。莊公大子，不書弑，諱也。○般音班。大音泰。

【疏】傳「子般卒」。○釋曰：《公羊傳》云：「其稱子般卒何也？君存稱世子，君薨稱子某，既葬稱子，踰年稱公。」范意亦與之同。<sup>②</sup>但踰年雖在國稱公，若未葬，亦不得稱侯以接鄰國，故桓十三年注云「今衛宣未葬，而嗣子稱侯以出，其失禮明矣」，是其事也。子般不書葬者，未踰年之君，例不書葬，故子野不書葬也。

子卒日，正也。襄三十一年「秋，九月，癸巳，子野卒」是也。不日，故也。文十八年「冬，十月，子赤

①「立」，《穀梁補注》作「發」。

②「同」下，原有「但踰年稱公范意亦與之同」十一字，阮校：「毛本無此十一字，此本誤衍。」今據刪。

卒」是也。有所見則日。閔公不書即位，是見繼弑者也。故慶父弑子般，子般可以日卒，不待不日而顯。○見則，賢徧反。

### 公子慶父如齊。

【疏】傳「公子慶父如齊」。○釋曰：牙與慶父同謀殺般，所以牙被殺，慶父得出奔者，《左氏》、《公羊》皆以爲牙欲廢般立慶父，故季子鳩殺之。《穀梁》不見季子歸魯之文，亦無鳩牙之事，則叔牙被殺以不，不可知也。

此奔也。其曰如，何也？據閔二年慶父奔莒，不言如。諱莫如深，深則隱。深謂君弑賊奔。隱，痛之至也。故子般日卒，慶父如齊。

【疏】傳「諱莫如深」。○釋曰：①「諱莫如深」，謂爲國隱諱，莫如事之最深。深者則隱，深謂君弑賊奔之深重，以其深重，則爲之隱諱。若經書子般日卒，慶父如齊是也。②「苟有所見，莫如深」者，謂經意誠有所見，莫如事之深者。不書閔公即位，是事之深也。「有所見」，謂子般之弑，慶父之奔也。

苟有所見，莫如深也。閔公不書即位，見子般之弑，慶公出奔。

### 狄伐邢。

### 閔公

【疏】《魯世家》：閔公名開，莊公之子，惠王十六年即位。《謚法》：「在國逢難曰閔。」《世本》作啓方，辟漢景帝諱，故爲開也。

元年，春，王正月。繼弑君，不言即位，正也。

【疏】傳「繼弑」至「正也」。○釋曰：復發傳者，以非父非君，嫌異，故發之。僖公又發之者，兄之後弟義異，故重發之。文公繼正之始，故發傳以明之。成公不發傳者，蒙之可知，故不發也。襄昭發傳者，昭公即位，承子野之卒，嫌其非正，故發傳以明之。昭繼子野，傳言「繼正」，嫌襄公與之異，故亦發傳。父子同有「繼正」之文，所以相發明也。或以襄非嫡夫人之子，嫌非正，故發傳。案襄四年「夫人嬖氏薨」，彼注云：「成公夫人，襄公母也。」明非爲母賤而發傳也。

親之非父也，兄也。尊之非君也，未踰年

①「釋」下，據文例當有「曰」字。

②「元年」上，敦煌寫本有「春秋穀梁傳閔公第四」凡九字，下有雙行小字范甯《集解》語：「閔公名開，莊公之子，子般庶弟也。惠王十六年即位。」今本脫。

也。繼之如君父也者，受國焉爾。

齊人救邢。善救邢也。善齊桓得伯之道。

夏，六月，辛酉，葬我君莊公。莊公葬

而後舉謚。謚，所以成德也，

【疏】傳「謚所以成德」。○釋曰：復發傳者，桓

公被殺，莊公好終，僖公葬緩，嫌異禮，故各發傳以明之。

於卒事乎加之矣。

秋，八月，公及齊侯盟于洛姑。<sup>①</sup>洛姑，齊

地。○洛姑，一本作路姑。盟納季子也。

季子來歸。

【疏】傳「季子來歸」。○釋曰：傳云「貴之也」

者，不稱公子者，公子是凡常之總號，季子忠賢，爲國人所思，故稱子，所以表其賢也。

其曰季子，貴之也。大夫稱名氏，今日子，是

貴之也。子，男子之美稱。○美稱，尺證反。其曰來

歸，喜之也。大夫出使歸不書，執然後致，不言歸。國

內之人不曰來，今言來者，明本欲遂去，同他國之人也。

言歸者，明實魯人也。「喜之」者，季子賢大夫，以亂故出奔，國人思之，懼其遂去不反，今得其還，故皆喜曰：「季

子來歸。」○使，所吏反。

【疏】注「大夫」至「來歸」。○釋曰：此云「大夫

出使歸不書」，而宣十八年「歸父還自晉」書者，彼傳云「還者，事未畢也」，是還與歸意異也。「執然後致，不言歸」者，意如與婿是也。國內之人不言來，下文齊仲孫言來者，以其外之曰齊，故得言來也。

冬，齊仲孫來。其曰齊仲孫，外之也。

魯絕之，故繫之于齊。○齊仲孫，慶父也。《左氏》以爲齊大夫。其不目而曰仲孫，疏之也。「不目」謂不言公子慶父。其言齊，以累桓也。繫仲孫於齊，言相容，赦有罪。○累，劣僞反。

【疏】傳「其言齊以累桓也」。○釋曰：傳解經言

「齊仲孫」有二種意，故上文以外慶父釋之，此又以累桓言之。慶父魯人，而繫之於齊，是外之也。齊桓容赦有罪，故繫慶父於齊，是惡之也。

二年，春，王正月，齊人遷陽。

夏，五月，乙酉，吉禘于莊公。三年喪畢，

致新死者之主於廟，廟之遠主當遷入大祖之廟，因是大祭，以審昭穆，謂之禘。莊公喪制未闋，時別立廟，廟成而

①「洛姑」，敦煌寫本作「路姑」，下注同。今按：此與

《釋文》所謂「一本作路姑」合。

吉祭，又不於大廟，故詳書以示譏。○禘，徒帝反。①大祖音泰，下「大廟」同。昭，上饒反。闕，苦穴反。

【疏】注「三年」至「示譏」。○釋曰：言「禘於莊公」，即是莊公立宮。而不稱宮者，莊公廟雖立訖，而公服未除，至此始二十二月，未滿三年，故不得稱宮也。此喪服未終，舉吉以非之。文二年，亦喪服未終，而「大事于大廟」，不言吉者，其譏已明，故不復云吉。言「大事」者，秋禘而物成，其祀大，故傳云「大是事也，著禘、嘗」是也。凡祭祀之禮，書者皆譏，故范《畧例》云：「祭祀例有九，皆書月以示譏。」九者，謂桓有二烝一嘗，總三也；閔吉禘，四也；僖禘大廟，五也；文著禘、嘗，六也；宣公有事，七也；昭公禘武宮，八也；定公從祀，九也。知禘是三年喪畢之祭者，此莊公薨未二十二月，②仍書吉以譏之，明三年喪畢，方得爲也。知必於大廟者，《明堂位》曰「季夏六月以禘禮祀周公於大廟」是也。其禘祀之月，王肅、杜預之徒皆以二十五月除喪，即得行禘祭。鄭玄則以二十八月始服吉嘗，即禘於大廟，明年春始禘於羣廟。今范云三年喪畢，禘於大廟，必不得與鄭明年春禘於羣廟同。其除喪之月，或與鄭合。故何休注《公羊》，亦以除喪在二十七月之後也。方者，未至之辭，此實二十二月而云方者，莊公以三十二年八月薨，至此年五月始滿二十一月，未盡其月，爲禘祭，故言方。或可譏其大速，以甚言之，故云方也。

吉禘者，不吉者也。喪事未畢而舉吉

祭，故非之也。莊公薨，至此方二十二月，喪未畢。

秋，八月，辛丑，公薨。不地，故也。其

不書葬，不以討母葬子也。凡君弑，賊討則書葬，哀姜實被討而不書葬者，不以討母葬子。

九月，夫人姜氏孫于邾。哀姜與弑閔公，故出奔。○孫音遜，本或作遜。與音豫。孫之爲言猶

孫也，

【疏】傳「孫之爲言猶孫」。○釋曰：重發傳者，文姜殺夫，哀姜殺子，嫌異，故重發之。

諱奔也。

公子慶父出奔莒。其曰出，絕之也。

慶父不復見矣。慶父弑子般，閔公不書弑，諱之。③○復，扶又反。見，賢徧反。

【疏】傳「其曰」至「見矣」。○釋曰：宣十八年歸父奔齊，范注云：「竟外，故不言出。」是竟內言出，理之

①「徒」，原作「徙」，據《釋文》改。

②「未」，原作「來」，阮校：「閔、監、毛本「來」作「未」，是。」今據改。

③「不書弑諱之」，敦煌寫本作「不復見矣諱也」。

常也。而云「絕之也」者，慶父前奔不言出，書曰「如齊」，爲之隱諱，是不絕其位之辭，今不諱言奔，明是絕其位也。又云「慶父不復見」者，明弑二君罪重，不宜復見，故特顯之矣。

冬，齊高子來盟。其曰來，喜之也。其

曰高子，貴之也。盟立僖公也。不言使，何也？據桓十四年「鄭伯使其弟禦來盟」言使。○禦，魚

呂反，下同。不以齊侯使高子也。齊侯不討慶父，使魯重罹其禍，今若高子自來，非齊侯所得使也，猶屈完不稱使也。江熙曰：「魯頻弑君，僖公非正也。桓公遣高僖立僖公以存魯，魯人德之，不名其使以貴之。貴其使，則其主重矣。」○重，直用反。屈，君勿反。僖音奚。其使，所吏反，下同。

【疏】傳「其曰」至「子也」。○釋曰：來者，自外之常稱，而云「喜之」者，時魯二君見弑，諸侯無一助之者，而高子盟以存之，比之餘使，情實過倍，故傳序經之情，明與凡常之來有異也。云「不以齊侯使高子也」者，二說不同者，前說以齊侯不討慶父，使魯重遭其禍，不以齊侯使高子，故作自來之文，所以歸美於高子。若楚人使屈完如師，能量敵強弱，遂與齊盟，故不言使，所以歸功於屈完也。江熙之意，以君臣一體，好惡同之，使貴則主尊，故去使文，以表高子之貴。高子既貴，則桓公之重益彰，故不

從前說也。

十有二月，狄入衛。僖公二年城楚丘以封衛，則衛爲狄所滅明矣。不言滅而言入者，《春秋》爲賢者諱，齊桓公不能攘夷狄，救中國，故爲之諱。○爲賢，于僞反，下同。攘，如羊反。

鄭棄其師。惡其長也。兼不反其衆，

則是棄其師也。長謂高克也。高克好利，不顧其君。文公惡而遠之不能，使高克將兵禦狄于竟，陳其師旅，翱翔河上，久而不召，衆將離散。高克進之不以禮，文公退之不以道，危國亡師之本。○惡其，烏路反，注同。長，丁丈反。兼，戶謙反，又如字。好，呼報反。遠，于萬反。將，子匠反。竟音境。翱，五羔反。

【疏】傳「惡其」至「師也」。○釋曰：解經稱棄師之意，爲惡高克不顧其君，又責鄭人不反其衆，故經書「鄭棄其師」也。

## 監本春秋穀梁注疏僖公卷第七

起元年，盡五年

范甯集解 楊士勛疏 ①

僖公 ○名申，惠王十八年即位。

【疏】《魯世家》：「僖公名申，莊公之子，閔公庶兄，以惠王十八年即位。《謚法》：『小心畏忌曰僖。』」

元年，春，王正月。繼弑君不言即位，

正也。○弑音試，後皆同。

齊師、宋師、曹師次于聶北，救邢。聶北，邢地。○聶，女輒反。救不言次，據莊六年「王人子突救衛」，不言次。

【疏】傳「救不言次」。○釋曰：「王人子突救衛」，上有伐文。今無見伐文，而云救邢者，莊三十二年，狄伐邢，邢國遂滅，而齊救之，錄其本意，故經言救。傳以次非救急之事，故云非救也。知邢國滅者，《公羊傳》云：「不及事者何？邢已亡矣。孰亡之？蓋狄滅之。」又經書「城邢」，是國滅也。滅而不書者，《公羊傳》云：「曷為不言狄滅之？為桓公諱也。」是為齊桓公諱，故不言狄滅邢。

也。然則滅衛諱而書人，邢全不書之者，二事不可全掩，故諱而書一也。邢不書人，故有救次之文。衛亡書人，故沒其救次耳。

言次非救也。次，止也。救，赴急之意。今方

停止，故知非救也。非救而曰救，何也？遂齊

侯之意也。錄其本意。是齊侯與？怪其稱師。

○與音餘。齊侯也。何用見其是齊侯也？據

經書「齊師」。○見，賢徧反，下「復見」及注同。曹無

師。曹師者，曹伯也。小國君將稱君，卿將稱人，

不得稱師，言師則是曹伯也。曹君不可在師下，故知是齊

侯。○君將，子匠反，下同。

【疏】注「小國」至「稱師」。○釋曰：桓十三年傳

云「戰稱人，敗稱師，重衆」，是師者重辭。《周禮》「小國一軍」，軍將雖命卿，小國之卿唯比大夫，名氏不見，例當稱人，故不得言師也。是知言師者，即國君也。然師是重辭，所以楚滅蔡，亦得稱師。齊侯不足乎揚，亦稱師者，凡師者大國則得稱之，不論貶有輕重。《春秋》美惡不嫌同文，貶雖文同，輕重則自別。

①「范甯集解楊士勛疏」，原在下文「元年春」前，據全書例移此。

其不言曹伯，何也？以其不言齊侯，不可言曹伯也。其不言齊侯，何也？以其不足乎揚，不言齊侯也。救不及事，不足稱揚。○以其不足乎揚，絕句，稱揚也。

夏，六月，邢遷于夷儀。辟狄難。夷儀，邢地。○難，乃旦反。

【疏】注「夷儀邢地」。○釋曰：以邢遷之，故知邢地。

遷者，猶得其國家以往者也。其地，邢復見也。非若宋人遷宿，滅不復見。○復，扶又反，下注並同。

齊師、宋師、曹師城邢。是向之師也，使之如改事然，美齊侯之功也。是向聶北之師，當言遂，今復列三國者，<sup>①</sup>美齊桓存亡國。○是鄉，許亮反，本又作向，注同。

【疏】傳「向之師也」。○釋曰：前言師者，貶齊侯也。若向之師，便是彰桓之罪，而云美其功者，《春秋》文同義異者，上下甚衆。故齊侯前稱師以見貶，書次以彰情，今之城邢，國滅而復存，齊桓過而能改，君子善之，故重列三國，所以美其功也。○「使之如改事然」。○釋云：謂經不言遂，重列三國之師，若似更別來城，不因前

事，故云「改事然」。

秋，七月，戊辰，夫人姜氏薨于夷。哀姜。夫人薨不地。地，故也。

齊人以歸。不言以喪歸，非以喪歸也。加喪焉，諱以夫人歸也。泰曰：「齊人實以夫人歸，殺之于夷。諱，故使若自行至夷，遇疾而薨，然後齊人以喪歸也。歸在薨前，而今在下，是加喪之文也。經不言以喪歸者，以本非以喪歸也。」傳例曰：「以者，不以者也。」微旨見矣。○見，賢徧反。其以歸，薨之也。以歸然後殺之。

【疏】「不言」至「之也」。○釋曰：「不言以喪歸」，謂承夫人薨于夷，下不云齊人以喪歸也。「非以喪歸」，謂元本實不以喪歸，故不得言之也。「加喪焉」者，謂齊人以夫人歸，然後殺之，今經書薨文在上，是加喪之文也。謂諱齊人以我夫人殺之，故加喪文於上，似若夫人行至夷，遇疾而死，然後齊人以其喪歸也。「其以歸，薨之」者，謂其實以歸之，然後始薨之。實殺，傳言「薨之」者，傳以經文諱殺，故順經爲文。○注「傳例」至「見矣」。○釋

①「三」，原作「二」，阮校：「閩、監、毛本『二』作『三』，是也。」今據改。

曰：桓十四年傳文，彼注云：「不以」者，謂本非所得制，今得以之也。」范引之者，證齊人不合「以夫人」見此微旨。

### 楚人伐鄭。

【疏】「楚人伐鄭」。○釋曰：不以州言之者，以楚雖荆蠻，漸自通於諸夏，國轉彊大，與中國抗衡，故不復州舉之。或以爲言楚，所以駁鄭，然則從此以後盡稱楚，豈皆是駁鄭乎？其說非也。何休云：「稱楚人者，爲僖公諱與夷狄交婚，故進之，使若中國也。」《穀梁》無交婚之事，其言不可通于此也。杜預云：「荆始改號曰楚。」案莊十四年傳云：「荆者何？州舉之也。州不如國。」注云「言荆不如言楚」，則亦與杜預異也。

八月，公會齊侯、宋公、鄭伯、曹伯、邾人于櫓。櫓，宋地。○櫓，勅貞反，一本作打，音同。

九月，公敗邾師于偃。偃，邾地。○敗，必邁反，下皆同。偃，于免反，一本作堰，同。

【疏】「九月」至「于偃」。○釋曰：公所以敗邾師者，此傳無說。何休云：「公怨邾以夫人與齊，故敗之。」未知范意然不。

不日，疑戰也。疑戰而曰敗，勝內也。  
冬，十月，壬午，公子友帥師敗莒師于

麗，獲莒挐。麗，魯地。傳例曰：「獲者，不與之辭。」○麗，力池反。①挐，女居反，又女加反。莒無大夫，其曰莒挐，何也？據非大夫不書。以吾獲之，目之也。內不言獲，獲者不與之辭，主善以內，故不言獲。此其言獲，何也？據文十一年「叔孫得臣敗狄于鹹」，不言獲長狄。

【疏】注「據文」至「長狄」。○釋曰：此傳云「惡公子之給」，彼傳諱重傷，故不言獲。獲者不與之辭，內不言獲，乃是常例。至於長狄則異於餘獲，宜書之以表功，而經文畧之，由重傷故也。此注據之，以爲證者，取不書獲之成文，不言義旨全合也。

惡公子之給。給，欺給也。○惡，烏路反。給，徒乃反。給者奈何？公子友謂莒挐曰：「吾二人不相說，士卒何罪？」屏左右而相搏。公子友處下，左右曰：「孟勞！」孟勞者，魯之寶刀也。公子友以殺之。然則何

①「池」，原作「他」，據《釋文》改。



以惡乎給也？據得勝地。<sup>①</sup>○說音悅。卒，子忽反。搏音博，手搏也。勞如字，孟勞，寶刀名。曰，棄

師之道也。江熙曰：「經書『敗莒師』，而傳云二人相

搏，則師不戰，何以得敗？理自不通也。夫王赫斯怒，貴在爰整。子所慎三，戰居其一。季友令德之人，豈當舍三軍之整，佻身獨鬪，潛刃相害，以決勝負者哉？雖千載之事難明，然風味之所期，古猶今也，此又事之不然，傳或失之。」○赫，呼白反。舍音捨。佻，他堯反，又徒堯反。

【疏】注「江熙」至「失之」。○釋曰：《老子》云：

「以政治國，以奇用兵。」季子知莒挈之可擒，棄文王之整旅，佻身獨鬪，潛刃相爭，據禮雖乖，於權未爽，縱使理違，猶須申傳，況傳文不失，<sup>②</sup>江生何以爲非乎？又且季子無輕鬪之事，經不應書獲，傳不須云「棄師之道」。既經傳文符，而江熙妄難，范引其說，意亦同之，乃是范失，非傳失之。又經書獲，所以惡季子之給。今江熙云「季子令德也」，則是非獨不信傳，亦是不信經。

十有二月，丁巳，夫人氏之喪至自齊。

其不言姜，以其殺二子，貶之也。二子，子般、閔公。或曰，爲齊桓諱殺同姓也。○爲，于僞反。

【疏】「爲齊」至「姓也」。○釋曰：討夫人，<sup>③</sup>於齊桓非是姑姊，即是妹侄，而直云同姓者，以夫人失母之

道，殺子外奔，齊桓討之，信得其罪，既疏而遠之，託言同姓。

二年，春，王正月，城楚丘。楚丘者何？衛邑也。國而曰城，此邑也，其曰城，

何也？據元年「齊師、宋師、曹師城邢」，邢，國也。封

衛也。閔二年「狄人衛」，遂滅。則其不言城衛，

何也？衛未遷也。其不言衛之遷焉，何

也？據元年「邢遷于夷儀」，言遷也。不與齊侯專

封也。其言城之者，專辭也。故非天子不

得專封諸侯，諸侯不得專封諸侯，<sup>④</sup>雖通其

仁，以義而不與也。存衛是桓之仁，故通令城楚丘。

義不可以專封，故不言遷衛。○令，力呈反。故曰，仁

①「地」，《穀梁補注》作「也」。

②「失」，原作「知」，據宋刻元修本改。

③「討」，夏校：「疑爲衍字。」

④「不得專封」，王引之《經義述聞》：「下『不得』蓋涉上

「不得」而衍。若「專封」上有「不得」二字，則与下文不貫矣。」

不勝道。仁謂存亡國，道謂上下之禮。<sup>①</sup>

【疏】「楚丘」至「勝道」。○釋曰：楚丘何嫌非衛而傳言者，以無遷衛之文，故發之也。傳知是衛者，以《詩》云「作于楚宮」，故知之也。此云不言遷，不與齊侯專封，而元年城邢，美齊侯之功者，彼邢遷之後始城，則城者修舊之辭，非始立之稱，故可以美於齊桓。今衛國已滅，始城楚丘而國未遷，經先言城，後言遷，則是齊桓城而遷之，故不與專封也。然城鄭虎牢是邑，知楚丘非邑者，《詩》稱「楚宮」，明知非邑也。

夏，五月，辛巳，葬我小君哀姜。

虞師、晉師滅夏陽。非國而曰滅，重夏陽也。虞無師，其曰師，何也？以其先晉，不可以不言師也。人不得居師上，貴賤之序。○夏

陽，戶雅反，《左氏》作下陽。<sup>②</sup>先，蘇薦反，下文及注同。

【疏】傳「非國而曰滅」。○釋曰：此云「非國而曰滅，重夏陽也」，昭十三年「吳滅州來」亦言滅者，虞虢之滅，由於夏陽之亡；州來，楚之大都，而吳滅之，令楚國稍弱，入郢之兆，由滅州來所致，故並書滅。○傳「虞無師」。○釋曰：小國無師，傳三發之者，並是小國，不合言師。燕為敗而重衆，故得言師。曹言師者，明其是君也。虞言師者，表其先晉也。以其言師不同，各舉備文耳。

其先晉，何也？據小不先大。為主乎滅

夏陽也。夏陽者，虞、虢之塞邑也。其地險要，故二國以為塞邑。○塞，蘇代反，注同。滅夏陽，而

虞、虢舉矣。虞之為主乎滅夏陽，何也？

晉獻公欲伐虢，荀息曰：「君何不以屈產

之乘，垂棘之璧而借道乎虞也？」荀息，晉大

夫。屈邑產駿馬，垂棘出良璧。○屈，其勿反，又君勿反，地名也。乘，繩證反。駿音俊。借，子夜反，及下「不借」，「而借」皆同。

【疏】傳「虞虢舉矣」。○釋曰：徐邈云：「舉猶拔也。言晉滅夏陽，則虞、虢自此而拔也。」

公曰：「此晉國之寶也，如受吾幣而不借吾道，則如之何？」荀息曰：「此小國之所以事大國也。此謂璧馬之屬。」

【疏】傳「晉國之寶」。○釋曰：玉有美惡，出處不同。周有藍田，楚有和氏，宋有結綠，晉有垂棘，各是國之貴物，故云國之寶也。

① 「禮」，《穀梁補注》作「體」。

② 「作」，原無，據《釋文》補。

彼不借吾道，必不敢受吾幣。如受吾幣

而借吾道，則是我取之中府，而藏之外府，

取之中廢，而置之外廢也。」公曰：「宮之

奇存焉，宮之奇，虞之賢大夫。」○廢音敕。奇，其宜

反。必不使受之也。」荀息曰：「宮之奇之

爲人也，達心而懦，懦，弱。○懦，乃亂反，又乃臥

反。又少長於君。達心則其言畧，明達之人，言

則舉綱領要，不言提其耳，則愚者不悟。○少，詩召反，下

同。長，丁丈反。提，徒兮反，本作題，音同。懦則不

能彊諫，少長於君，則君輕之。且夫玩好在

耳目之前，而患在一國之後，此中知以上乃

能慮之，臣料虞君中知以下也。」公遂借道

而伐虢。宮之奇諫曰：「晉國之使者，其

辭卑而幣重，必不便於虞。」虞公弗聽，遂受

其幣而借之道。宮之奇諫曰：「語曰：

『唇亡則齒寒。』其斯之謂與！」語，諺言也。

○彊，其良反，又其丈反。好，呼報反。知音智，下同。

上，時掌反。料，力彫反，<sup>①</sup>又力弔反。使，所吏反。便，婢

面反。與音餘。諺音彥。

【疏】傳「中知以下」。○釋曰：《論語》云：「中

人以上，可以語上。」今虞君中知以下，則近愚，故不能遠慮也。

挈其妻子以奔曹。獻公亡虢，五年而

後舉虞。荀息牽馬操璧而前曰：「璧則猶

是也，而馬齒加長矣。」猶是，言如故。○挈，去結

反。操，七刀反。加長，丁丈反。

【疏】「五年而後舉虞」。○釋曰：謂僖五年也。

秋，九月，齊侯、宋公、江人、黃人盟于

貫。貫，宋地。○貫，古亂反。貫之盟，不期而至

者，江人、黃人也。江人、黃人者，遠國之辭

也。中國稱齊、宋，遠國稱江、黃，以爲諸侯

皆來至也。

【疏】傳「以爲諸侯皆來至也」。○釋曰：《公羊

傳》曰：「江人、黃人者何？遠國之辭也。遠國至矣，則中國曷爲獨言齊、宋至爾？大國言齊、宋，遠國言江、黃，

①「力」，原作「方」，據宋刻元修本及《釋文》改。

則其餘爲莫敢不至也。」何休云：「晉、楚大於宋，不序晉、楚而言序宋者，時實晉、楚之君不至，但君子成人之美，故褒益以爲偏至之辭，所以獎大霸功而勉盛德也。」事或然矣。魯雖復非大，《春秋》以魯爲主，魯若與會必書公，但魯亦不至，故不書之。或以爲魯公亦在，舉大以包之，故不得以魯爲主耳。

冬，十月，不雨。不雨者，勤雨也。言不雨，是欲得雨之心勤也。明君之恤民。○勤如字，麋氏音覲，後年同。

楚人侵鄭。

三年，春，王正月，不雨。不雨者，勤雨也。

夏，四月，不雨。一時不雨，則書首月。不言旱，不爲災。一時言不雨者，閔雨也。經一時輒言不雨，憂民之至。閔，憂也。

【疏】「一時」至「雨也」。○釋曰：此傳云「一時言不雨」者，據文二年「自十二月不雨，至于秋七月」。彼傳云：「歷時而言不雨，文不憂雨也。」此僖公憂雨，故時時別書之。

閔雨者，有志乎民者也。

徐人取舒。

六月，雨。雨云者，喜雨也。喜雨者，有志乎民者也。

【疏】傳「雨云」至「民者也」。○釋曰：《春秋》上下時雨不書，非常乃錄。今輒書「六月，雨」者，欲明僖公得雨則心喜故也。①心喜，是於民情深，故特錄之。

秋，齊侯、宋公、江人、黃人會于陽穀。陽穀，齊地。陽穀之會，桓公委端摺笏而朝諸侯，委，委貌之冠也。端，玄端之服。摺，插也。笏，以記事者也。所謂衣裳之會。○摺音進，又音箭。笏音忽。朝，直遙反。插，楚洽反。諸侯皆諭乎桓公之志。

【疏】「陽穀」至「之志」。○釋曰：桓會多矣，獨此言「委端摺笏」，「皆諭乎桓公之志」者，以此會最大，又以四教令於諸侯，其諸侯皆曉諭桓公之志，不須盟誓，故傳詳其事也。其四教者，《公羊傳》云「無鄣谷，無貯粟，無易樹子，無以妾爲妻」是也。云「委端摺笏」者，謂會時服此服以朝諸侯也。謂「委端」者，《郊特牲》云：「委貌，周道也。章甫，殷道也。母追，夏后氏之道也。」又《論語》云：「羔裘玄冠不以弔。」鄭玄云：「玄冠，委貌，諸侯視朝之。」

①「得」，原作「待」，阮校：「閔、監、毛本「待」作「得」，是。」今據改。

服。」是委者，委貌之冠也。《論語》又云：「端章甫，願為小相焉。」鄭云：「端，玄端也。衣玄端，冠章甫，諸侯日視朝之服。」又《士冠禮》云：「主人玄冠朝服。」在朝君臣同服，是玄端諸侯視朝之服。王肅云：「端委者，玄端之衣，委貌之冠。」故范亦同之。謂之玄端者，其色玄，而制正幅無殺，故謂之玄端。桓公會諸侯，因使諸侯朝己，故服朝服也。笏者，《玉藻》云：「天子以球玉，諸侯以象，大夫以魚須文竹，士竹本，象可也。」其長短則天子三尺，諸侯以下二尺有六寸也。○注「所謂衣裳之會」。○釋曰：傳稱衣裳之會十有一，今此注特言「所謂衣裳之會」者，以傳有其文，故注因顯之，不謂直此會是衣裳也。

冬，公子季友如齊莅盟。傳例曰：「莅，位也。內之前定之盟謂之莅，外之前定之盟謂之來。」○莅音利，又音類。

【疏】注「傳例」至「之來」。○釋曰：昭七年傳文。

莅者，位也。盟誓之言素定，今但往其位而盟。其不日，前定也。不言及者，以國與之也。不言其人，亦以國與之也。

【疏】傳「不言」至「之也」。○釋曰：舊解此傳是外內之通例，不據此一文而已。「不言及者，以國與之也」，謂若外國之來盟，及魯人往盟，經直舉外來為文。不

言及者，欲見以國與之也，故舉國為主，即宣七年「衛侯使孫良夫來盟」，此「公子季友如齊蒞盟」是也。「不言其人，亦以國與之也」者，謂不言來盟之類。經雖言及，而不書魯之主名者，亦是舉國與之，<sup>①</sup>即成三年「丙午，及荀庚盟」是也。不言外及者，經無故也。麋信、徐邈並據當文解之，理亦通也。但據成三年傳注，則不得以當文解之，故今從舊說耳。

### 楚人伐鄭。

四年，春，王正月，公會齊侯、宋公、陳侯、衛侯、鄭伯、許男、曹伯侵蔡，蔡潰。傳例曰：「侵時而此月，蓋為潰。」○潰，戶內反。蓋為，于偽反，下「為退」同。

【疏】注「傳例」至「為潰」。○釋曰：侵無月例，例時，今桓公知所侵而經書月，故知為潰也。文三年「沈潰書月，是其例也。莒潰書日者，惡大夫之叛，故謹而日之。」

潰之為言上下不相得也。君臣不和，而自潰散。侵，淺事也。侵蔡而蔡潰，以桓公為知所侵也。責得其罪，故裁侵而潰。不土其地，不分其民，明正也。

① 「是」，宋刻元修本作「見」。

【疏】傳「侵淺」至「正也」。○釋曰：侵者拘人民，而謂之淺者，對伐爲淺也。又傳云「不分其民」，是拘之而不取，亦是淺之義。此傳本意言桓公不深暴於蔡，纔侵之而即潰，故因發淺例。《左氏》：「無鍾鼓曰侵。」此傳稱拘人民，或當掩其不備，亦未聲鍾鼓也。《論語》稱「齊桓公正而不譎」，指謂伐楚。此侵蔡亦言正者，伐楚是責正事大，故馬、鄭指之；其實侵蔡不土其地，不分其民，亦是正事，故傳言正也。<sup>①</sup>

遂伐楚，次于陘。楚彊，齊欲綏之以德，故不速進而次于陘。陘，楚地。○陘音刑。

遂，繼事也。次，止也。

【疏】傳「次止也」。○釋曰：次有二種，有所畏之次，即「齊師、宋師次于郎」，傳曰「畏我」是也。有非所畏之次，即此「次于陘」，傳曰「次，止也」是。

夏，許男新臣卒。十四年「冬，蔡侯肸卒」，傳曰：「諸侯時卒，惡之也。」宣九年「辛酉，晉侯黑臀卒于扈」，傳曰：「其地，于外也。其日，未踰竟也。」然則新臣卒于楚，故不日耳，非惡也。○惡，烏路反，下同。臀，徒門反。

【疏】注「十四年」至「惡也」。○釋曰：宋公和卒，傳曰：「諸侯日卒，正也。」則日卒由正，不由善惡。蔡侯肸卒，傳曰：「時卒，惡也。」則似不日卒由善惡，不由正

- 者，凡諸侯雖則正卒，有惡者亦不得書日。成十五年「夏，六月，宋公固卒」，僖二十四年「冬，晉侯夷吾卒」，十四年「冬，蔡侯肸卒」是也。身既是庶，雖則無惡，亦不得書日，故傳云「日卒，正也」，明不日是不正。昭十四年「八月，莒子去疾卒」，定十四年夏五月「吳子光卒」，襄十八年冬十月「曹伯負芻卒」是也。日卒有二義，故傳兩明之。是諸侯正而無惡，縱在外在內並書日，不正無惡則書月。但有大惡，不問正與不正皆時也。「宋共公卒」書月者，彼爲葬日，表其違例，故不得書時也。雖例言之，則此許男新臣亦是不正也。故范直以「非惡」解之，不云正與不正。又昭二十三年「夏，六月，蔡侯東國卒于楚」，范云「不日，在外也」，則此新臣亦不正，<sup>②</sup>故不書日。襄二十六年「八月，壬午，許男甯卒于楚」，彼亦在外而書日，則甯是正可知也。然則庶子踰竟未踰竟，並皆不日，嫡子在在外在內，並皆書日，則新臣由不正而不書日。注云「卒于楚，故不日」者，以新臣非直不正，又兼在外，傳例云「其日，未踰竟」，故順傳文書之。其實由正與不正，不論在在外在內也。其襄公二十六年傳注云「在外已顯」者，彼甯實是正，經言
- ① 「傳侵淺至正也」至「故傳言正也」，原在經「次于陘」釋文「陘音刑」下，阮校：「此一段疏，閩、監、毛本移在傳「明正也」下。」今據閩、監、毛本移正。
- ② 「不正」，阮校：「「不正」當作「在外」。」

「于楚」，則在外之文已顯，必不須去日，故亦順傳文言之。必知由正不正，不由在外在內者，宣九年范注云：「諸侯正卒則日，不正則不日。」而云未踰竟者，恐後人謂操扈是國，故發傳曰未踰竟是也。知新臣無罪者，以薨于朝會，乃有王事之功，明無罪。或以爲許男新臣亦正也，但爲卒於楚，故不日。「許男甯卒于楚」書日者，以「新臣卒」無「于楚」之文，故去日，以見在外而卒也。許男甯經有在外之文，故書日以明其正。「晉侯黑臀卒于扈」，是正未踰竟，故亦書日，與許男異。故范以爲「其日，未踰竟」者，表其非國，不釋日與不日。范氏之注，上下多違，縱使兩解，仍有僻謬，故並存之，以遺來哲。

諸侯死於國，不地。死於外，地。死於師，何爲不地？據宣九年「晉侯黑臀卒于扈」，地。

【疏】注「據宣」至「扈地」。○釋曰：不據「曹伯負芻卒于師」者，師與地異。上云「伐楚，次于陘」，則許男卒于陘可知。卒當有地，而不地，故注以地決之。曹伯圍齊未退，即在師而卒，故云「卒于師」，是師與地異，故不據曹伯也。

內桓師也。齊桓威德洽著，諸侯安之，雖卒於外，與其在國同。<sup>①</sup>

楚屈完來盟于師，盟于召陵。屈完來如陘師盟，齊桓以其服義，爲退一舍，次于召陵，而與之盟。召陵，楚地。○召，上照反。

【疏】注「退一舍」。○釋曰：知「一舍」者，古者，師行每舍三十里，上云「屈完來盟于師」，下即云「盟于召陵」，知非大遠，故云「一舍」。宣十五年《左傳》華元謂子反曰：「去我三十里，唯命是聽。」亦其證也。

楚無大夫，無命卿也。

【疏】「楚無大夫」。○釋曰：無大夫，凡有三等之例。曹無大夫者，本非微國，後削小耳。莒則是東夷，本微國也。楚則蠻夷大國，僭號稱王，其卿不命於天子，故不同中國之例也。

其曰屈完，何也？以其來會桓，成之爲大夫也。尊齊桓，不欲令與卑者盟。○令，力呈反，下同。其不言使，權在屈完也。邵曰：「齊桓威陵江漢，楚人大懼，未能量敵，遣屈完如師。完權事之宜，<sup>②</sup>以義卻齊，遂得與盟，以安竟內。功皆在完，故不言使。」○與音預，又如字。則是正乎？曰，非正也。臣無自專之道。以其來會諸侯，重之也。重其宗中國，歸有道。

【疏】「以其」至「重之也」。○釋曰：以其來會，

<sup>①</sup>「其在」，《穀梁補注》作「在其」。

<sup>②</sup>「事」，宋刻元修本作「言」。

重之也，謂完既不正，經無貶文者，重其會中國。徐邈云：「經不言使屈完者，重其會諸侯也。」不言使，前已解訖。徐說非也。

來者何？內桓師也。來者，內辭也。內桓師，故言來。

【疏】「來者」至「師也」。○釋曰：「來者何」也，謂據陳袁僑如會，不言來也。「內桓師也」，<sup>①</sup>謂來者鄉內之辭，今內齊桓，為天下霸主，故亦言來也。于師，前

定也。于召陵，得志乎桓公也。得志者，不得志也。屈完來盟，桓公退于召陵，是屈完得其本志。

屈完得志，則桓公不得志。以桓公得志為僅矣。

桓為霸主，以會諸侯，楚子不來，屈完受盟，令問諸江，辭又不順，僅乃得志。言楚之難服。○為僅，其靳反。屈

完曰：「大國之以兵向楚，何也？」桓公

曰：「昭王南征不反，菁茅之貢不至，故周

室不祭。」菁茅，香草，所以縮酒，楚之職貢。○菁茅，

子丁反，下亡交反；菁茅，香草也。《尚書》傳云：「菁以爲菹，茅以縮酒。」縮，所六反。

【疏】注「菁茅香草」。○釋曰：《尚書·禹貢》云：「苟匭菁茅。」孔安國云：「菁以爲菹，茅以縮酒。」

今范云「菁茅，香草」，則以爲一物，與孔異也。

屈完曰：「菁茅之貢不至，則諾。昭王南征不反，我將問諸江。」問江邊之民，有見之者不。此不服罪之言，故退于召陵而與之盟。屈完所以得志，桓公之不得志爾。

【疏】注「問江邊之民」。○釋曰：《呂氏春秋》云：「周昭王親征荊蠻，反涉漢，梁敗，隕于漢中，辛餘靡振王北濟。」高誘注引《左傳》云：「昭王不復，君其問諸水濱。」<sup>②</sup>則昭王沒於漢，不得振王北濟也。故舊說皆云，漢濱之人以膠膠舡，船壞，昭王溺焉，則昭王沒漢。此云問諸江邊者，江漢，水之相近者，楚人不服罪，不指王之死處，而云問諸江也。

齊人執陳袁濤塗。袁濤塗，陳大夫。○濤，徒刀反。齊人者，齊侯也。其人之，何也？

於是咺然外齊侯也，不正其踰國而執也。江熙曰：「踰國，謂踰陳而執陳大夫。主人之不敬客，由客之不先敬主人。」<sup>③</sup>咺然衆有不服之心，故《春秋》因而譏

①「內」，原作「曰」，阮校：「段玉裁校本『曰』作『內』。」今據改。

②「水」，原作「木」，據宋刻元修本改。

③「不先」，阮校：「閩、監、毛本『不先』作『先不』。」



之，所謂以萬物爲心也。莊十七年「齊人執鄭詹」，傳與其執者，詹奔在齊，因執之。」○哆，昌者反，又昌氏反。詹之廉反。

【疏】「齊人」至「執也」。○釋曰：《公羊》、《左

氏》皆以爲濤塗誤軍道，故齊侯執之。此傳與注竟無誤軍道之言，則以濤塗不敬齊命，故執之也。「於是哆然外齊侯」者，謂齊不以禮於陳，陳人有不服之意，哆然疏外齊侯。哆然，寬大之意也。○「不正其踰國而執也」。○釋曰：謂陳之不敬，由齊之無禮，不能自責，反越國而執其臣，故不正其踰國而執也，貶以稱人。不正，猶言不與也。正則人與之，不正則人不與，故謂不與爲不正也。然齊人執鄭詹，亦稱人以執，傳言「與之」，此稱人以執，即云貶者。詹，鄭之佞人，往至齊國，稱人以執，則是衆人欲執之。今濤塗不在齊國，又無實罪，齊侯執之，而云「齊人」，故知是貶也。桓十一年宋公執人權臣，令廢嫡立庶，亦貶云「宋人」，是其類也。○注「以萬物爲心也」。○釋曰：《莊子》文。

秋，及江人、黃人伐陳。不言其人及之者何？內師也。

【疏】「不言」至「師也」。○釋曰：何嫌非內而發傳者，以文承齊人執濤塗之下，即云「及江人、黃人伐陳」，恐非魯及，故云「內師也」。

八月，公至自伐楚。有二事偶，則以後

事致。後事小，則以先事致。其以伐楚致，大伐楚也。鄭君曰：「會爲大事，伐爲小事。今齊桓伐楚，而後盟于召陵，公當致會而致伐者，楚彊莫能伐者，故以伐楚爲大事。」

【疏】注「鄭君」至「大事」。○釋曰：知會大伐小者，伐雖國之大事，會盟有昇壇揖讓之儀，示威講禮之制，奉之以牲王，<sup>①</sup>要之以神明，是其大事。故定四年公會諸侯侵楚，五月盟于臯鼬，下云「公至自會」，是亦以會爲大事也。今以楚彊莫能伐之者，故特以伐爲大事也。

葬許穆公。

冬，十有二月，公孫茲帥師會齊人、宋

人、衛人、鄭人、許人、曹人侵陳。莊十年春「二月，<sup>②</sup>公侵宋」，傳曰：「侵時，此其月，何也？惡之，故謹而月之。然則凡侵而月者，皆惡之。」○惡，烏路反，下同。

【疏】注「凡侵」至「惡之」。○釋曰：此侵陳爲惡者，陳之不敬，由齊之不敬陳也。齊桓宜自責，反執其臣，前事既非，今又致討，故書月以見惡也。

五年，春，晉侯殺其世子申生。目晉

① 「王」，據文意疑爲「主」之訛。

② 「二」，原作「正」，據宋刻元修本改。

侯，斥殺，惡晉侯也。斥，指斥。

【疏】「目晉」至「侯也」。○釋曰：傳言此者，於鄭段雖有目君之例，未辨目君之由，故於此明之。宋公殺其世子痤，雖不發傳，從此可知。其殺公子不目君者，皆罪賤之也。

杞伯姬來朝其子。婦人既嫁不踰竟，踰竟，非正也。諸侯相見曰朝，<sup>①</sup>伯姬爲志乎朝其子也。伯姬爲志乎朝其子，則是杞伯失夫之道矣。凱曰：「不能刑于寡妻。」○朝，直遙反，下皆同。爲志，于僞反，下同。諸侯相見曰朝，以待人父之道待人之子，非正也。故曰杞伯姬來朝其子，參譏也。參譏，謂伯姬、杞伯、魯侯也。桓九年「曹伯使其世子射姑來朝」，譏世子，此不譏者，明子隨母行，年尚幼弱，未可責以人子之道。伯姬以莊二十五年夏嫁，至今十五年，<sup>②</sup>則子幼可知。○參，七南反，又音三。

【疏】傳「參譏也」。○釋曰：並譏之者，伯姬託事而行，近於淫佚，失爲婦之道；杞伯不能防其閨門，令妻至魯，失爲夫之宜；魯待人之子，行待父之禮，失爲主之度，故三事同譏之也。

夏，公孫茲如牟。

公及齊侯、宋公、陳侯、衛侯、鄭伯、許男、曹伯會王世子于首戴。惠王之世子，名鄭，後立爲襄王。首戴，衛地。○首戴，《左氏》作首止。

【疏】「公及」至「首戴」。○釋曰：案《史記·年表》，此時齊侯、桓公也；宋公、桓公也；陳侯、宣公也；衛侯、文公也；鄭伯、文公也；許男、僖公也；曹伯、昭公也。其王世子者，即惠王之世子，名鄭，後立爲襄王是也。

及以會，尊之也。言及諸侯，然後會王世子，不敢令世子與諸侯齊列。○令，力呈反。何尊焉？王世子云者，唯王之貳也。云可以重之存焉，尊之也。何重焉？天子世子，世天下也。

【疏】「天子」至「下也」。○釋曰：《士冠禮》云：「天子之元子猶士也，天下無生而貴者也。」此云「世天下

①「諸侯相見曰朝」，王引之《經義述聞》：「此六字蓋涉下文而行。」

②「十五」，原作「十三」，據《穀梁補注》改。

也」者，彼見無生而貴者，又明有父在之故，今傳以其特世父位，故云「世天下也」。

秋，八月，諸侯盟于首戴。言諸侯者，前目而後凡，他皆放此。無中事而復舉諸侯，何也？

尊王世子而不敢與盟也。尊則其不敢與盟，何也？盟者，不相信也，故謹信也，不敢以所不信而加之尊者。桓，諸侯也，不能朝天子，是不臣也。王世子，子也，塊然受諸侯之尊己而立乎其位，是不子也。桓不臣，王世子不子，則其所善焉何也？是則變之正也。雖非禮之正，而合當時之宜。○復，扶又反，下同。塊，苦對反，又苦怪反。

【疏】「無中」至「侯何也」。○釋曰：「無中事」者，謂中間無他事也。據平丘之會無中事，不重舉諸侯，此則重舉諸侯，故決之。○「塊然」。○釋曰：塊然者，徐邈云：「塊然，安然也。」○「則其所善焉何也」。○釋曰：謂經不譏桓而尊王世子是也。

天子微，諸侯不享覲，桓控大國，扶小國，統諸侯，不能以朝天子，亦不敢致天王，

尊王世子于首戴，乃所以尊天王之命也。世子含王命會齊桓，亦所以尊天王之命也。世子受之可乎？是亦變之正也。天子微，諸侯不享覲，世子受諸侯之尊己，而天王尊矣，世子受之可也。

鄭伯逃歸不盟。以其去諸侯，故逃之也。專己背衆，故書逃。傳例曰：「逃義曰逃。」○控大，苦貢反。背衆，音佩。

【疏】「世子受之可乎」。○釋曰：謂問世子受諸侯之尊己可乎以不也。④下又云「世子受之可也」，謂得受之也。○注「逃義曰逃」。○釋曰：莊十七年傳文。④

①「去」，原作「法」，據宋刻元修本改。

②「世子受之可乎」，阮校：「此疏閩、監、毛本移在傳

「世子受之可也」下。」

③「謂問世子」至「之尊己」，阮校：「閩、毛本『謂』作

「請」，監本同，惟「已」字作「以」。」

④「注逃義曰逃」○釋曰莊十七年傳文，阮校：「此疏閩、監、毛本移在注『逃義曰逃』下。」

楚人滅弦，弦子奔黃。弦，國也。其不日，微國也。○<sup>①</sup>「弦國也」。何嫌非國，傳特言「弦國也」，發之者，將明微國不書日，故辨之也。<sup>②</sup>

九月，戊申，朔，日有食之。

冬，晉人執虞公。虞公貪璧馬之寶，棄兄弟之親，拒絕忠諫之口，不圖社稷之危，故晉命行于虞，使下執上，虞同于晉，是以謂之「晉人執虞公」。江熙曰：「《春秋》有州公、郭公、虞公，凡三公，非爵也。傳以為下執之辭，嘗試因此論之。五等諸侯，民皆稱曰公，存有王爵之限，沒則申其臣民之稱。州公舍其國，故先書州公。郭公盜而歸曹，故先名而後稱郭公。夏陽亡則虞為滅國，故宜稱虞公。三人殊而一致，三公舛而同歸，生死齊稱，蓋《春秋》所賤。」○之稱，尺證反，下「齊稱」同。舍音捨。舛，昌充反。

【疏】注「江熙」至「所賤」。○釋曰：「存有王爵

之限」者，謂五等諸侯，生存皆從本爵稱之也。「沒則申其臣民之稱」者，謂五等臣子尊其君父，舉謚稱公也。「州公舍其國，故先書州公」者，謂州公、郭公書經不同立文之意，以州公好舍其國而寔來，故先書州公，若郭公則盜而歸曹，故後言郭公也。「夏陽亡則虞為滅國」者，謂晉滅夏陽，則虞號舉矣，故虞為滅國，而亦稱公也。「三人殊而一致」者，謂立文雖殊，其理致是一也。「三公舛而同歸」者，謂立國雖舛，同歸一稱也。「生死齊稱」，正謂生死同號之曰公，與凡諸侯異也。案桓五年州公如曹，六年寔來，本無舍國之事，莊二十四年郭公歸曹，不見有盜歸之文，今江為此說，而范不難者，以州公舍國，《左氏》有文，郭公棄位適曹，即是盜之狀，以無正文，故引而不難也。「三公舛而同歸」，或有作舛者，舛謂差舛，理亦通，但定本舛者多。

執不言所於地，緼於晉也。時虞已包裹屬於晉，故雖在虞，執而不書其處。○緼，紆粉反。包音苞。裹音果。處，昌呂反。

【疏】「執不」至「晉也」。○釋曰：舊解云，執人

①「○」，原無，據文例補。

②「弦國也何嫌非國」至「故辨之也」，阮校：「此疏本本誤與前疏連。閩、監、毛本移在傳「微國也」下，于「何嫌」上增「○」及「釋曰」二字。」今據移正。

例不書地，此云不地，縕於晉也者，凡執人不地者，亦以地理可明故也。若晉會諸侯於溴梁，<sup>①</sup>執莒子、邾子，楚合諸侯於申，執徐子，皆因會而執之，則在會可知，故不假言地。至如滅人之國，執人之君，則亦是就國可知也。經若書晉滅虞，則是言其地。今不書滅虞，即不舉滅國之地，不謂執人當地也。所以不言滅虞者，晉命先行於虞，虞已屬晉，故不得言之也。或以爲「執不言所於地」，謂不書執虞公于虞也；「縕于晉也」，謂虞已苞裹屬晉，故不得言也。理亦通耳也。

其曰公，何也？據十九年「宋人執滕子嬰齊」，不言公。猶曰其下執之之辭也。臣民執其君，故稱公。其猶下執之之辭，何也？晉命行乎虞民矣。虞服于晉，故從晉命而執其君。虞虢之相救，非相爲賜也。今日亡虢，而明日亡虞矣。言明日，喻其速。○爲，于僞反，又如字。

①「溴」，原作「溴」，夏校：「按全書均作「溴梁」，據改。」今從之。

## 監本春秋穀梁注疏僖公卷第八

起六年，盡十八年

范甯集解 楊士勛疏

六年，春，王正月。

夏，公會齊侯、宋公、陳侯、衛侯、曹伯伐鄭，圍新城。伐國不言圍邑，此其言圍，何也？據元年「楚人伐鄭」，不言圍。病鄭也，著鄭伯之罪也。秦曰：諸伐國而言圍邑，傳皆以爲伐者之罪，而以此著鄭伯之罪者，齊桓行霸，尊崇王室，綏合諸侯，翼戴世子。盟之美者，莫盛於此。而鄭伯辟義逃歸，違叛霸者，是以諸侯伐而圍之，罪著于上，討顯于下，圍伐之文雖同，而善惡之義有殊，亦猶桓盟不日以明信，而葵丘之盟日之以爲美。○著，張慮反。辟音避。

【疏】注「秦曰」至「爲美」。○釋曰：罪著於上，而討顯于下者，謂前五年書鄭伯會而逃歸，是罪著於上也。今伐鄭，又言圍新城，是討顯於下也。圍伐之文雖

同，而善惡之義有殊，謂隱五年「宋人伐鄭，圍長葛」，此言齊侯伐鄭，圍新城，是圍伐之文同也。彼傳云「伐國不言圍邑，此其言圍，何也？久之也」。此傳曰「伐國不言圍邑，此其言圍，何也？著鄭伯之罪也」。故知彼言圍以惡宋，此言圍以善齊，是善惡之義有殊也。知善齊者，傳言著鄭伯之罪，故知圍者之善也。

秋，楚人圍許，諸侯遂救許。伐鄭之諸侯。善救許也。

【疏】「善救許也」。○釋曰：何嫌非善，而傳言之者，以許是近楚小國，叛而即齊，嫌救之非善，故發之。

冬，公至自伐鄭。其不以救許致，何也？大伐鄭也。

【疏】「大伐鄭也」。○釋曰：大之者，鄭叛中國，外心事楚，成蠻夷之強，益華夏之弱，齊桓爲伯，討得其罪，鄭人服從，遂使世子聽命，是其大也。

七年，春，齊人伐鄭。

夏，小邾子來朝。○朝，直遙反。

鄭殺其大夫申侯。稱國以殺大夫，殺無罪也。

【疏】「稱國」至「罪也」。○釋曰：莊九年「齊人殺無知」，傳曰「稱人以殺，殺有罪也」。此云「稱國以殺大夫，殺無罪也」，是稱人稱國例異也。但傳不說殺之狀，無由知其事焉。准例言之，則是罪鄭伯也。案傳例：「失德不葬。」文公不書葬，則亦失德也。枉殺卿佐，是失德之儔，未知鄭伯更有失德，為當直由殺申侯，不可知也。

秋，七月，公會齊侯、宋公、陳世子款、鄭世子華，盟于寧母。寧母，某地。○寧母，上音如字，又音甯，下音無，又茂后反。《左氏》作甯。衣裳之會也。

【疏】「衣裳之會也」。○釋曰：衣裳之會十有一，或釋或不釋。兵車之會四，傳皆發之者，衣裳之會多，省文以相包，兵車之會少，故備舉以見義。此是衣裳，後歲兵車，二文相近，故傳因而別之也。

曹伯班卒。○班，必顏反。

公子友如齊。

冬，葬曹昭公。

八年，春，王正月，公會王人、齊侯、宋公、衛侯、許男、曹伯、陳世子款盟于洮。洮，

曹地。王人之先諸侯，何也？貴王命也：朝服雖敝，必加於上；弁冕雖舊，必加於首；周室雖衰，必先諸侯。兵車之會也。

鄭伯乞盟。以向之逃歸乞之也。向謂五年逃首戴之盟，齊桓為兵車之會，于此乃震服，懼不得盟，故乞得與之。不錄使者，使若鄭伯自來，所以抑一人之惡，申衆人之善。○之先，悉薦反，下同。朝服，直遙反。弁，皮彥反。以向，香亮反，本又作鄉，注同。得與音豫，使者，所吏反。

【疏】「朝服雖敝」至「必加於首」。○釋曰：朝服者，天子則皮弁，諸侯則玄冠，衣則皮弁白布，玄冠緇衣素裳也。弁冕者，謂白鹿皮為弁，冕謂以木為幹。衣之以布，上玄下纁，垂旒者也。

乞者，重辭也，人道貴讓，故以乞為重。

【疏】「乞者重辭也」。○釋曰：文與乞師同，故為重辭也。

重是盟也。悔前逃歸，故以重言。乞者，處其所而請與也。言乞知不自來。

【疏】注「言乞知不自來」。○釋曰：經言晉侯使卻錡來乞師，是亦不自來也。若然，何以不錄使者？所以抑鄭伯、申諸侯也。

蓋沟之也。沟血而與之。○沟，<sup>①</sup>由若反，又音酌。

### 夏，狄伐晉。

秋，七月，禘于大廟，禘，三年大祭之名。大廟，周公廟。《禮記·明堂位》曰：「季夏六月，以禘禮祀周公于大廟。」《雜記下》曰：「孟獻子曰：『七月日至，可以有事于祖。』七月而禘，獻子爲之。」案宣九年「仲孫蔑如京師」，於是獻子始見經，襄十九年卒，然則失禮非獻子所始明矣。《雜記》之云，甯所未詳。○大廟音泰。見，賢徧反，下文「而見」同。

【疏】注「失禮」至「明矣」。○釋曰：范言此者，以《禮記》稱「七月而禘，獻子爲之」，此時未有獻子，亦七月而禘，故知失禮非獻子爲始也。

用致夫人。劉向曰：夫人，成風也。致之于大廟，立之以爲夫人。○夫人，成風也。《左氏》以爲哀姜。

【疏】「用致夫人」。○釋曰：《左氏》以夫人爲哀姜，因禘祭而致之於廟。《公羊》以爲僖公本取楚女爲嫡，取齊女爲媵，齊女先至，遂脅公使立之爲夫人，故因禘祭而見於廟。此傳及注意，則以夫人爲成風。致之者，謂致之於大廟，立之以爲夫人。與二傳違者，若《左氏》以夫人爲哀姜，元年爲齊所殺，何爲今日乃致之？若《公羊》以爲齊之媵女，則僖公是作頌賢君，縱爲齊所脅，豈得以媵

妾爲夫人乎？明知二傳非也。今傳云，一則以宗廟臨之而後貶焉，一則以外之弗夫人而見正焉。檢經傳之文符同，故知是成風也。

用者，不宜用者也；致者，不宜致者也。言夫人必以其氏姓，言夫人而不以氏姓，非夫人也，立妾之辭也，非正也。夫人者，正嫡之稱，謂非崇妾之嘉號。以妾體君，則上下無別，雖尊其母，是卑其父，故曰非正也。禮：有君之母，非夫人者，又庶子爲後，爲其母總。是妾不爲夫體明矣。<sup>②</sup>○適，丁歷反，本亦作嫡。稱，尺證反。別，彼列反。爲其，于僞反。總，音思。

【疏】注「夫人」至「明矣」。○釋曰：仲子者，惠公之母。隱五年「考仲子之宮」，而經傳譏之是也。有君之母非夫人者，又庶子爲後爲其母總者，《喪服》文也。

夫人之，我可以不夫人之乎？夫人卒葬之，我可以不卒葬之乎？鄭嗣曰：君以爲夫

① 「沟」，原作「灼」，據《釋文》改。

② 「體」，原闕，阮校：「閩、監、毛本作『體』」。《穀梁補注》亦作「體」。今按：上文言「以妾體君」，則此當爲「體」字，據補。



人，君以夫人之禮卒葬之，主書者不得不以爲夫人也。成風以文四年薨，五年葬，傳終說其事。一則以宗廟臨之而後貶焉，臣無貶君之義，故于大廟去夫人氏姓，以明君之非正。○去，起吕反。一則以外之弗夫人而見正焉。秦人來歸僖公成風之襚，不言夫人。○襚音遂。

冬，十有二月，丁未，天王崩。惠王也。

九年，春，王三月，丁丑，宋公禦說卒。

○禦，魚吕反，本亦作御。說音悅。

夏，公會宰周公、齊侯、宋子、衛侯、鄭伯、許男、曹伯于葵丘。宰，官。周，采地。天子三公不字。宋子，襄公。葵丘，地名。○采音菜。天子之宰，通于四海。宰，天官冢宰，兼爲三公者。三公論道之官，無事于會盟。冢宰掌建邦之六典，以佐王治邦國，故曰通于四海。

【疏】注「宰天」至「四海」。○釋曰：傳言通於四海者，解其與盟會之事也。若直爲三公論道之官，則無事於會盟。以兼爲冢宰，通於四海，爲諸侯所尊，故得出會也。一解通於四海者，解其稱官之意，與注乖，非也。論道之官者，《尚書》、《周官》云「論道經邦，燮理陰陽」是也。「掌建邦之六典」者，《大宰》職云「一曰治典，二曰教典，三

曰禮典，四曰政典，五曰刑典，六曰事典是也。《左氏》以宰周公爲宰孔，此傳蓋亦然也。

宋其稱子，何也？未葬之辭也。禮：

柩在堂上，孤無外事。今背殯而出會，以宋

子爲無哀矣。櫨木如椁，塗之曰殯。殷人殯于兩楹之間，①周人殯于西階之上。宋，殷後也。○柩，其救反。

《禮記》云：「在牀曰尸，在棺曰柩。」背音佩。菽木，才官反，本又作櫨，同。

【疏】「宋其」至「哀矣」。○釋曰：稱宋子，正也。

而云無哀者，宋子非主伯所召，②而自會諸侯。稱子，嫌稱子合正無譏，故傳責其背殯也。晉襄背殯，貶之稱人。此經不貶者，宋襄雖背殯出會，而子道不虧，於理雖合小譏，而文不可貶責。其晉襄上無王命所召，又非國事急重，而自爲戎首，與敵交戰，非直於理合責，於文亦當貶也。其稱子稱侯之例，具於桓十三年疏。○注「櫨木」至「後也」。○釋曰：《禮記·檀弓》云：「天子之殯也，菽塗龍輅以椁。」鄭玄云：「菽木周龍輅，如椁，而塗之也。天子殯以輅車，畫輅爲龍也。」彼說天子之禮，故云龍輅，則諸侯亦設輅而不畫龍，其用木櫨之亦如椁，故范云「櫨木如椁」。

①「殷」，原作「周」，據宋刻元修本改。

②「主」，宋刻元修本作「王」。

也。《檀弓》又云：「夏后氏殯於東階之上」，「殷人殯於兩楹之間」，「周人殯於西階之上」。是注所據之文也。云「宋，殷後」者，欲見宋之殯亦從兩楹之間。

秋，七月，乙酉，伯姬卒。內女也。未

適人，不卒，此何以卒也？許嫁，笄而字之，死則以成人之喪治之。女子許嫁不爲殯，死則以成人之喪治之，謂許嫁於諸侯，尊同，則服大功九月。吉筭，以象爲之，刻鏤其首以爲飾，成人著之。○筭，古今反。殯，式羊反。著，丁畧反。

【疏】「內女也」。○釋曰：明內女有書卒之義，

故發首云內女也。若其不然，不嫌非內女也。范氏《別例》云：「內女卒葬例有六，葬有三，卒亦有三。卒者，此文一也；僖十六年鄆季姬二也；成八年杞叔姬三也。葬者，莊四年葬紀伯姬，三十年葬紀叔姬，襄三十年宋葬共姬是也。文十二年子叔姬不數之者，與此伯姬同是未適人，故總爲一也。」○注「女子」至「著之」。○釋曰：《喪服》大功章云：「女子子之長殯。」傳曰：「何以大功？未成人也，」年十九至十六爲長殯，十五至十二爲中殯，十一至八歲爲下殯，七歲以下「爲無服之殯」。於其服也，長殯，中殯降成人一等，下殯降成人二等。又《喪服》傳曰：「大功之殯中從上，小功之殯中從下。」長殯，中殯總言之者，據大功以上也。其葬殯之禮，亦與成人有異，故《檀弓》云「周人以殷人之棺槨葬長殯，以夏后氏之

聖周葬中殯、下殯，以有虞氏之瓦棺葬無服之殯」是也。女子許嫁而笄，猶男子之冠也，故以成人之喪治之。禮：

諸侯絕朞。故許嫁於諸侯，則服之；若嫁與大夫，則不服也。禮：姊妹與己之女，同服齊衰，若出嫁，則爲之降至大功九月。禮意爲降者，取受我而厚之。夫爲之朞，故我爲之降。計此伯姬未至夫家，①案《曾子問》云：「娶女有吉日而女死，」「壻齊衰而弔，既葬除之」。然則其夫不爲之盡禮，則皆不得爲之降，當亦服齊衰朞也。而范注云服大功者，總據出嫁者言之，故云大功，非謂此亦大功也。或當女子在室，公不爲之服，則卒之亦不書。②今書之者，以其許嫁故也。夫雖不終服，③公亦從出嫁之例降至大功也。「吉筭以象爲之」者，《詩》云「象服是宜」，毛傳云：「尊者所以爲飾。」故知用象也。鄭解象服與此異耳。《喪服》女子許嫁，服斬衰，用箭筭，齊衰則用榛筭。喪既無飾，故知吉筭有飾也。鏤刻其首者，相傳爲然也。

九月，戊辰，諸侯盟于葵丘。桓盟不日，此何以日？美之也。爲見天子之禁，故備之也。何休以爲即日爲美，其不日皆爲惡也。桓

①「計」，宋刻元修本作「討」。

②「之」，宋刻元修本無。

③「不」下，宋刻元修本有「爲」字。

公之盟不日，皆爲惡邪？莊十三年柯之盟，不日爲信，至此日以爲美，義相反也。鄭君釋之曰：「柯之盟不日，因始信之。」①自其後盟，以不日爲平文。從陽穀已來，至此葵丘之盟，皆令諸侯以天子之禁。桓德極而將衰，故備日以美之，自此不復盟矣。」○爲見，于僞反，下賢徧反。復，扶又反。

【疏】注「自此不復盟矣」。○釋曰：十五年盟于牡丘，而云「不復盟矣」者，以衣裳之會不復盟，彼是兵車故也。

葵丘之會，②陳牲而不殺，所謂無歃血之盟。

鄭君曰：「盟牲，諸侯用牛，大夫用豕。」○歃，本又作啗，所洽反，又所甲反。豕音加。

【疏】「陳牲而不殺」。○釋曰：陳牲不殺，則不得謂之盟。若不殺牲，又不得云讀書加於牲上。而傳云不殺者，桓公信義之極，見於此矣。③雖盟而不歃血，謂之不殺。不殺者，謂不如凡常之殺，殺而不用，直讀書而加于牲上而已。○注「所謂」至「用豕」。○釋曰：莊二十七年傳云：「衣裳之會十有一，未嘗有歃血之盟也，信厚也。」則衣裳之會皆不歃血。而此會獨言之者，以此會桓德極盛，故詳其事，實餘盟亦不歃血耳。八年洮會云「洮血與鄭伯」者，彼兵車之會故也。徐邈云：「陳牲者，不殺埋之，陳示諸侯而已。加于牲上者，亦謂活牲，非死牲。」理亦通也。此葵丘會爲桓德盛，故書日以美之。又

毋雍泉以下，是四教之事，而《論語》一匡天下，鄭不據之，而指陽穀者，鄭據《公羊》之文，故指陽穀。其實此會亦有四教，故上注云「從陽穀已來，至此葵丘之盟，旨令諸侯以天子之禁」是也。注又引鄭君曰「盟牲，諸侯用牛，大夫用豕」者，《左傳》云：「諸侯盟，誰執牛耳？」又曰：「鄭伯使卒出豕。」是其證也。

讀書加于牲上，壹明天子之禁，壹猶專也。曰，毋雍泉，專水利以障谷。○雍，於勇反，塞也。障音章，又之亮反。毋訖糴，訖，止也，謂貯粟。○糴音狄。貯，張呂反。毋易樹子，樹子，嫡子。○嫡，丁歷反。毋以妾爲妻，毋使婦人與國事。女正位於內。○與音豫。

甲子，晉侯詭諸卒。獻公也。枉殺世子申生，失德不葬。○詭諸，九委反，《左氏》作僇諸。枉，紆往反。【疏】注「失德不葬」。○釋曰：宋桓亦不葬，至此言失德者，今獻公枉殺申生，即是失德之例。宋桓無罪

①「因」，宋刻元修本作「固」。

②「會」，宋刻元修本作「盟」。

③「見」，原作「是」，阮校：「監、毛本『是』作『見』，是也。」今據改。

之狀，故范不得言之也。《公羊》以爲桓公不書葬者，<sup>①</sup>爲宋襄公背殯出會，不書葬，若非背殯然也。《穀梁》既譏宋子，即不是爲諱，蓋魯不會故也。

冬，晉里克殺其君之子奚齊。其君之子云者，國人不子也。國人不子，何也？不正其殺世子申生而立之也。諸侯在喪稱子，言國人不君之，故繫于其君。

【疏】「冬晉」至「奚齊」。○釋曰：范云：「弑君日與不日，從其君正與不正。」今奚齊書時者，爲未成君，且又不正故也。○「國人不子」。○釋曰：舊解諸侯在喪稱子，今國人不以爲君，故不直謂之子，而繫之於君也。徐邈云：「不子者，謂不子愛之也。」非范意。蓋不子者，謂不以爲君，則是不子也。

十年，春，王正月，公如齊。

【疏】「正月公如齊」。○釋曰：何休云：「書月者，善公朝事齊，故月之。」朝既以時爲正，書月何以爲善？蓋爲下滅溫書月也。

狄滅溫，溫子奔衛。

晉里克弑其君卓，及其大夫荀息。以尊及卑也。荀息閑也。○卓，勅角反。

夏，齊侯、許男伐北戎。

晉殺其大夫里克。稱國以殺，罪累上也。里克弑二君與一大夫，二君：奚齊、卓子。一大夫：荀息。其以累上之辭言之，何也？據有罪。其殺之不以其罪也。其殺之不以其罪，奈何？里克所爲殺者，爲重耳也。殺奚齊、卓子者，欲以重耳爲君。重耳，夷吾兄文公。○所爲，于僞反，下文皆同。重，直龍反。殺奚齊，申志反，又如字。夷吾曰：「是又將殺我乎？」故殺之不以其罪也。其爲重耳弑奈何？晉獻公伐虢，得麗姬，獻公私之。有二子，長曰奚齊，稚曰卓子。麗姬欲爲亂，亂謂殺申生而立其子。○麗姬，力池反，伐虢所得。《左氏》伐麗戎所得。長，丁丈反。稚，直吏反。故謂君曰：「吾夜者夢夫人趨而來曰：『吾苦畏！』」夫人，申生母。○苦，如字，又枯路反，下同。胡不使大夫將衛士而衛冢乎？」公曰：「孰可使？」曰：

①「不」，原作「下」，據宋刻元修本改。

「臣莫尊於世子，則世子可。」故君謂世子曰：「麗姬夢夫人趨而來曰：『吾苦畏！』女其將衛士而往衛冢乎！」世子曰：「敬諾！」築宮，宮成。麗姬又曰：「吾夜者夢夫人趨而來曰：『吾苦饑！』」世子之宮已成，則何爲不使祠也？」故獻公謂世子曰：「其祠！」世子祠。已祠，致福於君。君田而不在。麗姬以酖爲酒，藥脯以毒。獻公田來，麗姬曰：「世子已祠，故致福於君。」君將食，麗姬跪曰：「食自外來者，不可不試也。」覆酒於地而地責。責，沸起也。○女音汝，下皆同。祠，自絲反。酖，直蔭反，以鳩鳥毛畫酒。跪，求委反。覆，芳服反。責，扶粉反，注同。以脯與犬，犬死。麗姬下堂而啼呼曰：「天乎，天乎！國，子之國也，子何遲於爲君？」君喟然歎曰：「吾與女未有過切，吾與女未有過差切急。」○呼，火故反。喟，去愧反，又去怪反。差，初賣反，又如字。

【疏】「未有過切」。○釋曰：公信麗姬，謂大子實將殺己，故喟然歎曰：「吾與汝爲父子以來，未嘗有過差切急，是何與我之深也！」雖不對大子發歎，而爲此言也。

「是何與我之深也？」使人謂世子曰：「爾其圖之！」世子之傅里克謂世子曰：「人自明！人自明則可以生，不人自明則不可以生。」世子曰：「吾君已老矣，已昏矣。吾若此而人自明，則麗姬必死，麗姬死，則吾君不安。所以使吾君不安者，吾不若自死，吾寧自殺以安吾君，以重耳爲寄矣。」慮麗姬又譖重耳，故以託里克，使保全之。勿脰而死。○勿，亡粉反。脰音豆，頸也。故里克所爲弑者，爲重耳也。夷吾曰：「是又將殺我也。」

秋，七月。

冬，大雨雪。○雨，于付反。

十有一年，春，晉殺其大夫平鄭父。○平，浦悲反。稱國以殺，罪累上也。

【疏】「罪累上也」。○釋曰：重發傳者，此里克同黨，恐異，故發之。

夏，公及夫人姜氏會齊侯于陽穀。

秋，八月，大雩。雩月，正也。雩，得雨

曰雩，不得雨曰旱。禮，龍見而雩。常祀不書，書者皆以旱也。故得雨則喜，以月爲正也；不得雨則書旱，明旱災成。何休曰：「《公羊》書雩者，善人君應變求索，不雩則言旱，旱而不害物，言不雨也。就如《穀梁》，設本不雩，何以明之？如以不雨明之，設旱而不害物，何以別乎？」鄭君釋之曰：「雩者，夏祈穀實之禮也，旱亦用焉。得雨書雩，明雩有益。不得雨書旱，明旱災成。後得雨，無及也。國君而遭旱，雖有不憂民事者，何乃廢禮？本不雩禱哉，顧不能致精誠也。旱而不害物，故以久不雨別之。」<sup>①</sup>文二年、<sup>②</sup>十三年，「自十有二月」、「自正月不雨，至于秋七月」是也。《穀梁傳》曰：「歷時而言不雨，文不閔雨也。」以文不憂雨，故不如僖時書不雨。文所以不閔雨者，素無志於民，性退弱而不明，又見時久不雨而無災耳。」○雩音于。龍見，賢徧反，下同。應變，應對之應。索，所白反。別，彼列反，下同。禱，丁老反，又丁報反。

【疏】「雩月正也」。○釋曰：《穀梁》之例，若常祀之雩，則皆不書，書者，並是爲旱也，若得雨則書雩，不

得雨則書旱。就書之中，若八月、九月雩，則書月以見正，何者？八月、九月，其時窮，人力盡故也。定元年「九月，大雩」，傳曰：「雩月，雩之正也。」此秋八月雩，傳曰：「雩月，正也。」是雨者雩者書月以見正。昭二十五年七月「大雩」亦書月者，以一月再雩，故月也。餘月雩者，則書時以見非正。則成七年「冬，大雩」，傳曰：「雩不月而時，非之也。冬無爲雩也。」又定元年傳曰：「秋，大雩，非正也。冬，大雩，非正也。」是餘月雩皆書時以見非正。其早則例皆時，何者？早必歲窮，非一月之事故也，則僖二十一年「夏，大旱」，傳曰：「旱時，正也」，宣七年「秋，大旱」，亦蒙例可知也。舊解八月雩，雖不得雨，亦不云旱也，若九月雩而不得雨，則書旱。傳言得雨曰雩，指爲八月也；不得雨曰旱，指爲九月也。觀經傳上下，全無此意，其說非也。又僖二十一年「夏，大旱」，范引傳例曰：「得雨曰雩，不得雨曰旱。」豈是九月雩不得雨，何爲亦書旱也？○注「設本」至「災耳」。○釋曰：何休難此傳云，雩而得雨曰雩，故言設使元本不雩，則何以明之也？此傳又云不得雨曰旱，故又難云，

①「故」，原作「固」，阮校：「監、毛本『固』作『故』，是。」今據改。

②「文二年」下，《穀梁補注》有「十年」二字。今按：十年、十三年均有「自正月不雨，至于秋七月」。

就如《穀梁》書早，則以不雨明之，設使或旱而不害物，則何以別之乎？

冬，楚人伐黃。

十有二年，春，王正月，<sup>①</sup>庚午，日有食之。

夏，楚人滅黃。貫之盟，管仲曰：

「江、黃遠齊而近楚，楚爲利之國也，若伐而不能救，則無以宗諸侯矣。」宗諸侯，謂諸侯宗之。

○貫，古亂反。遠，于萬反。近，附近之近。爲，于僞反。

桓公不聽，遂與之盟。管仲死，楚伐江滅黃，桓公不能救，故君子閔之也。閔其貪慕伯者以致滅。

【疏】「貫之」至「閔之也」。○釋曰：案《史記》，

管仲之卒在桓公四十一年，計桓公四十一年，當魯僖十五年。而此云管仲死者，蓋不取之《史記》之說。云閔之也者，閔其背楚致禍，歸齊無福之意，是不解經也。

秋，七月。

冬，十有二月，丁丑，陳侯杵臼卒。

○杵，昌吕反。

十有三年，春，狄侵衛。

夏，四月，葬陳宣公。公會齊侯、宋公、

陳侯、衛侯、鄭伯、許男、曹伯于鹹。鹹，衛地。

○鹹音咸。兵車之會也。

【疏】「兵車之會也」。○釋曰：何休於此有《廢

疾》，范不具載鄭釋者，以數九會異於鄭故也。

秋，九月，大雩。

冬，公子友如齊。

十有四年，春，諸侯城緣陵。緣陵，杞邑。

【疏】注「緣陵杞邑」。○釋曰：謂之城者，封杞

也。不發非國之問者，從楚丘之例也。不言城杞及遷，亦從彼例也。《公羊》以爲杞國爲徐莒脅滅，故諸侯爲之城。《左氏》以爲淮夷病杞，故齊桓爲之城。二傳說城之所由雖殊，皆是爲杞也，故范注亦云「緣陵，杞邑」。

其曰諸侯，散辭也。直曰諸侯，無小大之序，

①「正月」，阮校：「石經「正」作「三」。王引之《經義述

聞》：「謹案：日食必於朔。杜氏《春秋長曆》是年

三月庚午朔，則作「三」者是也。……《左氏》、《公羊》

皆作「三」。」

是各自欲城，無總一之者，非伯者所制，故曰散辭。聚而曰散，何也？據言諸侯城，則是聚。諸侯城，有散辭也，桓德衰矣。言諸侯城，則非伯者之爲可知也。齊桓德衰，所以散也。何休曰：「案先是盟亦言諸侯，非散也。又《穀梁》美九年諸侯盟于葵丘，即散，何以美之邪？」鄭君釋之曰：「九年，公會宰周公、齊侯、宋子、衛侯、鄭伯、許男、曹伯于葵丘，九月戊辰，盟于葵丘。時諸侯初在會，未有歸者，故可以不序。今此十三年夏公會齊侯、宋公、陳侯、衛侯、鄭伯、許男、曹伯于鹹，而冬公子友如齊，此聘也。書聘，則會固前已歸矣。今云諸侯城緣陵，而不序其人，明其散，桓德衰矣。葵丘之事，安得以難此？」○難，乃旦反。

夏，六月，季姬及繒子遇于防，使繒子來朝。遇例時，此非所宜遇，故謹而月之。○繒，在陵反。朝，直遙反，下文及注同。遇者，同謀也。魯女無故遠會諸侯，遂得淫通，此亦事之不然。《左傳》曰：繒季姬來寧，公怒之以繒子不朝，遇于防，而使來朝。此近合人情。○近，如字，又附近之近。

【疏】「遇者同謀也」。○釋曰：傳例曰：「遇者，志相得也。」今云同謀者，以淫通與盟會異，故發傳。又云「言使，非正者，婦人使夫，異於君使世子，故重發非正之例也」。

來朝者，來請己也。使來朝，請己爲妻。朝不言使，言使，非正也。以病繒子也。

秋，八月，辛卯，沙鹿崩。沙鹿，晉山。

【疏】「沙鹿崩」。○釋曰：《公羊》以沙鹿爲河上之邑。崩者，陷入地中。杜預注《左氏》以爲山名。此傳以鹿爲山足。是三傳說異也。

林屬於山爲鹿。鹿，山足。○屬，之玉反。

沙，山名也。無崩道而崩，故志之也。其日，重其變也。劉向曰：「鹿在山下平地，臣象，陰位也。崩者，散落，背叛不事上之象。」○背音佩。

【疏】「其日重其變也」。○釋曰：決梁山崩，不日也。梁山崩，亦壅河，不書壅河者，舉山崩爲重故也。

狄侵鄭。

冬，蔡侯貶卒。○貶，許乞反。諸侯時卒，

惡之也。○惡，烏路反。

【疏】「時卒惡之也」。○釋曰：麋信云：「蔡侯貶父哀侯，爲楚所執，貶不附中國，而常事父讎，故惡之而不書日也。」案蔡侯自僖以來，未與中國爲會，則麋信之言是也。不書葬者，或是失德，或是魯不會也。

十有五年，春，王正月，公如齊。



楚人伐徐。

三月，公會齊侯、宋公、陳侯、衛侯、鄭伯、許男、曹伯，盟于牡丘。牡丘，地名。兵車之會也。

遂次于匡。救徐也，時楚人伐徐。匡，衛地。

遂，繼事也。次，止也。有畏也。畏楚。

【疏】「次止也有畏也」。○釋曰：復發傳者，前次于陘，欲綏楚以德，今而畏楚，故別發之。

公孫敖帥師及諸侯之大夫救徐。諸侯既盟，次匡，皆遣大夫將兵救徐，故不復具列諸國。○復，扶又反。善救徐也。

【疏】「善救徐也」。○釋曰：徐叛楚即齊，旋為楚所敗，嫌救非善，故發明之。

夏，五月，日有食之。夜食。

【疏】注「夜食」。○釋曰：莊公十八年傳云：

「不言日，不言朔，夜食也。」是以知之。

秋，七月，齊師、曹師伐厲。徐邈曰：案齊桓末年，用師及會，皆危之而月也。于時霸業已衰，勤王之誠替于內，震矜之容見於外，禍釁既兆，動接危理，故月。衆國之君雖有失道，未足為一世興衰。齊桓威攝羣

后，政行天下，其得失皆治亂所繫，故《春秋》重而詳之，錄所善而著所危云爾。○見，賢徧反。釁，許靳反。衰，本或作喪，①息浪反。治，自吏反。

【疏】注「徐邈」至「云爾」。○釋曰：何休以為葵丘之會，桓公震而矜之，叛者九國。此厲亦是叛者，故伐之。《左氏》以為厲是楚屬國，故伐厲以救徐。今范載徐言云震矜之容見於外，則與何休同也。錄所善，九年，盟于葵丘，著日以極美是也。著所危者，此年書月以見衰，是著所危。

八月，螽。○螽音終。螽，蟲災也。甚則月，不甚則時。

九月，公至自會。莊二十七年傳曰：「桓會不致，②安之也。」而此致者，齊桓德衰，故危而致之。

【疏】「甚則月」。③○釋曰：重發傳者，嫌僖公憂民之重，災不至於甚，故明之也。

季姬歸于緡。

①「本或」，原作「木」，據《釋文》改。

②「桓」，原作「相」，夏校據《穀梁傳》莊公二十七年改，今從之。

③「甚則月」，此疏當在上傳文「甚則月不甚則時」下。

己卯，晦，震夷伯之廟。夷，謚。伯，字。晦，冥也。震，雷也。夷伯，魯大夫也。因此以見天子至于士皆有廟。明夷伯之廟過制，故因此以言禮。○冥，亡定反。見，賢偏反。

【疏】「晦冥」至「有廟」。○釋曰：《公羊》以為晦者為晝日而晦冥，震者雷也，謂有雷擊夷伯之廟。此傳亦云晦，冥也，震，雷也，則不得從《左氏》為月晦，與《公羊》同矣。《公羊》又以為夷伯者，季氏之信臣，故震其廟以戒之。今此傳歷言天子以下廟數，以為過制，故震之，與《公羊》異。《左氏》以為夷伯有隱慝，故天命霹靂之，亦與《穀梁》不同也。

天子七廟，《祭法》曰：王立七廟，曰考廟、王考廟、皇考廟、顯考廟、祖考廟，有二祧。遠廟稱祧。○祧，它堯反。諸侯五，曰考廟、王考廟、皇考廟、顯考廟、祖考廟。大夫三，曰考廟、王考廟、皇考廟。士二。曰考廟、王考廟。故德厚者流光，德薄者流卑。雍曰：「德厚者位尊，道隆者爵重，故天子遠及七世，士祭祖而已。」是以貴始，德之本也。始封必為祖。若契為殷祖，棄為周祖。○契，息列反。

【疏】「天子」至「為祖」。○釋曰：鄭據《禮記》說

云：「夏五廟，則殷六廟，周七廟。」故《王制》云：「天子七廟，三昭三穆，與大祖之廟而七。」鄭注云：「此周制。七者，大祖廟，及文武二祧，與親廟四。大祖，謂后稷也。殷則六廟，契及湯，與二昭二穆也。夏則五廟，無大祖，禹與二昭二穆而已。」是其說也。《王制》又云：「諸侯五廟，二昭二穆與大祖而五。」鄭云：「大祖，始封之君。王者之後，則不為始封之君廟也。」又云：「大夫三廟，一昭一穆與大祖之廟而三。」鄭云：「大祖，別子始爵封者，①雖非別子，始爵者亦然。」又云：「士一廟，庶人祭于寢。」鄭云：「謂諸侯中士下士名曰官師者，上士則二廟。寢，適寢也。」是禮與傳文合也。唯《祭法》云「大夫三廟，曰考廟，曰王考廟，曰皇考廟」，與《王制》「一昭一穆與大祖，其意少異者。鄭答趙商：『《祭法》大夫三廟，是周之制；而《王制》大夫三廟，言與大祖而三，或當夏、殷法，不合於周禮也。』是解二者不同之意。《祭法》又云「適士二廟，官師一廟」，而《王制》云「士一廟」者，亦謂是中士下士者也；若是上士，亦當二廟。故鄭注《王制》云「士一廟者，諸侯之中士下士名曰官師者也，上士則二廟」是也。中士下士，所以名為官師者，師，長也，言為一官之長也。《祭法》又云：「庶人無廟。」故《王制》亦云：「庶人祭寢。」是無廟也。庶士者，謂府史之屬

①「封」，阮校：「案：鄭氏注原文無「封」字。」

也。庶人者，謂平民也。以其賤，故無廟也。○「德厚」至「流卑」。○釋曰：光猶遠也，卑猶近也。天子德厚，故遠及七廟，士之德薄，故近及二廟，因其貴賤有倫，故制爲等級也。○「是以」至「本也」。○釋曰：始，謂受封之君，所以貴之者由是。「德之本也」，言有大德，故受高位。高位由之而來，故始封之君，必爲祖矣。祖，謂廟不毀也。

### 冬，宋人伐曹。

楚人敗徐于婁林。婁林，徐地。○敗，必邁反。下「相敗」同。夷狄相敗，志也。

【疏】「夷狄相敗志也」。○釋曰：夷狄相敗，書文不具。今起禍亂之原，謹兵車之始，故傳言此以明之。

### 十有一月，壬戌，晉侯及秦伯戰于韓。

韓，晉地。獲晉侯。獲者，不與之辭，諸侯非可相獲。

【疏】注「獲者不與之辭」。○釋曰：傳有明例，

注言之者，嫌晉侯失衆，與秦得獲，故注顯之，欲明亦不與秦獲也。范《別例》云：「凡書獲有七：謂莒挐一也，晉侯二也，華元三也，蔡公子濕四也，陳夏齧五也，齊國書六也，麟七也。」於晉侯著失民之咎，於蔡公子濕彰公子之病，華元表得衆之辭，莒挐顯公子之給，①自餘雖不發，從省文可知也。

### 韓之戰，晉侯失民矣，以其民未敗，而

君獲也。

十有六年，春，王正月，戊申，朔，隕石于宋五。劉向曰：「石，陰類也。五，陽數也。象陰而陽行，將致隊落。」○隕，云敏反。行，下孟反。下「陰行」同。隊，直類反。

【疏】注「劉向」至「隊落」。○釋曰：何休云：

「石者，陰德之專者也；鷦者，鳥中之耿介者；皆有似宋襄公之行。宋襄欲行霸事，不納公子目夷之謀，事事耿介自用，卒以五年見執，六年終敗，如五石六鷦之數。天之與人，昭昭著明，甚可畏也。」賈逵云：「石，山岳之物。齊，大岳之胤。而五石隕宋，象齊桓卒而五公子作亂。宋將得諸侯而治五公子之亂，鷽退，不成之象，後六年霸業退也。鷽，水鳥，陽中之陰，象君臣之訟鬩也。」許慎《異義》載《穀梁》說云：「隕石於宋五，象宋公德劣國小，陰類也。而欲行霸道，是陰而欲陽行也。其隕，將拘執之象也，是宋公欲以諸侯行天子道也。」六鷽退者，鄭玄云：「六鷽俱飛，得諸侯之象也。其退，示其德行不進，以致敗也。得諸侯，是陽行也。被執敗，是陰行也。」是二說與劉向合耳。其何休、賈逵之言，並是《公羊》、《左氏》舊說，非《穀梁》意也。

①「給」，原作「給」，夏校據僖公元年傳改，今從之。

先隕而後石，何也？據莊七年「星隕如雨」，先言星，後言隕。隕而後石也。既隕後，乃知是石。于宋四竟之內曰宋。後數，散辭也。耳治也。隕石，記聞也。聞其碩然，視之則石，察之則五。○竟音境。治，直吏反。下「目治」同。碩，之人反，又大年反，聲響也。

【疏】「于宋」至「治也」。○釋曰：散辭也者，對下聚辭也。爲言此石散在宋四竟之內，故後言其數，以散辭言之。鵠則聚在宋都之上，故先言其數，以聚辭言之。又云耳治也者，謂隕石先以耳聞，故言先言隕。鵠退先以目見，故先言數。是各以聞見先後爲次。○注「聞其碩然」。○釋曰：范取《公羊》爲說，彼傳云「隕石記聞，聞其碩然，視之則石，察之則五」是也。碩字，《說文》、《玉篇》、《字林》等無其字，學士多讀爲辟。據《公羊》古本並爲碩字，張揖讀爲碩，是石聲之類，不知出何書也。

是月，六鵠退飛，<sup>①</sup>過宋都。是月，隕石之月。劉向曰：「鵠，陽也。六，陰數也。象陽而陰行，必衰退。」○鵠，五歷反。是月也，決不日而月也。欲著石日鵠月，故言是月。若不言是月，則嫌與戊申同。

【疏】「決不日而月也」。○釋曰：傳言此者，解經書「是月」之意，言鵠退不日而月，故云是月，明與石隕異日也。若然，案桓十二年「丙戌，公會鄭伯盟于武父」。

丙戌，衛侯晉卒，若下事得蒙上日，何爲彼經重舉丙戌者？彼公盟必須書日，衛侯不正前見，亦當書日，經以衛侯不正，而恐不得蒙上日，故書二日以明之。此石隕鵠退，是記異之事，恐蒙上日，故言是月以別之。知下事得蒙上日者，覆且之卒，得連日食之下，叔弓之卒，得與祭同日，是經舉一日得包兩日之驗也。

六鵠退飛，過宋都，先數，聚辭也。目治也。六鵠退飛，記見也。視之則六，察之則鵠，徐而察之則退飛。子曰：「石，無知之物，鵠，微有知之物。」石無知，故日之；石無知而隕，必天使之然，故詳而日之。鵠微有知之物，故月之。鵠或時自欲退飛耳，是以畧而月之。君子之於物，無所苟而已。石、鵠且猶盡其辭，而況於人乎？故五石六鵠之辭不設，則王道不亢矣。不遺微細，故王道可舉。○亢，苦浪反。民所聚

①「鵠」，阮校：「石經『鵠』作『鵠』，下『五石六鵠』同。《釋文》出『六鵠』。案：十行本『鵠』字繫刺補，乃淺人妄改，而仍有改之未盡者。案：《說文》作『鵠』，無『鵠』字。」

曰都。

三月，壬申，公子季友卒。大夫日卒，

正也。季友，桓公之子。

【疏】「大夫日卒正也」。○釋曰：傳發之者，益師明其有罪，此則顯其得正，故兩明之也。

稱公弟叔仲，賢也。大夫不言公子、公孫，疏之也。

【疏】「稱公弟叔仲賢也」。○釋曰：傳因季友之賢，<sup>①</sup>發起其例也。叔肸賢而稱弟，季友不稱弟稱字，賢可知也。以兄先死，故不得稱弟耳。「不言公子、公孫，疏之」者，謂仲遂、嬰齊之等是也。又公孫茲發日卒之傳者，以其名而不字，又非罪非賢，故重發之。仲遂非賢而稱字者，彼既不言公子以疏之，唯宣公嘉之而稱字，無嫌是賢故也。

夏，四月，丙申，繒季姬卒。

秋，七月，甲子，公孫茲卒。大夫日卒，

正也。

冬，十有二月，公會齊侯、宋公、陳侯、衛侯、鄭伯、許男、邢侯、曹伯于淮。兵車之

會也。○淮音懷。

十有七年，春，齊人、徐人伐英氏。  
○英，於京反。

夏，滅項。孰滅之？桓公也。何以不

言桓公也？據莊十年「齊師滅譚」稱齊師。○項，戶

講反，國名也，齊滅之，《左氏》以為魯滅。為賢者諱

也。項，國也，不可滅而滅之乎？桓公知

項之可滅也，知政昏亂，易可滅。○為，于偽反。下

「為之諱」同。而不知己之不可以滅也。霸者，存

恤鄰國，抑彊輔弱，義不可滅人之國。既滅人之國

矣，何賢乎？君子惡惡疾其始，絕其始，則得

不終於惡。邵曰：「謂疾其初為惡之事，不終身疾之。」

○惡惡，並如字，又烏路反。善善樂其終。樂賢者終

其行也。邵曰：「謂始有善事，則終身善之。」○行，下孟

反。

【疏】「君子」至「其終」。○釋曰：言此者，解為

齊桓諱滅項之意。惡惡疾其始，謂君子憎惡惡人，則疾其

①「因」，原作「國」，據宋刻元修本改。

初始，何者？欲使惡人不得終於惡，故就其初始即貶疾之也。善善樂其終，謂君子善其善人，樂使終其行也。以樂終其行，故雖有惡，亦為諱之。或齊雖滅項，亦不言齊滅也。邵解二事，並與范異。君子惡惡疾其始者，君子憎惡人有惡事，唯疾其初始為惡，不終身疾也，言有惡則疾之，無惡則止也。善善樂其終者，君子嘉善人，則欲終身善之，見人一度有善，則終身不忘，故為齊桓諱滅項也。

桓公嘗有存亡繼絕之功，故君子為之諱也。邵曰：「存亡謂存邢衛，繼絕謂立僖公，所以終其善。」

秋，夫人姜氏會齊侯于卞。卞，魯地。

○卞，皮彥反。

九月，公至自會。桓會不致，而今致會，桓公德衰，威信不著，陳列兵車，又以滅項。往會既非，踰年乃反，故往還皆月以危之。

冬，十有二月，乙亥，齊侯小白卒。此不正，其日之，何也？據二十四年「晉侯夷吾卒」不書日。其不正前見矣。其不正之前見何也？以不正入虛國，故稱嫌焉爾。莊九年「齊小白入于齊」，貶不稱公子。虛國，謂齊無君。傳例曰：「以國氏者，嫌也。」○見，賢徧反。下同。

十有八年，春，王正月，宋公、曹伯、衛人、邾人伐齊。非伐喪也。伐喪無道，故謹而月之。

【疏】注「故謹而月之」。○釋曰：侵伐書月唯施於內，今亦施之於外者，齊桓以安危所繫，故書月以表之，宋襄欲繼齊桓之業，故亦謹而月之。

夏，師救齊。魯師。善救齊也。

五月，戊寅，宋師及齊師戰于甌。甌，齊地。○甌，魚輦反。又音言。齊師敗績。戰不言

伐，客不言及。言及，惡宋也。何休曰：「戰言及者，所以別客主直不直也。故文十二年「晉人、秦人戰于河曲」，兩不直，故不云及。」○今宋言及，明直在宋，非所以惡宋也。即言及為惡，是河曲之戰為兩善乎？又《穀梁》以河曲不言及，畧之也，則自相反矣。鄭君釋之曰：「及者，別異客主耳，不施於直與不直也。直不直，自在事而已。義兵則客直，宣十二年夏，「晉荀林父帥師及楚子

○「故不云及」，阮校：「案《釋文》出「故去，起呂反」，在「以別」下，「于邲」上。今驗「以別」之下，「于邲」之上無「故去」之文，當是陸所據本此「故不云及」四字作「故去反」三字。」

戰於郟，晉師敗績」是也。兵不義則主人直，莊二十八年春，「衛人及齊人戰，衛人敗績」是也。今齊桓卒未葬，宋襄欲興霸事而伐喪，於禮尤反，故反其文，以宋及齊。即實以宋及齊，明直在宋。郟之戰，直在楚，不以楚及晉何邪？秦晉戰於河曲，不言及，疾其亟戰爭舉兵，故畧其先後。」○惡，烏路反，下同。別，彼列反，下同。郟，蒲必反，一音弼。亟，欺異反。

【疏】「戰不」至「宋也」。○釋曰：《春秋》之例，戰伐不並舉，此上有伐文，今又言戰，是違常例也。又伐人者為客，受伐者為主，此言及齊師，是亦違常例也。故傳釋之以為惡宋也。○注「何休」至「先後」。○釋曰：何休《廢疾》云，此言「及」為惡宋，則文十二年河曲之戰不言及，為兩善也。故知言及者，分別客主直與不直也。鄭玄釋之曰：「言及者，別異客主耳，不施直與不直也。」故引宣十二年夏，莊二十八年春以明之，「宣十二年，郟之戰，楚直晉曲，經云『荀林父及楚子』」，莊二十八年，衛直齊曲，而云「衛人及齊」。明直者在事而已，不由稱及也。」《穀梁》郟戰竟不論楚直晉曲，而鄭云直在楚者，《公羊》意以為郟戰是楚直，故據之難何休。

### 狄救齊。善救齊也。

【疏】「善救齊也」。○釋曰：楚與上文魯師救齊並為善者，<sup>①</sup>此善狄能憂中國。上文與魯昔與齊仇讎，<sup>②</sup>恐救之非善，故並發善救之例也。

秋，八月，丁亥，葬齊桓公。豎刁、易牙爭權，五公子爭立，故危之。○刁音雕。

冬，邾人、狄人伐衛。狄其稱人何也？

善累而後進之。累，積。伐衛，所以救齊也。

何休曰：「即伐衛救齊當兩舉，如伐楚救江矣。又傳以為江遠楚近，故伐楚救江，今狄亦近衛而遠齊，其事一也，義異何也？」鄭君釋之曰：「文三年冬，晉陽處父帥師伐楚救江，兩舉之者，以晉未有救江文，故明言之。今此春宋公、曹伯、衛人、邾人伐齊，夏狄救齊，冬，邾人、狄人伐衛，為其救齊可知，故省文耳。事同義又何異？」○近衛，如字，又附近之近。遠齊，如字，又于萬反。<sup>③</sup>為其，于偽反。省，所景反。功近而德遠矣。伐衛，功近耳。夷狄而憂中國，其德遠也。

①「楚」，宋刻元修本作「此」。

②上「與」字，宋刻元修本作「以」。

③「萬」，原作「邁」，據宋刻元修本改。

# 監本春秋穀梁注疏僖公卷第九

起十九年，盡三十三年

范甯集解 楊士勛疏

十有九年，春，王三月，宋人執滕子嬰齊。

【疏】「滕子嬰齊」。○釋曰：傳法並不解稱名之意，<sup>①</sup>蓋罪賤之也。

夏，六月，宋公、曹人、邾人盟于曹南。曹南，曹之南鄙。繒子會盟于邾。己酉，邾人執繒子，用之。微國之君，因邾以求與之盟。與，廟豫也。○與音豫，注及下文同。

【疏】「會盟于邾」。○釋曰：言會盟于邾者，繒是微國，欲因邾以求盟，故云會盟也。

人因己以求與之盟，己迎而執之。惡之，故謹而日之也。用之者，叩其鼻以衄社也。衄者，斃也，取鼻血以釁祭社器。○惡，烏路反。下

「惡其長」同。叩音口。衄音二。

【疏】「故謹」至「社也」。○釋曰：此與昭公十一年「冬，十有一月，丁酉，楚師滅蔡，執蔡世子友以歸，用之」，皆惡其用人，故不據國之大小，同書日以見惡也。叩其鼻者，《論語》云「以杖叩其脛」，則叩謂擊也。

秋，宋人圍曹。

衛人伐邢。

冬，會陳人、蔡人、楚人、鄭人盟于齊。會無主名，內卑者也。四國稱人，外卑者也。杜預曰：「地於齊，齊亦與盟。」

梁亡。自亡也。湏於酒，淫於色，心昏，耳目塞。上無正長之治，大臣背叛，民爲寇盜。梁亡，自亡也。如加力役焉，湏不足道也。如使伐之而滅亡，則湏湏不足記也。使其自亡，然後其惡明。○湏，面善反。長，丁丈反，下及注同。背音佩。

【疏】「梁亡」。○釋曰：《左氏》以爲秦滅梁，惡其自取滅亡之故，不以秦滅爲文。《公羊》以爲魚爛而亡，謂梁君隆刑峻法，百姓逃叛，而事等魚爛，從中而去也。此傳亦云大臣背叛，民爲寇盜，則同《公羊》。梁國亦自亡也，又

①「法」，疑當作「例」。



如加力役焉，湫不足道也，則梁之土地，必爲人所取，蓋同《左氏》「秦得之」，但據自滅爲文少異耳。

梁亡，鄭棄其師，我無加損焉，正名而已矣。梁亡，出惡正也。正謂政教。

【疏】「正名而已矣」。○釋曰：仲尼脩《春秋》，亦有改舊義以見褒貶者，亦有因史成文以示善惡者。其變之

也，不葬有三，爲齊桓諱滅項之類，是改舊也；其梁以自滅爲文，鄭棄其師之徒，<sup>①</sup>是因史之文也。故傳云我無加損焉，正名而已矣。

鄭棄其師，惡其長也。長謂高克。

二十年，春，新作南門。作，爲也，有加

其度也。更加使大。言新，有故也，非作也。責

其改舊制。南門者，法門也。法門，謂天子諸侯皆南面而治，法令之所出入，故謂之法門。

夏，郕子來朝。○郕，古報反。

五月，己巳，<sup>②</sup>西宮災。謂之新宮，則

近爲禰宮。言閔公非僖公之父，故不言新宮也。

○近，附近之近。禰，乃禮反，父廟也。以謚言之，則如疏之然，故不言閔宮，而云西宮。以是爲閔宮也。

【疏】「以是爲閔宮也」。○釋曰：傳知之者，以若是禰宮，當言新宮；若是疏祖之宮，又須言謚，此在親疏之間，故知是閔宮也。

鄭人人滑。

秋，齊人、狄人盟于邢。邢爲主焉爾。

邢小，其爲主何也？其爲主乎救齊。<sup>③</sup>十八年「邢人、狄人伐衛」以救齊是也。

【疏】「邢爲」至「救齊」。○釋曰：盟會地于國都者，國主雖與盟會，未知即能爲主，桓十四年「公會鄭伯于曹」，曹不爲主是也。而傳云邢爲主焉爾，又辨其大小者，傳以十八年「邢人、狄人伐衛」以救齊，今又盟于邢，故知爲主也。又云邢小者，以邢雖是小國，爲主能救齊，故歸功于邢。不謂盟國都者，例能爲主耳。

冬，楚人伐隨。隨，國也。

【疏】「隨國也」。○釋曰：案《世本》隨是國名，經又言伐，知非邑也。

①「徒」，《穀梁補注》作「屬」。

②「己巳」，《穀梁補注》、《左傳》、《公羊傳》並作「乙巳」。

③「其」，王引之《經義述聞》：「『爲主乎救齊』上不當有

「其」字，蓋涉上句而衍。」

二十有一年，春，狄侵衛。

宋人、齊人、楚人盟于鹿上。宋爲盟主，故序齊上。鹿上，宋地。

夏，大旱。傳例曰：「得雨曰雩，不得雨曰旱。」

旱時，正也。

【疏】「旱時正也」。○釋曰：旱必歷時，非一月之事，故書時爲正也。

秋，宋公、楚子、陳侯、蔡侯、鄭伯、許男、

曹伯會于雩。雩，宋地。雩或爲宇。執宋公以伐

宋。以，重辭也。傳例曰：「以者，不以者也。」此傳及定七年「齊人執衛行人北宮結以侵衛」，傳皆曰「以，重辭也」，然則以有二義矣。國之所重，故曰重辭。

【疏】「以重辭也」。○釋曰：桓十四年「宋人以齊

人、蔡人」云云「伐鄭」，傳曰：「以者，不以者也。」今傳云「以，重辭也」，何知非是一事而重不可以？范注云以有二義者，范以執宋公及執衛結，皆是國之所重，而傳云「以，重辭也」，其微人從伐者，即云以者，不以者也。明二者意異，故云以有二義。

冬，公伐邾。

楚人使宜申來獻捷。楚稱人者，爲執宋公貶。

○捷，在接反。爲，于僞反。

【疏】注「楚稱」至「公貶」。○釋曰：知爲執宋公貶者，以稱使知是楚子使之，國君而稱人，明爲執宋公貶也。

捷，軍得也。其不曰宋捷，何也？據莊三十一年「齊侯來獻戎捷」。<sup>①</sup>

【疏】注「據莊」至「戎捷」。<sup>②</sup>○釋曰：彼傳云「戎菽也」，<sup>③</sup>則與此宋捷絕不相當。而范引之者，彼雖以戎爲菽，終是伐得之，故范引爲證也。

不與楚捷於宋也。不以夷狄捷中國。<sup>④</sup>

十有二月，癸丑，公會諸侯盟于薄。會雩之諸侯。會者，外爲主焉爾。

釋宋公。外釋不志，此其志何也？以公之與之盟目之也。不言楚，不與楚專釋也。何休曰：《春秋》以執之爲罪，不以釋之爲罪，責楚

①「據」，原作「捷」，今據疏標起訖及《穀梁補注》改。

②「莊」，原無，夏校據上注及疏標起訖例補，今從之。

③「彼」，原作「役」，阮校：「閩、監、毛本『役』作『彼』，是也。」今據改。

④「以」，《穀梁補注》作「與」。

子專釋，非其理也。《公羊》以為公會諸侯釋之，故不復出楚耳。」鄭君釋之曰：「不與楚專釋者，非以責之也。傳云『外釋不志，此其志何也？』以公之與之盟目之也。」言公與諸侯盟而釋宋公，公有功焉，與《公羊》義無違錯。」○復，扶又反。

【疏】「會者外為主焉爾」。○釋曰：重發之者，以釋者是公，嫌會非是外為主，故發例以明之。

二十有二年，<sup>①</sup>春，公伐邾，取須句。○句，其俱反。

夏，宋公、衛侯、許男、滕子伐鄭。

秋，八月，丁未，及邾人戰于升陘。<sup>②</sup>升陘，魯地。內諱敗，舉其可道者也。不言其人，以

吾敗也。不言及之者，為內諱也。○為，于僞反。

【疏】「不言」至「諱也」。○釋曰：不言其人，以吾敗也，謂不言邾之主名也。不言及者，為內諱也，謂不言魯之主名也。與桓十七年解異者，觀經為說，不可執文也。

冬，十有一月，己巳，朔，宋公及楚人戰于泓。○泓，烏宏反。宋師敗績。日事遇朔曰朔。《春秋》三十有四戰，未有以尊敗乎卑，

以師敗乎人者也。以尊敗乎卑，以師敗乎人，則驕其敵。襄公以師敗乎人，而不驕其敵，何也？責之也。泓之戰，以為復雩之恥也。前年，宋公為楚所執。雩之恥，宋襄公有以自取之。伐齊之喪，執滕子，圍曹，為雩之會，不顧其力之不足，而致楚成王，成王怒而執之，故曰：禮人而不答，則反其敬；愛人而不親，則反其仁；治人而不治，則反其知。過而不改，又之，又，復。○知音智，又如字。復，扶又反。是謂之過。襄公之謂也。古者被甲嬰冑，非以興國也，則以征無道也，豈曰以報其恥哉！宋公與楚人戰于泓水之上，司馬子反曰：「楚衆我少，鼓險而擊之，勝無幸焉。」若要而擊之，必可破，非僥倖也。○被，皮既反。

①「有」，原無，阮校：「此本、閩、監、毛本脫『有』字，石經作『廿有二年』。」今據補。

胃，直救反。①司馬子反，《左傳》作子魚。要，於遙反。饒，古堯反。倖音幸。

【疏】「司馬子反」。○釋曰：麋信云：「子反當爲子夷，未審范意然不？」○「勝無幸」。○釋曰：以小敵大，恐其不若，克之不名微幸也。

襄公曰：「君子不推人危，不攻人厄，須其出。」須其出險。○推，如字，又它回反。既出，旌亂於上，陳亂於下。子反曰：「楚衆我少，擊之，勝無幸焉。」襄公曰：「不鼓不成列。」列，陳。○陳，直覲反。須其成列而後擊之，則衆敗而身傷焉；七月而死。何休曰：「即宋公身傷，當言公，不當言師，成十六年『楚子敗績』是也。又成十六年傳曰：『不言師，君重于師也。』即成十六年是，二十二年虛言也。即二十二年是，十六年非也。」鄭君釋之曰：「傳說楚子敗績，曰四體偏斷，此則目也。此言君之目與手足有破斷者，乃爲敗矣。今宋襄公身傷耳，當持鼓，軍事無所害，而師猶敗，故不言宋公敗績也。傳所以言『則衆敗身傷焉』者，②疾其信而不道，以取大辱。」

【疏】「七月而死」。○釋曰：此云七月而死，則是身傷。不云宋公敗績者，鄭玄云非四體偏斷，又非傷目，故

依常例稱師也。

倍則攻，敵則戰，少則守。人之所以爲人者，言也。人而不能言，何以爲人？言之所以爲言者，信也。言而不信，何以爲言？信之所以爲信者，道也。信而不道，何以爲道？③道之貴者時，其行勢也。凱曰：「道有時，事有勢，何貴於道？貴合於時。何貴於時？貴順於勢。宋公守匹夫之狷介，徒蒙恥於夷狄，焉識大通之方，至道之術哉！」○攻如字，又音貢。守如字，又手又反。狷音絹。介音界。焉，於虔反。

【疏】「焉識」至「術哉」。○釋曰：老子至道之人，猶曰「以政治國，以奇用兵」，今宋襄國弱於楚，而行敵戰之禮，故傳譏其師敗身傷，注謂之不識至道之術也。

二十有三年，春，齊侯伐宋，圍閔。伐國不言圍邑，此其言圍，何也？不正其以惡報

①「直」，原作「而」，據《釋文》改。

②「則」，原作「敗」，夏校據傳文及《穀梁補注》改，今從之。

③「道」，《穀梁補注》作「信」。

惡也。前十八年宋伐齊之喪，是惡也。今齊乘勝而報，是以惡報惡也。○閔，《左氏》作緡，二十五年楚圍亦同。

夏，五月，庚寅，宋公茲父卒。桓公之子襄公。茲父之不葬，何也？失民也。其失民

何也？以其不教民戰，則是棄其師也。爲

人君而棄其師，其民孰以爲君哉！何休曰：

「所謂教民戰者，習之也。《春秋》貴偏戰而惡詐戰，宋襄公所以敗于泓者，守禮偏戰也，非不教其民也。孔子曰：

『君子去仁，惡乎成名？』造次必於是，顛沛必於是。」未有

守正以敗而惡之也。《公羊》以爲不書葬爲襄公諱，背殯出會，所以美其有承齊桓尊周室之美志。鄭君釋之曰：「教

民習戰而不用，是亦不教也。詐戰謂不期也。既期矣，當觀敵爲策，倍則攻，敵則戰，少則守。今宋襄公于泓之戰違

之，又不用其臣之謀而敗，故徒善，不用賢良，不足以興霸主之功，徒言，<sup>①</sup>不知權譎之謀，不足以交鄰國、會遠疆，

故《易》譏鼎折足，《詩》刺不用良。」此說善也。○而惡，烏路反，下「而惡」同。惡乎音烏。造，七報反。沛音貝。爲

襄，于僞反。背音佩，譎音決。折，之設反。刺，七賜反。

【疏】「何休」至「善也」。○釋曰：何休曰《春秋》

貴偏戰者，謂各守一偏而戰也。鄭玄云《易》譏鼎折足，

《詩》刺不用良者，鼎折足，是鼎卦九四爻辭，彼云：「鼎

折足，覆公餗，其形渥，凶。」王弼云：「處上體之下，而又

應初。既承且施，非己所堪。」若鼎足小細而任重，故折足也。鼎足既折，則覆餗矣。餗謂鼎之實，實覆則沾渥其形，以喻不勝其任，身被戮辱，故凶也。此襄公是其事也，故曰「鼎折足」也。「初己出否，至四所盛，則己潔矣。故曰覆公餗也。渥，沾濡之貌也。既覆公餗，體爲渥沾，智小謀大，不堪其任，受其至辱，災及其身，故曰其形渥，凶也。」鼎卦巽下離上。馬融云：「餗謂糜也。」《詩》刺不用良者，謂鄭忽不能與賢人圖事，以至死亡，故《詩》作《狡童》、《揚之水》二篇刺之，故《詩序》云云，《狡童》刺忽也，不能與賢人圖事，權臣擅命也。《揚之水》，閔無臣也，君子閔忽之無忠臣良士，終以死亡，而作是詩也。

### 秋，楚人伐陳。

冬，十有一月，杞子卒。莊二十七年稱伯，今稱子，蓋爲時王所黜。

### 二十有四年，春，王正月。

### 夏，狄伐鄭。

### 秋，七月。

冬，天王出居于鄭。襄王也。天子以天下爲家，故所在稱居。天子無出，出，失天下也。王者

①「言」，《穀梁補注》作「信」。

無外，言出則有外之辭。江熙曰：「天子必巡守然後行，故河陽之守，全天王之行也。平王東遷，其詩不能復《雅》，而列爲《國風》。襄王奔鄭，不得全天王之行，則與諸侯不異，故書出也。夫子祖述堯舜，憲章文武，斯文是作，不以道假人。傳言失天下，闕然如有未備。」○巡守，手又反，下同之。行如字，或下孟反，下同。復雅，扶又反。

【疏】注「夫子」至「未備」。○釋曰：舊解江熙此言，明夫子之脩《春秋》，雖憲章前代，亦不可全與前代齊錄，故云「夫子祖述堯舜，憲章文武」，言堯舜有巡守之禮，文武有省方之制，故仲尼因襄王之守全天子之行，是亦祖述憲章也。「斯文是作，不以道假人」者，謂若全天子之行，憲章前代，是不以道假借人也。但襄王與諸侯不異，不可復全天子之行，故書出以表之也。明夫子雖欲尊王者同之先代，以周德闕然未備，不可同之，故遂以此道借人也。或以爲夫子所以書王出者，「祖述堯舜，憲章文武，斯文是作，不以道借人」。王德既闕，不可復全其行，故書出以表其失天下也。

居者，居其所也。雖失天下，莫敢有也。邵曰：「雖實出奔，而王者無外，王之所居，則成王畿，鄭不敢有之以爲國。」

晉侯夷吾卒。傳曰：「諸侯時卒，惡之。」出不葬，<sup>①</sup>篡文公而立，失德。○惡，烏路反。篡，初患反。

二十有五年，<sup>②</sup>春，王正月，丙午，衛侯

燬滅邢。燬之名，何也？據宣十二年「楚子滅蕭」不名。○燬，況委反。不正其伐本而滅同姓也。絕先祖支體尤重，故名以甚之。

【疏】「不正」至「姓也」。○釋曰：衛與邢同姬姓，今衛滅邢，則是絕先祖支體，故謂之伐本也。

夏，四月，癸酉，衛侯燬卒。

宋蕩伯姬來逆婦。伯姬，魯女，爲宋大夫蕩氏妻也。自爲其子來迎婦。○自爲其，于爲反，下「爲祖」同。<sup>③</sup>

婦人既嫁不踰竟，宋蕩伯姬來逆婦，非正也。其曰婦，何也？緣姑言之之辭也。

【疏】「不踰竟」。○釋曰：復發傳者，嫌爲求婦爲禮，故發之。

宋殺其大夫。其不稱名姓，以其在祖之位，尊之也。何休曰：「曹殺其大夫，亦不稱名姓，豈

①「出」，《穀梁補注》無。

②「有」，原無，阮校：「此本、閩、監、毛本脫『有』字，石經作『廿有五年』。」今據補。

③「自爲其于爲反下爲祖同」，原作「自爲○爲人下爲且同」，據《釋文》改。

可復以爲祖乎？」鄭君釋之曰：「宋之大夫盡名姓。禮：公族有罪，<sup>①</sup>刑于甸師氏，不與國人慮兄弟也，所以尊異之。孔子之祖孔父，累於宋殤公而死，今骨肉在其位而見殺，故尊之，隱而不忍稱名氏。若罪大者，名之而已，使若異姓然，此乃祖之疏也。曹殺其大夫，自以無大夫，不稱名氏耳。《春秋》辭同事異者甚多，隱去即位以見讓，莊去即位爲繼弑，是復可以比例非之乎？」○復以，扶又反，下「是復」同。甸，徒徧反。累，劣僞反。<sup>②</sup>去，起吕反，下同。以見，賢徧反。爲繼，于僞反，又如字。

【疏】注「祖之疏」。○釋曰：異姓稱名，疏而詳已，同姓不名，親而畧之；若名氏具備，而見其疏，則見異姓同，非尊祖之事，故曰疏之也。古本或作「禮之疏」者，言同姓與異姓不別，則於禮法爲疏也。理亦通耳。以本不定，故兩解之。

秋，楚人圍陳，納頓子于頓。納者，內弗受也。圍，一事也。納，一事也。而遂言之，怪其異事而辭相連，有似遂事之辭。蓋納頓子者陳也。圍陳，使納頓子。

【疏】「蓋納頓子者陳也」。○釋曰：案《癰疾》云：「休以爲即陳納之當舉陳，何以不言陳？」鄭君釋之曰：「納頓子固宜爲楚也。穀梁子見經云「楚人圍陳，納頓子于頓」，有似「晉陽處父伐楚救江」之文，故云蓋陳也。」

是鄭意亦同范說，圍陳使納頓子也。  
葬衛文公。

冬，十有二月，癸亥，公會衛子、莒慶盟于洮。衛稱子，在喪。洮，魯地。莒無大夫，其曰莒慶，何也？以公之會目之也。小國無大夫，以公與會，故進之。時有衛子，則無敵公之嫌。○與會如字，一音預。

二十有六年，春，王正月，己未，公會莒子、衛甯速盟于向。向，莒地。○向，舒亮反。公不會大夫，其曰甯速何也？以其隨莒子，可以言會也。

齊人侵我西鄙。公追齊師至嵩，弗及。人，微者也。侵，淺事也。公之追之，非正也。至嵩，急辭也。以急辭言之，明不至嵩。○嵩音攜，又似衮反。

【疏】「人微」至「辭也」。○釋曰：文承追齊師

① 「族」，原作「旌」，據宋刻元修本改。  
② 「劣」，原作「方」，據《釋文》改。

之下，即云至嚮，是急辭也。據文與「公追戎于濟西」異也。案莊十八年「公追戎于濟西」，傳稱「不使戎邇於我也」，今舉齊侵，是以難近國，而亦云大之也者，彼以戎有徒衆，故大公所追，此以公之不及，故亦言大之也。然彼不言戎之伐我，此云齊人侵我者，彼是戎狄，不使之近我，似若望風退走然，此齊是中國，侵又淺事，故舉之以見公追非正也。

弗及者，弗與也，弗與戰也。可以及而不敢及也。畏齊師。其侵也曰人，其追也曰師，以公之弗及，大之也。大之，謂變人言師。弗及，內辭也。弗及者，若曰我自不及耳，非齊不可及。

夏，齊人伐我北鄙。

衛人伐齊。

公子遂如楚乞師。乞，重辭也。雍曰：

「人道施而不有，讓而不取，故以乞爲重。」○施，舒豉反。

【疏】「乞重辭也」。○釋曰：此是乞師之始，故發傳以明之。

何重焉？重人之死也，非所乞也。師出不必反，戰不必勝，故重之也。

秋，楚人滅夔，以夔子歸。夔，國也。不

日，微國也。以歸，猶愈乎執也。

【疏】「夔國」至「執也」。○釋曰：滅國有三術，中國日，卑國月，夷狄時。此是夷狄之微國，故從時例。而傳言微國也，以明之也。案戎伐凡伯以歸，不言執者，尊天子之使，不與夷狄之執。今夷狄自相執，經言以歸，傳云「猶愈乎執也」者，彼尊凡伯，使一人當一國，故變執言以歸。諸侯相執以歸者，例不得言執，故傳云以歸，猶愈乎執也，明經止得言以歸。

冬，楚人伐宋，圍閔。伐國不言圍邑，此其言圍，何也？以吾用其師目其事也，非道用師也。楚人出師，爲魯伐齊，而中道以伐宋，故伐圍兼書，所以責楚。○爲，于僞反。中如字，又丁仲反。

【疏】「目其」至「師也」。○釋曰：傳解經，並言圍伐之意也。言楚人爲我伐齊，而中道更伐宋，故兼圍伐目其事，所以責楚中道用師，①非訓爲責也。

公以楚師伐齊，取穀。以者，不以者也。民者，君之本也。使民以其死，非其正也。雍曰：「兵，不祥之器，不得已而用之，安有驅民於死地，

①「師」，原作「帥」，夏校據上文作「用師」改，今從之。



以共假借之役乎？」○共音恭，本又作供。假借音嫁，又古雅反；下子夜反，又子亦反。

【疏】「以者不以者也」。○釋曰：重發傳者，彼據外，此據內，故重詳之。

公至自伐齊。惡事不致，此其致之何也？危之也。以蠻夷之師伐鄰近大國，招禍深怨，危亡之道。

【疏】「惡事」至「危之也」。○釋曰：莊六年秋，「公至自伐衛」，傳曰：「惡事不致，此其致何也？」不致，則無用見公惡事之成也。此文不同者，互文以起義，其實不異，彼明惡事之成，此亦明之，此云危之也，則彼亦危之可知也。

二十有七年，春，杞子來朝。○朝，直遙反。

夏，六月，庚寅，齊侯昭卒。○昭，或作照，非。

秋，八月，乙未，葬齊孝公。

乙巳，公子遂帥師入杞。

冬，楚人、陳侯、蔡侯、鄭伯、許男圍宋。楚人者，楚子也。其曰人，何也？人楚子，

所以人諸侯也。其人諸侯，何也？不正其信夷狄而伐中國也。何休曰：「哀元年「楚子、陳侯、隨侯、許男圍蔡」，不稱人，明不以此故也。」鄭君釋之曰：「時晉文為賢伯，故譏諸侯不從，而信夷狄也。哀元年時無賢伯，又何據而當貶之邪？」甯謂定哀之世楚彊盛，故諸侯不得不從耳。江熙曰：「夫屈信理對，言信必有屈也。宋楚戰于泓，宋以信義而敗，未有闕也，楚復圍之。我三人行必有我師，諸侯不能以義相師，①反信楚之曲，屈宋之直，是義所不取，信曲屈直猶不可，況乃華夷乎？楚以亡義見貶，則諸侯之不從，不待貶而見也。然則四國信楚而屈宋，春秋屈其信而信其屈，貶楚子于兵首，則彼碌碌者以類見矣，②故曰「人楚子，所以人諸侯」。○信音申。

【疏】注「甯謂」至「諸侯」。○釋曰：鄭云無賢伯，范言楚盛者，③二者相接也，為當時無賢伯，楚又彊盛，故諸侯不得不從也。案泓之戰，《穀梁》意譏宋公。④江熙云宋以信義而敗，未有闕者，據宋不能量敵彊弱，致師敗身

①「師」，原作「帥」，阮校：「案上文云「必有我師」，「帥」是「師」之誤字。」今據改。

②「類」，宋刻元修本作「期」。

③「盛」上，《穀梁補注》有「彊」字。

④「穀梁意」，《穀梁補注》作「穀梁傳」。

傷，故譏之。其於信義，實未有所闕，而楚復圍之，故貶楚子也。《公羊》以爲稱公者，爲執宋公貶，故終僖之篇貶之。杜預解云，楚以微者告。並與《穀梁》異也。

十有二月，甲戌，公會諸侯，盟于宋。地以宋者，則宋得與盟，宋圍解可知。○與音豫。

【疏】注「地以」至「可知」。○釋曰：《左氏》之意，公會諸侯盟于宋，宋不與盟。何休與范皆云「地以元缺宋，則宋得與盟」。二傳以無晉救宋之文，故與《左氏》異也。

二十有八年，春，晉侯侵曹。晉侯伐衛。

再稱晉侯，忌也。鄭嗣曰：「曹衛並有宿怨于晉，君子不念舊惡，故再稱晉侯以刺之。」○刺，七賜反。下文及注同。

公子買戍衛。不卒戍，刺之。刺，殺也。內諱殺大夫，故謂之刺。蓋取《周禮》三刺之法。先名後刺，殺有罪也。公子啓曰：「不卒戍者，可以卒也。可以卒而不卒，譏在公子也，刺之可也。」公子啓，魯大夫。

【疏】「公子啓曰」。○釋曰：舊解云，公子啓即公子偃，啓書日者，啓無罪，今買書時者，是買有罪也。今觀上下文勢，理恐不然，何者？此傳上云先名後刺，下文云不卒戍者，可卒也，本非釋時日之意，何爲公子啓一句獨

論日月之事？若以《穀梁》專釋經，不論人語之事，何爲襄二十三年傳云：「蘧伯玉曰：不以道事其君者，其出乎！」豈得謂蘧伯玉曰又不是人言也？故知舊說非耳。

楚人救衛。

三月，丙午，晉侯入曹，執曹伯，畀宋人。

人者，內弗受也。日人，惡人者也。以晉侯而斥執曹伯，惡晉侯也。惡其忌怨深。○畀，必利反，與也，下及注同。惡，烏路反，下文及注同。

【疏】「人者，內弗受也」。○釋曰：前已有傳，重發之者，以晉文初霸，嫌得人中國，故發傳以明之。

畀，與也。其曰人，何也？不以晉侯畀宋公也。畀，上與下之辭，故不以侯畀公。哀四年夏「晉人執戍蠻子赤歸于楚」，使楚子治其罪。今執曹伯，不言歸于宋，而言與宋人者，是使宋公拘執之。

夏，四月，己巳，晉侯、齊師、宋師、秦師

①「元缺」，《公羊解詁》僖公二十七年曰：「地以宋者，起公解宋圍爲此盟也。宋得與盟，則宋解可知也。」則無缺字。

②上「公」字，原無，夏校據《穀梁補注》補，今從之。

及楚人戰于城濮，楚師敗績。

楚殺其大夫得臣。

衛侯出奔楚。

五月，癸丑，公會晉侯、齊侯、宋公、蔡

侯、鄭伯、衛子、莒子，盟于踐土。衛稱子者，時

衛侯出奔，國更立君，非王命所加，未成君，故曰子。踐土，

鄭地。諱會天王也。實會天王，而文不言天王，若諸

侯自共盟然，是諱之也，所謂譎而不正。

陳侯如會。如會，外乎會也，於會受命

也。外乎會，不及序也。受命于會，故書如會。

公朝于王所。朝不言所，言所者，非其

所也。非京師朝。

【疏】「朝不言所」。○釋曰：公如京師，亦不言

朝，直決不言所者，「如」即是內朝之常文，故直解不言所而已。「如」既是常文，此言朝者，以其非京師，故以違例言之。

六月，衛侯鄭自楚復歸于衛。自楚，楚

有奉焉爾。復者，復中國也。中國，猶國中也。

【疏】「楚有奉焉爾」。○釋曰：發傳者，①自楚，

嫌與中國異也。

歸者，歸其所也。鄭之名，失國也。

【疏】「鄭之名失國也」。○釋曰：重起失國之例

者，以鄭非大罪，故出奔不名，惡其藉楚之力，故人名，以表失國，嫌出入異，②故傳發之。

衛元咺出奔晉。

陳侯款卒。

秋，杞伯姬來。莊公女，來歸寧。

公子遂如齊。聘也。

冬，公會晉侯、宋公、蔡侯、鄭伯、陳子、

莒子、邾子、秦人于溫。陳稱子，在喪也。諱會

天王也。復致天子。○復，扶又反。

天王守于河陽。河陽，晉地。○守音狩，下同。

全天王之行也，時實晉文公召王。以臣召君，不可以訓。因天子有巡守之禮，故以自行爲文。○行如字，或下孟反。爲若將守而遇諸侯之朝也。爲天王諱

①「發」上，《穀梁補注》有「重」字。

②「入」，原作「人」，據宋刻元修本改。

也。水北爲陽，山南爲陽。溫，河陽也。日之所昭曰陽。○爲天王，于僞反。

壬申，公朝於王所。朝於廟，禮也。於外，非禮也。諸侯朝王，王必於宗廟受之者，蓋欲尊祖禰，共其榮。獨公朝與？諸侯盡朝也。其日，以其再致天子，故謹而日之。主善以內，目惡以外。主善以內，謂公朝于王所。目惡以外，言再致天子。○朝與，音餘。言曰公朝，逆辭也，而尊天子。鄭嗣曰：「若公朝于廟，則當言公如京師，而今言公朝，是逆常之辭。雖逆常而曰公朝王所，是尊天子。」

【疏】「而尊天子」。○釋曰：公若朝於廟，當云如也。今逆常，故言朝也。朝雖逆常之辭，言公朝於王所，仍是敬王室之事，故云「而尊天子」。

會于溫，言小諸侯。溫，河北地，以河陽言之，大天子也。溫，河陽同耳。小諸侯，故以一邑言之。尊天子，故以廣大言之。日繫於月，月繫於時。壬申，公朝于王所，其不月，失其所繫也。以爲晉文公之行事爲已慎矣。以臣召君，慎倒上下，日不繫于月，猶諸侯不宗于天子。○慎，都田

反。倒，丁老反。

晉人執衛侯，歸之于京師。此人而執，其不言人，何也？不外王命於衛也。人者自外來，伯者以王命討衛。衛，王之土，<sup>①</sup>故曰不外王命。歸之于京師，緩辭也。斷在京師也。辭間容之，故言緩。○斷，丁亂反。

【疏】「緩辭也」。○釋曰：據成十五年「晉侯執曹伯歸于京師」，不言「之」。

衛元咺自晉復歸于衛。自晉，晉有奉焉爾。復者，復中國也。歸者，歸其所也。

【疏】「晉有奉焉爾」。○釋曰：又發傳者，嫌霸者與凡諸侯異。

諸侯遂圍許。會溫諸侯。許比再會不至，故共圍之。遂，繼事也。繼事，會于溫而圍許。

曹伯襄復歸于曹。三月爲晉侯所執，今方歸。復者，復中國也。天子免之，因與之會。其

①「土」，原作「士」，阮校：「監、毛本『士』作『土』，當不誤。」今據改。

曰復，通王命也。免之于宋，身未反國，因會于許，即從反國之辭通王命。

遂會諸侯圍許。遂，繼事也。

二十有九年，春，介葛盧來。介，國也。

葛盧，微國之君未爵者也。其曰來，卑也。

○介音界，國名。

【疏】「其曰來卑也」。○釋曰：據莊五年「邾來來朝」，亦未得爵命而稱朝，此謂卑賤之，故直言來矣。<sup>①</sup>襄十八年「白狄來」，<sup>②</sup>注云「不言朝者，不能行朝禮」是也。

公至自圍許。

夏，六月，公會王人、晉人、宋人、齊人、

陳人、蔡人、秦人，盟于翟泉。翟泉，某地。

【疏】「公會」至「翟泉」。○釋曰：《左氏》以為「王

人」者王子虎，為下盟列國；「晉人」云云者狐偃等，為上敵公侯，皆貶之稱人。何休注《公羊》云，晉文德衰，故微者往會。今《穀梁》既無傳注，或如何說，王人以下皆是微也。

秋，大雨雹。雹者，陰脅陽、臣侵君之象。陽氣

之在水雨則溫熱，陰氣薄而脅之，不相入，轉而成雹。

○雨，于付反。雹，蒲學反。

冬，介葛盧來。

三十年，春，王正月。

夏，狄侵齊。

秋，衛殺其大夫元咺。稱國以殺，罪累

上也，以是為訟君也。元咺訟君之罪于伯者，君忌之，使人殺之而後入。案宣九年「陳殺其大夫泄冶」，傳曰「稱國以殺其大夫，殺無罪也」，此傳曰「稱國以殺，罪累上也」。凡稱國以殺大夫，或殺無罪，或罪累上，參互不同，畧當近半。然則稱國以殺有二義，泄冶忠賢而君殺之，是君無道也；衛侯雖有不德，臣無訟君之道，元咺之罪亦已重矣。然君子之道，譬之于射，失諸正鵠，反求諸身。衛侯不思致訟之愆，躬自厚之義，過而不改，而又怨忌，上下皆失，故曰罪累上。○累，劣僞反。泄，息列反。冶音也。近半，附近之近。正音征。鵠，古毒反。愆，起虔反。

【疏】「以是為訟君也」。○釋曰：元咺訟君，則是

臣之罪。復言累上者，以上下俱失，嫌衛殺無罪，故加累上之文也。衛侯得書復歸者，復歸非全善之辭，衛侯既委罪元咺，故得復歸之稱。○注「有二義」。○釋曰：言有二義者，謂傳言「殺無罪也」，即是罪全在君，傳云「罪累上

①「直」，原作「有」，據宋刻元修本改。

②「狄」，原作「秋」，阮校：「『秋』當作『狄』，閩、監、毛本不誤。」今據改。

也」，即上下俱失，故云有二義。

衛侯在外，其以累上之辭言之，何也？待其殺而後人也。

及公子瑕。公子瑕，累也，以尊及卑也。

衛侯鄭歸于衛。徐逸曰：「凡出奔歸月，執歸不月者，齊則國更立主，<sup>①</sup>若故君還入，必有戰爭禍害，所以謹其文。執者，罪名未定，其國猶追奉之，歸無犯害，故例不月。」○戰爭，爭鬪之爭。

晉人、秦人圍鄭。介人侵蕭。

冬，天王使宰周公來聘。天子之宰，通於四海。

【疏】「天子」至「四海」。○釋曰：復發傳者，葵丘會也，此則聘也，嫌異，故重發之。

公子遂如京師，遂如晉。以尊遂乎卑，此言不敢叛京師也。何休曰：「大夫無遂事。案襄十二年，<sup>②</sup>季孫宿救台，「遂入鄆」，惡季孫不受命而人也。如公子遂受命如晉，不當言遂。」鄭君釋之曰：「遂固受命如京師如晉，不專受命如周，經近上言「天王使宰周公來聘」，故公子遂報焉，因聘于晉，尊周不敢使並命，使若公子遂自往然。即云公子遂如京師如晉，是同周于諸侯，叛

而不尊天子也。《公羊傳》有美惡不嫌同辭，何獨不廣之於此乎？」甯謂經同而傳異者甚衆，<sup>③</sup>此吾徒所以不及古人也。○台，土來反，又音臺。鄆音運。惡季孫，烏路反。美惡，烏路反，又如字。

【疏】「遂乎卑」。○釋曰：傳言此者，遂是繼事之辭，以辭有善惡，故傳分明別之也。

三十有一年，春，取濟西田。曹田。

公子遂如晉。

夏，四月，四卜郊。謂之郊者，天人相與交接之意也。不言郊天者，不敢斥尊也。昔武王既崩，成王幼少，周公居攝，行天子事，制禮作樂，終致太平。周公薨，成王以王禮葬之，命魯使郊，以彰周公之德，祭蒼帝靈威仰，昊天上帝魯不祭。○少，詩照反。大音泰。

【疏】注「謂之」至「不祭」。○釋曰：范惟言天人相與交接，故謂之郊。字既從郊，或當亦在南郊，就陽位而祭也。昔武王既崩云云，《尚書》有其事。制禮作樂云云者，《禮記》文。祭蒼帝靈威仰，昊天上帝魯不祭者，是鄭玄之說。鄭以《春秋說元命包》云：「紫微爲大帝，大微爲天

①「齊」，《穀梁補注》作「奔」。

②「襄」，原作「宣」，據宋刻元修本改。

③「衆」，原作「以」，據宋刻元修本改。

庭，五帝合明。」又《文耀鉤》云：「蒼帝春受制，其名靈威仰。赤帝夏受制，其名赤熛怒。黃帝受制王四季，其名含樞紐。」①白帝秋受制，其名白招拒。黑帝冬受制，其名叶光紀。②是紫微宮者五方帝。」故鄭以周與魯夏正郊天者，祭青帝靈威仰之帝，冬至祭天於圓丘者，祭天皇大帝，魯不得祭之。故范亦同之耳。然三王之郊，一用夏正，魯不然者，以天子得冬至祭天皇大帝，故郊所感之帝皆以夏正爲之，魯不得冬至祭天，故博卜三正。③從周正月至於三月，皆是郊之時也，月各一卜，故云三卜，禮也。四月非時，故云四卜，非禮也。《左氏》以爲禮不卜常祀，郊既魯之常祀，故一卜亦爲非禮。《公羊》以爲天子不卜郊，魯郊非常禮，故卜之，求吉之道不過三，故三卜，禮也，四卜，非禮也。是三傳各異。其用牲也，何休以爲郊天牛，角繭栗，三望之牛，角尺，其文出於《稽命徵》。其祀也，郊祭則焚燎，山則升，水則沈。「猶三望」，《公羊》以爲三望：泰山、河、海。賈逵、杜預之徒注《左氏》者，皆以爲分野星、國中山川。今范同鄭玄之說，取《禹貢》之文，以爲淮、海、岱也。

不從，乃免牲，猶三望。鄭君曰：「望者，祭山川之名也，謂海也，岱也，淮也。非其疆界則不祭。」《禹貢》曰：「海、岱及淮惟徐州。」徐，魯地。

夏四月，不時也。郊，春事也。四卜，非禮也。郊，春事，四卜則入夏。免牲者，爲之緇衣熏

裳，有司玄端，奉送至于南郊。免牛亦然。玄端，黑衣，接神之道。玄熏者，天地之色也。南郊，天位，歸之于陽也。「全曰牲，傷曰牛」，「牛有變而不郊，故卜免牛」。○熏，許云反。

【疏】注「全曰」至「免牛」。○釋曰：哀元年傳文也。

乃者，亡乎人之辭也。亡乎人，若曰無賢人也。凱曰，其猶《易》稱「闕其戶，闕其無人」，《詩》云「巷無居人」，譏僖公不共，致天變。○闕，苦鵬反。共音恭，本亦作恭。猶者，可以已之辭也。望，郊之細也。不郊，無望可也。已，止也。

秋，七月。

冬，杞伯姬來求婦。婦人既嫁不踰竟，杞伯姬來求婦，非正也。

【疏】「求婦非正也」。○釋曰：重發傳者，嫌國君

①「紐」，原作「紉」，阮校：「何校本「紉」作「紐」，是也。」今據改。

②「叶」，原作「汁」，阮校：「何校本「汁」作「叶」，是也。」今據改。

③「博」，阮校：「「博」當「轉」之壞字。」

之妻異，故明之。

### 狄圍衛。

十有二月，衛遷於帝丘。帝丘，衛地。

三十有二年，春，王正月。

夏，四月，己丑，鄭伯捷卒。○捷，在接反。

衛人侵狄。

秋，衛人及狄盟。

冬，十有二月，己卯，晉侯重耳卒。晉自莊

公已前不書于《春秋》，<sup>①</sup>又不言文公之人及鄭忽之殺，何乎？徐邈通之曰：「案《詩序》及《紀年》、《史記》，晉昭公之後，大亂五世。又鄭忽之後，有子驪、子儀，且事出記傳，而經所無殊多，誠當有不告故不書者。諸侯有朝聘之禮，赴告之命，所以敦其交好，通其憂虞。若鄰國相望而情志否隔，存亡禍福不以相關，則它國之史，無由得書，故告命之事絕，則記注之文闕，此蓋內外相與之常也。魯政雖陵遲，而典刑猶存，史策所錄，不失常法，其文獻之實足證，故孔子因而脩之，事仍本史，而辭有損益，所以成詳畧之例，起褒貶之意。若夫可以寄微旨而通王道者，存乎精義窮理，不在記事少多，此蓋脩《春秋》之本旨。師資辯說，日用之常義，故穀梁子可不復發文，而體例自舉矣。」○重，直龍反。驪，亡匪反。朝聘，直遙反。好，呼報反。否，備矣反。注，張住反。不復，扶又反。

【疏】注「師資辯說」。○釋曰：師者，教人以不及，故謂師為師資也。日用者，《易·繫辭》文也。

三十有三年，春，王二月，秦人入滑。

滑，國也。

齊侯使國歸父來聘。

夏，四月，辛巳，晉人及姜戎敗秦師于殽。不言戰而言敗，何也？狄秦也。其狄

之何也？秦越千里之險，入虛國，滑無備，故言虛國。○殺，戶交反。進不能守，<sup>②</sup>退敗其師，

徒亂人子女之教，無男女之別。秦之為狄，自殺之戰始也。明秦本非夷狄。○別，彼列反。

【疏】「進不」至「始也」。○釋曰：舊解，進不能守，謂人滑而去，退敗其師，謂敗於殽也；亂人子女，謂人

①「公」，《穀梁補注》作「閔」。

②「進不能守」，疏同。王引之《經義述聞》：「當作「不能守」。」



滑之時，縱暴亂也。本或別進字者。<sup>①</sup>

秦伯將襲鄭，百里子與蹇叔子諫曰：

「千里而襲人，未有不亡者也。」秦伯曰：

「子之冢木已拱矣，何知！」子之輩皆已老死矣。

拱，合抱也。言其老無知。○百里子，如字，或作伯，誤

也。蹇，紀輦反。拱，九勇反。合手曰拱。師行，百里

子與蹇叔子送其子而戒之曰：「女死，必於

穀之巖險之下。其處險隘，一人可以要百人。○女

音汝，下及注同。險，本作壑，音吟，一音欽。處，昌慮反。

隘，於懈反。要百，於遙反，下文「要而擊之」同。我將尸

女於是。」尸女者，收女尸。師行，百里子與蹇叔

子隨其子而哭之。秦伯怒曰：「何爲哭吾

師也？」二子曰：「非敢哭師也，哭吾子也。

我老矣，彼不死，則我死矣。」畏秦伯怒，故云彼我

要有死者。晉人與姜戎要而擊之，穀，匹馬倚輪

無反者。倚輪，一隻之輪。○倚，居宣反，或於綺反。

晉人者，晉子也。其曰人，何也？微之也。

何爲微之？不正其釋殯而主乎戰也。

癸巳，葬晉文公。日葬，危不得葬也。

狄侵齊。

公伐邾，取訾樓。○訾，子斯反。

秋，公子遂帥師伐邾。

晉人敗狄于箕。箕，晉地。

冬，十月，公如齊。

十有二月，公至自齊。

乙巳，公薨于小寢。小寢，內寢。小寢，非

正也。非路寢。

【疏】「小寢非正也」。○釋曰：傳發此例者，以隱

公不地，<sup>②</sup>桓公非正，今僖公雖卒，<sup>③</sup>而沒於婦人之手，故發傳以惡之也。

隕霜不殺草。京房《易傳》曰：「君假與臣權，

隕霜不殺草。」○隕，云敏反。未可殺而殺，舉重

①「本或別進字者」，王引之《經義述聞》：「當作『本或別有進字者』。」

②「公」，《穀梁補注》作「閔」。

③「卒」上，《穀梁補注》有「好」字。

也。可殺而不殺，舉輕也。重，謂菽也。輕，謂草也。輕者不死，則重者不死可知。

李、梅實。京房《易傳》曰：「從叛者茲謂不明，厥妖木冬實。」實之爲言猶實也。實，子。

晉人、陳人、鄭人伐許。

## 監本春秋穀梁注疏文公卷第十

起元年，盡八年

范甯集解 楊士勛疏

文公 ○襄王二十六年即位，名興。

【疏】《魯世家》：「文公名興，僖公之子，以襄王二十六年即位。」《謚法》：「慈惠愛民曰文。」

元年，春，王正月，公即位。繼正即位，

正也。繼正，謂繼正卒也。隱去即位以見讓，桓書即位示安忍。莊、閔、僖不言即位，皆繼弒。○去，起呂反。見，賢徧反。弒，申志反。

二月，癸亥，日有食之。

天王使叔服來會葬。諸侯喪，天子使大夫會葬，禮也。傳例曰：「天子大夫稱字。」蓋未受采邑，故不稱氏。字者貴稱，故可獨達也。○貴稱，尺證反。

【疏】「諸侯」至「達也」。○釋曰：范云傳例者，非正例，推以知之。定十四年傳曰：「天子之大夫不名。」隱七年「凡伯來聘」，傳曰：「凡伯者何也？天子之

大夫也。」又九年「南季來聘」，傳曰：「南，氏姓也。季，字也。」是天子之大夫稱字，據傳文可知，故亦得云傳例也。

葬曰會，言會，明非一人之辭。其志，重天子之禮也。

【疏】「重天子之禮也」。① ○釋曰：五年，「毛伯來會葬」，「會葬之禮於鄙上」。此叔服來會葬，云「其志，重天子之禮也」者，舊解以為叔服在葬前至，先鄉魯國，然後赴葬所。毛伯以喪服發後始來，先之竟上，然始至魯國，故傳釋有異辭也。或當此釋書之所由，故云重天子之禮也。彼解會葬之處，故云於鄙上。二者互言之，未必由先後至，理亦通也。

夏，四月，丁巳，葬我君僖公。薨稱公，舉上也。葬我君，接上下也。僖公葬而後舉謚，謚所以成德也，於卒事乎加之矣。

【疏】「薨稱」至「加之矣」。○釋曰：重發傳者，恒不以禮終，僖則好卒，二者既異，故傳詳之。

天王使毛伯來錫公命。毛，采邑，伯，字也，

① 「重」上，單疏本有「傳」字。單疏本標起訖，多有「傳」字，阮本多闕，下不另出校。

天子上大夫也。○錫，星歷反。采地，音菜，地本又作邑。禮：有受命，無來錫命，錫命，非正也。

【疏】「禮有」至「正也」。○釋曰：重發傳者，桓則薨後見錫，此則即位見錫，嫌其得正，故傳發之。

晉侯伐衛。

叔孫得臣如京師。

衛人伐晉。

秋，公孫敖會晉侯于戚。禮：卿不得會公

侯。《春秋》尊魯，內卿大夫可以會外諸侯。戚，衛地。○戚，倉寂反。

【疏】注「內卿」至「衛地」。○釋曰：「內卿大夫

可以會外諸侯」者，下二年傳文。不於此發例者，伯者至尊，大夫不可以會，但《春秋》內魯，故無譏文。以失禮深，傳不可云得會。至於二年垂斂之會，<sup>①</sup>則是凡常諸侯，<sup>②</sup>禮雖不達，人情通許。故發內大夫可以會外諸侯之例。

冬，十月，丁未，楚世子商臣弑其君

髡。<sup>③</sup>鄭嗣曰：「商臣，繆王也。髡，文王之子成王也。」

不言其父，而言其君者，君之於世子，有父之親，有君之尊，言世子所以明其親也，言其君所以明其尊也，商臣於尊親盡矣。○弑其，申志反，傳同。髡，苦門反。日髡

之卒，所以謹商臣之弑也。夷狄不言正不

正。徐乾曰：「中國君卒，正者例日，篡立不正者不日，

夷狄君卒，皆畧而不日，所以殊夷夏也。今書日，謹識商臣之大逆爾，不以明髡正與不正。」○篡，初患反。夏，戶雅反。識，如字，又申志反。

【疏】「夷狄」至「不正」。○釋曰：傳言此者，以夷狄之弑有日與不日，嫌同中國，故分明別之。

公孫敖如齊。

二年，春，王二月，甲子，晉侯及秦師戰

于彭衙。彭衙，秦地。○衙音牙。秦師敗績。

丁丑，作僝公主。作，爲也，爲僝公主

也。爲僝公廟作主也。主，蓋神之所馮依，其狀正方，穿中央，達四方。天子長尺二寸，諸侯長一尺。○爲僝公廟，于僞反。馮，皮冰反。長尺，直亮反，又如字，下同。

①「二」，原作「三」，阮校：「何校本『三』作『二』，是也。」

今按：單疏本同何校本，據改。

②「凡」，原作「几」，據宋刻元修本、單疏本改。

③「商」，原作「商」，阮校：「石經、閩、監、毛本『商』作『商』，下及注同。」今據改。下及注同。

立主，喪主於虞，禮：平旦而葬，日中反而祭，謂之曰虞，其主用桑。吉主於練。期而小祥，其主用栗。作僖公主，譏其後也。僖公薨，至此已十五日。作主壞廟有時日，於練焉壞廟。壞廟之道，易檐可也，改塗可也。禮：親過高祖則毀其廟。以次而遷，將納新神，故示有所加。○壞音怪，下同。檐，以占反。

【疏】「作爲」至「可也」。○釋曰：僖二十年「新作南門」，傳曰：「作，爲也。有加其度也。」彼傳意言作所以爲譏，則此作亦譏可知，故下傳云「作僖公主，譏其後也」。案莊公之喪已二十二月，仍譏其爲吉禘，今方練而作主，猶是凶服，而曰吉主者，三年之喪，至二十五月猶未合全吉，故公子遂有納幣之譏。莊公喪制未二十五月而禘祭，故譏其爲吉。此言吉者，比之虞主，故爲吉也。此雖爲練作之主，終入廟以辨昭穆，故傳以吉言之。然作主在十三月，壞廟在三年喪終，而傳連言之者，此主終入廟，入廟即易檐，以事相繼，①故連言之，非謂作主壞廟同時也。或以爲練而作主之時，則易檐改塗，故此傳云於練壞廟，於傳文雖順，舊說不然，故不從之，直記異聞耳。麋信引衛次仲云：「宗廟主皆用栗，右主八寸，左主七寸，②廣厚三寸。若祭訖，則內於西壁慆中，③去地一尺六寸。右主，謂父也；左主，謂母也。」何休、徐邈並與范注同，云

天子尺二寸，諸侯一尺，狀正方，穿中央，達四方，是與衛氏異也。其藏之也，《白虎通》亦云藏之西壁，則納之西壁中，或如衛說，去地高下，則無文以明之。何休又云：「謂之虞者，親喪已入墳，④皇皇無所見求，而虞事之。虞，猶安也。虞主用桑者，桑猶喪也。取其名與其麋，⑤所以副孝子之心。」練主用栗者，謂既埋虞主於兩階之間，易栗木爲主，取其戰慄，故用栗木爲主。又引《士虞記》曰：「桑主不文，吉主皆刻而謚之。」蓋爲禘時別昭穆

①「以」，阮校：「何校本『以』作『其』。」今按：單疏本同何校本。

②「七」，原作「八」，單疏本作「七」。阮校：「何校本『八』作『七』。」按：《儀禮經傳通解》亦作「七」。今據改。

③「內於西壁慆中」，單疏本「內」作「納」，「慆」作「培」。阮校：「閩、監、毛本『慆』作『陷』，何校本作『培』。」

④「入」，阮校：「何校本據元文『入』改『下』。」

⑤「麋」，原作「牖」，單疏本作「麋」。阮校：「何校本上『牖』作『麋』，是也。按《說文》無『牖』字，蓋『牖』轉寫之訛。」今據單疏本、阮校及《公羊傳》何休注改。

也。<sup>①</sup>徐邈注《穀梁》盡與之同，范亦當不異也。

三月，乙巳，及晉處父盟。晉大夫陽處父。

【疏】注「晉大夫陽處父」。<sup>②</sup>○釋曰：經不言陽，注知之者，以下有「晉殺其大夫陽處父」故也。

不言公，處父伉也，爲公諱也。諱公與

大夫盟，去處父氏，公親如晉，使若與其君盟，<sup>③</sup>如經言鄭儀父矣。不書地者，公在晉也。莊二十二年「秋，七月，丙申，及齊高傒盟于防」，不去高傒氏者，公不親如齊，不與其君盟，於恥差降。○伉，苦浪反。爲公，于僞反。去處父，起吕反，下同。傒音兮。差，初賣反，又初佳反。何以知其與公盟？以其日也。何以不言公之如晉？所恥也。出不書，反不致也。

【疏】「何以至「不致也」」。○釋曰：傳決不言公者，據隱公八年「九月，辛卯，公及莒人盟于包來」言公也。彼傳云：「可言公及人，不可言公及大夫。」故此没公，彼存公也。莊二十二年「及齊高傒盟于防」，傳曰：「不言公，高傒伉也。」彼已有傳，此又重發者，高傒存氏，今處父去族嫌異，故重發之。傳不於高傒發日以明公存者，二者理同，此又須辨公不言如晉意也，故就此一發之。<sup>④</sup>彼注云「書日，則公盟也」，<sup>⑤</sup>是亦意同之事也。傳又云出不書，反不致也者，以致者必有出，出者不必致，今出既不書，故

反亦不致也。

夏，六月，公孫敖會宋公、陳侯、鄭伯、

晉士穀，<sup>⑥</sup>盟于垂斂。垂斂，鄭地。○穀，戶木反，

本又作穀，九年同。斂如字，《左氏》作垂隴。內大夫可以會外諸侯。

自十有二月不雨，至于秋七月。建午之月，猶未爲災。歷時而言不雨，文不憂雨也。僖公憂民，歷一時輒書不雨，今文公歷四時乃書，是不勤雨也。

【疏】「歷時」至「雨也」。○釋曰：傳發之者，以僖公憂民之情急，故備書之。今文公繼父之業，無志於

①「禘時」，阮校：「何校本依元文「禘」下增「禘」字。」今按：單疏本同何校本。

②「注晉大夫陽處父」，單疏本作「注晉大云云」。

③「其」，原作「甚」，阮校：「閩、監、毛本「甚」作「其」，是也。」今據改。

④「一」，阮校：「何校本「一」作「亦」。」

⑤「彼」，原作「後」，據單疏本改。

⑥「士穀」，阮校：「石經「穀」作「穀」，《釋文》出「士穀」云：本又作「穀」。九年同。」

民，故畧書之。以二者既異，故傳分而別之。莊三十一年「冬，不雨」，不發傳者，以一時不雨輕故也。下十年、十三年意亦與此同，故省文不發之。

不憂雨者，無志乎民也。無恤民志。

八月，丁卯，大事于大廟，躋僖公。大事，

禘也。時三年之喪未終，而吉祭於大廟，則其譏自明。

○大廟，音泰，注及傳「大祖」同。躋，子兮反，升也。禘，戶夾反，下及注皆同。

【疏】注「大事」至「自明」。○釋曰：舊解，范云

其譏自明者，謂吉禘於莊公書吉，此大事于大廟不書吉者，以同未滿三年，前已書吉，則此亦同譏，故云其譏自明。此解取杜預之意也。然杜云其譏已明，故得以吉禘並之，范云其譏自明，焉知遠比吉禘？蓋范意以喪制未終，不待譏責，其惡足顯，故云自明也。禘禘之禮俱在廟序昭穆，所以為制異者，《公羊傳》稱「五年再殷祭」，何休云：「謂三年禘，五年禘，禘所以異於禘者，禘則功臣皆祭也，禘則合食於大祖而已。」是何休意禘則三年，禘則五年也。范於閔二年注同杜預，以禘為三年之祭，必不得與何休同也。《公羊》云「五年再殷祭」，禘既三年，蓋禘則五年也。若然，禘在五年而云三年之喪未終者，<sup>①</sup>據時三年未終而為禘祭，故以三年言之，不謂禘祭亦在三年也。或以為禘禘同三年，但禘在夏，禘在秋，直時異耳，於范注不妨，但與《公羊》「五年再殷祭」違也。何休又云：「天子

特禘特禘，諸侯禘則不約，禘則不嘗，大夫有賜於君，然後禘其高祖。」然諸侯禘則不約，或如何說，云大夫有禘，恐其不然。《公羊》亦以此大事于大廟為禘祭，杜解《左氏》以大事為禘，與《穀梁》異。

大事者何？大是事也，著禘、嘗。禘，合

也。嘗，秋祭。禘祭者，毀廟之主，陳于大祖；

未毀廟之主，皆升，合祭于大祖。禘祭者，皆合

祭諸廟已毀未毀者之主於大祖廟中，以昭繆為次序，父為昭，子為穆，昭南鄉，繆北鄉，孫從王父坐也。祭畢，則復還其廟。○昭繆音韶穆，下及傳同。鄉音向，下同。

躋，升也，先親而後祖也，逆祀也。舊說僖公，

閔公庶兄，故文公升僖公之主於閔公之上耳。僖公雖長，已為臣矣。閔公雖小，已為君矣。臣不可以先君，猶子不可以先父，故以昭穆父祖為喻。甯曰：即之於傳，則無以知其然。若引《左氏》以釋此傳，則義雖有似，而於文不辨。高宗，殷之賢主，猶祭豐于禩，以致雉雉之變，然後率脩常禮。文公僖倒祖考，固不足多怪矣。親謂僖，祖謂莊。○長，丁丈反。先，悉薦反，下同。禩，乃禮反。雉，古豆反，雉鳴也。僖倒，丁田反，下丁老反。逆祀，則

①「終」，原作「禘」，阮校：「何校本作『終』。案：『終』是。」今按：單疏本同何校本，據改。

是無昭穆也。無昭穆，則是無祖也。無祖，則無天也。故曰：文無天。無天者，是無天而行也。祖，人之始也。人之所仰，天也。君子不以親親害尊尊，此《春秋》之義也。尊卑有序，不可亂也。

【疏】「大事」至「義也」。○釋曰：大事是事也者，禘是祭之大者，故云大是事也。著禘嘗者，謂以大事言之，著明是禘嘗之祭也。嘗連言者，禘必在秋，故連嘗言之。然周之八月，夏之六月，而云著禘嘗者，蓋月却節前，已得立秋之節故也。先親而後祖，親謂僖公，祖謂閔公也。僖繼閔而立，猶子之繼父，故傳以昭穆祖父爲喻。此於傳文不失，而范氏謂莊公爲祖，其理非也。何者？若范云文公僖倒祖考，則是僖在於莊上，謂之夷狄猶自不然，況乎有道之邦，豈其若是？明范說非也。則無天也，謂天道先尊而後親，今亂其上下，不仰法天也。此《春秋》之義也者，以嫌疑之間，須取聖證故也。

冬，晉人、宋人、陳人、鄭人伐秦。

公子遂如齊納幣。喪制未畢而納幣，書非禮。

三年，春，王正月，叔孫得臣會晉人、宋人、陳人、衛人、鄭人伐沈，沈潰。沈，國也。潰之爲言上下不相得。○沈音審。潰，戶內反。

夏，五月，王子虎卒。叔服也。此不卒者也，外大夫不書卒。何以卒之？以其來會葬，我卒之也。會葬在元年，

【疏】「何以卒之」。○釋曰：重發之者，尹氏則以爲魯主，此爲會葬，事異，故重發之。或曰，以其嘗執重以守也。僖二十四年，「天王出居于鄭」，叔服執重任以守國。○守，手又反。

秦人伐晉。

秋，楚人圍江。

雨蝨于宋。外災不志，此何以志也？

曰，災甚也。其甚奈何？茅茨盡矣。茅茨猶盡，則嘉穀可知。茨，蒺藜。○雨蝨，于付反，下同；下音終。茨，在思反。茅，草也。

【疏】「外災不志」。○釋曰：外災不志，重發之者，志災或爲王者之後，或爲甚而錄之，故不得一例危之。○注「茨，蒺藜」。○釋曰：徐邈云：「禾稼既盡，又食屋之茅茨。」今范云「茨，蒺藜」，則與徐異也。《公羊》與《考異郵》皆云：「蝨死而墜於地。」故何休云「蝨猶

①「危」，阮校：「閩、監、毛本作「施」。」



衆也，死而墜者，<sup>①</sup>象宋群臣相殘害也。云云，「上下異之云爾」。今《穀梁》直云「茅茨盡矣，著於上見於下謂之雨」，與讖違，是爲短。鄭玄云：「《穀梁》意亦以宋德薄，<sup>②</sup>後將有禍，故螽飛在上，墜地而死。言茅茨盡者，著甚之驗，於讖何錯之有乎？」是鄭意以雨螽於宋，亦爲將禍之應也。

著於上見於下謂之雨。○見，賢徧反。

冬，公如晉。

十有二月，己巳，公及晉侯盟。

晉陽處父帥師伐楚，救江。此伐楚，其言救江，何也？江遠楚近，伐楚所以救江也。時楚人圍江，晉師伐楚，楚國有難，則江圍自解。○難，乃旦反。解音蟹，又古買反。

四年，春，公至自晉。

夏，逆婦姜于齊。其曰婦姜，爲其禮成乎齊也。婦禮成于齊，故在齊便稱婦。○爲，于僞反。其逆者誰也？親逆而稱婦，或者公與？何其速婦之也！鄭嗣曰：「皆問者之辭。問者以使大夫逆，例稱女，而今稱婦，爲是公親逆與？怪稱婦速，故反覆推之。」○公與音餘，注同。反覆，芳服反。

曰，公也。其不言公，何也？據莊二十四年「公如齊逆女」言公。非成禮於齊也。非，責。曰婦，有姑之辭也。其不言氏何也？貶之也。何爲貶之也？夫人與有貶也。邵曰：「夫人能以禮自防，則夫婦之禮不成於齊，故譏公而夫人與焉。」○與音豫，注同。貶，彼檢反。

【疏】「其曰婦」至「貶也」。○釋曰：宣元年已有傳，今故深發之者，<sup>③</sup>彼書夫人，此直云婦姜，嫌文異也，故彼此明之。以彼稱夫人，<sup>④</sup>又書至，此不然者，《公羊傳》曰：「其謂之逆婦姜于齊何？娶於大夫者，<sup>⑤</sup>畧之也。」徐邈亦以爲不書至，不稱夫人，下娶賤，畧之。若以諸侯下娶大夫便爲畧賤，則大夫亦不得上娶諸侯，且天子得下婚諸侯，何爲諸侯不得下娶大夫？是《公羊》之言，不可以解此也。蓋不稱夫人，不言至者，以其婦禮成於齊，故

①「者」，單疏本作「地」。

②「德薄」，阮校：「單疏本『德薄』乙轉。」

③「故深」，單疏本作「復」。阮校：「閩、監、毛本『故深』作『復特』，何校本無此二字。」

④「以」，單疏本作「然」。

⑤「於」，阮校：「何校本『於』作『乎』，與《公羊傳》合。」今按：單疏本原作「於」，改爲「乎」。

異於餘稱。傳云「夫人與有貶也」者，解不稱氏之意，非釋不稱夫人也。

### 狄侵齊。

### 秋，楚人滅江。

### 晉侯伐秦。

衛侯使甯俞來聘。○俞，羊朱反。

冬，十有一月，壬寅，夫人風氏薨。僖公母，風姓。

### 五年，春，王正月，王使榮叔歸含且贈。

含，口實也。《禮記》曰：「飯用米貝，弗忍虛也。」諸侯含用玉。榮叔，天子之上大夫也。榮，采地，叔，字。○含，戶暗反，釋舊作哈。贈，芳鳳反。飯，扶晚反。

【疏】注「含口」至「叔字」。○釋曰：「飯用米貝，不忍虛也」，《禮記·檀弓》文。諸侯含用玉，《禮緯》文也。

含，一事也。贈，一事也。兼歸之，非

正也。禮：含、贈、襚，各異人。○襚音遂。

【疏】注「禮含」至「異人」。○釋曰：知各異人者，《雜記》稱諸侯之喪有贈者，有含者，有襚者，又此傳云兼歸之，非正也，明天子於諸侯含襚常各異使也。①其

曰且，志兼也。其不言來，不周事之用也。

何休曰：「四年「夫人風氏薨」，九年「秦人來歸僖公成風之襚」，最晚矣，何以言來？」鄭君釋之曰：「秦自敗于穀之後，與晉爲仇，兵無休時，乃加免繆公之喪而來，君子原情不責晚。」用，或作辭。○穀，戶交反。贈以早，乘馬曰贈，乘馬所以助葬，成風未葬，故書早。○乘，繩證反，下同。而含已晚。②已殯，故言晚。國有遠近，皆令及事，理不通也。《禮·雜記》曰：「含者執璧將命曰：『寡君使某含。』相者入告，出曰：『孤某須矣。』含者入，升堂致命，子拜稽顙。含者坐委於殯東南，有葦席，既葬，蒲席。降，出反位。」明君之於臣，有含贈之義，所以助喪盡恩，含不必用，示有其禮。○令，力呈反。相，息亮反。稽顙，音啓，下息黨反。葦，于鬼反。

【疏】注「已殯」至「其禮」。○釋曰：舊解以爲傳與《雜記》違者，傳言含贈，上闕天子之於諸侯及夫人耳。《雜記》所云唯論諸侯自相於，不是天子施於諸侯之事，故彼既殯猶致含。此則責其晚也，何者？諸侯及夫人於天

①「又此」至「含襚」，單疏本無此一十八字。「常」，阮校：「何校本「常」作「當」。」今按：單疏本同何校本。

②「已」，阮校：「石經「已」作「以」。」按《儀禮經傳通解》引作「以」。

子生有朝覲之好，有疾則當告於天子，天子遣使問之，有喪則致含，無則止矣，故未殯以來，足以及事。今天子歸贈大早，歸含大晚，故譏之。其諸侯相於，有疾未必相告，比殯以來，道遠者容其不至，故示其禮而已，不責其晚也。以事既有殊，譏亦有異。今恐不然，何者？范云「國有遠近，皆令及事，理不通也」，則是傳之不通，故引記文爲證，何得云天子與諸侯禮異？是舊說妄耳。又云「明君之於臣」云云者，證君之於臣有贈含之義，不必皆用也。案鄭《釋廢疾》云：「天子於二王后之喪，含爲先，襚次之，贈次之，餘諸侯，含之贈之，小君亦如之，於諸侯之臣，襚之，贈之。其諸侯相於，如天子於二王之後。於卿大夫，如天子於諸侯。於士，如天子於諸侯之臣。京師去魯千里，王室無事，三月乃含，故不言來以譏之。」是鄭意亦以譏王含晚也。范前注引鄭釋，似將傳爲是，後注取彼記文，則以傳非者，范以何休取「秦人來歸僖公成風之襚」爲難非類，故上注取鄭釋以排之，下注既以傳爲非，故引《雜記》之文爲證，二注並不取鄭君非王含晚之說，益明范云傳爲非也。

三月，辛亥，葬我小君成風。

王使毛伯來會葬。會葬之禮於鄙上。

從竟至墓，主爲送葬來。○竟音境。爲，于僞反。

【疏】「毛伯來會葬」。○釋曰：《左氏》、《公羊》

及徐邈本並云召伯，此本作毛伯，疑誤也。

夏，公孫敖如晉。

秦人人郛。○郛音若。

秋，楚人滅六。

冬，十月，甲申，許男業卒。

六年，春，葬許僖公。

夏，季孫行父如陳。行父，季友孫。

【疏】注「行父季友孫」。○釋曰：《世本》：季

友生仲無佚，佚生行父是也。

秋，季孫行父如晉。

八月，乙亥，晉侯驩卒。○驩，好官反。

冬，十月，公子遂如晉。

葬晉襄公。

晉殺其大夫陽處父。稱國以殺，罪累

上也。襄公已葬，其以累上之辭言之，何

也？君漏言也。上泄則下闇，下闇則上

聾，且闇且聾，無以相通。臣闇不言，君無所聞，

上下否塞。○累，劣僞反，下同，或如字。泄，息列反，又

以制反。聾，魯公反。

【疏】傳「襄公已葬」。○釋曰：徐邈解襄公已葬，謂《春秋》之例，君殺無罪之大夫，則是失德，不合書葬，今襄公書葬，則是無罪，而以累上之辭言之者，以襄公漏泄陽處父之言故也。舊解亦云襄公罪輕，故不追去葬文。今以爲傳云襄公已葬者，謂卒哭日久，葬在前，殺在後，是罪累不合及君，故起累上之問，非是釋合書葬以否。

夜姑殺者也。<sup>①</sup>殺處父。○《左氏》作射姑。

夜姑之殺奈何？曰：晉將與狄戰，使狐

夜姑爲將軍，趙盾佐之。陽處父曰：「不

可！古者君之使臣也，使仁者佐賢者，不

使賢者佐仁者。今趙盾賢，夜姑仁，其不可

乎？」邵曰：「賢者多才也，戰主于攻伐，仁者有惻隱之

恩，不如多才者有權畧。」○盾，徒本反。攻如字，又音貢。

惻，初力反。襄公曰：「諾。」謂夜姑曰：「吾

始使盾佐女，今女佐盾矣。」稱處父語以語之，故

傳曰漏言也。○女音汝。語，魚慮反。夜姑曰：

「敬諾。」襄公死，處父主竟上事，<sup>②</sup>待諸侯會葬，

在鄙上。○竟音境。夜姑使人殺之，君漏言也。

親殺者夜姑，而歸罪於君，明由君言而殺之，罪在君也，故

稱君以殺。

【疏】注「親殺」至「以殺」。○釋曰：兩下相殺，不志乎《春秋》，今雖是射姑之殺，罪君漏言，故稱國以殺。

故士造辟而言，詭辭而出，辟，君也。詭辭

而出，不以實告人。○造，七報反。辟，必亦反，君也，注

同。詭，九委反。曰：用我則可，不用我則無

亂其德。此士對君言之辭。

晉狐夜姑出奔狄。

閏月不告月，猶朝于廟。禮：天子以十二

月朔政班告于諸侯，諸侯受於禰廟。孝子尊事先君，不敢

自專也。言朝者，緣生以事死，親存，朝朝莫夕不敢泄鬼

神，故事畢，感月始而朝之。○猶朝，直遙反，注及下同。

朝朝，上如字，下直遙反。莫音慕。泄，息列反。

【疏】注「禮天子」至「朝之」。○釋曰：《周禮》

「太史班告朔于邦國」，鄭玄云：「天子班朔於諸侯，諸侯

藏之祖廟。至朔日朝於廟，告而受行之。」《論語》云：

「夜姑」，原作「射姑」，宋刻元修本作「夜姑」。阮校：

「石經、閩、監、毛本『射』作『夜』。」今據改。下「射姑之

殺」，「射姑使人」並改。

「竟上」，阮校：「石經『上』下有『之』字。」

「子貢欲去告朔之餼羊。」是告朔用特羊言廟。<sup>①</sup>鄭云「祖廟」，范言「禰廟」者，以無正文，各以意說，或祖或禰，通言之耳。何休亦云「藏於祖廟，使大夫南面奉天子命，君北面而受之」，是亦受政之事也。凡告朔之禮，因聽視此月之政，故謂之視朔，謂之聽朔也。其朝廟之禮，孝子緣生以事死，因告朔在廟，故感月始而亦享祭宗廟，故亦謂之朝享，其歲首謂之朝正也。據《玉藻》及《祭法》之文，則天子聽朔於明堂，朝享自祖考以下五廟，諸侯則聽朔於大廟，朝享自皇考以下三廟也。《公羊傳》稱：「閏月」曷為不告朔？天無是月也。閏月矣，何以謂之天無是月？非常月也。<sup>②</sup>此傳云「閏月者，附月之餘日也」，「天子不以告朔而喪事不數」。《公羊》、《穀梁》皆以為閏月不合告朔。《左氏傳》云：「不告閏朔，棄時政也。何以爲民主？」則閏月當告朔，與二傳異也。案哀五年「閏月，葬齊景公」，《公羊傳》意以為并閏，此傳云「喪事不數也」者，閏月不告朔，二傳雖同，其於喪事，數與不數，其意又異也。范氏《別例》云：「書不告朔有三，皆所以示譏耳：則此文，一也；公四不視朔，二也；襄二十九年，公在楚，三也。」公既在楚，則是不告朔，故亦以為一。注又云不敢泄鬼神，解生則朝朝莫夕，死則每月始朝之意也。

不告月者何也？不告朔也。不告朔，則何爲不言朔也？閏月者，附月之餘日也，積分而成於月者也。一歲三百六十日，餘六

日，又有小月六，積五歲得六十日而再閏，積衆月之餘分以成此月。

【疏】注「一歲」至「此月」。○釋曰：古今爲曆者，皆云周天有三百六十五度四分之度之一，日之行天，一日一夜行一度，故謂一度爲一日。一歲十二月，唯有三百六十日，是餘五日四分之度之一也。又月一大一小，則一年之間又有六日，并言之，則一歲有七十二日，故積五歲得六十日。此皆大率而言，其實一年不得有十二日，范不如曆法細計之，故云五歲得六十日也。

天子不以告朔，而喪事不數也。閏是叢殘之數，非月之正，故吉凶大事皆不用也。不數，所右也。○叢，俎洪反。<sup>③</sup>猶之爲言可以已也。郊然後三望，告朔然後朝廟，俱言猶，義相類也。既廢其大，而行其細，故譏之。

【疏】猶之「至已也」。○釋曰：重發傳者，前

①「言」，阮校：「何校本「言」作「告」。」今按：單疏本同何校本。

②「閏月矣何以謂之天無是月非常月也」，阮校：「何校本「矣」作「也」，「非」上疊「是月」二字，與《公羊》合。」

③「不數所右也」○叢俎洪反，《釋文》作「不數所古反或所具反叢俎供反」。

爲三望發，此是朝廟，嫌異，故重明之。范例「猶」有五等，發傳者三：僖三十一年「猶三望」，獨發傳者，據始也；宣三年不發傳者，從例也；成七年亦不發傳者，亦爲從例可知也；此年發傳者，朝與三望異也；宣八年發傳者，嫌仲遂有罪，得不廢禮，又繹祭與朝廟禮異故也。

### 七年，春，公伐邾。

三月，甲戌，取須句。取邑不日，此其日何也？據僖二十六年公「伐齊，取穀」，不日。

○句，其俱反。不正其再取，故謹而日之也。僖二十二年，公已「伐邾，取須句」，過而不改，於此爲甚，故錄日以志之。

【疏】「不正」至「日之也」。○釋曰：哀元年「冬，仲孫何忌帥師伐邾」，二年「王二月，季孫斯」云云「帥師伐邾，取濶東田，及沂西田」。彼比年伐邾，而取兩邑，經不書日，今僖之與文，父子異人，特言謹而日之者，以文公是不肖之君，緩主逆祀，取邑致討，不得序列於諸侯，譏其過而不改，故錄日以見惡。僖雖伐邾，纔始一度，又是作頌賢君，故與文異也。

遂城郛。遂，繼事也。因伐邾之師。○郛音吾。

夏，四月，宋公壬臣卒。<sup>①</sup>○壬臣，或作王臣。

宋人殺其大夫。稱人以殺，誅有罪也。

【疏】「宋人殺其大夫」。○釋曰：《公羊》以爲三世內娶，使若無大夫，故不書名。《左氏》以爲無罪，故不書名。今此傳直云「稱人以殺，誅有罪也」，則謂此被殺者爲有罪，故稱人以殺，<sup>②</sup>仍未解不稱名所由。案僖二十五年「宋殺其大夫」，傳曰：「其不稱名姓，以其在祖之位，尊之也。」此傳云誅有罪也，又經稱宋人，則與彼異。蓋成公壬臣新卒，<sup>③</sup>昭公杵臼未即位，國內無君，故不稱名氏，從未命大夫例，故八年鄭《釋廢疾》亦以此爲無君。若然，兩下相殺，《春秋》不書，又不得言其，此書殺大夫而云無君者，以受命於嗣天子，是以言其孤未畢喪，故無名氏。八年書「司馬，官也」者，彼雖實有君，而不重瓜牙，<sup>④</sup>無君人之度，故經書「司馬」，傳以「無君」釋之。鄭玄云，亦爲上下俱失，罪臣以權寵逼君，故稱人以殺。君以非理殺臣，故著言司馬。不稱名者，以其世在祖之位，尊亦與僖二十五年「宋殺其大夫」同。是其說也。

①「壬」，阮校：「石經「壬」作「王」。《穀梁補注》曰：

「壬，本或作「王」，唐石經作「王」，《左氏》、《公羊》作

「王」。《左》亦或作「壬」。」

②「人」，單疏本作「名」。

③「壬」，宋刻元修本、單疏本作「王」。

④「瓜」，據文意當爲「爪」之訛。

戊子，晉人及秦人戰于令狐。令狐，秦地。  
○令，力丁反。

晉先蔑奔秦。不言出，在外也。輟戰

而奔秦，以是爲逃軍也。輟，止也。爲將而獨奔，故曰逃軍。○輟，丁劣反。將，子匠反。

狄侵我西鄙。

秋，八月，公會諸侯、晉大夫盟于扈。

扈，鄭地。○扈音戶。其曰諸侯，畧之也。晉侯新立，公始往會，晉侯不盟，大夫受盟。既以喪娶，又取二邑，爲諸侯所賤，不得序于會，諱使若扈之盟，都不可知，故畧之。○喪取，七住反，本亦作娶。

【疏】注「諱使」至「畧之」。○釋曰：舊說使若扈

之盟都不可知者，謂後十五年亦不序諸侯，探解下文，故云都也。今以爲范解諸侯不序之意，魯諱其不與，故總言諸侯，似若扈之盟，諸侯都不可知，非是探解下文始稱都也。

冬，徐伐莒。

公孫敖如莒莅盟。莅，位也。其曰位，

何也？前定也。其不日，前定之盟不日也。

【疏】莅位也。○釋曰：重發傳者，以徐伐莒而往莅盟，嫌非兩國交盟之例，故明之。<sup>①</sup>

八年，春，王正月。

夏，四月。

秋，八月，戊申，天王崩。襄王。

冬，十月，壬午，公子遂會晉趙盾盟于

衡雍。衡雍，鄭地。○雍，於用反。

【疏】公子遂。○釋曰：再稱公子者，若下文

直言遂，恐爲繼事之辭。兩名不辨，故重言公子以詳之。

乙酉，公子遂會雒戎，盟于暴。鄭地。

○雒戎，音洛，本或作伊雒之戎，誤。公孫敖如京

師，弔周喪。不至而復。<sup>②</sup>丙戌，奔莒。不言

所至，未如也。若其已行，當如公子遂至黃乃復，今

不言所至而直言復，知其實未如也。未如則未復也。

未如而曰如，不廢君命也。雍曰：「受命而出，

義無私留。書如京師，以顯命行于下，不書所至，以表不

① 「明之」，單疏本作「盟之也」。

② 「而」，阮校：「石經無「而」字。」

去之罪。」未復而曰復，不專君命也。復者，事畢之辭。未如，故知其未復。加畢事之文者，言君命無輒專之道。其如非如也，其復非復也，唯奔莒之爲信，故謹而日之也。

【疏】「謹而日之也」。○釋曰：襄二十三年，

「冬，十月，乙亥，臧孫紇出奔邾」，傳曰：「其日，正臧孫紇之出也。」范云：「正其有罪。」彼云「正其有罪」，則此亦正其有罪。兩處發傳者，此其如非如，其復非復，臧孫則實奔，嫌其意異，故舉二者以包其餘。成十六年「冬，十月，乙亥，叔孫僑如出奔齊」，亦同此例，故不復發之。若然，僑如亦是有罪，書日亦以包之。於彼注引徐邈云：「禮：大夫去君，<sup>①</sup>掃其宗廟，不絕其祀，身雖出奔，而君遇之不失正，故詳而日之，明有恩義也。」與此異者，書日之義有二種之意也：一爲正罪，一爲兼君恩。知者，以閔二年「公子慶父出奔莒」，文承九月之下而不書日，傳稱「慶父不復見矣」，明罪重合誅，故去日以見恩絕，則書日者有恩可知。以此推之，歸父、公子慤不書日之從例可知也。然歸父有罪，非成公逐之者，<sup>②</sup>歸父殺嫡立庶，宜世不長，魯人逐之，實得其罪，但惡成公逐父之使耳，不言歸父無罪也。

各蟲。

宋人殺其大夫司馬。司馬，官也。其

以官稱，無君之辭也。何休曰：「近上七年，『宋公壬臣卒』，『宋人殺其大夫』，不言官。今此在三年中言官，義相違。」鄭君釋之曰：「七年殺其大夫，此實無君也。今殺其司馬，無人君之德耳。司馬，司城，君之爪牙，守國之臣，乃殺其司馬，奔其司城，無道之甚，故稱官以見輕慢也。」傳例：「稱人以殺，殺有罪也。」此上下俱失之。○見，賢偏反。

宋司城來奔。司城，官也。其以官稱，無君之辭也。來奔者不言出，舉其接我也。

【疏】「來奔」至「接我也」。○釋曰：重發傳者，嫌奔殺異也。來奔不言出，發傳於此者，以是來奔之始，故發之。子哀不發者，從此例可知。

- ① 「去」，原作「云」，單疏本作「去」。阮校：「何校本『云』作『去』，與成十六年注合。」今據改。
- ② 「遂」，單疏本作「逐」。今按：下文言「但惡成公逐父之使耳」，作「逐」是。



監本春秋穀梁注疏文公卷第十一

起九年，盡十八年

范甯集解 楊士勛疏

九年，春，毛伯來求金。求車猶可，求金甚矣。凱曰：「求俱不可，在喪尤甚。不稱使者，天子當喪未君也。」

【疏】注「在喪尤甚」。○釋曰：求賻亦在喪，不言尤甚者，在喪有賻無金，故求賻比求金為輕，求車不在喪，又可於求賻，<sup>①</sup>故傳云求車猶可，凱云在喪求金尤甚。

夫人姜氏如齊。歸寧。

二月，叔孫得臣如京師。京，大也。師，衆也。言周必以衆與大言之也。

【疏】「京大」至「言之也」。○釋曰：不發於桓九年者，內之如京師始於此，故發之。季姜非魯女，故彼處不發，雖畧不發傳，亦同此可知也。

辛丑，葬襄王。天子志崩不志葬。舉

天下而葬一人，其道不疑也。志葬，危不得葬也。不得備禮葬。

【疏】「天子」至「葬也」。○釋曰：重發傳者，桓王七年始葬，襄王則七月而葬，嫌異，故重發之也。

日之，甚矣，其不葬之辭也。王室微弱，諸侯無復往會葬。○復，扶又反。

【疏】「王室」至「會葬」。○釋曰：魯不會葬，則無由得書。而云王室微弱諸侯無復往會葬者，天子志崩不志葬，而又書日，是不葬之辭，故知諸侯無復往會葬也。<sup>②</sup>其實魯卿往會始書，若不會則不當書也。故《春秋》之世有十二王，志崩者有九，書葬者唯五耳。良由王室不赴，諸侯不會故也。志崩有九者，平王、桓王、惠王、襄王、匡王、定王、簡王、靈王、景王是也。書葬有五者，桓王、襄王、匡王、簡王、景王是也。其莊王、僖王、頃王三者不志崩，為不赴故也。然則天子不合書葬，魯史書之者，欲見周室之衰，不得備禮而葬，因遣使往會則錄之。若不遣使，則葬不明，故不錄也。傳稱不志葬者，據治平之日正法言之也。

① 「於」，單疏本作「以」。

② 「葬」，原作「者」，據單疏本改。

晉人殺其大夫先都。

三月，夫人姜氏至自齊。卑以尊致，病

文公也。夫人行，例不致，乃以君禮致，刺公寵之過。

○刺，七賜反。

【疏】注「夫人」至「之過」。○釋曰：范氏例云：

「夫人行有十二，例時，此致而書月者，蓋以非禮而致，故書月以刺之，餘不書月者，當條皆有義耳。」夫人行十二者：文姜七如齊，再如莒，是九也。夫人姜氏會齊侯于陽穀，十也。夫人姜氏會齊侯于下，十一也。並數此夫人姜氏，是十二也。徐邈云：「卑以尊致，有文公娶齊大夫女爲妻，故初逆姜氏，不稱夫人，今致以夫人，禮與逆自違，故疾公也。」范云：「夫人行例不致，乃以君禮致，刺公寵之過。」則與徐異也。

晉人殺其大夫士穀及箕鄭父。稱人以

殺，誅有罪也。鄭父，累也。○箕，居其反。

楚人伐鄭。

公子遂會晉人、宋人、衛人、許人救鄭。

夏，狄侵齊。

秋，八月，曹伯襄卒。

九月，癸酉，地震。震，動也。地不震

者也，震，故謹而日之也。《穀梁》說曰：「大臣盛，將動有所變。」

【疏】「癸酉地震」。○釋曰：范例云「地震五，例日」，故此亦日也。何休、徐邈並云：「由公子遂陰爲陽行，專政之所致。」今范引《穀梁》說曰「大臣盛，將動有所變」，則與二說同，理亦無妨。

冬，楚子使蔣來聘。楚無大夫，無命卿。

○蔣，子遙反，又子小反，或作蔣，《左氏》作椒。其曰

蔣何也？以其來我，褒之也。

【疏】「楚無」至「之也」。○釋曰：既褒之而書名。所以不稱氏者，《公羊傳》云「許夷狄者不一而足」，理或然也。

秦人來歸僖公成風之襚。秦人弗夫人

也，言秦人弗以成風爲夫人，故不言夫人。即外之弗

夫人而見正焉。見不以妾爲妻之正。○見，賢徧

反。

葬曹共公。○共音恭。

①「有」，阮校：「何校本『有』作『者』。」今按：單疏本同何校本。

十年，春，王三月，辛卯，臧孫辰卒。

夏，秦伐晉。

楚殺其大夫宜申。僖四年傳曰「楚無大夫」，而今云殺其大夫者，楚本祝融之後，季連之胄也，而國近南蠻，遂漸其俗，故棄而夷之。今知內附中國，亦轉強大，故進之。○胄，直又反。國近，附近之近。

【疏】「楚本」至「進之」。○釋曰：《國語》與《楚世家》文也。

自正月不雨，至于秋七月。歷時而言不雨，文不閔雨也。不閔雨者，無志乎民也。

及蘇子盟于女栗。<sup>①</sup>女栗，某地。蘇子，周卿士。○女音汝。

冬，狄侵宋。

楚子、蔡侯次于厥貉。厥貉，某地也。○貉，亡白反。

十有一年，春，楚子伐麇。○麇，九倫反。夏，叔彭生會晉卻缺于承匡。承匡，宋地。

○缺，苦悅反。

秋，曹伯來朝。○朝，直遙反。

公子遂如宋。

狄侵齊。

冬，十月，甲午，叔孫得臣敗狄于鹹。

不言帥師而言敗，何也？據僖元年「公子友帥師敗莒師于麗，獲莒拏」，<sup>②</sup>稱帥師。○敗，必邁反。鹹音咸。麗，力知反。拏，女居反。<sup>③</sup>直敗一人之辭也。一人而曰敗，何也？以衆焉言之也。言其力足以敵衆。

【疏】「直敗」至「言之也」。○釋曰：公子友與莒拏戰，唯二人相敵，亦是直敗一人，彼言帥師，此不言者，季子與莒拏並將軍衆而行之，雖決勝負，以其俱有徒衆，故經書帥師；今叔孫與魯之衆止敵一人，故但言敗，不言帥師也。

①「栗」，原作「栗」，阮校：「石經『栗』作『栗』，《釋文》出

「女栗」。按：當作「栗」。今據改。下同。

②「拏」，夏校：「僖元年經、傳均作『拏』。」

③「拏女居反」，《釋文》作「莒拏女居反」。

傳曰：長狄也，弟兄三人，佚宕中

國，<sup>①</sup>佚猶更也。○佚宕，<sup>②</sup>大結反，更也。害，本又作

宕。更音庚。瓦石不能害。肌膚堅強，瓦石打擲，不

能虧損。○強，其丈反。擲，直隻反。叔孫得臣，最

善射者也。射其目，身橫九畝。廣一步，長百

步，爲一畝。九畝，五丈四尺。○射其，食亦反，下注同。

廣，古曠反，直亮反。<sup>③</sup>

【疏】注「五丈四尺」。○釋曰：《春秋考異郵》

云：「兄弟三人各長百尺，別之國欲爲君。」何休云：

「長百尺。」范云「五丈四尺」者，讖緯之書，不可悉信。以

此傳云身橫九畝，故知是五丈四尺也。杜預注《左氏》云

「三丈」，唯約《國語》仲尼稱「僬僥長三尺」，大者不過數之

十，非經正文，故范所不信。注「高三尺三寸」。知者，《考

工記》云，兵車之廣「六尺有六寸」，又「以其廣之半爲之軾

崇」，是軾高從上而下，去車版三尺三寸，橫施一木，名之

曰軾也。

斷其首而載之，眉見於軾。兵車之軾高三

尺三寸。<sup>④</sup>○斷，丁管反。見，賢偏反。軾音式。

然則何爲不言獲也？據莒拏言獲。曰，

古者不重創，不禽二毛，故不言獲，爲內諱

也。不重創，恤病也。不禽二毛，敬老也。仁者造次必

於是，顛沛必於是，故爲內諱也。既射其目，又斷其首，爲

重創。鬢髮白爲二毛。○重，直用反，注同。創，初羊反。

爲內，于僞反。造，七報反。沛音貝。

【疏】「曰古」至「諱也」。○釋曰：或以《春秋》本

自不應書經，何諱之有？《穀梁》以不重創爲諱，其理非

也。今知不然者，以長狄兄弟更害中國，禍害爲深，得臣

能立功於一時，而標名於萬代，其庸大矣。若其不諱，何

以不書？且晉獲潞子，尚書於經，魯獲長狄，棄而不錄，

詳內畧外之義，豈其然哉？知內諱之言爲得其實也。

晉者也。

【疏】「其之」至「者也」。○釋曰：《公羊傳》

云：「兄弟三人，一者之齊，一者之魯，一者之晉。」何休

云：

①「宕」，阮校：「石經「宕」作「害」。」

②「佚宕」，《釋文》作「佚害」，是。

③「直亮反」上，《釋文》有「長百」二字。

④「三尺三寸」，原作「三尺二寸」，阮校：「監、毛本「二」

作「三」。案：「三」是。」今據改。

云：「之」三國各欲爲君，<sup>①</sup>象周衰，禮義廢。魯成就周道之國，<sup>②</sup>齊、晉霸者之後，<sup>③</sup>此三國爲後，欲見中國皆爲夷狄之行。」范雖不從何說，理亦無妨。○「未知其之晉者也」。○釋曰：之魯者，叔孫得臣殺之。之齊者，王子成父殺之。謂其之晉者，史傳不記，未知殺者姓名是誰也。

十有二年，春，王正月，邾伯來奔。○邾音成。

杞伯來朝。僖二十七年稱子，今稱伯，蓋時王所進。○朝，直遙反。

二月，庚子，子叔姬卒。其曰子叔姬，貴也，公之母姊妹也。同母姊妹。

【疏】「公之母姊妹也」。○釋曰：傳稱其曰子叔姬，貴之也，公之母姊妹也，則似稱子以明貴，是以錄其卒，未必由公之母姊妹。上下意乖者，上傳云公之母姊妹，解其稱子所由，明貴則書卒，賤乃不錄也；下傳云許嫁以卒之也，欲見其雖貴，非許嫁不書。上下二傳足成，非乖也。許嫁乃書卒者，以其即貴之漸故也。徐邈云：「上傳云子叔姬者，杞夫人見出，故不言杞。下傳云許嫁者，言是別女，非杞叔姬也。」理亦足通。未知范意然否？

其一傳曰：許嫁以卒之也。男子二十而冠，冠而列丈夫，三十而娶。女子十五

而許嫁，二十而嫁。禮：二十而冠，冠而在丈夫之列。譙周曰：「國不可久無儲貳，故天子諸侯十五而冠，十五而娶，娶必先冠，以夫婦之道，王教之本，不可以童子之道治之。禮：十五爲成童，以次成人。欲人君之早有繼體，故因以爲節。」《書》稱「成王十五而冠」，著在《金縢》。《周禮·媒氏》曰：「令男三十而娶，女二十而嫁。」

《內則》云：「女子十五而笄。」說曰：「許嫁也。」是故男自二十以及三十，女自十五以及二十，皆得以嫁娶，先是則速，後是則晚。凡人嫁娶，或以賢淑，或以方類，豈但年數而已。若必差十年乃爲夫婦，是廢賢淑方類，苟比年數而已，禮何爲然哉？則三十而娶，二十而嫁，說嫁娶之限，蓋不得復過此爾。故舜年三十無室，《書》稱曰齔。《周禮》云：女子年二十未有嫁者，「仲春之月，奔者不禁」。奔者，不待禮聘因媒請嫁而已矣。「甯謂禮爲夫之姊妹服長殤，年十九至十六。如此，男不必三十而娶，女不必二十而嫁明矣。此又士大夫之禮。」○冠，江喚反。娶，七住反。譙，在遙反。笄，古兮反。先是，蘇徧反。後是，戶豆反。比，毗至反，或如字。得復，扶又反。齔，古頑

①「之」，原無，阮校：「何校本『三』上有『之』字。案：有者是。」今據補。

②「國」，阮校：「《公羊》注『國』作『封』。」

③「者」，阮校：「《公羊》注『者』字作『尊周室』三字。」

反。禮爲，于僞反。長，丁丈反。

【疏】注「禮」至「之禮」。○釋曰：先儒多以

《周禮·媒氏》「三十之男，二十之女」限以年數，故范引譙周以爲證，下取《禮》文以爲早嫁之驗。或以賢淑者，若文王之娶大妣是也。或以方類者，《左傳》稱鄭世子忽云齊大非吾偶是也。此又士大夫之禮者，著《喪服》所言，<sup>①</sup>多陳士大夫之禮，猶不待二十，明諸侯以上早娶，禮在不疑也。案《尚書·金縢》無成王十五而冠，故彼鄭注云：

「天子諸侯十二而冠。」成王此年十五，於禮已冠而爵弁者，承天變故降服也。今譙周云「成王十五而冠，著在《金縢》者，先儒鄭玄之徒，約《大戴禮》，以爲文王崩之明年，成王始生。文王年十五生武王，文王九十七而終，則終時武王年八十三矣。崩之明年，武王年八十四也。武王九十三而終，則武王崩時，成王年十歲可知耳。周公攝政，必在除喪之後。是周公初攝政之時，成王年十二。《金縢》稱始欲攝政，即羣叔流言，周公居東二年，罪人斯得，乘前之年，是成王十四年。秋，始感大風之變，王與大夫盡弁，以啓《金縢》之書，是啓金縢時，成王年十五。又《書傳》云：「四年建侯衛。」則周公復居攝四年作《康誥》也。又《書傳》云：「天子年十八稱孟侯。」作《康誥》之時，成王稱孟侯，則成王年十八矣。周公居攝四年，成王十八年，自然啓金縢迎周公之時，成王十五，故譙周亦以啓金縢時爲成王年十五。《尚書》特云王與大夫盡弁，明則始冠之年，故云十五而冠，謂在《金縢》也。<sup>②</sup>鄭云「天子諸侯

十二而冠」者，約《左傳》魯襄公之年耳，更無正文可據，故亦不從。

夏，楚人圍巢。

秋，滕子來朝。

秦伯使術來聘。術，秦大夫。○術音述。

冬，十有二月，戊午，晉人、秦人戰于河

曲。河曲，晉地。不言及，秦、晉之戰已亟，故

畧之也。亟，數也。夫戰必有曲直，以一人主之，二國

戰鬪數，曲直不可得詳，故畧之，不言晉人及秦人戰。

○亟，去冀反，數也，注同。

【疏】「不言」至「畧之也」。○釋曰：七年「戰于

令狐」，十年「秦伐晉」，此年又戰河曲，是數也。

季孫行父帥師城諸及鄆。稱帥師，言

有難也。○難，乃旦反。

【疏】「言有難也」。○釋曰：凡城之志皆譏。今

①「著」，阮校：「何校本「著」作「謂」。今按：單疏本

同何校本。

②「謂」，阮校：「何校本「謂」作「著」。今按：單疏本

同何校本。

傳云有難，則似無譏者。傳本有難，不是解譏與不譏，直釋其帥師之意耳。但此城得時，<sup>①</sup>又畏莒爭鄆，書雖是譏，情義通許。故傳以有難釋之，不言譏之意也。

十有三年，春，王正月。

夏，五月，壬午，陳侯朔卒。

【疏】「陳侯朔卒」。○釋曰：《世本》是陳共公也。

邾子籛條卒。○籛，其居反。條，直居反。

【疏】「邾子籛條卒」。○釋曰：《左傳》是文公也。

自正月不雨，至于秋七月。

大室屋壞。屋者，主於覆蓋，明廟不都壞。○大音泰，傳皆同。大室屋壞者，有壞道也，譏

不脩也。大室猶世室也。世世有是室，故言世室。

【疏】「有壞道也」。○釋曰：高者有崩道，下者有壞道，既言有壞道，而書之者，譏不脩也。言魯若繕脩之，豈有敗壞之理？故書以譏不敬也。<sup>②</sup>成五年「梁山崩」，傳云「高者有崩道」。山有崩道，又不可繕脩之物，而亦書之者，刺人君無德而致天災，令山崩河壅，怪異之大，故亦書之。然山高稱崩，屋下言壞，而序稱禮壞樂崩，釋

云通言之者，以禮樂無高下之殊，故知通言之。

周公曰大廟，《爾雅》曰：「室有東西廂曰廟。」

伯禽曰大室，羣公曰宮。《爾雅》曰：「宮謂之室，室謂之宮。」然則其實一也，蓋尊伯禽而異其名。

【疏】注「爾雅」至「其名」。○釋曰：此下注所引並《爾雅·釋宮》之言，有東西廂者，謂有夾室也。傳知周公曰大廟，伯禽曰大室，羣公曰宮者，《禮記·明堂位》云「季夏六月，以禘禮祀周公于大廟」，哀三年「桓宮、僖宮災」，是周公稱大廟，羣公稱宮，此經別言大室，明是伯禽廟。《公羊傳》為世室，言世世不毀，世與大意亦同耳。

禮：宗廟之事，君親割，割牲。

【疏】「君親割」。○釋曰：徐邈云：《禮記》曰「君執鸞刀而割牲」是也。然彼據初殺牲之時，非是割牲之事，徐言非也。

夫人親舂，舂粢盛。敬之至也。為社稷之主，而先君之廟壞，極稱之，志不敬也。極稱言屋壞，不復依違其文。○復，扶又反。

冬，公如晉。

① 「但」，原作「得」，據宋刻元修本改。  
② 「敬」，單疏本作「修」。

衛侯會公于沓。沓，地也。○沓，徒答反。

狄侵衛。

十有二月，己丑，公及晉侯盟。還自

晉。還者，事未畢也。自晉，事畢也。

【疏】「還者」至「畢也」。○釋曰：知「自晉」是事

畢者，以其與致文同，故知是事畢。傳知「還」是事未畢者，以未至國都，而鄭伯會公于棐，故知是未畢。《春秋》上下書還者有四，莊八年「秋，師還」，傳曰：「還也。」今自晉爲事未畢而言，嫌不得如彼例，故復發傳。宣十八年「歸父還自晉」，嫌君臣異，故復發事未畢之文。襄十九年「晉士句帥師侵齊，聞齊侯卒，乃還」，嫌外內異，故亦復發傳云：「事未畢也。」還例有四，范《別例》云三者，蓋直據內爲三，不數外臣故也。

鄭伯會公于棐。棐，鄭地。○棐，芳匪反。

十有四年，春，王正月，公至自晉。

邾人伐我南鄙。

叔彭生帥師伐邾。

夏，五月，乙亥，齊侯潘卒。○潘，浦干反。

【疏】「齊侯潘卒」。○釋曰：《世家》及《世本》是

齊昭公也。

六月，公會宋公、陳侯、衛侯、鄭伯、許伯、曹伯、晉趙盾。癸酉，同盟于新城。新城，宋地。同者，有同也。同外楚也。

【疏】「同外楚也」。○釋曰：《春秋》書同盟非一，傳或有釋，亦有不釋，就不釋之內辭又不同。所以然者，莊公之世，二幽之盟，于時楚國未強，齊桓初霸，直取同尊周室而已，故傳云「同尊周也」。及邵陵首止之後，楚不敢與爭，褒大齊桓，故不復言同。當文公時，楚人強盛，而中國畏之。今同盟詳心外楚，③不復直能尊周室而已，故傳釋之云同外楚也。「斷道」書同，傳云：「外楚也。」則「清丘」亦是外楚，故傳省文也。舉斷道以包上下，則蟲牢、馬陵、蒲之與戚、柯陵、虛杙之類，亦是省文可知。同盟雖復發傳者，楚人轉盛，中國外之彌甚，故更發之，則戲盟及京城重丘之等，亦其義也。平丘又重發外楚之文者，平丘以下，中國微弱，外楚之事盡於平丘。從此以後，不復能外，故發傳以終之也。

秋，七月，有星孛入于北斗。孛之爲言

①「許伯」，阮校：「石經「許伯」作「許男」。」

②「後」，原作「徒」，據單疏本改。

③「今」，原作「命」，阮校：「監、毛本「命」作「今」，是也。」今據改。



猶弗也。其曰人北斗，斗有環域也。據字于大辰及東方皆不言人，此言人者，明斗有規郭，人其魁中也。劉向曰：「北斗貴星，人君之象也。弗星，亂臣之類，言邪亂之臣，將並弑其君。」○字，步內反。弗，李軌、扶憤反，徐邈扶勿反，一音步勿反，又音弗。邪，俄嗟反。弑音試。公至自會。

晉人納捷菑于邾，弗克納。是卻克也。其曰人，何也？微之也。何爲微之也？

長轂五百乘，綿地千里，長轂，兵車。四馬曰乘，一乘，甲士三人，步卒七十二人，五百乘，合三萬七千五百人。綿猶彌漫。○捷菑，在接反，下側其反。轂，古木反。乘，繩證反。卒，子忽反。

【疏】「微之也」。○釋曰：不言貶之者，以非專惡之稱，故傳言微之而已。

過宋、鄭、滕、薛，復入千乘之國，欲變人之主，復猶遠也。變人之主，謂時邾已立獲且。邾，小國，而言千乘者，大卻克之事。○復，況盛反。至城下，然後知，何知之晚也！征不廟筭，正其得失，勞而遠涉，乃至城下。邾以義拒，然後方悟，貶之曰人，不亦宜乎？○悟，五故反。弗克納，未伐而曰弗克

何也？弗克其義也。非力不足，義不可勝。捷菑，晉出也。獲且，齊出也。姊妹之子曰出。獲且，正也。捷菑，不正也。正，適。○適，丁歷反。九月，甲申，公孫敖卒于齊。奔大夫不言卒，而言卒何也？據閔二年「公子慶父出奔莒」，後不言卒。爲受其喪，不可不卒也。其地，於外也。成十七年「公孫嬰齊卒于狸蜃」，傳曰：「其地，未踰竟。」宣八年「仲遂卒于垂」，垂，齊地。然則地，或踰竟，或未踰竟。凡大夫卒，在常所則不地，地者皆非其常所，隨其所在而書其地耳，不孫於踰竟與不踰竟。○爲，于僞反。狸，力之反。蜃，市軫反。竟音境，並同。

【疏】「其地於外也」。○釋曰：此與公孫嬰齊卒于狸蜃，傳皆釋之。宣八年「仲遂卒于垂」，②而傳不釋者，此公孫敖卒于齊之國內，故傳釋之曰「其地，於外也」，明在他國而卒。公孫嬰齊卒在魯竟內，故傳釋之曰「其地，未踰竟」，明非他國也。二者既已發傳，垂是齊地，非是他國都，又非魯竟內，在兩端之間，故不復釋之。

① 「孫」，《春秋穀梁傳》作「係」。

② 「宣八年」，原作「宣十年」，今據單疏本及范注、阮校改。

齊公子商人弑其君舍。舍未踰年，其曰君何也？成舍之爲君，所以重商人之弑也。舍不成君，則殺者非弑也。○殺其，音試，本又作弑。商人其不以國氏何也？據隱四年，衛州吁弑其君完，<sup>①</sup>不言公子。不以嫌代嫌也。《春秋》以正治不正，不以亂平亂。舍不宜立，有不正之嫌。商人專權，有當國之嫌，故不書國氏，明不以嫌相代。

【疏】「不以嫌代嫌也」。○釋曰：《左氏》以舍是昭公之子，夫人叔姬所生，而范云舍不宜立，有不正之嫌，以傳云不以嫌代嫌，明知舍不正。又舍卒不日，亦是非正之驗。

舍之不日，何也？未成爲君也。

【疏】「舍之」至「君也」。○釋曰：傳例：凡弑君，書日以明正，不繫於成君。若舍是庶，成君亦不合書日。而云未成君者，《春秋》不正見者，雖庶亦得書日，即齊侯小白、鄭伯突是也。今商人爲不欲以嫌代嫌，<sup>②</sup>故不去公子，則舍不正之嫌，前已著見。不正已見，例當書日，爲未成君，故不日耳。

宋子哀來奔。其曰子哀，失之也。言失其氏族，不知何人。

【疏】「失之也」。○釋曰：經言宋子哀，傳云失

之也者，舊解：失之者，謂其未達稱子之意。案范注云「言失其氏族不知何人」，<sup>③</sup>則不得云失其稱子之意。蓋失之者，謂雖知子哀是宋之大夫，但不知是何族姓也。

冬，單伯如齊。單伯，魯大夫。○單音善。

齊人執單伯。私罪也。單伯淫于齊，齊人執之。

齊人執子叔姬。叔姬同罪也。

【疏】「叔姬同罪也」。○釋曰：叔姬既與單伯同罪，而經文異執者，單伯是天子命大夫，魯人遣送叔姬，未至而與之淫。王則闇於取人之術，魯則失於遣使之宜，故經不書叔姬歸于齊。再舉齊執之文者，使若異罪然，所以爲諱也。明年書「單伯至自齊」，亦是諱之事耳。《公羊》亦以爲「不言齊人執單伯及子叔姬」者，「內辭也，使若異罪然」。《左氏》則云單伯天子大夫，爲魯「請叔姬」，非

①「州吁弑其君完」，宋刻元修本「州」作「祝」。阮校：

「何校本「州」作「祝」，是也。《釋文》出「殺其」，云：

本又作弑。」

②「爲」，單疏本作「是」。

③「氏族」，原無，阮校云何校本「言失其」下有「氏族」二字。今據上注文及何校本補。

《穀梁》意也。

十有五年，春，季孫行父如晉。

三月，宋司馬華孫來盟。泰曰：「擅權專國，不君其君，緣其不臣，因曰無君。上司馬，司城皆不名，而此獨名者，以華孫奉使出盟，為好於我，故書官以見專，錄名以存善。」○華，戶化反。使，所吏反。好，呼報反。以見，賢徧反。

【疏】「泰曰」至「存善」。○釋曰：外大夫來盟書名，則是常事。而云錄名以存善者，華孫擅權專國，理合變文，今得錄名，即是同於常使。失常為惡，則得常是善，猶《左氏》稱「公子翬如齊逆女，脩先君之好，故曰公子」，亦其類也。華孫奉使不稱使者，以其專，故經書官以表之。傳云無君之辭也，既無君無臣，故不得使也。

司馬，官也。其以官稱，無君之辭也。來盟者何？前定也。不言及者，以國與之也。○稱，尺證反，年末注同。

【疏】「前定也」。○釋曰：重發傳者，不稱使，嫌異常故也。「鼓，用牲于社」，莊二十五年傳稱「鼓，禮也」。鼓既是禮，所以書之者，鼓當於朝，今用之於社，鼓雖得禮，用之失處，故書也。若然，後亦鼓之於社，而云禮者，彼對用牲為非禮，故云「鼓，禮也」。其實用鼓亦非其處，若得其處，經不當書耳。

夏，曹伯來朝。○朝，直遙反。

齊人歸公孫敖之喪。

六月，辛丑朔，日有食之，鼓，用牲于社。

單伯至自齊。大夫執則致，致則名，此其不名何也？據昭十四年「意如至自晉」稱名。天子之命大夫也。

晉卻缺帥師伐蔡。戊申，入蔡。

【疏】「晉卻」至「入蔡」。○釋曰：伐人兩舉者，伐而不即入，故兩舉之也。莊二十八年伐戰兩舉者，初伐其竟內，戰在國都，故亦兩舉之也。

秋，齊人侵我西鄙。其曰鄙，遠之也。其遠之何也？不以難介我國也。介猶近也。

○難，乃旦反。介音界，注同。

【疏】「其曰鄙遠之也」。○釋曰：重發傳者，以莊十九年三國「伐我」，今齊人獨來，嫌異，故重明之。

季孫行父如晉。

冬，十有一月，諸侯盟于扈。諸侯皆會，而公獨不與，故恥而畧之。

【疏】注「諸侯」至「畧之」。○釋曰：舊解：公獨不與者，謂七年扈之盟公不得與，故畧言諸侯。此與十七年公雖與會，諱前不與，故亦畧之。其意解公獨不與，謂七年時也。今以爲公獨不與，正謂此年公在不與，故言公會諸侯。今此會盟，公全不往，故直言諸侯盟于扈而已，皆所以爲諱也。

十有二月，齊人來歸子叔姬。其曰子叔姬，貴之也。其言來歸，何也？父母之

於子，雖有罪，猶欲其免也。凱曰：「書來歸，是見出之辭。有罪之人，猶與貴稱，書之曰子者，蓋父母之恩，欲免罪也。」

【疏】「其曰」至「免也」。○釋曰：來歸者，是彰罪之稱。而云父母之於子欲其免也者，稱子是尊貴之辭，雖云來歸，以貴辭言之，非是有罪之稱，故云欲其免也。

齊侯侵我西鄙，遂伐曹，入其郭。郭，郭，郭，芳俘反。

【疏】「入其郭」。○釋曰：《公羊傳》云：「郭者何？郭也。」此不發傳者，《春秋》唯有此事而已，非例所及，故畧之也。

十有六年，春，季孫行父會齊侯于陽穀。齊侯弗及盟。弗及者，內辭也。行父

失命矣，齊得內辭也。行父出會失辭，義無可納，故齊侯以正道拒而弗受，不盟由齊，故得內辭。

【疏】注「行父」至「內辭」。○釋曰：以行父失辭之故，爲齊侯所非，外得其所拒，內失其志，《春秋》惡行父之失命，故得內辭也。

夏，五月，公四不視朔。天子告朔于諸侯，諸侯受乎禰廟，禮也。每月，天子以朔政班于諸侯，諸侯受而納之禰廟，告廟以羊。今公自二月不視朔，至于五月，是後視朔之禮遂廢，故子貢欲去其羊。○去，起呂反。

【疏】注「每月」至「其羊」。○釋曰：《三朝記》云：周衰，天子不班朔于天下。此云班朔者，彼據周末全不能班之，此時尚或班，或不班，故下傳云「以公爲厭政以甚矣」。范云天子班朔而公不視是也。知是二月不視朔至五月者，以經書「五月，公四不視朔」。若從五月以後數之，則公或視或不視，何得預言四不視朔？知從二月至五月爲四也。又云是後視朔之禮遂廢，而經直云公四不視朔者，《左氏》以爲此獨書公四不視朔者，以表公實有疾，非詐齊也。《公羊》爲此公有疾猶可言，<sup>①</sup>無疾則不可言。《穀梁》文雖不明，蓋從此一譏之惡，足見其餘不復譏

①「爲」，阮校：「監、毛本『爲』作『謂』。」

也。

公四不視朔，公不臣也，以公爲厭政以

甚矣。天子班朔而公不視，是不臣。○厭，於豔反。

六月，戊辰，公子遂及齊侯盟于師丘。

師丘，齊地。○師丘，《左氏》作鄆丘，《公羊》作犀丘。復

行父之盟也。春，齊侯不與行父盟，故復使遂脩之。

○復行，扶又反。又音服，注「復使」及下注「而復」皆同。

秋，八月，辛未，夫人姜氏薨。僖公夫人。

毀泉臺。喪不貳事，貳事，緩喪也，喪事

主哀，而復毀泉臺，是以喪爲緩。以文爲多失道矣。

緩作主，躋僖公，四不視朔，毀泉臺之類。

【疏】「以文」至「道矣」。○釋曰：《春秋》爲尊親

者諱，而舉其多失道者，仲尼之脩《春秋》，所以示法，有罪皆諱，何以見其褒貶？故桓公殺逆之主，罪無遺漏，亦其比也。至於書經，文不委曲，<sup>①</sup>則亦是諱，何者？文實逆祀，而云躋僖，文從後多不視朔，直言四不視朔而已，文稱毀泉臺，則似嫌其奢泰，是亦臣子爲尊親諱之義也。然取二邑、大室屋壞、不與扈盟，亦是失道，注不言之者，云云之類，足以包之也。《公羊》以爲泉臺者，是莊公所築郎臺也。《左氏》與此傳並不顯言，或如《公羊》之說也。

自古爲之，今毀之，不如勿處而已矣。

若以夫人居之而薨者，但當莫處。

楚人、秦人、巴人滅庸。

冬，十有一月，宋人弑其君杵臼。泰曰：

傳稱人者，衆辭。衆之所同，則君過可知。又曰：稱國以弑其君，君惡甚矣。然則舉國重於書人也。○杵，昌呂反。臼，其九反。

【疏】注「泰曰」至「人也」。○釋曰：稱人衆辭，

莊十七年傳文。「稱國以弑其君，君惡甚矣」，成十八年傳文。

十有七年，春，晉人、衛人、陳人、鄭人

伐宋。衛序陳上，蓋主會者降之。

夏，四月，癸亥，葬我小君聲姜。

齊侯伐我西鄙。

六月，癸未，公及齊侯盟于穀。

諸侯會于扈。言諸侯者，義與上十五年同。

○范云「言諸侯者，義與上十五年同」，亦諸侯皆會，公獨不與，恥而畧之。

【疏】注「言諸」至「年同」。○釋曰：彼爲公不會

①「不」，《穀梁補注》作「辭」。

畧言諸侯，則此亦然也。

秋，公至自穀。

冬，公子遂如齊。

十有八年，春，王二月，丁丑，公薨于臺下。臺下，非正也。

【疏】「臺下非正也」。○釋曰：非正與僖同。重發之者，僖是小寢，此則臺下，嫌異，故發之。

秦伯罃卒。○罃，乙耕反。

夏，五月，戊戌，齊人弑其君商人。

六月，癸酉，葬我君文公。

秋，公子遂、叔孫得臣如齊。使舉上客，而不稱介，不正其同倫而相介，故列而數之也。上客，耳主也。①禮：大夫為卿介。遂與得臣俱為卿，是以同倫為副使，故兩言之，明無差降。○使舉，所吏反，注同。介音界，下同，副使也。數，所主反。

【疏】注「禮大夫為卿介」。○釋曰：《聘禮》「卿出，以大夫為上介，士為末介」是也。

冬，十月，子卒。子赤也。諸侯在喪，既葬之稱。

【疏】注「子赤」至「之稱」。○釋曰：《公羊傳》稱

君薨稱子某，既葬稱子，踰年稱君。今子赤，文公既葬而云子卒，是既葬之稱也。

子卒不日，故也。故，殺也。不稱殺，諱也。

夫人姜氏歸于齊。惡宣公也。姜氏，子赤之母，其子被殺，故大歸也。宣公亦文公之子，其母敬嬴，惡不奉姜氏。○惡，烏路反，注同。嬴音盈，依《左傳》應作項熊。

【疏】「惡宣公也」。○釋曰：注並言敬嬴者，注意欲明宣公是敬嬴所生，是非惡敬嬴也。舊解：宣公不使其母奉養姜氏，故言之。禮亦通也。②

有不待貶絕而罪惡見者，泰曰：直書姜氏之歸，則宣公罪惡不貶而自見。有待貶絕而惡從之者。齊小白以國氏之類是也。侄娣者，不孤子之意也，言其一人有子則共養。○侄，大結反。娣音弟。共養，並如字，一讀上九用反，下餘亮反。一人有子，三人緩帶。共望其祿。

【疏】「侄娣」至「緩帶」。○釋曰：上文直云侄娣者，所以分別尊卑，明夫人須媵妾之意。下文總言緩帶

①「耳」，阮校：「監、毛本「耳」作「聘」。」

②「禮」，單疏本及《穀梁補注》所引作「理」。

者，欲見有子則喜樂之情均，貴賤之意等。今宣公爲人君，不尊養姜氏，非緩帶之謂也。緩帶者，優遊之稱也。

一曰就賢也。若並有子，則就其賢，謂年同也。宣公不奉哀姜，非此之謂，故惡之。

【疏】注「若並」至「惡之」。○釋曰：宣以庶子篡立，非關就賢。范云「宣不能奉養哀姜」，則是非賢之事，故云非此之謂也。

### 季孫行父如齊。

莒弑其君庶其。傳例曰：「稱國以弑其君，君惡甚矣。」

【疏】注「傳例」至「甚矣」。○釋曰：注引傳例者，嫌小國無大夫，例不稱臣名，明弑逆事重，不從凡常大夫之例也。舊解，稱國者，謂惡於國人，并虐及卿大夫，稱人者，謂失心於民庶也。此乃涉於賈逵之說，據十六年范注則似不然。

# 監本春秋穀梁注疏宣公卷第十二

起元年，終十八年

范甯集解 楊士勛疏

## 宣公

【疏】《魯世家》：宣公名倭，文公之子，子赤庶兄。以周匡王五年即位。《謚法》：「善問周達曰宣。」

元年，春，王正月，公即位。繼故而言即位，與聞乎故也。○與聞，音豫，下注亦同。

【疏】「繼故」至「故也」。○釋曰：重發傳者，桓公篡成君，宣公篡未踰年君，嫌異，故發之。

公子遂如齊逆女。不譏喪娶者，不待貶絕，而罪惡自見。桓三年傳曰：「逆女，親者也。使大夫，非正也。」○自見，賢徧反。

【疏】注「桓三」至「正也」。○釋曰：引彼傳例者，嫌譏喪娶，不責親迎，故引傳例以明之。

三月，遂以夫人婦姜至自齊。其不言氏，喪未畢，故畧之也。夫人不能以禮自固，故與

有貶。

【疏】注「夫人」至「有貶」。○釋曰：婚禮遲速，由於夫家，陽倡陰和，固是其理，<sup>①</sup>而責夫人者，一禮不備，貞女不行，夫人姜氏若其不行，公得無喪娶之譏，夫人無苟從之咎，故責之。

其曰婦，緣姑言之之辭也。遂之挈，由上致之也。上，謂宣公。○挈，苦結反。

【疏】「其曰」至「辭也」。○釋曰：傳重言此者，嫌喪娶辭畧，並明不與陳人之婦同也。○「遂之」至「之也」。○釋曰：挈者，謂去氏族而直書名。徐邈以挈爲舉，非也。《左氏》以爲遂不稱公子者，「尊夫人也」。《公羊》以爲遂不言公子者，「一事而再見」，從省文。此傳云「由上致之」，是與二傳異也。此注云，上謂宣公，昭公二十四年「媾至自晉」，注云「上謂宗廟也」者，釋有二家，其一云：禮，夫人三月始見宗廟，遂與僑如之致由君而已，故知上爲宣公、成公也；媾被執而反，理當告廟，故知上謂宗廟也。又一釋：二者互文也，以相通。見廟之時，君稱臣之名以告宗廟，則二者皆當書名，故此云宣公，彼云宗廟，亦是昭公告之，可知此宣公亦是告宗廟明矣。

①「理」，阮校：「何校本「理」作「禮」。今按：單疏本同何校本。



媾與意如俱爲被執而致，傳釋有異辭者，意如訴公於晉，媾則無罪，故傳不同也。此已發傳，僑如又發之者，此喪娶，彼非喪娶，嫌異，故重明之。

夏，季孫行父如齊。

晉放其大夫胥甲父于衛。放，猶屏也。

屏，除。稱國以放，放無罪也。

公會齊侯于平州。平州，齊地，離會故不致。

【疏】「稱國」至「罪也」。① ○釋曰：范《別例》

云：「放大夫凡有三，晉放胥甲父一，昭八年楚放公子招二，②哀三年蔡人放公孫獵三也。」③此云稱國以放，放無罪也，則稱蔡人者，是放有罪也。若然，招殺世子偃師，則招亦有罪，不稱楚人者，以上有楚師滅陳之文，故不復出楚人；又招有罪自明，故不待更稱楚人也。○注「離會故不致」。○釋曰：④不引傳例者，此宣自應例惡，無所嫌疑故也。○傳「內不」至「齊也」。○釋曰：⑤昭二十五年「齊侯取鄆」，傳曰：「取，易辭也。」哀八年「齊人取謹及闡」，傳曰：「惡內也。」所以三發傳不同者，內不合言取，今言取，是違例之問，宜在於始，魯人不得已而賂之，取雖是易而我難之，故直云授之。昭公，失國之君，忠臣喜公得邑，故以易辭言之。哀公犯齊陵邾，而反喪邑，易辭之也，傳以明惡內之理未顯，故傳特言惡內，其實皆是易辭也。

公子遂如齊。

六月，齊人取濟西田。內不言取，言

取，授之也，以是爲賂齊也。宣公弑立，⑥賂齊以

自輔，恥賂之，故書齊取。

秋，邾子來朝。

① 此段疏文各本多不同，阮校：「何校本上有『傳』字。」

又此下疏三條，此本並爲一條，在注「故不致」下，閩、監、毛本分屬三節：此疏在傳「放無罪也」下，「離會故不致」段在注「故不致」下，「內不至齊也」段在注「故書齊取」下。」

② 「公子招」，原作「公子昭」，單疏本作「公子招」。今按：昭公八年「陳侯之弟招殺陳世子偃師」，「冬，十月，壬午，楚師滅陳，執陳公子招，放之于越」，皆曰「招」，則此「公子昭」之「昭」當爲「招」之訛。今據改。上「三」字，原作「二」，據單疏本改。

③ ○釋曰，原無，今據例補。

④ 「傳內不至齊也」○釋曰，原作「傳內不至齊也」，今據例補疏文標誌「○」和「○釋曰」。

⑤ 「宣公弑立」，原作「公宣弑入」，阮校：「監、毛本作『宣公弑立』，《釋文》出『宣弑』。」今據改。

楚子、鄭人侵陳，遂侵宋。遂，繼事也。

晉趙盾帥師救陳。善救陳也。○盾，徒本反。

【疏】「善救陳也」。○釋曰：何嫌非善而言善者，陳近楚，屬晉，嫌救之非善，故傳釋之。又救之者爲善，所以駁鄭之過也。

宋公、陳侯、衛侯、曹伯會晉師于棗林，

伐鄭。棗林，鄭地。○棗，芳尾反。又音匪。列數諸

侯而會晉趙盾，大趙盾之事也。大其衛中國，攘

夷狄。○數，所主反。攘，而羊反。其曰師，何也？

據言會晉師，不言會晉趙盾。以其大之也。以諸侯

大趙盾之事，故言師。師者，衆大之辭。

【疏】「以其大之也」。○釋曰：襄二年「晉師、宋

師、衛甯殖侵鄭」，注云：「不書晉宋之將，以慢其伐人之

喪。」彼稱師，言惡晉宋，此稱師，云大之者，稱師之義，不

在一方，言師雖同，善惡有別，所謂《春秋》不嫌同文，此之

謂也。齊救邢，惡不及事；楚子滅蔡，滅非其罪；晉宋

伐喪，失匍匐之義，故皆貶之稱師。今趙盾伐鄭，以救陳

宋，故經列數諸侯而殊大之，明稱師者，以著善也。

于棗林，地而後伐鄭，疑辭也。此其

地何？則著其美也。泰曰：「夫救災恤患，其道

宜速，而方云會于棗林，然後伐鄭，狀似伐鄭有疑，須會乃

定。曰：非也，欲美趙盾之功，故詳錄其會地。」

【疏】「于棗」至「美也」。○釋曰：桓十五年「公

會諸侯于棗，伐鄭」，傳曰：「地而後伐，疑辭也。非其疑

也。」此傳既曰「疑辭也」，又云「則著其美也」者，此文雖與

會襄同，其理則異。何者？以其列數諸侯而會趙盾，則

詳其會地，亦善可知也。

冬，晉趙穿帥師侵崇。○穿音川。

晉人、宋人伐鄭。伐鄭，所以救宋也。

時楚、鄭侵宋。

【疏】「所以救宋也」。○釋曰：伐鄭所以救宋，

經不言救宋者，以上有「楚子、鄭人侵陳，遂侵宋」之文，今

云「晉人、宋人伐鄭」，明救宋可知，故不言之也。知非救

陳者，以救陳之文已見。故楚伐宋，宋得出而自救者，伐

宋者不攻都城，故得出師助晉也。

二年，春，王二月，壬子，宋華元帥師及

鄭公子歸生帥師，戰于大棘。宋師敗績，獲

宋華元。大棘，宋地。○華，戶化反。獲者，不與

之辭也。華元得衆，甚賢，故不與鄭獲之。

①「伐鄭」，王引之《經義述聞》：「『伐』下不當有『鄭』字。」

【疏】注「華元」至「獲之」。○釋曰：華元得衆，故不與鄭獲之。然則晉侯失民，亦言獲者，晉侯雖失衆，諸侯無相獲之道，故亦不與秦獲也。徐邈云：「獲是不與之辭，與者當稱得也。故定九年『得寶玉、大弓』是也。」然則弓、玉與人不類，徐言非也。何休云：「華元繫宋者，明恥辱及國。」案齊國書、陳夏齧皆繫國，則是史之常辭，非有異文也。

言盡其衆，以救其將也。先言敗績，而後言獲，知華元得衆心，軍敗而後見獲。晉與秦戰于韓，未言敗績而君已獲，知晉侯不得衆心明矣。○盡，子忍反。

以三軍敵華元，華元雖獲，不病矣。何休曰：「書獲，皆生獲也。如欲不病華元，當有變文。」鄭君釋之曰：「將帥見獲，師敗可知，不當復書師敗績。此兩書之者，明宋師懼華元見獲，皆竭力以救之，無奈不勝敵耳。華元有賢行，得衆如是，雖師敗身獲，適明其美，不傷賢行。今兩書敗獲，非變文如何？」

### 秦師伐晉。

夏，晉人、宋人、衛人、陳人侵鄭。

秋，九月，乙丑，晉趙盾弑其君夷臯。穿弑也，穿，趙盾從父昆弟。盾不弑，而曰盾弑，何也？以罪盾也。其以罪盾何也？曰：

靈公朝諸大夫而暴彈之，暴，殘暴。○朝，直遙反。彈，徒丹反，又徒旦反。觀其辟丸也。趙盾入諫，不聽。出亡，至於郊。禮：三諫不聽，則去，待放於竟三年。君賜之環，則還；賜之玦，則往。必三年者，古疑獄三年而後斷，《易》曰「繼用徽纆，示于叢棘」，三歲不得，凶」是也。自嫌有辜當誅，故三年不敢去。○辟音避，竟音境。玦，古穴反，杜元凱云：「如環而不連。」斷，丁亂反。徽，許歸反。纆，亡北反。徽纆皆繩也，三股曰徽，兩股曰纆。

【疏】注「禮三」至「敢去」。○釋曰：「三諫不聽則去，待放於竟三年」，《公羊傳》文。「君賜之環則還，賜之玦則往」，荀卿書有其事。《易》曰「繼用徽纆，示于叢棘，三歲不得，凶」者，《易·坎卦》上六爻辭，但《易》本「繼」作「係」。陸德明云：「真，置也。」王弼云：「險陷之極，不可升也。法峻整，難可犯也。宜其囚執真于思過之地三歲，險道之夷也，險終乃反，故三歲不得。自修

- ①「示」，《十三經注疏》本《周易》作「真」。阮校：「《釋文》：真，劉作『示』，子夏傳作『是』，姚作『寔』，張作『置』。」
- ②「法峻整」，單疏本及《周易》王弼注作「嚴法峻整」。阮校：「何校本上有『嚴』字。」

三歲，乃可以求復，故曰三歲不得，凶也。」馬融云：「徽纆，索也。」陸德明云：①「三糾繩曰徽，二糾繩曰纆。」劉表云：「三股爲徽，兩股爲纆。」

趙穿弑公，而後反趙盾。招使還。史狐

書賊曰：「趙盾弑公。」史，國史，掌書記事。狐，

其名。盾曰：「天乎！天乎！予無罪。」告

天，言己無弑君之罪。孰爲盾而忍弑其君者

乎？「迴己易他，誰作盾而當忍弑君者乎？」○孰爲盾，

絕句。孰，誰也。史狐曰：「子爲正卿，人諫不

聽，出亡不遠。君弑，反不討賊，則志同，志

同穿也。志同則書重，非子而誰？」盾是正卿，又

賢，故言重。故書之曰「晉趙盾弑其君夷臯」

者，過在下也。鄭嗣曰：成十八年「晉弑其君州

蒲」，傳曰：「稱國以弑其君，君惡甚矣。」然則稱臣以弑，

罪在臣下也。趙盾弑其君，不言罪而曰過者，言非盾親

弑，有不討賊之過。○惡甚，如字，又烏路反。曰：

於盾也，見忠臣之至；於許世子止，見孝

子之至。邵曰：「盾以亡不出竟，反不討賊，受弑君之

罪，忠不至故也。止以病，②不知嘗藥，受弑父之罪，孝不

至故也。」○見忠，賢徧反，或如字，下同。

【疏】「曰於」至「之至」。○釋曰：趙盾與許止加

弑是同，而許君書葬，晉靈公不書葬者，許止失嘗藥之罪

輕，故書葬以赦止；趙盾不討賊之罪重，故不書晉侯葬，

明盾罪不可原也。《春秋》必加弑於此二人者，所以見忠

孝之至故也。忠孝不至，則加惡名，欲使忠臣睹之，不敢

惜力，孝子見之，所以盡心，是將來之遠防也。

冬，十月，乙亥，天王崩。匡王也。

三年，春，王正月，郊牛之口傷。之口，

緩辭也，傷自牛作也。牛自傷口，非備災之道不至

也，故以緩辭言之。

【疏】「緩辭也」。○釋曰：此「之」爲緩辭，則成

七年不言「之」爲急辭也。舊解，范氏《別例》云凡三十五，

范既總爲例，則言「之」者，並是緩辭也。傳於執衛侯云，

言「之」，「緩辭」也，則云其餘不發，亦緩可知耳。公喪在

外，逆之緩也；衛侯之弟鱣、秦伯之弟鍼等稱「之」者，取

其緩之得逃；吳敗六國亡之者，③取其六國同役，而不急

於軍事也；殺奚齊稱「之」者，緩於成君也；考仲子宮

①「德」，原作「得」，據宋刻元修本、單疏本改。

②「病」，阮校：「何校本『病』上有『父』。」

③「亡」，單疏本作「云」。阮校：「閩、監、毛本『亡』作

「言」，何校本作「云」。」

言「之」者，隱孫而脩之緩也；日食言「之」者，不知之緩也。則自餘並緩耳。理雖迂延，<sup>①</sup>舊說既然，不可致詰，故今亦從之。

改卜牛。牛死，乃不郊。事之變也。牛

無故自傷其口，易牛改卜，復死，乃廢郊禮，此事之變異。○復，扶又反。

【疏】「改卜」至「變也」。○釋曰：《公羊傳》稱改

卜者，帝牲不吉，則引稷牲而卜之。其帝牲在於滌宮三月。於稷者，唯具視其身體無災而已，不特養於滌宮。又云：郊「必以其祖配」者，「自內出者，無匹不行，自外至者，無主不止」。今改卜者，取於稷牛，則未審傳意如何。以后稷配郊，必與《公羊》異也。不言免牛，而云不郊者，牛死，不行免牛之禮，故直言不郊也。

乃者，亡乎人之辭也。譏宣公不恭，致天變。

【疏】「乃者」至「辭也」。○釋曰：重發傳者，嫌牛死與卜郊不從異也。<sup>②</sup>

猶三望。

葬匡王。

楚子伐陸渾戎。○渾，戶門反，又戶困反。

夏，楚人侵鄭。

秋，赤狄侵齊。

宋師圍曹。

冬，十月，丙戌，鄭伯蘭卒。

葬鄭穆公。

四年，春，王正月，公及齊侯平莒及邾。

莒人不肯。及者，內為志焉爾。平者，成

也。不肯者，可以肯也。凱曰：「君子不念舊惡，

況為大國所和平！」○邾音談，國名也。

【疏】「平者成也」。○釋曰：舊解，以莒不肯平，

公伐莒取向，莒人彌復怨邾，邾之與莒，方為怨惡，乃是成就亂事，故訓之為成。注無此意，恐非也。

公伐莒，取向。向，莒邑。○向，書亮反。伐

猶可，取向，甚矣。以義兵討不平，未若不用兵以義使平者也，故曰猶可也。

【疏】注「以義」至「可也」。○釋曰：傳稱伐猶可，是非正與辭。注云義兵者，據其討不直，故云義兵也。義兵之道不足，故傳云猶可也。

① 「迂延」，單疏本作「迂誕」。阮校：「何校本「迂延」作

「迂誕」，是也。閩、監、毛本「迂」作「遷」。

② 「與」，阮校：「單疏本「與」作「于」。」

莒人辭不受治也。乘義取邑，所以不服。伐

莒，義兵也。討不釋怨。取向，非也，乘義而爲

利也。○爲，如字，又于僞反。

秦伯稻卒。

【疏】「秦伯稻卒」。○釋曰：《世本》：秦共公

也。

夏，六月，乙酉，鄭公子歸生弑其君夷。

赤狄侵齊。

秋，公如齊。公至自齊。

冬，楚子伐鄭。

五年，春，公如齊。

夏，公至自齊。

秋，九月，齊高固來逆子叔姬。諸侯之

嫁子於大夫，主大夫以與之。婚禮：主人設几

筵于廟，以待迎者。諸侯、大夫尊卑不敵，故使大夫爲之

主。○迎，魚敬反。來者，接內也。不正其接

內，故不與夫婦之稱也。來者，謂高固。高固，齊

之大夫，而今與君接婚姻之禮，故不言逆女。○稱，尺證

反。

【疏】「諸侯」至「稱也」。○釋曰：莒慶已發傳，

今重發之者，莒慶，小國之大夫，高固，齊之尊卿，而取公之同母姊妹，嫌待之禮殊，故發傳，明其不異也。徐邈云：「傳言吾子，是宣公女也。」理亦通爾。①

叔孫得臣卒。

冬，齊高固及子叔姬來。及者，及吾子

叔姬也。爲使來者，不使得歸之意也。高固

受使來聘，而與婦俱歸，故書及以明非禮。莊二十七年冬

「杞伯姬來」，僖二十八年秋「杞伯姬來」，皆不言所及，是

使得歸之意。○受使，所吏反。

【疏】「叔孫得臣卒」。○釋曰：隱元年傳曰：

「大夫不日卒，惡也。」今叔孫得臣不日卒，亦惡可知矣。

何休云：「知公子遂弑君，而匿情不言。」未審范意亦然

以否。○「及者」至「姬也」。○釋曰：經既言高固及子

叔姬，足自明矣，傳何須更言及吾子叔姬也者，傳方欲解

及爲非禮，故上張其文也。○注「故書」至「非禮」。

② 釋曰：桓十八年灋之會，去及爲非禮，此書及爲非禮

① 「理亦通爾」，單疏本「爾」作「耳」。阮校：「何校本

「爾」作「耳」。按：毛本「理」作「禮」。

② 「傳」，《穀梁補注》作「以」。

者，公與夫人之行，須言及以別尊卑，故云及。夫人姜氏會齊侯於陽穀言及，灤之會以夫人之伉不言及，故知云及爲非禮。<sup>①</sup>今叔姬歸寧，當以獨來爲文，高固奉命，宜云來聘，經總之言來，故故書及爲非禮。<sup>②</sup>

### 楚人伐鄭。

六年，春，晉趙盾、衛孫免侵陳。此帥師也，其不言帥師，何也？據元年「趙盾帥師救陳」言帥師也。不正其敗前事，故不與帥師也。元年救，而今更侵之。

【疏】「不正」至「帥也」。

○釋曰：傳例：「將卑師衆曰師，將尊師少直言將。」<sup>③</sup>成三年，「晉郤克、衛孫良夫伐牆咎如」，彼非是敗前事，亦不言帥師。此云不正其敗前事，故不與帥師者，凡常書，經自依將之尊卑師之多少之例。趙盾元年稱「帥師救陳」，今直言名而已，明是惡敗前事，故不與帥師也。郤克、良夫，前無帥師之文，故知從將尊師少例耳。

### 夏，四月。

秋，八月，螽。

○螽音終。

### 冬，十月。

七年，春，衛侯使孫良夫來盟。來盟，前定也。不言及者，以國與之。不言其人，

亦以國與之。不日，前定之盟不日。

夏，公會齊侯伐萊。○萊音來，國名。

【疏】「來盟」至「不日」。○釋曰：此重發傳者，

宋華孫不稱使，此則稱使，嫌異，故重發之。言不日者，據成三年及荀庚盟有日，故發問也。

秋，公至自伐萊。大旱。

冬，公會晉侯、宋公、衛侯、鄭伯、曹伯

于黑壤。黑壤，某地。○壤，人丈反。

八年，春，公至自會。

夏，六月，公子遂如齊，至黃乃復。蓋有疾而還。黃，齊地。

【疏】「蓋有疾而還」。○釋曰：以下有卒，故知有疾也。

①「云」，阮校：「監、毛本『云』作『去』。」今按：單疏本同監、毛本。

②「故故」，阮校：「閩、監、毛本『故』字不重。案：此本刪改，下『故』當依何校本作『知』。」

③「直言」，阮校：「單疏本無『直』字。按：無『直』字是也。《公羊》隱五年傳『言』作『稱』。」

乃者，亡乎人之辭也。鄭嗣曰：「大夫受命而出，雖死，以尸將事。今遂以疾而還，失禮違命，故曰亡乎人，言魯使不得其人也。」

【疏】「亡乎人之辭也」。○釋曰：重發傳者，此乃復是事畢之文，其實未畢，嫌與他例異，故重明之。此云「乃者，亡乎人之辭也」，定十五年傳以爲「急辭也」者，乃有二義故也。此魯使不得其人，言乃以責之，公孫敖亦是失命，不言乃者，此以疾而反，有可責之理，故言乃復以譏之，敖棄命奔莒，元來未去，不足可責，非乃文所盡，故不言乃也。

復者，事畢也，不專公命也。遂以疾反，而加事畢之文者，是不使遂專命還。

辛巳，有事于大廟。○大音泰，下注同。仲

遂卒于垂。祭于大廟之日，而知仲遂卒。垂，齊地。

【疏】注「祭于」至「遂卒」。○釋曰：注言此者，解經仲遂之卒，繫祭廟之意也。仲遂有罪，而亦書日者，宣公與遂同罪，猶定公不惡意如而書日也。或當辛巳自爲祭廟，不爲仲遂也。案公子翬當桓世無罪，則不去公子，仲遂非宣惡人，而去公子者，翬非桓罪人，故生存不去公子之號，仲遂於宣，雖則無罪，死者人之終，若不去公子，嫌其全無罪狀，故去之。若然，何以不去日者？既替其尊號，則罪已明，故不假去日也。傳稱「公弟叔仲，賢

也」，遂非賢，而稱仲者，杜預云：「時君所加。」何休云：「稱仲者，起嬰齊所氏。」范雖不注，理未必然。蓋以遂見疏而去公子，經不可單稱遂卒，遂於後以仲爲氏，故稱仲遂卒也。然仲遂以罪見疏，即見罪惡之臣，而譏宣公不廢繹者，宣公與遂同心，繹祭之時，則內舞去籥而爲之，故所以譏也。

爲若反命而後卒也。先書復，後言卒，使若遂已反命于君，而後卒于垂。此公子也，其曰仲，何也？疏之也。僖十六年傳曰：「大夫不言公子，公孫，疏之也。」何爲疏之也？是不卒者也。遂與宣公共弑子赤。不疏，則無用見其不卒也。若書公子，則與正卒者同，故去公子以見之。○見其，賢偏反，注同。故去，起呂反，下文及注同。則其卒之何也？據公子翬不書卒。○子翬，許韋反。以譏乎宣也。其譏乎宣何也？聞大夫之喪，則去樂，卒事。去籥萬，卒祭事，言今不然。

壬午，猶繹。猶者，可以已之辭也。繹者，祭之旦日之享賓也。萬人，去籥。萬，舞

①「見」，阮校：「單疏本「見」下有「是」字。」



名。簫，管也。○釋音亦，《爾雅》云：「又祭也。」享，許丈反。簫，餘若反，管也。

【疏】「猶者」至「賓也」。○釋曰：旦日猶明日

也。何休云：「釋者，繼昨日事，但不灌地降神耳。天子諸侯曰繹，大夫曰賓尸，士曰宴尸，則天子以卿爲之，諸侯則以大夫爲之，卿大夫以孫爲之。夏立尸，殷坐尸，周旅酬六尸，唯士宴尸。」與先儒少異，則范意或與何同也。案少牢饋食之禮，卿大夫當日賓尸，天子諸侯明日賓尸者，天子諸侯禮大，故異日爲之，卿大夫以下禮小，故當日即行。其三代之名者，案《爾雅》云「夏曰復昨，殷曰彤」，周曰繹」是也。謂之復昨者，復前日之禮也。謂之彤者，彤是不絕之意也。謂之繹者，繹陳昨日禮也。何休又云，禮：大夫死，爲廢一時之祭。有事於廟而聞之者，去樂卒事，至卒事而聞之者，廢繹。今魯不，以爲譏。范意當亦然也。

以其爲之變，譏之也。內舞去簫，惡其聲聞，此爲卿變於常禮，是知其不可而爲之。○爲之，于僞反，注「爲卿變」同。惡其，烏路反。

戊子，夫人熊氏薨。宣公妾母。○《左氏》作嬴氏。

晉師、白狄伐秦。

楚人滅舒鄢。○舒鄢音了，本又作蓼，國名也。

秋，七月，甲子，日有食之，既。

冬，十月，己丑，葬我小君頃熊。文夫人

姜氏大歸于齊，故宣公立己妾母爲夫人。君以夫人禮卒葬之，故主書者不得不以爲夫人，義與成風同。○頃熊音傾，《左氏》作敬嬴。

【疏】注「文夫人」至「風同」。○釋曰：哀姜有罪，

故僖成其母爲夫人。今姜氏子殺故身出，本自無罪，則頃熊成喪，不是同例。而云與成風同者，禮：妾子爲君，其母不得稱夫人，以二者俱非正禮，故云同耳，非謂意盡同也。《穀梁》以成風再貶，故曰妾子雖爲君，其母不得稱夫人，則襄公以其母定姒爲夫人亦非正明也。然成風再貶，自外不譏者，從一譏故也。案文十八年注云「宣母敬嬴」，此云頃熊者，一人有兩號故也。

雨，不克葬。葬既有日，不爲雨止，禮

也。雨，不克葬，喪不以制也。徐邈曰：「案經

文是己丑之日葬，喪既出而遇雨，若未及己丑而却期，無爲逆書此日。葬禮：喪事有進無退。又《士喪禮》有潦車載蓑笠。則人君之張設，固兼備矣。禮：先遷柩於廟，其明味爽而引。既及葬日之晨，則祖行遣奠之禮設

①「彤」，原作「彤」，據宋刻元修本、單疏本及《爾雅·釋

天》改。

矣，故雖雨猶終事，不敢停柩久次。」○不爲，于僞反。潦音老。蓑，素禾反。笠音立。張如字，又陟亮反。柩，其又反，尸在棺曰柩。昧音妹。引，以刃反，又如字。遣奠，弃戰反。

【疏】「葬既至制也」。○釋曰：舊解：案禮庶人懸封，葬不爲雨止，明天子諸侯不觸雨而行可知也。傳言不爲雨止者，謂不得止葬事而更卜遠日。「喪不以制也」者，謂不得臨雨而制喪事，豈有諸侯執紼者五百人，安待觸雨而行哉！②是徐邈之說，理之不通。今案傳文云「雨不克葬，喪不以制也」，是葬爲雨止，喪事不以禮制也。上文云「葬既有日，不爲雨止，禮也」，明是雨止，③則非禮可知，安得云傳意葬爲雨止乎！又且范引徐邈之注，不言其非，則是從徐說矣，何爲述范義而違之哉！○注「徐邈」至「久次」。○釋曰：「未及己丑而却期」者，謂雨之與葬，皆是己丑之日也。若未及己丑之日而遇雨，④其葬期有却者，何爲逆書己丑日葬也？《士喪禮》有潦車載蓑笠者，《毛詩傳》云「蓑所以備雨，笠所以禦暑」是也。

庚寅，日中而克葬。而，緩辭也，足乎日之辭也。

【疏】「而緩辭也」。○釋曰：言緩辭也者，此日中克葬，足乎日，故云緩也。定十五年，「日下昃」，⑤乃克葬，故云「乃，急辭也」。是二文相對爲緩急，故《公羊傳》云：

「曷爲或言而，或言乃？乃難乎而也。」是二文相對也。

城平陽。

楚師伐陳。

九年，春，王正月，公如齊。有母之喪，而行朝會，非禮。○朝，直遙反。

【疏】注「有母」至「非禮」。○釋曰：非禮，經無異文者，傳例云：「如往月，危往也。」此朝書月，即是非禮之異文也。

公至自齊。

夏，仲孫蔑如京師。

齊侯伐萊。

①「五」，宋刻元修本作「三」。

②「待」，宋刻元修本、單疏本作「得」。

③「是」，原作「爲」，阮校：「何校本「爲」作「是」，是也。」今據改。

④「日」，原無，據單疏本補。盧宣旬補校曰：「閩、監、毛本「之」下有「日」字，此本誤脫。」

⑤「昃」，宋刻元修本、單疏本作「稷」。阮校：「何校本「昃」作「稷」，十行本此字剗改，當是本作「稷」也。按注云：「稷，昃也。」」

秋，取根牟。

【疏】「秋取根牟」。○釋曰：《公羊傳》曰：「根牟者何？邾婁之邑也。曷為不繫乎邾婁？諱亟也。」謂母喪未期而取邑，故諱不繫邾婁也。若言諱不繫邾婁，居母之喪，縱非邾邑，豈容無諱？或當如《左傳》以根牟為國名也。

八月，滕子卒。

九月，晉侯、宋公、衛侯、鄭伯、曹伯會

于扈。

晉荀林父帥師伐陳。

辛酉，晉侯黑臀卒于扈。其地，於外

也。其日，未踰竟也。外，謂國都之外，諸侯卒於

路寢則不地。傳例曰：「諸侯正卒則日，不正則不日。」

舊說踰竟亦不日，然則諸侯不正，而與未踰竟無以別之

矣。案襄七年，鄭伯卒于操，此年晉侯卒于扈，文正與襄

二十六年許男卒於楚同，恐後人謂操、扈是國，故於疑似

之際，每為發傳，日未踰竟也。○臀，徒門反。竟音境。

以別，彼列反。操，七報反。

【疏】注「外謂」至「竟也」。○釋曰：諸侯之

國，皆以侵伐會盟見經，操、扈經既無文，而疑是國者，周有千八百諸侯，今盟會侵伐見《春秋》者不過數十而

已，操、扈傳若不發，焉知非國也？曲棘不釋者，雙名也，去國遠矣，故不假釋。邢鄧邵以三言為名，故傳釋之為國也。晉侯黑臀不書葬者，舊解以為篡立故也，今案，黑臀既書日卒，未必篡立，蓋魯不會，故不書也。

冬，十月，癸酉，衛侯鄭卒。

宋人圍滕。

楚子伐鄭。

晉卻缺帥師救鄭。○卻，去逆反。缺，傾雪

反。

陳殺其大夫泄冶。①○泄，息列反。冶音

也。稱國以殺其大夫，殺無罪也。泄冶之無

罪如何？陳靈公通于夏徵舒之家，公孫

寧、儀行父亦通其家。②二人，陳大夫。○夏，戶

雅反。或衣其衣，或衷其襦，衷者，襦在衷也。

○衣其衣，上於既反，下如字。襦，而朱反。在衷，本又作

①「泄」，阮校：「石經『泄』作『洩』，下同。《釋文》出『泄冶』。」

②「通」，阮校：「石經、余本『通』下有『子』字。」

裏，音里。以相戲於朝。○朝，直遙反。泄冶聞之，人諫曰：「使國人聞之，則猶可使仁人聞之，則不可。」君愧於泄冶，不能用其言而殺之。

十年，春，公如齊。

公至自齊。

齊人歸我濟西田。公娶齊，齊由以爲兄弟反之。齊由以婚族，故還魯田。《爾雅·釋親》曰：「婦之党爲婚兄弟。」○娶，七住反。①不言來，公如齊受之也。

夏，四月，丙辰，日有食之。

己巳，齊侯元卒。傳例曰：「言日不言朔，食晦日。」則此丙辰，晦之日也。己巳在晦日之下，五月之上，推尋義例，當是閏月矣。文六年傳曰：「閏月者，附月之餘日。」言閏承前月，而受其餘日。故書閏月之日，繫前月之下，蓋史策常法，文有定例，閏有常體，無嫌不明，故不復每月發傳。哀五年《公羊傳》曰：「閏月不書，此何以書？」推此言之，則《春秋》固有在閏月而不冠以閏者矣。至於閏不告月，猶朝于廟，閏月葬齊景公，

不正其閏，無以言其事，故書，見變禮。○不復，扶又反，下注復同。不冠，工亂反。猶朝，直遙反。見，賢徧反。

【疏】「不言」至「受之」。○釋曰：決定十年「齊人來歸鄆、讙、龜陰之田」言來也。○注「閏有常體」。○釋曰：閏月，所在無常，而言有常體者，閏是附月之餘，文承前月，是無體之常，不謂所在有常。

齊崔氏出奔衛。氏者，舉族而出之之辭也。何休曰：「氏者，譏世卿也。即稱氏，爲舉族而出，尹氏卒，寧可復以爲舉族死乎？」鄭君釋之曰：「云舉族死，是何妖問甚乎？」「舉族而出之之辭」者，固譏世卿也。崔杼以世卿專權，齊人惡其族，今出奔，既不欲其身反，又不欲國立其宗後，故孔子順而書之曰「崔氏出奔衛」，若其舉族盡去之爾。○崔杼，直吕反。惡其，烏路反。

公如齊。

五月，公至自齊。

癸巳，陳夏徵舒弑其君平國。

①「七」，原作「十」，夏校據《釋文》改。今從之。  
②「見」，宋刻元修本及《釋文》作「見變」。

六月，宋師伐滕。月者，蓋爲下齊惠公葬速起。○爲，于僞反。

【疏】注「月者」至「速起」。○釋曰：知非爲宋師伐滕、歸父如齊、宋師伐滕，外事也，歸父之聘，輕也。諸侯時葬，正也，月葬，故也。今上有齊逐崔氏之文，又非五月而葬，明書月者，爲葬惠公也。

公孫歸父如齊。

葬齊惠公。

晉人、宋人、衛人、曹人伐鄭。

秋，天王使王季子來聘。其曰王季，王子也。其曰子，尊之也。子者，人之貴稱。○稱，尺證反。

【疏】「其曰」至「尊之也」。○釋曰：傳知稱子是尊之也者，此言王季子，即是大子之母弟。子者，人之貴稱，故稱子爲尊之也。叔服以庶子爲大夫，故直稱字而不繫王也。卒稱王子虎者，卒當稱名，故繫王言之。

聘，問也。

公孫歸父帥師伐邾，取繹。○繹音亦。

大水。

季孫行父如齊。

冬，公孫歸父如齊。

齊侯使國佐來聘。

饑。○饑，本或作飢，居疑反。

楚子伐鄭。

十有一年，春，王正月。

夏，楚子、陳侯、鄭伯盟于夷陵。夷陵，齊

地。○《左氏》作辰陵。

公孫歸父會齊人伐莒。

秋，晉侯會狄于欒函。欒函，狄地。○函音咸。不言及，外狄也。①所以異之於諸夏。○夏，戶雅反。

【疏】「不言及外狄也」。○釋曰：哀十三年「公會晉侯及吳子于黃池」，注云：「及者，書尊及卑也。」是言及所以外吳。何得此傳云「不言及，外狄」者？黃池之會，欲同吳子於諸侯，故直云及吳子，不云會吳，此不言及，是外狄，故云會狄，不云及狄，是不言及爲外狄也。若不外，當云晉侯及狄會于欒函。然隱三年「齊侯、鄭伯盟

①「也」，原無，阮校：「石經、余本下有「也」字。」今據補。

于石門」不言及，同吳於諸夏而云及吳子者，不可全同中國，故言及，以別尊卑也。

冬，十月，楚人殺陳夏徵舒。變楚子言人者，弑君之賊，若曰人人所得殺也。其月，謹之。

【疏】「變楚」至「謹之」。○釋曰：經直言楚人，知是楚子者，下云楚子人陳，明知此爲討賊，故變楚子言人也。「其月，謹之」者，不能自討，藉楚之力，禍害必深，故書月爲謹之。

此人而殺也。其不言人，何也？據人國乃得殺。外徵舒於陳也。其外徵舒於陳，何也？據徵舒陳大夫，不應外。明楚之討有罪也。

雍曰：「經若書楚子人陳殺夏徵舒者，則人者內不受，是無以表徵舒之悖逆，楚子之得正。」○悖，補對反。

丁亥，楚子人陳。人者，內弗受也。日人，惡人者也。何用弗受也？不使夷狄爲

中國也。楚子人陳，納淫亂之人，執國威柄，制其君臣，俱倒上下，錯亂邪正，是以夷狄爲中國。○惡，烏路反。俱，丁田反，本又作顛。邪，似嗟反。

【疏】「日人惡人者也」。○釋曰：上文美楚子人，今又惡之者，前爲討徵舒，討得其罪，故變文以美之，今爲納二子，失其所，故日人以惡之。

納公孫寧、儀行父于陳。納者，內弗受

也。輔人之不能民而討猶可，雍曰：「輔相鄰國有不能治民者，而討其罪人則可。而曰猶可者，明鄰國之君，無輔相之道。」○輔相，息亮反，下輔相同。

【疏】「納公」至「于陳」。○釋曰：糜信云，二子不繫陳者，以其淫亂，明絕之也。或當上有人陳之文，下云于陳，故省文耳，無義例。

入人之國，制人之上下，使不得其君臣之道，不可。二人與昏淫，①當絕，而楚強納之，是制人之上下。○強，其丈反，一音其良反。

十有二年，春，葬陳靈公。傳例曰：「失德不葬」；②「君弑，賊不討，不葬，以罪下也」；「日卒，時葬，正也」。靈公淫夏姬，殺泄冶，臣子不能討賊，踰三年然後葬，而日卒時葬，何邪？泰曰：「楚已討之矣，臣子雖欲討之，無所討也，故君子即而恕之，以申臣子之恩。稱國以殺大夫，則靈公之惡不嫌不明，書葬以表討賊，不言靈公無罪也。踰三年而後葬，則國亂居可知矣。非日月小有前却，則書時不嫌。」○弑音試。夏，戶雅反。

①「與」，阮校：「余本『與』下有『君』字。」

②「德」，原作「得」，夏校依昭公十三年傳文及文意改。下疏同。今從之。

【疏】注「傳例」至「不嫌」。○釋曰：「失德不葬」，昭十三年傳文。「君弑，賊不討，不書葬，以罪下也」，隱十一年傳文。「日卒，時葬，正也」，襄七年傳文。案徵舒之弑靈公在十年五月，至此纔二十一月，而注云踰三年者，諸侯五月而葬，今踰五月至三年，故曰踰也。非日月小有前却者，未五月謂之前，過五月謂之却，言葬有前却，則書月以見危。今三年始葬，非是小有前却，故書時不嫌也。

### 楚子圍鄭。

夏，六月，乙卯，晉荀林父帥師及楚子戰于郟。郟，鄭地。○郟，皮必反。

【疏】「夏六月」至「于郟」。○釋曰：《公羊傳》稱，荀林父稱名氏，先楚子者，惡林父也。若然，城濮之戰後子玉，當是善子玉乎？徐邈云「先林父者，內晉而外楚」是也。

晉師敗績。績，功也。功，事也。日其事，敗也。

秋，七月。

冬，十有二月，戊寅，楚子滅蕭。

晉人、宋人、衛人、曹人同盟于清丘。清

丘，衛地。

【疏】「日其事敗也」。○釋曰：舊解，此戰事書日者，為敗之故也。特於此發之者，二國兵衆，不同小國之戰，故特發之。徐邈云：「於此發傳者，深閔中國大敗於彊楚也。」①今以曰為語辭，理足通也。②但舊解為日月之日，疑不敢質，故皆存耳。○「戊寅楚子滅蕭」。○釋曰：書日者，徐邈云：「蕭君有賢德，故書日也。」何休云：「責楚滅人國，故書日。」若釋善而從，則徐言與傳例合也。

### 宋師伐陳。

衛人救陳。

【疏】「衛人救陳」。○釋曰：不言善者，衛宋同盟外楚，今反救陳，不足可善，故傳不釋。

十有三年，春，齊師伐莒。

夏，楚子伐宋。

秋，螽。

①「閔」，單疏本作「明」。

②「理」，阮校：「單疏本『理』作『亦』」。

冬，晉殺其大夫先穀。<sup>①</sup> ○穀，戶木反，一本作穀。

【疏】「晉殺」至「先穀」。○釋曰：此雖無傳，於例爲殺無罪也。

十有四年，春，衛殺其大夫孔達。

夏，五月，壬申，曹伯壽卒。

晉侯伐鄭。

秋，九月，楚子圍宋。

【疏】「秋九」至「圍宋」。○釋曰：徐邈云：「圍例時，此圍久，故書月以惡之也。」何休亦然，范意或當不異也。

葬曹文公。

冬，公孫歸父會齊侯于穀。

十有五年，春，公孫歸父會楚子于宋。

夏，五月，宋人及楚人平。平者，成也。

善其量力而反義也。各自知力，不能相制，反共和之義。

【疏】「平者成也」。○釋曰：重發傳者，嫌外內異也。

人者，衆辭也。平稱衆，上下欲之也。外平不道，以吾人之存焉道之也。吾人，謂大夫歸父。

六月，癸卯，晉師滅赤狄潞氏，以潞子嬰兒歸。滅國有三術：術，猶道也。○潞氏音路。嬰，一盈反。中國謹日，卑國月，夷狄不日。卑國，謂附庸之屬，襄六年傳曰：「中國日，卑國月，夷狄時。」此謂三術。其曰潞子嬰兒，<sup>②</sup>賢也。

【疏】「滅國」至「賢也」。○釋曰：中國日者，謂衛滅邢之類是也。<sup>③</sup>卑國月者，謂無駭人極，齊侯滅萊之類是也。夷狄不日者，楚滅江、黃，吳滅州來之類是也。<sup>④</sup>此不云夷狄時而云不日者，方釋潞子嬰兒書日之意，故不云

①「先穀」，阮校：「石經『穀』作『穀』。宋本《釋文》出

「先穀」云：「一本作穀。」兩者必有一誤。」

②「日」，阮校：「惠棟云：『日，當作日。』」

③「邢」，原作「許」，阮校：「閩、監、毛本『許』作『邢』，是也。按：傳廿五年衛侯燬滅邢。」今據改。

④「楚滅」至「是也」，原作「楚滅江吳滅滅州來之類是也」，據阮校及盧宣旬補校，閩、監、毛本「江」下有「黃」字，無下「滅」字，今據改。



夷狄時也。夷狄不日，宜從下爲文勢。嬰兒爲賢，書日復稱名者，書日以表其賢，書名以見滅國，所謂善惡兩舉也。

### 秦人伐晉。

王札子殺召伯、毛伯。王札子者，當上之辭也。殺召伯、毛伯，不言其何也？解經不言殺其大夫。○札，側八反。召，上照反。兩下相殺也。兩下相殺，不志乎《春秋》，此其志，何也？矯王命以殺之，非忿怒相殺也，故曰以王命殺也。以王命殺，謂言王札子殺召伯、毛伯，是知以王命而殺之。○矯，居表反。以王命殺，則何志焉？爲天下主者，天也，繼天者，君也，君之所存者，命也。爲人臣而侵其君之命而用之，是不臣也；爲人君而失其命，是不君也。君不君，臣不臣，此天下所以傾也。

秋，螽。

仲孫蔑會齊高固于無婁。無婁，杞邑。○婁，力侯反。

初稅畝。初者，始也。古者什一，一夫一婦佃田百畝，以共五口，<sup>①</sup>父母妻子也。又受田十畝，<sup>②</sup>以爲公田，公田在內，私田在外。此一夫一婦爲耕百一十畝。○稅，始稅反，賦也。什一，音十，十稅一也。佃音田，又徒徧反。共音恭。藉而不稅。藉此公田而收其人，言不稅民。

【疏】「藉而不稅」。○釋曰：徐邈曰：「藉，借也。謂借民力治公田，不稅民之私也。」觀范之注，以藉爲賦藉，理亦通。從徐之言，義無妨也。

初稅畝，非正也。古者三百步爲里，名曰井田。井田者，九百畝，公田居一。出除公田八十畝，餘八百二十畝。故井田之法，八家共一井，八百畝餘二十畝，家各二畝半爲廬舍。○廬，力魚反。私田稼不善，則非吏；非，責也。吏，田峻也。言吏急民，使不得營私田。○峻音俊，田大夫也。公田稼

①「共」，宋刻元修本作「其」。

②「十畝」，原作「十五畝」，阮校：「余本無「五」字，是也。莊廿八年疏引作「又受田十畝」。今據改。」

不善，則非民。民勤私也。初稅畝者，非公之去公田而履畝，十取一也，以公之與民爲已悉矣。悉謂盡其力。○去，如字，又起呂反。

【疏】「履畝十取一也」。○釋曰：何休云：「宣公無恩信於民，民不肯盡力治公田，故公家履踐案行，擇其善畝穀最好者稅取之，故曰履畝。」徐邈以爲除去公田之外，又稅私田之十一也。傳稱「以公之與民爲已悉矣」，則徐言是也。

古者公田爲居，八家共居。井竈葱韭盡取焉。損其廬舍，家作一園，以種五菜，外種楸桑，以備養生送死。○韭音九，<sup>①</sup>楸音秋。

【疏】注「損其」至「送死」。○釋曰：損爲減損也。五菜者，世所謂五辛之菜也。何休又云：「古者井田之法，一夫一婦受田百畝，身與父母妻子五口以爲一户，公田十畝，又廬舍二畝半，凡爲田一頃一十二畝半也。八家而有九頃，故曰井田廬舍在內，貴人也。公田次之，重公也。私田在外，賤私也。若五口之外，名曰餘夫，餘夫率受田二十五畝半。」記異聞耳，於范氏注亦無所取。

冬，蜚生。蜚非災也。其曰蜚，非稅畝之災也。凡《春秋》記災，未有言生者。蜚之言緣也，緣宣公稅畝，故生此災以責之。非，責也。○蜚，以全反。

劉歆云：「此蚘蜥子。」董仲舒云：「蝗子。」《字林》尹綰反。

饑。

十有六年，春，王正月，晉人滅赤狄甲氏及留吁。甲氏、留吁，赤狄別種。晉既滅潞氏，今又并盡其餘邑也。滅夷狄時，賢嬰兒，故滅其餘邑猶月。○吁，許于反。種，章勇反。并，必政反。

【疏】「甲氏」至「猶月」。○釋曰：傳例：「滅夷狄時，嬰兒以賢書月。」故知餘邑書月亦爲賢也。甲氏、留吁非國，而云滅者，甲氏、留吁國之大邑，而晉盡有之，重其事，故云滅，若晉滅夏陽之類是也。留吁言及者，蓋小於甲氏也。

夏，成周宣榭災。成周，東周，今之洛陽。宣榭，宣王之榭。《爾雅》曰：「室有東西廂曰廟，無東西廂有室曰寢，無室曰榭。」傳例曰：「國曰災，邑曰火。」○榭音謝，本或作謝。災，《左氏》作火。

【疏】「成周宣榭災」。○釋曰：不言京師者，

①「○」，原無，下爲《釋文》之文，今據《釋文》及本書體例補。

②「榭」，阮校：「單疏本「榭」作「謝」，下同。案此則單疏本所據經注必皆作「謝」，與《釋文》「或作」本合。」

爾時成周非京師故也。《公羊傳》云：「宣榭者何？宣宮之榭也。」故范注亦以爲宣王之廟也。「無室曰榭」，《爾雅》正文。或以爲《爾雅》無此文，唯云「土高曰臺，有木謂之榭」，臺上有木，即是屋也。《楚語》曰：「榭不過講軍實。」臨觀講武，必是歇前，故云「無室曰榭」。《爾雅》有之者，本或誤也。又引傳例曰云云者，昭九年傳文也。

周災，不志也。其曰宣榭，何也？以樂器之所藏目之也。移風易俗，莫善於樂，是故貴其器。<sup>①</sup>

【疏】「周災不志也」。○釋曰：徐邈所據本云周災至，<sup>②</sup>注云重王室也。今徧檢范本，並有「不」字，則不得解與徐同也。

秋，鄒伯姬來歸。爲夫家所遣。

冬，大有年。五穀大熟爲大有年。

十有七年，春，王正月，庚子，許男錫我

卒。  
○錫，星歷反。<sup>③</sup>

丁未，蔡侯申卒。

夏，葬許昭公。

葬蔡文公。

六月，癸卯，日有食之。

己未，公會晉侯、衛侯、曹伯、邾子同盟于斷道。己未，亦閏月之日。斷道，晉地。○斷，徒短反，一音短。

【疏】注「己未」至「晉地」。○釋曰：十年「夏，四月，丙辰，日有食之。己巳，齊侯元卒」。范以爲丙辰晦之日也。己巳在晦日之下，五月之上，當是閏月可知。此文與彼正同，明亦閏月之日也。

同者，有同也，同外楚也。

秋，公至自會。

冬，十有一月，壬午，公弟叔肸卒。其

曰公弟叔肸，賢之也。其賢之何也？宣弑

而非之也。宣公殺子赤，叔肸非責之。○肸，許乙反。

【疏】「同外楚也」。○釋曰：不於清丘發傳者，清丘，魯不會，故重舉，所以包之也。

非之，則胡爲不去也？曰：兄弟也，

何去而之？言無所至。與之財，則曰我足矣。

① 「貴」，阮校：「余本『貴』作『善』。」

② 「至」，《穀梁補注》曰：「『至』字乃『志』之誤。」孫校同。

③ 「星」，原作「墨」，據宋刻元修本及《釋文》改。

宣公與之財物，則言自足以距之。織屨而食，織屨，賣以易食。○屨，九具反。終身不食宣公之食。君子以是爲通恩也，以取貴乎《春秋》。泰曰：「宣公弑逆，故其祿不可受，兄弟無絕道，故雖非而不去，論情可以明親親，言義足以厲不軌，書曰公弟，不亦宜乎！」

【疏】「取貴乎春秋」。○釋曰：衛侯之弟鱄去君，傳云合於《春秋》，此不去君，傳亦取貴於《春秋》者，《易》稱「君子之道，或出或處，或默或語」。鱄以衛侯惡而難親，恐罪及己，故棄之而去，使君無殺臣之惡，兄無害弟之愆，故得合於《春秋》；此叔肸以君有大逆，不可受其祿食，又是孔懷之親，不忍奮飛，使君臣之節兩通，兄弟之情俱暢，故亦取貴於《春秋》。叔肸書字，鱄直稱名者，叔肸內可以明親親，外足以厲不軌，比鱄也賢乎遠矣，故貴之稱字，鱄雖合於《春秋》，無大善可應，故直書名而已。

十有八年，春，晉侯、衛世子臧伐齊。  
○臧，子郎反。

公伐杞。

夏，四月。

秋，七月，邾人戕繒子于繒。戕猶殘也，斃殺也。<sup>①</sup>斃謂捶打殘賊而殺。<sup>②</sup>地于繒，惡其臣

子不能距離。○戕，在良反，殘也，賊也，猶殺也。繒，本或作鄆，在陵反。斃殺，他活反，又徒栝反，<sup>③</sup>捶打也，《字林》云：木杖。或作撲，普木反。捶，章蘂反。打音頂。<sup>④</sup>惡其，烏路反。難，乃旦反。

【疏】注「地于繒」至「距離」。○釋曰：據楚子虔誘蔡侯般殺之于申，不于國都也。

甲戌，楚子呂卒。商臣子，莊王。○子呂，《左氏》作旅。夷狄不卒，卒，少進也。卒而不日，日，少進也。日而不言正不正，簡之也。中國君日卒，正也。不日，不正也。今進夷狄，直舉其日，而不論正之與不正。

【疏】「夷狄」至「之也」。○釋曰：夷狄不卒，據自此以前，吳、楚君卒而不書日，據襄十二年秋九月，吳子乘卒言之也。簡之也者，中國卒則日，不正乃不日，夷狄

①「斃」，阮校：「嚴杰云：『石經初刻「斃」作「斃」，後改從手，非也。』斃殺謂以杖殺之。《後漢書·禰衡傳》

「手持三尺斃杖」是也。」

②「打」，錢大昕《潛研堂集》卷八云：「打」必「打」字之訛。

③「栝」，宋刻元修本及《釋文》作「活」。

④「打」，宋刻元修本及《釋文》作「打」。

進之則日，不論正與不正，故云簡之也。

公孫歸父如晉。

冬，十月，壬戌，公薨于路寢。正寢也。

歸父還自晉。還者，事未畢也。莊八年

「秋，師還」是也。

【疏】「路寢正寢也」。○釋曰：重發傳者，莊據

始，故發之。宣公篡弑有嫌，成公承所嫌之下，故各發傳也。○「歸父還自晉」。○釋曰：執則致，歸父非執而書其還者，爲出奔張本也。直名不氏者，凡致者由上致之，故例。今不書歸父之氏，明有致命之義也。

自晉，事畢也。與人之子，守其父之

殯，人之子，謂歸父子也，言成公與歸父子共守宣公殯。

捐殯而奔其父之使者，是以奔父也。①捐，棄

也。奔猶逐也。言成公棄父之殯，逐父之使。使謂歸父

也。父命未反，而已逐之，是與親奔父無異。○捐，以全

反。

至櫜，遂奔齊。遂，繼事也。杜預曰：

櫜，魯竟外，故不言出。○櫜，尹貞反，《左氏》作笙。竟音境。

①「以」，阮校：「石經、余本「以」作「亦」。」

# 監本春秋穀梁注疏成公卷第十三

起元年，終八年

范甯集解 楊士勛疏

成公。

【疏】《魯世家》：成公名黑肱，宣公之子。以周定王十七年即位。《謚法》：「安民立政曰成。」

元年，春，王正月，公即位。

二月，辛酉，葬我君宣公。

無冰。終時無冰則志，此未終時而言無冰，何也？言終寒時無冰，當志之耳。今方建丑之月，是寒時未終。

【疏】「無冰」。○釋曰：徐邈、何休並云：「此年無冰者，由季孫行父專政之所致也。」桓十四年亦無冰，范云「政治舒緩之所致」，必不得與二說同也。又爾時季氏不專政，亦無冰，明徐、何之言不可用。

終無冰矣，加之寒之辭也。周二月，建丑之月，夏之十二月也。此月既是常寒之月，於寒之中又如加

甚，<sup>①</sup>常年過此無冰，終無復冰矣。○夏之，戶雅反。復，扶又反。

【疏】「終時」至「辭也」。○釋曰：終時無冰當志，謂終寒時無冰當志之也。此未終寒時，謂今建丑之月，是寒時未終，而言無冰何也？謂怪其書之意也。「終無冰矣」，謂過此時無冰，則終無冰也。「加之寒之辭也」，謂於此月書者，以此月是常寒之月，加甚之辭，故廢信、徐邈亦云：「十二月最是寒盛之時，故特於此月書之是也。」餘無冰不發，特於此月發之者，襄二十八年書春無冰，<sup>②</sup>則是一時無冰，書時，則是終寒時，故不傳。<sup>③</sup>此在二月葬宣公之下，三月作丘甲之上，是未終時，故特發之。桓十四年無冰，在正月之下者，舊解，正月自為公會鄭伯，不為無冰也，或當月却而節前，則周之正月亦是常寒之月。○注「周二」至「冰也」。○釋曰：天有四時，冬寒夏暑，是冬為常寒之月。「於寒之中又加甚」，謂建丑是夏之十二月，於寒之中又加甚於餘月，雖未終時，亦得於此

①「如」，阮校：「余本無「如」字。案：疏兩引皆無「如」字，余本是也。」

②「二十八年」，原作「三十八年」，據宋刻元修本、單疏本改。

③「不」，阮校：「何校本「不」下有「發」字。」今按：單疏本同何校本。

月書之。

三月，作丘甲。《周禮》：九夫爲井，四井爲邑，四邑爲丘，丘十六井。甲，鎧也。○鎧，開代反。

【疏】「三月作丘甲」。○釋曰：何休云：「月者，重錄之。」徐邈云：「甲有伎巧，非凡民能作，而強使作之，故書月以譏之。」范雖無注，或書月亦是譏。《公羊》說作丘甲，亦與此傳同，唯《左氏傳》以爲譏重斂。

作，爲也。丘爲甲也。使一丘之民皆作甲。

【疏】「作爲也」。○釋曰：後重發傳者，①文同事異，不可以一例該之故也。范《別例》云：「作例有六，直云「作」者三，云「新作」亦三也。云「作」三者，謂作丘甲，一也；作三軍，二也；作僖公主，三也。云「新作」三者，謂新作南門，一也；新延廡，二也；新作雉門及兩觀，三也。言作者不必有新，言新則兼作也。」②三者皆所以爲譏，故傳曰：「作，爲也。」是有加其度也，言新有故是也。

丘甲，國之事也。丘作甲，非正也。丘

作甲之爲非正，何也？古者立國家，百官

具，農工皆有職以事上。古者有四民：有

士民，學習道藝者。

【疏】「有士民」。○釋曰：何休云：「德能居位

曰士。」范云「學習道藝者」，是以爲之四民。若以居位，則不得爲之民，故云「學習道藝」也。

有商民，通四方之貨者。有農民，播殖耕稼者。有工民。巧心勞手以成器物者。夫甲，非人之所能爲也。各有業也。○夫音符。丘作甲，非正也。

夏，臧孫許及晉侯盟于赤棘。赤棘，晉地。

【疏】「夏臧」至「赤棘」。○釋曰：盟不日者，何休云：「謀結鞏之戰不相負。所以不日者，執在三年，非此所得保也。」案隱元年昧之盟爲七年伐邾尚猶去日，③何爲二年即執，反云非此所得保乎？蓋謀爲鞏戰，歸我汶陽之田，至八年渝前約，故畧之也。

秋，王師敗績于貿戎。貿戎地。○貿音茂，

《左氏》作茅戎。

【疏】「秋王」至「貿戎」。○釋曰：《左氏》以爲戎

①「重」，阮校：「單疏本無「重」字。」

②「言新」，原無，阮校：「單疏本上有「言新」二字。案有者是。」今據補。

③「昧」，原作「昧」，阮校：「浦鏜云：「昧誤昧。」」今按：《公羊傳》、《穀梁傳》隱公元年作「昧」，據改。

敗之；《公羊》與此亦同，爲晉敗之。今經不云晉敗之者，欲見王者無敵故也。不書月者，何休云：「深正之，使若不戰。」范雖不解，蓋不言晉敗及戰，故亦畧其日月。

不言戰，莫之敢敵也。爲尊者諱敵不

諱敗，諱敵，使莫二也。不諱敗，容有過否。○爲，于僞

反。爲親者諱敗不諱敵，諱敗，惜其毀折也。不諱敵，諸侯有列國，尊尊親親之義也。尊則無敵，親則保全，尊謂王，親謂魯。然則孰敗之？晉也。

冬，十月。

季孫行父禿，晉卻克眇，<sup>①</sup>衛孫良夫跛，

曹公子手僂，同時而聘於齊。齊使禿者御

禿者，使眇者御眇者，使跛者御跛者，使僂

者御僂者。御音迓，迓，迎也。○禿，他不反。<sup>②</sup>眇，

亡小反。跛，波可反。僂，於矩反，一音刀圭反。<sup>③</sup>

【疏】「卻克眇」。○釋曰：《左氏》以爲跛。今云

眇者，《公羊》無說，未知二傳孰是。范明年注云「卻克跛」者，意從《左氏》故也。或以爲誤，跛當作眇。

蕭同侄子處臺上而笑之，蕭，國也。同，姓

也。姪子，字也。其母更嫁齊惠公，生頃公。宣十二年，楚人滅蕭，故隨其母在齊。○侄子，大節反，又丈乙反。

頃公，音傾。聞於客，客不說而去，相與立胥聞

而語，移日不解。胥聞，門名。○說音悅。胥聞，思

徐反，下力居反。解，古買反，又音蟹。

【疏】注「胥聞門名」。○釋曰：即《周禮》二十五家也。

齊人有知之者，曰：「齊之患，必自此

始矣！」穀梁子作傳，皆釋經以言義，未有無其文而橫

發傳者，甯疑經「冬十月」下云「季孫行父如齊」脫此六字。

○橫，華孟反，又如字。脫此，徒活反，又他活反。

【疏】注「脫此六字」。○釋曰：季孫行父禿，是

傳辭上脫「季孫行父如齊」六字。

二年，春，齊侯伐我北鄙。

①「晉卻克眇」，阮校：「釋云：『《左氏》以爲跛。今云

眇者，《公羊》無說。』案：臧琳《經義雜記》云：「據

沈文阿引《穀梁傳》，知古本《穀梁》作晉卻克跛，故范

注二年傳云謂笑其跛也。」「《穀梁補注》曰：「此文

「眇」、「跛」字當互易。自唐定本始誤，而楊氏作疏因

之，陸德明亦誤。」

②「不」，宋刻元修本及《釋文》作「木」。

③「刀圭」，宋刻元修本及《釋文》作「力圭」。



夏，四月，丙戌，衛孫良夫帥師及齊師戰于新築，衛師敗績。新築，衛地。○築音竹。

六月，癸酉，季孫行父、臧孫許、叔孫僑

如、公孫嬰齊帥師，會晉卻克、衛孫良夫、曹

公子手，及齊侯戰于鞏，齊師敗績。鞏，齊地。

○僑，本又作喬，其僑反。公子手，《左氏》作首。鞏音安。

【疏】「癸酉季孫」至「敗績」。○釋曰：徐邈云：

「四大夫不舉重者，惡魯狼遣四大夫用兵，亦以譏之也。」然則諸國用兵，亦應狼遣，何以不具書之？蓋是用兵重事，故詳內也。

其日，或曰日其戰也，或曰日其悉也。

悉，謂魯四大夫時悉在戰也。明二者皆當日。

【疏】「其日」至「悉也」。○釋曰：案傳例：「疑

戰不日，不疑戰則例書日。」此傳云「日其戰」、「日其悉也」者，豈使詐戰，則魯雖四大夫戰，亦不得書，但傳以此戰不許，<sup>①</sup>書事宜詳，故因經書日，并見此意也。

曹無大夫，其曰公子，何也？以吾之

四大夫在焉，舉其貴者也。不欲令內衆大夫與外

卑者共行戰。○令，力呈反。

【疏】「曹無大夫」。○釋曰：復發傳者，前爲崇

羈，今爲戰，故重發之。《公羊》以爲「公子手何以書？憂

內也」，杜解《左氏》以爲「備於禮」，並非《穀梁》意。

秋，七月，齊侯使國佐如師。己酉，及

國佐盟于爰婁。鞏，去國五百里；爰婁，

去國五十里。國，齊國也。

【疏】「爰婁」至「十里」。○釋曰：爰婁去齊五十

里，今在師之外，明晉師已逼到其國。師，謂晉師也。齊爲晉所敗，兵臨城下，然則敗軍之將，不可以語勇，驚弦之鳥，不可以應弓。所以更能五戰者，齊是大國，邑寬既寬，<sup>②</sup>收拾餘燼，足當諸國之師，故請以五也。

壹戰縣地五百里，焚雍門之茨，雍門，齊

城門。茨，蓋也。○雍，於用反。之茨，在私反。侵車

東至海。侵車，侵伐之車，言時侵齊，過乃至海。君

子聞之曰：「夫甚甚之辭焉！」鄭嗣曰：「君

子聞戰于鞏，乃盟于爰婁，焚雍門之茨，侵車至海，言因齊之敗，逼之甚。」○夫甚，音符。齊有以取之也。」齊

之有以取之，何也？敗衛師于新築，侵我

北鄙，敖卻獻子，謂笑其跛。○謂笑其跛，布可反。

①「許」，宋刻元修本作「詐」。

②「邑寬既寬」，宋刻元修本、單疏本作「邑竟既寬」。

案杜預注《左傳》云「卻克跛」，此傳言「卻克眇」，范注當依

傳，而作「跛」，恐非。齊有以取之也。爰婁在師

之外。言師已逼其國。卻克曰：「反魯、衛之

侵地，以紀侯之甌來，甌，玉甌，齊滅紀，故得其寶。

○甌，魚輦反，又音言，又音彦，玉甌也。以蕭同姪子

之母爲質，齊侯與姪子同母異父昆弟，不欲斥言齊侯

之母，故言蕭同姪子之母也。兼忿姪子笑。○爲質，音

致，下同。使耕者皆束其畝，欲以利其戎車於驅侵

易。○侵易，以豉反，下「伐易」同。然後與子盟。」

國佐曰：「反魯、衛之侵地，以紀侯之甌

來，則諾。『以蕭同姪子之母爲質』，則是齊

侯之母也，齊侯之母猶晉君之母也，晉君之

母猶齊侯之母也。言尊同也。『使耕者盡束其

畝』，則是終土齊也。凱曰：「利其戎車侵伐易，則

是以齊爲土。」不可，謂若不許已言。請壹戰。

壹戰不克，請再。再不克，請三。三不克，

請四。四不克，請五。五不克，舉國而授。」

於是而與之盟。

八月，壬午，宋公鮑卒。

庚寅，衛侯速卒。取汶陽田。○汶音問。

冬，楚師、鄭師侵衛。

十有一月，公會楚公子嬰齊于蜀。蜀，某

地。楚無大夫，其曰公子，何也？嬰齊亢

也。泰曰：莊二十二年「丙申，及齊高傒盟」，文二年

「乙巳，及晉處父盟」，傳曰：「不言公，①高傒、處父亢

也。」此傳會嬰齊，書公以明亢，何乎？蓋言高傒、處父亢

禮敵公，書公則內恥也。嬰齊初雖驕慢，終自降替，故于

會則書公，以顯嬰齊之驕亢，于盟則稱人，以表嬰齊之

服罪。然則向之驕，正足以表其無禮，不足以病公，則書

公可也。○向之，本又作鄉，亦作向，同，許亮反；下文

同。

【疏】楚無「至」亢也。○釋曰：楚無大夫，重

發之者，屈完當齊桓，名氏始見，非正例也。椒與宜申二

①「公」，原無，阮校：「莊二十二年、文二年傳並云「不

言公」，此注「言」下當有「公」字。今本脫也。何校本

有「公」字。」今據補。

者不見名氏，非大夫之例。今稱公子，是貴於同大夫之文，<sup>①</sup>故重發之。嬰齊之亢，又重發者，高侯則没公存氏，處父無氏稱名，嬰齊則前驕後讓，三者皆異，故各發之。

丙申，公及楚人、秦人、宋人、陳人、衛人、鄭人、齊人、曹人、邾人、薛人、繒人盟于蜀。楚其稱人，何也？怪楚向稱公子，今稱人。齊在鄭下，蓋時王所黜。

【疏】注「齊在」至「所黜」。○釋曰：知時王黜者，以秦、宋、陳、衛以下皆稱人，稱人則非卿，以其諸侯之大夫俱是微者，必不能自有升降，故知時王所黜。齊以傲敵之故，師敗於鞏，兵臨城下，微弱之極，天子因其勢，故退之鄭下，此乃一時之宜，非是常例也。知諸侯之大夫是微人者，傳直怪嬰齊稱人，不論諸侯大夫，明知並是微者。

於是而後公得其所也。會與盟同月，則地會，不地盟；不同月，則地會，地盟。此其地會、地盟，何也？以公得其所，申其事也。公得其所，謂楚稱人；申其事，謂地會、地盟。○「會與盟同月」絕句，「不同月」絕句，「則地會地盟」絕句。

【疏】「會與」至「事也」。○釋曰：同月，則地會、

不地盟者，僖二十八年踐土之盟，襄十六年溴梁之盟是也。不同月，則地會、地盟者，<sup>②</sup>昭十三年平丘之盟，定四年皐鼬之盟是也。

今之屈，向之驕也。

三年，春，王正月，公會晉侯、宋公、衛侯、曹伯伐鄭。宋、衛未葬，而自同於正君，故書公侯以譏之。

【疏】注「宋衛」至「譏之」。○釋曰：范意雖葬未踰年，亦不得成君，雖踰年而未葬，亦不得成君，故云宋衛未葬，書公侯以譏之。踰年未葬不得成君，此注是也。雖葬，未踰年，不得成君，即四年「鄭伯伐許」，注云「喪未踰年，自同於正君，亦譏之」是也。

辛亥，葬衛穆公。

二月，公至自伐鄭。

甲子，新宮災，三日哭。新宮者，禰宮也。謂宣公廟也。三年喪畢，宣公神主新入廟，故謂之也。

① 「同」，阮校：「何校本『同』作『稱』。」今按：單疏本同何校本。

② 「地盟」之「地」字，原無，據單疏本補。

新宮。○禰，乃禮反。

【疏】「甲子新宮災」。○釋曰：何休云：「此象宣公篡位，<sup>①</sup>當誅絕，不宜列之昭穆。<sup>②</sup>成公結怨強齊，不得久承宗廟之象也。」<sup>③</sup>范以天災難知，非人所及，故不言之。

三日哭，哀也。其哀，禮也。官廟，親之神靈所憑居，而遇災，故以哀哭爲禮。○馮居，皮冰反。迫近不敢稱謚，恭也。迫近，言親禰也。桓，僖遠祖則稱謚。

【疏】注「迫近」至「稱謚」。○釋曰：范不據丹桓宮者，傳云「迫近不敢稱謚」，言近則宜對遠，故據桓、僖言之。其丹桓宮，以莊公娶父之讎女，故特言桓宮，以譏莊之不子也。<sup>④</sup>

其辭恭且哀，以成公爲無譏矣。

乙亥，葬宋文公。

夏，公如晉。

鄭公子去疾帥師伐許。○去，起吕反。

【疏】「其辭」至「譏矣」。○釋曰：不稱謚，明其恭。三日哭，著其哀。是成公爲無譏矣。

公至自晉。

秋，叔孫僑如帥師圍棘。

大雩。

晉郤克、衛孫良夫伐牆咎如。○咎音羔。

【疏】「叔孫」至「圍棘」。○釋曰：《公羊》、《左氏》皆以棘爲汶陽之田邑，此傳無說，事或然也。

冬，十有一月，晉侯使荀庚來聘。

衛侯使孫良夫來聘。丙午，及荀庚盟。

丁未，及孫良夫盟。其日，公也。來聘而求

盟，不言及者，以國與之也。不言其人，亦

以國與之也。徐邈曰：「不言及，謂凡書來盟者也，

若宣七年「衛孫良夫來盟」是也。以國與之，謂舉國爲主，故直書外來爾。此先聘而後盟，故不言來盟，總言及而不復著其人，亦是舉國之辭。」○復，扶又反。

【疏】「其日」至「與之也」。○釋曰：案傳例：

「前定之盟不日，後定之盟則日。」此云「公也」者，其實盟

①「位」，阮校：「按《公羊》注「位」作「立」。」

②「列之」，阮校：「《公羊》注無「之」字。」

③「象」，阮校：「《公羊》注「象」作「應」。」

④「子」，阮校：「單疏本「子」作「孝」。」

雖公在位，但爲前定則不日，後定則日，此其日，公故也，則後定亦可知矣。但以上文聘既接公，下文及則公文未顯，嫌不得再煩尊者，恐盟時無公，故傳云公以釋之。傳又云不言及者，則宣七年「衛孫良夫來盟」是也。不言其人者，解此文不書內之名氏是也。又云不言求兩欲之也者，言求當直言求盟，如孫良夫是也。不言求者，此云來聘，又云及盟是也。何者？來聘是他求，言及，我欲也。是兩國同欲之文，非獨求之稱，故云不言求，兩欲之也。若然，上文云來聘而求盟者，解二人本意來聘，只爲求盟，爲下「不言求」張本也。

### 不言求，兩欲之也。

鄭伐許。鄭從楚而伐衛之喪，又叛諸侯之盟，故狄之。

【疏】注「鄭從」至「狄之」。○釋曰：知伐衛之喪，又叛諸侯之盟，故狄之者，昭十二年「晉伐鮮虞」，傳曰「不正其與夷狄交伐中國，故狄稱之也」。定四年傳云，吳不稱子，「反其狄道也」。鄭、衛同姓，不有弔臨之恩，而伐其喪，其爲惡行，莫斯之甚，而亦直舉國稱之，明爲夷狄之行也。叛諸侯之盟者，舊解以爲上文背晉爲諸侯所伐是也。①又其言伐喪者，前年衛侯速卒，楚師、鄭師侵衛是也。不於伐喪貶者，其罪不積，不足以成惡。②鄭既伐喪背盟，一年之中，再加兵於許，故於此夷狄之。

### 四年，春，宋公使華元來聘。

三月，壬申，鄭伯堅卒。

杞伯來朝。○朝，直遙反。

夏，四月，甲寅，臧孫許卒。

公如晉。

葬鄭襄公。秋，公至自晉。

冬，城鄆。○鄆音運。

鄭伯伐許。喪未踰年，自同於正君，亦譏之。

【疏】注「喪未」至「譏之」。○釋曰：傳於宋襄起

喪稱之例，則諸侯亦同之可知，故上下經文，宋、衛、陳皆有子稱，鄭是伯爵，與侯同於七命，明在喪之稱，或亦與侯同也。《左氏》之例，唯云公侯曰子，伯則不入於例，與此異也。

五年，春，王正月，杞叔姬來歸。婦人

之義，嫁曰歸，反曰來歸。

仲孫蔑如宋。

夏，叔孫僑如會晉荀首于穀。穀，齊地。

①「背」，單疏本作「叛」。阮校：「閩本「背」作「皆」，何校本作「叛」。」

②「以」，單疏本無。

【疏】「婦人」至「來歸」。①○釋曰：范氏云：「出女例凡三，齊人來歸子叔姬，一也。邾伯姬來歸，二也。此杞叔姬來歸，三也。」又別引文十八年「夫人姜氏歸於齊」爲例者，出既是同，但內外爲異，故并引之也。子叔姬淫而得罪，爲齊所逐，故言齊人來歸。今杞叔姬文既與之異，故並發傳舉其上下，邾伯姬亦足以相包，故不更發之。

梁山崩。梁山，晉之望也。不言晉者，名山大澤不以封也。許慎曰：「山者陽位，君之象也。」象君權壞。

【疏】注「梁山」至「望也」。○釋曰：《詩》云：「弈弈梁山。」是韓國之鎮，霍、陽、韓、魏，晉之地，②故云晉之望也。

不日，何也？據僖十四年「秋，八月，辛卯，沙鹿崩」，書曰：「高者有崩道也。有崩道，則何以書也？」曰：梁山崩，壅遏河三日不流。晉君召伯尊而問焉。伯尊來，遇輦者，輦者不辟，使車右下而鞭之。凡車，將在左，御在中，有力之人在右，所以備非常。○壅，於勇反。遏，於葛反。伯尊，《左氏》作伯宗。辟音避。將，子匠反。輦者曰：「所以鞭我者，其取道遠矣。」所用鞭我之間，行道則可遠。伯尊下車而問焉，以其言有理，知

非凡人。曰：「子有聞乎？」對曰：「梁山崩，壅遏河三日不流。」伯尊曰：「君爲此召我也，爲之奈何？」輦者曰：「天有山，天崩之。天有河，天壅之。雖召伯尊，如之何？」伯尊由忠問焉。用忠誠之心問之。○爲此，于僞反。輦者曰：「君親素縞，帥羣臣而哭之，既而祠焉，斯流矣。」素衣縞冠，凶服也。所以凶服者，山川，國之鎮也，山崩川塞，示哀窮。○縞，古老反。

【疏】注「素衣」至「哀窮」。○釋曰：禮云素縞者，鄭玄云：「黑經白緯謂之縞，縞冠素純，以純喪冠，故謂之素縞。是祥祭之冠也。」今注云素衣縞冠，與鄭異也。

伯尊至，君問之曰：「梁山崩，壅遏河

①「婦人」至「來歸」，阮校：「此疏闕，監、毛本在傳「反曰來歸」下，何校本上有「傳」字。」

②「陽」，今按：《左傳》襄公二十九年：「公告叔侯。叔侯曰：『虞、虢、焦、滑、霍、揚、韓、魏皆姬姓也，晉是以大。』」杜注：「八國皆晉所滅。」阮校云：「『揚』當作『楊』。」則此「陽」當爲「楊」之訛。

三日不流，爲之奈何？」伯尊曰：「君親素縞，帥羣臣而哭之，既而祠焉，斯流矣。」孔子聞之曰：「伯尊其無績乎！攘善也。」績，功也。攘，盜也。取輦者之言而行之，非己之功也。績，或作績，謂無繼嗣。○攘，如羊反。

【疏】注「謂無繼嗣」。○釋曰：舊說云，伯尊，晉之賢大夫。輦人，晉之隱士。今一遇吐誠，理難再得。伯尊不能薦之於晉侯，以救朝廷之急，反竊其語而晦其人，蔽賢罪深，故被戮絕嗣。子夏雖匿聖人之論，能播教於西河，令黑水之人欽其風，蒲坂之間愛其道，其罪先輕，<sup>①</sup>故直喪明而已。然此之立說，恐非其理，何者？天道冥昧，非人所知，大聖立言，意在軌世，則伯尊之戮，未必由蔽賢人之言，卜商喪明，豈關匿聖人之論？徒爭罪之輕重，妄說受罪淺深，據理言之，恐非聖賢之旨。何休以爲梁山崩，壅河三日不流，象諸侯失勢，王道絕，故自是之後六十年之中，弑君十四，亡國三十二。案此傳說輦者之言，竟不論天子諸侯喪亡之事，則何休之言，未必通於此也。

### 秋，大水。

冬，十一月，己酉，天王崩。定王。

十有二月，己丑，公會晉侯、齊侯、宋公、衛侯、鄭伯、曹伯、邾子、杞伯，同盟于蟲

牢。蟲牢，鄭地。○蟲，直忠反。牢，力刀反。

六年，春，王正月，公至自會。

二月，辛巳，立武宮。舊說曰：武公之宮廟毀已久矣。故傳曰「不宜立也」。《禮記·明堂位》曰：「魯公之廟，文世室也。武公之廟，武世室也。」言世室，則不毀也，則義與此違。

【疏】「春王」至「自會」。○釋曰：何休云：「月者，魯使大夫獲齊侯，今親相見，危之，故書月也。」傳例致月則危，此書月必是危，但不知同何說以否。或當時有危，傳不言之，故范亦不解。或亦爲此年公遠會始至，<sup>②</sup>立武宮，取鄭，皆是危事，故致會書月也。○「立武宮」。○釋曰：《禮記》稱「世室」，此傳云不宜立者，《禮記》，周末之書，以其廟不毀，<sup>③</sup>故謂之世室，此以武公之廟毀來已久，今復立之，故云不宜立。范義與此違也。何休解《公羊》以爲臧孫許伐齊有功，故立武宮。《左氏》以爲季文子以鞏之功立武宮，據人雖別，同是伐齊。《穀梁》之意，亦

①「先」，阮校：「閩、監、毛本『先』作『既』。」

②「春王」至「自會」，阮校：「此疏閩、監、毛本分屬兩節，一在『公至自會』下，一在注『義與此違』下。」

③「亦」，阮校：「單疏本『亦』作『以』。案『以』是。」

④「毀」，阮校：「單疏本『毀』作『廢』。」

以勝齊立武宮也。

立者，不宜立也。

取鄆。鄆，國也。○鄆音專，又市轉反，國名。

【疏】「取鄆」。○釋曰：「隱十年，『鄭伯伐取之』，直注云：『凡書取國，皆滅也，變滅言取，明其易。』今不言滅鄆，是明魯取之易也，又惡鄆不備也。凡書取之例，以內外皆有。①外書取者，即徐人取舒是也。內書取者，即取鄆是也。其內被取邑亦為取，齊侯取鄆是也。《公羊》以為鄆是邾之邑，與《穀梁》異。

衛孫良夫帥師侵宋。

夏，六月，邾子來朝。○朝，直遙反。

公孫嬰齊如晉。

壬申，鄭伯費卒。○費音秘。

【疏】「鄭伯費卒」。○釋曰：案《世本》及《左氏》，鄭伯費是鄭悼公。不書葬者，何休云：「楚伐鄭喪，諸侯不能救，晉欒書又侵之，故去葬，使若非伐喪者，為中國諱也。」在隱三年注，魯不往會，則經亦不書，則悼公不書葬者，魯不會也。

秋，仲孫蔑、叔孫僑如帥師侵宋。

楚公子嬰齊帥師伐鄭。

冬，季孫行父如晉。

晉欒書帥師救鄭。②

七年，春，王正月，驪鼠食郊牛角。不言免牛者，以方改卜郊，吉否未可知。○驪音奚。吉否，方九反。

【疏】注「不言」至「可知」。○釋曰：下傳稱免牲，不曰不郊，免牛亦然。此言免牛，則嫌似不郊，故云不言免牛者，以方改卜郊，未可知也。

不言日，急辭也，辭中促急，不容日。

【疏】「不言」至「辭也」。○釋曰：宣三年「郊牛之口傷」，彼言「之」是緩辭，亦不云日。此傳云「不言日，急辭也」者，案宣三年傳言「之」，是牛自傷之緩，此言「其」，是鼠食牛之緩。二者立文雖異，俱是緩辭，則辭間容日，亦是緩辭。傳云「不言日，急辭也」，此已發例，則定十五年「哀元年之類，不言日者，並是急辭也。緩辭不言日者，言「之」既是緩辭可知，故不須更書日以見緩也。

①「以」，阮校：「單疏本『以』作『有』。何云『以』字疑衍。」

②「救鄭」，《穀梁補注》曰《公羊》作「侵鄭」。



過有司也。郊牛日展觚角而知傷，<sup>①</sup>展道盡矣，其所以備災之道不盡也。有司展察牛而即知傷，是展察之道盡，不能防災禦患，致使牛傷，故不書日，以顯有司之過。觚，球球然角貌。○觚角，其穆反，一音求，角貌，或本作觚，非。禦，魚呂反。球音求。

【疏】「郊牛」至「盡也」。○釋曰：展，省察也。言日日皆省察牛之觚角，而則知傷，是省察之道盡矣。展道雖盡，不能防災禦患，致使牛傷，長其所以備災之道不盡，<sup>②</sup>是故不言日以責有司也。牛角云觚者，《詩》稱「兕觥其觚」，<sup>③</sup>又曰「有觚其角」是也。

改卜牛，騶鼠又食其角。又，有繼之辭也。前已食，故曰繼。其，緩辭也。曰亡乎人矣，非人之所能也，所以免有司之過也。至此復食，乃知國無賢君，天災之爾，非有司之過也，故言其以赦之。○能，如字，亦作耐。復食，扶又反，下同。

【疏】「其緩」至「過也」。○釋曰：解經上文云「騶鼠食郊牛角」，不言「其」，此文云「又食其角」，乃變言「其」，故釋之云「其，緩辭也」。「曰亡乎人矣」，亡，無也。至此郊牛復食，乃知國無賢君，非人所不能也。謂國無賢君之故，為上天之所災，非人力所能禁，所以免有司之過也。謂經言「其」者，所以赦有司也。<sup>④</sup>

乃免牛。乃者，亡乎人之辭也。免牲

者，為之緇衣纁裳，有司玄端，奉送至于南郊。免牛亦然。免牲不曰不郊，免牛亦然。郊者用牲，今言免牲，則不郊顯矣。若言免牛，亦不郊。而經復書不郊者，蓋為三望起爾，言時既不郊而猶三望，明失禮。○緇，側其反。纁，許云反。為，于偽反。

【疏】「乃者」至「亦然」。○釋曰：重發傳者，此再食乃免牛，嫌與他例別，故重發之。○注「蓋為」至「起爾」。○釋曰：僖三十一年「夏，四月，四卜郊，不從，乃免牲，猶三望」。彼不云不郊，此既云「免牛」，又云「不郊」者，彼免牲與三望同時，故畧去不郊之文，此春免牛，夏乃三望，故備言之。

吳伐郟。○郟音談。

夏，五月，曹伯來朝。

不郊，猶三望。

①「觚」，原作「斛」，阮校：「石經、閩、毛本「斛」作「觚」，是也。」今據改。

②「長」，宋刻元修本、單疏本作「是」。

③「觥」，單疏本作「觥」。《十三經注疏·毛詩注疏》《小雅·桑扈》亦作「觥」。

④「赦」，原作「放」，阮校：「閩本「放」作「赦」，是也。」今據改。

秋，楚公子嬰齊帥師伐鄭。

公會晉侯、齊侯、宋公、衛侯、曹伯、莒子、邾子、杞伯救鄭。八月，戊辰，同盟于馬陵。  
馬陵，衛地。

公至自會。

吳人州來。  
州來，楚地。

冬，大雩。雩不月而時，非之也。冬無爲雩也。

【疏】「雩不」至「雩也」。○釋曰：傳例云：「月雩，正也。時雩，非正也。」非正者，其時未窮，人力未盡，毛澤已竭，不雩則不及事，故月以明之，則經書秋八月雩、九月雩是也。既過此節，秋不書早，則冬無爲雩也，故鄭《釋廢疾》去冬及春夏。<sup>①</sup>案《春秋說考異鄭》，三時唯有禘禮，無雩祭之事，唯四月龍星見，始有常雩耳，故因載其禘請山川辭云：「方今天旱，野無生稼，寡人當死，百姓何依。不敢煩民請命，願撫萬民，以身塞無狀。」是鄭意亦以不須雩，唯有禱請而已。

衛孫林父出奔晉。

八年，春，晉侯使韓穿來言汶陽之田，歸之于齊。晉爲盟主，齊還事晉，故使魯還二年齊所

反之田。○穿音川。

【疏】注「晉爲」至「之田」。○釋曰：《公羊》以爲齊侯敗鞏之後，<sup>②</sup>七年不飲酒，不食肉，晉侯高其德，遂反其所取侵地。此雖無傳，齊頃是中平之主，安能以一敗之後，七年不飲酒食肉乎？故以爲晉爲盟主，齊還事晉，故使魯還二年齊所反之田。杜預解《左氏》，其意亦然。

于齊，緩辭也，不使盡我也。若曰爲之請歸，不使晉制命于我。○爲，于僞反。

【疏】「于齊緩辭也」。○釋曰：僖二十八年，「晉人執衛侯，歸之于京師」，傳以言「之」爲「緩辭也」。今言「歸之于齊」爲緩辭者，之，緩辭，自是常例，「于齊」之理未明，故特釋之，辭雖不同，亦是緩也。<sup>③</sup>此以緩辭言之者，諱不使制命於我也。

晉樂書帥師侵蔡。

公孫嬰齊如莒。

宋公使華元來聘。

夏，宋公使公孫壽來納幣。婚禮不稱主人，

①「去」，孫校：當爲「云」。

②「鞏」，原作「案」，據單疏本改。

③「亦是」，阮校：「單疏本無「是」字。」

宋公無主婚者，自命之，故稱使。納幣不書，書者，賢伯姬，故盡其事。

【疏】注「婚禮」至「其事」。○釋曰：《公羊》以為

婚禮不稱主人，宋公無主婚者，辭窮自命之，故公孫壽來納幣稱使。紀侯有母，履綸受紀侯之母命，婦人之命不通，故不稱使。案隱二年傳云：「其不言使，何也？逆之道微，無足道焉爾。」據彼傳文以「逆者微，無足道焉爾」，故不言使，則與《公羊》異。觀此注意，云宋公無主婚者，自命之，故稱使，明為母命之，則不稱使，似與《公羊》同。而與傳違者，范以紀侯之與宋公皆是無母，宜並稱主人，但納幣是卿之事，故稱宋公使也，逆女是君之事，使大夫非正，故履綸不稱使。今此注云「婚禮不稱主人」，亦據諸侯母在者言之。又且履綸不稱使，大率言之，亦是不稱主人之事，故注言之耳。納幣不書，其經之所書者三：莊公以非禮書，一也；公子遂以喪錄，二也；此為賢伯姬，三也。范知為賢伯姬者，《公羊傳》云：「納幣不書，此何以書？錄伯姬也。」是為賢而錄也。

### 晉殺其大夫趙同、趙括。

秋，七月，天子使召伯來錫公命。禮有受命，無來錫命，錫命，非正也。曰天子，何也？曰見一稱也。天王、天子，王者之通稱。自此以上，未有言天子者，今言天子，是更見一稱。○召，上昭反。①曰

見，賢偏反，注「更見」同。一稱，尺證反。以上，時掌反。

【疏】「曰見一稱也」。○釋曰：王既是四大之重，宜表異號，莫若繫天，以衆人卑故稱母子，貴者取貴稱，故謂之天子。人《春秋》以來，唯取仁義之稱，未表繫天子之尊，故曰「更見一稱也」。《公羊傳》云：「其稱天子何？元年春王正月，正也。其餘皆通矣。」何休云：「德合於元者稱皇，德合於天者稱帝，仁義合者稱王。」又云：「王者，取天下歸往也。天子者，爵稱也。聖人受命，皆天所生，故謂之天子。或言王，或言天王，②或言天子，皆相通也。」唯賈逵云：「畿內稱王，諸夏稱天王，夷狄稱天子。」其理非也。

冬，十月，癸卯，杞叔姬卒。杜預曰：「前五年來歸者，女既適人，雖見出棄，猶以成人之禮書之，終為杞伯所葬，故稱杞叔姬。」

晉侯使士燮來聘。○燮，素協反。

叔孫僑如會晉士燮、齊人、邾人伐郟。

衛人來媵。杜預曰：「古者諸侯娶嫡夫人，及

①「昭」，宋刻元修本及《釋文》作「昭」。

②「或言王」，原無，阮校：「監本『王』誤『主』。按：依

《公羊》注，「或」字上有「或言王」三字，此不當刪。」今據補。

左右媵，各有姪娣，皆同姓之國。國三人，凡九女，所以廣繼嗣。」魯將嫁伯姬于宋，故衛來媵。○媵，以證反。又繩證反。嫡，丁歷反。姪，大結反。娣音弟。

【疏】「衛人來媵」。○釋曰：《公羊》以爲媵不合書，其書者，賢伯姬也。《左氏》雖無其說，蓋以來至於魯，<sup>①</sup>然後與嫡行，故書之。此傳之意，以伯姬爲災而死，閔之，故書其事。是言三傳意小異也。

媵，淺事也，不志。此其志何也？以

伯姬之不得其所，故盡其事也。不得其所，謂災死也。江熙曰：「共公之葬由伯姬，則共公是失德者也。傷伯姬賢而嫁不得其所。」○共音恭，下同。

【疏】注「江熙」至「其所」。○釋曰：江熙以不得其所，爲共公失德，文無所據。范引之者，傳異聞也。

①「至」，阮校：「何校本『至』作『致』。」

# 監本春秋穀梁注疏成公卷第十四

起九年，盡十八年

范甯集解 楊士勛疏

九年，春，王正月，杞伯來逆叔姬之喪以歸。傳曰：「夫無逆出妻之喪而爲之也。」

【疏】傳「傳曰」至「爲之也」。○釋曰：《公羊》以爲魯脅杞，使逆其喪。《左氏》以爲魯人請之，故杞伯來逆。此傳不說歸之所由，要叔姬免犯七出之愆，<sup>①</sup>反歸父母之國，恩以絕矣。杞伯今復逆出妻之喪，而違禮傷教，言其不合爲而爲之，是以書而記之以見非。傳曰「夫無逆出妻之喪而爲之」，言其不合爲而爲之也。徐邈云：「爲，猶葬也。言夫無逆出妻之喪而葬。」理亦通矣。但范不訓「爲」爲葬也。

公會晉侯、齊侯、宋公、衛侯、鄭伯、曹伯、莒子、杞伯同盟于蒲。蒲，衛地。公至自會。

二月，伯姬歸于宋。逆者非卿，故不書。

夏，季孫行父如宋致女。致，勅戒之言於女。

【疏】傳「夏季」至「致女」。<sup>②</sup>○釋曰：《公羊》以《春秋》「未有言致女者，此其言致女何？賢伯姬也」。《左氏》無說，蓋以使卿則書，餘不書者，或不致，或不使卿也。此傳云「詳其事，賢伯姬也」，則與《公羊》意同耳。徐邈云：「宋公不親迎，故伯姬未順爲夫婦，故父母使卿致伯姬，使成夫婦之禮，以其責小禮違大節，故傳曰「不與內稱」，謂不稱夫人而稱女。」案傳稱賢伯姬，而徐云責伯姬，是背傳而解之，故范以爲謂致勅戒之言於女也。

致者，不致者也。婦人在家制於父，既嫁制於夫。如宋致女，是以我盡之也。刺已嫁而猶以父制盡之。不正，故不與內稱也。內稱，謂稱使。○內稱，尺證反。

【疏】注「內稱謂稱使」。○釋曰：案經，內大夫出國，例言如，不言使。此季孫行父如宋，即是內稱，而云不與者，凡內卿出外，直言如某者即是使，又即是內稱。今行父稱君之命，以在家之道制出嫁之女，雖言如以爲內稱，言致女是見其不與也。僖三年「公子友如齊莅盟」，彼

① 「免」，《穀梁補注》作「既」。

② 「傳」，當誤，「夏季」至「致女」爲《春秋》經文。

亦言「如」，又云「莅盟」者，若直言「如」，則嫌是單聘，故更須言盟也。莅盟既更須言盟也，莅盟則致女亦須言之。<sup>①</sup>云「不與內稱」者，莅盟是禮，致女非禮，故不合言也。若然，傳曰「逆者微，故致女詳其事，賢伯姬也」。據傳文，似致女得正，而云「不正，故不與內稱」者，禮：諸侯親逆，則不須致女，今以宋逆者微，故致女，具傳解其致女之意也；云「不正，故不與內稱也」，其以在家之道制出嫁之女也。此傳之意，因解宋公不親逆，并見致女之不正。又云「賢伯姬」者，以上下文詳，皆云「賢伯姬」，則此云「致女」，亦兼賢伯姬也。若其不為賢伯姬，則致女雖正，亦不書也。

逆者微，故致女詳其事，賢伯姬也。

晉人來媵。媵，淺事也，不志，此其志何也？以伯姬之不得其所，故盡其事也。

秋，七月，丙子，齊侯無野卒。

晉人執鄭伯。

晉樂書帥師伐鄭。不言戰，以鄭伯也。

樂書以鄭伯伐鄭，君臣無戰道。為尊者諱恥，不使臣敵君，王師敗績于貿戎是也。○為尊，于偽反，下及此傳注同。為賢者諱過，為齊桓諱滅項是也。○滅項，平講反。為親者諱疾。雍曰：「樂書以鄭伯伐鄭，不

言戰是也。」鄭，兄弟之國，故謂之親，君臣交兵，病莫大焉，故為之諱。

【疏】「為親者諱疾」。○釋曰：《春秋》諱有四事，一曰為尊者諱恥，二曰為魯諱敗，三曰為賢者諱過，四曰為同姓諱疾。此不言魯者，因親者諱疾，則文亦包魯可知，<sup>②</sup>故不言也。聖人有作，親疏一也。今乃以同姓為別者，《春秋》之意因親疏，<sup>③</sup>故仲尼書經，內外有別。既內外別，則親疏尊卑見矣。

冬，十有一月，葬齊頃公。○頃音傾。

楚公子嬰齊帥師伐莒。庚申，莒潰。

其日，莒雖夷狄，猶中國也。莒雖有夷狄之行，猶是中國。○潰，戶內反。行，下孟反。大夫潰莒而之楚，是以知其上為事也。<sup>④</sup>臣以叛君為事，明君臣無道。

① 「莅盟既更須」至「致女」，單疏本作「莅盟既須更言盟則致女」。

② 「文」，原作「又」，據單疏本改。

③ 「親疏」，《穀梁補注》「疏」上有「及」字。

④ 「知」，《穀梁補注》作「叛」。今按：范注作「臣以叛君為事」，則以「叛」為是。

【疏】「大夫」至「事也」。○釋曰：范《別例》云：

「凡潰者有四，發傳有三。」僖四年「蔡潰」，傳曰：「潰之爲言上下不相得也。」此「莒潰」，傳曰：「大夫潰莒而之楚。」二者雖同是不相得，與君臣不和自潰散少異，故亦發傳。昭二十九年「鄆潰」，彼鄆是邑，與國殊，故重發傳。一解鄆不伐而自潰，與常例異，故重發之。文三年「沈潰」不發者，從例可知他。

惡之，故謹而日之也。潰例月，甚之，故日。

○惡，鳥路反。

【疏】注「潰例」至「故日」。○釋曰：傳上云「猶

中國也」，故日；下文言「惡之，故謹而日之也」。若使莒非中國，雖惡不得日也。以潰例月，爲惡故日，是以云「謹而日之」。范知例月者，僖四年「春，王正月，公會齊侯」云云，「侵蔡。蔡潰」，文三年「春，王正月，叔孫得臣會晉人」云云，「伐沈。沈潰」，是例月。今此莒帥衆民叛君從楚，故變文書日以見惡。

楚人人鄆。

【疏】「楚人人鄆」。○釋曰：魯雖有鄆，此鄆非魯

也，蓋從《左氏》爲莒邑，大都以名通，故不繫莒。或以爲昭元年取鄆，范云魯邑，此不繫莒，則魯邑可知，理亦通也。

秦人、白狄伐晉。

鄭人圍許。

城中城。城中城者，非外民也。譏公不

務德政，恃城以自固，不復能衛其人民。①

【疏】「城中」至「民也」。○釋曰：莊二十九年

冬，「城諸及防」，傳曰：「可城也。」今云「非外民也」者，凡城之志皆譏，就譏之中，閒隙之月少耳，故云可城，乃非全善之文。此亦冬城，嫌同而無譏，故發傳明之。舊解以爲有難而脩城，②則不譏之，若文十二年「季孫行父城諸及鄆」是也。③此涉《左氏》之說。案《穀梁傳》凡城之志皆譏，安得有備難之事？若備難無譏，則經本不應書之，經既書之，明譏例同。或以爲「城諸及防」是十一月，④故傳發可城之文，今此城是十二月，⑤故發外民之傳。雖同是譏，事有優劣，故發傳以異之。

十年，春，衛侯之弟黑背帥師侵鄭。

【疏】「衛侯」至「侵鄭」。○釋曰：范答薄氏駁

①「復」，原作「德」，阮校：「余本、監本、毛本「德」作「復」。今據改。」

②「脩」，阮校：「單疏本「脩」作「新」。」

③「行父」，阮校：「案文公十二年經「父」字下有「帥師」二字。」

④「十一」，阮校：「單疏本「十一」作「其」字。」

⑤「是」，阮校：「單疏本「是」作「爲」。」

云：「諸侯之尊，弟兄不得以屬通，有賢行則書弟。」今黑背書弟者，明亦有賢行故也。陳侯之弟黃，<sup>①</sup>衛侯之弟專，秦伯之弟鍼，傳無賢行，所以皆云弟者，<sup>②</sup>隱七年「齊侯使其弟年來聘」，傳曰：「其弟云者，以其來接於我，舉其貴者也。」是接我者例稱弟。襄二十年「陳侯之弟光出奔楚」，昭元年「秦伯之弟鍼出奔晉」，傳皆曰：「親而奔之，惡也。」襄二十七年「衛侯之弟專出奔晉」，傳云：「其曰弟何也？專有是信者。」三者無罪，<sup>③</sup>故稱弟以惡兄。襄三十年「天王殺其弟佖夫」，傳曰：「甚之也。」稱弟以惡王也。昭八年「陳侯之弟招殺陳世子偃師」，傳曰：「其弟云者，親之也。親而殺之，惡也。」是惡而稱弟也。宣十七年「公弟叔肸卒」，傳曰：「其曰公弟叔肸，賢之也。」莊三十二年「公子牙卒」，無賢行而不稱弟，明稱弟皆賢也。自然黃、專之非直罪兄，必兼有賢行。叔肸以賢稱弟，傳有賢行明文，則黑背稱弟，自然亦有賢行。故范准例言之，稱弟之例有四意，齊侯之弟年來聘，鄭伯使其弟禦來盟，為接我稱弟；衛侯之弟專，為罪兄稱弟；陳侯之弟招，惡之稱弟；叔肸及衛侯之弟黑背，為賢稱弟。是有四也。

夏，四月，五卜郊。不從，乃不郊。夏四月，不時也。郊時極於二月。五卜，強也。乃

者，亡乎人之辭也。○強，其丈反。

【疏】「亡乎人之辭也」。○釋曰：重發傳者，嫌五卜與四卜異故也。

五月，公會晉侯、齊侯、宋公、衛侯、曹伯伐鄭。

齊人來媵。媵伯姬也。異姓來媵，非禮。

【疏】注「媵伯姬」至「非禮」。○釋曰：何休以為異姓亦得媵，故鄭《箴膏肓》難之云：「天子云備百姓，博異氣，諸侯直云備酒漿，何得有異姓在其中？」是亦以異姓不合媵也。此媵不發傳者，上詳其事，見同姓之得禮，異姓非禮可知，故省文。

丙午，晉侯獯卒。○獯，乃侯反。

【疏】「晉侯獯卒」。○釋曰：何休云：「不書葬，為殺大夫趙同等。」范雖不解，或當魯不會也。

秋，七月，公如晉。

冬，十月。

①「黃」，《穀梁傳》襄公二十年「陳侯之弟光」，《釋文》曰：「《左氏》作黃。」據《釋文》及疏下文引襄二十年「陳侯之弟光出奔楚」，此「黃」當為「光」之訛，下「黃專」之「黃」字同。

②「云」，阮校：「何校本「云」作「稱」。今按：單疏本同何校本。

③「三」上，單疏本有「是」字。



十有一年，春，王三月，公至自晉。

晉侯使卻犇來聘。

己丑，及卻犇盟。

○卻犇，尺由反，《公羊》作「卻州」。

【疏】「己丑及卻犇盟」。○釋曰：書日者，公親在，又非前定之盟故也。又不云公者，取舉國與之也。

夏，季孫行父如晉。

秋，叔孫僑如如齊。

冬十月。

十有二年，春，周公出奔晉。周有人無

出。鄭嗣曰：「王者無外，故無出也。宗廟宮室有定所，或即位失其常處，反常書入，內宗廟也。昭二十六年『天王入于成周』是。」○處，昌慮反。其曰出，上下一見之也。鄭嗣曰：「上，謂僖二十四年『天王出居于鄭』，下，謂今周公出奔，上下皆一見之。」○見，賢偏反。言其上下之道無以存也。上雖失之，下孰敢有之？今上下皆失之矣。上雖有不君之失，臣下莫敢效不臣之過。今復云周公之出，則上下皆有失矣。君而不君，臣而不臣，是無以存于世，言周之所以

衰。○復云，扶又反。

【疏】「周有」至「失之矣」。○釋曰：有人無出，注意直據天子，今不云王而云周者，以經雖無王臣人文，至於王臣出，亦是譏限，故言周以總之。范以王者出人之文俱有，故注直言王以當之。案僖二十四年傳云：「雖失天下，莫敢有也。」謂王雖出鄭，不敢有之以為國也。此云「上雖失之，下孰敢有之」，謂上雖有不君之失，臣下誰敢於效為之。①觀經立說，故二處不同也。「今上下皆失之矣」，謂王既書出居于鄭，今復云周公出奔晉，是上下皆有失也。《公羊》以為書出者，周公「自其私土而出也」。②《左氏》以為書出者，已復之，「周公自出」。並與《穀梁》異也。

夏，公會晉侯、衛侯于瑣澤。瑣澤，某地。

○瑣，素果反。

秋，晉人敗狄于交剛。交剛，某地。中國

與夷狄不言戰，皆曰敗之。不使夷狄敵中國。

夷狄不日。

①「誰敢於」，阮校：「單疏本『誰』作『孰』，『於』作『放』。」

②「而出」，原作「謂國」，阮校：「《公羊傳》『謂國』作『而出』，此誤。」今據改。

【疏】「夷狄不日」。○釋曰：不於箕役發傳者，以再敗狄師甚之，故發於此。

冬，十月。

十有三年，春，晉侯使卻錡來乞師。  
○錡，魚綺反。乞，重辭也。古之人重師，故以乞言之也。

【疏】「乞師。乞，重辭也」。① ○釋曰：重發傳者，公子遂內之始，此外之初，故發之也。古之人重師，故以乞言之也者，古人以師之爲重，故以重辭言之。古者，舊以爲穀梁子後代人，② 遠者舉當時之事，亦以古言之，徐邈以爲引古以刺今耳。

三月，公如京師。公如京師不月，月，非如也。時實會晉伐秦，過京師也。公行出竟，有危則月，朝聘京師，③ 理無危懼，故不月。○過京師，音戈，下同。竟音境。朝聘，直遙反，下皆同。非如而曰如，不叛京師也。因其過朝，故正其文，若使本自往。

【疏】「公如」至「師也」。○釋曰：僖二十八年「五月，癸丑，公會晉侯」云云，「盟于踐土」，「陳侯如會」，「公朝於王所」，彼日月並書。「公朝于王所」，雖文承「五

月，癸丑」之下，彼之日月自爲盟，不爲朝也。「壬申，公朝于王所」，書日，此意取「日不繫月」，猶諸侯不宗於天王。朝會無危，則例時。今公以伐秦過京師，非真朝，故書月以見意。

夏，五月，公自京師，遂會晉侯、宋公、衛侯、鄭伯、曹伯、邾人、滕人伐秦。言受命不敢叛周也。使若既朝王，而王命已使伐秦。叛周，謂專征伐。

① 「乞師乞重辭也」，阮校：「何校本作「傳乞重至之也」。」

② 「人」，原作「火」，據宋刻元修本，單疏本改。

③ 「聘」，《穀梁補注》作「覲」。

④ 「公自京師遂會晉侯」，阮校：「石經「公」下有「至」字，「晉侯」下有「齊侯」二字。余本無「至」字，有「齊侯」二字。何煌云：「考石經三傳，《左氏》有「至」字，《公羊》無，疏云：「公」下「自」上有「至」字者衍文也。《穀梁》石經此年係宋人補刻，疑「至」字或亦出臆增也。」案：是年石經實非補刻，何蓋偶誤。《公羊》疏以「至」字爲衍文者，指《公羊傳》而言，《穀梁》自與《公羊》不同。何據彼疏疑此經，非是。又補刻石經係朱梁，謂宋人補刻，亦非是。」

【疏】「言受」至「周也」。○釋曰：「公子遂如京師，遂如晉」，傳云：「不叛天子。」此文重發傳者，嫌君臣異例也。

曹伯廬卒于師。○廬，力吳反，又力魚反。

傳曰：「閔之也。公、大夫在師曰『師』，在會曰『會』。」

【疏】「曰閔」至「曰會」。○釋曰：諸侯或從會，

或從伐，皆閔其在外而死，故云卒于師于會也。卒于師，則此曹伯廬，襄十八年曹伯負芻是也。卒于會者，則定四年杞伯成卒于會是也。僖四年許男新臣亦卒於師，不言於師者，彼以內桓師，雖卒於外，以若在國然，故不書于師。然則大夫之卒，例所不書，而與公同例，云在師曰師，在會曰會者，舊解以爲《春秋》緣大夫之心，則知書君之卒，於師則言師，於會則言會，非謂外大夫書卒于師。若然，傳當云大夫也，公不得云大夫，且經無其事，傳因類發例者，其數不少，即日食云外壤，饑云饑康之等是也。彼經無其事，傳得因類引之，此雖無經，何以爲不得又會大夫？單伯之徒亦書會諸侯，若使卒於師，因當書之，<sup>①</sup>但無卒于師卒于會者耳。故知公、大夫在師曰師，謂公及大夫二者皆然也。徐邈之注，亦以爲公及大夫所會諸侯在師言師，在會言會。明爲舊解非也。

秋，七月，公至自伐秦。

冬，葬曹宣公。葬時，正也。

【疏】「葬時，正也」。○釋曰：嫌卒于師，失正葬，故重發之。葬正則是無危。不日卒者，蓋非嫡子爲君故也。又僖四年注云：「新臣卒于楚，故不日耳。」則此

不日者，或當爲卒于秦故也。若然，襄二十六年「壬午，許男甯卒于楚」，注云：「許男卒于楚，則在外已顯矣。日卒，明其正。」二注不同者，以無正文，二理俱通，故爲兩解。或亦新臣非嫡子，不須兩解，理足可通耳。

十有四年，春，王正月，莒子朱卒。徐邈

曰：「傳稱『莒雖夷狄猶中國也』，言莒本中國，末世衰弱，遂行夷禮。葬皆稱謚，而莒君無謚，謚以公配。而吳楚稱王，所以終《春秋》亦不得書葬。」

【疏】「莒子朱卒」。○釋曰：莒子朱者，莒渠丘

公。今不書葬者，莒行夷禮，則是失德。又葬須稱謚，莒夷無謚，故不書葬也。不日卒者，何休云：「《人》《春秋》以來，至此始書卒，故畧之不日。」或當既行夷禮，不得同中國，故不日。或當非正卒。無文可明之。

夏，衛孫林父自晉歸于衛。

秋，叔孫僑如如齊逆女。泰曰：「親迎例

①「因」，阮校：「何校本『因』作『固』。」今按：單疏本同何校本。

時，大夫逆，皆謹月以譏之。下云「九月，僑如以夫人婦姜氏至自齊」，一事不二譏，故此可以不月也。「宣元年「公子遂如齊逆女」，亦以時逆而月致，義與此同。○親迎，魚敬反，傳同，本或作逆。

【疏】注「宣元」至「此同」。○釋曰：案宣元年，

「春，王正月，公即位，公子遂如齊逆女」，彼文承正月之下，即與此別。而云同者，彼雖文承正月之下，正月自爲即位發文，非是爲遂逆女。若逆女，既蒙上月，則下夫人至不須云月。案此比例，知彼亦當時也。

鄭公子喜帥師伐許。

九月，僑如以夫人婦姜氏至自齊。大夫不以夫人，以夫人，非正也，刺不親迎也。僑如之挈，由上致之也。○刺不，七賜反。挈，苦結反。

【疏】「大夫」至「之也」。○釋曰：「公子翬如齊逆女」，傳曰：「不言翬之來，何見于公也？」然則夫人見於君，宜言以夫人至。而曰非正者，逆女，親者也，使大夫，非正也，非正而以夫人至，故刺之。彼以先接於公，故無至文。此使大夫有譏，則翬之被責，居然顯矣。不發於宣公逆女，於此發之者，宣公以喪娶，故畧夫人而不氏，一事不二譏，故省其文。成公非喪娶而不親迎，嫌其無罪，故傳明之。莊公親逆，傳亦譏之者，以娶讎人之女而事宗

廟故也。由上致之者，宣元年注云：「上謂宣公。」則謂成公也。<sup>③</sup>

冬，十月，庚寅，衛侯臧卒。○臧，子郎反。

秦伯卒。

【疏】「秦伯卒」。○釋曰：《世本》及《左氏》是秦桓公也。

十有五年，春，王二月，葬衛定公。

三月，乙巳，仲嬰齊卒。此公孫也，其

曰仲，何也？此蓋仲遂之子，據實公孫。子由父

疏之也。雍曰：「父有弑君之罪，故不得言公子，父不言公子，則子不得稱公孫，是見疏之罪由父故。」<sup>④</sup>

①「位」，原作「云」，阮校：「閩、監、毛本「云」作「位」，單疏本「公即云」三字作「公即位下文即去」七字，蓋十行本誤脫。」今據改。

②「之來」，《穀梁補注》「之」下有「以」字。今按：《穀梁傳》桓公三年正作「不言翬之以來」。

③「則」，單疏本「則」上有「此」字。阮校：「監、毛本「則」下有「此」字，何校本「此」在「則」上。」

④「是見」，原作「是是」，阮校：「余本、監、毛本下「是」作「見」。今據改。

【疏】「子由父疏之也」。○釋曰：宣十八年，「公孫歸父如晉」，歸父亦襄仲之子，何以不疏者？卒則身之終，今嬰齊之卒，當繼於父，父既被疏，故子亦當畧。歸父則奉命出使使奔之，故具名氏以恩錄也。歸父還不氏者，以明由上也。《公羊》以爲仲嬰齊何以不稱公孫，以歸父既是兄，公孫嬰齊爲歸父後，爲人後者則爲之子，故不稱公孫，與《穀梁》異。

癸丑，公會晉侯、衛侯、鄭伯、曹伯、宋世子成、齊國佐、邾人同盟于戚。

晉侯執曹伯，歸于京師。以晉侯而斥執曹伯，惡晉侯也。僖二十八年，「晉人執衛侯，歸之于京師」，此伯討之文也。今以侯執伯，明執之不以其罪。○惡晉，烏路反。

【疏】「斥執曹伯」。○釋曰：重發者，此執歸于京師，嫌晉之無罪，故明之。○注「僖二十」至「其罪」。○釋曰：衛侯有罪，故稱人言執，又歸之京師，令天子決之，是伯討之文也。又且此傳云：「以晉侯而斥執曹伯，惡晉侯也。」稱侯以執爲惡，<sup>①</sup>明稱人以執是伯討也。若然，定元年「晉人執宋仲幾」，傳曰：「此大夫，其曰人何也？微之也。何爲微之？不正其執人於尊者之所也，不與大夫之得伯討也。」<sup>②</sup>彼又稱人非伯討者，彼仲幾雖則逆命，當歸於王之有司。今晉大夫執人於尊者之側，故地

于京師以見尊，稱人以見微，<sup>③</sup>是不與大夫之伯討也。伯討宜施諸侯，大夫則不得也。《左氏》以爲曹伯殺大子而自立，《公羊》之意，曹伯篡喜時，據二傳之文則是有罪。范云不以其罪者，范以曹伯言執，云惡晉侯，曹伯之人，云歸爲善。據此二文言之，明執之不得以其罪，不得以《公羊》、《左氏》爲難。

不言「之」，急辭也，斷在晉侯也。明晉之私。○斷在，丁亂反。

公至自會。

夏，六月，宋公固卒。

楚子伐鄭。

秋，八月，庚辰，葬宋共公。月卒日葬，非葬者也。宋共公正立，卒當書日，葬無甚危，則當錄月，今反常違例，故知不葬者也。然則共公之不宜書葬，

①「稱侯以執爲惡」，原作「稱人以執是伯」，阮校：「單疏本『人』作『侯』，『是伯』作『爲惡』」。案：單疏本是，注疏本蓋緣與下文相涉而訛。今據改。

②「得」，單疏本作「特」。阮校：「『得』字乃衍文。」

③「微」，原作「彼」，阮校：「何校本『彼』作『微』，是也。」今按：單疏本同何校本，據改。

昏亂故。○共音恭。

【疏】注「宋共」至「亂故」。○釋曰：葬書時，正也。注不以時決而以月決之者，以葬書時最爲正，書月有故，書日危不得葬，今共公月猶不得，明不葬可知，故不以時決之。然共公失德，所以不全去葬文者，爲伯姬書葬，故不得不存共公之葬，但書日以表失德，且不全去葬文，嫌是魯之不會，無以明其失德也。

此其言葬，何也？以其葬共姬，不可不葬共公也。葬共姬，則其不可不葬共公，何也？夫人之義不踰君也，爲賢者崇也。

賢崇伯姬，故書共公葬。○爲，于僞反。

宋華元出奔晉。

宋華元自晉歸于宋。

宋殺其大夫山。

【疏】「宋殺其大夫」。○釋曰：《左氏》以爲背其族。何休注《公羊》以爲譖華元，貶之。《穀梁》無說，不知所從。

宋魚石出奔楚。

冬，十有一月，叔孫僑如會晉士燮、齊高無咎、宋華元、衛孫林父、鄭公子鮒、邾

人，會吳于鍾離。會又會，外之也。兩書會，<sup>①</sup>殊外夷狄。○無咎，其九反。鮒音秋。

【疏】「會又會外之也」。○釋曰：重發傳者，攢函表中國之辭，鍾離明内外之稱，故兩發之。

許遷于葉。遷者，猶得其國家以往者也。其地，許復見也。○葉，始涉反。復，<sup>②</sup>扶又反。見也，賢徧反。

十有六年，春，王正月，雨木冰。《穀梁傳》曰：<sup>③</sup>雨木冰者，木介甲冑，兵之象。○雨如字，或于付反，非也。介音界。冑，直又反。

【疏】「雨木冰」。○釋曰：劉向云：「冰者陰之盛，木者少陽，卿大夫之象。此是人將有害，則陰氣脅木，木先寒，得雨而冰也。是時叔孫僑如出奔，公子偃誅死。一曰時晉執季孫行父，執公，此執辱之異也。」徐邈云：「五行以木爲介，介，甲也。木者少陽之精，幼君大臣之象。冰者兵之象。」<sup>④</sup>今冰脅木，君臣將見執之異。根枝折

① 「兩」，《穀梁補注》作「再」。

② 「復」，原作「覆」，據宋刻元修本及《釋文》改。

③ 「穀梁傳曰」，《穀梁補注》引作「穀梁說」。

④ 「冰者」下，《穀梁補注》有「凝陰」二字。

者，象禍害速至也。」或曰木冰比木介，①介者甲也，兵之象也。是歲有鄢陵之戰，楚子傷目而敗。②注云兵之象，則或說是也。

雨而木冰也。雨著木成冰。○著，直畧反。

志異也。傳曰：「根枝折。」

夏，四月，辛未，滕子卒。

【疏】「滕子卒」。○釋曰：《左氏》滕文公。

鄭公孫喜帥師侵宋。

六月，丙寅，朔，日有食之。

晉侯使欒黶來乞師。將與鄭楚戰。○壓，於

斬反。

甲午，晦，晉侯及楚子、鄭伯戰于鄢陵，

鄢陵，鄭地。○鄢音偃，又於建反。楚子、鄭師敗

績。日事遇晦曰晦。四體偏斷曰敗，此其

敗則目也。此言敗者，目傷故。

【疏】「日事遇晦曰晦」。○釋曰：僖十五年「己

卯，晦，震夷伯之廟」，傳曰：「晦，冥也。」則晦非常文。而云遇晦者，舊解以為僖十五年傳曰「晦，冥也」者，謂月光盡而夜闇，不謂非晦日也。今以為震夷伯之廟云晦者，如《公羊》晝日為冥。自餘稱晦者，是月盡日也。既

云日事遇晦，何以日食不書晦者？日食既言日，雖不言晦，可以知省文也。③必知不如《公羊》以晝為晦冥者，④上六月丙寅朔，日有食之。此甲午是二十九日晦，以日月相當，知非晝日為冥也。○「敗則目也」。○釋曰：手足偏斷，⑤尚謂之敗，目在首，重於手足，故亦為敗也。

楚不言師，君重於師也。

楚殺其大夫公子側。

秋，公會晉侯、齊侯、衛侯、宋華元、邾人

于沙隨，不見公。沙隨，宋地。不見公者，可以

見公也。可以見公而不見公，譏在諸侯也。

公至自會。

①「比」，原作「此」，阮校：「監本「此」作「水比」，毛本

「此」作「比」。今據改。

②「子」，《穀梁補注》作「王」。

③「省」，阮校：「單疏本「省」上有「故」字。」

④「晝」，原作「盡」，據單疏本改。

⑤「偏」，原作「徧」，據傳文及四庫全書本改。

【疏】傳「議在諸侯也」。<sup>①</sup>○釋曰：不見公者，<sup>②</sup>是晉侯之意，諸侯既無解釋之者，即是同不與公相見，故以諸侯總之。

公會尹子、晉侯、齊國佐、邾人伐鄭。尹子，王卿士，子爵。

曹伯歸自京師。不言所歸，歸之善者也。出入不名，以爲不失其國也。歸爲善，謂直言歸而不言其國，即曹伯歸自京師，不言于曹是自某歸次之。若蔡季自陳歸于蔡，衛侯鄭自楚復歸于衛是。<sup>③</sup>

【疏】「出入不名」。○釋曰：凡諸侯有罪失國，出書名者，即昭三年「北燕伯款出奔齊」是也；入書名，<sup>④</sup>即僖二十八年衛侯鄭、曹伯襄是也。今曹伯被執，以其無罪，故出入不名，見其不失國也。傳詳發于此者，以歸文與常例異，故分別之。

九月，晉人執季孫行父，舍之于荏丘。行父，魯執政卿，其身執則危及國，故謹而月之，錄所憂也。荏丘，晉地。○荏音條。

【疏】注「行父」至「晉地」。○釋曰：昭十三年「八月，甲戌，同盟于平丘，公不與盟」，「晉人執季孫意如以歸」。二十三年「春，<sup>⑤</sup>正月，叔孫婼如晉。癸丑，叔鞅卒。晉人執我行人叔孫婼」。彼二文皆承月下，即蒙上月

文，何爲此注獨爲謹而月之者？意如之執，文承八月之下，彼月自爲盟而發，不爲執意如也。婼之執雖文承正月之下，彼月自爲叔鞅而言，亦不是爲婼而發。故襄十八年「晉人執衛行人石買」，莊十七年「齊人執鄭詹」，皆不月也。此九月之下，更無他事，指言晉人執季孫，故知爲危，謹而月之也。一解行父書月以見危，則意如及婼亦是危也。

執者不舍，據昭二十三年「晉人執我行人叔孫婼」，不言舍。○孫婼，丑畧反。而舍，公所也。今言舍者，以公在荏丘故也。公在荏丘而言舍者，明不得致也。若既不致，復不言舍，則無以見其舍。○復，扶又反。

①「傳議在諸侯也」，原在上疏「故亦爲敗也」下，阮校：

「此六字當在下疏首，下疏「不見公者」四字當在「釋曰」下。元本及十行本、閩、監、毛本並誤，單疏本不誤。」今據改。

②「不見公者」，原在「釋曰」前，今據阮校移「釋曰」後。又阮校云：「十行本此疏在經「公至自會」下，閩、監、毛本在傳「議在諸侯也」下。」

③「是」，原無，阮校：「余本「衛」下有「是」字。案以上注例之，有「是」字者是。按：桓十一年疏引有「是」字。」今據補。

④「名」下，單疏本有「者」字。

⑤「春」，夏校：「昭二十三年經「春」後有「王」字。」



下同。以見賢偏反，下「見公」同。執者致，據昭二十四年「媾至自晉」。而不致，公在也。在，在荍丘也。見舍于荍丘，還國則與公俱。不得致者，重在公。何其執而辭也？問何故書執季孫行父而言舍之，復不致之辭邪？猶存公也。時行父雖爲晉所執，猶欲存公之所在，故不致行父，又言舍之，皆所以見公在荍丘。存意，公亦存焉？<sup>①</sup>問存舍之不致之意，便可知公所在乎？公存也。但存此二事，即知公在荍丘。

【疏】「執者」至「存也」。○釋曰：經稱執季孫行父舍之荍丘，故傳稱執者不舍，是據叔孫婁而發問也。「而舍，公所也」者，謂言所舍故也。公所者，即荍丘是也。執致者，謂昭二十四年「媾至自晉」是也。「而不致，公在也」者，謂今季孫歸而不書至者，公在故也；以其與公同歸，重在公，故不致也。「何其執而辭也」，謂問經意何其書執不以致爲辭也。猶存公也，謂爲晉所執，心欲存公所在，故不致行父，又言舍之也。「存意，公亦存焉」，謂又問經意，直存舍之不致之意，則便可知公所在乎？「公存也」者，答上問意，但存此二事，即知公在也。公存者，謂在荍丘也。舊解，注言二事，舍是一事也，於荍丘是二事。今以爲乘上注意，則二事者，謂舍於荍丘及不致焉二事。<sup>②</sup>

冬，十月，乙亥，叔孫僑如出奔齊。徐邈

曰：「案襄二十三年『臧孫紇出奔齊』，傳曰：『其日，正臧紇之出也。』」禮：大夫去君，掃其宗廟，不絕其祀。身雖出奔，而君遇之不失正，故詳而日之，<sup>③</sup>明有恩義也。○紇，根發反。<sup>④</sup>

【疏】注「徐邈」至「義也」。○釋曰：僑如爲君遇之不失所，書日，臧紇則正其有罪而書日，二者不同。范引之者，欲明二者不異。臧孫云「正其有罪」，亦兼爲君遇之不失所書日，僑如言君有恩而書日，亦兼正其罪可知，是互以相包，故引之。

十有二月，乙丑，季孫行父及晉卻棼盟于扈。

公至自會。無二事，會則致會，伐則致伐。上無會事，當言至自伐鄭，而言至自會，甯所未詳。鄭君曰：「伐而致會，於伐事不成。」

- ① 「焉」，原作「也」，阮校云：「石經、余本『也』作『焉』。」今按：據此下疏文，作「焉」是，據改。
- ② 「焉」，宋刻元修本作「焉」。
- ③ 「日」，原作「已」，阮校：「閩、監、毛本『已』作『紀』，余本『已』作『日』。」盧宣旬補校曰：「按作『日』是也，否則與成十六年注不合。」今據改。
- ④ 「根」，宋刻元修本及《釋文》作「恨」。

乙酉，刺公子偃。大夫日卒，正也。先

刺後名，殺無罪也。僖二十八年，「公子買戍衛，<sup>①</sup>不卒戍，刺之」，是有罪者，以先列其罪。<sup>②</sup>○刺，七則反，傳同。《爾雅》云：「殺也。」戍，式喻反。

【疏】「刺公子偃」。○釋曰：徐邈云：「偃爲僞如所譖，故云無罪。」《左氏》云：「爲姜氏所立。」二者未知孰是。

十有七年，春，衛北宮括帥師侵鄭。

夏，公會尹子、單子、晉侯、齊侯、宋公、

衛侯、曹伯、邾人伐鄭。○單子音善。

六月，乙酉，同盟于柯陵。柯陵，鄭地。○柯音歌。柯陵之盟，謀復伐鄭也。○復，扶又反。

秋，公至自會。不曰至自伐鄭也，公不

周乎伐鄭也。周，信也。公逼諸侯爲此盟爾，意不欲更伐鄭。何以知公之不周乎伐鄭？以其以

會致也。何以知其盟復伐鄭也？以其後

會之人盡盟者也。後會，謂冬公會單子等是。不

周乎伐鄭，則何爲日也？據無伐鄭意而強盟，盟

不由忠，不當日也。○而強，其丈反。言公之不背

柯陵之盟也。舍己從人，遂伐鄭。

【疏】「不曰」至「盟也」。○釋曰：定四年，諸侯侵楚，「盟于皐鼬」，言「公至自會」者，經之常也。今傳起違例之問者，定四年楚弱，而爲諸侯所侵，侵訖而盟，故以盟爲大事，故云「至自會」。鄭自柯陵戰後，<sup>③</sup>不助中國，二年之間，三度興兵，以伐爲重，盟爲輕，故決其不以伐鄭致。<sup>④</sup>僖四年傳云：「大伐楚也。」不以會致而以伐致，是其事也。案後會齊侯不出，而云後會之人盡盟者也，以今時身在，後遣大夫從師，故亦得云後會之人盡盟。

齊高無咎出奔莒。

九月，辛丑，用郊。夏之始可以承春，

以秋之末承春之始，蓋不可矣。郊，春事也。僖三十一年「夏，四月，四卜郊，不從」，傳曰：「四月，不時。」今言可者，方明秋末之不可，故以是爲猶可也。九月用郊，用者，不宜用也。宮室不設，不可以祭。衣服不脩，不可以祭。車馬器械不

① 「戍」，原作「成」，據宋刻元修本改。

② 「以」，夏校：「《穀梁補注》作『必』，義較長。」

③ 「柯陵」，《穀梁補注》作「鄆陵」。

④ 「故決」至「鄭致」，單疏本無「不」字，「致」作「至」。

備，不可以祭。有司一人不備其職，不可以祭。祭者，薦其時也，薦其敬也，薦其美也，<sup>①</sup>非享味也。

【疏】「宮室」至「味也」。

○釋曰：論用郊而陳宮

室者，禮有五經，莫重於祭。祭之盛者，莫大於郊。傳意欲見嚴父然後至其天，家國備然後祭享，<sup>②</sup>故具說宮室、祭服、車馬、官司之等，明神非徒享味而已，何得九月始用郊乎？徐邈云：「宮室謂郊之齊宮，衣服、車馬亦謂郊之所用，言一事闕，則不可祭。何得九月用郊？」理不通也。<sup>③</sup>

晉侯使荀罃來乞師。將伐鄭。○荀罃，烏耕反。

【疏】「晉侯」至「乞師」。

○釋曰：范別例云：

「乞師例有三。」三者不釋，從例可知也。乞師六者，乞師五，乞盟一，并之爲六。乞師五者，公子遂、晉卻錡、欒黶、荀罃、士魴是也。乞盟一者，鄭伯是也。

冬，公會單子、晉侯、宋公、衛侯、曹伯、齊人、邾人伐鄭。言公不背柯陵之盟也。

十有一月，公至自伐鄭。

壬申，公孫嬰齊卒于狸蜃。狸蜃，魯地也。

○狸蜃，上力之反，下時軫反。十一月無壬申，壬

申乃十月也。致公而後錄，臣子之義也。嬰齊實以十月壬申日卒，而公以十一月還，先致公而後錄其卒，故壬申在十一月下也。嬰齊從公伐鄭，致公然後伐鄭之事畢，須公事畢，然後書臣卒，先君後臣之義也。其地，未踰竟也。○竟音境。

【疏】「致公」至「竟也」。

○釋曰：《公羊》之意，

以爲臣待君命，然後卒大夫，此云致公而後錄其卒，是與《公羊》異。杜預解《左氏》，以爲日誤，又與二傳不同也。

十有二月，丁巳，朔，日有食之。

邾子貜且卒。

○貜，俱縛反。<sup>④</sup>且，子餘反。

【疏】「邾子貜且卒」。

○釋曰：《世本》邾定公也。

晉殺其大夫卻錡、卻犝、卻至。自禍於是起矣。厲公見殺之禍。○殺之，如字，又音試。

①「美」，王引之《經義述聞》引王念孫曰：「『美』當爲『義』字之誤也。」

②「嚴父」至「祭享」，原作「嚴父然後至其夫家國備然後然享」，單疏本「夫」作「天」，「然享」作「祭享」，今據改。

③「不」，阮校：「監、毛本『不』作『亦』。」今按：單疏本同監、毛本。

④「反」，原作「及」，據《釋文》改。

楚人滅舒庸。

十有八年，春，王正月，晉殺其大夫胥童。

庚申，晉弑其君州蒲。稱國以弑其君，

君惡甚矣。

【疏】「君惡甚矣」。○釋曰：於此發傳者，以州蒲二年之間殺四大夫，故於此發惡例也。

齊殺其大夫國佐。

公如晉。

夏，楚子、鄭伯伐宋。

宋魚石復入于彭城。彭城，宋邑。魚石十五年奔楚，經稱復入者，明前奔時，入彭城以叛也，今楚取彭城以封魚石，故言復入。

【疏】注「彭城」至「復入」。○釋曰：晉欒盈亦書

復入者，以欒盈先入曲沃，後復入晉，故亦云復入也。後入曲沃，不云復入者，兵敗奔曲沃，即既前文已云復入于晉，<sup>①</sup>故直云入曲沃。舊解以爲初入國都，後入曲沃，言復入。若然，何不云復入曲沃，而云復入于晉？

公至自晉。

晉侯使士匄來聘。○匄，本又作丐，<sup>②</sup>音蓋。

秋，杞伯來朝。○朝，直遙反，下同。

八月，邾子來朝。

築鹿囿。築牆爲鹿地之苑。○囿音又。

【疏】「築鹿囿」。○釋曰：范知非爲鹿築囿，而以鹿爲地名者，案郎囿既是地名，則此鹿亦當是地名。徐邈、何休皆云地名。天子囿方百里，公侯十里，<sup>③</sup>伯方七里，子男方五里。<sup>④</sup>言魯先有囿，今復築之，故書以示譏。則郎及蛇泉，<sup>⑤</sup>亦是譏也。案《毛詩傳》云：「囿者，天子百里，諸侯三十里。」<sup>⑥</sup>與徐、何二說別者，《詩傳》蓋據孟子

①「即」，阮校：「何校本無「即」字。」今按：單疏本同何校本。

②「丐」，原作「山」，據《釋文》改。

③「百里公侯」，原缺，阮校：「何校本「方」下有「百里公侯」四字，與《公羊》注合。」今據補。

④「伯方七里，子男方五里」，阮校：「案《公羊》注無二「方」字。」

⑤「泉」，《穀梁補注》作「淵」。今按：定公十三年經作「築蛇淵囿」。

⑥「三十」，《穀梁補注》作「四十」，下「寡人三十里」同。按，《毛詩注疏·大雅·靈臺》毛傳作「四十」。

稱「文王囿七十里，寡人三十里」，故約之爲天子，<sup>①</sup>諸侯三十里耳。未審徐、何二家據何爲說也。

築不志，此其志何也？山林藪澤之利，

所以與民共也。虞之，非正也。○藪，素口反。

己丑，公薨于路寢。路寢，正也。男子

不絕婦人之手，以齊終也。○齊如字，又側皆反。

冬，楚人、鄭人侵宋。

晉侯使士魴來乞師。○魴音房。

十有二月，仲孫蔑會晉侯、宋公、衛侯、

邾子、齊崔杼，同盟于虛杙。虛杙，某地。○杼，

直呂反。虛，丘魚反。杙，丑丁反。

【疏】「同盟于虛杙」。○釋曰：此虛杙之盟不日

者，何休云，公薨，喪盟畧之，故不日。事或然也。

丁未，葬我君成公。

① 「天子」下，據文意蓋脫「百里」二字。

# 監本附音春秋穀梁注疏襄公卷第十五

起元年，盡十五年

范甯集解 楊士勛疏

襄公

【疏】《魯世家》：襄公名午，成公之子，定姒所生，周簡王十四年即位。《謚法》：「因事有功曰襄。」

元年，春，王正月，公即位。繼正即位，正也。

【疏】「繼正即位正也」。○釋曰：襄是定姒之子，嫌非正，故重明之。

仲孫蔑會晉欒黶、宋華元、衛甯殖、曹人、莒人、邾人、滕人、薛人圍宋彭城。繫彭城於宋者，不與魚石，正也。魚石得罪於宋，成十五年奔楚，十八年復入于彭城。然則彭城已屬魚石，今猶繫宋者，崇君抑叛臣也。○復，扶又反。

【疏】「繫彭」至「正也」。○釋曰：哀三年齊、衛

圍戚，傳曰「不繫戚於衛者，子不有父也」。魚石人臣，而取君之邑，邑以繫國爲正，故言「繫彭城於宋，不與魚石，正也」。若不繫宋，則似與之爲父子，君意異，<sup>①</sup>繫不有殊。《公羊傳》曰：「曷爲繫之於宋？不與諸侯專封也。」《左氏》云：「今楚取彭城以封魚石。」是魚石爲楚所封，則三傳不異其說，彭城繫宋則異也。何者？《公羊》意彭城繫宋，不與楚封；此傳意彭城繫宋，不與魚石，是其異也。《左氏》以爲不成叛人，又云「謂之宋志」，是又與二傳意不同也。

夏，晉韓厥帥師伐鄭。

仲孫蔑會齊崔杼、曹人、邾人、杞人次

于鄆。鄆，鄭地。鄆或爲合。○鄆，似陵反。

秋，楚公子壬夫帥師侵宋。○壬，而林反。

九月，辛酉，天王崩。

邾子來朝。○朝，直遙反。

【疏】「邾子來朝」。○釋曰：《世本》及《左傳》邾

①「君意異」，阮校：「監、毛本『君』作『若』，何校本『君』下有『臣』字，『異』下有『故』字。」今按：單疏本同何校本。

宣公也。

冬，衛侯使公孫剽來聘。○剽，匹妙反。

晉侯使荀罃來聘。<sup>①</sup>冬者，十月初也。王崩，赴未至，皆未聞喪，故各得行朝聘之禮。

【疏】注「冬者」至「之禮」。○釋曰：《周禮》：

「諸侯之邦交，歲相問，殷相聘，世相朝。」又《左傳》云：「凡諸侯即位，小國朝之，大國聘焉。」此年公新即位，故各行朝聘禮也。知「王崩，赴未至」者，禮，諸侯爲天子斬衰，若其聞喪，豈天子以九月崩，當月即邾子來朝，冬初即晉、衛來聘，魯是有禮之國，焉得受之？明知赴未至，故各得行朝聘之禮也。猶如襄二十九年，吳子餘祭五月所弒，赴未至魯，<sup>②</sup>故季札以六月致魯，<sup>③</sup>仍行聘事，<sup>④</sup>亦此類也。若然，經書九月「天王崩」者，赴雖在十月之末，告以九月崩耳。知王崩，諸侯不得行朝聘之禮者，曾子問云：<sup>⑤</sup>「諸侯相見，揖讓入門，不得終禮，廢者幾？」孔子曰：「六。天子崩，大廟火，日食，后夫人之喪，雨雪服，失容，則廢。」是天子崩，不得行朝聘也。

二年，春，王正月，葬簡王。

鄭師伐宋。

夏，五月，庚寅，夫人姜氏薨。

六月，庚辰，鄭伯睞卒。○睞，古困反。

晉師、宋師、衛甯殖侵鄭。其曰衛甯殖，如是而稱于前事也。初衛侯速卒，鄭人侵之，故舉甯殖之報，以明稱其前事。<sup>⑥</sup>不書晉、宋之將，以慢其伐人之喪。○稱于，尺證反。

【疏】「稱于前事」。○釋曰：依例，將尊師少稱將，將卑師衆稱師。傳知稱于前而書名者，三人同有伐喪之罪，或名或師，明知稱師者罪重，稱名者罪輕。又成二年鄭人侵衛之喪，今甯殖獨稱名氏，故知稱其前事也。

秋，七月，仲孫蔑會晉荀罃、宋華元、衛孫林父、曹人、邾人于戚。

己丑，葬我小君齊姜。齊，謚。○齊姜，如字。齊，謚也，一音側皆反，後「齊歸」同。

①「罃」，阮校：「石經『罃』作『嬰』，二、三年並同。」

②「赴」，原作「越」，據宋刻元修本、單疏本改。

③「季札」，原作「季朴」，據宋刻元修本、單疏本改。「致」，

阮校：「閩、監、毛本『致』作『至』，單疏本作『到』。」

④「事」，單疏本作「禮」。

⑤「曾」，原作「魯」，據四庫全書本改。夏校：「此爲《禮記·曾子問》之文。」

⑥「其」，阮校：「閩、監、毛本『其』作『于』。」

【疏】注「齊謚」。○釋曰：葬皆舉謚。又《謚法》「執心克壯曰齊」，故知是謚。

叔孫豹如宋。

冬，仲孫蔑會晉荀罃、齊崔杼、宋華元、衛孫林父、曹人、邾人、滕人、薛人、小邾人于戚，遂城虎牢。若言中國焉，內鄭也。虎牢，鄭邑。鄭服罪，內之，故爲之城。不繫虎牢於鄭者，如中國之邑也。僖二年「城楚丘」，傳曰：「楚丘者何？衛之邑。國曰城，此邑也，其曰城何？」封衛也。然則非魯邑，皆不言城。中國，猶國中也。○爲，于僞反。

【疏】「若言」至「鄭也」。○釋曰：此言若中國焉者，非是對戎狄而生名，言中國猶國中也。今經不繫虎牢於鄭者，如國中之邑也。所以如國中之邑者，鄭服罪，故內之也。所以鄭服不繫虎牢者，《春秋》之例，外邑皆不言城，今虎牢若繫鄭，則不得書之，故不繫之鄭，比內邑也。《公羊》以爲虎牢不繫鄭者，爲中國諱伐喪。說《左氏》者，以爲虎牢已屬晉，故不繫鄭。並與《穀梁》異。

楚殺其大夫公子申。

三年，春，楚公子嬰齊帥師伐吳。

公如晉。

夏，四月，壬戌，公及晉侯盟于長檣。晉侯出其國都，與公盟于外地。○檣，丑居反。

【疏】注「晉侯」至「外地」。○釋曰：范知出國都與公盟者，上言「如晉」，下言「公至自晉」，不言「長檣」，故知之也。

公至自晉。

六月，公會單子、晉侯、宋公、衛侯、鄭伯、莒子、邾子、齊世子光。己未，同盟于雞澤。雞澤，地也。同者，有同也。同外楚也。

陳侯使袁僑如會。如會，外乎會也。外乎會者，明本非會內也，諸侯已會，乃至耳。

【疏】「外乎會也」。○釋曰：莊十四年「單伯會伐宋」，傳云「會事之成也」，僖二十八年「陳侯如會」，傳曰：「外乎會也。」是二文互以相通也。會伐宋，伐事已成，單伯乃至，則踐土亦會事已成，陳侯乃至也。陳侯言外乎會，明伐宋時，亦外乎會也。三處發傳者，單伯內大夫，陳侯是諸侯，袁僑爲君所使，嫌有異，故重發之。

於會受命也。



戊寅，叔孫豹及諸侯之大夫，及陳袁僑盟。及，以及與之也。諸侯在會，而大夫又盟，是

大夫執國之權，亢君之禮。陳君不會，袁僑受使來盟。袁僑之盟，得其義也。通言叔孫豹及諸侯之大夫，則無以表袁僑之得禮，故再言及，明獨與袁僑，不與諸侯之大夫。

○受使，所吏反。諸侯以爲可與則與之，不可

與則釋之。諸侯盟，又大夫相與私盟，是大

夫張也。<sup>①</sup>故雞澤之會，諸侯始失正矣。<sup>②</sup>

大夫執國權，曰袁僑，異之也。釋不但總言及諸侯之大夫，而復別言袁僑者，是異袁僑之得禮。○復，扶又反。

【疏】及以「至」之也。○釋曰：傳解經所以再言及者，以及與之也，謂與袁僑，故言及以殊之。《公羊》以爲重言及者，爲其與袁僑盟也。其意言諸侯大夫所以爲盟者，爲與袁僑盟也，與《穀梁傳》異也。禮，君不敵臣。陳遣大夫赴會，諸侯大夫與之爲盟，則是貴賤之宜。而云大夫強者，陳侯遠慕中國，使大夫詣會受盟，諸侯雖則盟罷，當須更與結好。又尊卑不敵者，謂獨會公侯，今既與諸侯衆在，何以得稱不敵？陳侯不在，故與袁僑得盟。諸侯大夫，君在私盟，故謂之彊也。案十六年「大夫不臣也」，則不繫諸侯。此云諸侯之大夫，而謂之彊者，此雖對

君私盟，慢君之意緩，至十六年，積習已久，不臣之情極，故不繫諸侯。此亦應爲君之命，<sup>③</sup>而謂之私者，對君盟，非臣事，故謂之私。

秋，公至自晉。

冬，晉荀罃帥師伐許。

四年，春，王三月，己酉，陳侯午卒。

夏，叔孫豹如晉。

秋，七月，戊子，夫人嬖氏薨。成公夫人，

襄公母也。嬖，杞姓。○杞音起。

【疏】「夫人嬖氏薨」。○釋曰：《公羊》以爲「弋氏」，<sup>④</sup>何休云「莒女」。此與《左氏》並爲「嬖氏」，范及杜預皆云「杞女」，是與《公羊》異也。傳：妾子爲君，其母不得稱夫人。今薨葬備文者，君與夫人禮成之，臣民不可以妾禮遇之，故亦得稱夫人，今仍非禮也。

葬陳成公。

- ①「張」，王引之《經義述聞》：「『張』，當爲『彊』。」
- ②「正」，阮校：「石經『正』作『王』。」
- ③「爲」，單疏本作「受」。
- ④「弋」，原作「弋」，據單疏本及《公羊》經改。

八月，辛亥，葬我小君定姒。定，謚。

冬，公如晉。陳人圍頓。

五年，春，公至自晉。

夏，鄭伯使公子發來聘。

叔孫豹、繒世子巫如晉。外不言如，而

言如，爲我事往也。外相如不書，爲魯事往，故同於內。○巫，亡符反。爲，于僞反。

【疏】「叔孫豹繒世子巫如晉」者。① ○釋曰：

《公羊》以繒世子巫是繒之前夫人莒女所生，其巫之母，即是魯襄公同母姊妹。繒更娶後夫人於莒，而無子有女，還于莒爲夫人，生公子。②但繒子愛後之夫人，故立其外孫莒之公子，故叔孫豹與世子巫如晉訟之。此傳直云「爲我事往也」，不知更爲何事，故徐邈注此，取《左氏》爲說，云「爲我事往」者，謂請繒于晉，以助己出賦也。今范云「外相如不書，爲魯事往，故同於內也」也。下文滅繒，此傳亦同《公羊》，取外孫爲嗣，則此之如晉同《公羊》，理亦無損。但巫縱與魯同是莒之外孫，傳不得云爲我事往也。況又上四年范注云姒氏，襄公母，杞姓也，則襄公母非莒女也。若同《左氏》，則於傳文爲順，未審范意如何。或當范雖從《公羊》外孫爲嗣，此明如晉非爲外孫。

仲孫蔑、衛孫林父會吳于善稻。善稻，吳

地。○善稻，吳謂之伊緩，《左氏》作善道。吳謂善伊，謂稻緩。號從中國，名從主人。夷狄所號地形及物類，當從中國言之，以教殊俗，故不言伊緩，而言善稻。人名當從其本俗言。

【疏】號從中國。○釋曰：重發此文者，邾之

與宋，俱是中國，嫌此魯、衛會吳善稻。善稻，吳地，嫌從夷號，故重發之。大原，晉地，接狄之竟，名曰大鹵，恐從狄名，故更發其例。蚡泉，魯地，莒從夷俗，但狄人謂蚡泉爲矢胎，③莒不得與真夷狄同，故亦須發例也。「名從主人」者，越爲於越，《左氏》云壽夢之鼎是也。

秋，大雩。

楚殺其大夫公子壬夫。

公會晉侯、宋公、陳侯、衛侯、鄭伯、曹

①「叔孫」至「晉者」，單疏本作「叔孫豹至如晉」。阮校：

「閔、監、毛本無「者」字。」

②「而無子」至「生公子」，何休《解詁》作「夫人無男有女，還嫁之於莒，有外孫」。

③「蚡泉爲矢胎」，阮校引段玉裁云：「昭五年經「蚡」作「黃」，「矢胎」作「失台」。」

伯、莒子、邾子、滕子、薛伯、齊世子光、吳人、繒人于戚。繒以外甥爲子，曾夷狄之不若，故序吳下，所以不復殊外吳者，以其數會中國故。○曾夷，才登反，又如字。不復，扶又反。數會，音朔。

【疏】注「數會中國故」。○釋曰：繒夷狄之不若，自當序吳下。繒在吳下，即得殊吳。①所以云數會中國者，若繒夷狄不若，吳不數會中國，縱使抑繒，不可稱人進班也。今以其數行進之，故序云會進之。故序繒于下，以表夷狄之不若；進吳於上，以顯其數會中國也。

### 公至自會。

冬，戍陳。內辭也。不言諸侯，是魯戍之。

【疏】「內辭也」。○釋曰：此戍陳，《公羊》以爲諸侯雖至，不可得而序，故獨言我也。杜預以爲戚會，受晉命戍陳，諸侯各自遣戍，不復告魯，故不書也。觀范注，似魯獨自戍之。案檢上下，則於理不得。何者？定五年「歸粟于蔡」，傳云「專辭也」。彼專辭即與此內辭不異，彼傳歸粟，更云諸侯歸之，則此戍陳亦是諸侯同戍。襄三十年澶淵救災，具列諸國，故定五年歸粟，不復歷序諸侯，則此亦以救陳之文具列諸侯，故於戍之文獨言魯戍也。彼傳云「義邇也」，不足具列，則此亦以其事可知，故經文不序。范云魯者，解經之獨立文也。

### 楚公子貞帥師伐陳。

公會晉侯、宋公、衛侯、鄭伯、曹伯、莒子、邾子、滕子、薛伯、齊世子光救陳。

十有二月，公至自救陳。善救陳也。楚人伐陳，公能救中國而攘夷狄，故善之。善之謂以救陳致。

【疏】「善救陳也」。○釋曰：於公之至下言之者，《春秋》主善以內，故書公至下重發。

辛未，季孫行父卒。

六年，春，王三月，壬午，杞伯姑容卒。

夏，宋華弱來奔。

秋，葬杞桓公。

滕子來朝。○朝，直遙反。

莒人滅繒。莒是繒甥，立以爲後，非其族類，神不歆其祀，故言滅。○莒人滅繒，似陵反，立其甥爲後，異姓，故言滅也。非滅也。非以兵滅。中國日，卑國月，夷狄時。繒，中國也。而時，非滅也。

①「得」，單疏本作「是」。

家有既亡，國有既滅。滅猶亡，亡猶滅，家立異姓爲後，則亡；國立異姓爲嗣，則滅。既，盡也。滅而不自知，由別之而不別也。繒不達滅亡之義，故國滅而不知。○別，彼列反。莒人滅繒，非滅也。非立異姓以莅祭祀，滅亡之道也。○莅音利，又音類。

【疏】「中國」至「道也」。○釋曰：重發傳者，非兵滅，故重明之，由別之不別也。言繒所以滅者，立嗣須分別同姓，而繒不別也。舊解云：別猶識也。言繒君唯識知國須立後，不能分別異姓之不得。「齊侯滅萊」，《左氏》以爲齊遷萊子於郕，故不書出奔。《公羊》以爲萊子出奔，不如死也，死不書，舉滅爲重。此無傳，未知所從。<sup>①</sup>

冬，叔孫豹如邾。

季孫宿如晉。宿，行父子。

十有二月，齊侯滅萊。

七年，春，邾子來朝。○邾音談。朝，直遙反，下同。

夏，四月，三卜邾，不從，乃免牲。夏四月，不時也。三卜，禮也。乃者，亡乎人之

辭也。

【疏】「三卜」至「辭也」。○釋曰：三卜是禮，而書之者，爲三卜不從，及四月不時故也。「乃者，亡乎人之辭也」，復發傳者，嫌三卜禮不當，責無人也。

小邾子來朝。

【疏】「小邾子來朝」。○釋曰：《左傳》：小邾，穆公也。

城費。○費音秘。

秋，季孫宿如衛。

八月，螽。

冬，十月，衛侯使孫林父來聘。

壬戌，及孫林父盟。

楚公子貞帥師圍陳。

十有二月，公會晉侯、宋公、陳侯、衛侯、曹伯、莒子、邾子于鄆。鄆，鄭地。○鄆，本

① 「齊侯滅萊」至「未知所從」一節疏，當在下經「十有二月齊侯滅萊」下。

又作隔，于詭反。

鄭伯髡原如會，○髡，苦門反，本又作郡，或作顛，顛音於倫反，《左氏》作髡顛。未見諸侯。丙戌，

卒于操。操，鄭地。○操，七報反。未見諸侯，其

曰如會，何也？致其志也。禮：諸侯不

生名，此其生名，何也？卒之名也。卒之

名，則何為加之如會之上？見以如會卒

也。其見以如會卒，何也？鄭伯將會中

國，其臣欲從楚，不勝其臣，弑而死。其不

言弑，何也？不使夷狄之民加乎中國之君

也。邵曰：「以其臣欲從楚，故謂夷狄之民，不欲使夷

狄之臣得弑中國之君，故去弑而言卒，使若正卒然。」<sup>①</sup>

○見以，賢徧反。去，起吕反。其地，於外也。其

日，未踰竟也。日卒時葬，正也。未踰竟，音

境。<sup>②</sup>【疏】「日卒」至「正也」。○釋曰：葬在八年，此

處發之者，以鄭伯被弑而同正卒。既同正卒，宜云正葬，<sup>③</sup>

故連言也。重發正卒之傳者，今被弑而同正卒，嫌與他例

異，故明之也。

陳侯逃歸。以其去諸侯，故逃之也。鄭

伯欲從中國而罹其凶禍，諸侯莫有討心，於是懼而去之，

背華即夷，故書逃以抑之。○背音佩。

八年，春，王正月，公如晉。

【疏】「正月公如晉」。○釋曰：傳例：「往月，危往也」。今書正月者，<sup>④</sup>以鄭伯歸晉受禍，陳侯畏楚逃歸，明晉之不足可恃，而公往朝，危之道，故書月也。

夏，葬鄭僖公。

鄭人侵蔡，獲蔡公子濕。獲者，不與之辭。

侵者，所以服不義，無相獲之道。○公子濕，本又作隔，又音變，二十年同。《左氏》作變。人，微者也。浸，<sup>⑤</sup>

淺事也。而獲公子，公子病矣。

①「正」，原作「止」，據宋刻元修本改。

②「未踰竟音境」，此五字疑為《釋文》之文。四部叢刊本

《春秋穀梁傳》無此注，下有《釋文》「踰竟音境」。

③「云」，阮校：「閩、監、毛本『云』作『同』」。

④「今書正月者」，此五字前原有「原空二字」四字。蓋為

版刻者識記之語，今刪。阮校：「十行本此上空二

字，閩、監、毛本不空。」

⑤「浸」，四部叢刊本《春秋穀梁傳》作「侵」。

【疏】「公子病矣」。○釋曰：《公羊》以爲侵而言獲者，適得其意，謂值其無備，故獲得之。此云「公子病矣」，謂侵是淺事，所以得公子者，由公子病弱矣。徐邈云：「公子病，不任爲將帥，故獲之。」

季孫宿會晉侯、鄭伯、齊人、宋人、衛人、邾人于邢丘。邢丘，地。○邢音刑。見魯之失正也，公在而大夫會也。○見，賢徧反。

【疏】「見魯之失正也」。○釋曰：以公在晉，未及告公，大夫爲會，故云「失正也」。

公至自晉。

莒人伐我東鄙。

秋，九月，大雩。

冬，楚公子貞帥師伐鄭。

晉侯使士匄來聘。

九年，春，宋災。外災不志，此其志何也？故宋也。故猶先也，孔子之先宋人。

【疏】「宋災」。○釋曰：《公羊》以爲「大者曰災」，何休云「大者謂正寢、社稷、宗廟、朝廷也」，小者非宗廟、社稷也。又曰「內何以不言火，甚之也」者，何休云：

「《春秋》以內爲天下法」，「故雖小有火，如大災」。又云：「外災不書，此何書？」爲王者之後記災也。此傳直云「故宋也」，徐邈云：「《春秋》王魯，以周公爲王後，以宋爲故也。」是亦以爲王者之後記災也。今范獨云「孔子之先宋人」，故記其災，以黜周王魯乃是《公羊》之說，今徐乃取以解《穀梁》，故范不從之。

夏，季孫宿如晉。

五月，辛酉，夫人姜氏薨。成公母。

秋，八月，癸未，葬我小君穆姜。

冬，公會晉侯、宋公、衛侯、曹伯、莒子、

邾子、滕子、薛伯、小邾子、齊世子光伐鄭。③

十有二月，己亥，同盟于戲。戲，鄭地。

○于戲，許宜反。不異言鄭，善得鄭也。不致，恥不能據鄭也。戲盟還而楚伐鄭，故恥不能終有鄭。

【疏】「不異」至「鄭也」。○釋曰：舊解以伐鄭之

① 「何」下，《公羊傳》有「以」字。

② 「王後」，單疏本作「後之」。阮校：「何校本作「後王」。」

③ 「薛伯」，阮校：「石經「薛伯」下有「杞伯」二字。」

文在上，即同盟于戲，明鄭在可知，故不異言也。「善得鄭也」，言鄭服心同盟，故以爲善，既善得鄭，則是無恥。所以不致者，恥不能據鄭也，謂既盟之後，楚即伐鄭，恥不能終據之，故不致也。又一解，不異言鄭，謂會伐無鄭伯之文，今不序，是不異言也。所以不異言者，善得鄭也，嘉其服心受盟，比之舊同好然，故不異言也。既善得鄭，又以爲恥者，當時鄭雖受盟，楚即伐鄭，諸侯不能終據鄭，故以爲恥也。

### 楚子伐鄭。

十年，春，公會晉侯、宋公、衛侯、曹伯、莒子、邾子、滕子、薛伯、杞伯、小邾子、齊世子光，會吳于柤。柤，楚地。○于柤，莊加反。會又會，外之也。五年會于戚，不殊會，今殊會吳者，復夷狄故。○復夷，扶又反，下「不復」皆同。

【疏】「會又會外之也」。○釋曰：重發傳者，五年戚會不殊吳，今殊之，故復發傳。○注「復夷狄故」。○釋曰：舊解，戚之會抑繒進吳，故不得殊會，今宜當復夷狄，故會以外之。或以爲戚會，以吳行進，故不殊之，今在後，更爲夷狄之行，故外之。

夏，五月，甲午，遂滅傅陽。○傅陽，《左氏》作「偃陽」。遂，直遂也。其曰遂何？<sup>①</sup>不

以中國從夷狄也。言時實吳會諸侯滅傅陽，恥以中國之君從夷狄之主，<sup>②</sup>故加甲午，使若改日諸侯自滅傅陽。滅卑國月，此日蓋爲遂耳。○爲，于僞反。

【疏】「遂直遂也」。○釋曰：傳言「遂，直遂也」者，是繼事之辭，不須云日。今加甲午，始云遂滅，與凡遂異，故傳言之。○注「此日蓋爲遂耳」。○釋曰：傅陽卑國，例當書月，此經言日，故范云「蓋爲遂耳」。爲遂者，欲見不使中國之君從夷狄之主也。

公至自會。會夷狄不致，惡事不致，夷狄不致，恥與同。惡事不致，恥有惡。此其致何也？會吳，會夷狄也。滅傅陽，惡事也。據不應致。存中國也。以中國之君，從夷狄之主，而滅人之邑也，此即夷狄爾，是無中國也。故加甲午，使若改日諸侯自滅傅陽爾，不以諸侯從夷狄也。滅中國雖惡事，自諸侯之一眚爾。從夷狄而滅人，則中國不復存矣。○眚，所景反。

【疏】「夷狄」至「國也」。○釋曰：僖二十六年「公至自伐齊」，傳曰：「惡事不致，此其致之何也？危之也。」彼亦是以蠻夷伐中國，傳總釋之。今分別兩言之

① 「何」，阮校：「石經、余本「何」下有「也」字。」

② 「主」，《穀梁補注》作「役」。

者，當以直會夷狄，直爲惡事，二者俱不致會。夷狄不致者，成二年蜀之盟是也。惡事不致者，桓二年稷之會也。今公從夷狄爲桓之會，又滅傅陽，二事皆惡，故傳兩舉之。彼公以楚師伐齊唯一事，故總釋耳。傳於此見存中國之文者，雞澤之會，諸侯失政，從此之後，日益陵遲，又會夷狄之人以滅中國，惡事之甚，故書公至以存之。僖二十六年傳云危之，此云存之者，彼向來陵遲，<sup>①</sup>故直云危之。公此時微弱之甚，故云「存中國也」。○注「而滅人之邑」。○釋曰：此謂國邑也，故上注云「卑國月」。《公羊》、《左氏》亦以爲國也。

中國有善事，則并焉。若中國有善事，則不復言會諸侯，改曰遂滅傅陽。如僖四年諸侯「侵蔡，蔡潰」，遂伐楚，是并焉。○則并，必性反，又如字。無善事則異之，存之也。諸侯會吳于柤，甲午，遂滅傅陽，是則若會與遂異人。汲鄭伯，汲猶引也。鄭伯髡原爲臣所弑而不書弑，此引而致於善事。○汲音急。逃歸陳侯，鄆之會，陳侯不會，以其爲楚，故言逃歸。○爲，于僞反。致桓之會，存中國也。

楚子貞、<sup>②</sup>鄭公孫輒帥師伐宋。

晉師伐秦。

秋，莒人伐我東鄙。

公會晉侯、宋公、衛侯、曹伯、莒子、邾子、齊世子光、滕子、薛伯、杞伯、小邾子伐鄭。齊世子光序滕、薛之上，蓋驕蹇。○蹇，紀輩反。

冬，盜殺鄭公子斐、公子發、公孫輒。稱盜以殺大夫，弗以上下道，惡上也。兩下相殺，不志乎《春秋》，惡鄭伯不能脩政刑，致盜殺大夫也。以上下道，當言鄭人殺其大夫。○斐，芳尾反，《左氏》作驍。惡，烏路反。

【疏】「稱盜」至「上也」。○釋曰：哀四年傳云「微殺大夫，謂之盜」，而曰上下道者，以微殺大夫，即是兩下相殺。兩下相殺，不志乎《春秋》。惡鄭伯不能脩政刑，以致盜殺大夫，則哀十三年「盜殺陳夏區夫」，昭二十年「盜殺衛侯之兄輒」，亦是惡其君以致盜也。兩下相殺，既不入於例，故云不以上下道。其以上下道者，當云鄭人殺其大夫也。然文六年狐射姑殺陽處父，經改兩下相殺之

①「向來」，阮校云：「何校本『向來』作『尚未』。」今按：單疏本同何校本。

②「楚子貞」，《左傳》、《公羊傳》經及《穀梁補注》並作「楚公子貞」。



文「晉殺其大夫陽處父」，是謂君國殺之之辭也，則上下之道亦稱國。而獨決其不稱人者，稱國以殺大夫有二例，以二例不定，故不得專為上下道，稱人殺，是誅有罪之文，有罪無二例，故得決之。於此發例者，盜殺大夫，初起於此故也。

戊鄭虎牢。不稱其人，則魯戊也，猶戍陳。其

曰鄭虎牢，決鄭乎虎牢也。二年，鄭去楚而從中國，故城虎牢。不言鄭，使與中國無異。自爾已來，數反覆，無從善之意，故繫之於鄭，決絕而棄外。○數，所角反。覆，芳服反。

【疏】注「二年」至「棄外」。○釋曰：注言此者，解其決鄭之意。九年鄭與諸侯同盟，其年楚子伐鄭，鄭從楚，此年又與楚公子貞伐宋，是其數反覆也。今諸侯則戍鄭，當見其無從善之心，故不得內之，以明當決絕之。①若不決絕之，當如上二年直云「城虎牢」，不繫之鄭也。

楚公子貞帥師救鄭。

公至自伐鄭。

十有一年，春，王正月，作三軍。作，為也。古者天子六師，諸侯一軍。作三軍，非正也。《周禮》、《司馬法》曰：「萬有二千五百人為軍。王六軍，大國三軍，次國二軍，小國一軍，其將皆命卿。二

千五百人為師。」然則此言天子六師，凡萬有五千人，大國三軍，則三萬七千五百人。諸侯制踰天子，非義也。總云諸侯一軍，又非制也。昭五年經曰「舍中軍」，傳曰「貴復正也」，然則魯有二軍，今云作三軍，增置中軍爾。魯為次國，於此為明。○將，子匠反。舍中，音捨。

【疏】注「魯為次國」。○釋曰：魯本周公之後，地方七百里，而云次國者，據春秋時言之也。

夏，四月，四卜郊，不從，乃不郊。夏四月，不時也。四卜非禮也。

【疏】「四卜非禮也」。○釋曰：上三卜為禮，而非時。此卜違禮，而禮亦非時，②故重發傳。不言免牲者，不行免牲之禮，故但言不郊耳。

鄭公孫舍之帥師侵宋。

公會晉侯、宋公、衛侯、曹伯、齊世子光、莒子、邾子、滕子、薛伯、杞伯、小邾子伐鄭。

①「明」，原作「盟」，阮校：「單疏本『盟』作『明』，是也。」今據改。

②「而」，阮校：「何校本『而』作『非』。」今按：單疏本同何校本。

公至自伐鄭。不以後致，盟後復伐鄭。

【疏】「不以」至「鄭也」。○釋曰：成十七年「夏，

楚子、鄭伯伐宋。

公至自會。伐而後會，不以伐鄭致，得

○鄭與，音豫。

楚人執鄭行人良宵。行人者，挈國之辭也。行人，是傳國之辭命者。○傳，直專反。

【疏】「挈國之辭也」。○釋曰：舊解：挈猶傳也。行人傳國使會命，故云「挈國之辭也」。或以挈爲舉，謂傳舉國命之辭，理亦通耳，但與注乖。行人之文有六，傳之所以發者三也。昭公八年「楚人執陳行人干徵師」，②傳曰：「稱人以執大夫，執有罪也。稱行人，怨接於上也。」襄十有八年「晉執衛行人石買」，③傳曰：「稱行人，怨接於上也。」此云「楚人執鄭行人良宵」，傳曰：「挈國之辭也。」徵師云稱人執有罪，則此挈國之辭，而被囚執，亦是罪也。石買云稱行人怨接於上，則良宵亦然也，是

①「同」，《穀梁補注》作「周」。今按：柯陵之盟在成公十七年，傳云「公不周乎伐鄭也」，則作「周」是。

②「于」，原作「子」，據昭公八年經、宋刻元修本改。

③「晉」，阮校：「按十八年經「晉」下有「人」字。」

其文互相通也。①傳舉三者，則定六年「晉人執宋行人樂祁犁」，七年「齊人執衛行人北宮結」，昭二十三年「晉人執我行人叔孫婼」亦然也。是稱人以執有罪，石買稱行人怨接於上，明君之與臣，②兩舉失之也。執大夫稱人，又有二義。莊十七年「齊人執鄭詹」，傳曰「人者，衆辭也。以人執，與之辭也」。僖四年「齊人執陳袁濤塗」，傳曰：「齊人者，齊侯也」，「不正其踰國而執也」。桓十一年「宋人執鄭祭仲」，傳曰「宋人者，宋公也。其曰人何也？貶之也」。是有二也。案經例執大夫皆稱人而執，未有稱公侯者，③而云貶宋公、齊侯何也？斯有旨矣。然執大夫得其罪，例當稱人。經因事以明義，若被執者有罪，則稱人以見罪；若執人者有罪，亦稱人以見惡。齊侯爲踰國而執，宋公命人逐君，故貶之也，稱人以明不正也。縱使例執得其罪，未有稱公侯之文，其齊宋二君，亦當貶從稱人之限，故經雖同常文，傳則分而別之，所謂善惡不嫌同辭，不可以一概求之矣。祭仲不稱行人，舊解私罪不稱行人，或當非行人故也。

### 冬，秦人伐晉。

十有二年，春，王三月，莒人伐我東鄙，圍郕。蓋攻守之害深，故以危錄其月。○郕，本又作台，他來反，又音臺。伐國不言圍邑，舉重也。伐國重，圍邑輕，舉重可以包輕。取邑不書，圍安足

書也？不足書而今書，蓋爲下事起。○爲，于僞反。

【疏】注「蓋爲下事起」。○釋曰：范知之者，以伐國不言圍邑，言圍邑有所見，明此爲下事耳。

季孫宿帥師救郕，遂入鄆。鄆，莒邑。④

○鄆音運。遂，繼事也。受命而救郕，不受命而入鄆，惡季孫宿也。○惡，烏路反。

夏，晉侯使士魴來聘。

秋，九月，吳子乘卒。

冬，楚公子貞帥師侵宋。

公如晉。

十有三年，春，公至自晉。

①「互」，原作「亦」，阮校：「何校本『亦』作『互』，是也。」

今按：單疏本同何校本，據改。

②「與」，阮校：「何校本『與』作『於』。」今按：單疏本同何校本。

③「侯」，單疏本作「執」。

④「莒邑」，原作「言邑」，據宋刻元修本及四部叢刊本《春秋穀梁傳》改。

夏，取郛。○郛音詩。

【疏】「夏取郛」。○釋曰：《公羊》以郛爲邾婁之邑，此傳雖無說，蓋從《左氏》爲國也。

秋，九月，庚辰，楚子審卒。共王。○共音

恭。

冬，城防。

十有四年，春，王正月，季孫宿、叔老會晉士匄、齊人、宋人、衛人、鄭公孫蠆、曹人、莒人、邾人、滕人、薛人、杞人、小邾人會吳于向。向，鄭地。○蠆音丑邁反。向，舒亮反。

【疏】「正月」至「于向」。○釋曰：何休云「月者，刺諸侯委任大夫」，「二年之後，君若贅旒然」，故月之。范雖不注，或以二卿遠會蠻夷，危之，故月。從何說，理亦通耳。

二月，乙未，朔，日有食之。

夏，四月，叔孫豹會晉荀偃、齊人、宋人、衛北宮括、鄭公孫蠆、曹人、莒人、邾人、滕人、薛人、杞人、小邾人伐秦。

己未，衛侯出奔齊。諸侯出奔例月，衍結怨于

民，自棄於位，君弑而歸，與知逆謀，故出入皆日，以著其惡。○與音豫。

【疏】注「諸侯」至「其惡」。○釋曰：桓十五年「五月，鄭伯突出奔蔡」，十六年「十有一月，衛侯朔出奔齊」，又十一年「鄭忽出奔衛」，亦文承九月之下，是例月也。若然，昭三年「冬，北燕伯款出奔齊」，二十一年「冬，蔡侯東出奔楚」而書時者，彼蔡侯東時，爲公如晉不當月，故時也；其北燕伯時，自爲大雨雹，故亦畧其月，文或當時，與月同，唯書日有異也。然此書日以著衛侯之惡，則昭二十五年「九月，乙亥，公孫于齊」，亦是明公之惡也。或可詳內，不可以外例准之。然「衛侯朔出奔齊」，傳曰「朔之名，惡也。天子召而不往」，彼亦惡而書名，則北燕伯、蔡侯之徒，亦是書名以見惡也。今衛侯以惡甚而書日，所以不名者，「鄭忽出奔衛」，傳曰「其名，失國也」，<sup>④</sup>衛

①「者」下，《穀梁補注》有「危」字。據《公羊傳》襄公十四年何休《解詁》，有「危」是。

②「二年」，宋刻元修本、單疏本作「三年」。阮校：「何校本」「二」作「三」，與《公羊》合。今按：《公羊傳》作「三年」，阮元《公羊注疏校勘記》引浦鏜云：「『二』誤『三』」，從《穀梁》疏校。「二者必有一誤」。

③「與」，原作「明」，據單疏本改。

④「失」，原作「夫」，據宋刻元修本、單疏本改。

侯雖則惡甚，以其不失國，故不名以見得國，<sup>①</sup>人書名以明惡也。曹伯負芻無罪，故出入不名，則衛侯鄭人書名者，亦惡可知也。然衛侯朔亦得國，而出書名者，以天子絕之故也。則蔡侯東、北燕伯款，亦為失國而名也。鄭忽，桓十五年稱「世子忽復歸于鄭」，亦是得國而書名者，以其微弱罪賤之，故傳曰「其名，失國」，以後雖入國，不能自安，故亦與失國同也。又忽是世子，與君少異，故彼注云「其名，謂去世子而但稱忽」是也。「公孫于齊」不名者，為內諱也。一解以衛侯不名者，出奔書日，以見罪惡甚，故不復名也，理亦通耳。

莒人侵我東鄙。

秋，楚公子貞帥師伐吳。

冬，季孫宿會晉士匄、宋華閱、衛孫林

父、鄭公孫蠆、莒人、邾人于戚。○閱音悅。

十有五年，春，宋公使向戌來聘。○向，

舒亮反。戌音恤。

二月，己亥，及向戌盟于劉。

劉夏逆王后于齊。劉，采地。夏，名。書名，

則非卿也。天子無外，所命則成，故不言逆女。○劉夏，戶雅反，注同。

【疏】「劉夏至于齊」。○釋曰：《公羊》以劉夏為天子下大夫，<sup>②</sup>今范云非卿，則亦以為下大夫也。此時

王者，案《世本》、《本紀》當頃王也。<sup>③</sup>

過我，故志之也。○過音戈。

夏，齊侯伐我北鄙，圍成。

公救成，至遇。至遇而齊師已退也。遇，魯地。

季孫宿、叔孫豹帥師城成郛。郛，郭。

○郛音孚。

秋，八月，丁巳，日有食之。

邾人伐我南鄙。

冬，十有一月，癸亥，晉侯周卒。

①「故」，《穀梁補注》作「出」。

②「天子下大夫」，《公羊傳》作「天子之大夫也」，阮元《公羊注疏校勘記》引孫志祖云：「《穀梁疏》云『《公羊》以劉夏為天子下大夫』，據此，則『大夫』之上疑脫『下』字。」

③「頃王」，孫校：「柳云：『頃王』當為『靈王』。」

監本附音春秋穀梁注疏襄公卷第十六<sup>①</sup>

起十六年，盡三十一年

范甯集解 楊士勳疏

十有六年，春，王正月，葬晉悼公。

三月，公會晉侯、宋公、衛侯、鄭伯、曹伯、莒子、邾子、薛伯、杞伯、小邾子于溴梁。  
溴梁，地。○溴，古閼反。

戊寅，大夫盟。溴梁之會，諸侯失正矣。諸侯會，而曰大夫盟，正在大夫也。諸侯在，而不曰諸侯之大夫，大夫不臣也。

晉人執莒子、邾子以歸。

【疏】「晉人」至「以歸」。○釋曰：諸侯不得私相治，執人以歸，<sup>②</sup>非禮明矣。

齊侯伐我北鄙。

夏，公至自會。

五月，甲子，地震。

叔老會鄭伯、晉荀偃、衛甯殖、宋人伐

許。

秋，齊侯伐我北鄙，圍成。

大雩。

冬，叔孫豹如晉。

十有七年，春，王二月，庚午，邾子貜

卒。

○啁音閑，《左氏》作慆。

宋人伐陳。

夏，衛石買帥師伐曹。

秋，齊侯伐我北鄙，圍桃。

齊高厚帥師伐我北鄙，圍防。

九月，大雩。

① 「第」，原無，據全書體例補。  
② 「人」，宋刻元修本、單疏本作「之」。

【疏】「九月大雩」。○釋曰：前年大雩不月，此月者，僖十一年傳曰「雩月，正也」，是九月八月雩得正也，故月。前年雩不正，時也。

宋華臣出奔陳。

冬，邾人伐我南鄙。

十有八年，春，白狄來。不言朝，不能行朝禮。○朝，直遙反。

夏，晉人執衛行人石買。稱行人，怨接於上也。怨其君而執其使，稱行人，明使人爾，罪在上也。○其使，所吏反，下同。

【疏】注「怨其君」至「在上也」。○釋曰：稱人以執，是執有罪。范云明使人者，謂稱行人者，明罪在君上，故云「明使人」，非謂稱行人以罪晉也。重發傳者，楚是夷狄，嫌晉之主盟當異，故重明之。<sup>①</sup>

秋，齊侯伐我北鄙。

冬，十月，公會晉侯、宋公、衛侯、鄭伯、曹伯、莒子、邾子、滕子、薛伯、杞伯、小邾子同圍齊。非圍而曰圍，據實伐。齊有大焉，亦有病焉。齊若無罪，諸侯豈得同病之乎？非大而

足同與？<sup>②</sup>齊非大國，諸侯豈足同共圍之與？○同與音餘。諸侯同罪之也，亦病矣。諸侯同罪大國，是不量力，必為大國所讎，則亦病矣。

【疏】「非圍」至「病矣」。○釋曰：知非圍者，以十九年經云「至自伐齊」，不以圍致故也。傳言「非圍而曰圍」者，解經不以實言之意。「齊有大焉，亦有病焉」，謂經稱同圍之意。齊雖有事，大國焉，亦有罪惡焉。<sup>③</sup>病猶罪惡也，謂數伐魯。以數伐魯，又復國大，故稱同圍之耳。「非大而足同與」，覆上「齊有大焉」，「諸侯同罪」之意也，謂齊若非大國，何須諸侯同罪之也。「亦病矣」，謂齊是大國，諸侯共同罪之，必為大國所讎，是取禍之道，故云亦罪惡矣，言諸侯與齊同有罪惡也。

曹伯負芻卒于師。閔之也。

【疏】「閔之也」。○釋曰：僖四年「許男新臣

①「明」，阮校：「何校本『明』作『發』。」今按：單疏本同何校本。

②「與」，原作「焉」，阮校：「石經、余本『焉』作『與』。」案：《釋文》出「同與」，是陸所據本亦作「與」。作「焉」者非。今據改。

③「罪」，單疏本無。

卒」，彼內桓師，故不地。知言卒于師者，皆閔之也。

### 楚公子午帥師伐鄭。

十有九年，春，王正月，諸侯盟于祝柯。

前年同圍齊之諸侯也。祝柯，齊地。○祝柯，古河反，注同。

### 晉人執邾子。

公至自伐齊。《春秋》之義，已伐而盟，

復伐者，則以伐致。京城北之類是。○復，扶又

反，下及注皆同。盟不復伐者，則以會致。會于

蕭魚之類是。祝柯之盟，盟復伐齊與？怪不以

會致。○與音餘。曰，非也。不復伐齊。然則何

爲以伐致也？曰，與人同事，或執其君，或

取其地。同與邾圍齊，而晉執其君，魯取其地，此與盟

後後伐無異。<sup>①</sup>

【疏】「或執」至「其地」。○釋曰：據此傳文，

事實在此，不關于齊。而以伐齊致者，以明實伐齊，盟

後又或執其君，或取其地，與盟後復伐無異，故託事以

見意，罪晉執君，惡魯取地。若其實不伐齊，亦不得以

伐致也。

取邾田，自漚水。以漚水爲界。○漚水，火號

反，又音郭，水名。軋辭也。軋，委曲隨漚水，言取邾田之多。○軋，於八反。

【疏】「軋辭也」。○釋曰：《公羊》以爲漚水移入

邾界，魯隨而有之。今云「軋辭」者，軋謂委曲。經言「自

漚水」者，委曲之辭也。一解軋辭者，軋謂委曲，言取邾田

委曲隨漚水爲界之辭，言其多也。

其不日，惡盟也。○惡，烏路反。

【疏】「其不日惡盟也」。○釋曰：謂執君取地。

季孫宿如晉。

葬曹成公。

夏，衛孫林父帥師伐齊。

秋，七月，辛卯，齊侯環卒。

晉士匄帥師侵齊，至穀，聞齊侯卒，乃

還。還者，事未畢之辭也。

①「盟後復伐」，今按：《穀梁傳》襄十一年：「同盟于

京城北。公至自伐鄭。不以後致，盟後復伐鄭也。」范

注：「傳例曰：『已伐而盟，復伐者，則以伐致；盟

不復伐者，則以會致。』皆言「復伐」，不曰「後伐」。此

疏文引亦作「盟後復伐」，則此當作「盟後復伐」。



【疏】「還者」至「辭也」。○釋曰：重發傳者，嫌內外異也。何休《廢疾》難此云：「君子不求備於一人，士句不伐喪，純善矣。何以復責其專大功也？」鄭玄釋之曰：「士句不伐喪則善矣，然于善則稱君，禮仍未備，故言乃還，不言乃復，作未畢之辭。」還者致辭，復者反命，如鄭之言，亦是譏士句不復命也。然如鄭意，以乃還為惡，乃復為善，則公子遂至黃乃復，又為惡之者，彼以遂違君命而反，故加畢事之文，欲見臣不專君命，與此意少異。此既善不伐喪，復為畢事之辭，則是純善士句，故以未畢之辭言之。

受命而誅，生死無所加其怒。不伐喪，善之也。善之，則何為未畢也？君不尸小事，臣不專大名。善則稱君，過則稱己，則民作讓矣。士句外專君命，故非之也。然則為士句者宜奈何？宜墀帷而歸命乎介。除地為墀，於墀張帷，反命于介，介歸告君，君命乃還，不敢專也。○墀音善，介音界，副使也。

八月，丙辰，仲孫蔑卒。

齊殺其大夫高厚。

鄭殺其大夫公子嘉。

冬，葬齊靈公。城西郭。

叔孫豹會晉士句于柯。柯，地。

城武城。

二十年，春，王正月，辛亥，仲孫速會莒人盟于向。向，莒邑，○向，舒亮反。

夏，六月，庚申，公會晉侯、齊侯、宋公、衛侯、鄭伯、曹伯、莒子、邾子、滕子、薛伯、杞伯、小邾子盟于澶淵。澶淵，衛地。○澶，市然反。

秋，公至自會。

仲孫速帥師伐邾。

蔡殺其大夫公子濕。

蔡公子履出奔楚。

陳侯之弟光出奔楚。諸侯之尊，弟兄

① 「人」下，原有「原空闕三字」五字，當為版刻者識記之語。今刪。

不得以屬通。其弟云者，親之也。親而奔之，惡也。顯書弟，明其親也。親而奔逐之，所以惡陳侯。○弟光，《左氏》作黃。惡音烏路反。

【疏】注「所以惡陳侯」。○釋曰：知非惡光者，以傳例「歸爲善，自某歸次之」，以二十三年云「光自楚歸于陳」，又且專之稱弟罪衛侯，則光稱弟罪陳侯也，故鄭《釋廢疾》亦云「惡陳侯也」。

叔老如齊。

冬，十月，丙辰朔，日有食之。

季孫宿如宋。

二十有一年，春，王正月，公如晉。

邾庶其以漆間丘來奔。以者，不以者也。

凱曰：「人臣無專祿以邑叛之道。」○漆音七。間，力居反。

【疏】「以者不以者也」。○釋曰：重發傳者，此非用兵之以，故昭五年「莒牟夷以牟婁及防茲來奔」，傳曰「及防茲，以大及小也」，是大小不敵，故當言及。今不言及，爲小大敵故也。

來奔者不言出，舉其接我者也。漆間

丘不言及，小大敵也。

夏，公至自晉。

秋，晉欒盈出奔楚。

九月，庚戌朔，日有食之。

冬，十月，庚辰朔，日有食之。

【疏】「日有食之」。○釋曰：此年與二十四年，皆頻月日食。據今歷有無頻食之理，<sup>①</sup>但古或有之。故《漢書·高祖本紀》亦有頻食。

曹伯來朝。○朝，直遙反。

公會晉侯、齊侯、宋公、衛侯、鄭伯、曹伯、莒子、邾子于商任。商任，某地。○任音壬。

庚子，孔子生。<sup>②</sup>

【疏】「庚子孔子生」。○釋曰：仲尼以此年生，

①「有無」，單疏本作「法無」。阮校：「監、毛本『有無』作『無有』，何校本『有』作『法』。」

②「庚子孔子生」，《穀梁補注》曰：「《左氏》無此文。今本《公羊》多『十有一月』四字。唐石經以下皆然。據陸氏《音義》，知《公羊》亦無『十有一月』，其有者，乃別本之誤也。」

故傳因而錄之。《史記·世家》云襄公二十二年生者，馬遷之言，與經典不同者非一，故與此傳異年耳。

二十有二年，春，王正月，公至自會。

【疏】「公至自會」。○釋曰：此與二十一年「公如晉」皆月者，依傳例「月者有危」，傳不記危之事，未可知也。何休云「善公能事大國」，案下沙隨會公至不月，則何說非。

夏，四月。

秋，七月，辛酉，叔老卒。

冬，公會晉侯、齊侯、宋公、衛侯、鄭伯、曹伯、莒子、邾子、滕子、薛伯、杞伯、小邾子于沙隨。

公至自會。

楚殺其大夫公子追舒。

二十有三年，春，王二月，癸酉，朔，日有食之。

三月，己巳，杞伯勾卒。○勾，古害反。

夏，邾畀我來奔。○畀，必二反。

葬杞孝公。

陳殺其大夫慶虎及慶寅。稱國以殺，罪累上也。及慶寅，慶寅累也。

陳侯之弟光自楚歸于陳。光反稱弟言歸，無罪明矣。

晉欒盈復入于晉，入于曲沃。曲沃，晉地。○復，扶又反。

秋，齊侯伐衛，遂伐晉。

八月，叔孫豹帥師救晉，次于雍洧。雍洧，晉地。○雍，於用反，又如字。洧，羊朱反。言救後次，非救也。惡其不遂君命而專止次，故先通君命而後言次，尊君抑臣之義。鄭嗣曰：「次，止也。凡先書救而後言次，皆非救也。」僖元年「齊師、宋師、曹師次于聶北，救邢」，此師本欲止聶北，遙爲之援爾，隨其本意而書，故先言次而後言救。豹本受君命救晉，中道不能，故先言救而後言次。若鄭伯未見諸侯，而曰如會，致其本意。○惡其，音烏路反，①下傳「惡之」同。聶北，不輒反。中道，丁仲反，又如字。

①「音」，《釋文》作「惡其烏路反」，此處當衍「音」字。

【疏】「言救」至「救也」。○釋曰：後言次爲非救，則以僖元年先言次即是救，彼傳亦云非救者，其實言次，則並是非救，但傳各隨其本意而釋之，鄭嗣言之詳矣。

己卯，仲孫速卒。

冬，十月，乙亥，臧孫紇出奔邾。其日，

正臧孫紇之出也。正其有罪。蘧伯玉曰：

「不以道事其君者，其出乎？」必不見容。

○蘧，其居反。

晉人殺欒盈。惡之，弗有也。不言殺其大

夫，是不有之以爲大夫。

齊侯襲莒。輕行掩其不備曰襲。○輕，遣政

反，又如字。

二十有四年，春，叔孫豹如晉。

仲孫羯帥師侵齊。

夏，楚子伐吳。

秋，七月，甲子，朔，日有食之，既。

齊崔杼帥師伐莒。

大水。

八月，癸巳，朔，日有食之。

公會晉侯、宋公、衛侯、鄭伯、曹伯、莒

子、邾子、滕子、薛伯、杞伯、小邾子于夷儀。

冬，楚子、蔡侯、陳侯、許男伐鄭。

公至自會。

陳鍼宜咎出奔楚。○鍼，其廉反。咎，其九

反。

叔孫豹如京師。

大饑。五穀不升爲大饑。升，成也。一

穀不升謂之歉，歉，不足貌。○歉，去聲反。二穀

不升謂之饑，三穀不升謂之饑，○饑音近。四

穀不升謂之康，康，虛。五穀不升謂之大侵。

侵，傷。

【疏】「五穀」至「大侵」。○釋曰：「二穀不升謂

之饑」，今經云「大饑」，故傳云「五穀不升」也。謂之歉，謂之康，歉是不足之貌，康是虛荒之名。「五穀不升謂之大侵」，又謂之大饑者，以經云「大饑」，是傳文順經言之，經所云「大饑」者，謂五穀不熟也。其實大侵者，大饑之異名，通而言之，正是一物也，傳欲分析五種之名，故異言之。

耳。徐邈云「有死者曰大饑，無死者曰大饑」，何休云「有死曰大饑，無死曰饑」，<sup>①</sup>並以意言之，與《穀梁》異也。

大侵之禮，君食不兼味，臺榭不塗。塗，

聖飾。<sup>②</sup> ○榭音謝。聖，<sup>③</sup>鳥路反，又烏洛反。<sup>④</sup> 弛

侯，廷道不除。弛，廢也。侯，射侯也。廢侯不燕射，廷內道路不脩除。○弛侯，式氏反。廷道，徒佞反，朝廷之道也，一音庭。

【疏】注「弛廢」至「燕射」。○釋曰：凡大射為祭

擇士，賓射則接賓而射，燕則因歡燕而為射。<sup>⑤</sup> 既國大饑，君不宜燕樂，故注舉燕射言之，其實尚不祭鬼神，亦不應有大射賓射之禮，故傳以弛侯總之。或以為燕射一侯，禮最省，故舉之以明餘者亦不為之耳，理亦通之。<sup>⑥</sup>

百官布而不制，官職脩列，不可闕廢，不更有造作。鬼神禱而不祀，《周書》曰：「大荒有禱無祀。」

【疏】注「周書」至「無祀」。○釋曰：《周書》者，

先儒以為仲尼刪《尚書》之餘，今據其書與《尚書》不類，未知是與非也。

此大侵之禮也。

二十有五年，春，齊崔杼帥師伐我北鄙。

夏，五月，乙亥，齊崔杼弑其君光。莊

公失言，淫于崔氏。放言將淫崔氏，為此見弑也。

邵曰：「淫，過也。言莊公言語失漏，有過於崔子，而崔子弑之。」故傳載其致弑之由，以明崔杼之罪甚。○為此，于偽反，下「為其」同。

【疏】注「放言」至「罪甚」。○釋曰：失言謂放言，謂放言語淫崔氏。<sup>⑦</sup> 邵解云謂言語失漏，有過於崔氏。范兩載之者，貴異說耳。注又云「傳載其致弑之由」者，正謂此傳，不更據別文也。

①「有死曰大饑無死曰饑」，阮校：「單疏本、監、毛本

「死」下有「者」字，閩本「无」作「無」，監、毛本同「饑」，「饑」字倒。按《公羊》注作「有死傷曰大饑，無死傷曰饑」。今按：阮元《校勘記》出此條作「有死曰大饑无死曰饑」。

②「聖」，原作「塗」，據宋刻元修本改。

③「聖」，原作「塗」，據宋刻元修本及《釋文》改。

④「烏洛」，原作「同都」，據宋刻元修本及《釋文》改。

⑤「燕」，上言「大射」、「賓射」，則此「燕」當言「燕射」。疑

「燕」下脫「射」字。

⑥「通之」，阮校：「監、毛本無「之」字。」

⑦「失言」至「崔氏」，單疏本「謂放言」三字不重。

公會晉侯、宋公、衛侯、鄭伯、曹伯、莒子、邾子、滕子、薛伯、杞伯、小邾子于夷儀。

六月，壬子，鄭公孫舍之帥師入陳。

秋，八月，己巳，諸侯同盟于重丘。會夷儀之諸侯也。重丘，齊地。○重，直龍反。

公至自會。

衛侯入于夷儀。夷儀本邢地，衛滅邢而爲衛地。<sup>①</sup>

楚屈建帥師滅舒鳩。○屈，居勿反。<sup>②</sup>

冬，鄭公孫夏帥師伐陳。○夏，戶雅反。

十有二月，吳子謁伐楚，門于巢，卒。

以伐楚之事，門于巢，卒也。所以攻巢之門者，爲其伐楚之事故也。然則伐楚經巢。○子謁，《左氏》作遏。于巢者，外乎楚也。若但言伐楚卒而不言于巢者，則卒在楚也。言于巢，則不在楚。門于巢，

乃伐楚也。先攻巢，然後楚乃可得伐。

【疏】注「先攻巢」。○釋曰：舊解，巢，楚竟上之小國，有表裏之援，故先攻之，然後楚可得伐，以爲楚邑非也。徐邈亦云「巢，偃姓之國」是也。

諸侯不生名，取卒之名，加之伐楚之上者，見以伐楚卒也。其見以伐楚卒何也？據伐楚惡事，無緣致本意。○見，賢徧反。

【疏】「諸侯不生名」。○釋曰：重發傳者，與失國生名異故也。

古者大國過小邑，小邑必飾城而請罪，禮也。飾城者，脩守備。請罪，問所以爲闕致師之意。

○守備，手又反，或如字。吳子謁伐楚，至巢，入

其門，門人射吳子。有矢創，反舍而卒。古

者雖有文事，必有武備，非巢之不飾城而請罪，非吳子之自輕也。非，責。○射，食亦反。創，

初良反。

二十有六年，春，王二月，辛卯，衛甯喜弑其君剽。此不正，其日何也？殖也立

之，喜也君之，正也。父立以爲君，則子宜君之，以明正也。○君剽，匹妙反。

①「地」，《穀梁補注》作「邑」。

②「勿」，原作「忽」，據宋刻元修本及《釋文》改。

【疏】「此不正其日何」。○釋曰：知剽不正者，以元年稱公孫見經故也。

衛孫林父入于戚以叛。

甲午，衛侯衎復歸于衛。日歸，見知弑

也。書喜弑君，衎可言歸，衎實與弑，故錄日以見之。書日所以知其與弑者，<sup>①</sup>言辛卯弑君，甲午便歸，是待弑而入，故得速也。○衎，苦旦反，一本作衍。見知，賢徧反。實與，音豫，下同。

【疏】「日歸」至「弑也」。○釋曰：衎既與弑，不言人以惡之者，傳例歸為善，復歸則居其兩端，故傳復者復中國，歸者歸其所。今喜既弑君，衎可言歸，但以與弑，故從平文云復歸。<sup>②</sup>書名，因以見惡耳。不言人，以明歸罪于甯喜也。

夏，晉侯使荀吳來聘。

公會晉人、鄭良霄、宋人、曹人于澶淵。

秋，宋公殺其世子座。<sup>③</sup>○座，在禾反。

晉人執衛甯喜。

八月，壬午，許男甯卒于楚。宣九年九月「辛酉，晉侯黑臀卒于扈」，傳曰「其日，未踰竟也」。此乃在楚，何以日邪？隱三年「八月，庚辰，宋公和卒」，傳

曰：「日卒，正也。」許男卒于楚，則在外已顯，日卒，明其正。○竟音境。

【疏】注「宣九」至「其正」。○釋曰：案薄氏駁云：「此自發例於大國，不明於小國。」<sup>④</sup>其小國或詳或畧，許男書日，必正也。<sup>⑤</sup>范答云：「《春秋》稱世子，國有非正，<sup>⑥</sup>周之襄王，晉之恭子，曹伯射姑，亦是其例。纘且之卒，謂于日食之下，<sup>⑦</sup>何以知其不日？」然則范之此答，據何文得知？又周之襄王與恭子何以為別？又薄氏之駁不問射姑，而范答探意大過者，案《左氏》襄王是惠后之子，明襄王是嫡也。故文八年書「八月，戊申，天王崩」。恭世子是獻公烝父妾而生，僖五年被殺，不日，故知雖世子仍非嫡也。薄氏之意，見射姑稱世子，而卒不稱日，故

①「故錄日以見之書日」，阮校：「毛本『日』誤『曰』，余

本無『以見之書日』五字。」

②「平」，單疏本作「中」。

③「殺其」，《釋文》作「弑其」。「座」，《穀梁補注》：《左

傳》、《公羊傳》作「痊」。

④「明」，《穀梁補注》作「關」。

⑤「必」，《穀梁補注》作「未必」。

⑥「國」，阮校云：「何校本『國』作『固』。」今按：單疏

本同何校本。《穀梁補注》引疏亦作「固」。

⑦「謂」，《穀梁補注》作「連」。

駁云發例于大國，小國自從詳畧，故范以射姑非正答之。據陳侯款僖七年寧母之會亦言世子，至僖二十八年書卒之上亦不日，明稱世子亦有非正也。捷菑既貶，則獲且是正，故知獲且之卒，蒙上日食之文可知。襄王正，恭子不正，而亦引以爲例者，欲明襄王正而稱世子，申生不正亦稱世子。據此言之，明有不正而稱世子者，

冬，楚子、蔡侯、陳侯伐鄭。

葬許靈公。

二十有七年，春，齊侯使慶封來聘。

夏，叔孫豹會晉趙武、楚屈建、蔡公孫歸生、衛石惡、陳孔奐、鄭良霄、許人、曹人于宋。○奐，呼亂反。

衛殺其大夫甯喜。稱國以殺，罪累上也。甯喜弑君，其以累上之辭言之，何也？

嘗爲大夫，與之涉公事矣。鄭嗣曰：「若獻人以喜有弑君之罪而殺之，<sup>①</sup>則不宜既人以爲大夫，而復殺之，<sup>②</sup>明以他故。」○復音扶又反。

【疏】「涉公事矣」。○釋曰：舊解，國家之事，危若涉海，以水行爲踰也。徐邈云：「涉猶歷也。」○傳「織紉邯鄲」。糜信云：「紉者，著履舄之頭，即《周禮》紉

總及純是也。」<sup>③</sup>

甯喜由君弑君，而不以弑君之罪罪之者，惡獻公也。獻公即衍也。鄭嗣曰：「書甯喜弑其君，則喜之罪不嫌不明。今若不言喜之無罪而死，則獻公之惡不彰。」○惡獻，烏路反。

衛侯之弟專出奔晉。○專，《左氏》作鱄。

專，喜之徒也。專之爲喜之徒，何也？己雖急納其兄，與人之臣謀弑其君，是亦弑君者也。專其曰弟，何也？據稱弟則無罪。○己音紀。專有是信者。言君本使專與喜爲約納君，許以寵賂，今反殺之，獻公使專失信，故稱弟，見獻公之惡也。○見，賢徧反。君賂不入乎喜而殺喜，是君

①「入」，阮校：「余本『入』作『公』。」

②「復」，原作「得」，阮校：「何校本『得』作『復』。案：《釋文》出『而復』，作『復』是。」今據改。

③「周禮紉總及純」，《穀梁補注》引疏作「《儀禮》紉總純」。孫校：「《周禮》，鍾文烝《補注》引此改作「儀禮」，近是。《周禮·屨人》有紉總無純，惟《士冠禮》三者備有。」



不直乎喜也，故出奔晉。織紵邯鄲，終身不言衛。恥失信。○紵，其俱反。邯音寒。鄲音丹。

專之去，合乎《春秋》。何休曰：「甯喜本弑君之家，獻公過而殺之，小負也。專以君之小負自絕，非大義也。何以合乎《春秋》？」鄭君釋之曰：「甯喜雖弑君之家，本專與約納獻公爾。公由喜得人，已與喜以君臣從事矣。《春秋》撥亂重盟約，今獻公背之，而殺忠于己者，是獻公惡而難親也。獻公既惡而難親，專又與喜爲黨，懼禍將及，君子見幾而作，不俟終日。微子去紂，孔子以爲三仁。」○專之去衛，其心若此，合于《春秋》，不亦宜乎？○與約，如字，又於妙反，下同。爲約，于僞反，本或作盟約。背之，音佩。

秋，七月，辛巳，豹及諸侯之大夫盟于宋。湟梁之會，諸侯在而不曰諸侯之大夫，大夫不臣也，晉趙武恥之。豹云者，恭也。不舉姓氏。諸侯不在而曰諸侯之大夫，大夫臣也，其臣恭也，晉趙武爲之會也。

【疏】「晉趙」至「會也」。○釋曰：豹云能恭，獨言趙武恥之者，趙武恥湟梁之會大夫不臣，故今帥諸侯大夫爲恭，故歸功趙武也。傳言「豹云者」，據前稱氏，後直

名也。

冬，十有二月，乙亥，朔，日有食之。二十有八年，春，無冰。夏，衛石惡出奔晉。

邾子來朝。○朝，直遙反。

秋，八月，大雩。

仲孫羯如晉。

冬，齊慶封來奔。

十有一月，公如楚。

【疏】「公如楚」。○釋曰：書月者，何休云：「危公朝夷狄。」案下二十九年「公至自楚」，傳云「喜之也」。則何說是耳。

十有二月，甲寅，天王崩。靈王。

乙未，楚子昭卒。

①「三」，原作「上」，阮校：「閩、監、毛本『上』作『三』，是也。」今據改。

②「今帥」，原作「合帥」，單疏本作「今帥」。阮校：「閩、監、毛本『師』作『帥』，何校本『合』作『今』。」今據改。

二十有九年，春，王正月，公在楚。閔公也。閔公爲楚所制，故存錄。

夏，五月，公至自楚。喜之也。凱曰：「遠之蠻國，喜得全歸。」致君者，殆其往，殆，危。而喜其反，此致君之意義也。

【疏】「致君」至「義也」。○釋曰：於此發之者，以公遠之荆蠻，故傳特發之，明中國亦同也。

庚午，衛侯衍卒。

閔弑吳子餘祭。閔，門者也，寺人也。不稱名姓，閔不得齊於人。不稱其君，閔不得君其君也。禮：君不使無恥，不近刑人，無恥，不知臧否。○閔音昏，守門人也。祭，側界反。寺人，本又作侍人。不近，附近之近，下同。否音鄙，又方九反。不狎敵，不邇怨。賤人非所貴也，貴人非所刑也，刑人非所近也。舉至賤而加之吳子，吳子近刑人也。閔弑吳子餘祭，仇之也。怨仇餘祭，故弑之。○狎，戶甲反。怨，於願反，又於元反。仇音求。

【疏】「閔門」至「之也」。○釋曰：稟二儀之氣，須五常之性備，然後爲人。閔者，虧刑絕嗣，無陰陽之會，故不復齊於人。以主門晨昏開閉謂之閔，以是奄豎之屬，故又謂之寺人也。「不狎敵，不邇怨」者，言爲人君之道，外不得狎敵，內不得近怨。何者？吳遏以狎敵蒙禍，餘祭以邇怨害身，故不可狎敵近怨也。「賤人非所貴」，謂卑賤之人，無高德者，不可卒貴。「貴人非所刑」，謂刑不上大夫，故不可刑之。「刑非所近也」，<sup>②</sup>謂刑罪之人，不可信近之。今吳子以奄人爲閔，是近之也。「舉至賤而加之吳子，近刑人也」，謂經書「閔弑吳子餘祭」者，譏其近刑人也。○注「怨仇餘祭」。<sup>③</sup>○釋曰：國君不仇匹夫，犯罪則誅之，故知是閔怨也。

仲孫羯會晉荀盈、齊高止、宋華定、衛世叔儀、鄭公孫段、曹人、莒人、邾人、滕人、薛人、小邾人城杞。古者天子封諸侯，其地

①「遏」，《穀梁補注》作「謁」。今按：《穀梁傳》襄公二十五年傳文作「吳子謁」，作「謁」是。

②「刑非所近也」，阮校：「監、毛本作『刑人非所近』。」今按：此釋傳文，監、毛本是。

③「祭」，原作「祭祭」，單疏本不重「祭」字，據刪。

足以容其民，其民足以滿城以自守也。杞危而不能自守，故諸侯之大夫相帥以城之，此變之正也。諸侯微弱，政由大夫，大夫能同恤災危，故曰變之正。

【疏】「變之正」。○釋曰：諸侯恤災救危是正，今大夫爲之，故云「變之正也」。

晉侯使士鞅來聘。

杞子來盟。杞復稱子，蓋時王所黜。○復，扶又反。

吳子使札來聘。杜預曰：「吳子餘祭既遣札聘上國而後死，札以六月到魯，未聞喪也。不稱公子，其禮未同於上國。」○札，側八反。吳其稱子何也？善使延陵季子，故進之也。身賢，賢也。使賢，亦賢也。延陵季子之賢，尊君也。以季札之賢，吳子得進稱子，是尊君也。其名，成尊於上也。《春秋》賢者不名，而札名者，許夷狄不一而足，唯成吳之尊稱。直稱吳，則不得有大夫。○尊稱，尺證反。

【疏】「成尊於上也」。○釋曰：謂進吳稱子，上謂君上也。

秋，七月，葬衛獻公。

齊高止出奔北燕。其曰北燕，從史文

也。南燕，姁姓，在鄭、衛之間。北燕，姬姓，在晉之北，史曰北燕，據時然，故不改也。傳所言解時但有言燕者。①○北燕，音烟，國名。姁，其乙反，又其吉反。

【疏】「從史文也」。○釋曰：傳言從史文者，以時有直言燕者，故仲尼從史文也。

冬，仲孫羯如晉。

三十年，春，王正月，楚子使薳罷來聘。

聘例時，此聘月之，何也？泰曰：「桓二年『宋督弑其君與夷』，傳曰『書王以正與夷之卒』。然則善有所明，②皆須王以正之。書王必上繫于春，下統于月。此書王以治蔡般弑父之罪爾，非以錄薳罷之聘。」○薳罷，于委反，下音皮。與夷如字，又音餘，宋殤公名。

夏，四月，蔡世子般弑其君固。其不日，子奪父政，是謂夷之。比之夷弑，故不日也。

① 「燕」，阮校：「余本『燕』下有『有』字。」  
② 「善」，阮校：「余本『善』作『義』。」

「丁未，楚世子商弑其父」，<sup>①</sup>傳曰：「日髡之卒，所以謹商臣之弑也。」楚公子比弑其君」，傳曰：「不日，比不弑。」般弑不日，而曰夷之，何也？徐乾曰：「凡中國君正卒，皆書日以錄之。夷狄君卒，皆不日以畧之，所以別中國與夷狄。夷狄弑君而日者，閔其爲惡之甚，謹而錄之。中國君卒例日，不以弑與不弑也。至于卒而不日者，乃所以畧之，與夷狄同例。」○子般，音班，本或作班。髡，苦門反。以別，彼列反。

【疏】注「比之」至「同例」。○釋曰：何休《廢疾》云：「蔡世子班弑其君固，不日，謂之夷。楚世子商臣弑其君，何以反書日邪？」鄭玄釋之曰：「商臣弑父日之，嫌夷狄無禮，罪輕也。今蔡中國，而又弑父，故不日之，若夷狄不足責然。《公羊》有若不疾乃疾之，推以況此，則無怪然。」此注之意，與鄭君《釋廢疾》大旨同也，<sup>②</sup>但解商臣之弑書日少異耳。何者？鄭云「嫌夷狄無禮，罪輕，故日」，徐乾云「閔其爲惡之甚，故日」，是少異也。昭十九年「夏，五月，戊辰，許世子止弑其君買」，<sup>③</sup>傳云：「日弑，正卒也。」與此異者，彼以實不弑君而書日，故與此異也。

五月，甲午，宋災，伯姬卒。取卒之日，加之災上者，見以災卒也。其見以災卒奈何？伯姬之舍失火，左右曰：「夫人少辟

火乎？」伯姬曰：「婦人之義，傅母不在，宵不下堂。」宵，夜。○見以，賢徧反。辟音避，下同。左右又曰：「夫人少辟火乎？」伯姬曰：「婦人之義，保母不在，宵不下堂。」遂逮乎火而死。婦人以貞爲行者也，伯姬之婦道盡矣。詳其事，賢伯姬也。○逮言代，<sup>④</sup>又大計反。行，下孟反。

【疏】「取卒」至「姬也」。○釋曰：外災例時，今伯姬之卒故進日在上，以明災死也。「伯姬之婦道盡矣」，爲共公卒雖日久，姬能守災死之貞，<sup>⑤</sup>謂之婦道盡矣。

天王殺其弟佖夫。傳曰：諸侯且不

- ①「弑其父」，宋刻元修本「弑」作「殺」，《穀梁補注》「父」作「君」。今按：《穀梁傳》文元年經作「丁未楚世子商臣弑其君」，則作「君」是。
- ②「旨」，阮校：「監、毛本『旨』作『致』」。
- ③「買」，宋刻元修本作「罪」。
- ④「言代」，「言」當爲「音」之訛。《釋文》作「音代」。
- ⑤「災死」，阮校：「何校本『災死』作『夫在』」。

首惡，<sup>①</sup>沉於天子乎？君無忍親之義，天子諸侯所親者，唯長子母弟耳。天王殺其弟佞夫，甚之也。○長，丁丈反。

【疏】「沉於天子乎」。○釋曰：嫌天子之殺弟異於諸侯，故以輕沉重，舉重以明輕，見輕重之道並見矣。<sup>②</sup>

王子瑕奔晉。不言出，周無外。

秋，七月，叔弓如宋，葬共姬。共姬，從夫之謚。○共音恭。外夫人不書葬，此其言葬，何也？吾女也。卒災，故隱而葬之也。

【疏】「外夫人至葬之也」。○釋曰：外夫人卒亦不書，而云不書葬者，傳云「外夫人不葬」者，謂魯女嫁於諸侯者，唯當書卒，不合稱葬，非謂不是魯女也。

鄭良霄出奔許，自許人于鄭。

鄭人殺良霄。不言大夫，惡之也。

○惡，烏路反。

【疏】「不言」至「之也」。○釋曰：襄二十三年「晉人殺欒盈」，<sup>③</sup>傳曰：「惡之，弗有也。」彼云不有，則此亦然也。重發傳者，嫌與復人異故也。

冬，十月，葬蔡景公。不日卒而月葬，不葬者也。卒而葬之，不忍使公失民於子也。鄭嗣曰：「夫葬者，臣子之事也。景公無子，不可謂無民。無民則景公有失於民，有民則罪歸於子。若不書葬，則嫌亦失民，故曰「不忍使父失民於子」。」

【疏】「不日」至「子也」。○釋曰：成十五年「秋，八月，庚辰，葬宋共公」，傳曰：「月卒日葬，非葬者也。」<sup>④</sup>此云「不日卒而月葬，不葬者也」，重發傳而文又異者，傳例「諸侯日卒時葬，正也」，明違此即非正，故兩文以明之。又解一弑一卒，經文有日月之殊，故重發傳而文異。日月有殊者，宋共則日葬，景公則月葬，是殊也。宋襄失民不葬，此失民書葬者，此即是於失子，非失民。若實失民，則

①「且」，原作「目」，阮校：「監、毛本『目』作『且』。按石經亦作『且』。」今據改。

②「見」，《穀梁補注》作「是」。

③「三」，原作「一」，單疏本作「三」。今按：「晉人殺欒盈」在襄二十三年，據改。

④「非葬」，原無，阮校：「何校本『葬』下有『非葬』二字，與成十五年傳合。」今按：單疏本同何校本，據補。

直稱人以弑以弑。①傳曰「不忍使父失民於子也」，是非失民可知。傳云「不忍使父失民於子」者，言若不書葬，則與失民同，故云然也。

晉人、齊人、宋人、衛人、鄭人、曹人、莒人、邾人、滕人、薛人、杞人、小邾人會于澶淵，宋災故。會不言其所爲，其曰宋災故，何也？不言災故，則無以見其善也。其曰人，何也？救災以衆。何救焉？更宋之所喪財也。償其所喪財，故雖不及災時，而猶曰救災。○所爲，于僞反。以見，賢徧反。更音庚，償也。喪，息浪反。償，時亮反。

【疏】「晉人」至「財也」。○釋曰：《公羊傳》云：「卿則其稱人何？貶也。曷爲貶？卿不得憂諸侯也。」《左氏》以爲不歸宋財，故貶。此傳云：「其曰人何？救災以衆。」是三傳異也。或當此會，趙武亦在，但取救災以衆，故不顯名也。

澶淵之會，中國不侵伐夷狄，夷狄不入中國，無侵伐八年，善之也。晉趙武、楚屈建之力也。

【疏】「無侵伐八年」。○釋曰：徐邈云：「晉趙武、楚屈建感伯姬之節，故爲之息兵。」其意以爲諸侯閔伯姬之賢，故歸宋財，爲澶淵之會。此不相侵伐，連會言之，故知爲伯姬也。范氏不解，理未必然。言感伯姬歸宋財，事亦可矣，豈以一婦人之貞，國則息兵八載，人情測之，必是未可。又且傳稱趙武、屈建之力，則無侵伐不由伯姬明矣。若然，則此會不書楚人，則無楚屈建。若據此後言之，昭元年即楚靈王即位，不得云無侵伐八年。若據二十六年澶淵之會言之，何知彼有趙武、屈建？唯二十七年見經，而云屈建之力者，案《左氏》，晉趙武以二十五年爲政，二十六年澶淵之會，晉人列在鄭卿之上，明是趙武。但恥梁不臣，故屈於澶淵也。其實晉人者趙武，是爲政起於二十五年，再會澶淵，一會宋，又昭元年會于弔，而中國以安，屈建雖一會于宋，外寧夷狄，是屈建之功。傳恐連公子圍之事，故以屈建別之，故《左氏》云相晉國於今八年，亦從二十五年數至昭元年也。傳連此澶淵會言之者，以諸侯靜兵，由趙武功力，此歸宋財，亦是趙武爲之，以其息師，故得憂災恤患，是以連言之耳。

三十有一年，春，王正月。

夏，六月，辛巳，公薨于楚宮。楚宮，非

①「以弑以弑」，下「以弑」疑衍。

正也。楚宮，別宮名，非路寢。

秋，九月，癸巳，子野卒。襄公太子。<sup>①</sup>  
○大音泰。子卒日，正也。

【疏】「子卒日正也」。○解云：未踰年之君，弑死不日。文十八年「子卒」是也。莊三十二年「子般卒」書日者，以有所見故也。今子野正卒書日，嫌與子般同，故傳發之以明昭公之繼正也。

己亥，仲孫羯卒。

冬，十月，滕子來會葬。書非禮。

癸酉，葬我君襄公。

十有一月，莒人弑其君密州。

① 「大」，原作「太」，阮校：「監、毛本『太』作『大』。案「大」是」。今據改。

# 監本春秋穀梁注疏昭公卷第十七

起元年，盡十三年

范甯集解 楊士勛疏

昭公

【疏】《魯世家》：昭公名稠，<sup>①</sup>襄公之子，以周景王四年即位。《謚法》：「容儀恭明曰昭。」

元年，春，王正月，公即位。繼正即位，正也。

【疏】「繼正即位正也」。○釋曰：重發傳者，嫌繼子野非正，故明之。

叔孫豹會晉趙武、楚公子圍、齊國弱、宋向戌、<sup>②</sup>衛齊惡、陳公子招、蔡公孫歸生、鄭罕虎、許人、曹人于郭。○招，上昭反。郭，《左氏》作號。

二月，<sup>③</sup>取鄆。鄆，魯邑。言取者，叛戾不服。○鄆音運。

【疏】注「鄆魯」至「不服」。○釋曰：案《左氏》鄆為莒邑。范知魯邑者，以經有城諸及鄆之文。此鄆不繼莒，故知魯邑也。《公羊傳》曰「鄆者何？內之邑也。其言取之何？」<sup>④</sup>不聽也，何休云「不聽者，叛也」，是范所據之文也。

夏，秦伯之弟鍼出奔晉。諸侯之尊，弟兄不得以屬通。其弟云者，親之也。親而奔之，惡也。○鍼，其廉反。惡，烏路反。

【疏】「親而奔之惡也」。○釋曰：重發傳者，陳侯之弟稱歸，為無罪，此鍼後無歸文，則罪之輕重，既不可

①「稠」，《史記·魯周公世家》：「魯人立齊歸之子稠為君，是為昭公。《集解》：「徐廣曰：「稠，一作招。」」

《索隱》：「《系本》作「稠」。又徐廣云一作「招」，音紹也。《史記會注考證》云：「《世家》從《左傳》作「稠」，《年表》從《世本》作「稠」。」

②「向戌」，夏校：「《左傳》、《公羊傳》、《穀梁補注》均作「向戌」。」

③「二」，阮校：「石經「二」作「三」，是也。」今按：《左傳》、《公羊傳》經作「三」。

④「之」，原無，夏校據昭元年《公羊傳》及《穀梁補注》補。今從之。



知，故傳云「親而奔之，惡也」，明與陳光同耳。

六月，丁巳，邾子華卒。

晉荀吳帥師敗狄于太原。太原，地。○大

音泰。傳曰：中國曰太原，夷狄曰大鹵。

號從中國，名從主人。襄五年注詳矣。○鹵，力古反。

【疏】注「襄五」至「詳矣」。○釋曰：桓二年亦有文，而注言襄五年者，桓二年論郤鼎之事，襄五年則同論地事，故注指之。

秋，莒去疾自齊入于莒。

莒展出奔吳。

【疏】「莒展出奔吳」。○釋曰：展篡踰年，不稱爵者，徐邈云：「不為內外所與也，不成君，故但書名。」理或然焉。

叔弓帥師疆鄆田。疆之為言猶竟也。

為之境界。○去，起吕反。竟音境。

【疏】「叔弓」至「鄆田」。○釋曰：鄆是魯邑，所以帥師者，《公羊》以為與莒接竟，故帥師是畏莒，故以師正其界。

葬邾悼公。

冬，十有一月，己酉，楚子卷卒。○卷音權，《左氏》作麇。

楚公子比出奔晉。

二年，春，晉侯使韓起來聘。

夏，叔弓如晉。

秋，鄭殺其大夫公孫黑。

冬，公如晉，至河乃復。乃者，亡乎人之辭。

刺公弱劣，受制彊臣。① 恥如晉，故著有疾也。公凡四如晉，季氏訴公于晉侯，使不見公，公懼不利于己，故公托至河有疾而反，以殺恥也。十二年傳曰「季氏不使遂乎晉」，與此傳互文以見義。然則十三年、② 二十一年如晉，與此義同。二十三年經曰「至河，有疾，乃復」，是微有疾而反，嫌與上四如晉同，故明之。○見，去聲。

【疏】「恥如」至「疾也」。○釋曰：案公之「乃復」，凡有五文，惟二十三年經云「至河，有疾，乃復」，自餘四者，皆不云有疾，而傳曰「著有疾」者，公為季氏所訴，恥

① 「疆」，原作「疆」，阮校：「閩、毛本「疆」改「疆」，是也。」今據改。

② 「三」，原作「二」，據宋刻元修本改。

四如晉不入，故皆書曰乃復者，即是託有疾之辭，非實疾也，故傳云「恥如晉，故著有疾也」。二十三年實有疾而復，故經言有疾而別之。○注「公凡四如晉」。○釋曰：此文一也，十二年二也，十三年三也，二十一年四也。二十三年經云「有疾」，故不數之耳。

季孫宿如晉。公如晉而不得人，季孫宿如晉而得人，惡季孫宿也。明晉之不見公，季孫宿之所為。○惡，烏路反。

【疏】「惡季孫宿也」。○釋曰：惡季孫宿，①十二年又發傳云「季孫不使遂乎晉」者，季孫宿以七年卒，十二年譖君者意如，見其累世同惡，故傳重明之。若然，十三年乃復者，意如見執之下，意如身尚被執，安得謂之譖公者？②彼公不盟，亦坐意如。意如先以譖公，被執之日又自雪無罪，晉人聽其言而不受公，故經言乃復之文，與十二年同，明亦是意如譖公可知也。

三年，春，王正月，丁未，滕子原卒。

夏，叔弓如滕。

五月，葬滕成公。

【疏】「夏叔」至「成公」。○釋曰：何休云：「月者，上葬襄公，諸侯莫肯加禮，獨滕子來會葬，故恩錄之。」《穀梁》以月葬為故，必不得從何說，或當有故，但經傳不

言耳。

秋，小邾子來朝。○朝，直遙反。

八月，大雩。

冬，大雨雹。○雨，于付反。雹，皮學反。

北燕伯款出奔齊。其曰北燕，從史文也。

【疏】「從史文也」。○釋曰：重發傳者，前高止之奔，欲明從史文，今北燕伯出奔，亦曰北燕伯，嫌自名之，③故重曰「從史文」，舉此二者以明例，故於後不釋。

四年，春，王正月，大雨雪。雪，或為雹。

○雨雪，于付反，《左氏》作雨雹。

【疏】注「雪，或為雹」。○釋曰：《左氏》為雹，故范疑之云「或為雹」也。

夏，楚子、蔡侯、陳侯、鄭伯、許男、徐子、滕子、頓子、胡子、沈子、小邾子、宋世子

①「惡」上，單疏本有「此云」二字。

②「謂」，阮校：「單疏本作『為』。」

③「自」，原作「目」，《穀梁補注》引作「自」，據改。

佐、淮夷會于申。楚靈王始會諸侯也。<sup>①</sup> ○沈音審。楚人執徐子。稱人以執，執有罪。

【疏】「楚人執徐子」。○釋曰：僖二十一年「執宋公」不言楚，此云「楚人執徐子」者，彼欲見諸侯同執，且不與夷狄執中國，故不言楚人。此時楚彊，徐又夷也，故云楚執。不言歸者，蓋在會而執，尋亦釋之，故不言所歸也。

秋，七月，楚子、蔡侯、陳侯、許男、頓子、胡子、沈子、淮夷伐吳。衆國之君，傾衆悉力，以伐彊敵，內外之害重，故謹而月之。定四年伐楚亦月，<sup>②</sup>此其例也。

【疏】注「衆國」至「例也」。○釋曰：舊解，凡日月之例，多施於內，不止於外。<sup>③</sup>而云「謹而月之」者，以四夷之盛，吳、楚最甚。從此以後，中國微弱，禍害既重，書亦宜詳，故注并引定四年「三月，公會劉子」以下「于召陵，侵楚」爲證，猶莊六年子突王者之師挫於諸侯，僖十五年齊桓霸者之兵屈於伐厲，故亦書月，是其義也。徐邈云「伐不月而書月者，爲滅厲書」，理亦通也。「內外之害」者，內謂吳，外謂衆國也。

執齊慶封，殺之。此人而殺，其不言人，何也？慶封封乎吳鍾離。言時殺慶封自于

鍾離，實不入吳。其不言伐鍾離，何也？不與吳封也。慶封其以齊氏，何也？據已絕于齊，爲齊討也。靈王使人以慶封令於軍中曰：「有若齊慶封弑其君者乎？」謂與崔杼共弑莊公光。○爲，于僞反。慶封曰：「子一息，我亦且一言，曰：有若楚公子圍弑其兄之子而代之爲君者乎！」軍人粲然皆笑。粲然，盛笑貌。○粲，七旦反。

【疏】「弑其兄之子」。○釋曰：元年「楚子卷卒」不云弑，此云弑者，彼爲密弑之，託以疾卒。楚無良史，告以不實，<sup>④</sup>故《春秋》從而書之。傳因慶封之對，以起其事，則篡之罪亦足以見也。<sup>⑤</sup>

慶封弑其君，而不以弑君之罪罪之者，慶封不爲靈王服也，不與楚討也。傳例曰：

- ① 「會」，《穀梁補注》作「合」。
- ② 「伐」，《穀梁補注》作「侵」。
- ③ 「止」，《穀梁補注》作「加」。
- ④ 「以不」，《穀梁補注》作「不以」。
- ⑤ 「篡」下，《穀梁補注》有「弑」字。

「稱人以殺大夫，爲殺有罪。」今殺慶封，經不稱人，故曰「不以弑君之罪罪之」。○爲，于僞反。《春秋》之義，用貴治賤，用賢治不肖，不以亂治亂也。孔子曰：「懷惡而討，雖死不服，其斯之謂與？」○與音餘。

【疏】「孔子曰」至「謂與」。○釋曰：上云《春秋》之義，足以見罪人。①稱孔子曰者，靈王夷狄之君，欲行霸者之事，嫌於得善，故引《春秋》以明之，後言孔子以正之。

遂滅厲。遂，繼事也。

九月，取繒。

【疏】「九月取繒」。○釋曰：襄六年「莒人滅繒」，今又云取者，彼以立莒之公子爲後，故以滅言之，其實非滅，故今魯得取之。不云滅而云取者，徐邈云「諱，故以易言之」，事或然矣。

冬，十有二月，乙卯，叔孫豹卒。

五年，春，王正月，舍中軍。貴復正也。

魯次國，舊二軍，襄十一年立三軍，今毀之，故曰復正。○舍音捨。

楚殺其大夫屈申。○屈，居勿反。

公如晉。

夏，莒牟夷以牟婁及防茲來奔。以者，不以者也。來奔者不言出。以其方向內也。及防茲，以大及小也。莒無大夫，其曰牟夷，何也？以其地來也。②以地來，則何以書也？重地也。竊地之罪重，故不得不錄其人。

【疏】「以者」至「地也」。○釋曰：重發傳者，庶其以邑來而不言及，此以邑來言及，黑肱則不繫濫，故各發傳也。此傳獨言重地者，舉其中以包上下也。

秋，七月，公至自晉。

戊辰，叔弓帥師敗莒師于賁泉。賁泉，魯地。○賁泉，扶粉反，《左氏》作蚡泉。狄人謂賁泉失台，號從中國，名從主人。○台，湯來反。

秦伯卒。

【疏】「秦伯卒」。○釋曰：《左氏》以爲同盟則

①「人」，單疏本作「又」，屬下。

②「其」，阮校：「石經無「其」字。」

名，同盟而不名，皆從赴。《公羊》以爲秦伯不名者，「秦夷也，匿嫡之名」。其意云嫡子生，不以名告國中，唯擇勇猛者而立之。又云秦伯罃及稻名者，嫡子，故得名之，言獨二人以嫡得立也。此傳云隱七年「滕侯卒」，①云無名，「狄道也」，則此秦伯不名者，以用狄道也。②又隱八年「宿男卒」，注曰：③「宿，微國也。未能同盟，故男卒也。」據彼則是未同盟者，則不赴以名。案秦之諸君卒，經或名，或不名，則是非用狄道，蓋同《左氏》未同盟，故不名也。徐邈云「秦伯不名，用狄道也」，恐非耳。

冬，楚子、蔡侯、陳侯、許男、頓子、沈子、徐人、越人伐吳。

六年，春，王正月，杞伯益姑卒。

【疏】「杞伯益姑卒」。○釋曰：不日卒者，蓋非正也。

葬秦景公。

夏，季孫宿如晉。

葬杞文公。

宋華合比出奔衛。○比，必里反，又毗志反。

秋，九月，大雩。

冬，遠罷帥師伐吳。④

冬，叔弓如楚。

齊侯伐北燕。

七年，春，王正月，暨齊平。○暨，其器反。

平者，成也。暨猶暨暨也。暨者不得已也。以外及內曰暨。

【疏】「平者成也」。○釋曰：舊解，平者善事也，當同以爲之，而不得已而爲之，是亂道也，故釋之爲成，言成亂之辭耳。或當成，平義通，故展轉爲訓。

三月，公如楚。

叔孫婁如齊莅盟。○婁，丑畧反。莅音利，又音類。莅，位也。內之前定之辭謂之莅，外之前定之辭謂之來。

【疏】「莅位也」。○釋曰：重發傳者，嫌公如楚，

①「云」，單疏本作「於」。

②「以」，阮校：「單疏本『以』作『似』，是也。」

③「注」，據文例當爲「傳」之訛。

④「冬」，阮校：「石經、余本『冬』作『楚』，不誤。」

恐媼非是君命，故發之，明媼亦受命也。<sup>①</sup>

夏，四月，甲辰，朔，日有食之。

秋，八月，戊辰，衛侯惡卒。鄉曰衛齊

惡，<sup>②</sup>在元年。○鄉，<sup>③</sup>香亮反，本亦作羈，八年同。今

曰衛侯惡，此何爲君臣同名也？君子不奪

人名，不奪人親之所名，重其所以來也，王

父名子也。不奪人名，謂親之所名，明臣雖欲改，君不

當聽也。君不聽臣易名者，欲使重父命也。父受命名于

王父，<sup>④</sup>王父卒，則聽王父之命名之。<sup>⑤</sup>

【疏】「王父名子也」。○釋曰：傳言王父，則祖

也。范云「欲使人重父命也」者，父受名於王父，王父卒則已命子，故傳注兩言之，其並存者則不諱。若卒哭而後，<sup>⑥</sup>無容得斥君名，蓋捨名而稱字耳。

九月，公至自楚。

冬，十有一月，癸未，季孫宿卒。

十有二月，癸亥，葬衛襄公。

八年，春，陳侯之弟招殺陳世子偃師。

鄉曰陳公子招，在元年。今日陳侯之弟招，何

也？曰盡其親，所以惡招也。盡其親，謂既稱公子又稱弟。招，先君之公子，今君之母弟。○惡，烏路反。

【疏】「盡其親」。○釋曰：盡其親者，招前稱公

子，明有先君之親，今變文言弟，彰是今君之親，二稱並見，故云「盡其親」也。然昭元年稱公子，不關殺偃師，而亦言之者，以變公子之文而稱弟，故二者并言之也。十三年「殺公子比」，不言楚比。云「陳世子」者，體國重，故繫國言之。公子繫君，故不繫國也。若然，下云「殺陳孔免」繫陳者，楚人殺他國之臣，故繫國。

兩下相殺，不志乎《春秋》，此其志何也？世子云者，唯君之貳也，云可以重之存焉志之也。諸侯之尊，兄弟不得以屬通。

①「故發之明」，原作「故發明之」，阮校：「單疏本「明之」作「之明」。今據改。」

②「惡」，原作「侯」，據宋刻元修本改。

③「鄉」，《釋文》作「嚮」。

④「欲使」至「王父」，阮校：「余本「使」下有「人」字，無下「命」字。」今按：下疏文引同余本。

⑤「聽」，阮校：「余本作「稱」。」

⑥「而」，阮校：「單疏本作「以」。」

其弟云者，親之也。親而殺之，惡也。惡招。

【疏】注「惡招」。○釋曰：此稱弟惡招，光稱弟惡陳侯者，①光有歸文見經，明知光無罪，今招親殺世子，故知稱弟以惡招也。

夏，四月，辛丑，陳侯溺卒。○溺，乃歷反。

叔弓如晉。

楚人執陳行人干徵師，殺之。干，姓。徵師，名。稱人以執大夫，執有罪也。稱行人，怨接於上也。

【疏】「稱人」至「上也」。○釋曰：重發傳者，嫌楚殺爲甚，恐其無罪，故重發傳以同之。②

陳公子留出奔鄭。

秋，蒐于紅。紅，魯地。○蒐，所求反。紅，戶公反。

【疏】「秋蒐于紅」。○釋曰：傳云「正也」，而經書者，范氏例云：蒐狩書時，其例有九。書狩有四，言蒐有五。稱狩有四者，桓四年「狩于郎」，一也；莊四年「狩于郕」，二也；僖二十八年「狩于河陽」，三也；哀十四年「西狩獲麟」，四也。蒐有五者，此「蒐于紅」，一也；十一年「大蒐于比蒲」，二也；二十二年「大蒐于昌間」，三

也；定十三年「大蒐于比蒲」，四也；定十四年又「大蒐于比蒲」，五也。范又云：「凡書者，皆譏也。昭八年『秋，蒐于紅』，傳云『正也』。而書之者，明比年大蒐失禮，故因此此正見不正也。」是范意將秋蒐得禮，③欲見以正刺不正，故書之。范例又云：「器械皆常，故不云大。言大者，則器械過常。」狩言公，此不云公者，狩則主爲游戲，故言公，蒐是國家常禮，故例不言公也。然則蒐狩書者皆譏，而傳云「因蒐狩以習用武事，禮之大者也」，據得禮者言之。范云比年失禮，謂器械過常，又失時是也。

正也。常事不書，而此書者，以後比年大蒐失禮，因此以見正。○見，賢徧反。因蒐狩以習用武事，

禮之大者也。艾蘭以爲防，蘭，香草也。防，爲田之大限。○狩，手又反。艾，魚廢反。置旃以爲轅門，旃，旌旗之名。《周禮》「通帛爲旃」。④轅門，印車以

①「招光」，單疏本作「昭元年」。

②「疏稱人」至「以同之」，此段疏文原在「陳公子留出奔鄭」下，阮校：「此疏闕、監、毛本在上傳「怨接於上也」下。」今據移正。

③「將」，《穀梁補注》作「以」。

④「爲」，原無，阮校：「余本『帛』下有『爲』字，是也。」今據阮校及《周禮·司常》補。

其輶表門。○旗，之然反。印車，五郎反，一音仰，本又作昂。以葛覆質以爲縶，質，榘也。縶，門中臬。葛或爲褐。○縶，魚列反，門縶也。榘，張林反。臬，魚列反，

概也。①褐，戶葛反，毛布也。流旁握，御輶者不得人。流旁握，謂車兩轆頭各去門邊空握。②握，四寸也。

輶挂則不得入門。③輶，古帝反，挂也，劉兆云「挂也」，本或作擊。輶音衛，一音徐歲反，車軸頭也。挂，

戶卦反，又音卦，礙也。車軌塵，塵不出轍。馬候蹄，發足相應，遲疾相投。○蹄，徒兮反，馬足也。相應，

應對之應。揜禽旅，揜取衆禽。○揜，於檢反，本亦作掩。④御者不失其馳，然後射者能中。不失馳

騁之節。○中，丁仲反，下皆同。過防弗逐，不從奔之道也。戰不逐奔之義。面傷不獻，嫌誅降。

○降，戶江反。不成禽不獻。惡虐幼少。⑤○惡，烏路反，年末傳及注皆同。少，詩召反。禽雖多，天子取三十焉，其餘與士衆，以習射於射宮。

取三十以共乾豆，賓客之庖。⑥射宮，澤宮。○共音恭。庖，步交反。射而中，田不得禽，則得禽。田得禽而射不中，則不得禽。是以知古之貴仁

義，而賤勇力也。射以不爭爲仁，揖讓爲義。○爭，爭鬪之爭。

【疏】「艾蘭」至「力也」。○釋曰：蘭是草之貴者，地之希有之物，而云艾蘭爲防者，廣澤之內，與衆同生，艾之爲防，則逢蘭同剪，⑦故舉以包之。「置旃以爲轅門」，謂以車爲營，舉輶爲門，又建旃以表之，故云「置旃以

①「概」，原作「揜」，據《釋文》改。

②「空」，阮校：「余本作「容」。」

③「輶挂」，阮校：「案《釋文》出「挂也」，云「戶卦反，又音卦，礙也」，與今本不同。疑陸氏所據本「輶挂」下有

「也挂」二字。」今按：《穀梁補注》引正作「輶挂也，挂則不得入門」。

④「掩」，宋刻元修本作「掩」。阮校：「按「掩」當是「揜」之誤。」

⑤「少」，原作「小」，阮校：「余本「小」作「少」。案：《釋文》出「幼少」，音詩召反，余本是也。」今據改。

⑥「賓客」下，《穀梁補注》有「君」字。今按：《穀梁傳》桓公四年云：「四時之田用三焉，唯其所先得，一爲乾豆，二爲賓客，三爲充君之庖。」《公羊傳》桓公四年亦云：「諸侯曷爲必田狩？一曰乾豆，二曰賓客，三曰充君之庖。」則有「君」字是。

⑦「逢」，宋刻元修本作「逢」，單疏本作「蓬」。



爲轅門，以葛覆質以爲槩，質者，中門之木樑，謂恐木樑傷馬足，故以葛草覆之以爲槩。葛或爲褐者，謂之毛布覆之。<sup>①</sup>徐邈亦云「恐傷馬足，故以毛布覆之」。<sup>②</sup>《毛詩傳》云「褐纏旃以爲門，裘纏質以爲槩」，與此異也。「流旁握，御轅者不得人」，徐邈云：「流，至也。門之廣狹，足令車通。至車兩軸，去門之旁邊一握。握，四寸也。轅者不得人，轅謂挂著，若車挂著門，則不使得人，以恥其御拙也。」觀范之注，似與徐邈同。或以爲流旁握者，謂建旌表門之旒旁去車之兩軸各一握也。古字相通，故傳作流，理亦通也，但與注少僻耳。范注兩軸頭，本或作轅者，兩轅兩軸，止是一物，故鄭玄注《少儀》亦以軸爲轅也。「車軌塵」，謂驅車塵不出軌轍。「馬候蹄」，舊解，四蹄皆發，後足躡前足而相伺候。與范注亦合耳。「揜禽旅」，旅，衆也，謂掩取衆禽。然禮云不掩羣者，謂不得不分別大小，一羣盡取之。今雖掩衆禽，在田則簡其麋卵之流而放之，射訖則釋其面傷之徒不獻之，以習軍禮，則亦不掩羣之義也。

○「古之貴仁義」者，謂田獵之時，務在得禽，不升降，是勇力也；射宮之內，有揖讓周旋，是仁義也；田雖不得禽，射中則得禽，是貴仁義而賤勇力也。舊解以爲射宮之內，還射死禽，中則取之，故以重傷爲難。《論語》稱「射不主皮」，則射皮不射禽也。

陳人殺其大夫公子過。○過音戈。

大雩。

冬，十月，壬午，楚師滅陳，執陳公子招，放之于越。殺陳孔奐。惡楚子也。惡其滅人之國，放有罪之人，反殺無辜之臣，故實是楚子而言師。

【疏】惡楚子也。○釋曰：惡之者，謂滅人之國，又招有罪而放之，免無辜反殺之，有三事之惡，故貶而稱師也。傳知是楚子者，以九年經「叔弓會楚子於陳」，知滅陳亦是楚子，但爲惡之，故貶稱師也。不貶稱人而言師者，以楚恃彊滅國，著其用大衆，故云師。若貶之稱人，嫌是賤者，故不言人矣。

葬陳哀公。不與楚滅，閔公也。<sup>③</sup>滅國不葬，閔楚夷狄以無道滅之，故書葬以存陳。

【疏】滅國。○釋曰：滅國不葬，<sup>④</sup>今書葬者，以楚夷狄，無道滅人，閔陳之滅，故書葬以存之。

九年，春，叔弓會楚子于陳。

許遷于夷。以自遷爲文而地者，許復見也。夷，

①「謂」，阮校：「單疏本作「爲」。」

②「布」，原作「市」，據單疏本改。

③「公」，阮校：「石經、余本「公」作「之」。」

④「滅」上，單疏本有「傳解」二字。

許地，徐邈曰：「許十八年又遷于白羽。許比遷徙，所都無常，居處薄淺，如一邑之移，故畧而不月，不得從國遷常例。」<sup>①</sup>○復，扶又反。見，賢遍反。

【疏】注「故畧而不月」。○釋曰：僖元年「夏，六月，邢遷于夷儀」，三十一年十二月「衛遷于帝丘」，皆書月，而許還不月，故知是畧也。

夏，四月，陳火。○火，《左氏》作災。國曰災，邑曰火。火不志，此何以志？閔陳而存之也。陳已滅矣，猶書火者，不與楚滅也。不可以方全國，故不云災。何休曰：「月者，閔之。」

【疏】「國曰災」至「存之也」。○釋曰：傳言「火不志」，則是無例。而云「國曰災，邑曰火」者，火不合志，志者皆義有所見。此書者，以見不與楚滅，義在存陳也。陳滅不可以比全國，故以邑錄之。既以邑錄之，則不得與國同文，國邑文既不同，傳宜顯變例，故云「國曰災，邑曰火」。

秋，仲孫矍如齊。○矍，俱縛反。

冬，築郎囿。○囿音又，舊于目反，苑也。

十年，春，王正月。

夏，齊樂施來奔。

秋，七月，季孫意如、叔弓、仲孫矍帥師

伐莒。

戊子，晉侯彪卒。○彪，彼虬反。

九月，叔孫婁如晉。月者，爲下葬晉平公起。

○爲，于僞反。

葬晉平公。

十有二月，甲子，宋公成卒。不書冬，甯所未詳。○成音城。

【疏】「十有」至「成卒」。○釋曰：何休云：「去冬者，蓋昭娶吳孟子之年，故貶之。」范既不注，或是闕文也。

十有一年，春，王二月，叔弓如宋。

葬宋平公。晉獻公以殺世子申生，故不書葬。宋平公殺世子座而書葬，<sup>②</sup>何乎？何休曰「座有罪」故也。座之罪，甯所未聞。鄭莊公殺弟而書葬，以段不弟也。何氏將以理例推之，然則段不弟也，故不書弟，座若不子，亦不應書世子，書世子，則座之罪非不子明矣。○座，在禾反。不弟，大帝反，又如字，下「不弟」同。

①「得」，原作「想」，據宋刻元修本改。

②「座」，當爲「痤」之訛，下「座有罪」、「座之罪」、本疏「座若無」、「座若不子」並同。

【疏】注「晉獻」至「明矣」。○釋曰：晉獻公殺世子申生，故不書葬。座若無不子之行，而平公殺之，所以書葬者，申生賢孝，遇讒而死，故黜獻公之葬；座雖無不子之文，微有小罪，故不黜宋公之葬。<sup>①</sup>若然，范云「甯所未聞」者，不直取何休之說，故云未聞。范以與何說異者，何休意直謂座有罪，如鄭段之比，故平公書葬，不論罪之輕重。范意以鄭段至逆，經不言弟，座若不子，亦不應云世子，既云世子，明無至逆，故不從何說，而云未聞。今以罪輕重解之，與何休異。

夏，四月，丁巳，楚子虔誘蔡侯般，殺之于申。何爲名之也？據諸侯不生名。○虔，其然反，或作乾。侯般，音班。

【疏】注「據諸侯不生名」。○釋曰：十六年「楚子誘戎蠻子殺之」，不名，所以不據之以明於例，而總云「諸侯不生名」者，以傳於鄭伯髡原之卒，亦言諸侯不生名者，又恐華戎異例，故注以廣問衆例言之。

夷狄之君，誘中國之君而殺之，故謹而名之也。稱時、稱月、稱日、稱地，謹之也。蔡侯般，弑父之賊，此人倫之所不容，王誅之所必加。禮：凡在官者殺無赦，豈得惡楚子殺般乎？若謂夷狄之君，不得行禮于中國者，理既不通，事又不然。宣十一年「楚人殺陳夏徵書」，<sup>②</sup>不言人，傳曰「明楚之討有罪也」。

似若上下違反，不兩立之說。嘗試論之曰：夫罰不及嗣，先王之令典，懷惡而討，丈夫之醜行。楚虔滅人之國，殺人之子，伐不以罪，亦已明矣。莊王之討徵舒，則異於是矣。凡罰當其理，雖夷必申；苟違斯道，雖華必抑。故莊王得爲伯討，齊侯不得滅紀。趙盾救陳，則稱師以大之；靈王誘蔡，則書名以惡之。所以情理俱暢，善惡兩顯，豈直惡夷狄之君，討中國之亂哉！夫楚靈王之殺蔡般，亦猶晉惠之戮里克，雖伐弑逆之國，誅有罪之人，不獲討賊之美，而有累謹之名者，良有以也。○得惡，烏路反，下「以惡之」、「豈直惡」同。陳夏，戶雅反。醜行，下孟反。罰當，丁浪反，又如字。趙盾，徒本反。有累，力僞反。

【疏】「夷狄之」至「謹之也」。○釋曰：注「凡罰當其理，雖夷必申」，苟違斯道，雖華必抑，似華夷討罪事同。<sup>③</sup>傳云「夷狄之君，誘中國之君而殺之，故謹而名之」，又似華戎事異者。據此傳意，就討不以罪之內，則華夷不同，注意言但罰當其理者，則華夷不異。知然者，傳以《春秋》書誘有二，皆楚子所爲，其罪或名或不名，據此二文詳畧，知誘中國君與夷狄君異也。注「故莊王得爲伯討，齊侯不得滅紀」，明討得其罪者，則華夷不異可知。

① 「宋公」，《穀梁補注》作「平公」。

② 「書」，宣十一年三傳經文通作「舒」。

③ 「夷」，原無，據單疏本補。

也。○注「蔡侯」至「以也」。○釋曰：殺父者，謂襄三十年「蔡世子般弑其君固」是也。<sup>①</sup>「禮：凡在官者殺無赦」，《禮記·檀弓》文。兩立之說，謂兩理皆立之說。所以謂之兩理者，楚殺徵舒，則傳云「討有罪」；楚殺蔡般，則傳云「夷狄誘中國之君」，<sup>②</sup>故名之。同論楚討，二者意見，故云兩理也。又解兩立之說，謂兩事立說，或以爲不字下讀，云不兩立之說，謂事不得兩立，恐非也。又云「伐弑逆之國」，謂蔡也。「誅有罪之人」，謂里克也。「而有累謹之名者」，「晉殺其大夫里克」，傳云「稱國以殺，罪累上也」，是謂晉惠也。楚子誘蔡侯，傳曰「謹而名之」，是謂楚靈也。

### 楚公子棄疾帥師圍蔡。

五月，甲申，夫人歸氏薨。昭公母，胡女，歸姓。

大蒐于比蒲。夏而言蒐，蓋用秋蒐之禮。八年「秋，蒐于紅」，傳曰「正也」。比月大蒐，人衆器械有踰常禮。時有小君之喪，不譏喪蒐者，重守國之衛，安不忘危。○比音毗。械，戶戒反。

【疏】注「夏而」至「忘危」。○釋曰：傳稱「夏曰苗，秋曰蒐」，今五月大蒐，自是用秋蒐之禮。而云蓋者，以傳無文解，故云蓋以示疑也。注又引傳曰「正也」，今以失時之蒐，故引正以譏不正也。

仲孫纁會邾子，盟于侵祥。侵祥，地也。

○侵，子鳩反。

秋，季孫意如會晉韓起、齊國弱、宋華亥、衛北宮佗、鄭罕虎、曹人、杞人于厥慙。厥慙，地也。<sup>③</sup>○佗，大何反。慙，魚斬反，又五轄反。

九月，己亥，葬我小君齊歸。齊，謚。

冬，十有一月，丁酉，楚師滅蔡，執蔡世子友以歸，用之。傳十九年「邾人執繒子用之」，傳曰「用之者，叩其鼻以衄血」，<sup>④</sup>惡之，故謹而日之。○叩音口。衄音二。惡，烏路反，下文及注同。

【疏】注「故謹而日之」。○釋曰：傳例「滅中國日」，則此書日爲滅。而云惡用蔡世子友，故謹而日之者，滅國書日，傳例以明，用人書日，其文未顯，注嫌用之不得蒙日，故特言之。其實二者皆當日。又檢經上下，執例

①「固」，原作「故」，盧宣旬補校曰：「毛本『故』作『固』」，案襄三十年經是「固」字。」今據改。

②「誘」，原作「有」，單疏本作「誘」。阮校引何焯云：「誘」誤「有」。今據改。

③「也」，阮校：「閩、監、毛本作『名』。」

④「血」，阮校：「傳九年傳作『社』。注云：『取鼻血以釁祭社器。』」

日，則書曰爲惡，故云「謹而日之」也。《左氏》以爲用之殺蔡世子祭岡山，《公羊》以爲用之築城，今范引僖十九年傳，則用之祭社也。

此子也，諸侯在喪稱子。其曰世子，何也？不與楚殺也。一事注乎志，所以惡楚子也。一事輒注而志之也。何休曰：「即不與楚殺，當貶楚爾，何故反貶蔡稱世子邪？」鄭君釋之曰：「滅蔡者，楚子也，而稱師，固已貶矣。楚子思啓封疆而貪蔡，誘殺蔡侯般，冬而滅蔡殺友，惡其淫放其志，殺一國二君，<sup>①</sup>以取其國，故變子言世子，使若不得其君終。」

【疏】「此子」至「子也」。○釋曰：世子父沒仍得稱世子，母弟兄死而不得稱弟者，世子繼體之名，父雖沒，若意有所見，則亦得稱之，母弟者對兄，沒則寵名棄矣，<sup>②</sup>故不得稱弟。○注「滅蔡者楚子」。○釋曰：經稱「公子棄疾帥師圍蔡」，鄭知是楚子者，以棄疾若貶，當云楚人，今貶而稱師，故知楚子也。又傳云「惡楚子也」，明非棄疾。然則惡楚子，變文云世子者，以楚四年之中滅兩國，殺二君，自謂得志，若遂其凶暴，是表中國之衰，申夷狄之彊，故抑之使若不得其君，故云世子也。

十有二年，春，齊高偃帥師納北燕伯于陽。三年所奔齊者，高偃玄孫，齊大夫也。陽，燕別邑。

不言于燕，未得國都也。納者，內不受也。燕伯之不名，何也？據義不可受，則應名而絕之。<sup>③</sup>

【疏】傳「燕伯之不名何也」。○釋曰：「楚人圍陳，納頓子」，傳曰：「納者何？內弗受也。」彼稱納而不名，「衛侯人于夷儀」亦不書名，則不書名乃是常事。而傳怪燕伯不名者，「衛侯朔人于衛」，傳曰「朔之名，惡也」，則諸侯有惡，出入皆名。北燕伯亦出入宜名，但不以高偃挈之，故直出書名而已。頓子不名者，爲楚微者所納，故亦不名。「衛侯人于夷儀」不名者，以復歸有名，故未入國畧而不名也。鄭伯突亦未入國，書名者，以後不書復歸，故人櫟書名也。

不以高偃挈燕伯也。邵曰：「公子遂以去公子爲挈，燕伯以書名爲挈者，臣宜書名，故須去公子乃爲挈。君不可名而以臣名君者，不待去燕伯則爲挈也。是以目燕伯而不書名，所以不與高偃挈之。」○挈，苦結反。以去，起呂反。

三月，壬申，鄭伯嘉卒。

①「一」，原作「〇」，阮校：「閩、監、毛本『〇』作『蔡』，何校本作『一』。」今據何校改。  
②「沒」上，《穀梁補注》有「兄」字。  
③「而」，阮校：「余本作『以』。」

夏，宋公使華定來聘。

公如晉，至河乃復。季孫氏不使遂乎晉也。

【疏】「季孫氏」。○釋曰：不言意如而云氏者，欲見累世譜公故也。

五月，葬鄭簡公。

楚殺其大夫成虎。

秋，七月。

冬，十月，公子慙出奔齊。○慙，魚斬反。

楚子伐徐。

晉伐鮮虞。其曰晉，狄之也。其狄之何也？不正其與夷狄交伐中國，故狄稱之也。

鮮虞，姬姓，白狄也，地居中山，故曰中國。夷狄謂楚也。何休曰：「《春秋》多與夷狄並伐，①何以不狄也？」鄭君釋之曰：「晉不見因會以綏諸夏，而伐同姓，貶之可也。狄之大重，晉為厥慙之會，實謀救蔡，以八國之師而不救，②楚終滅蔡，今又伐徐，晉不糾合諸侯以遂前志，舍而伐鮮虞，是楚而不如也，故狄稱之焉。」厥慙之會，《穀梁》無傳，鄭君之說，似依《左氏》，甯所未詳，是《穀梁》

意非。○見，賢徧反。諸夏，戶雅反。舍音捨。

【疏】「夷狄交伐」。○釋曰：麋信云：「夷狄交伐，謂楚伐徐，晉伐鮮虞是也。」范云：「夷狄謂楚也。」則與麋信不異耳。○注「鮮虞」至「意非」。○釋曰：「鮮虞，姬姓，白狄也」者，《世本》文也。云「甯所未詳是《穀梁》意非」者，疑鄭以厥慙之會謀救蔡者，作《穀梁》意也。若然，范答薄氏，亦言楚滅陳蔡，而晉不能救，棄盟背好，交相伐攻者。范意以楚滅陳蔡，③晉不能救者，不據厥慙之會故也。

十有三年，春，叔弓帥師圍費。○費音祕。

夏，四月，楚公子比自晉歸于楚，弑其君虔于乾溪。乾溪，楚地。○溪，苦奚反。

【疏】「于乾溪」。○釋曰：《左氏》以為田獵于乾溪，《公羊》以為「作乾溪臺，三年不成」。范云「乾溪，楚地」，則從《左氏》也。

自晉，晉有奉焉爾。歸而弑，不言歸，

①「並伐」，阮校：「余本下有「者」字。」

②「不」，阮校：「余本「不」下有「能」字。」

③「意」，單疏本作「云」。

言歸，非弑也。傳例曰：「歸爲善，自某歸次之。」然則弑君不得言歸，比不弑之一驗也。

【疏】「自晉」至「焉爾」。○釋曰：重發傳者，楚比之歸，歸實非弑，嫌自亦非晉力，故復明之。

歸一事也，弑一事也，而遂言之，以比比之歸弑，比不弑也。歸、弑其事各異，自宜別書之，而今連言之，是比之歸，遇君弑爾，比不弑之二驗也。

【疏】注「自宜別書之」。○釋曰：「齊小白入于齊」，「齊人取子糾殺之」，「齊陽生入于齊。齊陳乞弑其君荼」，彼各異書，明知此亦宜別書之。

弑君者日，不日，比不弑也。據文元年「丁未，楚世子商臣弑其君髡」日，此不日，比不弑之三驗也。○髡，苦門反。

【疏】「弑君者」。○釋曰：弑君日，不辨嫡庶者，中國死者正則日，不正不日，是楚不闕中國之例，故范注引商臣爲證也。「當上之辭也」者，<sup>①</sup>謂不稱人以殺，而云「公子棄疾殺公子比」，如「王札子殺召伯毛伯」也。

楚公子棄疾殺公子比。當上之辭也。當上之辭者，謂不稱人以殺，乃以君殺之也。稱人以殺，謂若「衛人殺祝吁于濮」是也。今比實不

弑，故以君殺大夫之辭言之。○吁，香于反。濮音卜。

討賊以當上之辭，殺非弑也。實有弑君之罪，則人人皆欲殺，宜稱人以殺之。今言「楚公子棄疾殺公子比」，明棄疾所殺非弑君之人，比之不弑四驗也。比之不弑有四，上四事。取國者稱國以弑，若比欲取國而殺君者，<sup>②</sup>當直云楚比弑其君虔，不應言公子也，若「衛祝吁弑其君完」、「齊無知弑其君諸兒」之類是也。楚公子棄疾殺公子比，比不嫌也。今棄疾殺之，又言殺公子比，不言弑其君，是比無欲爲君之嫌。《春秋》不以嫌代嫌，不以亂治亂之義。棄疾主其事，故嫌也。比實無弑君之罪，而主殺之者，是棄疾欲爲君之嫌。

【疏】「比不」至「故嫌也」。○釋曰：比歸稱公子，今棄疾殺之，亦云公子，不言弑其君，是比無欲爲君之嫌，異于無知、祝吁之類也。然無知、祝吁有嫌，此亦不稱

①「當上之辭也者」，阮校：「十行本此下疏在『弑君者』一段內，單疏本同。閩、監、毛本刪『者』字，以『當上之辭也』五字爲標起止，下增『○』及『釋曰』二字，移屬注文，故以君殺大夫之辭言之『下』。」

②「殺」，阮校：「何校本作『弑』。」

君，未踰年之主例不得稱君，以稱公子，則異于祝吁之類。齊公子商人弑舍，雖未踰年，欲成商人罪而稱君。若成棄疾之罪，亦應稱君，故范決其不言弑其君也。《春秋》不以嫌代嫌者，謂比歸而遇弑，雖則無嫌，棄疾之意，亦以比欲爲君之嫌而殺之，是棄疾以比爲嫌，棄疾殺比而自立，亦是嫌也。今棄疾不以國氏者，不以嫌代嫌故也。若以嫌代嫌，而當云楚棄疾殺公子比也。但由不以嫌代嫌，故存棄疾之氏耳。棄疾主其事，故嫌也。傳言此者，棄疾殺比，理實有嫌，但爲不以嫌代嫌，故經無其事，傳以棄疾經無嫌文，故云「棄疾主其事，故嫌也」。主其事者，主殺比之事也。

秋，公會劉子、晉侯、齊侯、宋公、衛侯、鄭伯、曹伯、莒子、邾子、滕子、薛伯、杞伯、小邾子于平丘。平丘，地也。

八月，甲戌，同盟于平丘。公不與盟。公以再如晉，不得入，故不肯與盟。○與音豫。同者，有同也，同外楚也。公不與盟者，可以與而不與，譏在公也。其日，善是盟也。公不與盟，當從外盟不日，今日之，善其會盟，因楚有難，而反陳蔡之君。○有難，乃旦反。

【疏】注「當從外盟不日」。○釋云：外盟不日

者，<sup>①</sup>隱八年傳曰「外盟不日，此其日，何也？諸侯之參盟於是始，故謹而日之」，是非始則不日也。

晉人執季孫意如以歸。以公不與盟故。公至自會。

蔡侯廬歸于蔡。

陳侯吳歸于陳。八年楚滅陳，十一年楚滅蔡，諸侯會而復之，故言歸。善其成之，會而歸之，故謹而日之。二國獲復，此盟之功也，故於其歸，追述前盟謹日之意，以美諸侯存亡繼絕，非謹陳、蔡歸國之日也。於盟則發謹日之美，於歸則論致美之義。

【疏】注「於盟」至「之義」。○釋曰：注言此者，解傳稱「謹而日之」意也。「於盟則發謹而日之美」者，謂傳稱其日，善是盟是也。「於歸論致美之義」者，謂傳云「善其成之會而歸之，故謹而日之」是也。

此未嘗有國也，使如失國辭然者，不與楚滅也。

①「外」，阮校：「何校本「外」上有「知」字。」今按：單疏本同何校本。



【疏】「使如」至「滅也」。○釋曰：傳言此者，據其稱爵言歸，同於舊有國之例也。「不與楚滅也」，謂不與楚滅，故以失國辭言之。不言復歸者，雖同失國之辭，實未嘗有國，故不得言復歸也。《公羊傳》云：「此滅國也，其言歸何？不與諸侯專封也。」其意不與諸侯專封，故使若有國自歸者。<sup>①</sup>《穀梁》以此會劉子在焉，楚以無道滅二國諸侯，王命存之，不得云不與諸侯專封也，故以爲「善其成之，會而歸之」，狀同舊有國然，且又不與楚滅故也。

冬，十月，葬蔡靈公。變之不葬有三：變之，謂改常禮。《春秋》之常，小國、夷狄不葬。

【疏】注「變之」至「不葬」。○釋曰：彼不赴，我不會，及小國與夷狄，不書葬者也，舊史之常也。言變之言不葬者，謂舊合書葬，有故而仲尼改之也。小國不葬，曹、許之書葬者，小國謂附庸之屬，非曹、許也。

失德不葬，無君道。弑君不葬，謂不討賊，如無臣子。滅國不葬。無臣子也。然且葬之，不與楚滅，且成諸侯之事也。蔡靈公弑逆無道，以致身死國滅，不宜書葬。書葬者，不令夷狄加乎中國，且成諸侯與滅繼絕之善，故葬之。○令，力呈反。

公如晉，至河乃復。

吳滅州來。

【疏】「失德」至「事也」。<sup>②</sup>○釋曰：此言「失德不葬」，宋共書葬者，<sup>③</sup>由賢伯姬，故書其葬也。「弑君不葬」，《春秋》所以有弑君書葬者，弑君賊不討之不書葬是正也，其書葬者，皆意有所見也。蔡景不忍使父失民於子，陳靈公明外之討賊，蔡昭以盜名不見，若殺微人，不足可錄。其衛桓、齊襄二人並討賊，故皆書葬也。滅國無臣子不葬，是其正也，書之者亦意有所見。此見不與楚滅蔡，且成諸侯之事。八年陳哀公書葬者，亦見不與楚滅，閔陳而存之也。

①「自」，原作「目」，據宋刻元修本改。

②「失德至事也」，阮校：「此疏十行本在『吳滅州來』下，閩、監、毛本在注『故葬之』下，何校本上有『傳』字。」

③「共」，原作「其」，據宋刻元修本改。

監本春秋穀梁注疏昭公卷第十八

起十四年，盡三十二年

范甯集解 楊士勛疏

十有四年，春，意如至自晉。大夫執則

致，致則名，意如惡，然而致，見君臣之禮

也。大夫有罪，則宜廢之。既不能廢，不得不盡為君臣

之恩，故曰「見君臣之禮」。○見君，賢徧反。

【疏】「大夫執則致」。○釋曰：重發傳者，單伯

書字，意如則書名，媼又無罪，以見三者義異，故各發傳也。<sup>①</sup>

三月，曹伯滕卒。

夏，四月。

秋，葬曹武公。

八月，莒子去疾卒。○去，起呂反。

【疏】「八月」至「疾卒」。○釋曰：不正前已見

訖，今卒書月，莒行夷禮，故無嫡庶之異。

冬，莒殺其公子意恢。○恢，苦回反。言

公子而不言大夫，莒無大夫也。莒無大夫，

而曰公子意恢，意恢賢也。曹、莒皆無大

夫，其所以無大夫者，其義異也。曹叔振鐸，文

王之子，武王封之于曹，在甸服之內，後削小爾。莒，己

姓，東夷，本微國。○振鐸，之慎反，下大各反。甸，徒徧

反。己姓音己，一本又音祀。

【疏】「曹莒」至「異也」。○釋曰：傳言此者，總

而言之，則小國無大夫也。就事而釋，則曹、莒有異，故傳

辨之。○注「曹叔」至「之國」。○釋曰：曹是文王之

子，封於曹者，《世本》文。「在甸服之內」者，定四年《左

傳》文。

十有五年，春，王正月，吳子夷末卒。

○末，亡葛反。

二月，癸酉，有事于武宮。籥人，叔弓

卒，去樂卒事。君在祭樂之中，聞大夫之

喪，則去樂卒事，禮也。祭樂者，君在廟中祭作樂。

○籥，由若反。去，起呂反。

①「重發傳者」至「以見三者」二十一字，單疏本無。

【疏】「禮也」。○釋曰：禮則不疑，而曰「有變，以聞可乎」，似有嫌，嫌則非禮，非禮何以言禮也？解云，祭祀重禮，國之大事，一物不具，則為失所，以卿佐之卒，而闕先君之樂而不止祭，嫌有失禮。釋之復言可乎，問言禮意。

君在祭樂之中，大夫有變，以聞可乎？

變謂死喪。大夫，國體也。君之卿佐，是謂股肱，故曰國體。古之人重死，君命無所不通。死者不可復生，重莫大焉。是以君雖在祭樂之中，大夫死，以聞可也。○復，扶又反。

【疏】「君命」至「不通」。○釋曰：解命告也。大夫與君一體，情無疑二，祭祀雖重，以卒告君，君當哀其喪而止祭，不得以輕廢重，故死可以聞也。

夏，蔡朝吳出奔鄭。朝吳，蔡大夫。

六月，丁巳，朔，日有食之。

秋，晉荀吳帥師伐鮮虞。

冬，公如晉。

十有六年，春，齊侯伐徐。

楚子誘戎蠻子殺之。楚子不名，戎蠻子非中國故。

夏，公至自晉。

秋，八月，己亥，晉侯夷卒。

九月，大雩。季孫意如如晉。

【疏】「意如如晉」。○釋曰：何以在葬上？解云，<sup>①</sup>有本末事，書前後文不得同。

冬，十月，葬晉昭公。

十有七年，春，小邾子來朝。○朝，直遙

反。

夏，六月，甲戌，朔，日有食之。

秋，邾子來朝。

八月，晉荀吳帥師滅陸渾戎。滅夷狄時，

潞子嬰兒賢則日，此月者，蓋亦有殊于常戎。

冬，有星孛于大辰。一有一亡曰有。

于大辰者，濫于大辰也。劉向曰：「大辰者，大火

①「云」，原作「去」，阮校：「閩、監、毛本『去』作『云』是也。」今據改。

也。不曰字于大火，<sup>①</sup>而曰大辰者，謂濫于蒼龍之體，不獨加大火。」○星孛，蒲內反。字于，本又作葦，音佩。<sup>②</sup>

楚人及吳戰于長岸。長岸，楚地。兩夷狄

曰敗，夷狄不能結日成陳，故曰敗，「於越敗吳于檣李」是也。○曰敗，必邁反，下文及注同。成陳，直刃反。檣李，音辭。中國與夷狄亦曰敗。「晉荀吳敗狄于大鹵」是也。<sup>③</sup>楚人及吳戰于長岸，進楚子，故曰戰。

【疏】「進楚子故曰戰」。○釋曰：何嫌以發？

解，戰言及，所以別客主，不施直不，言及或在上，或在下。案宋襄伐齊，云及在上，所以惡宋襄。宣十二年邲之戰，楚言及在下，所以不惡楚者，據無罪言之直，用兵得理則客直。今楚稱及而在上，與邲戰之義反，嫌惡楚而善吳，吳以伯舉有辭，序上稱及以罪楚。今兩夷言戰，有違常例，二國曲直得失未分，故須起例以明之。

十有八年，春，王三月，曹伯須卒。

夏，五月，壬午，宋、衛、陳、鄭災。其志，以同日也。其日，亦以同日也。或曰，人有謂鄭子產曰：「某日有災。」子產曰：「天者神，子惡知之？是人也。同日爲四

國災也。」○惡音烏。

【疏】「其志」至「同日」。○釋曰：二文釋何？

解，襄九年「宋災」，傳曰「故宋也」，明之災得書之由。<sup>④</sup>然則宋常錄，三國事非常也，故傳曰「同日也」，解衛、陳、鄭得書之意以此，故復問外災不日之義，見同日，故不得不兩文釋之。鄭子產之言，明天時人事，報應有驗，重其同日，故經書其文，傳載其事。劉向以爲宋、陳王者之後，衛、鄭周之同姓，時景王在，<sup>⑤</sup>劉子、單子事王猛，召氏、尹氏立王子朝，<sup>⑥</sup>朝，楚之出也。及宋、衛、陳、鄭皆外附於楚，無尊周室之心。後三年崩，王室亂，故天災四國，若曰

①「字于」，阮校：「《釋文》『星孛』下出『葦于』，云：

「本亦作字。」今本作「字」，與《釋文》「亦作」本合。」

②「字于」至「音佩」，《釋文》作「葦于，音佩，本亦作字。」

③「大鹵」，《穀梁補注》作「大原」。今按：昭公元年《穀梁傳》曰：「晉荀吳帥師敗狄于大原。傳曰：中國曰大原，夷狄曰大鹵。」則作「大原」是。

④「明之」，阮校：「監、毛本『之』作『宋』，單疏本作『外』。」

⑤「在」，《穀梁補注》作「老」。

⑥「尹氏」，單疏本無。

不救，<sup>①</sup>反從楚廢世子，言不正以害王室，<sup>②</sup>明以同辜。

六月，邾人人郕。○郕音禹，又音矩。

秋，葬曹平公。

冬，許遷于白羽。白羽，許地。

十有九年，春，宋公伐邾。

夏，五月，戊辰，許世子止弑其君買。

日弑，正卒也。蔡世子般實弑父，故以比之夷狄，而不書日。止弑而日，知其不弑；<sup>③</sup>止不弑，則買正卒也。

正卒，則止不弑也。不弑而曰弑，責止也。責止不啻藥。

【疏】「正卒」至「責止也」。○釋曰：責止則實，

實文不可虛加，而復書葬以赦何？解，止進藥之罪，不由於醫，罪連於許君，故書弑責止。<sup>①</sup>止實不弑，宜書葬以赦之。《春秋》子弑父，皆非子失教訓之道，獨於此見之何？有義而然，因其可責而責之。若商臣、蔡般之流，行同禽獸，不得為小人，非可責之限，故傳詳例於此。

止曰：「我與夫弑者。」不立乎其位，

以與其弟虺。止自責曰，我與弑君之人同罪。於是致君位於弟。○與夫，音豫，又如字；下音扶。虺，許鬼反。哭泣，歆飭粥，嗑不容粒。嗑，喉也。○歆，

昌悅反，又常悅反。飭，之然反，又居言反，粥也。粥，之六反。嗑音益，咽喉也。容粒，音立。未踰年而死。故君子即止自責而責之也。就其有自責心，故以備禮責之。

己卯，地震。

秋，齊高發帥師伐莒。

冬，葬許悼公。日卒時葬，不使止為弑父也。曰，子既生，不免乎水火，母之罪也。

羈貫成童，不就師傅，父之罪也。羈貫，謂交午翦髮以為飾。成童，八歲以上。○羈又作羈。<sup>⑤</sup>貫，古亂反。就師學問無方，心志不通，身之罪也。

心志既通，而名譽不聞，友之罪也。名譽既

①「救」下，《穀梁補注》有「周」字。

②「言」，《穀梁補注》作「立」。

③「不」，原無，阮校：「余本『其』下有『不』字。」《穀梁補注》亦有「不」字，今據補。

④「弑」，原作「殺」，據單疏本改。

⑤「羈」又作羈，《釋文》作「羈」又作羈。四部叢刊本《春秋穀梁傳》作「羈」又作羈。

聞，有司不舉，有司之罪也。有司舉之，王者不用，王者之過也。不敢罪上，故言過。許世子不知嘗藥，累及許君也。許君不授子以師傅，使不識嘗藥之義，故累及之。○累，劣僞反。

二十年，春，王正月。

夏，曹公孫會自夢出奔宋。自夢者，專乎夢也。能專制夢。○自夢，無工反，又亡忠反，又亡弄反，本或作蔑，《左氏》作鄭。曹無大夫，其曰公孫，何也？言其以貴取之，而不以叛也。會以公孫之貴而得夢，既而不以之叛，明曹君無道，致令其奔，非會之罪，故書公孫以善之。○令，力呈反。

【疏】「曹無大夫」。○釋曰：再發傳者何？解，前崇曹羈之殺，此重公孫之奔，奔殺異辭，而同例發明，明其俱賢而得書，明小國無大夫也。

秋，盜殺衛侯之兄輒。盜，賤也。其曰兄，母兄也。目衛侯，衛侯累也。凱曰：「諸侯之尊，弟兄不得以屬通。經不書衛公子，而目言衛侯之兄者，惡其不能保護其兄，乃為盜所殺，故稱至賤殺至貴。」○惡其，烏路反。

【疏】「盜賤也」。○釋曰：復發傳何？解，殺大

夫稱人者，謂誅有罪，故盜殺三卿，云不以上下道，明大夫之例，母兄之殺，宜繫於君自殺也。不能保存母兄，令為盜所殺，故書兩下之文，以至賤而殺至貴，故不得言上下道。稱盜雖同，本事例異，故發傳也。

然則何為不為君也？嫡兄宜為君。○嫡，丁歷反。曰，有天疾者，不得入乎宗廟。輒者何也？曰，兩足不能相過，齊謂之綦，楚謂之跣，衛謂之輒。○綦音其，又其冀反，劉兆云：「綦，連併也。」跣，女輒反，劉兆云：「聚合不解也。」輒，本亦作繫，劉兆云：「如見絆繫也。」

冬，十月，宋華亥、向寧、華定出奔陳。徐邈曰：「月者，蓋三卿同出，為禍害重也。君以臣為體，民以君為命，凡為憂者大，害民處甚，《春秋》皆變常文而示所謹，非徒足以見時事之實，亦知安危監戒云耳。」○處，昌慮反。以見，賢徧反。

十有一月，辛卯，蔡侯廬卒。

【疏】注「月者」至「害重也」。○釋曰：宋萬以一

①「目」，宋刻元修本作「斥」。阮校：「閩、監、毛本「目」作「自」，余本作「斥」。」

②「令」，單疏本作「今」。

卿而詳之，又弟辰以五大夫而不月何？解，宋萬乃出月，見宋人不討賊，致令得奔，故謹而月之；弟辰爲仲佗所彊，元無去意，爲患輕，故不月。

二十有一年，春，王三月，葬蔡平公。

夏，晉侯使士鞅來聘。

宋華亥、向寧、華定自陳入于宋南里以叛。自陳，陳有奉焉爾。入者，內弗受也。其曰宋南里，宋之南鄙也。以者，不以者也。叛，直叛也。言不作亂。

【疏】「自陳」至「焉爾」。○釋曰：復發傳何解？從外之叛而加自，自實有力，嫌其言自叛，不由外納力。<sup>①</sup>復言「內弗受也」，與人邑異例，不受爲同。復言以有嫌異於竊地者，故發例同之。○注「言不作亂」。○釋曰：則作亂不得言叛，當以作亂書，樂盈、良霄是也。傳言叛，是與作亂是也。<sup>②</sup>

秋，七月，壬午，朔，日有食之。

八月，乙亥，叔輒卒。叔弓之子。

冬，蔡侯東出奔楚。東者，東國也。何

爲謂之東也？王父誘而殺焉，「楚子虔誘蔡侯般，殺之于申」。○蔡侯東，《左氏》及《公羊》作蔡侯朱。

父執而用焉，「執蔡世子友以歸，用之」是也。奔而又奔之，曰東，惡之而貶之也。奔既罪矣，又奔讎國，惡莫大焉。○惡之，烏路反。

公如晉，至河乃復。

二十有二年，春，齊侯伐莒。

宋華亥、向寧、華定自宋南里出奔楚。

自宋南里者，專也。專制南里。

大蒐于昌間。○間如字，一音蒯。秋而曰

蒐，此春也，其曰蒐何也？以蒐事也。

【疏】「秋而」至「蒐事」。○釋曰：何以發傳於此？解，大蒐有五，八年發例，見正譏不正。比蒲之蒐在夏之末，承秋之初，<sup>③</sup>尚可以蒐，則承春之首，不可之甚，故須發傳以彰甚也。

夏，四月，乙丑，天王崩。

① 「力」，單疏本作「內」。

② 「是與作亂是也」，據文意，疑此句當爲「是與作亂異也」。

③ 「承」，《穀梁補注》作「近」。

六月，叔鞅如京師。葬景王。叔鞅，叔弓子。天子志崩不志葬，志葬，危不得以禮葬也。月者，亦爲葬景王起。○亦爲，于僞反。

【疏】「六月葬景王」。○釋曰：何以不書日？解，傳言日甚矣。其不葬之辭，恐其甚之不明，<sup>①</sup>日以起之。今經言王室亂，則甚之可知，故省文也。

王室亂。亂之爲言，事未有所成也。尹氏立子朝，劉氏、單氏立王猛，俱未定也。

劉子、單子以王猛居于皇。皇，地。○單音善。以者，不以者也。王猛嫌也。直言王猛，不言王子，是有當國之嫌。

【疏】「以者不以者也」。○釋曰：復發傳何？解，劉、單，王之重卿；猛，王之庶子，以貴制庶，嫌其義別，起例以詳之也。

秋，劉子、單子以王猛入于王城。以者，不以者也。入者，內弗受也。猛，非正也。

冬，十月，王子猛卒。此不卒者也。未成君也。其曰卒，失嫌也。猛本有當國之嫌，其卒則失嫌，故錄之。

【疏】「失嫌也」。○釋曰：經言王猛，以王爲尊，何以言當國？解，《春秋》以王爲國，若言齊、晉，今言王

猛，不言子，與無知同文，故曰當國也。

十有二月，癸酉，朔，日有食之。

二十有三年，春，王正月，叔孫婼如晉。

癸丑，叔鞅卒。

晉人執我行人叔孫婼。

晉人圍郊。郊，周邑也。

夏，六月，蔡侯東國卒于楚。不日在外也。

以罪出奔，又奔讎國，故不葬。

【疏】注「不日在外也」。○釋曰：案諸侯之卒，不日以明庶，不以外爲異。傳曰：「諸侯時卒，惡之。」今東國奔讎，何以書月？解，「許男新臣卒」，<sup>②</sup>上言伐楚，下言卒，無明其在楚，庶子而卒，卒而不日，書時，在外文不明故也。蔡侯旼在內而卒，卒不書日，傳曰「惡之」。今蔡侯東國，上言東以貶之，下言卒於楚。諸侯之奔，例不書卒。今蔡侯之卒，見奔讎國而死，惡之可知，以在外以明惡，故書月以顯之。○注「又奔讎國故不葬」。○釋曰：

①「之不」，單疏本作「不可」。

②「男」，原作「用」，阮校：「閩、監、毛本『用』作『男』。」

今據改。



諸侯奔，死於外國，<sup>①</sup>例不卒，何直不葬？有義而然。諸侯不卒則已，卒宜有葬，葬不書者，義有所見，義不必同，或從失德。今蔡侯不卒，卒於讎國，書卒而不葬。

秋，七月，莒子庚輿來奔。

戊辰，吳敗頓、胡、沈、蔡、陳、許之師于

雞甫。雞甫，楚地。○雞甫，《左氏》作雞父。胡子

髡、沈子盈滅。國雖存，君死曰滅。○髡，苦門反。

盈，本亦作逞。中國不言敗，此其言敗，何也？

據宣十二年「晉荀林父及楚子戰于邲，晉師敗績」，不言楚敗晉師。

【疏】「中國不言敗」。○釋曰：釋其滅。案經

「戰于韓，獲晉侯」，「戰于大棘，宋師敗績，獲華元」。中國不言敗，直言戰于雞甫，敗頓、胡、沈、蔡、陳、許之師，胡子髡、沈子盈滅。定以言敗。<sup>②</sup>解言「楚人及吳戰于長岸」，傳曰「進楚子」。然則邲之戰，直在楚，以中國不言敗。今吳無進，稱為夷狄，故不稱「戰」及「敗績」，以釋其滅。<sup>③</sup>足賢胡、沈之君，亦明吳之不進也。

中國不敗，胡子髡、沈子盈其滅乎？

其言敗，釋其滅也。若師不敗，則君無由滅也。賢

胡、沈之君死社稷。

獲陳夏齧。獲者，非與之辭也，賢夏齧，

雖獲不病，以其得衆也。義與華元同。○夏，戶雅反。齧，五結反。

【疏】注「與華元同」。○釋曰：國書亦然，而無

傳釋，而經文有異，何得稱同？解，華元有故而止，文雖不同，明賢之義不別，<sup>④</sup>國書文同而義同也。

上下之稱也。君死曰滅，臣得曰獲，君臣之稱。

○之稱，尺證反。注「之稱」同。

天王居于狄泉。敬王，辟子朝。狄泉，周地。

○辟音避。始王也。其曰天王，因其居而王

之也。天子踰年即位稱王，敬王踰年而出，故曰始王。

雖不在國行即位之禮，王者以天下為家，故居于狄泉稱王。

尹氏立王子朝。隱四年「衛人立晉」，傳曰「稱

人以立，得衆也」。此言尹氏立，明唯尹氏欲立之。<sup>⑤</sup>

①「外」，阮校：「單疏本作「他」。」

②「定」，阮校：「單疏本作「足」。」

③「釋」，阮校：「單疏本作「稱」。」

④「不」，單疏本作「則」。

⑤「明」，原作「朝」，宋刻元修本作「明」。阮校云：「何校本「朝」作「明」。按：作「明」是也。」今據改。

【疏】「始王」至「之也」。<sup>①</sup> ○釋曰：注云：「天子踰年即位稱王，敬王踰年而出，故曰始王。」天子之稱天王，是常例也，而傳云「始王」，注云「踰年」者，未通此傳之意。解，子猛當國，朝亦非正，景王以三十一年夏四月崩，六月葬，劉、單二子以王猛居于皇，復入王城，冬而猛卒。至今敬王踰年而既葬，所繼者承景王之崩，不繼者承王猛之卒，<sup>②</sup>是年七月敬王立，當踰年既葬之例。此歲尹氏立子朝，將圖神器，天下兇懼，其主無雖復常，稱其所在，著其始王也。

立者，不宜立者也。朝之不名，何也？

據晉之名惡，今朝亦惡，怪不直名而言王子。<sup>③</sup> ○惡，烏路反，下同。別嫌乎尹氏之朝也。若但言尹氏立朝，則嫌朝是尹氏之子，故言王子以別之。○別，彼列反。

【疏】「立者」至「者也」。○釋曰：重發傳何？<sup>④</sup>

解，衛晉得衆，言立嫌非所宜。此子朝失衆，獨在尹氏，故言立以著不宜，文同而義異，故復發傳，別嫌乎尹氏之朝。○注云「嫌朝是尹氏之子」。○釋曰：夫國之大事，莫善繼統。繼統之道，勿盛嫡冑。繼無承重，宜擇立其次，故單子、劉子立猛，文稱當國，其次子無命，故獨言立，言立彰不宜，明有篡王之意。今周室雖衰，鼎命在上，四方諸侯，知一人之貴繼，<sup>⑤</sup>成康之道滅，典法之文存，祭號大名不可虛置，巍巍聖寶寧得空假？鄩以區區之小，而以外孫爲嗣，書其滅亡，以爲將來之戒，況天下重任，豈得異

姓？尹氏不擇天道，不達人事，不自立其子，當有同心之授，不義之罪。<sup>⑥</sup>御假一朝之勢，以集四海之士，此理灼然，而愚夫之所不或，<sup>⑦</sup>何爲孔子書經，游夏爲傳？經於不疑之中，而彊生疑，於無嫌之義，<sup>⑧</sup>而巧出嫌。恐朝爲尹氏之子，爲當有旨。解，周室大亂，骨肉乖離，故王猛有篡奪之心，單、劉懷翼戴之志，敬王孤立，猛卒之後，而朝逆尹氏之世卿，婚媾王室，禍亂之基，固可奪之。初自立，或招乘輿之衆，集負險之民，堅冰之際，或有無妄之會，經別嫌尹氏，不亦宜乎！衰亂之世，何所不爲？鄩立異姓，周亦致疑，疑而須別，別嫌立朝者，此其旨矣。

八月，乙未，地震。

冬，公如晉，至河，公有疾，乃復。疾不

①「始王」至「之也」，阮校：「此疏十行本在注「尹氏欲立之」下，閩、監、毛本在「故居于狄泉稱王」下，何校本

上有「傳」字。」

②「承景王之崩不繼者」，單疏本無此八字。

③「王子」，原作「王于」，據宋刻元修本改。

④「重」，單疏本作「復」。

⑤「知」，單疏本作「稱」。

⑥「義」，阮校：「單疏本作「達」。」

⑦「或」，阮校：「閩、監、毛本「或」作「惑」。」

⑧「於」上，單疏本有「傳」字。

志，此其志，何也？釋不得人乎晉也。

【疏】「有疾」至「晉也」。○釋曰：解，公之如晉，四不得人，假言有疾，實由季孫之不入。今實有疾，別於無疾而反也。

二十有四年，春，王二月，丙戌，仲孫貜卒。

媾至自晉。大夫執則致，致則挈，由上致之也。上謂宗廟也。致臣于廟，則直名而已，所謂君前臣名。○挈，苦結反。

夏，五月，乙未，朔，日有食之。

秋，八月，大雩。

丁酉，杞伯郁釐卒。○釐，力之反。

冬，吳滅巢。

葬杞平公。

二十有五年，春，叔孫婼如宋。

夏，叔倪會晉趙鞅、宋樂大心、衛北宮喜、鄭游吉、曹人、邾人、滕人、薛人、小邾人于黃父。

有鸛鵒來巢。一有一亡曰有。來者，

來中國也。鸛鵒不渡濟，非中國之禽，故曰來。○鸛，其俱反，本又作鸛，音灌，①《左氏》作鸛，《公羊》作鸛。鵒音欲。濟，子禮反。

【疏】「一有」至「中國」。○釋曰：重發傳者何？解，鸛鵒者飛鳥，與蜚蜚異，稱有為同，故重發傳。云「來者，來中國也」，何嫌而發？解，蜚蜚不言來，不見所從，麟不言來者，欲但於中國，不外之。

鸛鵒穴者而曰巢。劉向曰：「去穴而巢，此陰居陽位，臣逐君之象也。」或曰，增之也。如增言巢爾，②其實不巢也。雍曰：「凡《春秋》記災異，未有妄加之文。或說非也。」

秋，七月，上辛，大雩。季辛，又雩。季者，有中之辭也。不言中辛，中辛無事。又，有繼之辭也。緣有上辛大雩，故言又也。

九月，乙亥，公孫于齊。孫之為言猶孫也，諱奔也。

①「灌」，原作「權」，據《釋文》改。  
②「如」，阮校：「何校本作「加」。」

次于陽州。次，止也。陽州，齊竟上之地。未敢直前，故止竟也。○公孫，音遜，本亦作遜，下同。齊竟，音境，下同。

【疏】「孫之」至「奔也」。○釋曰：復發傳何？解，前發例於夫人，今復發例於公，明其同義，以別尊卑之辭詳畧也。

齊侯唁公于野井。野井，齊地。齊侯來唁公，公逆之至野井。○唁音彥。弔失國曰唁，唁公不得人於魯也。

【疏】「弔失」至「魯也」。○釋曰：言弔足以釋之，復言不入於魯地，<sup>①</sup>則曰唁者，彰公失國。言不得人魯，繼國事之辭，言可以書唁，而不詳其文。

冬，十月，戊辰，叔孫婁卒。

十有一月，己亥，宋公佐卒于曲棘。曲棘，宋地。邢公也。邢當爲訪。訪，謀也。言宋公所以卒于曲棘者，欲謀納公。○邢音方，又音訪。

【疏】注「宋公」至「納公」。○釋曰：案諸侯之卒，卒在外，書地。書地，縱不納公，何得畧以見義？<sup>②</sup>解，諸侯卒書地者，地有遠近、國邑之別，故鄭、扈非國，晉侯因會旦而鄭伯未見諸侯之所，<sup>③</sup>許男朝楚，蔡奔歸國，四者書地，<sup>④</sup>地有所由。今曲棘非國，是未踰竟，當從鄭、扈

之例既明矣。釋以謀納公爲義，義叶鄭、扈而例不異。

十有二月，齊侯取鄆。取鄆以居公。取，易辭也。內不言取，以其爲公取之，故易言之也。○易，以豉反。爲，于僞反。

【疏】「取易辭」。○釋曰：與濟西、謹、闡同異若何？解，取者易之辭，易辭之義兼外內，<sup>⑤</sup>外內之釋雖同，同而事辨異，<sup>⑥</sup>異則反覆釋之，故曰「爲公取之」。言非季氏之賂，忠臣之意，非實易辭。尊君抑臣，與濟西同文。前不異外之易者，實易，宋取鄆師是也。

二十有六年，春，王正月，葬宋元公。

三月，公至自齊，居于鄆。公次于陽州，其曰至自齊，何也？據公但至陽州，未至齊。

【疏】注「據公」至「陽州」。○釋曰：後如晉，出致不同，傳以見出致。解，公初至於陽州，後如晉乾侯出

①「地」，單疏本作「也」。

②「何」，阮校：「單疏本『何』下有『以』字。」

③「而」，阮校：「單疏本『而』下有『卒』字。」

④「書地」，阮校：「單疏本作『地書』。」

⑤「外」，原無，據單疏本補。

⑥「辨」，阮校：「單疏本作『別』。」

不同，傳以見齊侯爲義，雖至陽州，可以齊致，明乾侯之致，不見晉侯，故下二十九年注云「以乾侯致，不得見晉侯故」。

以齊侯之見公，可以言至自齊也。「齊侯

唁公于野井」，以親見齊侯爲重，故可言至自齊。居于鄆者，公在外也。若但言公至自齊，而不言居于鄆，則公得歸國，<sup>①</sup>欲明公實在外，故言居于鄆。

【疏】「公在外」。○釋曰：又日前不外公，<sup>②</sup>言外何？解，言外者，據內生名。公雖出奔，臣子不得外公，存錄之如在國。在國之文，不得實同，故言居鄆以別之。

至自齊，道義不外公也。至自齊者，臣子喜君父得反，致宗廟之辭爾。今君雖在外，猶以在國之禮錄之，是崇君之道。

夏，公圍成。成，孟氏邑。非國不言圍，所以言圍者，以大公也。崇大其事。

【疏】「非國」至「大公也」。○釋曰：何解凡邑不言圍，指小都，都之大者則國。此文是於三家彊大，邑過百乘，比之小國，國家之患，良由此起。昭公圍成，<sup>③</sup>郕，郕人不服，而臣之邑不順，季氏之權，得國之資，圍而不克，故以大公爲文。然則定公雖墮三都，成人不肯，公伐不克，故傳以大公釋之。書致爲異，故傳釋之。此不致者，

齊無難公之言，不以適齊無爲危至，如長葛言圍，非常見義乃殊，故傳不異。

秋，公會齊侯、莒子、邾子、杞伯盟于鄆

陵。鄆陵，某地。○鄆陵，音專，又市轉反。

公至自會，居于鄆。公在外也。至自會，道義不外公也。

【疏】「義不外公也」。○釋曰：復發傳何？解，自齊爲虛致，自會爲實文，與虛致嫌義有殊，故發不異也。

九月，庚申，楚子居卒。

冬，十月，天王入于成周。周有人無出也。始即位非其所，今得還，復據宗廟，是內故可言入。若即位於廟，則王者無外，不言出。

【疏】「有人無出也」。○釋曰：王也，傳言周而復釋何？<sup>④</sup>解，彼明上下一見，則同有出文，故言周。言

①「則」，阮校：「何校本依《公羊》疏「則」下增「嫌」字。」

②「日」，阮校：「何校本作「日」。」今按：單疏本同何校本。

③「成」，單疏本作「郕」。

④「釋」，單疏本作「始」。

周有人無出，明天王之身入與出，故發傳也。

尹氏、召伯、毛伯以王子朝奔楚。遠

矣，非也。雍曰：「奔篡君之賊，其責遠矣。」○召，上照反。篡，初患反。

【疏】注「奔篡」至「遠矣」。

○釋曰：傳言奔，直

奔也，何嫌以發？<sup>①</sup>解，「非也」，非責之非，責其遠矣。獨言遠者，傳云於周公著例，見上下之文。然則王子瑕不言出是常，常文而無大罪，則從例可知，故省文。至於尹氏，周室之微弱，而日月不誅，子朝使之奔，不足可責遠矣。則刺諸侯，諸侯謂宋、衛、陳、鄭外附於楚，子朝之舅，華戎同心而叛，天子不能誅，則宜遠責諸侯，乃經解傳，<sup>②</sup>宣其責遠矣。<sup>③</sup>傳既責遠，愧奔亦異，故曰：「奔，直奔也。」傳曰奔之惡也，惡其奔讎。子朝之奔，奔讎而曰奔。直奔，惡諸侯之叛，刺其不殊也。<sup>④</sup>

奔，直奔也。

二十有七年，春，公如齊。自鄆行。

公至自齊，居于鄆。公在外也。

【疏】「公在外也」。○釋曰：發傳不同，而重起

例何？解，公前孫而至，今如齊，不言孫，反而言至。至言居于鄆，故傳言「公在外也」。異義而文別，故重言例，而文省則義同，義同，亦在外可知也。

夏，四月，吳弑其君僚。○僚，力雕反。

楚殺其大夫鄢宛。○宛，於阮反，又於元反。

秋，晉士鞅、宋樂祁犁、衛北宮喜、曹

人、邾人、滕人會于扈。○祁犁，力兮反，又力私反。扈音戶。

冬，十月，曹伯午卒。

邾快來奔。徐邈曰：「自此已前，邾畀我，庶其

並來奔，今邾快又至，三叛之人，俱以魯為主。邾，魯鄰國，而聚其逋逃，為過之甚，故悉書之以示譏也。小國無大夫，故但舉名而畧其氏。」○邾快，苦夬反。畀，必二反，本或作鼻。逋逃，布吳反。

公如齊。

公至自齊，居于鄆。

二十有八年，春，王三月，葬曹悼公。

公如晉，次于乾侯。不得入于晉。乾侯，晉

①「以」，單疏本作「而」。

②「乃經解傳」，夏校：「依文義疑當作「乃傳解經」。」

③「宣」，夏校：「疑為「宜」之訛。」

④「殊」，阮校：「閩、監、毛本作「誅」。今按：單疏本同閩、監、毛本。

地。

【疏】「公如晉」。○釋曰：解，與發圍國之文同，故傳言「公在外也」，明從鄆如齊，不釋言次之，言在外亦顯故。

公在外也。

夏，四月，丙戌，鄭伯寧卒。○寧，下「滕子寧」皆如字。

寧，皆如字。

六月，葬鄭定公。

秋，七月，癸巳，滕子寧卒。

冬，葬滕悼公。

二十有九年，春，公至自乾侯，居于鄆。

以乾侯致，不得見晉侯故。

齊侯使高張來唁公。唁公不得入於魯也。

也。

【疏】「唁公」至「魯也」。○釋曰：復發傳何？

解，前「齊侯唁公于野井」，野井，齊地，今來唁公于鄆，鄆是魯地。魯地而言唁，言不得入于魯國都。魯國都謂宗廟所在。①唁有遠近，人有尊卑，君臣同文，故重發例也。

公如晉，次于乾侯。

夏，四月，庚子，叔倪卒。季孫意如

曰：「叔倪無病而死，此皆無公也。是天命也。非我罪也。」言叔倪欲納公，無病而死，此皆天命，使魯無君爾，魯公之出非我罪。○叔倪，五計反，又五兮反，《左氏》作詣。

【疏】「皆無公也」。○釋曰：叔倪之卒事，無公而曰皆何？解，經言「宋公佐卒于曲棘」，傳言「邢公也」，今叔倪復卒，傳曰「皆無公也」。

秋，七月。

冬，十月，鄆潰。潰之爲言上下不相得也。

上下不相得則惡矣，亦譏公也。公既出奔，不能改德脩行，居鄆小邑，復使潰亂，德之建，如此之甚。○潰，戶內反。惡，烏路反，又如字。行，下孟反。復，扶又反。

【疏】「潰之」至「得也」。○釋曰：重發起例何？

解，上下不相得之爲罪與國同，②故例詳之。此年三月，次于乾侯，來還于鄆。冬而鄆潰，嫌自潰，不責於公，故言「亦譏公也」。

①「魯國都」，單疏本無。

②「上下」至「國同」，《穀梁補注》引作「上下不相得之罪」。

邑與國同」。

昭公出奔，民如釋重負。傳明昭公有過，非但季氏之罪。

三十年，春，王正月，公在乾侯。中國不存公，存公故也。中國，猶國中也。

【疏】注「中國」至「中也」。○釋曰：凡言國中，指謂魯也。中國指其諸夏。諸夏爲中國，據夷狄爲外。案成，昭適晉，並踰年而不言在，襄二十八年「公如楚」，二十九年書「公在楚」，傳曰「閔公也」，爲楚所致，存錄之。然則此文中國，國中何爲變中國者何？解，中國踰年不言在，親倚之情，如國莫二，比之國中，不以言中非諸夏。且昭以二十五年出奔，二十六年居鄆，是魯地不存公。二十七年、二十八年亦如之，至此寄在乾侯。乾侯爲晉地，明公去魯竟而入於晉界，不復重還，遂卒于外。雖復生存居地壤，于予來歸，來不居茲日，故傳以有故釋之，所以閔公。范例云：「在，有故。」①言在，非所在也。」

夏，六月，庚辰，晉侯去疾卒。○去，起呂反。

秋，八月，葬晉頃公。○頃音傾。

冬，十有一月，吳滅徐。滅夷狄時。月者，爲下奔起。○爲，于僞反。

【疏】注「月者」至「奔起」。○釋曰：案滅中國

日，出奔月，輕於滅。滅夷狄時，奔何得更月？解，范答薄氏云：「國不滅而出，以月爲國，國滅例而出，出重發於滅，滅夷狄雖時，猶加於月。」②然則溫子不滅而出奔，③何以不月？有義而然。弦子之奔，文承八月之下，溫子以逃，在正月之後，何知不月？傳於弦子滅言「不日，微國」，微國則例月，例月則不關於君出，君出之重，不大於滅國。范云出重於滅者，言既滅其國，君不死難，比之常奔恒滅，則爲重矣。滅在月例者，君出不復加日，④明滅重矣。月亦是，譚子出月，月開滅國，滅國例之同，⑤同例在不日。傳於滅國詳畧之，更於潞子發夷狄之遠例，於鄆亡見中國之變稱，義例成矣。潞子之賢從自盟，滅國獲君，君或出奔，名爲罪，皆有罪，故注譚子云「蓋無罪」。今注章羽，明不復疑。名爲有罪，譚子言蓋，約邾益之名，⑥名

①「故」，《穀梁補注》作「四」。

②「國不」至「於月」，單疏本「於月」作「以月」，《穀梁補注》引作：「國不滅而出，以月爲例，國滅而出，出重於滅，滅夷狄雖時，猶加以月。」

③「不滅」，《穀梁補注》引作「國滅」。

④「出」，單疏本作「奔」。

⑤「例」，阮校：「單疏本作「與」。」

⑥「約」，單疏本作「日」。



義見矣，故章羽從正例而不疑也。<sup>①</sup>

徐子章羽奔楚。奔而名者，有罪惡也。○惡，烏路反。

三十有一年，春，王正月，公在乾侯。

季孫意如會晉荀欒于適歷。適歷，晉地。

○欒音歷，舊作躒。適，丁歷反。

夏，四月，丁巳，薛伯穀卒。

晉侯使荀欒唁公于乾侯。唁公不得人

於魯也。曰：「既爲君言之矣，不可者意如也。」言己已告魯求納君，唯意如不肯。○爲，于僞反。

【疏】「唁公」至「魯也」。○釋曰：復發傳何？

解，范例云：「唁有三，弔失國曰唁。」唁雖有三，弔失國三，三釋一而已。不入魯界有三文，知言唁嫌與魯異。其言不得入魯，明弔失國而異。今地晉而受晉納，公有可入之理，故言「唁公不得入於魯也」。

秋，葬薛獻公。

冬，黑肱以濫來奔。其不言邾黑肱，何

也？據襄二十一年「邾庶其以漆間丘來奔」言邾。

○肱，古弘反。濫，力甘反，又力暫反。别乎邾也。

邾以濫邑封黑肱，故别之若國。○别，彼列反。其不

言濫子，何也？據既别之爲國，則應書其爵。非

天子所封也。來奔，內不言叛也。

【疏】「來奔」至「叛也」。○釋曰：重發傳何？

解，書黑肱不繫邾，嫌其專地，不責叛，罪輕，故言來奔。不言叛，罪自顯也。

十有二月，辛亥，朔，日有食之。

三十有二年，<sup>②</sup>春，王正月，公在乾侯，

取闕。○闕，口暫反。

夏，吳伐越。

秋，七月。

冬，仲孫何忌會晉韓不信、齊高張、宋仲幾、衛大叔申、<sup>③</sup>鄭國參、曹人、莒人、邾

①「羽」，原作「禹」，阮校：「單疏本、監、毛本『禹』作『羽』。」今據改。

②「三十有二年」，原作「二十有二年」，據上文「三十有一年」及阮校改。

③「大」，原作「太」，阮校：「石經『太』作『大』，《釋文》出『大叔音泰』。」今據改。

人、薛人、杞人、小邾人城成周。天子微，諸侯不享覲。享，獻也。覲，見也。言天子微弱，四方諸侯不復貢獻，又無朝覲之禮。<sup>①</sup>○大音泰。享，許丈反。覲，其靳反。見，賢徧反。復，扶又反。朝，直遙反。天子之在者，惟祭與號。祭謂郊上帝，號謂稱王。

【疏】「天子」至「與號」。○釋曰：於此乃言周衰變之正，<sup>②</sup>重復起傳何？解，平、桓之世，唯復禮樂出自諸侯，<sup>③</sup>諸侯猶有享覲之心，<sup>④</sup>襄王雖復出居，猶賴晉文之力。札子雖云矯殺，王威未甚屈辱。至於景王之崩，嫡庶交爭，宋、衛外附，楚亦內侮。天子獨立成周，政教不行天下，諸侯無桓、文之霸，不能致力於京師，權柄委于臣手，故大夫相率而城之。比之在禮，<sup>⑤</sup>故釋不異辭，因變正也。故諸侯之大夫，相帥以城之，此變之正也。

十有二月，己未，公薨于乾侯。

- ① 「覲」，阮校：「余本作『見』。」
- ② 「於」，阮校：「單疏本作『以』。」
- ③ 「唯」，《穀梁補注》作「雖」。
- ④ 「諸侯」，單疏本無。
- ⑤ 「在」，《穀梁補注》作「正」。

## 監本春秋穀梁注疏定公卷第十九

起元年，盡十五年

范甯集解 楊士勛疏

## 定公

【疏】《魯世家》：定公名宋，襄公之子，昭公之弟，以周敬王十一年即位。《謚法》：「安民大慮曰定。」

元年，春，王三月。<sup>①</sup>徐邈曰：「案傳定元年不書正月，言「定無正也」。然則改元即位在于此年，故不可以不書王。書王，必有月以承之，故因其執月以表年首爾，不以謹仲幾也。」

不言正月，定無正也。定之無正，何也？昭公之終，非正終也。死在外故。

【疏】注「死在外故」。○釋曰：非正終，案桓公之薨于齊，與乾侯不異，莊公不即位，而書正月何？解，以十八年如齊，至即薨，薨而當歲即入，入而莊公繼位，行既殯踰年之禮，但以先君殺而後主不忍行即位之禮。<sup>②</sup>今昭公前年薨，今年喪入，定公既殯，不居正月之前，欲行即位，非踰年之始，非始非正，故未得即位，不得比之莊公。

定之始，非正始也。昭無正終，故定無正始。不言即位，喪在外也。

晉人執宋仲幾于京師。晉執人於尊者之側，而不以歸京師，故但言其執，不書所歸。

【疏】注「晉執」至「幾也」。○釋曰：薄氏駁云：「仲幾之罪，自委之王吏，<sup>③</sup>非晉人所執，故傳云「不正其執人於尊者之所也」，譏執，不譏無所歸。晉執曹、衛，他處並可言歸，若晉人執仲幾于京師，復何得言歸于京師？」<sup>④</sup>若如此論，何以通乎解？「范答云：「晉城成周，宋不即役，晉為監功之主，因而執之，此自晉人之事，安得委之王吏？傳當以執人於尊者之所，而不以

① 「王三月」，《穀梁補注》曰：「舊本「三月」二字退在下

「晉人」上，以「王」字斷句，與桓元年同誤。今改正之，並移下條徐注於此。《公羊》此年亦以「王」字斷句，孔廣森本改正。」今據改。

② 「殺而後主」，阮校：「閩、監、毛本「主」作「立」，何校本「殺」作「弑」。今按：單疏本同何校本。

③ 「自」，《穀梁補注》所引「自」下有「當」字。

④ 「何」，阮校：「何校本作「可」。今按：單疏本同何校本。

歸於王之有司，<sup>①</sup>非言其不可以執。晉文公執曹、衛之君，各於其國，而並不書國者，以其歸于京師故也。今執仲幾，不書所歸，唯舉其地者，此晉自治之效。若使歸于京師，與執諸侯同，君臣無別也。今直執在京師，<sup>②</sup>不可言歸。此義猶自未通，有義而然。上言城成周，序仲幾于會，於歸言于京師，<sup>③</sup>其言足誤天王居于狄泉，<sup>④</sup>在畿內而別處。若上言城成周，下稱晉人執宋仲幾歸于京師，具見執之異處而歸天子。今晉人於尊者之側，而執人以歸，自治於國，<sup>⑤</sup>故《春秋》不與其專執地於京師。下文言「此大夫，其曰人何？微之也」。何以知大夫？有義而然。<sup>⑥</sup>周之稱名，大夫相執無稱名之例，因此見義，明大夫相執不書，書則微之，見伯討失所，故云云，非謂大夫相執得見於經。經書晉人執衛侯歸之于京師，與伯執稱人不異，異則言侯，故曰以晉侯而斥執曹伯，惡晉侯也。是君臣之別也。」

此大夫，<sup>⑦</sup>其曰人，何也？微之也。何爲微之？不正其執人於尊者之所也，不與大夫之伯討也。

夏，六月，癸亥，公之喪至自乾侯。

戊辰，公即位。殯然後即位也。周人殯于西階之上。

【疏】注「周人」至「之上」。○釋曰：嫌何以

言？<sup>⑧</sup>解，喪自外至，雖正棺於兩楹之間，兼不亦言，<sup>⑨</sup>故言西階。鄭注《禮記》以爲殯亦兩楹之間也。

定無正，見無以正也。踰年不言即位，

是有故公也。謂昭公在外故。○見，賢徧反。言

即位，是無故公也。即位，授受之道也。先

君見授，後君乃受，故須棺在殯，乃言即位。先君無正

終，則後君無正始也。先君有正終，則後君

①「王」下，單疏本有「者」字。

②「直」，《穀梁補注》所引「直」下有「以」字。

③「於歸言于京師」，《穀梁補注》引作「此言歸於京師」。

④「誤」，阮校：「浦鏜云「誤」疑「證」字誤。」

⑤「自」，單疏本作「以」。

⑥「然」，阮校：「何校本作「後」。」

⑦「此大夫」，原作「此其大夫」，阮校：「石經、余本無

「其」字。案成公十五年疏引無「其」字。按，上文疏引

亦無「其」字。」今據刪。

⑧「以」，單疏本作「而」。

⑨「兼不亦言」，阮校：「何校本作「嫌殯亦言」。」今按：

單疏本同何校本。

有正始也。戊辰，公即位。謹之也。定之即位，不可不察也。公即位，何以日也？據未有日者。

【疏】「定之」至「察也」。○釋曰：解，定公即位，特異常文者，欲言繼弑，公好卒，欲言好卒，卒非正終，不即入，踰年乃至，至正月當即位，而皆失時。時不得同於常禮，禮宜異文，文書之在夏，是有故與無故兩文並見。即位雖同，而時義有別，理有所見，見必有意，故曰「不可不察也」。

戊辰之日，然後即位也。癸亥，公之喪至自乾侯，何爲戊辰之日然後即位也？癸亥去戊辰六日，怪不即位。正君乎國，然後即位也。諸侯五日而殯，今以君始死之禮治之，故須殯而後言即位。沈子曰：「正棺乎兩楹之間，然後即位也。」兩楹之間，南面之君聽治之處。<sup>①</sup>○之處，昌慮反。內之大事，日。即位，君之大事也，其不日何也？以年決者，不以日決也。此則其日，何也？著之也。欲有所見。何著焉？踰年即位，厲也。厲，危也。公喪在外，踰年

六月，乃得即位，危，故日之。於厲之中，又有義焉。先君未殯，則後君不得即位。未殯，雖有天子之命猶不敢，況臨諸臣乎？以輕喻重也。雖爲天子所召，不敢背殯而往，況君喪未殯，而行即位之禮，以臨諸臣乎？周人有喪，魯人有喪。周人弔，魯人不弔。周人曰：「固吾臣也，使人可也。」魯人曰：「吾君也，親之者也，使大夫則不可也。」故周人弔，魯人不弔，以其下成，康爲未久也。周道尚明，無愧于不往。

【疏】注「周道」至「不往」。○釋曰：今定公之世，天子之存，唯祭與號，安得云尚明？解，此傳以重況輕，陳上世之事，非專今日，下成康爲未久。定公未殯不得即位，以臨群臣，輕于王命。王命猶不得背殯，<sup>②</sup>指謂王與魯並有喪，周人弔魯，魯人不弔，既殯君，乃奔喪。《喪服》，天子之斬，哭泣申父重之情。先殯其父，後奔天子之喪，亦是不奪人之親。門外之治義斷恩，門內之治恩掩

①「聽」，宋刻元修本作「所」。

②「猶不得背」，單疏本作「不既得皆」。阮校：「何校本

「背」作「皆」。

義。至如伯禽，越紼赴金革之重，不拘此例。

君，至尊也，去父之殯而往弔猶不敢，況未殯而臨諸臣乎？

秋，七月，癸巳，葬我君昭公。

九月，大雩。雩月，雩之正也。秋，大雩，雩，非正也。冬，大雩，非正也。秋，大雩，雩之爲非正，<sup>①</sup>何也？冬，禾稼既成，猶雩，則非禮可知。秋，禾稼始苗，<sup>②</sup>嫌當須雨，故問也。毛澤未盡，人力未竭，未可以雩也。邵曰：「凡地之所生謂之毛。」《公羊傳》曰「錫之不毛之地」是也。言秋百穀之潤澤未盡也。人力未盡，謂耕耘之功未畢。<sup>③</sup>○耘，本又作芸，音云。

【疏】「凡地」至「是也」。○釋曰：言非必百穀至，而雩祀之設，本爲求雨，求雨之意指爲祈穀，故《周頌·噫嘻》之篇，歌春夏而同名，至於脩雩祀不異，故此傳言「毛澤未窮，人力未竭」，言人力之功施於種植，種植之義在于禾黍。未聞凡品總稱曰毛，將何所據？解，聖人之於四海，不偏一物，愛人之情，特深懷抱。百姓所恃，莫急於食。食雖民天，天不降雨，嘉品不育，時澤之來，普汎無私，雖非百穀，亦治有洪之潤，<sup>④</sup>公田已流，遂及之惠彌遠。故總凡品爲毛，明天德之道廣。列子言山川之毛指謂草木，《公羊》所論，非專禾麥。寒涼之地，本不種苗，

鄭衍吹律，乃始名生物謂之黍。若以此言之，《公羊》所言不毛，鄭衍之前，當鄭伯與楚語時也。又上傳云「冬，大雩，非正也」，秋亦曰「非正也」，非正是同，而問不異。及答之，直釋月雩爲正，則四月龍見，常失正故也。解成七年「冬，大雩」，傳云「冬無爲雩也」，言用禱禮，明禾稼成不須雩，失時不二，故問同而答異。注「當須雨」，其解也，聖人重謝請，請必爲民，民之本務在於春夏，春夏祈穀，先嚴其犧牲，具其器物，謹脩其禮，冀精神有感，<sup>⑤</sup>故一時盡力，專心求請。求請不得失時，時謂孟夏之節。是月有雨，先種得成茂實，後種更生，故重其二時。時過以往，至於八月、九月。脩雩之節，不言四月，非正也，故曰「是月不雩，則無及矣」，謂八月求雨，雩而得之則書雩，明有所及故也。是月雩不必有雨，而曰無及者，人情之意，欲其有益，<sup>⑥</sup>故以兩月請。「是年不艾，則無食」，指謂九月之雩，

①「冬大雩非正也秋大雩雩之爲非正」，阮校：「石經無下「雩」字，《儀禮經傳通解》引同。余本脫「冬大雩非正也」六字。」

②「稼」，原作「嫁」，據四部叢刊本《春秋穀梁傳》改。

③「治有洪」，單疏本作「沾有滄」。阮校：「閩、監、毛本

「治」作「沾」，何校本「洪」作「滄」是也。」

④「神」，單疏本作「誠」。

⑤「有益」，單疏本作「而得」。

零而得雨，是年有食，零不得雨，則書旱，旱則一歲無食，故曰是年。傳於仲秋言月，季秋言年，年月之情以表遠近深淺之辭也。

零月，零之正也。月之爲零之正，何也？其時窮，人力盡，然後零，零之正也。何謂其時窮人力盡？是月不雨，則無及矣；是年不艾，則無食矣：是謂其時窮人力盡也。零之必待其時窮人力盡何也？零者，爲早求者也。求者，請也。古之人重請。何重乎請？人之所以爲人者，讓也，請道去讓也，則是舍其所以爲人也，是以重之。焉請哉？請乎應上公。古之神人有應上公者，通乎陰陽，君親帥諸大夫道之而以請焉。道之，謂君必爲先也。其禱辭曰：「方今大旱，野無生稼，寡人當死，百姓何謗？不敢煩民請命，願撫萬民，以身塞無狀。」禱亦請也，此即請辭也。○艾，魚廢反。去讓，羌呂反。是舍，音捨。焉請，於虔反。應上，時掌反。道之，音導。夫請者，非可詒託而往也，必親之者也，是以重之。詒託猶假寄。○詒，以

之反。

【疏】「請乎應上公」。○釋曰：案《月令》「大零帝」，此經言「大零」，文與《月令》同，同祀上帝。帝，天也，而曰上公，義更何取？且零與禱本自不同，而引禱辭以證零何？解，天子零上帝，諸侯零上公，魯與天子同零上帝，<sup>①</sup>上帝既零，<sup>②</sup>及百辟卿士，有益於民者，即此傳所謂古之神人，通乎陰陽，使爲民請雨，故言「焉請哉？」<sup>③</sup>請應乎上公。<sup>④</sup>天尊，不敢指斥，故請其屬神。《考異郵》說僖公三時不雨，禱于山川，以六過自責，又曰：「方今大旱，野無生稼。」此注所云其禱辭，或亦用之，故引以明之耳。

立煬宮。煬宮，伯禽子廟，毀已久。○煬宮，餘亮反，煬公之廟也。煬公，伯禽子。立者，不宜立者也。

【疏】「立者」至「者也」。○釋曰：重發傳何？解，不日，與武宮異，故發傳。范例云：「宮廟有三者，三者文有詳畧。詳畧見功有輕重：丹楹功少，故書時；刻桷功重，故錄月。」范答薄氏云：「考宮書月，比丹楹爲

①「魯與」，原作「與魯」，據單疏本改。

②「零」，原重文，據單疏本刪。

③「焉」，原脫，夏校從上傳文補。今從之。

④「請應乎上公」，據上文，此文疑當爲「請乎應上公」。

重。」是其三文。武宮書曰，范云「始築之事然」。煬，案《周書·謚法》「肆行勞神曰煬」。煬宮不日，比武宮爲輕。輕重之例，①各以類舉，此謂范例之數以宮言之。立廟之例，以立言之，在不宜之中。②一事而兩屬，義有所附，故例有因，亦得數此，同在不宜之中。

冬，十月，隕霜殺菽。建酉之月，隕霜殺菽，非常之災。未可以殺而殺，舉重。舉殺豆，則殺草可知。可殺而不殺，舉輕。不殺草，則不殺菽亦顯，僖三十三年「隕霜不殺草」是也。其曰菽，舉重也。

【疏】「未可」至「舉輕」。○釋曰：隕霜二文不同書，故范特爲一例。傳嫌獨殺菽，不害餘物，故以輕重別之。菽易長而難殺，故以殺之爲重。重者殺，則輕者死矣。輕而不死，重者不殺，居然可知。

二年，春，王正月。

夏，五月，壬辰，雉門及兩觀災。雉門，公宮之南門。兩觀，闕也。○兩觀，工喚反，注及下文同。其不曰雉門災及兩觀，何也？據先書雉門，則應言雉門災及兩觀。鄭嗣曰：「據災實從雉門起，應言雉門災及兩觀。」災自兩觀始也，不以尊者親災也。始災者，兩觀也。鄭嗣曰：「今以災在兩觀下，使若兩觀始災者，不以雉門親災。」先言雉門，尊尊也。

欲言兩觀災及雉門，則卑不可以及尊，災不從雉門起，故不得言雉門災及兩觀。兩觀始災，故災在兩觀下也。鄭嗣曰：「欲以兩觀親災，則經宜言兩觀災及雉門，雉門尊，兩觀卑，卑不可以及尊，故不得不先言雉門，而後言兩觀。欲令兩觀始災，故災在兩觀下矣。」○令，力呈反。

【疏】「雉門」至「觀災」。○釋曰：解，劉向云：「雉門，天子之門。而今過魯制，③故致天災也。」

秋，楚人伐吳。

冬，十月，新作雉門及兩觀。言新，有舊也。作，爲也，有加其度也。此不正，其以尊者親之，何也？不正，謂更廣大之，不合法度也。據當諱，而以雉門親新作之下。雖不正也，於美猶可也。改舊雖不合正，脩飾美好之事，差可以雉門親之。○差，初賣反。

【疏】「作爲」至「度也」。○釋曰：重發傳何？解，此災而更脩，嫌與作南門異，故發傳以同之。災惡，故

①「例」，阮校：「監、毛本作『序』。」

②「在不宜之中」，單疏本作「在乎不疑之中」。

③「過魯」，阮校：「惠棟校本作『魯過』。」今按：單疏本同惠棟校本。



尊雉門，推災而遠之。今新作美好之事，雉門雖不正，尊雉門可以親之。

三年，春，王正月，公如晉，至河乃復。

【疏】「公如晉」。○釋曰：書月何？解，昭公四如晉，兼有疾爲五，皆不月。公不入晉，則無危。十三年、二十三年「乃復」，皆不月，是其例，「乃復」文承月下，不蒙可知。昭公即位二年，而脩朝禮無闕，而爲季氏所譖，使不得入，公無危懼之意，猶數數修朝於晉。晉雖不受朝，公無危懼之理。定立今三年，始朝於晉，晉責其緩慢，不受其朝，公懼而反，非必季氏所譖。公有負於晉，而心內畏懼，故危錄之。

三月，辛卯，邾子穿卒。○穿音川。

夏，四月。

秋，葬邾莊公。

冬，仲孫何忌及邾子盟于拔。拔，地名。

○拔，皮八反。

四年，春，王二月，癸巳，陳侯吳卒。

三月，公會劉子、晉侯、宋公、蔡侯、衛侯、陳子、鄭伯、許男、曹伯、莒子、邾子、頓子、胡子、滕子、薛伯、杞伯、小邾子、齊國夏

于召陵，侵楚。○夏，戶雅反。召，詩照反。

夏，四月，庚辰，蔡公孫姓帥師滅沈，以沈子嘉歸，殺之。○公孫姓，音生，又如字。

五月，公及諸侯盟于臯鼬。召陵會劉子、諸侯，總言之也。臯鼬，地名。○鼬，由又反。

後而再會，<sup>①</sup>公志於後會也。後，志疑也。公畏強楚，疑於侵之，故復者，更謀也。不日者，後楚伐蔡，不能救故。○復，扶又反。

【疏】「公會」至「疑也」。○釋曰：案傳例地而伐，<sup>②</sup>疑辭。今經言會于召陵侵楚，則疑於前會，不關於後。而云「志於後會也」者，後志疑何？解，楚當時爲之所困，<sup>③</sup>削弱矣，諸侯侵之，易可得志。今一會之中，十有九國，衆力之彊，足以服楚，不敢深入，淺侵郊竟，則責諸侯之疑，居然可曉。公疑於楚彊，謂無勇，故會盟二文，並見魯公，外內之疑兩顯。

①「後」，阮校：「石經、余本作「一事」兩字。」

②「例地而伐」，阮校：「何校本「例」作「異」，「伐」作「發」。」今按：單疏本同何校本。

③「之」，阮校：「何校本作「吳」。」今按：單疏本同何校本。

杞伯成卒于會。

六月，葬陳惠公。

許遷于容城。

秋，七月，公至自會。

劉卷卒。劉，采地。○劉卷，音權。采，七代反。

此不卒而卒者，賢之也。襄內諸侯也，非列土諸侯，此何以卒也？天子畿內大夫有采地者，謂之襄內諸侯，非列土之諸侯，雖賢，猶不當卒。○襄內，音環。天王崩，爲諸侯主也。昭二十二年景王崩，嘗以賓主之禮相接，能爲諸侯主，所以爲賢。

【疏】「此不卒」至「賢之也」。○釋曰：又云「非

列土諸侯，此何以卒也？天王崩，爲諸侯主也」。書卒不闕其賢，<sup>①</sup>而范例云「襄內諸侯，非列土諸侯。非列土諸侯而書之者，<sup>②</sup>賢之也」。賢之一文，而義當兩用。解，上言不卒而得書卒之意，釋下言賢之，猶賢不當卒，卒之者，以其爲諸侯主，明賢之義，故得書卒。反覆二事皆是爲賢，故例復云賢之不用葬，葬之者，明亦爲賢之，而采地比之畿外諸侯，<sup>③</sup>故書葬。

葬杞悼公。

楚人圍蔡。

晉士鞅、衛孔圉帥師伐鮮虞。

葬劉文公。

冬，十有一月，庚午，蔡侯以吳子及楚人戰于伯舉，楚師敗績。吳其稱子，何也？以蔡侯之以之，舉其貴者也。貴謂子也。蔡侯之以之，則其舉貴者，何也？吳信中國而攘夷狄，吳進矣。其信中國而攘夷狄奈何？子胥父誅于楚也，子胥父，伍奢也。爲楚平王所殺。○信音申。<sup>①</sup>攘，如羊反，却也。挾弓持矢而干闔廬。見不以禮曰干，欲因闔廬復父之讎。○挾，戶牒反，又子協反。闔，戶臘反。廬，力居反。見，賢徧反。闔廬曰：「大之甚！勇之甚！」子胥匹夫，乃欲復讎於國君，其孝甚大，其心甚勇。

【疏】注「其孝」至「甚勇」。○釋曰：子胥之復

①「闔」，單疏本作「關」。

②「之」，《穀梁補注》作「卒」。

③「外」，宋刻元修本作「內」。

④「信音申」，《釋文》作「吳信音申又如字」。

讎，違君臣之禮，失事主之道，以匹夫之弱，敵千乘之強，非心至孝，莫能然也。得事父之孝，非敬長之道，故曰「其孝甚大」。若夫子胥父欲被誅，竄身外奔，布衣之士，而求干列國之君，吐弓矢之志，無疑難之心，故曰「其心甚勇」。

爲是欲興師而伐楚。子胥諫曰：「臣聞之，君不爲匹夫興師。」

【疏】「君不」至「興師」。○釋曰：然則成湯之誅葛伯，爲殺其餉者，武王之殺殷紂，稱斬朝涉之脛，<sup>①</sup>何以萬乘之主，爲匹夫復讎？解，湯征葛伯，本爲不祀之罪，罪已灼然。然湯聽其順辭，使其亳民爲耕，葛伯殺其餉者，此由不祀而致禍。其如殷紂之罪，被所不盡，斬以所不書，故武王致天之罪，<sup>②</sup>稱斬朝涉之脛，剖賢人之心，亦不爲匹夫興師。<sup>③</sup>吳子有因諸侯之怒，<sup>④</sup>直申子胥之情，故言「不爲匹夫興師」，得其實論也。傳稱子胥云「虧君之義，復父之讎」，傳文曲直，子胥是非，《穀梁》之意，善惡若爲？解，《公羊》、《左氏》論難紛然，賈逵、服虔共相教授，戴宏、何休亦有唇齒。其於此傳開端，似同《公羊》，及其結綯，不言子胥之善。夫資父事君，尊之非異，重服之情，理宜共均。既以天性之重，降於義合之輕，<sup>⑤</sup>故令忠臣出自孝子，孝子不稱忠臣。今子胥稱一體之重，忽元首之分，以父被誅，而痛纏骨髓，得耿介之孝，失忠義之臣，而忠孝不得並存。傳不善子胥者，兩端之間，忠臣傷孝子之恩，論孝子則失忠臣之義。《春秋》科量至理，尊君卑

臣，子胥有罪明矣。君者臣之天，天無二日，土無二王。子胥以藉吳之兵，戮楚王之尸，可謂失矣。雖得壯士之偏節，失純臣之具道，傳舉見其非，<sup>⑥</sup>不言其義，蓋吳子爲蔡討楚，申中國之心，屈夷狄之意，其在可知。<sup>⑦</sup>

且事君猶事父也，虧君之義，復父之讎，臣弗爲也。」於是止。蔡昭公朝於楚，有美裘，正是日，囊瓦求之。正是日，謂昭公始朝楚之日。○爲是，于僞反，「不爲」及下「爲是」皆同。<sup>⑧</sup>朝於，直遙反，注同。囊，乃郎反。昭公不與，爲是拘

①「斬」，原作「斬」，據單疏本改。

②「罪」，單疏本作「罰」。

③「不」，阮校：「何校本『不』下有『專』字。」今按：單疏本同何校本。

④「有」，單疏本作「无」。阮校：「何校本作『既』。」

⑤「於」，單疏本作「以」。

⑥「非」，阮校：「單疏本作『爲』。」今按：《穀梁補注》引亦作「爲」。

⑦「其」，阮校：「何校本作『理』。」今按：單疏本同何校本。

⑧「不爲及下」，《釋文》作「下不爲匹夫」。

昭公於南郢。南郢，楚郡。<sup>①</sup>○郢，以井反，又以正反。數年然後得歸，歸乃用事乎漢。用事者，禱漢水神。○數，所主反。曰：「苟諸侯有欲伐楚者，寡人請爲前列焉。」楚人聞之而怒，爲是興師而伐蔡。蔡請救于吳。子胥曰：「蔡非有罪，楚無道也。君若有憂中國之心，則若此時可矣。」爲是興師而伐楚。何以不言救也？據實救蔡。救大也。夷狄漸進，未同於中國。

【疏】「救大也」。○釋曰：「夷狄漸進，未同於中國」，狄何以言救齊？解，救齊是善事。今吳夷狄而憂中國，故進稱子，然未同諸夏，故不言救。雖書救齊而未稱人，許夷狄不使頓脩故也。令吳既進稱子，<sup>②</sup>復書曰救，便與中國齊蹤，華夷等迹，故不與救。若書救，當言吳子救蔡，「蔡侯以吳子及楚人戰于伯舉」，不直舉救蔡，而言吳人楚。

楚囊瓦出奔鄭。知見伐由己，故懼而出奔。

庚辰，吳人楚。日入，易無楚也。易無

楚者，壞宗廟，徙陳器，撻平王之墓。鄭嗣曰：「陳器，樂縣也。禮：諸侯軒縣。」言吳人壞楚宗

廟，徙其樂器，鞭其君之尸，楚無能抗禦之者，若曰無人也。○易，以豉反。壞音怪。撻，土達反。縣音玄。亢，苦浪反。何以不言滅也？據宗廟既毀，樂器已徙，則是滅也。欲存楚也。其欲存楚奈何？昭王之軍敗而逃，父老送之，曰：「寡人不肖，亡先君之邑。父老反矣，何憂無君？寡人且用此人海矣。」父老曰：「有君如此其賢也，以衆不如吳，以必死不如楚。」雍曰：「吳勝而驕，楚敗而奮。」○肖音笑。奮，方問反。相與擊之，一夜而三敗吳人，復立。楚復立也。○敗，必邁反。復，扶又反。何以謂之吳也？據戰稱子。狄之也。何謂狄之也？君居其君之寢而妻其君之妻，大夫居其大夫之寢而妻其大夫之妻，蓋有欲妻楚王之母者，不正。乘敗人之績，而深爲利，居人之國，故反其

①「郡」，阮校：「余本作『都』。」

②「令吳既進稱子」，宋刻元修本、單疏本作「今吳既進稱子」。

狄道也。

五年，春，王三月，<sup>①</sup>辛亥，朔，日有食之。

夏，歸粟于蔡。蔡侯比年在楚，又爲楚所伐，飢，故諸侯歸之粟。諸侯無粟，諸侯相歸粟，正也。孰歸之？諸侯也。不言歸之者，專辭也。不言歸之者主名，若獨是魯也。義邇也。言此是邇近之事，故不足具列諸侯。

於越入吳。舊說於越，夷言也。《春秋》即其所以自稱者書之，見其不能慕中國，故以本俗名自通。○見，賢徧反。

六月，丙申，季孫意如卒。傳例曰：「大夫不日卒，惡也。」意如逐昭公，而日卒者，明定之得立由乎意如，<sup>②</sup>《春秋》因定之不惡，而書日以示譏，亦猶公子翬非桓之罪人，故於桓不貶。○惡，烏路反。翬，許韋反。

秋，七月，壬子，叔孫不敢卒。

冬，晉士鞅帥師圍鮮虞。

六年，春，王正月，癸亥，鄭游速帥師滅許，以許男斯歸。

二月，公侵鄭。

公至自侵鄭。

夏，季孫斯、仲孫何忌如晉。仲孫忌，而曰仲孫何忌，甯所未詳。《公羊傳》曰：「譏二名。」

秋，晉人執宋行人樂祁犁。

冬，城中城。城中城者，三家張也。大夫稱家。三家：仲孫、叔孫、季孫也。三家侈張，故公懼而脩內城，譏公不務德政，恃城以自固。○張，如字，一音下亮反，<sup>③</sup>注同。

【疏】「三家張也」。○釋曰：釋之異辭，何也？凡城之志，皆譏。傳於「冬，城諸及防」，解「可城」，言間隙無事，理實有譏。今不釋，恐同彼傳，言志城之中雖得間隙，復有畏張侈之患，還與皆譏之義同，或是義與可城同也。

或曰，非外民也。

季孫斯、仲孫忌帥師圍鄆。

① 「三月」，原作「正月」，據宋刻元修本改。  
② 「乎」，阮校：「余本作「于」。」  
③ 「下」，《釋文》作「丁」。

七年，春，王正月。

夏，四月。

秋，齊侯、鄭伯盟于鹹。○鹹音咸。

齊人執衛行人北宮結，以侵衛。以，重

辭也。衛人重北宮結。齊以衛重結，故執以侵之，

若楚執宋公以伐宋。凡言以，皆非所宜以。

【疏】「以重辭也」。○釋曰：前注云「以有二

義」，今注即云「凡言以，皆非所宜以」，是一義，而曰二

何？解，楚執宋公，兩君相執，傳以言重，<sup>①</sup>辭別於凡以。

今此君而執臣，明以國重，不言與二君共例，故發例同之。

二義已見，故注更言「凡以」而起義，解以者不以者，不止

釋此文。

齊侯、衛侯盟于沙。沙，地。

大雩。

齊國夏帥師伐我西鄙。

九月，大雩。

冬，十月。

八年，春，王正月，公侵齊。

公至自侵齊。

二月，公侵齊。未得志故。

三月，公至自侵齊。公如，往時致月，

危致也。往月致時，危往也。往月致月，惡

之也。○惡，烏路反。

【疏】「公如」至「致也」。○釋曰：復發傳何？

解，莊二十三年起例，公行有危而書月。今公伐齊有危，

危而書月，一時之間，再興兵革，危懼之理，義例所詳，故

重說以明之。

曹伯露卒。

夏，齊國夏帥師伐我西鄙。

公會晉師于瓦。瓦，衛地也。

公至自瓦。

秋，七月，戊辰，陳侯柳卒。○柳，良久反。

晉士鞅帥師侵鄭，遂侵衛。

葬曹靖公。

九月，葬陳懷公。

①「以言」，阮校：「何校本『以言』乙轉。」今按：單疏本同何校本。

季孫斯、仲孫何忌帥師侵衛。

冬，衛侯、鄭伯盟于曲濮。曲濮，衛地。

○濮音卜。

從祀先公。貴復正也。文公逆祀，今還順。

盜竊寶玉大弓。寶玉者，封圭也。始封

之圭。大弓者，武王之戎弓也。是武王征伐之

弓。周公受賜，藏之魯。周公受賜於周，藏之魯者，

欲世世子孫無忘周德也。非其所以與人而與人，

謂之亡。亡，失也。非其所取而取之，謂之

盜。

【疏】「非其」至「之亡」。○釋曰：①於經何例當

之？解，經言饑，止謂二穀不收。②苞宣公之例，五穀不

收止在當文，康、鍾無例應之。今因盜而發亡例，經無應

之。或說非其所以與人謂之亡，是梁伯所行也。梁伯受

國于天子，不能撫其民人而自失之。夫國之利器，不可以

示人，權之可守，焉得虛假？君貪色好酒，耳目不能聰

明，上無正長之治，大臣背叛而國外奔，因若自滅，故謂之

亡，此可以應其義。

九年，春，王正月。

夏，四月，戊申，鄭伯蠆卒。○蠆，田邁

反。③

得寶玉大弓。杜預曰：「弓，王國之分器也。

得之足以爲榮，失之足以爲辱，故重而書之。」○分器，扶

問反。其不地何也？

【疏】「其不地何也」。○釋曰：據何文而責地？

解，此據獲物言地，①經言「戰于大棘，獲宋華元」，宜蒙上

地，故據彼責此。

寶玉大弓，在家則羞，不目，羞也。國之

大寶，在家則羞也。況陪臣專之乎！恥甚而不目其地。

【疏】注「況陪臣專之乎恥甚而不目其地」。○釋

曰：下「或曰，陽虎以解衆也」，還是陪臣，何以異之？

解，上說不目羞，明失之爲辱，得之爲榮。榮而言地，地是

陪臣之所居。魯能奪陪臣之得，可以明免恥，何爲不地？

夫以千乘之國，而受辱於陪臣，雖得爲榮，書地則恥。或

曰之義，得非魯力也。陽虎竊國重寶，非其所用，畏衆之

討，送納歸君，故書而記之。

①「釋」，原作「傳」，阮校：「『傳』當作『釋』」。閩本誤同。

監、毛本不誤。」今據改。

②「收」，原作「政」，據單疏本改。

③「田」，蓋誤，《釋文》作「丑」。

④「言」，單疏本作「有」。

惡得之？惡，於何也。○惡音烏，注同。得

之堤下，或曰，陽虎以解衆也。

六月，葬鄭獻公。

秋，齊侯、衛侯次于五氏。五氏，晉地。

秦伯卒。

冬，葬秦哀公。

十年，春，王三月，及齊平。平前八年再侵齊之怨。

夏，公會齊侯于頰谷。○頰，古協反，《左傳》作夾谷。

公至自頰谷。離會不致。雍曰：二國會

曰離，各是其所是，非其所非。然則所是之是未必是，所非之非未必非。未必非者，不能非人之真非，未必是者，不能是人之真是。是非紛錯，則未有是。是非不同，故曰離。離則善惡無在，善惡無在，則不足致之于宗廟。

何爲致也？危之也。危之則以地致何也？爲危之也。其危奈何？曰，頰谷之

會，孔子相焉。兩君就壇，兩相相揖。將欲行盟會之禮。○爲危，于僞反。相焉，息亮反，下「兩相」同。

壇，徒丹反，封土曰壇。齊人鼓譟而起，欲以執魯

君。羣呼曰譟。○鼓譟，素報反。呼，火故反。孔子

歷階而上，不盡一等，而視歸乎齊侯，階，會壇

之階。曰：「兩君合好，夷狄之民，何爲來

爲？」命司馬止之。兩君合會，以結親好，而齊人欲

執魯君，此無禮之甚，故謂之夷狄之民。司馬，主兵之官，

使禦止之。○合好，呼報反，注同。使禦，魚呂反。齊

侯逡巡而謝曰：「寡人之過也。」退而屬其

二三大夫曰：「夫人率其君與之行古人之

道，二三子獨率我而入夷狄之俗，何爲？」

屬，語也。夫人謂孔子也。齊人欲執魯君，是夷狄之行。

○逡，一句反。①屬，章欲反。夫人，音扶。語，魚呂反。

之行，下孟反。罷會，齊人使優施舞於魯君之

幕下。優，俳。施，其名也。幕，帳。欲嗤笑魯君。

○幕音莫。②俳，皮皆反。嗤，尺之反。孔子曰：

「笑君者罪當死。」使司馬行法焉，首足異門

①「一」，蓋誤，《釋文》作「七」。  
②「莫」下，《釋文》有「帳也」二字。



而出。齊人來歸鄆、讙、龜陰之田者，蓋爲此也。何休曰：「齊侯自頰谷歸，謂晏子曰：『寡人獲過於魯侯，如之何？』」晏子曰：「君子謝過以質，小人謝過以文。齊嘗侵魯四邑，請皆還之。」○讙，好官反。蓋爲，于僞反。因是以見雖有文事，必有武備。孔子於頰谷之會見之矣。○以見，賢徧反。

【疏】①一會之怒，三軍自降，若非孔子，必以白刃喪其膽核矣。敢直視齊侯，行法殺戮，故傳「於頰谷之會見之矣」。後世慕其風規，②欽其意氣者，忽若如是。毛遂之亢楚王、藺子之脅秦王，俱展一夫之勇，不憚千乘之威，亦善忠臣之鯁骨，是賢亞聖之義勇。

晉趙鞅帥師圍衛。

齊人來歸鄆、讙、龜陰之田。

叔孫州仇、仲孫何忌帥師圍郕。郕，叔孫氏邑。○郕音后。

秋，叔孫州仇、仲孫何忌帥師圍郕。

宋樂大心出奔曹。

宋公子地出奔陳。

冬，齊侯、衛侯、鄭游速會于安甫。安甫，地名。

叔孫州仇如齊。

宋公之弟辰暨宋仲佗、石彊出奔陳。辰爲佗所強，故曰暨。○暨，其器反。佗，大河反。彊，苦侯反。強，其丈反。

十有一年，春，宋公之弟辰，未失其弟也。③言辰未有失其爲弟之道，故書弟以罪宋公。

【疏】「未失其弟也」。○釋曰：案辰以前年出奔，離骨肉之義，今歲入邑，有叛國之罪。失弟之道，彰於經文，而曰未失，何也？解，公不能制御彊臣，以撫其弟，而使二卿脅以外奔，故著暨以表彊辭，稱弟以見罪，④罪在仲、石，亦可知矣。今而入國，兩子之情，非辰之意，書及而辨尊卑，⑤言弟以顯無失。然則自陳之力，力由二卿，入蕭之叛，專歸仲、石，故重發例以明無罪。

①「疏」，依釋例，「疏」下應標注疏文之起訖，並加「○釋曰」，疑脫。

②「規」，宋刻元修本、單疏本作「軌」。

③「宋公之弟辰未失其弟也」，阮校：「閩、監、毛本『辰』下衍『及仲佗石彊公子地自陳入于蕭以叛宋公之弟辰』二十字。」夏校：「疑此非衍，乃經、傳本序。」

④「稱弟以見罪」，《穀梁補注》作「稱弟以見無罪」。

⑤「而」，阮校：「單疏本作『以』。」

及仲佗、石彊、公子地，以尊及卑也。自陳，陳有奉焉爾。入于蕭以叛。蕭，宋邑。入者，內弗受也。以者，不以也。叛，直叛也。

夏，四月。

秋，宋樂大心自曹入于蕭。入蕭從叛人，叛可知，故不書叛。

冬，及鄭平。平六年侵鄭之怨。傳例曰：「盟不日者，渝盟惡之也。」取夫詳畧之義，則平不日者，亦有惡矣。蓋不能相結以信。○渝，羊朱反，變也。惡之，烏路反，下同。取夫，音符。

叔還如鄭莅盟。○還音旋。

十有二年，春，薛伯定卒。

夏，葬薛襄公。

叔孫州仇帥師墮郕。墮猶取也。陪臣專強，違背公室，恃城爲固，是以叔孫墮其城，若新得之，故云墮。墮猶取也。墮非訓取，言今但毀其城，則郕永屬己，若更取邑於他然。○墮，許規反，毀也。背音佩。

【疏】注「墮非訓取」。○釋曰：傳言「墮猶取也」，即其訓。而曰非者，何休難云：「當言取，不言墮。」

實壞耳，無取於訓詁。」①鄭君如此釋之，今經墮其爲義。②衛公孟彊帥師伐曹。

季孫斯、仲孫何忌帥師墮費。○費音祕。秋，大雩。

冬，十月，癸亥，公會齊侯盟于黃。

十有一月，丙寅，朔，日有食之。

公至自黃。

十有二月，公圍成。非國不言圍，③圍

成，大公也。以公之重而伐小邑，則爲恥深矣，故大公之事而言圍，使若成是國然。

【疏】注「以公」至「小邑」。○釋曰：案例國曰圍，今邑而言圍，則大都。大都則皆是國，而曰小邑何？解，經書公，明成非小，是故言圍。公，一國之貴重，成，三家之大邑。邑比於國爲細，擬公爲小，比於凡邑則大。

①「當言」至「訓詁」，《穀梁補注》引作「實取當言取，不言墮。墮實壞耳，無取於訓詁」。

②「其」，單疏本作「而」。

③「不」，原無，阮校：「石經、余本『國』下有『不』字。」今據補。

矣，故書曰圍。

公至自圍成。何以致？危之也。何

危爾？邊乎齊也。邊謂相接。

十有三年，春，齊侯次于垂葭。○葭音

加。

夏，築蛇淵圍。蛇淵，地名。○圍音又。

大蒐于比蒲。○比音毗。

衛公孟彊帥師伐曹。

秋，晉趙鞅入于晉陽以叛。以者，不以

者也。叛，直叛也。

【疏】「叛直叛也」。○釋曰：不解人而重發叛例

何？解，趙鞅自人己邑，不從外人。人者，內弗受也，以其無君命，於義不受。同書人之，非專不受，故但釋其叛非實叛，故下書歸明之。非叛而書叛，書叛非真叛也，故復發也。<sup>①</sup>

冬，晉荀寅、士吉射入于朝歌以叛。

○射，食夜反，又食亦反。<sup>②</sup>

晉趙鞅歸于晉。此叛也，其以歸言之，

何也？據叛惡而歸善。貴其以地反也。貴其

以地反，則是大利也？非大利也，許悔過

也。許悔過，則何以言叛也？以地正國

也。地謂晉陽也。蓋以晉陽之兵還正國也。《公羊傳》

曰：「逐君側之惡人。」以地正國，則何以言叛？

據是善事。其人無君命也。凱曰：「專入晉陽以興

兵甲，<sup>③</sup>故不得不言叛，實以驅惡而安君，則釋兵不得不言

歸。《春秋》善惡必著之義。」

薛弑其君比。○比，必履反，又毗志反。

【疏】「薛弑其君比」。○釋曰：不日月者何？

解，傳言剽不正，其日何？則庶子為君而被弑，則不日而月之。傳曰「諸侯時卒，惡之」，宜從此例。薛比書時，亦其惡也。

十有四年，春，衛公叔戌來奔。

晉趙陽出奔宋。○晉趙陽，《左氏》作衛趙陽。

二月，辛巳，楚公子結、陳公孫佗人帥

師滅頓，以頓子牂歸。○佗，徒河反，又如字。牂，

① 「故復發也」，單疏本作「故重發傳也」。阮校：「何校本作『故重復發傳也』。」

② 「又」，《釋文》作「或」。

③ 「兵甲」，阮校：「余本作『甲兵』。」

作郎反。

夏，衛北宮結來奔。

五月，於越敗吳于檣李。檣李，吳地。

○敗，必邁反。檣李，音醉。

吳子光卒。

公會齊侯、衛侯于牽。牽，地。○牽，去賢

反。

公至自會。

秋，齊侯、宋公會于洮。○洮，他刀反。

天王使石尚來歸脤。脤，祭肉。天子祭畢，以之賜同姓諸侯，親兄弟之國，與之共福。○脤，市軫反。

脤者，何也？俎實也，祭肉也。生曰脤，熟

曰臠。其辭石尚，士也。辭猶書也。○臠音煩，

本或作煩。何以知其士也？天子之大夫不

名，石尚欲書《春秋》，欲著名于《春秋》。諫曰：

「久矣！周之不行禮於魯也。請行脤。」貴

復正也。

【疏】「貴復正也」。○釋曰：從祀先公，前有失

正之文，於後言貴復正。今復正，前無失正之文，而曰貴

復正何？解，復正之文雖同，義須有異，天王不行禮於魯，失正矣。今由石尚而歸脤，美之，故曰「貴復正也」。

衛世子蒯聵出奔宋。○蒯聵，苦怪反，下五

怪反。

衛公孟彊出奔鄭。

宋公之弟辰自蕭來奔。稱弟，猶未失為弟之

行。○行，下孟反。

大蒐于比蒲。

【疏】「大蒐于比蒲」。○釋曰：文承秋下，注云

「城莒父」，云「無冬者，甯所未詳」。然則大蒐在秋，<sup>①</sup>秋則常事。常事不書，書之者何？解，<sup>②</sup>昭八年「秋，蒐于紅」，

傳曰「正也」，正所以譏不正，後比蒲大蒐失禮，因此見正。

今定公以十三年大蒐，秋事而於夏行之，失正，至此十四

年大蒐，書正以明前不正也。

邾子來會公。會公于比蒲。

城莒父及霄。無冬，甯所未詳。

【疏】注「無冬」至「未詳」。○釋曰：桓七年注云

「下無秋冬」，今不言下何？解，桓七年夏有人事，而秋冬

①「在」，原無，據單疏本補。

②「解」，原作「即」，據單疏本改。

二時不書，復無人事，故云下。今此上有秋，下有人事而無冬，故直云無冬。不言下，明冬宜在人事之上也。

十有五年，春，王正月，邾子來朝。

○朝，直遙反。

麋鼠食郊牛，牛死，改卜牛。不言所食，食非一處而至死。○麋音兮。處，昌慮反。不敬莫大焉。

定公不敬最大，故天災最甚。

【疏】「不敬莫大焉」。

○釋曰：凡鼠食牛，皆是不敬，而曰莫大何？

解，成七年「麋鼠食郊牛角」，「過有司也」，「改卜牛，麋鼠又食其角」，歸罪於君，皆道其所，傳明不敬之罪小。今牛體偏食，不敬之罪大也。

二月，辛丑，楚子滅胡，以胡子豹歸。

夏，五月，辛亥，郊。譏不時也。

壬申，公薨于高寢。高寢，官名。高寢，非正也。

正也。

【疏】「高寢非正也」。

○釋曰：重發傳何？解，

高者大名，嫌是路寢之流，故發傳明之。

鄭罕達帥師伐宋。

齊侯、衛侯次于渠蔭。渠蔭，地也。○蔭，

直居反。

邾子來奔喪。喪急，故以奔言之。

【疏】「喪急」至「言之」。

○釋曰：奔喪之制，日行百里，故傳言急，所以申匍匐之情也。

秋，七月，壬申，弋氏卒。妾辭也。不言

夫人薨。○弋氏，羊職反，哀公之母，《左氏》作姒氏也。

哀公之母也。

八月，庚辰，朔，日有食之。

九月，滕子來會葬。邾、滕，魯之屬國，近則來

奔喪，遠則來會葬。於長帥之喪，同之王者，書非禮。

○長，丁丈反。帥，所類反。

【疏】注「邾滕」至「屬國」。

○釋曰：將何據也？解，范答薄氏云：「屬國，非私屬，五國為屬，屬有長，曹、

滕、二邾、莒世屬服事我，故謂之屬。」○注「近則」至「非

禮」。○釋曰：若如此注意，以奔喪為禮，會葬為非。然

則王者之喪，諸侯會，出何文證？若以會葬非禮，何以范

例云會葬四？案經有三，范總云會葬禮何？解，傳言奔

喪喪急，不言非禮可知。諸侯自相會葬，傳無釋文，但釋

天子之會葬，云其志重天子之禮，又曰在鄙上，明其別於

諸侯。傳曰「周人有喪，魯人有喪。周人弔，魯人不弔」，

①「莒」，原無，據單疏本補。

周人責，魯人曰「吾君親之」，是以知王者之喪，諸侯親會之。范云四，四當爲三，古者四三皆積畫，字有誤耳。會葬，禮也。據釋天子之大夫來會葬，言者重天子之禮，故范例舉之，不謂皆是禮也。

丁巳，葬我君定公。雨，不克葬。葬既有日，不爲雨止，禮也。雨不克葬，喪不以制也。

戊午，日下稷，乃克葬。稷，晨也。下晨謂脯時。○爲，于僞反。稷如字，①《左氏》作晨。脯，布吳反。

【疏】「葬既有日」。○釋曰：重發傳何？解，頃熊夫人，今此人君，嫌禮異，故發傳以明之。且彼言日中，此言日下稷，彼言而，此言乃，文並不同。釋既不異，義體相似。

乃，急辭也，不足乎日之辭也。宣八年注詳矣。

【疏】注「宣八」至「詳矣」。○釋曰：范例云「克例有六」，則數何文以充之？解，鄭伯克段一，不克納二，雨不克葬，日中不克葬各二，②是謂四，通前二爲六也。

辛巳，葬定弋。○定弋，《左氏》作定姒。冬，城漆。

① 「字」下，《釋文》有「晨也」二字。  
② 「不」，原作「而」，據單疏本改。

# 監本春秋穀梁注疏哀公卷第二十

起元年，盡十四年

范甯集解 楊士勛疏

## 哀公

【疏】公名蔣，①定公之子，敬王二十六年即位。②十四年西狩獲麟，《春秋》終矣。二十七年薨，謚曰哀。《周書·謚法》：「恭仁短折曰哀。」

元年，春，王正月，公即位。

楚子、陳侯、隨侯、許男圍蔡。隨久不見者，衰微也。稱侯者，本爵俱侯，土地見侵削，故微爾。定六年鄭滅許，今復見者，自復也。○不見，賢徧反，下「復見」同。復，扶又反。

【疏】注「隨久」至「微也」。○釋曰：僖二十年冬

「楚人伐隨」以來，更不見經，將是衰微，不能自通於盟會故也。「本爵俱侯」者，隨本侯爵，自僖二十年見經，至今俱侯，盟更不為貶黜，但土地見侵削，故微爾。昭八年「楚師滅陳」，十一年「楚師滅蔡」，十三年諸侯會于平丘而復陳、蔡，故經書「蔡侯廬歸于蔡，陳侯吳歸于陳」，是有文見

復也。其許男，則定六年「鄭遊速帥師滅許，以許男斯歸」，其間更無歸文。今許男復見經者，明是許男自復。

驪鼠食郊牛角，改卜牛。

夏，四月，辛巳，郊。此該郊之變而道

之也。③該，備也。《春秋》書郊終於此，故於此備說郊之變。變謂郊非其時，或牲被災害。

【疏】「此該」至「之也」。○釋曰：郊自正月至于三月，郊之時也。三卜，禮之正。凡書郊皆譏。范例云：書郊有九，僖三十一年「夏，四月，四卜郊，不從，乃免牲，猶三望」，一也；宣三年「郊牛之口傷」，「改卜牛。牛死，乃不郊，猶三望」，二也；成七年「驪鼠食郊牛角」，「三也」；襄七年「夏，四月，三卜郊，不從，乃免牲」，四也；襄十一年「夏，四月，四卜郊，不從，乃不郊」者，五也；定公、哀公並有牲變，不言所食處，不敬莫大，二罪不異，并為一物，六也；定十五年五月郊，七也；成十七年「九月，用郊」，八也；及此年「四月，辛巳，郊」，九也。下傳云「子之所言」，至「道之何也」。然則據此而言，牛有傷損

①「公」上，單疏本有「哀」字。

②「二」，原作「三」，據單疏本改。

③「郊」，原無，阮校：「石經、余本『之』上有『郊』字，與《儀禮》經傳合。」今據補。

之異，卜有遠近之別，亦在其間。<sup>①</sup>

於變之中，又有言焉。於災變之中，又有可善而言者。

【疏】注「於災」至「言者」。○釋曰：郊牛日日展視其觚角，而知其傷，是展盡道矣。<sup>②</sup>即於災變之中，有可善而言者。但備災之道不盡，致此天災，而騷鼠食角，故書以譏之也。

騷鼠食郊牛角，改卜牛，志不敬也。郊牛日展觚角而知傷，展道盡矣。展道雖盡，所以備災之道不盡，譏哀公不敬，故致天變。○觚音糾，又音求。

郊，自正月至于三月，郊之時也。夏四月郊，不時也。五月郊，不時也。夏之始可以承春，以秋之末，承春之始，蓋不可矣。凱曰：「不時之中，有差劇也。夏始承春，方秋之末，猶爲可也。」○有差，初賣反。

【疏】注「不時」至「可也」。○釋曰：自正月、二月、三月，此三春之月，是郊天之正時也。若夏四月、五月以後，皆非郊月，如其有郊，並書以示譏。然則郊是春事也，如郊在四月、五月之中，則是以夏始承春，其過差少。若郊在九月之中，則是以秋末承春，其過極多，<sup>③</sup>則自五月

至八月，其間有郊，亦以承春遠近爲過之深淺也。

九月用郊。用者，不宜用者也。在成十七年。郊三卜，禮也。以十二月下辛卜正月上辛，如不從，則以正月下辛卜二月上辛，如不從，則以二月下辛卜三月上辛。所謂三卜也。鄭嗣曰：「謂下一辛而三也。」<sup>①</sup>求吉之道三，故曰禮也。」

【疏】注「鄭嗣」至「三也」。○釋曰：如嗣之意，以十二月下辛卜正月上辛日，爲郊之時，則於此一辛之上卜，不吉，以至二卜，不吉，以至三卜。求吉之道三，故曰禮也。

四卜，非禮也。僖三十一年、襄十一年皆四卜。五卜，強也。成十年五卜。

【疏】「四卜非禮也」。○釋曰：僖三十一年，以十二月下辛卜正月上辛，不從，則以正月下辛卜二月上辛，不從，則以二月下辛卜三月上辛，所謂「三卜，禮

①「間」，原作「明」，阮校：「毛本『明』作『間』，不誤。」今據改。

②「盡道」，單疏本乙倒。

③「極」，阮校：「何校本作『差』。」今按：單疏本同何校本。

④「下」，《穀梁補注》作「卜」。



也。今以三月以前不吉，更以三月下辛卜四月上辛，則謂四卜郊，非禮也。成十年以四月以前四卜不吉，又於四月下辛卜五月上辛，則五卜，強也，非禮可知。鄭嗣之意，亦以一辛之中卜至於四五月也。一辛之上三卜，禮也，四卜、五卜，非禮也。然則四卜云非禮，五卜變文云強者，四卜雖失，猶去禮近，容有過失，故以非禮言之。若至五卜，<sup>①</sup>則是知其不可而強爲之，去禮已遠，故以強釋之。

卜免牲者，吉則免之，不吉則否。牛

傷，不言傷之者，傷自牛作也，故其辭緩。宣三年「郊牛之口傷」，以牛自傷，故加「之」，言「緩辭」。○則否，方九反。全曰牲，傷曰牛，未牲曰牛，

其牛一也，其所以爲牛者異。已卜日成牲而傷之曰牛，未卜日未成牲之牛，二者不同。有變而不郊，故卜免牛也。已牛矣，其尚卜免之，何也？災傷，不復以郊，怪復卜免之。禮，與其亡也

寧有。於禮，有卜之與無卜，寧嘗有卜。<sup>②</sup>嘗置之上

帝矣，故卜而後免之，不敢專也。嘗置之滌官，名之爲上帝牲矣，故不敢擅施也。○滌，徒歷反。擅，市戰反。施，式氏反，又如字。卜之不吉，則如之何？不免。安置之？繫而待，六月上甲，

始庀牲，然後左右之。庀，具也。待具後牲，然後左右前牛，皆我用之，<sup>③</sup>不復須卜，已有新牲故也。《周禮》曰：「司門掌授管鍵，以啓閉國門」，「祭祀之生牲繫焉」。<sup>④</sup>然則未左右時，監門者養之。○庀，匹爾反。鍵，其展反，又其偃反。監，古銜反。子之所言者，牲之變也，而曰我一該郊之變而道之，何也？我以六月上甲始庀牲，十月上甲始繫牲，十一月、十二月牲雖有變，不道也。牲有變則改卜牛，以不妨郊事，故不言其變。

【疏】「子之」至「道也」。○釋曰：上言「子」者，<sup>⑤</sup>弟子問穀梁子之辭。「而曰我」者，是弟子述穀梁子自我之意。「我以六月」者，是穀梁子答前弟子之辭。「我以六月上甲始庀牲」，庀，具，猶簡擇，未繫之，待十月，然後始繫養。若六月簡訖以後有變，則七月、八月、九月上

①「至」，單疏本作「是」。

②「嘗有卜」，阮校：「余本『嘗』作『當』。」

③「皆」，阮校：「余本作『在』。」

④「生牲」，宋刻元修本及《周禮·司門》作「牛牲」。

⑤「者」，原作「曰」，阮校：「何校本『曰』作『者』。」今按：單疏本同何校本，據改。

甲皆可簡擇，故傳云「六月上甲始庀牲」，明自六月爲始，七月、八月、九月皆可簡牲。自十月繫之，有變則改卜，卜取吉者，十一月、十二月亦然，是繫之三月也。故傳云「十月上甲始繫牲，十一月、十二月牲雖有變，不道也」是也。「待正月，然後言牲之變」，周正是郊時之正，如其牛有變，然後言之，二月、三月亦然，重妨郊故也。

待正月，然後言牲之變，此乃所以該郊。至郊時然後言其變，重其妨郊也。十二月不道，<sup>①</sup>自前可知也。至正月然後道，則二月、三月亦可知也。此所以該郊，言其變道盡。

【疏】「此乃」至「該郊」。○釋曰：自六月上甲始庀牲，十月始繫牲，自十二月以前，牲雖有變不道，自正月然後云牲之變，乃不郊，卜免牲吉與不吉。如此之類，皆是該備郊事，言牲變之道盡悉也。

郊，享道也。貴其時，大其禮。其養牲，雖小不備可也。享者飲食之道。牲有變，則改卜牛，郊日已逼，庀繫之禮雖小不備，合時得禮，用之可也。○享，許丈反。子不忘三月卜郊，<sup>②</sup>何也？三月，謂十二月、正月、二月也。

【疏】注「三月」至「二月」。○釋曰：既言十二月下辛卜正月上辛，正月下辛卜二月上辛，二月下辛卜三月上辛，怪經不書此十二月、正月、二月之下郊，<sup>③</sup>故問之也。

郊自正月至于三月，郊之時也。有變乃志，常事不書。我以十二月下辛卜正月上辛，如不從，則以正月下辛卜二月上辛，如不從，則以二月下辛卜三月上辛，如不從，則不郊矣。意欲郊而卜不吉，故曰不從。郊必用上辛者，取其新潔莫先也。

秋，齊侯、衛侯伐晉。

冬，仲孫何忌帥師伐邾。

二年，春，王二月，季孫斯、叔孫州仇、仲孫何忌帥師伐邾，取漵東田。漵東未盡也。

及沂西田。沂西未盡也。漵、沂皆水名。邵曰：「以其言東西，則知其未盡也。」○漵東，火號反，又音郭。沂，魚依反。

①「十二」，《穀梁補注》作「十一」。今按：上傳云「十一月、十二月牲雖有變，不道也」，有「一」字是。

②「忘」，阮校：「石經、余本作『志』。」

③「卜」，原作「下」，據單疏本改。

癸巳，叔孫州仇、仲孫何忌及邾子盟于句繹。句繹，邾地。○句，古侯反。繹音亦。三人伐而二人盟，何也？各盟其得也。季孫不得田，故不與盟。○不與，音豫。<sup>①</sup>

夏，四月，丙子，衛侯元卒。

滕子來朝。○朝，直遙反。

晉趙鞅帥師納衛世子蒯聵于戚。鄭君曰：「蒯聵欲殺母，靈公廢之是也。若君薨，有反國之道，當稱子某，如齊子糾也。今稱世子，如君存，是《春秋》不與蒯聵得反立明矣。」江熙曰：「鄭世子忽反正有明文，子糾但於公子為貴，非世子也。」

【疏】注「蒯聵」至「廢之」。○釋曰：案定公十四年《左傳》云：「衛侯為夫人南子召宋朝，會于洮。大子蒯聵獻孟于齊，過宋野。野人歌之曰：『既定爾婁豬，盍歸吾艾豕。』」大子羞之，謂戲陽速曰：「從我而朝少君，我顧，乃殺之。」速曰：「諾。」乃朝夫人。夫人見大子，大子三顧，<sup>②</sup>速不進。夫人見其色，啼而走曰：「蒯聵將殺余。」公執其手以登臺，大子奔宋。是也。云「當稱子某」者，《公羊》云：「君在稱世子，君薨稱子某，<sup>③</sup>既葬稱子，踰年稱君。」范取《公羊》為說也。云「如齊子糾也」者，莊九年「九月，齊人取子糾殺之」是也。云「鄭世子忽反正有明文」者，桓十五年「鄭世子忽復歸于鄭」，<sup>④</sup>傳曰「反正

也」。然則鄭世子忽反正，《春秋》不非稱世子，則蒯聵稱世子，亦是反正不非之之限，是其子糾稱子某，但於公子之中為貴，謂是右滕之子，非世子，與鄭忽、蒯聵不同。如熙之意，則蒯聵合立，而輒拒父非是也。

納者，內弗受也。帥師而後納者，有伐也。何用弗受也？以輒不受也。以輒不受父之命，受之王父也。信父而辭王父，則是不尊王父也。其弗受，以尊王父也。甯不達此義。江熙曰：「齊景公廢世子，世子還國書篡。若靈公廢蒯聵立輒，則蒯聵不得復稱曩日世子也。稱蒯聵為世子，則靈公不命輒審矣。」此矛盾之喻也。然則從王父之言，傳似失矣。經云「納衛世子」，「鄭世子忽復歸于鄭」，稱世子明正也。明正則拒之者非邪。○信父，音申。篡，初患反。復，扶又反。曩，乃黨反。矛，五侯反，本又

① 「豫」，原作「像」，據《釋文》改。

② 「大子三顧」，原作「二顧」，單疏本作「大子三顧」。阮校：「『二』當作『三』。閩、監、毛本不誤。何校本此上有『大子』二字，與《左傳》合。」今據改。

③ 「某」，原作「其」，單疏本作「某」。阮校：「毛本『其』改『某』，是。」今據改。

④ 「子」，原無，據單疏本補。

作紆。<sup>①</sup>楯，常允反，又音允。拒音巨。邪也，似嗟反。

【疏】「信父」至「父也」。○釋曰：輒先受王父之命而有國，今若以國與父，則是申父也。若申父而辭王父，則是不尊父也。<sup>②</sup>何者？使父有違命之愆，故其不受，使父無違命之失，則尊父也。○注「齊景」至「書篡」。○釋曰：下六年「齊陽生入于齊。齊陳乞弑其君荼」，傳曰「陽生正，荼不正。不正則其曰君何也？荼雖不正，已受命矣」。此與莊九年「齊小白入于齊」同文，則稱名書入者，皆一辭也。然則蒯聵若已被廢，則當與陽生同文，稱衛蒯聵人戚，不得自稱曩日世子。○注「矛楯之喻也」。○釋曰：《莊子》云：「楚人有賣矛及楯者，見人來買矛，即謂之曰：『此矛無何不徹。』見人來買楯，則又謂之曰：『此楯無何能徹者。』」買人曰：「還將爾矛刺爾楯，若何？」然則矛楯各自言之，則皆善矣；若相對言之，則必有不善者矣。喻今傳文，輒若申父而辭王父，是不受父，則蒯聵違父為不善，若以鄭忽稱世子以明反正，則輒之拒父為醜行，亦是非不可並，故云「矛楯之喻也」。

秋，八月，甲戌，晉趙鞅帥師，及鄭罕達帥師，戰于鐵。鐵，衛地。○鐵，他結反。鄭師敗績。

冬，十月，葬衛靈公。七月葬，蒯聵之亂故

也。

【疏】注「七月」至「故也」。○釋曰：隱五年「夏，四月，葬衛桓公」，傳曰「月葬，故也」。月葬憂危最甚，不得備禮葬也。此月葬，故知有故也。彼注云「有祝吁之難故」，此則蒯聵之亂故也。

十有一月，蔡遷于州來。  
蔡殺其大夫公子駟。

三年，春，齊國夏、衛石曼姑帥師圍戚。此衛事也，其先國夏何也？子不圍父也。不繫戚於衛者，子不有父也。江熙曰：「國夏首兵，則應言衛戚。今不言者，辟子有父也。子有父者，戚繫衛，則為大夫屬于衛。子圍父者，謂人倫之道絕，故以齊首之。」○曼姑，音萬。辟音避。

【疏】注「戚繫」至「于衛」。○釋曰：諸侯有國，大夫有邑。大夫之邑，國君之有。若言圍衛戚，是戚繫

①「矛五侯反本又作紆」，《釋文》作「紆」，本又作矛，亡侯反。

②「尊父」，阮校：「毛本『父』上有『王』字，下『則尊父也』同。」

衛，<sup>①</sup>便是子之而圍父也，故以國夏爲首也。

夏，四月，甲午，地震。

五月，辛卯，桓宮、僖宮災。言及，則祖

有尊卑。解經不言及僖。由我言之，則一也。遠祖恩無差降如一，故不言及。

【疏】注「遠祖」至「言及」。○釋曰：凡言及者，

皆以尊及卑，等者不言及。若自祖言之，則有昭穆，昭尊可以及穆。若自我言之，則遠祖親盡，尊卑如一，故不言及。案《左氏》「孔子在陳，聞火，曰：『其桓、僖乎？』」言廟應毀而不毀，故天災也。

季孫斯、叔孫州仇帥師城啓陽。稱帥師，

有難。○難，乃旦反。

宋樂髡帥師伐曹。○髡，苦門反。

秋，七月，丙子，季孫斯卒。

蔡人放其大夫公孫獵于吳。宣元年「晉放

其大夫胥甲父于衛」，傳曰「稱國以放，放無罪也」。然則稱人以放，放有罪也。

冬，十月，癸卯，秦伯卒。

叔孫州仇、仲孫何忌帥師圍邾。

四年，春，王二月，庚戌，盜弑蔡侯申。

稱盜以弑君，不以上下道道也。以上下道道者，若衛祝吁弑其君完之類是。直稱盜，不在人倫之序。

【疏】注「以上」至「類是」。○釋曰：「祝吁弑其

君完」，隱四年經文。<sup>②</sup>祝吁稱國稱名，及言弑其君者，是下道。言弑其君，謂此死者，是其臣之君，而臣弑之，故以君臣上下道道之。今不稱名氏，直稱盜，盜是微賤。稱賤，不稱弑其君，<sup>③</sup>則此死者，非是盜者之君，則盜疏外無君，是不正人倫上下之序。

內其君而外弑者，不以弑道道也。襄七

年「鄭伯將會中國，其臣欲從楚，不勝其臣，弑而死」，「不使夷狄之民，加乎中國之君」，故曰「鄭伯髡原如會，未見諸侯。丙戌，卒于操」，是不以弑道道也。

【疏】「內其」至「道也」。○釋曰：猶尊內其君，

而疏外弑者，故不與疏外者，得弑君之道道之，故抑之爲盜。若鄭伯髡原實被臣弑，其書自卒，抑臣爲夷狄之民，亦是也。

①「是戚」，單疏本無。

②「祝吁」至「經文」，隱四年經文作「戊申衛祝吁弑其君完」。

③「君」，阮校：「何校本『君』下有『者』字。」今按：單疏本同何校本。

《春秋》有三盜：微殺大夫，謂之盜；

十三年冬，「盜殺陳夏區夫」是。○陳夏，戶雅反。區，烏

侯反。非所取而取之，謂之盜；定八年，陽貨取

寶玉大弓是。辟中國之正道以襲利，謂之盜。

即殺蔡侯申者是，非微者也。○辟中，音避。

【疏】「辟中」至「襲利」。○釋曰：辟中國之正

道，而行同夷狄，不以禮義為主，而微幸以求名利，若齊豹之類，故抑而書盜者也。襲，掩也。謂求利之心，不以禮義為意也。

蔡公孫辰出奔吳。

葬秦惠公。

宋人執小邾子。

夏，蔡殺其大夫公孫姓、公孫霍。

晉人執戎蠻子赤歸于楚。

城西郭。郭，郭也。○郭音孚。

六月，辛丑，亳社災。殷都于亳，武王克紂，

而班列其社于諸侯，以為亡國之戒。劉向曰：「災亳社，戒人君縱恣，不能警戒之象。」

【疏】注「殷都于亳」。○釋曰：《書·序》云「湯

始居亳，從先王居」，孔注云「契父帝嚳都亳，湯自商丘遷

焉，故曰從先王居」，又「盤庚五遷，將治亳殷」，①是都亳之事。

亳社者，亳之社也。亳，亡國也。亳即殷

也，殷都于亳，故因謂之亳社。亡國之社以為廟

屏，戒也。立亳之社於廟之外，以為屏蔽，取其不得通

天，人君瞻之而致戒心。

【疏】注「立亳」至「之外」。○釋曰：《周禮》「建

國之神位，左宗廟，右社稷」，彼謂天子諸侯之正社稷霜露者。《周禮》又云決陰事于亳社，明不與正同處。②明一在西，一在東，故《左氏》曰「問於兩社，為公室輔」是也。

其屋亡國之社，不得上達也。③必為之作

屋，不使上通天也。緣有屋，故言災。

秋，八月，甲寅，滕子結卒。

冬，十有二月，葬蔡昭公。不書弑君之賊，

而昭公書葬。既謂之盜，若殺微賤小人，不足錄之。

【疏】「冬十有」至「昭公」。○釋曰：諸侯時葬，

正也。今書月者以明危，亦見不葬而書葬者。《春秋》賊

①「又」，阮校：「毛本作『及』。」

②「正」，單疏本作「衆」。

③「上達」，宋刻元修本作「達上」。

不討則不書葬，若不書葬，則見賊不討。今書葬者，使若弑者實是盜，微賤小人，雖討訖不足錄。

葬滕頃公。○頃音傾。

五年，春，城毗。

夏，齊侯伐宋。

晉趙鞅帥師伐衛。

秋，九月，癸酉，齊侯杵臼卒。○杵，昌呂

反。

冬，叔遠如齊。<sup>①</sup>

閏月，葬齊景公。不正其閏也。閏月，附

月之餘日，喪事不數。○數，所主反。

【疏】注「閏月」至「不數」。○釋曰：案經書閏月葬者，年若數閏，則十三月，故書閏月葬，以見喪事亦不數之例。

六年，春，城邾瑕。

晉趙鞅帥師伐鮮虞。

吳伐陳。

夏，齊國夏及高張來奔。

叔還會吳于柎。○柎，注加反。

秋，七月，庚寅，楚子軫卒。○軫，之忍反。

齊陽生入于齊。

齊陳乞弑其君荼。不日荼不正也。○荼音

舒，又音徒，一音丈加反。

【疏】注「不日荼不正也」。○釋曰：隱三年「八月，庚辰，宋公和卒」，傳云「諸侯日卒，正也」。荼不日，是不正也。

陽生入而弑其君，以陳乞主之，何也？

不以陽生君荼也。其不以陽生君荼，何也？陽生正，荼不正，不正則其曰君，何

也？荼雖不正，已受命矣。已受命于景公而立，

故可言君。人者，內弗受也。<sup>②</sup>荼不正，何用

弗受？以其受命，可以言弗受也。先君已命

立之，於義可以拒之。陽生其以國氏，何也？取

國于荼也。何休曰：「即不使陽生以荼為君，不當去

① 「叔遠」，宋刻元修本及《左傳》、《公羊傳》經皆作「叔還」。

② 「弗」，阮校：「石經作『不』。下並同。」

公子，見當國也。又《穀梁》以爲國氏者，取國于荼。齊小白又不取國于子糾，無乃近自相反乎？「鄭君釋之曰：『陽生篡國，故不言公子。不使君荼，謂書陳乞弑君爾。』」荼與小白，其事相似，荼弑乃後立，小白立乃後弑，<sup>①</sup>雖然，俱篡國而受國焉爾。傳曰：「齊小白入于齊，惡之也」；「陽生其以國氏何？取國于荼也」。義適互相足，又何自反乎？子糾宜立，而小白篡之，非受國于子糾，則將誰乎？<sup>②</sup>○當去，起呂反。見當，賢徧反。糾，居黝反。惡之，烏路反。

【疏】注「荼殺」至「後殺」。○釋曰：案上六年經書「齊陽生入于齊。齊陳乞殺其君荼」，<sup>③</sup>傳云「陽生入而弑其君，以陳乞主之，何也？不以陽生君荼也」，是荼殺之後，陽生乃立。案莊九年夏「齊小白入于齊」，九月，齊人取子糾殺之。是小白立，乃後殺也。「義適互相足」者，莊九年傳云「小白入于齊，惡之」，則陽生入于齊，亦惡之。此年傳云「陽生其以國氏，取國于荼也」，則小白以其國氏，亦取國于子糾也。以義推之，適互相足，故鄭云「子糾宜立，而小白篡之，非受國于子糾，則將誰乎」是也。<sup>④</sup>

冬，仲孫何忌帥師伐邾。

宋向巢帥師伐曹。

七年，春，宋皇瑗帥師侵鄭。○緩，<sup>⑤</sup>于眷反。

晉魏曼多帥師侵衛。○曼音万。  
夏，公會吳于繒。○繒，在陵反。  
秋，公伐邾。

八月，己酉，入邾，以邾子益來。以者，不以者也。夫諸侯有罪，伯者雖執，猶以歸于京師。魯非霸王，<sup>⑥</sup>而擅相執錄，<sup>⑦</sup>故日人以表惡之。○擅，市戰反。惡，烏路反，傳及注同。

【疏】注「夫諸侯」至「于京師」。○釋曰：僖二十八年「晉人執衛侯，歸之于京師」，傳云「歸之于京師，緩辭也，斷在京師也」，是衛侯有罪，晉文伯者執之，猶以歸于京師之事。<sup>⑧</sup>○注「故日人以表惡之」。○釋曰：案范

①「弑」，阮校：「余本作『殺』。」

②「殺」，六年經作「弑」。

③「誰」，原作「許」，單疏本作「誰」。阮校：「監、毛本」

「許」改「誰」，與注合。今據改。

④「緩」，《釋文》作「瑗」。今按：經書「宋皇瑗」，則當爲「瑗」字。

⑤「王」，宋刻元修本作「主」。

⑥「錄」，《穀梁補注》作「獲」。

⑦「猶」，單疏本作「尔」，上屬。



例云：「僖二十八年三月，丙午，晉侯入曹，執曹伯畀宋人」，傳曰「入者，內弗受也。日入，惡入者也」。次惡則月。「據此日人與彼例同，故知「日人以表惡之」。

益之名，惡也。惡其不能死社稷。《春秋》

有臨天下之言焉，徐乾曰：「臨者，撫有之也。王者無外，以天下爲家，盡其有也。」

【疏】「春秋」至「言焉」。○釋曰：此下三者，皆以內外辭別之。王者則以海內之辭言之，即僖二十八年「天王狩于河陽」，<sup>①</sup>傳曰「全天王之行也」是也。王者微弱，則以外辭言之，即僖二十四年「天王出居于鄭」，傳曰「失天下也」是也。

有臨一國之言焉，諸侯之臨國，亦得有之，如王於天下。

【疏】「有臨」至「言焉」。○釋曰：此亦據內外言之，若宣九年「辛酉，晉侯卒于扈」，傳曰「其地，于外也。其日，未踰竟也」。既以內外顯地及日，是以一國言之。有臨一家之言焉。大夫臨家，猶諸侯臨國。

【疏】「有臨一家」至「焉」。○釋曰：家謂采地，若文元年「毛伯來錫公命」，定四年「劉卷卒」，其毛、劉皆采邑名，大夫氏采爲家。大夫稱家，是以一家言之也。

其言來者，有外魯之辭焉。非己內有，從外來者曰來。今魯侯身自以歸而曰來，是外之也。

【疏】其言「至」辭焉」。○釋曰：凡言來者，非己內有，從外始來，即「邾庶其以漆間丘來奔」是也。今書魯侯「以邾子益來」，而文與庶其正同，文切直者，有外魯侯之辭焉爾。

宋人圍曹。

冬，鄭駟弘帥師救曹。

八年，春，王正月，宋公入曹，以曹伯陽

歸。

吳伐我。

夏，齊人取譚及闡。宣元年傳曰：②「內不言取，言取，授之也，以是爲賂齊。」此言取，蓋亦賂也。魯前年伐邾，以邾子益來。益，齊之甥也，畏齊，故賂之。○及闡，尺善反。惡內也。歸邾子益于邾。侵齊故也。③○惡，烏路反。益之名，失國也。於王

①「狩于」，宋刻元修本、單疏本「狩」作「守」。阮校：「毛本「于」作「於」，何校本「狩」作「守」，與石經同。」

②「元」，原作「九」，阮校：「何校本「九」作「元」，是也。」今據改。

③「侵」，《穀梁補注》作「畏」。

法當絕故。

【疏】「益之名失國也」。○釋曰：經書「歸邾子益於邾」，則益得國。而云失國者，邾益不能死難，而從執辱，於王法而言，理當絕位。魯歸之，不得無罪，故書益之名，以明失國之故也。<sup>①</sup>

秋，七月。

冬，十有二月，癸亥，杞伯過卒。○過音戈。

齊人歸讜及闡。凱曰：「歸邾子，故亦還其賂。」

九年，春，王二月，葬杞僖公。

宋皇瑗帥師取鄭師于雍丘。雍丘，地也。

○雍，於用反。取，易辭也。以師而易取，鄭病

矣。以師之重，而宋以易得之辭言之，則鄭師將劣矣。

○易，以豉反。將，子匠反。

【疏】「以師而」至「鄭病矣」。○釋曰：凡書取，

皆易辭，今以鄭師之重，而今宋以易得之辭言之，鄭之將帥微弱矣。亡軍之咎，本由君不任其才，故為鄭國病患。<sup>②</sup>

夏，楚人伐陳。

秋，宋公伐鄭。

冬，十月。

十年，春，王二月，邾子益來奔。

公會吳伐齊。

三月，戊戌，齊侯陽生卒。

夏，宋人伐鄭。

晉趙鞅帥師侵齊。

五月，公至自伐齊。傳例曰：「惡事不致，公

會夷狄伐齊之喪，而致之何也？」莊六年「公至自伐衛」，傳曰「不致，則無以見公惡事之成也」，<sup>③</sup>將宜從此之例。

○以見，賢徧反。

【疏】注「傳例」至「不致」。○釋曰：襄十年「公

會晉侯」云云，「齊世子光會吳于柎」，傳曰「會夷狄不致，惡事不致」是也。云「傳曰不致，則無以見公惡事之成也」者，案莊公五年「公會齊人」云云「伐衛」，注云「納惠公朔」，「逆天王之命也」。六年「公至自伐衛」，傳曰「惡事不致，此其致，何也？」不致，則無用見公之惡事之成也」是也。此年二月，公會吳伐齊之喪，是惡事，宜不致而致，亦以見公惡事之成也。

① 「故」，單疏本作「惡」。

② 「患」，單疏本作「惡」。

③ 「以見公惡」，阮校：「何校本『以』作『用』，『公』下有『之』字，與莊六年傳合。」

葬齊悼公。

衛公孟彊自齊歸于衛。○彊，苦侯反。

薛伯夷卒。

秋，葬薛惠公。

冬，楚公子結帥師伐陳。

吳救陳。

十有一年，春，齊國書帥師伐我。

夏，陳轅頗出奔鄭。○頗，破何反。

五月，公會吳伐齊。甲戌，齊國書帥師

及吳戰于艾陵，齊師敗績。獲齊國書。與華

元同義。艾陵，齊地。○艾，五蓋反。

【疏】注「與華元同義」。○釋曰：宣二年「宋華

元帥師，及鄭公子歸生帥師，戰于大棘，宋師敗績。獲宋華元」，傳曰：「獲者，不與之辭也。言盡其衆，以救其將也。以三軍敵華元，華元雖獲，不病也。」是與此同義。

秋，七月，辛酉，滕子虞母卒。

冬，十有一月，葬滕隱公。

衛世叔齊出奔宋。

十有二年，春，用田賦。古者九夫爲井，十六井爲丘。丘賦之法，因其田財，通共出馬一匹，牛三頭。今別其田及家財，各出此賦。言用者，非所宜用。○別，如字，又彼列反。

【疏】「用田賦」。○釋曰：古者一丘之田，方十六井，一百四十四夫。軍賦之法，因其田財，通出馬一匹，牛三頭。今乃分別其田及家財，各令出此賦，則一丘之田，出馬二匹，牛六頭，故曰「用田賦」，言非所宜用也。謂之田賦者，古者但賦其家財，今又計田貢，故曰田賦也。○注「古者九夫」至「爲丘」。○釋曰：案《周禮·小司徒》職：「九夫爲井，四井爲邑，四邑爲丘，四丘爲甸。」然則井方一里，九夫；邑方二里，四井，三十六夫；丘方四里，十六井，百四十四夫；甸方八里，六十四井，五百七十六夫。軍賦之法，丘出馬一匹，牛三頭；甸出長轂一乘，馬四匹，牛十二頭，甲士三人，步卒七十二人。此甸八里，據實出賦者言之，其畔各加一里，治溝洫者。《司馬法》城方十里，出革車一乘者，通計治溝洫者言之，其實一也。今指解經云「用田賦」者，是丘之賦，故云「九夫爲井，十六井爲丘」也。然經即云「用田賦」，而使丘民，②以成

①「即」，單疏本作「只」。

②「而使丘民」，單疏本作「而知使丘民者」。阮校：「何

校本「而」下有「知」字。」

元年「作丘甲」，民盡作甲，則知此「用田賦」，亦令一丘之民用田賦也。宣十五年「初稅畝」，則計畝以稅。所稅畝，十畝稅其一，此則通公田什一，而不畝計，故彼言稅，而此言賦也。○注「丘賦」至「三頭」。○釋曰：凡丘賦之法，因其民之所受，公田什一，及私家之財，通融共出馬一匹，牛三頭。以一丘之民，共出此賦，以家財為主，故曰丘賦。今又分別其所受公田，各令出此馬牛之賦，故曰「用田賦」也。《論語》曰：「哀公云：『二，吾猶不足，如之何其徹也？』」即此田財並賦之驗也。

### 古者公田什一，<sup>①</sup>用田賦，非正也。古者

五口之家，受田百畝，為官田十畝，是為私得其什，而官稅其一，故曰「什一」。周謂之徹，殷謂之助，夏謂之貢，其實一也，皆通法也。今乃棄中平之法，而田財並賦，言其賦民甚矣。○為稅官，于僞反。稅，舒銳反。夏謂，戶雅反。

### 【疏】「古者公」至「非正也」。○釋曰：凡受農

田，皆私田百畝，公田十畝。但由公田私田，皆公家所受，故總曰「公田什一」，則以田之什一及家財，而出馬牛之賦，是其正也。今魯用田與財，各出馬牛之賦，<sup>②</sup>非正也。

○注「古者五」至「百畝」。○釋曰：《周禮·小司徒》云：「上地家七人，可任也者家三人。」鄭注曰：「一家男女七人以上，則授之以上地，所養者衆也。男女五人以下，則授之以下地，所養者寡也。正以七、六、五為率者，<sup>③</sup>有夫有婦，然後為家，自二人以至於十人為九等，<sup>④</sup>則七、

六、五為其中也。出老者一人，<sup>⑤</sup>其餘彊弱相半，此其大數也。」然則《周禮》七人、五人、六人三等，范唯言「五口之家，受田百畝」，指下等言之。其實六人、七人亦受田百畝，與《周禮》不異也。「為官田十畝」者，受田百畝之外，又受十畝以為公田，是為私得其十，而官稅其一，故《漢書·食貨志》「井方一里」，<sup>⑥</sup>是為九夫，八家共之，各受私田百畝，公田十畝，是為八百八十畝。餘二十畝為廬舍，則家得二畝半，凡家受田一百十二畝半也。今傳言「公田什一」者，舉其全數，據出稅言之。「周謂之徹，殷謂之助，夏謂之貢，其實一也」者，出《孟子》文。彼云滕文公問為國於孟子，孟子對曰「夏后氏五十而貢，殷人七十而助，周人百畝而徹，其實皆什一」是也。然三代受畝悉皆什一，則夫皆一百一十畝。夏后政寬，計其五十畝，而貢五畝於

①「古者」，阮校：「閩本上有『傳』字，監、毛本脫。」

②「各」，阮校：「何校本作『並』。」今按：單疏本同何校本。

③「七六五」，阮校：「何校本『七、六、五』作『七人、六人、五人』，與鄭注《周禮》合。」

④「十人」，單疏本作「九人」。

⑤「出」，原無，據單疏本補。

⑥「食」，原作「殖」；「方」，原作「田」，據單疏本改。

公，殷人計其七十畝，而助十畝於公；①周人盡計一百一十畝，而徹十畝於公。徹者通也。什一而稅，爲天下通法，故《詩》云「徹田爲糧」是也。「皆通法」者，《孟子》云：

「重之于堯舜，大桀小桀，輕之於堯舜，大貉小貉。」②什一而稅，頌聲作則。「什一而稅，堯舜亦然，是爲通法也。貢起堯舜，則古者公田什一，冠堯舜之時，明此什一之法也。范說不與先儒同，其先儒皆云什一者，十中稅一耳。

夏，五月，甲辰，孟子卒。孟子者，何也？昭公夫人也。其不言夫人，何也？

諱取同姓也。葬當書姓，諱故亦不書葬。○取如字，又七住反。

【疏】注「書當」至「書葬」。○釋曰：莊二十二年

「葬我小君文姜」，經書其氏，卒又稱夫人而書葬。今孟子卒雖不稱夫人，准弋氏應書葬。不言者，知諱同姓，故范例夫人薨者十，而書葬者十。夫人之道，從母儀。即桓公夫人文姜一，莊公夫人哀姜二，僖公之母成風三，文公之母聲姜四，宣公之母頃熊五，成公之母穆姜六，成公之嫡夫人齊姜七，襄公之母定姒八，昭公之母歸氏九，哀公之母定弋十。③十者並書葬，其隱公夫人從夫之讓，昭公夫人諱同姓，二者皆不書葬也。

公會吳于橐皋。橐皋，某地。○橐，章夜反，一音託。

秋，公會衛侯、宋皇瑗于鄆。鄆，某地。

○鄆音云。

宋向巢帥師伐鄭。

冬，十有二月，螽。○螽音終。

十有三年，春，鄭罕達帥師，取宋師于岳。○岳，五咸反。取，易辭也。以師而易取，

宋病矣。

【疏】「取易辭」至「病矣」。○釋曰：上九年宋皇

瑗取鄭師，今鄭罕達取宋師，其事正反，嫌宋爲人所報，非宋之病，故重發以同之。

夏，許男成卒。

公會晉侯及吳子于黃池。及者，書尊及卑也。黃池，某地。

【疏】注「及者」至「卑也」。○釋曰：隱二年傳云「會者，外爲主焉爾」。今言「公會晉侯」，則晉爲主於黃池

①「十」，單疏本作「七」。

②「大」，原作「人」，據宋刻元修本、單疏本改。

③「弋」，原作「戈」，定公十五年：「弋氏卒。哀公之母也。辛巳，葬定弋。」則此當爲「弋」。據改。

而公往會之。既以晉侯爲主，會無二尊，故言及以卑吳也。則與桓二年范注云「會盟言及，別內外也。尊卑言及，序上下也」亦同。何者？外吳而尊晉，別內外，序上下也。

黃池之會，吳子進乎哉！遂子矣。進

遂稱子。吳，夷狄之國也，祝髮文身。祝，斷也。

文身，刻畫其身以爲文也。必自殘毀者，以辟蛟龍之害。○祝，之六反。斷音短。辟音避。蛟音交。

【疏】注「文身」至「之害」。○釋曰：荆、楊之域，厥土塗泥，人多游泳，故刻畫其身，以爲蛟龍之文，與之同類，以辟其害。

欲因魯之禮，因晉之權，而請冠端而

襲。襲，衣。冠端，玄端。

【疏】「欲因魯」至「而襲」。○釋曰：魯是守文之國，禮儀之鄉，晉執中國之權，爲諸侯盟主，故吳子欲因之而冠。必欲因之者，以鄭伯髡原欲從中國，而被殺于鄆，吳子亦恐臣子不肯變從，故因魯之禮，因晉之權，然後群臣嚮化，以魯禮天下共依，晉權諸侯所服故也。是以《明堂》說魯云「天下以爲有道之國，天下資禮樂焉」是也。云「請冠端而襲」者，請著玄冠玄端而相襲。○注「襲衣冠端玄端」。○釋曰：吳俗祝髮文身，衣皮卉服，不能衣冠相襲。今請加冠于首，身服玄端，則衣冠上下共相掩襲，

故云襲衣也。《詩》云：「其軍三單。」彼《毛傳》云：「三單相襲。」彼謂三單前後爲相襲，則此衣冠上下亦爲相襲也。玄端者，謂玄端衣而端幅制之，即諸侯視朝之服也。諸侯視朝之服，緇布衣，素積裳，緇玄一也。

其藉于成周，藉謂貢獻。

【疏】注「藉謂貢獻」。○釋云：貢謂土地所有，以獻于成周。若《禹貢》「齒革羽毛」，「納錫大龜」，「惟金三品」之類，著於藉錄，以爲常職，故知藉謂貢獻也。

以尊天王，吳進矣。吳，東方之大國

也，累累致小國以會諸侯，以合乎中國。累累，猶數數也。○累累，如字。數，所角反。

【疏】注「累累猶數數」。○釋云：東方之國，吳爲最大。吳舉，小國必從，會吳于柤、于道、于繒、于池之類，<sup>①</sup>積其善事，故言數數致小國，<sup>②</sup>以合乎中國也。

吳能爲之，則不臣乎？言其臣也。吳進矣。王，尊稱也。子，卑稱也。辭尊稱而居

①「池」，阮校：「何校本「池」上有「黃」字。」

②「故言數數致小國」，原作「故言數」○數致小國」，宋刻元修本無「○」，空闕一字。今按：上文云「累累猶數數」，則「數數」連用。據此刪「○」。

卑稱，以會乎諸侯，以尊天王。吳王夫差曰：「好冠來！」孔子曰：「大矣哉！夫差未能言冠而欲冠也。」不知冠有差等，唯欲好冠。○尊稱，尺證反，下同。夫差音扶，下初佳反。

【疏】「王尊稱也，子卑稱也」。○釋曰：自黃池前，吳常僭號稱王，是其尊稱。今去僭號而稱子，是其卑稱也。○注「不知冠而差等」。○釋曰：冕有旒數不同，則冠亦有差等之別。吳爲子爵，其冠之飾必不得與公侯同等，但未知若爲差等爾。

楚公子申帥師伐陳。

於越入吳。

秋，公至自會。吳進稱子，又會晉侯，故致也。

【疏】注「吳進」至「致也」。○釋曰：襄十年傳曰「會夷狄不致」。致會者，一以吳進稱子，二又爲公會晉侯，以此二事之故致之爾。

晉魏曼多帥師侵衛。

葬許元公。

九月，螽。

冬，十有一月，有星孛于東方。不書所孛之星，而曰東方者，旦方見孛，衆星皆沒故。○孛音佩。

【疏】注「不書」至「方者」。○釋曰：文十四年「有星孛于北斗」，昭十七年「有星孛于大辰」，彼皆言所孛之星。此不言所孛之星，直言東方者，彼北斗大辰未沒之時有故，得言所孛之星，此則旦明之時，方乃見孛，其東方常見之星，並以沒盡，故不言所孛之處星也。

盜殺陳夏區夫。傳例曰：「微殺大夫謂之盜。」○區夫，烏侯反。

十有二月，螽。

十有四年，春，西狩獲麟。杜預曰：「孔子曰：『文王既沒，文不在茲乎？』此制作之本旨。又曰：『鳳鳥不至，河不出圖，吾已矣夫。』斯不王之明文矣。」夫《關雎》之化，王者之風，《麟之趾》，《關雎》之應也。然則斯麟之來，歸於王德者矣。《春秋》之文，廣大悉備，義始於隱公，道終於獲麟。○狩，手又反。不出，如字，又赤遂反。矣夫音扶。不王，于況反，下「王德」同。雖，七余反。之應，于敬反。

【疏】注「杜預」至「本旨」。○釋曰：《論語》云：「文武之道，未墜於地，在人。」文王既沒，其爲文之道，實不在我身乎？孔子既言「文武之道在我身」，孔子有制作之意。《中庸》云，有其德無其位，不得制作，有其位無

① 「而」，上注文作「有」。

其德，而不得制作。孔子雖懷聖德，而道不王，故有制作之志而不爲也。○注「又曰」至「文矣」。○釋曰：凡聖人受命，而必鳳鳥至，河出圖，洛出書，故孔子曰：「鳳鳥不至，河不出圖，吾已矣夫。」言己無瑞應，道終不王，故云「斯不王之明文矣」。○注「關雎之化，王者之風」。○釋曰：子夏《詩序》云：「《關雎》之化，王者之風。」言后妃有《關雎》之德也。○注「麟之趾，關雎之應也」。○釋曰：《詩序》文。言后妃有《關雎》之德，爲王者之風，故感麟來應之，以見其趾。趾，足也。○注「然則斯麟之來，歸于王德者矣」。○釋曰：由后妃有《關雎》之化，爲王者之風，故致得麟來應之。然則孔子有王之德，故亦感得麟來應之，故斯應麟之來，歸于王德者，謂孔子也。○注「春秋」至「獲麟」。○釋曰：其《詩·周南》則始於《關雎》篇，終於《麟趾》，故《春秋》之文，亦義始於隱公之道，終於獲麟，乘之以十二，約之以周典。《詩》云「誰將西歸，懷之好音」，示有贊於周道，故著西狩獲麟，言道備之驗也。

**引取之也。**言引取之，解經言獲也。傳例曰：

「諸獲者，皆不與也。」故今言獲，麟自爲孔子來，魯引而取之，亦不與魯之辭也。○爲，于僞反。

【疏】注「傳例」至「不與也」。○釋曰：宣二年大棘之戰，鄭公子歸生獲宋華元，傳曰：「獲者，不與之辭也。」上十一年艾陵之戰，吳獲齊國書，范云「與華元同

義」，是諸獲皆不與之辭也。今言獲麟者，欲言此麟自爲孔子有王者之德而來應之，魯引而取之，亦不與魯之辭也。必使魯引取之者，天意若曰以夫子因《魯史記》而脩《春秋》故也。然則孔子脩《春秋》，乃獲麟之驗也。

**狩地不地，不狩也。非狩而曰狩，大獲麟，故大其適也。**適猶如也，之也。非狩而言狩，大得麟，故以大所如者名之也。且實狩當言冬，不當言春。

【疏】「狩地」至「適也」。○釋曰：桓四年春「公狩于郎」，莊四年「冬，公及齊人狩于郕」，①是狩皆書地。今不書地，則非狩也。非狩而曰狩者，大得此驗，故以大其所如者名之。○注「實狩」至「言春」。○釋曰：案桓四年傳云「春日田，夏日苗，秋日蒐，冬日狩」是也。

**其不言來，不外麟於中國也。其不言有，不使麟不恒於中國也。**雍曰：「中國者，蓋禮義之鄉，聖賢之宅，軌儀表於遐荒，道風扇於不朽。麒麟步郊，不爲暫有。鸞鳳栖林，非爲權來。雖時道喪，猶若不喪。雖麟一降，猶若其常。」②鸛鵒非魯之常禽，蜚蜮

①「于」，原作「而」，阮校：「閩、監、毛『而』改『于』，是也。」今據改。

②「其常」，阮校：「余本作『有恒』。」



非祥瑞之嘉蟲，故經書其有，以非常有，此所以所貴于中國，<sup>①</sup>《春秋》之意義也。」○道喪，息浪反。鸛音權，又音劬。鵠音欲。鵠音或。

【疏】注「鸛鵠」至「嘉蟲」。○釋曰：昭二十五年經書「有鸛鵠來巢」，莊二十九年經書「秋，有蜚」，莊十八年經書「秋，有蜚」，傳皆曰「一有一亡曰有」是也。<sup>②</sup>○注「所以」至「中國」。○釋曰：麒麟一致，不為暫有，雖時道喪，猶若不喪。如此為文，是所以取貴于中國，而王道頌盛，麟鳳常有，此則《春秋》之意然也。

① 「所貴」，《穀梁補注》作「取貴」。

② 上「一」字，原無，據宋刻元修本補。

# 春秋穀梁經傳補注

〔清〕

鍾文烝

撰

駢宇騫

校點

駢驊



# 目錄

校點說明	一
序	一
范氏元序	五
論經	九
論傳	二〇
略例	三一
春秋隱公經傳第一補注第一	一
春秋隱公經傳第一補注第二	三四
春秋桓公經傳第二補注第三	五九
春秋桓公經傳第二補注第四	八五
春秋莊公閔公經傳第三補注第五	一〇八
春秋莊公閔公經傳第三補注第六	一三三
春秋莊公閔公經傳第三補注第七	一五四
春秋莊公閔公經傳第三補注第八	一七四

春秋僖公經傳第四補注第九	一九六
春秋僖公經傳第四補注第十	二一八
春秋僖公經傳第四補注第十一	二四五
春秋僖公經傳第四補注第十二	二六六
春秋文公經傳第五補注第十三	二八五
春秋文公經傳第五補注第十四	三〇八
春秋宣公經傳第六補注第十五	三三三
春秋宣公經傳第六補注第十六	三五〇
春秋成公經傳第七補注第十七	三六七
春秋成公經傳第七補注第十八	三九一
春秋襄公經傳第八補注第十九	四一〇
春秋襄公經傳第八補注第二十	四三八
春秋昭公經傳第九補注第二十一	四六八
春秋昭公經傳第九補注第二十二	四九八
春秋定公經傳第十補注第二十三	五二三
春秋哀公經傳第十一補注第二十四	五五六
律句四十韻	五八二



## 校點說明

《春秋》是我國歷史上魯國的一部編年體的歷史著作。從現存的本子來看，上起魯隱公元年（前七二二），下迄魯哀公十四年（前四八一），歷十二代君主，共計二百四十餘年。其內容主要記載了春秋時期這二百四十多年中魯國及其他諸侯國的國家大事。

### 一

由於《春秋》記事十分簡略，意義也隱晦，每敘一事，往往只有寥寥幾個字，很不容易理解，於是為之詮釋講解的書便應運而生。據《漢書·藝文志》記載，當時解說《春秋》的傳就有五家：《左氏傳》、《公羊傳》、《穀梁傳》、《鄒氏傳》、《夾氏傳》。《漢

書·藝文志》還說「鄒氏無師，夾氏未有書」，意思是說《鄒氏傳》沒有人把它傳下來，《夾氏傳》連成文的書都沒有，實際上傳下來的只有《左氏傳》、《公羊傳》、《穀梁傳》三種。由於師傳的不同，所以《春秋》三《傳》內容的側重點也各異。《左氏傳》作者主要是根據大量的材料來補充、甚至訂正《春秋》的脫漏和錯誤，間或有說明「《春秋》書法」的，但為數極少，這也是過去今文學派認為《左氏》不傳《經》的理由。《公羊傳》、《穀梁傳》則是以解釋《春秋》經文的「微言大義」和「《春秋》書法」為主，敘述史事的極少。所謂「微言大義」和「《春秋》書法」，說穿了就是《公羊傳》、《穀梁傳》的作者利用解釋《春秋》經文來宣揚自己的政治主張，其中有些內容為二《傳》作者各逞胸臆，有些解釋也未必合乎《春秋》本旨。如《春秋》經文隱公元年「元年春王正月」六字，本為編年體史書記時的普通用語，而三《傳》的解釋就大不相同。從字數來看，《左氏傳》七十一字，《公羊傳》一百九十五字，《穀梁傳》最長，為二百二十二字。從

內容來看，《左氏傳》解釋經文僅用了「不書即位，攝也」六個字。《公羊傳》解釋經文的文字將近《左氏傳》的三倍，除說明「大一統」的觀念外，還有所謂「子以母貴，母以子貴」的原則等，文字拖沓，難以卒讀。《穀梁傳》解釋經文的文字比《公羊傳》還長，講所謂「《春秋》成人之美，不成人之惡」，「《春秋》貴義而不貴惠，信道而不信邪。孝子揚父之美，不揚父之惡」等，廢話極多，史事極少。可見《公》、《穀》二傳的所謂「微言大義」也未必就是大義，更未必合乎《春秋》的本旨。宋人葉夢得曾經指出：「《公羊》、《穀梁》傳義不傳事，是以詳於經而義未必當。」正切中《公》、《穀》二傳的通病。

## 二

《春秋穀梁經傳補注》是清末《春秋》學研究著作中較有影響的一部。據作者鍾文烝《自序》，該書動筆於道光二十五年（一八四五），咸豐三年（一八五三）成初稿，到咸豐九年才初步定稿，後又幾經修

改，直到同治七年（一八六八）才算全部脫稿。前後歷時二十餘年，可見用力之勤。鍾文烝，《清史稿》本傳云：「字子勤（《清史列傳》云：字殿才），嘉善人。道光二十六年舉人，候選知縣。於學無所不通，而其全力尤在《春秋》。因沉潛反覆三十餘年，成《穀梁經傳補注》二十四卷。其書網羅衆家，折衷一是。其未經人道者，自比於梅賾之辨偽、陳第之談古韻，略引其緒，以待後賢。文烝兼究宋、元諸儒書，書中若釋禘祫、祖禩、謚法以及心志不通、仁不勝道者以道受命等，皆能提要挈綱，實是求是。」鍾氏在《春秋穀梁經傳補注自序》中云：「然而斯義也，左氏、公羊不能道，獨穀梁子稱述而發明之。」《穀梁傳》者，《春秋》之本義也。」其《序》又云：「文烝九歲、十歲時，先君子親以三《傳》全文授讀，備承庭訓，兼奉慈箴。後來，博搜諸家書，見而記，記而疑，其甚疑者則時時往來於心，不能自己。年將三十，始知《穀梁》源流之正，義例之精。數年之間，所見漸多，頗有所得。用是不揣樸昧，詳爲之注，存豫

章之元文，擷助教之要義。繁稱廣引，起例發凡，敷暢簡言，宣揚幽理。條貫前後，羅陳異同。典禮有徵，詰訓從朔。辭或旁涉，事多創通。竊謂穀梁解《春秋》似疏而密，甚約而該。《經》固難知，《傳》亦難讀，學者既潛心於茲，又必熟精他經，融貫二《傳》，備悉周、秦諸子及二千年說者之得失，然後補苴張皇，可無遺憾。以予淺學，蓋未之逮，唯曰實事求是，而盡心平心則庶幾矣。」漢魏以來，注《穀梁》者有尹更始、唐固、孔演、江熙等十餘家，自晉范甯《集解》行後，諸家皆廢。此後又有不少學者為《穀梁傳》作注疏，如孫覺、葉夢得、侯康、許桂林、鍾文炆、柳興恩、廖平、柯劭忞等，但唯鍾氏《春秋穀梁經傳補注》能兼採漢學、宋學，同時對范甯《集解》也有所補充，可以說是目前能看到的有關《穀梁傳》注本中較好的一種。

鍾氏在《春秋穀梁經傳補注·論傳》中云：「鄭君論三《傳》曰：『左氏善於禮，公羊善於讖，穀梁善於經。』案：左氏言禮未必盡當，圖讖起於哀、平，乃

附合公羊家說為之，鄭評二《傳》，竊所未安，唯「穀梁善經」一語則不可易。《墨子》曰：「夫辯者，將以明是非之分，審治亂之紀，明同異之處，察名實之理，處利害，決嫌疑焉。摹略萬物之然，論求群言之比，以名舉實，以辭抒意。」文炆為此書，頗有志乎此數語，而要以「穀梁善經」一語為準。」這也是鍾氏對《穀梁傳》的基本認識，也是他撰寫《穀梁補注》的指導思想。他於《論經》中又云：「《傳》稱夫子曰『君子之於物，無所苟而已。石鵠且猶盡其辭，而況於人乎？故五石六鵠之辭不設則王道不亢矣』。又曰『梁亡，鄭棄其師，我無加損焉，正名而已矣』。《春秋》始元終麟，止是正名而盡其辭，以明王道，此直揭全書本旨也。隱無正，唯元年有正，《傳》曰『謹始也』，所以正隱也。桓無王，唯元年有王，《傳》曰『謹始也』，所以治桓也，此特標開宗要義也。開宗之義即冒全書，故孟子以《春秋》為亂後之一治，謂之天子之事，而引夫子知我罪我之言也。正名盡辭，以為之綱，正隱治桓，以弁其首，而左氏之三體



五例，公羊之三科九旨，皆不足言矣。」對《經》、《傳》的「微言大義」，鍾氏就是在上述指導思想下進行闡述的。當然鍾氏的《補注》也並非全襲漢代今文經學家的思想和方法，在名物訓詁等方面也吸取了清代古文經學派的一些較好的做法。如：《穀梁傳》桓三年云：「冕而親迎，不已重乎？」《范注》只云：「冕，祭服。」而鍾氏《補注》則廣徵博引，論說了不同時代不同等級所用的冕的形制、顏色等。莊元年《補注》下說「性」條，更是博採衆家之說，洋洋二千五百餘言。鍾氏在《補注》中也有對范甯《集解》補充及糾正者，如隱六年《傳》云：「齊侯盟艾。」《注》云：「艾，魯地。」《補注》則云：「艾，當云齊地。」鍾說近是。又如桓二年《傳》云：「以是知君之累也。」《范注》云：「累，謂從也。」《補注》則云：「注非也。『累』之正字本作『纍』，省作『累』。《戰國策》『纍』、『累』通用。《玉篇》『纍』字，有力僞切一音，云『延及也』。又曰：『累，同上。』《廣韻》曰：『累，緣坐也。』『緣』與『延』同義。王逸《楚辭注》：『纍，緣

也。』《毛詩傳》：『纍，蔓也。』緣、蔓皆延也。《傳》言「君之累之」者，謂督欲弑君，延坐及於孔父，以致先死也。《補注》對《傳》、《范注》未能下按斷者，則兼採諸家之說，羅列於後，請「學者擇焉」。如哀公十二年春「用田賦」下，桓公三年「父，字謚也」下皆採取這種方法，這也是注釋古書的一種科學態度。除上述之外，《補注》中還有「選異」一項，專門校勘三傳經文之異同，鍾氏的態度也很客觀，很少妄下按斷。如遇到今古文兩派不同意見時，鍾氏也很少以自己所崇尚的今文學派為是，如桓公六年春正月經文「寔來」二字，公、穀二《傳》皆訓為「是來」，左氏訓為「實來」，鍾氏在《補注》案語中云：「《觀禮》曰『伯父實來』，鄭君注：『今文『實』作『寔』。』《左傳》曰『鞏伯實來、子皮實來、印段實往。』《左氏》書，古文也。杜讀從之，說亦可通。但今文家訓『是』，自有所受，不可輒改。《毛詩》『寔命不同』，《傳》云：『寔，是也。』《韓詩》作『實』，云『有也』，此二訓之異。」儘管鍾氏偏於今文經學，但他在這裏把兩家對「寔」字的

解釋如實地擺了出來，其態度還是比較公允的。當然鍾氏的《補注》有些也未能超越今古文學派的門戶之見，有的甚至違背科學。如哀公十三年十一月《傳》云「有星孛于東方」，孛即彗星的一種，也是圍繞太陽運行的一個天體，它的出現也和其他太陽系的行星一樣，是有一定規律的。而鍾氏《補注》卻云：「今人惑於荒外新法，改九重之稱，增四七之宿，謂彗孛亦可以術推，實蕩且妄。張衡能作器械地震，而今不能，則術也不精矣。夫日食之道甚著，聖人猶不憑術，況其他乎？」他還認為「星孛于東方」為「天之示人」，這才是「實蕩且妄」的說法，我們今天應當以科學的態度對待。

### 三

鍾氏《春秋穀梁經傳補注》付梓後有光緒二年（一八七六）鍾氏信美室刊本，其後又有南菁書院刊本（後收入《續皇清經解》內）、中華書局《四部備要》本（據南菁書院《續經解》本校刊）、商務印書館《國

學基本叢書》本。這次校點，我們採用鍾氏信美室刊本為底本，以南菁書院刊本為參校本。對於《穀梁傳》原文的斷句，我們一依鍾氏理解為準。對於《補注》中的引文，我們儘量尋找原書進行了核對，凡有錯誤之處，我們都做了校正，並一一寫出校記。對於鍾氏節引或有意改寫的引文，如非內容牴牾，一般逕從其舊，不加改正。對於書中的避諱字，均予回改，異體字統一改為通行字。此外，《補注》卷首原有《序》、《論經》、《論傳》、《略例》、范氏《原序》幾項內容，這次整理，對它們的排列次序做了一些調整，即將范氏《原序》移至鍾《序》之後。由於我們在整理時已將避諱字一一回改，新排的版面格式也與信美室刊本不同，所以將原《略例》中的第六條「凡經、傳中聖諱字、廟諱三字皆敬缺筆。經、傳外諸應敬避者，或缺筆，或改寫，若以他字代則方匡其外。至私諱，水部、木部各一字，亦缺筆，在經不缺筆，慎辨也」及第七條「凡傳皆連於經，經傳一條，第二行以後皆下一字一條，畢乃提行；無傳之經，每

條提行，便覽也」兩條全部刪去。原書卷末除附有《律句四十韻》、《四言一首》外，尚有《書後》、《再書後》兩篇，該兩篇為鍾氏門人所撰，其內容與本書關係不大，所以也逕刪去。此外，原刻本間有「眉批」，為不影響新排版面，這次一律將書中「眉批」置於相應的正文之下，並加【眉批】二字，以示區別。

校點工作，難度較大，囿於學力識見，《補注》點校中必定還存在一些這樣那樣的缺點和錯誤，懇請讀者賜予批評指正。

校點者 駢字騫 駢 驛

## 序

魯之《春秋》，魯所獨也。孔子之《春秋》，孔子所獨也。魯所獨者，王禮所在，其史法較諸國爲備，故石、尚欲書《春秋》，當時以爲重。孔子所獨者，是非二百四十二年之中，脩其辭以明其義，子游、子夏不能贊一辭，改一字，故梁、鄭正其名，石鵠盡其辭，正隱治桓，皆卓然出於周初典策之上。夫梁、鄭之事，舊文也，而名有所必正，則其加損舊文者可知矣。石鵠之事，微物也，而辭有所必盡，則大焉者可知矣。正隱治桓，揭兩字於卷首，則全書悉可知矣。然而斯義也，左氏、公羊不能道，獨穀梁子稱述而發明之。

實爲十一卷，大指總要之處，推之千八百事，無所不通。故《穀梁傳》者，《春秋》之本義也。蓋嘗論之，聖人既作《春秋》，書於二尺四寸之策，其義指數千，弟子口受之，自後遞相授受，錄以爲傳，則穀梁之與左氏、公羊宜若無大異者。而漢博士言「左氏不傳《春秋》，實以其書專主記事，不若二家純論《經》義」。二家之中，公羊當六國之亡，穀梁去孔子近，則見聞不同。公羊五傳至其玄孫，當漢孝景時，始著竹帛。穀梁作《傳》，親授荀卿，則撰述亦不同。公羊爲齊學，穀梁乃魯學，則師承又不同。今觀《穀梁》「隕霜不殺草」之《傳》，據韓非書，乃夫子答哀公問《春秋》之語，而《公羊》無之。《穀梁》引尸子、公子啟、蘧伯玉、沈子之外，有稱「傳曰」者十，「傳」者，七十子所記，其來甚古，《儀禮·喪服傳》亦有此例，而《公羊》又無之。

《舊傳》與《喪服傳》所引，《舊傳》非必說《春秋》、說《喪服》之專書，而皆出七十子。《喪服傳》出七十子之後，或云子夏作，非也。《毛詩序》亦非子夏自作，有引高子語，當與公羊同時。以公羊氏所未聞，明穀梁氏之近古，以《儀禮傳》之可信，明《春秋傳》之得真，知其爲《春秋》之本義無疑也。《左氏》、《公羊》之失甚多，就其最淺著者，如《左氏》於仲子之贈，以爲桓母未死而豫贈；誤紀子伯爲紀子帛，則以君爲臣；《左氏》亦以臣先於君，其義不安，故於襄十六年叔老會鄭伯、晉荀偃之《傳》釋之曰：「爲夷故也。」杜注、孔疏以爲「諸侯之大夫與鄭伯尊卑皆平」是也。又於僖二十九年《傳》曰：「卿不會公、侯，會伯、子、男可也。」皆是曲爲彌縫，以申成臣得先君之說。誤尹氏爲君氏，則內外男女皆失其實。開卷之初，其謬如是。《公羊》妄意曹伯爲有罪，則曰甚惡也，又不能言其惡，則曰不可以一罪言也。妄意盟宋再出豹爲殆諸侯，則曰衛石惡在，是惡人之徒也。妄意西宮爲宮寢之宮，又不

敢決言三宮之制，則曰以有西宮亦知諸侯之有三宮也。凡若此類，第在事實、人名、禮制之間，亦不及《穀梁》遠，何論其他矣。

漢世，三《傳》並行，大約宣、元以前則《公羊》盛，明、章以後則《左氏》興，而《穀梁》之學頗微。江左中興，妄謂《穀梁》膚淺，不足立學，相沿至唐初，謂之小書，而《穀梁》之學益微。苟非有范甯、徐邈闡明於前，楊士助輩續述於後，則《穀梁傳》之在今日，幾何不爲十六篇《書》、三家《詩》之無徵不信哉？吾於此歎唐人義疏之功大也。大曆以降，經學一變，前此說《春秋》者，皆說三《傳》，主於一而兼其二，未有自我作故去取唯欲者。啖助、趙匡、陸淳之書出，而兩宋孫復、劉敞、孫覺、程子、葉夢得、胡安國、陳傅良、張洽之徒繼之，元之黃澤、趙汭用功尤深，又踵而詳之，於是三家之書各不成家，而《春秋》之說

滋亂，至於今未已也。然而風氣日開，智慧日出，講求益密，義理益詳，則亦自有灼然不惑之說。故啖助謂《穀梁》意深；陸淳謂斷義不如《穀梁》之精；孫覺謂以三家之說校其當否，《穀梁》最爲精深；葉夢得謂《穀梁》所得尤多；胡安國謂義莫精於《穀梁》；蔡元定謂三《傳》中道理，《穀梁》及七八分；某

氏《六經奧論》謂解《經》莫若《穀梁》之密。而乾、道中，浦江鄭綺遂著《穀梁合經論》三萬言，惜不可見矣。清興，李文貞公光地變通朱子之學以治群經，其論《春秋》曰：「三《傳》好，《穀梁》尤好。」迨後惠士奇父子倡古學於東南，亦云「論莫正於《穀梁》」。其專宗《穀梁》者，溧水王芝藻而後亦頗有人，而書皆不行。《四庫》附《存目》有王芝藻《春秋類義折衷》十六卷，載其自序謂：「《左傳》多不可信，《公羊》亦多繆戾，惟《穀梁》猶不失聖門之舊。」又謂《公羊》襲取《穀梁》書續

爲之」。鎮江柳氏有《穀梁傳學》，海州許桂林有《穀梁時月日釋例》，道光中，阮元皆爲之序。許書今有刻本，取其一條。竊以國家二百年來經籍道盛，宜有專門巨編發前人所未發者，且以范注之略而舛也，楊疏之淺而厯也，苟不備爲補正，將令穀梁氏之面目精采永爲左氏、公羊所掩，謂非斯文之闕事乎哉？

文烝年九歲、十歲時，道光丙戌、丁亥。先君子親以三《傳》全文授讀，備承庭訓，兼奉慈箴。考諱棠，縣諸生，先母氏奚。後來，博搜諸家書，見而記，記而疑，其甚疑者則時時往來於心，不能自己。年將三十，始知《穀梁》源流之正，義例之精。數年之間，所見漸多，頗有所得，用是不揣樸昧，詳爲之注，存豫章之元文，擷助教之要義。繁稱廣引，起例發凡，敷暢簡言，宣揚幽理。條貫前後，羅陳異同。典禮有徵，詁訓從朔。辭或旁涉，事多創通。

竊謂穀梁解《春秋》似疏而密，甚約而該。《經》固難知，《傳》亦難讀，學者既潛心於茲，又必熟精他經，融貫二《傳》，備悉周、秦諸子及二千年說者之得失，然後補苴張皇，可無遺憾。以予淺學，蓋未之逮，唯曰實事求是，而盡心平心則庶幾矣。詹體仁語真德秀居官莅民之道曰「盡心平心」，實亦讀書要法。夫不得於心則不得於言，趙岐之拙，王弼之巧，皆失之不明。朱子曰：「解書難得分曉，趙岐《孟子》拙而不明，王弼《周易》巧而不明。」李鼎祚、衛湜之浩博，又苦於不斷，予期於明且斷而已矣。乙巳迄癸丑歲稟立，己未歲始有定本，直題《補注》，無取異名。《疏》卷二十，今二十有四。《左氏》、《公羊》之《經》異者具列《經》下，並證明之。別爲《論經》、《傳》各若干條，冠書首焉。咸豐九年己未夏五月乙未嘉善鍾文烝朝美氏自序。

自後又脩飾暢獮之，而紀之以詩，癸亥之三月也。又六歲，增易又以千百計，然後疑滯疏漏漸漸免矣。夫學欲多也，思欲專也，取群書以治一書者，其道無以易此也。予討論百家之解，稽合四部之言，所謂思之思之，鬼神教之，蓋有之矣。所謂天下之理，眩於求而真於遇，蓋有之矣。敢自謂多且專乎哉？抑亦有二十餘年心力之勤焉，於是乎又記。時同治七年戊辰七月七日。

## 范氏元序

昔周道衰陵，乾綱絕紐，禮壞樂崩，彝倫攸斁，弑逆篡盜者國有，淫縱破義者比肩，是以妖災因釁而作，民俗染化而遷。陰陽爲之愆度，七耀爲之盈縮，川岳爲之崩竭，鬼神爲之疵厲。故父子之恩缺則《小弁》之刺作，君臣之禮廢則《桑扈》之諷興，夫婦之道絕則《谷風》之篇奏，骨肉之親離則《角弓》之怨彰，君子之路塞則《白駒》之詩賦。天垂象，見吉凶，聖作訓，紀成敗，欲人君戒慎厥行，增脩德政。蓋誨爾諄諄，聽我藐藐，履霜堅冰，所由者漸。四夷交侵，華戎同貫。幽王以暴虐見禍，平王以微弱東遷。征伐不由天

子之命，號令出自權臣之門，故兩觀表而臣禮亡，朱干設而君權喪，下陵上替，僭逼理極，天下蕩蕩，王道盡矣。孔子觀滄海之橫流，迺喟然而歎曰：「文王既沒，文不在茲乎？」言文王之道喪，興之者在己。於是就大師而正《雅》、《頌》，因魯史而脩《春秋》，列《黍離》於《國風》。齊王德於邦君，列於《風》而謂之王，亦其舊也，夫子因之耳。所以明其不能復《雅》，政化不足以被群后也。劉向《列女傳》云，平王之後，周與諸侯無異，即《孟子》所謂《詩》亡然後《春秋》作。於時則接乎隱公，故因茲以託始。杜預以爲平王，東周之始王，隱公，讓國之賢君，其時相接，故《春秋》始隱，范所本也。《史記》平王三年，惠公即位，至四十九年入春秋。陸淳《集傳纂例》孝公二十五年，犬戎殺幽王。惠公三年，平王東遷。此啖助、趙匡之說，與《史記》不同。沈括云不知啖、趙得於何書，王應麟引吳仁傑《鹽石新論》謂出何休《公羊音訓》。錢儀吉云何氏爲《春秋》專家之學，其言必有所受，非誤也。陸又引趙云《春秋》始隱公，一



則因平王之遷，二則賢隱之讓。陳岳云建篇首隱，所以崇讓。該二儀之化育，贊人道之幽變，舉得失以彰黜陟，明成敗以著勸誡，拯頹綱以繼三五，鼓芳風以扇遊塵。舊解以正樂爲芳風，淫樂爲遊塵。又或善之顯著者，惡之煩碎者。一字之褒，寵踰華袞之贈；片言之貶，辱過市朝之撻。德之所助，雖賤必申；義之所抑，雖貴必屈。故附勢匿非者，無所逃其罪；若輩。潛德獨運者，無所隱其名。若公弟叔肸。信不易之宏軌，百王之通典也。先王之道既弘，麟感化而來應，《穀梁》家皆以爲麟應《春秋》而至，與《左氏》舊說，《公羊》孔衍本同，與諸《公羊》家，《史記》、杜預皆異。因事備而終篇，故絕筆於斯年。《公羊》曰：「備矣。」《元命苞》云：「始於元，終於麟，王道成也。」成天下之事業，定天下之邪正，莫善於《春秋》。《春秋》之《傳》有三，而爲《經》之旨一，臧否不同，褒貶殊致，蓋九流分而微言隱，異端作而

大義乖。左氏以鬻拳兵諫爲愛君，此事非《春秋》經。文公納幣爲用禮，穀梁以衛輒拒父爲尊祖，不納子糾爲內惡，公羊以祭仲廢君爲行權，妾母稱夫人爲合正。以兵諫爲愛君，是人主可得而脅也；以納幣爲用禮，是居喪可得而婚也；以拒父爲尊祖，是爲子可得而叛也；以不納子糾爲內惡，是仇讐可得而容也；二事《補注》詳之。范誤，傳不誤。以廢君爲行權，是神器可得而闕也；以妾母爲夫人，是嫡庶可得而齊也。《公羊》又美齊襄爲賢者，比宋襄於文王。黃仲炎以爲誤天下後世不淺。若此之類，傷教害義，不可得強通者也。凡傳以通經爲主，經以必當爲理，夫至當無二，而三《傳》殊說，庸得不棄其所滯，擇善而從乎？注中偶有之，要當兼取二家，而斷以本傳。既不俱當則固容俱失，若至言幽絕，擇善靡從，庸得不並舍以求宗，據理以通經乎？此已開啖、趙先

聲，然注中似此者尚少。雖我之所是，理未全當，安可以得當之難而自絕於希通哉？而漢興以來，瓌望碩儒，各信所習，是非紛錯，準裁靡定，故有父子異同之論，劉向主《穀梁》，劉歆主《左氏》。石渠分爭之說。甘露元年，召名儒大議殿中，平《公》、《穀》同異。廢興由於好惡，武帝尊《公羊》，宣帝好《穀梁》。盛衰繼之辯訥，董仲舒治《公羊》，江公治《穀梁》。江公訥。斯蓋非通方之至理，誠君子之所歎息也。《左氏》豔而富，其失也巫；《穀梁》清而婉，其失也短；文簡耳，非短也。其義實視二《傳》爲密。《公羊》辯而裁，其失也俗。若能富而不巫，清而不短，裁而不俗，則深於其道者也。故君子之於《春秋》，沒身而已矣。孫覺極取此語。升平之末，歲次大梁，先君北蕃迴軫，頓駕于吳，晉穆帝升平五年，甯父汪爲安北將軍，徐兗二州刺史。其十月，以罪免爲庶人，屏居吳郡。是年歲在辛酉。乃帥門生故吏，門生，同門後

生，故吏，謂昔日君臣，江、徐之屬。我兄弟子姪，甯自謂。及謂從弟邵三子泰、雍、凱。研講六籍，次及三《傳》。《左氏》則有服、杜之注，案：范注無引服者。《公羊》則有何、嚴之訓，嚴氏《章句》，時尚未亡，何則用顏氏本，范《注》引之。釋《穀梁傳》者雖近十家，皆膚淺末學，不經師匠。江左中興，荀崧奏請立《公》、《穀》博士。詔許立《公羊》。云《穀梁》膚淺，不足立博士，<sup>①</sup>由此數家末學誤之也。辭理典據，既無可觀，又引《左氏》、《公羊》以解此《傳》，文義違反，斯害也已。范亦多無可觀，又其以二《傳》般亂本書者亦往往有，故知解《經》難，故知何、杜不可及。於是乃商略名例，范別爲略例百餘條。敷陳疑滯，博示諸儒同異之說。旻天不弔，大山其頽，汪卒當在簡文之世。匍匐墓次，死亡無日，日月逾邁，跂及視息，乃與二三學士及諸子

①「立」，中華書局點校本《晉書·荀崧列傳》作「置」。

弟各記所識，并言其意。業未及終，嚴霜夏墜，從弟彫落，謂邵。二子泯沒，謂雍、凱。天實喪予，何痛如之？今撰諸子之言，各記其姓名，名曰《春秋穀梁傳集解》。《晉書》云：「沈思積年，爲之集解。其義精審，爲世所重。」此當在豫章免郡後。凡解古書，集衆家記姓名者，何晏、李鼎祚之屬專記前人者也，范氏兼記同時人及其子弟者也，裴駰、李善之屬又推及所引他書之注者也。文烝附范書爲《補注》，兼用三例，記姓名者三百餘焉。

## 論經

《傳》稱夫子曰「君子之於物，無所苟而已。石鵠且猶盡其辭，而況於人乎？故五石六鵠之辭不設則王道不亢矣」。又曰「梁亡，鄭棄其師，我無加損焉，正名而已矣」。《春秋》始元終麟，止是正名而盡其辭，以明王道，此直揭全書本旨也。隱無正，唯元年有正，《傳》曰「謹始也」，所以正隱也。桓無王，唯元年有王，《傳》曰「謹始也」，所以治桓也。此特標開宗要義也。開宗之義即冒全書，故孟子以《春秋》爲亂後之一治，謂之天子之事，而引夫子知我罪我之言也。正名盡辭，以爲之綱，正隱治桓，以弁其首，而左氏

之三體五例，公羊之三科九旨，皆不足言矣。

李光地曰：「三代學校之教，《詩》、《書》、《禮》、《樂》四術而已，自夫子贊《周易》，脩《春秋》，於是二書稍見於世。此朱子說也。文烝案：《易傳》不必夫子自作，下注論之。故記禮者名爲六經，而莊周之徒頗知其意者亦往往並述焉。」今案：《禮記》經解述孔子之言曰：「其爲人也，屬辭比事，《春秋》教也。」屬者，屬合之。比者，比次之。《春秋》之義，是非非，皆於其屬合、比次、異同、詳略之間見之，是其本教也。趙汴云：「《春秋》有筆有削，與述而不作者事異。《荀子》論夫子事曰：『一家得，周道舉。』楊倞注曰：『一家得，謂作《春秋》。周道舉，謂刪《詩》、《書》，定《禮》、《樂》。』文烝案：刪《詩》、《史記》文。刪《詩》、《書》讖緯文。自高弟如游、夏尚不能贊一辭，苟非聖人爲法以教人，使考其異同之故以求之，則筆削之意何由可見乎？」

此屬辭比事所以爲《春秋》之教，不得與五經同也。」莊周之言曰：「《春秋》以道名分。」又曰：「《春秋》經世，先王之志，聖人議而不辯。」道名分者，正名以順言，順言以成事。名之必可言，言之必可行也。名由於分，故曰名分，推其本，則《孟子》云：「所性分定。」又推其本，則《大戴禮·本命》云：「分於道，謂之命。形於一，謂之性。」議而不辯者，假事以明義，推見以至隱。議之甚詳，而其文則但爲記事之文也。李光地《論語正名章說》云：「夫子脩《經》，不過使其言之順理，然先儒以爲制事之權衡，揆道之模範，蓋周公之禮樂在焉。而又爲孔子之刑書，皆不離乎書法，抑揚輕重，婉直微顯之間而得之。」趙沅云：「《春秋》存策書之大體，而假筆削以行權，有不書，有變文，有特筆，有日月之法，而歸於辭從主人，皆所謂議而不辯者也。」

《孟子》曰：「王者之迹熄而《詩》亡，《詩》亡然後《春秋》作，晉之《乘》，楚之《檮杌》，魯之《春秋》，一也。其事則齊桓、晉文，其文則史。孔子曰：『其義則丘竊取之矣。』」此言《春秋》以義爲重也，《公羊》述孔子之言曰：「其辭則丘有罪焉爾。」《公羊》本作「詞」字，依《說文》當作「𠄎」，此正字也，今通用「辭」字。此又言《春秋》以辭爲重也。其實義即是辭，辭即是義。《說文》解「𠄎」字曰：「意內而言外。」義者內之意，辭者外之言。《公羊》所述即《孟子》所述，而《史記》引孔子曰「《春秋》以道義」亦同旨也。是故君子之脩《春秋》，脩其辭以取其義也。此揚雄《法言》所謂「說理者莫辯乎《春秋》」，李軌注曰：「屬辭比事之義。」文烝案：《春秋》議而不辯者，邵子所謂錄實事而善惡形於其中也，於文不辯，於理則辯矣。故《左傳》亦曰：「微而顯，婉而辨。」而非其事與文之謂也。泥於其

事，溺於其文，左氏所以失也。即其辭而明其義，穀梁所以得也。公羊亦近之，而文多意少，或不知而強爲之說，故未盡善也。

《左傳》昭二年，晉韓宣子聘於魯，觀書於大史氏，見《易象》與《魯春秋》，曰：「周禮盡在魯矣。吾乃今知周公之德與周之所以王也。」案：《易·繫辭》傳言：「《易》之興也當殷之末世，周之盛德，當文王與紂之事。」《左傳》又載衛祝佗語，魯公初封，分之祝，宗、卜、史，備物典策。杜預以典策爲春秋之制，而賈逵解《周禮》句云：「史法最備，然則於《易》見周之所以王，而亦可見周禮於春秋，見周禮而即見周公之德也。」孔穎達《正義》解「周公之德」二語最分明，而於周禮句未盡其意。案：禮者，治世之大名，古人每通言之，故《易象》、《魯春秋》可觀周禮；夏時坤乾，可觀夏、殷之禮。孟仲子說《周頌》「維天之命」則曰「美周之禮」。而《周官經》稱《周禮》，自劉歆已

然。《禮記·明堂位》曰：「魯王禮也，天下傳之久矣，君臣未嘗相弑也，禮樂刑法政俗未嘗相變也。」王禮即周禮，其未嘗相弑相變，則謂雖相弑《明堂位》本作「殺」字，古書凡「弑」字皆作「殺」也。說詳隱四年。而不言弑，君殺大夫，雖相變而其文不直不盡，亦史法之一端也。君子脩《春秋》，以史法爲經法而例立，葉西謂：

夫子所本之史即韓宣子所見者，杜預不知聖人因史作《經》，非爲魯國脩史，於是以韓子所見爲周之舊典禮經，於夫子所本者則以爲赴告策書，諸所記注，多違舊章，故刊而正之。即此一語，見杜氏受病之處。於是有變史例以爲例者，於是有自變其例以爲變例者，此其正名盡辭以當王法，豈不允備乎哉？夫例者義而已矣，其字古祇作「列」，見《禮記·服問》，訓爲「等比」，說禮服說律不能外是，而《春秋》家亦用之。《服問》引《傳》曰：「臯多而刑五，喪多而服五，上附下附列也。」鄭君曰：「列，等比

也。」徐邈：「音例。」程子曰：「大率所書事同則辭同，後人因謂之例。然有事同而辭異者，蓋各有義，非可以例拘。」此言最切當，所謂非可例拘者，今所謂變例是也。白居易云：「明則有凡例，幽則有微旨。」洪興祖云：「《春秋》本無例，學者因行事之迹以爲例，猶天本無度，治曆者即周天之數以爲度也。」並與程子語相發明。嘗竊謂夫子自言七十而從心所欲，不踰矩，從，依舊讀爲「縱」。《春秋》之書，事事有其矩，事事從心而爲之，不易變易，相因相成，欲求《春秋》義例者，當知斯意。然則其說如之何？曰《穀梁》備矣。胡承諾謂「三《傳》各有義例，皆不敢以私意亂聖法」是也。又謂「學者不必較量異同」，非也。

《春秋》十一卷，千八百餘事，萬六千五百餘言，《公羊疏》引《春秋》說云一萬八千字。【眉批】：

「《經》字萬六千五百五十有奇，《公羊》多百五十有奇。」義指弘多，科條周委，至精至深，至纖至悉。王充《論

衡》云：「孔子意密，《春秋》義纖。」猶周公制作禮樂之書，無鉅無細，無不備舉。劉勰《文心雕龍》論《儀禮》云：「禮以立體，據事制範，「制」，舊誤作「制」。章條纖曲，執而後顯。」而凌廷堪作《釋例》，具言同中之異，異中之同，先聖後聖，其揆一也。子曰：「禮儀三百，可勉能也，威儀三千則難也。」《春秋》之難讀，正如此。此之謂作；

《孟子》。此之謂游，夏不能贊一辭，《文選》注引《史記》。改一字；《公羊疏》引《春秋說》。此之謂其義竊取；此之謂見素王之文，《漢書·董仲舒傳》。明素王之道，《說苑》。立素王之法；《左傳正義》引賈逵序。此之謂微；《荀子》。此之謂推見以至隱；《史記》。此之謂議而不辯；此之謂約而不速；《荀子》。即杜預云「辭約義微」，趙匡云「辭簡義隱」是也。此之謂能繫心於微而致之著；《春秋繁露》。此之謂約其文辭而指博；《史記》。此之謂殺史見極，平易正直；《後漢書·班

彪傳》引《傳》曰。此之謂立義創意，眇思自出於胸中。《論衡》。統而論之，大氏明於辨是非而嚴於正名分，本之以智，約之以禮，智崇禮卑，故其制作侔天地。「智崇禮卑」四字包括萬理。

唐之中葉，啖、趙、陸始自名其學，而大致猶無變乎古，韓文公愈爲儒者宗，亦言聖人作《春秋》，深其文辭。至宋諸儒，因伯沖之書，益出新意，程伯子亦重陸書。皆未有言《春秋》不過直書其事者，唯朱子言之，學者惑焉。夫使《春秋》不過隨事直書，別無書法，則一良史優爲之矣。何以游、夏不能贊一辭？何以齊、魯師儒遞有授受？何以《孟子》謂之作？謂之亂後之一治？何以《荀子》謂其微？謂其約而不速？豈一切皆不足信邪？陸龜蒙復友生書云：「《春秋》，大典也。舉凡例而褒貶之，非周公之法所及者，酌在夫子之心，凡例本周公，用杜預說。」

故游、夏不能措一辭。若區區於敘事，則魯國之史官耳，孰謂之《春秋》哉？」陸氏此論，實不可易矣。程子謂《春秋》大義易見，其微辭隱，義爲難知。愚以爲劉歆言「夫子沒而微言絕，七十子卒而大義乖」，二語必有所本。《春秋》微言也，大義在其中，而弟子口受之，今其遺文即《穀梁傳》也。微言者，議而不辯之謂，作《傳》辯之而大義出矣。伊川語大概近是。朱文公於此《經》固自云未學，又云終不能自信於心，又云此《經》簡奧，立說雖易，貫通爲難。聖人之言，平易中有精深處，則亦未嘗以直書之說爲定，且自高弟黃榦已不謂然矣。今正無容苟同焉耳。黃氏云：「其間亦有曉然若出於微意者。」

聖人不空作，其作《經》，以爲典法也。故如衛、齊惡君臣同名之屬，無關筆削者，亦論其義，以詔後世，家鉉翁謂之因事垂法是



矣。學者當存此意求之，庶幾可以弗畔。

《春秋》以義修辭，不以記事爲重，徐邈於重耳卒下論之曰：「事仍本史而辭有損益。」又曰：「若夫可以寄微旨而通王道者，存乎精義窮理，不在記事少多。」案：堯、舜百五

十載之久，孔門七十餘賢之多，而《典》、《謨》、《論語》，事迹人名，闕疏寥落，古人爲書，意別有在也，況聖者之制作乎？此數語包絡全旨，開釋群疑，爲諸儒所

不及，學者先識此意，乃可與論《春秋》矣。若欲求解《經》之法，則當先讀何休注，何氏固多怪妄之說，而條例文義之細密融貫，實爲古今第一，孔廣森嘗稱其體大思精。今《補注》中或采其語，或師其意，獲益甚多，並有孔氏《通義》所未及致意者。凡讀諸經典，須通全部，先定大主意，必如徐仙民則可。又須用逐句逐字之功，必如何、邵公則可。殷侑作《公羊注》，欲得韓子爲序，而韓子答

書以爲前聞口授指略，如遂蒙開釋，章分句斷，其心曉然，直使序所《注》，其又奚辭？既言指略，又言章句，此真讀書之法歟？朱子曰：「必析之有以極其精而不亂，然後合之有以盡其大而無餘。」

愚自己酉歲來，最慕黃澤之學。黃氏之言，尤切中樞要者，曰：「史記事從實而是非自見，雖隱諱而是非亦終在。夫子《春秋》多因舊史，則是非亦與史同，但有隱微及改舊史處，始是聖人用意，然亦有止用舊文而亦自有意義者。」

黃氏所獨得者，史法經法之說也。趙汴繼黃而加詳，其大致亦自足取，但因求詳之故，遂欲舉史法經法截然分之則非也。夫史法既變爲經法，則其所遵用史法者亦皆經法而非史法，史法固不可不知，而亦不可過執也。此在《穀梁》「梁亡」一傳本，有端緒，何

也？梁亡，鄭棄其師，義主正名，而文仍舊史，以此推之，則不論其文之加損不加損，而其義皆有所取，不計其與舊史本意同異何如也。說經者若必截分史法經法，而一一臆斷其孰爲策書本文，孰則聖人脩改，無論其未必是，即使盡得之，亦將疑於仍舊者之無所取義，此說者之大蔽也。杜預雖專治《左氏》，而於《釋例》終篇特言之曰：「仲尼雖因舊文，固是仲尼之書也。丘明所發，固是仲尼之意也。」此實開通洞達之言，可破百家曲說。愚之此書，或有推求其爲仍舊爲改舊者，皆不違本《傳》之文，仍竊取征南之意。子常可作，或予許焉。

戊午冬日，病中偶思《論語》「麻冕」章，深悟《春秋》之義。子曰：「麻冕，禮也；今也純，儉，吾從衆。拜下，禮也；今拜乎上，泰也。雖違衆，吾從下。」夫純也，拜上也，皆

是俗尚苟簡，積漸使然，非儉亦非泰也。但純之本意雖非儉，以義斷之，則儉也。聖人之從純，自取義於儉，此《春秋》因舊之比也。拜上之本意雖非泰，以義斷之，則泰也。聖人不從其泰，乃據禮以正其義，此《春秋》改舊之比也。

若以問「十世」章擬諸《春秋》，其理則同，其事則異。殷因於夏禮，所損益可知也；周因於殷禮，所損益可知也；其或繼周者，雖百世可知也。非因無以爲損益，非損益無以爲因，後監於前，經承乎史，是則同也。禮行於中國而不可息，魯史記則周禮也，夫子脩之，亦約以周禮，鄭衆、賈逵、服虔、穎容說。是其所以異也。或謂殷變夏，周變殷，春秋變周，《淮南子》。以繼周損益之事說《春秋》，夸矣。或又謂《春秋》改周之文，從殷之質，《公羊》家及讖緯說。用夏之忠，啖助說。以三

王循環之道說《春秋》，妄矣。

以上諸條多定於乙丑、丙寅之間，與世之馳騁浮辭增飾鑿說者蓋不同矣。尚有須申論者，則從心所欲，不踰矩之說也。夫魯史記之爲信史也，其體嚴，其事重也。脩之若無可脩也，以義斷之又甚難言也。而觀於《穀梁傳》，則述作新舊之間，去留加損之際，章之離合，句之繁約，字之先後，亦既一一精其義而深其文辭矣。李光地曰：「《春秋》不過幾個字換來換去，忽如此用，忽不如此用，忽用忽不用，千變萬化，不可思議，又至穩至當。」而在聖人，不過歲月間之事也。《公羊》閔：因序及諸緯云：「九月經立，謂獲麟後之九月，即春作秋成之謬說也。脩《春秋》在哀十一年冬，自衛反魯後，不知何時始，其成則在十四年春。」豈非無矩而有矩，有心而無心者歟？夫矩者中也，中者權也。矩者，方之所出，有上下前後左右則有中矣。中無定，故曰權。沈善登曰：「矩者方之至，而實分

於圓，故其所出之綫長短不等，皆歸於圓。聖人之心，渾圓如天，因物付物，物得之即爲矩矣。」堯曰：「允執其中。」子曰：「中庸之爲德也，其至矣乎！」又曰：「過猶不及。」《孟子》曰：「執中無權，猶執一也。」此之謂也。中，又謂之節。權者，因其節而節之，節性、節禮樂皆是。大氏聖人之學始於志，中於立，終於權，故四十而不惑，五十而知天命，六十而耳順，皆由立而權之節次功候也。至於七十而從心所欲，不踰矩，則權道之備，而作《春秋》之年也。知禮者可與立，知《春秋》者可與權。權者立之極至也，《春秋》者禮之極至也。《記》曰：「禮，時爲大。」《孟子》曰：「孔子，聖之時者也。」時者，謂中而權也。《韓詩外傳》作「聖之中」，所謂君子而時中。

以一事之正變言之：如正月言公即位，正也；隱不言即位，變也；定以六月即位，

尤變也；而言曰，又變之正也；莊、閔、僖不忍言即位，亦變之正也；桓、宣言即位，則變之變也；公如京師，正也，而言月，正之變也；朝王，所變也，其日，變之變也；皆言朝，又變之正也；公大夫盟言日，正也，不日，變也；齊桓盟不日，則正也，其日，又正之正也；公親逆女，正也，使人逆，變也；莊親逆於齊，則亦變也，親納幣，又變也；桓使人逆而又親焉，始變終正也；文親逆而速婦之，始正終變也。

以諸事之善惡、功罪、是非、真似言之，如正隱則醇其善矣，治桓則盡其惡矣，美齊桓之正則功多罪少矣，譏晉文之譎則罪多功少矣。至如紀侯棄國、衛專避兄、荀息死不正、伯姬坐待火之類，似非而真是也。不見善人，思見有恒，不得中行，思得狂狷，此之謂也。宋襄守正非信，楚靈討罪非義，曹世

子從父非孝，臧武仲多智非道之類，似是而真非也。鄉原亂德，爲德之賊，居之似忠信，行之似廉潔，此之謂也。伯夷、柳下惠，夫子自謂「我則異於是」，孟子亦言「君子不由」，又目之爲聖，謂其能興起百世，蓋夫子思狂狷有恒之意乎？其必距楊、墨何也？曰：夷、惠可師者，爲其使頑夫廉，懦夫有立志，薄夫敦，鄙夫寬也。楊、墨必距者，爲其無君無父也。推孟子之意，可徧讀天下書而進退之，《莊子》末篇亦近是。

凡此皆中也，皆權也。語其大要，有寬嚴焉，有輕重焉。蘇軾云：「《春秋》之義，立法貴嚴，而責人貴寬。是故用嚴之極，至於仁不勝道，此如論令尹子文、陳文子，憂國忘身，許其忠不許其仁，潔身去亂，許其清不許其仁也。用寬之極，至於叛而許悔，此如告冉有、原思富不當繼，然且謂其不吝而不直拒之，又不深責之；祿不當辭，然且喜其能廉而不深責之，又代爲處之也。」本朱子說。於

是觀其輕重，尊尊、親親、賢賢之義皆最重，其相值則迭重。文之大事，定之即位，滅項，葬宋共公，王師敗績，樂書伐鄭，《傳》有明文也，此即諱昭公不知禮，告葉公父子相隱，論古而美尚德，論今而貴民稱之意也。內中國外夷狄之義最重，一值其重，則他義俱在所輕。楚莊之人，陳靈之誘蔡，吳子之戰伯舉，會欒函，會鍾離，《傳》有明文也，此即夷狄有君不如諸夏之亡之意也。夫子賢楚昭，見葉公，觀吳季子之葬，子豈謂其無賢君臣哉？論中國夷狄之辨，則善惡是非不論矣。若夫進狄人則思中國之有伯也，善宋盟則喜中國之小康也。莒潰楚弑皆謹日，則又以中國君臣父子之義，公之於夷狄也，蓋海之可浮，九夷之可居，蠻貊之所可行，夷狄之所不可棄，《春秋》皆有其意也。

總之，讀《春秋》者當知其辭之深微隱約，而不可以史家之學求之。雖曰左史書動

爲《春秋》，右史書言爲《尚書》，然而《尚書》說事者也，《春秋》說理者也。並本《法言》。說事故覽文如詭而尋理即暢也，說理故觀辭立曉而訪義方隱也。並本《文心雕龍》。後人以史視《春秋》，一誤於杜預，則謂《春秋》不可無《左傳》；再誤於劉知幾，則謂《左傳》勝於《春秋》；異言喧豗，而斷爛朝報之說起矣。韓子答劉秀才論史書曰：「凡史氏褒貶大法，《春秋》已備之矣。後之作者，在據事跡實錄，則善惡自見。」司馬光作《通鑑》，於《魏紀》特言之曰：「臣今所述，止欲敘國家之興衰，著生民之休戚，使觀者自擇其善惡得失以爲勸戒，非若《春秋》立褒貶之法，撥亂世反諸正也。」由二子之言思之，可以知史，可以知經。

至於經之何以始終也？其終易知，其始難知。易知者，文成致祥，事備絕筆，本一

說也。其難知者，若謂始於元之一字，則如鄭君說《禮運》，天地爲本，至於四靈爲畜，以爲《春秋》始於元，終於麟，包之而固，非《禮運》之本旨。且十二公皆有元，凡史書莫不有元矣。若如《公羊》學者言五始，則列國史書亦皆如此，且隱惟四始，不得爲五始。每公有五始，則十二公將爲六十始矣。若依《公羊》謂始乎隱者，祖之所逮聞則是強爲之辭，殆習聞《春秋》尊祖之說而致誤矣。反覆求之，始隱之意，但當如杜預、范甯、趙匡、陳岳所論。而《春秋》大義，實以正隱治桓並爲始，故穀梁子兩著「謹始」之文，而正隱謹始，尤爲全書大始。劉向以正春正君建本立始發明之，具隱十一年下。實《穀梁》家遺說也。

正隱之義，根於不言即位，不言即位，《傳》謂之無事，此亦別見一義焉。甲戌孟秋，沈善登書來曰：「《春秋》記千八百事，乃欲以無

事發端，至獲麟絕筆，而復於無事矣。惟隱接乎東遷之初而可得爲無事之文，惟麟爲王道之成而可以無事，聖人皆因其自然而已。既見義於無事，即寓意於無言，故始於無事者，猶曰天何言哉云爾。中間千八百事，猶曰四時行焉，百物生焉云爾。終於無事者，猶曰夫何言哉云爾。」《魯論語》。是說也，活潑潑地，程伯子云：「會得時，活潑潑地；會不得，只是弄精神。」遂并記之。

## 論傳

《孝經鉤命決》稱孔子之言曰：「吾志在《春秋》，行在《孝經》，以《春秋》屬商，《孝經》屬參，然則得《春秋》之真傳者必在卜氏之門矣。」《韓非子》稱八儒曰：子張、子思、顏氏、孟氏、漆彫氏、仲良氏、孫氏、樂正氏。不數子夏者，子夏傳經與著書立教者異。仲良氏即《檀弓》、《毛詩傳》之仲梁子也，孫氏即荀卿也。陸淳《纂例》、趙匡引應劭《風俗通》云：「穀梁，子夏弟子，名赤。」《釋文序錄》引作「子夏門人」，門人即弟子也。楊士勛疏云：「穀梁子，名淑，字元始。魯人。」《釋文序錄》引《七錄》同。「淑」當依《孝經序》正義引作「俶」。一名赤。受《經》於子夏，爲《經》作《傳》，傳孫卿。」陸德

明《釋文序錄》、《太平御覽》並引桓譚《新論》云：「左氏後百餘年，魯人穀梁赤爲《春秋序錄》。」又引麋信注云：「穀梁與秦孝公同時。」案：如《風俗通》、楊疏之言，是穀梁子受業於子夏也；如《新論》、麋注之言，是穀梁子不及見子夏也。桓以爲獲麟後百餘年，桓論《左傳》以爲獲麟時作，非也，下辯之。而《史記》秦孝公渠梁之元年距獲麟百有二十一年，是爲周顯王崩之八年，魯共公奮之十六年，魏惠王營、韓懿侯若山之十年，趙成侯種之十四年，楚宣王良夫之九年，燕文公之元年，齊威王因齊之十八年，宋剔成君之九年，衛聲公馴之十二年。其說相合也。王應麟曰：「《傳》載尸子語，而尸佼與商鞅同時，故麋氏以穀梁子爲秦孝公時人。然不可考，《漢書》但云魯學而已。」文烝案：麋南山固無他據，桓君山謂獲麟後百餘年必有據，而應仲瑗之說亦非無因。蓋穀梁受業於子夏之門人，因遂誤

以爲子夏門人。《史記·孟子列傳》云孟軻受業於子思之門人，王劭誤以「人」爲衍字，應氏之誤正相類矣。大氏穀梁子之於子夏，孟子之於子思，事同而時亦相近也。子夏傳《經》，必非妄語，荀子譏子夏氏之賤儒，正其衣冠，齊其顏色，嗛然而終日不言，正見門人謹守師傳之氣象。

楊《疏》曰：「穀梁爲《經》作《傳》，傳孫卿，孫卿傳魯人申公，申公傳博士江翁。」即瑕丘江公。案：孫卿即荀卿，其沒在秦始皇九年

後，而燕子噲、子之時已有賢名，蓋當秦之惠王矣。」據《韓非子·難三篇》：「燕子噲賢子之而非孫卿。」《史記·荀卿列傳》：「年五十始來游學於齊。齊襄王時而荀卿最爲老師。」又云：「春申君死而荀卿廢，因家蘭陵。」《戰國·楚策》有孫子自趙謝春申君書。又載李園殺春申君事云，是歲秦始皇立九年矣。然則荀卿自齊之宣王，歷閔王、襄王至王建，於秦爲惠、武、昭、文、莊及始皇也。韓非與李斯俱事荀卿，其言必不誤，而《史記》獲麟後，周及諸國之年蓋有誤且衍者。後漢馮光、陳晃言《曆》獲麟

至漢興百六十一年，<sup>①</sup>較《史記》少百十二年，似又失之。惠棟曰：「荀卿著書，言師不越時，隱五年《傳》「伐不踰時」。《荀子·議兵》同。言天子以下廟數傳十五年《傳》「天子七廟」云云。《荀子·禮論》同。及賻、贈、綏、含之義，隱元年《傳》。在《大略篇》。誥誓、盟詛、交質子之文，隱八年《傳》。在《大略篇》。諸侯相見，使仁居守，隱二年《傳》「仁者守」。在《大略篇》。以上爲天子，隱三年《傳》「大上故不名」。在《君子篇》。皆本《穀梁》之說，其言傳孫卿，信

①「一」，原訛作「二」，中華書局校點本《後漢書·律曆中》校勘記云：「《集解》引李銳說，謂邕於甲寅元開闢至漢元年數內減去庚申元開闢至獲麟年數，餘一百六十一爲獲麟至漢元年數，因謂光、晃差少一百一十四歲。今按：甲寅元開闢至獲麟積年二百七十五萬九千八百八十歲，獲麟至漢二百七十五歲，共二百七十六萬一百六十一歲，邕以庚申元開闢至獲麟積年二百七十六萬歲減之，則獲麟至漢爲百六十一歲，明「百六十二歲」之「二」字當作「一」，今據改。」今從之。



矣。」文烝案：《荀子》又云「《春秋》賢繆公，以爲能變也」，與《公羊》文十二年《傳》同，《穀梁》無其義。漢劉向治《穀梁》，而封事中引祭伯來以爲奔，乃用《公羊》。《說苑》亦或用《公羊》義，是何也？蓋聖人既沒，齊、魯之間，人自爲師，家自爲書，異說紛拏，故雖荀卿亦閒取他說。劉子政時，則《公羊》之學方盛，尤不能無染於其說矣。《六藝論·公羊春秋》顏安樂弟子有劉向。

惠棟又曰：「隱元年《傳》云《春秋》成人之美，不成人之惡。僖二十二年《傳》云過而不改，又之，是謂之過。二十三年《傳》云以其不教民戰，則是棄其師也。今皆在《論語》中。鄭君《論語序》云仲弓、子夏等所撰定。《論語識》亦言子夏等六十四人或作七十二人共撰仲尼微言。《論語》與後世語錄相似，蓋本弟子各記短簡，以便懷持，其撰次成書則在魯悼公後，以有孟敬子

謚知之也。《說苑》孟敬子作「孟儀」，則曾子弟子公明儀是歟？《禮記·坊記》有引《論語》曰，《孟子》題篇已法《論語》矣。其諸聖人之徒私淑諸人者乎？又《傳》中所載與《儀禮》、《禮記》諸經合者不可悉舉，故鄭君《六藝論》云《穀梁》善於《經》。」文烝案：《穀梁》又有與《毛詩傳》合者，王應麟所舉大侵、蒐狩二禮，其最著者也。毛公之學，出於荀卿，而傳於子夏，益知穀梁子之果爲荀卿師，而源出子夏也。又《易》彖、象《傳》釋經有曰其位、漸。其吉，同人。有曰吝道也、安行也、王弼曰：「安，辭也。」並同人。徧辭也、益。依孟喜、虞翻本。志疑也。巽。有止一字者曰窮也、明也、並屯。咎也、夬。行也、困。豐。下也、井。順也、渙。憊也。既濟。《穀梁》文句，多與相似。《易傳》十篇，蓋弟子錄《易》家舊語，并述所聞於夫子者，輯比爲之。《論語》班《易》占於巫醫，明《易》實占書也。五十以學《易》，本是「亦」字，屬下句讀，

明《史記·世家》所言皆未可信也。愚之此說，與歐陽修又不同，俟後賢辨之。

### 《釋文序錄·論三傳次第》云：「左丘明

受《經》於仲尼，孔安國《論語注》云：「魯大史劉歆以來因之，《史記》謂之魯君子。」公羊高受之於子夏，先儒皆云齊人，子夏弟子。《風俗通》同。《廣韻》云：「子夏門人。」穀梁赤乃後代傳聞。」此言真瞽說也。案：桓譚《新論》云：「《左氏傳》遭戰國寢微，<sup>①</sup>後百餘年，魯人穀梁赤爲《春秋》，殘略，多所遺失。<sup>②</sup>又有齊人公羊高緣《經》文作《傳》，彌離其本事矣。」本《釋文序錄》及《太平御覽》。鄭君《釋廢疾》云：「穀梁近孔子，公羊正當六國之亡。」本《王制正義》。觀桓、鄭之言，穀梁先於公羊明矣。而陸玄朗乃爲斯言，不亦謬乎？《序錄》注解傳述人中亦引《新論》文，何不一爲檢照乎？要由漢世《公羊》先出，《藝文志》已以《穀梁》列《公羊》後。迨江

左中興，妄謂《穀梁》膚淺，不足立博士。范甯、徐邈之後，微學幾絕，遺書僅存，遂皆申公而屈穀耳。且公羊高去子夏固遠，而左丘明亦非夫子同時人也。《左氏》載韓、魏滅智伯事有趙襄子謚，在春秋後已五十餘年，作書又當在其後，豈得以爲受《經》而作？桓君山謂左氏作《傳》後百餘年而穀梁子始爲《春秋傳》，亦以《左傳》之作即在獲麟時。班彪則直以爲定、哀之間。皆失之矣。穀梁與左氏時代不甚相遠，公羊則在其後，此無可疑者。公羊之學，當亦由子夏之弟子展轉相授，而去聖彌遠，意義不備，或多亂說。雖與穀梁同源，而其歸迥異。左氏爲魯太史，本

① 「微」，影宋本《太平御覽》及通志堂本《經典釋文》並作「廢」。

② 「所」，影宋本《太平御覽》及通志堂本《經典釋文》並作「有」。

不得其傳授，而能博采諸國史書，詳陳事迹，使一《經》本末具見，深爲有功於《經》。但其中與《經》違異，據《經》臆測者亦正不少，其於《經》之取義則罕有合，趙匡所謂左氏解《經》淺於公、穀，誣謬實繁者也。桓君山誤以太史記事之冊爲聖門傳《經》之宗，不知穀梁、公羊實得其傳，而穀梁尤得所傳之正，於事雖略，未嘗多所遺失也。左氏丘明爲魯太史，作《傳》及《國語》，今姑用舊說。趙匡頗疑其不然，而葉夢得據史遷云「左丘失明厥有《國語》」，以爲左氏蓋左史之後，以官氏者，《國語》則出左丘氏。文烝案：左丘明自見《論語》，書題《左傳》似不相涉。晉、楚俱有左史，葉說似近之。《國語》則本不題撰人也。

杜預病世之說《左氏春秋》者，進不成爲錯綜《經》文以盡其變，退不守丘明之《傳》。如杜此言，苟能錯綜《經》文以盡其義例之變，則固不必守丘明之《傳》以爲義例也。愚

治《穀梁傳》二十年，乃知《傳》之於《經》實有如杜所云錯綜盡變者，蓋魯學授受之可憑如是，惜乎元凱氏未嘗潛心。

《漢書·儒林傳》云：「宣帝即位，聞衛太子好《穀梁春秋》，以問丞相韋賢、長信少府夏侯勝及侍中樂陵侯史高，皆魯人也，言穀梁子本魯學，公羊氏迺齊學也，宜興《穀梁》。」斯言也，天下之公言也。《春秋》猶《論語》也，漢初，《魯論語》、《齊論語》並行，其後，孔氏壁中古文《論語》出，篇簡章句，與《魯論》大同，不若《齊論》多所附益，是魯學必勝齊學也。公羊作《傳》多齊言，且其解《經》多有護齊者，何足憑乎？

《史記·十二諸侯年表》云：「孔子西觀周室，論史記舊聞，興於魯而次《春秋》，上記隱，下至哀之獲麟，約其辭文，去其煩重，以制義法，王道備，人事浹。七十子之徒口受

其傳指，爲有所刺譏褒諱挹損之文辭不可以書見也。」《儒林列傳》云：「仲尼因史記作《春秋》，以當王法。其辭微而指博，後世學者多錄焉。」司馬遷所言史記，皆謂周及諸國之史記，故又言「因史記作《春秋》，十二公。據魯，親周，故殷。」【眉批】：「親周故殷，即新周故宋也。舊讀誤。」又言讀史記至文公、召王，讀史記至楚復陳，此本當時《公羊》家謬說，以爲《春秋》之書乃夫子廣采諸書，約其文而爲之，非據魯史記。定十四年下辯之。此二條言口受，言多錄，其說可信，《經》義則口受於夫子，《經》文則遞相傳錄也。「錄」或作「繆」字，蓋誤。考諸董仲舒

《春秋繁露》俞序篇有如閔子、子貢、子夏、曾子、子石、孔子弟子公孫龍也。公肩子、孔子弟子公肩定也。又疑當作「公扈子」，見《公羊》及《說苑》。世子、七十子之弟子世碩也。子池之倫，子池，未聞。皆以此《經》爲授受之業，但其義則徒有口說而無書，其有書亦但如穀梁子所引「傳曰」之

類，實非專書，蓋至穀梁，始有專書矣。公羊作《傳》，則當六國之亡，直至漢景帝時乃著竹帛，其初皆是口說相授，見何休注。又戴宏序云：「子夏傳與公羊高，高傳與其子平，平傳與其子地，地傳與其子敢，敢傳與其子壽。至漢景帝時，壽乃共弟子齊人胡毋子都著於竹帛。」文烝案：孔子七世孫曰子慎，當六國之亡。又四世至延年、安國，當漢景、武間。自公羊高至壽，年數略同也。故其《經》字與《左氏》、《穀梁》異者，大率音同聲近之字。而《傳》文亦多齊言，或以語急而易他字，如以「得」爲「登」之屬。

《史記·儒林列傳》云：「瑕丘江生爲穀梁《春秋》。自公孫弘得用，嘗集比其義，卒用董仲舒。」然則當時固非以瑕丘之學爲不如廣川也，以公孫氏力主之，上遂信之，天下莫敢言耳。董生自是醇儒，其說《經》自災異以外多合正理，惟一主《公羊》，故有失《經》

本義者。揚雄《法言》以災異推董學，今所不取。

漢初，陸賈造《新語》十二篇，其第一篇《道基》之末引《穀梁傳》曰：「仁者以治親，義者以利尊，萬世不亂，仁義之所治也。」今《傳》中無此四語，蓋在《漢志》所稱《穀梁外傳》、《穀梁章句》中，而通謂之《傳》也。《說苑》、《漢書》、《白虎通》、《後漢書》注、《大唐郊祀錄》所引有類此者，並詳《補注》。又第八篇《至德》之末論魯莊公事而曰「故《春秋穀梁》云云，今自「梁」字以下皆缺，不知何語。觀陸生兩引《穀梁》，則此《傳》信為周代書，并《外傳》、《章句》之屬，有非晚出者矣。

《穀梁》文章有二體，有詳而暢者，有簡而古者，要其辭清以淡，義該以貫，氣峻以厲，《春秋》謹嚴，《穀梁》峻厲，韓、柳二子確論。意婉以平，徵前典皆據正經，述古語特多精理，與《論語》、《禮記》最為相似。《論語》述古語，如克復

敬恕之類甚多，唯《傳》亦然。古書之不可考者多矣，如丹書敬義之訓，道經危微之言，非有《大戴禮》、《荀子》則無以知其書名。古人學問無方，豈專四術哉？至其解《經》之妙，或專釋，或通說，或備言相發，或省文相包，或一經而明衆義，或闡義至於無文，此乃程瑤田之論《喪服傳》傳所謂「端緒雖多，一綫不亂」。而凌曙以為唯鄭氏能綜核不誤者也。若夫左氏得之品藻，失之浮誇；公羊得之於辯，失之於俗，具如舊說。揚雄、韓子、范序語。其解《經》不及穀梁，又無論矣。鄭君論三《傳》曰：「左氏善於禮，公羊善於讖，穀梁善於經。」案：左氏言禮未必盡當，圖讖起於哀、平，乃附合公羊家說為之，鄭評二《傳》，竊所未安，唯「穀梁善經」一語則不可易。《墨子》曰：「夫辯者，將以明是非之分，審治亂之紀，明同異之處，察名實之理，處利害，決嫌疑焉。摹略萬物之然，王念

孫謂「摹略」猶無慮。《廣雅》曰：「無慮，都凡也。」論求群言之比，以名舉實，以辭抒意。」文烝爲此書，頗有志乎此數語，而要以「穀梁善經」一語爲準。

《穀梁》多特言君臣、父子、兄弟、夫婦，與夫貴禮賤兵，內夏外夷之旨，明《春秋》爲持世教之書也。家鉉翁謂三代下有國家者，所恃以扶綱常，植人極，皆《春秋》之大經大法而公、穀氏所傳，其實公與穀異。《穀梁》又往往以心志爲說，以人己爲說，桓、文之霸曰信、曰仁、曰忌、僖、文之於雨曰閔、曰喜、曰不憂，明《春秋》爲正人心之書也。持世教，易知也；正人心，未易知也。然而人事必本於人心，則謂《春秋》記人事即記人心可也。謂《孟子》亦欲正人心，直承上文成《春秋》可也。災異以人事統之，又所謂洚水警余者也。故《春秋》非心學，亦心學也，唯《傳》知之。愚至癸酉季夏而後悟之。

史之有論也，自左氏始也，述人言以評之，稱君子以斷之，即一家之書，而一時之心見焉。霸之譎正，國之夷夏，弗論也，論強弱而已。侯王之等，臣主之分，弗論也，論曲直而已。堯、舜爲的，文、武爲首，周公爲翼，未之有也，徒有怪力亂神之論而已。士莫賢於叔肸，而惟美其後嗣之卿；女莫賢於伯姬，而乃謂之女而不婦；人心如此，何以說聖人正人心之書哉？《記》曰「《春秋》之失亂」，《孟子》曰「君子反經」，將去亂而反諸經，非《穀梁》惡乎可。

杜牧嘗言：「天儻不生夫子於中國，紛紜冥昧，百家鬪起，是己所是，非己所非。天子隨其時而宗之，誰敢非之？縱有非之者，欲何所依據而爲其辭？」至哉斯言！《春秋》之有《穀梁傳》亦猶是矣。夫《春秋》之爲事，非董狐、南史、左史、倚相、左丘明、司馬

遷、班固之事也，乃欲以據事直書求之，或以網羅浩博，考核精審求之，不亦淺乎？《春秋》之爲道，非伯夷、伊尹、柳下惠之道也，況執後世儒生之見，哆口而議其義理，不亦偏且謬乎？故是己所是，非己所非，說愈多而愈無定，惟依據《穀梁傳》則皆有以斷之。或曰《穀梁》何以必可依據也？曰商子有言曰：「先聖人爲書而傳之後世，必師受之，乃知所謂之名。不師受之，而人以其心意議之，至死不能知其名與其意。愚之宗《穀梁》，亦宗其師受而已矣。」

《漢書·藝文志》有《左氏微》二篇，又有《鐸氏微》三篇。注曰：「楚太傅鐸椒。」又有《張氏微》十篇，又有《虞氏微傳》二篇。注曰：「趙相虞卿。」《史記·十二諸侯年表》云：「鐸椒爲楚威王傅，爲王不能盡觀《春秋》，采取成敗，卒四十章，爲《鐸氏微》。」《釋

文序錄》、《左傳序》、《正義》並引劉向《別錄》云：「左丘明授曾申，申授吳起，起授其子期，期授楚人鐸椒。鐸椒作《抄撮》八卷授虞卿。虞卿作《抄撮》九卷授荀卿，穀梁去左氏不遠，作《傳》授荀卿，而左氏七傳而至荀卿，可疑也。趙匡以爲僞妄。荀卿授張蒼。」案：諸文或言《微言》、《微傳》，或言《抄撮》，其篇章卷數又不同，大概皆是左氏之學，記事之流，故太史公繼《左氏春秋》言之，而劉子政言其源出丘明也。《說苑》：「魏武侯問『元年』於吳子，吳子對曰：『言國君必謹始也。』」①「謹始奈何？」曰：「正之。」「正之奈何？」曰：「明智。」王應麟以爲此吳起學《春秋》之證。《戰國·楚策》：「虞卿謂春申君曰：『臣聞之《春秋》，於安思危，危則慮安。』」此「春秋」二字吳師道疑涉下「王之春秋高」句而誤衍，惠棟以爲引《左傳》襄十一年魏絳語，非也。又《年

①「謹始」，中華書局點校本《說苑校證·建本》作「慎始」。



表》云：「趙孝成王時，其相虞卿上采《春秋》，下觀近世，<sup>①</sup>亦著八篇，為《虞氏春秋》。」《虞卿列傳》云曰：「《節義》、《稱號》、《揣摩》、《政謀》，凡八篇。以刺譏國家得失。」案：此蓋即《藝文志》儒家之《虞氏春秋》十五篇，其書如今《晏子春秋》，與《虞氏微》、《傳》各為一書也。《年表》下文又言《呂氏春秋》，并荀卿、孟子、公孫固、韓非各摺摭《春秋》以著書。至於張蒼曆譜五德，董仲舒推《春秋》義，皆附及耳。又疑太史公所云「為王不能盡觀《春秋》，虞卿上采《春秋》」者，承上左丘明成《左氏春秋》言，兼指《左傳》，不專指夫子《經》文。《戰國·楚策》孫子為書謝春申君，《韓非子·姦劫弑臣篇》並引楚王子圍、齊崔杼弑君事，與《左傳》大同，乃云「《春秋》記之」，《策》作「戒之」。是其證也。又當時通謂諸國史記為《春秋》，如《周春秋》、《燕春秋》、《宋春秋》、《齊

春秋》、《晉春秋》之類，摠為《百國春秋》，《墨子》、《汲冢瑣語》。故《晉語》司馬侯言羊舌肸習於《春秋》，《楚語》申叔時言教之《春秋》。《管子·山權數篇》：「《春秋》者，所以記成敗也。」《法法篇》：「《春秋》之記，臣有弑其君，子有弑其父者。」《戰國·東周策》呂倉謂周文君：「《春秋》記臣弑君者以百數。」《燕策》奉陽君曰：「今臣逃而紛齊、趙，始可著於《春秋》。」望諸君報書：「臣聞賢明之君，功立而不廢，故著於《春秋》。」《韓非子·備內篇》：「上古之傳言，《春秋》所記，犯法為逆以成大姦者，未嘗不從尊貴之臣也。」此等皆是史記之通稱。唯《魏策》魏謂趙王言《春秋》罪虞公，《內儲說上》七術言《春秋》記實霜，《外儲說右上》子夏

① 「世」，中華書局點校本《史記·十二諸侯年表》作「勢」。



說《春秋》，略同《說苑》，此等則指夫子《春秋》，當分別觀之。史公所云，亦其比矣。《左氏微》、《張氏微》二書無可考，當亦鐸、虞之類。臧庸以張氏爲張蒼。自丘明以史說《經》，已有傳事不傳義之譏，此葉夢得語。朱子亦云：「左氏史學，事詳而理差。」況其支流餘裔乎？

鄒氏、夾氏之書，《藝文志》列《穀梁傳》之後，其《傳》皆十一卷。據《王吉傳》「吉能爲鄒氏《春秋》」，「鄒」亦作「騶」。而吉上宣帝疏言：「《春秋》所以大一統者，六合同風，九州共貫也。」其說與公羊同，然則鄒之大體於公羊爲近，其時代或亦相近矣。《志》於《夾氏傳》注曰：「有錄無書。」其下又曰：「鄒氏無師，夾氏未有書。」是知鄒氏書無傳其學者，故《漢書》中自王吉之外，絕無所聞。《夾氏》則但有口說，如景帝以前之《公羊傳》，未著竹帛。《公羊》卒著之，《夾》竟不著也。

## 略例

一、凡《注》全載，或移其處。《疏》則《補注》中采之，頗有增刪并析，隨宜也。

二、凡《補注》之作，以徵引該貫，學鄭君《三禮注》；以探索精密，學朱子《四書章句集注》、《或問》。雖不能至，心鄉往之，求詳也。

三、凡《春秋》中不決之疑，今悉決之，其未經人道者，竊比於梅鷟辯僞書、陳第談古韻，皆可以俟後世，徵實也。

四、凡百家之解、四部之文今已逸者，從他書所引引之，不連舉他書之名，省煩也。

五、凡古今諸儒，皆直稱其姓名，本范注舊例。范於鄭君獨不名，今又以朱子配之，

而推及於韓子、周子、程伯子、程子、張子、邵子，表異也。

六、凡《經》、《傳》、注、疏及所稱引，皆以舊本、善本、精校本審定其字，懲誤也。

七、凡《撰異》上皆加圈，《補注》有餘意更端者亦加圈，注中有注則於眉端附存之，避穀也。



## 春秋隱公經傳第一補注第一 《傳》曰：「春

秋」編年，四時具而後爲年，言《春秋》之名因乎四時也。《左傳》杜預序曰：「《春秋》者，魯史記之名也。史之所記，必表年以首事，年有四時，故錯舉以爲所記之名。」楊士助疏曰：「春先於夏，秋先於冬，故舉『春秋』二字以包之。《春秋》立名，仲尼以往然矣。」今案：《孟子》稱晉之《乘》、楚之《檮杌》、魯之《春秋》，而《國語》晉司馬侯云「羊舌肸習於《春秋》」，楚申叔時論傳大子之法云「教之《春秋》」，孔穎達以爲《乘》、《檮杌》者，晉、楚私立別號，《春秋》是其大名。《汲冢瑣語》有《晉春秋》，則孔說是也。又案《墨子》稱周之《春秋》、燕之《春秋》、宋之《春秋》、齊之《春秋》，又稱吾見百國《春秋》。《汲冢瑣語》又有《夏殷春秋》，知天子諸侯之史書皆名《春秋》也。隱公，惠公長庶子，周公八世孫，《史記》名息，《世本》名息姑，母聲子，以平王四十九年即位。仲尼所修謂之《經》，穀梁所說謂之《傳》。作《傳》時《經》與《傳》分，《經》《傳》各十一卷，漢以後合《傳》於《經》，此隱公《經》《傳》總爲第一，今以《補注》文繁，增其卷數，各別著之。

穀梁《漢書·藝文志》班固自注曰：「穀梁子，魯

人。」楊疏曰：「爲《經》作《傳》，傳荀卿。」但穀梁子之名，諸書不同，桓譚《新論》、應劭《風俗通》、蔡邕《正交論》並云名赤。王充《論衡·案書篇》云「穀梁真」，阮孝緒《七錄》云：「名俶，字元始。」顏師古《藝文志》注云：「名喜。」未知誰得其實也。

范氏《集解》范氏名甯。案《晉書》，甯字武子，順陽縣人，爲豫章太守。《集解》者，范作注所題之名，因其父汪之說，博采諸家，并下己意。又取其長子泰、中子雍、小子凱、從弟邵之說，故曰《集解》。

鍾文烝詳補皆題「補曰」，以別於《集解》。其《經》下論《左氏》、《公羊》異字者，題「撰異曰」也。

元年春王正月。隱公之始年，周王之正月也。

杜預曰：「凡人君即位，欲其體元以居正，故不言一年一月也。」補曰：孔廣森曰：「古者諸侯，分土而守，分民而治，有不純臣之義，故各得紀元於其竟內。」孔氏「不純臣」之說，本《五經異義·公羊說》及《白虎通》。其云「各得紀

元」，又《左傳》義也。孔穎達引《爾雅》曰：「元，始也。正，長也。」文烝案：《左傳》曰「王周正月」，謂建子月也。月所以有建者，相承謂斗杓所指，據《逸周書·周月》云：「是月斗柄建子，始昏，北指也。」但恒星右旋有歲差，虞夏與周已差一次，至今差二次，故祖沖之云：「月位稱建，諒以氣之所本，非謂斗指。」而戴震因據《周髀》北極璿機四游說之，顧觀光又考而明之，謂《周髀》者，繪圖之法也，其圖皆借象，非實數也。以黃赤二極聯為一綫，於此綫上距北極五度，指一星以為識，命曰北極。璿機一晝夜左旋一周，而過一度，恒以冬至夜半加子，春分夜半加卯，夏至夜半加午，秋分夜半加酉，十二月建之，名因之而起也。范注用杜預者最多，此以杜預曰「著於下」，其實上二句亦杜語。雖無事，必舉正月，【補曰】《玉篇》曰：「雖，詞兩設也。」疏曰：「此言無事，直據正月無即位之事，非是通一時無事。」文烝案：《雜記》曰「過而舉君之諱」，鄭君注曰：「舉，猶言也。」又《史記》載《書·湯誓》「稱亂」為「舉亂」，《士相見》、《聘禮》、《檀弓》注並曰：「稱，舉也。」則「舉」亦訓「稱」矣。《說文》「再」字，《爾雅》「偁」字，皆訓「舉」。謹始也。謹君即位之始。【補曰】於文無即位之事，而當時實

有其事，不可全沒其實，故空書正月，以謹其始，即十一年《傳》云「所以正隱」，是申足此義也。莊、閔、僖之元年，皆空書正月，皆以明其實即位。定之元年，不空書正月，則知其實未即位矣。不釋春者，月繫於時，史之常文也。夏正建寅，殷建丑，周建子，孔穎達謂「月改則春移」是也。不釋王者，亦史之常文，謂此建子之月乃周王之正月，無他義也。唯桓元年之書王，有謹始之義，與諸公不同，故彼《傳》明之也。《公羊》家及諸讖緯有五始之說，謂元也，春也，王也，正月也，公即位也。此皆俗師增益，誇飾經義，不可援以說《傳》也。凡《傳》言謹者，皆謂詳其文以慎其事。凡《傳》專釋《經》之取義，如言謹，則明君子脩《經》取義於謹也。《春秋》之書，一言以蔽之，揚雄謂「說理莫辯者」是也。夫子言《春秋》以道義，言其義則丘竊取之，正是此意，故穀梁子釋《經》，專明義理，十一卷皆同。鄭君謂《穀梁》善於《經》，啖助謂《穀梁》意深，陸淳、孫覺、胡安國等謂《穀梁》最精密，葉夢得謂《穀梁》所得多。而李光地善承朱子之學，其論《春秋》家曰：「《穀梁》尤好，皆不易之言。」公何以不言即位？據文公言即位。【補曰】《左氏》賈逵、服虔注以為隱、莊、閔、僖四公皆實即位，孔子脩《經》，乃有

不書。穎容亦以爲魯十二公國史盡書即位也。凡《傳》多設疑問辭，自易文言《傳》已有此體。**成公志也。**成隱

讓桓之志。【補曰】注豫探下爲說。志，意也。言成者，桓弑而讓事不成，特成之也。杜預謂諸公不行即位之禮，劉敞極辯之。戴震曰「凡以不書即位爲不行即位之禮」者，非也。杜氏以爲雖不即君位而亦改元朝廟，與民更始。夫正君臣之位，不可不有始。即位者，正君位之始云爾。位者，命之天子，承之始封之君，非先君一人之位。雖先君不有其終，新君不可不有其始。不即君位於改元之初，及其視朝，將不正朝位乎？苟繼故者視朝然後即君位，亦豈得無深痛不忍之情？不廢改元朝廟，與民更始，而廢正百官，非義也。以桓之事考之，左氏言討爲氏有死者，是欲掩隱之見弑而不可，方詐爲自掩之計以治斯獄，使繼故不即君位。處大變者，無敢或異，一行其禮，則爲忍於先君，桓何所快於行即位之禮，而顯示國人以與聞乎弑哉？用是言之，《春秋》十二公皆行即位之禮，魯史記皆書即位也。君子脩《春秋》於隱不書者，終隱之身，自以爲攝，不忘先君之志，故書「春王正月」，以存其事。不書即位，以表微。於莊、閔、僖不書者，繼故即君位，經國之體，不可以已也。踐其位者，宜有深痛之情，異於繼正，故書「春王正月」，以存

其事。不書即位，以見其情。隱爲繼正之變文，莊、閔、僖爲繼故之正例。桓、宣亦是繼故，而書即位。以莊、閔、僖之不書即位者，比事類情，是爲忍於先君，是又繼故之變文也。《春秋》始乎隱，其事之值於變者三焉。諸侯無再娶之文，惠公失禮再娶，嘗立桓爲太子，然非隱所得而追議於先君也。上卿爲攝主，禮也，居上卿之位，攝行君之政，生不稱公，死不稱薨。隱嗣爵改元，非攝主比也。繼世之君，盡臣諸父兄弟，隱既立而猶奉桓爲太子，異於君臣之體者也。魯之禍，惠公啟之也。明乎嗣立即位之義，君臣父子夫婦昆弟之間其盡矣乎？焉成之？【補曰】焉，安也。言

君之不取爲公也。言隱意不取爲魯君也。公，君也。上言君，下言公，互辭。【補曰】明隱雖行即位之禮，而意不取爲魯之公，如未嘗即位也。君公雖是互辭，而「公」字是《經》書即位之文，故必出於下。君之不取爲公何也？【補曰】據以下皆書公，何得不取爲公之義？將以讓桓也。【補曰】將俟桓長讓之，自謂攝也。讓桓正乎？曰不正。隱長桓幼。【補曰】不正者，言君子之取義以爲不正也。問《春秋》以讓桓爲正乎？答言不以爲正也。下言「善則其不正焉何也」？加一「焉」字，意尤

明也。十一年《傳》曰「隱十年無正，隱不自正也」，元年有「正」，所以正隱也，是即《春秋》不正隱讓之微文也。正之訓是也，定也，直也，中也，善也。古讀皆平聲，如正月。隱讓所以爲不正者，下所云「成父之惡」，廢兄弟之倫，忘君父之命，以行小惠，其義多端，而兄弟之倫爲主，故注專以長幼言之。《春秋》成人之美，不成人之惡。【補曰】疏曰：「此云《春秋》成人之美，下云《春秋》貴義而不貴惠，顯言《春秋》者。上廣稱《春秋》之理以明之，下既以隱爲善，又惡其不正，恐人不信，故亦言《春秋》也。」隱不正而成之何也？將以惡桓也。不明讓者之善，則取者之惡不顯。【補曰】欲惡桓，故善隱，《春秋》懲惡而勸善也。其惡桓何也？隱將讓而桓弑之，則桓惡矣。【補曰】陸德明《音義》曰：「弑，又作『殺』。」說詳後四年。桓弑而隱讓，則隱善矣。【補曰】桓惡而隱善，故善隱以惡桓，申足上意。上言美下言善者，朱子所謂善者美之實也。善則其不正焉何也？據善無不正。《春秋》貴義而不貴惠，惠，謂私惠。信道而不信邪。信，申字，古今所共用。【補曰】鄭君《士相見

禮》注曰：「古文『伸』作『信』。」《儒行》注曰：「信，讀如『屈伸』之『伸』，假借字也。」韋昭《國語》注曰：「信，古『申』字。」孝子揚父之美，不揚父之惡。先君之欲與桓，非正也，邪也。【補曰】與予通。惠公以再娶仲子之故，嘗欲立桓爲世子。《公羊》稱諸侯不再娶，明再娶亦妾也。呂大圭曰：「仲子不得爲夫人，則桓不得爲適子，故曰非正也，邪也。」雖然，既勝其邪心以與隱矣。終歸之於隱，是以正道制邪心。【補曰】既，終也。《毛詩傳》曰：「既者，終其事。」《鄉飲酒禮》注：「既，卒也。」《爾雅》：「卒，既也。」義皆同。惠公終不敢以仲子爲夫人，故終不立桓爲世子，以隱是長庶，故以與隱。案《左傳》：「隱母聲子，爲繼室，有謚。桓母仲子，雖再娶，無謚。是知桓母但有手文之祥，曰爲魯夫人，惠終不以爲夫人明矣。《公羊》不知惠欲與桓，後終與隱，乃謂桓以母貴當立。諸大夫以隱長，權立隱，隱爲桓立，故欲反之桓。開卷之初，便失事實。《左傳》言隱立而奉桓言攝，亦不明言惠之終立隱而隱不宜爲攝，蓋由魯子孫皆桓之胤，史書不盡其辭，而左氏因之歟？」已探先君之邪志而遂以與桓，【補曰】己，己隱也。《爾雅》曰：「探，取也。」又曰：「試也。」

則是成父之惡也。【補曰】成，即揚也。兄弟，天倫也，兄兄弟後，天之倫次。【補曰】兄弟兼適兄弟、庶兄弟言之。《公羊》稱諸侯壹聘九女，謂夫人八妾也。夫人之長子爲太子，太子死則立其母弟，是立適依兄弟之倫也。八妾所生子通以年長幼爲兄弟，無太子適子則立庶子最長者一人，是立庶亦依兄弟之倫也。惠公元妃孟子早卒，無太子適子，隱以長庶爲兄，宜立，桓爲弟，不宜立。周制天子諸侯立子之法，《穀梁》與《左氏》說同，以後四年《傳》、文十八年《傳》與此《傳》合觀之，略可見。又論之於彼二處。爲子受之父，爲諸侯受之君。隱爲世子，親受命於惠公，爲魯君，已受之於天王矣。【補曰】《左傳》桓稱太子，據始也。此言爲子，受之父，據終也。齊陽生正，茶不正，《春秋》不以陽生君茶，猶以茶受命同之正君，況隱乎？己廢天倫而忘君父，以行小惠，曰小道也。弟先於兄，是廢天倫。私以國讓，是忘君父。【補曰】小惠，非義也。小道，非道也，邪也。曰者，目《經》意。若隱者，可謂輕千乘之國，【補曰】千乘之國，大國也，古書皆以千乘目大國。千乘者，賦也。《詩·魯頌》言魯制曰「公車千乘」，《毛傳》曰：「大國之賦千乘。」陳奐疏曰：「此

賦兵之車數也。《司馬法》有二說：一說云九夫爲井，四井爲邑，四邑爲丘。丘，十六井，有戎馬一匹，牛三頭，是曰匹馬丘牛。四丘爲甸。甸，六十四井，出長轂一乘，馬四匹，牛十二頭，甲士三人，步卒七十二人，戈楯具備，謂之乘馬。①說云六尺爲步，步百爲畝，畝百爲夫，夫三爲屋，屋三爲井，井十爲通。通爲匹馬，三十家，士一人，徒二人。通十爲成，成百井，三百家，革車一乘，士十人，徒二十人。十成爲終，終千井，三千家，革車十乘，士百人，徒二百人。十終爲同，同方百里，萬井，三萬家，革車百乘，士千人，徒二千人。」案：前一說甸出一乘，因是而推四甸爲縣，出四乘，四縣爲都，出十六乘。後一說成出一乘，終出十乘，同出百乘，與《漢書·刑法志》同。井、邑、丘、甸、縣、都出賦法，通、成、終、同出軍法，說者混爲一制，非也。千乘亦有二說：一說以一乘七十五人計之，千乘有七萬五千人。一說以一乘三十人計之，千乘有三萬人。出軍之千乘與出賦之千乘本自不同，《楚語》「國馬足以行軍，公馬足以稱賦」，明不同也。文烝案：包咸《論語注》曰：「方里爲井，十井爲

①「戈楯具備，是謂乘馬」，《漢書·刑法志》作「千戈備具是謂乘馬之法」。



乘，百里之國，適千乘也。」何休《公羊注》亦曰：「十井共出兵車一乘，公侯封方百里，凡千乘，伯四百九十乘，子男二百五十乘。」其說又異。又《詩》言「公徒三萬」，鄭君《箋》以三萬為三軍，鄭《志》答臨碩以為二軍，鄭《志》是也。說見襄十一年。許慎《五經異義》曰：「公車千乘，謂大總計地出軍也；公徒三萬，謂鄉遂兵數也。」蹈道則未也。未

履居正之道。【補曰】二句又申小道義也。疏曰：「伯夷、叔齊及太伯等讓國，史傳所善。今隱讓國而云小道者，伯夷為世子，其父尚存，兄弟交讓而歸周。父沒之後，國人立其中子，可謂求仁而得仁，故以為善。今隱公上奉天王之命，下承其父之託，百姓已歸，四鄰所與，苟探先君之邪心而陷父於不義，開篡弑之原，啟賊臣之路，卒使公子翬乘釁而動，自害其身，故謂之小道。至於太伯則越禮之高，以興周室，不可以常人難之。」文烝案：疏說是也。《傳》以「成志」之文著，而不正之文微，故詳言以明之。昔楚子發克蔡辭賞，荀卿子譏之曰：「反先王之道，亂楚國之法，抑卑其後世以為私廉。」與《傳》論隱讓相似。師徒之說，可以互證。後來惟柳宗元論董安于能得荀卿之意。而《傳》所論者，君臣父子兄弟夫婦之義備焉，實夫子之遺意也。葉夢得曰：「三《傳》釋《經》各異，《穀梁》之言近實，惟能察事之

實，所以能盡《經》之義。」家鉉翁曰：「此《春秋》垂世之法，穀梁子得之孔門高第，述之為《傳》，千古一大條貫也。」又曰：「《穀梁》之義，無以加矣。」葉氏、家氏所見甚是。讓美則成之，惠小則不正之，此董仲舒所謂《春秋》常於其嫌得者見其不得。而《史記·世家》云：「《春秋》約其文辭而指博。」司馬相如又以《春秋》義理繁茂，比之林藪，即開宗之章可見矣。抑愚因以見《穀梁》文章之工，隨輕重而曲直之，所謂甚峻而可以厲其氣者蓋如此。

### 三月，公及邾儀父盟于昧。邾，附庸之國。

昧，魯地。【補曰】魯侯爵稱公者，《白虎通》曰：「臣子之義，心俱欲尊其君父，故皆令臣子得稱其君為公也。」《尚書》曰：「公曰嗟，秦伯也。」《詩》云：「覃公惟私，覃子也。」《禮·大射》經曰：「公則釋獲。」大射者，諸侯之禮，伯子男皆在也。孔穎達曰：「五等皆稱公，禮之常也。」汪克寬曰：「《燕禮》、《大射儀》、《聘禮》五等諸侯皆稱公，而《公食大夫禮》又以名篇，則謂君為公，周之制也。」說又見僖五年注。《曲禮》曰：「涖牲曰盟。」《傳》曰：「盟，國之重也。」何休曰：「于者，於也。凡以事定地者加于例，以地定事者不加于例。」范注諸說地名皆本杜預。○【撰異曰】邾，《公羊》作「邾婁」，終《春秋》皆然。婁，力俱切。邾人語聲後曰婁，

或曰齊人語。《禮記·檀弓》同。《國語》、《孟子》諸書謂之鄒。眚，从目从午未之未。《左氏》作「蔑」。案：楚唐蔑亦作「唐眚」，與鄭嚴蔑皆字明。《說文》：「蔑，勞目無精也。」「眚，目不明也。」二字蓋古通。眚，以午未之未爲聲，莫達切，目不正也。非切。別有「眚」字，以本末之末爲聲，莫達切，目不正也。非此字。王引之以《廣韻》校正《說文》、《玉篇》，考之詳矣。諸稱二家與此異字，皆據今本，并陸德明《音義》、陸淳《纂例》。其或與今不合，乃各出之。及者何？內爲志焉爾。內，謂魯也。【補曰】《公羊》、《爾雅》皆曰：「及，與也。」及者，期定於我，而彼來會我，我及之也，故曰內爲志，是魯主而外客也。用兵言及者亦然。何休曰：「焉爾，猶於是也。」儀，字也。父，猶傅也，男子之美稱也。傅，師傅。附庸之君未王命，例稱名，善其結信於魯，故以字配之。【補曰】注釋「傅」，非也。傅，讀爲夫。《毛詩傳》曰：「夫，傅相也。」鄭君《郊特牲》注曰：「夫或爲傅。」明夫，傳古通用。《士冠禮記》「章甫」，鄭以爲表明丈夫。又云：「甫或爲父。」古書甫，父亦通用。《傳》言「父猶傅」，猶曰「甫猶夫」。以其非本訓而義相近，故言猶耳。《郊特牲》曰：「夫也者，夫也。」夫爲男子美稱，故春秋時人名字多加

父，名或加夫也。邾儀父，《左傳》曰「邾子克」也。案：周有王子克，字子儀，楚鬬克亦字子儀，宋桓魋之臣曰子儀克。盟會者，所以繼好息民，邾與魯最近，爲好於魯。《春秋》尤重之，故不言「邾克」，而言「邾儀父」，《左傳》所謂「貴之也」。注「附庸」三句，本杜預。其不言邾子何也？據莊十六年邾子卒稱邾子。邾之上古微，未爵命於周也。邾自此以上是附庸國。【補曰】《左傳》曰「未王命」，與此同。《詩·魯頌》曰：「乃命魯公，俾侯于東，錫之山川，土田附庸。」不日，其盟渝也。日者，所以謹信，盟變，故不日，七年公伐邾是也。【補曰】《爾雅》曰：「渝，變也。」疏曰：「公盟皆日，故知非例不日。《左氏》惟大夫卒及日食以日月爲例，自餘皆否。此《傳》凡是書《經》皆有日月之例者，以日月相承，其事可悉。史官記事，必當具文，豈有大聖脩撰而或詳或略？故知無日者，仲尼略之，見褒貶耳。」文烝案：《春秋》無事猶空書時月，蓋本魯史舊文，豈有例當具日月者而史反遺之？後儒又以當日月而不日月者概目爲史闕文，不知夫子所據策書，如「夏五」之屬者甚少。《傳》惟於「夏五」言以遠《傳》疑不可悉，援此例也。舊史有日，君子以後之渝盟追去日者，凡《春

秋》之文，屬辭比事，前後相顧，彼此互明，斯乃大聖制作之義，非以為史法也。必以不日見之者，隱之渝盟，遠在七年，不去盟日，無以顯之，與定三年盟拔同義，皆所以重盟約之信，貴邾、魯之好。桓十七年盟趙、哀二年盟句繹，則一二年間即背盟好，其為惡事，昭然易知，故還依公大夫盟書日之常文，而其義自見，《傳》亦可不復發文也。昧，地名也。【補曰】《公羊》曰：「地期也。」疑此亦當為「期」，涉後文「宿，邑名」而誤。

夏五月，鄭伯克段于鄢。段有徒衆，攻之，為害必深，故謹而月之。鄢，鄭地。【補曰】舊史凡殺世子母弟皆月，君子改從時例。志者，蓋來告。說見後三年。○【撰異曰】陸淳《春秋纂例》曰：「克，《公羊》作「剋」。」案今《公羊》不作「剋」。趙匡引《汲冢紀年》鄭莊公殺公子圣，《說文》：「圣，讀若兔，鹿窟。」克者何？能也。

【補曰】《爾雅》同。何能也？能殺也。【補曰】訓殺，《公羊》同。《爾雅》曰：「剋，勝也。」又曰：「勝，殺，克也。」是亦同也。《傳》合「能」、「殺」二字以解「克」字。依《說文》別有從力之「勉」，古祇一字。何以不言殺？

【補曰】據殺世子母弟皆言殺。見段之有徒衆也。言鄭伯能殺，則邦人不能殺矣。知段衆力彊盛，唯國君能殺之。【補曰】《傳》解「克」字，非解「鄭伯」字，注非也。《傳》言段有徒衆，變言「克」以見之，即《左傳》「得僞曰克」之例，所謂「如二君，故曰克」者也。凡《傳》解《經》言見者，皆謂《經》文所該，使人望而可知，是所以見之。或言著者，亦見也。段，鄭伯弟也。何以知其為弟也？【補曰】知，亦見也。周、秦之書多以知為見。《左傳》曰「晉侯聞之而後喜」可知。《呂氏春秋》曰：「文侯不悅，知於顏色。」《經》文雖隱，皆有所見，問何以見之。殺世子母弟目君，以其目君知其為弟也。母弟，同母弟也。目君，謂稱鄭伯。【補曰】目，見也，謂斥見之。何休訓如此，後皆同也。君殺大夫公子則直稱國，而不斥見君，故目君則明其為世子母弟。不嫌段是世子者，非所嫌也。高澍然以為大夫、公子對國言，弟、世子對君言，屬辭之審。段，弟也，而弗謂弟；公子也，而弗謂公子；貶之也。【補曰】何休曰：「貶，猶損也。」文烝案：凡言貶者，皆謂有所卑損，後儒泛以褒貶作美刺字解，非也。疏曰：「叔肸為賢稱弟，則不賢去弟，乃是其常。而云「弗謂

弟，貶之也」者，天王殺其弟佖夫，以無罪而稱弟。今段不稱公子，又不稱弟，故云貶之。又且相殺之例與尋常異，故知去弟者貶之也。」文烝案：《傳》解「弗謂弟」，又稱「弗謂公子」者，連類并言之。段失子弟之道矣，【補曰】失道，故貶。賤段而甚鄭伯也。賤段，謂不稱公子公弟。甚鄭伯，謂目君也。【補曰】殺世子母弟以目君爲例者，皆是甚其惡，此亦從例。何甚乎鄭伯？甚鄭伯之處心積慮成於殺也。雍曰：「段恃寵驕恣，彊足當國。鄭伯不能防閑以禮，教訓以道，縱成其罪，終致大辟。處心積思，志欲殺弟。」【補曰】《爾雅》曰：「慮，謀也，思也。」《墨子》經曰：「慮，求也。」雍注取《左傳》譏失教爲說，理固如此，非《傳》意也，《傳》但據殺弟言之。處心積慮成於殺者，即上文能殺之謂，與殺佖夫言忍親、言甚之正同，譏失教之義自在其中矣。于鄆，遠也，猶曰取之其母之懷中而殺之云爾，甚之也。段奔走，乃至于鄆，去已遠矣。鄭伯猶追殺之，何以異於探其母懷中赤子而殺之乎？君殺大夫例不地，甚鄭伯之殺弟，故謹其地。【補曰】又以謹地見甚也。然則爲鄭伯者宜柰

何？緩追逸賊，親親之道也。君親無將，將而必誅焉。此蓋臣子之道，所犯在己，故可以申兄弟之恩。【補曰】《左傳》周公作《誓命》曰：「毀則爲賊，掩賊爲藏。」注首二句本《公羊》他處文。案《傳》及《公羊》並以爲鄭伯殺段，《左傳》曰：「段入于鄆，公伐諸鄆。五月辛丑，大叔出奔共。」又曰：「不言出奔，難之也。」杜預謂「段實出奔而以克爲文，明鄭伯志在於殺，難言其奔」。杜意克亦是殺，而事實是奔。劉敞則以爲實見殺，《左氏》誤也。今考《左傳》「五月」之文在「伐諸鄆」之下，與《經》似不合。

秋七月，天王使宰咺來歸惠公、仲子之賵。宰，官。咺，名。仲，字。子，宋姓也。婦人以姓配字，明不忘本，因示不適同姓也。妾子爲君，賵當稱謚，成風是也。仲子乃孝公時卒，故不稱謚。平王新有幽王之亂，遷於成周，欲崇禮諸侯。仲子早卒，無由追賵，故因惠公之喪而來賵之。賵例時，書月，以謹其晚。【補曰】天主義在莊三年《傳》。注首二句，《公羊》、杜預語。《公羊》又曰：「曷爲以官氏？宰士也。」何休曰：「天子上士以名氏通，中士以官錄，下士略稱人。」孔廣森曰：「《周禮》冢宰之屬，宰夫下大夫四人，上士八人，中士十有六人，旅下士三

十有二人。《左傳》載晉聘周之辭曰：「歸時事于宰旅。」然則下士稱宰旅，中士、上士稱宰士也。」文烝案：孔說得之。服虔說《左氏》以爲宰夫，而孔穎達引《宰夫職》曰「凡邦之弔事，掌其戒令，與其幣器財用」，以爲既掌弔事，或即充使，其說甚核。但服、孔依《左傳》以爲詎貶稱名本當稱字，則必以下大夫四人當之，不可通於宰士之說，非也。凡王臣不繫官，繫官者唯宰。宰者，謂大宰、卿也。小宰，中大夫也。宰夫，下大夫也，上士也，中士也。說見僖九年。何氏謂上士以名氏通，不知宰夫之上士亦稱官也。謂中士以官錄，不知中士非屬宰夫者亦稱氏也。唯謂下士略稱人，當依用之，蓋宰旅亦同矣。惠公，《史記》名弗湟，孝公稱子也。仲子繫惠公，猶成風繫僖公，非夫人之辭也。直言仲子、成風，則夫人之辭也。成風違禮有謚，故稱謚；仲子無謚，故稱字。注言贈皆當稱謚，非也。「仲字子氏」五句，本何休，「平王新有」六句，本鄭君《釋廢疾》，見《雜記》正義。鄭意謂《經》原其情，故不如文五年之榮叔不言來耳。《傳》例來者，接公之辭，言之者緩辭。《爾雅》曰：「之，閒也。」杜預曰：「歸者，不反之辭。」何休曰：「言歸者，與使有之辭，天地所生，非一家之有，有無當相通。」文烝案：舊史歸贈之屬皆月，君子或略之。

母以子氏。妾不得體君，故

以子爲氏。仲子者何？惠公之母，孝公之妾也。【補曰】明以惠公氏也。《左氏》、《公羊》皆以仲子爲桓公母，謂兼歸二贈。今《穀梁》獨異者，疏曰：「文九年，秦人來歸僖公、成風之榼。彼不先書成風，明母以子氏，直歸成風榼而已。成風既是僖母，此文正與彼同，知是惠公母也。鄭《釋廢疾》亦云：「若仲子是桓之母，桓未爲君，則是惠公之妾。天王何以贈之？則惠公之母亦爲仲子也。」鄭云亦爲仲子者，以《左氏》、《公羊》言仲子桓母故也。然則魯女得並稱伯姬、叔姬，宋女何爲不得並稱仲子也？」文烝案：疏申鄭確矣。《左氏》、《公羊》但知桓母爲仲子，而桓母仲子不見《經》者也。桓母不知沒於何時，即沒於桓時，而當時猶未敢立妾母爲夫人，史不得書薨、書卒、書葬，故《經》無文也。自成風以前，妾母無爲夫人者，故隱母聲子、桓母仲子、閔母叔姜卒葬皆不見《經》也。隱於妾祖母，則考宮以尊之，彼三母者又無追尊之事焉。疏引歸榼爲證，《公羊》於彼亦誤以爲兼二榼。禮：贈人之母則可，贈人之妾則不可，君子以其可辭受之。【補曰】不知天王爲是贈人母邪？贈人妾邪？君子受之，謂是贈我惠公之仲子，從其可辭也。昔孟子受宋、薛之餽

金，於宋將有遠行，而辭曰餽，於薛有戒心，而辭曰爲兵餽，皆以可受而受，此能以《春秋》決事者矣。凡言君子者，謂脩《春秋》之君子也。孔門或稱師爲君子，故《論語》曰：

「君子不以紺緇飾，君子溫而厲也。」《易》、《詩》、《書》、《儀禮》屢言君子，蓋伊尹所謂君國子民，是其本義。而孔子對哀公言君子者，人之成名，又其轉義也。凡《傳》解《經》多言辭，《經》之取義皆以辭見，故此曰「可辭」、二年曰「專行之辭」、三年曰「內辭」、「外辭」，此類不可悉數。知其辭則知其義，乃讀《經》之要法，實脩《經》之本旨也。「辭」之正字作「詞」，依《說文》當作「詁」。詁者，意內而言外也。其志，【補曰】志，記也。凡《傳》言「其志」者，猶《公羊》言「何以書」。何休曰：「諸言何以書者，問主書。」不及事也。

常事不書。【補曰】《荀子》曰：「吉行五十，奔喪百里，贈贈及事，禮之大也。」此不及事，故志。不及事者，鄭云「仲子早卒」，范云「仲子乃孝公時卒」是也。鄭、范特以《傳》云「不及事」意之耳。惠立凡四十六年，或卒在惠之世，亦未可知矣。時因惠公之喪贈仲子，必贈惠公可知。此年無葬惠公文，《左傳》謂十月庚申改葬，又以贈惠公爲緩。杜預以爲惠公葬在春秋前，明惠公之贈亦不及事。《傳》必以爲

一贈非二贈者，贈諸侯自是恒事，例所不志，及事與否，非所論也。若然，贈諸侯雖不及事不志，贈諸侯之妾母雖及事亦志，《傳》以妾母之義易明，不及事之義未著，故就一邊言之也。注言「常事不書」是也，但以及事爲「常事」非也。

「常事不書」，本《公羊》語，依《傳》則當言「恒事不志」。《傳》言「恒」，《公羊》言「常」，《傳》言「志」，《公羊》言「書」，以「恒」爲「常」者，避漢諱也。《公羊》於田狩祭祀兩言「常事不書」，此史例本爲恒事，而《經》因之也。《傳》於公出親迎言「恒事不志」，此《經》改從恒事之例。而《傳》特言之，以包其餘也。田狩祭祀之屬爲恒事，全不志者也，公出親迎之屬爲恒事，雖志而略其文，猶不志也。推校全《經》，一可見。贈者何也？乘馬曰贈，衣衾曰襚，

貝玉曰含，錢財曰賻。四馬曰乘。含，口實。【補曰】四馬者，謂大夫以上至天子也。士不備四，《士喪禮》下篇「公贈，玄纁，束馬兩」是也。《公羊》曰「車馬曰贈」，《荀子》作「輿馬」。孔廣森引《雜記》「諸侯相贈以乘黃大輅」，明亦得有車也。衣者，兼裳爲言。衾，被也。《士喪禮》：「小斂，絞、衾、祭服、散衣凡十九稱。大斂，絞、衾、二君襚、祭服、散衣、庶襚凡三十稱。」《喪大記》以爲大夫五十

稱，君百稱，襚之多少，無以言之。貝，水物，古者以爲貨玉者，蓋璧也。飯以貝，含以玉，通言之皆曰含。《雜記》：「天子飯九貝，諸侯七，大夫五，士三。」此所謂飯用米貝。《傳》不言米者，米非所歸也。《周禮》：天子不飯貝而有飯玉，鄭君曰「碎玉以雜米」。《白虎通》則云：「天子飯以玉，諸侯以珠，大夫以碧，士以貝也。」《周禮》有「含玉」，鄭君謂柱左右頤及在口中者。《雜記》：「諸侯相含，執璧將命。」《左傳》：陳子行使其徒具含玉，又聲伯夢食瓊瑰爲含象，則大夫含兼珠玉矣。錢者，金幣之名，以銅爲之，所以貿買物，通財用，故曰錢財。先儒說泉布以爲藏曰泉，行曰布。泉，錢古今字。但據《周禮》「泉府」鄭衆注云「故書泉或作錢」，則疑錢爲正字，泉爲假借字。非取水泉義也。何休曰：「賄，猶覆也。襚，猶遺也。賄，猶助也。」案：四句通釋《經》例。《荀子》書略同，又云「玩好曰賄」，又云「賄賄所以佐生也，贈襚所以送死也」。

九月，及宋人盟于宿。及者何？內卑者也。宋人，外卑者也。卑者，謂非卿大夫也。

【補曰】韋昭《國語》注曰：「卑，微也。」《左氏》劉歆、賈逵說。《春秋》之序，三命以上乃書於《經》，潁容以爲再命稱

人；至劉敞則謂三命以名氏通，再命名之，一命略稱人。案：此皆無以言之，凡非大夫皆曰卑者。大夫即卿，命大夫即命卿，全《傳》所同。注並言卿大夫，非也。此《傳》解「及兼爲內諸直書事者發例，解「宋人」兼爲列國盟會言人者發例也。列國皆有大夫，非大夫則稱人，稱人則知是卑者，此其常文。猶內之直書其事，諸小國本無大夫，雖大夫亦稱人，亦是卑之。楚之先無君無大夫，不論君臣，其常文皆稱人。戎、狄、吳、淮夷不論君臣，其常文皆無人。卑者之盟不日。凡非卿大夫盟，信之與不，例不日。【補曰】略之也。《傳》發通例。宿，邑名也。【補曰】此「宿」非國，故辯之。《左傳》後七年。「宋，鄭盟于宿」，當是宿國耳。

冬十有二月，祭伯來。【補曰】何休曰：「月者，爲下卒也。」例見下四年注。案：來朝時者，《經》例也，史例皆月。何休又曰：「十言有二，起十下復有二，非十中之二。」杜預《釋例》說有年、有鸛鵒之等，以十有一年、十有一月爲比。然則「有」與「又」異。○【撰異曰】祭，邑字，汲冢《穆天子傳》、《說文》皆作「鄒」。來者，來朝也。【補曰】以不稱使而言來，知是來朝。其弗謂朝何



也？寰內諸侯，天子畿內大夫有采地，謂之寰內諸

侯。【補曰】《文選》注引尹更始曰：「天子以千里爲寰。」

寰，古「縣」字。《爾雅》曰：「侯，君也。」王官各君其采地，

故亦稱諸侯。雖爲諸侯，不全爲國，故《書》曰「百里采，二

百里男邦」，明采無邦名，散文或通言耳。《左傳》周公之胤

有祭有凡，文之昭有毛、聃、原，皆采地之名。聃即九年之

南。《傳》曰南氏姓也，則凡采皆氏也。《孟子》曰：「天子

之卿受地視侯，大夫受地視伯，元士受地視子男。」《王制》

曰：「天子之三公之田視公侯，卿視伯，大夫視子男，元士

視附庸。」此言采地之制。《禮運》曰：「大夫有采，以處其

子孫。」或云采取其邑之租稅，不得有其土地人民。或云

采，官也，因官食地，故曰采。或訓爲供王事，或訓種菜。

前二說近是。《國語》晉文公屬百官大夫食邑，士食田，官

宰食加。《周禮》有賞田，有加田，有土田。土田即《孟子》、

《王制》之圭田，三者又皆在采地外。總之，天子之上士以

上皆有采地，《春秋》稱氏者皆以采氏矣。九年《傳》曰「季，

字也」，則伯、叔皆字也。定十四年《傳》例曰「天子之大夫

不名」，明自下大夫以上皆不名，與書卒者異例。但《公羊》

以渠伯糾爲下大夫，則凡直稱伯、叔、季者當是上中大夫。

此祭伯蓋上大夫。祭氏前有祭公謀父，後又有祭公，皆爲

三公，則此來朝者當爲卿，即是上大夫也。《經》又有稱父、稱子者，《穀梁》、《公羊》無明文，以意測之，稱子者上大夫，稱父者通上、中、下三級？非有天子之命，不得出會諸

侯。【補曰】言會以包朝聘。不正其外交，故弗與

朝也？【補曰】與，許也。後皆同。使人聘則不與使，自

來朝則弗與朝，皆同意也。《春秋》之義，主於撥亂反正，凡

《傳》或言不正其云云，或言非正也，皆以明君子取義所在，

與讓桓不正同。聘弓鏃矢不出竟場，束脩之肉

不行竟中，有至尊者，不貳之也。聘遺所以結二

國之好，將彼我之意。臣當稟命於君，無私朝聘之道。【補

曰】疏曰：「麋信云：『聘，問也。』古者以弓矢相聘問。」文

烝案：若鄆陵之戰，楚子使工尹襄問郤至以弓，衛出公自

城鉏使以弓問子輅是也。《爾雅》曰：「金鏃翦羽謂之鏃。」

孫炎曰：「金鏃斷羽使前重也。」《考工記》曰：「鏃矢參分，

一在前，二在後。」《毛詩傳》曰：「鏃矢參亭。」《方言》曰：

「關西曰箭，江淮謂之鏃。」又曰：「凡箭鏃廣長而薄鏃謂之

鏃。」郭璞謂鏃即今之鏃箭也。竟場者，疏曰：「竟是疆界

之名，至此易主，故謂之疆場。」文烝案：《詩》曰「疆場翼

翼」，《毛傳》：「場，畔也。」《廣雅》：「疆場，限畔界也。」孔穎



達謂田之疆畔。至此易主，名之爲場，義與此同。古祇作「易」字，故《周易》陸續本「喪羊于場」，諸家皆作「易」也。《周禮》鄭衆注、《說文》皆曰：「脩，脯也。」鄭君注曰：「薄析曰脯，捶之而施薑桂曰鍛脩。」又曰：「脩鍛，脯也。」脩與脯，析言則異，統言則同也。每一脯爲一櫝，《鄉射記》曰：「櫝長尺二寸，一櫝謂之一挺，亦曰一胸。」束者十挺也，凡物十曰束。不行，猶不出，易字以便句耳。《檀弓》曰：「古之大夫，束脩之間不出竟。」王引之曰：「《玉篇》：『貳，並也。』《左傳》注：『貳，敵也。』天子聘遣諸侯，天子之臣亦聘遣諸侯，則是與天子相比並，相敵耦，故謂之貳。人臣不敢並於至尊，故無外交，故曰有至尊者不貳之也。」《郊特牲》曰：「大夫執圭而使，所以申信也；不敢私覲，所以致敬也。而庭實私覲，何爲乎諸侯之庭？爲人臣者無外交，不敢貳君也。」正與此同義。范注、楊疏以不稟命自專爲貳，《禮記正義》又解爲二心，皆非其訓。文烝案：聘遣器物，比並至尊，即專命之事也。六句申言不得外交之義，兼王臣及諸侯臣言。

**公子益師卒。**【補曰】孝公子衆父也。何休曰：

「公子者，氏也，諸侯之子稱公子，公子之子稱公孫。」案：

此不去氏，義在後五年《傳》。大夫日卒，正也；君之卿佐，是謂股肱，股肱或虧，何痛如之？故錄其卒日以紀恩。【補曰】許桂林曰：「正者，言常理也，常例也。」文烝案：大夫日卒，諸侯日卒，《傳》皆曰正也。又曰「葬時正也」，「日弑正卒也」，「子卒日正也」。又他釋《經》每曰正也，並悉同解，而其事各異。注前四句，《左傳》晉屠蒯語。不日卒，惡也。罪故略之。【補曰】疏曰：「益師之惡，《經》、《傳》無文，蓋《春秋》前有其事。麋信云：「益師不能防微杜漸，使桓弑隱。若益師能以正道輔隱，則君無推國之意，桓無篡弑之情，所言亦無案據也。」文烝案：此《傳》發通例也，凡大夫書卒者，公家皆有恩禮施焉，而後史書於策。晉荀盈卒未葬，平公飲酒作樂而屠蒯譏諫，知當時卿佐之喪，君爲之變，有常禮矣。至君子脩《經》，以日不日分別見義，仍其舊而存日者爲正，變其例而去日者爲惡，而正與正、惡與惡又各有別，則又有賢之、疏之之文。或并没其卒，皆據舊史而加損之。若柔、溺、單伯之不卒，則史所本無也。

二年春，凡年首月承於時，時承於年，文體相接，

《春秋》因書王以配之，所以見王者上奉時承天，而下統正萬國之義。然《春秋》記事，有例時者，若事在時例則時而不月，月繼事末則月而不書王，書王必皆上承春而下屬於月，表年始事，文莫之先，所以致恭而不黷者，他皆放此，唯桓有月無王以見不奉王法爾。公會戎于潛。南蠻北狄，東夷西戎，皆底羌之別種。潛，魯地。會例時。【補曰】《曲禮》曰：「諸侯相見於郤地曰會。」《左傳》曰：「會以訓上下之則，制財用之節。」戎直以號舉者，啖助曰：「凡戎狄舉號，君臣同辭。」注「南蠻」二句本杜預。杜元文曰：「戎狄夷蠻，皆氏羌之別種也，皆謂居中國，若戎子駒支者。」杜此言甚當。凡《春秋》之戎狄夷蠻，皆在《禹貢》職方九州之內，非《爾雅》所云「九夷八狄七戎六蠻謂之四海」者也。八荒之內為四海，四海之內為九州五服。胡渭說《禹貢》曰：「古所謂中國者，甸侯綏三服之地，所謂四夷者，要荒二服之地，皆九州之內也。所謂四海者，九州之外，東夷西戎，南蠻北狄，王者所不治也。」胡說是也。舊史會皆具月。○【撰異曰】陸淳《纂例》曰：「『潛』，《公羊》作『岑』。」案：今《公羊》不作「岑」。《書·禹貢》「沱潛」，《毛詩》「養魚之潛」，《史記》、《韓詩》皆作「潛」。會者，外為主焉爾，

【補曰】會者，期定於彼而我往會彼，故曰外為主，是魯客而外主也。凡會而復盟者，如公及邾儀父盟于昧及宋人盟于宿，此類皆內為志也。若後文公會齊侯盟于艾之屬，則外為主也。會而不盟者，此潛之屬，皆外為主。若是內為志，文不得稱及以會，其書之，則曰衛侯會公于沓，鄭伯會公于渠，邾子來會公。《傳》發內為志外為主之例，則用兵從例可知，故四年伐鄭、十一年入許皆不發《傳》。知者慮，察安審危。【補曰】疏曰：「謂卿為司徒，主教民察民之安危也。」義者行，臨事能斷。【補曰】疏曰：「謂卿為司馬，司馬主斷制也。」仁者守，衆之所歸，守必堅固。【補曰】疏曰：「謂卿為司空，司空主守也。」文烝案：慮、行，皆言出竟也，守言守國也。《大戴禮·虞戴德》、《荀子》書並云：「諸侯相見，卿為介，以其教士畢行，使仁守。」又《白虎通》曰：「王者出，一公以其屬守，二公以其屬從。」《毛詩傳》曰：「使文武之臣征伐，與孝友之臣處內。」謂尹吉甫、張仲也。○仁者守之為守國，猶《論語》「仁能守之，莊以涖之」，謂守官涖官也。《易·繫辭傳》「何以守位曰仁」，語意亦同矣。穀梁子諸言仁者，皆朱子所謂愛之理也。仁較深於愛，如言仁妻愛子，仁民愛物皆是。若以心之德言，則如

《左傳》仲尼曰：「古也有志：克己復禮，仁也。」晉曰季曰：「臣聞之，出門如賓，承事如祭，仁之則也。」《管子》書管仲曰：「語曰：非其所欲，勿施於人，仁也。」此類乃衆善之大名，不可概論。有此三者然後可以出會。【補曰】

言國有此三者之臣，或從君出，或留居國，然後君可會諸侯。《春秋》盟會雖多，三者得人則黜。《傳》蓋引古書成文，通爲凡會言其正法，乃《春秋》文外之意。會戎，危公也。無此三者，不可以會，而況會戎乎？【補曰】注非

也。此與上五句文意不相屬，乃專解《經》志會戎意也。以華會戎，事有可危，史有其文，君子取其義也。《注》誤連上爲說，疏申之曰：「人君之行，二卿從，一卿守，然後可會中國之君。桓公無三臣之策而出會齊侯，身死於外，故後桓十八年重起例，明其不可，是以此注云「無此三臣，不可以會，而況會戎乎」，兼爲桓公生此意。」楊氏說亦明暢，其實非《傳》意也。又曰「此既危公而不月」者，徐邈云：「會戎雖危，有三臣之助，不至於難，故不月也。」文烝案：范注既誤以無三臣爲危，徐尤失之。戎而言會，即爲危矣，不須復加月。

夏五月，莒人入向。人例時，惡甚則日，次惡

則月，他皆放此。【補曰】《左傳》例曰「弗地曰入」。《公羊》曰：「人者何？得而不居也。」稱人者，小國無師無大夫，非君將，則以稱人爲常，皆從微者之文，皆是微之，與下鄭人略有異也。舊史人皆具月日。人者，內弗受也。

人無小大，苟不以罪，則義皆不可受。【補曰】《傳》謂凡稱人者是內弗受之辭，注非也。言人則不以罪明矣。向，我邑也。自魯而言，故曰我也。【補曰】《左傳》以此爲向

國。杜預據《漢志》云：「沛國向縣，古向國。」謂即譙國龍亢縣東南之向城，於今爲鳳陽府之懷遠縣地。而莒爲今沂州府之莒州，相距且千里。蕞爾之邦，懸師遠入，事必不然。顧炎武引于欽《齊乘》說以爲沂州西南一百里之向城鎮，即後篇城向、盟向、取向之向，於今爲莒州地是矣。呂大圭曰：「讀《春秋》之法，《經》之所有則從《經》。」文烝案：諸伐內邑，直言伐我某鄙，常文也。言伐某鄙，又言圍郕、圍成，變文也。直言人向，尤變文也。其說見下。舊史當先言伐某鄙，後言人向。

無佞帥師入極。二千五百人爲師。【補曰】無佞，公子展之孫。師者，衆之通名，言師猶言軍，如後世之言兵也。范泥《周禮》人數，非也，說見襄十一年。此事蒙

上月。○【撰異曰】倭，《左氏》、《公羊》作「駭」，後同。奇倭非常，與「駭」聲義皆同也。帥，《公羊》作「率」，終《春秋》皆然。《公羊》於「帥師」字本皆作「率師」，而唐石經《公羊》此作「帥」，僖十五年作「率」，以後「率」、「帥」錯出，皆由轉寫亂之。人者，內弗受也。極，國也。諱滅同姓，故變滅言人。《傳例》曰：「滅國有三術，中國日，卑國月，夷狄時，極蓋卑國也。」內，謂所入之國，非獨魯也。【補曰】疏曰：「內弗受復言之者，恐內外不同，故兩發以同之。」文烝案：「內滅皆諱言取，此言人者，蓋欲與人向連文，說見下。《公羊》人、取並為諱。孔廣森以為易曰取，難曰入。孔意以「帥師」為文，則不得但言取，頗得其辭，未盡其義也。人向為邑，人極則為國，故《傳》特備文。賈逵說《左氏》以極為戎邑，非也。舊史凡滅皆具日。苟焉以人人為志者，人亦人之矣。【補曰】此合上人向言之，我欲入極，則人亦人我向矣。事在而志著，全《經》推見至隱之教也。志動而機應，此《經》屬辭比事之旨也。凡外來伐者皆言伐我某鄙，今特變言人向，以顯茲義。然則人極變取言人，實為此歟？春秋亂世，日尋干戈，受師出師，內事先見，若同常文，無以寄義，故因連文書人。蓋曰天道好還，

貪兵必死，己所不欲，勿施於人，乃治國之要道，開篇設戒，餘從同矣。《春秋》以一心正萬心，《傳》諸解《經》曰探邪志，曰處心積慮，曰以人人為志，此類皆卓絕於《左氏》、《公羊》之外。呂祖謙曰：「史，心史也。記，心記也。」不稱氏者，滅同姓，貶也。【補曰】《公羊》曰：「無駭者何？展無駭也。」考《左傳》，無駭死而後命為展氏，則史本書無倭，不書展無倭。但君子脩《經》，大夫例稱氏。《左傳》無駭之官，司空也，當追氏之，使《經》例前後畫一。今不追氏，是知為滅同姓貶之，抑或《左氏》命族之文不可依用矣。《後漢書》李固曰：「《春秋》褒儀父以開義路，貶無駭以閉利門。」案：貶無倭即所以譏公也，不從隱不爵大夫去氏者，後卒從例，則此處稱氏，無所嫌也。滅同姓為伐本，說具僖二十五年。

秋八月庚辰，公及戎盟于唐。《傳例》曰：

「及者，內為志焉爾。唐，魯地。」【補曰】唐，蓋即下五年之「棠」，此與上會非一事也。上是外為主，會而不盟，此是內為志，會而復盟，與桓元年盟越同。又論之於彼。

九月，紀履緌來逆女。不親逆則例月，重錄之，親迎則例時。【補曰】《爾雅》曰：「逆，迎也。」注本何

休。○【撰異曰】履綸，《左氏》作「裂繻」。陸淳曰：「誤也。」逆女，親者也。親者，謂自逆之也。【補曰】何休曰：「禮所以必親迎者，所以示男先女也。於廟者，告本也。夏后氏逆於庭，殷人逆於堂，周人逆於戶。」徐彥曰：「即《書》傳「夏后氏逆於廟庭」云云是也。」文烝案：亦即《詩·齊風》之俟著、俟庭、俟堂，蓋齊、魯、韓三家義也。著，即「戶」，三家作「户」。使大夫，非正也。【補曰】非正，故志之，微者則不志。諸侯來親迎亦志，內出親迎則削，史文不志，皆常例也。以國氏者，爲其來交接於我，故君子進之也。《傳例》曰：「當國以國氏，卑者以國氏，進大夫以國氏，國氏雖同而義各有當。公子公孫篡君代位，故去其氏族，國氏，以表其無禮，齊無知之徒是也。若庶姓微臣，雖爲大夫，不得爵命，無代位之嫌。既不書其氏族，當知某國之臣，故國氏以別之，宋萬之倫是也。履綸以名繫國，著其奉國重命，來爲君逆，得接公行禮，故以國氏重之。成九年宋不書逆女，以其逆者微，今書履綸亦足知其非卑者。《公羊傳》曰：「《春秋》貴賤不嫌同號，美惡不嫌同辭。」《左氏》舍族之例，或厭以尊君，或貶以著罪。此《傳》隱公去即位以明讓，莊公去即位以表繼弑，

文同而義異者甚衆，故不可以一方求之。【補曰】交接於我者，謂交接公也。注論國氏之例，非《傳》意也。《傳》言爲其來交接於公，故進之言紀履綸，明從小國無大夫例也。小國無大夫者，雖是大夫，皆直稱人，與列國卑者同例。若有不可不目言者則不氏，而直以國氏，亦與列國卑者同例。履綸之進，所謂不可不目言者也。《傳》唯於曹、莒言其無大夫，以曹、莒之列盟會，次於許，長於邾、滕以下。言曹、莒則諸小國該之，故何休言紀無大夫，最爲得旨。而范乃以宋例紀，謂履綸非卑者，誤矣。在紀則履綸非卑者，故書之，在《春秋》則履綸亦卑也，故書之而以國氏。

### 冬十月，伯姬歸于紀。伯姬，魯女。【補曰】公

羊，杜預語也。何休曰：「不稱公子者，婦人外成，不得獨繫父母。」文烝案：女子許嫁則稱字，見僖九年《傳》。凡女子不以名行，若曰與女簡璧，則紀述之辭也；曰君之妾棄，則謙抑之辭也；曰請使重見，則親昵之辭也。何休又曰：「書者，父母恩錄之也。禮，男之將取，三日不舉樂，思嗣親也。女之將嫁，三夜不息燭，思相離也。內女歸例月，恩錄之。」禮，婦人謂嫁曰歸，反曰來歸，嫁而曰歸，明外屬也。反曰來歸，明從外至。反，謂爲夫家所遣。【補

曰【左傳】出曰來歸，《公羊》大歸曰來歸。從人者也。

【補曰】從者，從其教令，謂從夫也，從夫故稱歸。婦人在

家制於父，既嫁制於夫，夫死從長子，婦人不

專行，必有從也。【補曰】此承上備言之也。制於父，

制於夫，亦從也。《喪服傳》、《郊特牲》、《大戴禮·本命》、

劉向《列女》、鄒孟軻母、魯之母師、齊杞梁妻《傳》，皆略同。

伯姬歸于紀，此其如專行之辭何也？曰非

專行也，吾伯姬歸于紀，故志之也。【補曰】疏

曰：「麋信云：『不稱使者，似若專行也。』」謂決魯夫人至并

稱逆者。此直云「伯姬歸」，故問之下云「吾伯姬歸，故志之

也」，明佗逆者不足錄，故與內夫人至異也。其不言使

何也？怪不言使履綸來逆女。逆之道微，無足道

焉爾。言君不親迎而大夫來逆，故曰微也。既失其大，

不復稍明其細，故不言使履綸也。【補曰】逆女本無使道，

使則逆之道微矣，故不足道。此道，言也，稱也。趙汭曰：

「納幣使人，禮也；逆女使人，非禮也。非禮者，禮無其文，

禮無其文而稱使，是制禮也。」

紀子伯、莒子盟于密。密，莒地。【補曰】不日

例在後八年《傳》。○【撰異曰】伯，《左氏》作「帛」，杜預以

爲裂繻字。案趙匡引《汲冢紀年》同，此《左氏》謬而《竹書》

因之也。趙氏曰：「《左傳》云『魯故也』，《竹書》自是晉史，

亦依此文而書，何哉？明不足據。」或曰紀子伯、莒

子而與之盟，紀子以莒子爲伯，而與之盟。伯，長也。

【補曰】注「伯，長」，《爾雅》文。古有東西二伯，春秋時曰王

官伯，曰侯伯。又一州之長爲牧，亦曰伯，即方伯也。或

曰年同爵同，故紀子以伯先也。年爵雖同，紀子

自以爲伯而先。【補曰】此兩「或曰」與下八年異，師並疑

之，《傳》亦並載之，非以前說爲較長也。《傳》於師所授，無

疑信皆存。

十有二月乙卯，夫人子氏薨。夫人薨例曰。

夫人曰薨，從夫稱。【補曰】《論語》曰：「邦君之妻，君稱之

曰夫人，邦人稱之曰君夫人。」何休曰：「夫人以姓配號，義

與仲子同。《傳》曰：「言夫人必以其氏姓。」何休又曰：「日

者，恩錄之，公夫人皆同例也。」夫人薨不地。夫人無

出竟之事，薨有常處。【補曰】常處者，小寢也。說見莊三

十二年。夫人者，隱之妻也。【補曰】隱稱公，故妻

稱夫人。隱雖將讓桓，猶在君位，妻之喪或降禮，亦從正書之。疏曰：「《左氏》以爲桓母仲子。桓未爲君，其母稱夫人，是亂嫡庶也。《公羊》以爲隱母，則隱見爲君，何以不書葬？若以讓不書葬，何爲書夫人子氏薨也？」卒而不書葬，夫人之義，從君者也。隱弑賊不討，故不書葬。【補曰】君子去隱之葬，因并去其夫人之葬，明亦非以爲史法。哀十二年《疏》曰：「隱夫人從夫之讓，故不書葬。」程子曰：「公在故不書葬，於此見夫婦之義。」葉夢得曰：「先薨不葬，待君而後葬，周道也。」胡安國曰：「明順。」胡銓曰：「合葬。」張洽曰：「葬禮未備。」諸說皆與注異，於《傳》「從君」之義亦可通也。不言薨言卒者，《傳》便文。《左氏》、《公羊》解《經》皆以書不書立義，此《傳》多言志，少言書，古人用字之例，各有不同也。

鄭人伐衛。《傳例》曰：「斬樹木、壞宮室曰伐。

伐例時。【補曰】注引《傳例》在後五年《傳》。人，微者也，義在僖二十六年《傳》。微者，謂非卿將，言將卑也。稱人則將卑可知，不稱師則師少亦可知，是其常文也。若將尊而亦稱人，文以前則有之。疏曰：「文承月下者，日月自爲魯夫人薨。」文烝案：舊史伐皆具月，君子略之，從時例。

三年春，王二月，【補曰】何休以爲二月、三月皆有王者，二月殷正月，三月夏正月，王者存二王之後，使統其正朔，所以通三統。《漢書·律曆志》述劉歆之言亦云：

「春三月，每月書王，元之三統也。」今宜從上二年范注爲是，漢儒說不可依用，在夏、殷皆是王正月耳。既言二月、三月，則王爲周王明矣。孔穎達已有是論。己巳，日有

食之。杜預曰：「日行遲，一歲一周天。月行疾，一月一

周天，一歲凡十二交會。然日月動物，雖行度有大量，不能不小有盈縮，故有雖交會而不食者，或有頻交而食者。唯正陽之月，君子忌之，故有伐鼓用幣之事。」京房《易傳》曰：「日者陽之精，人君之象，驕溢專明，爲陰所侵，則有日食之災。不救，必有篡臣之萌；其救也，君懷謙虛，下賢受諫任德，日食之災爲消也。」【補曰】《大戴禮·誥志》：「孔子曰：『古之治天下者必聖人。聖人有國，則日月不食，星辰不隕。』」《漢書·天文志》：「古人有言曰：『天下太平，

①「隕」，原訛作「孛」，據中華書局點校本《大戴禮記·誥志》改。



五星循度，亡有逆行，日不食朔，月不食望。」《唐書·曆志》一行之言曰：「《小雅》『十月之交，朔月辛卯』，虞卿以曆推之，在幽王六年。《開元曆》定交分四萬三千四百二十九，人食限，加時在晝。交會而食，<sup>①</sup>數之常也。然而君子猶以爲變，詩人悼之。然則古之太平，日不食，星不孛，蓋有之矣。若過至未分，月或變行而避之；或五星潛在下，饗侮而救之；或涉交數淺，或在陽曆，陽盛陰微則不食；或德之休明，而有小眚焉，<sup>②</sup>則天爲之隱，雖交而不食。此四者，皆德教之所由生也。」又曰：「黃初以來，治曆者始課日食疏密，及張子信而益詳。劉焯、張胃玄之徒自負其術，謂日月皆可以密率求，是專於曆紀者也。以《戊寅》、《麟德曆》推《春秋》日食，大最皆入食限。於曆應食而《春秋》不書者尚多，則日食必在交限，其人限者不必盡食。開元十二年七月戊午朔，於曆當食半強，自交阨至朔方，候之不食。十三年十二月庚戌朔，於曆當食太半，時東封泰山，還次梁、宋間，亦不食。雖算術乖舛，不宜如此，然後知德之動天，不俟終日矣。若因開元二食，曲變交限而從之，則差者益多。」又曰：「自開元治曆，史官每歲校節氣中晷，因檢加時小餘，雖大數有常，然亦與時推移，每歲不等。杜預云：『日月動物，不能不小有盈縮，有雖交會而不食者，有

頻交而食者。』是也。」又曰：「使日食皆不可以常數求，則無以稽曆數之疏密。若皆可以常數求，則無以知政教之休咎。」文烝案：《大戴》載《三朝記》、《漢志》引古語，後儒或疑之，然而魯史所記，悉本舊章，聖人之《經》，所以示警。

陳兵伐鼓，古之遺型，入門廢朝，禮之明訓。一行著論，推校精詳，大概得之，故張洽深取之。漢建安中，太史上言正旦當日食，劉邵以爲梓慎裨竈，古之良史，猶占水火，錯失天時。《禮記》稱諸侯旅見天子，及門不得終禮者四，日食在一。然則聖人垂制，不爲變豫廢朝禮者，或災消異伏，或推術謬誤也。苟或善其言，日竟不食，此足與一行說相證矣。堯、舜、禹時，歷年多無日食，《左傳》引《夏書》乃有辰不集房之事。楊簡之言也。春秋二百四十二年，日食三十六，并哀十四年爲三十七。而前漢二百一十二年，日食五十三。東漢而下，轉益加數，或一歲而三食，大約世愈降則

①「食」，中華書局點校本《新唐書·曆志三下》作「蝕」。此段引文中「食」字，中華書局點校本《新唐書·曆志三下》皆作「蝕」。

②「而」，原訛作「日」，據中華書局點校本《新唐書·曆志三下》改。



日食愈數，此大運盛衰之候，與其他災異不同。趙汭之言也。杜預謂唯正陽之月伐鼓用幣者，本《左氏》說，蓋未可據。諸日食皆爲記異，通謂之災。《左傳》晉士文伯論弭災之政，一曰擇人，二曰因民，三曰從時。京房所論，其意相近。范於諸災異所引，用《易傳》、《五行傳》、《月令》、《穀梁說》及劉向、許、鄭等語，頗甚用意。以其有理，皆當存之，皆可不必深論。具說於後九年《傳》。○【撰異曰】食，本亦作「蝕」，後同。《左氏》同。諸稱三家別本之異，皆據陸德明《音義》。言日不言朔，食晦日也。【補曰】凡食晦日者，范以爲皆即本月之晦，故於宣十年、十七年日食下更書日者，並以爲閏月。徐邈以爲皆是前月之晦。疏引徐曰：「己巳爲二月晦，則三月不得有庚戌明也。宣十年四月丙辰、十七年六月癸卯，皆是前月之晦也。則此己巳正月晦也冠以二月者，蓋交會之正，必主於朔。今雖未朔而食，著之此月，所以正其本，亦猶成十七年十月壬申而繫之十一月也，取前月之日而冠以後月，故不得稱晦。以其不得稱晦，知非二月晦也。」李廉曰：「徐說是也。」文烝案：日食必在朔，故一行曰「日月合度謂之朔，無所取之，取之蝕也。」但當時日官日御失曆，以爲前月之晦，故君子書後月以正之。謂如此己巳食者，乃二月也，非正月也。桓十七

年十月食二日，亦曆之失，故不言其日而言朔。謂此十月食者，乃朔也，非二日也。莊十八年三月、僖十五年五月，皆食朔日之夜，故不言日不言朔，以明之也。《春秋》之文，簡而有法，於此見焉。當時所以有失曆者，蓋曆家有平朔，有定朔，自後漢劉洪《乾象曆》以前皆用平朔，有大月之晦日已合辰者，有承小月之後而合辰於二日者，故或失之也。君子正之，即定朔之理也。凡日食三十六，朔二十六，晦七，夜二，二日一。《公羊》併二日於朔，以晦爲二日，以夜爲晦，誤矣。杜預《長曆》推此己巳乃二月朔。又一行《大衍曆》推宣八年七月甲子朔日食，《長曆》推宣十年四月丙辰朔，是年閏五月。《大衍曆》亦推四月丙辰大日食。又《長曆》推宣十七年六月癸卯朔，此四條皆合徐說。其曰有食之何也？【補曰】曰，音聿。吐者外壤，食者內壤，凡所吐出者，其壤在外；其所吞咽者，壤入於內。【補曰】疏曰：「壤」字，爲《穀梁》音者皆爲「傷」，徐邈亦作「傷」。麋信云：「齊、魯之間謂鑿地出土、鼠作穴出土皆曰壤。」或當字從「壤」，蓋如麋信之言也。」文烝案：壤，亦通作「場」。《埤倉》云：「場，鼠埴也。」郭璞《方言》注音「傷」。闕然不見其壤，有食之者也。今日闕損而

不知壤之所在，此必有物食之。有，內辭也。或，外

辭也。邵曰：「食者內壤，故曰內辭；吐者外壤，故曰外

辭。《傳》無外辭之文者，蓋時無外壤也。而曰「或外辭」

者，因事以明義例爾，猶《傳》云「三穀不升謂之饑，四穀不

升謂之康」，亦無其事。」【補曰】邵注非也。《注》以「內辭」

指食，「外辭」指吐，吐非《經》所宜書也。饑康之不書，包於

饑中，亦非無其事也。此二句蓋言「有」爲疑辭，與「或」字

同例，但「有」之疑爲內辭，其辭最微，如「日有食之」是也。

「或」之疑爲外辭，其辭較著，如《周易》「或躍在淵」之類。

文言《傳》云或之者，疑之也是也，若通言之，其義不異，故

周、秦、漢人之書「有」與「或」多同用。《管子》曰：「或者

何？若然者也。」《墨子》曰：「或也者，不盡也。若然，不

盡然」，內外辭得兼通也。莊十八年《傳》曰「一有一亡曰

有」，爲諸「有」字發例，此則別爲一例。故即《經》所無之

「或」字，分內外辭以明之。「內」，即上下文「內」字，「外」，

非外壤之「外」。有食之者，內於日也。內於日，以

壤不見於外。【補曰】此申上「內辭」也。《韓非子》曰：「日

月暈圍於外，其賊在內。」言之亦緩辭，尊而詳之。案：

《詩·小雅》曰：「十月之交，朔月辛卯，日有食之。」明古人

文例如此。《史記·秦本紀》厲共公三十四年，日食。昭襄

王六年，日食，晝晦。莊襄王三年四月，日食。凡日食三

見。《六國表》秦厲共公三十四年，日食，晝晦，星見。躁公

八年六月，日月食。簡公五年，日食。惠公三年，日食。獻

公三年，日食，晝晦。十年，日食。十六年，日食。昭王六

年，日食，晝晦。莊襄王二年，日食。凡日食九見。此十二

文皆直書食，不云有食之，蓋據《秦記》舊文，失魯史立文之

法矣。其不言食之者何也？【補曰】疏曰：「不言

食之者，謂不書月食日。」文烝案：焦贛《易林比之萃》曰：

「團團白日，爲月所食。」《家人》之《小畜》「團團」作「杲杲」。

知其不可知，知也。【補曰】末「知」字，依今音讀去

聲，即《爾雅》《說文》「智」、「智」字。《墨子》經曰：「知，材

也。」《經說》曰：「知也者，所以知也。」而必知此今去聲字

也。又《經》篇及《莊子》並曰：「知，接也。」《經說》曰「知也

者，以其知過物而能貌之」，此今平聲字也。《論語》曰：

「知之爲知之，不知爲不知是知也。」末「知」字亦音「智」爲

是。干寶《周易注》引《傳》曰：「不求知所不可知者智也。」

王念孫以爲古書「智慧」之「智」或作「知」，「知識」之「知」亦

或作「智」。據《墨子》他處及《管子》、《呂氏春秋》、《韓非

子》、《戰國策》、《淮南子》諸書有以「智」爲「知」者也，二字音義互得通借，疑其本無定字，殆不然矣。何休以爲不言月食日者，其形不可得而覩，故疑言日有食之與《傳》義相發。而《說文》則曰：「有，不宜有也。」《春秋傳》曰：「日月有食之。」从月又聲，其引《經》既衍「月」字，其說又非也。有爲不宜有，蓋依放一有一亡之義而失之。至以月食日爲「有」之本義，則與「知其不可知」之義適相刺謬，必非蒼頡作書之悞矣。許氏書往往有傳會字義穿鑿字形者，不可不察。○《春秋》書日食，不書月食，史法之舊也。案：《詩·小雅》曰：「彼月而食，則維其常。此日而食，于何不臧？」《漢書·天文志》引《詩傳》曰：「月食非常也，比之日食猶常也，日食則不臧矣。」此足明陰陽尊卑之義。齊履謙以爲常者謂常數，時月食已有術可推，故《春秋》不書，夫安見古人必不能推日食乎？此言似是而非。說又見襄二十一年。

### 三月庚戌，天王崩。平王也。【補曰】《史記》

名宜曰，幽王太子。或作宜咎。日者，蓋以明正。《傳》於下諸侯發例，天子當亦同矣。王崩九皆日，不書葬，例在莊三年《傳》。高曰崩，梁山崩。厚曰崩，沙鹿崩。【補曰】《墨子》經曰：「厚，有所大也。」尊曰崩，天子之崩

以尊也。【補曰】何休曰：「崩，大毀壞之辭。薨，小毀壞之辭。卒，猶終也。」其崩之何也？【補曰】問魯《春秋》何以崩天子？以其在民上，故崩之。【補曰】史承赴書崩，君子從而取義焉。何休曰：「爲天下恩痛王者。」其不名何也？【補曰】據諸侯卒名。大上故不名也。夫名者，所以相別爾。居人之大，在民之上，故無所名。【補曰】大上者，最上之稱，即上文「在民上」也。天下一人，故不必名，又不敢斥名。

### 夏四月辛卯，尹氏卒。文三年王子虎卒不日，

此日者，錄其恩深也。○【撰異曰】尹，《左氏》作「君」，以爲隱母聲子。楊時曾問程伯子，伯子曰：「聲子而書曰尹氏，是何義？當以尹氏爲正。」尹氏者何也？天子之大夫也。不書官名，疑其譏世卿。【補曰】案：譏世卿者，《公羊》之義，《傳》無是意也。不書名者，時魯人在周，知其卒，史因志之，非彼來赴，故略其名，而君子仍之也。或者君前臣名，時嗣王當喪未君，故不名也。不稱「尹子」者，襄內諸侯不得稱爵以卒，劉卷卒亦不言「劉子卷」也。《傳》言大夫，當是上大夫。上大夫者，卿也，尹氏爲卿，故

有世卿之說。○《公羊》於尹氏、齊崔氏並曰「譏世卿，世卿非禮」。於黑肱來奔曰「大夫之義不得世」。《五經異義》載《公羊》、《穀梁》說卿大夫世則權并一姓，妨塞賢路，專政犯君，故《經》譏周尹氏、齊崔氏也。《穀梁傳》本無此意。《思義》云爾者，《穀梁》家依放《公羊》爲之也。《左傳》隱八年衆仲曰：「官有世功，則有官族。邑亦如之。」《異義》載《左氏》說卿大夫得世祿，不得世位。父爲大夫，死，子得食其故采。如有賢才，則復升父故位也。文彙案：《左氏》與《公羊》有同有異，而左氏爲備，言卿大夫不世位，是其同也。《大戴禮·千乘》孔子對哀公曰「爵不世」，《孟子》述齊桓葵丘之命曰「士無世官」，皆其證也。言子世父祿，賢則世位。又論世功官族，是其異也。《商書》盤庚之誥曰：「世選爾勞，予不絕爾善。」《周易》訟六三曰「食舊德」，許慎以爲父位三爲三公，二爲卿大夫。食舊德者，謂食父故祿。《詩·文王篇》曰：「凡周之士，不顯亦世。」《毛傳》曰：「不世顯德乎？士者，世祿也。」鄭箋曰：「謂其臣有光明之德者亦得世世在位，重其功也。」又《緇衣》序曰：「美武公也。父子並爲周司徒。」毛傳曰：「有德君子宜世居卿士之位焉。」又《干旄》曰：「在浚之郊。」《毛傳》曰：「古者臣有大功，世其官邑。」又《裳裳者華》序曰：「古之仕者世祿，刺幽

王棄賢者之類，絕功臣之世。」《論語》曰：「興滅國，繼絕世。」許慎以爲國謂諸侯，世謂卿大夫。《孟子》曰：「文王之治岐也，仕者世祿。」又曰：「所謂故國者，有世臣之謂也。」此類皆《左氏》之證也。《公羊》不言得世祿與否，而《王制》曰：「內諸侯祿，外諸侯嗣。」又曰：「諸侯世子世國，大夫不世爵。」又曰：「諸侯之大夫不世爵祿。」蓋謂天子之大夫但得世祿，諸侯之大夫并祿不世。疑《公羊》意亦相同，是一偏之說也。大氏古者官人之法，本與封建相輔，故子得世父祿，賢則并世位，其有大功德者則世世在位，所以差別取舍，實聯邦家，天子諸侯，實無異制。溯夫盤庚之誥，則知周因於殷，迨春秋以來，尤唯貴戚世臣是賴，雖以罪誅，皆不絕世，積貴所在，人望有歸。陳亮嘗言孟子以爲故國必有世臣，至於不得已而後使卑踰尊，疏踰戚。使人君皆得魯季友、叔肸、齊高子之倫而用之，則亦何厭於世臣而欲求天下特起之賢於不可知之際哉？愚謂陳氏此論最爲明通，設以夫子爲政於天下，亦必仰稽前典，俯順時宜。庶姓雖參，世臣自在，作《經》垂訓，何轉致譏？穀梁子解宋殺大夫，言司馬爲祖之位，此正《春秋》不譏世卿之驗。而漢世《穀梁》家乃用《公羊》爲說，誣《經》并誣《傳》矣。列國獨秦無世臣，沿及始皇，而世國與世家並廢，天下大勢於

是一變。學者習於後世情事，則必以古制爲疑，《傳》既隱約，《三朝記》等又不備，故詳論焉。《公羊》之書言母以子貴，言大夫不世及、國君九世猶可復讐之等，皆秦人之法、戰國之論也。外大夫不卒，此何以卒之也？

【補曰】不卒者，《經》例因史例也。於天子之崩爲魯主，故隱而卒之。隱，猶痛也。《周禮》大行人職曰：

「若有大喪，則詔相諸侯之禮。」然則尹氏時在職，而詔魯人之弔者。【補曰】《傳》言爲魯主，《公羊》言諸侯之主，文異意同，此君子之取義也。史亦有此意而《傳》不論史也。辛卯與庚戌相去四十二日，王喪既赴而魯弔，四旬之內，來往千里，喪事尚急則然矣。王子虎、劉卷不日，此以其新爲魯主，恩深，故仍史文錄日，所以盈隱文。

秋，武氏子來求賻。天王使不正者月，今無君，不稱使，故亦略而書時。武氏子者何也？天

子之大夫也。【補曰】《左氏》後五年《傳》尹氏、武氏並稱，武氏亦上大夫歟？天子之大夫，其稱武氏子

何也？【補曰】何休曰：「據宰渠氏官，仍叔不稱氏，尹氏不稱子。」未畢喪，孤未爵，平王之喪在殯。【補曰】

五五斷仁謂之畢喪。《三年問》、《荀子》書皆曰三年之喪，二十五月而畢是也。孤，謂新君。未爵者，未爵命。《公羊》曰「父卒子未命」，謂武氏子之父已沒，亦新嗣爲大夫，而新君未爵命之也。未爵命不得稱其字，故稱武氏子也。任叔之子繫其父字，此直言氏，明其父已沒，不得繫之。既不錄父，故不須加之爲緩辭。《詩》言「彼留之子」，《易》繫辭傳言「顏氏之子」，彼等皆是便文，非《春秋》文例。未

爵使之，非正也。【補曰】使之已非正。其不言使何也？據桓十五年天王使家父來求車稱使。無君

也。桓王在喪，未即位，故曰無君。【補曰】猶《公羊》云

「未君也」。未葬、未踰年，皆不稱王，蓋亦當稱子矣。天子諸侯並是以世子繼父，則其辭宜同。此包毛伯言之。歸

死者曰贈，歸生者曰賻，【補曰】《士喪禮》下篇曰：

「知死者贈，知生者賻。」疑《傳》「贈」字亦當爲「贈」。《荀

子》曰：「玩好曰贈也。」凡《傳》發例，或有連及《經》外者，

而觀下注，則范本已誤。曰歸之者正也，求之者非

正也。喪事無求而有賻賻。【補曰】歸爲正禮，恒事不

志，歸贈、歸含、歸綖志者，爲歸妾母，又不及事耳。求所以

爲非正者，《公羊》曰「喪事無求」，「蓋通于下」。何休曰：「禮本爲有財者制，有則送之，無則致哀而已。不當求，求則皇皇傷孝子之心。」文烝案：求者，徵求也。定元年《傳》曰「請也」。言使之求賻又非正。周雖不求，魯不可以不歸，魯雖不歸，周不可以求之。【補曰】歸爲正，況諸侯於天子。求爲非正，況天子於諸侯。求之爲言，得不得未可知之辭也。【補曰】得不得，非己能主，明皆非正。如求婦之屬亦是也。交譏之。【補曰】何休曰：「譏，猶譴也。」文烝案：凡言譏者，與非、刺意皆相近。疏曰：「交，猶俱也。指事而書，則周、魯之非俱見。」

### 八月庚辰，宋公和卒。天子曰崩，諸侯曰薨，

大夫曰卒，周之制也。《春秋》所稱，曲存魯史之義。內稱公而書薨，所以自尊其君，則不得不略外諸侯書卒，以自異也。至於既葬，雖邾、許子男之君皆稱謚而言公，各順臣子之辭，兩通其義。鄭君曰：「《禮·雜記上》曰：『君薨，赴於他國之君，曰寡君不祿，敢告於執事。』」《曲禮下》曰：「壽考曰卒，短折曰不祿。」君薨赴而云不祿者，臣子之於君父，雖有壽考，猶若短折，痛傷之至也。若赴稱卒，是也壽終，

無哀惜之心，非臣子之辭。鄰國來赴，書以卒者，無老無幼，皆以成人之稱，亦所以相尊敬。【補曰】注「天子曰崩」十四句，本杜預《釋例》，引鄭君者，《駁五經異義》文也，見《雜記》正義。大夫曰卒，對文別言之卒也；壽考曰卒，散文通言之卒也；二說當兼之。八年《傳》以不名爲未能同盟，明同盟皆名。諸侯既世國，名所以別之，《公羊》言「卒從正」是也。生不得名卒得名者，蓋《春秋》於內爲臨一國之言，從大上之例。於外則亦臨天下之言也。《釋例》言葬稱謚而言公，順臣子之辭者。生有五等，沒則壹，申其臣民之稱，《公羊》言葬從主人是也。終《春秋》書卒者十八國，宋、衛、蔡、陳、鄭、齊、晉卒葬兼備，大國例也；曹、許從大國例者也；邾、薛、杞前不葬後葬，小國例也；宿，一見隱篇，故亦不葬也；滕、秦前不葬後葬，楚、莒、吳不葬，皆夷狄例也。諸侯曰卒，正也。正，謂承嫡。【補曰】宋繆公者，宣公之弟，宣公之立繆公，蓋時事宜然，所以爲正。凡自世子適子外，或立長庶，或以賢，或以卜，或以弟及，或以孫繼，諸宜爲君者，皆謂之正，天子諸侯，其制悉同，《傳》之言正者如此。注專言承嫡，非也。諸釋《經》言正也者，謂常理常例，而諸侯卒之爲正，又兼有嗣立正不正之義，故後《傳》屢言之，而注家據以爲說。古人文辭簡渾，大夫曰

卒正也，諸侯日卒正也，葬時正也，固無須分別耳。

### 冬十有二月，齊侯、鄭伯盟于石門。《傳

例》曰：「外盟不日。」石門，齊地。【補曰】不日者，亦略之，注當於前盟密引例。張洽曰：「隱十一年之間盟而不食言者，唯此石門之盟，二君終身未嘗相伐。」案杜預曰：「來告，故書。」馬驢曰：「國之大事曰會盟，曰朝聘，曰征伐，曰滅取，曰奔違，曰死喪，曰弑殺，曰災異，必有告赴，史乃承而書之。」文烝謂外相朝聘不入例，「奔違」下當加「歸復」。

### 癸未，葬宋繆公。○【撰異曰】繆，本亦作「穆」，

《左氏》作「穆」。案「繆」者，假借字。曰葬，故也，危不得葬也。天子七月而葬，諸侯五月而葬，大夫三月而

葬。《傳例》曰：「諸侯時葬，正也；月葬，故也。日者，憂危最甚，不得備禮葬也。他皆放此。」徐邈曰：「文元年《傳》曰『葬曰會』，言有天子諸侯之使，共赴會葬事，故凡書葬，皆據我而言葬彼，所以不稱宋葬繆公，而言葬宋繆公也。弔會之事，贈槨之命，此常事，無所書，故但記卒記葬，錄魯恩義之所及，則哀其喪而恤其終，亦可知矣。若存沒隔絕，情禮不交，則卒葬無文。或有書卒不書葬，蓋外雖赴卒而內不會葬。無其事則闕其文，史策之常也。《穀梁傳》稱變

之不葬有三：弑君不葬，滅國不葬，失德不葬。言夫子脩《春秋》，所改舊史以示義者也。弑君之賊，天下所當同誅，而諸侯不能治，臣子不能討，雖葬事是供，義何足算？亡國之君，喪事不成，則不應書葬。失德之主，無以守位，故沒葬文。《傳》於宋襄公著失民之咎，宋共公發非葬之問，言伯姬賢而不答，共公不能弘家人之禮。然則為君者，外之不足以全國，內之不足以正家，皆所謂失德而終，禮宜貶者也。於時諸國多失道，不可悉去其葬，故於二君示義，而大體明矣。【補曰】凡《傳》言「故」者，皆謂變故，俞樾引楊倞《荀子》注曰「故，事變也」是也。葬具月日，知其有變，故不為正矣。而日葬尤為危不得葬，甚於月。此所以為危文者，繆公逐其子馮而立其兄子與夷，卒致弑逆，其理危也。危者，危與夷，與《公羊》略同。書葬者，魯使卑者往會葬。孔穎達曰：「位賤非卿，不合書名，故直書其所為之事而已。盟則云及某盟，會則云會某人，葬則云葬某王某公。若叔孫得臣如京師葬襄王，叔弓如滕葬滕成公之類。遣卿行者，皆書使名也。」何休曰：「禮，天子七月而葬，同軌畢至；諸侯五月而葬，同盟至；大夫三月而葬，同位至；士踰月，外姻至。孔子曰：『葬於北方北首，三代之達禮也，之幽之故也。』」



## 四年春王二月，莒人伐杞，取牟婁。《傳》

例曰：「取，易辭也。伐國不言圍邑，言圍邑皆有所見。伐國及取邑例時，此月者，蓋爲下戊申衛君完卒日起也。凡例宜時而書月者，皆緣下事當日故也。日必繼於月，故不得不書月。事實在先，故不得後錄也。他皆放此。」【補曰】注引「易辭」例在莊九年《傳》，舊史伐國及取邑皆月，內取邑又日。君子略之，從時例。傳曰：稱「傳曰」者，穀梁子不親受於師，而聞之於傳者。【補曰】案：全《傳》稱「傳曰」者十，皆正解《春秋》之文，此蓋出七十子雜記之書，乃皆聞諸夫子者。穀梁子直用其成文，故特言「傳曰」以相別，當亦聞之於師也。《春秋繁露》稱閔子、子貢、子夏、曾子、子石、公肩子、世子、子池之倫，皆論《春秋》，或當時諸子皆有書也。古書通稱爲「傳」，非必說《春秋》之專書，猶《儀禮·喪服傳》引傳，亦非必說《喪服》之專書也。《喪服傳》稱「傳曰」者六，其一乃在記中。竊意記出夫子前，傳出七十子後，所引舊傳則出七十子，與《穀梁》書相類。言伐言取，所惡也。既伐其國，又取其土，明伐不以罪，而食其利。兩書取伐，以彰其惡。【補曰】舊《傳》發《經》通

例也。謝湜曰：「伐而戰，戰雖有功，不若伐而不戰之爲善也，況戰而無功者乎？伐而入，入雖有義，不若伐而不入之爲善也，況入而無義者乎？伐而圍，圍雖以直，不若伐而不圍之爲善也，況圍不以直者乎？伐而取，取雖以順，不若伐而不取之爲善也，況取不以順者乎？凡書伐於前，而書戰、入、圍、取於後，皆甚其惡也。」諸侯相伐取地於是始，故謹而志之也。春秋之始。【補曰】《公

羊》義同。注亦用《公羊》他處語。春秋之始者，託始也。內外諸取邑，史必備文，君子於外取邑皆略去，其存之者，欲以見義，外圍邑亦然。汪克寬曰：「隱公以後，爭地爭城，殺人盈野，諸侯城邑，得失無常，不足悉書，故《左傳》言取地。而《經》不書取者甚多，蓋以擅興殘民爲重，而土地之攘奪不暇論矣。」汪氏蓋本陳傅良、趙汴說。

## 戊申，衛祝吁弑其君完。弑君日與不日，從

其君正與不正之例也。祝吁，衛公子。○【撰異曰】戊申，汲古閣《左氏》作「庚戌」，誤也。祝，《左氏》、《公羊》作「州」，下同。《爾雅》「祝」、「州」本古音同也。《漢石經·公羊》殘碑十一年《傳》「弑」作「試」字。《白虎通》曰：「弑者，試也。欲言臣子殺其君父不敢卒，候間伺事，可稍稍試



之。《陸渚》纂例曰：「殺君，《公羊》皆作「弑君」。案：《纂例》皆本啖、趙，據此條則啖、趙、陸所據《穀梁》、《左氏》無「弑」字，諸弑君皆作「殺」。考之陸德明《釋文》元年傳《音義》曰：「弑，申志反，又作「殺」，如字，下同。」此經《音義》曰：「弑音試，舊作「殺」，《注》下同。」昭十三年《音義》曰：

「凡「弑」字從式，傳本多作「殺」字。」《左氏》此經《音義》曰：「弑，本又作「殺」，同音試。凡弑君之例皆放此。」然則啖、趙、陸所據《穀梁》、《左氏》即陸德明所見又作、舊作、多作之本也。竊意古祇有「殺」字，而上殺下及敵者相殺，讀殺，短言之。下殺上，讀殺，長言之。其字則皆从殳殺聲之字，《穀梁》、《左氏》經傳所用也。「弑」者，後出之字，从殺省式聲，或又假借「試」字，亦式聲，《公羊》經傳所用也。凡六藝群書在《公羊》前者皆有「殺」無「弑」也，其參差混亂并《公羊》中字亦不畫一者，皆寫本、槧本之失也。《釋文》通部說此二字雖詳，未能各從善本，唯陸渚獨得之。而此字有兩讀，無兩字，伯冲亦未知之。今知必然者，宋弑與夷、捷、晉弑卓，皆有及大夫文，《傳》與《左傳》皆言里克弑二君與一大夫，《明堂位》言魯君臣未嘗相弑，其字皆必當作「殺」者也。但以諸「弑」字相承已久，未便輒改，姑沿用之，而著其說於此。完，本又作「兒」，字體之異。大夫弑其

君以國氏者，嫌也，凡非正嫡則謂之嫌。【補曰】謂非正嗣也。嫌，疑也，疑於君也。《坊記》曰：「貴不嫌於上。」鄭君本作「嫌」字，云：「嫌，或為嫌。」王引之曰：「嫌，亦嫌字也。」文烝案：凡《傳》言嫌者，猶《公羊》言當國。弑而代之也。【補曰】言以嫌代正也。昭十三年《傳》曰：「取國者，稱國以弑。」

夏，公及宋公遇于清。遇，例時。清，衛地。及者，內為志焉爾；元年與宋人盟于宿，故今復尋之。八年《傳》曰：「不期而會曰遇」，今曰「內為志」，非不期也，然則遇有二義。【補曰】疏曰：「重發《傳》者，嫌盟遇禮異，故重發以同之。」文烝案：范言有二義，非也。凡遇皆是不期而會，八年《傳》言之，此略耳。「內為志」者，彼來遇我，我及之，是我為主矣。若是外為主，則當言公遇宋公于清，不當言「及」。《春秋》內書「遇」四，無不言「及」者，蓋時無外為主之事，或以遇事小於會，外為主則不足書耳。遇者，志相得也。【補曰】得，如得大子適郢之得。相得，謂相親說，猶《史記》言「相中」也。《易·序卦傳》曰：「物相遇而後聚。」《爾雅》曰：「遇，選也，見也。」又曰：「偶也。」

宋公、陳侯、蔡人、衛人伐鄭。【補曰】君將

常文皆稱君，皆不加言帥師者。《公羊》云「書重」是也。據《毛詩》序：「時衛使公孫文仲將。」

秋，鞏帥師會宋公、陳侯、蔡人、衛人伐

鄭。【補曰】《左傳》曰：「秋，諸侯復伐鄭。」言復伐是也。

復伐而鞏會之，《經》文自明，故《傳》不釋。鞏者何

也？公子鞏也。【補曰】桓三年文。字曰羽父。其

不稱公子何也？據莊二年，公子慶父帥師伐於餘丘

稱公子。【補曰】注非也，當云據益師、彊稱公子，與無佗、

俠不氏不同。貶之也。杜預曰：「外大夫貶皆稱人，內

大夫貶皆去族稱名，記事之體。他國可言某人，而己之卿

佐不得言魯人。【補曰】杜自用《左傳》說，不宜引爲注。

何爲貶之也？與于弑公，故貶也。【補曰】與，

即豫、預字。《士昏禮記》「子有吉，我與在」，古文作「豫」。

《鄉飲酒》以下，古文其字皆同。《論語》有「天下而不與」，

《白虎通》作「預」。貶義，《公羊》同，謂後年事豫貶於此也。

案：易文言《傳》曰「臣弑其君，子弑其父，非一朝一夕之故，

其所由來者漸矣，由辯之不早辯也。《韓非子》引子夏曰：

「《春秋》之記臣殺君、子殺父者，以十數矣。皆非一日之積

也，有漸而以至矣。凡姦者，行久而成積，積成而力多，力

多而能殺，故明主蚤絕之。」推早辯、蚤絕之義，可無疑於豫

貶之法。襄五年以吳抑繒，正此之比，不可以史法論也。

史法隨時記事，文有常體，自不得以後事追正前文矣。孔

廣森曰：「鞏貶之於始，仲遂貶之於終，皆言乎罪大惡極，

足以貫其沒世者也。《傳》末句「貶」字下或增「之」字，誤。

九月，衛人殺祝吁于濮。濮，陳地水名。【補

曰】孔廣森以爲衛地，近今淇縣，衛靈公之晉宿濮水上是

也。季本、王夫之、江永略同。稱人以殺，殺有罪

也。有弑君之罪者，則舉國之人皆欲殺之。【補曰】《傳》

解本《經》并發通例也。人者，衆辭，下《傳》言之。《公羊》

曰「討賊之辭」，亦衆辭之謂也。案《傳》稱桓弑隱，百姓不

能去，無王之道也。而鳳韶引《周禮·大司馬》「放弑其君

則殘之」，以爲王得討之，衆不得殺之，與陳遷鶴說同，甚失

其義。王討之者，正以衆欲殺之故也。罪非弑逆而稱人以

殺，則亦《孟子》所謂國人殺之，《王制》所謂刑人於市，與衆

棄之也。《孟子》言用舍殺三事，於殺獨多一句，又有「故

曰」之文，知國殺之爲古語，而《傳》義不可易矣。祝吁之

挈，不書氏族，提挈其名而道之也。【補曰】疏曰：「徐邈以挈爲舉，即是提挈之稱。范則以爲單挈不具足之辭。」文烝案：《墨子·經說》曰：「挈，有力也。引，無力也。」《音義》曰：「挈，本又作絜。」注同。失嫌也。衆所同疾，威力不足以自固，失當國之嫌。【補曰】注非也。以國氏者，嫌文也。絜者，失嫌之文也。所以得失者，爲其既殺。其月，謹之也。討賊例時也。衛人不能即討祝吁，致令出入自恣，故謹其時月所在，以著臣子之緩慢也。【補曰】舊史討賊皆月，君子改從時例，齊人殺無知是也。于濮者，譏失賊也。譏其不即討，乃令至濮。【補曰】殺於國者，亦無知是也。

冬十有二月，衛人立晉。立，納、入，皆篡也。大國篡例月，小國時。【補曰】《左傳》曰：「衛人逆公子晉于邢。」注本何休。衛人者，衆辭也。【補曰】猶言殷人、周人，義取衆。立者，不宜立者也。嗣子有常位，故不言立。【補曰】《易》稱「利建侯」，《左傳》載衛之筮曰：「嗣吉何建？建非嗣也。」故自人言之曰立某，知皆不宜立，宜立者則自君言之，曰公即位矣。依鄭衆《周禮》注，

古者「立」、「位」同字，古文《經》公即位皆爲「即立」，《傳》二解，《公羊》並同。晉之名，【補曰】名，謂直名爲挈文，不言公子。惡也。惡，謂不正。其稱人以立之，何也？【補曰】據立王子朝稱尹氏。得衆也。【補曰】《公羊》曰：「衆之所欲立。」《左傳》亦曰「衆也」。得衆則是賢也，賢則其曰不宜立，何也？《春秋》之義，諸侯與正而不與賢也。雍曰：「正，謂嫡長也。夫多賢不可以多君，無賢不可以無君。立君非以尚賢，所以明有統也；建儲非以私親，所以定名分。名分定則賢無亂長之階，而自賢之禍塞矣；君無嬖幸之由，而私愛之道滅矣。」【補曰】疏曰：「言《春秋》者，得衆而言立，恐理不相合，故廣稱《春秋》以包之。」文烝案：正者，謂世子、適子、長庶子也。賢，謂庶子之賢者也。無太子、適子則立長庶子，長幼鈞則立賢，賢鈞則卜。《左傳》所稱周制，實《春秋》之義。諸侯固然，天子亦然，不得以文王舍伯邑考而立武王爲難，文王乃聖人之權，當創業之世，非常例矣。又魯自伯禽以來，一生一及，而《檀弓》載孔子言周制立孫，謂太子有孫而死者。《春秋》宋繆公以弟繼兄爲正，齊昭公、惠公或繼兄或繼弟，皆爲正，桓王以孫繼祖爲正，晉悼公以君之

曾孫而亦爲正，此皆時事之宜，不拘立子之限。晉悼公之兄無慧不立，衛靈公之兄有惡疾不立，則又周制變通之法也。若《公羊》何休之說，有與《傳》及《左氏》不同者。《公羊》元年《傳》曰：「立適以長不以賢，立子以貴不以長。」何休曰：「子，謂左右媵及姪娣之子。禮，適夫人無子立右媵，右媵無子立左媵，左媵無子立嫡姪娣，嫡姪娣無子立右媵姪娣，右媵姪娣無子立左媵姪娣。質家親親先立娣，文家尊尊先立姪。嫡子有孫而死，質家親親先立弟，文家尊尊先立孫。其雙生也，質家據見立先生，文家據本意立後生，皆所以防愛爭。」何氏說頗詳備，不知以左右媵姪娣之子分貴賤者乃《公羊》之誤，不可用也。《穀梁》於正不正之說持之甚堅，此周人繼體之大法，《春秋》經世之深志。注「多賢」二句，慎子文。○姜炳璋曰：「書立君二，衛人立晉，不告於王，慨天下之無王也。尹氏立王子朝，晉不之問，慨天下之無霸也。」文烝案：此又《春秋》文外之意。

## 春秋隱公經傳第一補注第二

穀梁 范氏集解 鍾文丞詳補

五年春，公觀魚于棠。《傳例》曰：「公往時，

正也。正，謂無危事耳。」棠，魯地。【補曰】《公羊》曰：「棠

者何？濟上之邑也。」劉敞曰：「觀社稱如，觀魚不稱如，

內外之辨也。諸侯於其竟外可言如，竟內不可言如。」劉說

是也。《左傳》以如棠出上，史例非《經》例。注引往時例在

莊二十三年《傳》。何休曰：「觀例時。」○【撰異曰】觀，《左

氏》作「矢」。傳曰：常事曰視，視朔之類是。非常

曰觀。觀魚之類是。【補曰】此引舊《傳》文，知《經》文舊

非「矢」字。孫覺曰：「矢，言陳也。陳魚無義理。」禮，尊

不親小事，卑不尸大功。尸，主。【補曰】兼言以起

下。訓「主」，《爾雅》文。魚，卑者之事也。《周禮》獻

人中士，下士。【補曰】中士二人，下士四人也。《傳》出

《經》「魚」字而說之。魚，即漁、漁、潯字。《說文》曰：「漁，

捕魚也。从𩺰水。漁，篆文漁，从魚。」石鼓文「鯢鯉處之，

君子潯之」，又从魚下寸。此《經》、《傳》作「魚」字，《周禮》

作「𩺰」字、「𩺰」字，亦作「魚」字，皆一字耳。《左傳》曰「觀

魚」者，孔穎達引《說文》以為捕魚謂之「魚」。魚者，猶言獵

者。《音義》云：「本亦作漁者，依石鼓「處潯」為韻。」高誘

《呂氏春秋》、《淮南子》注：「漁，讀如《論語》之「語相語」之

「語」。」《周禮音義》：「𩺰，又音御。」知此字音與水蟲本音

異。公觀之，非正也。【補曰】非禮即非正。

夏四月，葬衛桓公。月葬故也。有祝吁之

難，故十五日乃葬。【補曰】疏曰：「重發《傳》者，前起日

例，今起月例，故重發之。」文烝案：觀其謹月，知其有故，

此故自指祝吁之難桓公葬緩而言，而非以緩葬為故也。有

故者，或亦五月而葬。

秋，衛師入郕。○【撰異曰】郕，《公羊》作「盛」，

《汲冢穆天子傳》同。入者，內弗受也。【補曰】疏

曰：「重發《傳》者，前起者邑，今是國，故重發之。」郕，國

也。【補曰】文與人向相似，故言國以別之。又以魯有成

邑，字亦作「郈」也。將卑師衆曰師。書其重者也，將

卑，謂非卿。【補曰】此發全《經》內外通例，與《公羊》同。

注上句亦《公羊》語也。有稱師而非將卑師衆者，未有將卑師衆而不稱師者，故爲通例。至於將尊師衆，內通稱某師，外則文以後始稱某師，文以前亦稱師。將尊師少，內通稱將，外則文以後始稱將，文以前稱人。將卑師少，內直書其事，外則通稱人，皆內外前後有異，未可以《公羊》之例爲定。葉西說近之矣。然則文以前外稱師者，其將或尊或卑，此之稱師，非必將卑，《傳》但舉通例大概言之，猶禧二十六年云「人微者也」，亦此意也。凡外用兵之稱四，其例大率如此。惟如齊桓之稱人，稱師，晉襄之稱人，楚靈之稱師，晉趙盾之直稱師，直稱將，晉、宋之別於衛而稱師，齊、宋之繼公而稱人，則皆是。特爲變文，《傳》當文一一言之，猶有不著於《傳》者，固當推而知矣。燕、曹、虞諸小國無師，又無大夫，苟非君將，則無論將之尊卑，師之衆寡，皆以稱人爲常。楚之先未與中國同文，無論君臣亦皆以稱人爲常。荆、徐、吳、於越、戎狄、淮夷無論君臣，其常文皆直以號舉，此其各有等差，又皆與盟會之文相準也。《中庸》曰：「文理密察，足以有別也，《春秋》之謂乎？」

九月，考仲子之宮。失禮宗廟，功重者月，功輕

者時。莊二十三年秋「丹桓宮楹」是也。【補曰】何休曰：

「加之者，宮廟尊卑共名，非配號稱之辭，故加之以絕也。」

絕者，即《傳》所謂緩辭。考者何也？考者成之

也，【補曰】成之，謂宮成而祭以成之也。路寢之屬初成則

設盛食以成之，亦謂之考。《爾雅》、《逸周書·謚法》同訓。

成之爲夫人也。立其廟，世祭之，成夫人之禮。【補

曰】謂成之爲夫人之宮也。孝公之夫人自在孝宮，仲子以

妾母之宮不繫惠公，直言仲子，則夫人之宮矣。生而加夫

人之稱，曰用致夫人，沒而有夫人之廟，曰考仲子之宮，皆

譏辭也。《注》言「立」，非也。說見下。禮，庶子爲君，

爲其母築宮，使公子主其祭也。公當奉宗廟，故

不得自主也。公子者，長子之弟及妾之子。於子祭，於

孫止。貴賤之序。【補曰】《喪服小記》曰：「慈母與妾母

不世祭也。」鄭君引此《傳》。又《小記》及《雜記》妾附於妾

祖姑，無妾祖姑，則中一以上從其昭穆之妾。庾蔚之曰：

「妾祖姑無廟，爲壇祭之。」仲子者，惠公之母。隱

孫而脩之，非隱也。非，責也。三年父喪畢，不於三

年考者，又有天王崩，至此服竟乃脩之。【補曰】《疏》曰：「此所以書者，惠公雖爲君，其母惟當惠公之世得祭，至隱不合祭之，故書以見譏也。立者，不宜立也。不言立者，爲庶母築宮，得禮之變，但不合於隱之世祭之，故止譏其考，不譏立也。」文烝案：仲子之宮，惠公時所築也。隱探父志，脩而考之，非隱始立之，疏非也。脩舊曰新，新亦變例，所當志，此重在考，自當言考也。《傳》以《經》無新文，故特言脩，明此是脩成而考，與凡考廟小異。注凡訓「非」爲「責」者，非，誹同用。《墨子》經曰：「譽，明美也。誹，明惡也。」

### 初獻六羽。

羽，翟羽，舞者所執。獻者，下奉上之

辭，作之於廟，故言獻。【補曰】《玉篇》曰：「獻，奉也，進也，上也，奏也。」初，始也。遂以爲常。【補曰】《公羊》、《爾雅》、《夏小正》、《傳》皆同訓，猶後世之著爲令也。穀

梁子曰：言穀梁子者，非受於師，自其意也。【補曰】自

著穀梁子者，因下有尸子，故以相別，非必不受諸師也。穀梁子得自稱者，猶《孟子》書自稱孟子，《莊子》書自稱莊子。又其先則曾子承夫子之意作《孝經》，自稱曾子。「舞夏，天子八佾，諸公六佾，諸侯四佾。」夏，大也。大，

謂大雉。大雉，翟雉。佾之言列，八人爲列。又有八列，八八六十四人也，並執翟雉之羽而舞也。天子用八，象八風；諸公用六，降殺以兩也。不言六佾者，言佾則干在其中，明婦人無武事，獨奏文樂。【補曰】王引之曰：「夏，蓋五色羽之名也。《周禮·染人》：『秋染夏。』鄭注曰：『染夏者，染五色。』謂之夏者，其色以夏狄爲飾。《禹貢》曰：『羽畎夏狄』是其總名，其類有六：曰翬，曰鴈，曰鵠，曰留，曰希，曰蹲。其毛羽五色，皆備成章。」舞羽，謂之舞夏，則所執羽備五色可知。《樂記》曰：『五色成文而不亂』，蓋謂此也。」文烝案：注言每佾必八人，與馬融、王逸、蔡邕、高誘、服虔、韋昭等同。《白虎通》、何休、杜預六六四四之說非也。《宋書》傳隆論之，不言六佾四句，并上釋「初」及釋「獻」第一句皆本何休。獨奏文樂，《疏》謂徐邈亦同也。諸公諸侯者，《公羊》以爲天子三公稱公，王者之後稱公，其餘大國稱侯，小國稱伯、子、男。如《公羊》說，蓋諸侯包伯、子、男矣。《傳》及《公羊》并下尸子說，皆不論大夫士。《儀禮·少牢》、《特牲禮》並無樂舞，而《左傳》載衆仲語天子八，諸侯六，大夫四，士二，非禮之正，故劉敞疑之也。凡禮，自天子至士，降殺以兩者，不殊諸公諸侯，其不及大夫士者，則諸公異等，故如六佾三軍之類，皆降於天子而崇於諸侯。初

獻六羽，始僭樂矣。」下犯上謂之僭。【補曰】何休

曰：「僭，齊也。下倣上之辭。」《說文》曰：「僭，擬也。」尸

子曰：【補曰】《傳》稱「尸子曰」者二，《漢書·藝文志》諸

子雜家有《尸子》二十篇，班氏自《注》曰：「名佼，魯人。秦相商君師之。鞅死，佼逃入蜀。」又《史記·孟荀傳》曰：

「楚有尸子。」裴駟引劉向《別錄》曰：「今案《尸子》書，晉人也。」宋翔鳳以爲「晉」與「魯」形近而誤。魯爲楚滅，故《史

記》以爲楚人。阮元又疑《傳》所稱之尸子非即佼，或當在佼前。「舞夏，自天子至諸侯皆用八佾。初獻

六羽，始厲樂矣。」言時諸侯僭侈皆用八佾，魯於是能

自減厲而始用六，穀梁子言其始僭，尸子言其始降。【補

曰】疏曰：「凡言初者有二意，若尸子所言是復正之初也，

若初稅畝是譏事之初。」文烝案：如注、疏之意，六佾但當言近正耳，言復正非也。《廣雅》曰：「厲，近也。」此「厲」字

或當訓「近」，未能用四佾，亦不用八佾，是始近乎樂。范未

得「厲」字之訓。《爾雅》：「厲，作也。」郭璞引《傳》爲說亦

不可通。王引之不用注、疏義，以爲「厲」之言「裂」也。《廣

雅》云：「裂，裁也。」尸子之意，天子諸公諸侯皆以八佾爲

正，魯用六佾則爲厲，譏其不當裁減而裁減也。○《公羊》

曰：「僭諸公猶可言也，僭天子不可言也。」孔廣森曰：「前

此群公之宮已徧舞八佾，今於仲子降一等，猶僭諸公。《春

秋》內大惡諱，僅因其可言者譏始於此。然六羽猶譏，八羽

可知，故曰易本隱以之顯，《春秋》推見以至隱，此之類也。」

邾人、鄭人伐宋。邾主兵，故序鄭上。【補曰】

此本杜預。

螟。《禮·月令》曰：「仲春行夏令則蟲螟爲害。」

【補曰】劉歆說《五行傳》「螟爲羸蟲之孽」，何休以爲煩擾之

應。蟲災也。【補曰】杜預曰：「蟲食苗心者。」羅願引漢

孔臧《夢蟲賦》「爰有蠕蟲，厥狀似螟」，以爲螟是無足小青

蟲。孔廣森曰：「《爾雅》：『食苗心螟，食葉蚱，食節賊，食

根蠹。』《經》唯書螟者，散文通矣。」甚則月，不甚則

時。甚則即盡，不及歷月。【補曰】注非也。時者，七月

也。災在八九月則甚，七月則不甚。

冬十有二月辛巳，公子彊卒。杜預曰：「大

夫書卒不書葬。葬者，自其臣子事，非公家所及。」【補曰】

公子彊，孝公子子臧，謚曰僖伯。杜因《左傳》有「葬之加一

等」語，故於此說其義。范引之宜在元年益師卒下。隱



不爵命大夫。【補曰】其義見下九年《傳》。《祭統》曰

「古者明君爵有德而祿有功，必賜爵祿于大廟，示不敢專也。故祭之日，一獻，君降立于阼階之南，南鄉，所命北面。

史由君右，執策命之，再拜稽首，受書以歸，而舍奠於其廟」，是爵命大夫之禮也。《左傳》記衛成公使周歆、冶廎爲

卿，皆先服卿服，公祀先君而命之。又鄭成公卒，子駟稱官命未改，孔穎達以爲先君既葬，嗣君正位，乃得建官命臣。

晉平公改服脩官，烝于曲沃，是其事如孔說，則似舊有命者，嗣君皆須改命。但平公於既葬即位，後即烝祭，改命非

正禮當然，正禮在三年喪畢後，三年《傳》所云是也。其

曰公子彊何也？據八年無佻卒不稱公子。【補曰】

無佻或說是貶，又非公公子，注非也。當云據俠不氏。先

君之大夫也。隱不成爲君，故不爵命大夫，公子不爲

大夫，則不言公子也。【補曰】先君之大夫者，言彊爲大夫，

而氏以公子，乃先君之子也。凡史書卒者，皆在大夫位，隱

之大夫雖在位而不爵命，故史不書其氏，而《經》因之。但

無佻氏爲展，俠亦非公公子，皆可以不氏，見其不命，彊之氏

則爲公子。公子者，或爲今君之子，或爲先君之子，故既爲

繫於今君之稱，又爲繫於先君之通稱。公子彊以先君之子

而爲大夫，是爲先君之大夫，既親且貴，今君雖不命之，史不得去其氏，《經》亦因之也。《傳》於此言之，則明益師亦同於彼，發全《經》日不日之例，於此說隱篇稱公子之義，互相明也。然則彊與益師倘是今君之子，固當去其公子之氏，而隱必無其事，故知無佻、俠必非公公子。輩則爲貶也，若自隱篇而外，唯溺一貶，輩不復貶，餘悉以公子書。先君之子，今君之子，初無二例，莊二十二年《傳》稱「公子之重視大夫，命以執公子」，是則公子之貴不減大夫，故雖不爲大夫，例所不卒者，亦存其公子之號。公子慙非大夫，公子結、公子買、公子偃等亦未必皆爲大夫。又陳公子禦寇未命爲大夫，曹公子手莒、公子意恢皆在無大夫之國，此類皆稱公子。而范謂公子不爲大夫則不言公子，倍《經》反《傳》，後儒多用其語，謬矣。凡《經》、《傳》中列國言大夫者，皆卿也。《王制》曰：「諸侯之上大夫卿。」卿即上大夫，故謂卿爲大夫，天子亦以上大夫爲卿，故《周禮·序官》有卿、有中、下大夫，則無上大夫矣。

宋人伐鄭，圍長葛。長葛，鄭邑。圍例時。

【補曰】常例言圍者，皆圍國。何休曰：「以兵守城曰圍。」

疏曰：「此爲久圍，故謹而月之耳。或解上文日月者，爲公

子彊卒，不爲圍也。」文烝案：舊史圍皆月，君子略書時。

伐國不言圍邑，此其言圍何也？據莊二年公子

慶父帥師伐於餘丘不言圍也。伐國不言圍邑，書其重也。

【補曰】《公羊》曰「邑不言圍」，故何注據伐於餘丘文，范襲之，非也。末句本襄十二年《傳》得之，此常例。久之

也。宋以此冬圍之，至六年冬乃取之。古者師出不踰時，

重民之命，愛民之財，乃暴師經年，僅而後克，無仁隱之心，而有貪利之行，故圍伐兼舉以明之。【補曰】久之者，言《春

秋》以爲久也。《墨子·經》曰：「久，彌異時也。」注以重命

愛財說不踰時義，其說未備。《詩》曰：「女心悲止，征夫歸

止。」《毛傳》曰：「室家踰時則思。」《白虎通》曰：「古者師出

不踰時者，爲怨思也。天道一時生，一時養，人者天之貴物

也，踰時則內有怨女，外有曠夫。」伐不踰時，【補曰】言

不越三月也。此說正禮，明宋不然。孔穎達《左傳正義》據

此《傳》知行役聘問亦不踰時。戰不逐奔，【補曰】《司馬

法》曰：「逐奔不過百步，從綏不過三舍。」誅不填服。

來服者不復填厭之。【補曰】王引之曰：「誅，謂殺戮，非特

填壓之而已。填，讀爲殄，謂殄戮之也。不殄服，猶言不殺

降。作「填」者，假借字耳。《毛詩傳》曰：「填，盡也。」《爾

雅》曰：「殄，盡也。」《集韻》：「殄，或作填。」凡從真從參之

字，多以聲近而通。」文烝案：此言戰誅，亦有仁心，因論伐

并及之。苞人民毆牛馬曰侵，斬樹木壞宮室

曰伐。制其人民，毆其牛馬，賊去之後，則可還反。樹木

斬，不復生，宮室壞，不自成，故其爲害重也。【補曰】王念

孫曰：「注訓「苞」爲「制」，非也。苞，讀爲俘。俘，取也。

賈逵《國語》注曰：「伐國取人曰俘。」作「苞」者，假借字耳。

《爾雅》曰：「俘，取也。」《漢書》晉灼、劉德注曰：「包，取

也。」《說文》：「俘，引取也。或作抱。」凡從包從孚之字，多

以聲近而通。」文烝案：《詩·采薇》正義引《穀梁》作「拘」

字，僖四年疏亦言「拘人民」，今姑從王說。言斬樹木者，古

者列樹以表道也。《春秋說題辭》曰「伐者，涉人國內行威，

有所斬壞」，依《傳》義也。注論害之輕重，本鄭君《釋廢

疾》，見疏。其實亦不然，《傳》言斬壞，謂既俘毆又斬壞，故

爲重耳，古書釋名義之文多有此例。《爾雅》釋饑、饑、荒與

《傳》襄二十四年之文相出入，其最著者矣。此《傳》通釋

《經》例，即凡古之侵伐者，如《易》言「利用侵伐」，《書》言

「侵于之疆，殺伐用張」，亦大率皆同。所謂兵者民之殘，於

是見之。趙匡、陸渙駁之，斯不然矣。

六年春，鄭人來輸平。○【撰異曰】輸，《左氏》

作「渝」。輸者，墮也。【補曰】《公羊》同。《詩》曰「載

輪爾載」亦是也。墮，謂敗壞也。又昭四年《左傳》「寡君將墮幣焉」，服虔曰：「墮，輸也。」則「輸」與「墮」可互訓。

「輸」又與「渝」通，朱子引《秦詛楚文》曰「變輪盟刺」。平

之爲言，以道成也。杜預曰：「和而不盟曰平。」【補

曰】平，成疊韻爲訓。《公羊》、《爾雅》同。以道者，即宣十

五年《傳》云「反義」。來輸平者，不果成也。春秋前

魯與鄭平，四年鞏與宋伐鄭，故來絕魯，壞前平也。【補曰】

孔廣森曰：「蓋自鞏伐鄭後，二國未有成，今謀與鄭成而不果。若所謂平莒及邾莒人不肯者，故得以輸平言之。歸輸

於鄭人者，起鄭人不肯也。」文烝案：墮平當有兵事，平例稱人，故來墮平亦稱人。

夏五月辛酉，公會齊侯盟于艾。艾，魯地。

隱行皆不致者，明其當讓也。【補曰】艾，當云齊地。杜預

曰：「凡公行還不書至者，皆不告廟也。隱不書至，謙不敢

自同於正君書勞策勳。」杜意隱無告廟飲至之事，史不書

至，此即大夫不爵命而不氏之比也。范意似謂史書至而

《經》去之，《經》本不正其讓。成志之文，止可一見，不當屢

見，則知注意非也。又此注當移於後文「伐邾會中丘」下。《經》例：凡離會本以不致爲常。

秋七月。無事書首月，不遺時也，他皆放此。【補

曰】《傳》在後九年。

冬，宋人取長葛。前年冬圍，至今乃得之。上

有伐鄭圍長葛，言長葛，則鄭邑可知，故不繫之鄭。【補曰】

何休曰：「不繫鄭舉伐者，明因上伐圍取也。」范《注》本杜

預。杜無「言」字，「則」字，末句作「故不言鄭也」。言取者，

從易辭例。兵已經年，得爲易者，於圍文見難，於取文見

易，互以相明。外取邑不志，此其志何也？久

之也。【補曰】此與上《傳》「久之」合爲一義，明《經》意深

疾之，故牟婁後又志。

七年春王三月，叔姬歸于紀。叔姬，伯姬之

娣。至此歸者，待年於父母之國。六年乃歸。媵之爲言送

也，從也，不與嫡俱行，非禮也。親逆例時，不親逆例月。

許慎曰：「姪娣年十五以上，能共事君子，可以往，二十而

御。《易》曰：「歸妹愆期，遲歸有待。」《詩》云：「韓侯取妻，

諸娣從之，祁祁如雲。」娣必少於嫡，知未二十而往也。【補

曰【案：杜預曰：「叔姬，伯姬之娣也。至是歸者，待年於父母國，不與嫡俱行，故書。」范注本之。凡姪娣從嫡而歸，書嫡不書姪娣。叔姬爲娣，本不得書，以不與伯姬俱歸，故書。此後更無不與嫡俱歸之事者，或史文惟此一事，或是君子獨存此文，將有其末，不得不錄其本也。許慎十五、二十之說，與何休同。何又云：「八歲，備數也。」言娣又言媵者，姪娣從嫡皆謂之媵，與左右媵無異名，《江有汜》之《詩》序以爲「美媵」是也。賈逵以爲書之者，刺紀責叔姬，殆未可據。注「親逆例時」二句已見前，此處無所取義，宜刪去。其不言逆，何也？據莊二十七年「莒慶來逆叔姬」言逆。【補曰】其事全異，不得據也。當云據言歸，當言逆。逆之道微，無足道焉爾。逆者非卿。【補曰】此二句與上二年伯姬歸紀《傳》、莊二十五年伯姬歸杞《傳》皆同。二年以不言使發義。微，謂君不親逆。無足道者，謂使也。此及莊二十五年以不言逆發義。微謂逆者，非卿。無足道者，謂逆也。莊二十五年兼爲諸內女見例，即成九年「伯姬歸宋，逆者微」之意，皆是爲嫡而不言逆之事。此則爲娣，娣或本不須卿逆，明二處之義各不同也。方苞曰：「有履綸之逆而後知叔姬之爲媵，是謂二年言逆之文

以別乎叔姬特存之。」說似可通，其實非也。

滕侯卒。滕侯無名。自無名，非貶之。【補

曰】謂匿其名，不通於外耳。說在下。少曰世子，長

曰君，狄道也，其不正者名也。戎狄之道，年少之

時稱曰世子，長立之號曰君，其非正長嫡然後有名爾，責滕

侯用狄道也。【補曰】少曰世子，長曰君，不以名通於外，故

曰無名，非謂不作名也。《孟子》稱「滕文公爲世子」，又稱

「滕定公薨」，「世子使然友問孟子」，趙岐據《古紀世本》「滕

國有考公廩，其子元公弘」，疑其即定公、文公，明滕世子實

有名矣。有名而不稱其名，當時滕用狄道，以爲尊世子。

此滕侯，《宣》、《成》篇滕子是也。若不正而爲君者，其初固

曰公子某，皆以名通。《僖》篇嬰齊之執，《昭》篇以後原寧

結虞母是也。《公羊》釋秦伯卒，以爲秦用夷禮，匿嫡之名，

當是傳聞之誤。而所云匿嫡之名，正可取證《傳》義。原寧

結虞母四君，適皆不正，似無可疑，亦容後來滕自舍其狄

道，《春秋》無文以別之耳。此及《宣》篇正而不日，《成》篇

正而日，以後不正皆日者，滕之卒，以前不日，後日爲詳略，

皆從夷狄例，不言正不正。此宣十八年《傳》之明文，特滕

之正不正則望文可知也。不名皆不葬者，蓋君子以其狄道

而削之，注以長嫡釋正，依《傳》世子之文，凡嫡子長庶之等，或爲世子，通得包之。

### 夏，城中丘。城例時。中丘，魯地。城爲保

民爲之也。建國立城邑有定所，高下大小，存乎王制，刺公不脩勤德政，更造城以安民。【補曰】立城之始，意在保民，脩舊可耳。《左傳》子服景伯曰：「民保於城，城保於德。」范以「安」訓「保」。今案：《國語》注曰：「保，持也，謂持守之。」《說文》曰：「城，以盛民也。」民衆城小則益城，益城無極。夫保民以德，不以城也，如民衆而城小，輒益城，是無限極也。【補曰】益城者，舊有城而廓之，舊無城而營之，皆是也。上注言「高下大小」者，疏引《考工記》王宮門阿之制五雉，宮隅之制七雉，城隅之制九雉。門阿之制以爲都城之制，宮隅之制以爲諸侯之城制，是其高下也。先儒據《考工記》天子城方九里推之，以爲公七里，侯、伯五里，子、男三里。疏又引《左傳》「大都，不過參國之一；中，五之一；小，九之一」。是其大小也。雉者，《公羊》及《戴禮》、《韓詩說》五堵而雉，雉長四丈，高一丈。古《周禮》及《左氏說》三堵爲雉，雉長三丈，高一丈。凡城之志，皆譏也。此發凡例，施之於城內邑。【補曰】譏者，

君子所取義，以其益城過於王制也。史書內城，皆是益城，脩舊補完，有國常事，非史所志，非《經》所譏也。諸譏城者，惟冬城較可，義在莊二十九年《傳》。

### 齊侯使其弟年來聘。聘例時。凡聘皆使卿執

玉帛以相存問。【補曰】聘皆「云云，本杜預。今《儀禮》第八篇備焉，其《記》曰：「久無事則聘焉，若有故則卒聘，束帛加書將命。」《周禮·大行人》、《大戴禮·朝事儀》並云「諸侯歲相問，殷相聘」。鄭君曰：「殷，中也。」孔廣森曰：「中，如中一以上之中，謂甲聘丙又聘。」何休曰：「不言聘公者，禮：聘受之於大廟，孝子謙，不敢以己當之，歸美於先君，且重賓也。」《傳例》凡言其者，亦緩辭，猶言之弟之兄。何休曰：「公子不言之兄弟言之者，敵體辭，嫌於尊卑不明，故加之以絕之，所以正名也。」諸侯之尊，弟兄不得以屬通。禮：非始封之君則臣諸父、昆弟，匹敵之稱，人臣不可以敵君，故不得以屬通，所以遠別貴賤，尊君卑臣之義。【補曰】屬，謂弟兄之秩次。通者，自通達於他國也。《喪服傳》曰：「始封之君不臣諸父、昆弟，封君之子不臣諸父而臣昆弟，封君之孫盡臣諸父、昆弟。」范舉其概耳。其弟云者，以其來接於我，舉其貴者也。

弟是臣之親貴者，殊別於凡庶。【補曰】接於我，謂接公也。疏曰：「叔肸稱弟，《傳》云「賢也」，此年稱弟，《傳》云「舉其貴者」，則稱弟有二義。」文烝案：《傳》於段佞夫謂之母弟，又昭二十年《傳》曰：「其曰兄，母兄也。」足明凡稱弟者皆母弟矣。《左傳例》曰：「凡大子之母弟，公在曰公子，不在曰弟。」又曰：「凡稱弟，皆母弟也。」數語義最明白。《公羊》曰：「母弟稱弟，母兄稱兄。」例亦同也。若非同母，皆曰公子。宋之辰地，是其明徵。稱弟實不止二義，見莊二十五年。

### 秋，公伐邾。

冬，天王使凡伯來聘。【補曰】書王聘義在後九年《傳》。戎伐凡伯于楚丘以歸。凡伯者何也？天子之大夫也。凡，氏；伯，字；上大夫也。【補曰】《左傳》有公卿之文，明亦上大夫。國而曰伐，此一人而曰伐，何也？大天子之命也。伐一人而同一國，尊天子之命。【補曰】凡言伐者，皆國也。今以伐凡伯爲文，是一人之辭，明大之。《左傳》稱「君行師從，卿行旅從」，非謂凡伯惟有一人。戎者，衛也。戎

衛者，爲其伐天子之使，貶而戎之也。楚丘，衛之邑也。夫天子之使過諸侯，諸侯當候在疆場，膳宰

致餼，司里授館，猶懼不敬。今乃執天子之使，無禮莫大焉。昭十二年晉伐鮮虞，《傳》曰：「晉，狄之也。」今不曰衛伐凡伯，乃變衛爲戎者，伐中國之罪輕，故稱國以狄晉。執天子之使罪重，故變衛以戎之。【補曰】疏曰：「麋信云：

「不言夷狄獨言戎者，因衛有戎邑故也。范意或然。」文烝案：自伐山戎以前，戎名皆不別，此「戎」即衛之戎邑也。

《左氏》哀十七年《傳》：「衛莊公登城以望，見戎州，曰：

「我，姬姓也，何戎之有焉。」賈逵曰：「戎州，戎人之邑。」

又「公踰于北方，入于戎州己氏」，又「公自城上見己氏之妻髮美」，彼時莊公在帝丘，是帝丘北接戎州也。帝丘爲漢之東郡濮陽縣。《鄭志·答張逸問詩楚宮》云：「楚丘在濟河間。」疑在今東郡界。而《水經注》引京相璠云：「濮陽城西南十五里有沮丘城。」六國時「沮」、「楚」同音，即衛之楚丘，是帝丘西南接楚丘也。《詩》稱「升彼虛矣，以望楚矣」，虛者，漕虛，《左傳》作「曹」字，是楚丘又接曹邑也。漢之濮陽，今直隸大名府之開州也。曹邑爲漢之白馬縣，今河南衛輝府之滑縣也。開州之西南，滑縣之東，數十里內乃楚

丘所在。隋嘗於濮陽置楚丘縣，後改名衛南縣，今其廢縣在滑縣東六十里，春秋楚丘約略在其處也。戎州者，蓋南接帝丘，而西南附屬楚丘，同爲一邑。凡伯自魯聘還，衛之戎州人攻而執之，或未聘時奪之幣而執之。若爲直文，當言衛伐凡伯于戎。衛伐不可言也，戎伐猶可言也，故變言戎伐，而貶衛爲戎之義存焉。故《傳》曰「戎者，衛也。戎衛者，爲其伐天子之使，貶而戎之也。」既言戎伐，故下變言于楚丘，故《傳》又解之曰「楚丘，衛之邑也」。言邑者，對後文「成時爲衛都」言之，亦明即戎所屬也。杜預云：「楚丘，衛地。」又云：「在濟陰成武縣西南。」是誤爲曹國之楚丘，乃《左傳》襄十年宋享晉侯之地，自《漢志》已失之矣。以

歸，猶愈乎執也。以一人當一國，諱執言以歸，皆尊尊之正義，《春秋》之微旨。【補曰】孔廣森引《書序》以箕子歸，明以歸之文，非甚賤辭。以者，不以者也，義在哀七年《傳》。愈，勝也。此執猶云獲也，在《經》則執與獲異。執者皆是以大執小，以強執弱，是非兼有之。獲之語意較執爲重，不論其大小強弱，皆以不與之辭書。但執不可通言獲，而獲可通言執，古人之爲文辭，固多通言以便文者，故此《傳》以執爲獲也。此既諱獲，猶不名者，王臣非諸侯

比也。

八年春，宋公、衛侯遇于垂。垂，衛地。【補

曰】《左傳》以爲犬丘。王夫之曰：「宋地，漢之敬丘也。睢陽有雉水，字从「犬」，而音同「垂」。」不期而會曰遇。

【補曰】《曲禮》曰：「諸侯未及期相見曰遇，相見於郤地曰會。」孔穎達《正義》謂未至所期之日及非所期之地而忽相見則並用遇禮相接。既及期，又至所期之地，則行會禮。然則《傳》所謂不期有二：一是日期，一是地期。遇者，志相得也。【補曰】重發《傳》者，嫌內外異故也。

三月，鄭伯使宛來歸郕。凡有所歸例時。

郕，鄭邑。【補曰】此請以郕易許也。凡田邑實我取言取，實彼歸言歸，皆史文之舊也。月者，爲下入日。疏曰：「一解以擅易天子田，故謹而月之。」○【撰異曰】郕，《左氏》作「枋」，下同。案：古「枋柄」、「仿柄」皆同字。名宛，所以貶鄭伯，惡與地也。去其族，惡擅易天子邑。【補曰】謂惡鄭伯也。凡歸田邑之屬稱人者，皆是卑者，非大夫。此不稱鄭人，明宛是大夫。大夫當氏，今直名不氏，明惡鄭伯而貶之，猶云病公子所以譏乎公也。《公羊》以宛爲



微者，非也。

庚寅，我人邲。徐邈曰：「人」承「鄭歸邲」下，

嫌内外文不別，故著「我」以明之。【補曰】徐說得之，此亦是直書其事，文承「來歸」，則非卑者文也。《傳》例書來者，皆接公之文，明得承上顯公矣。崔子方曰：「見鄭伯雖來歸之而未定於我，待我人然後定也。」人者，內弗受也。【補曰】疏曰：「重發《傳》者，嫌易田與兵人異，故重發以明之。」曰人，惡人者也。【補曰】謹日以惡之。

今音讀去聲字也。「惡」下「人」字各本脫，今依唐石經、十行本、俞皋《集傳釋義》本、李廉《會通》本補正。邲者，

鄭伯所受命於天子而祭泰山之邑也。王室微

弱，無復方岳之會，諸侯驕慢，亦廢朝覲之事，故鄭以湯沐之邑易魯朝宿之田也。諸侯有大功盛德於王室者，京師有朝宿之邑，泰山有沐浴之邑，所以供祭祀也。魯，周公之後，鄭，宣王母弟，若此有賜邑，其餘則否。許慎曰：「若令諸侯京師之地皆有朝宿之邑，周有千八百諸侯，盡京師之地不足以容，不合事理。【補曰】以邑易魯者，杜預謂各從本國所近之宜也。注言湯沐，《公羊》文言沐浴。何休注文引許慎者，《五經異義·駁公羊》說也，見《王制·正義》。」

《傳》「也」字各本脫，今依唐石經、十行本、呂本中《集解》本、俞皋《集傳釋義》本補正。

夏六月己亥，蔡侯考父卒。諸侯曰卒，

正也。【補曰】疏曰：「重發之者，宋公起例之始，蔡侯嫌爵異，故重發以明之。舉此二者，足以包宿男，故宿男不復發《傳》。」

辛亥，宿男卒。【補曰】宿亦書日，則日正、不日

不正之例兼施於小國明矣。宿，微國也。【補曰】明與

元年盟地異。未能同盟，故男卒也。【補曰】男卒，

謂不名。薛伯、杞子、四秦伯，同義也。未能同盟所以不名

者，以其情疏而不親，彼既赴我，則但略記其卒，雖知其名，

不欲詳之也。若然，秦康公、共公亦未同盟，得書名者，彼

時秦與魯稍親，故與桓公、景公、哀公、惠公異也。自餘中

國諸侯及吳、楚君亦多有未同盟而名者，皆以情親故也。

《傳》以盟是國之重事，言同盟、未同盟，足見諸國交好之合

離。當時恩義之厚薄，要是大概言之，不得膠執「同盟」二

字，據他《經》以難《傳》，而實失《傳》意也。不書名為未同

盟，《左傳》亦同，但《左氏》於滕侯卒發例云「凡諸侯同盟，於是稱名，故薨則赴以名」，又於杞子卒發例云「凡諸侯同



盟，死則赴以名，禮也。」赴以名則亦書之，不然則否，此二條皆不可通於《穀梁》。據《雜記》赴辭曰「寡君不祿則諸侯赴於諸侯未必名」，趙匡所疑是也。凡不名者，蓋皆因史之舊。宿、薛、杞不葬者，或魯不會，或史以微國而略之。

### 秋七月庚午，宋公、齊侯、衛侯盟于瓦屋。

宋序齊上，王爵也。瓦屋，周地。【補曰】杜預曰：

「齊侯尊宋，使主會。」杜是也。此亦齊僖、小伯之事。外

盟不日，此其日何也？據僖十九年夏六月宋公、曹

人、邾人盟于曹南不日。【補曰】凡外盟史皆書日，君子略

之。諸侯之參盟於是始，故謹而日之也。世道

交喪，盟詛滋彰，非可以經世軌訓，故存日以記惡，蓋春秋

之始也。【補曰】《曲禮》曰：「離坐離立，毋往參焉。」兩謂

之離，三謂之參，三以上皆為參。王元杰曰：「前猶兩國交

盟，今三國合黨，馴致列國同盟矣。前此會盟，各於其竟，

今在王畿，馴致翟泉抗盟矣。」《誥誓》不及五帝，五帝

謂黃帝、顓頊、帝嚳、帝堯、帝舜也。《誥誓》、《尚書》六誓七

誥是其遺文。五帝之世，道化淳備，不須誥誓而信自著。

【補曰】《尚書大傳》言六誓五誥，謂《甘誓》、《湯誓》、《大

誓》、《牧誓》、《費誓》、《秦誓》、《大誥》、《康誥》、《酒誥》、《召

誥》、《雒誥》也，范言七誥，蓋并《梓材》、《康王之誥》數之，疏不數《梓材》，數《湯誥》，此枚氏古文新增之篇，若數《湯誥》，又當數《仲虺之誥》，當云八誥，知疏說非矣。范數五帝，《大戴禮·五帝德》、《世本·帝繫》、《史記·五帝本紀》、《白虎通》說也。《白虎通》數三皇，於伏羲、神農外有燧人。或云祝融，鄭君《中候》注依《運斗樞》易以女媧，而軒轅、少昊、高陽、高辛、陶唐、有虞六代為五帝，某氏《尚書傳》序、皇甫謐《帝王世紀》則以犧、農、黃帝為三皇，少昊至舜為五帝，是皆以五帝應有少昊。今案《五帝德》乃夫子答宰我語，豈容違異？《魯語》展禽曰：「黃帝能成命百物，以明民共財，顓頊能脩之。」中間不言少昊，《祭法》亦同，則五帝無少昊甚明。又檢《大戴禮·帝繫》及《晉語》，黃帝之子有兩青陽，先儒說己姓之青陽即少皞清，名摯，亦作「質」，為帝稱金天氏者也。姬姓之青陽即玄囂，降居泝水，為諸侯者也。或恐青陽唯一人，後稱少皞金天氏而實不為帝歟？《逸周書》嘗麥曰「乃命少昊清司馬鳥師」，而《山海經》稱「少昊之國」，先儒亦頗疑之。盟詛不及三王，三王，謂夏、殷、周也。夏后有鈞臺之享，商湯有景亳之命，周武有盟津之會，衆所歸信，不盟詛也。【補曰】《曲禮》曰：「涖牲曰盟。」鄭君曰：「坎用牲，臨而讀其盟書。」《左

傳曰：「盟諸僖閔，詛諸五父之衢。」杜預曰：「詛，以禍福之言相要。」陽虎盟季桓子，又盟公，及三桓盟國人，皆盟而復詛。先儒以爲詛小於盟。盟者，盟將來；詛者，詛往過也。凡盟書所以告上下庶神，詛亦告神，事略相類。注「夏后」三句并下「齊桓」二句，皆昭四年《左傳》文，彼文「夏后」作「夏啟」，「會」作「誓」。又云「成有岐陽之蒐，康有鄭宮之朝，穆有塗山之會」也。《周禮》有司盟之官，邦國有疑會同，則用盟。又有詛法，其文屢見《毛詩》，《傳》據之。許慎《異義》及鄭君並據之，謂當從《左氏》說，於禮得盟。今案《傳》云「不及三王」，三王，禹、湯、文、武也。或欲通此《傳》於《周禮》，謂司盟起周公，周公制禮，正是王制，不得謂在三王之外。《左氏》所論，但據時事，謂爲周法，實屬可疑。竊意今之《周禮》，未必無周公舊制，而晚周改作，漢初采集，皆當有之，先儒之辯論多矣。而趙匡言盟誓不必在周季，世皆有之，聖人豈先立此官？張子言《周禮》盟詛之屬，必非周公之意。所見皆尤確也。若夫覲禮，設方明以依神，本不言盟，《國語》叔向云「成王盟諸侯于岐陽」，與《左傳》椒舉言「蒐」顯然不同。而《內外傳》展禽之言或云「成王勞周公大公而賜之盟」，或云「王命之曰質之以犧牲」，竊謂皆未可據也。夫自少皞之衰，九黎亂德，民神雜

糅，咸瀆齊盟。顓頊受之，乃命重黎，絕地天通。其後苗民弗靈，詛盟罔信。堯復育重黎之後，使復典之。三王脩堯、舜之道，先成民而後致力於神，故禮無盟詛。末世有黎、苗之德，不徵於人而徵於鬼，故幽王爲大室之盟，而《小雅》言屢盟出詛矣。交質子不及二伯。二伯，謂齊桓、晉文。齊桓有召陵之師，晉文有踐土之盟，諸侯率服，不質任也。【補曰】質，贅也。《說文》解「贅」字曰：「以物質錢。」解「質」字曰：「以物相贅。」此猶今人之抵押也。據《左傳》，春秋之初有交質子，至二伯乃不用，與上句「不及」同意。周代唯有二伯，合夏伯昆吾、商伯大彭、豕韋爲五伯。凡言周有五伯者，蓋非古義。應劭《風俗通》及趙鵬飛、家鉉翁、趙汭辯之明矣。「誥誓」、「交質子」，因論盟詛并及之，以參盟甚於特盟，《經》特謹曰，故於此發《傳》，《荀子》書有此三句，正述《傳》文。孔穎達於晉古文《書·大禹謨》正義以此文爲妄，且謂《穀梁傳》漢初始作，其誣甚矣。

八月，葬蔡宣公。月葬，故也。【補曰】重發《傳》者，衛桓葬緩，此三月而葬速，嫌異故也。

九月辛卯，公及莒人盟于包來。包來，宋邑。【補曰】杜預曰：「浮來，紀邑。」○【撰異曰】包，《左氏》

作「浮」，聲近字。可言公及人，不可言公及大夫。稱人，衆辭。可言公及人，若舉國之人皆盟也。不可言公及大夫，如以大夫敵公故也。【補曰】言公及大夫，謂既言公又言大夫氏名也。莒本無大夫，此論《經》盟會通例耳，非謂盟者非公，莒得有氏名也。內與外特盟，以其無大夫，故從以公會人之例，不從齊高傒之例。稱氏名而沒公也，稱氏名不可，稱人則可者，當如注「衆辭」義。又以人是微者，微者不嫌敵公，猶周公制禮，君沐梁，大夫沐稷。士沐梁，士去君遠，不嫌其僭也。君與群臣燕，不以公卿爲賓，而以大夫爲賓，使宰夫爲獻主。公與族燕，則異姓爲賓，膳宰爲主人，皆以位卑，不嫌其偏也。杜預亦有見於此，而孫覺嘗論之。

螟。

冬十有二月，無佻卒。無佻之名，【補曰】謂直名不氏。未有聞焉。未聞者，不知爲是隱之不爵大夫，爲是有罪貶去氏族。穀梁子不受之於師，故曰「未有聞焉」。【補曰】非不受之於師，師已疑之。如下所云。或曰隱不爵大夫也。若俠卒是。或說曰故貶之

也。若無佻帥師人極是。【補曰】疏曰：「後「或曰」是也。不日則惡可知矣。」文烝案：如前說，則本不當稱氏；如後說，則本當稱氏，貶去之耳。《傳》於人極已發貶義，不定從後說者，蓋以無佻非公，即不貶亦當不氏，與益師及彊不同，故以隱不爵之義列於前，序《經》意依違之也。貶義已見，當從前說，其惡則自於不日見之。王引之曰：「說」字蓋衍文，「故」字亦衍文，蓋涉上四年《傳》而衍。」

九年春，天王使南季來聘。南氏，姓也。

南季，天子之上大夫，氏以爲姓也。所以別姓者，《經》有「王季子來聘」，「祭伯來」，「王」，「祭」皆非姓也，嫌與同，故別之也。【補曰】注非也。姬、姜等是姓，祭、尹、武、凡、南等是采邑，即是氏姓，凡氏皆姓也。氏姓與桓二年「字謚」意略同。惠棟以爲南季者文王子南季載之後也。《白虎通》引《詩傳》，文王十子，末曰南季載，「南」與《周公》之「周」及諸叔管、蔡、曹、成、霍、康皆地名也。《左傳》、《列女傳》謂之「聘季」，《史記》作「冉季」，「南」、「聘」、「冉」三字並同。史公謂冉季載後世無所見，未之考耳。文烝案：《國語》富辰曰：「聘由鄭姬。」蓋聘由娶鄭女而亡，又當在此後

數十年間也。注言「上大夫」，其實或上或中，無以言之。季，字也。季云字者，明命爲大夫，不以名通也。【補曰】元年《傳》曰：「儀，字也。父，猶傳也，男子之美稱也。」以釋某父之爲字也。此《傳》曰：「季，字也。」以釋伯仲叔季之亦爲字也。周人稱字之法見《儀禮》、《禮記》。《儀禮·士冠禮》「賓字」、「冠者」曰伯某甫仲叔季，唯其所當。《禮記·檀弓》曰：「幼名冠字，五十以伯仲，死謚，周道也。」鄭君解「某甫」謂如宋孔甫及孔子爲尼甫之類，【眉批】：「鄭又誤引家甫。」賈公彥、孔穎達並據《禮緯》「質家積仲，文家積叔」，兄弟不止四人則唯末者稱季。但賈謂周於二十造字時權稱伯仲，其實未呼，至五十乃加而呼之。若孔子始冠，但字尼甫，至五十乃稱仲尼是也。孔謂二十時雖云伯仲，皆配某甫而言，至五十則捨其某字，直呼伯仲。二說不同。朱子疑孔說爲是。段玉裁從賈說，以爲伯仲叔季定於天，冠時必連舉之，而不以爲五十前之常稱，但稱某甫，至五十乃稱伯某甫。又曰某甫者，《儀禮》、《禮記》、《公羊》注所謂「且字」也。且者，承藉於下之辭。凡冠而字，祇有一字，必五十而後以伯仲，故下一字所以承藉伯仲也。言伯某、仲某，是稱其字，單言某甫，是稱其且字。且字之說，《儀禮》、《禮記》注各四見，《公羊》注三見。《士喪》父某甫，《士虞》皇祖某甫，《少牢》皇祖伯某，《曲禮》天王某甫，《雜記》陽童某甫，四某甫，一某，皆爲且字。《檀弓》「尼甫」爲且字，桓四年宰渠伯糾，「糾」爲且字，宣十五年王札子，「札」爲冠且字，定四年劉卷，「卷」爲且字。文彙案：賈、孔二說各有理，段氏解「且」字亦極詳明，何休注解「伯糾」可從，解「札」、「卷」皆不可從。總之，古之制禮，二十而冠，四十而仕，五十而後爵，位隨年異，稱謂斯殊。迨周衰禮變，多有未五十、四十未冠而命爲大夫者，而謂其稱謂之辭，悉準舊時期限，事必不然也。且《春秋》諸文如邾儀父、如宋之孔父則稱某父，如祭伯、凡伯、南季、任叔、榮叔、祭叔、毛伯、召伯、王季子，如蔡叔、許叔、蔡季、紀季、蕭叔，如內之單伯、夷伯、公子季友、公弟叔肸、鄭之祭仲、陳之女叔、原仲則又直稱伯、仲、叔、季，如渠伯糾、叔服則又稱伯某、叔某，如宋之山則又直稱某，如家父則又直稱父。《詩》有程伯休父，《國語》有樊仲山父，《左傳》有內史叔興父，連稱伯某父、仲某父、叔某父，《經》則無所見。又《經》文宋子哀爲疑義，而王人子突則何休、鄭君皆以爲字，《書傳》中以字繫子者亦多，凡此六科，參差歧異，今說《經》《傳》但通其可通者，未敢妄生枝蔓矣。又據《經》及他書，似凡伯、召伯、毛伯及單伯，皆世稱伯，任叔、榮叔皆世稱叔，南季世稱季，家

父世稱父，亦未知何說也。聘，問也。【補曰】「聘」與

「問」，對文則大聘曰聘，小聘曰問，其實聘亦是存問之義。

《爾雅》、《荀子》、《毛詩傳》皆同也。聘諸侯，非正也。

《周禮》：「時聘以結諸侯之好，殷覲以除邦國之慝，閒問以諭諸侯之志，歸賑以交諸侯之福，賀慶以贊諸侯之喜，致禴以補諸侯之災。」許慎曰：「禮：臣病，君親問之，天子有下聘之義。」《傳》曰「聘諸侯非正」，甯所未詳。【補曰】注首

《周禮》下有「天子」二字，大謬，今刪之。許氏《異義》以《公羊》說天子無下聘義，引《周禮》斷之如此，見《王制正義》。

《傳》與《公羊》說同，故范疑《傳》不合《周禮》，其實非不合也。案：《周禮·大行人》、《大戴禮·朝事儀》皆先言春

朝、秋覲、夏宗、冬遇、時會、殷同，鄭君曰：「此六事者，以

王見諸侯爲文。」次言時聘、殷覲，鄭曰：「此二事者，亦以

王見諸侯之臣使來者爲文。」又次言閒問、歸賑、賀慶、致

禴，鄭曰：「此四者，王使臣於諸侯之禮也。」以此觀之，時

聘是諸侯聘天子，故《墨子》說《詩》云「古者諸侯春秋朝聘

天子」，《毛詩傳》亦云「文王率諸侯朝聘乎紂」是也。閒問

是天子問諸侯，猶諸侯使人於諸侯曰聘，使人於大夫則曰

問，與小聘同名，故《聘禮》曰「賓皮弁聘」，又曰「賓朝服問

卿」是也。是故上之於下，有問無聘，分異而禮殊，禮殊而

名別。王室既卑，諸侯逐進，於是變問爲聘，蓋自夷王以降，東遷以來然矣。君子學文、武之道，垂憲章之書，因史

成文，明經大義。諸書王聘，皆見非正，故穀梁子承師說言之，而《公羊》家因之，此正可與《大行人》、《朝事儀》文相

證。而說者誤解「時聘」之句，輒生疑難，惟杜謬、萬斯大能考而辨之，其識卓矣。大氏《經》文皆據周典爲義，故《傳》

諸所陳制度及凡言古、言禮、言正者，亦皆依周制言之。以今之《周禮》五篇合諸《傳》，唯若盟詛、征稅之法，祭祀、田

獵之文，此類頗爲乖異，自餘則可取證者多也。古書莫詳核於《周禮》，莫博麗於《左傳》、《國語》，學者慎擇之而已。

凡朝聘之道多端，此《傳》曰「聘諸侯，非正也」，後《傳》曰「天子無事，諸侯相朝，正也」，足明諸侯朝聘於王及其自相

聘俱是正矣。蕭穎士曰：「於《穀梁》師其簡，當於此類觀之。」

三月癸酉，大雨，震電。【補曰】大雨水而震

電也。雨，依今音讀上聲，與下「雨」異。《左傳》以爲霖雨自三日以往。《書·金縢》言「天大雷電以風」，天乃雨，反

風，《春秋》不言天，不敢斥尊也。地震則言之，尊親之義。

震，雷也。電，霆也。【補曰】段玉裁曰：「《詩·十月

之交》言「震電」，《采芑》、《雲漢》、《常武》言「雷霆」，震雷一也，電霆一也。古義霆、電不別，許叔重造《說文》始分析言之，曰：「霆，陰陽薄動生物者也。」「霆，雷餘聲鈴鈴，所以挺出萬物。」「電，陰陽激耀也。」「震，劈歷振物者。」許意統言之謂之霆，自其振物言之謂之震，自其餘聲言之謂之霆，自其光耀言之謂之電。」王引之曰：「疏云電即雷之光，霆者霹靂之別名，分電、霆爲二，非也。古言霆有二義：一爲霹靂之別名，《爾雅》云「疾雷爲霆」是也；一爲電之別名，此《傳》云「電，霆也」是也。《開元占經·電占》引京房語皆以霆爲電，則謂電爲霆，西漢猶有此語。」文烝案：《淮南子》曰：「疾雷不及塞耳，疾霆不暇掩目。」亦謂電爲霆。又曰：「天之偏氣，怒者爲風；地之含氣，和者爲雨。陰陽相薄，感而爲雷，激而爲霆，亂而爲霧。陽氣勝則散而爲雨露，陰氣勝則凝而爲霜雪。」【眉批】：「天之」二句依劉績本，與《范子計然》合。《大唐郊祀錄》、《太平御覽》並引「陰陽相薄」三句，以爲《穀梁傳》。而《郊祀錄》「霆」作「電」字，汪曰楨語予，此《傳》逸文，予謂此非逸文，蓋王涇及編《御覽》者誤記，或誤據他類書，否則當爲《穀梁外傳》、《穀梁章句》等書中語，與《新語》、《說苑》、《漢書》、《白虎通》、《後漢書》注所

引同，並見後。

庚辰，大雨雪。【補曰】孔穎達曰：「不直書大

雪，與大水異者，水見其在地之多，故不言大雨水，雪見其自上而下，故言大雨雪。其大雨雹亦同。」志疏數也。

【補曰】疏曰：「謂災有遠近也。遠者爲疏，近者爲數。」文烝案：《爾雅》曰：「數，疾也。」《廣雅》曰：「疏，遲也。」高誘《淮南子》注並同。此以數而謹日，下申言之。劉向奏論日食曰：「異有大小希稠，占有舒疾緩急，而聖人所以斷疑也。」八日之間，再有大變，陰陽錯行，故謹而日之也。劉向云：「雷未可以出，電未可以見，雷電既以出見，則雪不當復降，皆失節也。雷電，陽也。雨雪，陰也。雷出非其時者，是陽不能閉陰，陰氣縱逸而將爲害也。」【補曰】《墨子·經說》曰：「閒，謂夾者也。」變，猶異也。災異之事，陰陽而已，《傳》特揭之，爲諸災異括例。錯，亂也。史於二事錄日，當亦如《傳》所說，而《傳》則唯論《經》也。劉子政推陰陽之占明篡弑之兆，孔廣森申之曰：「《易·中孚傳》雷之始發大壯，始君弱臣強，從解起。推是年三月癸酉，猶在漸泰之氣，雷已發聲，臣強之甚，蓋置驕蹇，將弑君微也。陽氣既不以時出，八日之間，陰氣又旋脅之而成雪，

盛陰厲甚，臣有作威之象也。」孔又引惠士奇曰：「吳孫亮太平二年二月甲寅，大雨震電。乙卯，雪大寒。兩日之間，一雷一雪。晉安帝義熙六年正月丙寅，雷又雪。并在一日之中。亮竟被廢，安、恭二帝，皆強臣劉裕弑之，與隱公同占也。」文烝竊謂惠、孔所言足裨劉義，但此等之學未審《傳》意如何。案：《傳》於蠅生曰「非稅畝之災也」，又於梁山崩稱輦者之言曰：「天有山，天崩之，天有河，天壅之。」君親素縞，帥群臣而哭之。既而祠焉。」又於宋、衛、陳、鄭災稱子產之言曰：「天者神，子惡知之，是人也。同日為四國災也。」自餘諸災異，皆不言某災由某事所致，亦不言某異為某事之兆。觀《傳》所言與其所不言，足明有國家者宜兢兢於人事，而不宜屑屑於天意，宜有堯、舜、湯、水警余之心，而不宜為瞽史某日有災之說。蓋《春秋》之教，本是如此，故曰子不語怪神，子罕言命。又曰夫子之言天道，不可得聞，而及其言天，則曰「天何言哉？」四時行焉，百物生焉，夫何言哉？」【眉批】：「下一句作「夫何言」，依《魯論語》。」簡易切近如此而已。鄭君說《論語》天道為七政變動之占，而《荀子》引《傳》曰「萬物之怪書不說」。《淮南子》曰「孔子作為《春秋》，不道鬼神」；《史記·天官書》曰「孔子論六經，紀異而說不書」。重規疊矩，相為發明，是則天文五行諸占

有其說而不說之驗也，高閔引《商書》高宗雉之變，祖己曰：「惟先格王，正厥事。」不言其吉凶禍福，惟正厥事，明《春秋》之旨亦不異也。穀梁子為《經》作《傳》，悉本夫子之意。《公羊》異流而同源，故其《傳》自蠅生以外，皆直日記災記異，別無他說，與《穀梁》正同。若《左傳》則雜采當時之言，而意無專主，自是史家之學異乎孔門所傳。孔穎達《詩·小雅》及《左傳正義》說士文伯論日食曰：「神道可以助教，不可專以為教，神之則惑眾，去之則害宜，故其言若有若無，其事若信若不信，期於大通而已。」此讀《左傳》者所不可不知矣。自漢孝武時董仲舒說《公羊》，於災異百餘事，一一推言其應，而何休繼之。劉向治《穀梁》，傳以《洪範》，其說時有出入。劉歆又自以其意附合《左氏》。今見於《漢書·五行志》者煩蕪歧誤，大約如《史通》內、《外篇》所譏。范解多采劉向語，佐以他書，擇之頗嚴，說皆近理。愚復略有稱引，附見其間，聊以蒐取舊聞，志其大者遠者，或亦不背《傳》意而終未敢信也。 雨月志，正也。 雨得其時則月。【補曰】疏曰：「僖三年六月雨是也。」文烝案：《傳》明雨得正則不日，上大雨為霖霽矣。霖自癸酉始，至庚辰而轉為雪。《五行傳》曰：「貌之不恭，是謂不肅。厥咎狂，厥罰恒雨。說曰：上慢下暴則陰氣勝，故其



罰常雨也。」

俠卒。○【撰異曰】俠，《左氏》作「挾」。案：《漢

書》「俠陞」，顏注：「同「挾」。」俠者，所俠也。俠，名

也；所，其氏。【補曰】疏曰：「徐邈引尹更始云：『所者，俠

之氏。』今范亦云所其氏，則所者是俠之氏族。麋信以爲

「所」非氏，所謂斥也。」文烝案：麋氏之意，所者斥言爲某

氏之辭，猶言「某俠」也，疑麋說是。莊三年解溺爲公子溺，

是魯人相傳云爾。俠別有氏，魯人失之。弗大夫者，

隱不爵大夫也。俠不命爲大夫，故不氏。【補曰】弗大

夫，謂直名不氏也。隱不爵命，故雖居大夫位，書卒而不

氏，足明無佞亦同矣。不爵命而不氏，與列國卑者以國氏

略相類。諸小國無命大夫者，欲目其人則直名，亦其比也。

桓與隱異，而柔亦不氏者，柔出會時未命，非終不命，若書

其卒，則必氏也。公子慤，臧孫紇非大夫，得氏者，公子之

重視大夫。紇之祖父又本世大夫，又皆例所不卒，以出奔

特書，故稱氏，無所嫌也。隱之不爵大夫何也？

曰不成爲君也。明將立桓。【補曰】不自成爲君也，猶

云不取爲公。

夏，城郎。郎，魯邑。【補曰】方苞曰：「據《左

傳》，元年費伯已帥師城之，至是始書，必前此城制猶未備

也。」文烝案：此亦舊有城而益城之證。

秋，七月。無事焉，何以書？不遺時

也。四時不具，不成年也。【補曰】不於六年發《傳》者，

《傳》及《左傳》皆周人書，其體例無所拘限，桓元年又多二

句。《公羊》曰：「《春秋》雖無事，首時過則書。」何休曰：

「過，歷也。歷一時無事，則書其始月。」

冬，公會齊侯于防。防，魯地也。【補曰】近

齊。○【撰異曰】防，《公羊》作「邴」。會者，外爲主焉

爾。【補曰】疏曰：「重發《傳》者，嫌華戎異故也。」

十年春王二月，公會齊侯、鄭伯于中丘。

隱行自此皆月者，天告雷雨之異，以見篡弑之禍，而不知戒懼，反更數會，故危之。【補曰】往月例在定八年《傳》。

夏，鞏帥師會齊人、鄭人伐宋。鞏，隱之罪

人也，故終隱之世貶之。【補曰】此本《公羊》。何焯曰：

「加貶於隱一代之中，使人因而推得其故，所謂微而顯。」



六月壬戌，公敗宋師于菅。敗例日與不日

皆與戰同。菅，宋地。內不言戰，【補曰】別內於外，故

不言戰，而以戰爲敗文，此蓋《經》改舊史以立例。舉其

大者也。戰然後敗，故敗大於戰。【補曰】明內所以不言

戰也。大，猶重也。敗重於戰，言敗則戰可知，故舉重而

書，可損去舊文也。此事與莊十一年同，書日義於彼《傳》發之。

辛未，取郕。【補曰】孔廣森曰：「郕，本部子國。

宋滅郕，有其地。今爲魯取。」辛巳，取防。【補曰】於是

魯有二防邑，近齊者爲東防，此爲西防。取邑不日，此

其日何也？據僖三十三年伐邾，取訾樓不日。【補曰】

凡內取邑，史皆日，君子略之。不正其乘敗人而深

爲利，取二邑，故謙而日之也。禮不重傷，戰不逐

北，公敗宋師于菅，復取其二邑，貪利不仁，故謹其日。【補

曰】乘，猶因也。胡瑗以爲十一日之間取其二邑，不日則其

實不明。程端學引陳岳說甚謬。取二邑，唐石經磨改作

「又取二邑」。

秋，宋人、衛人入鄭。

宋人、蔡人、衛人伐載。鄭伯伐取之。

凡書取國，皆滅也。變滅言取，明其易。【補曰】伐取之，殺

之、用之、刺之，凡句末言「之」者，皆緩辭例，與「日有食之」

亦同也。何休曰：「不月者，移惡上三國，何非也？既不

言滅，則從伐例，故略之。」○【撰異曰】載，本或作「戴」，《左

氏》作「戴」。唐石經《左氏》磨改，及《音義》亦作「載」。案：《釋名》：「載，戴也。戴，載也。」孔穎達曰：「《地理志》

云：「梁國留縣，故載國。」古「留」、「載」聲相近，故鄭《詩》

箋讀「假載」爲「熾留」。」文烝案：「載國」字，《說文》、《字

林》皆作「載」。不正其因人之力而易取之，故

主其事也。三國伐載，自足以制之，鄭伯不能矜人之危

而反與共伐，故獨書「鄭伯伐取之」，以首其惡，其實四國共

取之。【補曰】注言四國共取，不可通也。因人之力而易取

之者，解《經》言取之也。主其事者，謂「取之」之上加言

「伐」也。因人之力所以爲易取者，易辭。取之云者，因人

力而易取之之辭，因人易取，是爲蒙上之文，不爲特主其

事，今加言伐，明欲爲主事之文也。加伐所以爲主事者，如

三國言伐載，而鄭伯言取載，與徐人取舒同文，則三國爲主

事，鄭伯亦爲主事。直言取之，但爲蒙上，不爲主事。今言

伐取之，則是既爲蒙上，又爲主事也。必主之者，鄭伯因人之力，全無仁心，反得託兼弱攻昧之義，罪甚。三國不正其如此，故三國既主之，鄭伯又主之也。不蒙乎上，無以著其因人之實，不主其事，無以見因人之爲不正，是故戰不言伐，圍不言戰，人不言圍，滅不言人。而取特言伐焉，所謂其義則丘竊取之者也。如此之屬，必是改舊史之文也。家鉉翁曰：「《孟子》曰：『善戰者服上刑，連諸侯者次之。』此春秋初年用法之意也。若鄭莊、宋殤者，可以當此刑矣。」

冬十月壬午，齊人、鄭人人郕。○【撰異

曰】郕，《公羊》作「盛」。人者，內弗受也。曰人，

惡人者也。【補曰】重發《傳》者。前日人是易田，今是

兵入。郕，國也。

十有一年春，滕侯、薛侯來朝。【補曰】朝

者，《白虎通》謂用朝時見也。《傳》曰：「諸侯相見曰朝。」

何休曰：「不言朝公者，禮：朝受之於大廟，與聘同義。」疏

曰：「十是盈數，更以奇從盈，故言有，欲見一者非十中之物也。」孔穎達引干寶同。天子無事，諸侯相朝，正

也。事，謂巡守、崩葬、兵革之事。【補曰】《周禮·大行

人》：「凡諸侯之邦交，歲相問也，殷相聘也，世相朝也。」

《大戴禮·朝事儀》曰：「使諸侯世相朝，交歲相問，殷相

聘。」考禮脩德，所以尊天子也。【補曰】《禮器》

曰：「禮也者，猶體也。」《祭義》、《仲尼燕居》並以爲履。

《鄉飲酒義》曰：「德也者，得於身也。」《王制》曰：「考禮正

刑一德，以尊于天子。」《朝事儀》曰：「習禮考義，【眉批】：

「義，讀爲儀，謂等儀。」正刑一德，以崇天子。」《左傳》曰：「朝

以正班爵之義，帥長幼之序。」又《朝事儀》曰：「諸侯相朝

之禮，各執其圭瑞，服其服，乘其輅，建其旌旆，施其樊纓，

從其貳車，委積之以其牢禮之數。君使大夫迎于境，卿勞

于道，君親郊勞致館，及將幣，拜迎于大門外而廟受，北面

拜飢，君親致饗既，還圭，①饗食，致贈，郊送，所以相與習

禮樂也。諸侯相與習禮樂，則德行脩而不流也。」諸侯來

朝，時，正也。朝宜以時，故書時則正也。【補曰】謂正

例不月，注非。犝言同時也，犝言，謂別言也。若穀伯

①「饗」，原作「雍」，據中華書局整理本《大戴禮記解詁·朝事》改。

緩來朝，鄧侯吾離來朝，同時來，不俱至。【補曰】《音義》曰：「植，獨也。本或作「特」。」累數皆至也。累數，總言之也。若滕侯、薛侯來朝，同時俱至。【補曰】累，積也。數，計也，目也。皆至於魯，魯則先後受之。劉敞、葉夢得等以為旅見，非也。○陳則通曰：「來朝皆小國也，畏大國，不獲已，是以來也。鄭人曰曹畏宋、邾畏魯也。宋人曰滕、薛、邾，吾役也。晉人曰滕、薛小邾之不至，皆齊故也。不寧惟是，繒畏邾也，杞畏莒也，紀畏齊也，郕畏宋也，邾畏吳也，穀鄧畏楚也，介葛牟畏東夷也。《春秋》錄之，悲其無以自存，依人以爲安，亦幸其猶未亡也。春秋之末，諸姬垂盡，視昔日來朝者獨有區區之滕耳。」

夏五月，公會鄭伯于時來。時來，鄭地。

○【撰異曰】《左氏》無「五月」，張壽恭疑其脫。時來，《公羊》作「祁黎」，《左經》與此同，《傳》作「邾」。案：時來，祁黎古音皆同，後如曲池、毆蛇之類放此。

秋七月壬午，公及齊侯、鄭伯入許。【補

曰】劉敞曰：「伐宋、敗宋、取郕、取防、朝滕、薛、入許，隱之所以弑也。德薄而多大功，慮淺而數得意也。備其四竟，禍反在內，可不哀與？」孔子曰：「人無遠慮，必有近憂。」

不在顓臾，而在蕭牆也。」○【撰異曰】「許」國字，《說文》作「𡙇」，《史記·鄭世家》有「鄆」字。

冬十有一月壬辰，公薨。【補曰】內君薨皆不

名者，國所獨尊，從大上之例。十二公唯莊見名，隱、閔不葬，並不見謚，故史家之學，別有世本譜牒之書矣。《左傳》固史學，而此類則從略，故隱、桓、閔、文、宣、成、襄、哀之名亦皆不著。公薨不地，故也。不地，不書路寢之比。

【補曰】魯史之法，備用王禮，王無弑時，史無書道。故《明堂位》曰魯王禮也，君臣未嘗相弑也，禮樂刑法政俗未嘗相變也。觀於晉史之書趙盾，齊史之書崔杼，則足以明體例之異焉。君子作《春秋》以當王法，因其舊制，更立新例。弑逆大禍，則不忍地。本不地者，乃又不日，觀其有異文，知其有變故矣。鄭玉曰：「常事直書義自見，大事變文義始明。」方苞曰：「《春秋》之特文，皆所以發疑，事雖變而義非隱，無所用特文也。惟事變而義隱，然後特文以揭之，文異然後疑生，疑生然後義見。」范言路寢之比者，以桓公在外則地也。隱之，不忍地也。隱，猶痛也。【補曰】何休曰：「不忍言其僵尸之處。」○桓公與公子翬弑隱公，《傳》不如《左氏》、《公羊》。明言其事，但於前後略見之，

《傳》似此者多矣。以內之大事言之，如文姜、齊襄之殺桓公，哀姜、慶父之賊般，閔、季子之討慶父，宣公、仲遂之殺惡、視，意如之出昭公，陽虎之竊國寶，《左氏》載其事甚詳，《公羊》亦明述其事，獨此《傳》於《經》各當文下既不一言，其發《傳》於他處者亦皆隱約其辭，而無紀錄事迹之語。若此者何也？《傳》之釋《經》，主於明義，義明則止也。《經》文書法，簡婉深微，其實《經》之當文及前後文未嘗無以見之，故《傳》亦於當文，前後文明其義所見而止，不復敘述事迹也。全《傳》十一卷，義最該密，而文或簡略。季子之鳩叔牙、叔彭生之死，歸父之遣，與夫宋宣、繆之讓國，殤、閔之被弑，孔父、仇牧之死難，華元之平楚，陳袁濤《塗》之誤，齊桓、晉荀息之死難，齊豎刁、易牙之爭權，逢丑父之救君，陳乞之迎陽生，衛叔武之被殺，甯殖之命子，鄭弦高之犒秦師，楚莊王之赦鄭，靈王之經死，《左氏》、《公羊》皆有明文，《傳》絕無之。又《公羊》載曹子之劫齊桓，孔子之行乎季孫，曹羈之諫君，齊高子之城魯，《傳》亦絕無之。又《公羊》解《經》有衛石碣、鄭高克、楚子玉、得臣、晉先軫、曹公子喜時等姓氏名字，《傳》皆不具。夫此數十事者，公羊高尚能得之於師，則穀梁子尤當知之，今皆隱約其辭，或沒而不說，是其好從簡略矣。然則內事如獲莒挈、敗鹹、叔卒、

叔倪卒、至自頰谷，外事如滅夏陽、盟召陵、盟葵丘、殺里克、滅黃、戰泓、敗般、殺陽處父、弑夷皋、殺泄冶、戰鞏、盟爰婁、梁山崩、宋災、伯姬卒、殺慶封、宋衛陳鄭災、弑買、唁乾侯、戰伯舉、入楚、歸賑、會黃池，此二十七《傳》者何以述事獨詳？蓋作書時意有所到，偶然詳之，或以當時習知其事，習聞其義，因備述於《傳》。如滅夏陽一條，則《戰國策》、魏謂趙王論晉人伐虢之事，《春秋》罪虞之義可相證也。桓譚謂《穀梁》之書殘略，多所遺失，是謂《傳》所不載者並是不知其事，豈其然乎？其不言葬何也？君弑，

賊不討，不書葬，【補曰】此內外所同，亦《經》之新例。以罪下也。責臣子也。【補曰】《公羊》曰：「以為無臣子也。」又曰：「子沈子曰：『葬生者之事也。』《春秋》君弑，賊不討，不書葬，以為不繫乎臣子也。」隱十年無正，隱不自正也。無正，謂不書正月。【補曰】不自正，謂不自正為君。《公羊》曰：「隱將讓乎桓，故不有其正月也。」此《傳》以為不自正，明讓桓是不正之事，君子取義如此也。或疑十年中正月適無事，日食適是曆誤，故得移晦入朔，改正為二。又朝聘會遇，觀魚輪平等，適皆在時例耳，否則亦必有正。十年中或有竟春無事者，又必有正，此

皆疑非所疑也。今已無正，故《經》因就無正起義，義隨文變，無意無必。元年有正，所以正隱也。明隱宜立。【補曰】正隱，謂正隱之爲君也。既以無正取義於不自正，故元年之正又取正隱之義，《傳》與元年《傳》「謹始」之意相因相足，見《經》義之深遠也。劉向《說苑》曰：「《春秋》之義，有正春者無亂秋，有正君者無危國，是故君子貴建本而重立始，謂隱元年也。」案：隱二年人向、人極；三年日食；四年伐鄭；五年螟；六年輸平；七年伐邾；八年人邠，螟；九年震電，大雪；十年伐宋，敗宋，取郕，取防；十一年人許；此皆兵戎災異之事，而皆在無正之歲。元年有正則悉無之，故曰有正春者無亂秋也。隱不自正爲君，故身弑而統絕，正其爲君，則能終享其國，子孫保之，故曰有正君者無危國也。此爲建本立始，開卷之首義，蓋《穀梁》家相承之說，而《公羊》學者因之，遂謂《春秋》有五始矣。

## 春秋桓公經傳第二補注第三 桓公，亦惠公

子，隱公弟也。惠公嘗立之爲太子。《史記》名允。一作「軌」，與《世本》同。母亦曰仲子，以桓王九年即位。

穀梁 范氏集解 鍾文烝詳補

元年春王正月。【補曰】舊本「正月」二字退在

下《經》「公」字上，以「王」字斷句，此以《傳》合《經》者之誤，今移而改正之。或并欲移「公即位」於此，則非全《傳》附《經》之例。凡《經》一事有數句者，皆以《傳》文隨句散附，與《公羊》附《經》之例一事爲一《傳》者不同。嚴可均辯之甚明，故今亦仍舊例。桓無王，【補曰】謂文無王。其曰王，何也？謹始也。諸侯無專立之道，必受國於王，若桓初立，便以見治，故詳其即位之始，以明王者之義。其曰無王，何也？【補曰】據周實有王。桓弟弑兄，【補曰】《音義》曰：「弟殺，本亦作「弑」，下及下注同。」案：今皆作「弑」。臣弑君，天子不能定，諸侯不

能救，百姓不能去，【補曰】定，正也，安也。若宣王殺伯御，更立孝公，是救止也，謂討賊以止亂。百姓，蓋官民之通稱。去，除也，諸大夫國人共除賊也。以爲無王之道，遂可以至焉爾。【補曰】以爲無王之道，遂至於此，故文無王也。必於餘年去王而後足見此年之特書王，故《傳》欲申「謹始」之義而先釋「無王」之文。元年有王，所以治桓也。【補曰】治，討也。此申足上「謹始」義也。謹始即以治桓。隱之書正，曰謹始也，又曰所以正隱也；桓之書王，曰謹始也，又曰所以治桓也，文意一例，以明二字爲兩篇大要也。《孟子》曰：「世衰道微，邪說暴行有作，臣弑其君者有之，子弑其父者有之。孔子懼，作《春秋》。《春秋》，天子之事也，是故孔子曰：『知我者其惟《春秋》乎！罪我者其惟《春秋》乎！』」又曰：「孔子成《春秋》而亂臣賊子懼。」無王之道遂可以至此，孔子所以懼也。稱王治之，以大彰天下有王之義，此所以爲天子之事，而亂臣賊子懼也。內之變甚於外，桓之罪重於宣，故於桓特文以著義，明其餘皆從同矣。《傳》與《孟子》合，是聖門所傳如此。《春秋》經世，議而不辯，此其大者。疏曰：「范氏例云《春秋》上下無王者凡一百有八，桓無王者，見不奉王

法；餘公無王者，爲不書月，不得書王。桓初即位，若已見治，故書王以示義。二年書王，痛與夷之卒，正宋督之弑，宜加誅也。十年有王，正曹伯之卒，使世子來朝，王法所宜治也。十八年有王，取終始治桓也。」○《春秋》撥亂反正，以當王法，故隱之始有正，桓之始有王，冠兩篇而冒全書者也。《公羊》但知隱十年無正，而不能言其義，《孟子》於桓篇之義則深有合焉。世衰道微，但據《春秋》之初以無王之治始於桓也。《春秋》成而亂賊懼，懼王治之也。《春秋》天子之事，則以王之冒全書者言也。知我者惟《春秋》，《公羊》所謂「堯、舜之知君子」是也。罪我者惟《春秋》，《公羊》所謂「其詞則丘有罪」，又謂「主人習其讀而問其傳，未知己之有罪」是也。

**公即位。**杜預曰：「嗣子位定於初喪，而改元必須踰年者，繼父之業，成父之志，不忍有變於中年也。諸侯每首歲，必有禮於廟，諸遭喪繼位者，因此而改元即位，百官以序，故國史亦書即位之事於策。」【補曰】何休曰：「即者，就也。先謁宗廟，明繼祖也。還之朝，正君臣之位也，事畢而反凶服焉。」文彞案：《左傳》曰：「晉悼公即位于朝。」○【撰異曰】《周禮·小宗伯》「建國之神位」，注曰：「故書『位』作『立』。」鄭司農云：「『立』讀爲『位』，古者立、位同

字。古文《春秋經》「公即位」爲「公即立」。段玉裁曰：「古文《經》者，左氏古《經》也。」繼故不言即位，正也。故，謂弑也。【補曰】弑者故之實，非故之訓。繼故不言即位之爲正，何也？曰先君不以其道終，則子弟不忍即位也。哀痛之至，故不忍行即位之禮。【補曰】雖實即位而不言即位，明其有不忍心，子弟同義，故兼言之，亦以容桓。繼故而言即位，則是與聞乎弑也。繼故而言即位，是爲與聞乎弑，何也？曰先君不以其道終，已正即位之道而即位，是無恩於先君也。推其無恩，則知與弑也，此明統例耳。與弑尚然，況親弑者？【補曰】疏曰：「桓是親弑之主，而《傳》論與弑之事，故知《傳》意本明統例耳。」文彞案：注、疏非《傳》意，弑逆之事非一人所能獨爲，與弑即是親弑，故於桓曰與聞乎弑，鞏曰與于弑公，宣曰與聞乎故，許止曰與夫弑者，衛獻曰知弑，皆同解也。前見故，後言即位，皆爲與弑之辭。夫先君不正終而繼之者安然即位，無不忍心，習其讀而深思之，知其必與乎弑矣。

三月，公會鄭伯于垂。垂，衛地也。《傳例》

曰：「往月，危往也。桓大惡之人，故會皆月以危之。」【補曰】何休曰：「桓弑賢君，篡慈兄，無仁義之心，與人交接則有危也。」文烝案：桓公十餘會，無不有月，知舊史月日之文最爲詳備，而君子有所去取明矣。崔子方謂《春秋》之例以日月爲本，此言深有見。劉敞乃謂《穀梁》寤於日月，何哉？近儒或引王充《論衡》謂《穀梁》、《公羊》日月之例，使平常之事有怪異之說，徑直之文有曲折之義，非孔子之心。夫唯俗儒見以爲怪異曲折，斯其爲聖人之《經》也。漢諸儒無敢議日月例者，獨王充妄言之，彼無師法，豈足據依？會者，外爲主焉爾。鄭伯所以欲爲此會者，爲易田故。【補曰】疏曰：「重發《傳》者，嫌易田與直會異故也。」

鄭伯以璧假許田。【補曰】以者，重辭，當從僖

二十一年之例。玉圜肉倍好曰璧，圜剡上方下曰圭。假，借也。依《說文》當作「段」，《史記·魯世家》集解引廉信曰：「鄭以邠不足當許田，故復加璧。」《十二諸侯年表》鄭莊公二十九年：「與魯枋，【眉批】：「今本「枋」，誤作「璧」。易許田。」三十三年「以璧加魯，易許田」。假不言以，言以非假也。實假則不應言以璧。【補曰】假則直假耳，言以璧，是易也，非假也。非假而曰假，諱易地也。【補

曰】假可言，易不可言，故婉其文而爲諱。禮，天子在上，諸侯不得以地相與也。諸侯受地於天子，不得自專。【補曰】申上意也。許翰曰：「以邠近魯，許田近鄭，而以相與，利則利矣，而義不得。凡情之所便而亂之所生，《春秋》所謹也。無田則無許可知矣。【補曰】所稼

曰田，所居曰邑。許者，邑之名，以田繫邑名，無田，知亦無邑矣。諸言田，如濟西、汶陽，自漵水、龜陰、漵東、沂西，皆繫山水名，不繫邑者，有田無邑也。其繫邑者，則兼有邑，叔弓疆鄆田是也。《公羊》以爲田多邑少稱田，邑多田少稱邑。趙匡改之云有邑稱邑，無邑稱田。趙說近之矣。若然，言田不必皆兼邑，直言邑者即皆以邑見田，故疆鄆田之前直言取鄆，是其驗也。鄭以邠易許，歸邠，我人邠，直言邠，則此亦當直言許。《傳》言無田則無許可知者，明許下不須加言「田」以起下文也。《魯頌》美僖公曰「居常與許」，鄭君謂即此許，《毛傳》以爲魯西鄙，當是魯西近鄭之地，而《公羊》乃謂諱取周田，以其近許，而繫之許，杜預從之。夫邑自名許，何關許國，宜來劉炫之規。不言許，不與許也。但言以璧假許而不繼田，則許屬鄭也。今言「許田」，明以許之田與鄭，不與許邑也。諸侯有功，則賜田以



祿之，若可以借人，此蓋不欲以實言。【補曰】不與者，《經》不與得假也。假許田可言，假許不可言，故亦婉其文。案《左傳》楚子重請於王，取於申、呂，以爲賞田。申公巫臣曰：「此申、呂所以邑也，是以爲賦，以御北方。若取之，是無申、呂。」是古者賞田之制以田不以邑之事。許田者，

魯朝宿之邑也。邠者，鄭伯之所受命而祭泰山之邑也。用見魯之不朝於周，而鄭之不祭泰山也。朝天子所宿之邑謂之朝宿。泰山非鄭竟內，從天王巡守受命而祭也。擅相換易，則知朝祭並廢。【補曰】《傳》釋「許」連言「田」者，便文也。何休曰：「宿者，先誠之辭。」文烝案：「泰」或作「大」也。諸侯朝王，王巡助祭，皆周代大典，《春秋》猶有以見之。《王制》曰：「諸侯之於天子也，比年一小聘，三年一大聘，五年一朝天子，五年一巡守。」此與《五經異義·公羊說》及何休注同。鄭君據《左傳》以爲記所言大聘與朝乃晉文、襄霸時所制，諸侯自相朝聘之法也。《左傳》又有「歲聘問朝」，「再朝而會」，「再會而盟」之文，又有「諸侯五年再相朝」之文。《周禮·大行人》、《大戴禮·朝事儀》侯、甸、男、采、衛、要服六者，各以其服數來朝。十二歲王巡守殷國，《虞書·堯典》五載一巡守，

群后四朝。

夏四月丁未，公及鄭伯盟于越。○【撰異

曰】越，《公羊》本亦作「粵」。及者，內爲志焉爾。

【補曰】時鄭與魯會垂而去，魯復因易田事，志在結鄭，故又會於越而盟也。此與隱盟唐同，與盟蜀、盟宋、盟皋鼬、陳袁僑盟皆異。重發《傳》者，垂、越地近，時又相接，嫌與盟蜀諸文爲類也。盟唐、盟越，皆與上會判爲兩事，不復書會而書及，則是內爲志。蜀、宋、皋鼬、陳袁僑之屬書及者，皆與其上會爲一，非是罷會歸國，復會而盟。上書會而下書及，自足見爲尊卑內外之常文，非是內爲志矣。用兵書及，如公孫敖救徐亦承會文，亦是也。越，盟地之名也。越，衛地也。【補曰】盟地，盟所期之地，此越亦非國，故又辯之。《傳》釋宿、越二文，明後文會鄧、會邠、盟黃、會穀、築臺薛、秦之屬皆從此例，故不復發《傳》也。杜預以垂爲衛地，越爲近垂地名。王夫之謂垂屬宋，顧棟高、江永疑越當爲曹地。

秋，大水。《禮·月令》曰：「季秋行夏令則其國大水。」大水例時。【補曰】《五行傳》曰：「簡宗廟、不禱祠、廢祭祀、逆天時則水不潤下。」董仲舒曰：「水者陰氣也。」

《春秋考異郵》曰：「陰盛臣逆，民情悲發，則水出，水災歷月而成，故例時。」高下有水，災，曰大水。【補曰】明以災書也。張尚瑗曰：「高下言田之高下。」文彞案：《左傳》魯弔宋曰：「天作淫雨，害于粢盛。」

冬，十月。無事焉，何以書？不遺時

也。《春秋》編年，四時具而後爲年。編，錄。

【補曰】二語《公羊》同。備四時而後謂之年，編年而後謂之《春秋》也。《禮運》曰：「播五行於四時。」即《論語》云「四時行焉」是也。《洪範》九疇，五行居始，《春秋》之書，五行、五事、八政、五紀、王極、【眉批】：「王、皇同。」三德、稽疑、庶徵、五福、六極悉備焉，故上律天時，義之所重。又案：周之正月、七月，二至月也，四月、十月，二分月也，故《漢志》引劉歆云：「時以記啓閉，月以記分至。」

二年春王正月戊申，宋督弑其君與夷。

宋督，宋之卑者，卑者以國氏。【補曰】注二語本莊十二年宋萬弑君《傳》文，《傳》於彼發以明例。《左傳》稱督爲大宰，宋六卿無大宰，則大宰非卿，非命卿即非命大夫，皆爲卑者，卑者宜稱人。弑君殺大夫，非衆辭皆不稱人，不可不

目言之，故從卑者以國氏之例也。督本公孫後，賜氏爲華，若是大夫，當書「公孫督」，或追書「華督」矣。與夷，殤公。○【撰異曰】督，本又作「替」，字體之異。桓無王，其曰王何也？正與夷之卒也。諸侯之卒，天子所隱痛，姦逆之人，王法所宜誅，故書王以正之。【補曰】《左傳》文十五年，宋華耦辭公曰：「君之先臣督得罪於宋殤公，名在諸侯之策。」此可見魯史之舊。

及其大夫孔父。【補曰】孔穎達曰：「其君者督

之君，其大夫者與夷之大夫。」孔父先死，【補曰】說在下。其曰及何也？書尊及卑，《春秋》之義也。邵曰：「會盟言及，別內外也。尊卑言及，上下序也。」【補曰】凡及皆以尊及卑，君臣也，夫婦也，內外也，主客也，華夷也，一也。故特言《春秋》之義，所以廣包諸文。注未得《傳》意。孔父之先死何也？督欲弑君

而恐不立，於是乎先殺孔父，【補曰】不立，謂事不成。《公羊》曰「督將弑殤公，孔父生而存，則殤公不可得而弑也。故於是先攻孔父之家」是也。《左傳》亦謂先攻殺孔父，乃由督黷孔父之妻，殺而取之。啖助曰：「大夫妻乘

車，不可在路而見其貌。」文烝以爲《左氏》好言婦女，多采無稽小說爲之，故華之傾孔也，莒之人向也，晉之討同、括也，齊之取讎、闡也，各自有其本末，而皆爲鄙言褻語所亂。此年既載奪妻事，又言因民之不堪命歸罪司馬，是其所據之書不一，學者詳之。

**孔父閑也。**閑，謂扞禦。【補曰】

孔父所以爲閑者，《公羊》所謂義形於色也。特言此者，明兩下相殺不志，即志之，不言殺其大夫，又或當言遂殺其大夫。今以閑，故得志，又得言其大夫，又得蒙弑君文言及，不言遂殺也。呂大圭曰：「書『及』者，以其與君存亡。」汪克寬曰：「若言遂殺，則不見其爲君而死，而大臣扞君之節不著。」其說皆是也。劉知幾以爲稱「及」則弑、殺不分，君、臣靡別，「及」宜改爲「殺」。文烝以爲古「弑」字祇作「殺」，異音同字，故其辭得以相統，說已具隱四年，劉氏妄矣。此句與上數句文意不相屬。何以知其先殺孔父也？

【補曰】知，見也。言《經》以何文見之。曰：子既死，

父不忍稱其名；臣既死，君不忍稱其名，【補

曰】論君臣并及父子者，其事同也。《五經異義·公羊說》

臣子先死，君父猶名之。孔子云「鯉也死」，是已死而稱名。

《左氏說》既沒稱字而不名，孔父先君死，故稱其字。《穀

梁》同《左氏說》。鄭君以爲《論語》云「鯉也死」者，未葬以前也。文烝案：原仲、夷伯皆此例，說又見彼。以是知君之累之也。累，謂從也。【補曰】注非也。「累」之正

字本作「纍」，省作「累」。《戰國策》「纍」、「累」通用。《玉篇》「纍」字，有力僞切一音，云「延及也」。又曰：「累，同上。」《廣韻》曰：「累，緣坐也。」「緣」與「延」同義。王逸《楚辭注》：「纍，緣也。」《毛詩傳》：「纍，蔓也。」緣、蔓皆延也。

《傳》言「君之累之」者，謂督欲弑君，延坐及於孔父，以致先死也。《左傳》引《書·康誥》「父子兄弟罪不相及」。《管子》曰：「凡過黨，其在家屬，及于長家。」劉績注曰：「及，坐及也。」上言以「尊及卑」，及者，與也。此言「累之」，明凡殺

大夫言及者，又爲延及、坐及之及。《公羊》曰：「及者何？累也。」與《傳》同也。凡殺言及，皆爲累，而孔父之累則爲先死。公子瑕、箕鄭父、慶寅《傳》皆言累，並無先死之事。事雖不同，其爲延坐一也。《傳》曰：「罪累上也。」又曰：「以累桓也，」累及許君也，「衛侯累也」，皆爲緣坐延及之義，正可與此相證。而范乃訓「累」爲「從」，何休說《公羊》以爲「累從君而死」，齊人語。疏又引麋信云：「累者，從也。」謂

孔父先死，殤公從後被弑，皆失之矣。孔廣森說《公羊》讀

若伏生《書·甫刑》傳「大罪勿纍」，勝於舊說。又引《反離騷》之「湘纍」，李奇注謂諸不以罪死曰「纍」，則牽合之說也。

孔氏，【補曰】此合下句句字爲義，言以字爲氏也。

《左傳》曰孔父嘉。「嘉」，名也；「孔」，字也；「父」，美稱也。啖助以爲《春秋》時名「嘉」者多字「孔」，《說文》已言之矣。

弗父何讓國？四世至正考父，宋君未賜氏族，五世至孔父，君命以其字爲氏，故《左傳》亦曰督攻孔氏也。《史記》敘孔子之先曰孔防叔，防叔爲奔魯之始祖，故據而言之，非防叔始氏孔也。孔父嘉爲孔氏，猶華父督爲華氏。

父字，謚也。孔父有死難之勳，故其君以字爲謚。【補曰】

此又合上句「孔」字爲義。「父」者，美稱，連「孔」言，皆爲字，沒則爲謚，故曰字謚也。《左傳》、《世本》宋大夫皆無謚，殷禮則然。孔父以字稱，得爲謚者，蓋字以表德，沒稱之以易名。自周法言之，則謂之謚，以字氏爲君命，則以字謚亦君命矣。《檀弓》魯哀公誄孔子曰「嗚呼哀哉尼父」，與《左傳》同，鄭君曰：「因且字以爲之謚。」又《少牢》饋食禮「皇祖伯某」，鄭君曰：「伯某，且字也，大夫或因字爲謚。」引《左傳》魯無駭卒，請謚與族，公命之以字爲展氏，與《檀弓》注相合。鄭以彼《傳》衆仲言「諸侯以字爲謚，因以爲

族」，當於「謚」字斷句，而孔穎達哀十六年《正義》反謂鄭錯讀，非也。《傳》言字謚，諸證歷歷，夫子本宋人，哀公用殷禮，竊意衆仲所述未必周制，亦據周既有謚之後而言謚也。

孔廣森《經學厄言》說則異矣，以爲王褒賦言謚爲《洞簫》，謚本訓號，非始於周，特周始以行制謚耳。殷法生有名，死以字爲號，諸王以十幹稱者，皆其字。措之廟，立之主，配帝言之即謚也。文王之父曰公季，亦其比也。周既以行制謚，宋之君皆得謚於王，而賜大夫謚皆以字，自秉殷禮，故有正考父、孔父、好父、華父、樂父、碩父、夷父之等，疑他國亦本如是，故《左傳》曰諸侯以字爲謚，謂諸侯賜其臣謚之禮也。魯謚夫子爲尼父，一則以夫子本殷人，一則尊聖人，不敢以末世非禮之謚謚之。衛大夫有石駘、仲駘字，不見謚法，蓋東周之初猶守禮典，當亦以字爲謚者。孔說未知是否，學者擇焉。范注甚不了，疏申之尤誤，又引舊解云：「三月既葬之後，嗣君謚之，使者以葬後始來，故得稱謚。」又云：「或當孔父以字爲謚，得據後言之。」二說皆泥於葬後之制，且未思嗣君篡立，不應爲先大夫作謚也。或曰：其不稱名，蓋爲祖諱也。孔子故宋也。孔子舊是宋人，孔父之玄孫。【補曰】疏曰：「案《世本》，孔

父嘉生木金父，木金父生祁父，其子奔魯爲防叔。防叔生伯夏，伯夏生叔梁紇，叔梁紇生仲尼，是孔父是孔子六世祖。范云玄孫者，以玄者親之極至，來孫昆孫之等亦得通稱之。」文烝案：《孝經》鄭氏注曰「蓋者，謙辭」，謙謂謹慎，與疑辭意近。上言祖，下言故宋，謂孔子以故國視宋，不忘祖也。此或曰與後八年同，言《經》文亦包此義也。孔父即不先君死，夫子亦必不稱祖名。若盟會聘問之屬，可準臨文不諱之例。今此最隱痛之事，不得斥名，後篇四殺大夫，皆不名，由此處已有諱義也。魯史本以孔父先君死稱字，君子仍之，又寓諱義。然則史惟一意，《經》兼二旨，故《傳》備言之也。○《春秋》因舊文爲一義，出聖筆又爲一義，相兼乃備。嘗讀《詩》而益信，凡《詩》有兩作者即有兩義，可明證者三焉：其一，《左傳》富辰論《常棣》詩，既以爲周公作，又言召穆公作。「召穆公亦云」，鄭君解之以爲凡賦詩者，或造篇，或誦古也。其二，晉郤至曰：「世之治也，公侯扞城其民，故《詩》曰『赳赳武夫，公侯干城』。及其亂也，略其武夫，以爲己腹心股肱爪牙，故《詩》曰『赳赳武夫，公侯腹心』。」此《免置》一篇之文。而以一章爲治詩，三章爲亂詩，明是互文錯舉也。其三，《毛詩》以《關雎》爲文王之時，后妃之德。【眉批】：「《關雎》傳專言樂，師說如是，《序》混哀樂爲

一，蓋後來附益。」《魯》、《韓詩》則以爲康王房后，佩玉晏鳴，應門失守，畢公作諷。而觀《論語》夫子之言曰：「《關雎》樂而不淫，哀而不傷。」上句謂文王詩，下句謂康王詩，則亦兩義兼用也。劉向《說苑》稱《傳》曰：「《詩》無通故，《春秋》無通義。」【眉批】：「通故」、「通義」，《繁露》作「達詁」、「達辭」，王應麟引辭作例。此類皆是也。

滕子來朝。隱十一年稱侯，今稱子，蓋時王所黜。

【補曰】此等多用杜預義。疏曰：「周公之制，爵有五等，所以擬其黜陟。今《傳》無貶爵之文，明降爵非《春秋》之義。」疏是也。滕子、薛伯、杞伯、杞子皆時王所黜。曹之爲伯，《左傳》所謂「曹爲伯甸」，而《汲冢穆天子傳》有曹侯，此穆王後黜爵之驗。

三月，公會齊侯、陳侯、鄭伯于稷，以成宋亂。稷，宋地也。以者，內爲志焉爾。【補曰】疏

曰：「以者，內爲志，即是以者不之以之例。」文烝案：《傳》稱「以者，不以其者也」，又稱「以，重辭也」，范據之謂以有二義，故疏云爾。其實內爲志又別爲義，與莊八年「以俟陳人、蔡人」同例，則以有三義也。公爲志乎成是亂也。欲會者，外也。欲受賂者，公也。【補曰】齊僖爲小伯，注上句

是下句，當言欲成亂者公也。受賂自在下文，與此無涉，且三國亦皆有賂矣。家鉉翁曰：「魯桓逆黨，所以使三國成此亂者，魯也。」《穀梁》深得聖人之意。此成矣，取不成事之辭而加之焉，於內之惡而君子無遺焉爾。取不成事之辭，謂以成宋亂也。桓，姦逆之人，故極言其惡，無所遺漏也。江熙曰：「《春秋》親尊皆諱，蓋患惡之不可掩，豈當取不成事之辭以加君父之惡乎？」案，宣四年公及齊侯平莒及郟，《傳》曰「平者成也」，然則成亦平也，公與齊、陳、鄭欲平宋亂，而取其賂鼎，不能平亂，故書成宋亂。取郟大鼎納于大廟，微旨見矣。尋理推《經》，《傳》似失之。徐邈曰：「宋雖已亂，治之則治，治亂成不繫此一會，若諸侯討之，則有撥亂之功，不討則受成亂之責，辭豈虛加也哉？」《春秋》雖為親尊者諱，然亦不沒其實，故納鼎于廟，躋僖逆祀，及王室之亂，昭公之孫皆指事而書。哀七年《傳》所謂有一國之道者，有天下之道者也。君失社稷，猶書而不隱，況今四國群會，非一人之過，以義致譏，輕於自己兆亂，以此方彼，無所多怪。【補曰】江熙非也。「平」訓「成」者，字義也。成則書成，平則書平者，《經》辭也。自杜預始為平亂之說，以改鄭衆，服虔成就之訓，而江氏因

之，且議《傳》失，既乖《經》例，又昧《傳》旨矣。范謂極言其惡，徐謂指事而書，說皆得之。案：昭二十二年《傳》曰：「亂之為言，事未有所成也。」宋督弑與夷立馮，事已成矣，不得言亂。今日亂，曰成之，是取不成事之辭加之於桓也。但文雖有加而意在誅惡，乃是極言之無所遺漏，所謂盡而不汙，非苟為加文耳。論宋事，則已成，論內惡，實欲成其不成，此之謂內為志。朱子曰：「程子所謂《春秋》大義數十，炳如日星者，如成宋亂之類，直著誅絕，自是分明。」文烝謂此是《經》特增舊史文，徐引哀七年《傳》，字句微異。

夏四月，取郟大鼎于宋。【補曰】《左傳》稱宋

以郟大鼎賂公。言取者，受賂之辭也。衛竇諱取，此不諱，亦所謂無遺。戊申，納于大廟。《傳例》曰：「納者，內不受也。日之，明惡甚也。大廟，周公廟。」【補曰】疏曰：「此《傳》亦有弗受之文，而引《傳例》者，凡《傳》言內弗受，指說諸侯相人之例，今此言不受，謂周公也，恐其不合，故引例以明之。」文烝案：例在僖二十五年《傳》。桓內弑其君，外成人之亂，受賂而退，以事其祖，非禮也。【補曰】以亂助亂，以賂事祖，非禮如是，書不可遺，總解「會」、「取」二文也。其道以周公為弗受

也。【補曰】其道，猶言其義，此解「納」字。郕鼎者，郕之所爲也。曰宋，取之宋也。此鼎本郕國所作，宋後得之。【補曰】疏曰：「何休曰：『周家以世孝，天瑞之鼎，以助享祭，諸侯有世孝者，天子亦作鼎以賜之。』《禮》祭天子九鼎，諸侯七，卿大夫五，元士三也。故郕國有之。」文烝案：何說自有據，恐未必爾。以是爲討之鼎也。討宋亂而更受其賂鼎。【補曰】錢儀吉曰：「討之鼎，猶《檀弓》其不謂之殺厲之師與？」文烝案：《經》著「取之宋」之辭者，以是爲討之鼎故也。成亂者其實，討亂者其名。《音義》引麋氏云「討」或作「糾」。孔子曰：「名從主人，物從中國，故曰郕大鼎也。」主人，謂作鼎之主人也，故繫之郕。物從中國，謂是大鼎。【補曰】名從主人，謂從郕言郕。物從中國，謂從魯言大鼎。《左傳》稱吳壽夢之鼎，莒之二方鼎，甲父之鼎，正與郕大鼎同。孔廣森曰：「文王克崇伐密，而魯有崇鼎，晉有密須之鼓，亦是也。」文烝案：此夫子用舊史文而釋其義。《公羊》曰：「器從名，地從主人。」傳聞未審也。又曰：「宋始以不義取之，故謂之郕鼎。」則別爲一說，尤失之。

秋七月，紀侯來朝。隱二年稱子，今稱侯，蓋

時王所進。【補曰】《白虎通》曰：「紀子以嫁女於天子，故增爵稱侯。」何休曰：「稱侯者，天子將娶於紀，與之奉宗廟，傳之無窮，重莫大焉，故封之百里。」○【撰異曰】紀，《左氏》作「杞」。朝時，此其月何也？據隱十一年春滕侯、薛侯來朝稱時。【補曰】舊史朝皆具月，君子略之。桓內弑其君，外成人之亂，於是爲齊侯、陳侯、鄭伯計數日以賂。桓既罪深責大，乃復爲三國計數至日以賈宋賂。【補曰】《傳》及注「計」字，各本皆誤作「討」，今依《音義》、唐石經改正。己即是事而朝之，惡之，故謹而月之也。己，紀也。桓與諸侯，校數功勞，以取宋賂，不知非之爲非，貪愚之甚，紀不擇其不肖而就朝之。【補曰】疏曰：「桓雖不君，臣不得不臣，所以極言君父之惡，以示來世者。桓既罪深責大，若爲隱諱，便是長無道之君，使縱以爲暴，故《春秋》極其辭，以勸善懲惡也。」

蔡侯、鄭伯會于鄧。鄧，某地。【補曰】杜預《釋例》：「蔡地也。」《公羊》以爲鄧國，賈服從之，杜改之。范注「某」字，或作「厶」，後皆同。《左傳》曰：「始懼楚也。」

九月，人杞。我人之也。不稱主名，內之卑



者。【補曰】疏曰：「何嫌非我而發《傳》者，以隱八年云我人邴，此直云人杞，故發之。」文烝案：此內稱人之文也。陳傅良以爲內恒言大夫帥師，唯桓師非君將，皆不言大夫。陳氏又謂於晉靈公凡會盟皆不序諸侯，是天下之辭，於魯莊公凡會齊襄皆書人，是一國之辭，於魯桓公凡大夫將皆不言大夫，於宋昭公凡大夫皆不名，是一人之辭。案陳氏之說亦已巧矣，姑記之耳。

### 公及戎盟于唐。

【補曰】不日者，蓋以桓既姦逆，又與戎盟，其事可惡，故略之歟？襄十九年《傳》曰：

「不日，惡盟也。」

### 冬，公至自唐。

告廟曰至。《傳例》曰：「致君

者，殆其往而喜其反，此致君之意義也。離不言會，故以地致。【補曰】注引例在襄二十九年《傳》。告廟飲酒，策勳書勞者，至之事也，《左氏》所據史例也。喜其反者，至之義也，《經》例也。注言「離不言會，故以地致」，非也。離會不致，致者，皆危之，危之故以地致，例在定十年《傳》。桓無會而其致何也？遠之也。桓會甚衆，而曰無會，蓋無致會也。弑逆之罪，非可以致宗廟，而今致者，危其遠會戎狄，喜其得反。【補曰】無致會者，爲其不足言會，

故曰無會也。遠之者，言《春秋》以爲遠也。唐在竟內，非遠，以其會戎，則亦爲遠而可危，故遠之以危之。常例會夷狄不致，就本當致會者言，桓則本不當致會，故於常例所不致者特致焉。其文則從穀、瓦、頰谷、黃之例，其義則獨以危其遠爲義，與彼四事又略殊。

### 三年春正月，公會齊侯于贏。贏，齊地。

夏，齊侯、衛侯胥命于蒲。蒲，衛地。胥之

爲言，猶相也。【補曰】言猶者，義相近。《公羊》、《爾

雅》、何休注皆以「相」爲本訓。相命而信諭，謹言而

退，以是爲近古也。申約言以相達，不歃血而誓盟。

古謂五帝時。【補曰】相命即謹言。《爾雅》曰：「誥，誓，謹

也。」「曲禮」曰：「約信曰誓。」「戰國策》、《韓非子》知伯

曰：「吾與二主約謹矣。」此謂約謹其言，以相告命，而兩國

之信，已足曉達，故不盟而退。《經》著此不盟之文，以是爲

近古故也。《傳》多以「信」爲「申」，古讀「信」皆作「申」音，

此「信」字則爲「人而無信」之「信」，注以爲「申」字，非也。

俞樾曰：「謹，讀爲結，《公羊》正作「結」。《爾雅》之「謹」謂

「約謹」，約謹即約結一聲之轉。《廣雅》：「劼，勤也。」是其



例。文烝案：《表記》曰：「信以結之。」《左傳》曰：「言以結之。」讀「謹」爲「結」，於義優矣。古，謂三王時，隱八年《傳》有明文。注依《周禮》及《左氏》說遠指五帝，甚誤。《左傳》直曰「不盟也」，《公羊》曰「近正也」。古者不盟，結言而退。《荀子》曰：「《春秋》善胥命，而《詩》非屢盟，其心一也。」是必一人先，其以相言之，何也？不以齊侯命衛侯也。江熙曰：「夫相與親比，非一人之德，是以同聲相應，同氣相求。齊、衛胥命，雖有先倡，倡和理均。若以齊命衛，則功歸于齊；以衛命齊，則齊僅隨從，言其相命，則泯然無際矣。」【補曰】注非也。命令之事，必有一人爲先，而餘人後之，先者命之者也，後者從命者也。今此齊爲先，實是齊侯命衛侯，《春秋》正名以順言，不欲以齊命衛，故以相言之。

六月，公會杞侯于郕。郕，魯地。【補曰】此杜預下六年注，其字作「成」。○【撰異曰】杞，《公羊》作「紀」。郕，《公羊》作「盛」。

秋七月壬辰朔，日有食之，既。○【撰異曰】辰，汲古閣《公羊》作「申」，誤也。言日言朔，食正

朔也。朔日食也。【補曰】王引之曰：「《廣韻》曰：『正，正當也。』言日之食，當月之朔也。正之言貞也，《廣雅》曰：『貞，當也。』定四年《傳》曰：『正是日，囊瓦求之。』亦謂當是日。」既者，盡也，【補曰】《公羊》同。何休曰：「光明滅盡。」《毛詩傳》訓「既」爲「盡」爲「終」，《墨子》經曰：「盡，莫不然也。」《說文》曰：「盡，器中空也。」有繼之辭也。盡而復生謂之既。【補曰】《傳例》曰：「又有繼之辭也，既亦爲有繼者。盡則復生，有既則有又，義以相轉而相足，此訓詁之理。」

公子翬如齊逆女。翬稱公子者，桓不以爲罪人也。【補曰】桓所不罪，故從常例，而仍史文。後不書翬卒者，弑君賊安死卿位，不得書卒，例在宣八年《傳》，蓋君子削之也。《爾雅》曰：「如，往也。」《小爾雅》曰：「如，適也。」逆女前不見納幣事者，或在即位前，或不納幣，或納而不使卿。正月會贏，《左傳》以爲成昏于齊，則知其有異常禮，疑其不納幣，或不使卿矣。逆女，親者也，使大夫非正也。【補曰】疏曰：「重發《傳》者，履綏外之始，翬是內之初，故重發以明外內不異。」文烝案：如者，內稱使之文

也。履綸逆女，以無使道不言使，此言如者，逆女大典，不可同於臧孫辰私行之文，又不得與祭公、劉夏無別，故不言逆女于齊也。

### 九月，齊侯送姜氏于謹。已去齊國，故不言

女。未至于魯，故不稱夫人。謹，魯地。月者，重錄之。

【補曰】注釋稱姜氏義，本杜預，得之。《公羊》以為父母之辭，非也。上下《經》文，內女伯姬、叔姬等稱字，父母之辭，且以別其人也。內夫人子氏、姜氏等稱氏，夫家之辭，又各繫於其君，不待別之也。仲子稱字者，既沒無謚，辭窮也。紀、季、姜亦外女稱字者，與其上文王后互見義，一從王朝之辭，一從其父母辭也。王姬不字者，別於內女也，故曰「名之必可言也，言之必可行也」。禮：送女，父不下

堂，【補曰】堂，廟堂。母不出祭門，諸母兄弟不

出闕門。祭門，廟門也。闕，兩觀也，在祭門之外。【補

曰】闕門，即《經》書雉門，諸侯之中門也。《周禮·祭義》並云建國之神位，右社稷，左宗廟，謂中門內路寢門外之左右。鄭君說《禮》誤也。兄弟蓋兼女兄弟言。父戒之

曰：「謹慎從爾舅之言。」【補曰】謹即慎，疊言之

耳。又慎者，誠也，靜也，審也。母戒之曰：「謹慎

從爾姑之言。」【補曰】《國語》子夏曰：「婦學於舅姑

者，禮也。」諸母般申之曰：「謹慎從爾父母之

言。」般，囊也，所以盛朝夕所須，以備舅姑之用。【補曰】

《士昏禮》記曰：「庶母及門內施鞶。」鄭君以鞶為鞶囊，男

鞶革，女鞶絲。范從鄭義，與先儒異。先儒皆以鞶為大帶

也。《音義》曰：「般，一本作『鞶』，申重也。」上所謂禮，皆

謂壻親迎，父母以女授壻時。送女踰竟，非禮也。

【補曰】齊僖過寵其女，違不下堂之禮。《左傳例》曰：「凡

公女嫁於敵國，姊妹則上卿送之，以禮於先君；公子則下

卿送之，於大國雖公子亦上卿送之。於天子則諸卿皆行，

公不自送，於小國則上大夫送之。」

公會齊侯于謹。無譏乎？齊侯送女踰竟，

遠至于謹，嫌會非禮之人，當有譏。【補曰】注非也。言公

既不親逆，而此會又似親逆，禮所未有，問《經》意無譏否

乎？曰為禮也。齊侯來也，公之逆而會之，

可也。為親逆之禮。【補曰】答上問曰為禮也，猶《檀弓》

云其庶幾乎亡於禮者之禮也，明《經》意無譏也。所以然

者，齊侯既以送女來至謹，則公之逆姜氏而因會齊侯可，既失於前，猶得於後。

### 夫人姜氏至自齊。

【補曰】公與夫人同至得禮，異於莊，故無公至文，或從桓無致會例歟？何休曰：「不就謹上致者，婦人危重，故據都城乃致也。」孔廣森曰：「于謹，已入國矣。見宗廟然後致，不言至自謹者，從國有行，乃以其地致。夫人本自齊來，與往謹地而還歸者異。」何休曰：「月者，為夫人至例，危重之。」其不言輦之以來何也？據宣元年遂以夫人婦姜至自齊。公親受之于齊侯也。重在公。【補曰】是公受之，非輦以之。親受，則幾於親逆矣。子貢曰：「冕而親迎，不已重乎？」冕，祭服。【補曰】冕者，以版為幹，三十升布覆之，玄表朱裏，後高而前低，故曰冕。冕，俛也。《王制》、《毛詩傳》、《白虎通》古冠冕圖並言夏曰收，殷曰冏，周曰冕，其制蓋皆相似。《禮器》曰：「天子之冕朱綠藻，十有二旒，諸侯九，上大夫七，下大夫五，士三。」士三旒者，天子之上士耳，其中、下士及列國之士則以爵弁當冕矣。爵弁覆版略如冕，故《士冠禮記》、《郊特牲》、《說文》、《獨斷》、《公羊》宣元年注並言夏收、殷冏、周弁。弁者，爵弁，即冕也。爵弁雖

與冕類，但冕有旒垂前而低。《周禮》五冕皆以旒數為別，爵弁則無旒，而前後平，故不得冕名，而從銳上合手之稱曰弁。又以其如雀頭色曰爵，又以其用韋不用布謂之韋弁。陳祥道據《周禮》言韋弁、皮弁，《荀子》言士韋弁，皆別無爵弁。《書·顧命》某氏《傳》、《釋名》又並言「爵韋弁」，故知韋弁即爵弁也。《周禮》冕服有六，大裘而冕、衮冕、鷩冕、毳冕、希冕、玄冕也。以鄭君注言之，九章曰衮，謂畫龍也。有龍、山、華蟲、火、宗彝，畫以為績。有藻、粉米、黼黻，刺以為繡。《荀子》稱「天子山冕」即此服也。七章曰鷩，謂華蟲也。五章曰毳，謂宗彝虎雉也。三章曰希，刺而不畫也。一章曰玄，以其衣色言也。若言其章，則《左傳》晉士會獻冕是也。《說文》解「衮」字云「卷龍繡於下幅」，①似畫刺皆在裳，其上衣直玄而已。稱其衣曰玄，稱其裳曰衮，鷩、毳、希、黻。但衣之稱，上得兼下，故《詩》言衮衣，毳衣、黻衣，《荀子》言黼衣，而實則皆玄衣也。《禮器》曰：「天子龍衮，諸侯黼，大夫黻，士玄衣纁裳。」此略言之，而玄衣其所同也。《士冠禮》曰：「爵弁服，纁裳，純衣，緇帶，韎韐。」純衣

①「幅」，原訛作「裳」，據中華書局影印陳昌治刻本《說文解字·衣部》改。

即玄衣也。玄衣、純衣者，絲衣也。衣之用絲者，獨冕服及爵弁服，尊祭服也。纁裳，緇帶，韎韐，皆士之制。據《玉藻》則大夫以上冕服皆素帶，其韠謂之韍。諸侯卿大夫皆赤裳赤韍，天子朱裳朱韍也。冕而親迎，謂玄冕也，士爵弁而親迎。《說文》：「冕」或作「纁」，「兗」或作「弁」，又作「𡩊」。魯《論語》子見纁衣裳者，見纁者，古《論語》皆作「弁」。文相似，制相近，明皆貴服矣。《音義》曰：「迎，一本作『逆』。」孔子曰：「合二姓之好，以繼萬世之後，何謂已重乎？」【補曰】夫子答端木氏與大、小《戴記》對哀公略同，引之者明《春秋》貴親迎之意，以明桓公親受，較愈於宣、成以夫人之文也。古人愛厥妃，必先敬其主，妻者所安之主也，以愛言也；妻者內主也，親之主也，以敬言也。

冬，齊侯使其弟年來聘。【補曰】昏事畢而聘也。許翰曰：「自嬴之會至仲年來聘，備紀，姜氏如此，謹昏義也。《春秋》反復意有所致者，不可不察也，必有深誠其中。故志文姜悉者，閑其亂也；錄伯姬詳者，矜其節也。」顧棟高曰：「會嬴至聘，一年中連書六事，皆為昏文姜、盟防至用幣，三年中連書十三事，皆為昏哀姜，志閭門

之禍，謹履霜之漸。」

有年。有年，例時。【補曰】凡言年者，取禾一熟，年之言稔也。《說文》：「季，穀孰也。从禾千聲。」言「有」，亦一有一亡之例。《周禮》以凶歲為無年。五穀皆熟，為有年也。【補曰】五穀，黍、稷、稻、麥、菽也。《周禮》、《逸周書》豫州、并州其穀宜五種，魯當青、兗，雖有不宜者，非全無也，不如其宜者多耳。或以麻易稻，未是，麻與桑為類，合五穀為七賦也。熟，成也。疏曰：「冬，五穀畢入，計用豐足，然後書之，不可繫以日月，故例時。」文烝案：有年時者，十二月納禾稼畢乃書也。《書·金縢》言「秋，大熟，未穫」，謂周十二月以前，其下言「歲則大熟」，乃據十二月，猶《詩》言「歲其有」，皆與「有年」同意。此書「有年」，宣書「大有年」，《公羊》皆曰以喜書。此《左氏》昭元年《傳》所謂「國無道而年穀和熟，天贊之也」。胡安國本孫復說，謂桓、宣十八年，獨此二年書「有年」，他年之歉可知。方苞曰：「書『有年』，皆承歲稔也。隱五年螟，八年螟，桓元年大水，故三年有秋，喜而志之；宣自即位後，螽蟥水旱不絕，故十六年大有秋，喜而志之；莊六年螟，七年大水，二十四年、二十五年皆大水，而其後不書『有年』者，繼災之

後，稍熟不可謂有年，久則民氣漸復，雖有年不復書矣。」○黍稷之說夥矣。程瑤田曰：「今北人呼黍子、糜子、黃米、黃粱，又呼稌米、稌子，其音如「稷」者，皆即黍也。今呼高粱、紅粱、麤粱、秫秫者，即稷也。稷米麤，所謂疏食者也。今呼穀子、小米者，則粱也。粱即禾，禾者粱之專名也。」文烝案：程氏《九穀考》，世所推重，其言黍是也，其言稷未盡是也，其言粱及禾非也。禾爲黍、稷、稻既秀之通名，說見莊二十八年。今之小米當爲稷，《說文》：「穀，稷雪也。」《釋名》：「穀，星也。」《周禮》注：「肉有如米者似星。」三文互證，皆言細小，則稷爲今小米可知。今之高粱當是稷中一種，《廣雅》曰：「藿粱，木稷也。」即高粱也，高粱高大如木，故稱木稷。【眉批】：「木稷亦曰蜀黍。蜀，大也。」既別之爲木稷，則非稷之正種。但《玉藻》稷食菜羹，實即《論語》疏食菜羹，所稱稷，當爲木稷。鄭君《月令》注引舊說，稷爲首種。今北人收穫，黃米最先，高粱次之，小米又次之。播種則高粱最先，小米次之，黃米又次之。是高粱、小米並合首種之名矣。若《詩》、《三禮》、《左傳》所謂粱者，《說文》但云米名，知其非穀名。楊泉《物理論》謂黍稷之總名曰粱，合稻、菽爲三穀。竊意黍、稷之中並有米名粱。《史記索隱》引《三蒼》曰：「粱，好粟。」韋昭《國語》注曰：「粱，食之精

者。」蓋得其實，故《左傳》「粱」與「麤」對，猶《毛詩》「稌」與「疏」對矣。楊泉又以爲粱、稻、菽三穀各二十種爲六十，蔬果之實助穀各二十，凡爲百穀也。

#### 四年春正月，公狩于郎。春而言狩，蓋用冬

狩之禮。蒐狩例時，而此月者，重公失禮也。莊四年冬，公及齊人狩于郕。《傳》曰：「齊人者，齊侯也。其曰人何也？卑公之敵，所以卑公也。」然則言齊人者，所以人公，則譏已明矣。狩得其時，故不月。【補曰】凡史書狩，皆月也，狩與蒐，皆書地。哀十四年《傳》云：「狩地，知非以地遠譏。」何休云：「《禮》諸侯田狩不過郊。」孔穎達以爲大野是魯狩常地，皆未可據。四時之田，皆爲宗廟之事也。【補曰】「田」者，四時取獸之總名。何休引《易》曰「結繩罔以田魚」是也。何氏又曰：「己有三牲，必田者，孝子之意，以爲己之所養，不如天地自然之牲，逸豫肥美。禽獸多則傷五穀，因習兵事，又不空設，故因以捕禽獸，所以共承宗廟，示不忘武備，又因爲田除害。」春曰田，取獸於田。【補曰】《白虎通》曰：「總名爲田。」何爲田除害也？春，歲之本，舉本名而言之也。夏曰苗，因爲苗除害，故

曰苗。【補曰】此本杜預《左傳》注也。《白虎通》曰：「擇其未懷任者也。」鄭君解《周禮》謂擇取不孕任者，若治苗去不秀實者云。何休解《公羊》「春苗」曰：「苗，毛也。」明當毛物取未懷任者。毛即「覘」字，擇也。《公羊》「夏不田」，而董仲舒《繁露》增入「夏獮」，異其師說。秋曰蒐，蒐，擇之，舍小取大。【補曰】此本何休也。《白虎通》曰：「蒐，索肥者也。」《音義》曰：「蒐，麋氏本又作『搜』。」《周禮》、《左傳》、《爾雅》春蒐、秋獮，《國語》云：「蒐於農隙，獮於既烝。」古書異說，不可強同。冬曰狩。狩，圍守也。冬物

畢成，獲則取之，無所擇。【補曰】此亦本杜預也。《白虎通》曰：「守地而取之也。」疏曰：「周之十二月，夏之十月，萬物已收，故得以畢成言之。」文烝案：春、夏、秋、冬，皆用當代制，不從夏時，《傳》明《經》以非禮書也。凡四時之田，有田、苗、蒐、狩，猶四時之祭有祠、杓、嘗、烝也。失時失正，而史書於策，八者一也。終《春秋》不見書田、苗、祠、杓者，田苗禮簡，蒐狩禮盛，祠杓禮約，嘗烝禮豐，非禮之事，必於盛且豐者而取備焉。故或非時而狩，或非時而大蒐，或非時而烝烝，無有非時而田、苗、祠、杓者也。或值狩時而見脅於仇讐，或遇嘗時而不緩其所可緩，無有田、苗、祠、

杓而蹈斯失者也。凡狩二蒐五嘗一烝二，惟蒐紅別見義，若西狩則非狩矣。孔穎達《王制》正義引鄭君《釋廢疾》謂《穀梁》「四時田」者，近孔子故也。《公羊》正當六國之亡，得見孔子所藏之讖緯，改爲三時田，從《春秋》之制。鄭與何休皆信讖緯，以爲是孔子之書，後漢之妄說也。讖緯即用《公羊》、《公羊》世遠失實，孔廣森以爲諸侯制似取楊疏之義，亦無徵也。四時之田用三焉，唯其所先得，【補曰】目在下。《王制》天子諸侯歲三田。正義引《釋

廢疾》謂以乾豆等三事爲田，非三時田也，與《禮》注異。俞樾曰：「言唯其所先得，則自以所得先後爲一、二、三之次，疑下注上殺、次殺、下殺之說未足據。」一爲乾豆，上殺中心，死速，乾之以爲豆實，可以祭祀。【補曰】何休曰：「一者，第一之殺也，自左臠射之，達於右髀。豆，祭器名，狀如鐙。天子二十有六，諸公十有六，諸侯十有二，卿上大夫八，下大夫六，士二。」二爲賓客，次殺射髀髀，死差遲。【補曰】何休曰：「二者，第二之殺也，自左臠射之，達於右脾。」三爲充君之庖。下殺中腸汚泡，死最遲。先宗廟，次賓客，後庖廚，尊神敬客之義。【補曰】何休曰：「三者，第三之殺也，自左脾射之，達於右髀，中腸脂汚泡。」

充，備也。」案：《公羊》、《王制》、《毛詩》傳皆有此三句。

夏，天王使宰渠伯糾來聘。宰，官也。渠，

氏也。天子下大夫，老故稱字。下無秋、冬二時，甯所未詳。【補曰】《公羊》曰：「下大夫也。」孔穎達引《周禮》大宰卿一人，小宰中大夫二人，宰夫下大夫四人，謂未知伯糾是何宰？今據《公羊》，當爲宰夫。《周禮》鄭衆注以《詩》「家伯維宰」爲宰夫，此宰夫稱宰之證。服虔以咺爲宰夫，當移以說此。渠氏亦是采，惠棟引《左傳》昭二十六年「劉子以王出，次于渠」是也。伯糾猶叔服，皆字也。何休曰：「天子下大夫，繫官氏且字。稱伯者，上敬老也。」老臣不名，何以糾爲且字？得之。以伯爲老稱，范用其說，實未可據。《傳例》：「天子之大夫皆不名耳。」《左傳》曰：「父在故名。」父在之義與老臣之說相反。杜預說渠爲氏，伯糾爲名。孔穎達引鄭《箴膏肓》云「名且字」，則渠爲名，伯糾爲字。《公羊》注「繫官氏且字」，傳寫「氏」下衍「名」字。徐彥因謂渠是名，要之皆非也。下無秋七月、冬十月者，十四年《傳》曰：「立乎定、哀，以指隱、桓，隱、桓之日遠矣。夏五，《傳》疑也。」明此亦爲世遠之故，仍史之闕，以示《傳》疑。《傳》於彼言之，則此可不發也。

五年春正月，甲戌、己丑，陳侯鮑卒。【補

曰】前正與夷，後正終生，此不正者，以二日爲變文，不復須正。鮑卒，何爲以二日卒之？《春秋》之義，

信以傳信，疑以傳疑，明實錄也。【補曰】稱《春秋》

以包全《經》。陳侯以甲戌之日出，己丑之日

得，不知死之日，故舉二日以包也。國君獨出，

必辟病潛行。【補曰】《公羊》曰：「愾也。甲戌之日亡，己

丑之日死而得。」何休曰：「愾者，狂也。齊人語。」此注辟

病，謂辟易之病，即狂也。惠士奇說死而得。死，讀爲

「屍」，謂得其屍也。案：《傳》明此仍舊史從赴之文。

夏，齊侯、鄭伯如紀。外相如不書，過我則書，

例時。【補曰】注據下「冬」《傳》也。疏曰：「紀在齊東，鄭

在齊西北，鄭欲如紀，則直過齊，何以二君並得過魯？蓋

齊侯出竟西行而逢鄭伯，遂與至紀，途過於魯，故得記之。」

文烝案：如者，朝也。《左傳》曰：「齊侯、鄭伯朝于紀，欲以

襲之，紀人知之。」杜預曰：「外相朝皆言如。」案：外相朝言

如者，略之以別於來朝之文，從內朝外之例。凡過我則有

借道之禮，故或得書。

天王使任叔之子來聘。任叔，天子之大夫。

【補曰】未知爲上爲中。○【撰異曰】任，《左氏》、《公羊》作「仍」。孔廣森《詩聲類》以爲冬、縵、蒸三類古通用，故「仍」亦作「任」。而戎菽謂之荏菽，戎與茸通，茸當音仍。《集韻》「戎」兼入《蒸部》，《小雅》「朋」、「戎」爲韻，《邶風》、《大雅》「仲」、「任」爲本句韻。張壽恭引《史記索隱》曰：「《地理志》東平有任縣，蓋古仍國。」任叔之子者，錄父以使子也。錄父使子，謂不氏名其人，稱父言子也。【補曰】《廣雅》曰：「詮，錄，具也。」王念孫曰：「詮者，論之具也。字亦通作『譔』，錄者，記之具也。凡言『之』者，緩辭。」此錄父以使子，明「之」亦緩辭。何休所謂辟一人也。武氏子雖未爵，父沒爲大夫矣。不得錄父，故無煩緩也。故微其君臣而著其父子，不正父在子代仕之辭也。君闇劣於上，臣苟進於下，蓋參譏之。【補曰】稱君以使，而所使之臣無姓氏名字，是微之。錄父以使子，是著之。其辭如此者，明不正其父在子代仕也。疏曰：「闇劣，苟進止是二譏，而言參者，舊解《傳》言『微其君臣』，而著其父子是刺其父之不肖，而令苟進，更又刺其君臣，故曰參譏之。或以爲參者交互之義，不讀爲三，理亦得通。」文烝

案：《公羊》曰「父老」，老者，致仕之謂。

葬陳桓公。【補曰】葬時，正也，例在成十三年《傳》。

城祝丘。譏公不脩德政，恃城以安民。

秋，蔡人、衛人、陳人從王伐鄭。王親自伐

鄭。【補曰】稱人者，孫復以爲衆辭。文烝案：《傳》例公與諸國大夫會盟，大夫悉稱人，明或公會諸國卑者則同文也。王與諸侯並在焉，猶公會諸大夫也；王與諸大夫並在焉，猶公會諸卑者也。今此三國稱人，蓋蔡、衛皆君，而陳佗使大夫，通以稱人爲例。猶蜀之盟，楚人、秦人等爲大夫，而齊人爲卑者。澶淵之會，晉人爲大夫，而宋人爲卑者也。服虔以陳亂無君，而決三國皆大夫，未得稱人之旨。呂大圭謂「有天子在則諸侯稱人，有諸侯在則大夫稱人」，其言是也。謂三國皆諸侯，則未盡是也。不言天王者，趙汭曰：「凡言天，以其無上，故王不在辭端則不加天。」文烝案：此亦所謂致恭而不驕，公朝于王所亦同也。以王配謚，本無加稱。舉從者之辭也。使若王命諸侯伐鄭，書從王命者三國也。【補曰】疏曰：「麋信曰舉從者之辭，謂解《經》稱人也。徐邈云舉從者之辭，謂王不能以威致三



國，三國自以義從耳。范以二者不通，故爲別解，謂若王不親伐。」文烝案：范是也。以王文親於伐鄭之上，未嘗沒其事之實，特其屬文爲「舉從者」之辭，謂以蔡、衛、陳主其事，不以王主其事。孫復以爲不使天子首兵是矣。若不欲爲舉從者之辭，當先言天王伐鄭，而後言蔡人、衛人、陳人從，如河陽先言王守，後言朝，是則以王主其事。《左傳》稱「王以諸侯」，言「以」者，豈史之舊歟？其舉從者之辭何

也？爲天王諱伐鄭也。諱自伐鄭。鄭，同姓

之國也，在乎冀州，於是不服，爲天子病矣。

鄭，姬姓之國。冀州則近京師，親近猶不能服，則疏遠者可知。【補曰】疏曰：「徐邈云：『新鄭屬冀州。』案：《爾雅》兩

河間曰冀州，新鄭在河南，不得屬冀。麋信云：『韓哀侯滅鄭，遂都之。』韓，故晉也，本都冀州，《傳》以當時言之，遂以

目鄭。然則伐鄭時未有韓國，何得將後代之事以爲名？

韓侯從冀州都鄭，亦不得謂鄭爲冀州也。蓋冀州者天下之

中州，古者天子之常居。鄒衍書云「九州之內，名曰赤縣，

赤縣之畿，從冀州而起」，故後王雖不都冀州，亦得以冀州

言之。」鄭近王畿，故舉冀州以爲說。王引之曰：「《士冠禮

注》曰：「病，猶辱也，故凡羞愧者皆曰病，曰爲天子病矣，

曰公子病矣，此類以由己羞之者言也。曰病公子，曰所以病齊侯也，此類以爲人羞之者言也。徐邈於襄八年《傳》注誤以爲疾病之病，楊氏於哀九年《傳》疏又誤以爲病患之病，古訓疏，而《經》說遂踳矣。」文烝案：此言同姓之親，冀州之近，猶且不服，以爲是天子之羞辱，故婉其文而諱親伐也。《春秋》之義，至是而止，伐而後服，在所不論。若《左傳》所載戰于繻葛，師敗王傷，彌不可道矣。○趙鵬飛曰：「親征非平世之事也，武王創業則親征，宣王再造則親征，成、康平世，不聞親征，有大司馬之法在也。」

大雩。雩者，旱祭請雨之名。《傳例》曰：「雩，得

雨曰雩，不得雨曰旱。月雩，正也。時雩，不正也。」

《禮·月令》曰：「仲冬行夏令則其國乃旱。」【補曰】秋不月者，七月也。《傳例》在僖十一年、成七年。《爾雅》曰：

「舞，號，雩也。」何休曰：「使童男、女各八人舞而呼雩，故

謂之雩。」鄭君《答臨碩難周禮》引董仲舒曰：「雩，求雨之

術，吁嗟之歌。」《祭法注》曰：「雩之言吁嗟也。」賈逵、服

虔、杜預皆曰雩之言遠也，遠爲百穀祈膏雨。賈又曰：「言

大，別山川之雩，蓋以諸侯雩山川，魯得雩上帝，故稱大。」

何休曰：「不地者，常地也。」鄭君《論語》注曰：「沂水在魯

城南，雩壇在其上。」《五行傳》曰：「言之不從，是謂不艾。

厥咎僭，厥罰恒暘。說曰：僭，差也。刑罰妄加，群陰不附，則陽氣盛，故其罰常暘也。」何休曰：「旱者，政教不施之應。」

**螽**。《禮·月令》曰：「仲冬行春令則蟲蝗爲敗。」

【補曰】劉歆說《五行傳》：「螽爲介蟲之孽。」何休曰：「螽者，煩擾之所生。」○撰異曰：《公羊》作「螻」，後皆同，亦作「螽」。螽，蟲災也。螻，螽之屬。【補曰】此本杜預也。

孔穎達曰：「《釋蟲》云：『螽，螽也。』揚雄《方言》云：『春黍謂之螽。』陸機《毛詩》疏云：『幽州人謂之春箕，春箕即春黍，蝗類也。長而青，股鳴者。或謂似蝗而小，班黑，其股狀如瑇瑁文。』《爾雅》又有螽，土螽，樊光云：『皆螽之屬。』然則螽之種類多也。」文烝案：《說文》曰：「螽，蝗也。《爾雅》：『阜螽，草螽；析螽，螽；土螽，李巡以爲皆分別蝗子，異方之語。』唐石經初刻「螽」上無「螽」字。甚則

月，不甚則時。【補曰】疏曰：「重發《傳》者。《經》書

時雩非正，故不月，螽災與之同不月，嫌其甚而不月，故發以明之。」文烝案：螽時者，亦皆七月也，災在八月以後則甚，七月則不甚。唯文三年秋雨螽于宋，甚而亦時，彼以外災特志，又加言雨，足以別之矣。此七月得雨書雩，災不甚

可見，前發螽例，此發螽例，疏未得其意。

**冬，州公如曹。**【補曰】董仲舒曰：「州公化我，

奪爵而無號。」文烝案：曹，小國，而州朝之，公非本爵明矣。稱公者，明其從此失國爲寄公，猶郭公、虞公，皆生稱公也。《喪服》經於失國者稱寄公，知是古之常稱。此言「如」，下言「來」，皆不言「奔」，故稱公以起之。《左傳》謂之「湫于公」。外相如不書，此其書何也？【補曰】

不書者，《經》例因史例也。過我也。過我，六年「寔來」是也，將有其末，故先錄其本。【補曰】注以「過我」即下「寔來」，又用何休爲下張本之說，皆未分明。如曹者，州公本意也。書於冬者，是冬過我也。正月又言「來者」，以過相朝也。過我當書，以過相朝亦當書。疏曰：「齊侯、鄭伯如紀，無寔來亦言過我者，不必悉有下事，此因有下事，故以相發明。其齊侯、鄭伯直塗過於魯，不入國都，故不言寔來也。」

**六年春正月，寔來。**來朝例時。月者，謹其無

禮。寔來者，是來也。【補曰】《公羊》曰：「猶曰是人來也。」何休曰：「不錄何等人之辭。」《爾雅》曰：「寔，是也。」杜預曰：「寔，實也。」案：《覲禮》曰：「伯父實來。」鄭

君注：「今文『實』作『寔』」。《左傳》曰：鞏伯實來、子皮實來、印段實往。《外傳》亦曰：叔父使士季實來。《左氏》書，古文也，杜讀從之，說亦可通。但今文家訓「是」，自有所受，不可輒改。《毛詩》「寔命不同」，《傳》云：「寔，是也。」《韓詩》作「實」，云「有也」，此二訓之異。何謂是來？謂州公也。其謂之是來何也？以其畫我，故簡言之也。諸侯不以過相朝也。畫是相過，去朝遠。【補曰】此注尤不可曉，《傳》意自明也。上冬《傳》及此《傳》皆與《公羊》同。《公羊》曰：「曷為謂之寔來？慢之也。曷為慢之？化我也。」簡、慢義同，畫、化聲近。何休曰：「行過無禮謂之化，齊人語也。」然則畫者，魯人語也。簡言之者，謂言寔來，不言朝也。畫者，即下句「以過相朝」是也。俞樾曰：「《傳》與《公羊》略同，惟《公羊》於「化我」下不置一辭，《傳》又申之曰「諸侯不以過相朝也」，於是其義明矣。蓋諸侯惟過天子之國必行朝禮，成十三年《公羊傳》所謂「不敢過天子」是也。若諸侯之於諸侯，本非臣屬，但須假道，不必相朝。而州公乃以如曹之故，道出魯竟，遂行朝禮。朝不以禮，與無禮同，故謂之畫我化我，何休行過無禮之說必有師承。又謂諸侯相過，至竟必假塗，人都必

朝，今州公過魯都，不朝魯則大非傳義矣。」文烝案：俞說是也。俞又謂《左氏》與《公》、《穀》絕異。今案：《左傳》曰：「冬，涇于公如曹，度其國危，遂不復。」「六年春，自曹來朝。書曰「寔來」，不復其國也。」蓋左氏讀《經》不審，以為上冬自州如曹，今春又自曹來魯，於二家言「過」、言「畫」、言「化」之旨皆不得通。唯解「來」字亦為來朝而不復國之說，足證明公為寄公之義，並可依用，其留曹、留魯則無以言之。

夏四月，公會紀侯于郕。○【撰異曰】郕，《左氏》、《公羊》作「成」。

秋八月壬午，大閱。【補曰】孔穎達曰：「大蒐、

大閱，國之常禮。公身雖在，例不書公。比蒲、昌間皆舉蒐地，此不言地者，蓋在國簡閱，未必田獵。昭十八年鄭人簡兵大蒐在城內，此亦當在城內。」文烝案：孔言「未必田獵」，不為決辭，準諸此《傳》，不田明矣。大閱者何？

閱兵車也。閱為簡練。【補曰】《左傳》曰：「簡車馬也。」《公羊》曰：「簡車也。」今本《公羊》「車」下衍「徒」字。

孔廣森曰：「閱義如伐閱之閱，簡義如簡稽之簡。必取名簡閱者，明主為簿按之，《周禮》所謂校登其夫家之衆寡及其六畜車輦旗鼓兵器者是也。先王之治，安不忘危，存不

忘亡，并牧其田野而寄軍令焉。居則有戶籍田結，行則有尺籍伍符，故大師曰拱稽，大役曰抱曆，大田曰讀書契。凡所以使軍實可數，卒兩可比，然後等列辨，少長順，而坐作進退之節可習。」脩教明諭，國道也。脩先王之教，以

明達於民，治國之道。【補曰】言此固治國之道也，所以起下二句。平而脩戎事，非正也。邵曰：「禮因四時

田獵，以習用戎事，存不忘亡，安不忘危之道。平，謂不因田獵無事而脩之。」【補曰】《周禮·大宗伯》：「大田之禮，簡衆也。」鄭君曰：「古者因田習兵，閱其車徒之數。」文烝

謂因田習兵，每歲四時行之。因田習兵，又大加簡閱，疑當如何休說，以爲三年一行。三年一行，亦國之常，史例不志。今魯屈三年之期不因田獵以行此禮，輒於城內行之，故史特志之，而《經》因以見非正。其日，蒐閱例時。【補

曰】注因蒐以推閱也。以爲崇武，故謹而日之，【補

曰】崇，重也。時史見事有異，故特志之，又日之。君子從而取義如此。蓋以觀婦人也。【補曰】觀，示也。婦人，

夫人也。古文《孝經傳》曰：「蓋者，辜較之辭。」劉炫曰：「辜較，猶梗概也。」推《傳》此言，疑夫人自桓時已與聞國政，爲後來出會如師之漸。桓既從妻所好，他年國外簡閱，或與俱

行，爲後來共會共如之漸。茲因子同之生，將及月辰，故夫

人不出，特行事於城內，以悅之耳。於說似奇，於情或得。

家鉉翁曰：「時當淫姜煽豔之始，《穀梁》必有所本也。」

蔡人殺陳佗。陳佗者，陳君也。其曰陳

佗何也？匹夫行，故匹夫稱之也。【補曰】庶

人稱匹夫。匹，偶也，言其夫婦相偶耳。人君而匹夫稱之，

爲其有匹夫之行。其匹夫行柰何？陳侯憇獵，

【補曰】《說文》曰：「喜，樂也。」「憇，說也。」顏師古曰：

「喜」下施「心」，是好憇之意。音虛記切。《說文》又曰：

「嗜，憇欲之也。」《太玄·玄衝》曰：「務則憇。」又曰：「窮無

喜。」憇即憇省，而與「喜」別。《急就篇》：「勉力務之必有

憇。」皇象不誤，他本皆誤。此《傳》音義亦虛記反，板本皆

不誤，惟唐石經誤。《白虎通》曰：「四時之田，總名爲獵。」

蔡邕《月令章句》曰：「獵，捷取之名也。」淫獵于蔡，與

蔡人爭禽，淫獵，謂自放恣，遺失徒衆。【補曰】是所謂

匹夫行也。傳聞之誤，遂以爲姦淫。《公羊》似此者多。

蔡人不知其是陳君也而殺之。【補曰】蔡自殺匹

夫陳佗耳，不殺陳侯。何以知其是陳君也？

【補曰】此「知」字訓「見」，問於《經》文，何以見之？兩下

相殺，不道。兩大夫相殺，不書《春秋》。【補曰】注言

「兩大夫」，是謂卿與卿相殺。《傳》云「兩下」，不必兩者皆卿。兩下者，別乎君殺大夫及衆殺大夫之辭，猶言兩臣也。

兩臣相殺，苟非矯王命殺世子，事涉重大，則皆以不道爲常。不道者，或是《經》例因史例，或專是《經》例，未能定也。此蔡稱人，本是衆辭，稱人而不言殺其大夫，則雖是衆辭之例，而實爲兩臣相殺之文。以兩臣相殺，常例不道，足明陳佗爲陳君也。其不地，於蔡也。【補曰】疏曰：

「邾人戕繒子于繒。書地，今不地，故決之。」

九月丁卯，子同生。子同，桓公嫡子莊公。

【補曰】《青史氏記》稱王太子生而泣，繼以卜名。而依《內則》，凡子生命名皆在三月之末，則此書名者，史追書也。不稱世子者，賈逵、杜預皆曰書始生也。案：《禮·士冠記》曰：「天子之元子猶士也，天下無生而貴者也。」疑，故志之。莊公母文姜，淫于齊襄，疑非公之子。【補曰】

案：《左傳》十八年，文姜如齊，齊侯通焉。彼時莊年已十三，次年而即位，人共見之，無所可疑。其所以疑者，時謂姜氏未嫁已亂其兄。《史記·齊世家》、劉向《列女傳》、鄭

君《詩箋》皆有其說，此致疑之由也。君子案史記既書夫人至，又志子同生，使習其讀者知夫人嫁魯，四年而生子，中間無如齊出會之事，則文姜雖惡，而疑可釋矣。《內則》說大夫士生子，夫告宰名，宰書曰某年某月某日某生，而藏之。宰告閭史，閭史書爲二。以是推諸侯之禮，魯史書生，必不止此，君子於此獨存之，其爲以疑特志，不亦明乎？

朱子及張大亨、高閌、趙鼎、程端學、郝敬、近儒顧棟高、方苞、牛運震、洪亮吉、張應昌皆發明《穀梁》之義，而惠士奇言未嫁私通最得之。楊疏亦知未嫁私通，乃謂此四年中齊襄仍尚往來，所以可疑。不謂志以破疑，反謂志以見疑，誤會《傳》意。其言鄙倍，且齊世子何嘗來？魯夫人何嘗往？真無稽之談也。○杜預曰：「十二公唯子同是適夫人之長子，備用太子之禮，故史書之於策。」杜意聲姜爲文公母，《左傳》無明文，聲姜又未知何年所娶。《左傳》雖以定姒爲定公夫人，而定姒爲哀公母，亦無明文，亦未知何年所娶。又以《傳》載公衡事推之，則成公非穆姜所生。又《傳》於此云「以大子生之禮舉之」，則如文篇不書子惡之生，或是未嘗備禮。杜說未審信否，依杜亦得兼通，史雖唯有此文，君子自取疑義，明不當疑也。張應昌以爲「聖筆第存其舊，而自別具妙義」是也。朱彝尊曰：「易半以黃，易

嬴以呂，易司馬以牛，其事或未足深信，惟無聖人之書法可以祛惑，史沒其文，斯疑者益甚耳。」時曰：同乎人也。時人僉曰：齊侯之子，同於他人。【補曰】范解「同乎人」本《左傳》「微舒似女」、「亦似君」之意。案：《山海經》：「伯陵同吳權之妻阿女緣婦。」郭璞曰：「同猶通，言淫之也。」或當依彼作解，因其名同，謂是姜氏同通乎人所生。《毛詩序》曰：「人以爲齊侯之子焉。」是當時齊、魯之人有此語，申上句「疑」字意也。《左傳》桓公曰：「是其生也，與吾同物，命之曰同。」杜預曰：「謂同日。」

### 冬，紀侯來朝。

七年春二月己亥，焚咸丘。日之，謹其惡。【補曰】焚之者，蓋公也。不書公，蓋諱之，或亦與前人杞後伐邾同。其不言邾咸丘何也？據襄元年圍宋彭城言宋。【補曰】此當如何休據紀邾、鄆、郕，既無伐邾文，咸丘當繫邾。疾其以火攻也。不繫於國者，欲使焚邑之罪與焚國同。【補曰】注又失其解，若攻不以火，則直言伐邾，不目咸丘矣。今疾其以火攻，詳其所焚之邑，則略其所繫之國也。凡書紀邾、鄆、郕，宋彭城，鄭虎牢者，變文

也。伐邑、取邑、滅邑悉不繫國，常文也。蘇轍謂邑有常處，不待國別而知。其說是也。故不言邾由於言咸丘，言咸丘則由於疾焚也。《經》辭有體而皆相貫，《傳》文甚簡而有所包，當以此意讀之。疾，猶惡也。何休曰：「征伐之道，不過用兵，服則可以退，不服則可以進。火之盛炎，水之盛衝，雖欲服罪，不可復禁，故疾其暴而不仁也。」杜預以咸丘爲魯地，焚爲火田。《左傳》中兵事言焚者多矣，杜非也。又失時月日之例。

### 夏，穀伯綏來朝。鄆侯吾離來朝。其名

何也？據隱十一年滕、薛來朝不名。失國也。《禮》諸侯不生名，失地則名。【補曰】注用《曲禮》文。上句亦見襄七年二十五年。失國則其以朝言之何也？據文十二年邾伯來奔不名。【補曰】疏曰：「邾伯與穀、鄆並與常例違，故據之以相決，何則？邾伯不言名而云來奔，穀、鄆書名而稱朝，二者相反，故特據之。」嘗以諸侯與之接矣，雖失國，弗損吾異日也。待之以初也。下無秋、冬二時，甯所未詳。【補曰】注「待之以初」用《公羊》也。言前者嘗以諸侯之禮相接，今雖失國，託寄於我，我猶以諸侯待之而用朝禮，故言朝，此史文之舊，君子所取

也。何休曰：「所謂故舊不遺則民不偷。」又據《禮記》諸侯不臣寓公，寓公不繼世。論其事曰「獨妻得配夫，託衣食於公家，子孫當受田而耕」。疏曰：「邾伯與魯同姓，故不名以表其親。言奔以明失國，穀、鄧與魯有好，故言名以彰失國，稱朝以見和親。但入春秋以來，無同好之事，蓋春秋前有之。」文烝案：下無秋七月、冬十月者，與四年同說。

## 春秋桓公經傳第二補注第四

穀梁 范氏集解 鍾文烝詳補

八年春正月己卯，烝。失禮祭祀例日，得禮者

時。定八年冬從祀先公是也。僖八年秋七月禘于大廟，月者，謹用致夫人耳。禘無違禮。烝，冬事也。春祭曰

祠，薦尚非卯。夏祭曰禴，薦尚麥魚。秋祭曰嘗，薦尚黍肫。冬祭曰烝，薦尚稻鴈。無牲而祭曰薦，薦而加牲曰祭，禮各異也。【補曰】《詩·小雅》曰：「禴祠烝嘗，于公先

王。」此周四時祭名。《周禮》《公羊》《爾雅》皆同。范注約何休注文。何休又曰：「祠，猶食也，猶繼嗣也。春物始生，孝子思親，繼嗣而食之，故曰祠，因以別死生。」麥始熟可灼，故曰灼。【眉批】：「灼」即「禴」字。「嘗者，先辭也。秋穀成者非一，黍先熟，可得薦，故曰嘗。」烝，衆也，氣盛貌。冬萬物畢成，所薦衆多，芬芳備具，故曰烝。」董仲舒曰：「祠者，以正月始食韭也；灼者，以四月食麥也；嘗者，以七

月嘗黍稷也；烝者，以十月進初稻也。」又曰：「春上豆實，夏上尊實，秋上机實，冬上敦實。豆實，韭也。尊實，醴也。机實，黍也。敦實，稻也。始生故曰祠，善其司也。夏約故曰灼，貴所受初也。先成故曰嘗，嘗言甘也。畢孰故曰烝，烝言衆也。」董生大指與何氏同，此古義也。嘗、烝二字，其本義皆非祭，乃用其引申之義，蓋其由來久也。祠、灼、禘、祫，當皆是後來之禮，故特製正字。葉夢得引詩《那》、《烈祖》、《楚茨》，皆但言烝、嘗。又逸《禮篇》有烝嘗禮，有禘于大廟禮，是則時祭，烝、嘗爲重。大祭，禘其大名歟？○何休又論祭曰：「祭於室，求之於幽；祭於堂，求之於明；祭於祊，求之於遠；皆孝子博求之意也。大夫求諸明，士求諸幽，尊卑之差也。殷人先求諸明，周人先求諸幽，質文之義也。禮：天子、諸侯、卿、大夫、牛、羊、豕，凡三牲曰大牢。天子、元士、諸侯之卿大夫、羊、豕，凡二牲曰少牢。諸侯之士特豕。天子之牲角握，諸侯角尺，卿大夫索牛。」案：《國語》觀射父曰：「天子舉以大牢，祀以會；諸侯舉以特牛，祀以大牢；卿舉以少牢，祀以特牛；大夫舉以特牲，祀以少牢；士食魚炙，祀以特牲；庶人食菜，祀以魚。」韋昭曰：「會，會三大牢。舉，四方之奠。」春興之，志不時



也。【補曰】周正月、夏十一月，以爲不時而志者，時祭之名亦不以夏制爲準也。以《春秋》言之，桓嘗在八月，文大嘗亦然，建未月也。然則烝宜用戊亥月，不從夏時之冬矣。《論語》顏淵問爲邦，子曰：「行夏之時。」皇侃以爲顏淵魯人，問治魯國之法，孔子舉魯舊法爲答，謂田獵、祭祀、播種皆用夏時以行事，是魯之舊也。案：《論語》下文殷路、周冕、《韶舞》，皆魯國禮樂之舊，皇說甚有理。《逸周書·周月》曰：「至於敬授民時，巡狩烝享，猶自夏焉。」竊意周、魯之初悉如此，但後來漸有變更，遂一以周時爲準。隱、桓之代，沿用已久，故田祭一失周時則即謂之非禮。而史書於策，《春秋》事仍本史，因即據以爲義，若《論語》則本魯之初制言之，故不相同也。依《王制》，嘗、烝皆祫，祭五廟爲時祭之祫。《左傳》亦稱「齊嘗于大公之廟」，此不言「烝于大廟」，十四年不言「嘗于大廟」者，主爲烝嘗，書舉祭名則義見。

### 天王使家父來聘。家父，天子大夫。家氏，父

字。【補曰】家氏亦采也。鄭君引家父釋《冠禮》「某甫」，孔廣森遂以「家」爲且字，非也。疏曰：「何休云：『中大夫，故不稱伯仲。』」范意或然。」文烝案：稱伯仲、稱父，蓋並通乎

上、中大夫，似當時世世爲是稱。《毛詩序》仍叔美宣王、家父刺幽王，孔穎達謂《春秋》所書，別是一人，猶晉之知氏世稱伯，趙氏世稱孟，宋孔父之父正考父，其子木金父，累世同字「父」也。又《大雅》宣王時有皇父，《小雅》之皇父，《序》爲幽王時，鄭《譜》及《箋》爲厲王時。孔氏亦疑是傳世稱之。

夏五月丁丑，烝。烝，冬事也。春、夏興之，黷祀也，志不敬也。【補曰】《公羊》曰：「亟則

黷，黷則不敬。」何休曰：「黷，渫黷也。」《說文》曰：「敬，肅也。」《釋名》曰：「警也。」案：敬與恭，散文通，對文則如《少儀》「賓客主恭，祭祀主敬」。鄭君曰：「恭在貌也，而敬又在心。」張栻曰：「心在焉，謂之敬是也。」疏曰：「一失禮尚可，故以不時言之，再失禮重，故以不敬釋之。」程子曰：「既烝復烝者，必以前烝爲不備也，其黷禮甚矣。」

秋，伐邾。【補曰】亦內稱人之文。

冬十月，雨雪。《禮·月令》曰：「孟冬行秋令則

霜雪不時。」【補曰】《五行傳》曰：「聽之不聰，是謂不謀。厥咎急，厥罰恒寒。」劉歆以爲大雨雪及未當雨雪而雨雪及大雨雹隕霜殺菽，皆恒寒之罰也。何休曰：「周十月、夏八

月未當雨雪，此陰氣大盛，兵象也。」文烝案：月者，例也。范引孟冬者，但取下一句之事，非以夏正解《經》十月，范諸引《月令》皆然。

### 祭公來，遂逆王后于紀。祭公，襄內諸侯，爲

天子三公者。親逆例時，不親逆例月，故《春秋左氏說》曰：「王者至尊無敵，無親逆之禮。祭公逆王后，未至京師而稱后，知天子不行而禮成也。」鄭君釋之曰：「大姒之家在郃之陽，在渭之涘，文王親迎于渭，即天子親迎之明文矣。天子雖尊，其于后猶夫婦，夫婦判合，禮同一體，所謂無敵，豈施此哉？」《禮記·哀公問》曰：「冕而親迎，不已重乎？」孔子愀然作色而對曰：「合二姓之好，以繼先聖之後，以爲天地宗廟社稷之主，君何謂已重焉？」此言親迎繼先聖之後，爲天地宗廟社稷之主，非天子則誰乎？【補曰】《公羊》曰：「祭公者何？天子之三公也。」何休曰：「祭者，采也，天子三公氏采稱爵。」注引鄭君說天子當親迎，非也，下辨之。王后、王世子、王姬、王人、王師、王室，言王猶言周也。若言京師后、京師世子，則不成辭。《曲禮》曰：「天子之妃曰后。」后，君也。《左傳》稱后緡方娠，自夏然矣。何休曰：「不言如紀者，辟有外文。」其不言使焉

何也？據四年天王使宰渠伯糾稱使。【補曰】不得獨據彼，當依何休云「據宰周公稱使」。不正其以宗廟之

大事即謀於我，時天子命祭公就魯，共卜擇紀女可中后者，便逆之，不復反命。【補曰】娶女所以崇宗廟，故曰宗廟之大事。即，就也。就，成也。《公羊》曰：「使我爲媒可，則因用是往逆矣。」何休曰：「婚禮成於五，先納采、問名、納吉、納徵、請期，然後親迎。時王者遣祭公來，使魯爲媒可，則因用魯往迎之，不復成禮，疾王者不重妃匹，逆天下之母若逆婢妾，將謂海內何哉？」故弗與使也。【補曰】去使以譏王。遂，繼事之辭也。【補曰】疏曰：「依范氏略例，凡有十九遂事，《傳》亦有釋之者，亦有不釋者，此是例之首，又天子大夫嫌與諸侯臣異，故發繼事之辭。」文烝案：遂事實有二十，此所以爲繼事者，來成謀，即往逆，趙與權曰「因而成事」是也。其曰「遂逆王后」，故略之也。以其遂逆無禮，故不書逆女，而曰王后，略謂不以禮稱之。【補曰】俞樾曰：「此「故」字衍文，蓋涉上「故」字而衍。」文烝詳釋此《傳》，知《經》注下范所引鄭說非《傳》意也。隱二年、桓三年《傳》並曰：「逆女，親者也，使

大夫，非正也。」彼言逆女無使道，自論諸侯之禮。此祭公之來，非有他事，乃爲逆后使之來。《傳》曰：「不正其以宗廟之大事即謀於我，故弗與使也。」又曰：「其曰遂逆王后，略之也。」明若非成謀而即往逆，則此事不爲失禮，《春秋》書之當曰「天王使祭公逆女于紀」。不言「王后」而言「女」，不言「來」，不言「遂」而言「使」，不如諸侯之禮，不得有使道也。范所引乃許慎《五經異義》及鄭君駁語，見《詩·大明》、《禮記·曲禮》、《哀公問》。《左傳》此條諸《正義》及《通典》，其文互有詳略。諸《正義》引《異義》、《禮》戴說天子親迎，《春秋公羊》說天子至庶人娶皆當親迎。《左氏》說王者至尊，無體敵之義，故不親迎，使上卿逆，上公臨之。諸侯有故若疾病，則使上大夫逆，上卿臨之。許氏謹案：高祖時，皇太子納妃，叔孫通制禮，以爲天子無親迎，從《左氏》義。觀《異義》所載，不稱《穀梁》云何，固未可以《公羊》說爲《穀梁》說也。《荀子》曰：「天子無妻，告人無匹也。四海之內無客禮，告無適也。」【眉批】：「適」與「敵」同。無妻者，蓋謂稱妃不稱妻，以妃之言嬈，妻之言齊，其義略異故也。既曰無妻，必無親迎之禮。《左氏》說謂至尊無敵，故不親迎者，正是此意。荀卿學於《穀梁》，必不違其師說，則《穀梁》說必與《左氏》同也。戴《禮》、《公羊春秋》非古義，

而《白虎通》從之，鄭亦從之，不如許從古爲得也。何休說《公羊》襄十五年《傳》曰「禮：逆王后當使三公」，雖違其本《傳》之舊說，而義則是也。《詩》稱文王親迎大妣，考其事當在文王即位後。文王爲殷之諸侯，未可據以爲天子禮，《毛傳》亦無天子親迎之說。非若造舟爲梁，《傳》稱天子造舟，皋門應門，冢土《傳》稱王之郭門曰皋門，王之正門曰應門。美大王作郭門正門以致皋，應，美其社，遂爲大社，以爲因祖制而定爲王禮。又非若六師及之《傳》稱天子六軍，直以天子事追述文王也。孔子對哀公稱繼先聖後者，自指周公。稱爲天地主者，自據魯得郊天而言，非謂天子有親迎禮也。孔穎達於《禮記》、《左傳》二疏不以鄭駁爲允，其說最是。啖助疑而不定，而趙匡斷從不親迎之說，不可易矣。范引《異義》·左氏說《祭公逆王后未至京師而稱后，知天子不行而禮成，此自《左傳》家釋稱王后之義與《穀梁》不同。又《通典》引《異義》·左氏說《公子翬如齊逆女，《春秋》不譏，知諸侯有故，得使卿逆。有故而得使卿，可與《穀梁》相補備。但桓之使翬，未聞有故，《經》亦未嘗不譏，其說不可用也。祭公逆后，卿亦當行。杜預曰：「卿不書，舉重略輕。」杜是也。家鉉翁據《左傳》莊十八年號公、晉侯、鄭伯使原莊公逆王后于陳，不言王使，而曰號、晉、鄭使

之，以證《公羊》、《昏禮》不稱主人之義不可通於《穀梁》。或曰：天子無外，王命之則成矣。四海之濱，莫非王臣，王命紀女爲后，則已成王后，不如諸侯人國乃稱夫人，或說是。【補曰】孔廣森曰：「禮：女未嫁而壻死，女當改適，唯王者妃匹，至尊無偶，雖在其國，義成爲后，設遇大故，不得更許嫁，可以此《經》決之。」文烝案：此稱或曰者，《經》意既如上所說，又兼見此義也，襄十五年亦同。《公羊經》師傳聞有此一說，遂以爲專義矣。范據《公羊》，故曰「或說是」耳。

九年春，紀季姜歸于京師。季姜，桓王后，書字者，申父母之尊。姜，紀姓。【補曰】此皆本杜預。杜釋書字義本《公羊》，與上稱「王后」相對爲義也。逆稱王后，故歸稱季姜，若逆稱女，已從父母辭，則其歸當稱王后姜氏矣。京師義在文九年《傳》。不月者，程子曰：「書王國之事，不可用無王之月，故書時而已。」爲之中者，歸之也。中，謂闕與婚事。【補曰】當讀「爲之中者」絕句，我爲之中者，則歸之也。歸之者，謂《春秋》之文書「歸」以「歸之」，《經》仍史之舊。何休曰：「明魯爲媒，當有送迎之禮。」

夏四月。

秋七月。

冬，曹伯使其世子射姑來朝。【補曰】言

「其」者，凡世子上有目君文則爲緩辭。○【撰異曰】《音義》曰：「射，麋氏本作「亦」。」朝不言使，【補曰】異於聘。言使非正也。【補曰】包季姬言之。使世子伉諸侯之禮而來朝，曹伯失正矣。【補曰】《國語》注曰：「伉，對也。」《左傳》注曰：「敵也。」疏曰：「《禮》諸侯世子，誓於天子，攝其君則下其君之禮一等，未誓則以皮帛繼子男，此謂會同急趨王命者也。今曹伯或有疾，雖闕朝魯，未是急事，而使世子攝位來朝，故云非正也。」案：疏論諸侯適子之禮本《周禮·典命》、《大戴禮·朝事儀》。曹伯有疾，何休、杜預皆云爾。諸侯相見曰朝，以待人父之道待人之子，以內爲失正矣。【補曰】待與止同義，謂處待也。直書「朝」，明魯以處曹伯之禮處之，又譏內也。《左傳》曰「賓之以上卿」，蓋失之。內失正，曹伯失正，世子可以已矣，則是放命也。父有爭子，則身不陷於不義，射姑廢曹伯之命可。【補曰】已，止

也，謂止不來也。《太平御覽》引麋信注曰：「放，違也。」文  
 烝案：《書·康誥》曰「大放王命」，《堯典》及《孟子》言「方  
 命」，馬融、趙岐皆曰：「方，放也。」鄭君、王肅讀《堯典》之  
 「方」爲「放」，謂放棄教命也。注以「廢釋」放亦同，以爲  
 世子可放命，非也。《傳》言魯與曹伯既皆失正，則世子可  
 以止不來矣。又言世子若止不來，則嫌是違棄父命，疑若  
 未可。此句所以起下尸子語，文意與莊七年「則是雨說  
 也」，定十三年「則是大利也」正同。放，各本誤作「故」，今  
 依唐石經、陸渚《微旨》、《太平御覽》引及呂本中《集解》本、  
 俞樾《集傳釋義》本、程端學《本義》改正。胡安國《傳》言  
 「方命」，所據亦未誤。尸子曰：「夫已多乎道。」邵  
 曰：「已，止也。止曹伯使朝之命，則曹伯不陷非禮之愆，  
 世子無苟從之咎，魯無失正之譏，三者正則合道多矣。」補  
 曰：「言世子止不來則合道多，不以放命爲嫌。」荀子《引  
 《傳》曰從道不從君，從義不從父。《唐律》有子孫違犯教令  
 及供養有闕之罪，注曰「謂可從而違，堪供而闕」，並與尸子  
 義合也。可止不止，明又譏世子矣。程子以君病而世子出  
 爲危道，《經》無此義，然亦得包之。

十年春王正月，庚申，曹伯終生卒。桓  
 無王，其曰王何也？正終生之卒也。徐乾  
 曰：「與夷見弑，恐正卒不明，故復明之。」補曰：「案  
 范《答薄氏駁》云：「曹伯允諸侯之禮，使世子行朝，故於卒  
 示譏。」則《傳》云正者，謂正治其罪，是與徐解不同。而引  
 其說者，以徐說得通一家，故引之。范意仍與徐異，或以范  
 意權《答薄氏》，故云譏曹伯，若正說，仍與徐同。」

### 夏五月，葬曹桓公。

秋，公會衛侯于桃丘，弗遇。桃丘，衛地。  
 桓，弑逆之人，出則有危，故會皆月之。衛侯不來無危，故  
 時。弗遇者，志不相得也。弗，內辭也。倡會  
 者衛，魯至桃丘而衛不來，故書「弗遇」，以殺恥。補曰：「內  
 辭言「弗」，非內辭言「不」，《經》之通例。何休曰：「弗者，  
 不之深也。」

冬十有二月丙午，齊侯、衛侯、鄭伯來，  
 戰于郎。結日列陳則日。《傳例》曰：「不日，疑戰也。」  
 補曰：「注引例在莊十年《傳》。凡不日者皆月，敗師日不  
 日，皆與戰同。惟中國敗夷狄，不論其疑戰不疑戰，皆不

日，略之，則又不月。夷狄相敗，皆是疑戰，皆不月。何休曰：「合兵血刃曰戰。」來戰者，前定之戰也。先已結期戰。【補曰】明從來盟之例。內不言戰，【補曰】疏曰：「內不言戰，又發《傳》者，公敗宋師，起例之始，此戰沒公，故重發例以明之。」言戰則敗也。兩敵故言戰，《春秋》不以外敵內，書「戰」則敗。【補曰】史本言「我師敗績」，《經》改立例，惟乾時仍舊文，爲變例，注非也。《春秋》爲王師諱敵，爲內不諱敵，成元年《傳》有明文。不言戰爲舉大，隱十年《傳》又有明文矣。范於全《傳》多所未究。不言其人，以吾敗也。不言及者，爲內諱也。【補曰】既言戰，則以所不言者示義也。來者，接公之文，明此戰是公及之。

十有一年春正月，齊人、衛人、鄭人盟于惡曹。惡曹，地闕。【補曰】劉敞曰：「此非微者也。大夫之交盟於中國自此始，故貶之也。」葉夢得從其說。文烝案：以瓦屋之例推之，此說有理，但於《傳》與《左傳》俱無徵。

夏五月癸未，鄭伯寤生卒。

秋七月，葬鄭莊公。莊公殺段，失德不葬，而書葬者，段不弟，於王法當討，故不以殺親親貶之。【補曰】疏曰：「此據晉侯殺世子不葬而發。」文烝案：突、忽更出更人，不書日，危。莊公葬者，事近在下，又非尋常小故，危理易見，故不須日。楊氏之解葬景王已發此意。

九月，宋人執鄭祭仲。祭氏，仲名。執大夫，有罪者例時，無罪者月。此月者，爲下盟。【補曰】《說文》：「執，捕舉人也。」案：謂拘止之。注首二句本杜預。祭仲名而疑於字，申侯名而疑於爵，古人命名不拘。但據《左傳》，或言祭仲足，或言祭足，是名足。《公羊》亦以仲爲字，蓋與單伯、女叔同義耳。疏曰：「有罪時，若鄭詹。無罪月，若季孫行父。」文烝案：范以月爲下盟，而何休云執例時。此月者，爲突歸鄭奪正，鄭伯出奔，與范異也。宋人者，宋公也。【補曰】能執他國權臣，足明其爲宋君。其曰人何也？貶之也。惡其執人權臣廢嫡立庶。【補曰】不言行人，蓋非使人。劉炫及襄十一年疏得之。疏又引舊解以爲私罪，乃以單伯擬之，非也。

突歸于鄭。突，鄭厲公，昭公之弟，莊公之子。

【補曰】此「歸」亦人也，宜蒙月。曰突，賤之也。【補

曰】賤其不正，故直名，猶齊小白等之國氏見嫌也。本亦當言「鄭突」，今直名者，因下文鄭世子忽出奔，方變文，稱「鄭忽」以見義，若稱「鄭突」，則上下文同，故不得也。辭雖與挈文類，實無挈義，《公羊》以爲挈乎祭仲，非也。曰歸，

易辭也。《傳例》曰：「歸爲善，自某歸次之。此《傳》『曰

歸，易辭也』，然則「歸」有二義，不皆善矣。突篡兄之位，制命權臣，則歸無善。【補曰】此與衛侯衍復歸于衛皆是易辭，非善辭。衛侯嫌得善，故謹日，以明知弑；此既直名以賤之，言歸無所嫌。胡安國曰：「內則權臣許之立，外則大國爲之援，而世子忽之才不能自固也，故穀梁子曰『易辭也』。」劉敞曰：「歸者，順辭也。有易辭焉，非所順而書

「歸，易也」。人者，逆辭也。有難辭焉，非所逆而書「人，難也」。范所引例在成十六年《傳》。祭仲易其事，權在

祭仲也。易辭，言廢立在此。【補曰】申上也。注以「廢

立」解「權」字，言廢忽立突，皆已主之。《傳》言權在祭仲，是聖門相承說《經》語。《公羊經》師，習聞其言，遂誤以爲

祭仲行權，衍爲侈大之論，與納北燕伯《傳》之誤正同。死

君難，臣道也。【補曰】君，謂忽也。宋執祭仲，脅令立

突，是忽有難，仲宜死之。今立惡而黜正，惡祭仲

也。【補曰】立惡，立不正也。惡祭仲，故爲易辭，以彰仲

罪。劉敞駁《公羊》曰：「若祭仲知權者，宜效死勿聽，使宋

人知雖殺祭仲，猶不得鄭國迺可矣。且祭仲謂宋誠能以力

殺鄭忽而滅鄭國乎？則必不待執祭仲而劫之矣。如力不

能而夸爲大言，何故聽之？且祭仲死焉足矣。又不能，是

則若強許焉，還至其國而背之，執突而殺之可矣，何故黜正

而立不正？」又曰：「若仲之爲者，春秋之亂臣也。」季本

曰：「不言自宋歸者，上言宋執，則突自宋歸可知，文省而

義自備。」此本趙汭說。

鄭忽出奔衛。忽，鄭昭公。【補曰】《爾雅》曰：

「奔，走也。」《淮南子》曰：「走者，人之所以爲疾也。步者，

人之所以爲遲也。」此亦宜蒙月。鄭忽者，世子忽

也。【補曰】十五年文也。言非嫌。其名，失國也。其名，謂去世子而但稱忽。【補曰】疏曰：「此年去世子書

常例：已葬未踰年宜稱子。

### 柔會宋公、陳侯、蔡叔盟于折。

蔡叔，蔡大夫名，未命，故不氏。折，某地。【補曰】折，當云地闕。內大夫與外君可相盟會，例在文二年《傳》。范解蔡叔，依杜預爲名，又申之，非也。凡內之不氏者，或不命，或未命，實皆爲卿。《傳》謂之大夫，而外自小國夷狄以外，其直以國氏者，雖與內之不氏相當，其實皆非卿。《傳》謂之卑者，皆與其稱人之文不異，特以不可不目言其人，故稱名而不稱人。此蔡叔若是卑者，則盟事本無須目言，宜稱蔡人。若如范意，以爲未命之卿，則恐史於外卿未暇細別，《傳》所不言，何得以柔相擬？且未命之卿，絕少之事，「叔」之爲名，又未見必然，蔡叔與許叔、蔡季、紀季同例，當依陸渚、孫復爲蔡侯之弟、蔡季之兄。《經》若言蔡侯之弟某，則於文不便，故特稱字。《傳》後言蔡季，蔡之貴者，舉「季」則可見「叔」，故此不言也。外用兵稱將，稱某帥師，皆起文，以後盟會則無此例，故蔡叔、齊高偃、莒慶、衛甯速悉書於《經》也。疏曰：「不日者，柔是未命大夫，雖得書名，仍從卑者例也。」柔者何？吾大夫之未命者也。【補曰】疏曰：「重發《傳》者，隱不成爲君，不爵大夫，故俠卒不氏。

今桓成爲君，而有未命大夫，嫌有罪，故明之。」文烝案：大夫未命，故史無氏也。未命而曰大夫，明亦非卑者，故不如宿盟直書其事，蓋攝卿也。於隱曰不爵命，於桓曰未命，其事既異，《傳》亦各從實言之。疏以此《傳》爲重發，非也。柔後不卒者，何休以爲深薄桓公，不與有恩禮於大夫。文烝謂柔卒當在桓、莊之世，當是桓、莊無恩禮，史不記卒也。

### 公會宋公于夫鍾。

夫鍾，邾地。○【撰異曰】鍾，《公羊》作「童」，《音義》、《麋氏本》亦作「童」，音鍾。

### 冬十有二月，公會宋公于闕。

闕，魯地。

### 十有二年春正月。

### 夏六月壬寅，公會紀侯、莒子盟于曲池。

曲池，魯地。○【撰異曰】紀，《左氏》作「杞」。曲池，《公羊》作「毆蛇」。趙匡引《汲冢紀年》：魯桓公、紀侯、莒子盟于區蛇。

### 秋七月丁亥，公會宋公、燕人盟于穀丘。

穀丘，宋地。【補曰】杜預曰：「燕人，南燕大夫。」孫覺曰：「時北燕猶爲山戎所隔也。」文烝案：燕稱人者，從小國無大夫例。《左傳》「句瀆之丘」，即穀丘也。《論語音義》：



「穀，公豆反。句瀆音鉤寶。皆古瀆。」

八月壬辰，陳侯躍卒。陳厲公也。【補曰】不

葬者，蓋魯不會。《傳》稱變之不葬有三，求諸三者而不得，又非微國夷狄，則魯不會葬可知矣。

公會宋公于虛。虛，宋地。○【撰異曰】虛，《公

羊》作「郟」。

冬十有一月，公會宋公于龜。龜，宋地。

丙戌，公會鄭伯，盟于武父。武父，鄭地。

【補曰】許翰曰：「觀隱十年見兵革之亂也，桓十一年以來見盟會之亂也，霸統興起，則無復此亂，諸侯有所一矣。是以君子不得已於斯民，而以禮樂征伐與桓、文。」

丙戌，衛侯晉卒。再稱日，決日，義也。

明二事皆當日也，晉不正，非日卒者也。不正前見矣，隱四年衛人立晉是也，與齊小白義同。【補曰】疏曰：「決日義者，謂二事決宜書日，故《經》兩舉日文也。月則不然，縱有兩事合月，但舉一月以包之。其有蒙日明者，則亦不兩舉，故范《答薄氏》云：「獲且之卒，連於日食之下，可知同日是也。」文烝案：《玉篇》：「決，判也。」《廣韻》：「決，斷也。」決日義者，謂日義有嫌，判斷以明之，與僖十六年《傳》「決

不日而月」同意。再稱日，是決異日之嫌；是月，是決同日之嫌；《經》本相對見義，皆為特文，故《傳》釋同也。陳傳良曰：「於以見《春秋》之有日例也。」邵寶曰：「史法：一是即書，一是追書，即書者紀事之職，追書者承赴之體。」

十有二月，及鄭師伐宋。【補曰】此非內卑者

也。不言及之者，亦諱也。月者，為戰日。丁未，戰于

宋。非與所與伐戰也，非，責。【補曰】疏曰：「麋信

云：「此《傳》解《經》書下日之意也。非，責也，言責魯反與

其所與伐者戰也，謂還與鄭戰。」其言責其還與鄭戰是也。

言解《經》下日之意則非也。」文烝案：莊二十八年，衛人及齊人戰，不言于衛，知此與鄭戰明矣。程端學詆《傳》不通

文義，何易其言之甚邪？不言與鄭戰，恥不和也。

【補曰】恥之，故不復言及鄭師，而加言于宋。於伐與

戰，敗也。內諱敗，舉其可道者也。於伐宋而

與鄭戰，內敗也。戰輕於敗，戰可道而敗不可道。

十有三年春二月，公會紀侯、鄭伯。己

巳，及齊侯、宋公、衛侯、燕人戰。齊師、宋

師、衛師、燕師敗績。徐邈曰：「僖九年《傳》曰：

「禮：柩在堂上，孤無外事。」今衛宣未葬，而嗣子稱侯以出，其失禮明矣。宋、陳稱子而衛稱侯，隨其所以自稱者而書之，得失自見矣。【補曰】不於會上日者，趙匡以爲先行會禮，別日合戰。衛稱侯，與穀戰晉子稱人不同。疏曰：

「晉爲大國，不勞自戰，故貶稱人。衛從齊、宋之命，未是大過，故譏而不貶。」文烝案：敗績，義在宣十二年《傳》。其

言及者，由內及之也。【補曰】會則外爲主，戰則由

內及，各有其義，故《傳》明之。常例客不言及，魯雖客，亦言及，內即是主，不以戰之主爲主，於文不得以外及內也。

但若內一國與外敵，惟內敗有及文，否則言敗某師，不言及矣。若內連諸侯之師，則以內及外，此及鞏戰是。鞏戰，魯

與三國皆客也，艾陵仍以主及客，則沒魯文矣，故由內及外者亦通例也。晉與秦戰，必以晉及秦，內晉而外秦也，晉

與楚戰，必以晉及楚，內晉而外楚也，皆是例也，不論主客者也。其曰戰者，由外言之也。內不言戰，言戰則

敗，今魯與紀、鄭同討，以有紀、鄭，故可得言戰。【補曰】亦包鞏戰。戰稱人，敗稱師，重衆也。【補曰】小國無

師，君將稱君，非君皆稱人，雖以戰書，不稱師也。敗則舉

衆爲重。其不地，於紀也。《春秋》戰無不地，即於紀

戰，無爲不地也。鄭君曰：「紀」當爲「己」，謂在魯也，字之誤耳。得在龍門，城下之戰迫近，故不地。【補曰】戰于紀而不地者，上言會紀侯，故下省其文。省文者，蓋變文也。范疑之，非也。范語本何休《廢疾》，而鄭君釋之如此，見疏。「得在龍門」，「得」疑當作「時」，轉寫誤也。王引之

曰：「六年《傳》曰「其不地於蔡也」，文義正與此同。蔡、紀皆國名，不得破紀爲己，《傳》凡目魯皆曰我，或曰內，無言己者。鄭君從《公羊》戰魯龍門之說，以改《穀梁》說，非也。」文烝案：王說甚當。《公羊》以不地爲近乎圍，而何休

謂兵攻城池，親戰龍門。徐彥疏引《春秋》說，董仲舒《繁露》亦言之。《左傳》謂鄭不堪宋命，故戰不書所，戰後也。其說又異。趙匡、孫覺、胡安國詳經《經》文，知是齊以三國

伐紀，而魯與鄭救之，明《穀梁》之說最長，范注《傳》而反駁《傳》，故李廉怪之矣。

三月，葬衛宣公。【補曰】劉敞曰：「葬自內錄也，君子怨不棄義，怒不廢禮，惡不忘親。」

夏，大水。

秋七月。

冬十月。

十有四年春正月，公會鄭伯于曹。【補

曰】杜預曰：「以曹地，曹與會。」又隱元年注曰：「凡盟以國地者，國主亦與盟。」孔穎達曰：「會盟之地，地必有主，舉地者，地主之國，或與或否，故其國亦序於列。舉國名以爲盟地者，國主與在其中，不復序之於列，以其可知故也。會于曹，亦是例。」文彙案：《左傳》曰：「曹人致餼。」哀十二年《傳》子服景伯曰：「諸侯之會，事既畢矣，侯伯致禮，地主歸餼，以相辭也。」

無冰。皆君不明去就，政治舒緩之所致。《五行

傳》曰：「視之不明，是謂不哲，厥咎舒，厥罰常燠。」【補曰】疏曰：「徐邈云，無冰者，常陽之異，此夫人淫佚，陰爲陽行之所致也。」何休注《公羊》亦然。今范云云，則非獨爲夫人也，蓋爲桓公闇於去就，不達是非，外不能結好鄰國，內不能防制夫人，又成亂助篡，貪賂廢祀，以火攻人，反與伐戰，此等皆是不明去就，政教舒緩。《五行傳》云「不哲」者，謂不昭哲。文彙案：「哲」字或作「愆」，楊依鄭君作「哲」，訓昭哲也。范引《五行傳》本劉向，劉以爲周失之舒，秦失之

急，故周衰無寒歲，秦滅無燠年。《傳例》：「一有一亡曰有明。」言「無」者，皆一亡一有可知。趙汭曰：「常無曰有，常有曰無。」孔廣森曰：「藏冰之禮，先王所重，無以取冰，則春無以薦，夏無以頒，故不曰水不爲冰而曰無冰，自人事目之之辭。」文彙案：此略同趙鵬飛說。無冰，時燠也。

【補曰】疏曰：「舊解謂無冰書時。燠，煖也。『時』字上讀爲句，因即解成元年正月公即位、二月葬宣公、三月作丘甲，無冰在其中，不是爲無冰書月可知也。此正月公會鄭伯于曹，下云「無冰」，則正月者直爲公會鄭伯，不爲無冰，何者？無冰一時之事，固當不得以月書也。徐邈亦然。今以爲成元年《傳》云「加之寒之辭」，則無冰亦當蒙月也。《傳》云「無冰，時燠也」者，謂今所以無冰者，正由時燠也。於字下讀，理亦足通。」文彙案：無冰例時，襄二十八年有著例，成元年《傳》又云「終時則志」，舊解及徐得之。成元年得蒙二月，此不得蒙正月。《晏子春秋》曰「陰冰凝，陽冰厚五寸」者，寒溫節，寒溫節則政平，政平則上下和，上下和則年穀熟。陰冰者，不見日之冰；陽冰者，見日之冰。王念孫校正《晏子》文，其說如此。言燠，明不節矣。

夏五，鄭伯使其弟禦來盟。○【撰異曰】禦，

本亦作「御」，《左氏》、《公羊》作「語」。案：越地禦兒。張守節《史記正義》云：「今作『語兒』。」諸侯之尊，弟兄不得以屬通。其弟云者，以其來我，舉其貴者也。【補曰】疏曰：「重發例者，前弟年來聘，今禦來盟，嫌不同，故重發之。」來盟，前定也。【補曰】前定，謂盟誓之言素定；來者，接公之文，明與公盟矣。不言及，義在僖三年。不日，前定之盟不日。言信在前，非結於今。【補曰】疏曰：「此云前定之盟不日，則丙午及荀庚盟之屬是後定可知。」孔子曰：「聽遠音者，聞其疾而不聞其舒；疾，謂激揚之聲。舒，謂徐緩。望遠者，察其貌而不察其形。」<sup>①</sup>貌，姿體。形，容色。【補曰】《國語》曰：「目之察色也，不過墨丈尋常之間。」立乎定、哀，以指隱、桓、隱、桓之日遠矣。夏五，傳疑也。」孔子在於定、哀之世，而錄隱、桓之事，故承闕文之疑，不書月，明皆實錄。【補曰】此承孔子言而述其意。世近則無疑，疑由遠而起，故於桓篇遠日，特仍闕文，以示傳疑之義，與五年《傳》言「疑以傳疑」為一《經》通例者，又略異也。言哀連定，言桓連隱，皆便文也。言「夏

五傳疑」，以例其餘，明上四年、七年無秋七月、冬十月，皆同此義。而莊與桓接，二十二年夏五月下無事，明亦同義可知也。子曰：「多聞闕疑，慎言其餘。」又曰：「吾猶及史之闕文也。」又曰：「蓋有不知而作之者，我無是也。」《春秋》「月」字之闕不補，秋七月、冬十月之闕不補，夏五月不改為夏四月，並以世遠傳疑見義，此之謂也。或謂此等闕文之理易知，何必傳疑？夫唯理所易知，故傳疑之義得，因以見也。《公羊》經師，失其傳授，故其《傳》曰：「夏五者何？無聞焉爾。」孔廣森以《穀梁》說之，非《公羊》意也。尋《公羊》所說，蓋亦習聞隱、桓遠於定、哀之言，而不知即指「夏五傳疑」之屬，故隱元年、桓二年、哀十四年《傳》並曰「所見異辭」、「所聞異辭」、「所傳聞異辭」，定元年《傳》又曰「定、哀多微辭」，以為昭、定、哀所見之世，文、宣、成、襄所聞之世，隱、桓、莊、閔、僖所傳聞之世。內大夫卒則近辭詳而遠辭略，內大惡則近辭微而遠辭顯，此皆展轉附益，致失本真者也。《傳》先釋「來盟」，後釋「夏五」，明「來盟」文與「夏五」相連。何休以為莅盟、來盟例皆時，非也。莅盟、來

<sup>①</sup>「察其貌而不察其形」，柯劭忞《春秋穀梁傳補注》云：「疑當作『察其形而不察其貌』，傳寫誤倒。」

盟例不日，皆當書月，其有不月而時者，乃是同中之異，後各當文論之。齊桓盟不日者皆月，或閒書時，其例正相似。

### 秋八月壬申，御廩災。

御廩，藏公所親耕以奉粢盛之倉也。內災例日。【補曰】注釋「御廩」本杜預也。

何休曰：「御者，謂御用於宗廟。廩者，釋治穀名。火自出燒之曰災。」文烝案：《國語》曰：「廩于籍東南，鍾而藏之。」

《周禮》有廩人、倉人。蔡邕《月令章句》曰：「穀藏曰倉，米藏曰廩。」《五行傳》曰：「棄法律，逐功臣，殺太子，以妾爲妻，則火不炎上。」劉向以爲御廩，夫人八妾所舂米之藏以奉宗廟者也，時夫人有淫行，挾逆心，天戒若曰「夫人不可以奉宗廟」。

乙亥，嘗。御廩之災不志，以其微。【補曰】疏引徐邈云：「不足志。」謂內災如御廩者不足志，《左傳》「司鐸火」不志是也，亦史例也。此其志何也？

【補曰】據《經》而問。以爲唯未易災之餘而嘗可也。志，不敬也。鄭嗣曰：「唯以未易災之餘而嘗然後可志也，用火焚之餘以祭宗廟，非人子所以盡其心力，不敬之大也。」【補曰】范用鄭嗣說讀可也。「志」爲句，「不敬也」爲句。疏曰：「徐邈云：『而嘗可也』，言可以嘗。『可』上屬。」與范注違。王念孫曰：「徐讀『可也』絕句，『志不」

敬也」自爲句，實得《傳》意。八年、文十三年、哀元年《傳》皆言「志不敬也」，是其明證矣。「唯」者，「雖」之借字，古二字通用。言魯人不易其災之餘而嘗者，其意若曰「雖未易災之餘而嘗」可也，則不敬莫大乎是，故書曰「壬申御廩災」，「乙亥嘗」，所以志不敬也。《少儀雜記》注並曰「雖」或爲「唯」。《表記》注曰：「唯，當爲雖。」《大戴禮》、《墨子》、《荀子》、《戰國策》、《史記》、《漢書》、《列女傳》多有借「唯」爲「雖」者。天子親耕，以共粢盛，天子親耕，其禮三推。黍稷曰粢，在器曰盛。【補曰】共者，供、龔之省，《說文》曰：「供，設也。」一曰供給、龔給也。《爾雅》曰：「供，共，具也。」《玉篇》曰：「龔，奉也。」王后親蠶，以共祭服，王后親蠶，齊戒躬桑，夫人三纁，遂班三宮，朱綠玄黃，以爲黼黻文章。服既成，君服以祀之。【補曰】案：《祭義》、《祭統》天子籍田千畝，在南郊；諸侯籍田百畝，在東郊；王后夫人皆有公桑蠶室，在北郊。《傳》不言諸侯耕。夫人蠶者，舉尊以該之。范注「夫人」以下亦約《祭義》文，彼言「夫人親蠶」之事又錯互王后事言之，故云遂布於三宮夫人世婦之吉者，使纁其實。王后則班於所，卜三夫人之吉者，夫人則惟班於所，卜世婦之吉者而已。國非無

良農工女也，【補曰】「工」亦良也。《毛詩傳》曰：「善其事曰工。」以爲人之所盡，事其祖禰，不若以己所自親者也。凱曰：「夫治人之道莫急於禮，禮有五經，莫重於祭。祭者，非物自外至者也，由中出者，身致其誠信，然後可以交於神明，祭之道也。」【補曰】盡，盡心力也。人之所盡，不若己自盡，故必自親之。《祭統》曰：「誠信之謂盡，盡之謂敬。」俞樾讀此「盡」字爲「進」，蓋未是。凱注用《祭統》文，頗不了也。《傳》言事祖禰必自親，解上「粢盛」、「祭服」之文，亦兼解下「舂米」之文，其意主說舂米，以共盛共服起之耳。何用見其未易災之餘而嘗也？【補曰】問《經》文何用見之。曰：甸粟而內之三宮，三宮米而藏之御廩，甸，甸師，掌田之官也。三宮，三夫人也。宗廟之禮，君親割，夫人親舂。【補曰】《九章·粟米術》曰：「粟率五十，糲米三十，糲米二十七，鑿米二十四，御米二十一。」凡禾實連稈曰粟，去糠曰米，又通言之，則糲米爲粟，糲以上爲米。段玉裁說《書·禹貢》「四百里粟，五百里米」云：「粟者糲米，米者精米。」《傳》之「粟」、「米」當同彼矣。「內」即「納」字，《周禮》注曰：「婦人稱寢曰宮。」宮，隱蔽之言，范以三宮爲三夫人，非也。王后之下有三夫人，此三宮則言諸侯制也。諸侯惟一夫人，夫人有三宮，猶王后有六宮也。范又引文士三年《傳》「夫人親舂」以證此之「三宮米」，則又以爲諸侯之夫人，其說是也。三宮之人皆舂粟，而夫人爲主，劉向所謂「夫人八妾」也。《公羊》僖二十年《傳》引魯子曰：「以有西宮，亦知諸侯之有三宮也。」是其於三宮之制猶須推而知之，益信其學之晚出。《音義》曰：「廩氏「宮」作「官」。」夫嘗必有兼甸之事焉，夫人親舂，是兼甸之事。【補曰】自粟而米，須兼甸。《音義》曰：「兼甸」如字，十日爲甸。一本作「甸」，注亦然。案：楊疏謂夫人兼甸師，所據本作「甸」，此涉上「甸」字而誤也。今依《音義》正本，唐石經改正。壬申御廩災，乙亥嘗，以爲未易災之餘而嘗也。鄭嗣曰：「壬申、乙亥相去四日，言用日至少而功多，明未足及易而嘗。」【補曰】趙與權曰：「災在致齊三日前也。」

冬十有二月丁巳，齊侯祿父卒。

宋人以齊人、蔡人、衛人、陳人伐鄭。

○撰異曰《公羊》作「衛人、蔡人」。以者，不以者

也。不以者，謂本非所得制，今得以之也。【補曰】宋非伯者，故非所得制。伯者得以之則不言「以」。杜預《釋例》以爲「非例所及」是也。此發「以」字例，明惡宋也。《左傳例》曰：「凡師能左右之曰以。」《詩》箋、《國語》注曰：「東西之。」民者，君之本也，【補曰】《孟子》曰：「民爲貴，社稷次之，君爲輕。」用下敬上則君重於師，用上敬下則民貴於君，故曰「君之本」。使人以其死，非正也。刺四國使宋專用其師，輕民命也。【補曰】使人以其死者，謂驅民以聽命他國，置之死地也。自「民者」以下，又明兼惡四國也。

### 十有五年春二月，天王使家父來求車。

【補曰】何休曰：「求例時，此月者，桓行惡，不能誅，反從求之，故獨月。」案：此與「求賻」下范注異。古者諸侯時獻于天子，以其國之所有，【補曰】時者，每歲春也。《周禮·小行人》：「令諸侯春入貢。」職方氏：「制其貢，各以其所有。」《逸周書·職方》同。《左傳》曰：「諸侯不貢車服。」《周禮·大宰》、《大行人》則有器貢、服貢。故有辭讓而無徵求。【補曰】辭，以文辭告曉之。讓，譴責也。

此《國語》所謂威讓之令、文告之辭，所以懲不貢獻者。求車，非禮也，求金甚矣。文九年，毛伯來求金。【補曰】言甚者，在喪而求，非禮尤甚也。疏曰：「不云求賻甚而云求金甚者，喪事有賻，但求之非禮，金非喪所供，故以爲甚。」文烝案：《傳》言「金」，以包賻也。《左傳》曰：「天子不私求財。」《公羊》曰：「王者無求。」劉向《說苑》說求車、求金曰：「天子好利則諸侯貪，諸侯貪則大夫鄙，大夫鄙則庶人盜。」《鹽鐵論》引傳曰：「諸侯好利則大夫鄙，大夫鄙則士貪，士貪則庶人盜。」何休說《公羊》曰：「王者求則諸侯貪，大夫鄙，士庶盜竊。」案：此三文相似，《說苑》「庶人」上脫「士」字，《鹽鐵論》誤。

三月乙未，天王崩。桓王。【補曰】《史記》名林，太子泄父子，平王孫。書日者，正也。周制：太子有孫而死則立孫。

夏四月己巳，葬齊僖公。【補曰】危之者，孔廣森以爲僖公寵其弟年之子公孫無知，衣服禮秩如適，卒成篡弑，幾致奪正。

五月，鄭伯突出奔蔡。【補曰】何休曰：「月者，大國奔例月，重乖離之禍，小國例時也。」文烝案：舊史

大國奔皆日，小國皆月。譏奪正也。《禮》諸侯不生名，今名突，以譏之。【補曰】所謂惡也。

鄭世子忽復歸于鄭。【補曰】汪克寬曰：「前先書突歸，繼書忽奔，此先書突奔，繼書忽歸，突與忽之強弱見矣。」文烝案：此蒙上月。《左傳》曰：「六月乙亥，昭公入。」左氏別有所據，未可用也。諸侯出奔、歸國、入國例月，見執、歸國例時，說見僖三十年注。舊史大國出奔、歸、入者皆日。反正也。【補曰】疏曰：「釋其稱世子也。」孫

復曰：「鄉曰忽，今曰世子忽，明忽世嫡當嗣也。」崔子方曰：「忽未踰年而失國，不成爲君，故其復歸曰鄭世子，且見當立也。」文烝案：復歸義在僖二十八年《傳》。言復者，明其實已爲君，宜有國也。言世子、言復，足知上稱鄭忽非嫌矣。《左氏》載續經哀十六年春王正月己卯，衛世子蒯聵自戚入于衛，衛侯輒來奔，子稱衛侯而父稱衛世子，據實爲辭，與此有合。言人不言復人，不言歸，以蒯聵未嘗一日立乎其位，又不宜有國也，其義亦當。

許叔入于許。【補曰】此在時例。許叔，許之貴者也。莫宜乎許叔。其曰人何也？其歸之道，非所以歸也。《傳例》曰：「大夫出奔反，以好

曰歸，以惡曰入。」泰曰：「許國之貴，莫過許叔，叔之宜立，又無與二。而進無王命，退非父授，故不書曰歸，同之惡入。」【補曰】言貴者，解稱「叔」義也。案：《左傳》隱十一年，魯、齊、鄭人許，許莊公奔衛。鄭人使許叔居許東偏。叔者，杜預以爲莊公之弟，故爲貴。《經》欲顯其爲貴，又不得以弟爲文，故稱叔。叔本宜立，乃遲之十有五年，間鄭之亂以入于許，故曰「歸之道，非所以歸」。啖助曰：「字之，善興復也。言人，志非其正也。」啖之二語，《傳》得包之。人例在莊六年《傳》，注引例在莊九年《傳》。

公會齊侯于蒿。【補曰】此又蒙上月。○【撰異曰】蒿，《左氏》作「艾」，《公羊》作「鄆」。陸渚、孫覺皆從《穀梁》。

邾人、牟人、葛人來朝。何休曰：「桓公行惡而三人俱朝事之，三人爲衆，衆足責，故夷狄之。」【補曰】《公羊》曰：「皆何以稱人？夷狄之也。」董仲舒說之曰：「爲其天王崩而相朝聘也。」與何氏說異。劉敞、劉綯、家鉉翁皆從董說。案：襄元年一朝二聘，別無異文者，從此可知。成五年蟲牢之盟亦同其例。杜預則以爲彼朝聘皆未聞喪，於董生此言，殆皆無以相難。今以《繁露》未必廣川本書，而邵公注多依胡毋生條例，姑兩存焉。若胡安國謂



天王崩而相率朝弑君之賊，合兩說爲一，轉非說《經》之法，胡書往往如此。

### 秋九月，鄭伯突入于櫟。櫟，鄭邑也。突不

正，書「入」，明不當受。【補曰】杜預曰：「櫟，鄭別都。」疏曰：「案齊小白入于齊，《傳》曰以惡曰入；衛侯朔入于衛，《傳》曰入者內弗受也；蓋舊爲國君而入者則是內不受，若衛侯朔、鄭伯突是也。公子不正取國者則是以惡，若許叔、齊小白是也。但舊無此解，不敢輒定。或《傳》文互舉之，其實不異。」文烝案：互舉之說是也。嘗爲君，不言復入者，未入國都，不得言復。名者，惡也。月者，入國例。○上書忽歸，謂之鄭世子，此書「突入」，謂之鄭伯，自後唯莊四年「遇垂」一見鄭伯，又十年而有野之會。俞樾曰：「《春秋》若曰當有鄭國者忽也，終有鄭國者突也。」文烝案：《左傳》下十七年十月辛卯，高渠彌弑忽而子亶立；十八年七月戊戌，齊殺子亶而子儀立；莊十四年六月甲子，傅瑕弑子儀而突復立。《毛詩序》亦云：「公子五爭春秋，悉不志何也？」葉夢得曰：「鄭亂不以告則魯不得書於策，《春秋》安得而見哉？」《春秋》因人以見法，不求備於史而著其人，故曰其事則齊桓、晉文，其文則史。」李光地曰：「魯桓黨於突，當時鄭通赴告突也，非忽、亶、儀也。」文烝謂突自櫟入

于鄭，不書亦不告。

### 冬十有一月，公會宋公、衛侯、陳侯于

袤，伐鄭。袤，宋地。○【撰異曰】《公羊》「宋」上有「齊

侯」。「袤」作「侈」。案：《說文》引《春秋傳》：「公會齊侯于

侈。」地而後伐，疑辭也，【補曰】錄會地於「伐」上，是

遷延不進之辭，故曰「疑辭」。非其疑也。鄭突欲篡國，

伐而正之，義也。不應疑，故責之。【補曰】注非也。《左

氏》以爲謀伐鄭，將納厲公，《傳》意亦如是。言疑者，諸侯

亦知忽之當立，而岐意於突，卒助突也。胡安國曰：「昭公雖

正，其才不足以君一國之人；厲公雖篡，其智足以結四鄰之

援。諸侯不顧是非而計其強弱，始疑於輔正，終變而與邪，

《穀梁》所謂非其疑者，非其疑於爲義，而果於爲不義也。」

### 十有六年春正月，公會宋公、蔡侯、衛侯

于曹。

### 夏四月，公會宋公、衛侯、陳侯、蔡侯伐

鄭。「蔡」常在「衛」上，今序「陳」下，蓋後至。【補曰】此本

杜預。

秋七月，公至自伐鄭。桓無會，其致何也？危之也。桓公再助篡伐正，危殆之甚，喜得全

歸，故致之。【補曰】疏曰：「公與諸侯此年爲突伐鄭，前年雖爲忽討突，疑而不用心，亦是其助，故云再助。范《答薄氏駁》云：「明桓伐突非本心，故言再助是也。」」范必知前年爲忽伐鄭，而此年爲突伐鄭者，以前年責其疑，若是伐嫡而疑，則不足可責，明是爲忽討突也。此年《傳》云「危之」，若是助嫡，則不須云「危」，故知是助突討忽也。」文烝案：上伐亦是助突，范言再助是也。《答薄駁》及疏說非也。危致者，阻兵弗戰，以篡助篡。齊禍將發，其危甚也。唐不月，此月者，唐從凡以地致之例，致之已是危之，此從凡致伐之例，不月爲平文，加月爲危也。異事異例，故各發《傳》。致月例在莊二十三年《傳》。

冬，城向。

十有一月，衛侯朔出奔齊。朔，惠公名。

朔之名，惡也。天子召而不往也。【補曰】召而不往，是其惡也。《公羊》亦有其事，而《左傳》無之，蓋隱、桓、莊、閔之篇，《左氏》所據，史書多殘闕，有得之傳聞者，有采用雜史者。程子曰：「朔搆急，壽二兄，使至於死，其

罪大矣。然父立之，諸侯莫得而治也，天子治其舊惡而廢之宜也。」趙汭曰：「時衛立公子黔牟，而後來王人救衛，朔入于衛，放黔牟于周，則黔牟之立蓋天子之命。」

十有七年春正月丙辰，公會齊侯、紀侯盟于黃。黃，齊地。【補曰】下有郎戰、淪盟，依暨盟，公子結盟之例則當去日，因下趙盟不去日，故亦存日以明同。

二月丙午，公及邾儀父盟于趙。趙，魯地。

【補曰】不以秋伐淪盟去日者，魯淪邾盟，遠則不日，近則日。近則惡易見，不假去日，文得相變也。此與句繹同，襄二十年盟澶淵亦其比矣。儀父稱字者，重邾、魯之好，故褒之，與昧同義。於盟既貴其親魯，於朝必不責其事，桓前朝自當依董生說。○【撰異曰】「公」字各本脫，今依唐石經、十行本補正。《左氏》作「公會」，《左傳》直言「及」。

夏五月丙午，及齊師戰于郎。【補曰】《左

傳》曰：「及齊師戰于奚，疆事也。」杜預曰：「奚，魯地。」○【撰異曰】《公羊》無「夏」，《左氏》唐石經亦無「夏」，惟《穀梁》唐石經有「夏」。【眉批】：「今通志堂刻葉傳本剝板擠增「夏」字。」嚴可均曰：「孔穎達《左傳序》正義云：「桓十七年五月

無夏，昭十年十二月無冬。」則孔所見本無「夏」字。」文烝案：陸淳、孫覺皆曰《左氏》、《公羊》無「夏」字，蘇轍本、葉夢得本、張洽本皆無「夏」字。呂本中、黃震皆曰《穀梁》有「夏」字。段玉裁見淳化本《左氏》亦無「夏」字。「郎」，《左氏》、《公羊》作「奚」。張壽恭曰：「《說文》：『郎，汝南召陵里。从邑自聲。讀若奚。』凡《說文》讀若之字，皆可通假，《穀梁》蓋假「郎」爲「奚」，後人少識「郎」字，以其與「郎」相似，故誤爲「郎」耳。」內諱敗，舉其可道者也。敗恥大，戰恥小。【補曰】重發《傳》者，彼與所與伐者戰，此直稱「及」以戰，嫌有異也。不言其人，以吾敗也。言人，則微者敗於微者，其恥又甚，故言「師」。不言及之者，爲內諱也。及當有人，公親帥之，恥大不可言。【補曰】此《傳》與戰升陘《傳》全同。「不言其人」四句又與來戰于郎《傳》三處皆同，來戰無及文，故以「不言及」爲諱，此及升陘並有及文，故以「不言及之」者爲諱。不言及之者，即是不言其人，下二句即申上二句，注非也。帥之者，亦非必公也。《傳》重發之者，彼不言及，此不言及之者，嫌有異也。○桓賊也，故無恕辭；桓君也，故有諱義。子曰：「舉一隅而示之，不以三隅反，則吾不復也。」子貢曰：「回也聞一以

知十，賜也聞一以知二。」伯御之誅死也，不作謚，不序昭穆，而其稱公紀年以書事則十一年矣。設以君子脩之，亦若是而已矣。

### 六月丁丑，蔡侯封人卒。

秋八月，蔡季自陳歸于蔡。【補曰】蔡季，杜

預以爲即獻武也。非出奔歸，非篡月者，爲下葬日。蔡

季，蔡之貴者也。【補曰】亦解稱「季」義也。季者，何

休、杜預並以爲桓侯之弟，桓侯之弟，故爲貴。桓已卒，不

得以弟爲文，故稱「季」也。前十一年之蔡叔當爲季兄，叔

蓋先桓侯卒，故是時季立得爲正。自陳，陳有奉焉

爾。陳以力助。【補曰】《公羊》例曰「有力焉者也」。

### 癸巳，葬蔡桓侯。徐邈曰：「葬者，臣子之事，

故書葬皆以公配謚，此稱侯，蓋蔡臣子失禮，故即其所稱以

示過。【補曰】劉歆、賈逵、許淑說《左氏》曰：「桓卒而季

歸，無臣子之辭也。」杜預曰：「史書謬誤也。」二說最爲近

之。何休亦以抑桓稱侯爲奪臣子辭，而其所據爲說者則不

可用。徐注謂「即其所稱以示過」，此不合事實。《史

記·蔡世家》蔡諸君自宮侯而下皆以侯配謚，無稱公者，前

此宣公考父亦稱宣侯，後此文公申而下皆稱侯，《左傳》有哀侯、穆侯、文侯、景侯、靈侯、平侯、昭侯，皆不稱公。啖助又舉《世本》爲證，然則蔡臣子悉自稱侯，《春秋》何獨於桓侯仍其本稱？知徐爲不然矣。孔廣森曰：「五等諸侯皆得以公配謚，本周之舊制，若魯考公、煬公、齊丁公、乙公是也。然《書》有《文侯之命》題篇，則亦有謚配本爵者。」文烝案：晉未爲曲沃時皆稱某侯，此等先儒多已言之。竊意謚以公配，亦不禁人配以本爵者，周制之便俗也。雖以本爵配，而《春秋》必稱公者，魯策之守禮也。此葬蔡桓侯，若是史文，當如杜說，若是《經》意，當如劉、賈、許說，今未敢定焉。又考周初諸侯猶多沿殷舊制，不可繩以正典。周公曰周文公，而魯公不見其謚，齊大公亦無謚，丁公、乙公、癸公皆非謚也。杞之東樓公、西樓公、題公、謀娶公，亦非謚也。衛曰康叔、康伯，宋曰微子、微仲，蔡曰蔡仲、蔡伯，曹曰曹叔，晉曰唐叔，唯微子仍舊稱，餘皆以字繫地、繫國也。晉侯燮、宋公稽不見他稱，許文叔則以字配謚。德男至康男五世，乃多配以本爵。衛孝伯至貞伯五世，曹大伯至惠伯八世，多以字配謚也。此葬爲危文者，季自外歸，以貴嗣位，有危道焉。

及宋人、衛人伐邾。【補曰】及者，內卑者也，

猶稱人也。許翰曰：「正月與齊爲黃之盟，五月戰焉，二月與邾爲趙之盟，八月伐之。《詩》曰『君子屢盟，亂是用長』，豈不然哉？」

冬十月朔，日有食之。言朔不言日，食既朔也。既，盡也。盡朔一日，至明日乃食，是月二日食也。【補曰】實亦是月朔食，日官日御失曆，以爲二日，故不言日而言朔，所以正之。

十有八年春王正月，此年書王，以王法終治桓之事。【補曰】此與元年之「治桓」以始終相對，《傳》於彼言之，此從可知也。宣元年之主，與他公一例，與桓不同，故其薨年無王，同於隱、莊。與夷之弑，終生之卒，則皆春月第一事，所以與隱、莊、宣之薨不同也。公會齊侯于濼。公夫人姜氏遂如齊。公本與夫人俱行至濼，公與齊侯行會禮，故先書會濼，既會而相隨至齊，故曰遂。遂，繼事之辭，他皆放此。【補曰】濼，齊、魯間水名。注「故曰遂」以上皆本杜預。其實夫人亦行會禮也，如亦并蒙月。○【撰異曰】「公」下各本衍「與」字，今依唐石經刪正。《左氏》有「與」字，段玉裁曰：「《左經》疑俗增之。」《春秋》書

「及」、書「暨」未有書「與」者，僖十一年「公及夫人姜氏」，夫人偕行書例也。《左傳》記其始謀曰「將與姜氏如齊」，記其實事曰「公會齊侯于濼」，遂及文姜如齊，至聖人筆之曰「公夫人姜氏遂如齊」，不言「及」何？注云：「明遂在夫人也。」濼之會，不言及夫人何也？據夫人實在，當言「公及夫人姜氏會齊侯于濼」。以夫人之伉，弗稱數也。濼之會，夫人驕伉，不可言及，故舍而弗數。今書「遂如齊」，欲錄其致變之由，故不可以不書，實驕伉而不制，故不言「及」。【補曰】《傳》解「會不言及夫人」，因以見如齊不言「及」之義，夫人會如皆非禮，此處皆未暇論之。夫人如者，父不在而歸寧也。公如者，朝也。《左傳》魯人告齊曰「來脩舊好，禮成而不反」，行朝禮可知。

夏四月丙子，公薨于齊。夫人與齊謀殺之，

不書，諱也。魯公薨，正與不正皆日，所以別内外也。【補曰】夫人從君亦皆日，定元年《傳》曰「內之大事日」。其

地，於外也。【補曰】疏曰：「據隱、閔不地，故決之。」文

烝案：內君、內夫人、內大夫外，君苟死於外，則皆地，重其異常，故謹之也。外，謂竟外，若國都之外。薨稱公，舉

上也。公，五等乏上。

丁酉，公之喪至自齊。【補曰】何休曰：「加之

者，喪者死之通辭也。本以別死生，不以明貴賤，非配公之稱，故加之以絕。」案：此即《傳》所謂緩辭也。又曰：「凡公薨外致日者，危痛之。」朱子曰：「孔子直書，義在其中。云公會齊侯于濼，公夫人姜氏遂如齊，公薨于齊，公之喪至自齊，夫人孫于齊，此等顯然在目，雖無《傳》，亦可曉。」

秋七月。

冬十有二月己丑，葬我君桓公。【補曰】公

夫人葬亦並日。葬我君，接上下也。言我君，舉國上下之辭。【補曰】疏曰：「公者，臣子之稱也。我君者，接及舉國上下之辭。」文烝案：注、疏以上下為臣民，非也，臣民正皆稱公耳。《廣雅》曰：「接，合也。」上下，謂五等爵也，公為五等之上，君則合上下稱之，於薨專舉其上稱，於葬兼舉其合上下之稱，四句意相貫。何休曰：「以公配謚者，終有臣子之辭。加我君者，錄內也。」君弑，賊不討，不書葬。此其言葬何也？據隱公不書葬。不責踰國而討于是也。《禮》君父之讐，不與共戴

天，而曰「不責踰國而討于是」者，時齊強大，非己所討，君子即而恕之，以申臣子之恩。【補曰】于是，於此時也。後不復讐而釋怨，乃刺之。疏以爲公雖不能報，理當絕交，明其當恒以討爲念，而此時則姑不責其討。蘇軾謂「《春秋》之義，立法貴嚴，而責人貴寬」。胡安國謂「《春秋》立法謹嚴，而宅心忠恕」，正此之類。申臣子之恩者，謂不奪其葬也。桓公葬而後舉謚，謚所以成德也，於卒事乎加之矣。謚者行之迹，所以表德。人之終卒，事畢於葬，故於葬定稱號也。昔武王崩，周公制謚法，大行受大名，小行受小名，所以勸善而懲惡。《禮》天子崩，稱天命以謚之；諸侯薨，天子謚之；卿大夫卒，受謚於其君。【補曰】注首句及「大行」二句，《逸周書·謚法》文也。案：此《傳》二句當以《表記》二句證之。人兼有衆善者，取其大善一字爲謚，即善惡相雜。苟不至純惡無善者，亦以其善取一字爲謚。然則惡謚如幽、厲者，蓋有所不得已，故曰謚所以成德。而《表記》曰：「節以壹惠也。」《周書·謚法》「爲字無多」，即《論語》所論兩人知同謚亦容異行。而昭、穆世近，則謚必不同。於此無以通之，推其本意，特因既葬之後，人事卒而鬼事始，舊名將諱，則新名宜尊，故別易一字

爲名，以相加崇。而其中又因有所取義耳，故曰「於卒事乎加之」。而《表記》曰：「謚以尊名也。」《爾雅》：「加、崇，重也。崇，高也，充也。」《內則》注：「加，猶高也。」《國語》注：「加，猶上也。」以此意讀《傳》，則「也」字、「矣」字皆有意味，而此禮亦通矣。《白虎通》據葬定公文，明祖載而有謚。知者慮，義者行，仁者守，有此三者備然後可以會矣。桓無此三者，而出會大國，所以見殺。

【補曰】疏曰：「復發《傳》者，隱表會戎之危，此明桓見殺之事，故重發之。」○家鉉翁曰：「是歲由正月迄歲終，惟書魯桓所以死，不問以他事，於此見聖人之《經》爲誅亂賊而作。」案：家氏論《經》多如此，謂隱四年所書皆衛事，莊九年所書皆齊事，僖二十八年所書皆晉事，昭八年所書皆陳事，以爲《春秋》非史也。史者，備記當時事，《春秋》主乎垂法，多所不書。又謂《春秋》始於誅魯之亂賊而終於齊陳恒弑君之年，其說皆未必然，姑記於此。

## 春秋莊公閔公經傳第三補注第五 莊公，

桓公世子同也。母文姜。以莊王四年即位。閔公，莊公子，《史記》名開，《世本》名啟方。母叔姜，哀姜之姊也。以惠王十六年即位。凡閔之謚，古書多作「湣」。

案：《漢書·藝文志》曰：「春秋古經十二篇。」謂《左氏春秋經》也。又曰：「《經》十一卷。」謂《公羊》、《穀梁春秋經》也。又曰：「《左氏傳》三十卷，《公羊傳》十一卷，《穀梁傳》十一卷。」謂《左傳》卷數不與《經》篇數同，《公羊》、《穀梁傳》卷數皆與《經》卷數同也。何休說《公羊》云：「繫閔公篇於莊公下，故十二公爲十一卷也。」《公羊音義》於僖十六年云：「本或從此下別爲卷。」案《七志》、《七錄》、何注止十一卷，《公羊》以閔附莊故也。後人以僖卷大，輒分之爾。《穀梁音義》於莊十九年云：「傳本或分此以下爲莊公與閔公同卷。」唐石經《公羊》及鄂州本「僖公第五」，其下注曰「卷四」，以至「哀公第十二」，注曰「卷十一」，凡此皆何、范本十一卷之證也。三家之《經》，各有所受，閔不別卷者，蓋因文稀簡少，附合前篇，後易繅素，亦遂仍之。而何休以爲子未三年，無改於父之

道，引《傳》三年稱子云云，不可通於《穀梁》之義。

穀梁 范氏集解 鍾文烝詳補

元年春王正月。繼弑君，不言即位，正也。繼弑君不言即位之爲正何也？據君不絕。曰先君不以其道終，則子不忍即位也。

【補曰】君無不行即位之禮者，行其禮而不書，見嗣子之不忍。葉夢得曰：「即位者禮也，忍不忍者情也。」孔廣森曰：「君弑，賊不討，不書葬，以義治也。君弑子，不言即位，以仁治也。二者並《春秋》新意。」

三月，夫人孫于齊。桓公夫人文姜也。【補

曰】何休曰：「非實孫。月者，起練祭左右。」○【撰異曰】「孫」本亦作「遜」，後同。《左氏》、《公羊》皆同。段玉裁曰：「孫作「遜」者，俗也。」或將《左氏音義》「孫」、「遜」互易者，謬。孫之爲言，猶孫也。孫，孫遁而去。【補曰】言猶者，義相近。孫遁之「孫」，義近子孫之「孫」也。《爾雅》：「子之子爲孫。」郭璞曰：「孫，猶後也。」後謂退在

後生也。此與蒙者蒙也；徹者徹也，虛，虛也；已，已也；相似。後來又製「遜」字。《爾雅》曰：「遜，遜也。」孫炎曰：「遁，逃去也。」《易·序卦傳》曰：「遜者，退也。」明亦若退在後生矣。諱奔也。【補曰】內諱公夫人奔謂之孫，《公羊》亦同。諱者，《經》例因史例也。《左傳》載子贛對衛出公曰：「昔成公孫于陳，獻公孫于齊，今君再在孫。」明臣子之辭如是。奔，急辭。孫，緩辭。接練時錄母之變，始人之也。夫人初與桓俱如齊，今又書者，於練時感夫人不與祭，故始以人道錄之。【補曰】「接」與「際」同義，猶言會也。練者，十三月之祭，此日以練布爲冠服，故以名祭，即小祥也。注言「以人道錄之」，非《傳》意。王念孫曰：「《傳》言錄者，閔錄之也。人之者，仁之也。」謂於練時閔錄夫人之不與祭，於是始仁之也。《公羊》言「念母」，此言「仁之」，其義一也。《仲尼燕居》注曰：「仁，猶存也。」《墨子·經篇》曰：「仁，體愛也。」《說文》曰：「仁，親也。」又《方言》曰：「凡相憐哀，九疑、湘潭之間謂之人兮。」《中庸》曰：「仁者，人也。」注曰：「人，讀如「相人偶」之「人」，以人意相存偶之言。」《表記》曰：「仁者，人也。」注曰：「人，謂施以人恩。」則「人」與「仁」同義。《公羊》成十六年《傳》曰：

「此其言舍之何？仁之也。曰在招丘悌矣。」何休注曰：「仁之者，若曰在招丘可悲矣。閔錄之辭。」《表記》注引《公羊傳》「仁之」作「人之」，古書「仁」與「人」二字多通用，義通故字亦通也。文烝案：王說是也。二句明所以特書「孫齊」義也。《公羊》曰：「夫人固在齊矣，其言孫于齊何？念母也。」賈逵、服虔說《左氏》曰：「桓公之薨，至是年三月，期而小祥，公憂思少殺，念及於母，以其罪重，不可以反之，故書孫于齊耳。」其實先在於齊，本未歸也。孔廣森以爲莊公念母，將迎而復之，乃著之曰是時固孫于齊也。前此「孫」文無所施。文烝案：他「孫」及凡奔，皆去而不反之辭，此「孫」亦獨異。不言氏姓，貶之也。哀姜有殺子之罪，輕，故僖元年曰「夫人氏之喪至自齊」，去「姜」以貶之。文姜有殺夫之罪，重，故去姜氏以貶之，此輕重之差。【補曰】此氏姓與隱九年異，男子有姓有氏姓，女子姓而已。姓即氏，氏即姓。僖八年《傳》曰「言夫人必以其氏姓」，婦人以姓爲重，且變於君之直言公也。注云云者，與左氏、賈、服說略同。賈、服以爲殺子罪輕，故孫不去姜氏。賈又以說喪至，但去姜之義。孔廣森曰：「夫人姜氏孫于邾，是內絕之之辭，絕之則無惡也。於其喪歸，乃復以小君事之，故惡之於彼。夫人孫于齊，內逆之之辭也，自後遂終以小



君事之，故惡之於此，後不待貶矣。」人之於天也，以道受命，【補曰】此下申貶義也。賈子曰：「命者，制令也。」制，謂限制。令者，號令。下所云以言而在天，亦若諄諄然者也。人爲父母所生，其中有天焉。下三年《傳》曰「三合然後生」是也。道者，天人之際，可言可行之名也。自天之人則曰自誠明，謂之性，自人達天則曰自明誠，謂之教。性始之，教終之，道在其中矣。堯、舜性之，自誠明也，誠者天之道也；湯、武身之，自明誠也，誠之者人之道也。誠之者思誠也，身之者反之，謂反身而誠也。不明乎善則不誠其身，善者所性而有也。誠言乎自成也，道言乎自道也，皆大名也。若道與德對文，則道者若大路也，德者得善於身也。其綱，親親，仁也；尊賢，義也。其殺其等，禮所生也。其目，君臣也，父子也，夫婦也，昆弟也，朋友之交也，皆道也。所以行之者，知也，仁也，勇也，皆德也。言乎心之皆有，則曰仁也，義也，禮也，知也。言乎心所同然，則曰理也，義也。此夫子、子思、孟子之精言，而《傳》之所指也。《中庸》曰：「自誠明謂之性，自明誠謂之教。」其發端則曰：「天命之謂性，率性之謂道，脩道之謂教。」陸賈曰：「天地生人，以禮義之性，人能察己，所以受命則順，順

之謂道。」董仲舒曰：「明於天性，知自貴於物，然後知仁義，知仁義然後重禮節，重禮節然後安處善，安處善然後樂循理。」諸文語意皆與《傳》同。而陸生似即本《傳》義，但陸以受命之後能順爲道，《傳》言「受」則已兼有順義，與下「以言受命」一例。天者，自始生而然也，天命之謂性也。受命者，終身之所受也，率性之謂道也。案下傳「三合然後生」，《詩·大雅》曰：「天生烝民，有物有則。」《左傳》劉康公曰：「民受天地之中以生。」《論語》曰：「人之生也直。」諸「生」字皆謂始生，而《左傳》、《論語》二「生」字又爲生存生活之「生」，與始生之「生」相因爲義，可知此《傳》二句之說矣。○「性」之爲字，從心從生，是由始生得名，故曰生之謂性。曰性者生之質，曰與生俱生，是其訓詁然也。《經》、《傳》「性」字有二解，如《孝經》「天地之性人爲貴」，直訓「生」也。父子之道天性，則性情之「性」也。《左傳》「民樂其性」，亦「生」也。協於天地之性，性情之「性」也。夫《傳》言「人之於天，以道受命」，而《皋陶》曰「天敘有典，天秩有禮」，逸《書·大甲》曰「顧諟天之明命」。尹吉甫曰：「天生烝民，有物有則，民之秉彝，好是懿德。」劉康公曰：「民受天地之中以生，所謂命也。」夫子曰：「人之生也直。」子思曰：「天命之謂性，自誠明謂之性。」比而觀之，性善明矣。

然而孟子言性善，乃爲發前聖所未發者，可欲之謂善，無惡之謂善。孟子以爲人性但有善，無有不善，且人人所同，此「性」字真切究竟之義，其原出於《中庸》之言誠。而自《詩》、《書》以來，皆引而不發，子貢所謂夫子之言性與天道不可得聞者也。《論語》言性之文，唯曰「性相近也，習相遠也」，「唯上知與下愚不移」，其辭最渾，而其理最密，得其言，不得其意，未有不以爲善惡混者，又未有不以爲三品者，非孟子固不能辯之矣。蓋自夫子沒而微言絕，學者多失其旨，於是有子賤、漆彫開、世碩、公孫尼之說，有《樂記》之說，有《告子》四章之說，有公都子所稱「告子曰」及兩「或曰」之說，大率或言靜，或言動，皆有似乎相近之言。而言有性善有性不善者，則又似乎上下不移之言。今取《孟子》之書詳考而深繹之，人與聖人皆同類而相似，即口目耳鼻四肢之形色，其血氣心知之中，而仁義禮智具焉。斯則謂之爲天性，性不可知，於情知之，情不必專善，而以其皆有惻隱、羞惡、恭敬、是非之心，乃所謂故以利爲本者，故知其皆有仁義禮智根於心。而所性皆善，雖曰皆善，而非堯、舜之至誠，不可言性之。雖非性之，而皆可反身以思誠，即皆可以爲堯、舜。惟不思不求而不能盡其才，陷溺焉，梏亡焉。【眉批】：「梏」从手，即「撓」字，王引之說。則其本相近者，

倍蓰相遠，而至於無算，斯夫子所謂下愚矣。下愚從習而來，至此則亦不移。相遠之實以下愚爲極，相近之名從上知而生，此則《孟子》未嘗引《論語》而實密合《論語》之意，廣大精微，明白洞達，言天人性道者必至此而其說乃盡。文烝讀《孟子》，積久乃悟之，章句既多，用特櫟括焉。聖人與我同類，同類者相似，一語最分曉，以聖人之與人相似，即知人之與上知相近也。相似即是相近，而於所謂好惡與人相近，所謂違禽獸不遠者，近遠之文雖同，其意異也。七篇言性最先處曰：《孟子》道性善，言必稱堯、舜，堯、舜者，善之極，性之準，以是知《論語》兩「相」字必指上知也。一章再出「子曰」者，始吾於人，善人不見之例也。四德有智，即上知之「知」，明性中有知無愚，而下愚自由於習，故又曰「困而不學，民斯爲下也」。趙岐解「倍蓰無算」云：「非天獨與此人惡性，其有下愚不移者，譬如被疾不成之人，所謂童昏也。」此注是也。趙又解「湯、武反之」云：「反之於身。」明「反」非反性之謂。《管子》言「內靜外敬，能反其性，性將大定」，《莊子》言「反性復初」，彼皆道家之學，異乎《孟子》所論也。【眉批】：《淮南子》亦云。「宓子、漆彫子、世子、公孫尼子之書，見漢志」，而王充《論衡》稱之曰：「周人世

碩以爲人性有善有惡，舉善性養而致之則善長，<sup>①</sup>因惡性養而致之則惡長。故世子作《養書》一篇。<sup>②</sup>宓子賤、漆彫開、公孫尼子之徒亦論情性，與世子相出入，皆言性有善有惡。」此即公都子所述可以爲善可以爲不善之說也。《樂記》亦公孫尼所作，其言曰：「人生而靜，天之性也；感於物而動，性之欲也；民有血氣心知之性而無哀樂喜怒之常。」其言靜即告子無善無不善之說，其言動即告子「杞柳」、「湍水」、「食色」及以「生」訓「性」之說，亦即可爲善可爲不善之說也。【眉批】：「四子說：《樂記》說，告子五說，皆即是可爲善可爲不善之說，揚雄所謂善惡混也，韓子所謂中品也。」至於仁、義、禮、智、信五性爲五行物象之說；好、惡、喜、怒、哀、樂六情生於六氣之說；又有喜、怒、哀、懼、愛、惡、欲七情之說；與夫性爲陽氣，情爲陰氣，陽氣有仁，陰氣有欲之說；又有性不發爲陰，情形外爲陽之說；性其情，情其性之說。此等分論性情，皆於《孟子》無妨。古人言，凡有血氣，莫不知愛其類；亦曰凡有血氣，皆有爭心。言孩提之童，知愛其親，亦曰兒善訟。言人義人利，又言人患，言道心之微，兼言人心之危，此等言情言心，亦於《孟子》無妨。《詩》、《書》所稱，不虞天性，俾爾彌爾性，並不主於論性。其曰節性者，則以好、惡、喜、怒、哀、樂之無節於內者言之，而不害其爲本自

有節也。《孟子》又言忍性，亦節性之意也。言豈一端，各有所當，學者亦務究性善大旨而已。荀卿後出，其學深於禮，好非子思、孟子，作《性惡》一篇，與孟子爲難。而以性與偶對，則亦明知性之爲誠。【眉批】：「偶」非「爲」字。漢儒言天地生人以禮義之性，言明於天性知自貴於物，然後知仁義，重禮節，安處善，樂循理。言天之所生，皆有仁義禮智順善之心，保定人甚固，其餘言五性者甚衆。而後來輯古文書者言恒性，《說文》之訓則直曰性善者也，其實於孟子之言終未能篤信而發明之，故董仲舒著書言性未可謂善。其後揚雄、荀悅及王充《本性》、唐韓子《性原》、【眉批】：「作『原性』者誤。」皇甫湜之論、杜牧之辯，皆不宗孟子者也。李翱宗孟，而始爲滅情復性之說，性不可言復，且離情無以求性矣。【眉批】：「聖人言復禮，不言復性。」宋周子善談名理，【眉批】：「善談名理」四字，《潘興嗣墓誌》語。而程子因以有理與氣之說，張子亦有天地之性、氣質之性之說，朱子皆取以說《孟子》。夫天生萬物，莫不有性，故水性下，山性生，

①「舉」下，中華書局《諸子集成》本黃暉《論衡校釋》有「人之」二字。

②「養書」，黃暉《論衡校釋》引陳世宜曰：「《玉海》五三引『養』下有『性』字。」

羽性輕，雪性消，玉性堅，犬性守，牛性順，馬性健，而人性則善。善謂之仁義禮智，仁義禮智之心有所同然者謂之理義。今日性即理也，不及在我在物之別，則語未足矣。【眉批】：「鄭君解《樂記》『天理』亦云理猶性也，必如朱子云『在心喚做性，在事喚做理』，方得分明。」人有性而情以見之，才以充之，形色以載之，或謂之天性，或謂之血氣心知之性，各便文以爲言。今必兼論性與氣而分論天地之性、氣質之性，則辭又費矣。且諸大儒之發明性善與《論語》『三言終不合一』，則後人安得無疑哉？周子以來，皆引《易·繫辭傳》：「一陰一陽之謂道，繼之者善也，成之者性也。」【眉批】：「張、程、朱言性，皆周子太極之學也。太極之學，實從《易大傳》三句來。」先道次善而後及性，與《中庸》、《孟子》所指各殊。其言道即《論語》之天道，《大戴禮·本命》言「分於道謂之命」者也，今不復繁文焉。於人也，以言受命。臣子則受君父之命，婦受夫之命。【補曰】言，謂教令也。生民之初有男女，而後有夫婦，有父子，有君臣。帝王之教，君者臣之天，父者子之天，夫者妻之天。是故子之愛親，命也，不可解於心。臣之事君，義也，無適而非君也，無所逃於天地之間。陰之從陽，女之順夫，天地之義也。三綱之道，本諸性而垂諸教者也。以道受命，以言受命，其實一也。言或有不當

受者，若《傳》論曹世子則亦以道爲斷也。不若於道者，天絕之也；不若於言者，人絕之也。若，順。【補曰】《爾雅》文也。惠士奇曰：「婦人殺夫，天與人皆絕之。」案：《左傳》曰：「不稱姜氏，絕不爲親，禮也。」亦謂魯當絕之。臣子大受命。言義得貶夫人。【補曰】臣，謂時史。子，謂莊公。史承公意，錄母之變，存以人恩，宜大所以受命於天人者，不可不貶夫人。此君子所以示義，蓋舊有姜氏文而削之。君子亦史臣也，子則亦容時君，或言臣得連言子耳，自人之於天也。以下董仲舒《繁露》亦有其文，董未必用《穀梁》，蓋古書成文也。末一句當非成文，或董所本無矣。葉夢得曰：「有《春秋》之教，有《春秋》之法。教者施之後世，曰夫人矣，不可謂之奔，故言孫；法者行之其人，夫人之罪不可容於魯，故不書氏。」

夏，單伯逆王姬。○【撰異曰】逆，《左氏》作「送」。《左》以《經》諸單伯皆爲天子之大夫。案：《傳》有魯大夫費彥父，亦稱費伯，與單伯相似。又《史記》魯邑有單父，明單伯實魯大夫矣。孔廣森曰：「逆則據往之日書，先行單伯而後築館可也。送則據來之日書，時尚未有以居王姬也，是不可通也。」案：此即張洽、俞皋說。單伯者

何？吾大夫之命乎天子者也。命大夫，故不名也。單，姓也。伯，字。諸侯歲貢士于天子，天子親命之。使還其國爲大夫者不名，天子就其國命之者以名氏通也。【補曰】注言「歲貢士」者，《射義》言「古者天子之制，諸侯歲獻貢士於天子」，故范云爾。但據鄭君注以歲獻爲獻國事之書及計偕物，以貢士爲三歲而貢士，則范非也。何休曰：「禮：諸侯三年一貢士於天子，天子命與諸侯輔助爲政，所以通賢共治，示不獨專，重民之至。大國舉三人，次國舉二人，小國舉一人。」何注與伏生《書大傳》同，《射義》注悉依爲說，范言「天子就其國命之者以名氏通」亦非也。大夫稱名氏者，皆其君所命，君不命，則名而不氏，此乃《傳》之明文，范說不亦謬乎？《王制》曰：「大國三卿，皆命於天子；次國三卿，二卿命於天子，一卿命於其君；小國二卿，皆命於其君。」鄭君疑《記》文誤脫，以爲小國亦三卿，一卿命於天子，二卿命於其君。單伯後不卒，何休無說，當與柔、溺皆同。其不言如何也？據僖三十年，「公子遂如京師」言如。其義不可受於京師也。其義不可受於京師何也？曰君躬弑於齊，使之主婚姻，與齊爲禮，其義固不可受也。

《禮》尊卑不敵，天子嫁女于諸侯，必使同姓諸侯主之。魯桓親見殺于齊，若天子命使爲主，則非禮大矣。《春秋》爲尊者諱，故不可受之于京師。【補曰】《爾雅》曰：「壻之父爲姻，婦之父爲婚。」注「天子嫁女」二句本《公羊》也。衰麻接弁冕，亦是義不可受，下《傳》乃備言之。「君躬」，各本誤作「躬君」，今依胡安國傳、俞皋《集傳釋義》本、李廉《會通》本、趙沅《集傳》乙正。王引之曰：「注以魯桓釋君，親釋躬。《傳》文誤倒，未考宋元人所見本也。」《音義》曰：「弑，又作『殺』。注同。」案：「殺」字是，今注未誤。

秋，築王姬之館于外。【補曰】《毛詩傳》、《聘

禮》注皆曰：「館，舍也。」《說文》曰：「館，客舍也。」《雜記》曰：「公館者，公宮與公所爲也；私館者，自卿大夫以下之家也。」《曾子問》略同。加之者，緩辭。○【撰異曰】館，《白虎通》引作「觀」。築，禮也。【補曰】於禮宜築館也，築館與築邑、築臺、築囿亦同。但無虞之事爲異，苟不爲其築于外，則史不記而《經》無文，成十八年《傳》所謂「築不志也。何休曰：「繕故曰新，有所增益曰作，始造曰築。」《說文》曰：「築，擣也。」于外，非禮也。外，城外也。【補曰】於禮不當築館城外。築之爲禮何也？【補

曰【據諸侯宮非一，宜不須改築館。主王姬者必自公門出，公門，朝之外門。主王姬者，當設几筵于宗廟，以俟迎者，故在公門之內築王姬之館。【補曰】朝者，治朝，治朝之外門即雉門也，雉門曰公門。言必自公門出者，所以起下二句。注末二句宜刪去。於廟則已尊，於寢則已卑，爲之築，節矣。【補曰】《公羊》曰：「於路寢則不可，小寢則嫌，群公子之舍則以卑矣。其道必爲之改築者也。」何休曰：「公子，女公子也，當築夫人之下，群公子之上。」文烝案：節者，制斷也。《傳》意似當築廟下寢上。築之外，變之正也。築之外，變之爲正何也？【補曰】俞樾曰：「當作『爲變之正』，『爲』字『變之』字誤倒。」仇讐之人，非所以接婚姻也；【補曰】謂非可於廟中接婚姻。衰麻，非所以接弁冕也。親迎服祭服者，重婚姻也，公時有桓之喪。【補曰】《喪服》經曰「斬衰裳，苴絰、杖、絞帶、冠繩纓、菅屨者」，父凡服上曰衰，下曰裳，男子衰與裳殊。此言衰，則該裳矣。麻，謂首要經也。斬疏齊大小功布總五服皆曰衰，其經皆麻。言衰麻，猶言衰絰，此以配衰而足其文，非指衰之布爲麻也。弁

冕，皆親迎之服，大夫以上服冕。此兼言弁，亦以足句。又弁是大名，故疏曰：「弁冕者，連言之。」《周禮》弁師掌王之五冕，故《傳》亦通言之也。趙匡曰：「言築之爲宜，不若辭之爲正也，故君子貴端本也。」孫復亦云。其不言齊侯之來逆何也？不使齊侯得與吾爲禮也。【補

曰】齊侯與魯不可相爲禮，不復讐則怨不釋，即四年《傳》之義也。疏曰：「舊解齊侯親逆不至京師，文王親逆不至于治，則天子諸侯親迎皆不至婦家矣。今恐不然，何者？此時王姬、魯主婚，故不至京師。《詩》稱『親迎于渭』者，爲『造舟爲梁』張本，焉知文王不至大姒家乎？」

冬十月乙亥，陳侯林卒。諸侯日卒，正也。【補曰】疏曰：「重發之者。此共錫命相連，恐日月爲錫命錄，故明之。」

王使榮叔來錫桓公命。榮，氏。叔，字。天子之上大夫也。禮有九錫：一曰輿馬，二曰衣服，三曰樂則，四曰朱戶，五曰納陛，六曰虎賁，七曰弓矢，八曰鈇鉞，九曰柅轡，皆所以褒德賞功也。德有厚薄，功有輕重，故命有多少。何休曰：「桓，弑逆之人，王法所宜誅絕，而反錫命，悖亂天道，故不言天王也。」文五年「王使榮叔歸含，且

贈」則曰「含」者，臣子之職也，以至尊行卑事，故不言天王也。三月「王使毛伯來會葬」，又曰「刺比失禮」，故亦不言天王也。甯案：僖二十四年，天王出居于鄭，不可最大矣。禮：天子既有贈含之制，《傳》但譏二事共一使耳。言「且」，所以示譏，一事無再貶之道也。以天王之尊，會人妾祖母之葬，誠失禮矣，孰若使任叔之子來聘，使家父來求車之不可乎？此三者，皆言天王，明非義之所存。舊史有詳略，夫子因而弗革，故知曲說雖巧，致遠則滯矣。【補曰】此依杜預以榮爲氏，文五年注以榮爲采地。文元年叔服注云：「未受采邑，故不稱氏。」氏即采地，三公至元士皆同。榮叔亦得爲中大夫也，《書序》有榮伯。《爾雅》曰：「錫，賜也。」九錫之文本何休注。何休又曰：「百里不過九命，七十里不過七命，五十里不過五命。」范謂以功德爲多少，與何異也。《韓詩外傳》、《春秋緯》、《禮緯》皆言九錫，《書大傳》則言諸侯三年一貢士，一適謂之好德，再適謂之賢賢，三適謂之有功。有功者，天子一賜以車服弓矢，再賜以秬鬯，三賜以虎賁百人，號曰命諸侯，是三錫也。但《春秋》錫命及《左傳》諸所載似皆未可援三錫九錫爲說，惟齊桓、晉文錫命爲侯伯，略相近焉。王不稱天，范駁何休甚善，然非舊史有詳略也。《春秋》書錫命三：桓書「王」，文書「天

王」，成書「天子」，其義一也。其義一而或稱王、或稱天子者，成八年《傳》云「見一稱也」。但《傳》惟以「見一稱」釋天子而不釋王者，天子終《春秋》祇一見，而王則本配諡之稱，其爲見一稱易明，無待釋也。夫同此錫命一事而其文三變焉，所以得爲「見一稱」耳。至於榮叔歸含、召伯會葬，皆在文公逆祀後，則是《傳》所謂「文無天者」，因魯起義，非關王身。而先儒亦莫能悟，深可喟矣。大氏王不稱天，決無貶王之義，《春秋》言王、言天王、言天子、言王后、言公、言夫人，皆稱名之最尊者，雖有貶時，不貶於其尊稱之名也。此事蒙上月。禮有受命，無來錫命，錫命非正也。賞人於朝，與士共之，當召而錫也。《周禮·大宗伯職》曰「王命諸侯則儋之」，是來受命。【補曰】鄭君注曰：「儋，進之也。王將出命，假祖廟，立依前，南鄉，儋者進當命者，延之命使登，內史由王右以策命之，降再拜稽首，登受策以出，此其略也。諸侯爵祿，其臣則於祭焉。」生服之，死行之，禮也。【補曰】《公羊》曰：「錫者何？賜也。命者何？加我服也。」何休曰：「言命不言服者，重命不重其財物。」孔廣森引《覲禮》：「諸公奉篚服，加命書於其上，大史述命，侯氏降拜，升成拜，大史加書于服上，侯氏受。」生



不服，死追錫之，不正甚矣。【補曰】周禮大史賜謚，無追錫命之禮。何休曰：「《禮》生有善行，死當加善謚，不當復加錫。」疏曰：「書錫命者三，此追命失禮最大，故以甚言之。」文烝案：杜預《釋例》曰：「天子錫命，其詳未聞。諸侯或即位而見錫，或歷年乃加錫，或已薨而追錫。魯桓薨後見錫，則亦衛襄之比也；魯文即位見錫，則亦晉惠之比也。魯成八年，齊靈二十三年乃見錫，隨恩所加，得失存乎其事。」

### 王姬歸于齊。

【補曰】齊侯來逆而姬歸也。何休

曰：「內女歸例月，外女不月者，聖人探人情以制恩，實不如魯女。」爲之中者，歸之也。【補曰】明與紀、季、姜

略同。與齊桓夫人異。重發《傳》者，彼爲媒，此爲主也。讀同彼《傳》。丁溶曰：「〔中〕當作〔主〕。」疏云：「彼王姬非魯主昏。」又二年《傳》「爲之主者，卒之也」，明此亦當爲主。

### 齊師遷紀邢、鄆、郛。

【補曰】《爾雅》曰：「遷，

徙也。」《蒼頡篇》曰：「徙，移也。」○【撰異曰】「紀」下或有「于」字。《傳》所明記而先儒失之，今以《夏小正》傳例推知之。紀，國也；邢、鄆、郛，國也。此「國」以三言爲名。或曰遷紀于邢、鄆、郛。十年，宋人遷宿。《傳》

曰：「遷，亡辭也。其不地，宿不復見矣。」齊師遷紀，四年復書「紀侯大去其國」者，紀侯賢，不與齊師之亡紀，故變文以見義。邢、鄆、郛之君無紀侯之賢，故不復見，從常例也。若齊師遷紀于邢、鄆、郛，當言「于」以明之，又不應復書地，當如宋人遷宿，齊人遷陽。「或曰」之說，甯所未詳。【補

曰】案：《傳》有誤字，當云「邢、鄆、郛邑也」，或後人妄改之。紀之爲國，前已屢見，《傳》先言「紀，國也」者，以起下邢、鄆、郛之爲紀邑也。四年紀侯始去國，此時安得遷紀國都？豈有國遷而君猶在國者乎？《公羊》以爲外取邑，以爲自是始滅。杜預曰：「齊欲滅紀，故徙其三邑之民而取其地。」又《論語》稱「管仲奪伯氏駢邑三百」，應劭說即此邢也。不曰齊師伐紀取邢、鄆、郛者，實是遷徙其民，且還是亡辭，欲以著亡紀之漸也。邑得言遷，又繫紀，皆變文也。《傳》言紀是國都之大名，邢、鄆、郛乃其三邑，明與他例不同也。又稱「或說」者，謂《經》文異本多一「于」字，猶《夏小正傳》說「初歲祭宋」云「或曰祭非也」，說「鹿從」云「或曰人從」，【眉批】：「鹿從」二字依孔氏說。皆記別家經之異，與此正同矣。此有「于」字者，謂遷紀都之民於其三邑，文異則義異也。諸稱「或曰」、「其一曰」者，文同而義異也，皆示《傳》疑兼存之，師說如是。



二年春王二月，葬陳莊公。

夏，公子慶父帥師伐於餘丘。慶父名，字仲

父。【補曰】杜預曰：「莊公時年十五，則慶父，莊公庶兄。」

案：慶父謚曰共，仲也。慶父所弑，乃莊之子，故不如輩、豫貶，且輩弑別無見文，慶父弑當文自見。國而曰伐，

於餘丘，邾之邑也。其曰伐何也？【補曰】據

凡言伐國侵國者，皆其四竟之內，不必迫近國都。雖伐於

餘丘，當言伐邾。李廉曰：「《經》書魯大夫帥師伐國者九，

獨於餘丘以邑而書伐，欲以起問者察事情也。」公子貴

矣，師重矣，而敵人之邑，公子病矣。【補曰】既

貴且重，乃敵一邑，病也。明特變國言邑，以顯新義。病

公子，所以譏乎公也。【補曰】大夫之事皆公命。

其一曰：君在而重之也。邾君在此邑，故不繼于

邾，使若國。【補曰】疏曰：「一曰之說，亦解稱伐之意，言

為君在重之，使若國然，故邑亦稱伐。」文烝案：此亦解變

國言邑之意。注本《公羊》，失之，疏亦未了。

秋七月，齊王姬卒。【補曰】何休曰：「內女卒

例日，外女卒不日者，恩實輕於內女。」為之主者卒之也。主其嫁則有兄弟之恩，死則服之，服之故書卒。《禮

記》曰：「齊告王姬之喪，魯莊公為之大功。」【補曰】此亦讀

「為之主者」絕句。我為之主者，則書卒以卒之，《經》仍史

之舊也。「主」字各本脫，今依唐石經、陸淳《集傳纂例》及

十行本、俞皋《集傳釋義》本、李廉《會通》本補正。注引《禮

記·檀弓》文。

冬十有二月，夫人姜氏會齊侯于禚。禚，

齊地。【補曰】月者，為下卒日。文姜初如莒不月，則此亦

當不月。○【撰異曰】禚，《公羊》作「郛」，《玉篇·禾部》引

作「糕」。婦人既嫁，不踰竟，踰竟，非正也。

【補曰】何休以為婦人無外事，外則近淫也。此通說諸婦人

踰竟事。婦人不言會，言會非正也。【補曰】會或

在竟內，或在竟外，君大夫之事，非婦人事也。此說本

《經》，亦通說下二會及聲姜二會，并包杞伯姬。饗甚

矣。饗在四年。【補曰】饗者，兩君之事，亦非婦人事，飲

食宴樂，其情彌親，尤亂男女之別，故非正尤甚也。此指說

四年事。

乙酉，宋公馮卒。【補曰】疏曰：「馮是穆公長子，與夷既弑，則馮當正，故書日。」

### 三年春王正月，溺會齊師伐衛。徐邈曰：

「《傳例》曰：『往月，危往也。』齊受天子罪人，爲之興師，而魯與同，其理危也。」【補曰】徐意危往之例亦通於大夫，徐是也。《傳》言「會仇讐」，解溺直稱名之義，徐以危往，又別取一義。○【撰異曰】師，各本誤作「侯」，今依唐石經改正。

溺者何也？公子溺也。【補曰】《左氏》、《公羊》皆

所未聞。其不稱公子何也？據二年公子慶父帥師

伐於餘丘稱公子。【補曰】當云據凡公子無不氏者。惡

其會仇讐而伐同姓，故貶而名之也。【補曰】貶

溺亦所以譏公也。溺後不卒者，何休以爲莊公薄於臣子之

恩，故不卒大夫，與桓同義。文烝案：溺卒在莊世，容有其

理，要亦其卒時實無恩禮，史所不書。公子彊之子哀伯達，

其卒在莊世，不書亦其比也。桓、莊五十年中，自末年公子

牙外，無卒大夫者，輦卒當是君子所削，其餘如柔、溺、單伯

達之類，當皆是二君不加恩禮，而史不錄卒也。牙之卒，

《左傳》稱立叔孫氏，則明其有恩禮。

夏四月，葬宋莊公。月葬故也。【補曰】重

發《傳》者，五月而葬，非緩非速而有故，《傳》未有明文也。

五月，葬桓王。《傳》曰改葬也。若實改

葬，當言「改」以明之，猶「郊牛之口傷，改卜牛」是也。《傳》

當以七年乃葬，故謂之改葬。【補曰】此引舊《傳》文，《公

羊》又同，而《注》猶疑之，又引「改卜牛」亦不倫矣。前者桓

王之葬不書，下所謂天子志崩不志葬也，猶平王之葬亦不

書也。今此改葬，故特志之。疏妄引《感精符》以申范，非

也。依《左傳》，葬有闕則改葬，鄭君《喪服》記注謂「墳墓以

他故崩壞，將亡失尸柩」者。改葬之禮，總，舉下緬

也。總者五服最下。言舉下緬上，從總皆反其故服，因葬

桓王記改葬之禮，不謂改葬桓王當服總也。猶晦震夷伯之

廟，因明天子諸侯之制，不謂夷伯非魯之大夫也。甯之先

君與蔡司徒論之詳矣。江熙曰：「葬稱公，舉五等之上，改

葬禮總，舉五服之下，以喪緬藐遠也。天子諸侯易服而葬，

以爲交於神明者，不可以純凶，況其緬者乎？是故改葬之

禮，其服唯輕。言緬，釋所以總也。【補曰】《國語》注曰：

「緬，猶邈也。」《喪服記》曰：「改葬總。」《韓子》說《喪服》及

此《傳》曰：此皆謂子之於父母，妻爲夫如子，其他皆無服，

無服則弔服而加麻。緬，猶遠也。下，謂服之最輕者也。以其遠故，其服輕也。韓從江說，以范爲非。案：鄭君《喪服記》注：「服總者，臣也，子也，妻也。」韓說是也。《喪服傳》說總之制：十五升抽其半，有事其縷，無事其布。江云「易服而葬」者，疏引《檀弓》「弁經葛而葬，與神交之道也」，鄭君注云：「接神之道，不可以純凶，天子諸侯，變服而葬，冠素弁，以葛爲環經，既虞卒哭，乃服受服也。」又《喪服記》注曰：「總，三月而除之。」或曰卻尸以求諸侯。停尸七年，以求諸侯會葬，非人情也。【補曰】卻者，《說文》、《玉篇》云：「節，卻也。」《廣韻》云：「節也，退也。」此「卻尸」蓋取「退」義，謂卻退其下柩之期。尸即是柩，對文則異，散則通也。《左傳》曰「緩也」，是同或說，《傳》姑載之，本不可從。張大亨據之，遂以七年閒嘗書王命駁未葬不稱使之說。天子志崩不志葬，必其時也。何必焉？

舉天下而葬一人，其義不疑也。【補曰】不志葬，謂平、桓、惠、定、靈五王，非魯不會葬，蓋舊史皆有之矣。君子以爲魯史非周史，比改立不志葬之例，取義於必其時，明其不疑於不葬也。《文選》注引劉兆注曰：「舉，盡也。」「其義」，文九年作「其道」，義、道一也。不志葬爲必其時，

《公羊》亦同，獨五王不志葬者，說具襄二十八年靈王崩下。志葬故也，危不得葬也。【補曰】志葬，謂襄、匡、簡、景四王，此改葬桓王亦是也。志葬者月，甚則日。曰「近不失崩，不志崩，失天下也」。京師去魯不遠，赴告之命可不踰旬而至，史不志崩，則亂可知。【補曰】曰者，目《經》意也。不志崩，謂莊、僖、頃三王也。周有赴告，於魯爲近，地則千里，屬則文昭，理必赴崩。史不失志，今《經》不志，明史本無。近而失之，知其不赴，近而不赴，是失天下，君子將使人考其事，知其義也。注言不踰旬，甚言其速耳，以平王、簡王之崩觀之，當言不踰二旬。《左傳》例曰凡崩薨不赴則不書。方苞本程子語爲說，曰抑於此見《經》因魯史，有可損而不能益焉。天王之崩，雖易世以後，可考而知，而魯史所無者，不敢益也。其文則史，而義即於是乎取焉，此其較著者也。文烝案：自「天子志崩」以下，總論周諸王崩葬事。獨陰不生，獨陽不生，獨天不生，三合然後生，徐邈曰：「古人稱萬物負陰而抱陽，沖氣以爲和，然則《傳》所謂「天」，蓋名其沖和之功，而神理所由也。會二氣之和，極發揮之美者，不可以柔剛滯其用，不得以陰陽分其名，故歸於冥極而謂之天。凡生類

稟靈知於天，資形於二氣，故又曰「獨天不生」，必三合而形神，生理具矣。【補曰】陰謂母，陽謂父，《注》似未了，其解「天」字則是也。人之生，受形於母，得氣於父，稟靈於天，皆合焉而後爲人。《楚辭·天問》曰：「陰陽三合，何本何化。」邵子曰：「氣者神之宅也，體者氣之宅也，體、氣、神即陰、陽、天歟？」注「萬物」二句，《老子》文。故曰母之子也可，天之子也可。【補曰】凡爲母之子者，皆天之子也。不言父之子者，省句以便文，從可知。尊者取尊稱焉，卑者取卑稱焉，王者尊，故稱天子。衆人卑，故稱母子。【補曰】《喪服傳》曰：「禽獸知母而不知父，野人曰，父母何算焉？」都邑之士則知尊禰矣，大夫及學士則知尊祖矣。諸侯及其大祖，天子及其始祖之所自出，尊者尊統上，卑者尊統下。鄭君曰：「及始祖之所由出，謂祭天也。」案：此段與《傳》義相表裏。夫禰也，祖也，大祖也，始祖也，祭祀之鬼神，吾心之鬼神也。故祭祀之天，吾之天也。吾之天者，三合是也。此爲道之本，教之至。《說文》曰：「古之神，聖人母，感天而生子，故偶天子。」是乃漢儒聖人無父之妄說，不足據也。董仲舒《繁露》亦有「獨陰」以下數語，蓋是古書成文。彼無「獨天」句，中二句作「父之子

也可尊，母之子也可卑」，似是而非，當由轉寫妄改。其

曰王者，民之所歸往也。【補曰】《史記正義》引《逸

周書·謚法》「仁義所往曰王」謂身有仁義爲衆所歸往也。

「王」、「往」同聲爲訓。《呂氏春秋》曰：「帝也者，天下之適

也，王也者，天下之往也。」「適」亦「往」也。自「獨陰」以

下，又論稱天子、稱王之義，推此知天王者合二稱爲稱也。

何休解天王義，以爲時吳、楚上僭稱王，王者不能正，而上

自繫於天。《春秋》不正者，因以廣是非。劉敞、孔廣森引

董仲舒曰：「古之造文者，三畫而連其中謂之王。三者天、

地、人也，而參通之者王也。」皆非《傳》意。

秋，紀季以鄆人于齊。季，紀侯弟。【補曰】杜

預用《公羊》文也。○【撰異曰】鄆，《左氏》本又作「攜」。

鄆，紀之邑也。人于齊者，以鄆事齊也。雍

曰：「紀國微弱，齊將吞并，紀季深覩存亡之機，大懼社稷

之傾，故超然遐舉，以鄆事齊，庶胤嗣不泯，宗廟永存，《春

秋》賢之，故褒之以字。【補曰】雍注皆非也。以鄆事齊者，

《左傳》云「紀於是乎始判」，《公羊》云「請後五廟以存姑姊

妹」，杜預以爲「以邑入齊爲附庸」是也。此通解「以鄆人于

齊」五字義。舉《經》句不出「以鄆」二字者，省文也。《傳》

但言「以鄰事齊」，其文簡略。而《左氏》賈逵說以為紀季不能兄弟同心以存國，乃背兄歸讐，書以譏之。賈明於《穀梁》，此數語必《穀梁》家義也。書「以」者，從邾庶其、衛孫林父等文之例。庶其之等，《傳》多云「以者，不以者也」，明此亦同義，舉後可以包前也。「黑肱以濫來奔」，《傳》云「來奔內，不言叛」，明以邑出奔他國者皆當舉叛為重，故孫林父以戚出奔晉，但書叛，不書出奔，是其例也。此之以鄰入于齊，亦是叛而出奔。不舉叛為重者，或當以凡出奔不重於叛，故以叛為重，而此之人于齊為附庸，事不止於出奔，又重於叛，故不言出奔而言入，不得以叛為重也。《左氏》、劉歆、賈逵說，以為紀季以鄰奔齊，不言叛，不能專鄰，此說非也。紀季稱字者，從許叔、蔡季之例。《傳》言許叔，許之貴者；蔡季，蔡之貴者；明此亦以貴舉可知也。不言紀侯之弟某者，啖、趙以為兄無惡。《傳》解衛侯之兄輒云：「目衛侯，衛侯累也。」則啖、趙是也。《傳》與《左傳》皆無賢紀季之義，惟《公羊》以稱字為賢之，杜預遂據以改《左氏》，舊注范、雍因以注《穀梁》，後儒相沿為說，誤矣。《公羊》言賢其服罪，服罪之說從齊襄復讐而起，本不可通於《穀梁》、《左氏》，且《公羊》但以稱字為賢，未嘗謂其非叛，故何休注猶以叛為言，杜、范等并失《公羊》本意。惟孫復、杜諤言其

惡，黃仲炎言其為自全之計，家鉉翁謂貶而非褒，程端學以為季有罪不可以訓，蓋有合《穀梁》、《左氏》之舊義。人者，內弗受也。齊受人之邑而滅人之國，故於義不可受也。【補曰】注非也。此又言書人之義，與凡人同例也。齊受叛人之邑，非義所當受，故為不可受之辭。言齊不可受，則紀季之罪益著，雖不言叛，叛可知也。疏曰：「此齊不可受，嫌違例，故重發之。」案：疏語亦無發明也。

冬，公次于郎。【補曰】何休曰：「次，例時。」

○【撰異曰】郎，《左氏》作「滑」，王夫之曰：「宜以「郎」為正。」次，止也，【補曰】何休曰：「次者，兵舍止之名。」《左傳》例曰：「凡師一宿為舍，再宿為信，過信為次。」有畏也，欲救紀而不能也。畏齊。【補曰】不能救，是畏也。《公羊》同。次成諱恥，此直文者，蓋刺其畏讐。不致者，蓋舊史無之，竟內兵不告廟也。

四年春王二月，夫人姜氏饗齊侯于祝丘。饗，食也。兩君相見之禮，以非禮尤甚，故謹而月之。凡會書月著時，事有危，雖於公發例，亦無所不闕。祝丘，

魯地。【補曰】注首二句本杜預。訓「食」者渾言之，饗大於食與燕。如《左傳》鄧侯享楚文王，齊侯享魯定公之類是也。何休曰：「牛酒曰犒，加飯羹曰饗。」月者再出重也，三出不月者，省文從可知例。○【撰異曰】饗，本又作「享」。《左氏》作「享」。案：《左傳》中凡饗禮、食禮之饗，皆用「祭享」，「享獻」字，於六書爲假借，猶《曲禮》、《月令》、《禮器》等篇假「饗食」字爲祭享也。歆享、享國，與祭獻義相因。《毛詩》、《儀禮》、《今文尚書》等用「饗」者亦當爲假借，二字相亂，故記之。饗，甚矣。【補曰】覆說上《傳》專謂夫人也。饗齊侯，所以病齊侯也。【補曰】饗齊侯，謂《春秋》之文言饗以饗之，言饗又所以病齊侯，病其爲鄰國夫人加以甚非正之事也。女失既甚，男惡安辭？淫妹之事，隱然可見，故病之也。文姜與齊襄淫亂，於饗、於諸會，於如齊師皆有焉。《春秋》書會，但與會卞之屬一例。書如齊師，亦與他書如不殊。惟此書饗，雖亦記事之直文，而狐之綏綏，魚之遺遺，殆不可掩。夫兩君相饗從無書者，而獨書夫人饗，其爲甚且病不已明乎？

三月，紀伯姬卒。隱二年履綸所逆者。內女卒例曰，伯姬失國略之，故月也。【補曰】注首句，杜預語。不

日者，三十年《傳》以爲爲紀亡略之。時紀未亡，卒而即亡，猶未葬，當以亡論。外夫人不卒，此其言卒，何也？【補曰】外夫人，通言諸外夫人也。不卒者，《經》例因史例也。吾女也。適諸侯則尊同，以吾爲之變，卒之也。禮：諸侯絕旁尊，姑姊妹女子子嫁於國君者，尊與己同，則爲之服大功九月，變不服之例，然則適大夫者不書卒。【補曰】變者，既服其喪，則與常日異禮，故言變，與宣八年《傳》「變」字同義。注言「變不服之例」，非《傳》之「變」字也，此發已嫁女書卒通例。注言適大夫不卒，疏謂莒慶、齊高固並逆叔姬，無卒文是也。

夏，齊侯、陳侯、鄭伯遇于垂。《傳例》曰：「不期而會曰遇。」遇者，志相得也。【補曰】鄭伯者，突也。孫覺、胡安國、高閌、陳傅良、胡寧、程公說、張洽、趙鵬飛、呂大圭皆云。

紀侯大去其國。【補曰】去，違也，離也。言「其」，亦綏辭。不月者，小國奔例。大去者，不遺一人之辭也。【補曰】葉夢得曰：「大，猶盡也。盡無麥禾曰大無麥禾，盡去其國曰大去其國。」文烝案：《左氏》襄十

四年《傳》記晉伐秦事曰「乃命大還」，汪克寬引爲證，并引婦人大歸。此滅而奔也，謂之大去，有奔事，無奔文。言民之從者四年而後畢也。【補曰】謂元年既失邢、鄆、郛，而三邑之民猶有從者，至此乃合國都之民并其餘邑民，皆從君避難而去，故曰「四年而後畢」，明以紀侯得民，不欲言奔也。紀侯賢，而齊侯滅之，不言滅而曰大去其國者，不使小人加乎君子。不曰滅而曰大去其國，蓋抑無道之強以優有道之弱，若進止在己，非齊所得滅也。何休曰：「《春秋》楚世子商臣弑其君，其後滅江、六，不言大去。又大去者，於齊滅之不明，但知不使小人加乎君子。而不言滅，縱失襄公之惡，反爲大去也。」鄭君釋之曰：「商臣弑其父，大惡也，不得但爲小人。江、六之君又無紀侯得民之賢，不得變滅言大去也。元年冬，齊師遷紀，三年，紀季以酈人于齊，今紀侯大去其國，是足起齊滅之矣。即以變滅言大去，爲縱失襄公之惡，是乃《經》也，非《傳》也。且《春秋》因事見義，舍此以滅人爲罪者自多矣。」【補曰】疏曰：「言《春秋》有因事見義者，不得不舍此以滅人爲罪也，若晉人執虞公、梁亡之類是也。」文烝案：前文足起齊滅，既如鄭言，下文又明稱齊侯，則此文

本當言齊侯滅紀，亦無嫌不明，故可不言滅也。又去者，奔之異文。若言滅，又言奔，如齊師滅譚，譚子奔莒；楚人滅弦，弦子奔黃；則紀侯爲不能死社稷而其賢隱矣，故《春秋》不罪紀侯者，以其賢也。言大去不疑爲罪文者，由於不言滅也。《經》之改舊精，《傳》之說《經》密。鄭君言齊師遷紀，不連邢、鄆、郛，亦不知彼《傳》誤字。

六月乙丑，齊侯葬紀伯姬。【補曰】上既不言齊侯滅紀，又不出齊師、齊人，故稱齊侯葬以著之，異於陳哀公。俞皋曰：「見齊侯之滅紀也。」胡安國曰：「如紀似禮，存季似義，葬伯姬似仁，君子惡似而非者。」外夫人不書葬，此其書葬何也？【補曰】疏曰：「此外夫人即謂吾女，吾女爲外夫人者惟當書卒，不合稱葬。」文烝案：諸外夫人及內女爲外夫人者魯多會葬，史於內女志卒亦必志葬。至君子並削之，則其存而不削者別有義矣。

吾女也，失國，故隱而葬之。隱，痛也。不日卒而日葬，閔紀之亡也。【補曰】注二語本後三十年葬叔姬《傳》文。但彼《傳》是總發伯姬、叔姬卒葬四文之義，就日不日言之，此《傳》則直論伯姬書葬之義，以包叔姬，與彼《傳》義各別也。隱伯姬、叔姬之失國，猶隱宋共姬之卒災，皆於其



書葬見之。至於閔紀之亡，不日卒而日葬，義由紀起，不專在二姬之身，自不可與宋共姬類論。

秋七月。

冬，公及齊人狩于郕。郕，齊地。【補曰】非也。即取諸宋者。○【撰異曰】郕，《左氏》作「嵒」。齊人者，齊侯也。【補曰】公親出與狩，明是齊君。其曰人何也？卑公之敵，所以卑公也。內無貶公之道。【補曰】卑之猶言貶之，貶齊侯正以貶公。何爲卑公也？不復讐而怨不釋，【補曰】能復讐則善矣，既不能復則怨不可釋。苟見齊侯則殺之，故必無相見之理。刺釋怨也。【補曰】刺其釋怨相見，故爲卑公之文也。《公羊》釋齊人之文曰「諱與讐狩」，曰「於讐者將壹讐而已，故擇其重者而讐焉，莫重乎其與讐狩也」。《公羊》之言「讐」，即《傳》所謂「卑」、「刺」，《公羊》言「諱」而《傳》不言者，言卑刺則諱可知，明《經》以卑刺爲義也。若不以卑刺爲義，直以諱爲義，則當不言公而直言及齊侯，今言公及齊人則明以諱見讐。諱者其文，而卑刺者其義，故但言諱則無以知其爲卑刺，但言卑刺則諱可知也。不致者，蓋亦舊

史無之，凡狩不告廟也。

五年春王正月。

夏，夫人姜氏如齊師。【補曰】孔穎達曰：「於時齊無征伐之事，不知師在何處？蓋齊侯疆理紀地，有師在紀。不言會者，往其軍內就齊侯耳，不行會禮。」師而曰如，衆也。言師衆大如國，故可以言如，若言如齊侯則不可。【補曰】此爲凡書如師、如會者發例，注末二句可刪。婦人既嫁不踰竟，踰竟，非禮也。【補曰】疏曰：「復發《傳》者，嫌師與國異也。」孔廣森曰：「戎事不邇女器，目言「如齊師」，惡甚矣。」文烝案：如齊師之爲非禮，當與會同論，皆不若饗之甚。謝湜等說未是。

秋，邾黎來朝。○【撰異曰】邾，公羊作「倪」。段玉裁曰：「《公羊》蓋作「兒」，五兮反。十五年可證。」黎，《左氏》作「黎」。邾，國也。黎來，微國之君，未爵命者也。黎來，名也。【補曰】未爵命於周也。《左傳》亦曰「未王命」，杜預曰「附庸國」。重發《傳》者，前稱字，此稱名，前是盟，此是朝，嫌有異也。注本《左氏》、《公



羊》。

冬，公會齊人、宋人、陳人、蔡人伐衛。

納惠公朔。【補曰】《左傳》文。是齊侯、宋公也。【補

曰】公與共伐，致來王人之救，足見齊、宋君親來。不言陳侯、蔡侯者，省文。其曰人何也？人諸侯所以

人公也。【補曰】人之猶言貶之卑之。其人公何也？逆天王之命也。王不欲立朔也。【補曰】案：

上《經》言公及齊人刺釋怨而卑之，卑其相見，而諱使若不相見也。卑之之義即寓於諱之文，則此《經》「人公」當亦同上諱不沒公，直言及齊侯，此諱亦不沒公，直言會齊侯，其諱亦正相等。但上《經》「卑公」專以釋怨相見起義，卑之即是諱之。此《經》「人公」則不專是齊、魯之故，乃以逆王命起義。會即無齊，齊即非讐，亦當人公，不專為諱也。《春秋》包含萬理，而其義之重且急者乃《經》之本旨。陳傅良、趙昉說此伐衛及後圍邲，以為公與仇人接，《春秋》終諱之。萬斯大謂使若終不相見者，其論固是，而此《經》本義猶未得也。團邲不言公，亦為諱，此《經》則不專為諱。

六年春王三月，王人子突救衛。徐邈曰：

「諸侯不奉王命，朔遂得篡。王威屈辱有危，故月也。救衛於義善，故重子突功。不立，故著其危。」【補曰】疏曰：「日月之例，見危者惟施於內，今施之於外者，范答薄氏云：『王者安危，天下所繫，故亦與內同也。』」文烝案：何休曰：「救例時，此《經》例也，史例皆月。」○【撰異曰】三月，各本誤作「二月」，今依唐石經、十行本、呂本中《集解》、張洽《集註》、程端學《本義》、李廉《會通》改正。《左氏》作「正月」。王人，卑者也。【補曰】何休以為下士稱人。杜預《釋例》同。稱名，貴之也。何休以為稱子則非名也。鄭君釋之曰：「王人賤者，錄則名可，今以其銜命救衛，故貴之。貴之則『子突』為字可知明矣。此『名』當為『字』誤爾。」徐乾曰：「王人者，卑者之稱也，當直稱王人而已。今以其能奉天子之命救衛而拒諸侯，故加名以貴之。僖八年『公會王人、齊侯』是卑者之常稱。」【補曰】案：何休注意「突」仍是名，與《廢疾》異。《史記·自序》曰：「《春秋》褒周室，諸有尊貴文者，皆褒也。」陸淳曰：「天子無上，無以褒之，故褒子突，則王美可見也。」孫覺曰：「《春秋》之義，天王無褒，非無善也。其善者衆，不可以一善褒也。天王無貶，非無惡也。天王之位，非為惡者居之，雖有惡，不

加貶焉。故善天王之救衛，而書子突之字，貶王師之敗績。而以自敗爲文，蓋曰天王無裒，又其善不可掩也。則褒其臣，天王無貶，又其惡不可諱也。則書王師之自敗，所以推尊而責備之也。」善救衛也。【補曰】疏曰：「計王者有伐無救，而云『善』者，朔叛逆王命，天子廢之，立其嗣子，而遣師往救，有存諸侯之功，故曰善，不可以大平之法格之。」文烝案：疏說固通，但據《周禮·大司馬》「及師，大合軍，以行禁令，以救無辜，伐有罪」，則大平亦有救法，書救即爲善，與上稱名貴之各一義。羅喻義曰：「《春秋》筆法，空處最奇。隱之薨，不地不葬，知有亂者。桓之薨，前書夫人如齊，後書夫人孫，知有淫者。衛朔之人，書王人救衛，知有天子所立之公子黔牟。」救者善，則伐者不正矣。

【補曰】此句通謂凡救，凡救皆善，非善則沒其救文。如襄十一年，秦人伐晉以救鄭，彼時晉伐鄭爲近正，秦救鄭無善，《春秋》不言救，故言救者必善，即知伐者之非正矣。胡安國得其解。

夏六月，衛侯朔入于衛。其不言伐衛納朔何也？據九年伐齊納糾言納。【補曰】問上《經》。不逆天王之命也。不與諸侯得納王之所絕。【補曰】

《公羊》曰「辟王也」，與此同。人者，內弗受也。【補曰】此發君入通例，故重舉之。朔嘗爲君，不言復入者，方欲絕之，若其本未有國。劉敞曰：「不與復。」何用弗受也？爲以王命絕之也。【補曰】何休曰：「絕者，國當絕。」徐彥曰：「絕有二種：一是絕滅其國，一是絕去其身。」朔之名，惡也。【補曰】與「出」同義。朔入逆，則出順矣。【補曰】疏曰：「順者，比之人國爲順，仍是惡也。一解此當文自相比入爲逆，則出當爲順矣。」朔出入名，以王命絕之也。【補曰】《公羊》解「出」名曰「絕」，曷爲絕之？得罪于天子也。解「入」名曰絕，曷爲絕之？犯命也。

秋，公至自伐衛。【補曰】上冬伐，此秋至，歷四時之久，甚於伐楚之屬。不月者，此在不致之例，致之已足見危，不須月。惡事不致，此其致何也？據襄九年，時有穆姜之喪，會諸侯伐鄭不致。【補曰】注用《公羊》何休說，與襄九年本《傳》顯戾。當云據侵宋及伐邾取須句之屬皆不致。不致則無用見公之惡事之成也。【補曰】不致，則知其爲惡事矣，而云「不致無用見」者，此之

惡事，謂公與王人戰也。戰在伐後，不致則見伐不見戰。張自超所云「似王人來救，而諸侯之師已散，衛朔自入于衛」是也，故下有分惡，殺惡文。而先以此文見惡之成，乃是特變常例，轉存史文也。僖二十六年「至自伐齊」，《傳》云「危之」，此亦得兼有危義，而見惡之意為多，故言見惡也。董仲舒曰：「《春秋》視人所惑為立說，以大明之，若此類不言則不見，是之謂大明。」葉夢得譏此《傳》，非也。

螟。【補曰】自此後無書「螟」者。高閌曰：「螟食苗心，螽無所不食，螟之為災，較螽為輕。春秋之初，災之輕者亦書之，及其久也，輕者不勝書，書其重者耳。」

冬，齊人來歸衛寶。【補曰】何休曰：「寶者，玉物之凡名。」《說文》曰：「寶，珍也。」○【撰異曰】《左氏》作「衛俘」，誤。《左傳》亦曰「寶」。孔穎達曰：「案《說文》「俘」從人，采省聲。古文「俘」，不省。然則古字通用「寶」，或作「俘」，與「俘」相似，故誤作「俘」耳。」文烝案：《說文》「孚」从爪子，古文作「保」，从保。禾，古文「保」，保亦聲。以齊首之，分惡於齊也。使之如下齊而來我，然，惡戰則殺矣。若衛自歸寶於齊，過齊然後與我，齊首其事，則我與王人戰罪差減。【補曰】注全失之。首，

猶主也。下齊，齊為我下也。言惡，言惡戰，即上之惡事，《經》無戰文，故言戰以明之也。時齊率諸侯與王人戰，共敗王師，惡不可道。衛侯以為有功，出寶賂齊，齊又讓魯。齊所以讓魯者，《公羊》稱齊侯曰「此非寡人之力，魯侯之力也」。明魯尤多戰功，故讓魯也。衛賂齊而齊讓魯，是受賂者魯也。郕大鼎之賂，以「取」為文；濟西田之賂，以「齊取」為文。取者，受賂之辭，今不言取衛寶于齊，與取郕大鼎于宋一例。而以「齊人來歸」為文，則是以齊為主。但言齊讓賂，不言我受賂，而齊之惡戰彰，故曰「以齊首之，分惡於齊也」。「齊人來歸衛寶」與「齊侯來獻戎捷」同文，則是《經》之立文，又使若齊自為我下而來我，並不為讓賂來，而我之惡戰隱，故又曰「使之如下齊而來我然，惡戰則殺矣」。此《傳》之旨，若不以取鼎、獻捷兩文觀之，則不得其解。

七年春，夫人姜氏會齊侯于防。防，魯地。婦人不會，會非正也。【補曰】疏曰：「防是魯地，故重發《傳》。」

夏四月辛卯，昔，恒星不見。【補曰】各本此《經》下衍「夜中星隕如雨」六字，今依唐石經，十行本刪正。

○【撰異曰】昔，本或作「音」。《左氏》、《公羊》作「夜」。《公羊》一本無。恒星者，經星也。經，常也。謂常列宿。

【補曰】《公羊》曰：「列星也。」疏曰：「周四月，夏二月，常列宿者，南方七宿也。」孔穎達曰：「《月令》仲春之月，日在奎、昏弧中。」鄭云：「弧在輿鬼南，則於時南方之星盡當列見。」文烝案：四方二十八宿稱經星，故木、火、金、水、土五星稱緯星，合之爲九星也。又古書星辰連文者，皆以緯星爲星，經星爲辰。謂之辰者，以二十八舍日月所會也。《周禮·大宗伯》注疏有此說。日人至於星出謂之昔。

【補曰】此以「夕」訓「昔」也。《廣雅》曰：「昔，夜也。」王念孫《疏證》曰：「凡日入以後，日出以前，通謂之夜。」《左傳》、《列子》注並訓「昔」爲「夜」。《莊子音義》：「昔，夜也。」案：「昔」之言「夕」也，夕時亦謂之昔，故「夕」、「昔」古通用。《詩·樂酒》「今夕」，《楚辭》注引作「今昔」是也。《周禮·膳人》注：「膳之言夕也。」依《說文》「昔」、「腊」本一字。不見者，可以見也。【補曰】《大戴禮·夏小正傳》說「參則伏」曰「星無時而不見，我有不見之時」。《左傳》曰：「夜明也。」

夜中，星隕如雨。如，而也。星既隕而復雨。

鄭君曰：「衆星列宿，諸侯之象，不見者，是諸侯棄天子禮義法度也。」劉向曰：「隕者，象諸侯隕墜，失其所也。又中夜而隕者，象不終其性命，中道而落。」【補曰】《爾雅》曰：「隕，落也，墜也。」《夏小正傳》曰：「墜也。」注解「如雨」，非也。下論之引鄭君者，《駁五經異義》文，見《開元占經》也。

《漢書·五行志》、董仲舒、劉向以爲常星二十八宿者，人君之象也；衆星，萬民之類也。列宿不見，象諸侯微也；衆星隕墜，民失其所也。夜中者，爲中國也。不及地而復，象齊桓起而救存之也。鄉亡桓公，星遂至地，中國其良絕矣。劉向以爲夜中者，言不得終性命，中道敗也。或曰象其叛也，言當中道叛其上也。趙汭曰：「《公羊》稱「不脩《春秋》曰：雨星不及地尺而復」。此魯史舊文。《漢志》永始二年二月癸未，夜過中星隕如雨，長一二丈，繹繹未至地滅，至雞鳴止。不及地尺而復，即未至地滅也。古今星變，固有如此者。其所隕者，星之光魄，故雖多而不見在地之形。戴溪謂「積氣消散所致，蓋比他異尤重」。許翰所謂「王運終而霸統起矣」。○【撰異曰】隕，《公羊》作「實」。後同。其隕也如雨，是夜中與？星既隕而雨，必晦暝，安知夜中乎？【補曰】《春秋》之文，言「如」與言「而」異，「如雨」之「雨」與「不雨」之「雨」異。《左傳》言「與雨偕」，劉歆、

杜預讀「如」爲「而」，讀「雨」如今上聲字，范依之，皆非也。劉敞固言夜雨不足記矣，《傳》舉《經》下句以釋上句，而先設問辭。杜譌引《集義》得之。中者不須臾，故下言其幾，而發句如此。穀梁子、太史公文章之工，柳宗元有得焉，往往在發句處，更端處。《春秋》著以傳著，疑以傳疑。明實錄也。【補曰】包全《經》。中之幾也，而曰夜中，著焉爾。幾，微也。星既隕而雨，中微難知，而曰夜中，自以實著爾，非億度而知。【補曰】著焉爾，唐石經初刻作「實著焉爾」。注第二句當刪。何用見其中也？【補曰】謂史何所據。失變而錄其時，則夜中矣。失星變之始而錄其已隕之時，檢錄漏刻，以知夜中。【補曰】時，如《公羊》「至乎日若時」之「時」。一日夜有十二時，《史記·曆書》謂之十二節，《曲禮》曰「信時日」，孔穎達亦謂四時及十二時也。時者，期也。時加子曰夜中，亦曰夜半。依《素問》、《天官書》、《吳越春秋》及《左傳》昭五年杜預注，寅曰平旦，卯曰日出，辰曰食時，巳曰隅中，午曰日中，未曰日跌，申曰晡時，酉曰日入，戌曰黃昏，亥曰人定，子曰夜半，丑曰雞鳴。范意謂史檢漏刻而錄之。案周制有挈壺氏，以水火分日夜，見《周禮》及《毛詩》傳。《周

禮》注曰：「以水沃漏，夜則火視，刻數漏之箭，晝夜共百刻，冬夏之間有長短焉。」又說漢法曰：「大史立成法有四十八箭。」孔穎達曰：「於時春分之夜，夜當五十刻，二十五刻而夜半也。」其不曰恒星之隕何也？我知恒星之不見，而不知其隕也。【補曰】我者，我魯，又君子自我也。知，見也。隕者，見其爲星而已，莫明其爲何星。我見其隕而接於地者，則是雨說也。言我見從上來接於下，然後可言雨星。今唯見在下，故曰隕星。【補曰】此亦設問辭，注非也。隕與雨皆自上下下之稱，疑隕即是雨矣。何以言隕？又言如雨？文意與則是放命，則是大利皆同。著於上，見於下，謂之雨；著於下，不見於上，謂之隕；豈雨說哉？解《經》不得言雨星而言隕星也。【補曰】此解「如雨」也。在物言著，在人言見。《傳》互文錯言之。著上見下，謂上下一時並見，著下不見上，謂必至下乃見。疏引徐邈以著上爲雲著上，不可通也。隕非雨說，故言「如雨」。《公羊》曰：「如雨者何？如雨者非雨也。非雨則曷爲謂之如雨？不脩《春秋》曰：「雨星不及地尺而復。」君子脩之曰：「星實如雨。」觀乎《公羊》，則《傳》義益明矣。夫雨星不及地尺而復者，

舊史之紀實也，君子據其文改之曰星隕如雨，《春秋》之正名也。雨雪雨雹，時刻不絕。雨蚤上下皆合，舉首即見，衆目昭然。雨星則異，是故不直言雨，而謂之「隕如雨」也。

言雨則必先言雨而後言其物，言隕則其文各隨所施，星隕與隕霜異。蕭楚謂霜以著物，然後可知，故先言隕，後言霜。星麗於天，見隕則知之，故指言星隕也。星隕又與隕石異，《傳》解隕石云「隕而後石」。《左氏》說爲隕星。杜預謂隕石者，見在地之驗，不見始隕之星。星隕如雨，見星之隕而隊於四遠，不見在地之驗也。若然，則隕者主於下之辭也。先言星，後言隕，又有主於上之辭焉，其言如雨宜也。言星不言石，又有不及地之辭焉，不須更言不及地而復也。舊史之意，《經》悉該之，惟尺者約計之辭，非由實定，故置而不論。○《公羊》之「不脩《春秋》」，王充解爲《魯史記》是也。其解「如雨」，謂雨從地上而下，星亦從天貫而復，故曰「如」，則未是也。案：雨從地上而下，亦可通於著上見下之說，但讀「雨」爲上聲，殊非《傳》意。而以從地起者之復於地，明從天隕者之復於天，紆曲實甚矣。至啖助以爲奔流者衆，如雨之多，引《詩·雨無正》序語。案：隕與流異，如雨自足見多，若讀「雨」上聲而喻多，《詩》辭有之，非史筆也。《詩》、《書》、《禮》、《易》其文體辭例與《春

秋》各異，《詩》有韻，諸經傳古書亦往往有韻。《春秋》無韻，他書文，《春秋》質也。

秋，大水。高下有水災，曰大水。【補曰】

疏曰：「復發《傳》者，嫌大水無麥苗異於常，故重發之。」

無麥、苗。【補曰】《五行傳》曰：「治宮室，飾臺

榭，內淫亂，犯親戚，侮父兄，則稼穡不成。」麥苗同時也。麥與黍稷之苗同時死。【補曰】魯於周禮，周書當青

州、兗州之地，青州穀宜稻麥，兗州穀宜四種。四種者，黍、

稷、稻、麥也。黍、稷、稻皆稱苗。何休曰：「苗者，禾也。

生曰苗，秀曰禾。」何說是也。此言麥、苗，謂二穀，或二穀

以上苗，猶可復種。是年不收者惟麥，一穀不升謂之暵，不

謂之饑，故冬無饑文。凡諸水旱、螟、蟲之等，苟其害不至

無二穀，則但書水旱、螟、蟲而已。

冬，夫人姜氏會齊侯于穀，穀，齊地。婦人

不會，會非正也。【補曰】疏曰：「再發《傳》者，穀是齊

邑也。」文烝案：文姜三會，皆具發《傳》，明後洮陽穀下之

屬皆同義可知，故不復發也。文姜之孫齊，不言姜氏，既取

義於臣子大受命，會襁以下，皆言姜氏，但以非正非禮取義

者，前之辭嚴，後之辭婉也。《詩》曰：「人之無良，我以爲

兄。人之無良，我以為君。」言人則無善耳，我國人猶以為君之兄，猶以為國小君也。此夫子之語顏淵所謂親屬之言也。《春秋》因事因時而抑揚輕重其文，游、夏不能贊一辭，即文姜孫會諸文可見，而《穀梁》之合《經》亦見矣。○焦袁熹曰：「夫人饗齊侯、如齊師及諸會齊侯，先儒謂皆以國事出也。夫魯既不能討齊，齊復何憚於魯？而六七年間，二國之交日益親密，四鄰既從齊令，亦無一旅之師涉魯境者，皆夫人之為之也。夫人既歿，謚之曰文。婦人無武事，言文則美備，非有非常之才智，何以得此聲乎？」文烝案：金履祥已有此說，深合事情。世衰道微，邪說紛起，故魯桓、齊襄皆獲美謚，而桓妻別作謚焉。然猶為之肆大眚者，以其淫而害夫，公議不可違耳。

## 春秋莊公閔公經傳第三補注第六

穀梁 范氏集解 鍾文烝詳補

八年春王正月，師次于郎，以俟陳人、蔡人。時陳、蔡欲伐魯，故出師以待之。【補曰】注用《左氏》

賈逵注，賈用《穀梁》家說也。此次蓋公不在，故言師不言公，非諱也。陳、蔡稱人者，略之爲衆辭也。以者，內爲志之文，與桓二年同，書者，善之，別於他之有畏者也。次，隱，非畏自明，故不假加文別之。月者，爲下治兵日。次，止也。【補曰】重發《傳》者，此有俟文，嫌異也。俟，待也。【補曰】《爾雅》曰：「俟，待也。」明非畏。

甲午，治兵。【補曰】不地者，于郎也，承上「次」可知。《左傳》曰「治兵于廟」，非也。日者，時史善而志之。又日之，《經》仍之也。○【撰異曰】治，《公羊》作「祠」。鄭君《駁五經異義》曰：「《公羊》字誤。」案：謂聲之誤也。出

曰治兵，習戰也。【補曰】兵革將出，治其事。《爾雅》曰：「尚威武也。」孫炎曰：「幼賤在前，貴勇力。」入曰振旅，習戰也。振，整也。旅，衆也。【補曰】《爾雅》曰：「反尊卑也。」孫炎曰：「尊老在前，復常法。」治兵而陳、蔡不至矣。兵事以嚴終，以嚴整終事，故敵人不。【補曰】陳、蔡不至則治兵有效。又云兵事以嚴終者，言君子之取義如此也。兵將出而治兵，猶三年因田而大閱，亦國之常禮，史以此治兵陳、蔡不至，最有功效，故特志之，而《經》因以事嚴見義。《孫子》曰：「將者，智、信、仁、勇、嚴也。」劉晔謂之五德。故曰善陳者不戰，【補曰】善，猶好也。陳，謂軍陳行列。此之謂也。【補曰】此嚴以終事之謂。善爲國者不師，導之以德，齊之以禮。江熙曰：「鄰國望我，歡若親戚，何師之爲？」善師者不陳，師衆素嚴，不須耀軍列陳。江熙曰：「上兵伐謀，何乃至陳？」善陳者不戰，軍陳嚴整，敵望而畏之，莫敢戰。善戰者不死，投兵勝地，故無死者。江熙曰：「辟實攻虛則不死。」善死者不亡。民盡其命，無奔背散亡者



也。江熙曰：「見危授命，義存君親，雖沒猶存。」【補曰】江熙說，愚有取焉。《老子》曰：「死而不亡者壽。」《列子》曰：「由生而生，故雖終而不亡。」李軌《法言注》曰：「仁者之壽，死而不亡，名無窮也。」此即《左傳》叔孫穆子稱立德、立功、立言，雖久不廢，死而不朽也。夫生死者吉凶之極也。《釋名》曰：「吉，實也。凶，空也。」然則死而不亡者，以其空而猶實也。論聖賢之心，則有若無，實若虛；論鬼神之德，則無如有，虛如實，一而二，二而一也。尋老氏死而不亡之說，實合儒術，至言谷神不死，則取義玄遠，求之過深。由以道受命之說而過求之，謂之有物，謂之無明；由善死不亡之說而過求之，謂之不死，謂之無生；皆聖賢所弗論也。此五句承上廣言之，皆古書成文。《漢書·刑法志》稱：「故曰善師者不陳，善陳者不戰，善戰者不敗，善敗者不亡。舜脩百僚，咎繇作士，命以「蠻夷猾夏，寇賊姦軌」，而刑無所用，所謂善師不陳也。湯、武陳師誓衆，放禽桀、紂，所謂善陳不戰也。齊桓南服疆楚，北伐山戎，存亡繼絕，功爲伯首，所謂善戰不敗也。楚昭王國滅出亡，父老曰：「有君如是其賢也！」相與從之。或奔走赴秦，號哭請救，遂走吳師，昭王返國，所謂善敗不亡也。」疏引舊說曰：「善爲國者不師，謂古明王時，導德齊禮不起軍師，而四海

賓服，則黃帝、堯、舜是也。善師者不陳，若齊桓伐楚，不設行陳而服罪也。善陳者不戰，即此魯能嚴整終事而陳、蔡不至也。善戰者不死，若文王伐崇，因壘而崇自服也。善死者不亡，若伯舉之戰，吳雖入楚，父老致死還復楚國也。」文烝案：此皆各以意言，其解「亡」字，又並爲亡國也。鈔本、《北堂書鈔》引《逸周書·大武》曰：「武有七制：一曰政，二曰攻，三曰侵，四曰伐，五曰陳，六曰戰，七曰鬪。善政不攻，善攻不侵，善侵不伐，善伐不陳，善陳不戰，善戰不鬪，善鬪不敗。」《鹽鐵論》曰：「善克者不戰，善戰者不師，善師者不陳。」文各有異。《周書》「政」即「征」字。

#### 夏，師及齊師圍郕。郕降于齊師。【補

曰「降」義在三十年《傳》。○【撰異曰】兩「郕」字，《公羊》並作「成」，其《傳》曰：「成者，盛也。」其曰降于齊師何？不使齊師加威於郕也。郕，同姓之國，而與齊伐之，是用師之過也，故使若齊無武功而郕自降。【補曰】言不使齊師加威，明實齊師加威也。《左傳》稱：「郕降于齊師。仲慶父請伐齊師。公曰：「不可。我實不德，齊師何罪？」蓋齊不與魯共謀，獨自以威力降郕，魯爲齊弱，郕又同姓，不欲直言齊師降郕，故婉其文，使若郕自欲降于

齊，非齊以力降之也。不使齊師加威於郕，猶元年不使齊侯得與吾爲禮，四年不使小人加乎君子。《注》未盡其旨。《公羊》以爲諱滅同姓，變盛言成，又辟不言降吾師，非也。劉敞曰：「實共圍盛，改謂之成，實滅其國，改謂之降，實降於魯，又獨言齊。改白爲黑，曰己爲人，皆非聖人之文也。」文烝案：郕爲紀邑。降卽爲取。郕則國也。若已滅，不得但書降。

### 秋，師還。還者，事未畢也，【補曰】《爾雅》

曰：「還，復，返也。」二字訓同辭異，以事未畢、事畢別之。事畢者，據其至於國，其辭曰復，呂大圭云「反其故所之辭」是也。事未畢者，據其至而未至，其辭曰還，呂大圭云「自彼反之而未至國之辭」是也。襄十九年《傳》曰：「還者，事未畢之辭也。」加二字則意尤明矣。凡訓詁相同字，如還復、獲得、及暨、弗不、而乃、奔孫、刺殺之類，《春秋》別白其辭，無所假借，蓋訓詁之法，同類相通。制作之文，正名不苟，故鄭君以《論語》正名爲正文字，亦自有理也。又《論語》曰：「君子周而不比，小人比而不周。」王引之據《左傳》文十八年注、哀十六年注、《離騷注》：「周，密也，親也，合也。」又據《說文》、《大司馬注》、《吳語注》：「比，密也，親也，合也。」以爲「周比」同訓。而「周」以義，「比」以利，故辨

別之。王說卽朱子說，最爲明確。餘如和同驕泰之旨，聞達政事之義，聖有恒言，孰非《春秋》之教矣。遯也。郕已降而以未畢爲文者，蓋辟滅同姓之國，示不卒其事。【補曰】注既失「未畢」之義，言「滅」又誤也。遯者，退也，逃避也。齊襄強暴，魯畏之，不敢伐其師，故退避而去。《傳》言此不言復，言還爲至而未至之辭者，以其退避，不欲盡其辭，與晉士句略同也。《左傳》上圍郕實公自將，陳傅良以爲莊之會齊皆譏，故不言公。文烝案：齊侯或不在，而會讐伐親亦不可明言公，然則師卽是公，此言「師還」者，當依趙汭以爲公至自圍郕之變文也。文十三年，公及晉侯盟，還自晉。公亦言還，故言還不嫌非公也。《傳》不說諱公言師者，以師之還《春秋》無一書，今特書之，明公在矣。惟以還義未明，故發《傳》以明之。

### 冬十有一月癸未，齊無知弑其君諸兒。

【補曰】下年《傳》曰公孫無知。大夫弑其君，以國氏者，嫌也，弑而代之也。【補曰】重發《傳》者，諸兒罪重，嫌義異，故重發以明，與祝吁同。

### 九年春，齊人殺無知。無知之挈，失嫌

也。稱人以殺大夫，殺有罪也。【補曰】疏曰：

「重發之者，月與不月，地與不地之異，故重發之。」劉敞疑無知非大夫，不得解以大夫例。王念孫曰：「『大夫』二字衍文，涉上下文而衍也。僖七年疏引此無『大夫』二字。」呂大圭曰：「踰年而不以成君書之，正其爲賊也。正其爲賊者，明以賊討之也，不正其爲賊者，明不以賊討之也。」

公及齊大夫盟于暨。暨，魯地。○【撰異曰】

暨，《左氏》作「莒」。陸淳《纂例》唯云《公羊》作「暨」。公

不及大夫。《春秋》之義，內大夫可以會諸侯，公不可以

盟外大夫，所以明尊卑定內外也。今齊國無君，要當有任其盟者，故不得不以權通。【補曰】此及下二句文體與昭十

三年《傳》「取國者稱國以弑」三句同也。言今可以及者，以齊無君之故，明所以不沒公，又不稱齊人也。大夫不

名，無君也。《禮》君前臣名，齊無君，故大夫不名。【補

曰】言齊大夫，既以無君不稱人，則當以氏名見，今不名者，亦以齊無君故也。無君不當稱名，又不可稱字，故直書「大夫」。而《公羊》以爲諱與大夫盟，使若衆然。劉敞曰：「諱則沒公足矣。」文烝以爲人者衆辭，使若衆，當稱人矣。盟

納子糾也。不日，其盟渝也。變盟立小白。【補

曰】不日又不月者，蓋以齊無君異之。當齊無君，制在公矣。【補曰】制，制義、制命之「制」。當可納而

不納，【補曰】賈逵、服虔以爲齊大夫來迎子糾，公不亟遣而盟以要之，齊人歸迎小白，此《穀梁》家相承說也。故

惡內也。【補曰】惡內者，即謂不日也。魯方積爲齊弱，

幸而讐人斃，國嗣奔，大夫來迎，制皆在我，及是時而急納焉，庶幾猶可雪恥，計不出此而盟以要齊，事機既失，恥辱彌甚，故不日以惡之也。上言「不日其盟渝」，此又言「惡內」者，觀其不日，則知齊之渝盟；觀其渝盟，則知此盟惡內。在齊固無信，而所惡在內也。不致者，會大夫也。

夏，公伐齊，納糾。不言子糾而直云糾者，盟繫

在於魯，故挈之也。《春秋》於內公子爲大夫者，乃記其奔，子糾不爲大夫，故不書其奔。鄭忽既受命嗣位，是以書其出，然則重非嫡嗣，官非大夫，皆事例所略，故許叔、蔡季、小白、重耳通亦不書出。【補曰】「納」上言「伐」者，《公羊》以爲伐而言納者，猶不能納也。案下有「小白入」，則公不能納糾自明。晉納捷菑言「弗克納」，又無伐事，《公羊》非

也。此實是伐，故言伐。《傳》曰：帥師而後納者，有伐也，謂高偃、趙鞅之屬，皆以帥師當伐文，君將則不得言帥師，故此言伐也。《公羊》以不稱公子糾爲君前臣名，范以不稱子糾爲挈辭，言挈辭是也。孔穎達文十四年《正義》謂不言齊糾者，蒙伐齊文，與挈辭說異，未可用也。不言納糾于齊者，孔氏以爲此有伐齊之文，故不須言于齊。此說是也。凡納皆爲篡，此下有「入」文，則不嫌是篡。何休曰：「不月者，非納篡辭。」孔廣森以爲納不皆爲篡，納例皆時。孔說亦近是。范言許叔、蔡季之等，許叔蓋本無出事，此等或書或不書，皆史例之舊也。以臧孫紇、公子愁觀之，則內奔有非卿而書者矣。外奔書弟書公子，亦不必皆卿也。又有宋萬爲卑者。○【撰異曰】《左氏》舊有二本，或作「納糾」，或作「納子糾」。唐定本始以有「子」字爲正。徐彥、陸德明所見《左氏》亦有「子」字。徐彥當是晉宋以後唐以前人，或疑爲北齊人也。沈文何據《傳》「鮑叔來言，子糾親也」，謂齊人稱子糾非也。此《傳》便文耳，猶述石碣曰「陳桓公方有寵於王」，《史記·仲尼弟子傳》子羔曰「出公去矣」。當可納而不納，齊變而後伐，故乾時之戰不諱敗，惡內也。何休曰：「三年溺會齊師伐衛，故貶而名之；四年

公及齊人狩于郕，故卑之曰人。今親納讐子，反惡其晚，恩義相違，莫此之甚。」鄭君釋之曰：「於讐不復則怨不釋，而魯釋怨，屢會仇讐，一貶其臣，一卑其君，亦足以責魯臣子。」其餘則同，不復讖也。至於伐齊納糾，讖當可納而不納爾，此自《正義》不相反也。甯謂讐者無時，而可與通，縱納之遲晚，又不能全保讐子，何足以惡內乎？然則乾時之戰不諱敗，齊人取子糾殺之，皆不迂其文，正書其事，內之大惡，不待貶絕，居然顯矣。二十四年公如齊親迎，亦其類也。惡內之言，《傳》或失之。【補曰】此范之誤，《傳》釋《經》不誤也。齊變者，謂是時齊人已歸迎小白，即上《傳》渝盟是也。當可納而不納，以致齊變，變而後伐，取敗之道，故下文直書敗績，不復爲諱，又所以惡內也。上惡內謂盟不書日，微見惡意，此惡內謂戰不諱敗，明著惡文，皆惡其當可納而不納，其義一也。當可納而不納，與復讐義不相涉，所以然者，魯所讐，齊襄也，襄已殺死，何讐之有？子糾、小白，據《左傳》、《管子》、《史記》，本僖之子襄之弟，即以爲襄子，而讐子亦不爲讐，罰不及嗣，怒不可遷。是時而猶言復讐，此《公羊》復百世之讐之妄論，非君子意也。鄭說未爲詳備，而委曲推究，大概得之。范氏讐無時而可通之言，猶襲用《公羊》語，宜多誤矣。若然，魯與齊已不可

以讐言，而後文如齊親迎，夫人姜氏人，又爲不可者。夫人所以崇宗廟，妃匹之愛，謂之親膚，故讐人之女子子姊妹皆不可以爲魯夫人，故曰夫言豈一端而已，夫各有所當也。程子曰：「《春秋》窮理之要也。」張子曰：「非理明義精，殆未可學。」今於《穀梁》此年兩《傳》，取黃澤之意而暢之，庶不謬於義理。

### 齊小白入于齊。

【補曰】不月者，疏以爲與公伐齊同時，既伐例不月，故小白亦不月。文烝案：《傳》云先人，人不後於伐也，故以伐爲主。何休曰：「移惡于魯。」大夫出奔反，以好曰歸，成十四年，衛孫林父自晉歸于衛是也。以惡曰入。【補曰】以惡即內，弗受之例。齊

公孫無知弑襄公，公子糾、公子小白不能存，

出亡，子糾奔魯，小白奔莒。【補曰】本《左傳》。齊人

殺無知而迎公子糾於魯，【補曰】糾與小白皆僖公

庶子，而糾爲長。襄無嗣子，立庶弟宜立長者，故齊人迎

糾。公子小白不讓公子糾，先入，【補曰】齊變而

後魯納糾，時小白已入。《左傳》亦云「自莒先人也」。孔穎

達申杜曰：「伐齊納糾，始行即書。小白入齊，得告乃書，

故至齊之時出小白之後也。」又殺之于魯，故曰「齊小白入于齊」，惡之也。【補曰】僖十七年《傳》曰：「以不正入虛國，故稱嫌焉爾。」

### 秋七月丁酉，葬齊襄公。

諸公子爭立，國亂，故危之。【補曰】魯師雖在齊，猶有人會其葬，故史書之。不以襄之失德削史文者，賊已討，以討賊爲重。

### 八月庚申，及齊師戰于乾時，我師敗績。

不言及者，主名內之卑者。乾時，齊地。【補曰】杜預曰：「時水在樂安界，岐流，旱則竭涸，故曰乾時。」范言內卑者，非也。案《左氏》、《公羊》戰者，公也。此無諱文，不言公者，承上伐齊可知。孫覺、趙鵬飛、程端學、趙汴得之。劉知幾謂《尚書》務於寡事，《春秋》貴於省文。趙匡謂《春秋》省辭以從簡。孫氏亦謂《春秋》之法，文從簡易。文烝以爲《聘禮記》言辭多則史，《論語》言文勝質則史，君子脩《春秋》變乎史矣。客言及者，由內及之。不言言師敗績者，文承齊師，故言我以相別，與我人邛同，皆屬文之宜也。不致者，此著惡內文，雖納正，亦惡事。

### 九月，齊人取子糾殺之。

言子糾者，明其貴宜爲君。【補曰】此本《公羊》也。何休曰：「以君薨稱子某

言之者，著其宜爲君。」文烝案：齊稱人者，略之從衆辭例。

不地，亦略之。不日者，實未成君。外不言取，【補曰】

不以外取於內也。宣元年、昭二十五年《傳》皆曰「內不言

取」，其意一也。不言取者，《經》例因史例也。言取，病

內也。取，易辭也，【補曰】凡取皆易辭，《傳》因以明

通例。《左氏》、《公羊》例皆同。猶曰取其子糾而殺

之云爾。猶言自齊之子糾，今取而殺之，言魯不能救護

也。【補曰】是彼之子糾直從內取而殺之，若取物然，此所

以爲病內。《公羊》謂「脅我使我殺之」，《左傳》以爲「鮑叔

帥師來言」是也。此非韓穿來言之比，故不得書矣。劉敞

曰：「內私人之國而奪焉，外敗人之師而脅焉，是取其子糾

戮之而已矣。」葉夢得曰：「此子路、子貢所謂桓公殺公子

糾者歟？」凡義所得殺者，殺在上，衛人殺祝吁、齊人殺無

知是也。義所不得殺者，殺在下，齊取子糾殺之，楚誘蔡侯

般殺之，蔡以沈子嘉歸殺之是也。十室之邑，可以逃

難，百室之邑，可以隱死，【補曰】藏隱死罪。或云

猶內、外《傳》言逃死。以千乘之魯而不能存子

糾，【補曰】言大國不如小邑。以公爲病矣。【補曰】

七句又申病內意。

冬，浚洙。【補曰】杜預《釋例》曰：「洙水出魯國

東北，西南入沭水，下合泗。」浚洙者，深洙也。【補

曰】《公羊》訓同。《毛詩傳》：「浚，深也。」《爾雅》作「濬」，

《說文》作「濬」。濬，謂鑿深通之爲阻固。著力不足

也。畏齊難。【補曰】注本《公羊》也。何休曰：「洙在魯

北，齊所由來。」

十年春王正月，公敗齊師于長勺。長勺，

魯地。不日，疑戰也。疑戰者，言不剋日而戰，以詐相

襲。【補曰】疑戰，猶《公羊》言「詐戰」。疑，詐同意。何休

曰：「詐，卒也。齊人語蓋誤。」疑戰而曰敗，勝內

也。勝內，謂勝在內。【補曰】言敗則亦戰也，詐戰非戰，

而謂之敗者，勝在內，舉其勝者言之，非是成敗之也。凡敗

師不日者，皆非成敗之，雖發例於內，其餘亦無所不通。不

致者，凡敗某師之屬皆不致，克敵而反，無危故也。

二月，公侵宋。侵時，此其月何也？【補

曰】舊史侵皆月，君子略之。乃深其怨於齊，又退

侵宋，以衆其敵，惡之，故謹而月之。【補曰】惡之而謹月，即往月危往之例。疏曰：「舊說以爲公與宿盟，宋方病宿，故公侵之。若此則何惡也？公與宿盟，《經》無其事，爲宿侵宋，《傳》無其文，是舊說妄。」文烝案：不致者，惡事也。

三月，宋人遷宿。【補曰】月者，例也。遷者，遷之者皆同例，惟許爲變例。疏曰：「許四遷不月者，以其小，略之如邑也。遷紀不月者，文承月下，蒙之可知也。」案疏論許遷是也，論遷紀非也。紀不入諸遷例，前辨之。遷，亡辭也。爲人所遷，則無復國家，故曰亡辭。閔二年齊人遷陽亦是也。【補曰】《公羊》引子沈子曰：「蓋因而臣之。」杜預以爲強遷之而取其地也。案：《書·堯典》「竄三苗于三危」亦作「繫三苗」。《皋陶謨》謂「何遷乎有苗」，《書序》「成王東伐淮夷，遂踐奄」，「將遷其君于蒲姑」。周公告召公，作《將蒲姑》。葉夢得引此舜與成王二遷，以爲遷者但徙其地。孔《傳》言滅奄而徙之者，誤也。宋人遷宿，齊人遷陽亦存其君長而徙之，但諸侯所不得爲，故見譏焉。又謂《周禮·大司馬》九伐之法有滅無遷，蓋伐得之而後遷，非以師直遷，尤見先王之慎乎遷人，非如有苗與奄亦不

爲也。其不地，宿不復見也。國亡不復見《經》。不言滅者，言滅則殺其君，滅其宗廟社稷，就而有之，不遷其民。【補曰】葉夢得曰：「以遷人爲罪，義不在地也。」遷者，猶未失其國家以往者也。謂自遷者，僖元年邢遷于夷儀，成十五年許遷于葉之類是也。彼二《傳》曰「遷者猶得其國家以往者也」，此《傳》云「遷者猶未失其國家以往」，互文也。【補曰】未失國家，故復見，復見，故地。「遷者」較「遷之者」爲愈也，《傳》總明遷有二例。疏曰：「不於元年遷紀發《傳》者，彼以紀侯賢，《經》變文以示義，非正例，故不發之。遷陽不發，從此省文也。遷有二種，《傳》文三起例：此是亡辭之始，邢是復國之初，許獨自不月，故三發之也。」范《略例》云：「凡遷有十，亡遷三。遷紀、遷宿、遷陽是也。好遷七，邢遷夷儀、衛遷帝丘、蔡遷州來、許遷葉、夷、白羽、容城是也。」文烝案：范《例》及《疏》并言遷紀，非也。諸遷外如衛遷于楚丘，以不與專封不書，杞遷于緣陵，又遷于洧于，以其皆言城，略而不書，邾遷于繹、晉遷于新田、楚遷于都，事皆無危，史本不書。

夏六月，齊師、宋師次于郎。【補曰】月者，爲下敗宋。次，止也。畏我也。【補曰】重發《傳》



者，嫌外內異也。

公敗宋師于乘丘。乘丘，魯地。不日，疑

戰也。【補曰】孔廣森曰：「《左傳》：『公子偃曰：『宋師

不整，可敗也。』自雩門竊出，蒙皋比而先犯之。公從之。」

此詐戰不日之證。」疑戰而曰敗，勝內也。【補曰】疑

戰勝內。重發《傳》者，二師次而敗一師，嫌有異也。

秋九月，荆敗蔡師于莘，以蔡侯獻武歸。

莘，蔡地。【補曰】獻武，蔡哀侯也。不書日，與雞甫異者，

疑戰也。○【撰異曰】武，本亦作「舞」。《左氏》、《公羊》作

「舞」。案《周禮》「射有興武」，馬融云：「與「舞」同。」荆

者，楚也。【補曰】荆以州言，楚以國言。《詩·商頌》謂

之荆楚。何爲謂之荆？狄之也。【補曰】狄之，故

不欲言其國名，略以州舉，此《傳》與後十四年《傳》互相備。

何爲狄之？聖人立，必後至，天子弱，必先

叛，故曰荆，狄之也。【補曰】《公羊》僖四年《傳》亦

言「楚有王者則後服，無王者則先叛」。《漢書》賈捐之謂其

「動爲國家難，自古而患之」。今考殷之中興，武丁伐荆

楚，周之中興，宣王征荆蠻，並是後至先叛之事，以二代同

有此患，故言必也。陳奐曰：「楚當夷、厲之際，其國漸大，

侵犯中國，故宣王中興，既命方叔南征，又徙封申伯於謝邑

以禦南方，其事皆在初年。至宣王之末，當楚若敖之初，

《左傳》稱若敖啟辟山林。其喪南國之師，已載見於《國

語》。幽王荒廢，荆叛不至，漸漸之石，是以爲刺。平王東

遷，楚患尤甚，申、甫與許，並勞屯戍。魯桓之世，楚已稱

王，漢陽諸姬，蠶食殆盡矣。」○李光地曰：「學者謂夫子周

游諸侯之邦，采其國史而作《春秋》，誤也。如果夫子參采

《晉乘》、《楚檮杌》而脩《春秋》，楚文以上，晉獻以前，翦并

諸姬，滅翼作晉，其事甚章，夫子何用隱之而沒其本乎？

荆於是始書，始通也。秦、晉以暨晚出之吳、越，凡其入

《經》之先後皆然也。推此例，則有赴告而後有書，舊史有

書而後《春秋》有筆，不以他史益國史。故事有沿故而遺，

其以聞見覈所因；故事又有革舊而審且信也。」文彙案：

《左傳》例曰：「凡諸侯有命告則書，不然則否。師出臧否

亦如之。雖及滅國，滅不告敗，勝不告克，不書於策。」又

曰：「凡崩薨不赴則不書，旣福不告亦不書。」此自是史氏

相承確鑿有據之言。杜預以爲周公之垂法，史書之舊章，

蓋近之矣。《穀梁》雖無明文，而近不失崩一條正周有赴告

之證，即《公羊》亦云「卒赴而葬不告，觀於崩卒」，則他事亦



可推也。啖助乃謂《公羊》、《穀梁》不知有不告則不書之義，《左氏》舊解皆言從告，二者之說，俱不得中。此其所見卓絕，以論《左氏》則可，以論《公羊》、《穀梁》則未可。學者治《穀梁》，當以李氏此條及僖三十二年徐邈注爲定。蔡

侯何以名也？據僖十五年秦獲晉侯不名。絕之

也。何爲絕之？獲也。【補曰】《公羊》與此同。

何休曰：「獲，得也。戰而爲敵所得。」文烝案：戰既無勇，敗又不死，未能奔亡，乃見俘獲，可絕之道。何氏又曰：

「獻舞不言獲，故名以起之。」中國不言敗，此其言敗

何也？據宣十二年，晉荀林父帥師及楚子戰于郟，晉師

敗績，不言敗晉師。【補曰】《經》例：夷狄敗中國，言敗復

言戰，不直言敗，與中國相敗者同文，猶外敗內之直言戰也。中國不言敗，蔡侯其見獲乎？【補曰】若不

直言敗而言戰，則當先言蔡侯及荆戰于莘，而後言蔡師敗績。蔡侯既能戰，何以見獲乎？夫蔡侯所與戰者，夷狄

也，非晉與秦比也。蔡侯，君也，非齊國書比也。言敗雖見衆力之盡，言戰實彰君職之虧，是其恥彌深，於文不可也。

其言敗何也？釋蔡侯之獲也。【補曰】釋，解

也。解釋之者，爲中國殺恥。上二句反言，此正言。以歸，猶愈乎執也。爲中國諱見執，故言「以歸」。【補曰】重發《傳》者，獲諸侯與王臣異也，執即獲也。

冬十月，齊師滅譚。譚子奔莒。桓十一

年，鄭忽出奔衛，《傳》曰「其名，失國也」。十六年，衛侯朔

出奔齊，《傳》曰「朔之名，惡也」。然則出奔書名有二義，譚

子國滅不名，蓋無罪也。凡書奔者，責不死社稷。不言出

者，國滅無所出也。他皆放此。【補曰】《爾雅》曰：「滅，盡

也。」又曰：「絕也。」何休曰：「取其國曰滅。」注解不言出，

杜預用《公羊》文也。葉夢得曰：「《孟子》言周公相武王，

誅紂伐奄，滅國五十，而天下大悅。蓋外內亂，鳥獸行，則

滅之，先王之政也。必武王、周公而後可滅人，非武王、周

公而滅人之國，交相滅之道也。」鄭玉曰：「三王之興，行一

不義，殺一不辜，得天下不爲也。齊桓殺糾得國，殺一不辜

矣。滅譚立威，行一不義矣。」月者，何休以爲惡不死位。

文烝案：月自爲滅，兼施於奔，說見昭三十年。滅不日例

在後十三年《傳》，舊史滅皆具月日。○【撰異曰】陸淳《纂

例》曰：「《公羊》作「十有一月」。案：今《公羊》亦作「十

月」。譚，《說文·邑部》作「鄆」。

十有一年春王正月。

夏五月戊寅，公敗宋師于鄆。鄆，魯地。內

事不言戰，舉其大者。【補曰】重發《傳》者，敗昔前

有伐宋文，嫌此與異也。其日，成敗之也。結日列

陳，不以詐相襲，得敗師之道，故曰成也。【補曰】伯禽之誓

曰「甲戌，我惟征徐戎」，是古者戰必結日。結日者得正，故

日之，以成其敗之之事，《公羊》謂之「偏戰者」也。此爲內

言敗師者發例，亦通於外，惟殺爲變例。宋萬之獲也。

【補曰】獲宋萬不書者，卑者不志，又內不言獲。《左傳》在乘丘之役。

秋，宋大水。外災不書，此何以書？【補

曰】不書者，《經》例因史例也。王者之後也。【補曰】

魯史爲殷之後記災，而《經》仍之也。孔子亦殷人，則襄九

年《傳》云「故宋」是也。於彼論之。高下有水，災，曰

大水。【補曰】疏曰：「重發《傳》者，嫌外災，與內異也。」

冬，王姬歸于齊。其志，過我也。【補曰】

此猶外相如以過我書。《公羊》同。何休曰：「明當有送迎

之禮。《左傳》謂「齊侯來逆共姬」，非也。

十有二年春王三月，紀叔姬歸于鄆。鄆，

紀邑也。紀季所用，入于齊者。紀國既滅，故歸鄆。【補

曰】何休曰：「月者，恩錄之。」國而曰歸，此邑也，其

曰歸何也？吾女也。失國，喜得其所，故言

歸焉爾。江熙曰：「四年齊滅紀，不言滅而言大去者，義

有所見爾，則國滅也。叔姬來歸不書，非歸寧，且非大歸

也。叔姬守節，積有年矣。紀季雖以鄆入于齊，不敢懷貳，

然襄公豺狼，未可闇信。桓公既立，德行方宣於天下，是以

叔姬歸于鄆，魯喜其女得申其志。【補曰】《傳》曰「歸」者，

歸其所也。紀國既滅，而鄆爲齊附庸，猶立五廟，是得其

所。家鉉翁曰：「夫死無子而終於父母家者，非正也。終

於夫家，正也。」文烝案：喜而言歸者，《經》順魯而喜之也。

言歸不嫌若嫁者，上繫紀，前有以鄆文也。注「來歸」三句

本杜預。

夏四月。

秋八月甲午，宋萬弑其君捷，捷，宋閔公。

○【撰異曰】捷，《公羊》作「接」。徐彥《公羊疏》曰：「正本皆作「接」字，故賈氏云《公羊》、《穀梁》曰「接」是也。」案：

今《穀梁》不作「接」。《爾雅》曰：「接，捷也。」二字通用。宋萬，宋之卑者也。【補曰】南宮萬非命大夫。卑者以國氏。【補曰】此發通例，明同於隱元年稱人之例，皆爲卑者也。不目言者稱人，不可不目言者直以國氏，其實一也。前發稱人之例，與內之直書其事者並言，而曹、莒諸小國無大夫者，雖大夫亦稱人，足知其亦是卑之，即楚之先，亦足兼見也。此發以國氏之例，乃與內之不氏相當，而曹、莒諸小國，雖大夫亦以國氏，知亦卑之，即楚及吳皆足兼見也。惟公子公孫弒君篡國其以國氏則爲嫌文，不入此例。

及其大夫仇牧。以尊及卑也。仇牧閑

也。仇牧扞衛其君，故見殺也。桓二年《傳》曰：「臣既死君，不忍稱其名。」今仇牧書名，則知宋君先弒。【補曰】仇牧所以爲閑者，《公羊》所謂「不畏彊禦」也。疏曰：「復發《傳》者，孔父先君死，發《傳》以明閑，此則後君死，故又發《傳》。」文烝案：孔父爲司馬，仇牧不知何官，要以從晉荀息之例，則不從四殺大夫不稱名姓之例。

冬十月，宋萬出奔陳。宋久不討賊，致令得奔，故謹而月之。【補曰】疏曰：「無知既經三月，齊人得殺

之，故書時。」文烝案：《左氏》載續經三年事，外大夫奔者八，而哀十四年六月，宋向魋自曹出奔衛，宋向巢來奔，十五年夏五月，齊高無平出奔北燕，十六年二月，衛子還成出奔宋。四者皆月，則知舊史外大夫奔多以月爲例，君子悉改從時例，而閒以仍舊文存月者爲變例也。據《左傳》，萬亦卒見討，不書殺萬者，或史本無之，或《經》欲別於失嫌之文。既不書殺，故亦不書葬，或者葬在殺萬前。雖書殺萬，亦不追書葬也。

十有三年春，齊人、宋人、陳人、蔡人、邾人會于北杏。北杏，齊地。○【撰異曰】齊人，《左氏》、

《公羊》作「齊侯」。是齊侯、宋公也。【補曰】齊桓初行伯事，足明親來。宋亦大國，禦說新立，明亦身在會。陳、蔡、邾君，蓋亦親至。《傳》不言者，略之。《左傳》曰：「會于北杏，以平宋亂。」孔穎達以爲新君位未定，齊爲會以安定之。孔說是也。其曰人何也？始疑之。【補曰】疑齊也。疑者，謂《春秋》之文也。下《傳》曰「信齊侯也」，二十七年《傳》曰「信之也」，疑之、信之，皆謂《春秋》之文。此即十六年《傳》所謂外疑之。何疑焉？桓非

受命之伯也，【補曰】非受王命爲侯伯也。伯者，長也。

蓋即古所謂二伯，其在內曰王官伯，在外則曰侯伯矣。《戰國策》先生王升曰：「先君桓公，九合諸侯，一匡天下，天子授籍，立爲大伯。」立爲大伯者，謂二十七年賜齊侯命，既曰大伯，明是以二伯準之，即知僖二十八年策命晉侯爲侯伯亦不異也。讀伯長言之曰霸，《白虎通》曰：「霸者，伯也。行方伯之職。」其釋「霸」是也，其曰「方伯」蓋非也。案，《王制》八州八伯謂之方伯，此《曲禮》所謂牧，《左傳》所謂侯牧，《周禮》「八命作牧」是也。又有二伯，分天下爲左右，此《曲禮》、《左傳》所謂伯，《左傳》又稱侯伯、王官伯，《周禮》「九命作伯」是也。《公羊》每言上無天子，下無方伯，似以方伯爲侯伯。《詩·韓奕》「因以其伯」，《毛傳》謂韓侯受命爲侯伯，又似以侯伯爲方伯。《楚辭·天問》言「伯昌號衰，秉鞭作牧」，亦似以牧爲二伯之伯，名稱通借，所未審矣。《詩·旄丘》序云「責衛伯」，其下文明言「方伯」，而鄭箋乃謂周之制使伯佐牧，以爲方伯者州牧也。牧之下又有州伯二人佐之，則衛宣公爲之也。《下泉》有郇伯，序所謂「思明王賢伯」，故《傳》謂二伯，而箋亦爲州伯。如鄭所云，更滋殺亂。將以事授之者也。言諸侯將權時推齊侯使行

伯事。【補曰】注非也。此謂《春秋》將以伯事授桓也，此年

將以伯事授之，二十七年遂以諸侯授之。此言授伯事，彼言授諸侯，其意一也。齊桓、晉文，《春秋》所重，故《繁露》言曾子、子石盛美齊侯安諸侯尊天子，而孟子亦曰其事，則齊桓、晉文是《春秋》之志也。楊子《法言》曰：「聖人之法，未嘗不關盛衰焉。堯有天下，舉大綱，命舜、禹、夏、殷，周屬其子。唐虞象刑，惟明夏后肉辟三千。堯親九族，協和萬國。湯、武桓桓，征伐四克。禮樂征伐，自天子所出。春秋之時，齊、晉實予，不膠者卓矣。」崔寔《政論》曰：「孔子作《春秋》，褒齊桓，懿晉文，歎管仲之功，豈不美文、武之道哉？誠達權救敝之理。」楊、崔所論，最合《經》旨，足與曾子、子石、孟子之語相爲發明者也。孟子他日又言「以力假仁者霸，五霸假之」。五霸者，三王之罪人，謂之小補，此則《論語》小管仲之意，亦即僖二年《傳》「仁不勝道」之意，乃義理之極至，述作之指歸，而不害其爲與桓、文也。蘇洵作《春秋論》，謂夫子託周公之國以假天子之權，蓋曰有周公之心而後可行桓、文之事，斯言盡之矣。若夫孟子言仲尼之徒，無道桓、文之事。荀卿、董仲舒亦言仲尼之門，五尺之豎子言羞稱五伯。孟子又言不爲管仲，言以齊王猶反手，言王不待大，文王以百里。與夫司馬遷《列傳》、劉向

《新序》言管仲能霸不能王，故孔子小之。凡此，亞聖之權辭，後儒之推說也。夫桓、文之事，備載於《經》，《論語》稱之，不必無道而羞稱也。管仲尊周室，豈宜以齊王？夫子小其德，非以霸小之。至孟子，則其時有異，故夫子爲東周，謂行周於魯，孟子王齊，梁則謂代周而王，而論管仲亦異也。《大戴禮》、《孔子三朝記》言周昌霸諸侯以佐紂，以文王爲西伯，故謂之霸。猶共工氏之霸九州，但其繼世遂王天下，而德又與五霸異。以位則霸，以德則王，猶後儒論漢與唐以位則王，以德則霸，此非王霸正解也。文烝昔年十四時，先君子誨以《孟子》各條之義，謹述遺意，因而詳之，俾衆說共貫焉。○摠之，謂《春秋》尊王而亦與霸可也，謂《春秋》貴王賤霸亦可也。尊王而亦與霸者，以位言之王霸也，故孫復、李觀、司馬光既以霸爲伯，則謂王霸無二道也。貴王賤霸者，以德言之王霸也，故孟子、荀卿、董仲舒皆以爲霸劣於王。而漢孝、宣言漢家本以霸王道雜之也，宣帝習《穀梁》家言，可與《傳》相證矣。曰可矣乎？

未乎？邵曰：「疑齊桓雖非受命之伯，諸侯推之，便可以爲伯乎未也。」【補曰】曰者，目《經》意也。此注較下十六年注爲勝。彼注解此文謂諸侯之意，此注謂《春秋》之文，

此注是也。《春秋》於此文以爲可以事授之乎？未可以事授之乎？是之謂疑。舉人，衆之辭也。稱人，言非王命，衆授之以事。【補曰】注言「衆授」，非也，其首句亦不了。上言「稱人」爲疑，又釋「疑」意。而稱人所以得爲疑者，其理未顯，故復言稱人者衆辭。齊侯從衆辭則隱其爲伯之迹，宋、陳、蔡、邾之君從衆辭則不爲從伯之文，故得爲疑也。《左氏》、《公羊》之《經》皆言齊侯，一字之譌，而精義泯矣。

夏六月，齊人滅遂。遂，國也。其不日，微國也。【補曰】發例以包譚也。《國語》曰：「軍譚，遂而不有。」葉夢得以爲妄，李廉以爲誇大桓公之辭。凡國滅不言其君者，《公羊》曰：「國滅君死之，王也。」何休謂舉滅國爲重。

### 秋七月。

冬，公會齊侯盟于柯。柯，齊地。曹劌之盟也，信齊侯也。曹劌之盟，《經》、《傳》無文，蓋有信者也。《公羊傳》曰：「要盟可犯而桓公不欺，曹子可讐而桓公不怨，桓公之信著於天下，自柯之盟始。」【補曰】范意以《公羊》要劫之說爲可據，而非爲請所侵汶陽田要劫也。

案：《荀子》稱桓公劫于魯莊，此要劫之證。《戰國策》屢言曹沫劫桓公，而魯連、燕太子丹皆言反地，此又因請田要劫之證。《公羊》蓋得之。「劇」或作「沫」者，王當云：「聲之誤。」桓盟，雖內與不日，信也。公盟例日，外諸侯盟例不日。桓大信遠著，故雖公與盟，猶不日。【補曰】此發桓盟之例，以申上句意，與《公羊》同。謹日所以明信，大信則不假謹之。二幽、洛姑、貫、首戴、寧母、洮、牡丘八盟皆書月，此及召陵但書時者，此有要劫之事。召陵，楚來受盟，故略而異之，要同以不日為義。不致者，離會也。又桓會皆不致，明安之，例在後二十七年傳。○《五經異義》、《公羊》說「復百世之讐」，古《周禮》說「復讐之義不過五世」。許慎謹案：魯桓公為齊襄公所殺，其子莊公與齊桓公會，《春秋》不讐。又定公是魯桓公九世孫，孔子相定公，與齊會于夾谷，是不復百世之讐也。從《周禮》說。文烝案：《公羊》分別國、家，以為國可家不可，故許氏但就國君之事析之。《周禮》說與國君之事亦不合。

### 十有四年春，齊人、陳人、曹人伐宋。【補

曰】程子曰：「將卑師少曰某人。齊自管仲為政，莊十一年

而後未嘗興大衆也，其賦於諸侯亦寡矣。終管仲之身四十年，息養天下厚矣。惟救邢稱師，譏其次也。至於秦、晉，使之不競而已，不强致也，是以其功卑而易成。」胡安國曰：「蓋齊以制用兵，而賦於民薄矣。」李廉據《國語》、《管子》書，管仲制齊萬人為軍，凡三軍，有士三萬人，以為比之周制，誠為簡便，故曰節制之師。此三說得之。文烝以為兵數既少，其用之又恒少耳。自陽處父以前，師少稱人，雖尊卿為將亦不別。

### 夏，單伯會伐宋。【補曰】陸淳曰：「《左氏》謂

單伯是周大夫，若然，何得會鄆之時不列序？而言單伯會齊侯乎？」孫復、劉敞亦云。會，事之成也。伐事已成，單伯乃至。【補曰】會事之成，謂諸侯伐宋之事已成，而單伯乃會之也。因《經》「會」下不再出「齊人、陳人、曹人」，故特釋之，明與隱四年伐鄭異。

### 秋七月，荆人蔡。荆者，楚也。其曰荆

何也？州舉之也。【補曰】何休曰：「州謂九州：

冀、兗、青、徐、楊、荆、豫、梁、雍。」文烝案：《周禮》、《逸周書》九州曰：「楊、荆、豫、青、兗、雍、幽、冀、并。」疏曰：「廉信云，楚子貪淫，為息鳩滅蔡，故州舉之，是取《左傳》之說，

非也。」此與十年《傳》同耳。州不如國，言荆不如言楚。

【補曰】當云言荆不如言吳。荆改稱楚後，未有以國舉者。

國不如名，言楚不如言介葛盧。名不如字。言介葛

盧不如言邾儀父。【補曰】凡四夷舍本爵僭稱王者，州之國

之，荆、徐、吳、於越是也，黜淫名也。若戎狄等爲種號，則

又異矣。微國本未爵者，名之字之，邾儀父、邾黎來、蕭叔

介葛盧是也，著實錄也。若襄內諸侯書字，則以不嫌而同

辭矣。州劣於國，字優於名，州國一類，名字一類。《傳》言

國不如名者，便文連言之，謂四夷不如微國耳。《公羊》於

「國」上增「氏」與「人」，於「字」上增「子」，學者因謂《春秋

以七等進退諸侯，其說多不可通，宜葉夢得駁之也。

冬，單伯會齊侯、宋公、衛侯、鄭伯于鄆。

鄆，衛地。○【撰異曰】宋公、衛侯，各本脫，今依唐石經、十

行本補正。鄆，《左氏》、《公羊》一作「甄」。復同會也。

諸侯欲推桓以爲伯，故復同會于此以謀之。【補曰】十六年

《傳》曰「外內寮一疑之」，外從北杏可以見義，故自此無疑

文。內始會非公，故疑文在後。

十有五年春，齊侯、宋公、陳侯、衛侯、鄭

伯會于鄆。復同會也。爲欲推桓爲伯，故復會於

此。【補曰】《左傳》曰：「齊始霸也。」疏曰：「重發《傳》者，

諸侯至此方信齊桓，故更發之。」文烝案：當云方伯齊桓。

夏，夫人姜氏如齊。婦人既嫁，不踰竟，

踰竟，非禮也。【補曰】疏曰：「重發之者，此非淫，恐

異，故發《傳》同之。」

秋，宋人、齊人、邾人伐鄆。宋主兵，故序齊

上也。班序上下，以國大小爲次，夷狄在下。征伐則以主

兵爲先，《春秋》之常也，他皆放此。【補曰】注首二句本杜

預。「班序」以下則下年「夏伐鄭」下注也。杜無「夷狄在

下」句，宜刪四字。○【撰異曰】邾，《公羊》作「兒」。

鄭人侵宋。

冬十月。

十有六年春王正月。

夏，宋人、齊人、衛人伐鄭。【補曰】杜預

曰：「宋主兵也。」

秋，荆伐鄭。

冬十有二月，會齊侯、宋公、陳侯、衛侯、

鄭伯、許男、曹伯、滑伯、滕子同盟于幽。

宋地。【補曰】杜預曰：「陳國小，每盟會皆在衛下，齊桓始

霸，楚亦始彊，陳侯介於二大國之間，而為三恪之客，故齊桓因而進之，遂班在衛上，終於《春秋》。滑國都費。」○【撰

異曰】板本《公羊》「會」上衍「公」字，唐石經亦無「公」。董

仲舒《繁露》曰：「幽之會，莊公不往。」下十九年何注曰：

「先是，鄆、幽之會，公比不至。」徐彥疏曰：「彼二《經》皆不

言公會，故知不至矣。」陸渙《纂例》所據《公羊》已誤。左氏

無「曹伯」。段玉裁曰：「此等陸氏《音義》所不著者。」案：

《纂例》載之。同者，有同也，同尊周也。【補曰】疏

曰：「同尊周者，諸侯推桓為伯，使翼戴天子，即是尊周之

事。」文烝案：疏未得旨。周自東遷以來，此時最為微弱，

考諸史記，前十二年莊王崩，明年僖王崩，而《春秋》皆不

志，明雖以魯之近周，而赴告不及，故《傳》謂之失天下，言

其微弱之甚也。《左傳》此一《經》後云：「王使虢公命曲沃

伯以一軍為晉侯。」《詩·無衣》序云：「武公始并晉國，其

大夫為之請命乎天子之吏。」【眉批】：「吏」字依陳奐訂正。

《史記》云，晉侯緡立二十八年，「曲沃武公伐晉侯緡，滅之，

盡以其寶器賂周僖王。僖王命曲沃武公為晉君，列為諸

侯，於是盡并晉地而有之」。夫以曲沃之三世為逆，卒滅宗

國，王法之所必誅，而敢於以賂請命，遂如其欲，則周之陵

夷不振為何如哉？齊桓勃興，始與諸侯共會盟以尊周，

《春秋》深與之，因加言同，以顯其事。下文邾進書「子」，實

由齊桓為之請命，其與曲沃之請命，順逆相反，亦尊周之一

端矣。迨乎僖崩惠立，子頹為亂，號、鄭胥命，綏定王家。

《左傳》備記其事。周人不告，《春秋》不書也。桓力未及，

君子不責也。惠之十年，再盟于幽，復申前約，於是又以同

盟書，自後則存亡國，怙荆夷，而會王世子焉，會王人焉，且

會宰周公，以明王禁焉。諸侯翕然歸齊，皆獎王室，不疑其

無此意，不須特異其文矣。語云名生於不足，是之謂乎？

不言公，【補曰】據柯盟言公。外內寮一疑之也。

十三年春，會于北杏，諸侯俱疑齊桓非受命之伯，欲共以事

推之可乎？今于此年諸侯同共推桓，而魯與齊讐，外內同

一疑公可事齊不？會不書公，以著疑焉。同官為寮，謂諸

侯也。至二十七年同盟于幽，遂伯齊侯。【補曰】疏曰：

「舊解謂會北杏不言諸侯，是外疑之也；今此會不言公，是

內疑之也。自此以後，外內不復疑之，故曰一疑也。推尋

范注，必不得爾。范意外內寮者，諸侯之國，或遠或近，故



以外內總之。一者，同一也。」文烝案：范注非也，舊解是也。遠近之國，皆爲外，不得言內。《傳》言「外內寮」者，外謂宋、陳、蔡、邾，內謂魯，其於齊皆寮也。《春秋》之文，外則北杏稱人，一疑之；內則此不言公，一疑之。《傳》以內之一疑解《經》不言公，因蒙北杏并言之，明外內之文相準也。柯爲離會，齊無爲伯之事，鄆是大夫會，故皆無所謂疑，與此異也。「外內寮一疑之」，文意與成十二年「上下一見」之正同。至於當時外內諸侯之疑齊與否，內與齊之有舊讐，皆無須論。范於北杏《傳》、此《傳》皆誤解。

### 邾子克卒。【補曰】即儀父。其曰子，進之

也。附齊而尊周室，王命進其爵。【補曰】至是爵命於周則進矣。《經》因其進而進之。杜預曰：「蓋齊桓請王命以爲諸侯。」賈、服說以爲北杏之會時已得王命。案：邾卒無不名者，邾近魯，情最親，故雖小國，皆以名錄。觀於邾，而宿男、薛伯、杞子、秦伯之不名者，明史以其疏遠而略之矣。不日者，或不正，或史以其附庸新進略之。不葬者，或魯不會，或亦是史略之。

### 十有七年春，齊人執鄭詹。○【撰異曰】詹，

《公羊》作「瞻」。下同。人者，衆辭也。【補曰】實是齊侯，以衆辭稱人，明此非貶。以人執，與之辭也。與令得執。【補曰】衆辭者，與之之辭，與其執有罪也。昭八年《傳》曰「稱人以執大夫，執有罪也」，與此同意，皆發明諸以衆辭稱人之例，文互相備。鄭詹，鄭之卑者。【補曰】疏曰：「重發《傳》者，嫌有罪去氏也，知非有罪去氏者，外大夫身有罪例不去氏，祭仲之類是也。宛所以去氏者，爲貶鄭伯也。」卑者不志，此其志何也？【補曰】不志者，《經》例因史例也。以其逃來，志之也。【補曰】主爲逃來志。逃來則何志焉？【補曰】但當志逃來，何并志執？將有其末，不得不錄其本也。末，謂逃來。【補曰】本，謂執。錄執方可言自齊逃來。鄭詹，鄭之佞人也。【補曰】《說文》曰：「佞，巧譎高材也。」《國語》注曰：「僞善爲佞。」《爾雅》：「壬，佞也。」《公羊》謂詹爲甚佞，猶《書》言孔壬矣。但謂微者言執，書甚佞也。直以佞故志執，與《傳》意小異。

### 夏，齊人殲于遂。【補曰】劉貺論《汲冢竹書紀

年》曰：「齊人殲于遂，鄭棄其師，皆孔子新意，知後人案

《春秋》經傳而爲之。」文烝案：劉謂此《經》是新意，蓋得之，其說棄師，則非也。《竹書》「棄師」之文出《瑣語》、《晉春秋》，其父所著《史通》明言之。既並以爲《紀年》，亦其疏也。○【撰異曰】殲，《公羊》作「濊」。殲者，盡也。【補曰】盡，殺也。《爾雅》同。然則何爲不言遂人盡齊人也？無遂之辭也。【補曰】言遂人盡齊人者，以遂主其事，有遂之辭也。言齊人盡于遂者，以齊主其事，無遂之辭也。無遂則何爲言遂？【補曰】雖不以遂主事，而遂文自在。其猶存遂也。以其能殺齊戍，故若遂之存。存遂奈何？曰齊人滅遂，使人戍之，【補曰】戍，守。遂之因氏飲戍者酒而殺之，齊人殲焉。【補曰】因氏，遂大夫。杜預曰：「遂之彊宗。」此謂狎敵也。狎，猶輕也。【補曰】傳因齊事論其理，劉敞、孫覺譏之非也。許翰曰：「齊師滅譚，譚子奔莒，其君不誦也。齊人滅遂，齊人殲于遂，其民不歸也。孟子謂霸者以力服人，非心服也，力不贍也。」胡安國曰：「包胥一身，可以存楚，楚雖三戶，可以亡秦，足爲強而不義之戒。」

秋，鄭詹自齊逃來。逃義曰逃。齊稱人以執，是執有罪也。執得其罪，故曰義也。今而逃之，是逃義也。【補曰】此爲凡書逃者發例。其言「來」，則從接公之例，蓋齊惡詹佞而執之，公說而受之歟？公既受之，故卑者得志矣。《公羊》曰：「何以書？書甚佞也。」曰：「佞人來矣，佞人來矣。」夫子告顏淵爲邦曰「放鄭聲，遠佞人」，《公羊》義可通也。來奔先言來，此後言來者，葉夢得曰：「奔以適我爲志，逃以舍彼爲志也。歸人言自者，有奉之辭，承執稱逃，則不嫌有奉。」

冬，多麋。京房《易傳》曰：「廢正作淫，爲火不明，則國多麋。」【補曰】《易傳》又曰：「震遂泥，厥咎國多麋。」此以爲溺愛淫女也。劉向以爲麋色青，近青祥也。麋之爲言迷也，蓋牝獸之淫者也。是時莊公將取齊之淫女，其象先見，天戒若曰：勿取齊女，淫而迷國。莊不寤，遂取之。夫人既入，淫於二叔，終皆誅死，幾亡社稷。《左氏》劉敞說以爲毛蟲之孽爲災。杜預曰：「麋多則害五稼，故以災書。」案：《春秋》諸記異，如蜮蜚雨雹之類，《左傳》皆謂之災也。疏曰：「魯之常獸，是歲偏多，故書多也。螟蟲不言多者，螟蟲是微細之物，不可以數言之。」

十有八年春王三月，日有食之。不言

日，不言朔，夜食也。【補曰】與正朔、晦日、既朔皆

異文，足明其爲夜食。其實夜食亦朔也。周以夜半爲朔，

夜半後爲雞鳴，爲平旦，爲日出。下言「朝日」、「朝朔」，明

是日出後見而知之，史因書於策也。日出以前通爲夜，故

曰夜食。何以知其夜食也？【補曰】謂史何所據？

曰王者朝日，《王制》曰「天子玄冕而朝日於東門之

外」，故日始出而有虧傷之處，是以知其夜食也。【補曰】疏

曰：「魯事而輒言王者朝日者，言王者朝日，所以顯諸侯朝

朔也。」注引《王制》者乃《禮記·玉藻》文。文烝案：東門

之外者，東郊也。玄冕者，每月朔朝日之服，其正月則異。

《大戴禮·四代》孔子曰：「天子盛服朝日于東堂。」孔廣森

以爲「盛服者袞冕」，《國語》所謂「大采朝日東堂」者。明

堂，東門之堂，迎日東郊，反而禮日東堂也。依書《傳》略

說，在夏正之朔，即此三月矣。故雖爲天子，必有尊

也，貴爲諸侯，必有長也。故天子朝日，諸侯

朝朔。何休曰：「《春秋》不言月食日者，以其無形，故闕

疑。」其夜食何緣書乎？鄭君釋之曰：「一日一夜，合爲一

日，今朔日日始出，其食虧傷之處未復，故知此自以夜食，

夜食則亦屬前月之晦，故穀梁子不以爲疑。【補曰】朝朔

者，北面朝受天子所班朔政，謂以每月朔受之於禰廟，《經》

書視朔是也。朝日，明日尊也。朝朔，明天子長也。疏

曰：「朝日、朝朔禮異，皆早旦行事，而昨夜有虧傷之處尚

存，故知夜食也。」徐邈云：「夜食則星無光。」張靖箋《廢

疾》云：「立八尺之木，不見其影。」並與范意異。文烝案：

徐、張非但與范異，乃於《傳》外自爲說。范引鄭言屬前月

晦，是謂在夜半以前，則日出安得尚有虧傷之處？吳萊又

以後世事況之曰：「世之登泰山者，夜半觀海出日，人世之

閭閻猶故，於此而或食，謂之食朔可矣。晝食未可也，安得

不曰夜食乎？魏永安二年十月己酉，日食地下，虧從西南

角起，亦是夜食。」吳氏於事類頗近，亦非《傳》意也。唯《漢

書·五行志》說此曰：「史推合朔在夜，明旦日食而出，出

而解，是爲夜食。」斯則事核而義得矣。日食而出，出而解，

較所謂「虧傷未復」語意尤明。

夏，公追戎于濟西。【補曰】何休曰：「以兵逐

之曰追。」追例時。其不言戎之伐我何也？【補

曰】據追齊師言侵西鄙，狄侵我言侵西鄙。以公之追

之，不使戎邇於我也。邇，猶近也。不使戎得逼近於我，故若人竟望風退走。【補曰】言追伐可知矣。所追爲戎，追者爲公，故略文以示義。于濟西者，大之也。何大焉？爲公之追之也。言戎遠來至濟西，必大有徒衆，以公自追之，知其審然。【補曰】注非也。濟西猶言河陽，不限於地名，故爲大。濟西大公，猶河陽大天子也。大公者，華戎之辭，大天子者，君臣之辭。《傳》言「何大焉？」爲公之追之者，既以公追爲文，必言濟西以大之。公自追戎而但錄其地名，如追齊師至嵩云者，以爲不可也。不言伐某鄙，不言地名，不言至于言于，皆以戎故也。不致者，竟內兵也。

秋，有蜚。京房《易傳》曰：「忠臣進善，君不識，厥咎國生蜚。」【補曰】「不識」，《漢書·五行志》引作「不試」，顏師古曰：「試，用也。」劉向以爲蜚生南越，越地多婦人，男女同川，淫女爲主，亂氣所生，故聖人名之曰蜚。蜚，猶惑也。在水旁，能射人，射人有處，其甚者至死，南方謂之短狐，近射妖死亡之象也。時莊將取齊之淫女，故蜚至。天戒若曰，勿取齊女，將生淫惑篡弑之禍。莊不寤，遂取之。入後，淫於二叔，二叔以死，兩子見弑，夫人亦誅。○【撰異曰】蜚，本

亦作「蜚」。陸淳《纂例》曰：「三《傳》皆然。」一有一亡曰有。【補曰】疏後一說。一有一亡者，謂或有有時，或有無時，言不常也。螟螽之類是常有之物，不言有也。文烝案：一，猶或也。《王制》「禘一犴一稭」，《爾雅》「泉一見一否」，《夏小正》傳「一則在本，一則在末」，義皆爲或也。《傳》言「有一亡者四，亡皆不作「無」，疑《經》字「無冰」之等非其舊矣。徐彥曰：「不書來者，亂氣所生，不從外來故也。」蜚，射人者也。蜚，短狐也，蓋含沙射人。【補曰】疏曰：《洪範·五行傳》云：「蜚如鼃，三足，生於南越，南越婦人多淫，淫女惑亂之氣所生也。」陸璣《毛詩義疏》云：「蜚，短狐，一名射景，在江淮水中。人在岸上，景見水中，投人景則殺之，或謂含沙射人。人皮肌，其創如疥。」《左傳》及《詩正義》與此《疏》同。《毛傳》、《說文》皆曰「短狐也」。《說文》又曰：「似鼃，三足，以氣射害人。」《音義》曰：「《本草》謂之射工。」《左傳音義》同。《詩音義》曰：「俗呼之水弩。」陸璣前一說，徐彥引《草木志》同。後一說，范所用。服虔說《左傳》亦同，以爲偏身淺淺或或，故爲災也。《五行志》「狐」作「弧」。《左傳音義》曰：「弧，又作「狐」。」

冬十月。

# 春秋莊公閔公經傳第三補注第七

穀梁 范氏集解 鍾文烝詳補

十有九年春王正月。

夏四月。

秋，公子結媵陳人之婦于鄆，遂及齊侯、

宋公盟。媵，淺事也，不志。此其志何也？

【補曰】凡內女出媵他國女爲夫人者，史皆詳書之，君子以爲淺事，削而不志。辟要盟也。魯實使公子結要二國

之盟，欲自託於大國，未審得盟與不，故以媵婦爲名。得盟則盟，不則止，此行有辭也。【補曰】《公羊》十三年何休注

曰：「臣約其君曰要。」又云：「要脅，欲明魯辟要盟。若直

言公子結及齊侯、宋公盟于鄆，則無以見魯之本情，故存媵文，但視舊史爲略耳。」魯所以要盟者，洪咨夔、葉西謂以背

盟納逋，懼討也。何以見其辟要盟也？【補曰】周

《經》文何以見之？媵，禮之輕者也；盟，國之重

也；以輕事遂乎國重，無說。以輕遂重，無他異

說，故知辟要盟耳。【補曰】《考工記》曰「有說」，鄭君曰：

「說，猶意也。」《墨子》經曰：「說，所以明也。」以「遂」爲文

「無說」，則辟要盟之本情足見矣。舊史盟必有日，書日未

必有「遂」文。其曰陳人之婦，略之也。但爲遂事

假錄媵事耳，故略言陳人之婦，不處其主名。【補曰】何休

曰：「此陳侯夫人也。」文烝案：桓八年《傳》曰：「其曰：

「遂逆王后，略之也。」彼稱后，此稱婦，其意相類。舊史書

媵事，當有詳文。孔穎達曰：「鄆是衛之東地，蓋陳取衛女

爲婦。」孔廣森曰：「鄆者，盟地，非致媵地，本送女如陳，行

及于鄆也，猶曰鄆子會盟于邾，謂會曹南之盟而行及于邾

也。」其不日，【補曰】桓盟本不日，結要盟與凡盟異，還宜

具日。數渝，惡之也。【補曰】疏曰：「數，疾也。謂秋

共盟，冬而見伐，變盟之疾。或以「數渝」爲今冬伐我西鄙，

明年齊又伐我，故云數。」文烝案：明年伐我，「我」乃「戎」

之誤。「數」字當如前解，此必疏所述舊說，蓋猶據未誤之

本也。暨之盟曰不日，其盟渝也，又曰惡內也，此盟亦其

例，桓十七年黃之盟則爲變例矣。暨盟不日，又不月，此亦

不月者，蓋以辟要盟異之。

夫人姜氏如莒。婦人既嫁不踰竟，踰竟，非正也。【補曰】疏曰：「重發《傳》者，嫌此適異國恐別，故發《傳》以同之。」

冬，齊人、宋人、陳人伐我西鄙。其曰鄙，遠之也。【補曰】何休曰：「鄙者，邊垂之辭。」其遠之何也？不以難邇我國也。【補曰】亦猶十八年「不使戎邇於我」。何休曰：「榮見遠也。」文烝案：內言「鄙」者，與外直言「侵伐」文相當，哀篇直言「伐我」，則與外言「圍人」文相當。孫覺曰：「《春秋》外師之至，魯雖入其郛，亦皆曰鄙。侵伐他國，但曰某而已，不曰某鄙。魯必曰鄙者，蓋我國之君治國之道素脩，禦敵之道素備，彼之來寇者，乃適吾間隙，犯吾邊鄙耳。故《春秋》之法內言戰，不言敗，言侵言伐，不言其至於國都，所以親之尊之而備責之也。哀八年、十一年再言「伐我」而不言「其鄙」者，《春秋》之終，而聖人之微旨也。《穀梁》言「不以難邇我國」，此深於《春秋》者之說也。《傳》之「之」字，各本脫，今依唐石經、十行本、俞皋《集傳》、《釋義》本補正。

二十年春王二月，夫人姜氏如莒。夫人

比年如莒，過而不改，無禮尤甚，故謹而月之。【補曰】何休曰：「月者，再出也。不從四年已月者，異國。」○【撰異曰】呂本中曰：「《公羊》作「正月」。案：呂蓋誤。婦人既嫁不踰竟，踰竟，非正也。【補曰】疏曰：「重發《傳》者，比再如莒失禮之甚，故詳之。」

夏，齊大災。外災例時。【補曰】疏曰：「范例云，災有十二，內則書日，外則書時。國曰災，邑曰火。」其志，以甚也。外災不志。甚，謂災及人也。【補曰】災及人故大，大故志，重人也。宋災，伯姬卒與此相似。雨蟲及沙鹿，梁山崩皆以害大變重，志於魯策，亦此之類。

秋七月。

冬，齊人伐我。【補曰】「我」當爲「戎」。《穀梁》與《左氏》、《公羊》本同字，蓋轉寫誤也。哀以前皆書四鄙，不應此獨直文。《傳》於上年發書「鄙」義，不應於此無《傳》，知必是誤字矣。張洽曰：「戎在徐州之域，最近齊、魯，故先治之。」○【撰異曰】我，《左氏》、《公羊》作「戎」，宜從「戎」。

二十有一年春王正月。

夏五月辛酉，鄭伯突卒。【補曰】書日與齊小白同。

秋七月戊戌，夫人姜氏薨。【補曰】桓公夫人，莊公母。婦人弗目也。鄭嗣曰：「弗目，謂不目言其地也。婦人無外事，居有常所，故薨不書地。僖元年《傳》曰「夫人薨不地」，此言「弗目」，蓋互辭爾。定九年「得寶玉、大弓」，《傳》曰：「弗目，羞也。」蓋此類也。」江熙曰：

「文姜有弑公之逆，而弗目其罪。」【補曰】鄭是江非也。鄭不引隱二年《傳》，亦失之。疏曰：「隱二年著不地之例，此復發《傳》者，嫌有罪去地，故發之。」

冬十有二月，葬鄭厲公。【補曰】何休曰：「《春秋》纂明者書葬。」文烝案：篡立乃失德之大者，既有明文，魯會葬則葬之。

二十有二年春王正月，肆大眚。《易》稱「赦過宥罪」，《書》稱「眚災肆赦」，《經》稱「肆大眚」，皆放赦罪人，蕩滌衆故，有時而用之，非經國之常制。【補曰】此本杜預。第三句作《傳》稱肆眚圍鄭，范改之。此注言自古以來有時而用也。○【撰異曰】肆，《公羊》或作「佚」。眚，

《公羊》作「省」。案：石鼓「眚車」，義作「省車」。肆，失也。眚，災也。災，謂罪惡。【補曰】惠棟曰：「失，讀

爲「佚」，「佚」與「逸」同，謂逸囚也。古多以「失」爲「佚」。」文烝案：惠說是也。《公羊》曰：「肆者何？跌也。」似亦略相近。杜預襄九年《左傳》注、某氏《堯典》傳皆曰：「肆，緩也。」《逸周書·謚法》曰：「肆，放也。」緩、放亦「佚」之意。以「災」訓「眚」者，《堯典》、《康誥》言「眚災」是也。某氏《傳》曰：「眚，過也。災，害也。」是就二字析言之。杜預亦曰：「眚，過也。凡罪有過有故。」故者，《堯典》謂之「怙終」，《康誥》所云「非眚惟終」。災，紀也。失，故也。紀，治理也。有罪當治理之。今失之者，以文姜之故。【補曰】《墨子》曰：「絲縷有紀。」《說文》曰：「紀，絲別也。」引伸之爲治理。爲嫌天子之葬也。文姜罪應誅絕，誅絕之罪不葬，若不赦除衆惡。而書葬者，嫌天子許之，明須赦而後得葬。【補曰】天子之葬者，謂天子之法所當葬也。文姜淫而害夫，於法無赦，魯秉周禮，猶知畏法，嫌若法所當葬，爲是故大赦於國，滌除衆罪，咸與惟新。一若文姜之淫弑亦可不論者，所以掩其生前之惡，而成其沒後之禮也。賈逵說《左氏》曰：「文姜有罪，故赦而後葬，以說臣子也。」

魯大赦國中罪過，欲令文姜之過因是得除，以葬文姜。」賈之此注，即《穀梁》家語也。《傳》但言其有故，言其所爲，即其事可知，其義明。猶似乎亡於禮者之禮，而與失德不葬之旨亦足相發也。嘗論之肆眚者，即《堯典》所云「眚災肆赦」也。肆小眚又肆大眚者，即《康誥》所云「乃有大罪，非終，乃惟眚災，適爾，既道極厥辜，時乃不可殺」也。先王之世，本有其事，而觀《左氏》襄九年《傳》晉悼公肆眚圍鄭，是爲圍鄭特行赦，與魯之爲葬文姜特行大赦相類，知當時赦令皆有所爲矣。或凡赦無所爲者，史所不記，有所爲，乃記耳。

### 癸丑，葬我小君文姜。

【補曰】何休曰：「夫人

以姓配謚，欲使終不忘本也。」小君，非君也。不治其民。其曰君何也？以其爲公配，可以言小君也。【補曰】夫人與公一體，從公稱也。周制：天子至士，夫婦皆合葬，祭於廟，設詞几。祝曰：以某妃配。明夫婦精氣合也。孫覺曰：「姜氏之惡，《春秋》載之備矣，而薨葬皆詳書之，無貶辭焉。《春秋》魯史，其載魯事，有臣子之法，所以訓忠孝也。姜氏雖大惡，然魯之臣子不可不以母禮待之。」蘇轍曰：「君雖不君，臣不可以不臣；父雖不父，

子不可以不子。子爲父隱，道在其中矣，而文姜之惡何損焉？」文烝案：孫、蘇皆正論，陸淳聞於師者亦略同，要因魯既不能絕文姜，則宜有臣子之禮，亦卒仲遂，致意如之意也。

### 陳人殺其公子禦寇。禦寇，宣公之子。【補

曰】稱人者，衆辭，從殺有罪例。《傳》又舉例於文七年。

○【撰異曰】禦，又作「御」，《左氏》作「御」，亦作「禦」。段玉

裁曰：「《左傳》作「太子」，則《左經》當本作「世子」，《史記》亦云「太子」。文烝案：《左氏》、《史記》非也。殺世子當目

君，不目君，不得言「其」。言公子而不言大夫，公

子未命爲大夫也。【補曰】未命爲卿。其曰公子

何也？【補曰】據既非大夫，何得稱「公子」見《經》？

公子之重視大夫，視，比。命以執公子。大夫既

命，得執公子之禮。一本：大夫命以視公子。【補曰】言以

公子氏者，非他氏族比，他氏族不命爲卿，則直名不氏矣。

臧孫紇亦氏，內外異耳。張大亨曰：「殺公子，雖未命，必志之，惡賊親也。先王之制，公族有罪，不以犯有司。」

### 夏五月。

以五月首時，甯所未詳。【補曰】孫復以爲「月下有脫事」是也。史文殘闕，《經》遂仍之，亦「夏五



《傳》疑」之例。桓、莊相接，莊亦遠也，若在近世，多見而識其事，或可考矣。不改從始月例，明《春秋》無不知而作者。

秋七月丙申，及齊高傒盟于防。【補曰】母

喪十三月而盟，不去日也。不言公，高傒伉也。書

日，則公盟也。高傒驕伉，與公敵體，恥之，故不書公。【補

曰】一君一臣，特相盟會，是臣無禮，故曰伉。處父、嬰齊並同此義。注云「書日則公盟」，本文二年《傳》文，《傳》於彼乃發之者，彼又須辨公不言如晉意，故就彼亦發之。說見彼疏。不致者，既會大夫又沒公。

冬，公如齊納幣。【補曰】納幣，與諸書「納」者

異。納幣，大夫之事也。【補曰】說正禮。禮有納

采。采擇女之德性也。其禮用鴈為贄者，取順陰陽往來。

【補曰】《昏禮》納采、問名、納吉、請期、親迎皆用鴈。注本鄭君說也。有問名，問女名而卜之，知吉凶也。其禮如

納采。【補曰】《昏禮》記曰：「敢請女為誰氏。」鄭君曰：「謙

不必主人之女。」有納徵，徵，成也。納幣以成婚。【補

曰】何休曰：「納幣即納徵。禮曰「主人受幣，士受儷皮」是也。納徵用玄纁束帛儷皮。玄纁，取其順天地也。儷皮

者，鹿皮所以重古也。」孔廣森曰：「幣者，六幣之通名。諸侯聘女以大璋皮帛。」文烝案：注言納幣以成婚者，賈公彥曰：「納幣則昏禮已成，女家不得移改。」又案：納徵前有納吉禮，得吉卜而往告也。疏曰：「《傳》略納吉不言，或以為諸侯與士禮異者，非也。」有告期，告迎期。【補曰】《昏禮》曰：「請期用鴈，主人辭，賓許。告期如納徵禮。」謂先請於女家，後告之也。或云《傳》之「告」即《禮》之「請」。二十八年《傳》曰：「告，請也。」定元年《傳》曰：「求者，請也。」求、請、告三字同義。竊以彼皆散文告期則禮與請，對文告非請也。四者備而後娶，【補曰】娶，謂親迎。禮也。【補曰】因納幣備言其禮，唯娶親之。公之親納幣，非禮也，故譏之。公母喪未再替而圖婚，《傳》無譏文，但譏親納幣者。喪婚不待貶絕而罪惡見。【補曰】《傳》言「譏之」者，明《經》所以仍史文書其事。禮：父卒則為母齊衰三年。孔廣森以為親納幣失之小，三年之內圖婚失之大。小者猶譏，大者可知。

二十有三年春，公至自齊。【補曰】疏曰：二十七年《傳》云「桓會不致」，此與下文觀社皆書「公至」

者，《公羊傳》云「危之也」，徐邈亦云「不以禮行，故致以見危」。范下注云：「公怠棄國政，比行犯禮，憂危甚矣。」則亦以二者爲憂危致之也。若然，定八年《傳》稱「致月危致」，下《傳》云「致月有懼」，此致不月者，以二者皆非禮而行，不假書月，危懼可知。《傳》以危而不月，嫌與例乖，故發《傳》詳之。或以爲二者皆非禮之行，與好會異，故致之，非是見危，理亦通也。」文烝案：此處二往，皆見非禮致之，已足見危，非如致會、致伐之等，須加月以危之；又非如奔喪、會葬之等，往致皆須月也。疏說未明。又案：凡春如春至，若是正月，則亦必月。春不月者，皆非正月也。

### 祭叔來聘。其不言使何也？天子之內

臣也。祭叔，天子實內諸侯。叔名。【補曰】疏曰：「徐邈云『祭叔爲祭公使』，則徐意以祭叔爲祭之大夫也。范以『叔』爲名，似同徐說。但舊解不然。」文烝案：杜預引《穀梁》，正同徐語，此必《穀梁》家古義。不言使，謂不言祭公使內臣，亦指祭公。范意以「使」爲王使，以「內臣」即指祭叔，蓋失之。而疏以爲范似同徐說，又失之矣。「叔」當是字，猶任叔、榮叔。《周禮·大宰》「施則于都鄙，而建其長，立其兩」，謂公卿及王子弟食采邑者得立兩卿，祭叔爲祭之

大夫，蓋所謂兩卿者。孔穎達曰：「或是祭公之弟也。」不正其外交，故不與使也。何休曰：「南季、宰渠伯糾、家父、宰周公來聘，皆稱使，獨于此奪之何也？」鄭君釋之曰：「諸稱使者，是奉王命，其人無自來之意。今祭叔不一心於王，而欲外交，不得王命來，故去使以見之。」【補曰】范取鄭說，以爲祭叔外交無王命，故不與王得使之，非也。既無王命，則非使，何云不與王得使？若無使之者，則當爲朝，何以云聘？若以爲請命於王，非王本心，則石尚亦請命，何以得云使？此當依徐、杜說，謂不正祭公外交，故不與其得使也。趙汭曰：「不言祭公使者，王臣無外交，無其禮則不得襲其文，與卿爲君逆不稱使同。」

### 夏，公如齊觀社。【補曰】何休曰：「觀社者，觀

祭社。社者，土地之主。祭者，報德也。生萬物，居人民，德至厚，功至大，故感春秋而祭之。天子用三牲，諸侯用羊豕。」僖三十一年《公羊傳》曰：「天子祭天，諸侯祭土。」何休曰：「土謂社也。天子所祭莫重於郊，諸侯所祭莫重於社，卿大夫祭五祀，士祭其先祖。」哀四年《公羊傳》曰：「社者，封也。」文烝案：祭社曰社，猶祭於郊曰郊。常事曰視，視朔是也。非常曰觀。【補曰】疏曰：「復發《傳》

者，嫌觀魚、觀社異，故發之。」文烝案：此不言「傳曰」者，省文。觀，無事之辭也。言無朝會之事。以是爲尸女也，尸，主也。主爲女往爾，以觀社爲辭。【補曰】《經》著無事之辭者，以是爲尸女故也。意主於女，謂之尸女。《莊子》曰：「是其言也，猶時女也。」處女爲時所求，謂之時女，古人語如此。《六經奧論》說以《墨子》曰：「燕有祖，齊有社，宋有桑林，楚有雲夢，此男女之所屬而觀也。」家鉉翁曰：「尸女云者，盛其車服，炫惑婦人，要其從己也。」文烝案：《左氏》說以爲齊因祭社蒐軍實。《國語》曹劌曰：「齊棄太公之法而觀民於社。臣不聞諸侯相會祀也，祀又不法。」蒐軍實而曰觀民，曰不法，足與《墨子》相證也。無事不出竟。【補曰】說正禮。

公至自齊。公如，陳公行例。【補曰】凡往皆是，不專謂如某。往時，正也。正，謂無危懼也。皆放此。致月，故也。【補曰】故，謂變故。定八年《傳》曰：「致月，危致也。」於往言時，則月可知；於致言月，則時可知。互句以省文。如，往月、致月，有懼焉爾。【補曰】定八年《傳》曰：「往月致月，惡之也。」此皆《經》例。

舊史凡「往」與「致」無不月者。案此及上「致」皆時，《傳》發《經》通例也。《傳》以桓兩「致」皆變文，莊「致」伐衛，又非常例，故於此兩「致」發之。此例之外，惟正月如某及正月至者，雖無危懼，亦必書月，據文自明，故《傳》無說也。王引之曰：「上言「公如」，下不須更言「如」，下「如」字蓋衍文。」

荆人來聘。善累而後進之。【補曰】累，積。其曰人何也？【補曰】據當言荆來聘，如白狄來。舉道不待再。明聘問之禮。朝宗之道，非夷狄之所能，故一舉而進之。【補曰】以聘書，故人之。不如白狄，不言朝也。《公羊》曰：「荆何以稱人？始能聘也。」能聘即《傳》所謂「舉道」。

公及齊侯遇于穀。及者，內爲志焉爾。遇者，志相得也。【補曰】疏曰：「重發《傳》者，公爲淫如齊，嫌異於常，故重發之。」

蕭叔朝公。微國之君，未爵命者。【補曰】杜預曰：「附庸國。」疏曰：「書名者，附庸常例。《傳》於儀父言字，言美稱，此《傳》直云「微國」，不言字，則「叔」名也。重發《傳》者，嫌名字異故也。」文烝案：「叔」蓋字也，

故黎來後重發《傳》，疏從杜預爲名，又不記黎來《傳》何歟？其不言來，於外也。言於穀朝公也。【補曰】杜預曰：「就穀朝公，故不言來。」孔穎達曰：「穀是齊地故也。定十四年大蒐于比蒲，邾子來會公。比蒲，魯地，故言來也。」趙汭以爲蕭君至穀朝伯主，因得朝公。朝於廟，正也。【補曰】廟，大廟。於外，非正也。【補曰】以其非正，故加言公，明公一人專受之，不能尊先君共其榮。杜預曰：「凡在外朝則禮不得具，嘉禮不野合。」

秋，丹桓宮楹。楹，柱。【補曰】服虔曰：「丹，形。楹，謂之柱。」《釋名》曰：「楹，亭也。亭亭然孤立，旁無所依也。」案《禮》言東楹西楹，劉熙就一楹言之。禮：天子諸侯黝堊，黝堊，黑色。【補曰】范解「黝」字連言「堊」耳，非以「堊」亦爲黑也。疏引徐邈曰：「黝，黑柱也。堊，白壁也。謂白壁而黑柱。」文烝案：《詩》、《禮》多以黝爲幽。《爾雅》曰：「黑謂之黝。」《說文》以爲微青黑色。孫炎從之。堊者，《說文》曰「白涂」，《爾雅》所謂「牆謂之堊」。

《山海經》大次之山多堊，亦當爲白土。又有黃堊，又有白堊，黑青黃堊。據《呂氏春秋》云「白堊黑漆」，則直言堊者皆白也。《太平御覽》引此《傳》作「天子丹，諸侯黝堊」。王

引之曰：「《御覽》『丹』字涉上下文『丹楹』而誤衍。《廣雅》云『天子諸侯廟黝堊』，正用《傳》文。《左傳正義》、《北堂書鈔》、《白帖》引傳皆同今本。」大夫倉，【補曰】孔穎達《月令正義》曰：「倉亦青也。遠望則倉。」士黹。黹，黃色。【補曰】《音義》曰：「麋氏云『張斗反』。」文烝案：其「堊」皆同，省文從可知。丹楹，非禮也。【補曰】黝、倉、黹，皆禮之所有，丹則禮之所無。

冬十有一月，曹伯射姑卒。【補曰】終生卒日葬月。自此射姑、班、襄、廬、負芻、滕、須、午、露九君卒皆月而不日，惟壽卒日，廬、負芻以踰竟故不日，射姑等七君，皆當是不正，不應八世之中獨壽得以正立。射姑前稱世子，又非不正，以意度之，或者射姑雖爲世子，本不正。班、襄諸君皆不正，蓋所謂楚國之舉恒在少者乎？《傳》記無文，不敢定也。班、襄、廬、滕、須葬皆時，射姑、壽、負芻、露葬皆在上事月下。午葬月，何休以爲爲下出也。○【撰異曰】射，本或作「亦」。

十有二月甲寅，公會齊侯盟于扈。桓盟不日，此盟日者，前公如齊觀社，《傳》曰：「觀，無事之辭。以是爲尸女也。」公怠棄國政，比行犯禮，憂危甚矣。霸主

降心，親與之盟，實有弘濟之功，而魯得免於罪，臣子所慶，莫重於此。時事所重，文亦宜詳，故特謹日以著之。【補曰】注說未然。此當從孫復、程子、葉夢得說。以爲婚盟亦與諸桓盟不同，故還從常例書日也。不致者，離會例。《公羊》以書日爲危之。危之則當致，《公羊》非也。扈，鄭地。孫復以此爲齊地。

### 二十有四年春王三月，刻桓宮桷。【補

曰】杜預曰：「刻，鏤也。」服虔曰：「桷，謂之榱。榱，榱也。」案：《說文》曰：「桷，榱也。」「榱，榱也。」又曰：「榱方曰桷。」又以榱爲秦名屋榱。周謂之榱，齊、魯謂之桷。何休曰：「月者，功重於丹楹。」范例本之。或此爲下葬，故月。禮：天子之桷，斲之榱之，加密石焉。以細石磨之。【補曰】斲，斲也，削也。謂以斧斤斲削木榱礪之也。密，密理也。石，謂砥也。先粗礪之，加以密砥。諸侯之桷，斲之榱之。【補曰】無密石。大夫斲之。【補曰】不榱。士斲本。【補曰】但斲其首，不達稜。達稜，見《書大傳》。此以上，《國語》晉張老對趙文子

同。《書大傳》又云：「庶人到加。」刻桷，非正也。【補曰】非正者，非正禮，刻亦非禮之所有也。言非正不言非禮者，因下以娶讐女爲非禮，故避其文也。夫楹桷之爲物小，而禮可識也。禮所以教儉，故林放問禮之本，子曰：「禮，與其奢也寧儉。」古者自天子至士，事物物物皆有等差，以爲雖貴如天子諸侯，必有其節，而不得過焉。此《荀子》所謂「欲必不窮乎物，物必不屈於欲。貴賤有等，長幼有差，貧富輕重皆有稱」。魯策書以周禮書事，故重之矣。夫

人所以崇宗廟也，【補曰】崇，崇奉。《祭統》載取夫人之辭曰：「請君之玉女，與寡人共有敝邑，事宗廟社稷。」又曰：「夫祭也者，必夫婦親之。」《昏義》曰：「昏禮者，將合二姓之好，上以事宗廟而下以繼後世也。」取非禮與非正而加之於宗廟，以飾夫人，非正也。非禮謂娶讐女，非正謂刻桷丹楹也。本非宗廟之宜，故曰「加」。言將親迎，欲爲夫人飾，又非正也。【補曰】《漢書·五行志》劉歆說「莊飾宗廟，刻桷丹楹，以夸夫人」，與劉向《列女傳》略同。韋昭曰：「哀姜將至，當見於廟，故丹柱刻榱，以夸之。」案此一舉而三失也，言《春秋》所以見義。刻桓宮

桷，丹桓宮楹，斥言桓宮，以惡莊也。不言新宮而謂之桓宮，以桓見殺於齊。而飾其宗廟，以榮讐國之女，惡莊不子。【補曰】新宮斥謚，則如疏之然。疏之則不恭，明有所惡矣。張自超以爲文姜新入廟，亦齊女也，蓋尊文姜以尊齊。張履祥亦云：「丹刻，爲文姜也。」案：此義亦得兼見。

### 葬曹莊公。

夏，公如齊逆女。親迎，恒事也，不志。

此其志何也？【補曰】凡公出親迎，史法自當書之，君子以爲恒事，略而不志。但直言公如某，不目其事，而別言夫人某氏至自某，則其事自明。外諸侯來親迎則書時，適無其事耳。不正其親迎於齊也。【補曰】失禮非復恒事。

秋，公至自齊。迎者行見諸，舍見諸。

諸，之也。言瞻望夫人乘車。【補曰】舍，止息也。《詩》曰「有女同行」，是。先至，非正也。【補曰】以其非正，故書至以危之。若與夫人偕至，當但書夫人。

八月丁丑，夫人姜氏入。哀姜。人者，內

弗受也。曰人，惡入者也。【補曰】疏曰：「重發

《傳》者，嫌夫人與他例異故也。」文烝案：舊史夫人之至皆書「至」而具日，君子獨改此「至」文言「入」，又獨存其日，明與庚寅入邶、壬午入邶等同例也。王元杰曰：「削其告至之辭。」案：《左傳》曰「哀姜至」，舊史亦必書「至」。何用

不受也？以宗廟弗受也。【補曰】國之小君而可

以弗受，辭加之者，臨之以先君。其以宗廟弗受何

也？娶仇人子弟以薦舍於前，其義不可受

也。薦，進。舍，置。【補曰】言子弟者，或是齊襄之女，或

是其妹，作《傳》時已不審也。《公羊》曰：「其言人何？難

也。其言日何？難也。夫人不僂不可使人，與公有所約，

然後入。」何休曰：「僂，疾也。齊人語。約，約遠媵妾也。

夫人稽留，不肯疾順，公不可使即入。公至後，與公約定，

八月丁丑乃入，故爲難辭也。」文烝案：《公羊》解書「人」書

「日」之義頗近事情，未協《經》旨，自以《穀梁》爲允。妻不

可以樞機寢席之事要其夫，其義僻而暗；子孫不可以讐國

女見於祖禰，其義正而明。

戊寅，大夫宗婦覲，用幣。宗婦，同宗大夫之

婦。【補曰】此用《國語》注也。賈逵、杜預注作「同姓」。《左傳》桓六年「子同生，公與文姜宗婦命之」，襄二年「葬齊姜，齊侯使諸姜宗婦來送葬」，杜或言同宗，或言同姓。案：《左傳》同姓近者爲同宗，又近爲同族，杜於二者散文通言矣。同姓之卿稱「宗卿」，故其妻稱「宗婦」。《祭統》說君與夫人祭大廟，有卿大夫士，有宗婦，亦謂同宗之婦，皆自國言之之辭也。《特性》饋食禮，主婦之外又有宗婦，自家言之之辭也。若《內則》所言宗子、宗婦，則絕不同，彼謂大夫士大宗之婦也。國君不統宗，故禮有大宗、小宗。大宗者，君之別子爲祖，適長繼別爲宗，世世收族，雖無子，族人必以支子後之者也。小宗者，別子之諸子，其適長繼禰者爲小宗，五世服盡而遞遷者也。大宗一，小宗四。葉夢得分別禮之言宗婦有三，文烝取焉。覲，見也。【補曰】訓「見」者，渾言之，《公羊》、《爾雅》同。對文析言，卑於尊言覲，敵者言見，不見公未見諸侯是也。疏曰：「舊解言私爲覲，正爲見，今以爲不然。」禮：大夫不見夫人。【補曰】宗婦宜覲，大夫不宜行婦道，非禮，故志之。何休、杜預皆云《禮》夫人至，大夫執贄以見，孔穎達以爲《禮》無此文，是亦不安於其說也。不言及，不正其行婦道，

故列數之也。【補曰】及者，夫婦之辭。大夫行婦道則不得以尊及卑矣，故不言及，猶書公夫人姜氏也。男子之贄，羔鴈雉脰；贄，所執以至者也。上大夫用羔，取其從帥，群而不黨也。下大夫用鴈，取其知時，飛翔有行列也。士冬用雉，夏用脰，取其耿介，交有時，別有倫也。脰，腊也。雉必用死，爲其不可生服也。夏用脰，備腐臭也。【補曰】此皆本鄭君《士相見禮》注。「脰」之本義爲「鳥腊」，當依《說文》說。此「脰」爲乾雉。婦人之贄，棗栗鍛脩。棗，取其早自矜莊。栗，取其敬栗。鍛脩，取斷斷自脩整。【補曰】注本何休而小異。《周禮》注曰：「大物解肆乾之，謂之乾肉。薄析曰脯，捶之而施薑桂曰鍛脩。」腊，小物全乾。《士昏禮》婦見舅以棗栗，見姑以鍛脩。《曲禮》曰：「婦人之摯，棗脯脯脩棗栗。」《傳》舉男女贄者，疏曰：「見俱不得用幣。」用幣，非禮也。【補曰】又非禮。謝湜曰：「諸侯庭實有幣，獻方物也，贄則與幣異矣。男以玉帛禽鳥，以示執此德不敢廢也；女以棗栗脯脩，以示修此職不敢廢也。今皆用幣，則是相交以財，相賂以利也。外外交賂以財利而閭門之禮亂矣。」用者，不宜用者



也。【補曰】言「用」，知不宜用。《公羊》同。大夫，國體也，而行婦道，國體，謂爲君股肱。【補曰】《墨子》經曰：「體，分於兼也。」《經說》曰：「若二之一正之端也。」董仲舒曰：「陰者陽之合，妻者夫之合，子者父之合，臣者君之合。」惡之，故謹而日之也。【補曰】時史以大夫觀夫人，又男女用幣，並是非禮，故特志之，又日之，君子從而取義焉。大夫而觀夫人，其事可惡，贊不足復論。

### 大水。

【補曰】何休曰：「夫人不制，遂淫二叔。陰氣盛，故明年復水也。」文彙案：何說與《漢書·五行志》董仲舒、劉向義同。此事在時例。

### 冬，戎侵曹。

### 曹羈出奔陳。

【補曰】羈，曹大夫也。曹無大夫，以國氏而言羈者，以出奔目之也。出奔得志者，案《傳》曰：「曹、莒皆無大夫。」其所以無大夫者，其義異也。證以盟會之序，則曹之爲國，亞於許而尊於莒，故莒書奔者必如牟夷之以地來奔乃得書，曹則羈直奔陳，公孫會直奔宋，皆書也。《公羊》曰：「此何以書？賢也。何賢乎曹羈？戎將侵曹，曹羈諫曰：『戎衆以無義，君請勿自敵也。』曹伯曰：『不可。』三諫不從，遂去之，故君子以爲得君臣之義也。」

也。」案：《傳》於下殺大夫言崇曹羈之賢，不言此奔以賢書，且羈之爲賢，必是素以賢稱，若專以出奔一事爲賢，亦非其理。凡《公羊》所指爲賢而論其事者，其文往往如此，似未可用也。孔廣森引《韓非子》曰：「夷吾束縛而曹羈奔陳，伯里子道乞，傳說轉鬻。」孔又疑即《左傳》之僖負羈。案：僖負羈去此遠，孫覺以爲決非一人，是也。○【撰異曰】陸淳《纂例》曰：「羈，《公羊》作「羈」。案：今《公羊》不作「羈」。

### 赤歸于曹。郭公。赤，蓋郭公也。何爲

名也？禮：諸侯無外歸之義，外歸非正也。

徐乾曰：「郭公，郭國之君也，名赤。蓋不能治其國，舍而歸于曹。君爲社稷之主，承宗廟之重，不能安之而外歸他國，故但書名，以罪而懲之。不直言赤復云郭公者，恐不知赤者是誰，將若魯之微者故也。以郭公著上者則是諸侯失國之例，是無以見微之義。」【補曰】疏曰：《薄氏駁》云，赤若是諸侯，不能治國，舍而歸曹，應謂之「奔」，何以詭例言「歸」乎？徐乾又云，不言郭公，疑是魯之微者，若是微者，則例所不書，何得以微者爲譬？二事俱滯，而范從之者，凡諸侯出奔其國者，或爲人所滅，或受制強臣，迫逐苟免，



然後書出。今郭公在國，不被迫逐，往曹事等於歸，故以易辭言之，不得云出奔也。凡內大夫未得命者，例但書名，若使赤直名而無所繫，則文同佚等，故又云郭公也。徐乾之說理通，故范引而從之。「文烝案：此與「紀侯大去」，並奔之詭例。孔廣森以爲據其國言之則曰「大去」，據所之之國言之則曰「歸」也。稱公者，失國外歸，棄其本爵爲寄公，與州公同也。徐謂以郭公著上則是失國之例，無以見義，此說非是。孔廣森曰：「郭公」不當倒在下，疑傳《春秋》者「赤」上字舊漫缺，經師相承以爲「郭公」，謹慎不敢補入正文，故著之於下耳。」孔說甚有理。《傳》曰「赤蓋郭公也」，《公羊》亦曰「曹無赤者，蓋郭公也」。蓋者，疑辭、謙辭，當實如孔所言矣。段玉裁曰：「注不直言赤，「不」字疑衍，「微之義」當作「懲之義」。○自杜預始疑有闕誤，而杜諤、劉敞以來疑當爲郭亡，牽合《管子》、《韓詩外傳》、《新序》、《風俗通》、《說文》以爲說，鄭玉等皆之。」

二十有五年春，陳侯使女叔來聘。女氏，叔字。其不名何也？據成三年晉侯使荀庚來聘稱名。【補曰】不得獨據彼，當云據例稱名。天子之命大

夫也。【補曰】猶單伯。

夏五月癸丑，衛侯朔卒。惠公也。犯逆失德，故不書葬。【補曰】書日亦與齊小白同，本又當從鄭厲公例書葬，以其犯王命不可葬，故還去之。

六月辛未，朔，日有食之。言日言朔，食正朔也。【補曰】重發傳者，此有救變之文，嫌異常食，故發以同之。

鼓，用牲于社。【補曰】此《經》各本誤跳在《傳》「言日」上，今依唐石經、十行本移正。鼓，禮也。用牲，非禮也。【補曰】用者，不宜用者也。《書·召誥》曰「用牲于郊」，彼自記事常文，與《春秋》異。陸淳所謂《春秋》之文至簡，故字皆有義，其例不可徧求之於五經也。《左傳例》曰：凡天災有幣無牲。天子救日，置五麾，陳五兵、五鼓；麾，旌幡也。五兵，矛、戟、鉞、楯、弓矢。【補曰】《曾子問篇》孔子曰：「如諸侯皆在而日食，則從天子救日，各以其方色與其兵。」《周禮·鼓人》：「救日月則詔王鼓。」《大僕》：「凡軍旅田役贊王鼓，救日月亦如之。」《疏》曰：「五麾者，麋信云「各以方色之旌置之五處

也」。五兵者，徐邈云「矛在東，戟在南，鉞在西，楯在北，弓矢在中央」。麋信與范數五兵與之同，是相傳說也。」孔廣森曰：「《周禮》司兵、五兵外別有五盾，則五兵數楯非也。」《司馬法》曰：「弓矢圍，殳矛守，戈戟助。」凡五兵長以衛短，短以救長，當從鄭君注戈殳戟酋矛弓矢爲是。又疏曰：「五鼓者，麋信、徐邈並云東方青鼓，南方赤鼓，西方白鼓，北方黑鼓，中央黃鼓。案五兵，兵有五種，未審五鼓是一鼓有五色，爲當五種之鼓也。何者？《周禮》有六鼓，雷鼓、靈鼓、路鼓、鼗鼓、鼙鼓、晉鼓之等，若以爲五種之鼓，則不知六鼓之內竟去何鼓，若以爲一種之鼓，則不知六鼓之內竟取何鼓。又《周禮》云「雷鼓鼓神祀」，則似救日之鼓用雷鼓，但此用之於社。《周禮》又云「靈鼓鼓社祭」，則又似救日之鼓用靈鼓，進退有疑，不敢是正，故直述之而已。檢麋、徐兩家之說，則以五鼓者非六鼓之類，別用方色鼓而已。諸侯三者則云降殺以兩，去黑黃二色，是非六鼓之類也。下云「大夫擊門，士擊柝」，則此陳五鼓亦擊之也，但擊之時陳列於社之瑩域，因五兵五麾是陳，故亦以陳言之，非謂直陳而不擊也。」諸侯置三麾，陳三兵、三鼓；

【補曰】三兵三鼓，各本誤作「三鼓三兵」，今依《北堂書鈔》、

《開元占經》、《太平御覽》引互易正。大夫擊門；士擊柝。柝，兩木相擊。言充其陽也。凡有聲，皆陽事，以壓陰氣。充，實也。【補曰】孔穎達曰：「日食，曆之常也。古之聖王，因事設戒，故鳴之以鼓柝，射之以弓矢。庶人奔走以相從，畜夫馳騁以告衆，降物辟寢以哀之，祝幣史辭以禮之。立貶食去樂之數，制入門廢朝之典，示之以罪己之宜，教之以脩德之法，所以重天變，警人君也。天道深遠，有時而驗，或亦人之禍福偶與相逢，故聖人得因其變，常假爲勸戒，使智達之士識先聖之幽情，中下之主信妖祥以自懼。」

伯姬歸于杞。其不言逆何也？逆之道

微，無足道焉爾。【補曰】疏曰：「重發《傳》者，紀伯姬

釋不稱使之微，此解不言逆之微，故別發《傳》。」案：又當引紀叔姬，叔姬爲姊，又有異，而「微」字之解則同。

秋，大水。鼓，用牲于社、于門。門，國門

也。【補曰】此本杜預也。孔穎達曰：「國門謂城門。」高

下有水。災，曰大水。【補曰】疏曰：「重發之者，此

有用牲之失，嫌異常水，故更發之。」既戒鼓而駭衆，

【補曰】警鼓傳達，衆則駭動。用牲可以已矣。【補

曰】孔穎達引《詩·雲漢》、《禮·祭法》謂爲水旱禱祭則有牲。救日以鼓兵，救水以鼓衆。【補曰】疏曰：「救

日以鼓兵者，謂伐鼓以責陰，陳兵示禦侮。救水以鼓衆者，謂擊鼓聚衆，皆所以發陽。」案，董仲舒曰：「大旱雩祭而請雨，大水鳴鼓而攻社，天地之所爲，陰陽之所起也。或請焉或怒焉者何？大旱者，陽滅陰也。陽滅陰者，尊壓卑也，雖大甚拜請之而已，無敢有加也。大水者，陰滅陽也。陰滅陽者，卑勝尊也，日食亦然，自下犯上，以賤傷貴，皆逆節也，故鳴鼓而攻之，朱絲而脅之，爲其不義也。」又案：《公羊》曰：「于門，非禮也。」孔廣森曰：「時蓋以五祀秋祀門，故因爲水禳焉，然非禮典。」

冬，公子友如陳。【補曰】杜預曰：「公子友，莊

公之母弟。稱公子者，史策之通言。」文彞案：友謚曰成季，不稱公弟，與齊年、鄭禦異文，明內外異例也。凡外書弟者，來我則以貴錄，出奔見殺則以親錄，亦兼見無罪殺世子亦以親錄，帥師亦以親貴錄。內書弟者則以賢錄，然必於其卒而稱之，此皆《傳》之明文，惟不言帥師耳，然亦推而可知也。如者，內稱使之文，此報女叔之聘也。諸魯出朝

聘，皆直書「如」，不稱「朝聘」者，何休以爲尊內。夫言「如」不言「朝聘」，安見其尊？且何以有變文言「朝」者？何以外相朝亦言「如」乎？杜預以爲不果彼國必成其禮，夫朝聘之事，既至彼國則禮無不成，不至而不成則有他文矣。且納幣莅盟之屬，豈能果彼國必成其禮？何以明書也？孫覺曰：「聘問之禮，諸侯常事，略而不書。若記其所往之事者，皆非常也。」吳澂、程端學皆曰言「如」者，內辭也。說並得之。公朝、大夫聘，皆爲恒事，恒事不志，史文之常，別內於外，非有他義。外相朝言「如」，以別於其來朝者，正由此例推之也。至如拜田、拜命、拜盟、拜葬、拜師、拜辱、聽政、聽朝聘之數，弔喪、弔敗、納賂、賀慶有言謝罪獻俘之屬，皆直書「如」，亦以恒事而不志，且其事多，於朝聘中包之也。公出奔喪會葬於大國，則亦不目其事，雖同之於恒事，而其事則觀上下文而可知，亦所以別於小國之來我者也。此等蓋亦皆史文之舊，惟莅盟、乞師、納幣、逆女舊史皆重而志之，外內同辭同例，不在恒事不志之列。至君子則以納幣之得正禮者爲恒事，成十一年言「如齊」不言「納幣」是也。以親迎爲恒事，上年《傳》所云是也。外來納幣亦有志而不志，來親迎則以志爲正，不志爲變，皆案《經傳》而可知也。內大夫出會葬者，上言「如」，下言「葬某某」，諸

侯之大夫來會葬我者則皆全沒其文，以別於王臣之來者，此又錄內略外之例。

二十有六年春，公伐戎。○【撰異曰】《公羊》

無「春」字，唐石經及板本脫也，陸渚所見已然。

夏，公至自伐戎。

曹殺其大夫。【補曰】《孟子》述齊桓公葵丘之命

曰「無專殺大夫」，諸稱國以殺，皆以諸侯專殺爲罪，而大夫則多無罪者，例在僖七年十年《傳》。又徐幹《中論》以爲譏其不能以智自免，此義亦時有之。言大夫而不稱名姓，無命大夫也。徐邈曰：「于時微國衰陵，不能及

禮，其大夫降班失位，下同於士，故略稱人。而《傳》謂之無命大夫也。」莒慶、莒挈、邾庶其、邾快皆特以事書，非實能貴，故略名而已。楚雖荆蠻，漸自通於諸夏，故莊二十三年書「荆人來聘」，文九年又褒而書名，國轉彊大，書之益詳。然當僖公、文公之世，楚猶未能自同于列國，故得臣及蒍並略名。惟屈完來會諸侯以殊禮成之，楚莊王之興，爲江漢盟主，與諸夏之君權行抗禮，其勢彊于當年，而事交於內外，故《春秋》書之，遂從中國之例。夫政俗隆替，存乎其

人，三后之姓，日失其序，而諸國乘間，與之代興，因詳略之文則可以見時事之實矣。秦爵伯也，土據西周，班列中夏，故得稱師有大夫。其大夫當名氏，而文十二年秦術略名，蓋于時晉主魯盟，而秦方敵晉，則魯之于秦，情好疏矣。禮以飾情，情疏則禮略，《春秋》所以略文乎？又吳札不書氏，以成尊于上也。宋之盟，叔孫豹不書氏，以著其能恭，此皆因事而爲義。【補曰】命大夫者，命卿也。凡諸小國，其君亦皆有命卿。而云「無」者，當時小國命卿出，僅附列國卑者之末，不以爲卿也，必以爲下同於士，亦未然也。又注「荆人來聘」下當改云僖元年進書楚人，二十一年又進書大夫名，文九年又進書楚子，得臣之上，當增宜申史文詳略。因乎時事，勝於《公羊》家三世異辭之說。秦稱師有大夫，亦較《公羊》秦無大夫之言爲長。疏引《薄氏駁》曰：「術之名爲晉貶秦，然楚亦敵晉，何以不略而貶之？」范答之曰：「秦以交疏之故而略其臣，楚與諸夏會同，所以不略也。」無命大夫而曰大夫，【補曰】據莒殺直言公子。賢也，爲曹羈崇也。【補曰】疏曰：「《薄氏駁》曰：

「曹羈出奔，《經》無歸處，曹自殺大夫，何以知是羈也？又此注雖多，未足通崇之義，徒引證據，何益於此哉？」范答

之曰：「羈，曹之賢大夫也，曹伯不用其言，乃使出奔他國，終於受戮，故君子愍之，書殺其大夫，即是崇賢抑不肖之義也。」案大夫出奔，或書出不書人，秦后子是也；或書人不書出，蔡季是也。史有闕漏，非是一般，何得以無歸之文則怪其非羈也？是范氏論崇曹羈之事也。曹羈三諫不從，是《公羊》之說也。」文烝案：范意曹所殺者即是羈，以莒殺意恢《傳》觀之，似得其實。或曰成十五年《傳》曰：「夫人之義，不踰君也，為賢者崇也。」彼謂崇伯姬之賢，故共公得書葬，不欲使伯姬配失德之君也。此謂崇曹羈之賢，故曹得言大夫，羈任為大夫，不欲使居無大夫之國也。似所殺別是一人，不當如范說。

### 秋，公會宋人、齊人伐徐。【補曰】杜預曰：

「宋序齊上，主兵。」文烝案：不致者，會人共伐，外無君也。羅泌以為徐即戎也。前稱戎，後稱徐，猶荆之進而稱楚也。此說亦可存。但如戎伐凡伯，非徐明矣。○【撰異曰】陸渚《纂例》曰：「《左氏》無「公」字，張洽據古本《左氏》亦無「公」字，今《左氏》有「公」字。」

冬十有二月癸亥，朔，日有食之。

二十有七年春，公會杞伯姬于洮。伯姬，莊公女。洮，魯地。【補曰】此皆本杜預。《左傳》曰：「非事也。」何休曰：「書者，惡公教內女以非禮也。洮，內地。女會來例皆時。」文烝案：會不致者，蓋舊史無之，會婦人亦不告廟也。何氏又曰：「伯姬不卒者，蓋不與卒於無服。」案：無服則不卒者，亦本舊史例也，杞伯姬之無服，是當為服而不服耳。徐彥以為此之杞伯姬是嫁於大夫者，與上下文各為一人，非也，何氏亦無此意。○【撰異曰】洮，本或作「桃」。

夏六月，公會齊侯、宋公、陳侯、鄭伯同盟于幽。同者，有同也，同尊周也。【補曰】疏

曰：「復發《傳》者，前同盟于幽，諸侯尚有疑者，今外內同心，推桓為伯，得專征伐之任，成九合之功，故《傳》詳其事也。」文烝案：疏言「諸侯有疑」，當改云「前未授之諸侯」，再言尊周，說見前，疏未悟。於是而後授之諸侯也。【補曰】十三年「外疑之」，十六年「內疑之」，猶未以諸侯授之，至此而後授之也。授之者，謂外序爵，內稱公。其授之諸侯何也？齊侯得衆也。【補曰】至此桓已得衆，故雖未受王命，而遂以諸侯授之。據《左傳》，是年冬「王使召伯廖賜齊侯命」，杜預曰：「賜，命為侯伯。」知

此盟時尚未受命。王元杰曰：「桓公創伯之始，其事亦有可觀，仗義尊周，制強服異，自其始會北杏，再會于鄆。陳、鄭之叛服無常，魯、宋之疑信未定，磨以歲月，人知有齊。王室既卑而稍尊，諸侯群起而略定。威令已振，事權有歸，再盟于幽，陳、鄭服從，願與之盟，非出勉強。」桓會不致，安之也。桓盟不日，信之也。【補曰】四句發通例，《公羊》略同。信其信，仁其仁，【補曰】言《春秋》之意，既信桓之信，又仁桓之仁。《論語》曰：「桓公九合諸侯，不以兵車，管仲之力也。如其仁，如其仁。」衣裳之會十有一，未嘗有歃血之盟也，信厚也。十三年會北杏，十四年會鄆，十五年又會鄆，十六年會幽，二十七年又會幽，僖元年會榿，二年會貫，三年會陽穀，五年會首戴，七年會寧母，九年會葵丘。【補曰】申上信也。疏曰：「《論語》稱九合諸侯者，貫與陽穀二會，管仲不欲，故去之。鄭《釋廢疾》云，自柯之明年，葵丘以前，去貫與陽穀，固已九合矣，則鄭意不數北杏。」文烝案：鄭去貫、陽穀，又去北杏，又不可加以柯，則止八會，故疏述諸說紛紛疑之。皇侃、陸德明說《論語》更滋舛誤，孫復則謂去北杏與單伯會鄆爲九合，其實皆非也。《論語》九合即《穀梁》十

一會，《穀梁》每會計之，《論語》則據所會之地，合二鄆爲一，二幽爲一也。俞樾以爲：「九合者大概之辭，以極數言之。古人凡言數，少半言三，太半言七，舉中言五，舉極數則言九，如曰叛者九國，反者九起，皆見其至多耳。」案：俞說亦通。「歃血」，《玉篇》及《士相見禮》音義引作「沾血」。沾，嘗也。沾，即「鉗」字。《廣雅》「鉗」、「嘗」同訓「食」。兵車之會四，未嘗有大戰也，愛民也。僖八年會洮，十三年會鹹，十五年會牡丘，十六年會淮，於末年乃言之。不道侵蔡伐楚者，方書其盛，不道兵車也。此則以兵車會而不用征伐。【補曰】申上仁也。《傳》言「未嘗有大戰」，於四會外廣言之，侵蔡伐楚之屬俱非大戰。《傳》意論會則四以兵車，論侵伐則從無大戰也。《國語》、《管子》皆言兵車之會六，乘車之會三，與《傳》及《論語》相違，知其皆不足信也。自桓會不致以下，因其始得衆，授之諸侯，遂具言桓之美。

秋，公子友如陳，葬原仲。原仲，陳大夫。原氏，仲字。【補曰】此本杜預。杜又曰：「禮：臣既卒不名，故稱字。」何休曰：「稱字者葬從主人。」二說當兼之。孔穎達引《玉藻》曰：「士於君所，言大夫沒矣則稱謚若字。」又

引《穀梁》桓二年《傳》。文烝案：不言葬陳原仲者，蒙如陳爲一事。《左傳》曰：「原仲，季友之舊也。」言葬不言卒，不葬者也。外大夫例不書卒。【補曰】有葬無卒，

是不當書葬者。不葬而曰葬，諱出奔也。言季友

辟內難而出，以葬原仲爲辭。【補曰】辟內難者，《公羊》文

謂公子慶父、公子牙通乎夫人以脅公，是內難也。《左傳》

但言其仲通哀姜，而《穀梁》家舊說云夫人淫於二叔，則同

《公羊》矣。季友避內難，乃以葬原仲事請於君而行，其事

非奔，其情是奔，故以出奔言之也。不諱其情則不須書其

事，當直言公子友如陳，同於常文，今加言「葬原仲」，書所

不當書，以其所書在此，則知其所諱在彼也。《公羊》曰「通

季子之私行」，又曰「請至于陳」，凡大夫出竟，雖私行，皆請

於君，故得以「如」爲文。以《左傳》考之，僖五年公孫茲如

牟，《左傳》曰「娶焉」；文六年季孫行父如陳，《傳》曰「聘於

陳，且娶焉」；文七年公孫敖如莒莒盟，《傳》曰「且爲襄仲

逆」；成八年公孫嬰齊如莒，《傳》曰「逆也」；昭二十五年叔

孫婣如宋，《傳》曰「宋元夫人生子，妻季平子。昭子如宋

聘，且逆之」。彼五者皆有私事，亦容有請而行者，《經》皆

直言「如」，明此公子友亦本當直言「如」矣。杜預於茲之如

牟、娶齊之如莒皆以爲聘，孔穎達以爲牟是微國，魯不應使卿聘牟，當是公孫茲請於公，因娶而聘。孔說甚有理，疑公子友亦是因葬而聘也。

冬，杞伯姬來。歸寧。【補曰】《左傳》文也。《公

羊》曰：「其言來何？直來曰來。」何休曰：「直來，無事而

來也。諸侯夫人尊重，既嫁，非有大故不得反，唯自大夫妻

雖無事歲一歸宗。」惠士奇曰：「穀梁子稱「婦人既嫁不踰

竟，踰竟非禮也」，然則夫人歸寧，非禮也。諸侯夫人父母

在，使卿歸寧，沒則否。」《左氏》襄十二年《傳》「秦嬴歸于

楚」，「司馬子庚聘于秦，爲夫人寧」，時秦嬴母在，身不自歸

而使卿寧。《左傳》以爲禮則凡內女嫁於諸侯，雖父母在，

直書來者，皆非禮也。何氏謂夫人惟有大故得反，大故謂

奔父母喪也。又謂大夫妻雖無事歲一歸宗，說見《喪服

傳》，此謂同國也。如大夫娶乎鄰國則不可，宣五年譏子叔

姬是也。

莒慶來逆叔姬。慶，名也。莒大夫也。叔姬，

莊公女。《禮·檀弓》記曰：「陳莊子死，赴於魯，魯人欲勿

哭，繆公召縣子而問焉。縣子曰：「古之大夫束脩之間不

出竟，雖欲哭之，安得而哭之？今之大夫，交政於中國，雖

欲勿哭，安得而勿哭。」則大夫越竟逆女，非禮也。董仲舒曰：「大夫無束脩之餽，無諸侯之交，越竟逆女，紀罪也。」

【補曰】注解慶、叔姬本杜預。莒無大夫，以國氏，而言「慶」者，以來逆目之也。僖二十五年又書「莒慶」，《傳》特言之，《公羊》以爲書此者，譏大夫越竟逆女也。案：禮重親迎，而大夫不得私出疆。大夫妻有歸宗之義，而婦人既嫁不踰竟，是知大夫不得娶於他國。鄭君《喪服注》謂「古者大夫不外娶」，而何休之意以爲大夫任重，爲越竟逆女，於政事有所損曠，故竟內乃得親迎，所以屈私赴公也。劉敞以爲莒慶非有君命，其實亦請於君而行。諸侯之嫁子於大夫，主大夫以與之。君不敵臣。【補曰】《公羊》以爲同姓大夫。來者，接內也。接內，謂與君爲禮也。

【補曰】接內者，接公也。隱二年《傳》言「來交接於我」亦同意。此兼見凡書來之例，蓋亦通於來奔。不正其接內，故不與夫婦之稱也。夫婦之稱當言逆女。【補曰】或疑不接公爲禮，而言逆女則與履綸爲君逆文不別，不知不接公則不得言來，史例所不志。宋蕩伯姬之嫁不見《經》，是其證也。又案：公孫茲、季孫行父、公孫嬰齊皆因出聘而自爲逆。此年莒慶來逆，宣五年齊高固來逆，亦或

是因聘而逆。但我往則以聘爲重，外來則以接公逆女爲重，故內外異文。孔穎達曰：「從魯而出，私娶輕而君命重，故書聘不書逆。自外而來，嫁女重而受聘輕，故書逆不書聘。」其說最爲有見，惟言逆女重不言接公重則猶非也。若莒慶、齊高固逆不接公，亦當以卿來行聘爲重矣。○呂本中曰：「此一歲中會洮、葬原仲、伯姬來、莒慶來逆，皆爲非禮，然則治平之世，聖王在上，惟能使人克己復禮而已爾，使人克己復禮，《春秋》所爲作也。」文烝案：呂說葬原仲不合《傳》義，而其言能見大意。

杞伯來朝。杞稱伯，蓋時王所紂。【補曰】此本杜預。

公會齊侯于城濮。城濮，衛地。



# 春秋莊公閔公經傳第三補注第八

穀梁 范氏集解 鍾文烝詳補

二十有八年春王三月甲寅，齊人伐衛。

衛人及齊人戰，衛人敗績。【補曰】疏曰：「伐，戰

兩舉者，初伐其竟內，戰在國都，故兩舉之。」胡安國曰：

「日者，戰之日也。齊伐方以是日至，衛即與戰。」文烝案：

胡說即《公羊》兩言「至之日」。於伐與戰，安戰也？

問在何處戰。戰衛，【補曰】疏曰：「謂衛都。」戰則是

師也。【補曰】齊是霸國，既言戰非君，則宜稱齊師。其

曰人何也？微之也。何爲微之也？今授

之諸侯，而後有侵伐之事，故微之也。齊桓始

受方伯之任，未能信著鄰國，致有侵伐之事。貶師稱人，以

微之也。【補曰】注首句「方伯」當改作「侯伯」，此本《左

傳》，非《傳》意。《傳》言「授之諸侯」，謂上年盟幽，《春秋》

授之也。《公羊》曰：「衛未有罪。」董仲舒曰：「齊桓爲幽之會，衛人不來，其明年，桓公怒而大敗之。」其人衛何也？【補曰】衛爲諸姬，魯之寮國，非君言戰，亦宜稱師。

以其人齊，不可不人衛也。人不可以敵于師，師不

可以與人戰，故亦以衛師爲人，衛非有罪。【補曰】霸國尚

稱人，不可稱衛師也。衛小齊大，其以衛及之何

也？以其微之，可以言及也。【補曰】言以其微

之，可從以主及客之常文，否則當以齊及衛，猶晉與秦、楚

戰必以晉及秦及楚也。齊大而衛小，晉親而秦疏，晉夏而

楚夷，一內之一外之也。其稱人以敗何也？【補

曰】言敗，言敗績，無稱人者，敗績雖小國夷狄稱師。不

以師敗於人也。人輕而師重。【補曰】宋襄特變文以

責之，非常例。

夏四月丁未，邾子瑱卒。【補曰】邾卒書日始

此，或是克不正項正。

秋，荊伐鄭。荊者，楚也。其曰荊，州舉

之也。【補曰】前書荊人矣，故復發《傳》。

公會齊人、宋人救鄭。○【撰異曰】《公羊》「宋

人」下有「邾婁人」。陸渚所見《穀梁》、《左氏》似無「公」字。

善救鄭也。【補曰】重發《傳》者，嫌與王人異也。程子

曰：「齊桓伯主，魯望國，宋王者後，此救鄭制楚之始，蓋天下大勢所在。」朱朝瑛曰：「齊、宋非君而公會之者，齊之南伐，以魯為主也。」文彙案：朱說本《國語》、《管子》，得之前伐徐亦是也。北伐以燕為主，則伐山戎是，惟西伐以衛為主，未見耳。不致者，會人共救，外無君也。

冬，築微。微，魯邑。築例時。【補曰】築者，以杵

搗土，有所造也。○【撰異曰】微，《左氏》作「郿」。案：

《音義》云「《左氏》作「麋」，《公羊音義》同。今《左氏》皆作

「郿」，段玉裁以爲「麋」、「眉」相假，或古作「築眉」，後加

「邑」耳。山林藪澤之利，所以與民共也。【補

曰】周禮注曰：「積石曰山，竹木生平地曰林，水鍾曰澤，

澤無水曰藪。」又曰：「水希曰藪。」《商子》曰：「地方百里

者，山林處什一，藪澤處什一，谿谷流水處什一，都邑蹊道

處什一，惡田處什二，良田處什四。」其言「山林」即《王制》

之「山陵林麓」，今《商子》「林」作「陵」。虞之，非正也。

虞，典禽獸之官，言規固而築之，又置官司以守之，是不與

民共同利也。築不志，凡志皆譏也。【補曰】虞者，掌山澤

之官。《廣雅》曰：「虞，候望也。」惠士奇曰：「司馬相如《上

林賦》「亭皋千里，靡不被築」，郭璞注：「皆築地令平。」

案：築之者，禁之也，凡所被築，悉爲禁地，有官守之。梁

惠，成王發逢忌之藪以賜民，明舊禁而守之。齊之衡鹿舟

鮫，虞候祈望，亦是也。文彙案：注言「築不志」，本成十八

年《傳》文。「凡志皆譏」即隱七年《傳》發城例文，明同例。

大無麥、禾。○【撰異曰】何休說此爲秋水所傷，

即《漢書·五行志》董仲舒說也。各本《漢書》載此《經》遂

作「大水亡麥禾」，王念孫據景祐本無「水」字辨正其誤。

大者有顧之辭也。【補曰】疏曰：「顧，猶待也。」案：疏

非也。《說文》：「顧，還視也。」《詩》箋「旋視也」。書「大

無者，下注所謂不收甚。《傳》以大爲有顧者，對七年無麥

苗爲說也。彼直言無，爲同時，此言大無，爲有顧。於無

禾及無麥也。一災不書，於冬無禾，而後顧錄無麥，故

言「大」，明不收甚。【補曰】此所謂有顧之辭也。秋雖無麥

而禾猶有苗，是謂之嫌，不足記於策。疏曰：「徐邈亦云

「至冬無禾，於是顧錄無麥」是也。」范以「大」爲不收甚，不

收甚故顧錄。顧錄之意，無與於甚不甚，范非也，以爲甚則

是也。秋既無一穀，冬所無，自一穀至於四穀，皆得顧錄，故知范非也。此文稱「大無」，明是五穀俱無。禾所該者，實有四穀，故知范言「甚」則是也。穀不升，自二以上四以下皆當言饑，五穀不升當言大饑，此不言大饑者，疏曰：「不言饑，舊解以爲諱，或當雖無麥禾，得糴不至饑。」案舊解與下《傳》文合，其說得之。若以爲得糴不至大饑，則襄二十四年不出告糴尚能自救者，何爲反至大饑也？諸饑皆由水旱蟲，此無災而無麥禾者，劉向曰「土氣不養，稼穡不成」，服虔用其說，疏引徐邈亦曰「麥禾自死，不由水旱也」。蘇轍曰：「沈約《宋書·五行志》言吳孫皓時嘗有之，苗稼豐美而實不成，百姓以饑，闔境皆然，連歲不已，此所謂大無麥禾也。」土氣養禾之理，如蘇軾詩云「露珠夜上秋禾根」，自注云：「稻方含秀，每夜露珠起於其根，累累然，忽自騰上，或入莖心，或垂葉端，稻乃秀實。」是其理也。禾之說，自程瑤田以來失之。案：《詩·豳風》「十月納禾稼」，《說文》曰：「禾之秀實爲稼，莖節爲禾。」此禾與稼連言而別義，猶禮言禾與米也。《說文》又曰：「禾，嘉穀也。从木从丩省，丩象其穗。」何休《公羊》注曰：「生曰苗，秀曰禾。」此以禾該稼，單言禾者也。《廣雅》曰：「粢黍稻，其采謂之禾。」采、穗正俗字。粢即稷也。是禾者黍稷稻三穀既

秀之通稱也。《豳風》「十月納禾稼」之下又繼之曰「黍稷重穋，禾麻菽麥」，孔穎達《正義》曰：「禾稼、禾麻，再言禾者，以禾是大名，非徒黍稷重穋四種而已。其餘稻秫苽粱之輩，皆名爲禾，麻與菽麥則無禾稱，故於「麻麥」之上更言「禾」字以總諸禾。此文所不見者，明其皆納之。」孔解下「禾」字大概近是，若上「禾」字則得并包麻菽麥。以《詩》而推《春秋》，明此《經》「禾」字既據黍稷稻，又包菽矣。定元年書「殺菽」，明魯地雖不宜菽，亦非全不種菽。此《經》爲大饑之變文。大饑者，五穀不升，明以禾總四穀也。又古書多有以禾與黍稻並言者，蓋皆專以稷爲禾，非禾之本義也。

#### 臧孫辰告糴于齊。臧孫辰，魯大夫臧文仲。

【補曰】辰彊之曾孫也。彊生哀伯達，達生伯氏餅，餅生文仲辰。○【撰異曰】陸淳《纂例》、張洽皆曰「辰」，《穀梁》作「臣」。案：今不作「臣」。國無三年之畜，曰國非其國也。【補曰】非其所有。《墨子》引《周書》「畜」作「食」、「曰」作「者」。一年不升，告糴諸侯，【補曰】升，成也。與「登」同用。一年不成，遂至告糴，是無一年之畜。告，請也。【補曰】謂求請。《公羊》、《爾雅》同。糴，糴也。【補曰】《說文·米部》：「糴，穀也。从米翟」

聲。《人部》：「糴，市穀也。从入糴。」《出部》：「糴，出穀也。从出从糴，糴亦聲。」竊意古文唯有「糴」字，訓穀，而市穀、出穀皆用其字，因「糴」之爲穀，本施於市者之稱，而「糴」字有短言長言兩讀，故从之爲聲者，兼用而異施焉。市穀則短言，讀徒歷切，从翟羽，通作「狄」，狄人通作「翟」之例。出穀則長言，讀他弔切，从守桃，亦作守濯，桃佚亦作濯濯，及濯、濯、翟、濯諸音之例。後來別製从入糴、从出糴二字，分配其聲，而「糴」字罕用。作《傳》時已行此二字，而《經》文但依古文作「糴」，故《傳》曰「糴，糴也」，謂此「糴」字乃短言讀者，即今之「糴」字，是所以通古今，顯聲讀。自轉寫概作入部字，遂失其精意矣。《晏子春秋》言「田氏糴百姓之死命」，其義猶《詩》之「穀我士女，民莫不穀」，明是訓穀之「糴」而通作「濯」。趙岐解《孟子》「遏糴」云「遏止穀糴」，「穀糴」乃漢人常語，疑亦本作古文字。何休云：「買穀曰糴。」韋昭亦云：「市穀則皆入部字也，市買者以貨財。」《魯語》云：「臧文仲以鬯圭與玉磬如齊告糴，齊人歸其玉而與之糴。」孔穎達引以釋何休語是也。不正，【補曰】無一年之畜，故曰不正。故舉臧孫辰以爲私行也。爲內諱，故不稱使，使若私行。【補曰】如者，內稱使

之文也。今以告糴親臧孫辰之下爲急辭而後言于齊，是私行之文。何休曰：「諱使若國家不置，大夫自私行糴也。此上發義已備，下文反覆申明之。」孫覺曰：「《春秋》罪莊在位之久，畜積無素。《穀梁》最深切。」與孫復同。國無九年之畜曰不足，無六年之畜曰急，無三年之畜曰國非其國也。【補曰】《王制》、《賈子》皆有此文。諸侯無粟，諸侯相歸粟，正也。【補曰】歸者正，告者不正，《傳》以正形不正，猶《喪禮》之贈賻，歸爲正，求爲非正。歸粟，定五年文也。粟、糴二字，《廣雅》同訓「穀」，但彼買而歸之或直歸之則皆曰粟，唯據買者則曰糴，故《左傳》曰：「晉饑，秦輸之粟，秦饑，晉閉之糴。」《左傳》多古文，當亦本是「糴」字，足明《春秋》粟、糴異稱之義矣。沈彤曰：「案《周禮》大司徒職「大荒、大札，則令邦國移民、通財」；小行人職「若國凶荒，則令賙委之」；不聞有告糴之禮也。《外傳》以卿出告糴爲古制，其始於西周之衰乎？《逸周書·糴匡》曰「大荒，卿參告糴」，亦記衰周之制。」如沈說，又足發明正不正之義矣。夫周亟矜窮，王政所重，救災恤鄰，叔世所崇。齊禁貯粟，晉誠溫年，二伯盟書，此焉致謹？然在無畜之國則當深自引咎，故《春秋》大歸粟而

譏告糴，兩見其義。劉敞論告異弔災二事云：「凡物不當待於外者，已不可不內自竭也；其當待於外者，人亦不可不勉趨之也。」即此理也。隱六年冬，京師來告饑，公爲之請糴于宋、衛、齊、鄭。不書於《經》。杜預謂「告饑不以王命」，或是君子諱之，沒其文耳。臧孫辰告糴于齊，告然後與之，言內之無外交也。【補曰】《經》言

臧孫請齊而齊乃與，是知內無外交。內，謂魯君也。內無外交則臧孫私行矣。古者稅什一，宣十五年注詳矣。

豐年補敗，敗，謂凶年。【補曰】補者，謂豐年斂之，凶年發之。《漢書·食貨志》引《孟子》曰：「狗彘食人之食而不知斂，①野有餓莩而弗知發。」②言豐不知斂，凶不知發也。

常歲什一，豐年豫斂，是以能有畜。不外求而上下皆足也。【補曰】疏曰：「上謂君，下謂民。」雖累凶年，

民弗病也。【補曰】累者，謂三年、六年、九年。一年不艾而百姓饑，君子非之。【補曰】疏引麋信云：

「艾，穫也。」文烝案：艾，即「刈」字。《國語》「檜、刈、耨、耨」，韋昭曰：「刈，鎌也。」引伸之爲穫禾芟草。《傳》言今特一年不穫耳，而民已病饑，故君子非之，非之故諱不言

饑。使若麥禾自無，民猶不饑，以起私行之文，《傳》并見此意也。若然，宣公、襄公之篇皆是一年不艾而百姓饑，而直書饑者，彼無告糴文，百姓病饑，尚能自救，雖曰非之，以爲猶可言也。此則計無所出，仰給他國，得未可知，若直書饑，則其失愈顯，諱莫如深，故既諱如并諱饑也。其實大無麥禾，非饑而何？告糴于齊，非如而何？特立文不欲質言之耳。《傳》不言大饑而言饑者，便文也。《左傳》亦直曰「冬饑」，《國語》曰「魯饑」。不言如，爲內諱也。【補曰】《國語》言「如齊告糴」，紀事之常也，君子改舊史以立義。

二十有九年春，新延廡。○【撰異曰】「有」字

各本脫，今依唐石經補正。延廡者，法廡也。《周禮》天子十二閑，馬六種，邦國六閑，馬四種。每廡一閑。言法廡者，六閑之舊制也。【補曰】疏曰：「自「每廡一閑」以

①「之」，據中華書局點校本《漢書·食貨志下》補。

②「野」，原作「塗」；「弗」，原作「不」，據中華書局點校本《漢書·食貨志下》改。

上，《周禮·校人》有其事。馬六種者，彼《校人》云「辨六馬之屬，種馬一物，戎馬一物，齊馬一物，道馬一物，田馬一物，駕馬一物」是也，鄭云：「玉路駕種馬，戎路駕戎馬，金路駕齊馬，象路駕道馬，田路駕田馬，駕馬給宮中之役。」是天子六種之馬，分爲左右廄，故十二閑也。彼又云：「邦國六閑，馬四種，家四閑，馬二種。」鄭云：「諸侯齊馬、道馬、田馬各一閑，駕馬則分爲三，大夫則田馬一閑，駕馬分爲三也。」孔穎達曰：「延是廄之名，名之曰延，義不可知。」王葆曰：「廄名延廄，猶府名長府。」《左氏》說此以爲書不時，謂當以秋分馬還入廄時治廄。」其言新，有故也。言改故而新之。【補曰】當云因故，非改也。此發《經》通例。有故則何爲書也？【補曰】《公羊》曰：「脩舊不書。」何休曰：「新宮災後脩不書。」案：西宮大室亦是也。劉敞又言：「《魯頌》僖公脩泮宮得其時制，則《春秋》不書，《詩》有過厚，《春秋》無虛美。」古之君人者，必時視民之所勤，【補曰】勤，苦也。李軌《法言》注曰：「勤，苦。」高誘《戰國策》注曰：「苦，勤。」時視者，謂五年天子一巡守，三年二伯出巡職黜陟，一年方伯行國，諸侯行邑。說見《白虎通》。五年一巡守，與《周禮》十二年之說異。民

勤於力則功築罕，罕，希。民勤於財則貢賦少，【補曰】財者，貨實穀帛之通名。《周禮·大宰》注曰：

「財，泉穀也。」《坊記》注曰：「財，幣帛也。」貢賦，若《大宰》九賦九貢及《禹貢》九等賦。民勤於食則百事廢矣。凶荒殺禮。【補曰】百事皆廢，況功築貢賦乎？《玉藻》曰：「年不順成，君衣布摺本，鬬梁不租，山澤列而不賦，土功不興，大夫不得造車馬。」冬築微，春新延廄，以其用民力爲已悉矣。悉，盡。【補曰】不廢功

築，又頻焉，是盡也。黃仲炎引范仲淹皇祐中浙西興役之事，謂莊公豈知以此濟民，直困民爾。方苞曰：「後世興功築以救荒，上備之也。古者力役征於民則厲民甚矣。」張洽曰：「孔子以敬事而信，節用而愛人，使民以時，爲道千乘之國之法。《春秋》比事而書，見莊無君國子民之心，於斯三者，皆失之矣。」

夏，鄭人侵許。【補曰】張洽曰：「或齊命歟？」

秋，有蜚。《穀梁說》曰：「蜚者，南方臭惡之氣所生也，象君臣淫佚有臭惡之行。」【補曰】「劉向以爲蜚色青，近青眚也，非中國所有。南越盛暑，男女同川澤，淫風所

生，爲蟲臭惡。是時莊公取齊淫女爲夫人，既入，淫於兩叔，故蜚至。天戒若曰，今誅絕之尚及，不將生臭惡，聞於四方。莊不寤，其後夫人與兩叔作亂，二嗣以殺，卒皆被害。」文烝案：《穀梁說》言君臣淫佚者，君謂公與夫人，臣謂兩叔、慶父、牙也。《爾雅》曰：「蜚，蠹蜚。」郭璞曰：「即負盤臭蟲。」劉歆說《左氏》據之，以爲食穀故爲災，殆非「有」字之義。一有一亡曰有。【補曰】重發《傳》者，物不同也。

冬十有一月，紀叔姬卒。紀國雖滅，叔姬執節守義，故繫之紀，賢而錄之。【補曰】此本杜預。叔姬執節守義，固足爲賢，然非以賢錄也。《傳例》凡內女書卒者，皆以吾爲之變，而後史得書之。叔姬既不爲嫡，又已失國，而特書卒，明當時亦爲之變也。當時以叔姬不幸遭變，終全婦道，哀其遇而重其節，故特制服，待以嫡禮，一如伯姬，史因得書卒書葬，亦悉準伯姬之文也。文既不異，其賢自明，君子因史之舊，不必言賢而錄也。此一條張應昌得之矣。既書叔姬，自當繫紀，此又屬文之常，無他義。《白虎通》曰：「叔姬者，伯姬之娣也。伯姬卒，叔姬升于嫡，《經》不譏也。或曰嫡死不復更立，明嫡無二，防篡殺也。祭宗

廟，攝而已，以禮不聘爲妾，明不升。」

城諸及防。諸、防，皆魯邑。可城也，《傳例》曰：「凡城之志皆譏。今云可者，謂冬可用城，不妨農役耳，不謂作城無譏。」【補曰】此亦發通例。《左傳》曰：「書，時也。」又發例曰：「凡土功，龍見而畢務，戒事也；火見而致用，水昏正而栽，日至而畢。」以大及小也。【補曰】由書尊及卑之義推之，於言無所苟，亦發通例也。賈逵以爲言「及」，先後之辭，若使先後興役，當別言，不總言。

### 三十年春王正月。

夏，師次于成。【補曰】成，魯地，即桓三年、六年之「郕」。○【撰異曰】《左氏》無「師」字，杜注以爲將卑師少，張洽引任公輔說以爲微少則不見《經》，知當書師。段玉裁曰：「凡次皆師也，恐《左經》脫字。」次，止也。有畏也。欲救鄆而不能也。畏齊。【補曰】重發《傳》者，前言公，此言師，嫌異故也。不言公，【補曰】據次郎言公。恥不能救鄆也。【補曰】恥者，《經》恥之，齊桓非讐，恥而爲諱。

秋七月，齊人降鄆。【補曰】何休曰：「月者，重

於取邑。」○【撰異曰】陸淳《纂例》曰：「鄆，《左氏》作

「障」。案：今《左氏》不作「障」，《纂例》「鄆」字，刊本誤

「彰」。降，猶下也。【補曰】言猶者，義相近。《爾雅》、

《夏小正傳》皆曰：「降，下也。」則以爲本訓。戰國、秦、漢

之際多言「下」。降，古語。下，今語也。《春秋》言「降」，後

言「下」；《春秋》言「取」，後言「拔」；《春秋》言「敗」，後言

「破」；《春秋》言「滅」，後言「屠」；《春秋》言「伐」，後言

「擊」；《春秋》言「師」，後言「兵」。《傳》以「下」釋「降」。又

戰泓，敗般、入楚，《傳》皆有「擊」字，《左傳》亦時有「擊」字，

蓋左、穀梁相繼作《傳》，時語言漸異。鄆，紀之遺邑

也。【補曰】《公羊》同。又曰：「降之者何？取之也。取

之則曷爲不言取之？爲桓公諱也。外取邑不書，此何以

書？盡也。」葉夢得引《周禮·環人》「降園邑」，以爲諸侯

而擅納降，皆罪也。

八月癸亥，葬紀叔姬。不日卒而日葬，

閔紀之亡也。【補曰】此總發紀伯姬、紀叔姬卒葬四文

之義。言不日卒而日葬者，《經》之正例，內女卒皆日，不書

葬，葬則月之，宋共姬是也。今特相反，故據以問。言閔紀

之亡者，卒不日，削史之文，略其所當詳，明紀之亡也。葬

日，仍史之文，詳其所當略，明閔紀之亡而欲存之也。若不

特爲變文，則無以見義，故日。不日，特反常也。閔紀之亡

與隱二姬之失國各自爲義，書葬乃以見隱，《傳》已於葬伯

姬發文，故不須復發。

九月庚午朔，日有食之，鼓、用牲于社。

救日用牲，既失之矣。非正陽之月而又伐鼓，亦非禮。【補

曰】注兼用《左氏》說，非也。

冬，公及齊侯遇于魯濟。濟，水名。【補曰】

杜預曰：「濟水歷齊、魯界，在齊界爲齊濟，在魯界爲魯濟，

蓋魯地。」孔廣森曰：「濟水上也，斥言魯者。名山大澤，天

子不以封，故謂之魯濟可，謂之我濟則不可。」《左傳》曰：

「謀山戎也，以其病燕故也。」及者，內爲志焉爾。遇

者，志相得也。【補曰】疏曰：「重發《傳》者，齊爲伯

者，嫌與諸侯異也。」

齊人伐山戎。【補曰】自此諸戎名皆別言之，唯

下「獻捷」承此直言戎，餘無直言者。案：襄二十九年《傳》

曰：「其曰北燕，從史文也。」明此等皆從例，舉後以包前

也。何休以爲山戎行進故錄，非也。齊人者，齊侯



也。【補曰】下「獻捷」稱「齊侯」，又後有「齊侯伐北戎」，足明親伐。《左傳》宰孔曰：「齊侯北伐山戎，南伐楚。」其曰人何也？愛齊侯乎山戎也。不以齊侯敵乎山戎，故稱人。其愛之何也？【補曰】據伐北戎不愛。桓內無因國，外無從諸侯，而越千里之險北伐山戎，危之也。內無因緣山戎左右之國為內間者，外無諸侯者，不煩役寮國。【補曰】危其獨越險，故為愛辭。則非之乎？善之也。遠伐山戎雖危，勤王職貢則善。何善乎爾？燕，周之分子也，燕，周大保召、康公之後，成王所封。分子，謂周之別子孫也。【補曰】《經》之北燕是也。《音義》曰：「分，扶問反，又如字。本作「介」，音界。」注同。姚鼐以為《傳》本作「別子」，古「別」字作「介」，因誤作「分」，作「介」，范作注時猶未誤。貢職不至，山戎為之伐矣。言由山戎為害，伐擊燕，使之隔絕於周室。

三十有一年春，築臺于郎。【補曰】高誘《呂氏春秋》注曰：「積土四方而高曰臺，臺加木為榭。」何休

曰：「禮：天子有靈臺，以候天地；諸侯有時臺，以候四時。登高遠望，人情所樂動，而無益於民者，雖樂不為也。」《五經異義》載《公羊》說天子有靈臺、時臺、囿臺，諸侯但有時臺、囿臺，皆在國之東南二十五里。

夏四月，薛伯卒。【補曰】薛改稱伯，與滕同義。不名者，國小情疏，史不記名，從宿男例。不日者，或不正，或史以微國略之。不日而猶月，足知時卒為惡之明也。不葬者，或不曾，或亦史略之。自後薛不書卒，蓋不赴。至昭三十一年，與大國同例矣。

築臺于薛。薛，魯地。

六月，齊侯來獻戎捷。獻，下奉上之辭也。

《春秋》尊魯，故曰獻。【補曰】言獻，蓋據宗廟為辭。劉向《說苑》曰「獻之周公之廟也」。宜申來不月，此月者，疏引徐邈云：「霸主服遠之功重，故詳而月之。」齊侯來獻捷者，內齊侯也。【補曰】疏曰：「徐邈云，齊還經魯界，故使人獻捷。不入國都而言來獻，敬重霸主，親而內之也。麋信亦云，言內齊侯者，解《經》稱來之意也。范雖不注，理亦當然。楚人使宜申來獻捷，亦稱來者，宜申身來鄉魯，接公行禮，故得稱來，與齊侯異也。」不言使，內與同，不

言使也。泰曰：「齊桓內救中國，外攘夷狄，親倚之情，不以齊爲異國，故不稱使，若同一國也。」獻戎捷，軍得曰捷，【補曰】此句包宋捷言。戎菽也。菽，豆。【補曰】疏曰：「案《管子》云：『北伐山戎，出戎菽及冬蔥，布之天下。』則以戎爲豆也，故徐邈云『今之胡豆也』。」據僖二十一年《傳》及彼注意，則宋是中國，故捷不繫國，戎是夷狄，故繫之戎，又似不以戎爲豆。今疑不敢正，故兩載之。一解齊侯此時克山戎，并得胡豆來，故《傳》云「戎菽」，謂克戎之菽。」文烝案：「戎菽」之「戎」乃以名菽，非解《經》「戎」字，此承上句言，今此所得則戎菽是也。《管子》言「出戎菽」，《逸周書·王會》亦曰「山戎戎菽」，皆足爲此《傳》之證。此菽所以名戎菽者，自以其產於山戎而爲名，即後世之胡豆。至若《詩·大雅》之「荏菽」，《爾雅》、《毛傳》皆釋爲戎菽，荏戎之名，皆取大義，當如鄭君箋及孫炎注，以爲大豆與胡豆自是別物。孔晁以巨豆解《周書》「舍人」，樊光、李巡、郭璞並以胡豆解《爾雅》，皆失之。又案：劉向《說苑》曰「桓公分山戎之實，獻之周公之廟」，蓋戎菽外又有他物。

秋，築臺于秦。秦，魯地。不正，罷民三

時，【補曰】罷，疲通勞也。三時，春、夏、秋。《左傳》曰「三時不害」，《國語》曰「三時務農」。虞山林藪澤之利，【補曰】築臺猶築囿，亦禁守之。且財盡則怨，力盡則懟，懟，恚恨也。【補曰】多虞利，是財盡，屢罷民，是力盡。《爾雅》「懟」亦「怨」也。君子危之，故謹而志之也。【補曰】凡人已相對，未有人不安而已安者，況一國之民乎？故君子危之。志其三役，明視築微爲甚矣。以有三役，故言謹也。或曰倚諸桓也，【補曰】此存或說，謂《春秋》所以謹而志者，非但危之，乃以依倚諸桓之行事，如下所論也。倚者，謂《經》文倚彼爲義。○王引之曰：「倚，讀爲奇，奇，異也。奇諸桓者，異於桓也，謂書其異於桓者以譏之。王逸《楚辭》注云：「奇，異也。」古字「倚」與「奇」通，字或作「畸」。《莊子·大宗師篇》：「畸人者，畸於人而侔於天。」謂異於人而同於天，即《天下篇》之「倚人」也。《荀子》曰：「墨子有見於齊，無見於畸。」文烝案：董仲舒《繁露》曰：「人受命乎天也，故超然有以倚物。」桓外無諸侯之變，【補曰】謂來侵伐之變。內無國事，【補曰】謂災喪之事。兩言無者，《孟子》所謂國家閒暇

也。越千里之險，北伐山戎，爲燕辟地。辟，開。魯外無諸侯之變，內無國事，一年罷民三時，虞山林藪澤之利，惡內也。譏公依倚齊桓，而與桓行異。【補曰】《注》言「公依倚」，誤解上「倚」字也。《經》以魯事倚桓事，與伐戎獻捷之文相連相錯，明桓之善如彼，魯之惡如此，惡公與桓行異。張洽引《孟子》以爲「及是時，般樂怠敖」者也。

### 冬，不雨。

【補曰】疏曰：「徐邈云，僖十一年《傳》

曰「雩，不得雨曰旱」。然則此云「不雨」者，或當不雩也。范意亦未必然，或當不言旱不爲災也。」文烝案：言不爲災是也。《公羊》曰「記異也」。何休引京房《易傳》曰：「旱異者，旱久而不害物。」徐邈說失之。《傳》曰「冬無爲雩」，豈得於此言雩乎？不言無雨與無冰異者，常有忽無曰無，可以然而不然曰不。《易》曰「密雲不雨」，古之文例皆如此。書時者，例也，與旱同。

### 三十有二年春，城小穀。

小穀，魯邑。【補

曰】《左傳》曰「爲管仲也」。杜預曰：「小穀，齊邑。濟北穀城縣城中有管仲井。」范不從之，范是也。《左氏》昭十一年

《傳》楚申無宇曰「齊桓公城穀而實管仲焉」，則是穀也，非小穀也。齊有穀，魯有小穀。孫復曰：「曲阜西北有小穀城。」自孫氏以來，皆從范說。趙鵬飛因此疑《左氏》全書多附會。段玉裁曰：「徐彥《公羊疏》曰：『二《傳》作「小」字與《左氏》異。』此《疏》「作」字蓋誤，蓋是《穀梁》、《公羊》有「小」字，與《左氏》異也。《左氏》蓋本作「城穀」無「小」字。」

夏，宋公、齊侯遇于梁丘。遇者，志相得

也。【補曰】疏曰：「重發《傳》者，外與伯者遇嫌異，故發

之。」梁丘在曹、邾之間，去齊八百里，【補曰】杜預《釋例》：「宋地，名梁丘，高平昌邑縣西南梁丘鄉。」非不能從諸侯而往也，辭所遇，遇所不遇，大齊桓也。辭所遇，謂八百里間諸侯必有願從者而不之遇。遇所不遇，謂遠遇宋公也。【補曰】言齊侯遠至梁丘獨遇所不必遇者，既霸而能自下，《經》意大之也。地以梁丘而書齊、宋，其爲大桓明矣。宋序齊上者，齊侯既往遇之，又特下之，亦大桓也。

秋七月癸巳，公子牙卒。牙，慶父同母弟。

何休曰：「《傳》例大夫不日卒，惡也。」牙與慶父共淫哀姜，

謀殺子般，而日卒何也？鄭君釋之曰：「牙，莊公母弟，不言弟，其惡已見，不待去日矣。」甯案《傳》例諸侯之尊，弟兄不得以屬通，蓋以禮諸侯絕背，而臣諸父昆弟稱昆弟，則是申其私親也。宣十七年，公弟叔肸卒，《傳》曰：「其曰公弟叔肸，賢之也。」然則不稱弟，自其常例耳。鄭君之說，某所未詳。【補曰】注首句本杜預。謚曰僖。叔牙欲廢般立慶父，而季子鳩殺之。不書刺書卒者，時為牙立後，施以恩禮，若其自卒然，故史以卒書，而《經》仍之也。注引鄭君說而辨之，皆以牙為莊公母弟，《左傳》不言慶父與牙為莊之母弟，唯《公羊》有其文，蓋未可據。范意以此書日為疑義。今案：此當以下文慶父事比觀之，其義乃見。慶父首惡，牙次之。慶父猶公子遂，牙猶叔孫得臣也。慶父諱奔言如，又諱其縊死，則牙卒可書日以掩惡矣。遂卒見不卒之文，則得臣卒當去日以明惡矣。首從輕重之差，咸各相稱。繹《傳》所言而其所不言者，皆可以三隅反，先儒或未深思也。

### 八月癸亥，公薨于路寢。公薨皆書其所，謹

凶變。【補曰】此本杜預。路寢，正寢也。【補曰】《爾

雅》曰：「路，大也。」路寢亦曰大寢，此君每日聽政之寢，故為正寢。其庭曰大庭，是路門內之內朝。寢疾居正

寢，正也。【補曰】平時恒寢於燕寢，或夫人之寢。《詩》

言「與子同夢」是也。疾則移居正寢，此是正禮，自天子通於士，故《士喪禮》「死于適室」，《記》曰：「士處適寢，寢東首于北墉下。」鄭君曰：「將有疾，乃寢於適室。」男子不

絕于婦人之手，以齊終也。齊，絜。【補曰】此申上

二句意也。男女不同寢，而寢於正寢，猶祭而齊也。《士喪禮記》又曰「有疾，疾者齊」，鄭曰：「正情性也。適寢者不

齊不居其室。」又曰「養者皆齊」，鄭曰：「憂也。」又曰：「疾病，屬纊以俟絕氣，男子不絕於婦人之手，婦人不絕於男子

之手。」《喪大記》兩「絕」字並作「死」。鄭曰：「君子重終，為其相襲。」皆與《傳》義同也。《音義》曰：「齊」。本亦作

「齋」。注同。趙匡曰：「君必終於正寢，以就公卿也。大位奸之窺也，危病邪之伺也，若蔽於隱，是女子小人得行其

志也。」案：趙氏此論亦得兼通，但非《禮經》正義矣。夫人所薨之寢，《喪大記》亦以為路寢，然據《毛詩傳》「君聽朝於

路寢，夫人聽內事於正寢」，不於夫人亦言路寢。何休、服虔、杜預皆以夫人之寢為小寢，知夫人之正寢名小寢，與君

之大寢相對也。依鄭君及孔、賈諸說，天子六寢，路寢一，燕寢五。后亦六寢，正寢一，燕寢五。諸侯三寢，路寢一，

燕寢二。夫人亦三寢，正寢一，燕寢二。夫人之三寢蓋即桓十四年《傳》之「三宮」也。夫人三寢中之正寢，蓋即僖三十三年《經》之「小寢」也。但天子諸侯及后夫人之燕寢又通謂之小寢，蓋對路寢與正寢而言，未知僖所歿者是夫人正寢歟？是已與夫人之燕寢歟？疑不能明也。

冬十月乙未，子般卒。在喪故稱子。般，其名

也。莊公大子。不書弑，諱也。【補曰】案：《左傳》是孟任之子，而慶父弑之。注略本杜預也。疏曰：「《公羊傳》云：『君存稱世子，君薨稱子某，既葬稱子，踰年稱公。』」范意亦與之同。但踰年雖在國稱公，若未葬亦不得稱侯以接鄰國。桓十三年注譏衛惠是其事也。未踰年之君例不書葬，故子野亦不書。」文烝案：《公羊》又曰：「有子則廟，廟則書葬。無子不廟，不廟則不書葬。」鄭君駁許氏《異義》曰：「未踰年君者，魯子般、子惡是也，皆不稱公。書卒，弗謚，不成於君也。廟者當序於昭穆，不成於君則何廟之立？凡無廟者，為壇祭之。近漢諸幼少之帝，尚皆不廟祭而祭於陵。蔡邕《獨斷》曰：『殤、沖、質，三少帝，皆以未踰年崩，不列宗廟，四時就陵上祭寢而已。』」文烝案：三少帝皆以其元年崩，蔡通謂之未踰年，視鄭為疏。○【撰異曰】

乙未，《左氏》作「己未」。子卒日，正也。襄三十一年秋九月癸巳，子野卒是也。【補曰】日者，仍史文。不日，故也。文十八年冬十月，子卒是也。【補曰】不日者，削史文。若亦書日，無以別於正矣。未成君，不稱薨，則皆不地，故以日不日為例。有所見則日。閔公不書即位，是見繼弑者也。故慶父弑子般，子般可以日卒，不待不日而顯。【補曰】既有所見矣，故還從常例，不削舊史書日文也。君子之為《春秋》，董仲舒所謂明其義之所審，勿使嫌疑者也，故惟取其文之足以明義斯已矣。既足見義，不改恒例，全《經》之文，皆以是求之。

公子慶父如齊。此奔也。【補曰】後文弑閔

公而奔，此弑子般，明亦是奔。其曰如何也？據閔二年慶父奔莒，不言「如」。諱莫如深，深則隱，深，謂君弑賊奔，隱痛之至也，故子般日卒，慶父如齊。【補曰】深，幽深也。與《公羊》言「盈乎諱者」略相似。隱，微也，如「推見至隱之「隱」。注訓「痛」，非也。言《春秋》諱法，莫如文之幽深者，其諱最甚。如此《經》不言賊臣之奔，但言如，是諱文之幽深者。其文幽深則其事微隱，如此《經》言

如，爲幽深之文，則奔事微隱不著也。成九年《傳》曰「爲尊者諱恥，爲賢者諱過，爲親者諱疾」，閔公尊且親也，賊臣出奔，恥疾也，季子，賢也，不能即討，過也，三者兼之矣。

二句專解「如齊」之義，注合上子般日卒并言之，又非也。般弑而慶父奔，事固相因，但上《經》本應不日，而書日，不得謂之諱。凡所不言者爲諱，書日何諱之有？

苟有所見，莫如深也。閔公不書即位，見子般之弑，慶父出奔。

【補曰】此承上二句而足成其義。凡爲諱文者，皆以其事不沒而得諱，今此爲深諱之文，文深則事隱，事隱則疑於不見，不見則不可深諱，故又承上《傳》「有所見」之文以明之也。上《傳》言子般之卒，以有所見，得從常例。見者，見閔公繼故之文也。夫閔繼故則般被弑可知，即慶父弑般而奔亦可知。文雖深諱，事不竟沒，隱而有不隱者焉，則深諱可也。故曰：「苟有所見，莫如深也。」「有所見」三字即承上《傳》，故加一「苟」字以顯其意。凡《經》以有所見而從常文者，於上《傳》可類推，以有所見而深諱之者，又於此《傳》見例。

### 狄伐邢。

【補曰】《呂氏春秋》曰：「中山亡邢。」高誘曰：「中山，狄國也，一名鮮虞。」文烝案：邢實未亡，言

亡，非也。許翰曰：「《春秋》戎先見，荆次之，狄次之，而荆暴於戎，狄又暴於荆，南夷與北夷交，中國不絕若綫。使無齊桓攘服定之，豈復有諸夏哉？」

元年春王正月。繼弑君，不言即位，正

也。【補曰】疏曰：「復發《傳》者，以非父非君嫌異，故發

之。僖公又發之者，兄之後弟義異，故重發之。文公繼正之始，故發《傳》以明之。成公不發《傳》者，蒙之可知，故不發也。襄、昭發《傳》者，昭公承子野之卒，嫌其非正，故發《傳》以明之。昭繼子野，《傳》言繼正，嫌襄公與之異，故亦發《傳》。父子同有繼正之文，所以相發明也。或以襄非嫡夫人之子，嫌非正，故發《傳》。案：襄四年，夫人姒氏薨，彼注云「成公夫人，襄公母也」，明非爲母賤而發《傳》也。」文烝案：姒氏實是妾，或說是。又昭母歸氏亦妾也。親之非父也，兄也。尊之非君也，未踰年也。繼之如君父也者，受國焉爾。【補曰】《傳》重所自，故從繼弑君例。

齊人救邢。【補曰】救例時。不連上正月。善

救邢也。善齊桓得侯伯之道。【補曰】重發《傳》者，嫌霸國獨救義異也。

夏六月辛酉，葬我君莊公。莊公葬而後舉謚，謚所以成德也，於卒事乎加之矣。【補曰】疏曰：「復發《傳》者，桓公被殺，莊公好終，僖公葬緩，嫌異禮，故各發《傳》以明之。」

秋八月，公及齊侯盟于洛姑。洛姑，齊地。

【補曰】艾、柯等皆書「公會」，此書「公及」者，彼來會我也，故曰及者，內爲志，觀洛姑之盟而《傳》例無疑矣。此亦喪十三月而盟，隱盟昧亦近之。○【撰異曰】洛，一本作「路」，

《左氏》作「落」。盟納季子也。【補曰】據《左傳》，般弑

而季子奔陳，不書者，亦諱也。下言「來歸」，足知其奔矣。陸渢聞於師曰：「季子出奔不書者，慶父之難，季子力不能正，違而去之，權也；君立見召而來，義也。故聖人善其歸，不譏其去，以明變而得中，進退不違道也。」文烝案：陸說近之，然亦爲賢者諱過。胡安國亦是也。慶父則言「如」，季子則不書，又其別也。趙汭曰：「時閔公九歲耳，陳、魯方睦，季子嘗再如陳，是盟蓋季子援陳人以請於齊桓。」

季子來歸。【補曰】此在時例外，大夫歸人亦皆

時。其曰季子，貴之也。大夫稱名氏，今日子，是貴

之也。子，男子之美稱。【補曰】注末句與鄭君《士冠禮》注

同，非也。子者，士以上之貴稱，說詳「孔子生」下，又見「子

叔姬卒」下。不言公子友而稱季子，是貴之，而說者皆以

「季」爲字，又非也。稱字進於稱名，稱子又進於稱字，《鄉

射禮》曰「司正升自西階相旅，作受酬者曰某酬某子」，鄭君

曰：「某者，字也。某子者，氏也。稱酬者之字，受酬者曰

某子。旅酬下爲上，尊之也。」案：旅酬之禮，以尊酬卑，字

酬者，子受酬者。而曰下爲上，曰尊之，知稱子實進於稱

字，周禮之舊也。子既進於字則不須並稱之，但子文須有

所繫。以友之氏爲季，故繫之季。《儀禮》「某子爲氏」，此

文正同也。王季子是天子之大夫，例本當稱字，以其爲母

弟，加稱子。若列國之大夫，則稱字已爲變例。稱子者無

取於兼，稱齊高子自有明文，不可援王季子以相況也。季

爲字，又爲氏，後文言季友爲字，此言季子爲氏，各有所當

也。友之氏實爲季孫，此直言季者，言季孫而又言子，非屬

文所宜也。友之身得以季孫爲氏，下條論之。《傳》曰其曰

季子，貴之也；其曰高子，貴之也；其曰王季，王子也；其



曰子，尊之也。三文或同或異，則居可知矣。○稱子進於稱字，而《孝經》仲尼居，曾子侍，曾子稱子，夫子但以字稱。據《史記·弟子傳》：「夫子以曾子爲能通孝道，故授之業，作《孝經》。」陶淵明《五孝傳》云：「曾參受而書之。」則《孝經》之作亦夫子之意。所以與《春秋》異例而類下爲上之禮者。殷仲文注曰：「夫子深敬孝道，故稱表德之字。」又《論語》曰「孝哉閔子騫」，夫子稱弟子不名者獨此，明皆非常之文矣。其曰來歸，喜之也。大夫出使歸不書，執然後致，不言歸國，內之人不曰來，今言來者，明本欲遂去，同他國之人也。言歸者，明實魯人也。喜之者，季子賢大夫，以亂故出奔，國人思之，懼其遂去不反，今得其還，故皆喜曰季子來歸。【補曰】《公羊》語同，謂《經》順魯而喜之。朱子以爲魯亂已甚，季子歸國，國人皆慰，故國史喜而書之。後來立僖公，安社稷，有此大功，故夫子取之，因舊史文而書之，與取管仲意同。

冬，齊仲孫來。其曰齊仲孫，外之也。

魯絕之，故繫之于齊。【補曰】實是吾仲孫，繫齊以外之。《公羊》亦同。言來者，順外文也。案：慶父得稱仲孫，而仲孫自齊來得稱齊仲孫者。楚殺慶封，《傳》曰：「其以齊

氏何也？爲齊討也。」明慶封已爲吳大夫，本當言吳慶封，此齊仲孫之比也。下《傳》又曰「言齊以累桓」，明以齊桓受之，同之於齊人矣。其不目而曰仲孫，疏之也。

不目，謂不言公子慶父。【補曰】公子而不言公子，但言仲孫，是疏之。不曰齊慶父者，既繫諸齊，則不欲直其文。上言季即季孫，故連文言仲孫也。案：前後《經》文，仲慶父、叔牙、季友皆稱公子，其子稱公孫，其孫乃稱仲孫、叔孫、季孫，今慶父之身得稱仲孫者，仲孫、叔孫、季孫之氏雖至其孫，始爲專稱，其實當身已有此稱，已以爲氏。《左傳》於牙之卒曰立叔孫氏公孫茲，稱叔孫戴伯，又公子彊字子臧，稱臧僖伯，其子稱臧哀伯，亦稱臧孫達，明當時大夫通有此例，故一稱季，一稱仲孫也。諸言仲孫者，《左傳》皆謂之孟孫，又稱孟氏，他書皆然。《白虎通》云：「適長稱伯，庶長稱孟。」陸淳謂《左傳》諸國大夫有非庶而稱孟者，不知何故。其言齊，以累桓也。繫仲孫於齊，言相容赦有罪。【補曰】累者，緣坐也，延及也。此又申外之之義，以桓不能去慶父，又反受之，故遂同之於齊人，得爲外文也。閔公爲哀姜娣之子，而齊桓立之，慶父弑般之罪已不復論，又因慶父黨於哀姜，曲相容受，故以「累桓」之文大著其義，明



洛姑未盟以前，桓未有功，且有罪也。既盟洛姑，而納季子，則黜慶父、立僖公、殺哀姜相繼見於策矣。○《左傳》謂「齊仲孫湫來省難」，書仲孫者，嘉之。杜預以仲孫爲字，夫書字即是嘉之，何以不言齊侯，使若湫無君命，私來覘國，又何以得志？此不可通也。蓋時齊實有仲孫湫勸齊侯務寧魯難，《左氏》遂以爲湫實來，魯強附於齊仲孫來之《經》，謂之省難，正猶隱公時魯有鄭尹氏，後人強以當尹氏卒之《經》也。大氏莊、閔之篇，《左氏》於齊、魯事多闕略。

## 二年春王正月，齊人遷陽。

夏五月乙酉，吉禘于莊公。三年喪畢，致新

死者之主於廟，廟之遠主，當遷入大祖之廟，因是大祭，以審昭穆，謂之禘。莊公喪制未闕，特別立廟，廟成而吉祭，又不於大廟，故詳書以示譏。【補曰】此本杜預。唯第四句「大祖之廟」四字元文作「桃」一字。依《聘禮》注，諸侯大祖廟爲桃，遷主所在之名也。禘禘之說，自昔聚訟，文烝詳考之，周制三年一禘，五年一禘，而皆以喪畢之祭爲本。喪畢祫則後禘，喪畢禘則後祫，自爾更迭行此二祭，總之五年而再殷祭也。何休曰：「《禮》禘祫從先君數，朝聘從今君數。」

三年喪畢，遭禘則禘，遭祫則祫。今案：此年吉禘在五月，文二年祫嘗在八月。《毛詩傳》又言「夏禘秋祫」，竊意遭禘年而以秋冬祭者以祫代禘，遭祫年而以春夏祭者以禘代祫也。祫者，合也。合毀廟未毀廟之主於大廟，故文二年言「大事于大廟」也。禘者，遞也。諦也，第也。遷主既遞位，因以審諦昭穆，次第尊卑，陳毀廟主於大廟，而未毀廟新舊皆特祭，故僖八年言「禘于大廟」，此年言「禘于莊公」。《左傳》又言禘于武公、禘于襄公、禘于僖公也。逸《禮》有《禘于大廟篇》，專言大廟者，舉大以包之，猶僖八年言「禘于大廟」亦包群廟也。別論之於《傳》下及僖八、文二、宣八、昭十五、定八年諸處。吉禘者，不吉者也。【補曰】《公羊》曰：「其言吉何？言吉者，未可以吉也。」案：《汲冢紀年》康王三年「定樂歌，吉禘于先王」。《春秋》之例，喪畢吉祭，恒事不志，志之亦不言吉，猶當立者不言立，當以者不言以，故言吉知不吉，明未可以吉也。喪事未畢而舉吉祭，故非之也。莊公薨至此方二十二月，喪未畢。

【補曰】此申上意也。《公羊》曰：「曷爲未可以吉？未三年也。三年矣，曷爲謂之未三年？三年之喪，實以二十五月。」何休曰：「時莊公薨，至是適二十二月，所以必二十五

月者，取期再期，恩倍漸三年也。孔子曰「子生三年然後免於父母之懷，夫三年之喪，天下之通喪」，《禮·士虞記》曰「期而小祥」，曰薦此常事；又「期而大祥」，曰薦此祥事；「中月而禫」，是月也吉祭，猶未配。是月者，二十七月也。《傳》言二十五月者，在二十五月外可不議。」文烝案《傳》言「吉祭」即《士虞記》之「吉祭」也，在土直曰吉祭，在天子、諸侯曰禘，曰祫。鄭君解《士虞記》曰：「當四時之祭月則祭。」《左傳》例曰凡君薨，卒哭而祔，祔而作主，特祀於主，烝嘗禘於廟。賈逵、服虔解之曰，三年終禘，遭烝嘗則行祭禮。此說有禘無祫，非也。鄭君解《詩·玄鳥》、《大宗伯》、《王制》及作《魯禮禘祫志》，皆曰魯禮三年喪畢而祫於太祖，明年春禘於群廟，自爾之後，五年而再殷祭，一祫一禘。此說閔行吉禘，又先行祫，亦非也。何休解《公羊》曰：「遭禘則禘，遭祫則祫。」此說論祭年不論祭月，又非也。今以爲再期中月祥禫之後，春夏遭祭則禘，秋冬遭祭則祫，自後每六十月更迭禘祫，庶得其實也。禘祫之異，則孔穎達《詩·周頌》正義申鄭說云「祫則合聚祭之，禘則各就其廟」是也。此不言吉禘于大廟，舉大以包。而言于莊公者，言莊公則祭大廟可知。言大廟則莊喪未畢，嫌不祭莊，據文自明，故《傳》不釋也。何休曰：「《經》舉重不書禘于大廟，

嫌獨莊公不當禘，于大廟可禘者，故加吉，明大廟皆不當。」何氏之意，禘祭亦合未毀廟主於大廟，與祫同禮。而莊主未當入大廟，今閔既禘大廟，又禘新宮，何氏不知禘祫之異，非也。《公羊》又曰：「其言于莊公何？未可以稱宮廟也。」何休曰：「時閔公以莊公在三年之中，未可入大廟，禘之於新宮，故不稱宮廟。」又曰：「曷爲未可以稱宮廟？在三年之中矣。」何休曰：「當思慕悲哀，未可以鬼神事之。」杜預別爲一解，以是時廟之遠主未遷，莊主未入廟，故謂別立廟。別立廟則非後日之莊宮，故不得稱宮。杜氏非也，《公羊》是也。莊公即莊宮，以在三年中，不忍稱宮，與西宮、新宮不言謚同意。《公羊》又曰：「吉禘于莊公，何以書？譏。何譏爾？譏始不三年也。」賈逵說此《經》曰：「禘者，遞也。審諦昭穆，遷主遞位，孫居王父之處。」《後漢書》張純奏曰：「禘之爲言諦，諦定昭穆尊卑之義也。」禘祭以夏四月，夏者陽氣在上，陰氣在下，故正尊卑之義也。」崔靈恩曰：「禘以夏者，以審諦昭穆，序別尊卑。夏時陽在上，陰在下，尊卑有序，故大次第而祭之。故禘者，諦也，第傳改。」

①「定」，原作「謚」，據中華書局點校本《後漢書·張純列傳》改。

也。《說文》曰：「禘，諦祭也。」段玉裁注曰：「諦者，審諦昭穆，恐有如夏父弗忌之逆祀亂昭穆者，故於禘時審諦而定之。天子諸侯之禮，兄弟或相爲後，諸父諸子或相爲後，祖行孫行或相爲後，必後之者與所後者爲昭穆，不與族人同昭穆。」故《仲尼燕居》曰：「嘗禘之禮所以仁昭穆也。」《中庸》曰：「宗廟之禮所以序昭穆也。」○諸侯皆有禘祫二祭，趙鵬飛嘗論之。劉向《五經通義》言：「王者諸侯三年一祫，五年一禘。」自前漢《穀梁》家說已如此。而《明堂位》言「成王命魯禘」，《祭統》言「成王、康王賜魯大嘗禘」。大嘗者即祫，二文並爲特賜魯者，謂特賜以天子之禮樂也，故《左傳》晉荀偃、士句曰：「諸侯宋、魯，於是觀禮。魯有禘樂，賓祭用之。」《禮運》孔子言「魯禘非禮」，《論語》言「禘自既灌，吾不欲觀」，「或問禘之說，曰不知也」，又言「知其說者之於天下」，明以魯有王禮爲異也。《左傳》例曰「烝嘗禘於廟」，僖八年《傳》曰「禘而致哀姜」，《五經異義》曰：「《左氏》說歲祫及壇墠，終禘及郊宗石室。」終者，謂孝子三年喪，終則禘於大廟，以致新死者也，《漢書》劉歆引《國語》「歲貢終王」以爲壇墠則歲貢，大禘則終王。又襄十六年冬，晉人辭於魯曰：「寡君未禘祀。」杜謂「三年喪畢之吉祭」，是《左傳》及《傳》說有吉禘，無吉祫也。劉歆、賈逵之

徒皆云禘祫一祭二名，禮無差降。孔穎達《王制正義》曰：「《左氏》說及杜元凱皆以禘爲三年一大祭，在大祖之廟。《傳》無祫文，然則祫即禘也。取其序昭穆謂之禘，取其合集群祖謂之祫。」是諸儒既以喪畢之三年推諸自後之三年，又知祫必不可廢而彌縫之也。致「新死者」之言，起於致哀姜之誤，禘必於大廟，亦與此《經》及他《傳》禘群廟之文不合；禘祫爲一，與其舊說所云歲祫終禘者又相乖戾。歲祫終禘，亦非《國語》本文，明其說皆不可用也。晉平公禘祀一文似可爲喪畢專行禘之證，其實有禘必有祫，但無文以見之耳。文二年之祭，《傳》及《公羊》皆爲吉祫，而《左傳》晉荀偃、士句言魯有禘樂及《論語》、《明堂位》、《禮運》皆言魯禘不言祫者，皆是舉祫以該祫，唯《祭統》則備言之也。禘與祫斷非一祭，鄭衆說《周禮》，追享爲禘，朝享爲祫，其文稱四時之間祀在時祭之外。鄭君說《周禮》，肆獻裸爲祫，饋食爲禘，其文在時享之上。《公羊》曰「五年而再殷祭」，《漢書》韋玄成等四十四人奏議釋之曰言「壹禘壹祫也」。何休曰「殷，盛也」。謂三年祫，五年禘。劉向《說苑》、許慎《異義》、《說文》、《春秋說》並有其文，而劉氏作《五經通義》及張純引《禮》說並言三年一閏，天氣小備，五年再閏，天氣大備，故三年一祫，五年一禘，其義尤明也。【眉

批：「《說文》亦云《周禮》。此五句依陳壽棋校正本。《異義》謹案：三歲一禘，五歲一禘，此周禮也；三歲一禘，疑先王之禮也。鄭君駁之據《禮識》殷之五年殷祭亦名禘，以爲三年一禘，五年一禘，百王通義，鄭說是也。《周語》云：「日祭，月祀，時享，歲貢，終王，先王之訓也。」《楚語》云：「古者先王日祭月享，時類歲祀。」《荀子》說湯武之制與《周語》文同，而先儒說《周語》多以終王爲終禘，故許氏因疑其爲先王之禮，謂其不始於周也。許此說亦是也。五歲禘爲殷禘，三歲禘爲終禘吉禘，其實本無二禮也。喪終之祭不必爲禘，而終禘之說可通，至以歲貢爲歲禘則不可曉。文二年《穀梁》、《公羊》明見吉祭有禘，《左傳》記鄭子張有殷祭，即《大傳》大夫千禘之祭，又可見殷祭有禘，從無云歲禘者，是其爲說必誤矣。竊意歲貢之祭謂以歲計者耳，不必解爲每歲。其祭則或禘或禘，禘者三歲，禘者五歲也。終王之祭亦或禘或禘，有遭禘年而禘者，故有三年一禘之說。若遭禘年而禘，則以三年喪畢爲主，不得謂之五年一禘也。

秋八月辛丑，公薨。【補曰】慶父與哀姜弑之。

○【撰異曰】陸淳《纂例》曰：「丑，《公羊》作「酉」。」案：今《公羊》不作「酉」。不地，故也。【補曰】重發《傳》者，

明異於桓也，下有所見。還從不地例者，不忍地也。張洽曰：「諱國惡者，臣子之禮也。存事實者，傳信之法也。聖人之《經》，兩存禮法，故不徒隱諱而已。而不書地，以變於常，又比事屬辭，以見其實，將使後人因例啟疑。考究始末，以知莊公不能正身齊家，致後嗣再弑，國幾滅亡，雖欲諱之，而其實終不可得而揜。究觀書法，則知《左氏》所謂微而顯，志而晦，婉而成章，盡而不汙，懲惡而勸善，非聖人孰能脩之者，蓋指此類而言之。其說必有所傳，而施於稱族舍族之《傳》則非也。其不書葬，不以討母葬子

也。凡君弑賊討則書葬，哀姜實被討，而不書葬者，不以討母葬子。【補曰】《莊子》所謂《春秋》以道名分，如此類者甚微也。殺慶父不見《經》，殺哀姜見《經》，故《經》惟據討母爲義。孫覺不達此旨，遂議《傳》失，孫氏之誤，若是者多矣。又案：殺哀姜在明年七月，《左傳》先敘慶父之縊，次敘齊殺哀姜，容此二事皆在葬閔公後。劉敞以爲賊未討而葬，慢也。賊雖卒討，葬不追書。此說甚有理。然則《傳》言此者，特就《經》中所書，明其義之重者耳。

九月，夫人姜氏孫于邾。哀姜與弑閔公，故出奔。【補曰】月者，例也，公奔則日。何休曰：「凡公夫人

奔例曰。此月者，有罪。」孫之爲言，猶孫也。諱奔也。【補曰】疏曰：「重發《傳》者，文姜殺夫，哀姜殺子，嫌異，故重發之。」文烝案：下有所見，不深諱之。言如邾者，爲後薨于夷見罪，將有其末，宜錄其本，故直書孫也。

### 公子慶父出奔莒。【補曰】案：內大夫奔日者，

《傳》曰「正之」，慶父罪重，不正之者，蓋以自此不復見，即以奔文當卒刺之文，卒刺皆以不日見惡也。何休曰：「外大夫奔例皆時。」其曰出，絕之也，慶父不復見矣。慶父弑子般、閔公，不書弑，諱之。【補曰】疏曰：「慶父前奔不言「出」，書曰「如齊」，爲之隱諱，是不絕其位之辭。今不諱言「出奔」，明是絕其位也。又云慶父不復見者，明弑二君罪重，不宜復見，故特顯之矣。」文烝案：注既不釋《傳》文，疏又不得《傳》旨。《傳》以「出」爲絕之者，此與莊三十二年奔齊，其下皆有所見，彼言「如」，此不言「如」，是絕之不更諱也。又言「慶父不復見」者，申所以絕之意也。慶父後雖被逼縊死，《經》爲魯諱，又諱季子之行誅，故不復記。若此處猶諱言「如」，是使內之賊臣竟無文以顯書其罪，故直書「出奔」，以結前事，與上「如齊」之文相對，則爲絕之也。縊死既諱，故出奔不諱，不諱出奔，正

以起後文之諱討賊也。是故慶父之死不復見，即所謂「諱莫如深」也。直書「出奔」則不復見其死，即所謂「苟有所見，莫如深」者也。《韓子》言聖人之作《春秋》，深其文辭，愚謂《穀梁傳》亦未易讀。

### 冬，齊高子來盟。其曰來，喜之也。其

曰高子，貴之也。【補曰】此亦順魯而喜之，喜其立君以存魯也。書「來」雖接公之平文，見貴則亦見喜，明與季子來歸同矣。《公羊》以不名爲喜之。盟立僖公也。

【補曰】季子實立僖，而齊定其位，齊立公爲君，亦是接公矣。此盟亦前定，前定之盟不日，桓盟亦不日，以是立君大事，故又不月以異之。不言使何也？據桓十四年鄭伯使其弟禦來盟言「使」。不以齊侯使高子也。齊侯不討慶父，使魯重罹其禍。今若高子自來，非齊侯所得使也，猶屈完不稱使也。江熙曰：「魯頻弑君，僖公非正也。桓公遣高僖立僖公以存魯，魯人德之，不名其使以貴之，貴其使則其主重矣。」【補曰】范注非也。不以齊侯使高子者，謂既稱高子，則不得以齊侯使爲文也。凡稱君以使者，其臣皆名，不可名則字，女叔是也。惟文繫王使者，又有稱子、稱宰、稱公之等，宰與公尊矣，子是貴稱，亦不得以

諸侯使之爲文。今欲貴高子，令與季子俱稱子，故不稱齊侯使也。桓三年不以齊侯命衛侯，莊二十八年不以師敗於人，僖二十八年不以晉侯畀宋公，文意皆相似也。此《經》貴高子，正以美齊桓，桓之不討慶父，上有累文，與此無涉，以屈完例之，尤非其倫也。江注謂僖公非正，亦非也。僖是長庶，般既弑則僖爲正。不正者乃閔也，閔猶周之悼王，僖猶敬王矣。劉敞曰：「《公羊》曰『不稱使，我無君也』，非也。僖公之盟，何謂我無君？盟于暨，齊無君，文不沒公即魯無君，何故沒齊侯哉？」

十有二月，狄入衛。僖公二年，城楚丘以封衛，則衛爲狄所滅明矣。不言滅而言入者，《春秋》爲賢者諱。齊桓公不能攘夷狄救中國，故爲之諱。【補曰】《公羊》曰「爲桓公諱」，范注本之。賈逵曰：「不與夷狄得志於中國。」文烝案：《汲冢紀年》以狄爲赤翟滅。不日者，深諱之，於是愾公赤戰死，戴公申廬于曹而卒，立其弟文公。

### 鄭棄其師。

【補曰】不書鄭高克出奔陳者，何休所謂「舉棄師爲重」，此全用舊史文，僖十九年《傳》言之。

○【撰異曰】棄，《左氏》或作「弃」。惡其長也，兼不反其衆，則是棄其師也。長，謂高克也。高克好利，不

顧其君，文公惡而遠之，不能使高克將兵禦狄于竟，陳其師旅，翱翔河上。久而不召，衆將離散，高克之進不以禮，文公退之不以道，危國亡師之本。【補曰】《傳》言鄭伯惡其長而兼不反其衆，劉向《說苑》曰：「夫天之生人也，蓋非以爲君也；天之立君也，蓋非以爲位也。夫爲人君，行其私欲而不顧其人，是不承天意，忘其位之所以宜事也。如此者，《春秋》不予能君而夷狄之。鄭伯惡一人而兼棄其師，故有「夷狄不君」之辭。」案：此解《經》直言鄭也。注「衆將離散」四字當改云「衆散而歸」，其下又當增云「高克奔陳」。此事《左氏》、《公羊》、《毛詩序》皆同，而《毛序》爲詳，注全本之。高克之進，舊作「高克進之」，朱子《詩序辨說》曰：「當作『之進』。」趙汭屬辭從之，今據乙正也。

# 春秋僖公經傳第四補注第九 僖公亦莊公

子，名申，閔公庶兄。母成風。以惠王十八年即位。凡僖之謚，古書多作「釐」。

穀梁 范氏集解 鍾文烝詳補

元年春王正月。繼弑君，不言即位，正

也。【補曰】疏見閔元年。《公羊》曰：「公何以不言即位？」繼弑君，子不言即位。此非子也，其稱子何？

臣子一例也。何休曰：「僖公者，閔公庶兄。禮：諸侯臣諸父兄

弟，以臣之繼君，猶子之繼父也。其服皆斬衰，故《傳》稱

「臣子一例」。

齊師、宋師、曹師次于聶北，救邢。聶北，

邢地。【補曰】疏曰：「邢滅並不書人，故有救次之文。衛

亡書人，故沒其救次。」文烝案：邢實未滅，衛則雖欲救之

已不及救，《疏》皆非也。次救例俱時，不連上正月。○【撰

異曰】曹師，板本、《左氏》作「曹伯」，誤。唐石經亦作「曹

師」。《說文·品部》引《春秋傳》「次于聶北」。从品相連，

讀與「聶」同。段玉裁以為此《左氏》經傳之古文，後人以其

同音易其字，如「築廩」之改「築鄆」。救不言次，據莊六

年王人子突救衛不言次。言次非救也。次，止也。

救，赴急之意。今方停止，故知非救也。非救而曰救

何也？遂齊侯之意也。錄其本意。【補曰】遂，申

也，成也。如其意而申成之，故曰救，所謂《春秋》成人之

美。杜預、蘇轍以為「案兵待事，卒能救邢」是也。莊公次

郎，次成亦有救紀、救鄭之意，而謂之不能救，則直言次不

言救，不得遂其意也。叔孫豹次雍洵亦是不能救晉，而先

言救後言次者，以豹是魯臣，臣不可廢君命，故先言救為通

君命之辭，又與此遂其意者異也。是齊侯與？怪其

稱師。齊侯也。何用見其是齊侯也？據《經》

書齊師。【補曰】問《經》文何用見之？曹無師。曹師

者，曹伯也。小國君將稱君，卿將稱人，不得稱師，言師

則是曹伯也。曹君不可在師下，故知是齊侯。【補曰】前言

「曹無命大夫」，此言「曹無師」，明小國無大夫，又無師也。

小國無師者，國勢削弱，雖本得有一軍之制，而當時以為不



成軍也。楚之先及諸夷狄亦皆無師者，兵衆雖盛而《春秋》黜之。四年《傳》言「楚無大夫」，明亦無師矣。《禮》伯子男皆一軍，說見襄十一年。不說宋公者，從可知。其不言

曹伯何也？以其不言齊侯，不可言曹伯也。

【補曰】此猶莊二十八年「以其人齊不可不人衛」。其不

言齊侯何也？以其不足乎揚，不言齊侯也。

救不及事，不足稱揚。【補曰】注本《公羊》，非也。《公羊》

曰：「救不言次，此其言次何？不及事也。不及事者何？

邢已亡矣。孰亡之？蓋狄滅之。」《公羊》以邢已亡滅，故

謂之不及事，非《傳》意也。《傳》言「不足稱揚」者，即指言

次文。言次非救，故不足稱揚。不謂其無及，下城邢純爲

美辭，此加非救之文，而後遂其意明，但愈於郎、成、雍渝，

不及諸直言救之善，與下各自見義。

夏六月，邢遷于夷儀。辟狄難。夷儀，邢地。

○【撰異曰】夷，《公羊》作「陳」。案：夷，陳聲轉義通。矢、

雉、尸、夷諸字皆訓陳。陸渚所見《穀梁》亦作「陳」。遷

者，猶得其國家以往者也。【補曰】重發《傳》者，彼

爲遷之者發，此正解「遷」也。《公羊》曰：「遷者何？其意

也。遷之者何？非其意也。」其地，邢復見也。非若宋人遷宿，滅不復見。

齊師、宋師、曹師城邢。是向之師也，使

之如改事然，美齊侯之功也。是向聶北之師，當

言「遂」，今復列三國者，美齊桓存亡國。【補曰】向，往也，

或作「鄉」，其正字作「歸」，皆同是往之師，實非改事。何休

所謂桓公宿留城之，故當言「遂」，言「遂」則不須重舉三師

矣。上以不足乎揚，變爵稱師，此重舉則已揚之，故得以美

爲義也。《春秋》譏益城唯夷儀、楚丘、緣陵，或遷或封，理

合得城。昔齊去薄姑而遷臨菑，王命城之，《毛詩傳》以爲

古者諸侯之居逼隘，則王者遷其邑而定其居，是其類。晉

城杞亦是遷國，城成周則王者遷都之事也。《左傳》例曰凡

侯伯救患分災討罪，禮也。

秋七月戊辰，夫人姜氏薨于夷。哀姜。

【補曰】莊公夫人。杜預曰：「夷，魯地。」注在上年《傳》。

范遂遺之，《公羊》以爲齊地。夫人薨，不地；地，故

也。【補曰】變於君也。

齊人以歸。【補曰】齊稱人者，既諱之若其以喪



歸，則從卑者之常文。此《經》各本誤跳在《傳》「夫人薨」上，今依唐石經、十行本移正。不言以喪歸，非以喪歸也。加喪焉，諱以夫人歸也。泰曰：齊人實以夫人歸，殺之于夷，諱，故使若自行至夷，遇疾而薨，然後齊人以喪歸也。歸在薨前，而今在下，是加喪之文也。《經》不言以喪歸者，以本非以喪歸也。《傳》例曰以者，不以者也。微旨見矣。其以歸，薨之也。以歸然後殺之。

【補曰】如《傳》言則夷為齊地，是歟？

楚人伐鄭。【補曰】疏曰：「不以州言之者，以楚

雖荆蠻，漸自通於諸夏，國轉強大，與中國抗衡，故不復州舉之。何休云：「稱楚人者，為僖公諱與夷狄交婚，故進之使若中國。《穀梁》無交婚之事。杜預云：「荆始改號曰楚。」與《傳》亦不同。文烝案：李光地曰：「將有齊桓膺懲之事，不得復舉州。」其說亦可存也。楚皆以稱人為常，不直以國舉。

八月，公會齊侯、宋公、鄭伯、曹伯、邾人

于榿。榿，宋地。【補曰】何休曰：「月者，危公會霸者而與邾、婁有辨也。」○【撰異曰】榿，一本作「杙」。《公羊》作「杙」。徐彥曰：「杙」字，《左氏》作「榿」，亦有作「杙」字。」

九月，公敗邾師于偃。偃，邾地。【補曰】邾稱師，以我之敗之，舉其重者，與升陞異也。凡敗皆稱師，燕、邾、莒、頓、胡、沈、許皆有師，惟徐、狄、吳以國舉。衛言人，楚言爵，則變例也。疏曰：「何休云：『公怨邾人以夫人與齊，故敗之。』未知范意然不。」○【撰異曰】偃，一本作「堰」，《公羊》作「纓」。不日，疑戰也。疑戰而曰敗，勝內也。【補曰】重發《傳》者，嫌小國與齊、宋異例也。

冬十月壬午，公子友帥師敗莒師于麗，

獲莒挐。麗，魯地。《傳》例曰獲者，不與之辭。【補曰】注引例在宣二年《傳》。○【撰異曰】麗，《左氏》作「鄆」，《公羊》作「犁」。挐，《公羊》一本作「茹」。莒無大夫，【補曰】明與曹同也。舉曹、莒則邾、滕以下可知。昭十四年又言曹、莒之異。其曰莒挐何也？據非大夫不書。以吾獲之目之也。內不言獲，此其言獲何也？獲者，不與之辭，主善以內，故不言獲。據文十一年，叔孫得臣敗狄于鹹不言獲長狄。【補曰】疏曰：「內不言獲，乃是常例，至於長狄則異於餘，宜書獲以表功，而彼文略之，由重傷故也。此注據以為證者，取不書獲之成文，

不謂義旨全合。」文烝案：注是疏非也，說見敗鹹《傳》下。內不言獲者，《經》例因史例，或專是《經》例歟？此唯施於兵獲。惡公子之給。給，欺給也。【補曰】「公子」下唐石經初刻有「友」字。給者柰何？公子友謂莒挈曰：「吾二人不相說，士卒何罪？」【補曰】戰有甲士，有步卒。屏左右而相搏，【補曰】屏，除。搏，手搏。《左傳》曰：「晉侯夢與楚子搏。」漢有卞射武戲，手搏爲卞，角力爲武戲。公子友處下。左右曰：「孟勞！」孟勞者，魯之寶刀也，【補曰】刀名。見《廣雅》。《北齊本》或誤作「寶力」，見《顏氏家訓》。公子友以殺之。【補曰】明此獲乃殺也。《公羊》曰：「大夫生死皆曰獲。」然則何以惡乎給也？據得勝也。曰棄師之道也。江熙曰：「《經》書「敗莒師」，而《傳》云二人相搏，則師不戰何以得敗？理自不通也。夫王赫斯怒，貴在愛整，子所慎三，戰居其一。季友，令德之人，豈當舍三軍之整，佻身獨鬪，潛刃相害，以決勝負者哉？雖千載之事難明，然風味之所期，古猶今也。此又事之不然，《傳》或失之。」【補曰】棄師之道者，言潛刃相給，將棄師不用也。

《傳》謂戰畢乃相搏耳。江熙之疑非也。疏曰：「若季子無輕鬪之事，《經》不應書獲以惡之，《經》、《傳》文符，而江熙妄難，范引其說非也。」○《春秋》記事不記言，《傳》隨事釋其義，事之本末，皆所不論，言之委悉，更無從見，而自此《傳》以後則稍稍詳矣。《公羊》晚出，掇拾較多，《左傳》事言並記，乃是史家之學，創始之體，劉知幾所謂《左氏》、《漢書》二家，後來祖述者也。

十有二月丁巳，夫人氏之喪至自齊。其不言姜，以其殺二子貶之也。二子，子般、閔公。

【補曰】至此始貶者，《公羊》曰：「貶必於其重者，莫重乎其以喪至也。」孫復曰：「孫于邾不貶，不以子討母也。此而貶者，正王法也。」孔廣森以爲至此復以小君事之，故貶之，於此著其罪，兼惡臣子。文烝案：貶不言姜，猶言氏者，見莊元年注。或曰爲齊桓諱殺同姓也。【補曰】疏曰：「夫人於齊桓，非是姑姊即是妹姪，齊桓討得其罪，疏而遠之，託言同姓。」文烝案：疏說皆非也。姑姊、妹姪即是同姓，無分親疏也。《傳》引或說以爲爲齊桓諱，非桓託言也。言「討得其罪」，又非或說意也，此於正說後別爲一說。謂《經》所以不言姜者，不主於貶夫人而主於爲齊桓

諱，其義甚明。姜本齊姓，沒不言則爲諱矣。上文齊殺哀姜，《傳》不論其是非，如或曰之意，則與《左氏》、《公羊》同。《左傳》曰：「君子以齊人之殺哀姜也爲已甚矣，女子從人者也。」《公羊》但言「桓公召而縊殺之」，而《漢書》鄒陽之言曰：「魯公子慶父使僕人殺子般，獄有所歸，季友不探其情而誅焉。慶父親殺閔公，季子緩追免賊，《春秋》以爲親親之道也。魯哀姜薨于夷，孔子曰「齊桓公法而不譎」，以爲過也。」鄒論季子事皆本《公羊》文，則其論殺哀姜事亦必用《公羊》家舊說。而如《外戚傳》解光言《春秋》予齊桓，何休言不阿親親者，乃皆後來說也。鄒所引孔子語出《論語》，「法」當作「正」，「正」之古文作「正」，「法」之古文作「金」，「正」上誤增，遂成「法」字。此訓正譎爲經權，謂齊桓專守正經，不能行權譎以免其親，是其過也。蓋齊、魯諸《論語》家說謂齊桓長於經而短於權，晉文長於權而短於經，與馬、鄭注異也。

二年春王正月，城楚丘。【補曰】月者，別於內城。此何休意也。楚丘者何？衛邑也。【補曰】重發《傳》者，起下也。衛都朝歌，在河北，楚丘則在河南，

所謂東徙渡河也。漕邑亦相近。國而曰城，此邑也。其曰城何也？據元年齊師、宋師、曹師城邢。邢，國也。封衛也。閔二年，狄人衛遂滅。【補曰】國於楚丘，故言城。注當云「閔二年狄滅衛」，《傳》言「封衛」，以見上人爲滅也。衛與邢、杞異，衛已滅，城以封之，邢、杞未滅，但遷而城之耳。故《傳》與《左傳》皆止有「封衛」之文，不言封邢封杞也。齊桓存三亡國，雖統邢、衛、杞言之，其實邢、杞與衛小不同。《公羊》於邢、杞亦言已滅，亦以爲齊所封，此桓譚所謂「彌離其本事」者矣。《國語》言封邢，《管子》言封邢封杞，《呂氏春秋》言立邢，悉不可據。則其不言城衛何也？衛未遷也。【補曰】劉敞據《詩》「定之方中，作于楚宮。揆之以日，作于楚室」，序云：「文公徙居楚丘，始建城市而營宮室。」以爲夏之十月，周之十二月，衛必先徙居而後建城市，建城市而後營宮室。魯人後期，以正月會城不得云衛未遷。文烝案：劉說皆非也。《詩》序雖兼言城市，而《詩》但言作宮室，即或城與宮室並作，無妨十二月始事，正月以後畢功，《春秋》豈必以始事書哉？書城既不獨指魯，而謂營宮室必在遷後，尤臆且固。《詩》序必先言徙居者，乃文勢之便，劉氏善讀書，無容不知也。

其不言衛之遷焉何也？據元年邢遷于夷儀言遷也。不與齊侯專封也。【補曰】前有人衛文，言城又言遷，則封衛之事太明，疑若與其專封矣。《孟子》述葵丘之命曰「無有封而不告」，雖告王，猶爲專。其言城之者，【補曰】謂直言城。專辭也。【補曰】此「專」字與「專封」之「專」異。專辭，猶言內辭。諸侯共城之，文若魯獨城然。成陳《傳》曰「內辭」，歸粟于蔡《傳》亦曰「專辭」，所以爲專辭者，歸粟《傳》曰「義邇也」。李光地曰：「古之侯伯，有存亡繼絕，急病分災，攘夷狄，安諸夏之義。脩而行之，是天下之公利也。」《春秋》書諸侯事，如內辭者四：城楚丘、成陳、成鄭虎牢、歸粟于蔡是也。楚丘不城，衛人於狄矣；虎牢不成，鄭人於楚矣；成陳粟蔡，皆公舉也，故皆以公辭也。文烝案：《穀梁》言專辭、內辭者，謂其辭如此，就使魯不在列亦得爲此辭，以其是諸侯公義之舉。《春秋》引而近之，同諸內事，故曰義邇也。專辭、內辭，即李氏所謂公辭，但所從言之異耳。晉城杞，城成周，扶危定傾，故列序其人，以著其美，此則國已滅而城以封之，其美尤大，故從專辭例也。邢固未滅，而城邢之文上有所蒙，無庸列序，其列序則爲變文，明較杞與成周彌美也。城緣陵不

劣於城杞，城成周，亦當列序。而不序者，與城邢以盛衰相對，其立文又與此相對也。故非天子不得專封諸侯，諸侯不得專封諸侯，【補曰】王引之曰：「下」不得「二字衍文，蓋涉上「不得」而衍。」雖通其仁，以義而不與也。存衛是桓之仁，故通令城楚丘，義不可以專封，故不言遷衛。【補曰】以專辭書城是通其仁，不書衛遷是斷以義。劉敞所謂以小惠評之則桓公爲有德，以大法論之則諸侯無專封，得《傳》旨矣。凡專辭皆爲義事，故曰義邇。既謂之仁，則義有未盡，故曰「以義而不與」，言各有當也。陸賈《新語》引《穀梁傳》曰：「仁者以治親，義者以利尊，萬世不亂，仁義之所治也。」今檢《傳》無此文，當是後學者說傳此條之語。《漢書·藝文志》有《穀梁外傳》二十篇、《穀梁章句》三十三篇，此類蓋出其中歟？董仲舒曰：「《春秋》之所治，人與我也，所以治人與我者，仁與義也。以仁安人，以義正我，故仁之爲言人也，義之爲言我也，言名已別矣。是故《春秋》爲仁義法，仁之法在愛人不在愛我，義之法在正我不在正人。義者謂宜在我者，宜在我者而後可以稱義，故言義者合我與宜，以爲一言。」案董生訓「義」字甚精，其外則《管子》云「義者謂各處其宜」，鄭君《周

禮》注云「能斷時宜」，意同程、朱而言尤約也。【眉批】：「墨子『義』字皆作『義』，从拜，古文『我』也。王引之據《周晉姜鼎銘》。」故曰仁不勝道。仁，謂存亡國。道，謂上下之體。【補曰】《傳》引古語，足上意也。注解「道」字，未盡其理。《荀子》曰：「君子處仁以義，然後仁也；行義以禮，然後義也；制禮反本成末，然後禮也。三者皆通，然後道也。」然則道者，仁、義、禮之合，故仁不勝道。抑又論之，此道蓋謂聖人之道，而專封與否，又非所計也。夫義所不得與者，專封也。竊意當日周既衰矣，衛既滅矣，設以聖人而為齊桓亦不過告王而封之，亦必不聽其終滅。而在齊桓則謂之專封，在聖人則為道，亦論其心而已矣。《孟子》曰「五霸者，摟諸侯以伐諸侯，三王之罪人也」，以摟伐為罪，正猶以專封為非義。然而湯伐葛、文王伐崇伐密，豈有桀、紂之命哉？又如伊尹放大甲，《孟子》曰：「有伊尹之志則可，無伊尹之志則篡也。」此論心不論事之明文也。《傳》以專封為非義，又必曰「仁不勝道」，而後其說乃盡。《孟子》以摟伐為罪，他日又必曰「以德行仁者王」，「以力假仁者霸」，五霸假之也，小補之也，而後其說乃盡。以《論語》「夫子之言求之，管仲之力，到今受賜。言仁也，管仲之器小哉」，言道也，孫綽解器小曰功有餘而德不足，是《孟子》德力之說，小

補之義也。○愚於《傳》此句思之甚深，夫君子之惡惡也，有所謂誅意者矣，君子之善善也，未嘗苛求其心也。事善則善之，猶曰有功於子，可食而食之矣，夫何以其志為哉？桓公、管仲之功著乎天下，《春秋》方通其仁，則夫聖人之道固所未暇論耳。雖然書不盡言，言不盡意，故張敞曰「心之精微，口不能言也」，言之微眇，書不能文也」。程子《易》傳序亦曰：「予所傳者辭也，由辭以得其意，則在乎人焉，是故仁不勝道，不可不察也。」讀《管子》之書，質實而詳密，伊、管同稱亦宜矣，而自《孟子》言之，則慮夫王者之道不行也。讀《墨子》之書，闕肆而深奇，儒、墨同稱亦宜矣，而自《孟子》言之，則懼夫孔子之道之不著也。

### 夏五月辛巳，葬我小君哀姜。

虞師、晉師滅夏陽。○【撰異曰】夏，《左氏》作「下」。陸淳曰：「據上陽、下陽俱號邑都，《左氏》為是。」文烝案：漢為大陽縣。夏，大同義，江永言之。非國而曰滅，重夏陽也。【補曰】下所謂塞邑。虞無師，【補曰】疏曰：「小國無師，《傳》三發之者，並是小國，不合言師。燕為敗而重衆，故得言師。曹言師者，明其是君。虞言師者，表其先晉。以其言師不同，各舉備文耳。」其曰

師何也？以其先晉，不可以不言師也。人不得居師上，貴賤之序。其先晉何也？據小不先大。爲主乎滅夏陽也。【補曰】虞主兵也，凡小國兵序上者，皆是主兵，《傳》於此見例。夏陽者，虞、虢之塞邑也，其地險要，故二國以爲塞邑。【補曰】虢邑接虞者也。虞，虞仲之後。虢，虢叔之後，西虢國。胡安國曰：「塞邑，猶秦有潼關、蜀有劍嶺，皆國之門戶。」滅夏陽而虞、虢舉矣。【補曰】疏引徐邈云：「舉，猶拔也。」案：高誘《戰國策》注曰：「舉，得也。」又曰「拔也」。虞之爲主乎滅夏陽何也？【補曰】虞不應不知塞邑之不可滅，必不反出兵助晉，何得有主兵之文也？五年《傳》曰「虞、虢之相救」。晉獻公欲伐虢，荀息曰：「君何不以屈產之乘、垂棘之璧而借道乎虞也？」荀息，晉大夫。屈產駿馬，垂棘出良璧。【補曰】乘，四馬也。《公羊》曰「垂棘之白璧」，何休曰：「玉以尚白爲美。」凌廷堪曰：「《呂氏春秋》曰：『以屈產之乘爲庭實，而加以垂棘之璧，以假道於虞而伐虢。』是謂晉人聘虞行享

禮時，束帛所加之璧爲垂棘之璧，庭實所設之馬爲屈產之乘也。《聘禮》曰：「賓謁，奉束帛，加璧享。」《記》曰：「凡庭實，皮馬相間可也。」間猶代也，晉地多馬，故《聘禮》享庭實用皮，而晉代以馬也。」文烝案：《呂氏春秋》不言聘，凌說似是而非，此專爲借道，非聘也。聘享用璧而有庭實，自是常禮，又未有不受者。下言「小國所以事大國」，言「幣重不便」，又言「不借吾道不敢受吾幣」，其非享禮明矣。借道之事，依《聘禮》文但用束帛，許而後受幣，故下云然也。伐虢必過虞，故借道。賈逵曰：「虞在晉南，虢在虞南。」公曰：「此晉國之寶也，如受吾幣而不借吾道則如之何？」荀息曰：「此小國之所以事大國也，此謂璧、馬之屬。彼不借吾道必不敢受吾幣，如受吾幣而借吾道，則是我取之中府而藏之外府，取之中府而置之外府也。」【補曰】《三蒼》云：「府，文書財物藏也。」虞可并得，故言猶外府外廩。公曰：「宮之奇存焉，宮之奇，虞之賢大夫。必不使受之也。」【補曰】不使受而借。荀息曰：「宮之奇之爲人也，達心而慳，慳，弱。又少長

於君。達心則其言略，明達之人言則舉綱領要，不言提其耳則愚者不悟。悞則不能彊諫，少長於君則君輕之。【補曰】杜預曰：「親而狎之，必輕其言。」且夫玩好在耳目之前，而患在一國之後，【補曰】王引之曰：「之後」二字衍文，蓋後人增之，不可通。此論地之大小，非論時之遠近。」此中知以上乃能慮之，臣料虞君中知以下也。【補曰】中知，疏謂猶《論語》「中人」也。《呂氏春秋》曰：「義者，百事之始也，萬利之本也，中智之所不及也。虞爵非公，故荀息不曰虞公。」《公羊》則曰：「虞公貪而好竇矣。」公遂借道而伐虢。宮之奇諫曰：「晉國之使者，其辭卑而幣重，必不便於虞。」虞公弗聽，【補曰】此稱虞公者，便文也。案：《詩·衛風》言「譚公」，與齊侯、衛侯、邢侯並稱，即《春秋》「譚子」也。《公羊》鄭公與鄭伯並稱，據《國語》史伯言鄭，實子男之國也。紀以子而進為侯，而杜預《左傳後序》引《汲冢紀年》紀公之顛即《傳》紀侯之顛也，然則小國之君通稱某公，凡言虞公、虢公者皆同斯例，固非其爵為公，亦不因《春秋》所書矣。又《國語》、《管子》言晉公、秦

公、燕公、吳公，《晏子春秋》言齊公、魯公，是凡諸侯皆得通稱。遂受其幣而借之道。【補曰】如上所述，晉之滅夏陽，虞實為之，是虞主兵也。據《傳》虞實未出兵，與《公羊》同，與《左傳》異。杜氏《後序》引《汲冢紀年》正與《左》同，似皆非。宮之奇諫曰：【補曰】王念孫曰：「此『諫』字衍文，蓋因上『諫』字而衍。下云云者，退而私論也。」文烝案：弗聽之後，無妨復諫。「脣亡」一句，《左氏》、《公羊》皆為諫辭，王說未是。「語曰『脣亡則齒寒』，其斯之謂與！」語，諺言也。【補曰】范依《左氏》也，《公羊》以為記。挈其妻子以奔曹。【補曰】宮之奇再諫而奔，《左傳》在後五年再借道時，又不云奔何國。《國語》云「適西山」，高誘《戰國策》注以為適秦。獻公亡虢五年而後舉虞，【補曰】五年，當依《公羊》為「四年」，字之誤。疏以為僖五年，非也。《左傳》以為再借道而滅虢，還師滅虞。此以滅夏陽為亡虢者，或以後之滅虢，實由此之滅夏陽。或《傳》意此年滅夏陽，後旋即滅虢之都，與《公羊》郭君在夏陽之意雖異，而與其言取郭則同，皆與《左傳》異也。《水經注》引《紀年》曰：「晉獻公十有九年，獻公會



虞師伐虢，滅下陽，虢公醜奔衛，獻公命瑕父呂甥邑於虢都。」彼書雖出後人追脩，亦由滅虢之說當時相承故也。《經》無滅虢文者，重夏陽，故但舉滅夏陽爲重，舊史當備文矣。荀息牽馬操璧而前曰：「璧則猶是也，而馬齒加長矣。」猶是，言如故。【補曰】荀息戲言也。《戰國策》魏謂趙王曰：「昔者，晉人欲亡虞而伐虢，伐虢者，亡虞之始也。故荀息以馬與璧假道於虞，宮之奇諫而不聽，卒假晉道。晉人伐虢，反而取虞，故《春秋》書之，以罪虞公。」觀魏人之言，知春秋此等之文其義著矣。

### 秋九月，齊侯、宋公、江人、黃人盟于貫。

貫，宋地。【補曰】王夫之曰：「衛地。」《史記·田齊世家》齊伐衛取毋丘即此。○【撰異曰】《公羊》作「貫澤」，下九年《傳》曰「貫澤之會」。貫之盟，不期而至者，江人、黃人也。【補曰】二國聞會自至，本不與結期。江人、黃人者，遠國之辭也。【補曰】以遠國辭稱人，實是其君。中國稱齊、宋，遠國稱江、黃，以爲諸侯皆來至也。【補曰】舉此四國爲偏至之辭。疏曰：「何休云：『時實晉、楚之君不至，君子成人之美，故褒益以爲』」

偏至之辭。」事或然矣。魯不至，故不書。或以爲魯公亦在，舉大以包之。文烝案：不至者，不獨晉、楚，如弦如虞、虢，蓋皆不至也。不書公者，疏言「舉大以包」是也。江、黃不期而至，則除常會諸國之外，皆不期而至者，此桓霸之盛也。下會陽穀，即此盟之諸侯。

### 冬十月，不雨。不雨者，勤雨也。言不雨，

是欲得雨之心勤也，明君之恤民。【補曰】注解「勤」字非也。《音義》曰：「勤，麋氏音「覲」。後年同。《集韻》「去聲。勤，渠吝切。憂也。《春秋傳》「勤雨」麋氏說，王念孫曰：「麋說是也。」「勤」字平，去二聲皆可讀，下年《傳》亦言「勤雨」，又言「閔雨」，言「喜雨」。閔者，憂之甚，轉之則爲喜，明勤雨、閔雨皆爲憂雨也。文二年《傳》言「文不憂雨」，正與僖之「勤雨」、「閔雨」相反。若以爲欲得雨之心勤，則非其意矣。古謂憂爲勤，《問喪》曰「服勤三年」，《呂氏春秋》曰「勤天子之難」，《毛詩序》曰「憂勤」，《楚辭》曰「愁勤」，皆謂憂爲勤也。文烝案：《注》既不知勤之爲憂，又直以書「不雨」爲說，不以每首月輒書「不雨」爲說，亦非也。僖所以爲勤雨者，正以一月不雨即憂勤之。《春秋》三以首月書，不加自文，使後之讀者以文公之《經》比類相較，則僖之勤雨自見。故《傳》於此三「不雨」分釋之曰「不雨者勤雨



也」，又總釋之曰「一時言不雨者閔雨也」，總釋者即承分釋之文，足成其意也。十月不雨，不嫌十一月、十二月得雨者，以下有「六月雨」之文也。

### 楚人侵鄭。

三年春王正月，不雨。不雨者，勤雨也。

【補曰】不嫌二月、三月得雨者，以下有「六月雨」也。復發《傳》者，此已隔年，嫌不與上「不雨」為一事，故發以同之。此既連上，則下四月亦承此可知，故下《傳》省「勤雨」文。

夏四月，不雨。一時不雨則書首月。不言旱，不

為災。【補曰】此本杜預。下二句上有「傳例曰」三字。言作曰一時不雨書首月，與莊三十一年冬不雨之文相違，非《傳》義。《傳》以《經》美僖公，故不以歷時書，而一時輒書，繫諸首月，明其一月不雨即有勤心。因下明書雨月則不嫌五月雨，又不嫌旱竟夏也。一時言不雨者，閔雨也。《經》一時輒言不雨，憂民之至。閔，憂也。【補曰】閔之為憂，謂憂雨，非謂憂民。閔者勤之至也，此合三「不雨」總釋之。閔雨者，有志乎民者也。【補曰】《春秋》以其閔雨為有志乎民，不與文同也。《左傳》曰：「自十月

不雨至于五月。不曰旱，不為災也。」《公羊》亦為記異，而三不雨各為一事，非也。

徐人取舒。【補曰】徐夷且僭，與楚、吳、越同。直

以國舉，乃其桓文，敗婁林伐莒是也。進稱人者，案《左傳》齊桓娶於徐，是時徐實附齊，故從中國例。伐英氏亦同也。孔廣森曰：「《魯頌》曰「戎狄是膺，荆舒是懲」，皆詠僖公從齊桓征伐之事。懲荆者，召陵是也。懲舒者，疑此取舒是也。蓋徐人為中國取也。其下章曰「遂荒徐宅」，言乎徐人之服從中國也。」案：此略同林之奇、趙鵬飛、家鉉翁、李廉說。○【撰異曰】舒，《玉篇·邑部》引作「郇」。

六月，雨。雨云者，喜雨也。喜雨者，有

志乎民者也。【補曰】疏曰：「書者，明僖公得雨則心喜，是於民情深。」文烝案：不雨不言所至之月，則此必言雨，杜預謂「二旱不竟夏」是也。但上既見「閔」，則此足見「喜」，《春秋》以其喜為有志乎民矣。常例，周六月龍見而雩，雖雨不志，《傳》上年言「仁不勝道」，記事不必論心而足以見心者也。上冬至此，言勤、言閔、言喜，記事本以見心而足以論心者也。凡人事皆人心之所為也，全《經》記事，全《傳》解《經》，以是求之。○莊之季年，歲荒民貧，財殫力

竭，重以哀姜、慶父之亂，魯幾不國矣。僖承其敝，有恤民之心，卒成中興，頌聲以作，君子於此深致美焉。《公羊》家說謂其遇旱改政，躬節儉，閉女謁，放讒佞，理冤獄，誅稅民受貨者，退舍南郊，澍雨立應，或其言有所本也。

### 秋，齊侯、宋公、江人、黃人會于陽穀。

陽穀，齊地。陽穀之會，桓公委端摺笏而朝諸侯，委，委貌之冠也。端，玄端之服。摺，插也。笏，以記事者也。所謂衣裳之會。【補曰】委貌，玄冠也。玄冠者，吉冠用黑繒爲之，夏曰母追，殷曰章甫，周曰委貌。《周禮》又謂之冠弁。玄端者，玄冠之服。陳奐曰：「《周禮》鄭衆注曰『衣有襦裳者爲端』，是端者不連裳之稱，對朝服言之也。朝服亦玄冠服，而連衣裳。《土冠禮》曰『主人玄冠朝服，緇帶素鞶』，玄端玄裳，黃裳雜裳可也。緇帶爵鞶，《特牲饋食記》曰『特牲饋食，其服皆朝服玄冠，緇帶緇鞶，唯尸祝佐食，玄端玄裳，黃裳雜裳可也。皆爵鞶玄端，衣皆玄，而裳有玄、黃、襍三等之異。朝服皆不言裳，明其衣裳不殊，全似深衣爲袍，制不與玄端同矣。朝服布十五升，其類乎玄端者，一玄衣，一緇衣也。其異於深衣者，一緇衣有鞶，一白布爲衣，又無鞶也。」文烝案：陳說是也。《續漢

志》注引戴聖說「朝服布上素下」，與鄭君同，疑有誤矣。任大椿引《通典》，漢明帝永平中，議乘輿服衣深衣制，有袍隨五時色，蓋因當時說禮家皆謂朝服如深衣袍制，故遂以爲天子之朝服，史稱賜皐袍，又稱三老五更服絺紵大袍。單衣皐緣，其以皐者，猶沿古緇衣之制也。《玉藻》曰：「笏，天子以球玉，諸侯以象，大夫以魚須文竹，士竹本象可也。笏度二尺有六寸，其中博三寸，其殺六分而去一。」諸侯，天下諸侯也。《國語》、《管子》皆曰「大朝諸侯於陽穀」。諸侯皆諭乎桓公之志。【補曰】疏曰：「諭，曉也，言不須盟誓。」文烝案：《論語》稱管仲相桓公，一匡天下。《漢書》注謂陽穀之會，天下從令。據疏是鄭君說也。又李賢《後漢書》注引《穀梁傳》曰「齊桓公爲陽穀之會，一匡天下」，《傳》無此文，亦當是後學者說《傳》語，在《穀梁外傳》、《穀梁章句》中。

### 冬，公子季友如齊莅盟。

《傳例》曰：「莅，位也。內之前定之盟謂之莅，外之前定之盟謂之來。」【補曰】注引例後二句，昭七年《傳》文也。二「盟」字當爲「辭」。據《左傳》齊侯爲陽穀之會來尋盟，則知會陽穀公亦與，杜預注非也。公與會陽穀則實可知。○【撰異曰】此「季」字衍

文，《左氏》、《公羊》皆無「季」字。莅，《左氏》作「泣」，後皆同。依《說文》，莅、泣皆「竦」之假借字。莅者，位也。盟誓之言素定，今但往其位而盟。【補曰】《爾雅》曰：「臨、泣，視也。」郭璞曰：「察視。」《廣雅》曰：「位，莅也。」其不日，前定也。【補曰】與來盟同也。前定之盟不日，此又不月者，凡盟當日，故前定則月而已。齊桓盟本不日，故友往莅盟，又不月以異之，乃與柯、召陵、高子來盟一例。不言及者，以國與之也。不言其人，亦以國與之也。【補曰】疏曰：「舊解此《傳》是外內之通例，不據此一文而已。不言及者，以國與之，謂若外國之來盟及魯人往盟。《經》直舉外來爲文，不言及者，欲見以國與之也，故舉國爲主，即宣七年衛侯使孫良夫來盟。此公子季友如齊莅盟是也。不言其人，亦以國與之，謂不言來盟之類。《經》雖言及而不書魯之主名者，亦見舉國與之，即成三年丙午及荀庚盟是也。不言外及者，《經》無故也。麋信、徐邈並據當文解之，理亦通也。但據成三年《傳》注則宜從舊說。」

### 楚人伐鄭。

四年春王正月，公會齊侯、宋公、陳侯、衛侯、鄭伯、許男、曹伯侵蔡，蔡潰。《傳例》曰：「侵時，而此月，蓋爲潰。」【補曰】舊史潰皆具日，君子略之，從月例。潰之爲言，上下不相得也。君臣不和而自潰散。【補曰】上下，謂君及臣民也。《公羊》曰：「潰者何？下叛上也。」《左傳》例曰：「凡民逃其上曰潰。」杜預曰：「潰，衆散流移，如積水之潰，自壞之象也。」侵，淺事也。【補曰】疏曰：「侵者，拘人民，而謂之淺者，對伐爲淺也。又《傳》云不分其民，是拘之而不取，亦是淺之義。《傳》本意言桓公不深暴於蔡，纔侵之而即潰，故因發淺例。」《左氏》無鍾鼓曰侵，《傳》或當然。侵蔡而蔡潰，以桓公爲知所侵也。責得其罪，故裁侵而潰。【補曰】明《經》譏蔡不譏齊，與伐沈、伐莒異也。夫古者民之於上也，或不能欺，或不忍欺，或不敢欺。民既不欺，臣亦可知。臣民同力，何有於潰？況侵事之淺乎？凡潰不以諸侯潰之爲文。重出國者，何休曰：「侵爲加蔡，舉潰爲惡蔡錄。」明沈、莒亦同也。劉向《說苑》曰：「《春秋》記國家存亡以察來世，雖有廣土衆民，堅甲利兵，威猛之將，士

卒不親附，不可以戰勝取功。晉侯獲於韓，楚子玉、得臣敗於城濮，蔡不待敵而衆潰，故語曰文王不能使不附之民，先軫不能戰不教之卒。」**不土其地**，【補曰】《傳》曰：「則是終土齊。」俞樾曰：「『土』讀爲『度』，《周禮·大司徒》：『以土圭土其地』，鄭君曰：『土其地，猶言度其地。』《典瑞》：『封國則以土地』，鄭曰：『土地，猶度地也。』」**不分其民**，【補曰】不俘取之，蓋視凡侵尤輕。**明正也**。【補曰】疏曰：「《論語》稱齊桓公正而不譎，指謂伐楚，此侵蔡亦言正者，伐楚是真正事大，故馬、鄭指之。其實侵蔡不土其地，不分其民，亦是正事，故《傳》言正也。」

**遂伐楚，次于陘。**楚彊，齊欲綏之以德，故不速進而次于陘。陘，楚地。【補曰】此本杜預也。《公羊》以爲侯屈完，蓋因莊八年初郎有「侯」文，故云爾。**遂，繼事也**。【補曰】重發《傳》者，此是用兵，又是霸者，事嫌異，故也。時本爲伐楚，故侵蔡耳。齊桓用兵，自滅遂以來，若非自將則無大衆，其用諸侯之師無過二國者，今乃大舉侵蔡，則知伐楚爲本謀。葉夢得辯《左傳》蔡姬事，而《戰國策》游騰謂楚王以爲桓公「號言伐楚，其實襲蔡」，《韓非》書詳其

事，《史記》亦用之，皆謬妄。**次，止也**。【補曰】疏曰：「次有二種：有所畏之次，即齊師、宋師次于郎，《傳》曰『畏我』是也；有非所畏之次，即此次于陘，《傳》直曰『次，止也』是也。」文烝案：此次非畏，故重發《傳》。謝湜曰：「書次陘，善其不以攻戰爲事。」其說得之。《管子》曰：「至善不戰。」吳澂引《孫子》曰：「百戰百勝，非善之善者也；不戰而屈人之兵，善之善也。」

**夏，許男新臣卒。**十四年冬，蔡侯肸卒，《傳》曰：「諸侯時卒，惡之也。」宣九年辛酉，晉侯黑臀卒于扈，《傳》曰：「其地，于外也。其日，未踰竟也。」然則新臣卒于楚，故不日耳，非惡也。【補曰】案：不日者，從曹伯廬、曹伯負芻、杞伯成之例，明新臣實卒于師也。注言「卒于楚，故不日」，是以許男甯、蔡侯東國爲比，非也。《傳》明言死於師矣，說詳成十三年。但不日則當月，今時而不月，與蔡侯肸等同者，此處方盛美齊桓。七國之君，咸被褒錄，無嫌於惡之，則書時猶書月，大氏《春秋》之文多從簡質。○【撰異曰】陸渚《纂例》曰：「『新』，《公羊》作『辛』。」案：今《公羊》不作「辛」。諸侯死於國，不地；死於外，地。【補曰】閔之變於內也。或書地名，或書其國，或書師會，皆

地也。死於師何爲不地？據宣九年晉侯黑臀卒于扈地。【補曰】此地即謂師，書于師則地矣。注據黑臀，非也，當云據曹伯廬、曹伯負芻。內桓師也。齊桓威德洽著，諸侯安之，雖卒於外，與在其國同。

### 楚屈完來盟于師，盟于召陵。

屈完來如陘師盟，齊桓以其服義，爲退一舍，次于召陵，而與之盟。召陵，楚地。【補曰】成二年，齊侯使國佐如師。己酉，及國佐盟于爰婁。《傳》曰「爰婁在師之外」，明召陵亦在師之外矣。《左傳》曰：「師進，次于陘。夏，楚子使屈完如師。師退，次于召陵。」杜預言「退舍」，范所本也。師行一舍三十里。李廉曰：「召陵恐亦楚之要地，故後來楚平王簡東國之兵於召陵。」文烝案：今許州鄆城縣東即其地。桓盟不日，此又不月者，夷狄受盟與常盟異，故略其月以異之。楚無大夫，無命卿也。【補曰】疏曰：「無大夫有三等之例，曹本非微國，後削小。莒是東夷，本微國。楚則蠻夷大國，僭號稱王，其卿不命於天子。」文烝案：曹、莒等無命大夫者，其君本有命卿，而當時不以爲卿也。楚無命大夫者，其君亦本有命卿，而《春秋》黜之也。其例實止有二等，皆不須以不命於天子爲說。無大夫、無師皆同意。其曰屈

完何也？【補曰】略名之，當言楚完。以其來會桓，成之爲大夫也。尊齊桓，不欲令與卑者盟。【補曰】不氏則從曹、莒直名之例，是列國卑者之文。其不言使，權在屈完也。邵曰：「齊桓威陵江漢，楚人大懼，未能量敵，遣屈完如師，完權事之宜，以義却齊，遂得與盟，以安竟內，功皆在完，故不言使。」【補曰】權在屈完，猶言權在祭仲。注言「權事之宜」，非《傳》之「權」字也。以義却齊者，依《左傳》也。《左傳》屈完別自有言，不如下所云。下所云不爲完語，又在次陘前。則是正乎？曰非正也，臣無自專之道。【補曰】君臣之義，不以楚而廢也。以其來會諸侯，重之也。重其宗中國，歸有道。【補曰】若屈完者，亦變之正歟？來者何？內桓師也。來者，內辭也。內桓師，故言來。于師，前定也。【補曰】此解《經》上「盟」字。言來盟者，從前定之例，美其事而異之也。不言使而言來，先言于師而後言于召陵，皆變文也。若爲平文，當如齊國佐。于召陵，得志乎桓公也。屈完來盟，桓公退于召陵，是屈完得其本志。【補曰】注非也。此解《經》下「盟」字。再言盟者，見得志乎桓

公，謂桓公得志也。《公羊》曰：「其言盟于師、盟于召陵何？師在召陵也。師在召陵則曷爲再言盟？喜服楚也。」案：《公羊》言「師在召陵」非也，其以再言盟爲喜則是也。何休言屈完來陞，退次召陵，所以補正《傳》說。又引《春秋緯》孔子曰：「書之重，辭之複，嗚呼！不可不察，其中必有美者焉。」《繁露》亦有其語。汪克寬曰：「盟于召陵與會于蕭魚，書法不異，皆一《經》特筆，美齊服楚，美晉定鄭也。」黃震述其師說曰：「來盟于師，楚有盟心，退盟召陵，齊有盟禮。」與盧仝同。得志者，不得志也，屈完得志則桓公不得志。【補曰】注非也。《經》見桓公之得志，以此盟乃時人所謂不得志也，故曰「得志者，不得志也」。以桓公得志爲僅矣。桓爲霸主，以會諸侯，楚子不來，屈完受盟，令問諸江，辭又不順，僅乃得志，言楚之難服。【補曰】案：《傳》下云「我將問諸江」，非令齊問也，注誤依《左傳》文。又此句與下屈完語不相屬，注亦誤會。《國語》賈逵注曰：「僅，猶言纔能也。」韋昭曰：「猶劣也。」《經》意以爲桓公退盟召陵，不窮兵力，以不得志爲得志，其得志也。劣能如此耳，美其事，複其文，其義乃著。揚子《法言》曰：「周康之時，《頌》聲作乎下，《關雎》作乎上，習

治也。齊桓之時縕而《春秋》美邵陵，習亂也。故習治則傷始亂也，習亂則好始治也。」漢孝文詔曰：「堅邊設候，結和通使，休寧北陲，爲功多矣。」且無議軍，此得召陵之意。賈誼謂帝不能爲齊桓，過也。屈完曰：「大國之以兵

向楚何也？」桓公曰：「昭王南征不反，【補

曰】杜預曰：「昭王，成王之孫，南巡守，涉漢，船壞而溺。」案：齊以爲楚罪。菁茅之貢不至，故周室不祭。」

菁茅，香草，所以縮酒，楚之職貢。【補曰】《書·禹貢》荊州

之貢「苞匭菁茅」即此也。鄭君曰：「菁茅，茅之有毛刺

者。」杜預曰：「茅之爲異未審。」今案：《史記·封禪書》管

仲謂桓公「江淮之間，一茅三脊，所以爲藉也」。《水經注》

引《晉書·地理志》云：「泉陵縣有香茅，氣甚芳香，古貢之

以縮酒。」①二者其此茅乎？菁者，蓋言菁菁然盛也。《左

傳》言包茅縮酒，《周禮》鄭興注曰：「苦」讀爲「縮」。束茅

立之祭前，沃酒其上，酒滲下去，若神飲之，故謂之縮。縮，

浚也。浚者，《說文》「抒也」，《廣雅》「滌也」。鄭君曰：「縮

①「地理」，原作「地道」，據《晉書》改。又「古」，原作「言」，據《晉書·地理志》改。

酒，泔酒也。」又曰：「以茅縮去滓也。」不祭，謂不以菁茅祭。屈完曰：「菁茅之貢不至則諾，昭王南征不反，我將問諸江。」問江邊之民有見之者不。此不服罪之言，故退于召陵而與之盟。屈完所以得志，桓公之不得志爾。【補曰】漢水入江，言將問江神。注非也。《傳》因盟事，并記桓公、屈完語，得志之僅，亦其一驗，非以此便為僅也，注都未了。○蘇轍曰：「楚人方強，齊將綏之以德，故次于陘以待之。既而楚屈完來求盟，因而許之。雖有諸侯之衆而不用，蓋伯者之師，求以服人而已，非若後世必以戰勝為功也。二十八年，晉、楚戰于城濮，晉文公退三舍避楚，楚成得臣從之不已而後戰，方其退舍而楚還，則文公亦將不戰矣。由此觀之，桓文之於用兵皆求服人而不求必勝也。」家鉉翁曰：「蘇氏立論平實，得桓、文之用心。」

### 齊人執陳袁濤塗。袁濤塗，陳大夫。【補曰】不

月，則濤塗亦有罪。何休以為執例時。○【撰異曰】袁，《左氏》作「轅」，段玉裁曰：「《左氏音義》：『袁本多作「轅」，乃俗人以轅、袁互易也。』」文烝案：陳之袁氏或作「轅」，他書又作「爰」，難定其孰為本字。段據《北史》李繪謂袁狎語以為黃帝十二姓內有轅，當從車旁，而今《國語》誤為「僂」，遂

定陳大夫氏為「轅」。今考陳袁氏為公族，乃媯姓，無關黃帝姓也。齊人者，齊侯也。【補曰】文承上盟，足明其為齊侯。其人之何也？於是哆然外齊侯也。

不正其踰國而執也。江熙曰：「踰國，謂踰陳而執陳大夫，主人之不敬客，由客之不先敬主人，哆然衆有不服之心，故《春秋》因而譏之，所謂以萬物為心也。莊十七年，齊人執鄭詹，《傳》與其執者，詹奔在齊，因執之。」【補曰】疏曰：「《左氏》、《公羊》皆以為濤塗誤軍道。」《傳》與《注》無是言，則以濤塗不敬齊命，故執之，陳人有不服之意，哆然疏外齊侯。哆然，寬大之意也。「萬物為心」，《莊子》文。文烝案：注、疏皆失《傳》旨。哆然外齊侯者，謂《經》意哆然外之，故稱人也。《經》所以外之者，踰國而執其大夫，以為不正，此桓十一年之例也。濤塗之見執，當依《左傳》所載，齊侯初從濤塗之請，師出東方，後因鄭申侯言，仍由陳、鄭間出，遂執濤塗。濤塗從陳侯在師，時已至陳地，齊侯執之於陳，故謂之踰國而執，是聖門相承說《經》語也。至於陳有不服之心，觀下一伐一侵，固亦可見。而濤塗之請，乃其實迹，《公羊》以為不脩其師而執濤塗，古人之討則不然，其說亦可用也。上文「內桓師」，此文「外齊侯」，義各有當，



是之謂萬物爲心，鄭玉所云「功過不相掩也」。疏解「哆然」字亦非也，哆然者，離外之意。《爾雅》曰：「諺，離也。」諺，即「哆」字。《荀子》曰「有侈離之德」，「侈」亦即「哆」字，高郵王氏父子說。

秋，及江人、黃人伐陳。【補曰】《左傳》曰：

「討不忠也。」不言其人及之者何？內師也。

【補曰】內師，魯師也。此當言內卑者，而言內師，便文也。桓十七年「及宋人、衛人伐邾」正與此同。《傳》特於此言內師者，疏曰：「文承齊人執濤塗下，恐非魯及故也。」吳澂曰：「時江、黃之師在其國，以其近於陳，故令伐陳也。必使魯人及之者，江、黃遠國，不可無魯主兵也。」文烝案：此亦所謂南伐以魯爲主。

八月，公至自伐楚。【補曰】月者，似爲下葬，

然曹宣、許靈葬皆不月。何休曰：「凡公出，滿二時月，危公之久。」何注「二」或作「三」，誤。有二事偶則以後

事致，【補曰】偶者，相當敵，言後事不小於先事也，後不小則後爲大，此爲常例。後事小則以先事致，【補

曰】後小則先爲大，此爲變例。其以伐楚致，大伐楚

也。鄭君曰：「會爲大事，伐爲小事。」今齊桓伐楚而後盟

于召陵，公當致會。而致伐者，楚彊莫能伐者，故以伐楚爲大事。【補曰】鄭言「會大伐小」非也。凡伐與會爲偶，先會後伐，當以伐爲大，先伐後會，當以會爲大。此先伐後會而不以會爲大，明伐尤大也。定四年，侵楚盟皋鼬以會致，則依偶事致後之例，以會爲大矣。《書》序稱「成王東伐淮夷，遂踐奄」，其下云「成王歸自奄」，以踐奄爲大也。又稱「夏師敗績，湯遂從之，遂伐三腰」，其下云「湯歸自夏」，以勝夏爲大也。汪克寬引以證《春秋》，得之。又此《傳》特明統例耳，桓之盟會皆不致，固不謂召陵有書至之義。

葬許穆公。○【撰異曰】穆，公羊作「繆」，後謚皆同。

冬十有二月，公孫茲帥師會齊人、宋人、

衛人、鄭人、許人、曹人侵陳。莊十年春二月，公

侵宋，《傳》曰：「侵時，此其月何也？」惡之，故謹而月之。」

然則凡侵而月者，皆惡之。【補曰】三國伐，七國又侵，故惡之也。公孫茲，公子牙子叔孫戴伯也。自陽處父以前稱人者，皆是師少，不必將卑。魯以貴卿帥師，外亦將尊可知，但七國獨魯用大衆，恐非事情，蓋齊桓節制之兵，獨不用



衆。宋以下雖或用衆，既序齊後，從而稱人耳。○【撰異曰】茲，《公羊》作「慈」，後同。

五年春，晉侯殺其世子申生。【補曰】殺世子母弟例時。目晉侯斥殺，惡晉侯也。斥，指斥。

【補曰】目，見也。惡晉侯者，《公羊》云「甚之」是也。與殺母弟目言同。張洽曰：「董仲舒所謂爲人君父而蒙首惡之名。」謝湜曰：「滅國本而君道絕，滅天性而父道絕。」

杞伯姬來朝其子。婦人既嫁不踰竟，踰竟，非正也。【補曰】此專釋「來」也。重發《傳》者，內女

未有明文，又嫌外孫當朝也。

諸侯相見曰朝，伯姬爲志乎朝其子也。【補曰】使其子伉諸侯之禮者，乃

伯姬之志，書「來」已見非正，又書「朝其子」，是所以譏伯

姬。伯姬爲志乎朝其子，則是杞伯失夫之道矣。凱曰：「不能刑于寡妻。」【補曰】《孟子》曰：「身不行

道，不行於妻子，使人不以道，不能行於妻子。」言又譏杞伯也。諸侯相見曰朝，以待人父之道待人之子，非正也。【補曰】直書「朝」，明魯以處待杞伯之禮待

之，又譏內也。故曰杞伯姬來朝其子，參譏也。

參譏，謂伯姬、杞伯、魯侯也。桓九年，曹伯使其世子射姑來朝，譏世子。此不譏者，明子隨母行，年尚幼弱，未可責以人子之道。伯姬以莊二十五年夏嫁，至今十五年，則子幼可知。

夏，公孫茲如牟。【補曰】言如者，聘也。後皆同。《左傳》曰「公孫茲如牟娶焉」，說見莊二十七年。

公及齊侯、宋公、陳侯、衛侯、鄭伯、許

男、曹伯會王世子于首戴。惠王之世子名鄭，後立

爲襄王。首戴，衛地。【補曰】王世子不名者，別於諸侯之

世子與群王子，從大夫以上不名例也。王室事自王人救衛後，一志王姬歸齊，至此乃見王世子。○【撰異曰】戴，《左

氏》作「止」。下同。及以會，尊之也。言及諸侯然後

會王世子，不敢令世子與諸侯齊列。【補曰】會者，外爲主

之文，此時王世子爲主，當如王人、宰周公等冠齊侯上而

已。今書公及齊侯，從尊卑內外之常文，而移會王世子文殊之於下，明不欲與諸侯列數，是所以尊之，此蓋君子改舊史以明義。會又會，及以及，會以及，皆同也。何尊

焉？王世子云者，唯王之貳也。【補曰】貳，副也。《國語》曰：「貳若體焉。」上貳代舉，下貳代履。云可以重之存焉，尊之也。何重焉？天子世子，世天下也。【補曰】《公羊》曰：「世子猶世世子也。」韓嬰《詩傳》曰：「所以爲世子何？言世世不絕。」

秋八月，諸侯盟于首戴。言諸侯者，前目而後凡，他皆放此。【補曰】《公羊》曰：「諸侯何以不序？一事而再見者，前目而後凡也。」何休曰：「省文從可知。」文烝案：魯大夫與他國序，再出名氏，公不再出者，趙匡曰：「卿恐涉他臣，公則無二也，今以爲君臣相變。」無中事而復舉諸侯何也？【補曰】據同盟新城之屬不重舉尊王世子而不敢與盟也。【補曰】諸侯能尊王世子，《經》因其尊而尊之。《傳》於會言《春秋》尊之，於盟言諸侯尊王世子，其實此會此盟皆是諸侯能尊王世子，而《經》因爲尊文以示義，皆善桓也。盧全曰：「此《春秋》尊周之微意。」尊則其不敢與盟何也？盟者，不相信也，故謹信也，不敢以所不信而加之尊者。【補曰】申上意。桓，諸侯也，不能朝天子，

是不臣也。【補曰】朝者，朝京師也。王世子出會，足見桓不能朝。王世子，子也，塊然受諸侯之尊己，而立乎其位，是不子也。【補曰】疏引徐邈云：「塊然，安然也。」王引之曰：「徐訓非也。塊然，獨尊之貌。凡書《傳》言「塊」者，皆獨貌也。字亦作「傀」，《荀子》書「塊」、「傀」二字並出。」文烝案：位者，世子之位也，受尊禮而立其位，非子道，明古者世子不出會。桓不臣，王世子不子，則其所善焉何也？【補曰】《經》爲尊文，善桓明矣，故因以問。是則變之正也。雖非禮之正，而合當時之宜。【補曰】謂桓得變之正。天子微，諸侯不享覲，【補曰】享，獻也。不貢獻，不朝覲。桓控大國，【補曰】控，引也。扶小國，【補曰】扶，佐也。佐，謂手相助。統諸侯，不能以朝天子，亦不敢致天王，【補曰】統，總也。雖不能以諸侯朝京師，亦不敢如晉文致天王而朝之。呂祖謙論受胙請隧等事，以爲齊桓專在於扶名分，晉文則適以壞名分，見管仲、舅犯之優劣。尊王世子于首戴，【補曰】由其不敢致天王，故但致王世

子而尊之於會。乃所以尊天王之命也。【補曰】尊世子正以尊王也。言命者，請於王而王命之來。世子含王命會齊桓，亦所以尊天王之命也。【補曰】世子銜王命而來會，自尊亦即以尊王命。世子受之可乎？是亦變之正也。【補曰】亦，亦齊桓，與上同。天子微，諸侯不享覲，世子受諸侯之尊己，而天王尊矣，世子受之可也。【補曰】世子尊則天王尤尊，故可受也。自「桓諸侯也」以下，通論會盟之善。《左傳》曰「謀寧周也」，服、杜皆以爲王將廢世子，立王子帶，故齊桓帥諸侯會之以定其位。於此《傳》未能相通，或當時實有其事，而《經》但就文見義，以明其爲變之正，不須詳細論之耳。趙鵬飛以爲是會能假義，是盟能假信，引《經解》曰「義與信，伯王之器也」。家鉉翁則謂定世子之位之說深爲可疑，只當從《穀梁》。《穀梁》明變正之義，有功世教。

鄭伯逃歸不盟。以其去諸侯，故逃之也。專己背衆，故書逃。《傳例》曰：「逃義曰逃。」【補曰】

《公羊》引魯子曰「蓋不以寡犯衆也」，范本之。言不盟，則知上諸侯無鄭伯。劉敞曰：「出不盟者，在盟前逃也，猶沙

隨、平丘。尋其先文，如皆已盟，復得後語，乃知不與耳。」文烝案：言不者，可以然而不然之例。

楚人滅弦，弦子奔黃。弦，國也。其不

日，微國也。【補曰】重發《傳》者，此是楚滅，嫌異也。又此奔蒙上月，而滅在時例，與黃、夔、江、六同，皆夷狄之微國也，故重發《傳》。

九月戊申朔，日有食之。

冬，晉人執虞公。虞公貪璧馬之寶，棄兄弟之

親，拒絕忠諫之口，不圖社稷之危，故晉命行于虞，使下執上，虞同于晉，是以謂之晉人執虞公。【補曰】晉滅同姓不讖者，惠士奇曰：「夏陽之滅，以虞爲主，至此滅虞，變文言執，所以末滅晉之罪而獨罪虞也。不言滅，故亦不得稱名。」文烝案：此滅宜月，不言滅，故亦不月。執不言所

於地，縕於晉也。時虞已包裹屬於晉，故雖在虞執而不書其處。【補曰】疏曰：「舊解云執人例不書地，此云不

地縕於晉者，凡執人不地者，亦以地理可明故也。若晉會諸侯于湍梁，執莒子、邾子；楚合諸侯于申，執徐子；皆因會而執之，則在會可知，故不假言地。至如滅人之國，執人之君，則亦是就國可知也。《經》若書晉滅虞，則是言其地，

今不書滅虞，即不舉滅國之地，不謂執人當地也。所以不言滅虞者，晉命先行於虞，虞已屬晉，故不得言之也。或以爲執不言所於地，謂不書執虞公于虞也。縕於晉，謂虞已苞裹屬晉，故不得言也。理亦通耳。」其曰公何也？據十九年宋人執滕子嬰齊不言公。猶曰其下執之之辭也。臣民執其君，故稱公。江熙曰：「《春秋》有州公、郭公、虞公，凡三公，非爵也，《傳》以爲下執之辭。嘗試因此論之，五等諸侯，民皆稱曰公，存有王爵之限，沒則申其臣民之稱。州公舍其國，故先書州公；郭公盜而歸曹，故先名而後稱郭公；夏陽亡則虞爲滅國，故宜稱虞公。三人殊而一致，三公舛而同歸，生死齊稱，蓋《春秋》所賤。」補曰：《左傳》鄭莊公曰「無寧茲許公復奉其社稷」，此告許大夫百里之辭，從其所稱以爲稱，是臣民稱公之驗。又齊公子元不順懿公，終不曰公，明常稱皆曰公也。《春秋》內君則稱公，外稱公者，自宋以外皆以配謚，故曰「生死齊稱，《春秋》所賤」也。疏曰：「州公本無舍國之事，郭公不見盜歸之文，今江爲此說而范不難者，以州公舍國，《左氏》有文，郭公棄位適曹，即是盜之狀。」錢儀吉曰：「注『盜』字疑當作『逃』。」其猶下執之之辭何也？【補曰】據臣出

其君以自出爲文，況虞實不執君邪？晉命行乎虞民矣。虞服于晉，故從晉命而執其君。【補曰】晉命既行，可以使虞執之，故晉執而從虞稱也。縕以國言，命行以民言，皆指滅夏陽。但言民則臣兼之。虞、虢之相救，非相爲賜也，今日亡虢而明日亡虞矣。言明日，喻其速。【補曰】此又明虞借晉道一事，君子所甚惡也。前則主兵，此則不言滅，又稱公，所以大著其義。劉敞曰：「《春秋》之記事，原始見終，不失其實者也，故虞之滅自夏陽始，夏陽滅則虞亡矣。官之奇、舟之僑之徒皆知之，獨其君不知，故《春秋》因大見其釁於滅夏陽，而深沒其迹於執虞公，使天下之爲人君者從而省之，可以戒於此矣。故曰家有既亡，國有既滅，由別之不別也，可不哀乎？」文烝案：《傳》不釋稱人義者，凡諸侯稱人以執諸侯，皆是衆辭，皆是與其執有罪，與稱爵斥執者相對爲文。《傳》於後既明稱爵斥執之非，則稱人義自足見，故諸稱人悉略之也。諸侯執大夫皆稱人，無稱爵者，故或爲貶之外之，或爲衆辭，以其執有罪而與之，文同義異，而《傳》亦隨事備文。執諸侯則有稱爵、稱人二例，既以稱爵，當彼貶之外之之文，則稱人者自不煩釋。

# 春秋僖公經傳第四補注第十

穀梁 范氏集解 鍾文烝詳補

六年春王正月。

夏，公會齊侯、宋公、陳侯、衛侯、曹伯伐

鄭，圍新城。【補曰】《左傳》曰：「圍新密，鄭所以不時

城也。」杜預曰：「實新密而《經》言新城者，鄭以非時興土

功，齊桓聲其罪以告諸侯。」劉炫曰：「先王之制，諸侯無故

不造城，造城則攻其所造，《司馬法》「產城攻其所產」是

也。」伐國不言圍邑，此其言圍，何也？據元年

楚人伐鄭不言圍。【補曰】不得獨據彼又贅。病鄭也，

著鄭伯之罪也。泰曰：「諸伐國而言圍邑，《傳》皆以

爲伐者之罪。而以此著鄭伯之罪者，齊桓行霸，尊崇王室，

綏合諸侯，翼戴世子，盟之美者，莫盛於此。而鄭伯辟義逃

歸，違叛霸者，是以諸侯伐而圍之。罪著于上，討顯于下，

圍伐之文雖同，而善惡之義有殊，亦猶桓盟不日以明信，而葵丘之盟日之以爲美。【補曰】疏曰：「前書逃歸，是罪著於上也；今言伐，又言圍，是討顯於下也。」文烝案：注言「罪著於上」，非即《傳》所謂著罪；《傳》言著罪者，即申病鄭意也；言伐復言圍，或爲伐者之罪，或爲受伐者之罪；不嫌無別者，下以伐鄭致變，偶事致後之例，亦足明之也。

秋，楚人圍許。

諸侯遂救許。伐鄭之諸侯。【補曰】此本杜預。

善救許也。【補曰】疏曰：「何嫌非善？而《傳》言之

者，以許是近楚小國，叛而即齊，嫌救之非善，故發之。」

冬，公至自伐鄭。其不以救許致何也？

【補曰】據偶事，當致後。大伐鄭也。【補曰】疏曰：「大

之者，鄭叛中國，外心事楚，成蠻夷之強，益華夏之弱。齊

桓爲伯，討得其罪，鄭人服從，遂使世子聽命，是其大也。」

文烝案：公蓋以夏末行，冬初至，未滿二時，故不月。

七年春，齊人伐鄭。

夏，小邾子來朝。【補曰】杜預曰：「邾犁來始

得王命而來朝也。數從齊桓以尊周室，王命以爲小邾子。邾之別封，故曰小邾。」案：莊五年，《公羊》曰：「倪者何？小邾婁也。」○【撰異曰】小邾，《公羊》作「小邾婁」，終《春秋》皆然。

鄭殺其大夫申侯。【補曰】《呂氏春秋》謂之申侯伯。稱國以殺大夫，殺無罪也。【補曰】疏曰：「此云殺無罪，是罪鄭伯也。案：《傳》例失德不葬，文公不書葬，則亦失德也。枉殺卿佐，是失德之儔，未知鄭伯更有失德，爲當直由殺申侯，不可知也。」文烝案：文公不葬，非直由殺申侯，說見後卒下。

秋七月，公會齊侯、宋公、陳世子款、鄭世子華盟于寧母。寧母，某地。【補曰】當云魯地。

○【撰異曰】陸淳《纂例》曰：「《左氏》陳世子款下又有鄭世子華，誤加之也。」案：今《公》、《穀》皆有之。又《音義》、《纂例》「寧」，《左氏》作「甯」。案：今《公羊》亦作「甯」。《說文·宀部》：「寧，安也。从宀，心在皿上。皿，人之食飲器，所以安人也。」《丐部》：「寧，願書也。从丐，寧聲。」《用部》：「甯，所願也。从用，寧省聲。」《石鼓文》「天子永寧」，是訓「安」之字。今《書》傳盡作《丐部》字。晉古文

《書·大禹謨》音義辯之，《宀部》字爲會意，猶安从女在宀中，《丐部》、《用部》二字皆从其聲，又同義。明三字並通矣。毋，《左氏》作「母」，《音義》曰：「如字。又音無。」公、穀《音義》曰：「音無。又茂后反。」衣裳之會也。【補曰】疏曰：「衣裳之會十有一，或釋或不釋者，省文以相包。兵車之會少，故備舉見義。此是衣裳，後歲兵車，二文相近，故《傳》因而別之。」

曹伯班卒。○【撰異曰】班，《公羊》作「般」。案：《爾雅》「般」訓「還」，班訓「賦」，而古書以聲同通用。

公子友如齊。【補曰】聘也。

冬，葬曹昭公。

八年春王正月，公會王人、齊侯、宋公、衛侯、許男、曹伯、陳世子款盟于洮。洮，曹地。○【撰異曰】《公羊》「款」下有「鄭世子華」。王人之先諸侯何也？【補曰】據是下士。貴王命也。【補曰】會者外爲主，王人爲主，是貴王命。言命者，王人奉命出會，與世子同也。《傳》言襄內諸侯，非有天子之命不得

出會諸侯，明有天子命者得出會也。貴者，《經》貴之，亦由當時會實班上，猶能尊貴王命，故因而貴之以示義。諸書王朝臣出會先諸侯者，皆有王命，皆是貴之，卑者猶然，餘可知也。嘗論之齊、晉皆以外諸侯而爲伯，故自王人之微以至尹子、單子、劉子、宰周公皆據王命爲先，非周初二伯之制也。周初之二伯，自陝以東，周公主之，自陝以西，召公主之，其繼大保率西方諸侯，畢公率東方諸侯，皆以內諸侯爲伯，蓋所謂王官伯矣。齊桓、晉文與郇侯稱郇伯相似，但齊、晉既謂之侯伯，又謂之霸諸侯，亦其異也。齊、晉既爲伯，而周之卿士仍謂之王官伯，則又沿舊而通稱也。朝

服雖敝，必加於上；【補曰】朝服，玄冠之服，十五升

緇布衣而連裳，說見前。《詩》謂之「緇衣」，《逸周書·大

匡》謂之「麻衣」。諸侯視朝之服也，天子視朝則皮弁服。

皮弁者，白鹿皮爲弁。《士冠禮》曰：「皮弁服，素積緇帶素

鞶。」素積者，謂裳素者緇也，其衣蓋以緇，舊說十五升白布

爲之疑非。緇帶者，士制，大夫以上皮弁服皆素帶，諸侯視

朝朝服，朔視朝皮弁服，天子視朝皮弁服，朔視朝玄冕，凡

在朝君臣同服。《論語》「吉月必朝服而朝」，謂皮弁服也，

與其下文「朝服立阼」異。

弁冕雖舊，必加於首；

【補曰】《左傳》景王辭於晉曰「我在伯父，猶衣服之有冠冕」，即弁冕也。冕與弁與冠散文，渾言之皆通。周室雖衰，必先諸侯。【補曰】無問會者尊卑也。六句申上意。兵車之會也。

鄭伯乞盟。以向之逃歸乞之也。向，謂五

年逃首戴之盟。齊桓爲兵車之會于此，乃震服，懼不得盟，

故乞得與之。不錄使者，使若鄭伯自來，所以抑一人之惡，

申衆人之善。【補曰】戴祖啟曰：「向也逃則今也乞矣。」文

烝案：《經》因其乞而乞之，乞之猶上云逃之，皆謂《春秋》

之文也。向，或作「鄉」。注不錄使二句，本何休。下二句

在上「逃歸」《傳》下。乞者，重辭也，人道貴讓，故以乞

爲重。【補曰】注依定元年重請爲說，彼釋「求」義，非釋

「乞」義，「求」與「乞」雖同是「重」，而「乞」又重於「求」。疏

曰：「文與乞師同，故爲重辭。」得之。重是盟也。悔前

逃歸，故以「重」言。【補曰】申上句。乞者，處其所而

請與也，言乞，知不自來。【補曰】何休曰：「處其國上。」

注《音義》曰：「得與音豫，下「請與」并下注「而與」同。本

或作「豫」。孔廣森曰：「與，許也，使請見許盟於齊也。」蓋



沟之也。沟血而與之。【補曰】此二句與《公羊》同。沟，《公羊》作「酌」。何休曰：「酌，挹也。挹取其血。」范本之。孔廣森曰：「《周官》『邦沟』，鄭衆曰『沟』讀如『酌酒尊中』之『酌』。斟酌盜取國家密事，若今時刺探尚書事然，則『酌』之義猶言探之也。鄭屬與楚，不敢親來盟，使其世子爲乞盟，以探齊侯之意，蓋齊侯許之，故下葵丘之盟，鄭伯遂自至也。」文烝案：「沟」訓「探」亦可通。言使其世子，則據《公羊》經，非也。蓋者，承上語辭。謝湜曰：「爲宗廟社稷主，而其始若賤者，負罪而逃，其終若賤者，哀告而乞，著其屈辱，罪其不智也。」

### 夏，狄伐晉。

秋七月，禘于大廟，禘，三年大祭之名。大廟，

周公廟。《禮記·明堂位》曰：「季夏六月以禘禮祀周公于大廟。」《雜記下》曰：「孟獻子曰，七月日至，可以有事于祖。七月而禘，獻子爲之。」案：宣九年仲孫蔑如京師，於是獻子始見《經》，襄十九年卒，然則失禮非獻子所始明矣。《雜記》之云，甯所未詳。【補曰】范依《左氏》說，禘爲三年大祭，因喪畢始禘，自後遂以三年爲節，不知喪畢或禘或祫，五年而再殷祭。禘實五年祭之名，言大廟以包群廟，閔

二年詳之矣。《明堂位》季夏六月，鄭君以爲建巳月，《毛詩傳》亦言夏禘秋祫。七月禘者，後世變制，非唯不始於獻子，亦必不始於此時，是《雜記》之誤。又禘武公在二月，禘僖公在十月，是魯禘實無常期矣。禘既無常，史例不以失時志，此志者，爲用致夫人也。月者，謹用致，非譏禘不時也。○禘有爲時祭名者，《王制》、《祭統》春曰杓，夏曰禘。《郊特牲》、《祭義》又言春禘。《國語》邱敬子言嘗、禘、蒸、享皆據夏、殷之禮也。《商頌序·長發》大禘，自是殷祭之禘，別乎時祭，故言大也。禘有爲祭天地名者，《祭法》、《魯語》「周人禘饗而郊稷」，《周語》禘郊之事則有全烝，《魯語》天子潔奉禘郊之粢盛，《楚語》郊禘不過繭栗。天子禘郊之事，必自射其牲，天子親春禘郊之盛。此禘乃冬至祭昊天上帝於圜丘，夏至祭地於方丘之禮。《周頌序·昊天有成命》郊祀天地亦通稱郊也。《喪服小記》、《大傳》「不王不禘」，王者禘其祖之所自出，以其祖配，此夏正月祭上帝於南郊之禮，即魯郊子丑寅三月之禮。郊而通稱禘也。《周禮注》以圜丘方丘并宗廟爲三大禘。案：《爾雅》曰：「禘，大祭也。」大祭之合聲則「禘」，故凡大祭皆蒙其名矣。用致夫人。劉向曰：「夫人，成風也。致之于大廟，立之以爲



夫人。【補曰】《左傳》以夫人爲哀姜，果爾則當言用致哀姜。凡小君既沒有謚，不言夫人，猶君不可舍謚直言公也。《公羊》以爲齊之媵女。案：《左氏》哀二十四年《傳》：「公立公子荊之母爲夫人，宗人鬻夏謂魯無此禮，是知魯君當身以妾爲妻者始於彼時，非《春秋》中所有，黃澤言之矣。」用

者，不宜用者也。【補曰】重發《傳》者，嫌與用幣異。

致者，不宜致者也。【補曰】言致，知不宜致，宜致者

則曰至自某，不曰致之，猶立與即位之異。《公羊》并上句皆同，謂之用致者，始立妾母爲夫人而見於廟，用此禘禮以致之亦若夫人始嫁而告至，又若三月廟見之禮也。沈欽韓曰：「妾媵不助祭，尊成風，爲將來祔食之地，乃致成風，爲此日人廟之典也。」文烝案：《左氏》說以爲吉禘致新死者，而此禘非值喪畢，不得爲吉禘，故杜預推《左氏》之意以爲歷三禘而行其禮，紆回失實。言夫人必以其氏姓，

【補曰】說見莊元年。言夫人而不以氏姓，非夫人

也。【補曰】包文姜言之。哀姜去姜，出姜，穆姜去氏，次於

此例。立妾之辭也。【補曰】此專言成風。非正也。

夫人者，正嫡之稱，謂非崇妾之嘉號，以妾體君則上下無

別，雖尊其母，是卑其父，故曰非正也。禮有君之母非夫人者，又庶子爲後，爲其母緦，是妾不爲夫體明矣。【補曰】案：庶子爲父後者，爲所生母服緦三月，謂君之庶子父卒者也。若父在，爲其母練冠麻，麻衣緦緣，既葬而除，不在五服中。不爲後者，父在同，父卒則爲其母大功九月。大夫之庶子，父在爲其母大功九月，父卒爲其母齊衰三年。爲後不爲後者皆同，凡大夫以上，他庶母皆無服，《喪服》經注備矣。《五經異義》：「今《春秋公羊》說妾子立爲君，母得稱夫人，故上堂稱妾，屈於適也，下堂稱夫人，尊於行國也。父母者，子之天也，子不得爵命父母，則士庶起爲人君，母亦不得稱夫人。至於妾子爲君，得爵命其母者，以妾本接事尊者，有所因緣故也。《穀梁》說魯僖公立妾母成風爲夫人，人宗廟，是子而爵母也。以妾爲妻，非禮也。古《春秋左氏》說成風得立爲夫人，母以子貴，禮也。許君謹案：《尚書》舜爲天子，瞽瞍爲士，明起於士庶者，子不得爵父母也。至於魯僖公，本妾子，尊母成風爲小君，《經》無譏文，從《公羊》、《左氏》之說。」鄭君駁云：「《禮·喪服》：父爲長子三年，以將傳重故也，衆子則爲之期，明無二適也。女君卒，貴妾繼室攝其事耳，不得復立爲夫人。魯僖公妾母爲夫人者，乃緣莊公夫人哀姜有殺子般、閔公之罪，應貶故

也。近漢呂后殺戚夫人及庶子趙王，不仁，廢不得配食。文帝更尊其母薄后，非其比邪？妾子立者得尊其母，禮未之有也。」文烝案：如鄭所言，知《穀梁》爲正《經》，明有譏文，而許云無譏，非也。鄭論成風，意謂正夫人有以罪廢，妾母得成爲夫人。鄭又言宣公所以得尊其母爲夫人者，以姜氏歸齊不反之故。又杜預《釋例》以爲適母薨則申其母尊，孔穎達申杜曰：「哀姜既薨，成風乃正，出姜既出，敬嬴乃正，齊姜既薨，定嬖乃正，襄公一世，無娶夫人之文，故齊歸得正。」今案：此等權宜之說，皆非《穀梁》義，唯孔說齊歸似可依用。鄭援漢事，乃光武，非文帝也。夫人之，我可以不夫人之乎？夫人卒葬之，我可以不卒葬之乎？鄭嗣曰：「君以爲夫人，君以夫人之禮卒葬之，主書者不得不以爲夫人也。成風以文四年薨，五年葬，《傳》終說其事。」【補曰】此有二「我」字，蓋通下二句皆夫子之言，與十九年《傳》「我無加損」同例也。蘇轍謂《春秋》所書不爲異辭者，君臣之禮。胡安國以爲謹禮所由變，薛季宣以爲不沒其實。一則以宗廟臨之而後貶焉，臣無貶君之義，故于大廟去夫人氏姓，以明君之非正。【補曰】注非也。貶者，謂貶去夫人氏姓，與文姜、哀

姜、出姜之貶皆同。一則以外之弗夫人而見正焉。秦人來歸僖公成風之襚，不言夫人。【補曰】注亦非也。以外之弗夫人而見正者，謂不直言成風，而言僖公、成風也。於彼論之，夫夫人之、夫人卒葬之者，紀其實也。貶焉、見正焉者，所謂《春秋》視人所惑，立說以明之也，略舉數事，以證斯文。桓也而公，我亦公之；文姜也而夫人，我亦夫人之；楚商臣、蔡般而楚子、蔡侯，我亦楚子之、蔡侯之。惑則有說焉，桓不可爲公，而王不討，疑若可也，故將公之則先謹之也。文姜不可爲夫人，而子念母，疑若可也，故既夫人之而又貶之也。不惑則無說焉，楚商臣、蔡般，夫人而知其不可爲楚子不可爲蔡侯也，故楚子之、蔡侯之，如桓文也，是故我紀其實而已矣。紀其實而無說，我寄其意而已矣。寄其意者亦所謂我無加損焉，而名亦未嘗不正也。後世史書既非聖筆，不足寄意，乃競立說，小失則乖礙文體，大失則變亂事實，自王通、沈既濟、孫樵以來，又不第如譙周、干寶、孫盛之書以模擬文句爲病矣。

冬十有二月丁未，天王崩。惠王也。【補

曰】史記：桓王子莊王佗，莊王子禧王胡齊，僖王子惠王閔，《世本》名毋涼，《國語》注或作「涼」。《左傳》崩在上年

閏月無日，以爲至是來告。趙匡以來皆疑之，當是上冬有疾，至此崩也。

九年春王三月丁丑，宋公禦說卒。【補

曰】宋桓公也。不葬者，《疏》曰：「蓋魯不會。」○【撰異曰】禦，本亦作「御」，《左氏》作「御」。

夏，公會宰周公、齊侯、宋子、衛侯、鄭伯、許男、曹伯于葵丘。宰，官。周，采地。天子三

公不字。宋子，襄公。葵丘，地名。【補曰】周公，名孔。葵丘，杜預《釋例》「宋地也」。全祖望、洪亮吉據《左傳》云西爲此會，從《水經注》爲晉地。注自末句外皆本杜預。天

子之宰通于四海。宰，《天官·冢宰》兼爲三公者，三

公論道之官，無事于會盟。冢宰掌建邦之六典，以佐王治邦國，故曰通于四海。【補曰】疏曰：「《傳》言通於四海者，

解其與盟會之事也，若直爲三公論道之官，則無事於會盟。

以兼爲冢宰通於四海，爲諸侯所尊，故得出會也。一解通

於四海者，解其稱官之意，與注乖。」文烝案：一解得之，於

注亦不相悖。孔穎達解此《傳》謂「宰者六官之長，官名通

於海內，故書官名」是也。孔又以爲《傳》兼解宰、宰渠伯

糾，蓋自宰夫以上皆通，其說未當。宰周公以公兼卿，以其兼冢宰，通於四海，而書官。渠伯糾爲宰夫，咺爲宰夫之屬，亦書官者，因冢宰連及之也。官有正有貳有考，冢宰卿爲正，小宰中大夫爲貳，宰夫下大夫爲考，其官名俱爲宰，故通得書宰。其士則謂之殷，而上士中士視旅下士爲尊，故統於考而亦書宰。不嫌無別者，或名或字或爵，足以別之也。宋司城官屬俱來，司馬華孫官屬亦俱來，直書司城、司馬，亦其比也。至於周公出奔晉，祭公來，不言所兼之卿官，其餘自卿至中士皆不言官，明非冢宰及其貳與考，則皆略之。王子虎卒，《左傳》謂之王叔文公，《經》不言官，而《國語》以爲大宰，似未足據也。《公羊》謂宰周公是天子之爲政者。案：周初，周公以大宰攝王事，明宰實爲政，爲政故通於四海，通四海故言官，此必魯史所受《周禮》舊法，而君子因之。春秋時，周之爲政者不必皆大宰矣。鄭君《周禮注》曰：「百官摠焉，謂之冢，列職於王則稱大。」何休曰：「宰，猶治也。」干寶、賈公彥解《周禮》謂取調和之名。《爾雅》曰：「九夷、八狄、七戎、六蠻謂之四海。」李巡本《爾雅》。下文又云「八蠻、六戎、五狄」，與《風俗通》同。又古書言「四海」或爲四方之通稱，是有二義也。時蓋百官聽於冢宰，王既葬而命之出會，諸侯會葬，先出以俟乎？宋

其稱子何也？未葬之辭也。【補曰】內書子者，

既葬稱子，未葬稱子某。此宋子及定四年陳子未葬不名，

不如子般，子野者。既出會盟，與諸國君列序，不得獨出名

也。禮：柩在堂上，孤無外事，今背殯而出

會，以宋子爲無哀矣。槨木如椁，塗之曰殯。殷人

殯于兩楹之間，周人殯于西階之上。宋，殷後也。【補曰】

注言殷後者，解《傳》「堂上」爲兩楹間也，其實《傳》亦通言之。《曲禮》曰：「在牀曰尸，在棺曰柩。」無外事者，猶云喪

不貳事也。殯者，以大斂而徙棺也。依《檀弓》、《喪大記》，

天子之殯，菆塗龍輻以椁，加斧椁上，畢塗屋，諸侯之殯用

輅，橫至於上，畢塗屋，大夫之殯以幬，橫置於西序，塗不

暨於棺，士之殯見衽，塗上，帷之。「菆」與「橫」同字。凡

柩既殯將葬，乃啟之，其未啟，謂之在殯也。疏曰：「嫌稱

子合正無譏，故《傳》責其背殯。」文烝案：《傳》明《經》意，

見其無哀也。

秋七月乙酉，伯姬卒。內女也，【補曰】疏

曰：「不嫌非內女而云內女也者，明內女有書卒之義。」未

適人不卒，此何以卒也？【補曰】未適人，通言內

諸未嫁女也。不卒者，《經》例因史例也。許嫁，笄而

字之，吉笄以象爲之，刻鏤其首以爲飾，成人著之。【補

曰】《喪服傳》曰：「吉笄者，象笄也。」何休曰：「笄者，簪也，

所以繫持髮，象男子飾也。服此者，明繫屬於人，所以養貞

一也。字者，尊而不泄，所以遠別也。《昏禮》曰：「女子許

嫁，笄而禮之，稱字。」文烝案：《曲禮》亦與《傳》同。又曰

「女子許嫁，纓」，《內則》曰「女子十有五年而笄」，《雜記》曰

「女雖未許嫁，年二十而笄也」。字，即伯仲叔季，猶男子冠

而字。耿南仲說《易》「女子貞不字」，直訓「字」爲許嫁，誤。

《易》之「字」當從虞、陸說。死則以成人之喪治之。

女子許嫁不爲殤，死則以成人之喪治之，謂許嫁于諸侯，尊

同，則服大功九月。【補曰】何休曰：「不以殤禮降也。」

九月戊辰，諸侯盟于葵丘。【補曰】閒有事，

故復舉諸侯，雖王臣及諸侯之世子大夫在焉，皆以諸侯包

之。薄、宋、祝、柯、重丘、皋鼬五者皆同義也。《左傳》謂宰

孔先歸，《傳》無此意，《國語》似與《內傳》同，何休亦謂宰周

公不與盟，似皆非。桓盟不日，此何以日？美之

也。爲見天子之禁，故備之也。何休以爲即日

爲美，其不日皆爲惡也。桓公之盟不日，皆爲惡邪？莊十

三年柯之盟不日，爲信，至此日，以爲美，義相反也。鄭君釋之曰：「柯之盟不日，固始信之，自其後盟，以不日爲平文。從陽穀已來至此葵丘之盟，皆令諸侯以天子之禁，桓德極而將衰，故備日以美之，自此不復盟矣。」【補曰】疏曰「毋雍泉」以下是四教之事，而《論語》「一匡天下」，鄭指陽穀者，據《公羊》之文，其實此會亦有四教，故云「從陽穀已來」云云也。十五年盟牡丘而云不復盟者，以衣裳之會不復盟，彼是兵車故也。文烝案：陽穀大朝，葵丘明禁，《傳》本截然明白。鄭必兼用《公羊》者，凡鄭君之學，主於貫通稽合，往往如此。劉賁對策曰：「葵丘之盟特日者，美其能宣明天子之禁，率奉王官之法，故《春秋》備而書之。」汪克寬曰：「首戴定天下之大本，洮安天下之大勢，葵丘示天下之大法。」葵丘之盟，陳牲而不殺，所謂無敵血之盟。鄭君曰：「盟牲，諸侯用牛，大夫用豕。」【補曰】疏曰：「衣裳之會，皆不敵血，以此會極盛，故獨詳其事耳。洮會云「洮血」者，彼兵車之會故也。徐邈云「陳牲者，不殺埋之，陳示諸侯而已」。下文「加於牲上」者，亦謂活牲，非死牲。」讀書加于牲上，壹明天子之禁，豈猶專也。

【補曰】讀載書以明之，如下所云。

曰：毋雍泉，專水

利以障谷。【補曰】雍，遏也。《說文》曰：「泉，水原也。」《管子》書稱楚人攻宋，鄭要宋田，夾塞兩川，使水不得東流。雍泉亦謂此類。毋訖糴，訖，止也。謂貯粟。【補曰】二注皆《公羊》文。《左傳》晉盟曰：「毋壅利，毋濫年。」毋易樹子，樹子，嫡子。【補曰】何休曰：「樹立本正辭，無易本正當立之子。」毋以妾爲妻，【補曰】《說文》「妾，古文「妻」，从尙女。尙，古文「貴」字，明妻者貴稱。文王之妃太姒，《大雅》稱「寡妻」，《毛傳》曰「適妻也」。孔穎達曰：「適妻唯一，故言寡。」寡者，特也。《小雅》之「豔妻」，《魯詩》作「閭妻」，或作「剡妻」，鄭據之指厲王后，以爲敵夫曰妻。鄭是也。《荀子》曰「天子無妻」，謂禮之正稱，其通稱則謂后爲妻。毋使婦人與國事。女正位於內。【補曰】此謂妻也，亦容母言之，如文姜之比。戰國、秦、漢以後，母后爲攝主，春秋之世，見其端矣。《公羊》載四教在陽穀，無末句。《孟子》述葵丘五禁亦無末句，而文允詳，曰：「葵丘之會，諸侯束牲載書而不敵血。初命曰，誅不孝，無易樹子，無以妾爲妻。再命曰，尊賢育才，以彰有德。三命曰，敬老慈幼，無忘賓旅。四命曰，士無世官，官事無攝，取士必得，無專殺大夫。五命曰，無曲防，無遏

繹，無有封而不告。」彼以五命爲五禁，此則句別爲禁也。《左傳》不言明天子之禁而載宰孔之言，以爲齊侯不務德而勤遠略。《公羊》既移四教事於陽穀，乃云「葵丘之會，桓公震而矜之，叛者九國」，遂以此盟書日爲危之。《國語》亦記宰周公語，《戰國策》蔡澤亦言震矜國叛，皆他國所錄，末俗所傳，違於《經》義。

甲子，晉侯詭諸卒。獻公也。枉殺世子申生，

失德不葬。○【撰異曰】甲子，《公羊》作「甲戌」，張洽曰：

「甲子不應在戊辰後，合從《公羊》作「甲戌」。詭，《左氏》作「倗」，陸渚《纂例》唯云《公羊》作「詭」。

冬，晉里克殺其君之子奚齊。【補曰】疏

曰：「弑書時者，不正，且又未成君。」○【撰異曰】殺，《公羊》作「弑」。案：此字或作「弑」，或作「殺」，皆音申志反。

後闕弑吳子、盜弑蔡侯皆同。《淮南子》、董仲舒、劉向並言《春秋》之中弑君三十六，段玉裁以爲當作「二十六」，謂衛弑完一也，宋弑與夷二也，齊弑諸兒三也，宋弑捷四也，晉弑奚齊五也，弑卓六也，楚弑髡七也，齊弑舍八也，宋弑杵臼九也，齊弑商人十也，莒弑庶其十一也，晉弑夷皋十二也，鄭弑夷十三也，陳弑平國十四也，晉弑州蒲十五也，齊

弑光十六也，衛弑剽十七也，吳弑餘祭十八也，蔡弑固十九也，莒弑密州二十也，楚弑虔二十一也，許弑買二十二也，吳弑僚二十三也，薛弑比二十四也，蔡弑申二十五也，齊弑荼二十六也。其君之子云者，【補曰】據例當直稱子也。陳侯之弟招殺陳世子偃師，重舉陳，此當言弑晉子。國人不子也。諸侯在喪稱子，言國人不君之，故繫于其君。【補曰】言《經》爲國人不子之辭也。疏曰：「徐邈云不子者，謂不子愛之也。非范意。」高澍然曰：「以子繫國，公也；以子繫君，私也。」文烝案：加之者，緩辭，何休所謂起先君之子。孫覺曰：「惡奚齊而里克之罪不減，此《春秋》所以斷疑似之邪正，盡人情之難言，《穀梁》義最精。」國人不子何也？不正其殺世子申生而立之也。【補曰】《經》不正之。

十年春王正月，公如齊。【補曰】言如者，朝

也。桓僭夫人，莊以他事行，至此始專是朝大國。如京師、如晉、如楚，皆朝也。月者，疏以爲爲下減溫，疏非也。孔廣森說《公羊》曰：「公以正月如某，或正月至者，必月，重始月也，猶存君之意也。」案：孔說最爲得實。正月存君，

本《公羊》文，《穀梁》亦言存公。不致者，亦從安之之例。

狄滅溫，溫子奔衛。【補曰】蘇子國於溫，溫子

即蘇子。襄內諸侯，天子之上大夫也。滅奔皆蒙月，月非但施於滅。

晉里克弑其君卓【補曰】朱子曰：「里克自不當

安於奚齊、卓之立，但不可殺之。」王樵曰：「不正既於奚齊見義，則於卓成其君臣之名，以正里克之罪。」文烝案：不日者，不正也。○【撰異曰】《公羊》作「卓子」。及其大

夫荀息。以尊及卑也，荀息閑也。【補曰】荀息

所以爲閑者，《公羊》所謂不食其言也。疏曰：「後君死。

重發《傳》者，仇牧是卑者所殺，此爲尊卿殺之，嫌異也。」文

烝案：《傳》曰「死君難，臣道也」，孔父、仇牧、荀息《經》並

言及，《傳》並稱閑，明同義矣。柳宗元《非國語》曰：「息聞

君之惑，排長嗣而擁非正，其於中正也遠矣。不食其言，又

不可爲信，《春秋》類之。孔父、仇牧以激不能死者耳。孔

子曰：「與其進不保其往也。」

夏，齊侯、許男伐北戎。【補曰】有許男從伐，

不危之，故不以愛辭稱人。張自超曰：「桓獨徵師於許者，

前以諸侯之師伐鄭，未嘗用許師，又爲許解楚圍，故伐北戎

獨致許男，不復煩諸侯也。以江、黃伐陳，以曹伐厲，以徐伐英氏，齊桓用師節制如此。」

晉殺其大夫里克。稱國以殺，罪累上

也。【補曰】累者，延坐及之。上，謂君上，以罪延坐君上，

明其有專殺之罪，罪君不罪臣也。申侯之殺已發殺無罪之

例，此重發之者，里克弑逆，嫌例有異，故重明之也。弑逆

不可云無罪，故不曰殺無罪，而曰罪累，上論其事，則有小

異，要之《經》書其殺，專以罪君，其意一也。里克弑二

君與一大夫，二君，奚齊、卓子。一大夫，荀息。【補

曰】《國語》惠公曰「子殺二君與一大夫」，作「殺」者不誤。

《左傳》此句及此《傳》作「弑」，皆誤，說具隱四年。其以

累上之辭言之何也？據有罪。其殺之不以其

罪也。【補曰】非討賊還，以凡殺論。其殺之不以其

罪柰何？里克所爲弑者，爲重耳也。殺奚齊、

卓子者，欲以重耳爲君。重耳，夷吾兄文公。夷吾曰

「是又將殺我乎？」故殺之，不以其罪也。其

爲重耳殺柰何？晉獻公伐虢，得麗姬，【補

曰】《左傳》、《國語》、劉向《列女傳》謂伐驪戎所得，《莊子》



以爲艾封人之子。獻公私之，有二子：長曰奚齊，稚曰卓子。【補曰】《公羊》、《列女傳》同。《左傳》、《國語》以爲姬娣生卓子。稚，少也。麗姬欲爲亂，亂，謂殺申生而立其子。故謂君曰：「吾夜者夢夫人趨而來曰『吾苦畏』，夫人，申生母。【補曰】齊姜也。胡不使大夫將衛士而衛冢乎？」【補曰】胡、何通。衛士，宿衛之士，主守護者。冢，高墳。謂築宮宿衛之。公曰：「孰可使？」曰：「臣莫尊於世子，則世子可。」故君謂世子曰：「麗姬夢夫人趨而來曰『吾苦畏』，女其將衛士而往衛冢乎？」世子曰：「敬諾。」築宮，宮成。麗姬又曰：「吾夜者夢夫人趨而來曰『吾苦飢』，世子之宮已成，則何爲不使祠也？」【補曰】祠者，祭之通稱。《戰國策》曰楚有祠者。故獻公謂世子曰：「其祠。」世子祠。已祠，致福於君，【補曰】福，胙肉。君田而不在，麗姬以酖爲酒，【補曰】酖之正字作「鴆」，運日鳥也，其羽有毒，以畫酒，飲之

則死。藥脯以毒。【補曰】《國語》曰「實葷于肉」，賈、韋並曰鳥頭也。獻公田來，麗姬曰：「世子已祠，故致福於君。」君將食。麗姬跪曰：「食自外來者，不可不試也。」【補曰】危坐曰跪，亦曰跽，曰啟。安坐曰坐，亦曰居，曰處。危者直其身，安者著於蹠。《爾雅》、《毛詩傳》皆曰：「啟，跪也。」《聲類》曰：「跪，跽也。」覆酒於地，而地賁，賁，沸起也。以脯與犬，犬死。麗姬下堂而啼，呼曰：「天乎！天乎！國，子之國也，子何遲於爲君？」【補曰】兩言「子」者，尊辭。君喟然歎曰：「吾與女未有過切，吾與女未有過差切急。是何與我之深也？」【補曰】王念孫曰：《方言》曰：「予，讐也。」予，與古字通。與我，讐我也。《文彙》案：言「吾」又言「我」者，語意「我」緩於「吾」也。使人謂世子曰：「爾其圖之。」【補曰】上兩言「女」，此言「爾」者，語音「爾」重於「女」也。世子之傅里克【補曰】傅，傅相也。何休《公羊》注曰：「禮：諸侯之子，八歲受少傅，教之以小學，業小道焉，



履小節焉。十五受大傳，教之以大學，業大道焉，履大節焉。」文烝案：此人學就傳之年，《大戴禮·保傳》、《白虎通》並同，蓋自王太子、王子以至元士之嫡子皆如是。《書大傳》以爲十三人小學，二十人大學。又一說十五人小學，十八人大學。謂世子曰：「人自明。」【補曰】句絕。

人自明則可以生，不入自明則不可以生。」世子曰：「吾君已老矣，已昏矣，吾若此而入自明，則麗姬必死，麗姬死則吾君不安，所以使吾君不安者，吾不若自死，吾寧自殺以安吾君。以重耳爲寄矣。」慮麗姬又譖重耳，故以託里克使保全之。刎脰而死。【補曰】刎，割斷也。脰，頸項也。

《呂氏春秋》、劉向《說苑》以爲伏劍死。《左傳》、《國語》、《列女傳》以爲自經。故里克所爲弑者，爲重耳也。

夷吾曰：「是又將殺我也。」【補曰】《傳》兩言夷吾，不言惠公者，因稱重耳，故順文稱之，觀此《傳》，重耳得正明矣。《公羊》載里克言「君殺正而立不正，廢長而立幼」，長亦謂重耳也。又以惠公、文公出奔還人皆爲篡，特發《傳》云。曷爲不言惠公之人、晉之不言出入者？

踊爲文公諱也；謂惠公之人，懷公之出，文公之人，渾皆不書，爲文公諱故也。又云齊小白入于齊，曷爲不爲桓公諱？桓公享國長，美見乎天下，故不爲之諱本惡；文公享國短，美未見乎天下，故爲之諱本惡。謂桓之功足以除篡，文則未能，須爲諱惡也。案：《公羊》皆失之。文公得正當言歸，懷公見殺本非出，《經》不書惠公之人，懷公之弑，文公之歸者，皆因魯史之舊。《左傳》以爲不告故不書是也。

### 秋七月。

冬，大雨雪。【補曰】以大爲異也。不月者，蓋歷月。○【撰異曰】雪，《公羊》作「雹」，徐彥曰「《左氏》作「雪」」。

### 十有一年春，晉殺其大夫丕鄭父。○【撰

異曰】陸渚《纂例》曰：「丕，《公羊》作「邳」。」案：今《公羊》不作「邳」。徐彥《公羊》疏、陸渚《纂例》並曰「左氏《經》無「父」字，段玉裁曰：「《左傳》言丕鄭者，四不言父，則其《經》無「父」字明矣。」案：今左經皆有「父」。汪克寬曰：「《傳》但言鄭者，省文，如箕鄭父、胥甲父但言箕鄭、胥甲，樂祁犂但言樂祁。」汪說亦通。稱國以殺，罪累上

也。【補曰】疏曰：「重發《傳》者，此里克同黨，恐異，故發之。」

夏，公及夫人姜氏會齊侯于陽穀。【補

曰】姜氏，聲姜也。言及者，以夫及婦也。不致者，此亦離會，又會桓與柯。以下同。

秋八月，大雩。雩，月，正也。【補曰】亦通九

月言之。雩，得雨曰雩，不得雨曰旱。禮：龍見

而雩。常祀不書，書者，皆以旱也。故得雨則喜，以月爲正也；不得雨則書旱，明旱災成。何休曰：「《公羊》書雩者，

善人君應變求索也，不雩則言旱，旱而不害物，言不雨也。就如《穀梁》，設本不雩，何以明之？如以不雨明之，設早

而不害物，何以別乎？」鄭君釋之曰：「雩者，夏祈穀實之禮也，旱亦用焉。得雨書雩，明雩有益，不得雨書旱，明旱

災成，後得雨無及也。國君而遭旱，雖有不愛民事者，何乃廢禮本不雩禱哉？顧不能致精誠也。旱而不害物，固以

久不雨別之。文二年、十年、十三年，自十有二月自正月不雨，至于秋七月是也。《穀梁傳》曰「歷時而言不雨，文不閔

雨也」，以文不憂雨，故不如僖時書不雨。文所以不閔雨者，素無志於民，性退弱而不明，又見時久不雨而無災耳。」

【補曰】爲災言旱，不爲災言不雨，《左氏》、《公羊》皆同。《公羊》以別災與異。

冬，楚人伐黃。

十有二年春王三月庚午，日有食之。

○【撰異曰】三月，各本作「正月」，惟唐石經作「三月」，與《左氏》、《公羊》同。王引之曰：「據杜氏《長曆》正月辛丑朔，三月庚午朔，則作「三」者是，今據改正。」

夏，楚人滅黃。【補曰】不月者，黃與前之弦、後

之變、江、六、群、舒等皆夷狄也，故滅皆時，《傳》於弦、變略言之，於宣十五年發例。貫之盟，管仲曰：「江、黃

遠齊而近楚。楚，爲利之國也，【補曰】言便於

伐。若伐而不能救，則無以宗諸侯矣。」宗諸

侯，謂諸侯宗之。【補曰】《注》以宗爲尊，非其意。《風俗

通》曰：「宗，長也。《字林》曰：「主也。」言彼求與中國會

盟，而中國受之，則當終庇之。我既主諸侯爲長，可因其遠

而不能救乎？管仲恐桓霸盛極而衰，難以及遠，故勸使弗

受。《管子》書以爲管仲垂死勸桓公歸江、黃於楚，蓋記者

傳聞之誤。桓公不聽，遂與之盟。管仲死，楚伐江滅黃，桓公不能救，【補曰】伐江在文之篇，《傳》因黃事連言之耳。又疑上《經》伐黃，《穀梁》作伐江，先儒無說，莫能明焉。疏曰：「案《史記》管仲卒在桓公四十一年，當魯僖十五年，與《傳》不合。」文烝案：《史記》不足據。而《左傳》是年冬「管夷吾平戎于王」，亦與《傳》異。或平戎事在前年也。《傳》必記管仲死者，明管仲在猶能救。故君子閔之也。閔其貪慕伯者以致滅。【補曰】

閔黃即以病桓也。黃與弦皆以近楚被滅，而黃列桓盟，爲《春秋》所閔，故滅弦非桓病，滅黃乃病也。桓德之衰，至城緣陵而辭始著，而其端見於不救黃，則當管仲之歿也，其機伏於盟貫，則以違管仲之言也。即此一事，前後貫通，足明桓公之盛，皆由仲父之功，雖管夷吾名氏不見於《經》，而《經》意可知矣。董仲舒曰：「弗能察，寂若無能，察之，無物不在，《穀梁》之於《春秋》，善察者也。」

### 秋七月。

冬十有二月丁丑，陳侯杵臼卒。○【撰異

曰】杵，《公羊》作「處」。

十有三年春，狄侵衛。

夏四月，葬陳宣公。

公會齊侯、宋公、陳侯、衛侯、鄭伯、許男、曹伯于鹹。鹹，衛地。兵車之會也。

秋九月，大雩。

冬，公子友如齊。

十有四年春，諸侯城緣陵。緣陵，杞邑。

【補曰】疏曰：「《左氏》以爲淮夷病杞，《公羊》以爲徐、莒脅杞。」案：此亦城而遷之，邑即國也。何休曰：「外城不月者，文言諸侯，非內城明矣。」案：城虎牢、城成周皆時者，皆同義。城杞上有「五月」，亦不蒙之，《左傳》事在六月，知亦時矣。其曰諸侯，散辭也。直曰諸侯，無大小之序，是各自欲城，無摠一之者，非伯者所制，故曰散辭。【補曰】杞雖未滅而國已危，城緣陵以遷之，宜列序其人以見美，言諸侯而不序，是散辭也。散辭與二年專辭若相對，其實城邢不必列序而序，此當列序而不序，正與元年文相對也。文七年《傳》曰「略之」，散辭即是略，互相備也。嘗論

之，城楚丘及成陳、成虎牢、歸粟，皆伯者之大美事，故皆爲內辭。城邢、城緣陵、城杞、城成周，皆伯者之尋常美事，故其文皆以列序爲常。邢、緣陵之等所以異於楚丘者，一是興滅，一但持危也。成與歸粟所以又異於城邢、緣陵等者，危而城之，城之而事已畢，有警而以師守之，有急而以粟賙之，其功大於城也。據《左傳》城成周本是罷戍而城之，昭二十七年晉致諸侯之戍于周；三十二年王請於晉，令脩城以罷戍，晉人之謀曰：「與其戍周，不如城之。」天子實云，雖有後事，晉勿與知可也。是城不及戍之驗也。若然，城成周書，成成周不書者，彼時晉霸衰微，兵力不足，不欲與成陳、成虎牢同辭故也。《左氏》謂晉致諸侯之戍，魯人辭以難，是謂魯不在，故不書。若然，城楚丘魯若不與亦將不書乎？城邢無魯又何以書也？此《左氏》彌縫之失也。聚而曰散，何也？據言諸侯城則是聚。諸侯城，

有散辭也。桓德衰矣。言諸侯城，則非伯者之爲可知也。齊桓德衰，所以散也。何休曰：「案先是盟亦言諸侯，非散也。又《穀梁》美九年諸侯盟于葵丘即散，何以美之邪？」鄭君釋之曰：「九年，公會宰周公、齊侯、宋子、衛侯、鄭伯、許男、曹伯于葵丘，九月戊辰盟于葵丘，時諸侯初

在會，未有歸者，故可以不序。今此十三年夏，公會齊侯、宋公、陳侯、衛侯、鄭伯、許男、曹伯于鹹，而冬公子友如齊，此聘也，書聘則會固前已歸矣。今云諸侯城緣陵而不序其人，明其散，桓德衰矣。葵丘之事，安得以難此？」【補曰】衰者，從大差小之謂。桓之末年，功成志怠，女子小人爲政，德日衰，以迄於亂。《左氏》引《書》所謂「欲敗度，縱敗禮」也。《春秋》明帝王之道，貴敬義之學，既以諸侯授桓，深以其縱欲不終爲惜，故《傳》特明之。不復言杞遷者，亦略之也，知非避封杞者。杞不言人，非封明也。○趙鵬飛曰：「脩內者王，脩外者霸。何謂內？根諸心之謂內。何謂外？徇於物之謂外。王霸之道，均依仁仗義也，均伐叛討逆也，均安中國攘夷狄也。而王以王，霸以霸，何哉？內外之異也。脩內者逸，脩外者勞，故王者之脩無勤怠，而霸者之脩有勤怠。」

夏六月，季姬及繒子遇于防。使繒子來

朝。遇例時，此非所宜遇，故謹而月之。【補曰】季姬蓋莊

公女。周法，字積於叔，僖女未應有稱季者，文之篇兩子叔姬，則僖女也。○【撰異曰】繒，《左氏》、《公羊》作「鄆」，終《春秋》皆然。《左氏》亦或作「繒」。《周語》、《晉語》、《鄭

語《繒》、「鄫」並出。《戰國·魏策》、《漢書·地理志》作「繒」。遇者，同謀也。魯女無故遠會諸侯，遂得淫通，此亦事之不然。《左傳》曰「繒季姬來寧，公怒之」，以繒子不朝，遇于防，而使來朝。此近合人情。【補曰】疏曰：「《傳例》曰：『遇者，志相得也。』」今云同謀者，以淫通與盟會異，故發《傳》。文烝案：注，疏以「淫通」解「同謀」，非也。同謀時容有淫事，而不可以同謀為淫，此謂男女同謀，即下「使繒子來朝」一句是所謀也。此遇亦是不期而會之辭，志相得之義，而云同謀者，非謂遇有二例，正以男女不應志相得為其同謀。所以相得，猶下文云「請己」，亦非謂朝有二例，以此朝則有請己為夫人之事，故使之也。季姬稱字者，呂大圭曰：「女子許嫁，笄而字，豈其許嫁於繒而未歸者乎？」程端學以為雖未許嫁，既笄則字也。注以《左氏》駁《傳》，疑魯女不應遠遇諸侯。案：徐彥《公羊》疏曰：「何氏以為鄫、魯相近，信使交通，男女之情，風流應合，末世無禮，容或有之。」此言足匡范失。下年《經》書歸繒，而此《經》季姬直字不繫繒，又以內及外，以女及男，異於齊高固以夫及婦，明《左傳》為不然矣。後篇子叔姬、單伯之事，《左氏》亦不知而別為說，皆不可據。來朝者，

來請己也。使來朝請己為妻。朝不言使，言使非正也。【補曰】疏曰：「重發《傳》者，婦人使夫，異於君使世子，故重發非正之例。」文烝案：此句謂季姬無禮。以病繒子也。【補曰】此句謂言使，又以病繒子，病其為大國未嫁女，加以非正之事也。女既惑男，男亦悅女，則有苟合之事，故病之，與病齊襄同義。

#### 秋八月辛卯，沙鹿崩。沙鹿，晉山。劉向曰：

「鹿，在山下平地，臣象，陰位也。崩者，散落背叛，不事上之象。」【補曰】范以「鹿」字并為山名，誤依杜預，與《傳》顯戾。言晉亦未是，說在下。不繫國者，《經》辭尚簡，舉山名則國可知。趙匡以為「山自有常處」是也。《公羊》沙鹿、梁山並為天下記異。孫覺以為書之如內辭者，王道大壞，天下之人，皆反皇極，則天見其變而日食星孛，地見其妖而川竭山崩。所以召之者，在於天下，所以應之者，偏於四海，雖在於國，不得著其國。孫氏之論甚美，《傳》無其意，聊記之耳。○【撰異曰】陸渚《纂例》曰：「鹿，《公羊》作「鹿」。上「鹿」字蓋「麓」之誤。陸所見《穀梁》、《左氏》皆作「麓」也。《說文》引《春秋傳》「沙麓崩」。林屬於山為鹿。鹿，山足。【補曰】「鹿」之正字作「麓」，古文作「麓」。叢木

生平土曰林，生山足曰麓，麓亦林也，別所生，異其名耳。《周禮》有大林麓、中林麓、小林麓。沙，山名也。【補曰】此「鹿」屬沙山，猶《詩》言「旱麓」。無崩道而崩，故志之也。【補曰】案：《公羊》曰：「沙鹿者何？河上之邑也。此邑也，其言崩何？襲邑也。」何休曰：「襲者，嘿陷入於地中。」此《傳》不言邑名，而以為山足之林，無崩道而崩，即隱三年《傳》「厚曰崩」之例，是亦以崩為襲陷，與《公羊》不異，不得但如劉向散落之解也。張洽曰：「《詩》所謂「高岸為谷」謂是類。」孔廣森曰：「《水經注》言元城縣東有五鹿墟，墟之左右多陷城。」《郡國志》曰：「五鹿墟，故沙鹿是矣。」又曰：「《左氏》稱晉卜偃云「期年將有大咎」，此時五鹿地猶屬衛，不屬晉也。」《漢書》又云：「晉史卜之，其繇陰為陽雄，土火相乘，故有沙麓崩。後六百四十五年，宜有聖女興。」則因王氏徙居元城而附會說之，益非實矣。文烝案：沙鹿時屬衛，姜齊、王夫之、顧棟高、江永皆云。其曰，重其變也。【補曰】趙汭曰：「地陷視山崩為變尤重，故詳其月日以別之。」

### 狄侵鄭。

冬，蔡侯肸卒。【補曰】蔡穆侯。諸侯時卒，惡之也。【補曰】此發通例惡之，故略之甚也。《疏》引麋信曰：「肸父哀侯，為楚所執，肸不附中國，常事父讐，故惡之。」文烝案：此即何休說也。不書葬者，《疏》謂或是失德，或是魯不會。言魯不會是也，言失德非也。凡時卒惡之與失德不葬，各為一例。去葬之罪最重，時卒之譏較輕。時卒不可去葬，不葬者魯不會也。去葬亦不須時卒，則所謂一事不再議也。

十有五年春王正月，公如齊。【補曰】孔廣森曰：「月者，正月也。」文烝案：再朝不致，猶安之。

### 楚人伐徐。

三月，公會齊侯、宋公、陳侯、衛侯、鄭伯、許男、曹伯盟于牡丘。牡丘，地名。【補曰】當云地闕。《國語》曰「築五鹿中牟」，蓋與牡丘以衛諸夏之地。《管子》「中牟」下有「鄴」。牡丘作「社丘」。○【撰異曰】陸淳《纂例》曰：「《左氏》「陳侯」下又有「衛侯」，《公羊》亦有「衛侯」，而在「陳侯」之上。」案：陸所見《穀梁》無「衛

侯」，與今異，與今《公羊》亦異。程端學往往據之。兵車之會也。

遂次于匡。救徐也。時楚人伐徐。匡，衛地。

【補曰】「時楚」五字贅甚。遂，繼事也。【補曰】重發

《傳》者，時齊桓德衰，嫌義異也。次，止也，有畏也。

畏楚。【補曰】疏曰：「復發《傳》者，前次于陘，欲綏楚以德，今而畏楚，故別發之。」

公孫敖帥師及諸侯之大夫救徐。諸侯既

盟次匡，皆遣大夫將兵救徐，故不復具列諸國。【補曰】公

孫敖，公子慶父子孟穆伯也。大夫不序者，何休曰：「起會

上大夫君已目，故臣凡也。」范注本杜預，當依何氏爲明了。

文以前征伐自諸侯出，外皆略不言其將，與內異文，但此處

則本不當言將，如何氏說也。「大夫」下無「帥師」文者，文

以前外不言某帥師，且帥師文在上，從內可知也。文以前

外臣用兵，師衆稱師，此不言諸侯之師者，嫌若諸侯自將

也。君目臣凡，不直言諸侯之大夫帥師，必別出公孫敖於

上者，嫌與諸侯之前目後凡不別出公者同，所以變於君也。

許、曹亦得言大夫者，因大國連言之也。言及者，由內及之

上。言公會，不嫌於內爲志也。善救徐也。【補曰】重發《傳》者，疏曰：「徐叛楚，即齊旋爲楚所敗，嫌救非善，故發明之。」

夏五月，日有食之。夜食。

秋七月，齊師、曹師伐厲。徐逸曰：「案齊桓

末年，用師及會皆危之而月也。于時霸業已衰，勤王之誠

替于內，震矜之容見於外，禍釁既兆，動接危理，故月。衆

國之君雖有失道，未足爲一世興衰，齊桓威攝群后，政行天

下，其得失皆治亂所繫，故《春秋》重而詳之，錄所善而著所

危云爾。【補曰】此伐楚與國以緩徐寇也。曹稱師者，蓋與

次聶北同義，齊師當亦同。疏曰：「錄所善者，葵丘著日以

謹美，著所危者，此年書月以見衰。」文烝案：「震矜之容」，

用《公羊》語。

八月，螽。螽，蟲災也。甚則月，不甚則

時。【補曰】疏曰：「重發《傳》者，嫌僖公憂民之重，災不

至甚，故明之。」唐石經初刻亦無「螽」字。

九月，公至自會。莊二十七年《傳》曰：「桓會

不致，安之也。」而此致者，齊桓德衰，故危而致之。【補曰】

致之已變常例，足以見危，不須復加月。月者，已滿二時，

從伐楚例。《公羊》以爲久，故致，當是以久加月也。下有季姬歸，又當月。

季姬歸于繒。【補曰】孫復曰：「不書逆者，

微也。」

己卯晦，震夷伯之廟。【補曰】加之者，與仲子

同。《左傳》曰：「罪之也，於是展氏有隱慝焉。」罪之謂書以罪之。杜預曰：「聖人因天地之變，自然之妖，以感動之。神道助教，唯此爲深也。」案《論語》曰：「迅雷風烈必變。」晦，冥也。【補曰】《爾雅》同訓。《毛詩傳》曰：「晦，昏也，昧也。」義亦相近。冥者，《爾雅》、《毛詩傳》「竊也」，《說文》「幽也」。《公羊》訓「晦」字亦同，而意與《傳》異。《傳》云「晦，冥也」，與成十六年《傳》互相備，此但釋「晦」義，故曰「晦，冥也」。彼具釋書晦義，故曰「日事遇晦曰晦」與書朔同例。彼疏云：「舊解以爲僖十五年《傳》曰「晦，冥也」者，謂月光盡而夜闇，不謂非晦日也。」舊解是也。《公羊》曰《春秋》朔有事則書，晦雖有事不書，其釋二「晦」皆曰：「晦者何？冥也。何以書？記異也。」何休以爲晝日而冥，證之他書，如《史記秦本紀》、《六國表》「日食晝晦」，如《呂氏春秋》云「日有闕蝕，有晝盲」，如《爾雅》云「霧謂之

晦」。①此等皆合《公羊》之意，與《穀梁》截然不同矣。《漢

書·五行志》劉向說《穀梁》二「晦」皆用《公羊》，楊《疏》則謂二「晦」一同《公羊》，一同《左氏》，不從舊解之義。孔穎達亦謂此年《穀梁》與《公羊》同，其說皆誤。孔廣森又彌縫之，據《史記》日食晝晦謂《春秋》兩見晝晦，皆適當月晦，由食既之甚乃然，其言尤鑿。竊以晦爲月盡，朔爲月一日始蘇，觀文明矣。成十六年六月丙寅朔，甲午晦，此年下有正月戊申朔，推算易矣。至於日食晝晦，《春秋》書食既而已，《呂氏》之「日闕晝盲」，《爾雅》之「霧」，則《春秋》未有書者，《公羊》之說，何可通乎？汪曰楨語予此疏誤解，其實自前漢《公羊》盛行已失其旨。震，雷也。【補曰】《公羊》謂

雷電擊之。夷伯，魯大夫也。夷，謚；伯，字。【補

曰】據《左傳》是展氏之祖父也，《注》本杜預。杜又曰：

「大夫既卒書字。」劉敞、葉夢得以爲夷是氏，非展氏也。

因此以見天子至于士皆有廟。明夷伯之廟過制，

故因此以言禮。【補曰】疏曰：「《傳》歷言天子以下廟數，

①「霧」，原作「霧」，據《爾雅·釋天》改。段玉裁《說文解字注》云：「霧，今之霧字。一本作霧，非也。」



以爲過制，故震之。」文彙案：注疏非《傳》意，《傳》因大夫有廟，備言之耳。《公羊》桓二年何休注曰：「所以必有廟者，緣生時有宮室也。孝子三年喪畢，思念其親，故爲之立宗廟，以鬼享之。廟之爲言貌也，思想儀貌而事之。」鄭君《詩箋》曰：「以生時之居立宮室象貌爲之。」《祭法》注曰：「宗廟者，先祖之尊貌也。」天子七廟，《祭法》曰：「王立七廟，曰考廟、王考廟、皇考廟、顯考廟、祖考廟，有二桃。」遠廟稱桃。【補曰】尹更始說天子七廟據周也，見《聖證論》馬昭難王肅語。案《逸周書·作雒》曰：「乃位五宮：大廟、宗宮、考宮、路寢、明堂。」大廟者，后稷廟；宗宮，文王廟；考宮，武王廟；蓋成王時止立此三廟。至其後有親廟四，乃合爲七。鎬京、雒邑當皆同制，故《喪服小記》曰「王者立四廟」，而韋玄成等議及《石渠論》及《白虎通》之文，周以后稷、文、武特七廟，其言正相符同。《公羊》成六年何休注曰：「禮：天子諸侯立五廟，受命始封之君立一廟，至於子孫過高祖不得復立廟。周家祖有功，尊有德，立后稷、文、武廟，至於子孫自高祖已下而七廟。」如何氏之說，受命王立一廟者通禮也，成王立三廟者周禮也，然則武王始受命立二廟歟？二廟三廟以外，不必盡不祭，廟則止此矣。鄭君、盧植說二桃並以爲文、武，今案文穆也，武昭也，四親

廟父昭則子穆，父穆則子昭，孫如祖班，通爲三昭三穆。《周禮》守桃奄八人，據七廟及姜嫄廟言之，蓋周公制禮，豫爲立法如此。諸侯五，曰考廟、王考廟、皇考廟、顯考廟、祖考廟。【補曰】如魯祭文王，鄭祖厲王，則皆謂之周廟，即始封君所立一廟也，不入五廟數。凡始封君不必皆祭一世，廟則一而已。大夫三，曰考廟、王考廟、皇考廟。【補曰】盧植以爲天子之大夫。何休亦曰天子卿大夫三廟，鄭義則通列國也。天子諸侯大夫廟數，《王制》、《禮器》皆同，《王制》說三廟亦有大祖之廟，與《祭法》異者，蓋據諸侯之支子其繼爲大宗者得立始祖廟，《小記》、《大傳》所謂別子爲祖，繼別爲宗，重大宗也。異姓大夫容有爲他國公子之後者，《韓詩外傳》：「受命者必以其祖命之。孔子爲魯司寇，命之曰：『宋公之子弗甫何孫，魯孔丘，命爾爲司寇。』」意孔氏以弗甫爲大祖廟歟？弗甫者，宋湣公之適長子既讓國，亦別子也。鄭君解「別子」兼謂始來在此國者，解「大祖」又兼非別子而始爵者，其義益備，亦容或然耳。凡別子當身皆一廟，其後有三廟，此廟不入數，若魯三家之桓公廟是也。士二，曰考廟、王考廟。【補曰】何休曰：「天子元士二廟，諸侯之卿大夫比元士二廟，諸侯之士

一廟。文烝案：《王制·禮器》說土一廟，鄭君以爲祖禰共廟，即《祭法》云「官師一廟，曰考廟，王考無廟而祭之」是也。士亦容有大宗，而無大祖廟者，公子之重視大夫，唯大夫乃得祖之也。大夫士有廟，當必有主，從《通典》、徐邈說。《魏書》清河王懌議爲得也。又案：《祭法》天子、諸侯一壇一墀，大夫二壇，適士一壇，有禱則祭。《大傳》大夫士有大事，省於其君，干祿及其高祖。是皆不立廟而得祭，猶官師之王考無廟而祭。至於天子諸侯去墀爲鬼，大夫適士去壇爲鬼，官師去王考爲鬼，庶士庶人無廟死曰鬼，鄭君以爲凡鬼者薦而不祭，比而觀之，可見古人追養繼孝之道矣。後人泥程子、張子之言，但知高曾祖禰當通祭，遂疑古之道不即乎人心，是惡識禮意。故德厚者流光，德薄者流卑，雍曰：「德厚者位尊，道隆者爵重，故天子遠及七世，士祭祖而已。」【補曰】疏曰：「光，猶遠也。卑，猶近也。」文烝案：「光」與「廣」同，二字古通用，《荀子》作「流澤廣」、「流澤狹」也。德厚者流澤於後遠，故百世不毀，祖考廟及二祧是也。德薄者流澤於後近，故親過高祖則毀，四親廟是也。又諸侯無二祧，大夫無顯考、祖考，士無皇考，亦是以德之厚薄爲差也。雍《注》不解「德」字、「流」字之義

而飾以浮辭，則下文三語不相承接。三「德」字有二解矣。是以貴始，【補曰】謂貴始封者。德之本也，【補曰】疏曰：「所以貴受封之君者，由是德之本也。」文烝案：薄德以厚德爲本，本在始封，言始封之德厚。自天子七廟以下，《大戴禮·禮三本》、《荀子》書皆略同，皆不言一廟。始封必爲祖。若契爲殷祖，棄爲周祖。【補曰】案：周公爲魯祖，大公爲齊祖亦是也。《疏》曰：「祖，謂廟不毀。」文烝案：即《祭法》之祖考廟也。必爲祖，是貴之，此所謂流光。又《左傳》晉史趙曰「盛德必百世祀」，如《魯語》、《祭法》論黃帝、顓頊以下，文王世子有先聖先師之莫，亦準斯義。

冬，宋人伐曹。【補曰】許翰曰：「同盟始自相攻，桓不能一矣。」

楚人敗徐于婁林。婁林，徐地。【補曰】敗人而稱人者，楚無師也。言敗不言戰，例在昭十七年《傳》。前後文稱徐人，此從其常稱者。徐之稱人，實以齊故，今爲楚敗，齊救無功，不得援齊以自重，故亦不得人之。何休曰：「不月者，略兩夷狄也。」夷狄相敗，志也。【補曰】相敗雖是夷狄，亦重其事而志之。志者，《經》例因史例也。

二句與宣十六年《傳》直云「周災志也」同意。

十有一月壬戌，晉侯及秦伯戰于韓，獲

晉侯。韓，晉地。獲者，不與之辭，諸侯非可相獲。【補

曰】疏曰：「不與之辭，宣二年《傳》有明例，注言之者，嫌晉侯失衆與秦得獲，故注顯之，欲明亦不與秦獲也。范《別

例》云，凡書獲有七：謂莒挐一，晉侯二，宋華元三，蔡公子

濕四，陳夏齧五，齊國書六，麟七。於晉侯著失民之咎，於

公子濕彰公子之病，於華元表得衆之辭，於挐顯公子之給。

餘不發者，從可知也。」文烝案：獲爲不與之辭，惟施於兵

獲，獲麟不入例，范非也。此言獲不言以歸者，《傳例》曰：

「以歸猶愈乎執也。秦非夷，又非人滅，晉君雖見獲，可不

諱也。不言獲晉侯夷吾者，名以表獲，既言獲，不須名也。」

《公羊》曰：「君生得曰獲。」韓之戰，晉侯失民矣，

【補曰】於此戰見其失民。以其民未敗而君獲也。

【補曰】民未敗而君獲，謂不言晉師敗績，但言獲晉侯，是著

晉侯之失民也。言獲則師敗可知，不沒其事之實，特其立

文不言敗。若未敗然，所以與宋華元盡衆相救之文相對，

又以別於蔡侯有釋文。

十有六年春王正月戊申朔，隕石于宋，

五。劉向曰：「石，陰類也。五，陽數也。象陰而陽行，將

致隊落。【補曰】疏引《異義》載《穀梁說》云：「隕石于宋，

五，象宋公德劣國小，陰類也。而欲行霸道，是陰而欲陽行

也。其隕將拘執之象也。」《左傳》曰：「隕星也。」○【撰異

曰】隕，《說文·石部》引作「碩」。先隕而後石何

也？據莊七年星隕如雨，先言星，後言隕。隕而後石

也。既隕後乃知是石。于宋四竟之內曰宋，【補

曰】對下宋都言。後數，散辭也，耳治也。隕石，記

聞也，聞其碩然，視之則石，察之則五。【補曰】疏曰：「范

取《公羊》爲說。」「碩」字，《說文》、《玉篇》、【眉批】：臧琳曰：

「今本《玉篇》有「碩」字，蓋孫強等增加。《字林》等無其字，學士

多讀爲「磳」，據《公羊》古本並爲「碩」字，張揖讀爲「碩」，是

石聲之類。劉知幾曰：「聞之隕，視之石，數之五。加以一

字太詳，減其一字太略，求諸折中，簡要合理。」

是月，六鵩退飛，過宋都。是月，隕石之月。

是月，六鵩退飛，過宋都。是月，隕石之月。

劉向曰：「鵩，陽也。六，陰數也。象陽而陰行，必衰退。」

【補曰】疏引鄭君云：「六鵩俱飛，得諸侯之象也，其退，示

其德行不進，以致敗也。得諸侯是陽行也，被執敗是陰行也。」董仲舒、劉向、賈逵皆曰：「鵠，水鳥。」孔穎達引《考異郵》云：「鵠者，毛羽之蟲，生陰而屬於陽。」又引《洪範五行傳》曰：「鵠者，陽禽。」文烝案：《莊子》曰：「白鵠之相視，眸子不運而風化。」司馬彪曰：「相待風氣而化生也。」《左傳》說此曰「風也」。《五行傳》曰：「思心之不容，是謂不聖，厥咎霧，厥罰恒風。」○【撰異曰】《公羊音義》：「是月，如字，或一音徒兮反。」陸淳《纂例》曰：「是，《公羊》作『提』，誤也。」孔廣森讀从「提」。鵠，依唐石經作，《說文》此字左鳥右兒，引《春秋》傳「六鵠退飛」，或作「鵠」、「鵠」，今字多作「鵠」，《穀梁》、《公羊》皆然。《左氏音義》：「鵠，本或作『鵠』。」陸淳《纂例》：「鵠，《左氏》、《公羊》作『鵠』。」是月者，決不日而月也。欲著石日鵠月，故言是月，若不言是月，則嫌與戊申同。【補曰】此猶丙戌決日義之意，蓋魯史本亦書日，君子改言是月。《公羊》曰：「是月者何？僅逮是月也。」孔廣森據《初學記》、《鵠冠子》注讀爲「提月」，與《傳》異。六鵠退飛過宋都，先數，聚辭也，目治也。六鵠退飛，記見也，視之則六，察之則鵠，徐而察之則退飛。【補曰】先後耳目之義，與《公羊》同，故

注全用《公羊》語。《大戴禮·夏小正傳》曰：「先言鴈而後言鄉者何也？見鴈而後數其鄉也。先鳴而後鵠何也？鵠者鳴而後知其鵠也。」《小正》文多如此，則《春秋》此等之文因乎古歟？子曰：「石，無知之物；鵠，微有知之物；【補曰】微，小也。夫知者，施於人之稱也。自人言石鵠，則一無知，一小有知矣。若謂石已非星，其本是星，鵠以風化，還以風退，則皆非耳目所及，亦不可言有知無知也。是故天高地下，萬物散殊，君子論而議之，流而不息，合同而化，君子存而不論。石無知故日之，石無知而隕，必天使之然，故詳而日之。【補曰】二十二年《傳》曰：「日事遇朔日朔。」鵠微有知之物故月之。鵠或時自欲退飛耳，是以略而月之。【補曰】猶沙鹿無崩道而崩則日，梁山有崩道而崩則不日也。此夫子自述之言，足明日月之例有所加損，此爲損則彼爲加矣。君子之於物，無所苟而已。【補曰】此「君子」是夫子況論也。《論語》曰：「君子名之必可言也，言之必可行也。君子於其言，無所苟而已矣。」此所謂正名。董仲舒說聖人正名於言無所苟，即引此《經》。石鵠且猶盡其辭，而況於

人乎？【補曰】盡，謂或先或後，或日或月，皆不苟也。

石無知，鵲微有知，人則自孩提之良知以至於知者之無不知，皆靈於物者也。物有差別，猶必不苟記錄，人事更當何如？此通明《春秋》脩辭之意。故五石六鵲之辭不

設則王道不亢矣。」不遺微細，故王道可舉。【補曰】

亢爲人頸，引申之爲高也，舉也。舉王道者，劉軻所謂三代聖王死而其道盡留於《春秋》也。魯，王禮也，《春秋》，王法也。因王禮之舊作王法之書，此素王之說所自起，而《公

羊》豕黜周王、魯之謬言亦萌芽於是焉。韓子詩云：「《春

秋》書王法，不誅其人身。《爾雅》注蟲魚，定非磊落人。」此

云「五石六鵲之辭不設」，則王道不舉者，務大而緩小，學者之事也。即小以見大，聖人之心也。耳治目治之異，無知

有知之分，其稱名也小，其取類也大，故《春秋》王法不越乎

此，亦猶《關雎》興於鳥，《鹿鳴》興於獸，乃冠《風雅》之首，

皆孔門之教也。羅願駁《穀梁》以爲遣辭適宜，安取王道，

不考甚矣。此六句亦夫子之言，與十九年梁亡《傳》皆見一

《經》大指。在《左氏》則曰非聖人誰能脩之，在《公羊》則曰

君子制《春秋》之義以俟後聖，在《傳》則直述聖言也，學者

詳焉。民所聚曰都。【補曰】國所治處，衆之所歸也。

都，聚雙聲爲訓，《廣雅》曰：「都，聚也。」又曰：「都，大也。」

文九年《傳》曰：「京，大也。」聚，大義近，都、京意同，故《左傳》襄弘曰「毛得以濟侈於王都」，王子朝曰「惠、襄辟難，越去王都」，是京師稱都，猶諸侯之國都，故《風俗通》曰：「天子治居之城曰都，舊都曰邑。」《廣雅》又曰：「都，國也。」引

伸之，下邑民居衆者皆曰都，亦取聚義，以明大於他邑，故古稱二年成邑，三年成都。而《周禮》四井爲邑，以至四縣爲都，其等差猶是也。《傳》不言爲王者，後記異，又不言故宋者，略之從可知。

三月壬申，公子季友卒。季友，桓公之子。

大夫日卒，正也。【補曰】疏曰：「重發之者，益師明其

有罪，此則顯其得正，故兩明之。」稱公弟叔仲，賢也。

【補曰】叔也，仲也，舉中言之。弟者貴稱，字以表德，故足

明賢，此文及公弟叔肸是也。此不如叔肸稱弟者，疏曰：

「季子雖賢兄，已卒也。」《公羊》於此亦曰「賢也」。陸淳聞

於師曰季友之殺叔牙、慶父，義也；佐閔立僖權也。夫以

義滅親，以權正國，中人之所惑，故於其卒褒之，明其得反

《經》合道之義也。大夫不言公子公孫，疏之也。

【補曰】公子公孫，繫君爲號，至親者也。奪其親辭，是爲疏

之，仲遂、仲嬰齊是也。《疏》曰：「《傳》因季友之賢發起其例。」

夏四月丙申，繒季姬卒。

秋七月甲子，公孫茲卒。大夫日卒，正

也。【補曰】疏曰：「又發之者，以其名而不字，又非罪非賢，故重發之。」文烝案：魯比三喪，於禮皆爲父族，周内史對宋襄公，謂今茲魯多大喪者也。

冬十有二月，公會齊侯、宋公、陳侯、衛

侯、鄭伯、許男、邢侯、曹伯于淮。【補曰】杜預

曰：「臨淮郡左右。」董仲舒曰：「邢未嘗會齊桓也，附晉又微，晉侯獲于韓而背之。」董義未知何據。貫、陽穀爲諸侯皆至，《公羊》所同也，邢是齊所存，不應不與。兵車之會也。

十有七年春，齊人伐英氏。【補曰】

英氏，猶潞氏也。陸渚曰：「古者一字不成文辭，皆以氏字配之。姜氏、子氏，以氏配姓也；季氏、臧氏以氏配族也；哭於賜氏，以氏配名也；仲氏吹簫及不念伯氏之言，以氏

配字也；滅赤狄、潞氏，以氏配國也；母氏聖善，以氏配親也。」

夏，滅項。【補曰】不月者，既爲齊諱，文從略，異於

譚，遂，或亦夷國歟？孰滅之？桓公也。【補曰】

何休曰：「以言滅，知非內也。」文烝案：文與伐英氏相接，

明是齊人矣。《左傳》非也。何以不言桓公也？據

莊十年齊師滅譚稱齊師。爲賢者諱也。【補曰】承上

齊人言滅，則是桓公可知，故可爲諱。凡諱皆不沒其實也。

蕭楚曰：「滅傳陽言遂，今不言遂，知是諱文。」項，國也。

不可滅而滅之乎？桓公知項之可滅也，知政

昏亂易可滅。而不知己之不可以滅也。霸者存恤

鄰國，抑彊輔弱，義不可滅人之國。【補曰】注解「不可滅」

宜在上「滅之乎」下，時桓霸功已成，故言霸者有不可滅之

義，而何爲滅之乎？桓但見項有可滅之勢，遂忘此義耳。

既滅人之國矣何賢乎？【補曰】滅是惡事，何猶以

爲賢？君子惡惡疾其始，絕其始則得不終於惡。邵

曰：「謂疾其初爲惡之事，不終身疾之。」善善樂其終，

樂賢者終其行也。邵曰：「謂始有善事則終身善之。」【補

曰【兩注各前說，皆本何休。邵兩說則又《公羊》惡惡短、善善長之說也。古之教者，長善而後救失，古之學者，克己所以復禮，聖賢論善惡之際往往如此。桓嘗有存亡繼

絕之功，故君子爲之諱也。邵曰：「存亡謂存邢、

衛，繼絕謂立僖公，所以終其善。」【補曰】存亡謂城邢、城楚

丘、城緣陵也。衛已亡，邢、杞將亡，皆桓所存。《左傳》、

《國語》並言齊桓存三亡國，韋、杜並指魯、衛、邢，韋不誤，

杜未必然，當依《公羊》何休說指邢、衛、杞也。孔廣森曰：

「明既有此功，乃得覆惡，併解滅譚，遂不諱意也。」文烝

案：此所謂《春秋》之義，以功覆過除罪。《傳》「桓」字下各

本皆有「公」字，蓋涉《公羊》文而衍，今依唐石經刪正。

秋，夫人姜氏會齊侯于卞。卞，魯地。

○【撰異曰】卞，俗「弁」字。陸渚《纂例》曰：「《公羊》、《左氏》或作「弁」。《國語》曰「魯有弁費」，《檀弓》有弁人。

九月，公至自會。桓會不致，而今致會，桓公德

衰，威信不著，陳列兵車，又以滅項往會，既非踰年乃反，故

往還皆月以危之。【補曰】月者，與上十五年同，此較上尤

久。彼盟而月，此會而亦月，是從往月致月有懼之例。

冬十有二月乙亥，齊侯小白卒。此不

正，其日之何也？據二十四年晉侯夷吾卒不書日。

【補曰】不得獨據夷吾，又在時卒例，當云據例不日。其

不正前見矣。【補曰】既有所見，還依常例，與子般卒

《傳》同。彼言其見於後者，此則言其見於前者，兩處發

《傳》，餘從可推。《公羊》哀三年《傳》曰「《春秋》見者不復

見」，意正相類，又以明君子大居正，非以齊桓功德之盛，遂

不論其正不正也。其不正之前見何也？以不

正入虛國，故稱嫌焉爾。莊九年，齊小白入于齊，

貶不稱公子。虛國，謂齊無人。《傳例》曰：「以國氏者

嫌也。」

## 春秋僖公經傳第四補注第十一

穀梁 范氏集解 鍾文烝詳補

十有八年春王正月，宋公、曹伯、衛人、邾人伐齊。○【撰異曰】《公羊》《宋公》下有「會」字，孔

廣森曰：「衍字也。」非伐喪也。伐喪無道，故謹而月之。【補曰】非責也。疏曰：「侵伐書月，惟施於內，今亦施之於外者，齊桓以安危所繫，故書月以表之。宋襄欲繼齊桓之業，故亦謹而月之。」

夏，師救齊。魯師。善救齊也。【補曰】疏

曰：「以魯昔與齊仇讐，恐救之非善，故發例。」文烝案：重發《傳》者，嫌內兵獨救義異也，疏非也。

五月戊寅，宋師及齊師戰于甌。齊師敗

績。甌，齊地。【補曰】上稱宋公，此稱宋師，宋公與伐而不與戰也。《公羊》以此解「戰」上言「伐」之義。戰不言

伐，【補曰】疏曰：「《春秋》之例，戰伐不並舉，此上有伐

文，今又言戰，是違常例。」案：《公羊》曰戰不言伐，圍不言戰，人不言圍，滅不言人，書其重者也。客不言及，言

及，惡宋也。何休曰：「戰言及者，所以別客主直不直也，故文十二年晉人、秦人戰于河曲，兩不直，故不云及。

今宋言及，明直在宋，非所以惡宋也。」即言及爲惡，是河曲之戰爲兩善乎？又《穀梁》以河曲不言及，略之也，則自相

反矣。鄭君釋之曰：「及者，別異客主耳，不施於直與不直也。直不直自在事而已，義兵則客直，宣十二年夏，晉荀林

父帥師及楚子戰于邲，晉師敗績是也。兵不義則主人直，莊二十八年春，衛人及齊人戰，衛人敗績是也。今齊桓卒

未葬，宋襄欲興霸事而伐喪，於禮尤反，故反其文。以宋及齊，即實以宋及齊，明直在宋。邲之戰直在楚，不以楚及晉

何邪？秦、晉戰于河曲，不言及，疾其亟戰爭舉兵，故略其先後。【補曰】疏曰：「鄭云邲戰直在楚者，《公羊》意如此，

故據之難何休。」文烝案：言戰先言伐，亦是惡宋可知，《傳》省文也。據《左傳》桓無適子，嘗與管仲屬孝公於宋襄

公，以爲大子。而雍巫因寺人貂薦羞，爲無虧請，又許之。無虧者，長庶也。上伐是齊立無虧而宋納孝公，此戰是齊



人既殺無虧將立孝公，不勝，四公子之徒遂與宋戰。當時一伐一戰，同役異情，但君子承史脩《經》，專舉大義，事之細曲，多在所略。史書伐齊戰，伐喪之罪，無所可逃，《經》因存月以非之，反其及文以惡之。伐戰並舉，又寓其意，使後人讀此卒後葬前之文，而宋襄伐喪之罪益著，則其事之細曲固不必論。有欲詳考之者，而孝公之不宜納亦足明矣。聖人之《經》，簡易正大，而曲折微妙之旨在其中。家鉉翁說晉荀吳伐鮮虞曰「存大節而略細故，《春秋》法也」，此言最是，學者當一以《穀梁》斷之。

**狄救齊。善救齊也。**【補曰】疏曰：「善狄能憂中國。」文烝案：重發《傳》者，嫌與諸夏異也。

**秋八月丁亥，葬齊桓公。**豎刁、易牙爭權，五公子爭立，故危之。【補曰】注上句《公羊》，下句《左傳》。

**冬，邢人、狄人伐衛。狄其稱人何也？**

【補曰】據當言邢人及狄，如晉人及姜戎。《春秋》亦有不稱人而不及者，伐秦伐晉之白狄，伐吳之淮夷是也。但姜戎、白狄、淮夷皆複字，或言及或不及，皆可成文。若狄則單字，不稱人則必言及，既言及，可不稱人矣。陸渚、杜譔、趙鵬飛、黃仲炎、吳澂、程端學等以為狄稱人者便文，猶

書吳人、繒人，不知便文可言及也。凡單字所以有不成文者，《荀子》曰：「累而成文，名之麗也。」麗，即「儷」字，謂配偶也。吳言人，梁言山，渚言水，皆其類。善累而後進之，累，積。【補曰】善積而後進，故不於救稱人，而於伐稱人。救是善事，但不若書聘為舉道，故與荆人不同也。聘稱人，為進夷狄之文，救稱人則與中國文同，非其救前已有善事，不得遽進。伐衛所以救齊也。何休曰：「即伐衛救齊，當兩舉，如伐楚楚救江矣。」又《傳》以為江遠楚近，故伐楚楚救江，今狄亦近衛而遠齊，其事一也。義異何也？鄭君釋之曰：「文三年冬，晉陽處父帥師伐楚楚救江，兩舉之者，以晉未有救江文，故明言之。今此春，宋公、曹伯、衛人、邾人伐齊，夏，狄救齊，冬，邢人、狄人伐衛，其為救齊可知，故省文耳，事同義又何異？」【補曰】《傳》以是春衛伐齊，是夏狄救齊，今狄又伐衛，故言所以救齊，申釋伐之所以為善也，此《經》自不得有救文。功近而德遠矣。伐衛，功近耳，夷狄而憂中國，其德遠也。【補曰】狄有何功德可言近遠？指衛、齊尤曲，注非也。此句謂齊桓也，桓之功近在中國，而桓之德遠及夷狄，故狄與邢共救之也。君子於齊桓之歿，未忍遽忘之。此及下二十年兩稱狄人，

《傳》於此曰「伐衛所以救齊，功近而德遠」，於二十年曰「邢小，其爲主何也？爲主乎救齊」，明夫救齊一事，深當聖意。文施於進狄，而義起乎崇齊，木瓜之思，下泉之志，固若是其章章也。夫宋輔桓以霸者也，邢、衛則皆桓所存也，宋與衛伐齊而邢、狄能救之，齊與狄盟于邢而衛卒滅之，故《春秋》自伐齊至於滅邢，惡宋、衛而善邢、狄。屢書不一書，其意皆相貫也。何休、孫復以爲狄稱人者，善救齊。孫覺曰：「傷中國而罪諸侯也。中國無道則孔子欲居九夷，諸侯伐齊，狄能救之，則進之曰人，皆所以傷中國也。」

### 十有九年春王三月，宋人執滕子嬰齊。

【補曰】滕宣公也。宋公稱人者，滕有罪也。執諸侯，自戎蠻子赤以外皆不名，滕獨名。滕自昭篇以前卒皆不名，獨名於其執，蓋狄道正長嫡不以名通，史於此書名，見非正也。趙與權曰：「齊桓之伯，執不及君，已爲薄矣，宋襄效之而執虐人之君，其能免乎？」程端學曰：「出乎爾者反乎爾，故楚執宋公矣。」文烝案：執諸侯大夫，常例皆時，當如何休說。此月者，惡宋襄無道。又前此執虞公爲執之變文，此乃執君之始也，故謹之。

夏六月，宋公、曹人、邾人盟于曹南。曹南，曹之南鄙。【補曰】蓋國之南近都城。○【撰異曰】宋公，《公羊》作「宋人」，陸渚從《公羊》。

繒子會盟于邾。己酉，邾人執繒子，用之。○【撰異曰】上繒子，汲古閣《公羊》作「邾人」，誤。唐石經亦作「邾子」。微國之君，因邾以求與之盟。與，厠豫也。【補曰】之盟，是盟也。謂上曹南盟即解此《經》「盟」字。孔廣森曰：「不言如會者，未至曹南也。邾在曹東繒西，將如曹南，道出其國。」人因己以求與之盟，己迎而執之。惡之，故謹而日之也。【補曰】惡邾子，故執，特謹日，尚不論及用也。稱人者，從衆辭例。凡執諸侯爲衆辭者，皆是與其執有罪。此執言用，邾惡易見，雖爲衆辭，無嫌於罪繒而與邾。用之者，叩其鼻以衄社也。衄者，釁也，取鼻血以釁祭社器。【補曰】疏曰：《論語》云「以杖叩其脛」，則叩謂擊也。」文烝案：范言釁器，非也。衄社者，以血釁社，謂祭社也。《周禮·小子》：「掌珥于社稷，祈于五祀。」鄭衆曰：「珥社稷，以牲頭祭也。」鄭君曰：「珥，讀爲「衄」，祈，或爲「釁」。釁

蛄者，釁禮之事也。《山海經》「祈聃用魚」，郭璞曰：「以血塗祭爲聃。」聃，亦「蛄」字也。《公羊》曰：「叩其鼻以血社」，《左傳》曰：「宋公使邾文公用邾子于次睢之社，欲以屬東夷。」何休曰：「不言社者，本無用人之道。言用之，已重矣，故絕其所用處也。」又案：用人甚無道，亦蒙日也。繒子不名，異於蔡世子友者。繒子例不記卒，此以被用記耳。雖爲魯婿，不得名。趙汭曰：「小國之君不卒則亦不名，故邾戕繒子亦不名。」其說是也。

**秋，宋人圍曹。**【補曰】沈棐曰：「伐齊盟曹南，從宋者惟曹、邾，善曹以親諸侯可也。而專事威強，欲以力爭，不亦難乎？」

### 衛人伐邢。

**冬，會陳人、蔡人、楚人、鄭人盟于齊。**

會無主名，內卑者也。四國稱人，外卑者也。杜預曰：「地於齊，齊亦與盟。」【補曰】案：《左傳》陳穆公請脩好於諸侯，以無忘齊桓之德。冬盟于齊，脩桓公之好也。楚人、鄭人，時之班次，與襄五年吳人、繒人亦同。但吳班多在末，以不稱人殊會爲常文，故其稱人序繒上者可別見義。楚班本不定，稱人而序，或在末，或不在末，皆爲常文，無他義。

也。卑者盟，不日宿月，此不月者，以楚初與盟，故略之甚。○【撰異曰】《公羊》作「公會」，唐石經、《左氏》同。趙汭曰：「魯有救四公子之嫌，終孝公世，僖公未嘗如齊，卒爲仇敵，此盟決非公往。」

**梁亡。自亡也。**【補曰】實是秦滅，而以「亡」爲文，明其自亡也。疏據下「力役」之文，謂梁之土地必爲人所取，似同《公羊》「魚爛而亡」，亦同《左氏》「秦得之也」。湎於酒，【補曰】飲酒齊色曰湎。淫於色，【補曰】荒放於妻妾。心昏耳目塞，【補曰】言君以湎淫致昏塞。上無正長之治，【補曰】正長，通言卿大夫，正亦長也，謂官之長也。《周禮》曰「建其長，立其兩，建其正，立其貳」，對文析言之耳。疊言以圖文則不別。此言長官不事其事。大臣背叛，【補曰】言無忠臣。民爲寇盜。【補曰】言有亂民也，兼此數者，必亡之道。梁亡，自亡也。【補曰】言以其如上所云，故爲自亡。如加力役焉，湎不足道也。如使伐之而滅亡，則淫湎不足記也，使其自亡，然後其惡明。【補曰】言湎，該淫色以下五句，此二句承上自亡反言之。《春秋》亡國多矣，而此與紀

侯大去皆不加力役，紀賢而滅天也。所謂君如彼何哉？彊爲善而已，故書曰紀侯大去其國，閔之而全之也。梁洸而亡，人也，所謂家必自毀而後人毀之，國必自伐而後人伐之，故書曰「梁亡」，罪之而著之也。舉此二義則餘皆可推，《春秋》其至矣乎？《傳》其備矣乎？張洽曰：「《春秋》變法以書諸侯自取滅亡者有二：晉人執虞公，猶言兵已加頸而不自知也；梁亡，言國自亡而不之覺也。此胡氏所謂如化工之賦形異於畫筆之肖像。」張略本蘇轍說。梁亡，

鄭棄其師，我無加損焉，正名而已矣。【補曰】

此下皆夫子自述之言也，不言子曰者，《傳》省文。疏曰：

「不葬有三，爲齊桓諱滅項之類，是改舊也；梁亡、鄭棄其師之屬，是因史之文也。」文烝案：加損者，猶《史記》云筆削也；正名者，即《論語》答子路爲政必先正名，名不正則言不順，言不順則事不成。朱子《或問》用馬融說，以爲「使事物之名各得其正而不紊」是也。君子於魯史之文有所加損，以其名不正，故加損以正之。孟子引夫子之言曰「其義則丘竊取之」，而《莊子》以爲「《春秋》道名分」，即此謂也。其或在史舊文，已足見義，其名既正，不須加損，則此梁亡、鄭棄其師之屬是也。劉知幾引《汲冢瑣語》、《晉春秋》獻公

十七年鄭棄其師，其文正同，足與魯史相證，故知穀梁子無虛語也。二事所以爲正名者，具如下文所論。梁亡，出

惡正也。正，謂政教。【補曰】正，即「政」字。《呂氏春

秋》曰「班馬正」，以「正」爲「政」，《荀子》書尤多。出，猶發也，行也。惡，依今音讀人聲，與下異。劉賁《對策》引用此

《傳》曰「上出惡政」，胡安國《傳》亦曰「心昏而出惡政」，皆是也。始於耽酒色，中於失官守，終於釀群盜，皆緣君之無道，積漸使然，故總言出惡政，爲君人者之明監大誡。《左傳》言梁伯亟城罷民，《公羊》家言梁君隆刑峻法，亦足兼之矣。以出惡政而亡，故正其名，直云梁不言秦滅之。鄭

棄其師，惡其長也。長，謂高克。【補曰】鄭伯以惡其

長而棄師，故正其名，直云鄭，不罪主將高克，此二事適合聖意，故無可加損也。加損正名者，脩《春秋》之大宗指，《左氏》、《公羊》皆言「脩」，《穀梁》言「加損」，言脩、言加損皆在文辭之間。而一《經》之事述，皆史氏之本書，從可見焉。故曰：「蓋有不知而作之者，我無是也。多聞擇其善者而從之，多見而識之，知之次也。」又曰「吾猶及史之闕文也」，故《春秋》作也，猶述也。

二十年春，新作南門。作，爲也。【補曰】

《爾雅》同。有如其度也。更加使大。【補曰】杜預

曰：「魯城南門也，本名稷門。僖公更高大之，今猶不與諸門同，改名高門也。」案：《史記·孔子世家》記齊人歸女樂事曰「陳於魯城南高門外」。言新，有故也，非作也。責其改舊制。【補曰】新可耳，不宜作，作，故志之。

《論語》：「魯人爲長府。閔子騫曰：『仍舊貫，如之何？何必改作？』」子曰：「夫人不言，言必有中。」汪克寬曰：「僖

公之篇無城築土功之事，庶幾其能愛民矣，而猶有南門之過制。」南門者，法門也。法門，謂天子諸侯皆南面而

治，法令之所出入，故謂之法門。【補曰】法門與法廡同意，

禮法所得有也。諸侯之城，四面皆有門，皆是法門。此新

作者，則魯城南門。注牽合南面爲義，以法令解「法」字，皆非也。南門固嚮明，非以此專法門之稱也。何休說《公羊》

以爲諸侯軒城，缺南面以受過。《說文》：「軼，缺也。古者

城缺其南方，謂之軼。」

夏，郕子來朝。【補曰】《公羊》曰：「失地之君

也。何以不名？兄弟辭也。」何休曰：「明當尊遇之，異於

鄧、穀。」案：《左傳》：「郕，文之昭也。」郕爲宋滅，蓋滅而復封歟？○【撰異曰】陸渚《纂例》曰：「郕，《穀梁》作「邾」。」案：陸氏蓋據誤本。

五月乙巳，西宮災。謂之新宮，則近爲

禰宮，言閔公非僖公之父，故不言新宮也。【補曰】父爲

考，考廟稱禰，禰之言邇也。成三年《傳》曰：「新宮者，禰宮也。」近，猶似也。爲，於也。僖之頌稱閔廟曰「新廟奕奕」，自據時人恒稱，非《春秋》文例矣。觀於閔、僖之間，可

知受國爲人後之禮。據文二年《傳》，知其相爲昭穆，據此

《傳》，知其不稱考禰。《祭法》所謂考廟、王考廟者，言其常

法耳，非以爲稱，其稱之，則直言謚也。昭穆之次，人定也，祖禰之名，天定也，此制禮之精意也。以謚言之，

則如疏之然，故不言閔宮而云西宮。【補曰】成三年

《傳》曰：「迫近不敢稱謚，恭也。」莊二十四年《傳》曰：「斥

言桓宮，以惡莊也。」若論禮之正稱，則以宮配謚。以是

爲閔宮也。【補曰】宮言西，見爲閔宮也。凡寢與廟必

南鄉，而賈公彥《周禮·守桃》疏曰：「立廟之法，后稷廟在

中央，當昭者處東，當穆者處西，皆別爲宮院。」又《聘禮》疏

曰：「諸侯有五廟，大祖廟居中，二昭居東，二穆居西。廟

皆別門，門外兩邊皆有南北隔牆，隔牆中夾通門，又謂之閤門。」此賈據家人葬法以推廟制，知其相並排列，與阮謀《禮圖》同。閔爲穆，廟居於最西，故言西宮，足明其爲閔宮也。《史記·魯世家》魯公伯禽，子考公酋，弟煬公熙，子幽公宰，弟魏公潰弑幽公而立，子厲公擢，弟獻公具，子真公湏，弟武公敖，子懿公戲，兄括之子伯御弑懿公而立，周宣王殺伯御，立懿公之弟孝公稱，子惠公弗湏以後入春秋。計自伯禽至閔十七君，而伯御誅死，既無謚，必無廟。伯禽廟爲世室，不毀，其初實爲昭廟。伯禽以下，考穆煬昭，幽穆魏昭，厲穆獻昭，真穆武昭，懿穆孝昭，惠穆隱昭，桓穆莊昭，故閔爲穆也。《公羊》以此爲小寢內之西宮，甚誤。宮寢之宮，《經》皆言寢，不言宮，自楚宮外，言宮皆爲廟。

### 鄭人人滑。

秋，齊人、狄人盟于邢。【補曰】案：《左傳》

「爲邢謀衛難也」。狄稱人，與衛人及狄盟異，明亦特文。外盟不日，此又不月者，以與狄共盟，故略之甚。邢爲主焉爾。【補曰】爲主，即所謂外爲主也。凡會盟以國地者，其國則《左傳》所謂「地主」，地主必皆與於會盟，故亦謂之爲主矣。疏以公會鄭伯于曹，曹必不爲主，但邢能救齊，

今盟于邢，故知歸功於邢，以爲主，不謂盟國都者例能爲主。案：疏合下三句爲解，非此句之意。此句正爲會盟國都者見例，特大概言之，原不必皆主會主盟。上年盟于齊，脩桓公之好，惟彼一事當是地主主盟耳。邢小，其爲主何也？其爲主乎救齊。十八年，邢人、狄人伐衛以救齊是也。【補曰】此申足上意。言邢是小國，而有爲主之文何也？以前曾與狄人共救齊，故盟則爲主，救齊既善，盟善可知。狄進稱人，亦同前義可知。《傳》但論其事，不復釋義者，從前《傳》悉包之也。王引之曰：「下「其」字衍文，蓋涉上句而衍。」

### 冬，楚人伐隨。隨，國也。

二十有一年春，狄侵衛。【補曰】已見義，仍從恒稱。

宋人、齊人、楚人盟于鹿上。宋爲盟主，故序齊上。鹿上，宋地。【補曰】此本杜預。外盟不日，此又不月者，與十九年盟齊同義。

### 夏，大旱。《傳》例曰：「得雨曰雩，不得雨曰旱。」

【補曰】注引《傳例》固是，但此時得雨亦不言雩，龍見常祀，

不志也。旱時，正也。【補曰】疏曰：「凡非八月、九月而雩者，皆書時以見非正，書秋、書冬是也。其旱則例皆時何者？旱必歷月，非一月之事，故書時爲正也。宣七年秋大旱，亦蒙例可知。」文烝案：六月乃常雩之時，竟六月無雨，故得謂之旱。宣七年則竟九月，雩不得雨，謂之旱也。若非盡夏秋一時之久，不得爲旱矣。不言不雨者，爲災也。《左傳》曰：「是歲也，饑而不害。」張大亨曰：「志大旱而不曰饑者，荒政行也。」趙汭曰：「歲猶有人也。」陸佃《爾雅新義》曰：「《春秋》於僖初書雨，已而書雩，已而書旱，公德衰矣。」

秋，宋公、楚子、陳侯、蔡侯、鄭伯、許男、

曹伯會于雩。雩，宋地。雩或爲「宇」。【補曰】楚於此始書「子」，而後文獻捷、戰泓、圍宋、還書「楚人」，從其常文，則此書「子」者，乃特筆以見義。下年《傳》曰「不顧其力之不足而致楚成王」，明宋公強致楚君，自取執辱，故書「楚子」以顯之。○【撰異曰】雩，范見或本作「宇」，《左氏》作「孟」，《公羊》作「霍」。徐彥曰：「《左氏》作「孟」，《穀梁》作「雩」，蓋誤，或所見異。」錢大昕曰：「孟，有「吁」音，「雩」亦有「吁嗟」之義，故字又轉爲「霍」，猶《左傳》蔡公孫吁即

公孫霍也。」執宋公以伐宋。【補曰】不言楚執者，《公羊》曰「不與夷狄之執中國也」。文烝案：此不言楚，不疑其非楚，與昭四年會申、執徐子異文者，此一時彼一時。徐又夷也，彼從盟戚、執曹伯之正例，此爲變例。以，重辭也。《傳例》曰：「以者，不以者也。」此《傳》及定七年齊人執衛行人北宮結以侵衛《傳》皆曰「以重辭也」，然則以有二義矣。國之所重，故曰重辭。【補曰】尚有內爲志一義，范失之。

冬，公伐邾。【補曰】不致者，惡事也。

楚人使宜申來獻捷。楚稱人者，爲執宋公貶。

【補曰】注用《公羊》，非也。焦袁熹曰：「會雩書「楚子」者，欲見宋致其君，乃招執辱，自餘即復以書人爲平文。」高澍然曰：「秋聘之前書爵，惟會雩特文，餘皆恒辭書人。」焦、高說是。文承伐宋而言使，亦不疑其非楚君也。書宜申者，以其來我，故得錄名，與萩同義，《傳》於彼發之。捷，軍得也。【補曰】重發《傳》者，此所得非萩，嫌異故也。其不曰宋捷何也？據莊三十一年齊侯來獻戎捷。不與楚捷於宋也。不與夷狄捷中國。

十有二月癸丑，公會諸侯盟于薄。會雩

之諸侯。【補曰】薄，宋地，《史記·宋世家》作「亳」，二字古通用。《左氏》哀十四年《傳》宋景公曰：「薄，宗邑也。」明「薄」即「亳」矣。會者，外爲主焉爾。【補曰】疏曰：「重發之者，以釋者是公，嫌會非是外爲主，故發例以明之。」文烝案：疏言釋者是公，非也。《傳》重發外爲主之例，正明是楚子主之。

釋宋公。【補曰】此《經》各本誤跳在《傳》「會者」

上，今依唐石經、十行本移正。外釋不志，此其志何

也？【補曰】內獲言歸之，霸國執有言歸復歸者，自餘悉

不志，《經》例因史例也。以公之與之盟目之也。

【補曰】以公在，故目言楚之釋。齊履謙曰：「雩，薄皆宋地，諸侯見執，竟外曰歸，竟內曰釋。」不言楚，不與楚

專釋也。何休曰：「《春秋》以執之爲罪，不以釋之爲罪，

責楚子專釋，非其理也。《公羊》以爲公會諸侯釋之，故不復出楚耳。」鄭君釋之曰：「不與楚專釋者，非以責之也。

《傳》云外釋不志，此其志何也？以公之與之盟目之也。言公與諸侯盟而釋宋公，公有功焉，與《公羊》義無違錯。」

【補曰】何既失之，鄭又非也。不與楚專釋，與上以公盟目之文意不相屬。《公羊》所云不可通於《傳》，胡安國引《傳》文以《公羊》爲誤，胡氏是也。《傳》言不與專釋者，明非楚所得專執，故亦非楚所得專釋也。《傳》但解《經》釋不言楚，則上執不言楚亦包其義。上執無《傳》，故於此特明之。焦袁煊曰：「楚執之，楚釋之，不言可見，其事著也。無楚執、楚釋之文，不使夷狄得加於中國，其文隱也。」李光地曰：「立文如此，真可謂婉而成章。」文烝案：盟不致者，會夷狄也，宋、蜀皆同。

二十有二年春，公伐邾取須句。【補曰】不

致者，言伐、言取，事尤惡。《左傳》以須句爲國，邾滅之，而公反其君。劉敞、胡瑗、孫覺、葉夢得、趙鵬飛、呂大圭、黃震、李廉皆以爲無此事。○【撰異曰】「有」字各本脫，今依唐石經補正。「句」，《公羊》作「胸」，後同。

夏，宋公、衛侯、許男、滕子伐鄭。

秋八月丁未，及邾人戰于升陘。升陘，魯

地。【補曰】戰則是師也，不言邾師者，從小國無師例。

○【撰異曰】升，《左氏》或作「登」。案：《左傳》凡「升」下字



皆用「登」。陸，《玉篇·邑部》引《左氏傳》作「郢」。內諱敗，舉其可道者也。不言其人，以吾敗也。不言及之者，爲內諱也。【補曰】案：《左傳》戰者公也。重發《傳》者，齊大國稱師，邾小國稱人，嫌有異也。

冬十有一月己巳朔，宋公及楚人戰于

泓，宋師敗績。【補曰】案：《左傳》楚人亦楚子也。宋

主楚客，故以宋及。以晉、楚之戰例之，又當內宋。泓，宋水名。日事遇朔曰朔。【補曰】日事，事在日例者。

《春秋》三十有四戰，【補曰】案：《春秋》書戰者二十三，直書敗者十七，凡四十。而云三十有四戰者，蓋去婁林、箕、貿戎、交剛、長岸、檣李不數，六者皆略書時故也。鹹書日，大原蒙上月，故亦併數。未有以尊敗乎卑，

以師敗乎人者也。【補曰】言自此泓戰外，無如此立文者。三十三年，秦稱師而爲晉人所敗，亦是以師敗乎人。彼晉人是晉君，亦與此楚人相似，但以彼文直從敗狄之例，故不據爲義也。以尊敗乎卑，以師敗乎人，則驕其敵。【補曰】王逸《楚辭注》「倨簡曰驕」，謂若齊頃公敗於鞏也。頃公與四國大夫戰，不如此以楚君稱人，《傳》亦

大概言之耳。《文子》曰：「義兵王，應兵勝，忿兵敗，貪兵死，驕兵滅。」襄公以師敗乎人而不驕其敵何也？【補曰】《傳》倒句以便文。言師敗不言尊敗，省文。

責之也。【補曰】若不責之則當書楚子，或書楚師，或可

稱宋人敗績，如衛之於齊。泓之戰，以爲復雩之恥

也。前年宋公爲楚所執。【補曰】楚伐宋而宋與戰，欲復

前恥。雩之恥，宋襄公有以自取之，伐齊之

喪，執滕子，圍曹，爲雩之會，不顧其力之不

足而致楚成王，成王怒而執之，【補曰】明上四事

皆譏文。《淮南子》曰：「侯而求霸者必失其侯，霸而求王

者必喪其霸也。」不說伐鄭者，在會雩後略之。家鉉翁以

《穀梁》抑宋與楚爲陋。《穀梁》但言成王怒而執之，何嘗與

楚哉？故曰：禮，人而不答則反其敬，愛人

而不親則反其仁，治人而不治則反其知。【補

曰】反者，反求諸己，改行飭躬也。此引古語，與《孟子》文

同。自取之則宜自反之也，《春秋》以忠恕爲教，正己而不

求於人，因人而益求諸己。徐幹《中論》曰：「怨人之謂壅，

怨己之謂通。」又曰：「孔子制《春秋》，詳內而略外，急己而

寬人，皆此理也。《傳》中多以人已爲說，唯是尤深。過而不改，又之，是謂之過，又，復。【補曰】此用《論語》文，《論語》無「又之」二字。襄公之謂也。【補曰】張洽引《孟子》以爲疾疚雖甚，而德慧術智未有以增益其所不能者也。古者被甲嬰冑，【補曰】甲，鎧。嬰，加也。冑，兜鍪。非以興國也，則以征無道也，豈曰以報其恥哉？【補曰】興國，若齊桓伐楚也。征無道，若湯伐葛，文王伐崇密也。夫湯、文之事，義兵也；齊桓伐楚，近乎義兵者也。宋襄報其恥則始於貪兵，卒於忿兵，雖曰應兵，實類驕兵也。二十八年下胡安國曰：「春秋時用兵者，非懷私復怨，則利人土地。《詩》云「不忮不求，何用不臧」，不忮則能懲忿，不求則能窒欲，然後貪憤之兵亡矣。」成二年下亦云然。程子說《詩》及朱子說《詩》初解皆同，《論語》引之則又學者之事也。《傳》言自取之恥不宜報，明泓戰有敗道。宋公與楚人戰于泓水之上，【補曰】《公羊》曰：「期戰于泓之陽。」司馬子反曰：【補曰】疏曰：「麋信云子反當爲子夷。」文彙案：麋說可從。「夷」之爲「反」，形近而誤也。《左傳》公子目夷，字子魚，《傳》固不

必全同。「楚衆我少，鼓險而擊之，勝無幸焉。」若要而擊之，必可破，非僥倖也。【補曰】言鼓者，何休謂軍法以鼓戰，以金止。險者，《左氏》、《公羊》謂楚人未盡濟泓也。疏曰：「以小敵大，克之不名微幸。」王念孫曰：「注疏皆非也。宋非楚敵，但可僥倖以取勝耳。無，猶莫也。乘其在險，鼓而擊之以取勝，莫有幸於此者。」襄公曰：「君子不推人危，不攻人厄，【補曰】推，排也。須其出，須其出險。【補曰】出險者，盡濟、泓也。既出，旌亂於上，陳亂於下。」【補曰】《公羊》宣十一年何休注曰：「繒廣充幅，長尋曰旌，繼旌如燕尾曰旆，加文章曰旂，錯革鳥曰旗。」注：「旌首曰旂。兩言亂者，時楚人未成列，儼嚴不整。子反曰：「楚衆我少，擊之，勝無幸焉。」【補曰】謂乘其未成列，鼓而擊之以取勝，則亦莫有幸於此者。《左傳》曰：「勅敵之人，隘而不列，天贊我也。」是兩「幸」字之義。襄公曰：「不鼓不成列，列，陳。【補曰】何休曰：「不戰未成陳之師。」須其成列，【補曰】疑當更疊「成列」字，屬下句。而後擊之。」則衆敗而身傷焉，七月而死。何休曰：「即

宋公身傷，當言公，不當言師。成十六年楚子敗績是也。又成十六年《傳》曰「不言師，君重于師也」，即成十六年是二十二年虛言也，即二十二年是十六年非也。鄭君釋之曰：「《傳》說楚子敗績曰四體偏斷，此則目也；此言君之目與手足有破斷者，乃為敗矣。今宋襄公身傷耳，當持鼓軍事，無所害，而師猶敗，故不言宋公敗績也。《傳》所以言「則衆敗身傷焉」者，疾其信而不道，以取大辱。」【補曰】《傳》承上詳述戰事，以起下文。倍則攻，敵則戰，少則守。【補曰】《孫子》曰：「用兵之法，十則圍之，五則攻之，倍則分之。敵則能戰，少則能守，不若則能避之。」王念孫曰：「能，猶乃也。言宋少於楚，宜堅守不戰，戰已可責。」人之所以為人者，言也，人而不能言，何以為人？【補曰】《墨子》經曰：「言，口之利也。」《莊子》曰：「言者，所以在意。」言之所以為言者，信也，言而不信，何以為言？【補曰】於文「信」从人言，《說文》以為會意字。《墨子》經曰：「信，言合於意也。」《鬼谷子》曰：「信者，明也。」《說文》「誠也」，《釋名》「申也」。信之所以為信者，道也，信而不道，何以為信？

【補曰】《呂氏春秋》曰：「所貴信者，為其遵所理也。」各本誤作「何以為道」，今依鈔本、《北堂書鈔》引改正。道之貴者時，其行勢也。凱曰：「道有時，事有勢。何貴於道？貴合於時。何貴於時？貴順於勢。宋公守匹夫之狷介，徒蒙恥於夷狄，焉識大通之方至道之術哉？」【補曰】勢者，時之所趨，《孟子》所謂待時乘勢。《戰國策》亦曰：「時勢者，百事之長也。」《老子》曰：「以正治國，以奇用兵。」《孫子》曰：「水因地而制流，兵因敵而制勝，兵無常勢，水無常形。」是其義也。又言宋欲以少敵衆，當用子夷之謀，合於時勢，今又違之，重自取辱，明《春秋》責之者深。程子《易傳》曰：「知時識勢，學《易》之大方也。」又曰：「時之盛衰，勢之強弱，學《易》者所宜深識也。」愚謂《春秋》之書亦如是。○《左傳》但言宋襄求霸，而《公羊》言襄之戰得正道，君子大之，比之文王，於是宋襄列五霸之說，於是《商頌》美襄公之說。紛紛之論，甚不足據，若以敗績為正，夫子何以言我戰則克乎？陸賈《新語》以為宋襄輕用師而尚威力，至死於泓水之戰，《春秋》傷之。與《穀梁》合，最得《經》旨。

二十有三年春，齊侯伐宋，圍閔。【補曰】

閔，宋邑。○【撰異曰】閔，《左氏》、《公羊》作「緡」。伐國不言圍邑，此其言圍何也？不正其以惡報惡也。前十八年，宋伐齊之喪是惡也。今齊乘勝而報，是以惡報惡也。【補曰】胡銓、趙鵬飛、家鉉翁並謂齊孝公以惡報德，此似是而非也。宋伐齊喪，立孝公，自一人言之則以立我爲德，自一國言之則以伐喪爲惡，《春秋》貴義而不貴惠，故當以惡論。

### 夏五月庚寅，宋公茲父卒。桓公之子襄公。

【補曰】《左傳》曰：「傷於泓故也。」與上《傳》合。《公羊》於上圍緡曰「疾重故」，亦謂重故創。何休則以爲喻。○【撰異曰】茲，《公羊》作「慈」。茲父之不葬何也？失民也。【補曰】失民則失德明矣。蔡景不忍使失民則葬其失民何也？【補曰】據上言「宋師敗績」，不如晉侯戰韓有失民文，今亦以失民爲義何也？以其不教民戰，則是棄其師也。爲人君而棄其師，其民孰以爲君哉？何休曰：「所謂教民戰者，習之也。《春秋》貴偏戰而惡詐戰，宋襄公所以敗于泓者，守禮偏戰也，非不教其民也。孔子曰：『君子去仁，惡乎成名？』造

次必於是，顛沛必於是」，未有守正以敗而惡之也。《公羊》以爲不書葬爲襄公諱背殯出會，所以美其有承齊桓、尊周室之美志。鄭君釋之曰：「教民習戰而不用，是亦不教也。詐戰謂不期也，既期矣，當觀敵爲策，倍則攻，敵則戰，少則守。今宋襄公于泓之戰違之，又不用其臣之謀而敗，故徒善不用賢良不足以興霸主之功，徒信不知權譎之謀不足以交鄰國會遠疆，故《易》譏鼎折足，《詩》刺不用良，此說善也。【補曰】《傳》用《論語》文，言以不教之民戰者謂之棄師，今宋襄昧於衆寡，暗於時勢，率爾一戰，是亦不教而棄師之類也。君自棄師，民孰君之？故曰失民也。《春秋》於韓著失民之文，於泓則爲責文，無失民文，要其所以責之者，即爲其有失民之道。失民在於棄師，與鄭棄其師亦不同而同也。注「故徒善」以下鄭引《考異郵》文也，見《詩·大明》正義引《箴膏肓》，正義但有「徒信」三語，文略耳，「會遠疆」作「定遠疆」。李琪曰：「《春秋》於襄公之終不以伯錄，茲父卒略不書葬，與秦、楚之君無別矣。」

### 秋，楚人伐陳。

冬十有一月，杞子卒。莊二十七年稱伯，今稱子，蓋爲時王所黜。【補曰】杞，成公也，不名，從宿男例。

杞於魯非壻即外孫，當時猶以宿、薛待之，繒子、邾子亦魯壻，皆不記卒矣。不日者，或不正，或史略之。不葬者，或不曾，或亦略之。自此入襄篇，與大國同例。

二十有四年春王正月。

夏，狄伐鄭。

秋七月。

冬，天王出居于鄭。襄王也。天子以天下爲

家，故所在稱居。【補曰】避弟子帶之難也。注本杜預。《傳》所謂居其所不月者，王奔異於諸侯，不嫌與小國同例。天子無出，王者無外，言出則有外之辭。【補曰】無出者文，無出也。凡言出者，皆施於奔。言出奔，爲有出之文，直言奔則爲無出之文，王子瑕、王子朝是也。瑕、朝皆天子之臣，天子之臣有奔道，無出道，故文無出。天子之身無奔道，故文無所謂奔，亦無出也。《左氏》與《傳》同。《公羊》曰「王者無外」，《曲禮》曰「天子不言出」，亦皆同也。《易》言「王用出征」，《書》言「王出郊」，王出在應門之內。《王制》言「天子將出，類乎上帝」，彼皆道其實之辭。《春秋》之文，別自有例，斯蓋《周禮》之舊，典策所守，君子因而用之，

以爲一《經》之恒辭正例也。周不言出，猶內不言來，或臨天下，或臨一國，王臣因乎王，內臣因乎君。出，失天下也。江熙曰：「天子必巡守然後行，故河陽之守，全天王之行也。平王東遷，其《詩》不能復《雅》而列爲《國風》，襄王奔鄭，不得全天王之行則與諸侯不異，故書出也。夫子祖述堯、舜，憲章文、武，斯文是作，不以道假人。《傳》言失天下，闕然如有未備。【補曰】江注多不明白。失天下者，即謂奔也，天子無所謂奔，故無出。既言出，則奔可知。出文即爲奔文，奔則失天下，是出者失天下之辭也。諸侯言出奔爲失國，天子言出爲失天下，事正相類也。是時王實出奔，在鄭汜地，既非會諸侯之比，又與居狄泉不同，《經》爲失天下之辭，自是直文。但《春秋》爲尊者諱，爲親者諱，內諱出奔，言孫不欲直爲失國辭。王不諱出，則明以直文，爲特文矣。《春秋》之辭，婉直文質，唯變所適。《傳》順《經》意作解，前後皆相貫通。此《傳》曰「失天下」，而成十二年《傳》曰「一見之」，謂一見其文，以明其義，從魯莊「一疑之」例，寓《王風》閔周之心也。又《春秋》聖者之作，或一言兼衆義，或有義而無文。《傳》言「失天下」凡二，莊、僖不志崩爲失天下，蓋以起齊桓之存周也，義之無文者也。襄

言出爲失天下，蓋以起晉文之存周也，義之兼見者也。自後頃王亦不志崩，周公又言出，殆皆承前爲義。居者，

居其所也。【補曰】此釋書「居」義，兼爲凡書「居」者發

例也。雖失天下，莫敢有也。邵曰：「雖實出奔而

王者無外，王之所居則成王畿，鄭不敢有之以爲國。」【補

曰】邵注未喻《傳》旨。莫，無也。有，有天下也。二句說所

以言出又言居之義。言天子失天下猶加居所之文者，以爲

君臣之義，無所逃於天地之間，天下雖失，無敢有之者，則

居其所者固自若。書出，不沒其實；書居，深正其名也。

陸渚、趙汭以爲《禮》天子適諸侯，諸侯避正寢，納管鑰而館

於廟，故曰天子無客禮，莫敢爲主焉。文烝案：明年四月，

晉侯納王，不告，故不志。高澍然以爲《春秋》即其事其文

取義，非備記載之書，不必具首尾，舊史所無，不增益也。

○嘗以《春秋》之義推諸他事，測其異同，如厲王三十七年

流於彘。彘者，晉地，猶鄭之汜也。流亦出奔也，苟非特

文，不可言出，當依狄泉之例，書曰王居于晉矣。厲流之

後，不別立王，諸侯釋位，以閒王政，凡十四年，又當依公在

乾侯之例，每歲書曰王在晉矣。若後世房州之事則又不

同，具說於公在乾侯下。

晉侯夷吾卒。《傳》曰：「諸侯時卒，惡之也。不

葬，篡文公而立，失德。」【補曰】晉惠公也。篡立及韓戰失

民，固是失德，但此從蔡侯肸時卒之例，非從宋公茲父不葬

之例，以魯不會葬不書葬耳。《左傳》惠公卒在上年九月，

是年正月秦納公子重耳入桑泉，二月入于曲沃，殺懷公。

《國語》云，十月惠公卒，十二月秦伯納公子。疑《晉語》得

之。其月蓋此年之月歟？

二十有五年春王正月丙午，衛侯燬滅

邢。【補曰】日例在宣十五年《傳》。○【撰異曰】「有」字各

本脫，令依唐石經補正。燬之名何也？據宣十二年

楚子滅蕭不名。不正其伐本而滅同姓也。絕先祖

支體尤重，故名以甚之。【補曰】注用何休也。本，謂先祖。

《大戴禮·禮三本》、《荀子·書》皆曰：「天地者，性之本；先

祖者，類之本；君師者，治之本。」周公、康叔皆文之昭也，

邢，周公之胤也。此《傳》、《左氏》、《公羊》並同。《曲禮》亦

曰「諸侯滅同姓名」，孔廣森曰：「滅同姓名，唯謂滅周之同

姓，若齊之於萊，楚之於夔，彼雖自爲同姓，而於王家則爲

庶姓，罪猶差輕。」文烝案：十八年後《春秋》惡衛，至是名

燬，爲燬之終事，意足而文備矣。○此《經》「燬」字，從無異辭，黎錡、杜諤、朱子乃以爲因下衛侯燬卒傳寫之誤。苟不深考，不知其似而非。

### 夏四月癸酉，衛侯燬卒。

宋蕩伯姬來逆婦。伯姬，魯女，爲宋大夫蕩氏

妻也，自爲其子來迎婦。【補曰】此本杜預。婦人既嫁

不踰竟，宋蕩伯姬來逆婦，非正也。【補曰】疏

曰：「復發《傳》者，嫌爲求婦爲禮，故發之。」文烝案：大夫

妻有歸宗之禮，據此《傳》則嫁他國者不得矣。或《傳》并欲

爲大夫妻明義，故又發之。姑逆婦亦非正也。其曰婦

何也？緣姑言之之辭也。【補曰】其姑逆之，故於

逆稱婦，不嫌與逆婦姜同。《公羊》亦同也。後求婦亦從此

例，故不發。案：《白虎通》曰：「外屬小功已上不得娶，故

《春秋傳》曰譏娶母黨也。」《穀梁》及《公羊》漢時皆有《外

傳》、有《章句》、《白虎》所引蓋出其中，是說逆婦及求婦二

《經》歟？

宋殺其大夫。其不稱名姓，以其在祖之

位，尊之也。何休曰：「曹殺其大夫亦不稱名姓，豈可

復以爲祖乎？」鄭君釋之曰：「宋之大夫盡名姓，禮：公族有罪，刑于甸師氏，不與國人慮兄弟也，所以尊異之。孔子之祖孔父累於宋殤公而死，今骨肉在其位而見殺，故尊之，隱而不忍稱名氏。若罪大者，名之而已，使若異姓然，此乃祖之疏也。曹殺其大夫，自以無大夫不稱名氏耳。《春秋》辭同事異者甚多，隱去即位以見讓，莊去即位爲繼弑，是復可以比例非之乎？」【補曰】何說固無理，鄭亦失之。祖謂孔父也，《左傳》稱大司馬孔父，又稱孔父爲司馬，在祖之位，在司馬之位也。宋自此殺大夫者四，《春秋》皆不稱名姓。此《經》《左氏》無《傳》。文七年書「宋人殺其大夫」，《左傳》謂殺公孫固、公孫鄭，而樂豫舍司馬，《史記》謂殺大司馬公孫固。然則固、鄭二子，當依孔穎達說爲孤卿之官，而固則以大司馬爲孤，其下又有樂豫爲司馬，屬於固也。成十五年書「宋殺其大夫山」，《左傳》云蕩澤爲司馬，謂之子山。文八年則明書「宋人殺其大夫司馬」。以彼諸文推此年所殺，明亦是司馬可知，《穀梁》之說未可輕議，而《左傳》事迹抑亦十得七八矣。此《傳》二句，通四經言之，孔父不稱名，曰爲祖諱，四經不稱名姓，曰以其在祖之位尊之，明四經亦爲諱也。孔父諱而四經皆諱者，盈乎諱之意。古者官有世功則有官族，故宋魚氏世左師之位，魯三卿司



徒司馬司空、三桓亦各世其位，故宋司馬之位，孔氏所不忍言也。《孝經》首章引《大雅》云「無念爾祖，聿脩厥德」，匡衡以爲孔子特著之。《春秋》與《孝經》同義，而《公羊》以始隱爲祖所還聞，亦習聞尊祖之說而誤也。但四經雖皆諱名姓，而或直云大夫，或稱官，或稱字，或稱國，或稱人，《傳》或言或不言，則又同中之異，後當文各論之。鄭云「罪大者名之而已」者，謂山也。山稱國以殺，不得爲罪大。山是字，亦非名也。疏曰「祖之疏」，古木或作「禮之疏」，言同姓與異姓不別則於禮法爲疏也。○四殺大夫，其文微乎微矣，《公羊》經師失其義，乃於此年、文七年、八年造爲宋三世內娶之說，甚不可通。宋襄夫人王姬，襄王之姊也，謂之內娶，不亦謬乎？

秋，楚人圍陳，納頓子于頓。納者，內弗受也。【補曰】此發通例。圍一事也，納一事也。

【補曰】圍陳事在陳，納頓子于頓事在頓。而遂言之，怪其異事而辭相連，有似遂事之辭。【補曰】謂《經》文不再出楚人也。蓋納頓子者陳也。圍陳使納頓子。【補曰】注語最圓足，楚人納頓子，是楚人又非楚人，公子比弑其君，是公子比又非公公子比，事正相類。《傳》以文例特異，故

言「蓋」，爲疑辭。疏引鄭《釋廢疾》謂有似晉陽處父伐楚救江之文，其說不了。

葬衛文公。【補曰】屬上生名之，失德甚明，故不如茲父去葬。時者，從正例。

冬十有二月癸亥，公會衛子、莒慶，盟于洮。衛稱子，在喪。洮，魯地。【補曰】衛已葬稱子者，未

踰年故也。三十三年《傳》曰晉人者，晉子也。彼是踰年而未葬，《傳》以子稱之，明必已葬且踰年乃得稱本爵矣。杜預以莊二十七年之洮爲魯地，僖八年之洮爲曹地。曹地之洮，三十一年始屬魯，《左傳》所謂「分曹地自洮以南，東傳于濟」也。此年杜又云魯地，孔穎達以爲誤。莒無大夫，其曰莒慶何也？以公之會目之也。小國

無大夫，以公與會，故進之。時有衛子，則無敵公之嫌。

【補曰】此《傳》宜善讀之，若此盟無衛子，直是公會之則本可不目言其人，當從包來之例稱莒人，不當從書獲、書來逆、書來奔之例稱莒慶。今得目言者，以公之與衛子會之，故目之。《傳》不言以公之與衛子會之，但言以公之會者，《傳》意特大概言之，亦以下《傳》於衛甯速特發其義，故此不具說。注末二語即本下《傳》，其說是也。莒慶與衛甯速



無異義，但莒無大夫，因事目之，則直以國氏，此其異也。何休曰：「莒無大夫，書莒慶者，尊敬墦之義。杞伯、繒子皆無尊敬之文。」何說非也。不致者，會惟兩君，從離會例。

二十有六年春王正月己未，公會莒子、

衛甯速盟于向。向，莒地。【補曰】即隱二年莒所入

者，後屬魯，故桓十六年城向，後又屬莒，故宣四年取向。

○【撰異曰】速，《公羊》作「遯」。案：「遯」者籀文。公不

會大夫，【補曰】謂不書氏名也。隱八年《傳》曰「不可言

公及大夫」，莊九年《傳》曰「公不及大夫」，皆同義。其曰

甯速何也？【補曰】據翟泉、蜀、澶淵大夫皆稱人也。

內君外臣，特相盟會，其文皆沒公，自參以上不沒公，則宜

稱人。以其隨莒子，可以言會也。【補曰】外亦有

君，不以伉為嫌，故可稱氏名以會也。不致，與洮同。

齊人侵我西鄙，公追齊師，至薨，弗及。

【補曰】薨，齊地。○【撰異曰】薨，《左氏》作「鄰」，亦或作

「薨」。陸淳《纂例》曰：「《公羊》、《左氏》或作「鄰」。《左氏

音義》：「戶圭反，一音似轉反。」《公穀音義》皆又「似充

反」。段玉裁曰：「似轉、似充字當作「雋」，非也。」弗，十行本、《左氏》誤作「不」，葉夢得、呂本中所見已然。人，微者也。【補曰】謂將卑師少。自陽處父以前有將尊師少

而稱人者，《傳》但大概言之。侵，淺事也。【補曰】輕

於伐也。重舉例以起下。公之追之，非正也。【補

曰】不煩君自追。至薨，急辭也。以急辭言之，明不至

薨。【補曰】疏曰：「文承追齊師之下，即云至薨，是急辭

也。據文與公追戎于濟西異。」弗及者，弗與也，弗

與戰也。【補曰】《說文》：「及，逮也。」《爾雅》：「逮，與

也。」注非。可以及而不敢及也。畏齊師。【補曰】

明亦在不例。其侵也曰人，其追也曰師，以公

之弗及，大之也。大之，謂變人言師。【補曰】師者，

通稱不別之辭，故為大。追而弗及者，公也，不得仍言齊人

也。凡大夫將，師少稱人，衆稱師，專稱也。敗稱師，追稱

師，乞師，棄師，取師，如師，會師，卒于師之類，通稱也。齊

履謹、高澍然得之。弗及，內辭也。弗及者，若曰我自

不及耳，非齊不可及。【補曰】注非也。此承上「可以及而

不敢及」句申言之，凡可以然而不然者，《經》皆言不，今變

文言弗，是爲內辭。若曰齊師已去，追之弗及，非可以及而不敢及也。其實至闕下加言弗及，則其不敢及亦足見矣。此所以爲內辭者，追既非正，又不敢及，不可言也。凡言弗，皆內辭。非竟內兵不致者，既弗及，若猶未出竟。

### 夏，齊人伐我北鄙。

【補曰】許翰曰：「齊孝圍

宋邑，又侵伐魯不已，與桓公下宋桓，魯莊之意正相反，霸業所以墮矣。」文烝案：齊侵伐魯，不西則北，齊魯之西皆濟水也，魯之北岱也，岱陰齊也。《國語》說齊桓公地南至于餉陰，西至于濟，北至于河，東至于紀鄆。《管子》「餉」作「岱」，「河」作「海」。江水約計魯竟以爲北與齊分泰山，西與曹分濟水，南近邾滕，西南至金鄉、魚臺、單縣，鄰於宋，東跨蒙陰，抵諸城、濱海，東南鄰於莒。案：此皆非齊、魯初封之竟也。《晏子春秋》云「吾先君太公受之營丘，爲地五百里」，《管子》說桓公云「地方三百六十里」，《明堂位》云「成王封周公於曲阜，地方七百里」，《史記》云「封伯禽，康叔於魯，衛地，各四百里」，《孟子》諸書則謂公侯地皆方百里。《孟子》又云「今魯方百里者五」，周公封魯、大公封齊，皆方百里。

### 衛人伐齊。

### 公子遂如楚乞師。

【補曰】公子遂，莊公子東門

襄仲。何休曰：「稱師者，正所乞名也。乞師例時。」乞，重辭也。雍曰：「人道施而不有，讓而不取，故以乞爲重。」【補曰】重發《傳》者，前盟例，此師例也。注亦以定元年重請爲說。求，乞二文所同，非乞文所獨也。重者，重師，《傳》於成十三年明言之。《公羊》曰：「乞者何？卑辭也。曷爲以外內同若辭？重師也。」杜預注曰：「乞，不保得之辭。」《釋例》曰：「凡乞者，深求過理之辭。」何重焉？重人之死也，【補曰】申上句。非所乞也。

【補曰】非所乞而乞也。上言師所以稱乞，此言乞莫重於師，顧前乞盟文。師出不必反，戰不必勝，故重之也。【補曰】言有死道，又申重人之死也。《公羊》兩「不必」作「不正」。《論語》曰：「子之所慎，齊、戰、疾。」《史記》趙奢謂其妻曰：「兵，死地也，而括易言之，破趙軍者必括也。」亦得此意。董仲舒曰：「僖公親任季子，國家安寧，季子卒之後，魯不支鄰國之患，直乞師楚耳。」趙鵬飛曰：「僖自公子友卒而用公子遂，善惡判矣。」張洽曰：「僖公初年，頗有意於治國，務農閔雨，國以殷富。中年以來，民事既荒，國備不立。齊人再伐，已不能支，而遠乞師以刷其恥。孔子罪臧文仲竊位，蓋爲其從公子遂如楚，爲國無謀也。使

其立展禽以爲政。所以輔僖公者，必有道矣。」文烝案：《書》曰「知人則哲，安民則惠」，所謂《皋陶謨》可以觀治也。僖以能安民得之，以不能知人失之，《左傳》此行有臧文仲。

秋，楚人滅夔，以夔子歸。【補曰】夔子不名

者，略夷狄微國，猶誘戎蠻子殺之不名。○【撰異曰】兩

「夔」字，《公羊》並作「隗」。唐石經《穀梁》「夔子」作「夔人」，誤也。夔，國也。不日，微國也。【補曰】重發

《傳》者，此有以歸文，又在時例明也。疏曰：「此是夷狄之微國，故從時例。」以歸，猶愈乎執也。【補曰】重發傳

者，前敗中國書月書名，此滅夷狄微國不月不名，有異故也。此執亦即獲也，凡諱獲言以歸者，其義多端。中國獲

王臣則諱，爲王臣諱也；夷狄獲中國則諱，爲中國諱也，皆不專施於人滅者也。中國獲夷狄則亦諱，諱

中國之暴也，此專施於人滅者也。夷狄獲夷狄則亦諱，諱夷狄之盛也，亦專施於人滅者也。王臣非士不可名，其餘

諸侯既諱其獲，則生名以顯之，不名者，略也。《傳》欲因同以見異，故於此重發例。

冬，楚人伐宋，圍閔。○【撰異曰】閔，《左氏》、

《公羊》作「緡」。伐國不言圍邑，此其言圍何

也？以吾用其師目其事也，【補曰】吾將用之，故

并目彼事。非道用師也。楚人出師，爲魯伐齊，而中

道以伐宋，故伐、圍兼書，所以責楚。【補曰】此句《公羊》

同。何休曰：「時以師與魯未至，又道用之，於是惡其視百

姓之命若草木，不仁之甚也。稱人者，楚未有大夫，未得稱

師，楚自道用之，故從楚文。」

公以楚師伐齊，取穀。【補曰】楚稱師，以公之

以之，舉其重者也。何休曰：「稱師者，順上文。」以者，

不以其者也。民者，君之本也。使民以其死，

非其正也。雍曰：「兵，不祥之器，不得已而用之，安有

驅民于死地，以共假借之役乎？」【補曰】疏曰：「重發《傳》

者，彼據外，此據內，故重詳之。」文烝案：首句乃明惡內之

義，注未能了，說在桓十四年。

公至自伐齊。惡事不致，此其致之何

也？危之也。以蠻夷之師伐鄰近大國，招禍深怨，危

亡之道。【補曰】以夷伐鄰，伐而又取，皆惡也。疏曰：「莊

六年，公至自伐衛，《傳》曰「見公惡事之成也」，與此不同

者，互文起義。其實此亦見惡，彼亦危之。」文烝案：《傳》

固互文，而此則危之之意爲多，故言危之，與彼略異。

二十有七年春，杞子來朝。

夏六月庚寅，齊侯昭卒。【補曰】無虧既死，

則昭爲正，故書日。○【撰異曰】昭，或作「照」。

秋八月乙未，葬齊孝公。【補曰】危之者，潘

繼兄而立，雖得正，危道也。

乙巳，公子遂帥師入杞。

冬，楚人、陳侯、蔡侯、鄭伯、許男圍宋。

楚人者，楚子也。【補曰】序諸國君上，足明其爲楚

君。其曰人何也？人楚子，所以人諸侯也。

【補曰】從其書人之常文，乃所以人諸侯，非謂此之書人不爲常文。其人諸侯何也？不正其信夷狄而

伐中國也。何休曰：「哀元年，楚子、陳侯、隨侯、許男

圍蔡，不稱人，明不以此故也。」鄭君釋之曰：「時晉文爲賢

伯，故譏諸侯不從而信夷狄也。哀元年，時無賢伯，又何據而當貶之邪？甯謂定、哀之世，楚彊盛，故諸侯不得不從

耳。」江熙曰：「夫屈信理對，言信必有屈也。宋、楚戰于

泓，宋以信義而敗，未有闕也。楚復圍之，我三人行，必有我師，諸侯不能以義相帥，反信楚之曲，屈宋之直，是義所不取。信曲屈直猶不可，況乃華夷乎？楚以亡義見貶，則諸侯之不從，不待貶而見也。然則四國信楚而屈宋，《春秋》屈其信而信其屈，貶楚子于兵首，則彼碌碌者以類見矣，故曰人楚子所以人諸侯。【補曰】疏曰：「鄭云無賢伯，范言楚彊盛者，二者相接也。爲當時無賢伯，楚又彊盛，故諸侯不得不從泓之戰。《傳》譏宋公，而江熙云「宋以信義而敗，未有闕」者，據宋不能量敵強弱，致師敗身傷，故譏之。其於信義，實未有所闕，而楚復圍之，故貶楚子也。」文烝案：江注以義相帥。「帥」當作「師」，轉寫誤也。江用《公羊》爲說，不可通於《傳》。疏曲通之，非也。《傳》但論華夷，豈論曲直哉？諸侯信夷狄而伐中國，故人之以貶之，人楚正所以人諸侯，義甚明白。楚自秋聘次厥貉以前，君臣稱人，其常文也，非以稱人特爲貶楚辭也。

十有二月甲戌，公會諸侯，盟于宋。地以

宋者則宋得與盟，宋圍解可知。【補曰】杜預曰：「宋方見圍，無嫌於與盟，故直以宋地。」杜說是也。范注本何休，何氏以此盟歸功於僖，因有是說，不可依用。葉夢得曰：「盟于宋之國外，是亦宋矣。」文烝案：此與曹南不同。不致，與薄同。

## 春秋僖公經傳第四補注第十二

穀梁 范氏集解 鍾文烝詳補

二十有八年春，晉侯侵曹，晉侯伐衛。

再稱晉侯，忌也。鄭嗣曰：「曹、衛並有宿怨于晉，君子不念舊惡，故再稱晉侯以刺之。」補曰：《詩》曰「維予曷忌」，《毛傳》曰：「忌，怨也。」《說文》曰：「忌，憎惡也。」再稱晉侯，各為一事，明其既怨憎於曹，又怨憎於衛，凡有舊惡，無不念也。常例當言遂伐衛，為繼事辭。張洽曰：「報施救患，取威定伯，文公君臣之規模也，故先侵曹伐衛。若以大義興師，則當先於乞師伐齊之魯，從楚圍宋之陳、蔡。」呂大圭曰：「從楚圍宋者，陳、蔡、鄭、許也。晉乃舍而攻曹、衛者，陳、蔡、鄭、許邇楚者也，曹、衛邇宋者也。楚始得曹而新昏於衛，時方圍宋，晉欲釋宋之圍，致楚而與之戰也。」文烝案：二說深合事情，而晉文初念，實主脩怨，故《經》以忌為義。張洽又據《左傳》事迹以為文公終始徇私報怨，得

之矣。

公子買戍衛，不卒戍，刺之。刺，殺也。內

諱殺大夫，故謂之刺，蓋取《周禮》三刺之法。補曰：公子買，子叢也。《爾雅》曰：「戍，遏也。」韓嬰《詩傳》曰：「戍，舍也。」毛曰：「守也。」莊十七年何休注曰：「以兵守之曰戍。」《說文·人部》：「伐」，《戈部》：「戍」並从人持戈。《廣韻》：「戍，從人荷戈。」王筠曰：「《廣韻》所據是也。」《詩》「何戈與役」，又「役」之古文作「役」，從役從人，皆同意。李巡《爾雅注》曰：「卒，事之已也。」范注「刺，殺」，《爾雅》文。《孟子》言「刺人而殺之」，則二字亦微異。內諱殺大夫謂之刺，本《公羊》。諱者，《經》例因史例也。《明堂位》說魯君臣未嘗相弑，「弑」本是「殺」字，君為臣殺則書「薨」書「卒」，臣為君殺則書「刺」，是所謂未嘗相殺，皆魯史舊法也。《晉語》曰「刺三郤」、「刺欒盈」亦本晉史辭歟？刺取三刺之法，本杜預。案：《周禮》·小司寇·司刺：「壹刺曰訊群臣，再刺曰訊群吏，三刺曰訊萬民。」先名後刺，殺有罪也。補曰：此猶外之稱人以殺也。有罪故不日，從不日卒見惡之例。不發《傳》者，刺偃重，舉正例，此亦從例可知。何休曰：「內殺大夫例，有罪不日，無罪日，外殺大夫

皆時。」公子啟曰：公子啟，魯大夫。【補曰】疏曰：「舊解云公子啟即公子偃。啟書日者，啟無罪。今觀上下文勢，理恐不然。」猶襄二十三年《傳》引蘧伯玉曰耳。「不卒戍者，可以卒也。可以卒而不卒，譏在公子也，刺之可也。」【補曰】「不卒戍」一句，蓋時既聽察其辭，而斷獄弊訟，麗法議罪者也。「不」之一字，律之定論，《經》之通例也。至於公之附楚以敵晉，《經》所不論。既戍矣，則以不卒戍爲罪也，公子啟解其義而其事可知。《左氏》、《公羊》徒滋曲說，而後世史書但云某官某有罪棄市，或云有罪自殺，則以實事爲虛辭矣。○《史記》、《漢書》以來，以天子爲《本紀》，編年記事取法《春秋》，雖視古《經》爲繁，不若古《經》之密。至於言罕褒諱，事無黜陟，《史通》所論，更不必言也。

**楚人救衛。**【補曰】鄭玉曰：「見晉伐所必救，能致城濮之戰也。」

三月丙午，晉侯入曹，執曹伯，畀宋人。人者，內弗受也。日人，惡人者也。【補曰】疏曰：「重發之者，以晉文初霸，嫌得人中國，故發《傳》以明

之。」以晉侯而斥執曹伯，惡晉侯也。惡其忌怨深。【補曰】凡諸侯執諸侯稱爵。斥執者，皆是惡之之辭，《傳》并明通例也。晉文執曹伯、執衛侯，兩文相對甚明，解此以見彼。畀，與也。【補曰】《公羊》同。《爾雅》作「予」。《祭統》曰：「畀之爲言，與也。」其曰人何也？

不以晉侯畀宋公也。畀，上與下之辭，故不以侯畀公。哀四年夏，晉人執戎蠻子赤歸于楚，使楚子治其罪，今執曹伯不言歸于宋而言與宋人者，是使宋公拘執之。【補曰】此猶桓三年不以齊侯命衛侯也。人者，衆辭，故不嫌也。注首二語連上「畀與也」句作解。《左傳》曰：「執曹伯，分曹、衛之田以畀宋人。」葉夢得以爲此《經》當曰「畀宋人田」，不言田者，《經》成而亡之。又謂《穀梁》不見其事，左氏見之而不能辨。汰哉斯言，且安見《左傳》必不誤乎？《傳》上文「乘軒者三百人」，明是因《曹風》「三百赤芾」之文，誤以爲實。程子曰：「《詩》但言其多耳，曹國小，豈容有三百？」知《左氏》誤者多也。」

夏四月己巳，晉侯、齊師、宋師、秦師及楚人戰于城濮，楚師敗績。【補曰】《左傳》謂晉侯一戰而霸也。時楚使得臣將師，楚無師無大夫，故戰稱人

也，敗稱師，與燕同義。《傳例》中國敗夷狄，言敗不言戰，舉其大者也。又不論其疑戰不疑戰，皆不書日。中國雖與之結日列陳，既能敗之，則不欲詳之也。楚較他夷狄爲進，故不直言敗楚師，而結日之戰得書日。○【撰異曰】齊師，唐石經作「齊侯」，誤也。

楚殺其大夫得臣。【補曰】宜申以其來我書至，此與有大夫者同文，但仍未得氏也。楚殺得臣、公子側，皆賁軍之將也，《經》自以殺大夫見義耳。文不蒙上，不論此等情事。

### 衛侯出奔楚。

五月癸丑，公會晉侯、齊侯、宋公、蔡侯、鄭伯、衛子、莒子，盟于踐土。衛稱子者，時衛侯出奔，國更立君，非王命所加，未成君，故曰子。踐土，鄭地。【補曰】衛子，衛侯之母弟夷叔武也。杜預曰：「叔武攝位受盟，非王命所加，從未成君之禮，故稱子而序鄭伯之下。」諱會天王也。實會天王而文不言天王，若諸侯自共盟然，是諱之也，所謂諱而不正。【補曰】下有「王所」文，會天王可知，故可爲諱也。不如齊桓外內有疑文者，從桓已足見義。又據《左傳》，是月己酉「王命尹氏及王子虎、內

史叔興父策命晉侯爲侯伯」，在癸丑前五日，是則晉文既受命，無所可疑，故與齊桓異文。《傳》前言桓非受命之伯，則晉文既受命亦足以明也。不致者，會天王譎而不正，是惡事。○說《左傳》者謂王官之宰臨盟，先同姓，後異姓。又先衛後蔡，《春秋》所書會之次，非盟之次也。案：此說欲以《左傳》合《經》，殆非也。竊意周之宗盟，異姓爲後，此是盟詛初行時舊制則然，自齊桓以異姓主盟，其制變矣。衛或舊在蔡上，後來亦變矣。《公羊》曰「其序則齊桓、晉文，其會則主會者爲之」，最得其實。言其序、其會，則盟在其中矣。《左傳》衛祝佗稱周府之載書云：「王若曰，晉重、魯申、衛武、蔡甲午、鄭捷、齊潘、宋王臣、莒期。」此周人自據舊制記而藏之也。至謂皋鼬之盟、長衛於蔡，則《左氏》求合踐土載書，虛增之也，所以知周府載書非鑿空。而皋鼬、長衛不可信者，彼上文分魯公、分康叔、分唐叔云云，其數典必皆有據，而謂君以軍行則祝出竟，若嘉好之事，祝無事焉，則與《經》侵楚之文亦顯相乖刺，明彼《傳》須分別觀之。而《釋例》、《正義》皆曲說也。又此踐土盟，《左傳》謂王子虎盟諸侯于王庭，與《傳》言會天王似亦不合。

### 陳侯如會。如會，外乎會也，於會受命



也。外乎會，不及序也。受命于會，故書如會。

公朝于王所。朝不言所，言所者，非其所也。非京師朝。【補曰】此發書所例也。《詩·小雅》

云「自天子所」，天子之所，《觀禮》云「女順命于王所」，《考工記》云「不屬于王所」，《鄭風》又有「公所」之文，彼皆當時恒稱。《春秋》脩辭則別有義例也。胡安國曰：「周制：十有二年，王乃時巡，諸侯各朝於方嶽。亦何必於京師於廟然後爲禮乎？古者天子巡守於四方有常時，諸侯朝於方嶽有常所。其宮室道塗，可以豫脩，故民不勞；其供給調度，可以豫備，故國不費。今天王下勞晉侯，公朝于王所，則非其時與地矣。然則天子在是，其可以不朝乎？天子在是而諸侯就朝，禮之變也。《春秋》不以諸侯就朝爲非，而以王所非其所爲譏，正其本之意也。」文烝案：胡云「天王下勞」者，依杜預說。《公羊》以爲致天子，《傳》及《公羊》皆以河陽爲再致，杜說非也。此《傳》與下朝《傳》互相備。

六月，衛侯鄭自楚復歸于衛。【補曰】何休

曰：「復歸，例皆時，此月者，爲下卒出也。」《公羊》以復歸與歸爲二，故何氏有此例，不可通於《傳》。復歸與歸同，奔歸與執歸則異。奔歸月，執歸時，下三十年，徐邈說得之。

自楚，楚有奉焉爾。【補曰】疏曰：「重發《傳》者，自

楚，嫌與中國異也。」復者，復中國也。歸者，歸其所也。中國，猶國中者也。【補曰】注凡訓中國爲國中者，

隨文爲義。《詩》「中谷」爲谷中，《戰國策》「東山之君」爲山東，古人語多如此。君實有國，舊爲君，故言復也，此發復歸通例。鄭之名，失國也。【補曰】疏曰：「重起失國之例者，以鄭非大罪，故出奔不名，惡其藉楚之力，故入名以表失國，嫌出入異，故《傳》發之。」文烝案：出不名則入名，明失國也。出既不名，故《傳》重舉例耳，不必言惡其藉楚之力。

衛元咺出奔晉。【補曰】訟殺叔武也。不書衛

侯殺其弟武者，時不以告，史本無之。

陳侯款卒。【補曰】陳穆公也。前稱世子非不正，

蓋不蒙上月，在惡之之例。何休曰：「賤其歧意於楚。」何氏本解不日義，合諸《傳》例，則宜時也。不葬者，魯不會。

秋，杞伯姬來。莊公女。來歸寧。

公子遂如齊。聘也。【補曰】不應注於此，宜刪。

冬，公會晉侯、宋公、蔡侯、鄭伯、陳子、



莒子、邾子、秦人于溫。陳稱子，在喪也。【補曰】

溫，晉地，本溫國，狄滅之，襄王以賜晉文。杜預曰：「陳共公稱子，先君未葬也。宋襄公稱子，自在本班。陳共公稱子，降在鄭下，陳懷公稱子而在鄭上，蓋主會所次。」○【撰異曰】陸淳《纂例》曰：「《左氏》『晉侯』下有『齊侯』。」案：今《公羊》亦有之。邾子，板本、《左氏》作「邾人」，誤。唐石經亦作「邾子」。諱會天王也。復致天子。【補曰】此下言王守，其爲會天王尤明。

天王守于河陽。河陽，晉地。【補曰】守，巡守

也。《孟子》引晏子對齊景公曰：「天子適諸侯曰巡守。巡守者，巡所守也。」所守爲守，巡之亦爲守。《白虎通》曰：「巡者，循也。守者，牧也。爲天循行守牧民也。」《文選》注引《禮記·逸禮》亦曰：「天子巡行守牧也。」「巡守」字經典古書多通用「狩」。○【撰異曰】守，《左氏》、《公羊》作「狩」，《左》亦一作「守」。全天王之行也。時實晉文公召王，以臣召君，不可以訓，因天子有巡守之禮，故以自行爲文。【補曰】全者，深正其義，下句是也。踐土言朝，直承會下，此再致天子，失禮尤重，故須特爲全文。注前三語本《左傳》。爲若將守，而遇諸侯之朝也。【補曰】此

所謂全也。杜預《左傳後序》引《汲冢紀年》「周襄王會諸侯于河陽」，知此守即是上會，河陽即是溫，非別有巡守之事。但論其事，則會即是守，論其文，則既言會又言守，若別有守事然，故曰爲若將守而遇朝也。李琪引《紀年》之文云：

「睹此則尊王之辭，信爲仲尼特筆。」李氏以爲《春秋》有述有作，小事則述舊而紀錄，大事始作以制義也。《左氏》、《公羊》以此守爲狩郎、狩郤之狩，《左傳》又謂晉侯使王狩，皆失之。李廉曰「此非講武之狩，蓋假巡狩之禮以爲辭」是矣。爲天王諱也。【補曰】晉下陵而王上替，諱之以全之。水北爲陽，山南爲陽。日之所照曰陽。【補曰】北爲陽則南爲陰，南爲陽則北爲陰。溫，河陽也。【補曰】晉之河北，土田衆多，溫亦其一邑耳。下文云「溫，河北地」是也，黃仲炎、趙與權得之。

壬申，公朝于王所。朝於廟禮也，於外非禮也。諸侯朝王，王必於宗廟受之者，蓋欲尊祖禰，共其榮。【補曰】言朝于王所，不得言如京師，是足明其非禮。重發《傳》者，嫌朝王與諸侯相朝異也。獨公朝與？諸侯盡朝也。【補曰】起下「主善以內」句。《左傳》

曰：「晉侯召王，以諸侯見。」其日，以其再致天子，故謹而日之。【補曰】起下「目惡以外」句。時史本以其一歲再朝，特書日以見非常，君子從而取義焉。《公羊》曰：「其日何？錄乎內也。非公獨朝，何錄之有？」主善以內，目惡以外。主善以內，謂公朝于王所。目惡以外，言再致天子。【補曰】主善，謂言朝。目惡，謂謹日。此猶桓十三年《傳》言「由內及之，由外言之」。言曰公朝，逆辭也，而尊天子。鄭嗣曰：「若公朝于廟則當言公如京師，而今言公朝，是逆常之辭。雖逆常而曰公朝王所，是尊天子。」【補曰】申上善意也。辭有逆之而順者，名之正，辭之盡。會于溫，言小諸侯。溫，河北地，以河陽言之，大天子也。溫、河陽同耳。小諸侯，故以一邑言之，尊天子，故以廣大言之。【補曰】猶言東巡守，西南北巡守，因上言尊天子，覆解上《經》。日繫於月，月繫於時，【補曰】杜預《左傳序》曰：「記事者，以事繫日，以日繫月，以月繫時，以時繫年。」孔穎達曰：「繫者，以下綴上，以末連本之辭。」壬申公朝于王所，其不月，失其所繫也，【補曰】杜預曰：「壬申，十月十

日。」以為晉文公之行事，為已顛矣。以臣召君，顛倒上下，日不繫于月，猶諸侯不宗于天子。【補曰】此與「目惡」意相足。夫天子作民父母，以為天下王，禮樂征伐出焉，朝覲訟獄謳歌歸焉，天下之人皆繫於天子，百世不可易。故於功盛事顛者，既謹其日，又去所繫，辭微而義切矣。《左氏》不得其說，又無從益其月，故其《傳》亦遂於冬下直述《經》文，而繼以丁丑云云。疏漏之迹顯然，闕疑之意則善。

晉人執衛侯，歸之于京師。【補曰】稱人以執，執有罪，在晉文為伯討也，與上及成十五年二文皆相對。一年之中，一人之身，六稱晉侯而一稱晉人，同文異義，異文異義，於此為信。案：《左傳》衛侯先期入，叔武喜而走出，前驅射而殺之。胡銓以為此《康誥》所謂兄大不友于弟，與父不慈，子不祗，弟不共，皆民彝之不可泯亂，當速由文王作罰者也。此人而執，【補曰】亦晉侯入衛而執，謂自溫渡河入衛也。溫在河北，京師及衛在河南。案：《左傳》曰：「衛侯與元咺訟，甯武子為輔，鍼莊子為坐，士榮為大士。」此晉侯入衛之後聽其訟於衛也。又曰：「衛侯不勝，殺士榮，則鍼莊子，謂甯俞忠而免之。執衛侯，歸之

于京師，實諸深室。」此正說《經》文也。又曰：「元咺歸于衛，立公子瑕。」此說下《經》文。言咺訟既直，乃得書其歸也。夫咺在晉而衛侯得與訟，則咺從晉侯在溫，即隨人衛可知也。王在溫而歸衛侯于京師，則是時王將反京師可知也。《左傳》並載於會溫後，又其後舉王守公朝二《經》，乃是補序前事，故以「是會也」一句爲更端也。又以壬申公朝、丁丑圍許二句相接，壬申至丁丑六日，明人衛等事皆中間四日事也。杜預並以爲十月，《釋例》又疑是十二月也。其不言人何也？【補曰】據曹言人。不外王命於衛也。入者，自外來，伯者以王命討衛，衛王之土，故曰不外王命。歸之于京師，緩辭也，辭間容之，故言緩。【補曰】與成十五年歸于京師相對爲緩急。斷在京師也。【補曰】申上緩辭意，明得正。天子爲天下朝覲訟獄所歸，此年備見。

衛元咺自晉復歸于衛。【補曰】此《公羊》所謂「君人則己出，君出則己入」。自晉，晉有奉焉爾。【補曰】疏曰：「又發《傳》者，嫌霸者與凡諸侯異。」復者，復中國也。歸者，歸其所也。【補曰】大夫爲國

體，與君共國，復還居位則皆言復。重發《傳》者，嫌大夫與君異，故發以同之。

諸侯遂圍許。會溫諸侯。許比再會不至，故共圍之。【補曰】此本杜預。遂，繼事也。繼事，會于溫而圍許。【補曰】重發《傳》者，齊桓是伐與救與次，晉文是圍，並霸者之事，故詳之也。疏曰：「會溫已訖，中間有事，或恐不相繼，故發《傳》以明之。」謝湜曰：「諸侯朝王，許獨違命，書『遂圍許』，得討叛之義。」俞舉引項氏說以爲晉文公經略中外，自今年春自北而南，夏自南而北，冬復自北而南，明年春復自南而北，始歸於晉。文烝案：冬會乃再出也。

曹伯襄復歸于曹。三月爲晉侯所執，今方歸。復者，復中國也。【補曰】重發復例者，此未復而言復，將陳其義，故重舉以同之。曹伯本宜言復，以其言復於圍許前，獨爲變例。天子免之，因與之會。其曰復，通王命也。免之于宋，身未反國，因會于許，即從反國之辭，通王命。

遂會諸侯圍許。【補曰】段玉裁曰：「《左經》亦

作「圍許」，《傳》作「于許」者，謂會諸侯於圍許之師也，彼時曹無師。」遂，繼事也。【補曰】疏曰：「恐被釋而遂與常例異，故重發之。」文烝案：曹伯會事之成。重言諸侯者，順繼事之文也。《經》通王命言復，使若身既反曹，自曹來會，不可直言會圍許。

二十有九年春，介葛盧來。介，國也。

葛盧，微國之君，未爵者也。【補曰】重發《傳》者，

此朝而不言朝，嫌又異也。《公羊》曰「夷狄之君」。其曰

來，卑也。【補曰】疏曰：「邠黎來亦未得爵命而稱朝，此

謂卑賤之，故直言來矣。《公羊》曰：「何以不言朝？不能

乎朝也。」即襄十八年注云「不能行朝禮」是也。文烝案：

公不在亦得言來者，葛盧未見公輒反，至冬復來見公，其事甚明，故無嫌也。

公至自圍許。【補曰】此二事偶，則以後事致之

例，若無圍許事，則會溫再致天王亦不致。

夏六月，公會王人、晉人、宋人、齊人、陳人、蔡人、秦人，盟于翟泉。翟泉，某地。【補曰】當

云周地，即昭二十三年之狄泉也。案：《左傳》晉狐偃、宋公孫固、齊國歸父、陳轅濤塗、秦小子憖皆大夫也，惟蔡無名氏，或是闕，或卑者也。宋序齊上，孔穎達謂公孫固為大司馬，尊也。自晉以下皆稱人者，《傳例》曰：「可言公及人，不可言公及大夫，故不稱氏名也。」《左傳》以王人為王子虎，是否未可知。不日者，晉文不至，諸國皆大夫，既序其人則去其日，亦所以略之。不致，順略文。○【撰異曰】《左氏》無「公」字，《左傳》有之。陸淳《纂例》唯云《公羊》作「公會」。翟，《公羊》作「狄」，二字通用。

秋，大雨雹。雹者，陰脅陽，臣侵君之象。陽氣

之在水雨則溫熱，陰氣薄而脅之不相入，轉而成雹。【補

曰】此本劉向也。《漢書·五行志》劉以爲：「盛陽雨水，溫

煖而湯熱，陰氣脅之不相入，則轉而爲雹；盛陰雨雪，凝滯

而冰寒，陽氣薄之不相入，則散而爲霰。故沸湯之在閉器，

而湛於寒泉，則爲冰，及雪之銷，亦冰解而散，此其驗也。

故雹者陰脅陽也，霰者陽薄陰也，《春秋》不書霰者，猶月食

也。僖公末年信用公子遂，遂專權自恣，將至於殺君，故陰

脅陽之象見。臧琳曰：「范注當以此補正之。」文烝案：不

月者，蓋歷月。

冬，介葛盧來。

三十年春王正月。

夏，狄侵齊。

秋，衛殺其大夫元咺。稱國以殺，罪累

上也，以是爲訟君也。元咺訟君之罪于伯者，君忌

之，使人殺之而後入。案：宣九年陳殺其大夫泄冶，《傳》

曰：「稱國以殺其大夫，殺無罪也。」此《傳》曰：「稱國以殺

罪，累上也。」凡稱國以殺大夫，或殺無罪，或罪累上，參互

不同，略當近半。然則稱國以殺有二義：泄冶忠賢而君殺

之，是君無道也；衛侯雖有不德，臣無訟君之道，元咺之罪

亦已重矣。然君子之道，譬之于射，失諸正鵠，反求諸身，

衛侯不思致訟之愆，躬自厚之義，過而不改，而又怨忌，上

下皆失，故曰罪累上。【補曰】疏曰：「言有二義者，殺無

罪，罪全在君；罪累上，上下俱失。」文烝案：注說甚正，然

非有二義也。《傳》意里克、丕鄭父、元咺、甯喜之屬罪惡固

不可掩，而《春秋》書之，專以罪君。大夫之罪，《經》所不

論，罪累上與殺無罪，其例無異，特以里克等，究不可云

殺無罪，故謂之罪累上，非謂君子有所分別其閒，同一稱國

之文，而有二義也。此重發《傳》者，里、丕弑逆，嫌與異也。

又言以是爲訟君者，言《經》著累上之辭者，以是爲訟君故

也。訟君者致殺之由，君臣無獄，是不待言，但君而爲臣所

訟，君之失道甚矣。於此而專殺大夫，則其罪自在君上。

《春秋》之義，主於責己，不主於責人，注言「譬之於射」者是

也，故爲「累上」之文也。《傳》明言訟君，而陸淳論上執衛

侯之《傳》以爲不知有與元咺訟事，何謬之甚？衛侯在

外，其以累上之辭言之何也？待其殺而後

人也。【補曰】胡安國曰：「此《春秋》誅意之效也。」赦事

誅意，漢人語。《公羊》言稱國以殺者，君殺大夫之辭，以此

《傳》及殺陽處父《傳》觀之，較然明矣。

及公子瑕。公子瑕累也，【補曰】孔父已言

累，重發《傳》者，非以君及臣，又非必先死，嫌非延及坐及

也。以尊及卑也。【補曰】重發《傳》者，非以君及臣，

公子又是貴稱，嫌兩臣無尊卑，專是延坐，非訓與之及也。

據《左傳》元咺立瑕爲君，瑕實不成君，《經》不以爲君，與王

子朝奔楚同。

衛侯鄭歸于衛。徐邈曰：「凡出奔歸月、執歸不

月者，奔則國更立主，若故君還人，必有戰爭禍害，所以謹

其文。執者，罪名未定，其國猶追奉之，歸無犯害，故例不月。【補曰】舊爲君不言復歸者，高澍然曰：「拘於京師而歸，不書復內京師也。」高說最是。國內皆王土，言歸又言復則嫌若有外，故曹成公亦同也。曹共公特奉王命耳，本不在京師，故未復言復以見義。

### 晉人、秦人圍鄭。

介人侵蕭。【補曰】近上介兩來魯，新結親好。今

此用師，特來告魯，故得書於策。君子仍之，明《春秋》事悉如舊也。○嘗論魯之史記，書內事皆有體，書外事皆承告，不漏不蕪，最爲嚴重。至君子脩《春秋》，殺史見極，平易正直，既約其文辭矣。有并削去其事者，觀於所書，皆可互見。如公即位不書，公至不書，納幣、來納幣不書，來媵、媵他國不書，子生不書，天王不葬，內弑君不葬，內女不葬，夷狄不卒，變之三不葬，內不言戰，外不言圍邑、取邑之屬是也。若其不可以書、不書互見者則固悉書不削，用還魯史舊章。史所書亦書，雖細必載，內事如公子慙出奔齊，外事如介人侵蕭之屬是也。史所不書亦不書，雖大弗紀，內事如公子友以僖公適邾不書，外事如齊隰朋帥師會秦師納晉惠公、秦師伐晉納晉文公不書之屬是也。諸王崩皆書，而

莊、僖、頃不書，襄王之出居鄭書而入王城不書，敬王之居狄泉入成周書，而處姑舊入王城又不書，惠王之處鄭入王城則悉不書，皆因舊也。下三十二年徐邈注所謂事仍本史而辭有損益者，最爲平允得實。而陳傅良、趙汴每以《左傳》事之不見《經》者臆求聖人書不書互見之旨，則介人用師，孤文細事，《左傳》所無，《經》亦何所互見而存諸？雖有發明，適滋繳繞，學者未可以其專門鉅製而輕信之矣。

冬，天王使宰周公來聘。【補曰】周公名閱。

天子之宰通於四海。【補曰】疏曰：「復發《傳》者，前是會，此是聘，嫌異，故重發之。」

公子遂如京師，遂如晉。以尊遂乎卑，

【補曰】疏曰：「《傳》言此者，「遂」是繼事之辭，以辭有善惡，故《傳》分別明之。」文烝案：公子結以輕遂重，今公子遂以尊遂卑，明其事各異。此言不敢叛京師也。何休曰：「大夫無遂事。案：襄十二年季孫宿救台，遂入郕，惡季孫不受命而人也。如公子遂受命如晉，不當言遂。」鄭君釋之曰：「遂固受命如京師，如晉，不專受命如周，《經》近上言天王使宰周公來聘，故公子遂報焉，因聘于晉，尊周，不敢使並命。使若公子遂自往然，即云公子遂如京師，

如晉，是同周于諸侯，叛而不尊天子也。《公羊傳》有美惡不嫌同辭，何獨不廣之於此乎？「甯謂《經》同而《傳》異者甚衆，此吾徒所以不及古人也。」【補曰】葉夢得說此《經》合於《傳》義，與鄭說相發。鄭云「受命如京師如晉」者，謂本當言公子遂如京師、公子遂如晉，各爲一事，即葉云「大夫以二事行」，引盟衡雍、盟暴之文是也。鄭云「同周於諸侯，叛而不尊天子」者，謂再出公子遂，連文並書，見其並出命而並受命，則似叛京師，即葉云「疾不專於王」是也。鄭云「尊周，使若公子遂自往然」者，謂以繼事之文，別其尊卑，其義明其不敢叛，其辭則從入鄆之例，即葉云「諱爲之辭，若大夫之專事然」是也。然則此爲不敢叛，入鄆爲不受命，辭同而義異，所以不嫌者。葉氏曰「大夫之遂有曰盟、曰城、曰入者矣，聽於人則可盟，兵在己則可城可入，此遂而可得爲者也。內大夫如，皆聘也，必有禮焉，非遂之所能爲也。」案：葉氏此論最明確。《公羊》兩《傳》皆曰「公不得爲政」，蓋未達乎此。○許翰曰：「若意其遣使京師，必以有故於晉，非是則未往，說《經》者不當如是。」

三十有一年春，取濟西田。曹田。【補曰】《公羊》曰「晉侯執曹伯班其所取侵地於諸侯」，《左傳》以爲

晉分曹地予魯也。書取者，魯使人取之，據《左傳》、《國語》臧孫辰實往，是與盟宿、人杞之屬異，亦直書之者，志其事而略其人，故從卑者之文，蓋凡直書其事者有此二例矣。若祭祀蒐閱之屬，則是國之大事，其例又殊，城築浚直以其事志，則卑者尸之。

### 公子遂如晉。

夏四月，四卜郊，謂之郊者，天人相與交接之意也。不言郊天者，不敢斥尊也。昔武王既崩，成王幼少，周公居攝，行天子事，制禮作樂，終致大平。周公薨，成王以王禮葬之，命魯使郊，以彰周公之德，祭蒼帝靈威仰，昊天上帝，魯不祭。【補曰】疏曰：「范惟言天人相與交接，故謂之郊，或當亦以在南郊就陽位而祭也。」文烝案：周公薨云云者，今文《尚書·金縢》說也。此注全本何休。又《明堂位》、《祭統》並言成王賜魯郊禘，而《禮運》載孔子曰：「魯之郊禘，非禮也，周公其衰矣。」《公羊》亦曰：「魯郊非禮也。」劉敞引《呂氏春秋》「魯惠公使宰讓請郊廟之禮於天子，天子使史角往，惠公止之」，以爲魯有天子禮樂，殆周之末王所賜，非成王也。今以《穀梁》、《左氏》都不論及，姑依《明堂位》、《祭統》、《金縢》說可耳。又鄭君謂魯有郊無圜



丘，注末三句本之。郊，丘爲二，其說可從。靈威仰之說出於緯書，不可用也。《傳》曰郊享道也。貴其時，大其禮。《郊特牲》論郊曰：「郊之祭也，迎長日之至也，大報天而主日也，兆於南郊，就陽位也。」於郊，故謂之郊，萬物本乎天，人本乎祖，此所以配上帝也。郊之祭也，大報本反始也。《孝經》曰：「周公郊祀，后稷以配天。」凡卜郊皆謂卜郊日。龜曰卜，蓍曰筮。不從，【補曰】不從，不吉也。《書》曰：

「龜從筮從。」乃免牲。【補曰】牲，特性也，用騂犢。《郊

特牲》曰：「牲用騂，尚赤也；用犢，貴誠也。」《王制》曰：

「祭天地之牛，角繭栗。」猶三望。鄭君曰：「望者，祭山

川之名也。」謂海也，岱也，淮也。非其疆界則不祭。《禹

貢》曰：「海、岱及淮惟徐州。」徐，魯地。【補曰】此鄭《駁五

經異義》文，見《詩·閟宮》正義。《公羊》以爲祭大山、河、

海，鄭以淮易河。《左傳》所謂三代命祀祭不越望也。公羊

高，齊人，蓋據齊法。齊地在岱陰，又東至于海，西至于河

也。魯因郊而望，列國則無郊有望矣。賈、服、杜說《左氏》

曰：「三望，分野之星，國中山川。」何休曰：《禮》祭天牲角

繭栗，社稷宗廟角握，六宗五嶽四瀆角尺，其餘山川視卿大

夫，天燎地瘞，日月星辰布，山縣水沈，風磔雨升。燎者，取

俎上七體，與其珪寶在辨中，置於柴上燒之。」夏四月，不時也。郊，春事也。【補曰】《明堂位》曰：「魯君孟春

祀帝于郊，配以后稷。」鄭君曰：「孟春建子之月，《傳》以

子、丑、寅三月皆爲郊時，在哀元年。然則《明堂位》言其最

先所卜月耳。」《雜記》孟獻子曰：「正月日至，可以有事於

上帝。」是魯以正月爲常也。《左傳》例稱啟蟄而郊，又載孟

獻子曰：「郊祀后稷，以祈農事也。是故啟蟄而郊，郊而後

耕。」啟蟄在建寅月，是魯又以三月爲常也。竊意子月之

郊，義專報本，寅月之郊，禮兼祈穀，蓋周以冬至圜丘祭

天爲報祭，夏正郊祭天爲祈祭。魯無圜丘之祭，故但於子、

丑、寅月郊祭，通祈報爲一歟？四卜，非禮也。郊，

春事，四卜則入夏。【補曰】卜法亦在哀元年。四卜者：前

月下辛，第四卜也；十二月下辛卜正月上辛，初卜也；不從

則正月下辛卜二月上辛，二卜也；不從則二月下辛卜三月

上辛，三卜也；又不從則當於三月上辛免牲而不郊。今此

三月下辛又卜四月上辛，四卜矣，而又不從，乃於四月免牲

而不郊，故曰「夏四月，不時也。四卜，非禮也」。不時，非

禮，《經》所以書，若使卜從而以上辛郊則亦書也。免牲亦

當在上辛。不日者，何休所謂不郊則不日也。免牲者，



爲之緇衣熏裳，有司玄端，奉送至于南郊。

免牛亦然。玄端黑衣，接神之道。玄熏者，天地之色

也。南郊天位，歸之于陽也。全曰牲，傷曰牛，牛有變而不

郊，故卜免牛。【補曰】七人爲緇，玄六人，相似也。熏即

纁，赤黃色也。杜預曰：「免，猶縱也。」孔穎達曰：「縱放不

殺之也。」何休曰：「《禮》卜郊不吉則爲牲作玄衣纁裳，使

有司玄端，放之於南郊。明本爲天，不敢留天牲。」范注後

四句皆哀元年《傳》文。免牲，免牛皆先卜。乃者，亡乎

人之辭也。亡乎人，若曰無賢人也。凱曰：「其猶《易》

稱「闕其戶，闕其無人」，《詩》云「巷無居人」，譏僖公不共致

天變。【補曰】注以「亡」爲無，以「人」爲賢人，凡《傳》言「亡

乎人」者，注皆如此解之，皆非也。王引之曰：「亡，讀存亡

之亡。亡者，不在也。凡言亡乎人者，皆謂不在乎人。《荀

子》曰「制與在我，亡乎人」，與，讀爲舉。舉，皆也。言制皆

在我而不在乎人，是亡乎人爲不在乎人之證也。《管子》曰

「邪行亡乎體，違言不存口」，《莊子》曰「其在彼邪亡乎我，

在我邪亡乎彼」，《淮南子》曰「物物者亡乎萬物之中」，是

「亡乎」爲「不在乎」之證也。《禮·檀弓》曰「亡於禮者之禮

也，其動也中」，《荀子》曰「禮以順人心爲本，故亡於禮經而

順人心者皆禮也」，又曰「然則鬪與不鬪邪，亡於辱之與不

辱也，乃在於惡之與不惡也」，又曰「故治亂在於心之可，

亡於情之所欲」，又曰「吾所以得三士者，亡於十人與三十

人中，乃在百人與千人之中」，《淮南子》曰「聖亡乎治人而

在於得道，樂亡於富貴而在於得和」，是又「亡於」爲「不在

於」之證也。《詩·唐風》曰「予美亡此」，《禮·祭法》曰「有

天下者祭百神，諸侯在其地則祭之，亡其地則不祭」，《公羊

傳》曰「季子使而亡焉」，是又亡此爲不在此，亡其爲不在

其，亡焉爲不在焉之證也。」文烝案：王說是也。李光地以

爲「亡乎人」猶俗言「不由人」，意亦是也。王氏又以此年及

宣三年、成七年、十年、襄七年「亡乎人」之「人」爲指有司，

宣八年「亡乎人」之「人」爲指公子遂，則皆失之。成七年

《傳》云：「其，緩辭也。曰亡乎人矣，非人之所能也。」然則

人者對天之稱，不在乎人者在乎天也。李光地以爲「無可

柰何之意」是也。乃免牲，乃不郊，乃免牛，皆以凶變言乃，

此無可如何之事也。至黃乃復，至河公有疾乃復，皆以疾

言乃。至河乃復，亦以著有疾言乃，此又無可如何之事也。

至穀聞齊侯卒乃還，既爲善之文，雖責專命，猶從疾例，

則亦無可如何之事也。趙汭以爲不得已曰乃，即《傳》意

也。至於定、哀不敬之文，但言其備災無道，絕非國無賢君

之謂，其於「乃」字之義本不相涉，彼二《經》固無「乃」字也。凡「乃」皆亡乎人之辭，惟定十五年「乃克葬」爲急辭，彼與宣八年以「乃」與「而」二文相對爲緩急也。猶者，可以已之辭也。望，郊之細也，不郊無望可也。已，止也。【補曰】《公羊》同。注二語本《左傳》。何休曰：「譏尊者不食而卑者獨食。」

### 秋七月。

冬，杞伯姬來求婦。婦人既嫁不踰竟。

杞伯姬來求婦，非正也。【補曰】疏曰：「重發《傳》者，嫌國君之妻異，故明之。」

### 狄圍衛。

十有二月，衛遷于帝丘。帝丘，衛地。【補

曰】杜預曰：「故帝顓頊之虛，故曰帝丘。」

### 三十有二年春王正月。

夏四月己丑，鄭伯捷卒。【補曰】鄭文公也。

不葬者，棄師失民，與宋襄同例。○【撰異曰】捷，《公羊》作「接」。

### 衛人侵狄。

秋，衛人及狄盟。【補曰】何休曰：「不地者，起

因上侵就狄盟也。」杜預曰：「就狄廬帳盟。」趙鵬飛曰：「再舉衛人，侵一事也，盟一事也。」文彙案：外盟不日，此又不月者，與二十年盟邢同義。

冬十有二月己卯，晉侯重耳卒。晉自莊、

閔已前不書于《春秋》，又不言文公之人及鄭忽之殺，何乎？徐邈通之曰：「案《詩序》及《紀年》、《史記》晉昭公之後大亂五世，又鄭忽之後有子驪、子儀，且事出記傳而《經》所無殊多。誠當有不告故不書者，諸侯有朝聘之禮、赴告之命，所以敦其交好，通其憂虞，若鄰國相望而情志否隔，存亡禍福，不以相關，則它國之史無由得書，故告命之事絕則記注之文闕，此蓋內外相與之常也。魯政雖陵遲而典刑猶存，史策所錄，不失常法，其文獻之實足徵，故孔子因而脩之，事仍本史而辭有損益，所以成詳略之例，起褒貶之意。若夫可以寄微旨而通王道者，存乎精義窮理，不在記事少多，此蓋脩《春秋》之本旨。師資辯說日用之常義，故穀梁子可不復發文而體例自舉矣。」【補曰】書日者，正也。注因文公論晉事，因晉事廣說《春秋》，今更裨而足之。不

告故不書，《左傳》例如此。劉知幾《史通》曰：「《汲冢瑣語》有《晉春秋》，記獻公十七年事。」又曰：「《瑣語》、《晉春秋》載魯國閔公時事，<sup>①</sup>言之甚詳。斯則聞事必書，無假相赴。」子玄所說，未知何如。而魯史皆承赴告，其理實無可疑，君子脩《春秋》，辭有損益，事無損益，主於因辭明義，不以記事爲重。《公羊》所云「其辭則丘有罪焉」，《孟子》所云「其義則丘竊取之」，而歐陽脩以爲聖人著書，足以法世而已，故據其所得而脩之。意亦近是。至注謂魯之史策，不失常法。其說亦確，但未詳盡耳。案：《明堂位》曰：「魯王禮也，天下傳之久矣。」《左傳》昭二年晉韓起見《魯春秋》曰：「周禮盡在魯矣，吾乃今知周公之德。」賈逵注曰：「史法最備。」定四年衛祝佗言封魯公時有「備物典策」，杜預注曰：「春秋之制。」由此觀之，知魯史記事之法實有王者之禮，周公之典迥與他國不同。《傳》稱石尚欲書《春秋》，是周人亦重其記載也。

三十有三年春王二月，秦人入滑。滑，

國也。【補曰】滑，近鄭之國。將言秦人虛國，故先言滑國也。莊元年言邢、鄆、郟邑也，亦先言紀國也，文例正同

耳。《左傳》秦欲襲鄭及滑，鄭商人弦高犒其師，乃入滑而還于轅，稱師以敗也，于彭衙稱師以戰也。此稱人則師少之文，其將爲百里之子孟明視，即敗于轅之秦師也。

齊侯使國歸父來聘。

夏四月辛巳，晉人及姜戎敗秦師于轅。

【補曰】轅，晉山名。《公羊》曰：「其言及姜戎何？姜戎微也。」案：十八年伐衛，狄不言「及」而稱人，《傳》曰「進之」；又宣八年伐秦，成九年伐晉，白狄不言「及」；昭四年伐吳，淮夷不言「及」；昭五年伐吳，徐人、越人不言「及」而稱人，蓋彼從列數之文，此取以尊及卑之義也。此役晉君實親在，故不得列數。伐吳則楚子主之，故與伐衛、伐秦、伐晉同文也。疑戰不日，敗夷狄亦不日，此日者，《公羊》曰「盡也」，蓋惡晉不仁而謹之，與得臣敗狄皆爲變例。○【撰異曰】《公羊》無「師」字。轅，《公羊》本又作「着」。不言戰而言敗何也？【補曰】據例，兩夷狄曰敗，中國敗夷狄亦曰敗，餘言戰言敗，前韓後彭衙，皆同例。狄秦

①「晉」字，據商務印書館《四部叢刊》影印張鼎思本《史通》補。

也。【補曰】明在敗夷狄例，非是成敗之。其狄之何

也？【補曰】據秦稱師，非徐、狄、吳比。秦越千里之

險，【補曰】謂襲鄭。入虛國，滑無備，故言虛國。進

不能守，退敗其師，【補曰】疏曰：「舊解進不能守謂

入滑而去，退敗其師謂敗于穀。」王引之曰：「疏又云『本或

別進字』者，疏文『別』字下脫一『有』字，蓋疏所據本無『進』

字，其舉《傳》句亦無『進』字。又記別本有『進』字者，於後

也，當從疏所據正本無『進』字爲是。」徒亂人子女之

教，無男女之別，【補曰】《史記·趙世家》扁鵲云「秦

穆公曰帝告我，霸者之子且令而國男女無別」，又云「襄公

敗秦師於穀而歸縱淫」，《扁鵲傳》亦同，《傳》所云即其事

也。疏以亂人子女爲入滑之時縱暴亂，非也。秦之爲

狄，自殺之戰始也。明秦本非夷狄。【補曰】如上所

云，皆狄道也，故自殺戰狄秦則遂以秦爲狄。秦爲狄者，穆

公卒，康公始卒，至惠公而後日，是準諸滕、楚、莒、吳諸

國爲狄文也。孫覺曰：「《春秋》書敗秦師則甚秦之惡而狄

烝案：《荀子》曰《春秋》賢繆公，以爲能變，即《公羊》文

十二年「秦伯使遂」《傳》語。而《公羊》又曰：「其爲能變奈

何？惟譏諷善諍言，俾君子易怠。而況乎我多有之，惟一

介斷斷焉無他技，其心休休，能有容，是難也。」數語皆用

《秦誓》文。然則賢繆公能變者，乃推《尚書》錄《秦誓》之意

以說《春秋》，而《春秋》實無是義，《書》記言，《春秋》記事，

各不相同。《公羊》亂其家法，而《左氏》則美穆公用孟明，

尤流俗之論也。秦伯將襲鄭，【補曰】何休曰：「輕行

疾至，不戒以入。曰襲，此下追敘上年事。」百里子與蹇

叔子諫曰：【補曰】百里子，百里奚也。《左傳》無百里

奚諫，下哭師送子亦獨蹇叔耳。《音義》曰：「百，或作

「伯」。『千里而襲人，未有不亡者也。』秦伯

曰：「子之冢木已拱矣。何知？子之輩皆已老

死矣。拱，合抱也。言其老無知。師行。【補曰】《公羊》

曰「師出」，此亦當爲「出」，涉下「師行」而誤。或云上謂始

行，下謂遂行。百里子與蹇叔子送其子而戒之

曰：【補曰】百里奚之子孟明視也。同時爲帥者又有西乞

術、白乙丙，俱見《左傳》。《左傳》又曰「蹇叔之子與師」，

《史記》以爲西乞、白乙皆即蹇叔之子。《呂氏春秋》又謂蹇叔子曰申與視，高誘以申爲白乙丙也。女死必於殽之巖險之下，其處險隘，一人可以要百人。我將尸女於是。」尸女者，收女尸。【補曰】二句相屬爲義。險者，「崦」之借字。《音義》曰：「本或作『崦』。」《說文》曰：「巖，厓也。」崦，山之岑崦也。厓者，山邊。岑者，山小而高。《廣雅》曰：「岑崦，高也。」《公羊》作「欽巖」，《楚辭·招隱士》「欽」、「崦」二字並出。《左傳》曰：「晉人禦師必於殽，殽有二陵焉。其南陵夏后皋之墓也，其北陵文王之所辟風雨也，必死是閒，余收爾骨焉。」二陵即《傳》巖崦之下也。「必死是閒，余收爾骨」即《傳》之死必於巖崦之下，尸女於是也。何休說《公羊》，杜預說《左氏》皆以爲其處深阻險隘，故料其必死於此。范注本之。王引之曰：「皆非也。言女必在此閒戰死，不可在他處，吾將於此收女尸。死有定所，乃可收也。《呂氏春秋》蹇叔謂其子曰『女死不於南方之岸，必於北方之岸，爲吾尸女之易』是其證也。」師行，百里子與蹇子叔隨其子而哭之，秦伯怒曰：「何爲哭吾師也？」二子曰：「非敢哭師

也，哭吾子也。我老矣，【補曰】依《孟子》書百里奚去虞入秦，年已七十，時虞未滅也，至此蓋年百歲餘。彼不死則我死矣。」畏秦伯怒，故云彼我要有死者。晉人與姜戎而要而擊之殽，【補曰】要，遮也，明在疑戰例，又非是成敗之。匹馬倚輪無反者。倚輪，一隻之輪。【補曰】倚，唐石經初刻作「奇」。嚴可均曰：「《漢書·五行志》引此作『綺』。」服虔曰：「綺，音奇偶之奇。」師古曰：「綺，隻也。」則漢世《穀梁》本是「綺」字，後省「角」旁直作「奇」。《音義》：「奇，居宜反，或於綺反。」是陸所據范本作「奇」或作「倚」也。文烝案：《方言》曰：「倚，綺，奇也。自關而西，秦、晉之間，凡全物而體不具謂之倚，梁、楚之間謂之綺。」《公羊》作「隻輪」，何休曰：「隻，綺也。」明諸字俱通。何又曰：「皆喻盡。」晉人者，晉子也。【補曰】別姜戎言及，又下危文公葬，足明襄公親之。《傳》言「晉子」，爲踰年未葬稱子之明文，亦侵伐稱子之著例。其曰人何也？【補曰】晉是霸國，言戰言敗雖非君，猶宜稱師。微之也。何爲微之？不正其釋殯而主乎戰也。【補曰】劉向《說苑》曰：「好戰之臣不可不察也，羞小

恥以搆大怨，貪小利以亡大衆，《春秋》有其戒，晉先軫是也。先軫欲要功獲名，則以秦不假道之故請要秦師，襄公聽先軫興兵，要之殺擊之，匹馬隻輪無脫者，大結怨搆禍於秦，接刃流血，伏尸暴骸，糜爛國家，十有餘年，卒喪其師衆，禍及大夫，憂累後世。《漢書·五行志》劉向以爲晉不惟舊而聽虐謀，結怨彊國，四被秦寇，禍流數世。惠士奇曰：「秦、晉自殺之後，兵連不息，秦遂合於楚，卒爲晉患，故《春秋》於殽戰狄秦而微晉，交譏之。晉不敗秦，何害於霸而汲汲焉背殽要秦哉？」孔廣森曰：「下《經》曰『癸巳葬晉文公』，諸侯之禮，遞朝五廟，先葬五日而啟，自辛巳以迄癸巳十二日耳，則是時已當戒啟期矣，乃釋哀廢禮。佳兵造孽，不臣不子，孰此爲甚？」

癸巳，葬晉文公。日葬，危不得葬也。

【補曰】危者，危晉襄背殽用兵。文爲霸主，又異於齊桓緩葬，故特發《傳》，以明同義。

狄侵齊。

公伐邾，取訾樓。【補曰】不致者，伐而取惡事

也。○【撰異曰】樓，《左氏》作「婁」。《公羊》作「取叢」，亦作「取敢」。徐彥疏曰：有「作」鄒「字者」。孔廣森曰：「鄒，

即「訾婁」之合聲，猶壽夢爲「乘」，「句瀆」爲「穀」是也就作「叢」、「敢」字亦當讀如「鄒」，叢與諷、嘔等字並从取，古諧聲本同。」

秋，公子遂帥師伐邾。

晉人敗狄于箕。箕，晉地。【補曰】晉不稱師以敗之者，以敗夷狄，故略之也。言敗不言戰，例在成十二年《傳》。何休曰：「不月者，略微者與夷狄也。」案：當專是略夷狄。

冬十月，公如齊。【補曰】孔廣森曰：「月者，蓋

公有疾而行，故危之。」

十有二月，公至自齊。【補曰】月者，爲下

薨日。

乙巳，公薨于小寢。小寢，非正也。小

寢，內寢，非路寢。【補曰】范以小寢爲內寢，本杜預經注。

《左傳》曰：「即安也。」服虔曰：「小寢，夫人寢也，譏其近女室。」杜亦曰：「夫人寢也，譏公就所安，不終於路寢。」疏曰：「《傳》發此例者，以隱，閔不地，桓公非正，今僖公雖好卒而沒於婦人之手，故發《傳》以惡之。」楊亦謂是夫人之正寢也。《左傳》八年「夫人不薨于寢則不殯于廟」，服虔曰：

「寢，謂小寢也。」案：《周禮》：「宮人掌王之六寢之脩。」鄭君注曰：「路寢一，小寢五。」又引《玉藻》：「路寢聽政，小寢釋服」之文，斷之云「是路寢以治事，小寢以時燕息焉」。又引《春秋》：「薨于路寢」、「薨于小寢」之文，斷之云「是則人君非一寢明矣」。然則鄭意以僖所薨之小寢爲君之燕寢，不以爲夫人正寢。

**隕霜不殺草。**京房《易傳》曰：「君假與臣權，隕霜不殺草。」補曰：劉向以爲今十月，周十二月。於《易》五爲天位，爲君位，九月陰氣至五，通於天位，其卦爲剝，剝落萬物，始大殺矣。明陰從陽命，臣受君令而後殺也。今十月，隕霜而不能殺草，此君誅不行，舒緩之應也。**未可殺而殺，舉重也。可殺而不殺，舉輕也。**重，謂菽也。輕，謂草也。輕者不死，則重者不死可知。【補曰】《傳》合定元年爲說。《韓非子》曰：「魯哀公問於仲尼曰：『《春秋》之記曰：『冬十二月實霜不殺草。』』」【眉批】：「草，今本誤『菽』。何爲記此？」仲尼對曰：「此言可以殺而不殺也。夫宜殺而不殺，桃李冬實，天失道，草木猶犯干之，而況於人君乎？」王應麟曰：「以《論語》『焉用殺之』言觀之，乃法家者流託聖言耳。」文烝案：胡安國疑其與宰我戰栗之

對相似，王氏因有此論，但《韓非》後五句或非夫子之言，而前數語問答當實有之，正《穀梁》所本見「不」字之通例。

**李梅實。**京房《易傳》曰：「從叛者茲謂不明，厥妖

木冬實。」補曰：劉向以爲周十二月，今十月也，李梅當剝落，今反華實，近草妖也。先華而後實，不書華，舉重者也。陰成陽事，象臣顓君作威福。董仲舒引記曰：「不當華而華，易大夫，不當實而實，易相室。」孔廣森曰：「此於《洪範》五行屬木不曲直。《五行傳》曰：田獵不宿，飲食不享，出入不節，奪民農時及有姦謀則木不曲直。」實之爲言，猶實也。實，子。【補曰】注解上「實」字也。李梅子中有核人，於植物中屬覈物也。【眉批】：「覈即「核」字。」下「實」字是名實、虛實之實，與孫字同意。

晉人、陳人、鄭人伐許。

## 春秋文公經傳第五補注第十三 文公，僖公

子，《史記》名興。母聲姜。以襄王二十六年即位。

穀梁 范氏集解 鍾文烝詳補

元年春王正月，公即位。繼正，即位，正

也。繼正，謂繼正卒也。隱去即位以見讓，桓書即位示安

忍，莊、閔、僖不言即位，皆繼弑。【補曰】杜預曰：「先君未

葬而公即位，不可曠年無君。」文烝案：《公羊》言一年不二

君，不可曠年無君，杜用爲說。踰年未葬得稱公者，自己國

臣民稱之，成、定並同。李賢《後漢書》注引《穀梁傳》曰：

「承明繼體則守文之君也。」《傳》無此文，蓋後學者說《傳》

語，在《外傳》及《章句》中。

二月癸亥，日有食之。○【撰異曰】《公羊》作

「癸亥朔」，王引之據《漢書·五行志》以爲「朔」是衍字。師

古注《劉向傳》所引已衍。案：陸淳《纂例》所據本、唐石經

本皆誤衍。

天王使叔服來會葬。《傳例》曰：「天子、大夫

稱字，蓋未受采邑，故不稱氏。字者貴稱，故可獨達也。」

【補曰】《左傳》曰「內史叔服」，《周禮》內史中大夫一人，下

大夫二人，叔服蓋下大夫也。注引稱字例在定十四年

《傳》，依後王子虎卒《傳》前一說，則叔服本王子，不以王子

氏，蓋省文也。此事在時例。葬曰會，言會，明非一人

之辭。其志，重天子之禮也。諸侯喪，天子使大夫

會葬，禮也。【補曰】此本《公羊》、杜預也。疏後一說，此釋

得書所由。五年《傳》解會葬之處，二者互言之。文烝案：

此不獨互言也。《傳》文至簡，每以一《傳》包前後《經》文，

此以天子使人會葬爲重，則以知諸侯使人會葬爲恒事也。

以會葬僖公爲重，則以知凡公與夫人之喪，天子使人含贈

之等皆爲恒事也。又以知贈仲子、含贈成風志者亦爲重

也，又以知會葬成風志者尤爲重也。若然，《傳》於贈仲子

言不及事，於含贈成風言兼事不周事，又別爲解者，彼二文

又兼有是義，《傳》但就一邊言之也。諸侯之禮有志者，邾、

滕之奔喪會葬則以君親來志也，秦穆成風則與贈仲子略同

也，亦皆重之之義。

夏四月丁巳，葬我君僖公。薨稱公，舉



上也。葬我君，接上下也。僖公葬而後舉謚，謚所以成德也，於卒事乎加之矣。【補曰】疏曰：「重發《傳》者，桓不以禮終，僖則好卒，二者既異，故《傳》詳之。」

天王使毛伯來錫公命。毛，采邑。伯，字也。

天子上大夫也。【補曰】亦不知爲上、爲中。此事蒙上月。

○【撰異曰】錫，《左氏》、《唐石經》及宋本作「賜」，段玉裁曰：

「非也。」禮有受命，無來錫命，錫命非正也。

【補曰】疏曰：「重發《傳》者，桓薨後見錫，此即位見錫，嫌其得正，故《傳》發之。」劉敞據韓嬰《詩傳》及鄭君《詩箋》說，以爲嗣君三年喪畢以土服見於王，王於廟命之，錫之黻冕圭璧。文公喪未畢而命之，成公喪既畢而不受命於天子，皆非禮。何休以爲古者三載考績，三考黜陟幽明。文公新即位，功未足施而錫之，非禮也。何氏自據九錫爲說。

晉侯伐衛。

叔孫得臣如京師。【補曰】叔孫得臣，公子牙孫

莊叔。《左傳》曰：「如周拜。」

衛人伐晉。

秋，公孫敖會晉侯于戚。禮：卿不得會公

侯，《春秋》尊魯，內卿大夫可以會外諸侯。戚，衛地。【補

曰】注首句本《左氏》盟翟泉《傳》。彼《傳》曰：「在禮卿不會

公侯，會伯子男可也。」杜預曰：「大國之卿當小國之君，故

可以會伯子男。」文烝案：此《左氏》一家之言，未可用也。

《注》末句即下年盟垂斂《傳》文，又加一「卿」字。其實《傳》

之大夫即卿也。《傳》不於柔會宋公、陳侯發例，又不於此

發例者，隨意而發，非有深義。疏曰：「《傳》以伯者至尊，

不可云得會。」非也。

冬十月丁未，楚世子商臣弑其君髡。鄭

嗣曰：「商臣，繆王也。髡，文王之子成王也。不言其父而

言其君者，君之於世子有父之親，有君之尊，言世子所以明

其親也，言其君所以明其尊也，商臣於尊親盡矣。【補曰】

鄭嗣注本何休。何云：「言君者所以明有君之尊，又責臣

子當討賊也。」此刪一句，不如本文爲善，末句增足，淺贅。

髡之被弑，爲其欲黜世子。○【撰異曰】髡，《左氏》作「頽」。

日髡之卒，所以謹商臣之弑也。夷狄不言正

不正。徐乾曰：「中國君卒，正者例日，篡立不正者不日，

夷狄君卒皆略而不日，所以殊夷夏也。今書日，謹識商臣

之大逆爾，不以明髡正與不正。【補曰】此與成九年莒潰同意，此謹無父，彼謹無君也。《孟子》曰：「無父無君是禽獸也。」程子曰：「禮一失則爲夷狄，再失則爲禽獸，愚觀穀梁兩《傳》，而知聖人有憂之也，是故中國詳之，夷狄略之，中國也而夷狄則亦略之，夷狄也而禽獸乃更詳之，文相錯而義相成也。是故夷狄之辭，無時而可同中國者也，君臣父子之教，有時而不論，中國夷狄者也。推之全《經》而皆通，俟之百世而不惑。」

### 公孫敖如齊。

二年春王二月甲子，晉侯及秦師戰于彭衙，秦師敗績。彭衙，秦地。【補曰】李光地曰：「敗秦師于殽，罪秦也。及秦師戰敗績，稍恕秦也。」文烝案：此戰甲子，邲戰乙卯，戰以喪禮處之，故子卯不避。○【撰異曰】衙，《公羊》或作「牙」。

丁丑，作僖公主。作，爲也，爲僖公主也。爲僖公廟作主也。主，蓋神之所馮依，其狀正方，穿中央，達四方。天子長尺二寸，諸侯長一尺。【補曰】《公羊》曰「爲僖公作主」，故何《注》加一「廟」字解之，范襲之，

非也。「狀正方」以下亦本何休也。徐彥謂皆《孝經說》文。孔廣森曰：「案：《山海經》曰「桑封者，桑主也，方其下而銳其上，而中穿之，加金，主之有穿」，此其足證者。覲禮：設方明以依神，方明以木爲之，方四尺而設六玉。」鄭君曰：「設玉者，刻其木而著之，若然，六面皆刻而午貫相通，其所謂穿中央達四方者歟？設玉加金事亦同矣，蓋古主之遺象。」疏曰：「糜信引衛次仲云，宗廟主皆用栗，右主八寸，左主七寸，廣厚三寸。若祭訖，則內於西壁垅中，去地一尺六寸。右主謂父也，左主謂母也。」范注與何休、徐邈同，與衛氏異。其藏之也，《白虎通》亦云藏之西壁，或如衛說。去地高下則無文以明之。文烝案：糜所引衛宏說，據《漢舊儀》，則帝主九寸，后主七寸，藏太室西壁垅中，祭則設座於垅下。立主，【補曰】說正禮。喪主於虞，禮：平旦而葬，日中反而祭，謂之曰虞，其主用桑。【補曰】虞，安也，以安神。天子九虞，諸侯七，卿大夫五，士三。既處，埋重於道左而有主。吉主於練，期而小祥，其主用栗。【補曰】疏曰：「案：莊公之喪已二十二月，仍譏其爲吉禘，今方練而作主，猶是凶服。而曰吉主者，三年之喪，至二十五月猶未合全吉，故公子遂有納幣之譏。莊公喪制未二十五月

而禘祭，故譏其爲吉。此言吉者，比之虞主，故爲吉也。此雖爲練作之主，終入廟以辨昭穆，故《傳》以吉言之。」文烝案：《檀弓》曰：「殷練而祔，周卒哭而祔，孔子善殷。」夫隋祔於祖必有主，主必爲吉主，明周之吉主，卒哭作之，故《左傳》例曰，凡君薨，卒哭而祔，祔而作主。而舊說解此句爲「喪主」，失其實也。此《傳》及《公羊》皆至練時作主，似據殷制，或者殷、周之禮，諸侯得通用。抑或《魯》有王禮，避周從殷，皆未可知矣。《注》「用桑」、「用栗」，皆本《公羊》。何休曰：「夏后氏以松，殷人以柏，周人以栗。」杜預亦同，但不說夏耳。何休又曰：「埋虞主於兩階之間，易用栗也。」虞用桑者，桑猶喪也，取其名與其羸恤，所以副孝子之心。練用栗者，取其戰栗謹敬。《禮·士虞記》曰：「桑主不文，吉主皆刻而謚之。」蓋爲禘祫特別昭穆也。疏曰：「徐邈注盡與之同，范亦當不異。」孔廣森據《五經異義》載《公羊》及《禮》戴說，虞主埋於堂兩楹之間，又一說埋之於廟北墉下，以爲何氏所稱非師說。

**作僖公主，譏其後也。**僖公薨至此已十五日。【補曰】蓋是時練祭後期歟？《公羊》曰：「欲久喪而後不能也。」何休以爲文公亂聖人制，欲服喪三十六月，十九月作練主，又不能卒竟，故以十

五月。作主壞廟有時日，於練焉壞廟，禮：親過高祖則毀其廟，以次而遷。【補曰】注以「毀」訓「壞」，非也。脩壞曰壞，猶捫汙曰汙，治亂曰亂，古人語如此。所脩之廟謂死者祖之廟，於今君爲曾祖，即他日之新宮也。必脩之者，練之明日，當以所作主祔於此廟。據《士虞禮記》、《檀弓》「卒哭而祔」者，以祭之明日，知練而祔者亦以祭之明日也。既祔，仍以其主復於寢，即《左傳》所謂「特祀於主」。鄭君《士虞記》注曰：「凡祔已，復於寢，如既祫，主反其廟。」是也。《曾子問》曰：「當七廟五廟無虛主，虛主者，惟天子崩，諸侯薨與去其國，與祫祭於祖爲無主耳。吾聞諸老聃曰：『天子崩，國君薨，則祝取群廟之主而藏諸祖廟。』」禮也。卒哭成事而後主各反其廟。推此知練而祔者，練而各反廟，廟無虛主，又無二主，則各主皆如舊，而所祔新主之復於寢必也。迨大祥禫後，三年喪畢，然後今君高祖之父遷。依《公羊》馮君《章句》則遷廟之主藏於大祖大室北壁中，既遷則謂之毀廟，乃以曾祖之主遷焉，而新主遷於曾祖之處謂之新宮。《大戴禮》有《諸侯遷廟篇》，即喪畢遷主新宮之禮，其末云「擇日而祭」，蓋即閏二年《傳》、《士虞記》之吉祭或禘或祫者也。朱子據《遷廟篇》君臣皆玄服，明其爲除喪而遷。張履又據君臣皆乘車，且有「出入門及大溝

渠」之文，明其爲從寢之廟，其說皆是也。自來說《穀梁》者皆以壞廟爲毀廟，則與《大戴》之《遷廟》相混，鄭君《士虞記》注、盧辯《遷廟篇》注、孔穎達《王制》正義、賈公彥《周禮·鬯人》疏遂謂自寢遷廟在練時。楊氏疏曰：「作主在

十三月，壞廟在三年喪終，而《傳》連言之者，此主終入廟，入廟即易檐，其事相繼，故連言之，非謂作主壞廟同時也。或以爲練而作主之時則易檐改塗，故此《傳》云「於練壞廟」，於《傳》文雖順，舊說不然，故不從之，直記異聞耳。」至朱子則曰：「《穀梁》言壞舊廟，不言遷新主，安知其非於練而遷舊主，於三年而納新主邪？」朱子此語可謂破的，但其言壞舊廟遷舊主亦沿舊解之誤。張履作《毀廟論》、《祔祭論》，知《穀梁》所言爲殷制，然亦但謂毀廟非遷廟。竊以毀廟者，名有廢除，事殊墮壞，且《穀梁》不應此句說遠廟而下文說新宮，其不可通也甚矣。壞廟之道，易檐可

也，改塗可也。將納新神，故示有所加。【補曰】范此解可用。練之明日祔，亦得云納新神也。檐，屋榜聯也。《說文》檐爲槐，槐爲栢，栢爲楣，楣爲秦名屋榜聯。齊謂之戶，楚謂之栢。何休說新宮云「易其西北角」。塗者，聖飾壁，禮所謂白盛也。兩言可者，略辭。《大戴禮》有《諸侯饗

廟篇》，成廟，饗之以羊，君臣亦皆玄服，與《遷廟篇》相次，彼時事多，練則略矣。易檐改塗爲壞廟之道，則壞爲脩壞，而廟指新宮甚明。

### 三月乙巳，及晉處父盟。晉大夫陽處父。

不言公，處父伉也。【補曰】疏曰：「重發《傳》者，高倭存氏，處父去族，嫌異，故重發之。」爲公諱也。諱公與大夫盟，去處父氏。公親如晉，使若與其君盟，如《經》言祁儀父矣。不書地者，公在晉也。莊二十二年秋七月丙申，及齊高倭盟于防，不去高倭氏者，公不親如齊，不與其君盟，於恥差降。【補曰】爲公諱者，釋《經》去處父氏與《公羊》同也。去氏所以爲諱者，卑者以國氏，既不言公，則若內卑者與外卑者盟，是全乎諱也。如晉與大夫盟較莊之盟防，其恥尤甚，故爲之諱，亦緣盟既書日，不嫌非公，得以成其諱文，故下文遂云：「何以知其與公盟？」以其日也。」注謂若祁儀父，本何休說，頗迂曲，宜刪去「公親如晉」三句。何以知其與公盟？【補曰】問《經》文何以見之？以其日也。【補曰】存日以見公盟。何以不言公之如晉？所恥也。【補曰】盟於晉都而晉君不出，卑公已

甚，是所恥也。出不書，反不致也。【補曰】出不言公如，故反亦不致，皆諱恥也。既以去大夫氏爲諱出，反又諱者，諱莫如深也。不地而存日則有所見矣，故諱恥從深。

夏六月，公孫敖會宋公、陳侯、鄭伯、晉士穀盟于垂斂。垂斂，鄭地。【補曰】不日者，蓋以盟

事可惡，如祝、柯之例歟？或以霸國大夫盟數國之君始於此，與齊高偃又不同，故特變其例以示異。《左傳》稱士穀爲司空，晉司空非卿，以爲能堪卿事，故書。○【撰異曰】

穀，本又作「穀」，唐石經作「穀」，《左氏》、《公羊》作「穀」，《左》亦又作「穀」。斂，《左氏》作「隴」，徐彥《公羊》疏曰：「《左氏》作「垂隴」。內大夫可以會外諸侯。【補曰】

言可者，時既多有其事，《春秋》別內於外，異其辭耳。《傳》特發此，又明外大夫不可也。或《傳》欲以此意明此盟不日之義，故不於上年會戚發之。唐石經無「外」字。

自十有二月不雨，至于秋七月。建午之

月，猶未爲災。【補曰】杜預曰：「周七月，今五月也，不雨足爲災，不書旱，五穀猶有收。」文烝案：不雨之文不在七月下者，雨而後書不雨，則七月雨矣，其文不得在下。胡安國、程端學說皆非也。《月令》正義引鄭君《釋廢疾》曰：「春

秋《凡書二十四旱》，《考異郵》說「分爲四部」，各有義焉。孔廣森曰：「今檢《經》實二十六旱，凡大雩十九，大旱二，不雨二，歷時不雨加自文者三，是爲四部。昔夏侯勝以《洪範》諫昌邑王曰「天久陰而不雨，臣下有謀上者」。文公之篇書久不雨者三，卒致仲遂逆謀，嗣子遭禍，此其效也。」文烝案：《漢書·五行志》曰「皇極之常陰，劉向以爲《春秋》亡其應，一曰久陰不雨」是也，孔因附成爲說。歷時而言不雨，文不憂雨也。僖公憂民，歷一時輒書不雨，今文公歷四時乃書，是不勤雨也。不憂雨者，無志乎民也。無恤民志。【補曰】言《春秋》以爲無志也。疏曰：「莊三十一年冬不雨，不發《傳》者，以一時不雨輕故也。下十年，十三年意亦與此同，故十三年省文不發。」

八月丁卯，大事于大廟，躋僖公。大事，禘

也。時三年之喪未終而吉祭於大廟，則其譏自明。【補曰】疏曰：「杜預言「其譏已明」，謂前已書吉，則此亦同譏。范云「其譏自明」，謂不待譏責，其惡足顯。」文烝案：何休曰：「不言吉禘者，就不三年不復譏，略爲下張本。」又案：躋僖公亦遂以爲常，不言初者，定篇有從祀文，不須加初，從可知。○【撰異曰】躋，《周禮·大宗伯》注引作「躋」。

大事者何？大是事也，著禘嘗。禘，合也。嘗，

秋祭。【補曰】《公羊》曰：「大事者何？大禘也。大禘者何？合祭也。」蓋未知禘嘗之說。禘嘗者，禘而兼嘗，謂先禘而後嘗也。《詩·魯頌》曰「秋而載嘗」，《毛傳》曰：「諸侯夏禘則不禴，秋禘則不嘗，唯天子兼之。」毛謂諸侯之禘禘當廢五廟一時之祭，魯則禘而兼嘗，不廢時祭，乃天子之禮，故特言秋而載嘗，即《傳》禘嘗之說也。禘而兼嘗則不得直書禘，以其是天子禮，故特大是事以著之。言著禘嘗者，申上「大是事」一句意也。《傳》與《毛傳》多通，此文宜以毛爲證。何休云：「《禮》天子特禘特禘，諸侯禘則不禴，禘則不嘗。」與毛亦同也。禘當行於周之夏，而魯之中葉，禘無常月，不兼行時祭。禮：惟八月之禘嘗爲宗廟極盛之祭，故《詩·頌》僖公但言嘗不言禘，而《春秋》禘不書大事也。《祭統》言成王、康王賜魯外祭郊社，內祭大嘗禘，以一「大」字貫嘗禘二文。大禘即《明堂位》之六月禘，大嘗則《明堂位》所未備，即此《傳》禘嘗也。《祭統》前舉夏殷之時祭，春約夏禘，秋嘗冬烝，又詳言禘嘗之義，篇末乃言大嘗大禘，既以承前文，又以別前文也。此祭在八月，而《國語》以爲蒸，韋昭謂用冬祭之禮，乖謬不可據也。崔靈恩曰：「禘以秋者，以合聚群主，其禮最大，必秋時萬物成熟，大合

而祭之。禘者，合也。《說文》曰：「禘，大合祭先祖親疏遠

近也。」禘祭者，毀廟之主陳于大祖，未毀廟之主皆升，合祭于大祖。禘祭者，皆合祭諸廟已毀

未毀者之主於大祖廟中，以昭繆爲次序，父爲昭，子爲繆。

昭南鄉，繆北鄉，孫從王父坐也，祭畢則復還其廟。【補曰】

此約何休注文。何休曰：「大祖，周公之廟。陳者，就陳列

大祖前。大祖東鄉，昭南鄉，繆北鄉，其餘孫從王父。父曰

昭，子曰穆，昭取其鄉明，穆取其北面，尚敬，自外來曰升。」

文烝案：周公爲魯大祖，周則后稷歟？或曰后稷爲始祖，

文王爲大祖，蓋非也。《通典》引《逸禮》曰「禘祭七尸」。

《公羊》「合祭」作「合食」，又繼之曰「五年而再殷祭」。韋玄

成、劉向以來，皆言三年禘，五年禘，《通典》引徐邈曰「五年

再殷，凡六十月中，分每三十月殷」，徐說非也。禘以夏，禘

以秋，由禘而禘纔二十餘月，已踰二年，故言三年禘。由禘

而禘，有三十餘月，距前禘凡六十月，爲五年也。禘與禘其

禮略同，所以異於禘者，王肅《聖證論》引《禘于大廟》逸禮

云「其昭尸穆尸，其祝辭總稱孝子孝孫」，又云「皆升合於大

祖」。《通典》引《禘于大廟禮》「毀廟之主升合食而立二

尸」，又云「獻昭尸如穆尸」，又云「毀廟之主，昭共一牢，穆

共一牢」。又引韓嬰《詩傳》云：「禘取毀廟之主，皆升合食於大祖。」又劉向《五經通義》云：「禘者，諦也。取已遷廟主，合食大祖廟中。」據此諸文，知禘不及未毀廟主。《春秋》經傳多直云禘于某公，知未毀廟皆特禘，但如世室武宮之等。親盡而廟不毀，親盡則必就大廟昭穆之列，不毀則又比親廟特禘之禮也。禮以「禘于大廟」名篇，亦兼見親廟等之特禘，故祝辭兼稱孝子。《周頌》序，《離》「禘大祖」，大祖謂后稷，其文言孝子、言皇考、言烈考文母，蓋亦據親廟二桃言。或《序》之大祖，實指文王歟？何休以爲禘異於禘者，功臣皆祭。案：《周禮》有「功祭于大烝」，何說非也。○禘之名亦多矣，《五經異義·左氏》說「歲禘及壇墠，終禘及郊宗石室」。歲禘似是歲一禘，或是禘以歲計，即三歲之殷祭，而皆與《通典》引劉歆、賈逵所言之禘不同。又《左傳》大夫亦有殷祭，據《大傳》言「大夫士有大事，省於其君，于禘及其高祖」，是大夫士殷祭亦名禘也。又時祭亦有稱禘者，《王制》曰「天子植杓，禘禘禘嘗禘烝，諸侯杓植，禘一植一，禘嘗禘烝禘」，彼舉夏、殷四時祭名，而植禘之文或上或下，禘與植對，不專祭稱，但以其合祭親廟主於大廟亦謂之禘。其實《穀梁》之禘嘗謂禘而兼嘗，《王制》之禘嘗謂於嘗則禘。《穀梁》之禘，三歲一禘；《王制》之禘，一歲三禘，

二祭截然不同。《曾子問》言「禘祭於祖，則祝迎四廟之主」，渾言禘祭則二祭得兼包也。又《士虞記》古文「始虞之祭謂之禘事」，鄭君曰「以與先祖合爲安」。此則殷禘、時禘之外更有禘名也。躋，升也。【補曰】《公羊》、《爾雅》同。《爾雅》作「陞」。先親而後祖也，逆祀也。舊說僖公，閔公庶兄，故文公升僖公之主於閔公之上耳。僖公雖長，已爲臣矣，閔公雖小，已爲君矣，臣不可以先君，猶子不可以先父，故以昭穆父祖爲喻。甯曰：「即之於《傳》則無以知其然，若引《左氏》以釋此《傳》，則義雖有似而於文不辨。高宗，殷之賢主，猶祭豐于禩，以致雉雊之變，然後率脩常禮。文公僭倒祖考，固不足多怪矣。親謂僖，祖謂莊。【補曰】疏曰：「親謂僖，祖謂閔，僖繼閔而立，猶子之繼父，故以昭穆祖父爲喻，此於《傳》文不失。而范謂莊爲祖，其理非也。」文烝案：《傳》以祖父爲喻，當如舊說及疏，若下文昭穆之說則依段氏說爲順，見閔二年。又論於下。逆祀則是無昭穆也。【補曰】閔爲穆，僖則昭也。逆者，謂升僖於穆，北面西上，閔繼而東，并同爲穆，是無宗廟昭穆之禮。《國語》亦曰「非昭穆也」。兄弟所以異昭穆者，以受國爲人後爲重，既異昭穆，即與父子相繼無



異。僖雖不禰閔，而閔世次當考廟，於僖有禰道，故文雖不祖閔而閔世次當王考廟，於文有祖道。上文以僖爲親，閔爲祖，而《左氏》曰「子不先父」，《公羊》曰「先禰後祖」，其說逆祀，皆與《傳》同，由其相爲昭穆，故舉以相喻也。此說詳具於後漢周舉議奏。賈公彥《周禮·家人》疏、劉敞《爲兄後議》、趙汭《左傳補注》、當代通人萬斯同、金榜、段玉裁、孔廣森等皆所依用。范引舊說謂升僖於閔上者，即何休說也。何休云「升，謂西上」，惠公與莊公當同南面西上，隱、桓與閔、僖當同北面西上，繼閔者在下，緣僖爲庶兄，置於閔上，是未思兄弟同昭穆之說，於三《傳》、《國語》實不可通也。無昭穆則是無祖也，【補曰】此祖謂大祖也，昭穆相繼，皆承大祖之統。無祖則無天也，祖，人之始也，人之所仰天也。【補曰】天者，祖之所自出，非以祖爲天也。古人稱王者天，大祖亦謂配天，范因致誤。故曰文無天，【補曰】文無天，猶言隱十年無正、桓無王、桓無會、定無正也，此指下五年《經》王使不稱天而言。劉逢祿說《公羊》引《傳》此數語亦如是解之。《春秋》言天之文，唯施於王，一言天子，義亦不異，大祭大變，都不斥言，故知文公無天，指彼二文明矣。言故曰者，是聖門相承之說。無

天者是無天而行也。【補曰】此猶釋隱十年無正曰隱不自正，釋桓無王曰無王之道，遂可以至，釋定無正曰定之始，非正始。曰，見無以正也，明彼《經》著無天之文者，是見文公之無天而行也。自「逆祀則是」以下極論躋僖之惡，以解無天之文，明爲《春秋》所深惡也。《五經異義》「從《左氏》說爲大惡，不從《公羊》、董仲舒說爲小惡」是也。昭穆祖天，遞推而上，亦莊三年《傳》母子天子之義也。又嘗論之，《禮器》：「孔子曰：『臧文仲安知禮？夏父弗綦逆祀而弗止也。』」《左傳》載之，謂文仲「縱逆祀」，不知彼文論魯事，故無禮不知者臧孫罪也。《春秋》書王法，故無天者文公惡也。君子不以親親害尊尊，此《春秋》之義也。尊卑有序，不可亂也。【補曰】親親者，僖於閔爲兄，於文爲父，宜親僖也。尊尊者，閔於僖爲君，於文有祖，道宜尊閔也。親親尊尊，人道之大，二者一揆，尊理常伸。僖兄也，而無升道，不以親禰害其尊祖也。桓君也，而有治文，不以親公害其尊王也。文姜母也，而有絕道，不以親母害其尊父也。哀姜小君也，而有弗受文，不以親夫人害其尊先公也。蒯瞶父也，而亦有弗受文，不以親父害其尊王父也。諸若此類，皆《春秋》之義，《傳》承上推本廣言之也。



疏曰：「稱《春秋》者，以嫌疑之間，須取聖證。」案：疏說固可通，要是廣有所包，故言《春秋》也。

冬，晉人、宋人、陳人、鄭人伐秦。

公子遂如齊納幣。喪制未畢而納幣，書非禮。

【補曰】如得禮，《經》當直言如齊，不仍史文。《公羊》曰：「譏喪娶也。」以為娶雖在三年之外，而三年之內不圖婚，三年之恩疾，有人心焉者宜於此焉變也。董仲舒曰：「《春秋》之論事莫重乎志，納幣之月在喪分，故謂之喪娶。」

三年春王正月，叔孫得臣會晉人、宋人、

陳人、衛人、鄭人伐沈。沈潰。沈，國也。潰之為

言，上下不相得。

夏五月，王子虎卒。叔服也。【補曰】叔服

書王子書名者，卒例也。《左傳》成元年尚載叔服語，此《傳》則與《公羊》同。此不卒者也。何以卒之？

外大夫不書卒。【補曰】疏曰：「重發之者，尹氏則以為魯主，此為會葬，事異，故重發之。」以其來會葬，我卒之也。會葬在元年。【補曰】史書卒者，自以其來赴卒

之，所以赴我者，則以其嘗會葬我故也，此君子所取義也。五年會葬成風者不卒，彼不赴故也。彼文或作毛伯，則即後書札子殺者。或曰以其嘗執重以守也。僖二十四年，天王出居于鄭，叔服執重任以守國。【補曰】或說以會葬者不書卒，此自以其執重而來赴，而君子取其義也。如或說，蓋不以王子虎為叔服，叔服下大夫耳，安得執重以守？是亦如《左傳》以為王叔文公，《國語》所謂太宰文公也。

秦人伐晉。

秋，楚人圍江。

雨螽于宋。○【撰異曰】《公羊》「螽」皆作「螻」，獨

此亦是「螽」字。外災不志，此何以志也？【補曰】

疏曰：「重發之者，志災或為王者之後，或為甚而錄之，故不得一例。」曰災甚也。【補曰】此以甚志，明雖非王者，

後亦志也。《公羊》諸螽皆為記災，唯此雨螽及哀十二年十二月螽為記異，與《傳》不同也。《公羊》定元年《傳》曰「異大乎災」，何休曰：「異者，非常可怪，先事而至者。災者，有害於人物，隨事而至者。」成十六年「雨，木冰」，《傳》曰

「志異也」。其甚奈何？茅茨盡矣。茅茨猶盡則

嘉穀可知。茨，蒺藜。【補曰】疏曰：「徐邈云：『禾稼既盡，

又食屋之茅茨。』范與徐異。」王樵曰：「徐說嘗驗有之。」著

於上見於下，謂之雨。【補曰】傳以星宜言隕，蟲

宜言雨，董仲舒所謂「或降於天，或發於地」，不可同也，故

重發例。《漢書·五行志》說此《經》引《穀梁傳》曰「上下皆

合言甚」，《傳》無此句，蓋亦後學者說《傳》語，在《外傳》及

《章句》。案：《左傳》曰「隊而死也」，《公羊》曰「死而墜

也」，疏曰：「《公羊》與《考異郵》皆云「蟲死而墜於地」，故

何休云「蟲猶衆也，死而墜者，象宋群臣相殘害也，禍自上

下異之云爾」。今《穀梁》直云「茅茨盡矣」。著於上見於下

謂之雨」，與讖違，是爲短。鄭君云：「《穀梁》意亦以宋薄

德，後將有禍，故蟲飛在上，墜地而死。」言茅茨盡者，著甚

之驗，於讖何錯之有乎？」文烝案：《公羊》言異也，故董仲

舒、何休言大夫專恣，據後事推之；《穀梁》言災也，故劉向

言宋殺大夫無罪，據前事推之。鄭君意崇讖緯，姑作《調

人》以災異爲一，不復截然分別，於理固通，但非昔人家法，

亦學者所當知矣。至於董、劉、何、鄭所推之是非，可姑無

論耳。

冬，公如晉。

十有二月己巳，公及晉侯盟。【補曰】凡朝

而盟，來聘而盟者，皆言及，以內及外，以尊及卑之常辭也，

不入內爲志之例。

晉陽處父帥師伐楚救江。【補曰】自此外大

夫始稱某帥師、稱將。汪克寬曰：「書帥師百有三十，僖以

前書帥師僅九，皆內大夫，文、宣以後，外大夫多書帥師，

定、哀之間尤數數書之，大夫之強可見矣。」文烝案：文以

前列國亦有大夫爲將，且帥重師者。趙汴本陳傅良說，以

爲雖卿將但稱人，將尊師少與將卑師少者同，雖卿帥重師

但稱師，將尊師衆與將卑師衆者同，以征伐自諸侯出，其臣

之尊卑不足辨，此夫子修《春秋》於內從其恒稱以見實，而

於外變文以示義也。至文以後，征伐自大夫出，則大夫將

書大夫矣。張應昌以爲楚大夫將則至成六年始見，高澍然

以爲秦稱人、稱師爲達例，終《春秋》大夫未強，故不見大夫

將，二國皆小異也。呂大圭以爲大夫而交政於中國自晉文

翟泉之盟始，大夫而專征伐之權自晉襄伐楚救江始。

○撰異曰：《左氏》《楚》下有「以」字，段玉裁曰：「淺人所

增。」文烝案：劉敞《春秋權衡》曰：「《公羊》脫「以」字。」後

來皆依劉說，段氏獨得。此伐楚，其言救江何也？

江遠楚近，伐楚所以救江也。時楚人圍江，晉師

伐楚，楚國有難，則江圍自解。【補曰】江遠未易可救，伐楚

正所以救之，此與宣元年救陳皆未至所救之國。彼以下有

「會棠林」文，得直言救，此不得直言，故須言伐楚矣。伐楚

亦不直言者，張自超以爲商臣弑君，疑於得討賊之義。又

諸侯之用師於楚者，唯齊桓一書伐，晉定一書侵，使於處父

之師直書伐，則前繼齊桓而後駕晉定，故必曰救江。張說

亦有理，要以救者遂其意，致其志。凡救皆是善文，明此亦

善之，與諸直言救者一例也。若然，《傳》言「伐楚所以救

江」，而僖十八年云「伐衛所以救齊」，其救自爲一事；宣元

年云「伐鄭所以救宋」，於《經》別無救文，三者辭同意異，

又須分別觀之也。

#### 四年春，公至自晉。

夏，逆婦姜于齊。【補曰】出姜也。其曰婦

姜，爲其禮成乎齊也。婦禮成于齊，故在齊便稱婦。

【補曰】婦者，已配之稱，謂成昏也。禮：大夫以上不問舅

姑在否，皆至三月見宗廟，然後成婦禮。劉向《列女·宋恭

伯姬》、《齊孝孟姬傳》皆有是言，賈、服、何氏說《春秋》並同。《曾子問》曰：「女未廟見而死，歸葬於女氏之黨，未成婦也。」其逆者誰也？親逆而稱婦，或者公與？何其速婦之也！鄭嗣曰：「皆問者之辭。問

者以使大夫逆例稱女，而今稱婦，爲是公親逆與，怪稱婦速，故反覆推之。」【補曰】逆便稱婦，明非姑婦之婦矣，知是公逆。曰：公也。【補曰】公親逆，故不月。其不言

公何也？據莊二十四年公如齊逆女言公。非成禮於齊也。非，責。【補曰】失禮重，故沒公文，而以稱婦見

其失。若不責其成禮於齊，則但當言公如齊，從親迎恒事不志之例。而下書夫人婦姜氏至自齊，史舊文蓋本言「公

如齊逆女」，或當言「逆婦爲變文」，下蓋有「夫人婦姜氏至自齊」之文也。曰婦，有姑之辭也。【補曰】此言稱

婦有二義也，下無至文，明逆與至共文，以逆文爲至文也，逆稱婦爲夫婦之婦，至稱婦，又爲姑婦之婦，至所以別有姑

無姑者，見宣元年何休說。其不言氏何也？【補曰】據從魯辭，凡姓皆以氏配。貶之也。何爲貶之也？夫人與有貶也。邵曰：「夫人能以禮自防，則

夫婦之禮不成於齊，故譏公而夫人與焉。【補曰】疏曰：「宣元年已有傳，今復特發之者，彼書夫人，此直云婦姜，嫌文異，故彼此明之。然彼稱夫人，又書至，此不然者，《公羊傳》曰：『其謂之逆婦姜于齊何？娶乎大夫者略之也。』徐邈亦以爲不書至，不稱夫人，下娶賤略之。若以諸侯下娶大夫，便爲賤賤，則大夫亦不得上娶諸侯，且天子得下婚諸侯，何爲諸侯不得下娶大夫？是《公羊》之言不可以解此也。蓋不稱夫人不言至者，以其婦禮成於齊，故異於餘稱。《傳》云『夫人與有貶也』者，解不稱氏之意，非釋不稱夫人也。」文烝案：不稱夫人者，文不得言逆夫人也。不言至者，逆已稱婦姜，婦有二義，足以包至，不須言至矣。何休曰：「稱婦姜至，文也，逆與至共文。」其說是也。劉敞曰：「禮之於人大矣，是存則存，是亡則亡。文公之不能保其後嗣者，由無以刑其妻也，夫人之不能安其位者，由無以謹於禮也，此正始之道也。」劉用《左傳》「卿不行」之說，而謂夫人不能早避喪娶之辱，今斷章取之。

### 狄侵齊。

### 秋，楚人滅江。

晉侯伐秦。【補曰】程端學曰：「楚滅江不恤而躬

伐秦，伐楚則遣大夫，晉侯之報復，情不可掩矣。」

衛侯使甯俞來聘。○【撰異曰】徐彥《公羊疏》

曰：「正本作『速』字，故賈氏云《公羊》曰『甯速』是也。」段玉裁曰：「衛甯速見僖二十六年，即甯莊子也。僖二十八年、三十年《左傳》皆記武子事，則此聘必武子矣。《公羊》非也。《公羊》彼作『邀』，此亦當作『邀』。」

冬十有一月壬寅，夫人風氏薨。僖公母，風

姓。【補曰】當云僖公姜母。○【撰異曰】段玉裁曰：「據杜氏《長曆》，十一月庚子朔，十二月庚午朔，又稱十二月無壬寅，五年正月四日也。日月必有誤，則杜所據本實作『十有二月壬寅』。」楊昌霖曰：「今三家《經》皆作『十有一月』，蓋據杜說改之。十一月庚子朔，三日得壬寅，然非《經》之舊矣。」

五年春王正月，王使榮叔歸含，且贈。

含，口實也。《禮記》曰：「飯用米貝，弗忍虛也。諸侯含用玉。」榮叔，天子之上大夫也。榮，采地。叔，字。【補曰】注首句本《公羊》。尸所沐米，即以飯之。依鄭君《禮記》注，天子蓋用黍，諸侯用粱，大夫用稷，天子之士亦用粱，諸侯之士用稻也。貝亦飯所用，諸侯飯以貝而含以玉，通言之

皆爲含，故隱元年《傳》曰「貝玉曰含」，已論之矣。元年王使皆稱天，此與下會葬王使皆不稱天者，所謂文無天也。桓之春月，有月無王，文之於王使，有王無天，其意相類也。《傳》於此不言者，文屬王使而義起躋僖，故就彼《傳》一言之。《荀子》曰：「《春秋》之微也。」又曰：「《春秋》言是其微也。」又曰：「《春秋》約而不速，於此爲甚矣。」含，一事也；贈，一事也；兼歸之，非正也。禮：含贈襚各異人。【補曰】孔廣森曰：「禮：上客弔含，上介致贈。」其曰且，志兼也。【補曰】加且以顯其兼。以上《公羊》並同。其不言來，不周事之用也。何休曰：「四年夫人風氏薨，九年秦人來歸僖公，成風之襚，最晚矣，何以言來？」鄭君釋之曰：「秦自敗于殽之後，與晉爲仇，兵無休時，乃加免繆公之喪而來，君子原情不責晚。用，或作辭。」【補曰】不言來，若其不接公，以其不周事，若不致諸公然。趙匡曰：「《春秋》之文從簡，加減一字皆有義。」文烝案：周，猶給也，不給事，即下言早晚。贈以早，乘馬曰贈，乘馬所以助葬，成風未葬，故書早。而含以晚。已殯，故言晚。國有遠近，皆令及事，理不通也。《禮·雜記》曰：「含者執璧將命，曰『寡君使某含』，相者入告。出

曰「孤某須矣」。含者人，升堂致命，子拜稽顙。含者坐委於殯東南，有葦席，既葬，蒲席。降，出反位。」明君之於臣有含贈之義，所以助喪盡恩。含不必用，示有其禮。【補曰】疏曰：「舊解以爲《傳》言含贈，上關天子之於諸侯及夫人耳。《雜記》所云，唯論諸侯自相於何者，諸侯及夫人於天子，有疾當告，天子遣使問之，有喪則致含，故未殯足以及事。其諸侯相於，示其禮而已，不責其晚也。今恐不然，范云不通，是《傳》之不通，何得天子與諸侯禮異？明范以《傳》爲非也。」文烝案：疏說頗得范意，其實范謂「含不必用」與《傳》亦得兼通。此含距喪三月，《傳》譏其晚，豈謂含必在殯前哉？疏引鄭君《釋廢疾》云：「天子於二王後之喪，含爲先，襚次之，贈次之，賻次之，【眉批】：「賻次之」句，依《歲時廣記》增。」餘諸侯含之贈之，小君亦如之。於諸侯之臣，襚之贈之，其諸侯相於，如天子於二王後，於卿大夫，如天子於諸侯，於士，如天子於諸侯之臣。」京師去魯千里，王室無事，三月乃含，故不言來以譏之。文烝以爲鄭君最得之矣。此「以」字各本作「已」，與上句岐異，今依唐石經、《左傳正義》引及俞樾《集傳釋義》本改。二字通用。

三月辛亥，葬我小君成風。

王使毛伯來會葬。【補曰】毛，當爲「召」。榮

叔、召伯皆大夫，不知其上中。○【撰異曰】毛，《左氏》、《公羊》作「召」。疏曰：「《左氏》、《公羊》及徐邈本並云「召伯」，此本作「毛伯」，疑誤。」文彙案：《左傳》曰「召昭公」。會葬之禮於鄙上。從竟至墓，主爲送葬來。【補曰】通謂凡會葬也。下年《傳》曰「處父主竟上之事」，杜預曰：「來不及葬，不譏者，不失五月之內。」

夏，公孫敖如晉。

秦人人郿。

秋，楚人滅六。

冬十月甲申，許男業卒。○【撰異曰】徐彥

《公羊疏》曰：「業，正本作「辛」字。」

六年春，葬許僖公。

夏，季孫行父如陳。行父，季友孫。【補曰】季

文子也。行父之父齊仲，名無佚。

秋，季孫行父如晉。

八月乙亥，晉侯驩卒。○【撰異曰】驩，《公羊》

作「謹」。《周語》字從「馬」，《晉語》從「言」。

冬十月，公子遂如晉。【補曰】月者爲葬。

葬晉襄公。【補曰】杜預曰：「卿共葬事，文、襄之

制也。」案：《左傳》古者使下大夫。

晉殺其大夫陽處父。稱國以殺，罪累上

也。【補曰】重發《傳》者，衛成在外，晉襄已葬，嫌不同也。

襄公已葬，其以累上之辭言之何也？【補曰】

疏曰：「徐邈解「襄公已葬」謂《春秋》之例，君殺無罪之大夫則是失德，不合書葬，今襄公書葬則是無罪。而「以累上之辭言之」者，以襄公漏泄陽處父之言故也。舊解亦云襄公罪輕，故不追去葬文。今以爲《傳》云襄公已葬者，謂卒哭日久，葬在前，殺在後，是罪累不合及君，故起累上之問，非是釋合書葬以否。君漏言也。【補曰】何休曰：「自

上言泄下曰漏。」上泄則下聞，下聞則上聾，且聞且聾，無以相通。臣聞不言，君無所聞，上下否塞。

【補曰】王引之曰：「聞與瘖同。瘖謂不言，聾謂無聞也。

《墨子》曰：「臣下重其爵位而不言，近臣則暗，遠臣則喑。」

《晏子春秋》曰：「近臣嘿，遠臣瘖。」又曰：「朝居嚴則下無

言，下無言則上無聞矣。下無言則吾謂之瘖，上無聞則吾謂之聵。《說苑》曰：「嚴則下暗，下暗則上聵，聵不能相通。」語意並與此同。《說文》「闇」，从門音聲。古讀「闇」若「陰」，故與「瘖」多通用。夜姑殺者也，殺處父。【補曰】《左氏》、《公羊》略同。夜姑之殺柰何？曰晉將與狄戰，使狐夜姑爲將軍，【補曰】時將中軍者直稱將軍也。《國語》鄭人以詹伯爲將軍，當晉文公時，晉將軍爲正卿，故宣二年《傳》曰「子爲正卿」。趙盾佐之。陽處父曰：「不可。古者君之使臣也，使仁者佐賢者，不使賢者佐仁者。」邵曰：「賢者，多才也，戰主于攻伐。仁者，有惻隱之恩，不如多才者有權略。」【補曰】此亦仁者居守之意。案：《論語》「事其大夫之賢者，友其士之仁者也」，又徐彥引古之賢仁也，又《毛詩傳》「國君友其賢臣，大夫士友其宗族之仁者」，皆以仁次於賢，可與《傳》相證。劉敞《傳》改「仁」爲「能」，後儒遂謂穀梁子不識「仁」字，真一曲之見也。字有數義，言非一端，已論於隱二年。今趙盾賢，夜姑仁，其不可乎！」襄公曰：「諾。」謂夜姑曰：「吾始使盾佐女，今

女佐盾矣。」稱處父語以語之，故《傳》曰漏言也。夜姑曰：「敬諾。」襄公死，處父主竟上之事，待諸侯會葬在鄆上。【補曰】「之」字各本脫，今依唐石經、劉敞《傳》、呂本中《集解》本、俞皋《集傳釋義》本補正。夜姑使人殺之，君漏言也。親殺者夜姑，而歸罪於君，明由君言而殺之，罪在君也，故稱君以殺。故士造辟而言，詭辭而出，辟君也，詭辭而出，不以實告人。【補曰】王引之曰：「辟，當爲「膝」，隸字「膝」、「辟」之左右旁皆相似，故「膝」誤爲「辟」也。造，讀爲蹙，蹙者，促也，近也。蹙膝而言者，君臣促膝密語，不使左右聞之也。漢、魏、六朝、唐人文言造膝，言造膝之言，言造膝詭辭者，如《魏志·中山恭王傳》、《舊唐書·李吉甫傳》、漢《郎中鄭固碑》等共十二事皆用此《傳》語，蓋舊本多作「造膝」，范本傳寫誤耳。」曰用我則可，不用我則無亂其德。此士對君言之辭。【補曰】用，謂用其言。亂其德，猶《詩》云「二三其德」，不用而商之於人，是二三也。韓子《進士策》問曰：「問《書》稱「汝則有大疑，謀及乃心，謀及卿士」，以至於庶人、龜筮。考其從違，以審吉凶，則是聖人之舉事興爲，無不與人

共之。於《易》則又曰：「君不密則失臣，臣不密則失身，機事不密則害成。」《春秋》亦有譏漏言之詞，又似不與人共而獨運者，是二說者其信有是非乎？抑所指各殊而學者不之能察也？樊汝霖注引蘇洵曰：「聖人之道，有經有權有機。曰經者，天下之民舉知之可也；曰權者，民不得而知之矣，群臣知之可也；曰機者，雖群臣亦不得而知之矣，腹心之臣知之可也。」此《書》與《易》、《春秋》所指各殊也。

晉狐夜姑出奔狄。○【撰異曰】夜，《左氏》、《公

羊》作「射」。案：古讀「夜」若「豫」，讀「射」若「序」。

閏月不告月，猶朝于廟。禮：天子以十二月

朔政班告于諸侯，諸侯受於禰廟，孝子尊事先君，不敢自專也。言朝者，緣生以事死，親存朝朝莫夕，不敢泄鬼神，故事畢感月始而朝之。【補曰】疏曰：「范別例云『書不告朔有三，皆所以示譏』，則此文一，公四不視朔二，襄二十九年公在楚三。」文烝案：范以公在楚入例，乃用《左氏》說，又不以不告月為不班朔，而以書不告為譏，皆涉《左傳》，非也。此注自「孝子」以下皆本何休。《公羊》亦以不告朔解不告月。何休曰：「禮：諸侯受十二月朔政於天子，藏於大祖廟，每月朔朝廟，使大夫南面奉天子命，君北面而受之，

比時使有司先告朔，慎之至也。受於廟者，孝子歸美先君云云。」何休又曰：「朝者，因視朔政爾。」又後十六年四不視朔，注曰不舉不朝廟者，禮：月終，於廟先受朔政乃朝，明王教尊也。朝廟私也，故以不視朔為重。何氏之意，以此告朔即《論語》之告朔，告朔後乃受朔政。受朔政者，即後之視朔是也。受朔政後乃朝廟，則此之朝廟是也。范依十六年《傳》改大祖廟為禰廟，亦以此告朔即《論語》之告朔。十六年《傳》注援《論語》之文證受朔之事，似以告朔即是受朔，此注又似以受朔政與朝廟為一，謬矣。何氏說此禮節次自是明順，今惟以禰廟易其所謂大祖廟可耳。以祭法考之，禰廟、王考廟、皇考廟皆月祭，然則朝廟者祭此三廟也。先以餼羊告朔於禰廟，乃受朔政，乃復朝祭於三廟。不告月者何也？不告朔也。【補曰】告朔，猶言班朔，即《周禮》「大史頒告朔于邦國」，亦即十六年《傳》云「天子告朔於諸侯」，下《傳》「天子不以告朔」是也。《公羊》之告朔亦此意。《大戴禮·虞戴德》孔子曰：「天子告朔於諸侯，率天道而敬行之，以示威於天下。」又《用兵》孔子曰：「夏桀、商紂不告朔於諸侯。」皆與《論語》之告朔異。「四不視朔」言公，不告月不言公，知是論天子班朔之事矣。



不告月不郊，與凡言不者皆略異。不告朔則何爲不言朔也？閏月者附月之餘日也，積分而成於月者也。一歲三百六十日餘六日，又有小月六，積五歲得六十日，而再閏，積衆月之餘分以成此月。【補曰】附月，附於前月也。王念孫曰：「古書於」「爲」二字同用，「成於月」，成爲月也。僖二十年「近爲禰宮」，近於禰宮也。《公羊》曰「天無是月」，又曰「是月非常月」，孔廣森曰：「非年年常有之月也。《說文》『閏』字下解曰『餘分之月，五歲再閏』。」戴震曰：「日循黃道右旋，斜絡乎赤道而南北者，寒暑之故也。其隨大氣而左，準赤道爲出沒者，晝夜之故也。凡三百六十五日，小餘不滿四分日之一，日躔發斂一終，月道斜交乎黃道，凡二十七日。小餘過日之半，月遂其道一終，日月之會，凡二十九日。小餘過日之半，以起朔，十二朔，凡三百五十四日有奇分，而近歲終，積其差數置閏月，然後時序之從乎日行發斂者以正，故《堯典》曰「朞三百有六旬有六日，以閏月正四時」，【眉批】：「正四時」從《史記》。《成歲》。文烝案：閏所附月無常月，不得定名爲某月朔，故變告朔言告月也。若日事遇朔日朔，則不言閏月可。天子不以告朔，而喪事不數也。閏是叢殘

之數，非月之正，故吉凶大事皆不用也。【補曰】十二月各有其政，著在《明堂》、《月令》，閏所附無常月，則無常政，故天子不班告朔，此正解《經》「不告月」三字，當與閏月連讀見義。下句言喪服以年計者，其行事不宜數是月，指葬齊景公言也。猶之爲言，可以已也。郊然後三望，告朔然後朝廟，俱言猶，義相類也。既廢其大而行其細，故譏之。【補曰】注非也。因視朔，故朝廟，因天子班告朔，故視朔，不告月則無視朔之禮，何以朝廟爲乎？故爲「可以已」之辭也。文於閏朝廟者，亦桓公黷祀之類，時魯君臣以僖公爲聖賢，故服喪欲久，恰嘗躋主，閏猶朝祭，皆過乎禮，或容此朝祭專於禰廟矣。蘇轍、胡安國以爲此言「猶」者，幸其不已之辭。劉敞《意林》引王安石說以爲不郊矣。幸其猶三望，不告朔矣，幸其猶朝于廟，愈乎已則可矣。劉氏自爲說則曰，以爲可以已者，是猶逐其父者，而謂之曰，可并逐母也。以爲愈乎已者，是猶紕兄之臂者，而曰我且徐之也。君子不然，彼不郊而三望，自謂猶愈乎已，故譏之；彼不告朔而朝廟，自謂猶愈乎已，故非之。文烝案：王氏此說，蘇軾亦同，二蘇、王、胡既失其義。劉氏書當時謂其用意太過，此類是也。猶三望，猶朝于廟，猶繹，事異辭同，從《傳》爲允。疏曰：「重發《傳》者，前爲三望發，此是朝廟，嫌異，故重明之。」

范例猶有五等，發《傳》者三，僖三十一年猶三望，獨發《傳》者，據始也。宣三年，成七年皆不發《傳》者，從例可知也。此年發《傳》者，朝廟與三望異也。宣八年猶繹，發《傳》者，嫌仲遂有罪，得不廢禮，又繹祭與朝廟禮異故也。」

### 七年春，公伐邾。

三月甲戌，取須句。取邑不日，此其日何也？據僖二十六年公伐齊取穀不日。不正其再取，故謹而日之也。僖二十二年，公已伐邾取須句，過而不改，於此爲甚，故錄日以志之。【補曰】疏曰：「哀元年冬，仲孫何忌帥師伐邾，二年王二月，季孫斯、叔孫州仇、仲孫何忌帥師伐邾，取鄒東田及沂西田。彼比年伐邾而取兩邑，《經》不書日。今僖之與文，父子異人，特言謹而日之者，以文公是不肖之君，緩主逆祀，取邑致討，不得序列於諸侯，譏其過而不改，故錄日以見惡。」文烝案：哀公時，魯屢虐邾，其惡易見，故取鄒東、沂西自從常例書時，其月者，爲下事起耳。此則相隔十九年，父子異人，恐其惡不明，故日以顯之。疏說未了。不致者，以是惡事故。

遂城郛。【補曰】郛，魯邑。遂，繼事也。因伐

邾之師。【補曰】當云因取須句之師。重發《傳》者，上是伐國取邑，此是城，嫌非繼事也。

### 夏四月，宋公壬臣卒。【補曰】宋成公也。不

日者，蓋不正。不葬者，或是宋亂魯不會。○【撰異曰】壬，本或作「王」，唐石經作「王」，《左氏》、《公羊》作「王」。《左》亦或作「壬」。

### 宋人殺其大夫。稱人以殺，誅有罪也。

【補曰】重發《傳》者，此非討賊，又無名氏，故重舉衆辭之例。疏曰：「昭公杵臼未即位，國內無君，故不稱名氏，從未命大夫例。」文烝案：疏非也。不稱名氏，在祖之位也。據《左傳》，所殺者，公孫固、公孫鄭也，二子皆孤卿之官，固則爲大司馬，僖二十五年論之備。惟稱人是有罪之辭，恐《左氏》所載有是非失實者。《史記·宋世家》曰：「成公卒，成公弟禦殺太子及大司馬公孫固而自立爲君。宋人共殺君禦而立成公少子杵臼，是爲昭公。」其事與《左傳》異，而以公孫固爲大司馬最爲可據，以昭公爲少子不正，又足明後文弒不書日之義。

### 戊子，晉人及秦人戰于令狐。令狐，秦地。

【補曰】言秦地者，依《傳》在外之文爲說也。《左傳》曰：

「戊子，敗秦師于令狐，至于刳首。己丑，先蔑奔秦。」杜預曰：「從刳首去也。令狐在河東，當與刳首相接。」《釋例·土地名》：「令狐在晉地名中，刳首在秦地名中，杜據《左傳》：『二十四年秦納晉公子，濟河，圍令狐；成十一年晉侯在令狐，秦伯不肯涉河，使史顓盟晉侯于河東，故知令狐是晉地，在河東，接秦刳首。而《經》文當據刳首爲說。今臆測之，或令狐一地而兩屬，如閭爲晉地，而周亦得有閭田之比。其屬秦者，別名刳首，蓋又如溫之有鄆。鄆者，杜預以爲溫別邑，溫已屬晉，而鄆田猶屬周，正與刳首相類。周、晉爭鄆，皆以溫爲言。《說文》解「鄆」字曰：「晉之溫地。」是鄆亦通稱溫，正猶《經》之通稱令狐矣。以戰爲文，兩不稱師，又不言某師敗績者，皆是略之。河曲亦同也，略之亦因其亟戰。《傳》於河曲始言亟戰者，河曲尤甚，又有變文。《公羊》《兩傳》皆曰「何以不言師敗績？敵也」，失之。

**晉先蔑奔秦。**○【撰異曰】蔑，《公羊》作「昧」，「昧」下有「以師」二字。昧，今本作「昧」，唐石經不誤，徐彥曰：「《左氏》、《穀梁》作「先蔑」。」不言出，【補曰】何休曰：「據楚囊瓦俱戰而奔言出。」在外也。【補曰】在外，

在竟外也。《公羊》亦曰「遂在外也」。何休曰：「起其生事，成於竟外，從竟外去。」徐彥曰：「以此言之，則令狐非晉地，伯莒爲楚地亦明矣。」文烝案：二句包公孫敖、公孫歸父言之。輟戰而奔秦，以是爲逃軍也。輟，止也。爲將而獨奔，故曰逃軍。【補曰】此又言《經》於止戰之後，特著奔秦之文者，以是爲逃軍故也。冉有用矛於齊師，孔子曰：「義也。」子路曰：「魯有事於小邾，不敢問故，死其城下可也。」然則逃軍者，人臣之大罪，楚囊瓦事正與此同，《傳》亦并爲彼見義。

### 狄侵我西鄙。

秋八月，公會諸侯，晉大夫盟于扈。扈，鄭地。其曰諸侯，略之也。晉侯新立，公始往會，晉侯不盟，大夫受盟。既以喪娶，又取二邑，爲諸侯所賤，不得序于會，諱使若扈之盟，都不可知，故略之。【補曰】疏後一說，諸侯不序，使若扈之盟，諸侯都不可知。文烝案：范本《公羊》何休說，非也。《傳》云「略之」者，與城緣陵同義。彼《傳》曰「散辭」，亦是略之，此曰「略之」亦是「散辭」，文異而意互相備，一見桓德之衰，一著晉霸之衰。呂大圭謂此與十五年、十七年皆略而不序者，莫有主是盟之辭，齊履謙

亦以爲散盟、散會之辭，其說皆是也。緣陵之城，未知公在否，公雖在，亦當不出公，此異於城，故言公也。上言諸侯則下言晉大夫，屬文之宜也。既略之，故不日，亦不致。《左傳》載諸國爲齊侯、宋公、衛侯、陳侯、鄭伯、許男、曹伯、晉趙盾。

冬，徐伐莒。

公孫敖如莒莅盟。莅，位也。其曰位何也？前定也。其不日，前定之盟不日也。

【補曰】疏曰：「重發《傳》者，以徐伐莒，而往莅盟，嫌非兩國交盟之例，故明之。」文烝案：此不日又不月者，文承「伐」下，從伐例，蓋以徐伐爲主。

八年春王正月。

夏四月。

秋八月戊申，天王崩。襄王。【補曰】《左傳》、

《史記》皆名鄭。范注贅。王崩不去天者，事不涉魯，不得取義於公。

冬十月壬午，公子遂會晉趙盾盟于衡

雍。衡雍，鄭地。

乙酉，公子遂會雒戎盟于暴。鄭地。【補

曰】四日不能再出。不爲繼事辭者，內大夫兩事並受命則各書之，此常例也。又兩事並在日例，言日則不言遂，亦是常例。疏以爲下事若直言遂會雒戎，恐遂爲繼事辭，兩名不辨，故再稱公子。案：疏非也。疏據《公羊》一事再見則卒名，《傳》無是例。○【撰異曰】《公羊》「雒」上有「伊」字，《穀梁》、《左氏》皆或作「伊、雒之戎」，《音義》云：「誤。」《左氏音義》云：「後人妄取《傳》文加耳。」暴，《公羊》本又作「曝」，俗字也。

公孫敖如京師，弔周喪。【補曰】《左傳》文也。

公不奔喪，非禮也。說見定元年。不至復。丙戌，奔

莒。【補曰】言不者，可以然而不然之例。○【撰異曰】

「至」下各本衍「而」字，今依唐石經刪正。《左氏》有「而」字，文烝案：《左氏經》如桓十八年之「與」字，三年之「以」字，及此「而」字，皆非文例，當由後人妄增。不言所至，未如也，若其已行，當如公子遂至黃乃復，今不言所至而直言復，知其實未如也。未如則未復也。未如而

曰如，不廢君命也。雍曰：「受命而出，義無私留，書如京師，以顯命行。于下不書所至，以表不去之罪。」未復而曰復，不專君命也。復者，事畢之辭，未如，故知其未復。加畢事之文者，言君命無輒專之道。【補曰】言復不言乃者，未如未復，無所至，皆其人自爲之，乃文無所施。其如，非如也；其復，非復也。【補曰】其如非如京師，又不返。唯奔莒之爲信，【補曰】言如言復，皆爲奔起，明其意在奔莒，《左傳》謂從莒女己氏也。不言出，《公羊》曰：「遂在外也。」杜預曰：「受命而出，自外行。」即上年例云在外，蓋踰竟則即東行，亦以見其未如未復也。故謹而日之也。【補曰】意在奔莒則有罪，故言日以謹之。賈逵說《左氏》曰：「日者，以罪廢命，大討也。」本《傳》義也。歸父無罪，故有遂文，不言日也。疏曰：「襄二十三年冬十月乙亥，臧孫紇出奔邾，《傳》曰『其日』，正臧孫紇之出也。注云正其有罪，彼云正其有罪，則此亦正其有罪。兩處發《傳》者，此其如非如，其復非復，臧孫則實奔，嫌其意異，故舉二者以包其餘。成十六年冬十月乙亥，叔孫僑如出奔齊亦同此例，故不復發之。若然，僑如亦是有罪書日，而彼注引徐邈云『禮大夫去』云云與此異者，書日之義

有二種之意：一爲正罪，一爲兼君恩。知者以閔二年公子慶父出奔莒，文承九月下而不書日，《傳》稱慶父不復見，明罪重合誅，故去日以見恩絕，則書日者有恩可知。以此推之，歸父、公子慤不書日之從例可知也。然歸父有罪，非成公逐之者，歸父殺嫡立庶，宜世不長，魯人逐之，實得其罪，但惡成公逐父之使耳。不言歸父，無罪也。」文烝案：慶父、歸父、公子慤不日之義各異，疏不得其說。歸父之父有罪，歸父何罪乎？徐邈君恩之說，無當於《傳》。魯於慶父、歸父亦非無恩，皆不可通也。○此事後人書之則曰丙戌公孫敖出奔莒而已。《春秋》出名氏於上，錄日於下，加三句六字，去「出」字，事備而義精矣。《左傳》曰「以幣奔莒」，不書，不可書也。家勤國曰：「公不奔喪而卿行，是諸侯不有天子；敖如京師不至復，是大夫不有諸侯。」

各。【補曰】蒙上月。

宋人殺其大夫司馬。司馬，官也。【補

曰】亦曰司武。馬者，武也。其以官稱，無君之辭也。何休曰：「近上七年，宋公壬臣卒，宋人殺其大夫不言官，今此在三年中言官，義相違。」鄭君釋之曰：「七年殺其大夫，此實無君也，今殺其司馬，無人君之德耳。司馬、

司城，君之爪牙，守國之臣，乃殺其司馬，奔其司城，無道之甚，故稱官以見輕慢也。《傳例》稱人以殺，殺有罪也，此上下俱失之。【補曰】十五年注以「無君爲不臣」是也，鄭說非也。不稱名姓，在祖之位也。《左氏》事迹可徵，其是非予奪，皆未可信。但此與上七年皆稱人以殺，稱人則已見罪，而彼直云殺其大夫，此復稱官者，蓋因下事書宋司城二文相連，不可空言大夫，無以相別，故下言司城，則此言司馬，而因此司馬之文又以見祖位及在祖位者之實，乃爲前後諸文之樞紐，此聖者之作，自然之妙也。《傳》因下文稱官，是無君之辭，故於此亦順而言之，不可以辭害意。《左傳》稱其人曰「大司馬公子印」。

宋司城來奔。司城，官也。【補曰】宋避先君武公名，變司空爲司城。其以官稱，無君之辭也。【補曰】疏曰：「重發《傳》者，嫌奔殺異也。」文烝案：

列國官名，自行人以外內外無書者，此欲表其無君，何以必稱其官？蓋其時司城官屬悉來奔，實如《左傳》之說，故稱官以著之。崔氏舉族皆出則書齊崔氏，司城官屬皆來則書宋司城，各從其實，其義一也。若然，《經》以其官屬皆來稱官，而《傳》釋爲無君之辭者，官屬悉奔，朝廷空虛，擅權無

君，於斯爲著。《傳》所云無君即指其以官屬來也，是知上文司馬乃因此司城之文而書以相別。《傳》於上亦釋爲無君者，釋文雖同，其意異也。司城名氏，《左傳》曰「蕩意諸」。來奔者不言出，舉其接我也。【補曰】疏曰：「此是來奔之始，故發《傳》。邲伯、宋子哀等不發者，從此例可知。」文烝案：此言接我者，亦接公也。或有公不在而言來奔者，當與介葛盧同例，亦容不至國都，大概是以接公爲文。

## 春秋文公經傳第五補注第十四

穀梁 范氏集解 鍾文烝詳補

九年春，毛伯來求金。【補曰】金，黃金也。凡

金幣，黃爲上，此亦求賻之類。《傳》曰：「錢財曰賻。」錢者赤金爲之，若是赤金，當言賻矣。《漢書·食貨志》曰：「大公爲周立九府圜法：黃金方寸，而重一斤；錢圜函方，輕重以銖。」○或疑此金是赤金未鑄爲錢者，《左傳》：「鄭伯朝楚，楚子賜之金，曰：『無以鑄兵！』」故以鑄三鍾。明是赤金也。求車猶可，求金甚矣。凱曰：「求俱不可，在喪尤甚。不稱使者，天子當喪未君也。」【補曰】喪求甚於凡求，求金又甚於求賻。注解不稱使，本《公羊》，即隱三年例云「無君也」。彼無君，謂未踰年，又當如《左傳》說爲未葬。此無君，則《左傳》云「未葬」是也。《公羊》兩處並云「當喪未君」，又因此《經》謂未三年不稱王，且曰「以天子三年然後稱王」，亦知諸侯於其封內三年稱子。考之於《經》，景王

未三年，書「天王殺其弟佖夫」，敬王未三年，書「天王居于狄泉」，魯閔公未三年，上附莊卷，而其稱公作謚，繫世入廟，仍同他公。《穀梁》、《左氏》皆無義例，則《公羊》未可信也。《坊記》曰：「未沒喪不稱君。」《曲禮》曰：「天子未除喪，曰予小子。生名之，死亦名之。」皆與《公羊》說同。案：《論語》子張曰：「《書》云：『高宗諒陰，三年不言。』何謂也？」子曰：「何必高宗，古之人皆然。君薨，百官總己以聽於冢宰三年。」又《孟子》稱堯崩舜立，舜崩禹立，禹崩啟立，皆在三年喪畢後。竊意《公羊》、《坊記》、《曲禮》所言者自是先代之制，而周世則不然。呂大圭據《顧命》、《康王之誥》疑彼時已變制矣。

夫人姜氏如齊。歸寧。【補曰】姜氏，謂出姜。

此書非禮也。范本杜預，依《左傳》例。何休則以爲奔父母喪。父母者，齊大夫家也，蓋未可據。下有二月、三月，則此如是正月，上求金不以此如特出月，明夫人與公異例。

二月，叔孫得臣如京師。【補曰】月者，爲葬

日。京，大也。師，衆也。【補曰】二訓，《公羊》、《爾雅》同。言周，必以衆與大言之也。【補曰】何休曰：「天子之居，地方千里，周城千雉，宮室官府，制度廣

大，四方各以其職來貢，莫不備具，所以必自有地者。治自近始，故據土與諸侯分職而聽其政焉。」

辛丑，葬襄王。【補曰】公不親會葬，非禮也。說

見定元年。天子志崩不志葬，舉天下而葬一人，其道不疑也。【補曰】不志葬，不疑於不葬，猶諸

侯之時葬正也。魯史之制，宜辟周史，故得以不志葬爲義，若周史則不得矣。列國亦各有史，故略書時者則爲正，凡《春秋》之文，以簡約爲主。志葬，危不得葬也。不

得備禮葬。【補曰】志葬者，以月爲例，猶諸侯之月葬故也。

疏曰：「重發《傳》者，桓王七年始葬，襄王則七月而葬，嫌異，故重發之。」文烝案：桓是改葬，志葬猶不志也，彼傳亦不說，桓重發之者，所以起下。日之，甚矣，其不葬

之辭也。王室微弱，諸侯無復往會葬。【補曰】葬天子而

加日，甚於危不得葬，直是不葬之辭，猶諸侯之日葬危不得葬也。不葬之辭，謂非舉天下而葬一人之辭也。注以諸侯無復往會葬解之，當改言無復親往則通。

晉人殺其大夫先都。

三月，夫人姜氏至自齊。【補曰】疏曰：「范

例云，夫人行有十二，例時，此致而書月者，蓋以非禮而致，故書月以刺之，餘文書月者，當條皆有義耳。夫人行十二者，文姜七如齊，再如莒，聲姜會齊侯于陽穀，于卞，并數此出姜是十二也。」文烝案：夫人行例時，至例月。何休曰：「月者，婦人危重，從始至例。」卑以尊致，病文公也。夫人行例不致，乃以君禮致，刺公寵之過。【補曰】注

末句非也，病不可以爲刺。文公嬖頃熊而姜氏無寵，反言寵之過，非事實也。《傳》言夫人以君禮致，儼如國君然，是由公之不知禮，故足爲病也。夫人所以不得致者，婦人既嫁不踰竟，既無踰竟之事，安有告廟飲至之禮？故公宜致，夫人不宜致，始嫁宜致，既嫁不宜致。文姜、聲姜雖踰竟，皆不行告至之禮也。《禮·雜記》及何休說皆言夫人得奔父母喪，宜出則即宜致，《傳》所不言，似未足據矣。疏引徐邈云卑以尊致者，文公娶齊大夫女爲妻，故初逆姜氏，不稱夫人，今致以夫人禮，與逆自違，故疾公也。案：徐用《公羊》說，而以前不稱夫人爲卑，此稱夫人爲尊，殆非《傳》意。

晉人殺其大夫士穀及箕鄭父。○【撰異

曰】穀，本又作「穀」，《左氏》、《公羊》作「穀」。稱人以



殺，誅有罪也。【補曰】重發《傳》者，此有「及」文，嫌異故也。鄭父，累也。【補曰】重發《傳》者，鄭父非公子，嫌異故也。

### 楚人伐鄭。

公子遂會晉人、宋人、衛人、許人救鄭。

【補曰】案：《左傳》晉趙盾、宋華耦、衛孔達皆大夫也，稱人者，非霸國獨用兵，猶從伐沈之例。

### 夏，狄侵齊。

秋八月，曹伯襄卒。

九月癸酉，地震。《穀梁說》曰：「大臣盛，將動

有所變。」【補曰】《國語》伯陽父曰：「陽伏而不能出，陰迫而不能烝，於是地震。」注引《穀梁說》，蓋以為陽微陰盛，君弱臣強之象。此年之震，疏曰：「何休、徐邈並云由公子遂陰為陽行，專政之所致也。」孔廣森曰：「昭二十三年八月乙未地震，越二日丁酉，周地亦震，南宮極死而《經》不書，知諸書地震皆據魯。」震，動也。【補曰】《公羊》、《爾雅》同也。隱、僖篇「震」既訓雷，以雷能動物，故「震」之義又為動。凡一字數義者，皆如此。《易》卦之震，其本義為

動，不為雷，震與動，古今語也。《說卦傳》曰：「震，動也。」是以今語通古語，為《震》卦之本訓，八卦皆同也。《晏子春秋》稱「維星絕，樞星散，地其動」，又稱「鉤星在駟心之間，地其動」，是當時通言地動。《春秋》言地震不言地動者，策書用字之例，皆因乎古也。地不震者也，【補曰】何休曰：「天動地靜者常也。」文烝案：《素問》、《周髀算經》及《書考靈耀》說地亦圓而動不止，但人不覺其動，故曰不震者也。《管子》曰：「天曰虛，地曰靜。」震，故謹而日之也。【補曰】疏曰：「范例云，地震五，例日。」

冬，楚子使蔣來聘。【補曰】會零書楚子，別欲

見義，其後還書人，則書子斷自此始。蘇轍曰：「至是齊、晉日衰，楚人接迹於中國，於是書其君臣，與諸侯比。」孔廣森曰：「商臣弑父而得稱子以使者，其罪惡固不待貶絕而見。」文烝案：韓子詩云：「《春秋》書王法，不誅其人身。」許翰稱之，當以此意求之。若如周子云「《春秋》正王道」，又云「誅死者於前」，便未及此。韓子說《春秋》曰：「不誅其入曰謹，嚴曰深。」其文辭皆甚確。○【撰異曰】蔣，或作「菽」。段玉裁曰：「菽」之俗也。《左氏》、《公羊》作「椒」，《公羊》亦或作「菽」。案：古讀「椒」若「菽」也。楚無大

夫，無命卿。其曰萩何也？以其來，我褒之也。【補曰】褒之，猶言進之，以其來我，故進之而得目言萩也。楚君初見新意，楚臣猶依舊例。

### 秦人來歸嬴公、成風之襚。

【補曰】稱秦人無君臣者，從遠國例略之，或微者也。不去來者，原情不責之，見上五年注。既不責之，故亦不月。張洽曰：「時秦、楚交病中國，秦欲伐晉而歸襚於魯，猶楚欲圖北方而萩來聘也。」秦人弗夫人也，言秦人弗以成風爲夫人，故不言夫人。【補曰】若以成風爲夫人，當直言成風，今繫嬴公言之，明爲弗夫人之辭。孔廣森難《傳》曰：「若妾母必以其子氏者，令惠公、嬴公尚在，何以稱之？」文烝案：宰咺、秦人兩事本以歸妾母志，其以可辭受之，因以見正者，適因惠、嬴已沒故也，若二公尚在，則亦直文見譏矣，此不足疑也。范以不言夫人爲弗夫人之辭，非也。正嫡夫人亦未有既沒而稱夫人者，夫人乃生時之稱，唯何休知之，後儒皆不省。即外之弗夫人而見正焉。見不以妾爲妻之正。【補曰】秦人蓋曰此所以襚嬴公之成風者，故可因以見正，繫諸嬴公，就使秦襚莊公之成風，君子亦必以其可辭受之，因以見正也。志者，與贈仲子略同。孔穎達曰：「是時

服除已久，始來弔贈，當以變禮待之。」《檀弓》曰：「衛將軍文子之喪，既除喪而後越人來弔，主人深衣練冠待於廟，垂涕洟。子游曰：『將軍文氏之子其庶幾乎？亡於禮者之禮也，其動也中。』」

### 葬曹共公。

十年春王三月辛卯，臧孫辰卒。

夏，秦伐晉。【補曰】何休曰：「謂之秦者，晉先昧

以師奔秦，可以足矣，而猶不知止，故夷狄之。」孫復曰：「晉自令狐之戰不出師者三年，其厭戰之心可見，而秦又起此役，故曰秦以狄之。」孫覺曰：「以其易世相讐，但曰秦以狄之。」程子曰：「秦唯以報復爲事，夷狄之道也。」文烝案：四說大概得之，但以師奔秦，非《穀梁》之義，令狐後晉不出師，又與《左傳》不合耳。《傳》稱秦之爲狄，自穀之戰始，而此文狄秦，仍爲變例者。彼《傳》秦爲狄，惟於書君卒見其義，自餘猶從中國例。秦君狄也，秦國非狄也，秦君以有狄道而狄之。秦國本周舊都也，其取義與滕相似。

楚殺其大夫宜申。僖四年《傳》曰「楚無大夫」，而今云「殺其大夫」者，楚本祝融之後，季連之胄也，而國近

南蠻，遂漸其俗，故棄而夷之。今知內附中國，亦轉強大，故進之。【補曰】前已書殺其大夫得臣矣，非自此始進楚也。內附中國亦不始此，荆人來聘，宜申獻捷，彼時何嘗不與中國親？亦何嘗不强大乎？文之時，晉衰而楚益強，於諸書楚子見其義，不得說之於此。范之疏而不檢甚矣。

自正月不雨，至于秋七月。【補曰】汪克寬

曰：「正月上不繫王者，歲首書王，所以著一歲十二月皆承天子之正朔，故此年及十三年總書不雨，但紀月數而已，非歲首比也。」歷時而言不雨，文不閔雨也。不閔雨者，無志乎民也。【補曰】重發《傳》者，此專在本年，嫌異也。

及蘇子盟于女栗。女栗，某地。蘇子，周卿士。

【補曰】女栗當云地闕。下句本杜預。王卿之執政者，《左傳》謂之卿士，故杜以卿士言之，是天子之上大夫也。杜又曰：「僖十年，狄滅溫，蘇子奔衛。今復見，蓋王復之。」《傳例》曰：「及者何？內卑者也。」趙匡、劉敞、葉夢得以爲公及之，諱而不與，蓋非。《左傳》曰：「頃王立故也。」案：此奉王命，當在喪畢後，未必蒙月。《左氏》以爲秋七月，特據《經》測之。不月者，以卑者與王臣特盟，故略而異之，同諸

盟齊，不從宿例。自此周復微。○【撰異曰】女，《公羊》或作「汝」。栗，各本誤作「粟」，今依《音義》，唐石經改正。

冬，狄侵宋。

楚子、蔡侯次于厥貉。厥貉，某地也。【補曰】

亦當云地闕。《左傳》曰：「將以伐宋。」孫覺曰：「此次遂稱楚子，下伐麋又以爵書，自是楚益強。」○【撰異曰】厥，《公羊》作「屈」。

十有一年春，楚子伐麋。○【撰異曰】麋，《公

羊》作「圈」。

夏，叔彭生會晉卻缺于承匡。承匡，宋地。

【補曰】叔彭生，公子牙孫叔仲惠伯。張大亨曰：「文之篇六卿並見。」文烝案：成篇亦有六卿。○【撰異曰】唐石經初刻「叔」下有「仲」字，磨改去之。《左氏音義》云：「叔彭生本或作叔仲彭生，「仲」衍字。」板本、《左氏》有「仲」字。匡，作「筐」，唐石經皆不誤，淳化本、他宋本同。

秋，曹伯來朝。

公子遂如宋。

狄侵齊。【補曰】《左傳》曰「鄭瞞侵齊，遂伐我」，

謂即下長狄。

冬十月甲午，叔孫得臣敗狄于鹹。【補

曰】敗夷狄，雖非疑戰不日，此日者，蓋大得臣之功。《公

羊》以爲其言敗，其日，其地，皆大之也。鹹，魯地。不言

帥師而言敗，何也？據僖元年公子友帥師敗莒師

于麗，獲莒挐，稱帥師。【補曰】前伐沈救鄭乃稱將不稱帥

師之例，此言敗，則當言帥師矣。內事言敗，非公也，不直

言師則言某帥師。直敗一人之辭也。【補曰】欲明所

敗者一人，故不以衆辭加之。一人而曰敗何也？

【補曰】據敗亦衆辭。以衆焉言之也。言其力足以敵

衆。《傳》曰：長狄也，弟兄三人，【補曰】何休以

爲相類如兄弟，非親兄弟，與《左傳》異。弟兄，唐石經初刻

及各本皆作「兄弟」，誤涉《公羊》文，今依石經磨改及十行

本、俞樾《集傳釋義》本、李廉《會通》本乙正。佚害中

國，佚，猶更也。【補曰】佚，即「迭」字，故訓更。《孟子》

「迭爲賓主」，張鎰所見本或作「佚」。宋本《大戴禮·禮三

本》「情文佚興」，元本作「迭」。《音義》曰：「害，本又作

「宕」。案：各本皆同，《音義》一本作「宕」，如是「宕」字，范

應有注。楊疏言「更害中國」，所據本亦作「害」，今依《音

義》正本、楊疏、唐石經改正。瓦石不能害。肌膚堅

強，瓦石打擲，不能虧損。【補曰】打，當从木。叔孫得

臣，最善射者也。射其目，身橫九畝。廣一步

長百步爲一畝。九畝，五丈四尺。斷其首而載之，眉

見於軾。兵車之軾，高三尺三寸。【補曰】軾者，車前曲

木，左右曲向後，接兩轆。何休說長狄，蓋長百尺，杜預以

爲蓋長三丈。何據《考異郵》云：「兄弟三人，各長百尺，別

之國，欲爲君。」又據《關中記》云：「秦始皇二十六年有長

人十二，見於臨洮，身長百尺，皆夷狄服。」杜據《魯語》云：

「僬僥氏長三尺，短之至，長者不過十之。」其長短皆與《傳》

小異也。此長狄，《公羊》以爲記異，蓋如臨洮之見，偶然之

事。《左傳》則鄭瞞國也。孔穎達說《左傳》曰：「如《傳》

文，長狄有種，種類相生，當有支胤，唯獲數人。云其種遂

絕，深可疑之。《國語》仲尼之言以爲自虞以來，命守封、隅

之山，賜以涖姓，【眉批】：「涖，即「釐」字，作「漆」者誤。」則是世

爲國主，縣歷四代，安得更無支屬唯有四人？且君爲民

心，方以類聚，不應獨立三丈之君，使牧八尺之民。又三丈

之人誰爲匹配？豈有三丈之妻爲之生產乎？人情度之，深可惑也。」文烝案：孔氏特發此疑，今姑存而不論。《左傳》有可信者，論於下。然則何爲不言獲也？據莒

挐言獲。【補曰】此非所據也。如上所云，在獲例，不在敗例，何爲以敗言之，不言獲邪？曰：古者不重創，

不禽二毛，故不言獲，爲內諱也。不重創，恤病

也。不禽二毛，敬老也。仁者造次必於是，顛沛必於是，故爲內諱也。既射其目，又斷其首，爲重創。鬢髮白，爲二

毛。【補曰】《左傳》宋襄公曰：「君子不重傷，不禽二毛。」

傷即創也。《月令》曰：「瞻傷察創。」鄭君曰：「創之淺者曰

傷。此對文也，散文則通，故《說文》、《廣雅》云：「傷，創

也。《廣雅》又云：「創，傷也。」《說文》亦云：「刃，傷也。」或

作「創」。此並王念孫《廣雅疏證》說也。重創，禽二毛，皆

爲不仁，獲之爲言也，亦重創，禽二毛之屬也，故變文言敗，

而不言獲，所以爲內諱。尋《傳》意，本汎論事理，非指射目

斷首爲重創，《注》失其解，於理不通矣。《傳》先言「直敗一

人」，以衆言之，即引舊《傳》記其事，以明此敗異於他敗。

非敗獨得言敗者，大之也。又解不言獲之義，以明此獲通

於他獲。實獲皆不言獲者，諱之也。疏曰：「長狄兄弟，更

害中國，禍害爲深，得臣能立功於一時而標名於萬代，其庸大矣。若其不諱，何以不書？且晉獲潞子尚書於《經》，魯獲長狄棄而不錄，詳內略外之義，豈其然哉？知內不言獲之例不施於此也。」案：疏說迂曲，此即內不言獲之例耳。

公子友敗給棄師則言獲以惡之，得臣殺敵致果則不言獲以諱之，惡者變文，諱者常文，諱輕於惡，凡內所以不言獲者，正是諱耳。此《傳》曰諱莒挐，《傳》曰惡華元，夏竦《傳》曰不與非與，義皆相通。○射禮以中爲獲，鄭君《鄉射》注

曰：「射，講武田之類也，因是見爲國之思患而防也。《春

秋》以獲爲敗，《傳》曰爲內諱也，因是見用兵以不殺爲武

也。」其之齊者，王子成父殺之，則未知其之晉

者也。【補曰】《公羊》與此同。據《左傳》，魯所獲者僑

如。齊王子成父所獲者榮如，在齊惠公之二年，《傳》誤作

齊襄公，當依《史記》正之。晉所獲者焚如，在滅潞時。又

宋獲緣斯在春秋前，宋武公時衛獲簡如在齊獲之後。緣斯

者，僑如之先，僑如弟曰焚如，焚如弟曰榮如。季弟曰簡

如。襄三十年晉師曠言：「叔孫莊叔敗狄于鹹，獲長狄僑

如及虺也，豹也，而皆以名其子。」《左傳》人名事迹當非虛

妄，大氏左氏考史，博采而尚詳，聖門解《經》，核實而舉要。

十有二年春王正月，邾伯來奔。【補曰】

《公羊》曰：「失地之君也。何以不名？兄弟辭也。」《左傳》：「邾，文之昭也。」何休曰：「月者，前爲魯所滅，今來見歸，猶當加意厚遇之。」文烝案：魯前與齊共圍邾，非滅也，或至此始失國耳。《左傳》以爲邾世子，趙匡、劉敞疑之。月者，以是同姓兄弟，故仍史文錄月。舊史小國君奔皆月，君子皆略之從時例。○【撰異曰】邾，《公羊》作「盛」。

杞伯來朝。僖二十七年稱子，今稱伯，蓋時王所進。

二月庚子，子叔姬卒。其曰子叔姬，貴也，公之母姊妹也。同母姊妹。【補曰】《公羊》曰：

「其稱子何？貴也。其貴奈何？母弟也。」與《傳》意同。《傳》以父爲男子之美稱，於子則直曰貴之、尊之，不言男子，明女子亦得通稱，故大夫以上稱子，則其妻稱內子。今以君之母姊妹貴，故舉其貴者，猶母弟稱弟，母兄稱兄，皆以同母爲貴也。何休曰：「不稱母妹而繫先君言子者，遠別也。禮：男子不絕婦人之手，婦人不絕男子之手。」何氏遠別之義可用，其言繫先君非也。孔廣森又引《詩》齊侯之

子、東宮之妹，以爲君之母妹貴有殊矣。其一《傳》

曰：許嫁以卒之也。【補曰】稱「其一《傳》曰」者，蓋

引舊《傳》爲更端之辭，或「其一」二字衍也。疏曰：「上《傳》言母姊妹貴，故錄卒。下《傳》言許嫁諸侯，故錄卒。

似上下意乖者，《傳》欲見雖貴非許嫁不書，上下足成，非乖

也。許嫁乃書卒者，以其即貴之漸故也。徐邈云：「上

《傳》云子叔姬者，杞夫人見出，故不言杞。下《傳》云許嫁

者，言是別女，非杞叔姬也，理亦足通。」文烝案：疏說及徐

皆非也。「貴」釋書「子」義，「許嫁」釋書「卒」義，不泥「其

一」二字，則文意甚明。僖九年伯姬卒已發《傳》，重起例

者，此稱子，嫌有異，故舉舊《傳》重明之。《公羊》亦正如

是。男子二十而冠，冠而列丈夫，三十而

娶，女子十五而許嫁，二十而嫁。《禮》二十而

冠，冠而在丈夫之列。譙周曰：「國不可久無儲貳，故天子

諸侯十五而冠，十五而娶。娶必先冠，以夫婦之道，王教之

本，不可以童子之道治之。禮：十五爲成童，以次成人，欲

人君之早有繼體，故因以爲節。《書》稱成王十五而冠，著

在《金縢》。《周禮·媒氏》曰：「令男三十而娶，女二十而

嫁。」內則云：「女子十五而笄。」說曰許嫁也。是故男自

二十以及三十、女自十五以及二十皆得以嫁娶，先是則速，後是則晚。凡人嫁娶，或以賢淑，或以方類，豈但年數而已。若必差十年乃爲夫婦，是廢賢淑方類，苟比年數而已，禮何爲然哉？則三十而娶，二十而嫁，說嫁娶之限，蓋不得復過此爾。故舜年三十無室，《書》稱曰鰥。《周禮》云：女子年二十有未嫁者，仲春之月，奔者不禁，奔者，不待禮聘，因媒請嫁而已矣。甯謂禮爲夫之姊妹服長殤，年十九至十六，如此，男不必三十而娶，女不必二十而嫁明矣，此又士大夫之禮。【補曰】引譙周者，《五經然否論》文也，見《通典》所引說成王冠。疏曰：「注言此又士大夫之禮者，謂喪服所言，多陳士大夫之禮，猶不待二十，明諸侯以上早娶，禮在不疑。」文彙案：三十、二十之文，《周禮·內則》、《大戴禮·本命》、《書大傳》、《毛詩傳》皆同，《五經異義》從《左氏》說。人君早娶，以三十、二十爲庶人禮。王肅《聖證論》謂三十、二十者，男女嫁娶之限，禮言其極，不是過耳。男十六精通，二十而冠，女十四血化，十五而許嫁，於此以往，皆可嫁娶。以爲此《家語》孔子對哀公之言也。并官聖妃，【眉批】：「并官聖妃」四字見漢碑。又《廣韻》引《魯先賢傳》孔子妻并官氏，明刻《家語》始。誤「并」爲「升」。《家語》記其娶，謂孔子年十九，凡此並可與譙、范說相證矣。《白虎通》引《穀

梁傳》曰：「男二十五繫心，女十五許嫁，感陰陽也。」《通典》引同，今《傳》無此文，亦是爲《穀梁》學者說《傳》語，在《外傳》及《章句》。

夏，楚人圍巢。

秋，滕子來朝。

秦伯使術來聘。術，秦大夫。【補曰】術不氏，從楚、吳例也。秦非楚、吳比，有師則亦得有大夫，但觀溫之會，秦人序莒、邾君下，翟泉之盟，秦人序陳、蔡大夫下，皆在最末，秦雖親晉，當時猶以遠國視之也。穀戰後，與晉世讐，遂合於楚，《春秋》於是乎狄秦，既遠且狄，不可與荻札異例。莊二十六年徐邈說有未盡者。○【撰異曰】術，《公羊》作「遂」。徐彥曰：「《左氏》、《穀梁》皆作「術」字，經亦有作「術」字者，疑「遂」字誤。」案：《月令》「徑術」，《學記》「術有序」，鄭君謂即《周禮》「遂」字，聲近「遂」。答張逸云：「述，讀如「遂事不諫」之「遂」。」

冬十有二月戊午，晉人、秦人戰于河曲。

河曲，晉地。【補曰】《公羊》曰：「河曲疏矣，河千里而一曲也。」不言及，秦、晉之戰已亟，故略之也。亟，數也。夫戰必有曲直，以一人主之，二國戰鬪數，曲直不可

得詳，故略之，不言晉人及秦人戰。【補曰】亟訓數者，頻數也。《爾雅》曰：「屢，亟也。」又曰：「亟，屢，數，疾也。」曲直之說，與戰甌《傳》注引鄭君說異，非也。及者，以主及客，晉、秦之戰，則必以晉為主，此略之不言晉及者，爲其亟戰也。若然，罪晉爲其亟戰，明十年罪秦亦同，《傳》於此發之，舉一隅使人以三隅反也。鄭伐許亦爲其一歲再伐，亦足包其義，《傳》文至簡至密，細心則知，葉夢得、程端學妄譏此《傳》何哉？趙鵬飛曰：「夫有血氣者莫不有忿心，人之所以異於豺狼者，以其忿而能懲耳。今秦、晉忿而不懲，俱斃而後已，與豺狼何異？故以麋鬪目焉。」

季孫行父帥師城諸及鄆。○【撰異曰】鄆，《公羊》作「運」，此字後皆同。稱帥師，言有難也。

【補曰】疏曰：「凡城之志皆譏，此《傳》不解譏與不譏，直釋其帥師之意耳。但此城得時，又畏莒爭鄆，書雖是譏，情義通許，故《傳》以「有難」釋之，不言譏之意。」文烝案：城直言城者，其常也。卿親帥師則有難矣，《傳》發通例也。此城鄆，汪克寬以爲莒、魯之爭實始此。

十有三年春王正月。

夏五月壬午，陳侯朔卒。【補曰】陳共公也。不葬者，蓋魯不會。

邾子籛條卒。【補曰】邾文公。○【撰異曰】唐石經《左氏》初刻作「籛蔀」，後並磨去艸頭。板本同初刻。唐石經《公羊》初刻並從竹，後並改從艸。板本則上字從艸，下字從竹，惟《穀梁》石經、板本皆並從竹，爲得其正。段玉裁曰：「二字並當從竹。籛條，竹席也，此以器爲名。」

自正月不雨，至于秋七月。

大室屋壞。屋者主於覆蓋，明廟不都壞。【補曰】何休曰：「言屋者，重宗廟，詳錄之。」案：《爾雅》曰：「壞，毀也。」《說文》曰：「毀，缺也。」此當蒙月，謹之。《左傳》曰「秋七月」。○【撰異曰】大，《公羊》作「世」。《漢書·五行志》曰：「大室屋壞。」《穀梁》、《公羊》經曰「世室」。案：《穀梁》以「世」釋「大」，《志》因謂《經》同《公羊》也。大室屋壞者，有壞道也，譏不脩也。【補曰】疏曰：「高者有崩道，下者有壞道，既有壞道而書之者，譏魯久不繕脩。」文烝案：《公羊》曰：「久不脩。」杜預《釋例》曰：「大室之屋，國之所尊，朽而不繕，久旱遇雨，乃遂傾圮，不共之甚，



故特書之。《中庸》曰：「春秋脩其祖廟。」大室，猶世室也。世世有是室，故言世室。【補曰】大，世義相近。孔穎

達論世子、世叔申之屬，《左氏經》作「世」字，《傳》皆爲「大」，明古「世」、「大」義通。《公羊》曰：「世世不毀。」范用其意。周公曰大廟，《爾雅》曰：「室有東西廂曰廟。」

伯禽曰大室，群公曰宮。《爾雅》曰：「宮謂之室，室謂之宮。」然則其實一也，蓋尊伯禽而異其名。【補曰】伯禽，周公子魯公也。三句通釋《經》例，與《公羊》同。周之后稷廟稱大廟，文、武稱世室，親廟稱某宮，是天子亦同。《禮》宗廟之事，君親割，割牲。夫人親春，春粢

盛。【補曰】疏曰：「徐邈云：『《禮記》曰：『君執鸞刀而割牲』，彼據初殺牲之時，非是割牲之事。』」徐言非也。文烝案：《國語》觀射父曰：「天子禘郊之事，必自射其牲，王后必自春其粢。諸侯宗廟之事，必自射牛、刳羊、擊豕，夫人必自春其盛。」《周禮·射人》：「祭祀則贊射牲。」鄭君曰：「烝嘗之禮，有射豕者。」敬之至也。爲社稷之主，

而先君之廟壞，【補曰】社稷之主，謂君也。《禮運》孔子曰：「天子祭天地，諸侯祭社稷。」明諸侯所祭，社稷最

重，故以稱之。蔡邕《獨斷》曰：「天子社稷，土壇方廣五丈，諸侯半之。社稷二神同功，故同堂別壇，俱在未位。」《條牒論》曰：「稷壇在社壇西，俱北嚮，營並壇共門。或曰在社壇北。」《五經異義·今孝經說》：「社爲土神，稷爲穀神，句龍、后稷其配食者。」鄭君從其說。極稱之，志不敬也。極稱，言屋壞不復，依違其文。【補曰】所謂盡而

不汙也。《漢書·五行志》載《左氏說》曰：「前堂曰大廟，中央曰大室；屋，其上重屋尊高者也，象魯自是陵夷，將墮周公之祀也。」賈逵、服虔、杜預《注》皆以爲「大廟之室」，此不可通於《穀梁》、《公羊》。而陳奐作《詩傳》疏合以爲一，以爲大廟者路寢大廟，即《明堂》、《月令》左右介中央之大廟，【眉批】：「介，介，正俗字。」實爲明堂大廟，鄭君所謂大寢南堂者也。《明堂位》曰：「大廟，天子明堂。」此明堂爲路寢明堂，周、魯同制也。魯自魏公之世，以大廟爲周公廟，厲公之世以大廟大室爲魯公廟，至五廟中別有大祖廟，乃是文王廟，即《左傳》之周廟，絕非大廟，其在周，則懿王之世以文王爲文世室，孝王之世以武王爲武世室。世室即路寢之大廟，大室雖並稱世室，而前堂大廟則爲文王廟，中央大室則爲武王廟。凡陳氏所說，新奇繆盭，學者宜辨之矣。

一經之義，群籍所關，固須參會而通，亦不可牽合爲說。得則爲康成氏之括囊大典，網羅衆家，不得則爲夏侯建之章句小儒，破碎大道，二百年來之經術，當以是權之。方東樹欲一概抹倒，則亦過也。

冬，公如晉。

衛侯會公于沓。沓，地也。【補曰】當云地闕。

○【撰異曰】《公羊》無「公」字。

狄侵衛。

十有二月，己丑，公及晉侯盟。還自晉。

○【撰異曰】《左氏》「還」上有「公」字。還者，事未畢也。【補曰】疏曰：「莊八年『師還』，《傳》曰『還也』，嫌不得如彼例，故復發《傳》。《春秋》還例有四，范《別例》云三者，蓋直據內爲三，不數晉士句。」自晉，事畢也。【補

曰】疏曰：「以其與致文同也。」文烝案：事畢者，返至國也。事未畢者，返而在路也。本但當爲至國之辭，以有他事，加在路之辭，不可沒其本辭也。

鄭伯會公于棐。棐，鄭地。【補曰】兩書會公

者，公爲主也，謝湜得之。兩會皆不盟，故書之如此，邾子

來會亦同。若會而復盟，則當書曰公及衛侯盟于沓，公及鄭伯盟于棐，公及邾子盟于比蒲，從凡內爲志之文矣。是故會戎于潛，會齊侯于防，戎爲主，齊爲主也。會公于沓，會公于棐，來會公，公爲主也。○【撰異曰】棐，《公羊》作「斐」，亦或作「裴」。

十有四年春王正月，公至自晉。【補曰】此亦後事小則以先事致之例。孔廣森曰：「月者，正月也。」文烝案：公一出三爲諸侯所榮，於事無危，故劉敞據以駁危致之例，必如孔說乃通。

邾人伐我南鄙。

叔彭生帥師伐邾。

夏五月乙亥，齊侯潘卒。【補曰】齊昭公也。不葬者，或是齊亂，魯不會。

六月，公會宋公、陳侯、衛侯、鄭伯、許男、曹伯、晉趙盾。癸酉，同盟于新城。新城，

宋地。【補曰】七年略不序，此從常文。此盟同外楚，事較善也。不於會上日者，趙匡以爲既行會禮，別日又盟。不地會與湔梁異者，以同外楚爲重，雞澤並同義也。盟不復

舉諸侯者，無中事，故馬陵、柯陵、雞澤、戲、京城北、平丘六者皆同義也，惟首戴別欲見義。張洽曰：「許自晉文、襄圍伐後，始與盟會。」文烝案：《左傳》七年盟扈已有許。同者，有同也，同外楚也。【補曰】齊霸同盟同尊周，晉霸同盟同外楚。晉盟至此言同者，時楚強盛，晉不能制，非若文、襄之世。不疑不同，外之不須言同也。七年之盟及此後晉盟不言同者，皆本無外楚之事。

秋七月，有星孛入于北斗。劉向曰：「北斗貴星，人君之象也；彗星，亂臣之類。」言邪亂之臣將並弑其君。【補曰】《漢書·五行志》：「劉以爲君臣亂於朝，政令虧於外，則上濁三光之精，五星羸縮，變色逆行，甚則爲孛。北斗，人君象；彗星，亂臣類，篡弑之表也。《星傳》曰：「魁者，貴人之牢」。又曰「彗星見北斗中，大臣諸侯有受誅者」。一曰魁爲齊、晉。夫彗星較然在北斗中，天之視人顯矣，史之有占明矣，時君終不改寤。是後，宋、魯、莒、晉、鄭、陳六國咸弑其君，齊再弑焉。」文烝案：《左傳》載叔服言：「不出七年，宋、齊、晉之君皆將死亂。」劉所本也。月者，歷日也。孛之爲言，猶彗也。【補曰】言猶者，義相近也。案：《說文》「孛」者，《東部》字，與「彗」字爲聯縣疊韻。

之字。「彗」亦《東部》字。「彗」者《艸部》字。宋爲艸木盛也。宋然，彗字爲艸木之兒，彗爲多艸，是二字之本義相近也。就本義引申之，則「孛」爲凡盛之偶，「彗」爲凡多之偶，以「彗」釋「孛」，猶以「多」釋「盛」也。孛星光芒四出，蓬蓬字孛然，以其光盛，故謂之孛，以其光多，故釋以彗也。又「諄」、「悖」字从孛，「拂」字从弗，皆有亂義，凡物盛多則易亂。董仲舒以孛星爲閭亂之貌，何休以爲邪亂之氣，「孛」之爲「彗」，兼取亂義也。孛、彗古又同音，凡字義相類者聲多相同，或相近似也，此訓詁之理也。昭十七年有星孛于大辰，《左傳》載申須語謂之彗，《五行志》向、歆說及杜預依之。《公羊》曰：「孛者何？彗星也。」何休曰：「狀如簪。」《爾雅》曰：「彗星爲機槍。」郭璞曰：「亦謂之孛。」而《左傳》昭二十六年齊有彗星，《晏子春秋》、《史記·齊世家》並載晏子語，以爲孛甚於彗，是孛與彗異矣。今案：齊、魯至近，不應魯不見齊星，竊疑孛大而彗小，故書孛不書彗。《漢書》文穎《注》分別彗、孛、長三星，未知古法如何。但對文則孛、彗有別，散文則通言彗，故《經》書「孛」而《左氏》、《公羊》以爲彗。《爾雅》又以「彗」該「孛」也。《開元占經》引《尸子》與《爾雅》同，又引《荊州占》天棓、天槍、天機、彗星四者皆爲彗。其曰入北斗，斗有環域也。據

字于大辰及東方皆不言人，此言人者，明斗有規郭，人其魁中也。【補曰】注「規郭」解「環域」。環域者，營域也。人魁中，即《公羊》所云「北斗有中」也。《春秋運斗樞》曰：「北斗七星：第一天樞，第二旋，第三機，第四權，第五衡，第六開陽，第七搖光。」第一至第四爲魁，第五至第七爲杓，合而爲斗。《開元占經》引《河圖》曰：「北斗第一星開樞受，第二星提旋序，第三星機耀緒，第四星權拾取，第五星玉衡拒，第六星開陽紀，第七星搖光吐。」

### 公至自會。

晉人納捷菑于邾，弗克納。○【撰異曰】捷，

《公羊》作「接」。是卻克也。【補曰】《左傳》曰「晉趙盾」，《公羊》曰「卻缺」。疑「克」字誤。其曰人何也？

【補曰】不稱帥師，猶當稱將。微之也。何爲微之

也？長轂五百乘，長轂兵車，四馬曰乘，一乘甲士三

人，步卒七十二人，五百乘合三萬七千五百人。【補曰】轂

在輪中央，兵車之輪高六尺六寸，轂長三尺二寸，以其長五分之，輿下得一，輿外得三，於內外閒留一以置輻。曰長轂者，指輿外所見之尺九寸二分以爲名也。注一乘七十五人之數本《司馬法》，而《司馬法》又有一說：一乘甲士十人，

步卒二十人。金鶚曰：「江永以爲『七十五人者，丘甸之本法』，三十人者，調發之通制」，其說是也。一乘三十人，戰止用二十五人，以步卒五人將重車。重車者，每兵車五乘而一乘，一乘亦二十五人，杜牧《孫子注》所謂「炊家子十人固守，衣裝五人，廩養五人，樵汲五人」是也。」金說合《周禮》「五伍爲兩」之文，確不可易。此之五百乘，凡一萬二千五百人，爲一軍之制。古禮大國二軍，此已得其半，故爲多也。《左傳》曰：「以諸侯之師八百乘。」《公羊》曰：「革車八百乘。」縣地千里，過宋、鄭、滕、薛，復人千乘之國，欲變人之主，縣猶彌漫。復，猶遠也。變人之主，謂時邾已立纓且，邾小國，而言千乘者，大卻克之事。【補曰】復與迴、洞通。《韓詩》曰「于嗟復兮」，此千乘就大國之賦言耳，賦與軍異法，說見隱元年。至城下然後知，何知之晚也。征不廟算，正其得失。勞師遠涉，乃至城下，邾以義拒，然後方悟。貶之曰人，不亦宜乎？【補曰】注言邾以義拒，依《左氏》、《公羊》也。弗克納，未伐而曰弗克何也？【補曰】納稱帥師，皆爲伐文，此不言帥師，知無伐事，故曰未伐。克，能也，勝也。弗

克其義也。非力不足，義不可勝。【補曰】《公羊》郤缺曰：「非吾力不能納也，義實不爾克也。」《傳例》曰：「弗，內辭也。」趙匡曰：「弗克納，言失之於初而得之於末也，愈乎遂也。」捷菑，晉出也，獲且，齊出也。姊妹之子曰出。【補曰】《公羊》同。注用《爾雅》文。何休以爲外孫。獲且正也，捷菑不正也。正，適。【補曰】《左傳》「邾文公元妃齊姜生定公，二妃晉姬生捷菑」，一正一不正，故其義弗克，四句申上意也。不正則當言邾捷菑，見嫌直名者，挈於郤克也。捷菑不正非君，故可以霸國大夫挈之。糾正本不當繫國，宜言公子或言子，亦挈者內君納之故也。孔穎達以爲捷菑不言邾者，下有「于邾」之文，又引劉炫云「已去邾國，又非邾君，故不稱邾捷菑也」。

九月甲申，公孫敖卒于齊。【補曰】案：《左傳》敖奔而復，復而又適莒，至是又求復，許之。將來，及齊而卒。奔大夫不言卒，而言卒何也？據閔二年公子慶父出奔莒後不言卒。【補曰】不言卒者，《經》例因史例也。爲受其喪，不可不卒也。【補曰】將有其末，不得不錄其本。其地，於外也。成十七年，公孫嬰齊

卒于狸蜃。《傳》曰：「其地，未踰竟。」宣八年，仲遂卒于垂。垂，齊地，然則地或踰竟，或未踰竟。凡大夫卒在常所則不地，地者，皆非其常所，隨其所在而書其地耳，不係於踰竟與不踰竟。【補曰】注殊費辭。踰竟者，竟外外也。未踰竟者，國都之外亦外也。內君、內夫人、內大夫、外君苟死於外，無不地者，無二例也。疏曰：「垂不發《傳》者，此及狸蜃既發《傳》，而垂非他國都，又非魯竟內，在兩端之間，故不復釋。」

齊公子商人弑其君舍。○【撰異曰】《音義》：「殺，音試，本又作「弑」。」舍未踰年，其曰君何也？【補曰】據弑奚齊稱君之子，其正例當直稱子，此當言弑齊子。成舍之爲君，所以重商人之弑也。舍不成君，則殺者非弑也。【補曰】注言殺者非弑，奚齊亦在二十六弑君之內，注非也。《傳》意在「重」字，即《公羊》所云「成死者而賤生者」也。《禮·雜記》曰：「君薨，大子號稱子，待猶君也。」鄭君曰：「謂未踰年也。」明凡未成爲君者皆有可成之爲君之理，但《春秋》不成奚齊獨成舍者，張洽曰「以獻公殺適立庶而奪之，以舍之正而與之」是也。此類王通所謂輕重之權衡，曲直之繩墨也。董仲舒曰：

「《春秋》痛之中有痛，無罪而受其死者，申生、奚齊、卓子是也；惡之中有惡者，已立之，已殺之，不得如他臣之弑君者，齊公子商人也是也。故晉禍痛而齊禍重，《春秋》傷痛而慙重，是以奪晉子繼位之辭，予齊子成君之號，詳見之也。」董言「已立之，已殺之」，本《公羊》文。慙，惡也。今《繁露》本作「敦」。商人其不以國氏何也？據隱四年衛祝吁弑其君完不言公子。不以嫌代嫌也。《春秋》以正治不正，不以亂平亂，舍不宜立，有不正之嫌，商人奪權，有當國之嫌，故不書國氏，明不以嫌相代。【補曰】案：《左傳》記齊桓之子曰，武孟無虧也，惠公元也，孝公昭也，昭公潘也，懿公商人也，公子雍也，皆異母兄弟，內嬖如夫人者所生。孝公、昭公日卒爲正，後此惠公日卒亦爲正，皆時事之宜也。今昭公卒而舍立，《左傳》但言「子叔姬妃齊昭公生舍」，不言舍不宜立，明舍非不正。范注失之。《傳》言嫌者，謂舍未踰年，有未成君之嫌耳。舍之不日何也？未成爲君也。【補曰】疏曰：「若舍不正，雖成君亦不合書日，而去未成君者，《春秋》不正見者，雖庶亦得書日，鄭伯突、齊侯小白是也。今商人爲不欲以嫌代嫌，故不去公子，則舍不正之嫌，前已著見，不正已見，例當書日，爲未成

君，故不日耳。」文烝案：疏說甚辯，實曲說也。一句之文，何云前見乎？舍正宜日，實未成君，故不日。

### 宋子哀來奔。其曰子哀，失之也。言失

其氏族，不知何人。【補曰】疏曰：「舊解失之者，謂未達稱子之意。」非范意。文烝案：范以「失其氏族」解「失」字，疏引舊解以「未達稱子意」解「失」字，其意皆是，其辭皆非也。失之者，謂子哀不氏而稱子，師說失其傳也。《傳》云「失之」，即《公羊》云「無聞焉爾」。《公羊》言「無聞」者三：紀子伯也，夏五也，宋子哀也。《傳》於紀子伯備「或曰」之文，於「夏五」發《傳》疑之義，惟此與《公羊》同。家鉉翁曰：「《穀梁》、《公羊》皆以爲無所考，後儒不必強爲之說，《左傳》高哀爲卿，不義宋公而出，遂來奔。書曰子哀，貴之。」家氏以爲在卿大夫之位，見君之危，委而去之，爲臣不忠，罪莫大焉，乃謂《春秋》貴而不名，以苟免爲見幾，有傷名教。

### 冬，單伯如齊。單伯，魯大夫。【補曰】莊元年，

十四年之單伯，蓋其祖父也。孫復、張洽嘗言之，通皆不卒者，與柔、溺同。若是王臣，不得言「如」，《公羊》言「王者無外」，何休以爲言「如」則有外也。

齊人執單伯。【補曰】若是王臣，又不可言執。

私罪也，【補曰】解《經》不言行人也。《公羊》曰：「稱行

人而執者，以其事執也；不稱行人而執者，以己執也。」單

伯淫于齊，齊人執之。【補曰】淫于齊，是私罪也，下

言叔姬同罪，此言淫于齊，是謂單伯至齊與子叔姬淫矣。

然則《傳》亦如《左傳》以子叔姬爲舍之母，與《公羊》《道淫》之說異。

齊人執子叔姬。【補曰】稱子者，亦母姊妹。母

姊妹有兩叔姬者，質家字積於仲，文家字積於叔，男女所同也。前當是妹，此當是姊。《左傳》曰「子叔姬妃齊昭公」前無「歸齊」文者，蓋與鄒伯姬同。叔姬同罪也。【補曰】

與單伯同罪，言淫也，同罪則同執。不言齊人執單伯及子叔姬者，男女之際，非夫婦不可言及也。劉敞雖不用同罪之說，亦曰此一事也。曷爲再言齊人，嫌也。程端學亦曰不可以臣及君夫人也。《公羊》曰「使若異罪然」，未得其義。不直言遂執子叔姬者，當用《公羊》此語。

十有五年春，季孫行父如晉。

三月，宋司馬華孫來盟。司馬，官也，其以官稱，無君之辭也。秦曰：「擅權專國，不君其

君，緣其不臣，因曰無君。上司馬、司城皆不名，而此獨名者，以華孫奉使出盟，爲好於我，故書官以見專，錄名以存善。【補曰】案：華孫無君，而必稱司馬以著之者，義與司

城同。《左傳》云「其官皆從之」，此得其實。官屬皆從，故不得不稱官也。盟會之事，卿行旅從而已，今乃空其官屬，

無留治政者，非專擅無君之人安得若是？故《傳》曰「無君之辭也」。《左氏》服虔說以爲華耦侈而不度，空官廢職，魯

人貴之，非君子貴之，可與《傳》義相證也。此與奔異，故又發《傳》也。《左傳》華孫名耦，而《注》以孫爲名，非也。胡

安國謂猶季孫、叔孫、仲孫、臧孫之類。今考厚氏，亦稱厚孫，或作后孫，皆是當時呼之如此。《春秋》宋司馬爲祖之位，不可言其名，故但謂之華孫。此非被殺，亦不可言其名

者，以其既著司馬之文，故不欲名之，來盟是善事，非來奔比，故彼直云司城，而此不直云司馬也。不稱使者，方欲爲無君之辭，故不言使，異於孫良夫。《傳》「其以」二字，各本

誤作「以其」，今依唐石經、十行本、俞皋《集傳釋義》本、李廉會通本乙正。○蘇軾嘗言《春秋》自有妙用，惟丘明識其

用，微見端兆。愚於司城、司馬二條得之。蘇氏之論，破繩約之見也。愚之說杜，揣測之私也。來盟者何？前

定也。不言及者，以國與之也。【補曰】疏曰：

「重發《傳》者，不稱使，嫌異常故也。」

夏，曹伯來朝。

齊人歸公孫敖之喪。

【補曰】大夫既卒皆書

字，此猶稱敖者，喪初歸從卒例也。不言來歸者，魯因孟氏之請，乃受其喪。孔穎達謂「非有專使特來」是也，無專使則不接公矣。案：《左傳》：「齊人或為孟氏謀，飾棺寘諸堂阜，於是下人以告，敖之子難，猶毀以為請，立于朝以待命。許之，取而殯之，齊人送之。」

六月辛丑朔，日有食之。鼓用牲于社。

單伯至自齊。

【補曰】若是王臣，又不得言至。

陸渚、劉敞已言之。大夫執則致，致則名，此其不名何也？據昭十四年意如至自晉稱名。天子之命大夫也。

晉卻缺帥師伐蔡。

戊申，入蔡。

【補曰】疏

曰：「伐人兩舉者，伐而不即入，故兩舉之。」趙匡以為伐之

不服而後入，所以兼惡蔡。許翰、高閔、張洽以為言伐言人甚晉也。文彙案：與哀公伐邾、人邾同。

秋，齊人侵我西鄙。

○【撰異曰】板本、《左氏》

或脫「秋」字，唐石經及諸宋本有。其曰鄙，遠之也。

其遠之何也？不以難介我國也。介，猶近也。

【補曰】王引之曰：「介，當為『余』，『余』古『邇』字，形與『介』相似，故譌為『介』。莊十八年《傳》：「不使戎邇於我也」，注曰：「邇，猶近也。」《音義》云：「邇，一本作介。」十九年《傳》：「不以難邇我國也」，《音義》亦云：「邇，本又作介，彼兩『介』字亦『余』之譌。」陸氏於三「介」字並音「界」，失之。疏曰：「重發《傳》者，以莊十九年三國伐我，今齊人獨來，嫌異，故重明之。」

季孫行父如晉。

冬十有一月，諸侯盟于扈。諸侯皆會而公

獨不與，故恥而略之。【補曰】疏曰：「舊解『公獨不與』謂七年時，今以為正謂此年。」文彙案：注云「不與」者，指此文言之，其意則承七年《傳》略之為說，於彼誤以為諱，故此以為恥，其實非也。此不國別序者，亦從散辭例而略之。《左傳》曰：「尋新城之盟，且謀伐齊也。齊人賂晉侯，故不



克而還。《書》曰「諸侯盟于扈」，無能爲也。【眉批】：「能爲」下本有「故」字，王念孫云衍。《左氏》得之，公自以有齊難不會耳。諸侯者，晉侯、宋公、衛侯、蔡侯、陳侯、鄭伯、許男、曹伯。

十有二月，齊人來歸子叔姬。【補曰】何休

曰：「月者，閏錄之，從無罪例。」其曰子叔姬，貴之也。【補曰】重發《傳》者，前是卒，此是出，嫌異也。其

言來歸何也？【補曰】非問稱來歸，問何以不直言齊

子叔姬來歸，而言齊人來歸之也。《傳》省「齊人」二字。

父母之於子，雖有罪，猶欲其免也。凱曰：「書

來歸，是見出之辭。有罪之人，猶與貴稱。書之曰子者，蓋

父母之恩，欲免罪也。【補曰】凱注非也。此釋稱齊人來歸

之義，文意甚明。前稱齊人執之，是見與單伯同罪之辭，此

稱齊人來歸之，是見齊免其罪之辭。父母之於子，欲其得

免，故順而書之，不從諸直言來歸者例也。何休說《公羊》

曰：「叔姬於文公爲姊妹，言父母者，時文公母在，明孝子

當申母恩也。」《通典》引董仲舒《春秋決獄》曰：「《春秋》之

義，父爲子隱。」謂此事也。范凱不審《傳》意，乃以稱子爲

言，子是母姊妹之貴稱，豈論其有罪無罪乎？

齊侯侵我西鄙。遂伐曹，入其郭。郭，

郭。【補曰】郭，外城也。疏曰：「《公羊》云：「郭者何？恢郭也。」此不發《傳》者，《春秋》惟有此事而已，非例所及，故略之。」文彙案：此亦上伐人兩舉之例，言郭以別於都。張大亨說是。

十有六年春，季孫行父會齊侯于陽穀，

齊侯弗及盟。弗及者，內辭也。【補曰】言是言

弗通例。及，與也。唐石經初刻直云「弗者」。行父失

命矣，齊得內辭也。行父出會失辭，義無可納，故齊

侯以正道拒而弗受。不盟由齊，故得內辭。【補曰】注非

也。行父之會，《左傳》以爲公使請盟，齊侯不肯，則行父爲

失命矣。行父非別有失命之事，齊不肯盟，即是失命。臣

失君命，君臣交恥，故不言齊侯不肯及盟，而得從內辭例。

若曰行父已去，齊弗與盟，非不肯也。其實會陽穀下加言

「弗及盟」，則其不肯及盟足見，特立文微而婉耳。

夏五月，公四不視朔。【補曰】言不者，可以然

而不然之例。天子告朔于諸侯，諸侯受乎禰

廟，禮也。每月天子以朔政班于諸侯，諸侯受而納之禰

廟，禮也。每月天子以朔政班于諸侯，諸侯受而納之禰

廟，告廟以羊。今公自二月不視朔，至于五月，是後視朔之禮遂廢，故子貢欲去其羊。【補曰】范注辭不別白。諸侯每月朔以特羊祭告禴廟，乃北面受朔政，受之即是視之，亦曰聽朔。莊十八年《傳》又謂之朝朔，其實一也。自是遂行朝廟禮，則禴廟、王考廟、皇考廟三廟皆祭，此言受乎禴廟，而《玉藻》云「聽朔於大廟」，所聞異說，殆難強同。或者大廟最尊，禴廟最親，禮所通許乎？又《覲禮》侯氏釋幣于禴，《文王世子》其在軍則守於公禴，鄭君據《曾子問》文知是遷廟主載以行者，以爲親之故言禴。而《書·甘誓》則謂之祖，或者祖、禴同義。苟非對文，皆得通稱乎？疑不敢質也。注末二句之誤，論於下。公四不視朔，公不臣也。以公爲厭政以甚矣。天子班朔而公不視，是不臣。【補曰】疏曰：「《三朝記》云『周衰，天子不班朔於天下』，彼據周末全不能班之，此時尚或班或不班。」文烝案：楊引《三朝記》即《大戴禮·用兵》之文，彼文云夏桀、商紂不告朔於諸侯，楊誤記也。《傳》言《經》書「公四不視朔」，明公失受朔禴廟之禮，是不臣也。不臣之惡，厭政所致。厭，倦也。直書其事，以爲公之倦政至此甚也。甚云者，不視朔而至四，連曠大典，是爲已甚。厭政甚即不臣甚，史記

其事而君子取其義也。不舉不朝廟者，何休曰：「受朔政乃朝，故以不視朔爲重。」何氏是也。或時公猶朝廟，亦未可知也。《左氏》、《公羊》解《經》皆以爲公有疾，大失《經》旨。趙匡曰：「十二公除文之外，無書不視朔者，豈皆無病？足知病不視朔，常事不書。」文烝以爲君不視朔，或因疾，或因有事，皆非過惡。史皆不書，不須書，且不勝書也。《公羊》又曰：「何言乎公有疾不視朔？自是公無疾不視朔也。然則曷爲不言公無疾不視朔？有疾猶可言也，無疾不可言也。」夫使公自此遂不視朔，則當書曰「二月，公初不視朔」，否則書「夏六月，公初不視朔」，或直言「初不視朔」，以見魯自此遂廢視朔之禮。《春秋》文有隱諱，而事皆從實，何不可言之有？不當以有疾見後之無疾，乃欲見其所必不能見也。公自二月至五月不視朔，則六月後還復視朔可知，宣公以後亦皆視朔可知，《經》文甚明，《公羊》自擾之耳。若然，《論語》記子貢欲去告朔之餼羊，而夫子有愛羊愛禮之論。彼文當定、哀時，既不告禴，豈復視朔乎？蓋自文四不視朔而宣、成、襄、昭或踵其失，至定、哀時加數，故子貢感而傷之。其實未嘗全廢不行，故雖廢禮之月，有司猶供餼羊，而夫子言我愛其禮也。范上注用《公羊》義，又以《論語》證成之，倍《經》反《傳》，而於《論語》亦失事

實焉。自此後至定、哀，無故不視朔皆不書者，文始廢禮，後乃效尤，積習生常，恬不知怪。史既不記，《經》遂無文，要以從此一譏亦足見義矣。

六月戊辰，公子遂及齊侯盟于師丘。師

丘，齊地。○【撰異曰】師丘，《左氏》作「鄆丘」，《公羊》作「犀丘」。徐彥《公羊疏》曰：「正本作「犀丘」，故賈氏云《公羊》曰「犀丘」，《穀梁》曰「師丘」是也。」今《左氏》經作「鄆」字。復行父之盟也。春，齊侯不與行父盟，故復使，遂脩之。【補曰】此盟內爲志，前命行父請盟明矣。《左傳》以爲納賂，故得盟。

秋八月辛未，夫人姜氏薨。僖公夫人。【補曰】文公母。

毀泉臺。【補曰】據《左傳》，泉宮之臺也。《公羊》謂即莊公所築郎臺。何休曰：「築毀譏同，知例皆時。」喪

不貳事，【補曰】《王制》有此文，鄭君曰：「貳之言二也。」

貳事，緩喪也。喪事主哀，而復毀泉臺，是以喪爲緩。

【補曰】李光地曰：「緩喪，猶云不專意於喪。」以文爲多失道矣。緩作主，躋僖公，四不視朔，毀泉臺之類。【補

曰】緩喪則失道，注專解「多」字也。疏曰：「《春秋》爲尊親者諱，而舉其多失道者，仲尼之脩《春秋》所以示法，若罪皆諱，何以見其衰貶？故桓公弑逆之主，罪無遺漏，亦其比也。至於書《經》，文辭委曲，則亦是諱，何者？文實逆祀而云躋僖，文從後多不視朔，直言四不視朔而已。文稱毀泉臺則似嫌其奢泰，是亦臣子爲尊親諱之義也。然取二邑大室屋壞，不與扈盟，亦是失道。注不言之者，云云之類，足以包之也。」文烝案：疏論不視朔之事非也。不與扈盟，又非失道，說皆見前。自古爲之，今毀之，【補曰】既是緩喪，又是毀先祖之所爲，皆爲失道。不如勿處而已矣。若以夫人居之而薨者，但當莫處。【補曰】《公羊》同范，兼用《左氏》說。

楚人、秦人、巴人滅庸。【補曰】戴溪曰：「秦、楚相遠，其所以得伐庸者，由巴蜀以通道。」趙鵬飛曰：「楚至是西連巴秦，繞出周晉之後，中國諸侯在其掌握矣。」案：此蓋在時例。

冬十有一月，宋人弑其君杵臼。泰曰：「《傳》稱人者，衆辭，衆之所同，則君過可知。」又曰：「稱國以弑其君，君惡甚矣，然則舉國重於書人也。」【補曰】宋昭

公也。賈逵以爲稱人者，君惡及國人。其說得之。稱人之例，不必定因魯史之舊。《左氏》載續《經》哀十四年齊人弑其君壬于舒州，或據彼文以爲史有稱人之例，非也。彼上文書夏四月齊陳恒執其君寘于舒州，弑文蒙執，故略稱人，不可引以爲證也。此弑不日，史記說可信，前已論之。陳恒之弑，《左傳》曰六月甲午，史文承月下無日，知舊史弑亦有不日者。諸弑不日，似多取舊史成例，但齊簡公非不正，又難相通。或者諸弑皆日，特因陳恒略稱人，故亦略不日歟？疑不能明也。○【撰異曰】杵，《公羊》作「處」。

### 十有七年春，晉人、衛人、陳人、鄭人伐

宋。衛序陳上，蓋主會者降之。【補曰】杜預曰：「自閔、僖以下終於《春秋》，陳侯常在衛侯上，今大夫會在衛下。《傳》不言陳公孫寧後至，則寧位非上卿故也。」與范異，范非也。案：《左傳》晉荀林父、衛孔達、陳公孫寧、鄭石楚皆大夫也，稱人者，或欲示討賊之義，故爲衆辭。《國語》稱趙宣子請師於靈公以伐宋，曰：「大者天地，其次君臣，所以爲明訓也。」乃發令于大廟，使旁告於諸侯，治兵振旅，鳴鍾鼓，以至于宋。是知晉本以討賊興師，特不成討耳。

夏四月癸亥，葬我小君聲姜。○【撰異曰】聲，《公羊》作「聖」。案：《白虎通》曰：「聖者，聲也。」

### 齊侯伐我西鄙。

六月癸未，公及齊侯盟于穀。【補曰】母喪十一月而盟，不去日也，與莊同。

### 諸侯會于扈。言諸侯者，義與上十五年同。【補

曰】案：此亦略之爲散辭。《左傳》曰：「晉侯復合諸侯于扈，平宋也。書曰「諸侯」，無功也。」平宋者，宋鮑新立，會以定之，與北杏同。杜預謂《傳》言復合，則如上十五年會扈之諸侯，明宋亦在矣。上伐不成討，故此會爲無功，於此略之，則言伐不嫌也。公亦以有齊難不與會。

### 秋，公至自穀。【補曰】離會致者，齊方虐我，危

之也，危之故以地致。胡銓曰：「見扈之會，公弗與也。」高閔同。

### 冬，公子遂如齊。

十有八年春王二月丁丑，公薨于臺下。臺下，非正也。【補曰】疏曰：「僖是小寢，此則臺下，

嫌異，故重發之。」

### 秦伯罃卒。

【補曰】秦康公也。秦始書卒不日，又

不葬。案：秦與魯本疏遠，至穆公始與中夏會盟，至康公歸棧來聘，情好漸親，故彼赴卒而我錄以名也。文之六年，穆公卒，不應彼不來赴，蓋君子削之矣。所以削之者，蓋敗般後以秦為狄，故從夷狄不卒之例。至康公書卒，少進之。至惠公書日，又少進之，皆從夷狄例也。夷狄有少進之例。不言正不正，故康公實是秦世子，可以不日也。至若桓公以後不書名者，又別有義，於彼論之。《史記·十二諸侯年表》以為繆公葬殉以人，從死者百七十人，君子譏之，故不言卒。此必用《公羊》家舊說，與《傳》夷狄不卒之例少異，而以為狄之則同，以人殉，亦狄道也。何休以罃為繆公，妄也。不葬者，蓋亦君子去之，以為夷狄故也。○【撰異曰】《公羊》昭五年注秦伯罃，稻名。徐彥疏曰：「文十八年《經》作「罃」字，今此作「罃」字者，誤也。寧知非彼誤者，正以文十八年秦伯罃卒之下賈氏云「《穀梁傳》云「秦伯偃不道」，《公羊》曰「罃」，知《公羊》與《左氏》同，皆作「罃」字矣。」案：今《穀梁》亦作「罃」，不作「偃」，蓋誤。

夏五月戊戌，齊人弑其君商人。【補曰】齊

懿公也。不以為討賊而以為弑君者，本非討賊。張洽所謂三年事之一旦弑之。程端學以為與晉殺大夫里克意同，《春秋》正名之義也。日者，大惡不正，前已見非，未成君可以日也。

六月癸酉，葬我君文公。

秋，公子遂、叔孫得臣如齊。【補曰】《左傳》

曰：「惠公立故，且拜葬也。」是時公子遂見宣公於齊侯而請立之。使舉上客而不稱介，上客，聘主也。【補

曰】介者，助也，副也，左右也。古者主有摯，客有介。士勾侵齊，《傳》稱歸命乎介；會于向，叔老為介；宋享趙文子，叔向為介；叔弓如滕，子服椒為介。則言介者非獨聘矣。

不正其同倫而相介，故列而數之也。《禮》大夫

為卿介，遂與得臣俱為卿，是以同倫為副使，故兩言之，明無差降。【補曰】《說文》曰：「倫，輩也。」此為凡書如、及、

會盟、用兵諸列數者發例，王臣亦從此例，惟列國則略之。

徐彥引《穀梁》「相」下有「為」字。○此弑立始謀也。黃澤

曰：「說《春秋》當求事情，如公子遂、叔孫得臣如齊，兩卿如齊，雖桓公霸諸侯時魯亦未嘗如此，原其事情，雖為賀惠公立，謝齊會葬，然亦是為立宣公之地。自二卿如齊至明

年六月齊人取濟西田，凡十三事，而八事皆爲齊，而子卒、夫人姜氏歸于齊、公即位，皆遂之爲也。一歲之間，書卿聘齊者六，此果何爲哉？如此推尋，則知是公子遂殺適立庶，急欲求齊以定公位，故冒喪娶齊女、棄濟西田，此所謂事情。」黃略本孫覺、呂本中、胡安國、洪咨夔、家鉉翁說。

冬十月，子卒。子赤也。諸侯在喪既葬之稱。

【補曰】既葬，故不名。范云子赤，依《公羊》也。據《左傳》則名惡。又《左傳》公子遂殺惡及視，并殺叔彭生，《公羊》亦載殺彭生事。而彭生不書刺、不書卒者，何休曰：「舉弑君爲重。」案：何義固是，但當是魯史本已不書，君子不得增之也。何氏以《春秋》爲夫子博采諸國書而作，不以爲據魯史，故其說柔、溺之不卒爲無恩禮，杞伯姬之不卒爲無服，彭生之不卒爲舉重，其義未嘗不是，而不知皆策書之本然。子卒不日，故也。故，殺也。不稱殺，諱也。【補曰】觀其不日，則知有變故矣。此「故」固是弑，不得訓「故」爲「弑」。

夫人姜氏歸于齊。【補曰】《左傳》謂之出姜，又曰「魯人謂之哀姜」，其說曰「大歸也」。惡宣公也，姜氏，子赤之母，其子被殺，故大歸也。宣公亦文公之子，其母敬嬴，惡不奉姜氏。【補曰】疏曰：「注并言敬嬴者，欲明

宣公是敬嬴所生，則非惡敬嬴也。舊解宣公不使其母奉養姜氏，故言之，理亦通也。」文烝案：敬嬴，當作「頃熊」。有不待貶絕而罪惡見者，泰曰：「直書姜氏之歸，則宣公罪惡不貶而自見。」【補曰】貶絕，或貶或絕也，罪惡顯則直文可也。有待貶絕而惡從之者，齊小白以國氏之類是也。【補曰】罪惡隱則直文未可也。二句爲全

《經》大例，不特出《春秋》於上者，省文也。《公羊》於昭元年《傳》亦曰：「《春秋》不待貶絕而罪惡見者，不貶絕以見罪惡也。貶絕然後罪惡見者，貶絕以見罪惡也。」孔廣森以爲此類皆讀《經》之要法。姪娣者，不孤子之意也。

言其一人有子則共養。【補曰】或姪或娣有子，通夫人三人共養之，是不孤之。《公羊》曰：「姪者何？兄之子也。娣者何？女弟也。」一人有子，三人緩帶，共望其錄。

【補曰】疏曰：「上文直云姪娣者，所以分別尊卑，明夫人須媵妾之意。下文總言三人緩帶者，欲見有子則喜樂之情均，貴賤之意等。今宣公爲人君，不尊養姜氏，非緩帶之謂也。緩帶者，優游之稱。」文烝案：《傳》言「三人」，謂夫人及其姪娣也。頃熊非姜氏姪娣，據《左傳》是文公二妃。《春秋》時，諸侯娶女不合九女之制，又有違禮再娶者，《傳》

特依正禮言耳。右媵左媵，班次在適姪娣上，與夫人亦爲三人。又右媵亦有姪娣，左媵亦有姪娣，合之亦各爲三人。《傳》但以適姪娣與夫人爲三人者，略言之，足相包也。何休《公羊》注曰：「必以姪娣從者，欲使一人有子，二人喜也，所以防嫉妬，令重繼嗣也，因以備尊尊親親也。」孔廣森曰：「《禮》婦人無子當去，諸侯夫人雖無子，媵有子，適得不去，重黜尊也。《易》曰『得妾以其子』，此之謂也。」一曰就賢也。若並有子則就其賢，謂年同也。宣公不奉哀姜，非此之謂，故惡之。【補曰】疏曰：「宣以庶子篡立，非關就賢，范言宣不能奉養哀姜，則是非賢之事，故云非此之謂。」文烝案：「范云並有子者，謂夫人無子而姪娣等並有子也。《左傳》論天子諸侯立子之法曰：『太子死，有母弟則立之，無則立長，年鈞擇賢，義鈞則卜。』據此文，則凡無太子適子者皆準此制。『年鈞擇賢』即《傳》之『就賢』，故注依以爲說，此論立庶子之法也。文公太子適子並已被殺，故《傳》既明『緩帶』之義，又援『就賢』之文，以見宣之可惡。

### 季孫行父如齊。

莒弑其君庶其。《傳例》曰：「稱國以弑其君，君惡甚矣。」【補曰】莒紀公也。疏曰：「注引《傳例》者，嫌小

國無大夫，例不稱臣名，明弑逆事重，不從凡常無大夫之例也。舊解稱國者，謂惡於國人，并虐及卿大夫。稱人者，謂失心於民庶。此乃涉於賈逵之說。文烝案：賈逵及劉歆、許淑、潁容說《左氏》，皆言君惡及國朝則稱國以弑，君惡及國人則稱人以弑，其說得之，蓋即《穀梁》家舊義也。注引例在成十八年《傳》。不日者，莒從夷狄例，其卒皆不日，其弑亦皆不日，不論其正不正，與吳悉同也。夷狄惟子弑父必書日，元年《傳》所云是也。○《左氏》以爲莒大子僕弑君，襄三十一年以爲公子展與弑君，劉敞極言其非。葉夢得曰：「《左氏》謂莒紀公多行無禮於國，挾比公虐。」其言是也，以爲僕與展與之弑則妄矣。《孟子》曰：「吾於《武成》取二三策而已。」文烝案：《左氏》謂大子僕以寶玉來奔，宣公命與之邑，季文子使司寇出諸竟，亦是也。杜預以爲「未見公而文子出之，故來奔不書」。《國語》則謂公使僕人以書命文子，而里革更其書，流之於夷。大意不異。而上文亦謂僕弑紀公，又《左氏》文子之對《國語》宣公、里革之書，並有弑君之語，是則魯人皆知莒世子弑君，史必書之，夫子必不革之矣，而豈可信哉？《左氏》浮誇，《國語》誣淫，洵韓、柳之特見。

# 春秋宣公經傳第六補注第十五 宣公，文公

子，《史記》名倭。母頃熊。以匡王五年即位。

穀梁 范氏集解 鍾文烝詳補

元年春王正月，公即位。繼故而言即位，與聞乎故也。【補曰】疏曰：「重發《傳》者，桓篡

成君，宣篡未踰年君，嫌異，故發之。」文烝案：宣不去王，故元年之王亦爲平文，宣與桓少異。篡成君與未成君，既如《疏》說。而桓與罫共行弑，宣但爲遂所立，趙鵬飛嘗言之，要以《春秋》既稱王治桓，則不嫌宣元之王無治宣之義，特立文有輕重之差耳。張洽曰：「宣十八年間皆書王者，法已舉於前矣。天理不可以常亡，王法不可以久廢。」

公子遂如齊逆女。不譏喪娶者，不待貶絕而罪

惡自見。桓三年《傳》曰：「逆女親者也，使大夫非正也。」

【補曰】疏曰：「引彼《傳》例者，嫌譏喪娶，不責親迎，故引例以明之。」

三月，遂以夫人婦姜至自齊。【補曰】以者，

不以者也。義在成十四年《傳》。其不言氏，喪未

畢，故略之也。夫人不能以禮自固，故與有貶。【補

曰】疏曰：「婚禮遲速，由於夫家，陽倡陰和，固是其禮，而責夫人者，一禮不備，貞女不從。夫人姜氏，若其不行，公

得無喪娶之譏，夫人無苟從之咎，故責之。」文烝案：《公

羊》謂譏公喪娶，故貶夫人，夫人與公一體。注依文四年

《傳》。夫人與有貶而《疏》申之，與《公羊》微異。其曰

婦，緣姑言之之辭也。【補曰】疏曰：「重言此者，嫌

喪娶辭略，并明不與陳人之婦同。」文烝案：何休說《公羊》

曰：「有姑當以婦禮至，無姑當以夫人禮至，故分別言之。」

高閔曰：「見頃熊妾也而姑之也。」遂之挈，【補曰】疏

曰：「挈者，謂去氏族而直書名。徐邈以挈爲舉，非也。」文

烝案：挈實是舉，舉而直言之耳。由上致之也。上，

謂宣公。【補曰】謂君稱臣名以告廟，朱子疑此類是史官所

書如此。

夏，季孫行父如齊。【補曰】《左傳》曰：「如齊

納賂以請會。」

晉放其大夫胥甲父于衛。放，猶屏也。



屏除。【補曰】放者，棄置於此，不得他適，與屏義相近。所以異於奔者，杜預《釋例》曰：「奔者，迫窘而去，逃死四鄰，不以禮出也。放者，受罪黜免，宥之以遠也。」稱國以放，放無罪也。【補曰】君放之也，與殺同例。

公會齊侯于平州。平州，齊地。離會，故不致。

【補曰】《左傳》曰：「會于平州，以定公位。」

公子遂如齊。【補曰】《左傳》曰：「如齊拜成。」

杜預曰：「謝得會。」

六月，齊人取濟西田。【補曰】何休曰：「月

者，惡內甚於以邾婁子益。」內不言取，言取，授之也。【補曰】明亦易辭。以是為賂齊也。宣公弑立，

賂齊以自輔，恥賂之，故書齊取。【補曰】注謂諱賂言取，用何休說，非也。《經》著授之之辭者，以是為賂齊故也。凡

受賂則言取，取郕大鼎，宋賂魯也；取濟西田，魯賂齊也。

程子以為齊受之以助不義，故書「取」是也。張洽曰：「桓

誘鄭以許田，宣賂齊以濟西田，以利自固，前後一轍。使鄭

莊、齊惠不貪其利，則桓、宣必不能自立矣。故《春秋》曰

假、曰取，蔽罪鄭、齊。」張略本葉夢得說。顧奎光以為鄭假

齊取與魯取鼎同，亂賊所畏，不在強大而在無欲也。趙汭曰：「《禮》國亡大縣邑，公卿大夫士皆厭冠哭於大廟三日，君不舉此取田邑，所以必書於策。」趙本葉夢得說僖取濟西田。

秋，邾子來朝。

楚子、鄭人侵陳，遂侵宋。○【撰異曰】楚子，

鄂本《公羊》作「楚人」，誤也。遂，繼事也。【補曰】重

發《傳》者，楚是夷狄，又有與國，嫌義例有異故也。

晉趙盾帥師救陳。【補曰】此即下斐林之師也，

實未救陳。言救者，致其志，說見下。善救陳也。【補

曰】重發《傳》者，疏曰：「陳近楚屬晉，嫌救非善，故釋之。

又救之者為善，所以駁鄭之過也。」

宋公、陳侯、衛侯、曹伯會晉師于斐林，

伐鄭。斐林，鄭地。○【撰異曰】斐，《公羊》作「斐」。列

數諸侯而會晉趙盾，大趙盾之事也。大其衛中

國攘夷狄。其曰師何也？據言會晉師，不言會晉趙

盾。以其大之也。以諸侯大趙盾之事，故言師。師

者，衆大之辭。【補曰】疏曰：「齊侯救邢，惡不及事，楚子

滅蔡，滅非其罪，晉、宋侵鄭，失匍匐之義，故皆貶之而稱

師。今此稱師以大之者，所謂《春秋》美惡不嫌同辭也。」文  
烝案：《傳》言「以其大之」者，謂以此文欲大趙盾之事，承  
上言之也。注言諸侯大之，非也。疏論救邢亦非也。《公

羊》以爲不言趙盾者，「君不會大夫之辭」，既稱師以大之，  
則《公羊》所云之義亦在其中。趙鵬飛曰：「權以與其功，  
正以定其分，權正並用而《春秋》之法存乎其間，非聖人不  
能脩也。」于棐林，地而後伐鄭，疑辭也。此其  
地何？則著其美也。泰曰：「夫救災恤患，其道宜

速，而方云會于棐林，然後伐鄭，狀似伐鄭有疑，須會乃定。  
曰：非也。欲美趙盾之功，故詳錄其會地。」【補曰】《傳》義  
泰未得之。王引之曰：「鄭」字衍文，桓十五年《傳》曰「地  
而後伐，疑辭也」，此《傳》即承前《傳》言之，「伐」下不當有  
「鄭」字。」文烝案：王說是也。《傳》先言「于棐林」者，出  
《經》文也。又言「地而後伐，疑辭」者，泛論《春秋》之例也。

又言「此其地何？則著其美」者，言此之以棐林地則非疑  
辭，乃特明救陳之師所至之地，所以著其美，與上善救陳之  
義相爲終始也。孔穎達曰：「陳在宋南，楚先侵陳，去陳乃  
侵宋也。陳既被侵，方始告晉，晉人起師救陳，楚又移師侵  
宋，晉師比至於鄭，楚師既已去矣，故諸國會于棐林，同共

伐鄭。棐林，鄭地。明晉始至鄭，不得與楚相遇，故竟無戰  
事。言救陳者，致其意耳。」孔說足與此《傳》相發。趙匡駁  
《傳》誤矣。

冬，晉趙穿帥師侵崇。【補曰】崇者，附秦小  
國。當從《左傳》。○【撰異曰】崇，《左氏》字亦作「密」，《公  
羊》作「柳」。趙坦曰：《周禮·縫人》注「柳之言聚」，《尚  
書大傳》注：「柳，聚也」。齊人語。《廣雅》：「崇，聚也。」此  
必齊人讀「崇」爲「柳」。

晉人，宋人伐鄭。伐鄭，所以救宋也。  
時楚、鄭侵宋。【補曰】疏曰：「《經》不言救宋者，以上有楚  
子、鄭人侵陳遂侵宋之文，今云晉人、宋人伐鄭，明救宋可  
知。」文烝案：楚、鄭侵宋之師早已去矣，以是時晉與宋共  
伐鄭，故言所以救宋也。《經》自不得有救文，與狄人伐衛  
所以救齊相類。

二年春王二月壬子，宋華元帥師及鄭公  
子歸生帥師戰于大棘，宋師敗績，獲宋華元。  
大棘，宋地。○【撰異曰】孔穎達《左氏正義》曰：「此華元、  
歸生及哀二年趙鞅、罕達，客主各言帥師者，皆是將尊師

衆，故並具其文。或於「歸生」之下無「帥師」之字，脫耳。「獲者，不與之辭也。」華元得衆甚賢，故不與鄭獲之。

【補曰】疏曰：「注言得衆，故不與獲，然則晉侯失民亦言獲者，晉侯雖失衆，諸侯無相獲之道，故亦不與秦獲也。徐邈云：「獲是不與之辭，與者當稱得也。定九年「得寶玉大弓」是也。」弓玉與人不類，徐言非也。」文烝案：不與之辭，施於兵獲則爲通例，凡書「獲」，蓋多因史文之舊，而其義則或以「不與獲」爲義，或以「引取之」爲義。《傳》於此發「不與」之例，謂書「獲」即見「不與」之義，不可更求「與之」之文以解《傳》，猶於麟言「引取之」，亦謂書「獲」即見「引取之」之義，不須更求「直取非引」之文以解《傳》也。戰所得俘，本當言獲，言獲即是不與。麟至既以「狩」爲文，狩所得獸，亦本當言獲，言獲即是引取之。寶玉、大弓，國之重器，器物之類，本當言得，失而復得，又當言得。「獲」與「得」訓釋雖同，而用字各不相假，皆史例之舊也。《左傳》例凡獲器用曰得，得用焉曰獲。姚鼐以爲器用者其器可用，用焉者謂人民走獸之屬能自動用其身，異於器之待人而爲用也。陸渚《纂例》「用力禽之曰獲，非用力禽之曰得」，與《左氏》亦兼通也。《易》曰：「田獲三狐，得黃矢。」獲、得連文而各別。又曰「王用出征，獲匪其醜」，「公用射隼于高墉之上，

獲之，无不利」，「田獲三品」，「得金矢」，「得黃金」，「君子得輿」，「或繫之牛，行人之得」，「失得勿恤」，「无喪无得」，「億喪貝，七日得」，「或得其桷」，「得其資斧」，「婦喪其茀，七日得」，此類皆與《春秋》相符，足知古人用字之例矣。隨有求得，隨有獲，得其大首，獲明夷之心，皆兩爻相承而異其文。得主、得朋、得女妻、得士夫、得友、得臣、得妾、得童僕、得敵，此類又自爲一例，難以俘獲比之。言盡其衆以救其將也。先言敗績而後言獲，知華元得衆心，軍敗而後見獲。晉與秦戰于韓，未言敗績而君已獲，知晉侯不得衆心明矣。以三軍敵華元，【補曰】「敵」當爲「救」，轉寫誤也。此承救其將言之。三軍謂宋師，宋爵稱公，得準元侯方伯之制，故言三軍也。或云三軍者，當時言軍之通稱，故子曰「三軍可奪帥」，子路曰「子行三軍」。華元雖獲，不病矣。何休曰：「書獲，皆生獲也，如欲不病華元，當有變文。」鄭君釋之曰：「將帥見獲，師敗可知，不當復書「師敗績」。此兩書之者，明宋師懼華元見獲，皆竭力以救之，無奈不勝敵耳。華元有賢行，得衆如是，雖師敗身獲，適明其美，不傷賢行。今兩書敗獲，非變文如何？」【補曰】敗獲兩書，常例也，非變文也。凡師敗者，或君將，或大夫

將。君傷言君敗，重君也；大夫傷則於師敗中包之，別於君也。若被獲，則無論君大夫，皆書敗書獲。獲既重於傷，而敗亦不可不書也。韓戰師敗君獲而不言敗，《傳》云「失民」，明特爲變文矣。既有彼變文，故此文有盡其衆以救其將之意，有不病華元之意，比類相較，其義自顯，豈謂非常例乎？鄭說無以折何氏，而劉敞疑之，抑殊不察。

### 秦師伐晉。

夏，晉人、宋人、衛人、陳人侵鄭。

秋九月乙丑，晉趙盾弑其君夷皋。【補

曰】晉靈公。○【撰異曰】皋，《公羊》作「獐」。穿弑也，

穿，趙盾從父昆弟。盾不弑，而曰盾弑何也？以

罪盾也。其以罪盾何也？曰靈公朝諸大

夫，【補曰】朝者，《公羊》以爲使諸大夫皆內朝也。其下文

云趙盾已朝而出，與諸大夫立於朝，則外朝矣。而暴彈

之，暴，殘暴。【補曰】《廣雅》曰：「暴，猝也。」此如「已孤

暴貴」、「瀧水暴益」之「暴」，謂出其不意，猝彈之也。《左

氏》、《公羊》皆謂從臺上彈之。觀其辟丸也。【補曰】

《說文》：「丸，圜也。傾側而轉者。」《公羊》曰「是樂而已

矣」，謂以是爲笑樂。趙盾入諫，不聽，【補曰】《左

氏》、《公羊》又有殺膳宰事，因此事入諫。出亡至於

郊，《禮》三諫不聽則去，待放於竟三年，君賜之環則還，賜

之玦則往。必三年者，古疑獄三年而後斷。《易》曰「係用

徽纆，寘于叢棘」，三歲不得，凶是也。自嫌有罪當誅，故

三年不敢去。【補曰】《左氏》、《公羊》謂靈公召盾飲食，將

殺之，盾乃出也。注首四句，疏謂本《公羊》、荀卿書。趙

穿弑公而後反趙盾。招使還。史狐書賊曰：

「趙盾弑公。」史，國史，掌書記事。狐，其名。【補曰】

董狐也，晉史所書如是。《左傳》乃曰「趙盾弑其君」，《公

羊》則直同《經》文，皆誤，趙汭言之矣。趙又云此與魯史諱

內惡不同，劉敞論此事則以諱惡爲仲尼新意。文烝以爲列

國之史，諸侯制也，魯史王禮也。隱、閔、子般、子惡之弑，

舊史本書薨卒，君子從而立不地不日之法也。以吾說求

之，乃可解劉知幾之惑。盾曰：「天乎！天乎！」

①「係」，原作「繼」；「寘」，原作「示」，據中華書局影印清

阮元重刻《十三經注疏》本《周易正義》改。

予無罪。告天言己無弑君之罪。孰爲盾而忍弑其君者乎？」迴己易他，誰作盾而當忍弑君者乎？【補

曰】王念孫曰：「注非也。爲，猶謂也，言誰謂盾而忍弑其君也。《公羊》曰「誰謂吾弑君者乎」是其證。古書「爲」字或與「謂」同義，二字可互用。」史狐曰：「子爲正卿，

人諫不聽，出亡不遠，君弑，反不討賊則志同，志同穿也。志同則書重，非子而誰？」盾是

正卿，又賢，故言重。【補曰】《傳》明晉本以盾弑赴，不以穿。葉夢得曰：「《左氏》傳史不傳《經》，故雖得於三言，而莫知《春秋》之義，正在於志同則書重，乃略而不言。」故書

之曰晉趙盾弑其君夷皋者，過在下也。鄭嗣

曰：「成十八年晉弑其君州蒲，《傳》曰：「稱國以弑其君，君惡甚矣。」然則稱臣以弑，罪在臣下也。趙盾弑其君，不言罪而曰過者，言非盾親弑，有不討賊之過。」【補曰】言故書之者，明史從赴書。盾弑而君子仍之，上言以罪盾，此言過在下，互辭。曰：於盾也見忠臣之至，於許世子止見孝子之至。邵曰：「盾以亡不出竟，反不討賊，受弑君之罪，忠不至故也。止以父病不知嘗藥，受弑父

之罪，孝不至故也。【補曰】曰者，目《經》意也。疏曰：「《春秋》必加弑於此二人者，所以見忠孝之至故也。忠孝不至則加惡名，欲使忠臣觀之，不敢惜力，孝子見之，所以盡心，是將來之遠防也。盾與止加弑是同，而許悼書葬，晉靈不書葬者，止失嘗藥之罪輕，故書葬以赦止，盾不討賊之罪重，故不書晉侯葬，明盾罪不可原也。」文烝案：晉從弑君不葬之例，許仍存史文。蘇轍曰：「言忠臣之至，孝子之至者，所以爲教也，非以爲法也。《孟子》言以不義取之於民者猶禦也，充類至義之盡也。充類至義之盡而名之曰禦則可，以禦誅之則不可，故《春秋》以弑君責之，非以弑君誅之也。」

冬十月乙亥，天王崩。匡王也。【補曰】《史

記》襄王子頃王壬臣，《世本》名巨，頃王子匡王班。范注贅王室事，自女栗後，文十四年春頃王崩不志，至此乃志。

三年春王正月，郊。牛之口傷。之口，緩辭也。傷自牛作也。牛自傷口，非備災之道不至

也，故以「緩辭」言之。【補曰】《公羊》亦云「緩」。疏曰：「舊解范別例云言「之」凡三十五，范既總爲例，則言「之」者並是緩辭，《傳》於執衛侯云「言之，緩辭也」，則其餘不發者

亦緩可知耳。」文烝案：下句申上「緩」意也，傷自牛作，非人所能，不得責人不敬，故爲緩辭，與成七年「緩辭」同意。此牛不須免，見成七年注。

### 改卜牛，牛死，乃不郊。事之變也。牛無

故自傷其口，易牛改卜復死，乃廢郊禮，此事之變異。【補

曰】後牛又自死，非人所能，謂之變而已。乃者，亡乎

人之辭也。譏宣公不恭致天變。【補曰】注解「亡乎人」

非也，說見僖三十一年。疏曰：「重發《傳》者，嫌牛死于卜

郊不從異也，不言免牛而云不郊者，牛死不行免牛之禮，故

直言不郊也。」文烝案：所改卜之牛即《公羊》及《郊特牲》

所謂稷牲、稷牛也。此牛又死若傷，不得又有牛，則不郊

矣。《公羊》曰：「曷爲不復卜？養牲養二卜，帝牲不吉，

則扳稷牲而卜之。帝牲在于滌三月，於稷者唯具是視。」

《公羊》之意以初時十月繫牲於滌宮，帝牲稷牲並繫，十月、

十一月、十二月共有三月。今因帝牲有災，謂之不吉，則改

卜稷牲爲帝牲，帝牲還是在滌之牲，其稷牲但須視其體具

所以爲可，若再有牲變，則無復有牛可爲帝牲，當止不郊，

故再變不復卜也。但改卜之稷牲何以決其必吉？啖助以

爲不吉則亦不郊，或恐此卜但示有其事，不復細論，蓋因前

此十月繫牲時二牲已皆卜而得吉故歟？《郊特牲》曰：

「帝牛不吉，以爲稷牛，帝牛必在滌三月，稷牛唯具。」孔穎

達曰：「爲，猶用也。用稷牛而爲帝牛，其祭稷之牛，臨時

別取用。」此皆與《公羊》同，知《穀梁》意亦不異。

### 猶三望。【補曰】前牛傷，後牛死，並在正月，皆不

可知其在某日。三望是上辛與否？抑或非用辛？無以

言之。屬上「天王崩」而書郊之變，同於他文。不譏卜郊牛

者，董仲舒曰：「《春秋》之義，國有大喪者止宗廟之祭而不

止郊祭，不敢以父母之喪廢事天地之禮也。父母之喪，至

哀痛悲苦也，尚不敢廢郊也，孰足以廢郊者？故其在禮亦

曰喪者不祭，唯祭天爲越蒞而行事。」又曰：「《春秋》譏喪

祭不譏喪郊。」杜預曰：「王崩未葬而郊者，不以王事廢天

事。」又引《曾子問》：「天子崩未殯，五祀不行，既殯而

祭。」自啟至於反哭，五祀之祭不行，已葬而祭。」文烝案：

杜意又有與舊異者，謂君薨既祔，作主以後，宗廟四時常祭

亦得行，不用三年不祭之說。杜非也。

### 葬匡王。【補曰】蒙上月。

### 楚子伐陸渾戎。○【撰異曰】《左氏》「戎」上有

「之」字。《公羊》作「伐賁渾戎」。《音義》：「賁音奔。」案：

古「陸」字與「睦」通。《說文》「畜」，古文「睦」，與「賁」相似。

### 夏，楚人侵鄭。

秋，赤狄侵齊。【補曰】自此赤狄四見，白狄三

見。孔穎達曰：「謂之赤、白，其義未聞，蓋其俗尚赤衣、白衣也。」文烝案：以《左傳》、《國語》、《呂氏春秋》、杜氏《後序》引《汲冢紀年》考之，莊三十二年狄伐邢，僖三十三年晉人敗狄于箕，皆白狄也。閔二年狄入衛，僖二十四年狄伐鄭，文七年狄侵我西鄙，皆赤狄也。《經》皆通言不別，至此別之者，亦北燕，從史文之例。何休以爲「進稱赤」，非也。

### 宋師圍曹。

冬十月丙戌，鄭伯蘭卒。

葬鄭穆公。【補曰】蓋不蒙月，在時葬正例。

四年春王正月，公及齊侯平莒及郟。莒

人不肯。【補曰】莒大於郟，故以莒及。王葆說是。《爾

雅》曰：「肯，可也。」月者，從平例。及者，內爲志焉

爾。【補曰】重發《傳》者，嫌平不入例也。平者，成

也。【補曰】重發《傳》者，以內平外，嫌有異也。不肯

者，可以肯也。凱曰：「君子不念舊惡，況爲大國所和乎？」【補曰】平例稱人，故不肯平者亦稱人，與輪平同。

公伐莒，取向。向，莒邑。伐猶可，取向甚

矣。以義兵討不平，未若不用兵以義使平者也，故曰猶可

也。【補曰】注非也。直言伐者，容有義兵，所以爲可。今

加言取向，言伐又言取，則貪其利而已，所以爲甚。隱四年

引舊《傳》曰「言伐言取，所惡也」，《傳》以凡諸義兵爲可，而

曰猶者，諸侯未賜弓矢，不專征伐，雖較善，已非大平法。

莒人辭，不受治也。乘義取邑，所以不服。【補曰】

治，討也。不受治，即上不肯平也。言平人國而取其邑，則

不肯平者轉有辭。伐莒，義兵也。討不釋怨。【補曰】

義兵者，假義以爲兵名，是亦義也。案：《孟子》曰「春秋無

義戰」，趙岐注曰：「《春秋》所載戰伐之事，無應王義者

也。《章指》又曰：「征伐誅討，不自王命，故曰無義戰也。」

然則《孟子》所謂義，非即《傳》所謂義。又曰「彼善於此則

有之矣」，善則《傳》所謂義耳。取向，非也，乘義而

爲利也。【補曰】義利渾言則通，析言則別。《易·文言

傳》、《左傳》並曰「利者，義之和也」；《國語》曰「義者，利之足

也」；《墨子》經曰「義，利也，二者通也」。《論語》「君子喻於義，小人喻於利」；《大學》言「以義爲利」；孟、荀並言先義後利，則二者別也。董仲舒言「義養心，利養體」。至朱子以天理人欲爲說，意尤切至。「天理」字本《樂記》，乃程伯子所以得不傳之學者矣。齊桓伐楚，韓非謂其義於名而利於實，宣公乘義爲利，并其所假之義而失之，與凡伐取者同，故還從所惡常例。不致者，從例也。

秦伯稻卒。【補曰】秦共公。

夏六月乙酉，鄭公子歸生弑其君夷。【補

曰】鄭幽公，後改爲靈公。《左傳》以爲公子宋弑君，歸生從之者耳。李廉據後十年鄭改葬謚時，斲子家之棺而逐其族，疑實歸生弑。

赤狄侵齊。

秋，公如齊。

公至自齊。

冬，楚子伐鄭。【補曰】上年侵，下年又伐，明此非討賊矣。

五年春，公如齊。

夏，公至自齊。

秋九月，齊高固來逆子叔姬。【補曰】月者，

爲下卒。○【撰異曰】《左氏》此處無「子」字。段玉裁曰：

「後人據《傳》妄刪《經》字耳。其實《傳》是省文。」諸侯之

嫁子於大夫，主大夫以與之。《婚禮》主人設几筵

于廟以待迎者，諸侯大夫尊卑不敵，故使大夫爲之主。來

者，接內也，不正其接內，故不與夫婦之稱

也。來者，謂高固。高固，齊之大夫，而今與君接婚姻之

禮，故不言逆女。【補曰】此注視莒慶《傳》爲詳。「來者」一句

誤。疏曰：「重發《傳》者，莒慶，小國之大夫，高固，齊之尊

卿，而娶公之同母姊妹，嫌待之禮殊，故發《傳》明其不異也。

徐邈云，《傳》言「吾子」，是宣公女也，理亦通耳。」文烝案：徐

非也。孔穎達據公孫茲如牟，知高固亦因來聘而自逆。

叔孫得臣卒。【補曰】疏曰：「不日則惡可知矣。」

何休云，知公子遂欲弑君而匿情不言，未審范亦然以否。」

冬，齊高固及子叔姬來。及者，及吾子

叔姬也。爲使來者，不使得歸之意也。高固

受使來聘而與婦俱歸，故書「及」以明非禮。莊二十七年冬



杞伯姬來，僖二十八年秋杞伯姬來，皆不言所及，是使得歸之意。【補曰】疏曰：《經》既言「及子叔姬」，《傳》何須更言「及吾子叔姬也」？以方欲解「及」爲非禮，故上張其文也。「灋之會去」及「爲非禮」，此書「及」爲非禮者，公與夫人之行須言「及」，以別尊卑。陽穀之會言「公及夫人姜氏」，而灋之會以夫人之伉不言「及」，故知去「及」爲非禮。今叔姬歸寧當以「獨來」爲文，高固奉命宜云「來聘」，《經》總之言「來」，故知書「及」爲非禮。」文烝案：凡內女書「來」者，皆不使得歸也，此必以爲使來，明其不使得歸者，彼皆是諸侯夫人直來，則非禮可知。子叔姬爲大夫妻，大夫妻有歲一歸宗之禮，直言「來」，嫌使得歸，故總言之以見義。本以其隨夫偕來，譏其非禮，故《傳》順《經》意釋之也。其實大夫妻歲歸宗惟同國則可，嫁他國者亦不得無事歸宗，與夫人同。就使叔姬獨來，《經》直書曰齊高叔姬來，亦是不使得歸之意，《傳例》所謂婦人既嫁不踰竟也，特此處未暇論耳。范注失之。○《左傳》曰：「反馬也。」說亦可通於《傳》。反馬不親行，此因聘親自反馬也。杜預曰：「禮送女留其送馬，謙不敢自安，三月廟見，遣使反馬。」孔穎達曰：「謙不敢自安者，若被出棄，將乘之以歸也。」

### 楚人伐鄭。

六年春，晉趙盾、衛孫免侵陳。此帥師也，其不言帥師何也？據元年趙盾帥師救陳言帥師也。【補曰】元年稱帥師救陳，此亦帥師可知，疏得之。不正其敗前事，故不與帥師也。元年救而今更侵之。【補曰】元年救陳下，四國君會晉趙盾，變文書曰會晉師，是與趙盾以帥師之明文也。前變文與帥師，此變文不與帥師，其文相對，明《經》意不正其敗前事矣。

夏四月。

秋八月，螽。

冬十月。

七年春，衛侯使孫良夫來盟。來盟者，前定也。不言及者，以國與之。不言其人，亦以國與之。不日，前定之盟不日。【補曰】疏曰：「重發《傳》者，宋華孫不稱使，此則稱使，嫌異，故重發之。言不日者，據及荀庚盟之屬有日也。」文烝案：「不言其人」二句，僖三年、成三年《傳》俱有之，乃釋成三年及荀

庚盟之屬，注詳成三年。此不日又不月者，《左傳》曰「始通，且謀會晉」，蓋以公得會晉自此始，故不月以異之歟？首句「者」字，各本脫，今依唐石經及余仁仲萬卷堂經注本、呂本中《集解》本、俞皋《集傳釋義》本補正。余本存者，自宣公起，何焯校出。

### 夏，公會齊侯伐萊。

### 秋，公至自伐萊。

大旱。【補曰】竟九月零不得雨，故不言大雩爲災，

故不言不雨。

### 冬，公會晉侯、宋公、衛侯、鄭伯、曹伯于

黑壤。黑壤，某地。【補曰】當云晉地，即昭二十五年之

黃父。

### 八年春，公至自會。

夏六月，公子遂如齊，至黃乃復。蓋有疾

而還。黃，齊地。【補曰】《公羊》曰：「有疾也。」注當去

「蓋」字。乃者，亡乎人之辭也。鄭嗣曰：「大夫受

命而出，雖死，以尸將事。今遂以疾而還，失禮違命，故曰

亡乎人。言魯使不得其人也。【補曰】注解「亡乎人」非也，說見僖三十一年。重發《傳》者，前是天災，此是有疾，其事異也。復者，事畢也，不專公命也。遂以疾反，而加「事畢」之文者，是不使遂專命還。【補曰】事畢，謂至國，下云「反命」是也。此與公孫敖同義。上注「以尸將事」之義宜說於此。

### 辛巳，有事于大廟。【補曰】此蓋禴也，諸侯禴

或雉或禴，此禴于大廟，禴與否無以言之。何休曰：「書有事者，爲不去樂張本。」鄭君《禘禴志》曰：「說者以爲有事謂禘，爲仲遂卒張本，故略之言有事耳。」何、鄭意皆得之。鄭所引說者，謂《左氏》說，彼《傳》無禘文，言禘非也。國之大事，在祀與戎，古者稱祀戎皆曰有事，故言有事也。日者，不去樂，失禮例當日。下又有「壬午繹」，須此起之。此祭雖無失禮亦當日，仲遂本不卒者，卒之不當日明矣。仲

遂卒于垂。祭于大廟之日而知仲遂卒。垂，齊地。爲

若反命而後卒也。先書復，後言卒，使若遂已反命于

君而後卒于垂。【補曰】垂是齊地，遂卒在辛巳前，今以君聞卒之日爲其卒日者，見臣子之義，與公孫嬰齊同意。又因遂卒本不當日也，不移卒文於辛巳祭前者，本不當卒，若

先出卒文，雖疏之，未足見意。此公子也，其曰仲何也？疏之也。僖十六年《傳》曰：「大夫不言公子公

孫，疏之也。」【補曰】疏曰：「遂見疏而去公子，《經》不可單稱遂卒，以遂於後以仲爲氏，故稱仲遂卒也。」文烝案：大夫卒不可直名者，嫌是不命大夫，若無佻、俠之等也。遂之身已以仲爲氏，劉炫以爲受賜，得之。疏言遂於後以仲爲氏，非也。何爲疏之也？是不卒者也。遂與宣

公共弑子赤。【補曰】是弑君賊，不當書卒者。不疏則

無用見其不卒也。若書公子，則與正卒者同，故去公

子以見之。則其卒之何也？據公子翬不書卒。以

譏乎宣也。其譏乎宣何也？聞大夫之喪則

去樂卒事。去籥萬，卒祭事，言今不然。【補曰】去樂

者，凡有聲無聲之屬悉去之也，今不去樂卒事，故卒仲遂以譏宣。但宣雖去樂卒事而壬午猶繹，非禮，當先書去樂卒

事以明正，繼書壬午猶繹以示譏，仍不得不卒仲遂，其理易見，故《傳》不具言耳。何休曰：「禮：大夫死，爲廢一時之祭；有事於廟而聞之者，去樂卒事，卒事而聞之者，廢繹。」文烝案：《傳》言「是不卒者也」，以譏乎宣也。昭十四年

《傳》曰：「意如惡，然而致見君臣之禮也。」兩《傳》意同。李光地說下「猶繹」曰：「《檀弓》載仲尼言卿卒不繹，則遂之功罪姑無論矣。韓子詩云《春秋》書王法，不誅其人身，此類是也。」文烝案：劉敞亦云《春秋》之設辭也，非其人之謂也，蓋其道之謂也。

壬午，猶繹。【補曰】各本此《經》下衍「萬人去籥」四字，今依唐石經、十行本刪正。猶者，可以已之辭也。【補曰】疏見文六年。繹者，祭之旦日之享賓也。【補曰】疏曰：「旦日，猶明日也。謂之繹者，繹陳昨日之禮。」文烝案：《公羊》曰：「祭之明日也。」《爾雅》

曰：「又祭也。」何休以爲繹繼昨日事。孫炎以爲祭之明日，尋繹復祭也。享賓者，賓尸，謂以尸爲賓而享之。天子諸侯曰繹，以祭之明日；卿大夫曰賓尸，與祭同日。繹亦是賓尸，異其名耳，故《傳》以「享賓」解「繹」也。何休曰：「殷曰彤，周曰繹。繹者，據今日道昨日；彤者，據昨日道今日。祭必有尸者，節神也。禮：天子以卿爲尸，諸侯以大夫爲尸，卿大夫以下以孫爲尸。」

萬人，去籥。萬，舞名。籥，管也。【補曰】此本杜預。萬人籥人，與諸書人者異也。去，徹也，藏也。訓

「藏」字或作「弄」，後人別之耳。鄭君《周禮》注曰：「去樂藏之也。」又引此而曰「萬言人則去者不入，藏之可知」。鄭言藏是也，言不入非也。籥即在萬中，昭十五年「籥入」、「去樂」，不可言「樂不入」明矣。以其爲之變，譏之也。內舞去籥，惡其聲聞，此爲卿變於常禮，是知其不可而爲之。【補曰】《公羊》曰：「萬者何？干舞也。籥者何？籥舞也。其言萬人去籥何？去其有聲者，廢其無聲者，存其心焉爾。存其心焉爾者何？知其不可而爲之也。」何休曰：「干，謂楯也，能爲人扞難而不使人害，故聖王貴之以爲武樂。萬者，其篇名。武王以萬人服天下，民樂之，故名之云爾。籥，所吹以節舞也。吹籥而舞，文樂之長。去其有聲者，不欲令人聞之也。廢，置也。置者，不去也，齊人語。」文烝案：《傳》文簡略，須以《公羊》證明之。何氏解「萬」字不合古義。《詩》曰：「方將萬舞。」《毛傳》曰：「以干羽爲萬舞。」陳旻曰：「《樂記》：『羽籥干戚，樂之器也』，干舞有干與戚，羽舞有羽與籥，羽舞亦曰籥舞。干舞爲武舞，以舞大武，羽籥舞爲文舞，以舞大夏。曰萬者，又兼二舞以爲名也。」《韓詩傳》：「萬，大舞也，以干羽舞，故爲大舞。」《逸周書·世俘》：「籥人奏武，王入進萬。」孔晁

注曰：「武以干羽爲萬舞。」《春秋》言「萬人去籥」，明萬必有籥。《左傳》：「考仲子之宮，將萬焉。公問羽數于衆仲。」【眉批】：《左傳》四語，陳疏所無，以意裨足之。明萬必有羽。孔穎達引《異義公羊》說「樂萬舞以鴻羽，取其勁輕，一舉千里」，又引《韓詩》說「以夷狄大鳥羽」，則萬舞有羽，古無異說。萬舞或可省言干，故《公羊》謂萬爲干舞，雖專言干舞，不謂萬無羽籥，故《異義》所載《公羊》說以萬爲羽，正與《傳》相補備。何休以爲萬取武王以萬人服天下之義，不爲羽籥舞之兼號。鄭君《詩》箋以萬爲干舞，籥翟乃爲籥舞。誤矣。《夏小正傳》曰「萬也者，干戚舞也」，蓋亦誤。陳疏申明毛義，詳確可據，自呂祖謙發其端矣。《夏小正》、《商頌》皆有萬，而何休以爲起武王者，本《春秋》說文。蓋以《小正》未足據，《商頌》則宋襄公時詩也。《郊特牲》以「朱干，設錫，冕而舞《大武》」爲諸侯之潛禮，則侯國之祭本無干舞。《祭統》稱成王、康王賜魯大嘗、禘，「朱干玉戚以舞《大武》，八佾以舞《大夏》，此天子之樂也」。明魯不與他國同。郝懿行《爾雅義疏》說籥，據《詩傳》、《說文》、《禮注》、《風俗通》、《廣雅》、《詩音義》諸文，以爲吹籥短於笛而三孔，舞籥長於笛而六孔，或七孔。趙汴曰：「禮樂者，先王大典，其節文之末，皆精義所存，諸侯不得妄有損益。《王制》變禮易樂者

爲不從，不從者君流，故猶繹之失，去樂之得，史皆書之，以謹亡失之漸。」文烝案：此所謂周禮在魯而君子尤重之也。

○夫子於魯之禮樂蓋兢兢焉，人大廟則每事問。告顏淵爲邦則述魯之舊法，斯《春秋》之志也。皇侃說《論語》行夏之時，謂祭祀田獵播種也。乘殷之路，謂郊乘素車也。服周之冕，謂郊廟用衮冕也。樂則《韶舞》，謂郊禘大賓，【眉批】：「郊禘大賓」四字增訂。備四代之樂，從虞氏始也。

戊子，夫人熊氏薨。宣公妾母。【補曰】何休

以爲即僖所娶楚女。宣爲僖之妾子，乖異難據。孔廣森謂楚以熊爲氏，芊爲姓，或其公族屈氏、鬬氏之屬可更以熊爲姓。○【撰異曰】熊，《左氏》作「羸」。

晉師、白狄伐秦。

楚人滅舒、鄧。【補曰】群舒也。《左傳》曰：「楚

子疆之，及滑汭。盟吳，越而還。」洪咨夔曰：「循江而下，以及於淮，與吳，越接壤也。」案：此在時例。○【撰異曰】鄧，本又作「夢」，《左氏》、《公羊》作「夢」。

秋七月甲子，日有食之，既。

冬十月己丑，葬我小君頃熊。文夫人姜氏

大歸于齊，故宣公立己妾母爲夫人，君以夫人禮卒葬之，故

主書者不得不以爲夫人，義與成風同。【補曰】疏曰：「成風再貶，自外妾母不譏者，從一譏故也。」文烝案：注首二語本鄭君《駁異義》說，見《通典》。凡適母被廢則妾母得爲夫人也，此不可通於《穀梁》，前論之。《左傳》曰：「葬敬嬴。早，無麻，始用葛菲。」○【撰異曰】頃熊，《左氏》作「敬嬴」。案：頃、敬古通用。《說苑》以南宮敬叔爲頃叔。趙匡謂「頃」是惡謚，追尊不應加惡謚。非也。雨，不克

葬。葬既有日，不爲雨止，禮也。雨，不克

葬，喪不以制也。徐邈曰：「案《經》文是己丑之日葬，

喪既出而遇雨，若未及己丑而卻期，無爲逆書此日葬。

《禮》喪事有進無退，又《士喪禮》有潦車載蓑笠，則人君之張設，固兼備矣。《禮》先遷柩於廟，其明味爽而引，既及葬日之晨，則祖行遣奠之禮設矣。故雖雨猶終事，不敢停柩久次。【補曰】疏曰：「舊解案《禮》『庶人縣封，葬不爲雨止』，明天子諸侯不觸雨而行。《傳》言『不爲雨止』者，謂不得止葬事而更卜遠日。喪不以制者，謂不得臨雨而制喪事，豈有諸侯執紼者五百人觸雨而行哉？是徐邈之說，理之不通。今案：《傳》文云『喪不以制』，是喪事不以禮制，上文『不爲雨止，禮也』，明爲雨止則非禮可知，安得云《傳》

意葬爲雨止乎？又且范引徐注不言其非，何爲述范義而違之？「未及己丑而卻期者，謂雨之與葬皆是己丑之日也，若未及己丑之日而遇雨，其葬期有卻者，何爲逆書己丑日葬也？」孔廣森曰：「《穀梁》之說謂既發引至於壙，不可因雨而乖有進無退之義，又非可若日食止柩道右以須明復，故有潦車之載，蓑笠之備。若其在廟祖遣，柩猶未行，雨霑服失容，自當卻改期日。」此孔氏因徐注、楊疏而加詳，又略本《王制》、《正義》之說，以通合《左傳》、《王制》之文也。今案：《左傳》曰：「雨，不克葬，禮也。禮，卜葬先遠日，辟不懷也。」《王制》曰：「庶人縣封，葬不爲雨止。」鄭君曰：「縣封當爲縣寔，雖雨猶葬，以其禮儀少。」孔穎達《正義》又引許慎《異義公羊》說「卿大夫臣賤，不能以雨止」。《左氏》說則與《王制》同，以爲此皆謂已發在路及葬也。又引鄭君《釋廢疾》「雖庶人葬爲雨止」，以爲此謂在廟未發也。其人君無論在廟在路，及葬皆爲雨止，故《公羊》說「雨不克葬」，謂天子諸侯也。《左氏》說「卜葬先遠日，辟不懷也」，惟《穀梁》說「葬既有日，不爲雨止」，許慎以爲非也。《正義》又云「鄭無駁」，與許同。許引《論語》云「死葬之以禮」，以爲以雨而葬是不行禮。何休注亦同。孔廣森欲通之於《穀梁》，乃取徐邈說，指已發在路，不別人君人臣。又據《王制》文

謂士以上皆爲雨止，則庶人雖未發亦不止，皆不合先儒所論。孔又別爲說曰：昔魏葬惠王，雪及牛目，有司請弛期，襄王弗許，而惠子託爲樂水齧王季墓事以說之，可知雨不克葬爲禮，是則以大雪比甚雨，亦先儒所未言。竊嘗論之，《王制》、《左氏》說「庶人不爲雨止」，《公羊》說「兼及卿大夫」，其言已岐異矣。《王制》下文言「喪不貳事」，亦屬庶人，而《穀梁》此年《傳》「不爲雨止」，文十六年《傳》「喪不貳事」，皆言人君之禮，則知《王制》爲記述之疏謬，而《左氏》、《公羊》皆未可用，許慎、何休、鄭君、孔穎達及《穀梁》舊解皆失之也。雨有甚不甚，葬有未發已發之別，《傳》但大概言之，謂葬既卜得日，於禮無止，止則以爲非制耳。徐注、楊疏、孔廣森亦皆失之也。

庚寅，日中而克葬。【補曰】何休曰：「別朝莫

者，明見日乃葬也。」文烝案：日中者，時加午也。而，緩辭也，足乎日之辭也。【補曰】疏曰：「與定十五年『日下稷，乃克葬』二文相對爲緩急。」文烝案：《公羊》曰：「而者何？難也。乃者何？難也。曷爲或言而或言乃，乃難乎而也。」《公羊》意與《傳》同。時加於午，視日下稷爲早，是以其足乎日而爲緩辭也。緩亦是難，視彼爲緩耳。

城平陽。【補曰】杜預《釋例》曰：「此東平陽也。」

杜以《左氏》哀二十七年《傳》之平陽爲西平陽。

楚師伐陳。【補曰】僖之篇楚兩稱師，一以公以

之，一以敗也。自此後始有師。

九年春王正月，公如齊。有母之喪而行朝

會，非禮。【補曰】孔廣森曰：「月者，正月也。」文烝案：

《疏》引往月危往之例，以爲此朝書月即是非禮之異文，不

知正月書月者非必在危例。襄公母以四年七月薨，其冬公

如晉不月，明書月不以其非禮，非禮易見，無假於月也。

禮：庶子爲後，爲其母總。今以爲夫人，則不用此制。

《禮·服問》有「近臣從服唯君所服」之語。

公至自齊。

夏，仲孫蔑如京師。【補曰】仲孫蔑，公孫敖孫

孟獻子也。蔑父文伯，名穀，其叔父惠叔，名難。《左傳》是

春「王使來徵聘」。

齊侯伐萊。

秋，取根牟。【補曰】疏曰：「當爲國名。」案：杜

預以爲東夷國，故疏從之。滅夷狄例時，說亦可通。但《穀梁》此處無《傳》，則非國也。取邑例時，當是取邑。諸取國及邑不出主名者，孔廣森曰：「蓋微者取之。」如孔說，則皆是內稱人之文，與入杞、伐邾同，與取濟西田異，未敢定也。

八月，滕子卒。【補曰】滕昭公。

九月，晉侯、宋公、衛侯、鄭伯、曹伯會于

扈。【補曰】月者，爲下卒日。

晉荀林父帥師伐陳。

辛酉，晉侯黑臀卒于扈。【補曰】晉成公也。

《公羊》曰：「扈者何？晉之邑也。」案：扈本鄭地，不知何

時入晉。其地，於外也。外，謂國都之外，諸侯卒於路

寢則不地。【補曰】國都之外及竟外，皆外也，注專指此文，

但以國都之外解「外」字，非《傳》意也。地以地名，不地以

會者，成十三年《傳》曰「公大夫在會曰會」，徐邈謂內君大

夫在焉者也。此會公不在，故不言卒于會，《傳》雖無說，以

彼《傳》推之，或當然也。《公羊》以爲「未出其地，故不言

會」。「未出其地」，即《傳》所謂「未踰竟」，孫覺從之，說亦

可通。其日，未踰竟也。《傳例》曰：「諸侯正卒則

日，不正則不日。」舊說踰竟亦不日，然則諸侯不正而與已踰竟無以別之矣。案：襄七年鄭伯卒于操，此年晉侯卒于扈，文正與襄二十六年許男卒于楚同，恐後人謂操、扈是國，故於疑似之際，每為發《傳》曰「未踰竟也」。【補曰】此注甚錯謬。《傳》言在外未踰竟者當書日，與在竟外者不同，明書日為未踰竟之通例，不以正不正論也。在竟外而卒，苟非明書其所卒之國，則正不正悉不日，《傳》舉此以見彼。而舊說因謂踰竟不日，大概得之，說詳成十三年。此不葬者，疏曰「蓋魯不會」。

冬十月癸酉，衛侯鄭卒。【補曰】衛成公也。

不葬者，殺其母弟叔武失德，亦篡立之比也。前無見文，故去葬以明之。

宋人圍滕。

楚子伐鄭。○【撰異曰】子，各本誤作「人」。今依

唐石經、十行本改正。

晉卻缺帥師救鄭。

陳殺其大夫泄冶。【補曰】《大戴禮·保傳》、

《賈子書》、《韓詩外傳》皆曰「靈公殺泄冶，而鄧元去陳以族從」。不書鄧元出奔者，史本無之。○【撰異曰】泄，《左氏》

作「洩」，唐石經《公》、《穀》亦皆作「洩」，避諱改也。稱國

以殺其大夫，殺無罪也。【補曰】重發《傳》者，泄治

忠賢，異於申侯，將詳其事，故復發文。泄治之無罪如

何？陳靈公通于夏徵舒之家，【補曰】傍淫曰

通。謂徵舒母夏姬，鄭穆公女，御叔妻也。公孫寧、儀

行父亦通于其家，二人陳大夫。【補曰】此「于」字各

本脫，今依唐石經、余本、俞皋《集傳釋義》本補正。或衣

其衣，或衷其襦，衷者，襦在衷也。【補曰】「在衷」或

作「在裏」。《說文》曰：「衷，裏褻衣。」「襦，短衣也。」《釋

名》有反閉襦，有單襦，有要襦。杜預曰：「衷，懷也。」以

相戲於朝。泄治聞之，人諫曰：「使國人聞之

則猶可，使仁人聞之則不可。」【補曰】仁人，愛君者

也。公卿宣淫，可令聞乎？君愧於泄治，不能用其

言而殺之。【補曰】孔子稱比干為仁，泄治庶幾近之。王

肅《家語》載孔子語謂泄治不得同比干，引《詩·板》篇與《左

傳》文同，皆不足據也。何休說《公羊》言「泄治有罪」，似用

《左傳》，其作膏肓，則以為無罪，蓋以《左傳》究不可用。



# 春秋宣公經傳第六補注第十六

穀梁 范氏集解 鍾文烝詳補

十年春，公如齊。

公至自齊。

齊人歸我濟西田。【撰異曰】《公羊》、唐石經磨

改及鄂本「西」下有「之」字，誤衍也。公娶齊，齊由以

為兄弟，反之，齊由以婚族，故還魯田。《爾雅·釋親》

曰：「婦之黨為婚兄弟。」【補曰】《公羊》僖二十五年何休注

曰：「宋、魯之間，名結婚姻為兄弟。」《爾雅·釋親·婚姻

章》曰：「壻之父為姻，婦之父為婚。父之黨為宗族，母與

妻之黨為兄弟。婦之父母，壻之父母相謂為婚姻。兩壻相

謂為亞。婦之黨為婚兄弟，壻之黨為姻兄弟。」郭璞注曰：

「古者皆謂婚姻為兄弟。」《釋親》題章凡四：曰宗族，曰母

黨，曰妻黨，曰婚姻，通言之皆族也。《尚書》歐陽、夏侯說、

《禮》載說九族者謂父族四：父之姓，五屬之內也，父女昆弟適人有子也，身女昆弟適人有子也，身女子子適人有子也，母族三：母之父母也，母之昆弟也，母之女昆弟適人有子也；妻族二：妻之父也，妻之母也。竊以司徒族黨之名，皆取聚義。《小雅》「兄弟昏姻」之句並顯親情，各得通稱，非無意矣。不言來，【補曰】據鄆、讎、龜陰田言來。公

如齊受之也。【補曰】受者，受於齊侯也。諸言來者，

皆專使接公之文。此田公如齊受之，公至自齊，而齊人歸

之，其歸或無專使接公，不得言來。或雖有專使，而以公之

親受為重，於此可略，亦不須言來。趙匡難此《傳》，非也。

「濟西田」上加言「我」者，亦以公如齊受之，則齊人未歸之

前，此田已屬我，故特加「我」於歸時，以與不言來之義相為

接足。《傳》釋「不言來」，則此意亦兼見。《公羊》以為言

「我」者，未絕於我，齊已言取之，其實未之齊。何休曰：

「齊已言語許取之，其人民貢賦尚屬於魯。不言來者，明不

從齊來。」如《公羊》、何氏之義，則書「取」既為虛文，書「歸」

亦非實事，劉敞駁之是矣。

夏四月丙辰，日有食之。

己巳，齊侯元卒。《傳例》曰：「言日不言朔，食

晦日，則此丙辰晦之日也。己已在晦日之下，五月之上，推尋義例，當是閏月矣。文六年《傳》曰「閏月」者，附月之餘日，言閏承前月而受其餘日，故書閏月之日繫前月之下。蓋史策常法，文有定例，閏有常體，無嫌不明，故不復每月發《傳》。哀五年《公羊傳》曰「閏月不書，此何以書」？推此言之，則《春秋》固有在閏月而不冠以閏者矣。至於閏不告月，猶朝于廟，閏月葬齊景公，不正其閏，無以言其事，故書見變禮。【補曰】徐邈謂日食是三月晦日，《經》冠以四月耳。見隱三年，范非也。其論書閏不書閏之義則得之。

### 齊崔氏出奔衛。氏者，舉族而出之之辭

也。何休曰：「氏者，譏世卿也，即稱氏爲舉族而出，尹氏卒寧可復以爲舉族死乎？」鄭君釋之曰：「云舉族死，是何妖問甚乎？舉族而出之之辭者，固譏世卿也，崔杼以世卿專權，齊人惡其族，令出奔，既不欲其身反，又不欲國立其宗後，故孔子順而書之曰「崔氏出奔衛」，若其舉族盡去之爾。【補曰】舉，盡也。《公羊》之義不可通於《傳》。《傳》無譏世卿義，直謂舉族出耳。蓋崔氏在位者不止一人，今並去國，《經》辭尚簡，不可悉書，則書崔氏而已。此自不得以尹氏爲比。《左傳》以爲崔杼，趙鵬飛考校時代，疑其非杼，

爲附會之說。家鉉翁亦云。

### 公如齊。【補曰】《左傳》曰：「奔喪。」杜預曰：「公

親奔喪，非禮也。公出朝會奔喪會葬，皆書如，不言其事，史之常也。」趙汭曰：「宣之事齊恭矣，而莫甚於奔其喪。」黃仲炎曰：「宣以不義得國，舉千乘之魯，唯齊是聽，《孟子》所謂人役者也。」文烝案：此蒙上月，所以危之，與成十年同。

### 五月，公至自齊。【補曰】致亦月者，亦危之，非

但爲下弑日，成十一年亦同此往月致月有懼之例。

### 癸巳，陳夏徵舒弑其君平國。

### 六月，宋師伐滕。月者，蓋爲下齊惠公葬速起。

【補曰】疏曰：「宋師伐滕，外事也。歸父如齊，又不當月。諸侯時葬，正也，月葬，故也。今上有齊逐崔氏之文，又非五月而葬，明書月爲葬惠公。」文烝案：注「速」字可刪去，疏「又非」句亦當刪。

### 公孫歸父如齊。【補曰】歸父，遂之子子家。

### 葬齊惠公。【補曰】上年不會晉葬，於齊則卿往，

以事晉者事齊矣。

晉人、宋人、衛人、曹人伐鄭。

秋，天王使王季子來聘。其曰王季，王

子也。【補曰】王子已爲大夫，而未受采邑，無氏，又不得

以季繫王子，故繫於王。王季，猶言周季也。《左傳》謂之

「劉康公」，杜預曰：「其後食采於劉。」其曰子，尊之

也。子者，人之貴稱。【補曰】《公羊》曰：「其稱王季子

何？貴也。其貴奈何？母弟也。」《公羊》說是也。貴即

尊也，爲大夫故字，以母弟而爲大夫，故尊之加言「子」。尊

之言子，猶諸侯之弟來我，舉其貴者言弟也。一言弟，一不

言弟者，天子之尊其弟兄，尤不得以屬通也。聘，問也。

【補曰】重釋聘者，王季子尊，故備文。又王聘終於此也。

公孫歸父帥師伐邾，取繹。○【撰異曰】繹，

《公羊》作「類」。案：《左傳》文十三年「邾遷于繹」。此所

取孔穎達以爲別有繹邑，近在邾都旁。或當作「類」爲是。

大水。

季孫行父如齊。【補曰】《左傳》曰：「初聘于

齊。」杜預曰：「齊侯初即位。」

冬，公孫歸父如齊。【補曰】《左傳》曰：「伐邾

故也。」杜預曰：「魯侵小，恐爲齊所討，故往謝。」

齊侯使國佐來聘。【補曰】孔廣森曰：「未踰年

而稱侯以使者，既於王見居喪之正法，其餘即悉因其廢禮之實，以刺譏當世矣。」

饑。【補曰】《傳例》：「二穀不升謂之饑。」言饑，蓋

包饑與康矣。此饑由秋大水也。莊七年秋，大水，無麥苗，

周之秋苗可更種，惟無麥耳。冬不至饑，故彼冬無饑文。

餘諸水旱，螟螣之等，雖傷二穀以上，不至於無，或偶無一

穀，冬皆不至饑也。饑例時。○【撰異曰】本或作「飢」。

案：「飢」者，假借字。

楚子伐鄭。

十有一年春王正月。

夏，楚子、陳侯、鄭伯盟于夷陵。夷陵，齊

地。【補曰】杜預曰：「辰陵，陳地。」文烝案：陳未葬而稱

侯，陳靈、蔡靈之葬與他例不同，則陳成、蔡平之稱侯亦與

他例不同也。外盟不日，此又不月者，以楚遂主盟，故略之

甚，猶盟齊、盟鹿上之意也。○【撰異曰】夷，《左氏》、《公

羊》作「辰」。

公孫歸父會齊人伐莒。

秋，晉侯會狄于欒函。欒函，狄地。【補曰】

《左傳》言：「卻成子求成於衆狄，衆狄疾赤狄之役，遂服於晉。會于欒函，衆狄服也。」蓋此會乃晉所以翦赤狄之羽翼，爲十五年滅之之地。不言及，外狄也。所以異之於諸夏。【補曰】黃池之會書晉侯及吳子者，言及之文也。彼會若魯不與，當書晉侯及吳子會于黃池，吳不得從列數之例，以殊會爲外，以書尊及卑爲進。今不言晉侯及狄會，明是外之，猶吳之殊會矣。此義施於會，不施於盟，不得以衛人及狄盟爲難。黃池又進吳稱子，則別有義也。《傳》「也」字，各本脫，今依唐石經、余本、呂本中《集解》本、俞皋《集傳釋義》本、李廉會通本補正。

冬十月，楚人殺陳夏徵舒。變楚子言人者，

弑君之賊，若曰人人所得殺也。其月，謹之。【補曰】人人得殺者，即是衆辭，從殺有罪例也。孔穎達曰：「不稱大夫者，諸放殺及執他國之臣皆不言某國大夫，以人臣卑賤故也。」文烝案：凡殺他國君亦不稱君，皆例耳。疏曰：「其月謹之者，不能自討，藉楚之力，禍害必深，故書月爲謹之。」文烝案：下有丁亥，此亦當月。此人而殺也。其不

言人何也？據人國乃得殺。【補曰】繫陳而不地，明是

殺之於陳。《左傳》亦曰「人陳，殺夏徵舒」。外徵舒於

陳也。【補曰】晉人執衛侯不言人衛，曰不外王命於衛；

楚人殺陳夏徵舒不先言人陳，曰外徵舒於陳，觀此兩義，信所謂師受，而知非以其心意議矣。故《春秋》之微也，惟

《傳》顯之，《春秋》約而不速，惟《傳》使人優柔求之。其

外徵舒於陳何也？據徵舒陳大夫不應外。明楚

之討有罪也。雍曰：「《經》若書楚子人陳殺夏徵舒者，

則人者內不受，是無以表徵舒之悖逆，楚子之得正。」【補

曰】討得其罪，不可不明其義，此即《論語》請討齊陳恒之意，與下各自爲義也。《公羊》以爲貶楚子稱人，「不與外

討」，又以爲「雖內討亦不與」，「諸侯之義，不得專討」，「實

與而文不與」，是不達事理之言，當以下《傳》所云「猶可」者

爲定論也。《傳》於城楚丘云不與齊侯專封，解《經》書城而

不書衛遷之意，書城仍非譏也。文既不與，何由知其實

與？趙匡曰：「凡《春秋》得變之正，皆變文以許之，乃是文與，何得云不與乎？」

丁亥，楚子人陳。人者，內弗受也。日

人，惡人者也。【補曰】重發《傳》者，嫌討賊無罪也。

何用弗受也？【補曰】據討賊可受。不使夷狄爲

中國也。楚子入陳，納淫亂之人，執國威柄，制其君臣，

俱倒上下，錯亂邪正，是以夷狄爲中國。【補曰】注非也。

夷狄，謂楚也。爲，治也，治亦討也。以夷狄治中國而討

罪，不可以訓，故於此還從弗受常例，若不使得然。苟非夷

狄，則須有特異之文以當人文矣。此與下事又不相涉，下

事下自見義。《六經奧論》曰：「《穀梁》解《經》，大氏在於

尊王室，抑外夷，明賞罰，此三條備之。」

納公孫寧、儀行父于陳。○【撰異曰】寧，《公

羊》作「甯」。納者，內弗受也。【補曰】重發《傳》者，

彼納君，此納大夫，嫌異故也。輔人之不能民而討

猶可，雍曰：「輔相鄰國有不能治民者而討其罪人則可，

而曰猶可者，明鄰國之君無輔相之道。」【補曰】注言不能治

民，其理是，其說非也。「能」讀爲「柔遠能邇」之「能」。鄭

君《詩》箋曰：「能，猶伽也。」伽與「如」通，謂伽順也。不

能民者，不順民也。王念孫曰：「《書》言「不能厥家人」，

《左傳》言「人而能民」、「不能其民」、「不能其大夫」、「不能

外內」，《公羊》言「不能乎母」並同義。」文烝案：人之不順

民者，謂繼世之君未順乎民者也。言爲他國討賊之道若但

以之輔人則猶可，若如下所云「人人以制人」則不可也。

「猶」字義當如注說。孔穎達《王制正義》曰：「魯無弓矢之

賜，陳恒弑君，孔子請討之者，《春秋》之時，見鄰國篡逆亦

得專征伐。」此足與《傳》相證。人人之國，制人之上

下，使不得其君臣之道不可。二人與君昏淫當

絕，而楚強納之，是制人之上下。【補曰】上下即君臣，制之

則不得其道矣。疏曰：「麋信云：『二子不繫陳者，以其淫

亂，明絕之也。』或當上有入陳之文，下云「于陳」，故省文

耳，無義例。」文烝案：麋氏非也，疏是也。陸淳聞於師

曰：「討徵舒，正也，故書曰「人」，許其行義也。人人之國，

又納淫亂之臣，邪也，故明書其爵，以示非正也。《春秋》之

義，彰善癉惡，纖介無遺，指事原情，瑕瑜不掩，斯之謂也。」

張洽曰：「聖人予善之弘，待人之公，先旌其討賊之義，然

後著其人陳，且納亂臣之罪，游、夏不能與者也。」程端學以

爲視其所以者，當觀其所由，書殺於前，書入與納於後，其

由來者顯矣。○案：莊王入陳縣陳，因申叔時言復封陳，

此《左傳》所載也。《史記·陳世家》曰：「孔子讀史記，至

楚復陳，曰：「賢哉楚莊王！輕千乘之國而重一言。」王肅《家語》因之。夫使此言果夫子之言，何以《經》文絕無所見？《經》但言人，不言滅，於縣陳、封陳之曲折，無以言之也。司馬遷所謂「孔子讀史記」者，乃當時《公羊》家謬說，所謂求周史記，得百二十國實書者也，以爲《春秋》不專據魯史記者也。即此以觀，益知其言不足信。大氏秦穆、楚莊，《春秋》以爲夷狄而略之，皆未嘗賢之，亦不以霸待之。自二國日強，競相追美，《左氏》、《公羊》附和成說，《孟子》亦因時俗之論，稱秦穆之霸，而於百里奚、孫叔敖皆樂道焉，遂滋後人之紛紜矣。《風俗通》及趙鵬飛、家鉉翁、趙汭皆嘗論之，學者當據《穀梁》二伯之文，以明《春秋》專家之學。

十有二年春，葬陳靈公。《傳例》曰：「失德不葬，君弑，賊不討不葬，以罪下也。日卒時葬，正也。靈公淫夏姬，殺泄冶，臣子不能討賊，踰三年然後葬，而日卒時葬何邪？」秦曰：「楚已討之矣，臣子雖欲討之，無所討也，故君子即而恕之，以申臣子之恩。稱國以殺大夫，則靈公之惡不嫌不明，書葬以表討賊，不言靈公無罪也。踰三年而後葬，則國亂居可知矣。非日月小有前卻，則書時不

嫌。【補曰】注「楚已討之」三句本《公羊》。疏曰：「未五月謂之前，過五月謂之卻。言葬有前卻，則書月以見故，今年始葬，非是小有前卻，故書時不嫌也。」文烝案：書月見故者，雖適五月亦書，疏非也。此注「踰三年而」以下當改云「文承上事則有故居可知矣」，故書時不嫌，亦鄭莊公不日之例也。劉敞曰：「既葬而後乃討賊，賊雖已討，葬猶不追書也，閔公是已。討賊雖遲而葬，在討賊之後則葬得書，陳靈公是已。凡君弑賊不討不敢葬，父弑讐不復不敢葬，不敢葬則亦不敢除其服，是故寢苦枕戈，志必復而後已。」此賊不討不書葬之義也，所以《春秋》有其賊未討，雖久弗葬而弗非也。

### 楚子圍鄭。

夏六月乙卯，晉荀林父帥師及楚子戰于邲，晉師敗績。邲，鄭地。【補曰】《韓非》、《淮南子》並曰楚莊王勝晉於河、雍之間。雍即灘也。疏曰：「徐邈云：『先林父者，內晉而外楚。』」文烝案：此晉荀林父救鄭之師也。《左氏》、《公羊》同。《左氏》以爲晉聞鄭及楚平，乃濟河而戰，故不得以救鄭書。高澍然曰：「若書救鄭及楚戰，似楚圍未撤，鄭守未下，晉以戰爲救，皆非事實矣。」

績，功也。【補曰】《爾雅》同。又曰：「功、績，成也。」《墨子》經曰：「功利民也。」孔廣森曰：「敗績猶《周禮》言師不功。」功，事也。【補曰】轉相訓。《爾雅》曰：「績，事也。」日，其事敗也。【補曰】疏曰：「舊解此戰事書日者，爲敗之故也。特於此發之者，二國兵衆，不同小國之戰，故特發之。徐邈云：「於此發《傳》者，深閔中國大敗於彊楚也。今以「日」爲語辭，亦足通也。但舊解爲「日月」之「日」，疑不敢質，故皆存耳。」文烝案：徐說是也。「日」當音「聿」。《左傳例》曰大崩、曰敗績」。

### 秋七月。

冬十有二月戊寅，楚子滅蕭。【補曰】《傳》以蕭爲微國。滅例中國日，卑國月。此在月例日者，蓋以蕭近宋之國，楚莊夷狄之盛，故進而詳之。疏引徐邈云：「蕭君有賢德，故書日。」文烝案：徐說以晉滅潞氏推之，但此無以其君歸之文，未必於君身取義。

晉人、宋人、衛人、曹人同盟于清丘。清丘，衛地。【補曰】案：《左傳》晉原穀、宋華椒、衛孔達皆大夫也，稱人者，蓋以晉師新敗，霸業已衰，故略之。既著同外楚文，則無嫌爲卑者。

宋師伐陳。【撰異曰】徐彥《公羊疏》曰：「宋師伐陳者，案諸家《經》皆有此文，唯賈氏注者闕此一《經》，疑脫耳。」

衛人救陳。【補曰】疏曰：「此不言善者，衛、宋同盟外楚，今反救陳，不足可善，故《傳》不釋。」文烝案：此是《傳》略不具耳。《經》論其大義，不屑屑論之。衛人救陳，楚人救衛，楚公子貞帥師救鄭，皆善也。趙孟何曰「讀《春秋》者不可於細事上求」是矣。

十有三年春，齊師伐莒。○【撰異曰】《公羊》作「伐衛」。汪克寬曰：「前後無齊、衛交怨之事。」

夏，楚子伐宋。【補曰】自九年以來，連書楚子凡八事。莊王會盟征伐，皆身親之。李光地曰：「見中國政在大夫，宜其不競於楚。」

### 秋，螽。

冬，晉殺其大夫先穀。○【撰異曰】穀，一本作「穀」。唐石經磨改作「穀」，《左氏》、《公羊》作「穀」。

十有四年春，衛殺其大夫孔達。

夏五月壬申，曹伯壽卒。

晉侯伐鄭。

秋九月，楚子圍宋。【補曰】疏曰：「徐邈云：

「圍例時，此圍久，故書月以惡之。」文烝案：月或爲下葬。

葬曹文公。

冬，公孫歸父會齊侯于穀。

十有五年春，公孫歸父會楚子于宋。【補

曰】地以宋者，與僖二十七年同說。高澍然曰：「僖會盟于薄，復會盟于宋，歸父復會于宋，宋東北與魯接壤，懼楚師及己，故先納款。」

夏五月，宋人及楚人平。【補曰】月者，例也。

平之正例，內外皆月。○【撰異曰】陳岳《春秋折衷》曰：

「《左》、《穀》『宋人及楚平』，《公羊》作『及楚人平』。」案：

《左》、《穀》皆作『及楚人平』，陳氏誤。平者，成也。

【補曰】疏曰：「重發《傳》者，嫌外內異也。」案：當云此無內文，嫌有異。善其量力而反義也。各自知力不能相

制，反共和之義。【補曰】小國事大國，大國比小國，義也。

人者，衆辭也。平稱衆，上下欲之也。【補曰】

上下，謂君及臣民。《左氏》賈逵注曰：「善其與衆同欲。」

謝湜曰：「宋見圍凡九月，外無隻輪匹馬之援，內有析骸易

子之變，宋人知怨之不可以結也，故請和於楚以求平。楚

人知忿之不可以恃也，故受宋之和而與之平。二國之平，

衆所同欲也。」外平不道，【補曰】不道者，《經》例因史例

也。以吾人之存焉道之也。吾人，謂大夫歸父。

【補曰】此猶外釋不志，以公之與之盟目之。

六月癸卯，晉師滅赤狄潞氏，以潞子嬰

兒歸。○【撰異曰】「潞」字，《國語》或無「水」。滅國有

三術：術，猶道也。中國謹日，卑國月，夷狄不

日。卑國，謂附庸之屬。襄六年《傳》曰「中國日，卑國月，

夷狄時」，此謂三術。【補曰】疏曰：「中國日者，衛滅邢之

類是。卑國月者，無佗人極，齊侯滅萊之類是。夷狄不日

者，楚滅江黃、吳滅州來之類是。此不云夷狄時而云不日

者，方釋潞子嬰兒書日之意，故云不日。」文烝案：《傳》特

發例於此者，因變例以明正例，此論《經》例耳，舊史則皆日



也。疏論滅萊非也。萊本夷狄，非正例。滅州來當改爲滅巢。其曰，潞子嬰兒賢也。【補曰】「日」字當爲「日月」之「日」，謂以賢故進書日也。進之當從卑國例月，而日者，爲以其君歸，從沈、許、頓、胡例也。既日之，故亦名之，與四君同。若夔滅在時例，則夔子不名矣。若然，書名者與書日之文相足，書日爲賢則書名非絕之，乃與常例異也。疏曰：「書日以表其賢，書名以見滅國，所謂善惡兩舉。」其說未是。

### 秦人伐晉。

王札子殺召伯、毛伯。【補曰】被殺不名者，別於卒也。札子非大夫則名，大夫則字，皆常例。案：《左傳》時有召桓公、召戴公，此殺者，召戴公、毛伯衛也。王札子者，當上之辭也。【補曰】當上之辭者，謂不稱王人以殺，是以王命殺也。王札子猶言周札子，札子者，名也。《左傳》謂之王子捷，是群王子也。王子未爲大夫則皆名，佞夫、瑕、猛、朝等皆同。殺召伯、毛伯，不言其何也？解《經》不言殺其大夫。【補曰】據凡稱人者，皆言其大夫。兩下相殺也。【補曰】兩下者，兩臣，兩臣

相殺，不得爲衆，非衆辭不得稱人，故亦不得言其，言其則不辭。兩下相殺，不志乎《春秋》，此其志何也？矯王命以殺之，非忿怒相殺也。【補曰】詐稱曰矯，以非兩下忿怒，故志也。故曰以王命殺也。以王命殺，謂言王札子殺召伯、毛伯，是知以王命而殺之。【補曰】以王命殺，是之謂「當上」。以王命殺則何志焉？【補曰】以王命殺則是王殺也。《左傳》記晉殺胥童、齊殺高厚、莒殺意恢、楚殺卻宛之等，未嘗非矯君命，而《經》概從君殺之文，是其比也。但《春秋》多記列國殺大夫，而王殺此外不見，或以列國之殺爲專殺，而王殺則異歟？故又據以問。爲天下主者天也。【補曰】萬物本乎天。繼天者君也。【補曰】天之子取尊稱。君之所存者命也。【補曰】人之於人，以言受命。爲人臣而侵其君之命而用之是不臣也，爲人君而失其命是不君也。【補曰】君臣皆惡，至於矯殺，故不可不志。劉向《說苑》：「子夏曰：『《春秋》者，記君不君、臣不臣、父不父、子不子者也，此非一日之事也，有漸以至焉。』」君不君，臣不臣，此天下所以傾也。【補曰】政

亡則國家從之，申足上意也。沈棐曰：「見天子之柄非獨不行於諸侯，而且不行於卿士矣。上下相夷，王室益衰，不可救止。」文烝案：《荀子》曰：「天地者，生之始也；禮義者，治之始也；君子者，禮義之始也。故天地生君子，君子理天地，君臣父子，兄弟夫婦，始則終，終則始，與天地同理，與萬世同久，夫是之謂大本。故喪祭、朝聘、師旅一也，貴賤、殺生、奪與一也，君君臣臣、父父子子、兄兄弟弟一也，農農士士、工工商商一也。」

### 秋，螽。

仲孫蔑會齊高固于無婁。無婁，杞邑。【補

曰】依《公羊》字，即隱四年、昭五年之牟婁也。當云莒邑。

○【撰異曰】無，《公羊》作「牟」。

初稅畝。【補曰】《急就篇》：「種樹收斂賦稅租。」

顏師古曰：「斂財曰賦，斂穀曰稅，田稅曰租。」王應麟曰：

「《漢志》稅以足食，賦以足兵。」文烝案：依丘甲三軍例，此亦當月。但國以民爲本，今改舊法，厚斂於民，內之大惡，較彼二事爲甚，故略不爲謹月文。若是國之常事，哀用田賦，亦同此也。初者，始也。【補曰】亦著爲令。古者什一，一夫一婦，佃田百畝，以共五口，父母妻子也。又

受田十畝，以爲公田，公田在內，私田在外，此一夫一婦爲耕百一十畝。【補曰】《孟子》曰：「夏后氏五十而貢，殷人七十而助，周人百畝而徹，其實皆什一也。」何休曰：「以什與民，自取其一爲公田。」姚鼐曰：「一在什之外，凡傳記言十一而稅則一在十中，言什一而藉及徹則一在十外。」文烝案：漢高帝輕田租，十五而稅一。文、景以後，常三十而稅一，以爲定制。蓋郡縣之天下，其用較古爲儉，古者千里之畿，五等之國，其城郭宮室宗廟祭祀之禮，諸侯幣帛饗飧，百官有司，委曲煩多，必什一然後足用，自堯舜已然矣。

藉而不稅，藉此公田而收其人，言不稅民。【補曰】《孟子》曰：「助者，藉也。」疏曰：「徐邈曰：『藉，借也。謂借民力治公田，不稅民之私也。』」范注以藉爲賦藉，理亦通。文烝案：《王制》、《孟子》皆有此語。初稅畝，非正也。

【補曰】言穀出過藉。古者三百步爲里，名曰井

田。【補曰】六尺爲步，三百步者謂廣與長也。《九章·方

田術》依秦、漢之制，畝廣一步，長二百四十步。周制廣一步，長百步爲一畝；廣百步，長百步爲百畝；廣三百步，長三百步爲一里，九百畝。《大戴禮·王言》亦曰「三百步而里」，里者，謂方里，故《孟子》曰「方里而井」，以上《韓詩外

傳》盡同也。開方之數即積其里之方之數而乘之，如《王制》云「州方千里」，則其積百萬里矣。四海之內九州，斷長補短，方三千里則其積九百萬里矣。《書·皋陶謨》「弼成五服，至于五千」，【眉批】：「五服即是九州，而方五千里，較之方三千里幾三倍何歟？或謂要荒二服，夷蠻之地，甚寬，而周之揚、荆二州，悉為要荒，他州亦時有之，終無以知其審也。《孟子》云「海內之地方千里者九」，與《王制》同。」歐陽、夏侯說中國方五千里，則其積二千五百萬里矣。至於自此至彼，如《傳》云「縣地若干里，某去某若干里者」，但據一邊袤長，不計積方。又但據人跡屈曲，非計鳥路徑直，當分別觀之也。「井田」二字，於文皆象形，井謂之畫。「畫」字下亦象田四界，古者畫九州，畫井，其始也。八卦、六書，皆取畫名，又轉為繪畫。九數之序則先方田，明井田為萬法本，故《易說》曰「井，法也」。下文「井竈」之井，蓋因井田得名，《易卦》有井，指其物言之，《易說》訓法，本其始言之。《說文》字作「井」，云：「八家一井，象構韓形，豔象也。」①古者伯益初作井。許氏以井竈為本義，殆失之。伯益初作井，豈唐虞前無「井」字乎？井田者九百畝，公田居一，出除公田八十畝，餘八百二十畝，故井田之法，八家共一井，八百畝餘二十畝，家各二畝半為廬舍。【補曰】《孟子》曰：「井九百畝，

其中為公田。八家皆私百畝，同養公田。」又曰：「《詩》云：『雨我公田，遂及我私。』惟助為有公田。由此觀之，雖周亦助也。」何休曰：「聖人制井田之法而口分之，一夫一婦，受田百畝，以養父母妻子。五口為一家，公田十畝，廬舍二畝半，凡為田一頃十二畝半。八家而九頃，共為一井，故曰井田。廬舍在內，貴人也。公田次之，重公也。私田在外，賤私也。井田之義：一曰無泄地氣，二曰無費一家，三曰同風俗，四曰合巧拙，五曰通財貨。因井田以為市，故俗語曰市井。多於五口，名曰餘夫，餘夫以率受田二十五畝，十井共出兵車一乘。司空謹別田之高下善惡分為三品：上田一歲一墾，中田二歲一墾，下田三歲一墾，肥饒不得獨樂，墾墾不得獨苦。故三年一換主易居，財均力平，兵車素定。」私田稼不善則非吏，非，責也。吏，田峻也。言吏急民，使不得營私田。【補曰】《說文》曰：「禾之秀實為稼，莖節為禾。」《毛詩傳》曰：「種之曰稼，斂之曰穡。」此稼謂禾稼也。田峻者，《爾雅》曰：「農夫也。」《毛詩傳》曰：「田大夫也。」公田稼不善則非民，民勤私也。

①「·」，原無，據《說文解字·井部》補。

【補曰】《孟子》曰：「公事畢，然後敢治私事。」初稅畝

者，非公之去公田而履畝，十取一也，【補曰】疏

曰：「何休云：『宣公無恩信於民，民不肯盡力治公田，故公

家履踐案行，擇其善畝穀最好者稅取之。』故曰履畝。徐邈

以爲除去公田之外又稅私田十之一也。《傳》稱「與民已

悉」，則徐言是。」文烝案：徐說以爲什二，杜預亦以爲然。

《漢書·五行志》劉向云：「是時，民患上力役，解於公田。

宣是時初稅畝，稅畝，就民田畝擇美者稅其什一。」與何說

同，與杜、徐說異。姚鼐曰：「謂去公田之名，而通九百畝

履畝十取一，是與民已悉。」孔廣森曰：「去公田而九家同

井，每畝稅取其什之一，近貢法也。或以爲什二而稅，非

也。《論語》言二者，是哀用田賦以後耳。」案：趙鵬飛、呂

大圭說並同此。以公之與民爲已悉矣，悉，謂盡其

力。【補曰】自古者三百步至此，申明上意。古者公田

爲居，八家共居。【補曰】謂以二十畝爲八家廬舍也。

《詩》曰：「中田有廬。」何休曰：「在田曰廬，在邑曰里。」

案：上文「去公田」句當如劉、何、趙、呂、姚、孔之說，若不

知公田實耕八十畝，則其義不明，故《傳》復言此。井竈

蔥韭盡取焉。損其廬舍，家作一園，以種五菜，外種楸

桑，以備養生送死。【補曰】疏曰：「損，謂減損也。五菜

者，世所謂五辛之菜。」文烝案：井所以汲，竈所以炊，皆養

生所重，居之所急。蔥韭之屬，宜種者多，舉以該其餘，當

如注說。何休曰：「種穀不得種一穀，以備災害；田中不得

有樹，以妨五穀。還廬舍種桑荻雜菜，畜五母雞，兩母豕，

瓜果種疆畔，女尚蠶織，老者得衣帛焉，得食肉焉，死者得

葬焉。」此二句又以發上未盡之意，故三稱古者。○何休又

論在邑之事曰：「一里八十戶，八家共一巷，中里爲校室，

選其耆老有高德者名曰父老，其有辯護伉健者爲里正，皆

受倍田，得乘馬吏民。春夏出田，秋冬入保城郭。田作之

時，春，父老及里正旦開門，坐塾上，晏出後時者不得出，莫

不持樵者不得入，五穀畢入，民皆居宅。里正趨緝績，男女

同巷，相從夜績，至于夜中，故女功一月得四十五日作，從

十月盡正月止。男女有所怨恨，相從而歌，飢者歌其食，勞

者歌其事。男年六十，女年五十無子者，官衣食之，使之民

閒求詩，鄉移於邑，邑移於國，國以聞于天子，故王者不出

牖戶，盡知天下所苦，不下堂而知四方。十月事訖，父老教

于校室，八歲者學小學，十五者學大學，其有秀者移于鄉

學，鄉學之秀者移于庠，庠之秀者移于國學。學于小學，諸

侯歲貢小學之秀者于天子，學于大學，其有秀者命曰進士，行同而能偶，別之以射，然後爵之。」

### 冬，蝻生。

【補曰】《爾雅》曰：「蝻，蝗蝻。」《說文》、董仲舒說「蝗子也」，劉向亦謂蝗始生。何休曰：「始生曰蝻，大曰蝻。」蝻，非災也。【補曰】此「非」字，「是非」之「非」也。言蝻不足為災，例所不志也。《公羊》曰：「蝻生不書。」其曰蝻，非稅畝之災也。凡《春秋》記

災未有言生者，蝻之言緣也，緣宣公稅畝，故生此災以責之。非，責也。【補曰】注說失之。言今所以志蝻者，責其以稅畝貪利之惡，而致此蝻，則足為災，故志之也。責者，《經》責之。《公羊》曰：「此何以書？幸之也。幸之者何？猶曰受之云爾。受之云爾者何？上變古易常，應是而有天災，其諸則宜於此焉變矣。」《公羊》意與《傳》合。《傳》上言「非災」，下言「非稅畝之災」，文意與襄六年《傳》上言「非滅」，下言「非立異姓」云云正同。許翰曰：「觀乎災異則見政事，觀乎政事以知災異，是謂念用庶徵。」數語可與《傳》相發。

### 饑。

【補曰】此饑由秋蝻，蝻不甚而饑矣。○【撰異曰】陸淳《纂例》曰：「公羊無此《經》。」案：今《公羊》有。

十有六年春王正月，晉人滅赤狄甲氏及留吁。甲氏、留吁，赤狄別種。晉既滅潞氏，今又并盡其餘邑也。滅夷狄時賢嬰兒，故滅其餘邑猶月。【補曰】疏

曰：「非國而云滅者，甲氏、留吁，國之大邑，而晉盡有之，重其事，故云滅。留吁言及者，蓋小於甲氏。」文烝案：滅國獲君既日之，故滅邑月之。

夏，成周宣榭災。成周，東周，今之洛陽。宣

榭，宣王之榭。《爾雅》曰：「室有東西廂曰廟，無東西廂有室曰寢，無室曰榭。」《傳例》曰：「國曰災，邑曰火。」【補曰】疏曰：「不言京師者，爾時成周非京師故也。《公羊傳》云：「宣謝者何？宣宮之謝也。」故范亦同之。」文烝案：何休曰：「宣王之廟不毀者，有中興之功。」孔廣森曰：「凡邑有宗廟先君之主曰都，成周者，周之下都，得有先王廟，若漢時原廟矣。」《爾雅》郭璞注曰：「榭即今堂堦。」○【撰異曰】榭，本或作「謝」。《公羊》作「謝災」，《左氏》作「火」。周災不志也。【補曰】疏曰：「徐邈所據本云「周災至」，注云「重王室也」。今遍檢范本，並有「不」字，則不得解與徐同。」文烝案：疏「至」字乃「志」之誤，謂徐本無「不」字

耳，徐本是也。外災不志，而宋爲王者後則志，周災則志，皆是《經》例因史例也。徐云「重王室」，其義允當，蓋范本誤衍「不」字也。劉敞曰：「宋災猶志，況周災乎？」所駁雖是，失之不考。其曰宣榭何也？【補曰】據外災皆不別所燒。以樂器之所藏目之也。移風易俗，莫善於樂，是故貴其器。【補曰】《公羊》曰：「何言乎成周宣榭災？樂器藏焉爾。」何休曰：「宣王中興，所作樂器。」文烝案：周詩既備，而其器用張陳，周官具焉，宣王承亂更作之。今存石鼓十，形如鼓耳，非樂器，然亦宣王作器之證矣。陳倉石鼓始見於劉昭引《三秦記》，或謂秦文公物，亦近之。然鼓文「鼎鼎昌屯闕」五字固籀文也。

### 秋，郊伯姬來歸。爲夫家所遣。【補曰】《傳例》

「反曰來歸」，在成五年。《左傳》曰「出也」，《公羊》曰「大歸曰來歸」。何休曰：「嫁不書者，爲媵也；來歸書者，後爲嫡也；死不卒者，已棄有更適人之道，或時爲大夫妻，故不得待以初也。棄歸例，有罪時，無罪月。」文烝案：何氏於紀叔姬以爲其後爲嫡，於此亦言後爲嫡，其實媵不得爲嫡也。鄭君曰：「女君卒，貴妾繼室攝其事耳，不得復立爲夫人。」杜預說《左氏》亦曰：「夫人薨，不更聘，必以姪娣媵繼室。」

繼室者，攝治內事，猶不得稱夫人，故謂之繼室也。啖助曰：「不書嫁而書出，或嫁時夫未爲君也。」此即賈逵適世子之說，劉敞亦云。

冬，大有年。五穀大熟爲大有年。

十有七年春王正月庚子，許男錫我卒。

丁未，蔡侯申卒。【補曰】莊侯甲午之子。甲午卒不書。

夏，葬許昭公。

葬蔡文公。

六月癸卯，日有食之。【補曰】徐彥引顏安樂

《公羊》說以爲十四日日食。孔廣森曰：「案：《史記》漢文帝二年亦十二月望日食，陰陽之異，容有非可理度意測者，但《傳》無明文，未知顏氏所本。」

己未，公會晉侯、衛侯、曹伯、邾子同盟

于斷道。己未亦閏月之日。斷道，晉地。【補曰】非閏也。說見隱三年日食。同者，有同也，同外楚也。

【補曰】重發《傳》也。疏曰：「不於清丘發《傳》者，清丘魯

不會，故重舉於此以包之，并包下蟲牢、馬陵、蒲、戚、柯陵、虛打之類。」

### 秋，公至自會。

冬十有一月壬午，公弟叔肸卒。【補曰】叔

肸，謚曰惠伯，見杜預《釋例·世族譜》，蓋據《世本》。凡公子不為大夫者不卒，時重肸賢，隆其恩禮，比之大夫，為之謚，遂立叔氏，故史得記卒也。不言公之弟者，以賢舉，不從緩辭例。

其曰公弟叔肸，賢之也。【補曰】賢之，

故稱弟，又不為緩辭，又加字。其賢之何也？宣弑

而非之也，宣公殺子赤，叔肸非責之。非之則胡為

不去也？曰兄弟也。何去而之？言無所至。

與之財，則曰我足矣，宣公與之財物，則言自足以距

之。【補曰】室家治生之道，亡求有，有求多，今日我足，雖

是距辭，亦所謂古之沈冥，常內足於懷。織屨而食，織

屨賣以易食。終身不食宣公之食。【補曰】下「食」

謂祿也，秩也。江永曰：「食與祿，通言之則同，分言之，有

田者為祿，無田者授之粟為食。《周禮·司土》「以功詔祿，

以久奠食」是也。食亦名秩，《左傳》惠王奪子禽祝跪與詹

父田，而收膳夫石速之秩，明散官無田有秩也。」文彙案：

叔肸不食宣公祿秩，又合於伯夷、叔齊之用心，何休引《論語》曰：「篤信好學，守死善道，危邦不入，亂邦不居，天下

有道則見，無道則隱。」劉敞引《論語》：「作者七人，不降其志，不辱其身，身中清，廢中權。」君子以是為通恩

也，以取貴乎《春秋》。泰曰：「宣公弑逆，故其祿不

可受。兄弟無絕道，故雖非而不去。論情可以明親親，言

義足以厲不軌。書曰公弟，不亦宜乎？【補曰】以是為通

恩者謂不去也。疏曰：「衛侯之弟專去君，《傳》云「合於

《春秋》，此不去君云「取貴於《春秋》者，《易》稱「君子之

道，或出或處，或默或語」，專以衛侯惡而難親，恐罪及己，

故棄之而去，使君無殺臣之惡，兄無害弟之愆，故得合於

《春秋》。此叔肸以君有大逆，不可受其祿食，又是孔懷之

親，不忍奮飛，使君臣之節兩通，兄弟之情俱暢，故取貴於

《春秋》。叔肸書字專直稱名者，叔肸內可以明親親，外足

以厲不軌，比專也賢乎遠矣，故貴之稱字。專雖合於《春

秋》，無大善可應，故直書名而已。」

十有八年春，晉侯、衛世子臧伐齊。

公伐杞。【補曰】不致者，惡事也。

夏四月。

秋七月，邾人戕繒子于繒。【補曰】賈逵

曰：「邾使大夫往殘賊之。」文烝案：稱人者，亦從衆辭例。

言戕則見邾惡，非見繒罪，可知衆辭無所嫌也。執用日，戕月，非必爲下卒日。○【撰異曰】此二「繒」字或作「鄆」。

戕，猶殘也。稅，殺也。稅，謂捶打殘賊而殺。地于

繒，惡其臣子不能距難。【補曰】言猶者，義相近。《詩》鄭

箋直言「戕，殘也」，是以爲本訓。《公羊》曰：「殘賊而殺之

也。」「稅」字舊從手，今改從木。《說文》曰：「棖，稅也。」

「稅，木杖也。」《字林》亦云「木杖」。《廣雅》曰：「棖，稅，杖

也。」顏師古《急就篇》注曰：「稅，小棖也。今俗呼爲袖稅，

言可藏於懷袖之中也。」《後漢書·禰衡傳》曰：「手持三尺

稅杖。」《說文》「木杖」，或作「大杖」，蓋誤也。杖爲稅，杖之

亦爲稅，猶言言授之繫以繫其馬，其義相因。邾人杖殺繒

子，此殘之實。《音義》曰：「稅，或作撲，普木反。」亦通。

注「打」字亦當從木，《說文》曰「撞也」，宅耕切。棖、棒、打、

打，皆正俗字。地于繒者，明在國都，楚子虔誘蔡侯般殺之

于申則不於國都也。不名者，趙汭以爲繒子卒不志於魯，

此特以戕死錄，故不名。

甲戌，楚子呂卒。商臣子莊王。【補曰】楚始書

卒，楚卒皆日，皆不葬，義見成十四年注。○【撰異曰】呂，

《左氏》、《公羊》作「旅」。案：《漢書·律曆志》曰：「呂以旅

陽宣氣。」又曰：「呂，旅也。」《說文》从肉旅聲之「膂」與

「呂」爲一字。夷狄不卒，【補曰】疏曰：「據自此前

吳、楚君也。」文烝案：自此前，莒君亦不卒，秦穆公亦不

卒，疑惟吳爲史所本無。卒，少進也。【補曰】明莒、吳

皆同例，秦亦然也。卒而不日，【補曰】疏曰：「據吳諸

君也。」文烝案：莒卒亦皆不日，滕始亦不日，秦始亦不日，

皆夷狄之。莒卒因史之舊，疑其餘不然。日少進也。

【補曰】明滕與秦皆同例也。滕、秦始不日終日，莒、吳始終

不日，楚始終日，此其異也。夷狄所以有少進例者，能脩政

刑，行事中夏，不得不漸進之。日而不言正，不正，

簡之也。中國君日卒，正也。不日，不正也。今進夷狄，

直舉其日，而不論正之與不正。【補曰】簡，略也。亦明滕

與秦皆同例也。略之者，既別於中國，亦因其政俗異宜，難

以周禮責。如楚國之舉，恒在少者，晉叔向以棄疾爲居常



矣。此《傳》爲滕、秦、楚、莒、吳五國書卒者發通例，《傳》文之簡而有條如此。

### 公孫歸父如晉。

冬十月壬戌，公薨于路寢。路寢，正寢

也。【補曰】疏曰：「重發《傳》者，莊據始，故發之。宣纂弑有嫌，成承所嫌之下，故各發《傳》。」文烝案：路寢唯此三文，故《傳》備釋，成篇較略，此最略。《傳》「路寢」二字各本脫，今依唐石經、余本、呂本中《集解》本補正。

歸父還自晉。【補曰】疏曰：「大夫執則致，歸父

非執而書其還者，爲出奔張本也。直名不氏者，凡致者由上致之，故例名，今不書歸父之氏，明有致命之義也。」文烝案：遂卒以言仲爲疏，慶父來以直言仲孫爲疏，知此還非以直名爲疏者。此還爲奔而書，事在奔例，無取疏義，明當從常文言公孫。特以文在還自晉之上，事未畢而若畢，得有致命之義而去氏也。各本此《經》下衍「至檉遂奔齊」五字，今依唐石經、十行本刪正。還者，事未畢也。自晉，事畢也。【補曰】疏曰：「復發《傳》者，嫌君臣異也。」文烝案：事畢者，至國之辭，以明其本欲至國而中路被逐，《傳》重發以起下也。范於「事未畢也」下注曰「莊八

年秋師還是也」，八字贅甚滯甚，今刪。全書刪注，唯此一處。與人之子守其父之殯，人之子，謂歸父子也。言成公與歸父子共守宣公殯。捐殯而奔其父之使者，是亦奔父也。捐，棄也。奔，猶逐也。言成公棄父之殯，逐父之使。使，謂歸父也，父命未反而已逐之，是與親奔父無異。【補曰】喪不貳事，況於逐父之使。孟莊子猶不改父之臣，況於國君。以其緩喪不孝，謂之奔父，《春秋》之意也。「亦」各本誤作「以」，今依唐石經、余本、胡安國傳、俞皋《集傳釋義》本、程端學《本義》、李廉會通本改正。

至檉，遂奔齊。杜預曰：「檉，魯竟外，故不言

出。【補曰】即文七年例云「在外也」。○【撰異曰】檉，《左氏》作「笙」。遂，繼事也。【補曰】疏曰：「重發遂例者，嫌出奔不得同於繼事也。」文烝案：歸父奔不謹日，異於公孫敖者，以從繼事例則不得日，《傳》并見此意也。必從繼事例者，明惡成公逐之，既惡成公，即知其不惡歸父。《左傳》臧宣叔曰：「當其時不能治也，後之人何罪？」此定論矣。高澍然曰：「書遂著聞亂而奔之迹，非若敖奔莒之前定也。」

春秋成公經傳第七補注第十七 成公，宣公

子，《史記》名黑肱，母蓋穆姜也。以定王十七年即位。

穀梁 范氏集解 鍾文烝詳補

元年春王正月，公即位。

二月辛酉，葬我君宣公。

無冰。【補曰】疏曰：「何休、徐邈並云此年無冰

者，由季孫行父專權而委任之所致，范意不同。」文烝案：

何氏引《尚書》曰「舒恒燠若」，又引《易》京房《傳》曰「當寒而溫，倒賞也」。范意見桓十四年注，大致亦主《洪範》，但不指實耳。終時無冰則志，此未終時而言無冰

何也？言終寒時無冰當志之耳，今方建丑之月，是寒時

未終。【補曰】桓十四年《傳》曰「無冰時」。終無冰矣，

加之寒之辭也。周二月，建丑之月，夏之十二月也。

此月既是常寒之月，於寒之中又加甚常年，過此無冰，終無復冰矣。【補曰】疏曰：「終無冰矣，謂過此時無冰則終無

冰也。加之寒之辭，謂於此月書者，以此月是常寒之月，加

甚之辭，故麋信、徐邈亦云「十二月最爲寒盛之時，故特於此月書之」是也。」文烝案：《詩·豳風》：「一之日麋發。」

《毛傳》曰：「風寒，謂待風乃寒。」又「二之日栗冽」，毛曰：

「寒氣，謂無風亦寒。」明周之二月，其寒加甚他月，是月無冰則終無冰矣。麋、徐及疏皆是，范別言「加甚常年」，失之。

疏申注亦不用其說也。無冰爲恒燠，桓十四年《傳》明文也。

疏又曰：「襄二十八年春無冰書時，則是終寒時，故不發

《傳》。此在二月下三月上，故特發之。桓十四年無冰在正

月下者，舊解正月自爲公會鄭伯，不爲無冰，或當月卻而節

前，則周正月亦是常寒之月。」文烝案：舊解是。

三月，作丘甲。《周禮》：「九夫爲井，四井爲邑，

四邑爲丘，丘十六井。」甲，鎧也。【補曰】不言井邑言丘者，

賦法起於丘也。疏曰：「徐邈云：『甲有伎巧，非凡民能作，

而強使作之，故書月以譏之。』」文烝案：稅畝田賦皆不月，

而舍中軍亦月，則此月非譏，當依何休以爲重錄之，《傳》所

謂謹也。作，爲也。【補曰】疏曰：「復發《傳》者，文同

事異，不可以一例該之故也。范別例云，「作」例有六，直云

「作」者三。僖公主丘甲、三軍。云新作者亦三：延廩、南

門、雉門。」文烝案：延廩安得云作？范因《左氏》杜預說，誤以人例耳。丘爲甲也。使一丘之民皆作甲。【補曰】謂農民，《公羊》曰「丘使」。丘甲，國之事也，【補曰】此「丘」字蓋衍文，或是「作」字。丘作甲，非正也。【補曰】桓六年《傳》曰：「脩教明諭，國道也。平而脩戎事，非正也。」彼以國道言，此以國之事言，其意相類。丘作甲之爲非正何也？古者立國家，百官具，農工皆有職以事上，【補曰】謂農官、工官也。官者，民之長。古者有四民：【補曰】以下申足上意。有士民，學習道藝者。【補曰】疏曰：「何休云：『德能居位曰士。』」范以居位則不得謂之民，故云「學習道藝」。文烝案：處士賢者可爲公士，其事相因。有商民，通四方之貨者。有農民，播殖耕稼者。有工民。巧心勞手以成器物者。【補曰】因官及民，因農工及士商，備言之也。劉向《說苑》引《春秋傳》曰「四民均則王道興，而百姓寧」，《傳》無此文，當是《外傳》及《章句》說《傳》語。今本《說苑》脫「傳」字。《漢書》注引《樂元語》曰：「四民常均。」凡四民皆有官焉，士民者處士，若公士以上則官也。商農工之官，

據《周禮》亦皆公士大夫也。《考工記》曰：「坐而論道謂之王公；作而行之謂之士大夫；審曲面勢，以飭五材，以辨民器，謂之百工；通四方之珍異以資之謂之商旅；飭力以長地財謂之農夫；治絲麻以成之謂之婦功。」此所謂國有六職。夫甲非人人之所能爲也，各有業也。【補曰】能爲甲者工耳。《考工記》函人爲甲，又有鮑人。《周禮》稟人職曰「齎其工曰饗工」，此工官工民爲甲之事。孔穎達曰：「使一丘農民皆作甲，以農爲工，失其本業。」丘作甲，非正也。【補曰】重言以結上文。不言初者，旋罷之。《左傳》曰：「爲齊難故。」孔穎達曰：「備齊難暫爲之耳。」

夏，臧孫許及晉侯盟于赤棘。赤棘，晉地。

【補曰】許辰之子臧宣叔。疏曰：「不日者，蓋謀爲鞏戰，歸我汶陽之田，至八年渝前約，故略之也。」文烝案：既不日又不月者，蓋略之甚。

秋，王師敗績于貿戎。貿戎，地。【補曰】疏

曰：「不書月者，何休云：『深正之，使若不戰。』」范雖不解，蓋不言晉敗及戰，故亦略其日月。文烝案：王師敗績，異於諸侯，故直書時而已，不嫌與夷狄見敗同例。○【撰異曰】貿，《左氏》作「茅」，段玉裁曰：「《史記》、《漢書》皆作

「貿」，古音同也。「不言戰，莫之敢敵也。」【補曰】昔

夏啟與有扈氏戰，《書》稱大戰于甘，紀實之辭也。《春秋》別起例以明義，蓋亦魯策書所據之周禮，君子因之。《荀子》曰「王者有誅而無戰」是也。不言敗之者，亦明莫敢敵。此《公羊》義。爲尊者，諱敵不諱敗；諱敵，使莫二也。不諱敗，容有過否？【補曰】以自敗爲文，但不言敗之

者耳。不諱言敗，劉絢曰：「聖人立法垂後，示之以意而已。」一書王師敗績于貿戎，而尊王之義，與王自取敗之道咸得而見矣。」李光地曰：「戰而勝猶恥也，戰之恥甚於敗，故諱戰也。」爲親者，諱敗不諱敵；諱敗，惜其毀折也。不諱敵，諸侯有列國。【補曰】有所不諱而後所諱顯，若全沒其實，亦不得謂之諱。劉敞謂諱其義，非諱其實。高澍然以爲「文諱而實不諱，未嘗有一語矯誣」是也。尊尊親親之義也。尊則無敵，親則保全。尊謂王，親謂

魯。【補曰】案：盧全詩曰：「孔子父母魯，諱魯不諱周。」此韓子所譏五傳束高閼者矣。《春秋》不以親親害尊尊，而亦不奪人所私，故曰伯母叔母疏衰，踊不絕地，姑姊妹之大功，踊絕於地。如知此者，由文矣哉！由文矣哉！踊申其情，敗掩其辱，尊不可干，示有私恩而已矣。然則孰

敗之？晉也。【補曰】此與戎伐凡伯相似。貿戎者，

戎之種而屬晉，實爲晉地，時晉之貿戎人敗王師於其地，不可言王師敗績于晉，故言「于貿戎」也。《傳》「不言貶晉而戎之者，從伐凡伯《傳》可知。《公羊》曰：「孰敗之？蓋晉敗之，或曰貿戎敗之。」不知貿戎即晉，傳聞不審也。《左傳》謂晉侯平戎于王。劉康公背盟欺晉，徼戎而伐之，敗績于徐吾氏。事或有之。僖二十二年晉及秦遷陸渾之戎于伊川，昭九年晉率陰戎伐潁，二十一年晉帥九州之戎納王。戎事涉周者，皆晉爲之也。

冬十月。季孫行父禿，晉卻克眇，衛孫

良夫跛，曹公子手僂，【補曰】禿，無髮也。眇，小目

也。跛，蹇也，謂曲脛。僂，佺也，謂曲脊。此文「眇」、「跛」字當互易。卻克之跛見《左傳》、《國語》，范注下年《傳》以卻克爲跛，沈文何引《穀梁》云「晉卻克跛，衛孫良夫眇」，自唐定本始誤，而楊氏作疏因之，陸德明亦誤。下句之次同誤。同時而聘於齊。【補曰】《公羊》曰：「晉卻克與臧孫許同時而聘於齊。」何休曰：「不書，恥之。」齊使禿者御禿者，使眇者御眇者，使跛者御跛者，使僂

者御僂者。御，音迓。迓，迎也。【補曰】注本《爾雅》

文。孔廣森曰：「迓，迎護賓者也。《聘禮記》卿大夫迓，大

夫士迓，士皆有迓。」蕭同姪子處臺上而笑之。蕭，

國也。同，姓也。姪子，字也。其母更嫁齊惠公，生頃公。

宣十二年，楚人滅蕭，故隨其母在齊。【補曰】蕭同姪子即

頃公母，范非也，論於下年。《蒼頡篇》曰：「笑，喜弄也。」

聞於客，客不說而去，相與立胥間而語。移

日不解，胥間，門名。【補曰】疏曰：「即《周禮》二十五家

也。」文烝案：《說文》：「間，里門也。」又引《周禮》「五比爲

間」。何休曰：「間，當道門。解，散也。」齊人有知之

者，曰：「齊之患必自此始矣。」穀梁子作《傳》，皆

釋《經》以言義，未有無其文而橫發《傳》者。甯疑《經》「冬

十月」下云「季孫行父如齊」，脫此六字。【補曰】范說又非

也。此《傳》當與下「其日或日」相連，誤跳在此，蓋以《傳》

合《經》者誤之耳。范以《傳》稱季孫聘於齊，《經》無爲不書

其事，但《經》書如齊，不當錄月，二家《經》皆無之，自以何

休說爲長。或當以季孫不說而去，聘事不成，故史無如齊

之文。其事亦未審在何年也。○《公羊》以爲郤克跛，臧孫

許眇，同時而聘于齊。《左傳》、《國語》但謂齊婦人笑郤子，

最近事情。《穀梁》下《傳》亦但云「敖郤獻子」，與《左傳》、

《國語》同。然則此《傳》云云，姑廣異聞耳，原不深信也。

陸淳以街談巷議訾之，豈爲善讀《傳》乎？先儒既有解說，

今亦聊說之而附以所見。

二年春，齊侯伐我北鄙。【補曰】《左傳》曰：

「圍龍。三日，取之。」

夏四月丙戌，衛孫良夫帥師及齊師戰于新

築，衛師敗績。新築，衛地。【補曰】時齊非桓公主盟時

矣，直從以主及客之常例，不須以微齊起之，與莊二十八年異。

六月癸酉，季孫行父、臧孫許、叔孫僑

如、公孫嬰齊帥師會晉郤克、衛孫良夫、曹公

子手及齊侯戰于鞌，齊師敗績。鞌，齊地。【補

曰】僑如，得臣子叔孫宣伯。公孫嬰齊，叔肸子子叔聲伯

也。疏曰：「徐邈云：『四大夫不舉重者，惡魯狠遺四大夫

用兵，亦以譏之也。然則諸國用兵亦應狠遺，何以不具書

之？蓋是用兵重事，故詳內也。』」文烝案：外大夫無帥師

文者，從內可知，內帥師總在嬰齊下者，亦從可知。六年仲

孫蔑、叔孫僑如帥師，襄十年楚公子貞、鄭公孫輒帥師之

等，皆此例。客言及者，由內及之。內言戰，亦與桓十三年同。○【撰異曰】僑，本又作「喬」。手，《左氏》作「首」，《公羊》一作「午」。其日，或曰日其戰也，或曰日其悉也。悉，謂魯四大夫時悉在戰也，明二者皆當日。【補曰】疏曰：「若是疑戰，雖四大夫在亦不得日，《傳》并見此意耳。」曹無大夫，【補曰】疏曰：「復發《傳》者，前爲崇羈，今爲戰，故重發之。」其曰公子何也？【補曰】略名之當言曹手，不當言氏，《傳》曰「公子之重視大夫」。以吾之四大夫在焉，舉其貴者也。不欲令內衆大夫與外卑者共行戰。【補曰】公子之重視大夫，是貴也。

### 秋七月，齊侯使國佐如師。己酉，及國

佐盟于爰婁。【補曰】《春秋》事同而辭異，如僖、文之書不雨，屈完、國佐之盟，其最著者也。此二盟，劉絢、胡安國、張洽以爲王道曲直之繩墨。○【撰異曰】《公羊傳》覆舉《經》句「及」下有「齊」字，孔廣森疑《公羊經》作「齊國佐」。爰，《左氏》、《公羊》作「哀」。鞌去國五百里，爰婁去國五十里。國，齊國也。【補曰】謂國都。顧炎武《日知錄》曰：「《穀梁傳》「古者三百步爲里」，今以三百六

十步爲里，而尺又大於古三之一強，今之六十二里弱，遂當古之百里。《穀梁傳》「鞌去國五百里」，今自歷城至臨淄僅三百三十里。《左傳》「黃人謂自郢及我九百里」，今自江陵至光州僅七百里。邾子謂吳二千里，不三月不至，今自蘇州至鄒縣僅一千五百里。《孟子》「不遠千里而來，千里而見王」，今自鄒至齊至梁亦不過五六百里。又謂舜卒鳴條，文王生岐周，相去千有餘里，今自安邑至岐山亦不過八百里。《史記》張儀說魏王言「從鄭至梁二百餘里」，今自鄭州至開封僅一百四十里。《戚夫人歌》「相離三千里，當誰使告汝」，貢禹上書言「自痛去家三千里」，今自琅邪至長安亦但二千餘里。趙則二千里而近。【眉批】：《司馬法》六尺爲步，今以五尺爲步，顧說則亦以六尺計。「而尺又大」二句，依沈彤《日知錄》校本。顧氏又云：「一寸者，今之六分有半，今量最大於古，權次之，度又次之。」壹戰縣地五百里，【補曰】壹，各本作「一」，今依唐石經，十行本改。焚雍門之茨，雍門，齊城門。茨，蓋也。【補曰】《釋名》曰「屋以草蓋曰茨」，即《考工記》所謂葺屋。侵車東至海。侵車，侵伐之車。言時侵齊，過乃至海。【補曰】三句言自鞌進師之事。君子聞之曰：「夫甚甚之辭焉，鄭嗣曰：「君子聞

戰于鞌，乃盟于爰婁，焚雍門之茨。侵車至海，言因齊之敗逼之甚。【補曰】劉瓛《孝經注》曰：「夫，猶凡也。」師及國門又至海，甚之又甚也，君子以爲上言鞌，下言爰婁，師文在中，凡有甚之又甚之辭焉。齊有以取之也。」齊之有以取之何也？敗衛師于新築，侵我北鄙，

【補曰】以伐爲侵，通言之。敖郤獻子，謂笑其跛。【補

曰】《爾雅》曰：「敖，傲也。」古通用。王逸《楚辭注》：「侮慢曰傲。」不舉秃眇僂者，明前《傳》姑載之，此記其實。齊

有以取之也。【補曰】明上二事皆譏文，又笑跛非禮。

爰婁在師之外。言師已逼其國。【補曰】疏曰：「爰婁

去齊五十里，今在師之外，明晉師已逼到其國。師，謂晉師。」文烝案：即《經》「師」字也。師退至爰婁而盟，《傳》將述其事，先以此句起之，兼爲盟召陵見例。郤克曰：

「反魯、衛之侵地，以紀侯之甌來，甌，玉甌。齊

滅紀，故得其寶。【補曰】《左傳》曰「紀甌」，《傳》及《公羊》

曰「紀侯之甌」，《汲冢紀年》曰「紀公之甌」。何休以爲紀之甌邑，其土肥饒。或說：「甌，玉甌。」杜、范皆云玉甌。《說文》曰：「甌，甌也。一穿。」①鄭衆《考工記注》曰：「甌，無

底甌。」段玉裁曰：「蓋甌七穿而小，甌一穿而大。」以蕭

同姪子之母爲質，齊侯與姪子同母異父昆弟，不欲斥

言齊侯之母，故言「蕭同姪子之母」也，兼忿姪子笑。【補

曰】案：此及下文兩言蕭同姪子之母，「之母」二字，皆衍文也。《左傳》作「蕭同叔子」，以爲是齊侯之母。杜預曰：

「同叔，蕭君之字，齊侯外祖父。子，女也。雖斥言其母，故遠言之。」《公羊》則作「蕭同姪子」，云是「齊君之母」。何休

曰：「蕭同，國名。姪子者，蕭同君姪弟之子，嫁與齊，生頃

公。《史記·齊世家》作「蕭桐叔子」，《晉世家》作「蕭桐姪子」，並以爲是齊君母。此《傳》文當與《公羊》同，蓋蕭君名

同，其姪弟所生女嫁齊而生頃公，故謂之蕭同姪子，即前處臺上笑客者也。范不能以二《傳》《史記》考正此《傳》衍字

而曲爲之說，必不可通。使耕者皆東其畝，欲以利其

戎車於驅侵易。【補曰】《詩·小雅》言疆理天下之制曰「南

東其畝」，《毛傳》曰：「或南或東。」案：畝所以有南東者，

《周禮·遂人》：「凡治野，夫間有遂，遂上有徑。十夫有

①「一」下，中華書局影印覆刻宋本《說文解字》有「曰」字。



溝，溝上有畛。百夫有洫，洫上有涂。千夫有澮，澮上有道。萬夫有川，川上有路，以達于畿。」夫間，兩夫之間也。十夫以上，二十夫至二萬夫之間也。此與《考工記》匠人之田首三夫及井間、成間、同間、兩山之間，其法各異，而阡陌之名，因之以生。凡畫畝必以川為準，川東流者，川橫路亦橫，於是澮縱道縱，洫橫涂橫，溝縱畛縱，遂橫徑橫，則其畝縱而畝必東陳，《風俗通》云「南北曰阡，東西曰陌」是也。若川南北流者，自外至內，其縱橫一一相反，則其畝橫而畝必南陳，《風俗通》云「河東以東西爲阡，南北爲陌」是也。天下之川，大勢皆東流，河東之川獨南流，至大伾河又北流。齊之境内，必多南畝，今晉欲使盡東其畝，《左氏》所謂「無顧土宜」，即下《傳》所謂「土齊也」。此皆程瑤田之說也。顧棟高曰：「齊與晉本遼遠，自景公滅潞，收狄遺土，於是晉地跨有東昌、曹、濮之境，與齊接壤，鞏之戰遂平行以入齊都。郤克欲使齊盡東其畝以利戎車者，以地逼近故也。」然後與子盟。」國佐曰：「反魯、衛之侵地，以紀侯之甗來，則諾，以蕭同姪子之母爲質，則是齊侯之母也。齊侯之母猶晉君之母也，晉君之母猶齊侯之母也。言尊同也。使耕

者盡東其畝，則是終土齊也，凱曰：「利其戎車侵伐易則是以齊爲土。」【補曰】何休曰：「則晉悉以齊爲土地。」俞樾讀從《周禮·大司徒》「土其地」、《典瑞》「土地」之「土」，以爲「土」者「度」之借字。度齊，猶《國語》云「規東夏」。不可。不可，謂若不許己言。【補曰】王引之曰：

「范以《左傳》云「晉人不可」，賓媚人曰「子又不許。請收合餘燼，背城借一」，故以「不可」爲「不許己言」，不知此《傳》「不可」二字與「則諾」相對爲文，謂郤克之後，二說不可行也。《公羊》曰：「與我紀侯之甗，請諾。反魯、衛之侵地，請諾。使耕者東畝，是則土齊也」，曰「不可」。「蕭同姪子者，齊君之母也，齊君之母猶晉君之母也」，曰「不可」。何注上曰「不可」云：「則晉悉以齊爲土地，是不可行。」注下曰「不可」云：「言至尊不可爲質。」彼文曰「不可」與「請諾」相對，猶此文「不可」與「則諾」相對也，當如何氏《公羊注》作解。若以爲不許己言，則文義下屬「請壹戰」句，上文「以蕭同姪子之母爲質」云云，遂成不了語矣。《公羊》上曰「不可」，今本脫，徐疏引一本有之。下曰「不可」，今脫「曰」字，【補】《後漢書》注引有之。請壹戰，壹戰不克，請再，【補】曰「二壹」字亦依唐石經、十行本改。再不克，請三，



三不克，請四，四不克，請五，【補曰】疏曰：「齊爲晉所敗，兵臨城下，然則敗軍之將不可以語勇，驚弦之鳥不可以應弓，所以更能五戰者，齊是大國，邑竟既寬，收拾餘燼，足當諸國之師，故請以五也。」五不克，舉國而授，【補曰】舉，盡也。以上皆師中語。於是而與之盟。【補曰】云於是者，謂退至爰婁。胡安國曰：「天下莫大於理，而強有力不與焉，亦可謂深切著明矣。」

八月壬午，宋公鮑卒。

庚寅，衛侯速卒。○【撰異曰】速，《公羊》作「遽」。

取汶陽田。【補曰】晉使齊還魯侵地，魯取之也。

冬，楚師、鄭師侵衛。【補曰】陳傅良曰：「此楚公子嬰齊也。其稱師何？楚猶未書大夫將也。」文彞案：是時楚共初立，嬰齊語於衆曰君弱。高澍然以爲楚政下逮之始，於是下文始具大夫氏名。而六年伐鄭亦具氏名矣。

十有一月，公會楚公子嬰齊于蜀。蜀，某地。【補曰】當云魯地，《左傳》甚明，杜注則在宣十八年《傳》。案：《左傳》「楚師侵衛，遂侵我師于蜀」，「侵及陽

橋」，杜預曰：「公賂之而退，故不書侵。」張應昌本毛奇齡說，以爲史諱之，謂至《春秋》之終方書吳伐我。疑張說是也。楚僭王，其公子稱王子，家鉉翁謂《春秋》削之書公子。竊以《魯春秋》有周禮焉，史之舊也。月者，爲下盟日或危之。楚無大夫，【補曰】疏曰：「重發之者，屈完當齊桓非正例，得臣、宜申、荻不氏，今稱公子，故重發之。」文彞案：疏言「當齊桓」，《公羊》語也，當改云「成爲大夫」。其曰公子何也？嬰齊亢也。泰曰：「莊二十二年丙申，及齊高傒盟；文二年乙巳，及晉處父盟；《傳》曰不言公，高傒、處父亢也。此《傳》會嬰齊書公以明亢何乎？蓋言高傒、處父亢禮敵公，書公則內恥也。嬰齊初雖驕慢，終自降替，故于會則書公，以顯嬰齊之驕亢。于盟則稱人，以表嬰齊之服罪。然則向之驕正，足以表其無禮，不足以病公，則書公可也。」【補曰】疏曰：「重發亢義者，與高傒、處父又皆異，故各發之。」文彞案：楚嬰齊者，夷狄無大夫之文也。楚公子嬰齊者，中國有大夫之文也。嬰齊亢禮敵公，若書以夷狄之辭，則公之恥辱益甚，故從中國例，而《傳》明之也。注論書公義得之，但謂嬰齊終自降替，表其服罪，則由誤解下《傳》文。說見下。

丙申，公及楚人、秦人、宋人、陳人、衛人、鄭人、齊人、曹人、邾人、薛人、繒人盟于蜀。齊在鄭下，蓋時王所黜。【補曰】杜預依《左傳》以爲

「齊非卿」，杜是也，范非也。○【撰異曰】徐彥《公羊疏》曰：「亦有一本無齊人者，脫也。」陸淳《纂例》本「齊人」下有「許人」，云《公羊》無齊人，《左氏》無許人。楚其稱

人何也？怪楚向稱公子，今稱人。於是而後公得

其所也。【補曰】於是衆國大夫咸在，得從翟泉、澶淵以

公會人之例，不以氏名見，是得其所也。案：《左傳》楚公

子嬰齊、秦右大夫說、宋華元、陳公孫寧、衛孫良夫、鄭公子去疾，六國皆得有氏名者也。會與盟同月則地會不

地盟，【補曰】誤梁是也。雞澤戊寅盟亦其類。又或地盟

不地會，如新城及雞澤已未盟略不言者，方明此不宜地盟，故專舉不地盟之例。不同月則地會地盟，此其地

會地盟何也？以公得其所，申其事也。公得

其所，謂楚稱人。申其事，謂地會地盟。今之屈，向之

驕也。【補曰】言今之屈而稱人者，即向之驕亢敵公者

也。驕即亢也。一驕一屈，即此一人之身，故宜申其事以詳之。屈者，謂《經》有屈文，非是嬰齊真能自屈，嬰齊何爲至盟而忽屈乎？向，或作「鄉」，作「歸」，上注同。書公及者，以尊及卑，以內及外，從常例也。上言公會，則無嫌於內爲志，故此可從常例。趙汭曰「蒙會文言及」，得之。不致者，會夷狄與薄、宋同。又外皆無君，與翟泉、澶淵同。

三年春王正月，公會晉侯、宋公、衛侯、

曹伯伐鄭。宋、衛未葬，而自同於正君，故書公侯以譏

之。【補曰】月者，爲下葬日。

辛亥，葬衛穆公。【補曰】危之者，從晉文公例。

下宋葬亦同也。衛宣公但月者，五月而葬，時事或較愈。

二月，公至自伐鄭。【補曰】月者，爲下災日。

甲子，新宮災，三日哭。新宮者，禰宮

也。謂宣公廟也。三年喪畢，宣公神主新入廟，故謂之新

宮。【補曰】注後三句本杜預。呂本中、崔子方以爲「當時之辭」是也，然非《傳》義，《傳》以新宮爲禰宮之常稱，不專以其新入廟。三日哭，哀也。【補曰】何休曰：「痛傷

鬼神無所依歸，故君臣素縞哭之。」其哀，禮也。官廟，親之神靈所憑居，而遇災，故以哀哭爲禮。【補曰】《公羊》

同，注本杜預也。《檀弓》曰：「有焚其先人之室則三日哭，

故曰新宮火亦三日哭。」《左傳》記鄭災，三日哭，國不市。

迫近不敢稱謚，恭也。迫近，言親禰也，桓、僖遠祖

則稱謚。【補曰】迫，逼也。注「遠祖」指哀篇也。莊公丹楹

刻桷，《傳》曰「斥言桓宮以惡莊也」，明此爲恭辭。其辭

恭且哀，以成公爲無譏矣。【補曰】其辭，《經》之辭

也。既盡其恭，又詳錄其哀哭，是以爲無譏。

乙亥，葬宋文公。

【補曰】《左傳》曰「始厚葬用

殉」。《呂氏春秋》曰：「宋未亡而東豕扣。」高誘曰：「文公

冢也。」

夏，公如晉。

鄭公子去疾帥師伐許。

公至自晉。

秋，叔孫僑如帥師圍棘。

【補曰】《公羊》曰：

「棘者何？汶陽之不服邑也。」與《左傳》同。大氏此等處，

《穀梁》多略也。莊二年伐於餘丘，《傳》言「病公子以譏

公」，此圍棘及後圍費、圍鄆、圍郕亦其例矣。伐人邑與圍內邑不同，而非國言伐，非國言圍，皆是內事，取類不異。

大雩。

晉卻克、衛孫良夫伐牆咎如。

【補曰】杜預

曰：「赤狄別種。」○【撰異曰】牆，《左氏》作「廡」。案：「牆」

與「廡」一字。《公羊》作「將」。

冬十有一月，晉侯使荀庚來聘。衛侯使

孫良夫來聘。【補曰】月者，爲下盟日。

丙午，及荀庚盟。丁未，及孫良夫盟。

其日，公也。【補曰】來盟不日，聘而盟則日。來者，接

公之文，聘而盟亦承上「來」文，明皆公盟也，明皆非齊高侯、晉處父之比，非諱也。《傳》特以書日，明爲公者。疏

曰：「以上文聘既接公，下言及則公文未顯，嫌不得再煩尊

者，恐盟時無公，故《傳》云「公」以釋之。」案：疏說固可通，

但未知《經》承「來」文，本自足以顯公，而《傳》之以書日爲

說者，乃就一邊言也。《經》所以不言公及者，下文云「以國

與之」是也。以其既足顯公，故得以不書公爲義，與來盟

同。來聘而求盟，【補曰】彼來聘，因求盟也，此所以別

於前定。不言及者，以國與之也。不言其人，亦以國與之也。徐邈曰：「不言及，謂凡書來盟者也，若宣七年衛孫良夫來盟是也。以國與之，謂舉國爲主，故直書外來爾。此先聘而後盟，故不言來盟，總言及而不復著其人，亦是舉國之辭。不言求，兩欲之也。」補曰：「疏曰：『來聘是他求，言及，我欲也，是兩國同欲之文，非獨求之稱。』文烝案：及之固是我欲，而非以書及爲欲。凡聘而盟言及，及者尊卑内外之辭，朝而盟亦然，皆與凡內爲志言及者異例。」

鄭伐許。鄭從楚而伐衛之喪，又叛諸侯之盟，故狄之。【補曰】疏曰：「叛諸侯之盟者，舊解以爲上文背晉，爲諸侯所伐是也。不於前年伐喪貶者，其罪不積，不足以成惡。鄭既伐喪背盟，一年之中，再加兵於許，故於此夷狄之。」文烝案：賈逵說《左氏》曰：「鄭，小國，與大國爭諸侯，仍伐許。不稱將帥，夷狄之，刺無知也。」何休說《公羊》曰：「謂之鄭者，惡鄭襄公與楚同心，數侵伐諸夏，自此之後，中國盟會無已，兵革數起，夷狄比周爲黨，故夷狄之。」賈言「仍伐」，何言「數侵伐」，楊言「一年再加兵」，程子、胡安國皆用其說，得《經》旨矣。

四年春，宋公使華元來聘。

三月壬申，鄭伯堅卒。○【撰異曰】《公羊》舊有二本，或作「堅」，或作「𢇛」。徐彥《公羊疏》曰：「鄭伯𢇛卒者，《左氏》作「堅」字，《穀梁》作「賢」字，今定本亦作「堅」字。」案：今《穀梁》不作「賢」。惠棟曰：「《公羊》『𢇛』，《穀梁》『賢』一字也。《說文》『𢇛』，古文以爲「賢」字，漢碑有「親𢇛」、「優𢇛」，即「賢」字。」又《玉篇·糸部》引成公四年鄭伯𢇛卒，古千、古兩二切。陸淳《纂例》「堅」，《公羊》作「姬」，段玉裁謂《玉篇》「𢇛」乃「姬」之譌，从糸臣聲，即「緊」字。竊疑《纂例》「姬」亦「𢇛」之譌矣。

杞伯來朝。

夏四月甲寅，臧孫許卒。

公如晉。

葬鄭襄公。

秋，公至自晉。

冬，城鄆。【補曰】杜預曰：「公欲叛晉，故城而爲

備。」《左傳》以爲晉侯見公不敬，公至自晉，欲叛晉。故杜

云爾也。孔穎達曰：「《釋例·土地名》魯有二鄆，文十二年城諸及鄆，杜云此東鄆，莒、魯所爭者。成十六年《傳》晉人執季文子，公待于鄆，杜云此西鄆，昭公所出居者。然則此爲欲叛晉，故城當西鄆也。」

**鄭伯伐許。**喪未踰年，自同於正君，亦譏之。【補

曰】推《傳》例，諸侯在喪未葬、或葬而未踰年，凡會盟侵伐皆以稱子爲正，而稱子亦猶有譏，公侯伯子男當無異例也。鄭之子儀，被弑無諡，《左傳》始終稱鄭子。《國語》楚范無字亦謂之鄭子，當時不以爲君也，知伯有子稱明矣。董仲舒說此以爲父伐人喪，子以喪伐人，《春秋》以其無子恩，不復稱子，謂之鄭伯，以辱之。

**五年春王正月，杞叔姬來歸。**【補曰】何休

曰：「始歸不書，與鄭伯姬同。」文烝案：齊子叔姬、鄭伯姬蓋皆夫未爲君時歸之，此杞桓公夫人也。僖三十一年杞伯姬來求婦，或者是歟？又疑以禮不備，略其歸矣。文十二年之子叔姬是許嫁之女，《左傳》誤以爲絕於杞，杜預乃謂杞桓公立其姊爲夫人，孔穎達以爲姊亦字叔者，周之法積叔也。其說皆不足據。婦人之義，嫁曰歸，反曰

**來歸。**【補曰】隱二年解「歸」，此解「來歸」，故各見之。

疏曰：「范氏云出女例凡三：齊人來歸子叔姬一也，鄭伯姬來歸二也，此杞叔姬來歸三也。又別引文十八年夫人姜氏歸于齊爲例。」文烝案：何休曰：「婦人有七棄，五不娶，三不去。嘗更三年喪不去，不忘恩也；賤娶貴不去，不背德也；有所受，無所歸，不去，不窮窮也。喪婦長女不娶，眉批：喪婦，或作「喪父」，宜考。無教戒也；世有惡疾不娶，棄於天也；世有刑人不娶，棄於人也；亂家女不娶，類不正也；逆家女不娶，廢人倫也。無子棄，絕世也；淫泆棄，亂類也；不事舅姑棄，悖德也；口舌棄，離親也；盜竊棄，反義也；嫉妒棄，亂家也；惡疾棄，不可奉宗廟也。」《大戴禮·本命》有「前貧賤，後富貴，不去」句，無「賤取貴」句。

**仲孫蔑如宋。**

**夏，叔孫僑如會晉荀首于穀。**穀，齊地。

○【撰異曰】首，《公羊》作「秀」。

**梁山崩。**梁山，晉之望也。不言晉者，名山大澤，

不以封也。許慎曰：「山者陽位，君之象也，象君權壞。」【補曰】注首句《爾雅》文。不繫晉者，言梁山則爲晉山可知。注以《王制》說之，非是。沙鹿亦不繫國，沙非名山也。

沙直言沙，梁加言山者，文不連鹿，不可單言梁，猶《書·禹貢》或言荆，或言荆山，皆屬文之宜，《荀子》所謂累而成文。不日何也？據僖十四年秋八月辛卯沙鹿崩書日。高者有崩道也。【補曰】非同山足之林，仍從外災時例。有崩道則何以書也？【補曰】疑若非變異。曰梁山崩，壅遏河，三日不流，【補曰】言壅河害大，故書。《公羊》曰：「大也。」壅者，遏也。「遏」，衍字，下同。《漢書·五行志》引此作「靡河」，《公羊》作「壅河」，並無「遏」字。晉君召伯尊而問焉。【補曰】《左傳》、《國語》、《韓詩外傳》皆作「伯宗」。伯尊來，遇輦者，【補曰】輦者，輓輦者。《左傳》曰「重人」，《國語》曰「大車當道而覆」。輦者不辟，使車右下而鞭之。凡車將在左，御在中，有力之人在右，所以備非常。【補曰】凡驂乘有車右，有御者，范言「將」是專謂兵車，有右，非也。兵車之制，若是君與元帥則皆居中，而御者在左，與乘車及他兵車不同，亦不可概云將左御中也。此「車」，傳車也。《詩音義》以「車」曰「傳」，以「馬」曰「遽」。輦者曰：「所以鞭我者，其取道遠矣。」所用鞭我之間，行道則可遠。

【補曰】《韓詩外傳》「取」作「趨」。伯尊下車而問焉，以其言有理，知非凡人。【補曰】下車敬之。曰：「子有聞乎？」【補曰】稱子，崇之。對曰：「梁山崩，壅遏河，三日不流。」伯尊曰：「君爲此召我也，爲之柰何？」輦者曰：「天有山，天崩之，【補曰】《左傳》、《國語》曰「山有朽壤而崩」。天有河，天壅之，雖召伯尊如之何？」伯尊由忠問焉。用忠誠之心問之。【補曰】由，古通以爲「猶」字，訓「用」非也。「忠問」，猶《論語》云「忠告」。輦者曰：「君親素縞，帥群臣而哭之，素衣縞冠，凶服也。所以凶服者，山川國之鎮也，山崩川塞示哀窮。【補曰】《周禮·司服》「大札大荒大裁素服」，鄭君曰：「君臣素服縞冠，若魯伯宗哭梁山之崩。」或以素縞之文俱爲冠。案：《閏傳》「大祥素縞麻衣」，鄭君曰：「素縞者，《玉藻》所云「縞冠素紕，既祥之冠」。《檀弓》注又以縞冠當素服。《左傳》、《國語》曰「國主山川」，又伯陽父曰「國必依山山川」。既而祠焉，斯流矣。」【補曰】流者，王充以爲水盛土散也。素縞而祠，示有人事耳。知天之變，盡人之常，輦者之言，所以爲善。伯

尊至，君問之曰：「梁山崩，壅遏河，三日不流，爲之奈何？」伯尊曰：「君親素縞，帥群臣而哭之，既而祠焉，斯流矣。」孔子聞之曰：「伯尊其無績乎！攘善也。」績，功也。攘，盜也。取輦者之言而行之，非己之功也。績，或作「績」，謂無繼嗣。【補曰】《爾雅》：「績，事也，業也，功也，成也。」又「績，績繼也。」「績」與「緝」通，故與「績」亦得同訓。此《傳》若作「績」而訓「功」，則文義不順。《韓詩外傳》述此事略與《傳》同，其字作「無後」，明《傳》義自謂繼嗣，績、績之字，得兩通也。以其事考之，《左傳》晉殺伯尊，其子州犁奔楚，在夫子生前，其後州犁仕楚見殺，又其後伯氏之族出，州犁之孫韜仕吳，最後又仕越，似皆未可爲無後之證。以其理斷之，如疏引舊說云「伯尊蔽賢罪深，故被戮絕嗣，子夏雖匿聖人之論，能播教於西河，其罪既輕，故直喪明而已」。楊氏以爲天道冥昧，非人所知，徒爭罪之輕重，妄說受罪淺深，恐非聖賢之旨也。然則夫子言此者，蓋猶《孟子》云「不祥之實，蔽賢者當之」，此惡之之辭，非億之之辭，而被戮喪明等事，皆可無論矣。夫無後之爲大罰，人所知也；輦者之言之善而攘之者之爲大惡，人所忽也；正猶作俑象人，數典忘祖，亦皆人

所忽，而皆謂之無後也。古書之文，參伍深思則了。

秋，大水。

冬十有一月己酉，天王崩。定王。【補曰】

《史記》名瑜，匡王弟。《國語》注作「榆」，又作「揄」。○【撰異曰】「有」字各本脫，今依唐石經補正。

十有二月己丑，公會晉侯、齊侯、宋公、

衛侯、鄭伯、曹伯、邾子、杞伯同盟于蟲牢。

蟲牢，鄭地。【補曰】後魯、衛侵宋渝盟不見有晉師，故還從書日常例。程子曰：「天王崩而會盟不廢，見其皆不臣。」

本孫復說，胡安國同。

六年春王正月，公至自會。【補曰】孔廣森

曰：「月者，正月也。」

二月辛巳，立武宮。舊說曰武公之宮廟毀已

久矣，故《傳》曰不宜立也。《禮記·明堂位》曰：「魯公之

廟，文世室也，武公之廟，武世室也。」言世室則不毀也，則

義與此違。【補曰】疏曰：《禮記》，周末之書，以其廟不

廢，故謂之世室耳。孔廣森曰：「不云武世室者，立毀廟猶

可言也，擬天子不可言也，《春秋》以其可辭書之。」文烝

案：《史記》真公澠弟武公敖。立者，不宜立也。【補曰】重發《傳》者，嫌與立君異也。《公羊》同。蕭楚曰：「起而置之之謂立。」文烝案：《左傳》季文子以鞶之功立武宮。何休曰：「臧孫許伐齊有功，故立武宮。」

取鄆。【補曰】內諱滅，謂之取，皆以易辭書。《公

羊》昭四年《傳》得之。諱者，《經》例因史例也。鄆，國也。【補曰】此獨釋鄆之爲國，明取根牟、取郛皆邑而非國也。滅例卑國月，此取亦蒙上二月，下良夫侵宋乃三月事，《左傳》有明文。取繒亦月，入極亦蒙上月，皆與此一例。至取根牟、取郛皆時，知自從取邑常例。

衛孫良夫帥師侵宋。

夏六月，邾子來朝。【補曰】月者，爲下卒日。

公孫嬰齊如晉。

壬申，鄭伯費卒。【補曰】鄭悼公也。不葬者，

疏曰：「魯不會。」

秋，仲孫蔑、叔孫僑如帥師侵宋。

楚公子嬰齊帥師伐鄭。

冬，季孫行父如晉。

晉樂書帥師救鄭。○【撰異曰】《公羊》作「侵鄭」。董仲舒所謂楚與中國俠而擊之。汪克寬曰：「明年，楚復伐鄭，諸侯又救鄭，則非侵明矣。」

七年春王正月，驪鼠食郊牛角。不言免牛

者，以方改卜郊，吉否未可知。【補曰】范意以免牛者不郊之謂也，時方改卜後牛，後牛既定則當卜郊，郊或得吉，亦未可知，故此不言免牛，以其實不免也。不於宣三年「傷口」作注者，此下有「免牛」文，而彼文無之，故說於此也。疏未得其解。而孔穎達以爲前牛亦免，從下免省文，誤矣。《說文》曰：「驪，小鼠也。」《爾雅》舊注曰：「色黑而小有毒。」《博物志》曰：「或謂之耳鼠。」《玉篇》曰：「食人及鳥獸皆不痛，今之甘口鼠也。」何休曰：「驪鼠，鼠中之微者。」《漢書·五行志》、京房《易傳》曰：「祭天不慎，厥妖驪鼠齧郊牛角。」劉向以爲近青祥，亦牛旣也。羅願曰：「牛繫於牢，設楅衡以制其角，故驪得食之。」各本此《經》下衍「改卜牛，驪鼠又食其角，乃免牛」十二字。今依唐石經、十行本刪正。不言日，急辭也。辭中促急不容之。【補曰】不言日，當爲「不言之」，謂牛角之間無「之」字，異於郊牛之



口也。注「之」字亦誤「日」，今改正。下注同。疏不知《傳》與注「日」字皆誤，其說難通。過有司也。【補曰】欲顯

有司之過，故爲急辭。過，謂不敬。過有司即過君也。哀

元年《傳》曰「志不敬也」，與此互相備。郊牛日展觚角

而知傷，展道盡矣，其所以備災之道不盡也。

有司展察牛而即知傷，是展察之道盡，不能防災禦患，致使牛傷，故不書之，以顯有司之過。觚，球球然，角貌。【補

曰】疏曰：「展，省察也，言日日皆省察牛之觚角。」文烝案：《祭義》曰：「朔月月半，君巡牲。」《說文》曰：「觚，角

兒。」今《詩》或作「抹」，爲假借字。或作「觚」，爲誤字。此

觚角，角繭栗也，《詩》之「牝牡掬角」則角握若尺矣。備災之道不盡，不敬之過也，三句申過有司之意。

改卜牛，騶鼠又食其角。又，有，繼之辭

也。前已食，故曰繼。其，緩辭也。【補曰】凡言「其」

者，皆緩辭，與言「之」同意。曰亡乎人矣，非人之

所能也，【補曰】曰者，目《經》意也，非人所能，所以謂之

亡乎人。《孟子》曰「非人之所能爲也，天也」，又曰「莫之爲而爲者，天也」。《音義》曰：「能」亦作「耐」。所以免

有司之過也。至此復食，乃知國無賢君。天災之爾，

非有司之過也，故言其以赦之。【補曰】注失其理。《五經

異義·公羊說》：「騶鼠，神物，食牛角，咎在有司，又食，咎

在人君。」范說正同。尋《傳》意，實不如此。備災之道不

盡，謂之不敬，猶大室屋壞，由於不脩，亦謂之不敬也。不

敬者，人之所爲，故直言牛角爲急辭，所以過有司也。既改

卜牛，備災必盡，重復被食，非人所能，不敬之罪，無所可

責，故言其角爲緩辭，所以免有司之過也。宣三年言之口

爲緩辭，後牛又死，但謂之事之變，亦此意耳。過有司即過

君，有司免過，君亦可知。《公羊》家及范解語涉機祥，文徒

支贅，不可用也。何休曰：「不重言牛獨重言鼠者，言角牛

可知。後食牛者，未必故鼠，故重言鼠。」

乃免牛。乃者，亡乎人之辭也。免牲

者，爲之緇衣纁裳，有司玄端，奉送至于南

郊。免牛亦然。【補曰】疏曰：「重發《傳》者，此再食

乃免牛，嫌與他例別，故重發之。」免牲不曰不郊，免

牛亦然。郊者用牲，今言免牲，則不郊顯矣。若言免牛，

亦不郊，而《經》復書不郊者，蓋爲三望起爾，言時既不郊，

而猶三望，明失禮。【補曰】杜預下注曰：「書不郊，間有

事。」疏曰：「春免牛，夏乃三望，故備言之。」文烝案：二句文體與襄十二年《傳》伐國不言圍邑四句同。

### 吳伐郟。

【補曰】《左傳》載季文子之言謂「中國不振旅，蠻夷入伐而莫之或恤」，是即《春秋》之義。周世自小雅盡廢，四夷交侵，幽王隕焉。入春秋，即以會戎危公，垂四十年而楚見，又百年而吳見，君子治之，無所不盡其辭，故其於二國或同焉，或異焉，或外焉，或進焉，當以前後《傳》文比而觀之。○楚與吳、越代興，或謂與後世遼、金、元相似。今案：楚，荊州之夷也；吳、越，楊州之夷也，古所謂夷狄，九州之內者也；漢以來所謂夷狄，九州之外者也。由九州而四海，由四海而四荒四極，浸推浸遠，大運爲之，春秋之事，何可同也？雖然，有中國大一統之王則有春秋外夷狄之義，時異事異，名分不異，故《春秋》道名分，百世以俟聖人而不惑者也。

### 夏五月，曹伯來朝。

【補曰】月者，爲下三望起。

### 不郊，猶三望。

【補曰】言猶者，皆可以已。此在五月，尤非禮，正月再有牲變，已不郊矣。忽於五月行望禮，不知當時情事若何。

秋，楚公子嬰齊帥師伐鄭。

公會晉侯、齊侯、宋公、衛侯、曹伯、莒

子、邾子、杞伯救鄭。○【撰異曰】陸淳《纂例》曰：

「《左氏》『晉侯』下有『齊侯』。」案：今三家皆有。

八月戊辰，同盟于馬陵。馬陵，衛地。

公至自會。【補曰】此二事偶則以後事致之例。

吳人州來。州來，楚地。【補曰】林之奇曰：「楚

人禦吳以江，故用舟師，吳人撓楚以淮，故用車戰。前此吳自徐伐巢，淮西也；今人州來，淮北也。吳、楚爭淮，自此始，自雞甫之師一敗而吳得州來，滅巢及鍾離矣。是則亡郢始於失淮。」○【撰異曰】陸淳《纂例》曰：「《公》、《穀》皆作『州萊』。」案：今皆不作「萊」。

冬，大雩。雩，不月而時，非之也。【補

曰】亦通秋言之，雩以月爲正，謂八月、九月。冬無爲雩也。【補曰】申上意也。疏曰：「八月、九月雩之正，不雩

則不及事，故月以明之。既過此節，秋不書旱，則冬無爲雩也。」文烝案：秋不書旱，冬固不須雩，秋若書旱，其災已成，冬雩亦無及，故曰冬無爲雩也。此年蓋竟九月雩不得

雨，而不爲災，言旱則不可言雩，則又嫌得雨，本當言不雨以明之，因冬初又雩而得雨，冬言雩，而其曲折盡見，故秋末不須言不雨也。若然，昭二十五年、定七年並是兩雩，而前雩無所嫌者，以其同在一月一時，與此異也。秋既無災，冬亦無爲雩，故從時例，所以非之。

### 衛孫林父出奔晉。

八年春，晉侯使韓穿來言汶陽之田，歸之于齊。晉爲盟主，齊還事晉，故使魯還二年齊所反之田。

【補曰】此本杜預而詳之。《聘禮》曰：「若有言則以束帛如享禮。」其《記》曰「束帛加書以將命」，鄭君引此《經》爲證，並引告糴乞師。于齊，緩辭也，【補曰】似句首脫一「之」字，或省耳。疏曰：「之」爲緩辭，自是常例，于齊之理未明，故特釋之。」疏非也。「田」上加「之」亦緩辭，不言，從可知。《傳》文簡略，往往如此。不使盡我也。若曰爲之請歸，不使晉制命于我。【補曰】盡者，唯其所命也。七年之中，一與一奪，晉之盡我，乃我之恥，故爲緩辭，婉其文不使盡，此申上句意也。不使盡我，猶莊八年不使齊師加威於邾矣。取汶陽田不加「之」，濟西、龜陰、鄆東、沂西

諸言田皆不加「之」，歸之于京師與歸于京師異義，明此《經》二「之」字非苟然者。趙鵬飛以爲《春秋》書法未有若是之詳且婉者，其說近是。因以見《春秋》辭句，緩急之間，一字不可損益也。《公羊》不達此旨，但解「來言」爲內辭。《聘禮》明載「有言」之文，無關《春秋》新意，新意乃在緩辭耳。范言「爲之請歸」，既涉《公羊》之見，而孔廣森溺於《公羊》，反謂《穀梁》圈囿於辭例，非辭例何以觀《春秋》哉？竊以爲《春秋》、《論語》皆不與他書同，《春秋》，夫子之手筆也，片言隻字，自然入妙焉。《論語》，夫子之口說也，發聲送句，渾然畢肖焉。

### 晉欒書帥師侵蔡。

### 公孫嬰齊如莒。

### 宋公使華元來聘。

夏，宋公使公孫壽來納幣。婚禮不稱主人，宋公無主婚者，自命之，故稱使。納幣不書，書者賢伯姬，故盡其事。【補曰】案：紀履緌來逆女不稱使者，譏不親迎，《傳》有明文。今此納幣，本卿之事，稱使自是常文。此注本杜預，而杜本《公羊》，顯與《傳》違，宜刪去「婚禮」四句。其言賢伯姬，亦似是而非，納幣與來媵爲類，當依來媵

《傳》言以伯姬之不得其所，故盡其事，不當依致女卒災《傳》言賢伯姬也。疏曰：「書納幣三：莊公以非禮書，公子遂以喪錄，此爲賢伯姬。」文烝案：舊史凡納幣皆書，君子有書有不書，以其所不書著其所書也。

### 晉殺其大夫趙同、趙括。

秋七月，天子使召伯來錫公命。【補曰】何

休曰：「月者，例也，爲魯喜錄之。」○【撰異曰】錫，《左氏》作「賜」。韓滉強說之，以爲正書「錫」，不正書「賜」。而陸佃《爾雅新義》乃以「錫」爲仁，「賜」爲義，其解尤鑿。段玉裁曰「賜」乃「錫」之譌字。《左傳》曰「召桓公來賜公命」，以「賜」訓「錫」。凡《經》作「錫」，《傳》作「賜」，文元年《傳》「毛伯衛來賜公命」，俗本改彼《傳》之「賜」爲「錫」者亦非也。案：陸淳《纂例》惟云《公羊》作「錫」，葉夢得《傳》唯云《穀梁》作「錫」，皆誤。禮有受命，無來錫命，錫命，非正也。【補曰】疏曰：「重發《傳》者，文踰年而賜，成八年乃賜，嫌異，故重發之。」曰天子何也？曰見一稱也。天王、天子，王者之通稱。自此以上，未有言天子者，今言天子，是更見一稱。【補曰】注首二句本杜預，其意則是，而未盡《傳》義。《公羊》曰：「元年春王正月，正也。」

其餘皆通矣。此杜氏通稱之說也。《穀梁》亦謂是通稱，而以桓、文、成三錫命共有三稱，故於此言見一稱，即此一稱包前二文，明王與天王亦是各見一稱也。《易·乾鑿度》及孟喜、京房說王爲美行之稱，天子爲爵號。《左氏》賈逵說畿內稱王，諸夏稱天王，夷狄稱天子，皆於《春秋》無所當。汪克寬曰：「《書·洪範》云「天子作民父母，以爲天下王」，故《立政》周公稱成王曰「告嗣天子王矣」，王與天子兼言之。《儀禮·覲禮》王與天子更互言之。《左傳》宰孔賜齊侯胙，富辛、石張請城成周，皆稱天子，答者亦曰天子，則信乎其爲通稱矣。」文烝案：《詩·小雅》言「王于出征，以佐天子」，亦是兼且互也。惟《周禮》一書專言王，其與《大戴禮·朝事儀》同文者，《行人》、《司儀》，皆以天子爲王。而《典命》一句亦言天子，其他則《司弓矢》、《校人》各一言天子，而《司弓矢》與《考工記》同文。《司服》一言天王，而與《昏義》同文。又《世子》之文甚多，無言天子者，而《諸子》職與《燕義》同文則否。觀於《世子》之一言大子也，王之三言天子，一言天王也，而今之成文可見者四焉。又《職方》之文全同《周書》，唯「公方五百里」至「男方百里」等句，其義可疑者，《周書》無之，直作「公侯伯子男」五字而已，是知《周禮》一書實有采集傳記者。小則依用，大則彌縫，其河

聞獻王毛生之倫乎？

冬十月癸卯，杞叔姬卒。杜預曰：「前五年

來歸者。女既適人，雖見出棄，猶以成人之禮書之。終爲杞伯所葬，故稱杞叔姬。」【補曰】注非也。杞叔姬不更適人，吾爲之變，故史錄其卒。錄卒自宜繫杞，《左氏》文十二年《傳》云「不言杞，絕也」，失之。

晉侯使士燮來聘。

叔孫僑如會晉士燮、齊人、邾人伐郟。

【補曰】據《左傳》晉以郟事吳故也。高澍然以爲爲吳通道。吳通晉之道二：一由宋彭城，十八年《左傳》曰「毒諸侯而懼吳、晉」是也；一由郟道莒，是年《左傳》「晉侯使申公巫臣如吳假道於莒」是也。

衛人來媵。杜預曰：「古者諸侯娶嫡夫人及左右

媵，各有姪娣，皆同姓之國，國三人，凡九女，所以廣繼嗣。魯將嫁伯姬于宋，故衛來媵。」【補曰】杜注大略本《公羊》也。何休曰：「言來媵者，《禮》君不求媵，諸侯自媵。夫人媵例時。」媵，淺事也，不志，此其志何也？【補曰】凡內女將歸而他國來媵者，史皆書之，君子以爲淺事，削而不志。以伯姬之不得其所，故盡其事也。不得其所，謂

災死也。江熙曰：「共公之葬由伯姬，則共公是失德者也。傷伯姬賢而嫁不得其所。」【補曰】此當依范說，以爲災死。言以伯姬之不得其所者，即襄三十年《傳》云「隱卒災也」。以伯姬卒災可隱，故盡其事。謂獨仍舊文，存其事也。言盡者，謂備其本末，納幣、三媵、歸宋，一事之本末也。常不志，特志，曰盡，常略，特不略，曰詳，皆即《公羊》所謂錄也。伯姬者，《春秋》之賢女，賢而卒災，故尤可隱，推極《經》義，賢意自見。言不得所，不須復言賢，故《傳》不言也。江熙以爲伯姬配失德之君即是不得所之事，於理亦通，而《傳》於此無是意也。共公失德不葬，十五年《傳》文其失德即謂不答伯姬，於彼《傳》論之，疏以江爲無所據，非也。

九年春王正月，杞伯來逆叔姬之喪以

歸。【補曰】以者，不以者也。傳曰：夫無逆出妻之喪而爲之也。【補曰】疏曰：「叔姬既犯七出之愆，反歸父母之國，恩已絕矣。杞伯今復逆出妻之喪而違禮傷教，言其不合爲而爲之，是以書而記之，以見非。徐邈云「爲」猶「葬」也，言夫無逆出妻之喪而葬，理亦通矣。但范不訓「爲」爲「葬」也。」俞樾曰：「徐乃自言其事耳，非訓

「爲」爲「葬」，「爲」當訓「治」，謂不當治其喪。」

公會晉侯、齊侯、宋公、衛侯、鄭伯、曹伯、

莒子、杞伯同盟于蒲。蒲，衛地。【補曰】不日者，爲

此秋執鄭伯以伐鄭，渝盟不信。祝柯盟爲惡之，亦略同。

公至自會。

二月，伯姬歸于宋。逆者非卿，故不書。【補

曰】劉向《列女傳》曰：「伯姬者，魯宣公女，成公妹也。其母曰繆姜。」文烝案：伯姬不稱子，則非同母。

夏，季孫行父如宋致女。致，敕戒之言於女。

【補曰】注以「致」爲致命，與劉向《列女傳》同，而其言太略，義不了也。說具於下。致者，不致者也。【補曰】重

發《傳》者，嫌與致妾母異也。婦人在家制於父，既

嫁制於夫，如宋致女，是以我盡之也。刺已嫁

而猶以父制盡之。【補曰】此解致者不致之意。盡，如八年

「盡我」之「盡」，已嫁宋而魯致之，是以我盡之。不正，

【補曰】以我盡之，故曰不正。故不與內稱也。內稱，

謂稱使。【補曰】如者，內稱使之文，注甚謬。疏強爲之說，

不可通也。內稱，謂稱伯姬，不稱伯姬而稱女，是不與內

稱。《傳》意言致，故言女，非禮之常，異其文耳，非譏魯，亦

非貶伯姬也。疏引徐邈言「伯姬責小禮違大節」，非是，惟

言稱女則得之。又以不稱夫人爲說，外夫人安得稱夫人

乎？父母之於子，雖爲諸侯夫人，猶曰吾伯姬，此內稱之

義也。來逆稱叔姬，不稱女，曰不與夫婦之稱，致稱女，不

稱伯姬，曰不與內稱，文可互明，義各有當。逆者微，故

致女。【補曰】此論致女之由也，先儒說致女互有不同。

何休曰：「古者婦人三月而後廟見稱婦，擇日而祭於禰，成

婦之義也。父母使大夫操禮而致之，必三月者，取一時足

以別貞信，貞信著然後成婦禮。」又孔穎達《曾子問正義》

曰：「如鄭義則從天子以下至於士皆當夕成昏，舅姑沒者，

三月廟見，故成九年如宋致女，鄭云致之使孝，非是始致於

夫婦。隱八年陳鍼子譏鄭公子忽先配而後祖，鄭以祖爲祖

道之祭，應先爲祖道然後配合也。若賈、服之義，大夫以

上，無問舅姑在否，皆三月見祖廟之後乃始成昏，故譏鄭公

子忽先爲配匹乃見祖廟，故服虔注云如宋致女謂成昏也。」

又杜預曰：「女嫁三月，又使大夫隨加聘問，謂之致女。所

以致成婦禮，篤昏姻之好。」又《左傳》桓三年冬，齊仲年來

問，存謙敬，序殷勤也。在魯而出則曰致女，在他國而來則總曰聘。」統觀諸說，賈、服、何、杜以致女爲致之使成夫婦，鄭以致女爲致之使孝。《經》不言致伯姬而言致女，言女者，正明其未成婦，則言致者，必是致以成之，賈、服、何、杜是也，鄭非也。但賈、服、何、杜以爲女嫁三月必有致女之禮，與《左傳》桓三年致夫人之文極合，而此《傳》云「逆者微，故致女」，又上文重發例云「致者，不致者也」，則《左傳》及賈、服、何、杜說皆未可用。明大夫以上之禮，雖至三月廟見始成昏，而要無致女之事也。劉向《列女傳》曰：「宋恭公不親迎伯姬，迫於父母之命而行，既入宋，三月廟見，當行夫婦之道，伯姬以恭公不親迎，故不肯聽命。宋人告魯，魯使大夫季文子如宋致命於伯姬。」疏引徐邈曰：「宋公不親迎，故伯姬未順爲夫婦，故父母使卿致伯姬使成夫婦之禮，以其責小禮違大節，故《傳》曰不與內稱，謂不稱夫人而稱女。」劉子政用《穀梁》家舊說，而徐注因之，大意皆是。劉以致命當《經》「致」字，爲范所本，但以用致夫人之致例之，或是致之於宋之廟也。伯姬始嫁，彼自告至，至此因伯姬不肯廟見成夫婦，故我使人致之。鄭君《坊記注》引此《經》，而曰：「是時宋共公不親迎，恐其有違而致之。」彼上文云「壻親迎，舅姑承子以授壻，恐事之違」。謂恐此女

於昏事乖違，不親夫以孝舅姑也。如鄭此注，則不但以爲致之使孝，又不謂致女是常禮，是亦可與《傳》義相證也。詳其事，賢伯姬也。【補曰】詳者，謂言致女，不直言如宋也。魯變禮，故爲不正。伯姬守禮，故爲賢。前後文來賸皆國之常事，《經》盡其事，既以不得其所取義，此文致女非常事，乃足見伯姬之爲人，故《經》詳其事，則取義於賢伯姬。而《傳》與卒災《傳》同文也。

晉人來賸。賸，淺事也，不志，此其志何也？【補曰】凡內女已歸而他國來賸者，君子亦以爲淺事不志。以伯姬之不得其所，故盡其事也。【補曰】重發《傳》者，此在歸後，嫌有異也。

秋七月丙子，齊侯無野卒。

晉人執鄭伯。【補曰】晉侯稱人者，鄭有罪。

晉樂書帥師伐鄭。不言戰，以鄭伯也。

樂書以鄭伯伐鄭，君臣無戰道。【補曰】《傳》以是役也，樂書以鄭伯伐鄭，而鄭與晉戰，戰重於伐，而書伐不書戰，故發其義。《左傳》無以鄭伯伐鄭而鄭與晉戰之事。爲尊者諱恥，不使臣敵君，王師敗績于貿戎是也。【補曰】當



云如王師敗績之屬，下二句注皆同。爲賢者諱過，爲齊桓諱滅項是也。爲親者諱疾。雍曰：「樂書以鄭伯伐鄭，不言戰是也。鄭，兄弟之國，故謂之親，君臣交兵，病莫大焉，故爲之諱。」【補曰】疏曰：「三者之外，尚有爲魯諱敗之事，不言者，因爲同姓諱疾，則文亦包魯可知。聖人有作，親疏一也。今乃以同姓爲別者，《春秋》之意，因親及疏，故仲尼書《經》，內外有別，既內外別，則親疏尊卑見矣。」文烝案：又有爲祖諱之事，亦於諱疾中句之，三句不特出，《春秋》者省文，《公羊》閔元年《傳》有此三語，皆無下一字。尊尊、賢賢、親親，《春秋》之大義也。《孝經》曰：「要君者無上，非聖人者無法，非孝者無親，此大亂之道也。」《孟子》曰：「天下有達尊三：爵一，齒一，德一。」其意並與《春秋》相表裏。啖助曰：「諱者，非隱其惡，蓋諱避之，避其名而遜其辭，以示尊敬。」

### 冬十有一月，葬齊頃公。

楚公子嬰齊帥師伐莒。【補曰】卓爾康曰：

「楚兵未有至沂上者，今越淮、泗而伐莒，蓋爲備吳也，得莒則足以制鄭。」庚申，莒潰。其日，【補曰】凡潰，史皆曰，君子略之。莒雖夷狄，猶中國也。莒雖有夷狄

之行，猶是中國。【補曰】昭五年《傳》直以莒爲狄，與此互相明。案：《左傳》成風、叔孫婁皆以邾爲夷，仲尼學官於邾子，曰天子失官，學在四夷。邾、邾之爲夷，皆莒之類也。《左傳》又言「杞用夷禮」，杞即東夷，則似《傳》之言謬矣。晉侯以傳陽子歸謂之夷俘，本非夷，晉諱之耳，與諸國又不同。《傳》此二句，所以起下文，言彼固夷狄而中國者也，而今乃如下所云乎？大夫潰莒而之楚，是以叛其上爲事也。臣以叛君爲事，明君臣無道。【補曰】之，適也。大夫潰於莒而適楚師，是不能事其君上，而以叛爲事也。《傳》以叛上乃中國之大惡，故指而言之，若極論其理，則夷狄亦不得矣。《左傳》無大夫叛上之事，《傳》自有所受，與上一條同。各本皆作「知其上」。案：注云「臣以叛君爲事」，疏曰「莒帥衆民叛君從楚」。又僖四年疏云「莒潰書日，惡大夫之叛」，《傳》文作「叛」明矣。「叛」與「知」字左畔相似，故誤爲「知」，今特改正。又疏曰：「范別例云，凡潰者有四，發《傳》有三，僖四年蔡潰，《傳》曰「潰之爲言，上下不相得」，文三年沈潰從例，可知此莒潰雖同，是不相得，但與君臣不和自潰散小異，故發《傳》。昭二十九年，鄆潰，彼鄆是邑，與國殊，故重發《傳》。」惡之，故謹而日之



也。潰例月，甚之，故曰。【補曰】二句結上文「其日」二字，猶紀侯來朝，上云「朝時，此其月何也？」下云「惡之，故謹而月之也」。公侵宋，上云「侵時，此其月何也？」下云「惡之，故謹而月之」。戊寅大夫宗婦覲，己酉邾人執繒子，並云「惡之，故謹而日之也」，亦略相似也。《戰國策》安陵君曰：「吾先君成侯，受詔襄王以守此地也，手受大府之憲。憲之上篇曰：『子弑父，臣弑君，有常不赦。國雖大赦，降城亡子不得與焉。』」此得《春秋》之義矣。疏曰：「上言莒猶中國，故曰，下言惡之，故曰，明若莒非中國，雖惡不得日也。」案：疏誤以「猶中國」句爲正解日義，是不審《傳》之文勢。又謂夷狄雖惡不得日，於文似合，於理實乖。《傳》言莒猶中國，以見莒之罪耳，豈謂以其猶中國故得日哉？夫《春秋》之視莒，介乎中國夷狄之間者也，君臣父子之義，無間於中國夷狄者也。楚，夷狄也，而未嘗無父子也，故世子弑君，謹而日之也。莒，夷狄而中國也，而未嘗無君臣也，故大夫叛上，謹而日之也。樊遲問仁，子曰：「居處恭，執事敬，與人忠，雖之夷狄，不可棄也。」人心之不可不存也，猶人倫之不可不正也，皆不以中國夷狄而有異，此聖人之大訓也。

楚人人鄆。【補曰】疏曰：「魯雖有鄆，此鄆非魯也，當從《左氏》爲莒邑。大都以名通，故不繫莒。」文系案：此即文十二年之鄆，時屬莒耳。稱人者，嬰齊在莒，別以偏師入鄆，非嬰齊移師，不得爲繼事辭也。方苞、高澍然、葉酉說是。

秦人、白狄伐晉。

鄭人圍許。

城中城。城中城者，非外民也。譏公不務德政，恃城以自固，不復能衛其人民。【補曰】中者，中外之中，魯都非魯邑也。城之者，脩舊而又益之，若遷都之爲者也。中城而益則取之鄆，古者天子諸侯城鄆俱有定制，其居民則國中及郊，有六鄉三鄉，郊外曰野，有六遂三遂，皆吾民也。今公違魯舊制，以鄆益城，城外之民將悉外之，故書以非之。非，責也。凡內書城皆是益城，皆有責其外民之意，此文尤足顯義，故《傳》特發之。范注既不了，劉敞、葉夢得遂詆《傳》失，尤非也。趙汭曰：「成城中城而後襄城西鄆，定城中城而後哀城西鄆。」

## 春秋成公經傳第七補注第十八

穀梁 范氏集解 鍾文烝詳補

十年春，衛侯之弟黑背帥師侵鄭。【補曰】稱弟，見其親且貴，不論其有罪無罪，異於奔殺。疏引《答薄駁》及其自爲說皆謂黑背以有賢行稱弟，非也。

夏四月，五卜郊，不從，乃不郊。夏四月，不時也。郊時極於三月。五卜，強也。【補曰】

疏曰：「知其不可而強爲之。」文烝案：四月書五卜者，蓋十一月下辛即卜，至三月下辛爲五卜，至此四月上辛而不郊也。或四月下辛又卜，爲第五卜，即於是日決意不郊，因亦不復行免牲之禮。《傳》以爲強，後說似長。凡卜免牲不吉則不免，如後說，則不卜而不免也。「強」或作「彊」。乃者，亡乎人之辭也。【補曰】疏曰：「不時，亡乎人。重發《傳》者，嫌五卜與四卜異也。」文烝案：《公羊》曰：「其

言乃不郊何？不免牲，故言乃不郊也。」哀元年《傳》曰：「卜免牲者，不吉則否。」此因卜免不吉，故不行免牲之禮也。其牲繫而待，六月上甲，然後左右之，亦見哀元年《傳》。彼注曰：「未左右時，監門者養之。」孔穎達曰：「不以其禮免，直使歸其本牧。」

五月，公會晉侯、齊侯、宋公、衛侯、曹伯伐鄭。【補曰】月者，蓋爲下卒日。不致者，蓋晉侯有疾，不成伐。《左傳》以爲在會者是晉世子州蒲，啖助、劉敞辯之。

齊人來媵。媵伯姬也。異姓來媵，非禮。【補曰】《左傳》例凡諸侯嫁女，同姓媵之。異姓則否。鄭君以爲納女於天子，稱備百姓，則得有異姓。又《毛詩傳》云「諸侯一取九女，二國媵之」，《公羊》同。謂三國來媵，非禮。何休以爲唯天子取十二女也。若然，此非禮有二，但《經》意則以伯姬之不得其所，故盡其事，非以非禮書也。致女齊媵，俱非禮，非賢之，非以其不得所，無容獨存史文。

丙午，晉侯獯卒。【補曰】晉景公。案：《左傳》：「秋，公如晉。晉人止公，使送葬。冬，葬晉景公。公送葬，諸侯莫在。魯人辱之，故不書，諱之也。」然則晉景不

葬，乃仍魯史之舊。

秋七月，公如晉。【補曰】杜預曰：「親弔非禮。」文烝案：晉人止公，冬而會葬，會葬又非禮。說見襄三十一年。親弔喪則奔喪之比也。往反皆月，與宣奔齊喪同義。

冬十月。○【撰異曰】《公羊》無此三字。唐石經誤衍。段玉裁曰：「《禮記·中庸》正義云，成十年不書冬十月，賈、服有說，則《左經》亦當無之。」

十有一年春王三月，公至自晉。【補曰】月者，從奔齊喪之例，又與會淮同，非但爲下盟日。

晉侯使郤犇來聘。○【撰異曰】犇，《公羊》作「州」，後同。亦或作「犇」。

己丑，及郤犇盟。

夏，季孫行父如晉。

秋，叔孫僑如如齊。【補曰】下十四年有逆女文，此如齊，蓋納幣也。納幣得禮，則直言如此，君子略其文，從恒事不志之例也。莊之納幣以二十二年冬至二十四

年夏而逆女，文之納幣以二年冬至四年夏而逆婦姜，今此納幣在十一年秋，而十三年七月以前公不在國，故至十四年秋始逆女也。《左氏》於此但言「聘于齊，以脩前好」，殆失其實。杜預因不見納幣事，則以爲《經》文闕絕，宜無怪焉。

冬十月。

十有二年春，周公出奔晉。【補曰】周公，名

楚。不月者，從外大夫例。周有人無出，鄭嗣曰：「王者無外，故無出也。宗廟宮室有定所，或即位失其常處，反常書入，內宗廟也。昭二十六年，天王入于成周是。」【補曰】疏曰：「言周者，總君臣言之。注直據天子者，以王者出入俱有成文。」其日出，上下一見之也。鄭嗣曰：「上謂僖二十四年天王出居于鄭，下謂今周公出奔，上下皆一見之。」【補曰】上始言出居，至敬王言居不言出，下始言出奔，至王子瑕、王子朝言奔不言出，故曰一見之，文意與外內寮一疑之同。許翰、李廉頗得其解。言其上之道，無以存也。【補曰】申上意也。出者，失天下

之文，君不君，臣不臣，其道無以存此天下。上雖失之，

下孰敢有之？今上下皆失之矣。上雖有不君

之失，臣下莫敢效不臣之過，今復云周公之出，則上下皆有

失矣。君而不君，臣而不臣，是無以存乎世，言周之所以

衰。【補曰】疏曰：「僖二十四年《傳》曰『雖失天下，莫敢有

也』，此云『上雖失之，下孰敢有之』，注觀《經》立說，故二處

不同。」文烝案：注義非也。「上雖失之」二句即承前《傳》

言之。上雖失天下，臣下莫敢有之，既不敢有天下，則猶

能爲天子守天下。《傳》所謂「大夫國體」，《孟子》所謂天

位與共，於是乎見。今上下各見出文，明上既失之，下亦

不能守之矣。周之衰也，由上下皆失之，故各一見以明

義。其義既明，故後此遂從平文也。○《傳》解兩「出」

字，總僖、成、襄、昭五文以爲說，其爲《春秋》本意，決然

無疑。《左氏》、《公羊》亦知天子無出，自周無出，王者無

外，而於其言出，則莫能明其說，乃沾沾然就一事求之，

宜其膠滯瑣屑而終不能通也。《穀梁》之得，二家之失，

大都如此。

夏，公會晉侯、衛侯于瑣澤。瑣澤，某地。

【補曰】當云地闕。不致者，蓋此會無足善。《左傳》晉、楚

爲成，故會。○【撰異曰】瑣，《公羊》作「沙」。案：定七年齊、衛之盟，《左氏》經作「沙」，《傳》作「瑣」。

秋，晉人敗狄于交剛。交剛，某地。【補曰】亦

當云地闕。言敗不言晉師，與箕同。中國與夷狄不

言戰，皆曰敗之。不使夷狄敵中國。【補曰】此發中

國敗夷狄通例也。案：隱十年《傳》曰「內不言戰，舉其大

者」，然則凡中國敗夷狄直言敗，乃從內直言敗外之例，范

解失之。范見元年《傳》有「諱敵」之言而不審其文義，故一

誤以爲外不敵內，再誤以爲夷狄不敵中國。如注說則外敗

內何以直言戰？夷狄敗中國何以言戰言敗？莘、雞甫何

以爲變例乎？夷狄不日。【補曰】此又發中國敗夷狄

及夷狄相敗通例也。凡日以敗之者，成敗之也，不日以敗

之者，直舉其勝者言也。結日列陳曰戰，故書戰皆日，不日

者，謂之疑戰。至於中國敗夷狄，不須爲結日列陳之文，夷

狄相敗，又不知結日列陳，一則概書以疑戰之文，一則其事

本是疑戰，皆不言戰，亦皆不得日，惟長岸言戰，然亦以疑

戰而不日也。箕、交剛、婁林、長岸、橋李又皆不月以略之，

惟大原蒙上月。疏曰：「不於箕役發《傳》者，以再敗狄師

甚之，故發於此。」

冬十月。

十有三年春，晉侯使卻錡來乞師。【補

曰】杜預曰：「將伐秦。」乞，重辭也。【補曰】疏曰：「重

發《傳》者，公子遂內之始，此外之初，故發之。」古之人

重師，故以乞言之也。【補曰】疏曰：「言古之人者，

徐邈以爲引古以刺今。」文烝案：古者，春秋前也，策書之

文，實因乎古，而君子取之，與定十五年《傳》云「喪急故以

奔言之」同意。呂本中曰：「春秋之世，霸主之令小國，其

强大恣橫，有甚於平世天子之令諸侯者，而猶以乞師爲名，

則是先王之禮意猶有髣髴存者，惜乎其君臣上下不能襲其

號以求其意也。」

三月，公如京師。公如京師不月，月，非

如也。時實會晉伐秦過京師也。公行出竟，有危則月，

朝覲京師，理無危懼，故不月。【補曰】仍史文書月，明其本

非如。非如而曰如，不叛京師也。因其過朝，故

正其文，使若本自往。【補曰】不叛者，明不敢過也。案：

朝也，「二《傳》互相明諸侯不以過相朝，故州公不得言朝，諸侯不敢過天子，故公得言如，此亦諸侯盡朝。《左傳》曰「公及諸侯朝王」。

夏五月，公自京師，遂會晉侯、齊侯、宋公、衛侯、鄭伯、曹伯、邾人、滕人伐秦。【補曰】何休曰：「閒無事復出公者，善公鑿行。《公羊》以不敢過天子爲鑿行。鑿者，何休曰：「猶更造之意也。《左傳》有劉子、成子，公親在行，史必備錄。《經》不書者，王沿謂嫌若實受王命也。又《左傳》稱「戰于麻隧，秦師敗績」，賈逵曰：「晉直秦曲，無辭不得，敵有辭，故不書戰。」杜預駁其說。文烝謂是略之，不欲以一秦敵九國君卿，故書伐而已。月者，爲下卒起。○【撰異曰】唐石經《左氏》、《穀梁》皆作「公至自京師」，「至」字皆衍字也。余仁仲本、各本悉無「至」字。徐彥《公羊》疏曰：「《公》下「自」上有「至」字者，衍文。」齊侯，各本脫，今依唐石經、余本補正。言受命，不敢叛周也。使若既朝王，而王命已使伐秦。叛周，謂專征伐。【補曰】疏曰：「《傳》於公子遂已言不敢叛京師，此重發《傳》者，嫌君臣異例。」文烝案：上以「非如」之辭見義，此及公子遂二文皆以「繼事」辭見義，三者皆同

意。高閔說此曰：「其辭若志敬而實志不敬，此《春秋》微辭。」

### 曹伯廬卒于師。

【補曰】疏曰：「不日卒者，蓋非嫡子爲君故也。又僖四年注云『新臣卒于楚，故不日耳』，則此不日者或當爲卒于秦故也。若然，襄二十六年八月壬午許男甯卒于楚，注云『許男卒于楚，則在外已顯矣』。日卒明其正，二注不同者，以無正文。二理俱通，故爲兩解。或亦新臣非嫡子，不須兩解，理足可通耳。」文烝案：《傳》例在外日者爲其未踰竟，則知在竟外者例皆不日矣。在外未踰竟日者，晉侯黑臀、鄭伯髡原、宋公佐是也；在竟外不日者，許男新臣、曹伯廬、曹伯負芻、杞伯成是也。許男甯例當不日，而書日者，以其明言卒于楚，非若新臣不地及于師于會之不言國，故還從正卒書日之常例。蔡侯東國亦明言卒于楚，而不書日者，本非正嗣，雖在己國都內亦不日也。然則在外未踰竟者正不正皆日，在竟外而文不顯者正不正皆不日，在竟外而文顯者正則日，不正則不日，與常例同。若夫惡之而時卒者，悉不論其正與不正，在國內國外，竟內竟外。但新臣又不入此例耳，凡此中國諸侯書卒之別也。○【撰異曰】廬，《左氏》本亦作「盧」。傳曰：閔之

也。【補曰】閔其不卒於常所故地。公大夫在師曰

師，在會曰會。【補曰】疏曰：「諸侯或從會，或從伐，

皆閔其在外而死，故云卒于師于會也。卒于師則此曹伯廬及曹伯負芻是也，卒于會則杞伯成是也。許男新臣亦卒于師，彼以內桓師，故不書于師也。大夫之卒，例所不書，而與公同例者，舊解以爲《春秋》緣大夫之心，非謂外大夫書卒于師。若然，《傳》不得云大夫，且《經》無其事，《傳》因類發例者，其數不少，即饑云饑康之等，此雖無《經》，何爲不得也？又會大夫單伯之徒亦書會諸侯，若使卒于師，固當書之，故知《傳》謂公及大夫二者皆然也。」疏又引徐邈注以爲「公及大夫所會諸侯，在師言師，在會言會。」文烝案：疏解「公大夫」三字，如前說則公指外諸侯，大夫兼指內外大夫，如後注則皆指內，後注是也。內大夫所會諸侯，未有言卒于師卒于會者，適無其事也。兩「在」字正指公大夫，徐注辭不別白。

### 秋七月，公至自伐秦。

【補曰】後事小於先事，不以先事致者，孫復以爲「本非朝京師，故不以京師致」是也。鄭玉曰：「上書『如京師』，明《春秋》以朝王爲重，使不違於禮而世道有所防。下書『至自伐秦』，明諸侯爲伐秦而

出使，不失其實，而後人有所考。」文烝案：此實未滿二時月者，遠用兵而反，故危之，亦從往月致月有懼之例。

冬，葬曹宣公。葬時，正也。【補曰】疏曰：

「嫌卒于師，失正葬，故重發之。」文烝案：此非重發也，乃因卒文有異，特發以明例。書時所以爲正者，葬是彼國臣子之事，彼國自有史書詳其月日，魯史記之但當書時而已，此蓋《經》之新例。

十有四年春王正月，莒子朱卒。徐邈曰：

「《傳》稱『莒雖夷狄，猶中國也』，言莒本中國，末世衰弱，遂行夷禮。葬皆稱謚，而莒君無謚，謚以公配。而吳、楚稱王，所以終《春秋》亦不得書葬。【補曰】此莒渠丘公也。至此始卒者，從夷狄少進之例，蓋《經》例也。莒卒皆不日，與吳同例。《左氏》載續經哀十四年，莒子狂卒，文承五月下，亦不日，則不日者史例也。莒卒又皆不葬，與楚、吳同例，莒子狂亦不葬，則不葬者亦史例也。吳之不日，當爲《經》例，莒小而吳大，莒不朝魯而吳聘魯，莒爲讐而吳爲昏，魯史之例必不同吳於莒，故知吳當日也。楚、吳之不葬，當並爲史例，莒號夷而楚、吳號嫌，吳號嫌而又夷，魯史之法，周

禮所在，故知楚、吳當本不葬也，吳、楚稱王，故不葬。《公羊》及《禮·坊記》皆有其說。

夏，衛孫林父自晉歸于衛。【補曰】嘗爲大

夫，不言復歸者，據《左傳》晉侯使卻曄送林父而見之。衛侯欲辭，因其夫人定姜之請乃始見而復之，是歸時猶未復其位，故不言復也。凡復國中者，皆是復其位。

秋，叔孫僑如如齊逆女。泰曰：「親迎例時，

大夫逆皆謹月以譏之。下云九月僑如以夫人婦姜氏至自齊，一事不二譏，故此可以不月也。宣元年公子遂如齊逆女，亦以時逆而月致，義與此同。【補曰】疏曰：「彼雖文承正月下，正月自爲即位發文。」

鄭公子喜帥師伐許。

九月，僑如以夫人婦姜氏至自齊。大夫不以夫人，以夫人，非正也，刺不親迎也。【補

曰】疏曰：「公子翬如齊逆女，《傳》曰『不言翬之以來何也？公親受之於齊侯也』，然則公不親受宜言以夫人至，而曰非正者，逆女親者也，使大夫非正也。非正而以夫人至，故刺之。不發於宣公逆女者，宣以喪娶，故略夫人而不氏，一事不二譏，故省其文。成非喪娶，嫌無罪，故《傳》明

之。僑如之挈，由上致之也。【補曰】疏曰：「重發挈義者，非喪娶嫌異，故重明之。」

冬十月庚寅，衛侯臧卒。

秦伯卒。【補曰】秦桓公也。秦卒自此不名，以後

葬矣，至哀三年日卒矣。《公羊》昭五年《傳》曰：「何以不名？秦者夷也，匿嫡之名也。其名何？嫡得之也。」何休曰：「嫡子生不以名，令於四竟擇勇猛者而立之，獨嬰、稻以嫡得立之。」案：《傳》言滕用狄道，世子無名，不正者名，《公羊》移其事於秦，而說又岐異。《史記·秦本紀》悉據秦史，絕無斯言，明《公羊》未可用。而疏引徐邈說曰「秦伯不名，用狄道也」，非《傳》意也。《傳》於宿男之不名，以為未能同盟，薛伯、杞子亦當同義。疏謂「秦之不名，蓋同彼《傳》」，即《左氏》未同盟之例，此說是矣。但秦康公、共公俱未同盟，而罃、稻並名者，時秦與山東諸侯漸親，故轉從同盟例也。秦桓公之大夫嘗盟于蜀，而桓公不得名者，時秦與山東諸侯漸疏，其盟亦非魯意，故還從未同盟例也。景公以後，宴處西陲，赴告僅通，冠裳不接，蓋其勢埒於齊，其交合於楚，而其疏遠自外，同於戎翟，非復同盟諸侯之比，故終《春秋》遂不名也。至若《傳》所謂秦之為狄，自穀

戰始者，非指其名不名也。少進書卒不書日，又少進書日，乃是狄之從滕、楚、莒、吳之例。○《春秋》不名者五，國未同盟一義也，用狄道又一義也，《左氏》得其一，《公羊》得其一，所聞皆不備。

十有五年春王二月，葬衛定公。

三月乙巳，仲嬰齊卒。此公孫也，其曰仲何也？此蓋仲遂之子，據實公孫。【補曰】歸父弟

也，謚曰昭子。《公羊》以為公孫嬰齊，為兄後，故以王父字為氏，此不得其說而強為之辭。何休說之曰「未見於《經》為公孫嬰齊，今為大夫，死見於《經》為仲嬰齊」，此注有可取焉。子由父疏之也。雍曰：「父有弑君之罪，故不得言公子，父不言公子，則子不得稱公孫，是見疏之罪由父故。」【補曰】嬰齊非有罪也，為欲接足前篇之義，疏父以及子，若卒歸父亦同之矣。遂身以仲為氏，故疏其父子，則皆稱之。成公時有兩公孫嬰齊，六年如晉，八年如莒，《左傳》皆以為子叔聲伯，即十七年卒者。二年戰鞏，《左傳》不言其人，何休以此嬰齊為未見《經》，則彼亦當是伯聲。竊以古《經》簡質，若書歸父之弟，當必從同不別，此卒若不疏



之，則亦從同不別，不可以後世史家之學求之。家鉉翁以爲此一《經》舊史必書公孫也。

癸丑，公會晉侯、衛侯、鄭伯、曹伯、宋世子成、齊國佐、邾人同盟于戚。【補曰】下有「執」，不如蒲、祝、柯去日者，稱侯斥執，其惡已顯，不假去日，故還從書日常例，與溴梁同。○【撰異曰】成，《公羊》作「戊」，音恤。亦或作「成」。

晉侯執曹伯歸于京師。○【撰異曰】《公羊》「歸」下有「之」字，唐石經及板本誤衍也。以晉侯而斥

執曹伯，惡晉侯也。僖二十八年，晉人執衛侯歸之于京師，此伯討之文也。今以侯執伯，明執之不以其罪。【補曰】疏曰：「重發《傳》者，此執歸于京師，嫌晉無罪，故重明之。」文烝案：《左傳》謂曹伯殺大子而自立，黃仲炎云未必然，程端學以爲附會，恐當從之。《公羊》但云公子喜時讓國，而《左傳》下年曹人請晉，雖重子臧，亦未嘗不義曹君也。不言之，急辭也，【補曰】辭中促迫不容之。斷在晉侯也。明晉之私。

公至自會。

夏六月，宋公固卒。

楚子伐鄭。

秋八月庚辰，葬宋共公。【補曰】顧炎武曰：

《春秋》葬皆用柔日，惟此是剛日，其如頃熊、定公雨不克葬，遲至明日者歟？「月卒日葬，非葬者也。」宋共公正立，卒當書日，葬無甚危，則當錄月。今反常違例，故知不葬者也。然則共公之不宜書葬，昏亂故。【補曰】案：中國諸侯，若立非正嗣而葬則甚危，又不如齊小白之不正前見，則亦月卒日葬矣。而云月卒日葬非葬者，蓋以共公卒本宜日葬，本不宜日，二事俱違例，如注所云也。紀伯姬、叔姬亦是月卒日葬，與例相違，《傳》云「閔紀之亡」，不嫌是非葬者，內女書葬，明是特錄，不若諸侯書葬爲常文。月卒日葬與宋共姬不同，則知是閔紀之亡矣。《傳》言共公，非宜書葬，則共公爲失德甚明。注言昏亂，而隱三年徐邈注解此文云伯姬賢而不答，以是爲共公失德之實，徐說蓋是也。共公不親逆女，又不使卿，共姬以上九年二月嫁，至是纔七年，而是年三月宋世子成出會諸侯，成必非共姬所生，成已立爲世子，若早知共姬必無子者，其不見答，從可知矣。《史記·宋世家》以成爲共公少子。何休亦曰「共公

卒，子幼」，蓋皆誤以爲共姬所生，當是《公羊》家說，徐氏之言，當本《穀梁》家舊說，極合事情。此其言葬何也？

以其葬共姬，不可不葬共公也。葬共姬則其不可不葬共公何也？夫人之義不踰君也，

【補曰】子氏去葬，爲其君不葬也，共公不去葬，爲其夫人葬也，因合葬之法，明夫婦之義。爲賢者崇也。賢崇伯姬，故書共公葬。【補曰】崇伯姬之賢，使得達其不踰君之義，若共公未嘗失德。然紀伯姬、叔姬書葬，不葬紀侯者，紀侯大去，非我所葬，與此異也。

### 宋華元出奔晉。

宋華元自晉歸于宋。【補曰】不省文復出宋華元者，史常文也，鄭良霄再見則略之矣。不言復者，乍奔即歸，位本未絕也。據《左傳》華元至河上而反，李光地、高澍然以爲己人晉竟，言奔者，不必定抵其都也。明亦從有奉之例。

### 宋殺其大夫山。

【補曰】《左傳》稱其人曰蕩澤，曰子山，則山者蕩澤之字也。不氏又不名者，《左傳》稱蕩澤爲司馬，在祖之位也。此與僖二十五年皆稱國以殺並是

無罪之文。而彼直云大夫，此言山者，蓋因上書宋華元，下書宋魚石，此文在中，不可空言大夫，無以相別，故上下文書名姓，則此略書字，與文八年同義。

### 宋魚石出奔楚。

冬十有一月，叔孫僑如會晉士燮、齊高無咎、宋華元、衛孫林父、鄭公子鮪、邾人會吳于鍾離。【補曰】鍾離，楚邑。何休曰：「月者，危錄之，諸侯既委任大夫，復命交接夷狄。」會又會，外之也。再書會，殊外夷狄。【補曰】注順《衍傳》語，甚無發明。

當時吳實序末，宜稱邾人、吳人，今因不欲稱吳人，故殊會，是外之也。不言及吳者，與檣函同，與黃池異。會者外爲主，不嫌以吳爲主，與王世子同者，上有會晉文也。疏曰：「重發《傳》者，檣函表中國之辭，鍾離明内外之稱，故兩發之。」文彙案：《公羊》曰：「《春秋》內其國而外諸夏，內諸夏而外夷狄。」

### 許遷于葉。

【補曰】葉，楚地。遷者，猶得其國家以往者也。其地，許復見也。【補曰】重發《傳》者，許遷皆不月，故發《傳》於始，以明與凡遷同。

十有六年春王正月，雨，木冰。雨而木

冰也，雨著木成冰。【補曰】朱子曰：「上溫故雨而不雪，

下冷故著木而冰。」《公羊》同。志異也。《穀梁說》曰：

「雨木冰者，木介、甲冑、兵之象。」【補曰】疏曰：「劉向云：

「冰者陰之盛，木者少陽，卿大夫之象。此是人將有害，則陰氣脅木，木先寒，得雨而冰也。是時叔孫僑如出奔，公子

偃誅死。一日，時晉執季孫行父，執公，此執辱之異也。或

曰，今之長老名木冰為木介。介者，甲也，兵象也。是歲晉有陽陵之戰，楚王傷目而敗。」徐邈云：「五行以木為介。」

介，甲也。木者少陽之精，幼君大臣之象，冰者凝陰，兵之

象，今冰脅木，君臣將見執之異。根枝折者，象禍害速至也。」文烝案：范注與劉向或說同，徐注兼用何休語。《公

羊》於諸異皆曰記異也。《傳》唯此一見。周人之書，體例

高簡，不屑屑也。《左傳》亦如此。傳曰：根枝折。

【補曰】惠士奇曰：「言折乃草妖也，後世以封條雪為雨木冰，非也。」

夏四月辛未，滕子卒。【補曰】滕文公也。滕

卒至此始書日，以後名且葬矣。滕之不名者正，名者不正，

然則日正、不日不正之例不施於滕明矣。楚卒書日，《傳》曰「日少進也」，滕用狄道，故從少進之例。本亦不言正不正，特其用狄道，即於名不名見之，故以名不名別之耳。或後來舍其狄道，亦所不論矣。

鄭公子喜帥師侵宋。

六月丙寅朔，日有食之。

晉侯使欒黶來乞師。將與鄭、楚戰。【補曰】

乞師者，將伐鄭也。伐鄭而楚子救之，遇於鄢陵，此《左傳》之明文，當從杜注為是。孔穎達曰：「時欒黶未為卿，得名

見《經》者，襄二十九年鄭公孫段，杜云「蓋以攝卿行」，此亦當以攝卿故書。」

甲午晦，晉侯及楚子、鄭伯戰于鄢陵。

楚子、鄭師敗績。鄢陵，鄭地。【補曰】鄢陵與鄢異

地。服虔注此云「鄭之東南地」。日事遇晦曰晦，【補

曰】與僖十五年同，說詳彼。四體偏斷曰敗，此其

敗則目也。此言敗者，目傷故。【補曰】疏曰：「手足偏

斷尚謂之敗，目在首，重於手足，故亦為敗也。」文烝案：此明楚子所以得言敗。楚不言師，【補曰】據凡戰稱君者，

其敗皆稱師。君重於師也。【補曰】君敗則師可知，舉君爲重也。敗之訓有異，敗之例從同，此亦在敗例，故爲舉重。韓戰師敗君獲，不言師敗，故爲失民。《公羊》解彼《經》云「君獲不言師敗績」，何休亦以爲舉重，蓋失之。尋《傳》言「君重於師」，明大夫則重與師等，苟爲將見傷而師敗，當仍以師爲重也。《春秋》一句之中，一字而含兩訓者，逆婦姜于齊，夫婦之婦也，亦姑婦之婦也；楚子、鄭師敗績，傷目之敗也，亦大崩之敗也。兩句之中，一字而兼兩讀者，殺其君某，長言讀之殺也，及其大夫某，又承上句爲短言讀之殺也，《公羊》云《春秋》「伐者爲客」，「伐者爲主」，亦殺字之例也。

### 楚殺其大夫公子側。

秋，公會晉侯、齊侯、衛侯、宋華元、邾人于沙隨，不見公。沙隨，宋地。不見公者，可以見公也。可以見公而不見公，譏在諸侯也。

【補曰】疏曰：「不見公，是晉侯之意，諸侯既無解釋之者，即是同不與公相見，故以諸侯總之。」文烝案：《經》意若譏在公而不譏諸侯，則言不之文當以公主之，當承上「公」字直書曰不見諸侯，或承公而言弗，又當曰弗遇矣。據《左

傳》，僑如通於穆姜，欲去季、孟，公將會晉伐鄭，姜使逐二子。公請反而聽命，姜怒，公子偃、公子鉏趨過，指之曰「是皆君也」。公申守而後行，遂不及鄆陵戰。晉卻棼取貨於僑如，訴公於晉侯，晉侯不見公。

### 公至自會。【補曰】不與會而致者，內無惡。

公會尹子，晉侯、齊國佐、邾人伐鄭。尹

子，王卿士，子爵。【補曰】此本杜預。卿士者，天子之上大夫也，杜以子爲爵，其說可從。蘇子國於溫，溫滅而奔，稱溫子，後稱蘇子，子必是爵，明尹子、單子、劉子之等皆爵也。【眉批】：「孔穎達《詩正義》謂若曾子、閔子，非也。」此與《詩》

言「聚子內史」不同。彼以「子」配氏，是卿大夫尊稱之常，通乎列國。其上下文或字或直氏，皆取便文通稱，明與此異矣。周畿內有子爵，陸渾以爲因殷制。案：鄭君說殷爵三等，公、侯、伯也，異畿內謂之子。又答張逸云，微子、箕子實是畿內采地之爵，非畿外治民之君。汪克寬曰：「伐秦不書劉子、成子者，所以削其請王師而著，因行朝王之慢也。伐鄭游書尹子、單子者，所以彰其瀆王臣之失也。夫苟伐秦書劉、成，則爲朝王請命，而伐秦爲善矣；伐鄭不書尹、單，則無挾王臣之罪，而討貳抑楚不爲過矣。聖人筆

削，豈不深切著明哉？

### 曹伯歸自京師。不言所歸，歸之善者

也。【補曰】不言歸于曹以爲最善也。孫復曰：「歸自京師者，天子赦之之辭也。」高澍然曰：「觀衛侯鄭亦歸于京師，不書自，則知彼釋於晉，而此釋於王也。」高說略本蕭楚、趙鵬飛。不言復，與衛侯鄭同。出人不名，以爲

不失其國也。【補曰】順善文而盈之。高澍然曰：「釋

於晉則未入國，猶失位之侯，故名。釋於王不待復國，已成之爲君，故不名。」歸爲善，謂直言歸而不言其國，即曹伯

歸自京師不言于曹是。【補曰】此亦兼包鄭世子忽復歸于

鄭、曹伯襄復歸于曹、衛侯鄭歸于衛，言所歸不言自某。自

某歸次之。若蔡季自陳歸于蔡、衛侯鄭自楚復歸于衛

是。【補曰】言自某又言所歸也，歸與復歸一例，此注是也。

疏曰：「《傳》詳發例於此者，以歸文與常例異，故分別之。」

### 九月，晉人執季孫行父，舍之于荅丘。

行父，魯執政卿，其身執則危及國，故謹而月之，錄所憂也。

荅丘，晉地。【補曰】桓十一年注以爲執大夫無罪者月。疏

曰：「晉執季孫意如、叔孫婁二文皆承月下，月不爲執發，

故知此獨爲危而謹月。一解：意如及婁亦是危也。」文彞

案：何休以爲凡執例時，此月者，痛傷忠臣，不得其所。據

《左傳》，卻犢聽僑如之言，故執行父。○【撰異曰】荅，《公

羊》作「招」。執者不舍，據昭二十三年晉人執我行人叔

孫婁不言舍。【補曰】當據執季孫意如言以歸。而舍，

公所也。今言舍者，以公在荅丘故也。公在荅丘而言舍

者，明不得致也。若既不致，復不言舍，則無以見其舍。

【補曰】舍者，寘也。《左氏》載續經曰：「齊陳恒執其君，寘

于舒州。」《左傳》曰：「晉人以宋五大夫在彭城者歸，寘諸

瓠丘。」言之亦緩辭。杜預以爲言舍之，「明不以歸」，其義

亦得兼見。何休曰：「不稱行人者，在君側，非出使。」杜預

亦曰「非使人」。劉敞曰：「從公也。」執者致，據昭二十

四年婁至自晉。【補曰】亦當兼據意如。而不致，公在

也。在，在荅丘也。見舍于荅丘，還國則與公俱。不得致

者，重在公。何其執而辭也？問何故書執季孫行父

而言舍之復不致之辭邪？猶存公也。時行父雖爲晉

所執，猶欲存公之所在，故不致行父。又言舍之，皆所以見

公在荅丘。存，意公亦存焉，問存舍之不致之意，便

可知公所在乎？【補曰】焉，各本誤作「也」。今依楊疏、唐石經、余本、俞皋《集傳釋義》本改正。公存也。但存此二事，即知公在荍丘。【補曰】疏曰：「舊解舍是一事，于荍丘是二事，今以爲舍于荍丘及不致爲二事。」文烝案：《傳》謂公還至荍丘，而《左傳》曰「公還，待於鄆」。鄆者，魯西邑，當是先在荍丘，後待鄆也。

### 冬十月乙亥，叔孫僑如出奔齊。徐邈曰：

「案襄二十三年，臧孫紇出奔齊，《傳》曰：『其日，正臧紇之出也。』《禮》大夫去，君掃其宗廟，不絕其祀。身雖出奔而君遇之不失正，故詳而日之，明有恩義也。」【補曰】范注彼《傳》云「正其有罪」，得之。徐似誤解「正」字以爲遇之不失正，范引之似謂既正其罪，兼明恩義。如其說，則慶父、歸父皆不絕祀，何以不日乎？

### 十有二月乙丑，季孫行父及晉卻犇盟于

扈。【補曰】行父非致，故不挈執。不致者，義在上《傳》。

### 公至自會。無二事，會則致會，伐則致伐。上無

會事，當言至自伐鄭，而言「至自會」，甯所未詳。鄭君曰：「伐而致會，於伐事不成。」【補曰】李廉曰：《春秋》不以本事致者，唯此伐鄭致會，襄十八年圍齊致伐。」文烝案：圍

齊實伐也。

### 乙酉，刺公子偃。【補曰】杜預曰：「公庶弟。」

大夫曰卒，正也。【補曰】重發《傳》者，嫌刺與卒異也。先刺後名，殺無罪也。僖二十八年，公子買成衛。不卒戍，刺之。是有罪者必先列其罪。【補曰】此猶外之稱國以殺也。偃但爲穆姜所指，不與謀，故無罪。杜預以鉏得不殺，臆度偃亦與謀，非也。疏引徐邈云「偃爲僑如所譖」，亦非也。

### 十有七年春，衛北宮括帥師侵鄭。○【撰

異曰】括，《公羊》作「結」。張洽曰：「誤。」

夏，公會尹子、單子、晉侯、齊侯、宋公、衛侯、曹伯、邾人伐鄭。

### 六月乙酉，同盟于柯陵。柯陵，鄭地。【補

曰】此《爾雅》所謂「陵莫大於加陵」。《淮南子》作「嘉陵」。柯陵之盟，謀復伐鄭也。【補曰】案：《左傳》曰：

「尋戚之盟也。」戚盟有鄭，則此盟鄭亦與矣。而《傳》云「盟謀復伐」者，晉強盟鄭，鄭未肯從，當其盟時，已有伐意，故

此冬復伐鄭也。此與後文京城北同，而與戲盟則異，戲盟鄭已服也。戲盟不嫌同辭者，其下有楚伐鄭文，非謀復伐可知，故不嫌也。

秋，公至自會。不日，至自伐鄭也，【補

曰】疏曰：「言公至自會者，《經》之常也。今《傳》起違例之問者，定四年，楚弱而為諸侯所侵，侵訖而盟，以盟為大事，故云至自會。鄭自鄆陵戰後不助中國，二年之間，三度興兵，以伐為重，盟為輕，故決其以伐鄭致。僖四年《傳》云「大伐楚」，不以會致，而以伐致，是其事也。」文烝案：盟後復伐鄭，當以伐致，襄十一年事是其明文。《傳》據彼文以問，不當如疏取僖四年事為說。疏說固可通，然非《傳》意。公不周乎伐鄭也。周，信也。公通諸侯為此盟爾，意不欲更伐鄭。【補曰】明以公不欲復伐鄭，故雖盟後實復伐，而從盟不復伐則以會致之例，乃轉同於偶事致後之常例也。何以知公之不周乎伐鄭？以其以會致也。【補曰】知，見也。反覆言之。何以知其盟復伐鄭也？以其後會之人盡盟者也。後會，謂冬公會單子等是。【補曰】疏曰：「案：後會齊侯不出，而云後會之人盡盟者，以今時身在，後遣大夫從師，故亦得云盡

盟。」文烝案：二句又申上《傳》。不周乎伐鄭則何為日也？據無伐鄭意而強盟。盟不由忠，不當日也。言公之不背柯陵之盟也。舍己從人，遂伐鄭。【補曰】二句又以足上未盡之意。

齊高無咎出奔莒。

九月辛丑，用郊。【補曰】何休曰：「日者，明用

辛例不郊則不日。」案：失禮祭祀例亦日。夏之始可以承春，以秋之末承春之始蓋不可矣。郊春事也。僖三十一年夏四月，四卜郊，不從。《傳》曰「四月，不時」，今言可者，方明秋末之不可，故以是為猶可也。【補曰】春分為建卯月之中氣，乃在四月，故言可承春。下言承春之始者，郊事起正月，欲甚言秋末之不可，故追遠言之。蓋者，發語辭。九月用郊，用者，不宜用也。【補曰】重發《傳》者，嫌與用致夫人異也。《公羊》同。何休曰：「周之九月，夏之七月，天氣上升，地氣下降，又非郊時，故加用之。」李瑾曰：「猶用牲于社，因史文也。」宮室不設不可以祭，衣服不脩不可以祭，車馬器械不備不可以祭，有司一人不備其職不可以

祭。【補曰】疏曰：「論用郊而陳宮室者，禮有五經，莫重

於祭，祭之盛者，莫大於郊，《傳》意欲見嚴父然後至其天，家國備然後祭享，故具說宮室、祭服、車馬、官司之等，明神非徒享味而已，何得九月始用郊乎？徐邈云：「宮室，謂郊之齋宮，衣服、車馬、器械亦謂郊之所用，言一事闕則不可祭，何得九月用郊？」理亦通也。」文烝案：徐說大概得之。齋宮者，路寢之室也。衣服，謂皮弁以聽祭，報祭則被袞戴冕，璪十有二旒。車馬器械，謂素車大路，旂十有二旒，龍章而設日月，器用陶匏，疏布幕，蒲越橐鞶，大圭不琢之屬。《說文》曰：「有所盛曰器，無所盛曰械。」有司之職謂凡所擇所戒者皆是，先於澤宮擇可與祭祀者，又於庫門內戒百官、大廟戒百姓。百姓者，親屬也。此言祭事重大，不得輕易用之。

祭者，薦其時也，薦其敬也，薦其美也，非享味也。【補曰】承上言祭之正也。時，謂

春時。敬者，言其心志。美者，言其禮物。享，食也，如享國、享祿之「享」。又言祭之義主薦，此三者非徒享味之謂，今日用之而已，是徒以爲享味也。哀元年《傳》曰：「郊，享道也，貴其時，大其禮。」自宮室以下，皆取古書成文，亦通於他祭。○薦其美，《藝文類聚》、《初學記》、《太平御覽》並

引作「薦其義」，王念孫曰：「作『美』則與『非享味』之意不合，當作『義』爲是。」文烝案：《祭統》言小物備，美物備，陰陽之物備。此美之說也。又言唯賢者能盡祭之義，盡其道，端其義。其志厚者其義章，其義章者其祭也敬。此義之說也。但義不可言薦，石經以下皆作「美」，未可以他書改本書也。美者，禮物之備，《傳》次時與敬言之，不得謂與享味爲一。《祭統》曰：「賢者之祭也，致其誠信，與其忠敬，奉之以物，道之以禮，安之以樂，參之以時，明薦之而已矣，不求其爲。」誠信、忠敬，皆敬也。物、禮，即美也。時，即《傳》之「時」也。明薦，即《傳》之「薦」也。

晉侯使荀營來乞師。將伐鄭。【補曰】此本杜

預。○【撰異曰】陸渚《纂例》曰：「營，《公羊》作『嬰」。案：今《公羊》不作「嬰」。

冬，公會單子、晉侯、宋公、衛侯、曹伯、齊人、邾人伐鄭。言公不背柯陵之盟也。

十有一月，公至自伐鄭。【補曰】何休曰：

「月者，方正下壬申，故月之。」

壬申，公孫嬰齊卒于貍蜃。貍蜃，魯地也。

【補曰】杜預注及《釋例》皆曰闕。又稱舊說魯地也。○【撰



異曰：「蜃，《左氏》作「脈」，《公羊》作「軫」。徐彥《公羊疏》曰：「正本作「狸辰」字。」十一月無壬申，壬申乃十月也。【補曰】下書丁巳朔，知壬申在十月。杜預《長曆》曰：「《公羊》、《穀梁》及諸儒皆以爲十月十五日。」致公而後錄，臣子之義也。嬰齊實以十月壬申日卒，而公以十一月還，先致公而後錄其卒，故壬申在十一月下也。嬰齊從公伐鄭，致公然後伐鄭之事畢，須公事畢然後書臣卒，先君後臣之義也。【補曰】言臣子者，連言子耳。注說固得之，亦以恤死恩禮宜自公出也。其地，未踰竟也。【補曰】在外未踰竟也。此與敖遂異，故發之。

十有二月丁巳朔，日有食之。

邾子貜且卒。

【補曰】邾定公也。范《答薄氏》謂

連上日食之日，定公正。當如范說。推此則瑣正籛條不正，日不日皆與大國同例。孔廣森曰：「同日二事，日食在上者，先天道，次人事。」

晉殺其大夫卻錡、卻犂、卻至。自禍於是起矣。厲公見殺之禍。【補曰】自禍，禍由自取也。

《國語》曰：「殺三卻而尸諸朝，納其室以分婦人，於是乎國

人不燭，遂弑諸翼也。」此《傳》與崔杼弑君《傳》文意略相似。此云「自禍於是起矣」，彼云「莊公失言，淫于崔氏」，蓋明二君之弑，君子所傷，要亦聖門相承說《經》語也。陸賈《新語》曰：「昔晉厲、齊莊、楚靈、宋襄秉大國之權，杖衆民之威，軍師橫出，陵轢諸侯，外驕敵國，內剋百姓。鄰國之讐結於外，臣下之怨積於內，而欲建金石之功，終傳不絕之世，豈不難哉？故宋襄死於泓水之戰，三君弑於臣子之手，皆輕用師而尚威力以至於斯，故《春秋》重而書之，嗟歎而傷之。是三君皆強其威而失國，急其刑而自賊，斯乃去事之戒，來事之師也。」董仲舒《繁露》曰：「《春秋》記天下之得失，而見所以然之故。甚幽而明，無傳而著，不可不察也。」又曰：「孔子曰：『吾因其行事而加乎王心焉。』以爲見之空言，不如載之行事之博深切明。故子貢、閔子、公肩子言其切而爲國家資也。其爲切而至於殺君亡國，奔走不得保社稷，其所以然，是皆不明於道，不覽於《春秋》也。故衛子夏言，有國家者不可不學《春秋》，不學《春秋》則無以見前後旁側之危，則不知國之大柄，君之重任也。故或脅窮失國，揜殺於位，一朝至爾。」陸生、董生所述論，其由來者舊矣，皆可與《傳》意相發，故備著之。

楚人滅舒庸。【補曰】亦群舒也。在時例。

### 十有八年春王正月，晉殺其大夫胥童。

【補曰】據《左傳》，樂書、荀偃殺之，非君殺也。《經》辭從同，不別月者，爲下弑日。《左傳》在上年閏月乙卯晦，蓋據他國史也，魯曆當爲正月乙卯朔。

### 庚申，晉弑其君州蒲。

【補曰】晉厲公也。何休以庚申爲二月日，非也。正月乙卯朔，庚申乃月六日也。

《左傳》是月甲申晦。○【撰異曰】州蒲當爲「州滿」字之誤也。孔穎達曰：「漢末有汝南，應劭作《舊君諱議》云：『昔者周穆王名滿，晉厲公名州滿，又有王孫滿，是同名不諱。』則此爲州滿，或爲州蒲，誤耳。今定本作「滿」。稱國以

弑其君，君惡甚矣。【補曰】疏曰：「於此發《傳》者，

以州蒲二年之間殺四大夫，故於此發，惡例也。」文烝案：

《傳》發例於此者，莒、吳、薛是夷狄小國，可以晉包之。又

晉禍起於殺大夫，則明是大夫弑之，而特不稱大夫，以見義。《經》既相承，《傳》亦承前《傳》也。《左傳》稱樂書、荀

偃既殺胥童，遂弑厲公。《春秋》稱國以弑，以爲厲公之自禍雖微，書偃亦將被弑，所謂國人不獨者也。《孟子》曰：

「無罪而殺士，則大夫可以去，無罪而戮民，則士可以徙。」厲

公一朝殺三卿，晉之諸臣可以盡去，苟不能去，必弑其君

矣。《孟子》又論貴戚之卿曰：「君有大過則諫，反覆之而

不聽則易位。」此所謂有伊尹之志則可者，晉無伊尹其人，

亦必弑其君矣。此其爲君之自禍，豈非惡之甚哉？張洽

述所聞於朱子，頗及大過易位之說，而不言書、偃，非其人，

則其義未密。又曰：「厲公昵用小人，殺戮無辜，舉朝諸

卿，不保首領。悼公遂不臣者七人，而不誅書、偃，非里克、

甯喜之比故也。」斯平情之論也。○《傳》及《左傳》皆有君

惡君無道之義，《傳》發稱國之例。而劉、賈、許、穎爲《左

氏》注，申成其意，并解稱人，最爲可據。文十八年已論之。

胡瑗之徒乃以《傳》及《左傳》之言爲害教，此未深思也。夫

既以弑君書，則臣之大惡已見，臣惡已見，則君惡亦安可不

論？杜預注謂「衆所共絕」，《釋例》謂「群下絕望」，是謂路

人。孔穎達謂「懲創將來之君」，兩見其義，非赦弑君之人

以爲無罪，其言皆甚明了。後世如宋昱、隋廣、梁溫、金亮

之惡，其臣民有不可一日堪者，豈可因其被弑而遂不論其

惡哉？且《春秋》書弑二十六，皆外之五等君耳。內君即

不言弑，若周爲天下共主，則既無弑事而亦無書理，故魯不

言弑，謂之王禮也。至若《孟子》言「聞誅一夫紂，未聞弑

君」，《荀子》亦言「桀、紂無天下而湯、武不弑君」，此本專爲

湯、武言之，然亦據《春秋》辯別君惡之義，推而究之，蓋所謂充類至義之盡。

### 齊殺其大夫國佐。

### 公如晉。

### 夏，楚子、鄭伯伐宋。

### 宋魚石復入于彭城。

彭城，宋邑。魚石十五年奔楚，《經》稱復入者，明前奔時入彭城以叛也。今楚取彭城以封魚石，故言復入。【補曰】注非也。復者，復中國也，復其位之辭也。入者，內弗受也，惡辭也。內弗受而言復者，案《左傳》楚、鄭同伐彭城，納魚石，以三百乘戍之，是所謂復者楚復其位也。范乃謂前奔時入彭城以叛，於《左傳》既無證驗，又違《傳》之明例矣。彭城不繫宋者，不須再出宋也，不如公孫寧、儀行父言納者，彼欲分別楚子善惡，故大夫亦得言納，此則自從平文，又彼納于陳，是抵國都，此未得人宋都也。若然，既無楚納文，宜言自楚復入，以彰楚之有奉。而不言者，蘇轍曰「言伐宋則自楚也」，王貫道曰「伐重於有奉也」，趙汭曰「言故則不言所自也」。文烝案：前既有奔楚文，此又承楚子伐宋，自楚明矣。故曰《春秋》貴於省文。又曰《春秋》謹嚴，又曰文簡而有法，唯《春

秋》可當也。不言以叛者，楚納之，非彼以之。趙汭、趙鵬飛說近是。

### 公至自晉。

晉侯使士匄來聘。○【撰異曰】匄，本又作

「丐」。案：「丐」者，俗字。

### 秋，杞伯來朝。

八月，邾子來朝。【補曰】月者，為下薨日。

### 築鹿囿。

築牆為鹿地之苑。【補曰】疏曰：「知非為鹿築囿。而以鹿為地名者，案郎囿既是地名，則此鹿亦當是地名。」疏是也。不言築囿于鹿，與築臺于郎異者，囿皆以地為名也。疏又曰：「何休、徐邈皆云天子囿方百里，公侯方十里，伯方七里，子男方五里。言魯先有囿，今復築之，故書以示譏，則郎及蛇淵亦是譏也。」案：《毛詩傳》云「囿者，天子百里，諸侯四十里」，與何、徐二說別者，《詩傳》蓋據《孟子》稱文王囿七十里，寡人四十里，故約之云然耳。未審何、徐據何為說。文烝案：魯有囿而又為，《公羊》義也。《毛詩傳》曰：「囿所以域養禽獸也。」《說文》曰：「苑有垣也。」《字林》以為有垣曰苑，無垣曰囿，與《說文》異。築

不志，此其志何也？【補曰】築或爲虞之，或非虞

之，非虞之則不志，如築館之屬，常例皆不志也。不志者，

《經》例因史例也。山林藪澤之利所以與民共

也，虞之，非正也。【補曰】疏曰：「築微已發例，復發

之者，彼築邑置官司以虞之，此直築囿以虞之，囿邑既殊，

俱是虞之，非正，故再起《傳》例。」

己丑，公薨于路寢。路寢，正也。男子

不絕婦人之手，以齊終也。【補曰】復發之者，說見

宣十八年。

冬，楚人、鄭人侵宋。

晉侯使士魴來乞師。【補曰】杜預曰：「將救

宋。」疏曰：「范別例云乞師不釋者三，從例可知也。乞例

有六，乞師五，乞盟一。」○【撰異曰】魴，《公羊》作「彭」。

後同。

十有二月，仲孫蔑會晉侯、宋公、衛侯、

邾子、齊崔杼同盟于虛朶。虛朶，某地。○【補曰】

當云地闕。何休曰：「不日者，或喪盟略。」文烝案：先君未

葬，嗣君又未即位，《左傳》謂「孟獻子請於諸侯，先歸會

葬」，言略是也。

丁未，葬我君成公。

# 春秋襄公經傳第八補注第十九 襄公，成公

子，《史記》名午。母定姒。以簡王十四年即位，時年四歲。

穀梁 范氏集解 鍾文烝詳補

元年春王正月，公即位。繼正即位，正

也。【補曰】疏曰：「襄是定姒之子，嫌非正，故重明之。」

案：此疏與閔元年疏異，此疏是。

仲孫蔑會晉欒黶、宋華元、衛甯殖、曹

人、莒人、邾人、滕人、薛人圍宋彭城。【補曰】

滕、薛微於莒、邾，又微者則杞、小邾也。自襄以後，諸侯之事，四國君臣鮮不從役，故夫子曰「孟公綽不可以爲滕薛大夫」，言國小而政煩也。繫彭城於宋者，不與魚石

正也。魚石得罪於宋，成十五年奔楚，十八年復入于彭

城。然則彭城已屬魚石，今猶繫宋者，崇君抑叛臣也。【補

曰】注言彭城屬魚石，其說未盡。《左傳》曰「非宋地」，《公

羊》曰「楚取彭城以封魚石」，又曰「楚已取之矣」。然則彭城地屬魚石即是屬楚，所以言非宋地也。《左傳》曰「追書」，明舊史本無「宋」字，與哀三年圍戚同例，君子一增之，一仍之也。李光地曰：「圍宋彭城者，主晉之辭也，善晉義也。圍戚者，主衛之辭也，誅衛志也。晉義善則宋華元無惡矣，衛志惡則齊國夏無善矣。」李氏說此二《經》皆非正義，但《經》意自足兼見耳。程公說曰：「宋，中國之望也，齊、晉之伯，可稱者三君，未嘗不加意於宋。桓之興，首會北杏，以平宋亂，會鄆以求其服，急於得宋如此。既得則爲之伐附庸之邾，鄰怨之鄭，求以懷宋。諸侯之望既歸而始霸之烈以定，桓沒，宋襄欲踵霸，諸侯從之，而圖霸失其道。晉文之興亦急於恤宋，悼之興亦急於救宋，出穀戍，釋宋圍，執曹伯，畀宋人，於是成一戰之霸；師台谷，退楚兵，討魚石，從宋人，於是成三駕之功；足驗當時大勢矣。」

夏，晉韓厥帥師伐鄭。○【撰異曰】厥，《公羊》

作「屈」。徐彥曰：「《左傳》、《穀梁》「屈」作「厥」字也。」

仲孫蔑會齊崔杼、曹人、邾人、杞人次于

鄆。鄆，鄭地。「鄆」或爲「合」。【補曰】《左傳》曰：「東諸

侯之師次于鄆，以待晉師。」○【撰異曰】鄆，《公羊》作「合」，

與《穀梁》或本同。徐彥曰：「《左氏》『合』作『鄩』字也。」段玉裁曰：「此鄩非姒姓國，故《穀梁》此『鄩』不作系旁『繒』字，蓋其字本作『會』，會、合音義皆通，一寫作『鄩』，再寫譌『鄩』耳。」杜注：「鄩，鄭地，在陳留襄邑縣東南。」可知「鄩」乃「鄩」之誤。古者鄭國處於留，鄭伯寄孥與賄於號，鄩以取其國，而遷鄭焉而野留。孟康曰：「留，鄭邑也，後爲陳所并，故曰陳留。此所次蓋鄭東鄙錯於宋竟者，古爲鄩地，故名之鄩。」《左氏音義》：「僖十四年鄩始見，音似陵反，以後不爲音，唯此鄩音才陵反，恐本是古外反，淺人改之也。」文烝案：《說文》：「恰，古文會。」《一切經音義》：「會，古文恰。」同。疑《穀梁》或本及《公羊》皆是「恰」字。

秋，楚公子壬夫帥師侵宋。

九月辛酉，天王崩。【補曰】《史記》名夷，定

王子。

邾子來朝。

冬，衛侯使公孫剽來聘。

晉侯使荀罃來聘。冬者，十月初也。王崩，赴

未至，皆未聞喪，故各得行朝聘之禮。【補曰】此本杜預。

杜以辛酉爲九月十五日，《左傳》謂此朝聘爲禮，故杜解之

如此。若依孫復、胡安國不臣之說，以左、杜爲不然，於《經》義亦自無礙。桓十五年，邾人、牟人、葛人已見夷狄之文，其餘皆從平文可矣。疏及孔穎達並引《曾子問》曰：「諸侯相見，揖讓入門，不得終禮，廢者幾。孔子曰：『六，天子崩，大廟火，日食，后夫人之喪，雨霑服失容則廢。』」○【撰異曰】罃，唐石經作「嬰」，後二年、三年同。嚴可均曰：「嬰，當作『罃』。」張參、顏傳經《五經文字》云：「『罃』與『罃』同，見《春秋傳》。《說文》有『罃』字，隸變爲『罃』，明此當爲『罃』也。」

二年春王正月，葬簡王。

鄭師伐宋。

夏五月庚寅，夫人姜氏薨。【補曰】成公夫

人也。《公羊》不辯宣、成二夫人，何休遂亂其姑婦。

六月庚辰，鄭伯論卒。【補曰】鄭成公也。不

葬者，蓋魯不會。○【撰異曰】辰，各本誤作「寅」，今依唐石

經、十行本改正。《音義》：「論，古困反。」《漢書·古今人

表》作「綸」，師古曰：「綸，音工頑反。」

晉師、宋師、衛甯殖侵鄭。其曰衛甯殖，

如是而稱于前事也。初衛侯速卒，鄭人侵之，故舉甯殖之報，以明稱其前事。不書晉、宋之將，以慢其伐人之喪。【補曰】《爾雅》曰：「稱，好也。」《漢書》注曰：「稱，宜也。」好亦宜也。《國語》注曰：「稱，副也。」疏曰：「稱師者罪重，稱名者罪輕。」文烝案：《傳》言此者，明衛從舊史紀實文，晉、宋皆變文，改舊史也。晉、宋在衛上，則無嫌為將卑師衆之常辭，晉主兵而宋、衛皆非君將，晉雖卑者，將亦宜序上，宋則不得以卑者先衛大夫。觀後十六年伐許書衛甯殖，宋人，知當時自有一定之次，史從而書之也。

秋七月，仲孫蔑會晉荀罃、宋華元、衛孫林父、曹人、邾人于戚。【補曰】月者，為下葬日。

己丑，葬我小君齊姜。齊，謚。

叔孫豹如宋。【補曰】豹亦得臣子，僑如弟穆叔也，亦稱叔孫穆子。

冬，仲孫蔑會晉荀罃、齊崔杼、宋華元、衛孫林父、曹人、邾人、滕人、薛人、小邾人于戚，遂城虎牢。【補曰】內外皆大夫言遂，與季孫宿人邾自是不同。會本為城出，又霸國之事，與內異例。若

言中國焉，內鄭也。虎牢，鄭邑。鄭服罪內之，故為之城。不繫虎牢於鄭者，如中國之邑也。僖二年城楚丘，《傳》曰：「楚丘者何？衛之邑。國曰城，此邑也。其曰城何？封衛也。」然則非魯邑皆不言城。中國，猶國中也。【補曰】外城邑志者，以其為國都，皆不繫國。虎牢非鄭都，亦從其例，故曰「若言中國焉」。注以內鄭為諸侯內之，非也。內，謂《春秋》之文，若言國中之邑，是內之。所以內之者，據《左傳》諸侯城虎牢以偪鄭，鄭人乃成，於是盟雞澤，聘魯，會戚，救陳，如鄆之會，侵蔡，會刑丘，於是楚伐鄭，歷書之，以皆是鄭服之事，故此特為內鄭文也。注言鄭服罪，故為之城，是謂鄭服在城前，非事實也。《公羊》曰：「虎牢者何？鄭之邑也。其言城之何？取之也。」杜預說《左傳》曰：「虎牢，舊鄭邑，今屬晉。」其義皆得通於此。

楚殺其大夫公子申。

三年春，楚公子嬰齊帥師伐吳。

公如晉。【補曰】母喪十月左右而朝亦非禮。高閔曰：「禮：童子侯不朝王，不可以成人之禮接也，其可以朝伯國乎？」

夏四月壬戌，公及晉侯盟于長檮。晉侯出其國都，與公盟於外地。【補曰】此本杜預也。孔穎達曰：「蓋近城之地，盟訖還入晉。」

公至自晉。【補曰】不以長檮致者，何休曰：「上盟不于都，嫌如晉不得入。」杜預曰：「本非會。」呂本中曰：「本謀如晉，以如爲重。」文彞案：此亦後事小則以先事致之例。

六月，公會單子、晉侯、宋公、衛侯、鄭伯、莒子、邾子、齊世子光。己未，同盟于雞澤。雞澤，地也。【補曰】當云晉地。《國語》作「雞丘」。此王喪二十二月而命會。同者，有同也，同外楚也。【補曰】疏曰：「復發《傳》者，楚人轉盛，中國外之彌甚，故更發之。後文戲及京城北、重丘之等亦其義也。」

陳侯使袁僑如會。如會，外乎會也，外乎會者，明本非會內也，諸侯已會乃至耳。於會受命也。

【補曰】疏曰：「單伯會伐宋，《傳》云『會事之成也』；踐土之盟，陳侯如會，《傳》云『外乎會也，於會受命也』。是二文互以相通。踐土亦是事成乃至，伐宋亦外乎會也。三處發

《傳》者，單伯內大夫，陳侯諸侯，袁僑爲君所使，嫌有異，故重發之。」

戊寅，叔孫豹及諸侯之大夫及陳袁僑盟。及以及，與之也。諸侯在會而大夫又盟，是大

夫執國之權，亢君之禮。陳君不會，袁僑受使來盟，袁僑之盟，得其義也。通言叔孫豹及諸侯之大夫則無以表袁僑之得禮，故再言及，明獨與袁僑，不與諸侯之大夫。【補曰】凡盟言及者，內爲志之文。今上言公會，足見外爲主，故於叔孫豹還從以內及外之例，無所嫌也。王世子則及以會，吳則會又會，陳袁僑則及以及，吳子則會以及，殊文相似，殊義不同。諸侯以爲可與則與之，【補曰】諸侯當親與盟。不可與則釋之。【補曰】不與盟可矣，亦不當使大夫。諸侯盟，又大夫相與私盟，【補曰】疏曰：「此亦應受君命，而謂之私者，對君盟，非臣事，故謂之私。」是大夫張也。【補曰】王引之曰：「『張』當爲『彊』，楊疏『彊』字凡三見，則疏所據本作『彊』。《音義》於定六年《傳》始爲『張』字作音，則此亦不作『張』。」文彞案：孫復《尊王發微》曰：「大夫彊，諸侯始失政。用此《傳》文也。」



呂本中、張洽、家鉉翁、俞皋所見已作「張」。故雞澤之

會，諸侯始失正矣，大夫執國權。【補曰】正，亦

「政」字也。大夫執國權者，《論語》所謂「禮樂征伐自大夫出也」。大夫之專禮樂征伐萌於晉文、襄，而成於晉悼。李

廉以爲陳侯如會不再盟，今再盟袁僑，亦悼公所以不及文公。曰袁僑，異之也。釋不但總言及諸侯之大夫，而

復別言袁僑者，是異袁僑之得禮。【補曰】異，即《公羊》之

「殊」也。疏曰：「陳侯不在，故與袁僑得盟諸侯。大夫君在私盟，故謂之彊。」文烝案：此又申再言「及」爲「與之」之意。復出陳者，屬文之宜。何休以爲「喜得陳國」，似非也。

秋，公至自會。○【撰異曰】會，各本誤作「晉」，

今依唐石經改正。

冬，晉荀罃帥師伐許。

四年春王三月己酉，陳侯午卒。【補曰】午

與襄公名同，不諱。胡安國以爲猶莊篇書同盟、僖篇書戊申、定篇書宋仲幾，從其質也。

夏，叔孫豹如晉。

秋七月戊子，夫人嬀氏薨。成公夫人，襄公

母也。嬀，杞姓。【補曰】當云襄公妾母。何休以弋爲莒

姓，本《公羊》下年《傳》「舅出」之說。莒，己姓，非弋也。

杞、繒皆嬀姓，此嬀氏或繒女歟？孔廣森說《公羊》謂弋即

是嬀，當爲鄆女。○【撰異曰】嬀，《公羊》作「弋」，下同。徐

彥曰：《左氏》經作「嬀氏」字，聲勢。與此同。

葬陳成公。

八月辛亥，葬我小君定嬀。定，謚。【補曰】

許翰曰：《左傳》季文子本不欲以夫人禮葬，此葬速，蓋禮略也。高閔曰：「距薨纔二十三日。」

冬，公如晉。【補曰】非禮。與宣同。

陳人圍頓。

五年春，公至自晉。

夏，鄭伯使公子發來聘。

叔孫豹、繒世子巫如晉。外不言如，而言如，【補曰】重起例者，此與內俱往也。爲我事往也。外相如不書，爲魯事往，故同於內。【補曰】疏曰：

「徐邈取《左氏》爲說，云爲我事往者，謂請繒於晉，以助己出賦也。」文系案：徐說得《傳》意。《傳》言繒世子爲魯將屬其國，與魯大夫並往晉，故同諸內而言如也。《左傳》上四年冬，公如晉，請屬鄆，晉侯許之。至此穆叔覲鄆大夫于晉，以成屬鄆，皆確然可據。惟下年莒人滅繒則與魯屬繒事無涉，乃《左氏》之誤耳。《左氏》知屬繒事，不知滅繒，《公羊》知滅繒事，不知屬繒，皆以如晉及莒滅二文牽連爲一，皆誤也。《左氏》解此云「言比諸魯大夫也」，比諸魯大夫，其意有二，不言及是比，言如亦是比，惟可不言及，故可言如，是其意實一也。杜預《經》下注云：「比魯大夫，故書巫如晉。」《傳》下注云：「豹與巫俱受命於魯，故《經》不書及，比之魯大夫。」○繒自有世子，不宜立異姓爲後，此又文外之意。

### 仲孫蔑、衛孫林父會吳于善稻。善稻，吳

地。【補曰】依杜當云地闕。不言會衛孫林父者，會者外爲主之文，《左傳》稱「晉將爲吳合諸侯，使魯、衛先會吳，且告會期」，則是魯、衛並受晉命，衛非爲主者，故不得言會衛也。又晉之諸會，魯班當在宋下衛上，此亦晉事，即亦不得言會衛也。前後諸文殊會吳者，上皆有會晉文，晉爲主而殊吳也。此但言會吳，吳爲主也。不言及衛孫林父者，吳

或會以及矣。未聞及以會，及以會乃特尊王世子之文，非可施於吳也。杜預曰：「魯、衛俱受命於晉，故不言及。」此未盡其義也。○【撰異曰】稻，《左氏》作「道」。吳謂善

伊謂稻緩，【補曰】段玉裁曰：「謂善爲伊者，古合韻也。

《說文》沛國謂稻曰梗，从禾夷聲。謂稻爲緩，即其理也。

緩，古亦讀如暖。」號從中國，名從主人。夷狄所號

地形及物類當從中國言之，以教殊俗，故不言伊緩，而言善

稻。人名當從其本俗言。【補曰】此發《經》辭之例，以明伊

緩稱善稻之意也。號，謂地號，物號，《公羊》所謂地物從中

國也。名，謂國名，人名，《公羊》所謂邑人名從主人也。中

國謂魯主人者，對魯言之，不專指夷狄。桓二年《傳》言「物

從中國」，此言號者，彼釋大鼎義，專是物號，此則兼包地物

之號也。此專是地號而不言地從中國，明包地物言之也。

桓二年《傳》言「名從主人」，乃釋大鼎稱部之義。名者國

名，此《經》無從主人之文亦并言之者，明欲發明全例，兼國

名、人名爲說也。前釋國名、物號之文，此通舉地號、物號、

國名、人名之例，意指各異，故兩處發《傳》也。《公羊》文在

昭元年，其言「邑人名」，邑即國也，范此注大略本何休，然

以主人專屬夷狄，不以中國爲魯，又不言國名，則皆誤也。

楊疏以越稱於越解名從主人，可補注闕。但專謂於越之名是從主人而不知越名亦從主人，亦終未得《傳》旨也。荀子作《正名》之篇曰：「散名之加於萬物者則從諸夏之成俗曲期，遠方異俗之鄉則因之而為通。」義與此相近。

## 秋，大雩。

楚殺其大夫公子壬夫。○【撰異曰】顏師古

《匡謬正俗》以為「壬」本是「王」字。非也。

公會晉侯、宋公、陳侯、衛侯、鄭伯、曹伯、莒子、邾子、滕子、薛伯、齊世子光、吳人、繒人于戚。繒以外甥為子，曾夷狄之不若，故序吳下。所以不復殊外吳者，以其數會中國故。【補曰】《公羊》曰：

「吳何以稱人？吳、鄫人云則不辭。」何休曰：「方以吳抑鄫，國在人上，不以順辭，故進吳稱人。所以抑鄫者，夷狄尚知父死子繼，故以甚鄫。不使鄫稱國者，鄫不如夷狄，故不得與夷狄同文。」文烝案：不辭者，不成文也。何注為范說所本，而不如何之明暢。其謂吳數會中國，故不殊外，實為大謬。前後諸外吳文皆為不欲稱吳人，故會而又會，吳既稱人，何外之有？何氏以吳抑鄫之說，雖於《公羊》無所見，必是《公羊》家舊義。此《傳》於下年滅繒，有別之而不

別之言，明《經》文實有豫抑之義，何說可依用也。但此文亦本魯史之舊，非夫子特易吳、繒之班。《左傳》曰：「穆叔以屬鄫為不利，使鄫大夫聽命於會。」杜預曰：「《傳》言鄫人，所以見於戚會。」左、杜之言，深得其實。繒於諸晉會皆不與，此時新為魯屬，其大夫轉得列會，明晉許魯還繒，使附會末，而班諸吳下也。史紀其實而《經》取其義，此《春秋》述作之大常，非必有所改易，然後可以見義也。前此齊之盟，有楚人、鄭人，楚無以國舉者，故稱人序上，無他義，吳則前後諸會皆為外文，故此文自足顯抑繒之義，若無前後諸文則不得也。魯之屬繒，是夏始成，至秋即以為不利，當時事情未可知，或叔孫聞繒將立異姓為後，慮其內亂歟？范注言外甥，外甥即外孫，說見下年。《左傳》曰：「九月丙午，盟于戚。」陳傅良曰：「吳初與諸侯盟不書盟，為晉諱也。」吳、晉之盟，《春秋》終諱之。

公至自會。【補曰】會夷狄而致者，上文吳稱人，故致也。楚稱人不致者，楚之稱人，自其常文，又主會，異於吳。

冬，戍陳。【補曰】杜預曰：「備楚。」何休曰：「戍例時。」內辭也。不言諸侯，是魯戍之。【補曰】內辭猶專

辭，謂諸侯共以師戍之，而《經》以魯獨往戍，辭書也。所以爲內辭者，侯伯救患，備豫不虞，得禮之正，合義之公，《春秋》與城楚丘、歸粟等皆同之於內事，無須列序諸侯。定五年《傳》所云「義邇也」，疏亦引彼《傳》以難注，范誤甚矣。

### 楚公子貞帥師伐陳。

公會晉侯、宋公、衛侯、鄭伯、曹伯、莒子、邾子、滕子、薛伯、齊世子光救陳。○【撰異

曰】《左氏》無莒子、邾子、滕子、薛伯。段玉裁曰：「《公》、《穀》皆有此四國，不容徐彥、陸德明不記其異同，疑唐石經脫文貽誤也。」案：陸澹《纂例》明云《左氏》無莒、邾、滕、薛四國，段所未見。

### 十有二月，公至自救陳。【補曰】月者，爲下

卒日。善救陳也。楚人伐陳，公能救中國而攘夷狄，故善之。善之謂以救陳致。【補曰】疏曰：「善文於『公至』下言之者，《春秋》主善以內，故於書『公至』下重發。」文烝案：注謂以救陳致是善，則與凡救言善不同，疏又曲爲之說。夫《傳》始本與《經》別行，後來以《傳》合《經》者乃以此句附「公至」下，實非《傳》意。此與諸言善者同義，當在諸侯救陳下也。重發《傳》者，戍而被伐，嫌救非善，故重明

之。「公至」是常文，不須釋。

### 辛未，季孫行父卒。

### 六年春王三月壬午，杞伯姑容卒。【補

曰】僖二十三年書杞子卒。案：《左傳》繼成公即位者即姑容也，自此終於《春秋》皆名。或日或不日，皆書葬，或時或月，悉與大國同例，蓋襄、昭以下，時事之不同於前，即諸小國可見也。

### 夏，宋華弱來奔。○【撰異曰】陸澹《纂例》曰：

「弱，《公羊》作『溺』。」案：今《公羊》不作「溺」。

### 秋，葬杞桓公。

### 滕子來朝。

莒人滅繒。非滅也。非以兵滅。中國日，

卑國月，夷狄時。【補曰】疏曰：「重發《傳》者，非兵

滅，故重明之。」繒，中國也，而時，【補曰】此亦大概言

之耳，若細別言之，當是卑國在月例。非滅也。【補曰】

言以其如上所云，故足明非滅。家有既亡，國有既

滅，滅，猶亡。亡，猶滅。家立異姓爲後則亡，國立異姓爲

嗣則滅。既，盡也。【補曰】此言有非滅而得言滅者也。俞樾曰：「此「既」字不當訓「盡」。家立異姓，其家未亡而實已亡；國立異姓，其國未滅而實已滅。昭四年，魯取繒，自此至昭四年之繒乃已滅之繒也。」文烝案：家言亡、國言滅者，對文析言之，渾言則同，梁亡是也。滅而不自知，由別之而不別也。繒不達滅亡之義，故國滅而不知。

【補曰】疏曰：「言繒所以滅者，立嗣須分別同異姓，而繒不別也。舊解云「別」猶「識」也，言繒君唯識知國須立後，不能識知異姓之不得立。」文烝案：疏載舊解與注意合。別之而不別，猶易文言《傳》云辯之不早辯。彼言被弑而不自知者所由，此言見滅而不自知者所由，其事相類，其情亦同。隱四年於翬豫貶之文，言《傳》之義也。上年於繒豫抑之，此《傳》之義也。觀此《傳》，則上《經》之爲抑繒亦明矣。莒人滅繒，非滅也。【補曰】又覆說，以起下文。非

立異姓以莅祭祀，滅亡之道也。莒是繒甥，立以爲後，非其族類，神不歆其祀，故言滅。【補曰】非者，責也，如「非稅畝之災」之「非」字。所以非滅而言滅者，責其立異姓以奉宗廟，乃滅亡之道，故言滅也。繒，姒姓；莒，己姓。《管子》曰「有者異姓，滅也」，蓋古昔遺言矣。《傳》說滅并

說亡者，承上家、國之文，連言之也。董仲舒曰：「諸侯父子兄弟不宜立而立者，《春秋》視其國與宜立之君無以異也，此皆在可以然之域也。至於繒取後乎莒，以之爲同居，目曰莒人滅鄆，此不在可以然之域也。」案：《公羊》上年《傳》曰：「其取後乎莒柰何？莒女有爲鄆夫人者，蓋欲立其出也。」何休曰：「時莒女嫁爲鄆後夫人，夫人無男有女，還嫁之於莒，有外孫，鄆子愛後夫人，而無子，欲立其外孫，又以巫爲鄆前夫人襄公母姊妹之子，俱莒外孫，故《傳》謂之舅出。」依何說，頗爲迂曲。王引之謂：「《傳》文本是鄆女有爲莒夫人者，轉寫互誤也。」若然，繒女之子於繒子爲外孫，於巫爲出，魯定姒亦繒女，故襄公於巫亦爲出，巫於襄則爲舅，事情既合，而於《公羊》本文亦明白通貫矣。范以外孫爲甥者，《毛詩傳》云「外孫曰甥」，謂父之外孫爲吾甥，又吾之外孫爲子之甥，以上見下而爲稱，故《左傳》外孫之子爲彌甥，姊妹之孫爲從孫甥，皆有甥稱也。莒爲繒甥，蓋《穀梁》家舊說，而范因之也。甥之稱又有以下見上者，《爾雅》「姑之子爲甥」，謂子之姑之子爲吾甥，又吾之姑之子爲吾父之甥也，舅之子、妻之舅弟、姊妹之夫亦皆爲甥，說亦同也。《經》書滅者，謂繒至此廢巫立外孫。不言繒亡與梁亡同文者，孔廣森據《公羊》上年《傳》云：「莒將滅之，

以爲立外孫者，實莒鄆人使然，故《春秋》歸惡莒人也。左氏於此不言立異姓爲後，其《傳》曰「莒人滅鄆，鄆恃賂也」，杜預以爲「鄆有貢賦之賂在魯，恃之而慢莒，故滅之」。蓋繒、莒皆無史書，左氏不得其事，因見簡牘所載上四年冬有邾人、莒人伐鄆，臧紇救鄆，侵邾，敗於狐駘之事，五年有屬鄆、還鄆之事，其事又書於《經》，故於滅鄆一《經》但據上事推測，意其爲恃賂耳。由其不受《經》於聖門，故有此失，不如穀梁、公羊。」家鉉翁以爲大條貫數十，皆由洙泗高弟親聞之聖人矣。「非」字各本脫，今依唐石經、陸淳《集傳辨疑》、余本、俞皋《集傳釋義》本補正。十行本空一字。

### 冬，叔孫豹如邾。

季孫宿如晉。宿，行父子。【補曰】季武子也。

許翰曰：「魯既世卿，而大夫無復三年喪，哀典廢於下矣。」張大亨曰：「季孫宿、仲孫速、仲孫羯，皆所謂以喪從利者。」

### 十有二月，齊侯滅萊。

【補曰】《左傳》稱萊爲

裔夷，其地即《禹貢》青州之萊夷也。滅在時例，月者，蓋以萊爲齊之同姓，故謹其文，與楚人滅夔相對爲詳略也。楚之誘蔡誘戎則文異，齊之滅萊、楚之滅夔則文異，夷夏之

辭，必不相假。

### 七年春，邾子來朝。

夏四月，三卜郊不從，乃免牲。夏四月，

不時也。三卜，禮也。【補曰】疏曰：「三卜是禮，而

書者，爲不從及不時故也。」文彙案：四月必不止三卜，三卜者當是正月下辛，前有牲變，已改卜牛，以正月下辛爲初卜，故言三卜也。若使卜從而郊，則當先書正月牲變，次書四月某日郊，與哀元年同文。今既不郊，則牲變可略，以卜不從爲重，非如再有牲變者須備言也，言四月、言三卜則牲變亦足見矣。或謂僖三十一年書「四月免牲」、成十年及下十一年書「四月不郊」，何以此獨爲牲變？曰非牲變則必非三卜，魯無十二月下辛不卜之理也。乃者，亡乎人之辭也。【補曰】不時亡乎人。復發《傳》者，三卜是禮，嫌有異也。

### 小邾子來朝。

城費。【補曰】費，季氏邑。

秋，季孫宿如衛。

八月，螽。

冬十月，衛侯使孫林父來聘。

壬戌，及孫林父盟。

楚公子貞帥師圍陳。

十有二月，公會晉侯、宋公、陳侯、衛侯、

曹伯、莒子、邾子于鄆。

鄆，鄭地。

【補曰】孔穎達

曰：「楚既圍陳，而陳侯亦列於會者，當是圍之不密，故得出會求救也。」文烝案：五年救陳，《左傳》曰「會于城棣以救之」，此年《傳》曰「會于鄆以救之」，二地皆鄭地，二事亦不異也。會城棣無陳侯，故書救陳。不於救陳上錄地者，善之，不得從疑辭例也。會鄆有陳侯，文承「圍」下，其為救陳可知，故不須言救。既不言救，自當錄地，其實亦善之也。杜預曰：「陳侯逃歸，不成救，故不書救。」非也。此救無功，自於下文鄭弑陳逃及不書公至見之，此時無所譏也。月者，為下卒日。○【撰異曰】鄆，本又作「隔」。

鄭伯髡原如會，

○【撰異曰】髡，本又作「郡」，或

作「頽」。原，《左氏》作「頑」。徐彥《公羊疏》曰：「正本作「頑」字，亦有一本作「原」字，非也。」未見諸侯。丙

戌，卒于操。操，鄭地。【補曰】《公羊》曰：「操者何？

鄭之邑也。」○【撰異曰】操，《左氏》作「鄆」。趙坦曰：「《說

文》無「鄆」字。」未見諸侯，其曰如會何也？【補

曰】據未至會。致其志也。【補曰】此亦所謂《春秋》成

人之美也。何休曰：「鄭伯欲與中國，意未達而見弑，故養

遂而致之，所以達賢者之心。」禮：諸侯不生名，此

其生名何也？【補曰】不生名者，《經》例因史例也。

卒之名也。卒之名則何為加之如會之上？

見以如會卒也。【補曰】明由如會至死。若卒不以如

會，當名之於卒，如曹伯終生不蒙使文。其見以如會

卒何也？【補曰】疑如會，何至死？鄭伯將會中

國，其臣欲從楚，不勝其臣，弑而死。【補曰】是

所謂以如會卒，其事與《公羊》同，與《左傳》異。弑則《左

氏》、《公羊》皆云爾，而《傳》意以卒名加上，便可見弑，發義

尤精。大氏《春秋》意嚴辭深，其微其約，固有如此者。然

則何以不改卒為弑也？曰此當時承赴之文，即是當時事

實，《公羊》所謂信史不革者也。文既不革，斯義有所取，如

下《傳》云云矣。其不言弑何也？不使夷狄之

民加乎中國之君也。邵曰：「以其臣欲從楚，故謂夷

狄之民，不欲使夷狄之臣得弑中國之君，故去弑而言卒，使若正卒然。」【補曰】此猶莊四年不使小人加乎君子，宣十一年不使夷狄爲中國。胡安國以爲聖人存天理，抑人欲之意。家鉉翁曰：「中國之大夫而目之爲夷狄之民，其誅斥之典斷自洙泗，穀梁子必有所受。」其地，於外也。其日，未踰竟也。【補曰】重發《傳》者，此被弑，嫌異故也。日卒，時葬，正也。【補曰】疏曰：「葬在八年，此處發之者，以鄭伯被弑而同正卒，既同正卒宜同正葬，故連言也。重發正卒《傳》者，今被弑而同正卒，嫌與他例異，故明之。」

陳侯逃歸。以其去諸侯，故逃之也。鄭

伯欲從中國而罹其凶禍，諸侯莫有討心，於是懼而去之，背華即夷，故書逃以抑之。【補曰】此《傳》與鄭伯逃歸不盟《傳》同。注解「去諸侯」爲背華即夷，與彼注所謂專已背衆亦同。但此則指實言之也。注首「鄭伯」以下四句用何休義。陳之逃不必因鄭之弑，似宜刪去。《傳》重發之者，鄭與諸侯行會禮而去，會而不盟，陳亦與諸侯行會禮而去，而此會直會而已，嫌有異，故發以同之。不致者，鄭伯見弑，

陳侯又去，此會不足善，故不致。

八年春王正月，公如晉。【補曰】汪克寬曰：

「襄嗣位甫八年，三朝於晉，自宣公媚齊之外，《春秋》事霸之禮未有若是其勤也。」孔廣森曰：「月者，正月也。」案：疏曰：「鄭伯歸晉受禍，陳侯畏楚逃歸，明晉不足恃，而公往朝，危之道也，故書月。」疏說亦可通也。孫復、胡銓以爲鄆之會不致，自會如晉。

夏，葬鄭僖公。

鄭人侵蔡，獲蔡公子濕。獲者，不與之辭。

侵者，所以服不義，無相獲之道。○【撰異曰】濕，本又作「濕」，《左氏》、《公羊》作「變」。徐彥曰：「《穀梁》作「公子濕」。案：《說文》：「變，讀若溼。」人，微者也，侵，淺事也。【補曰】重發《傳》者，彼爲追發，此爲獲發也。而獲公子，公子病矣。【補曰】以公子之貴，因淺事而爲微者所獲。《經》以爲病，與華元不病文相顧。疏引徐邈云：「公子病，不任爲將帥，故獲之。」大誤。

季孫宿會晉侯、鄭伯、齊人、宋人、衛人、



邾人于邢丘。邢丘，地。【補曰】當云晉地，見《左氏》

宣六年《傳》。故此處杜無注，甚矣范之疏也。見魯之

失正也。【補曰】「正」亦「政」字，謂魯君。公在而大

夫會也。【補曰】疏曰：「公在晉，未及告公，而大夫為

會，是失政。」文烝案：疏非也。會亦是公命。言公在而大

夫會者，猶雞澤言諸侯盟，又大夫相與私盟，渙梁言諸侯

會，而曰大夫盟，諸侯在而不曰諸侯之大夫，皆同意也。如

是即為失政，非必無君命。○《左傳》曰：「五月甲辰，會于

邢丘，以命朝聘之數，使諸侯之大夫聽命。季孫宿、齊高

厚、宋向戌、衛甯殖、邾大夫會之。鄭伯獻捷于會，故親聽

命。大夫不書，尊晉侯也。」杜預以為晉悼難勞諸侯，故使

大夫聽命。胡安國據《穀梁》義以為朝聘事之大者，重煩諸

侯，而使大夫聽命，無乃以姑息愛人，而不由德。李廉曰：

「此條左氏得其事，胡氏得其義。論其事，則不欲煩諸侯

者，晉侯之美意也；論其義，則不可委大夫者，《春秋》之深

意也。」李說是也。高厚、向戌、甯殖稱人，胡氏以為謹其

始，故貶之。

### 公至自晉。

莒人伐我東鄙。【補曰】《左傳》曰：「以疆鄙

田。」蓋以滅繒為真滅而誤。

秋九月，大雩。

冬，楚公子貞帥師伐鄭。

晉侯使士匄來聘。

九年春，宋災。○【撰異曰】災，《公羊》作「火」。

徐彥曰：「《左傳》、《穀梁》作「宋災」。」外災不志，此其

志何也？故宋也。故，猶先也，孔子之先宋人。【補

曰】疏曰：「徐邈云，《春秋》王魯，以周為王後，以宋為故

也。此《公羊》黜周王魯之說，故范不從之。」文烝案：此即

桓二年《傳》所云「孔子故宋」，言以故國視宋也。莊十一年

《傳》及此《傳》皆以外災不志發義，而彼言王者之後，此言

故宋者，兩《傳》之意互相備也。魯史本以宋為王者後，特

志災異，君子存而不削，又因以著故宋之義，明《經》中包此

二旨，故與彼《傳》各見之也。《春秋》之義，尊周親魯而故

宋，夫子以為魯事既婉為諱矣，則於宋諱祖之遇難可也，孔

父不稱名，而其後四殺大夫，因皆沒其名姓是也。魯事既

詳為錄矣，則於宋詳災異之變宜也，志大水，志石鵠，志雨

蚤，志災是也。此實君子不忘故國之意，所以桓二年及此年兩處發《傳》也。後人疑《春秋》非孔氏一家之書，趙鵬飛已辯之，而徐仙民輒引何休新周故宋王魯之說以解此之故宋，其亦怪矣。○案：故宋之說，聖門所傳，而《公羊》家及諸識緯誤以爲新周故宋而黜杞，又增造其義，以爲《春秋》承周文而反之質。自《淮南子》已云殷變夏，周變殷，春秋變周，後人沿用附益之，與《論語》、《禮運》、《中庸》杞、宋不足徵之言，從周之言，子貢答公孫朝文武之道無所不學之言，皆相背戾。漢孝、成時，梅福上言宜封孔子世以爲殷後，援《穀梁》在祖位之文，證孔子故殷後不直引故宋爲證，或當時《穀梁》家說故宋之義已爲《公羊》之學所亂歟？然猶有「爲祖諱」一語，亦不取證，蓋梅子真隨意指稱也。

### 夏，季孫宿如晉。

五月辛酉，夫人姜氏薨。成公母。【補曰】宣公夫人。

### 秋八月癸未，葬我小君穆姜。【補曰】劉向

《列女傳》「繆姜」字同。《公羊》云：「聰惠而行亂，故謚曰繆。」案：繆、繆通用，如劉說則義異也。古書多以秦繆公謚爲惡謚，而秦《詛楚文》曰「昔我先君豳公」，其字从豳

从禾。

冬，公會晉侯、宋公、衛侯、曹伯、莒子、

邾子、滕子、薛伯、杞伯、小邾子、齊世子光伐

鄭。【補曰】汪克寬曰：「齊桓之時在於服楚，晉文之時在

於勝楚，晉悼之時在於敝楚，故數伐鄭而不與楚戰，使楚疲於奔命而莫能爭也。」汪申胡安國說。○【撰異曰】杞伯，各

本脫，今依唐石經補正。

十有二月己亥，同盟于戲。戲，鄭地。不

異言鄭，善得鄭也。【補曰】疏曰：「舊解以伐鄭之文

在上，即同盟于戲，明鄭在可知，故不異言也。鄭心服同盟，故以爲善。又一解謂會伐無鄭伯之文，今不序，是不異

言也。所以不異言者，善得鄭也，心服受盟，比之舊同好然。」文烝案：柯陵、京城北，與此文同事異，故此《傳》特明

之。彼兩處鄭亦受盟，未能得鄭，故其盟爲謀復伐鄭，文雖與此同，而其下文皆復書伐鄭，亦足明之矣。此則下書楚

伐，見鄭之已服於晉也，《傳》於此獨以不異言鄭爲義，宜善會之。《左傳》曰：「鄭服也。」不致，恥不能據鄭也。

戲盟還而楚伐鄭，故恥不能終有鄭。【補曰】恥者，《經》恥之。王念孫曰：「《方言》、《廣雅》並曰：「據，定也。」《史

記·白起傳》「趙軍長平以按據上黨民」，「按據」猶安定也。」文烝案：《傳》言不能定鄭者，下年會柎無鄭伯，鄭伐宋而諸侯又伐鄭，是諸侯雖已得鄭而不能定鄭也。注以戲盟還而楚伐鄭為說，楚伐則是服晉之驗，非不能定也。

### 楚子伐鄭。

十年春，公會晉侯、宋公、衛侯、曹伯、莒子、邾子、滕子、薛伯、杞伯、小邾子、齊世子光會吳于柎。柎，楚地。【補曰】此本杜預也。京相璠曰：「宋地，去傳陽八十里。」京得之。哀六年之柎則楚地耳。會，又會，外之也。五年會于戚不殊會，今殊會吳者，復夷狄故。【補曰】注非也，說見上五年。疏曰：「重發《傳》者，戚不殊，今又殊之，故復發《傳》。」

### 夏五月甲午，遂滅傅陽。○【撰異曰】傳，《左

氏》、《公羊》作「偃」，《國語》同。徐彥曰：「《左氏經》作「偃」字，音夫目反。一音「逼近」之「逼」。案：《漢書·古今人表》作「福陽」，《地理志》及《續漢志》皆作「傅陽」。王莽改漢縣曰「輔陽」。遂，直遂也。【補曰】疏曰：「言遂

直遂也者，遂是繼事之辭，不須云日，今加甲午，與凡遂異，故《傳》言之。」其曰遂何也？不以中國從夷狄也。言時實吳會諸侯滅傅陽，恥以中國之君從夷狄之役，故加甲午，使若改日諸侯自滅傅陽。滅卑國月，此日，蓋為遂耳。【補曰】「其曰遂」三字當為「其日」二字，「遂」字轉寫

誤衍，日、曰形近易誤。「滅潞」《傳》「日」亦誤「曰」。「戰邲」，《傳》、《疏》存兩說，明二字自昔相亂也。此承上言「遂」，直是遂耳，不應復加「日」，加「日」則非直遂之辭，故公孫敖、歸父之奔言日則不言遂，言「遂」則不言「日」，此其例也。今所以加「日」、「遂」上者，為晉與吳共滅國，不欲以中國從夷狄，故仍史文之舊，特存其「日」。下《傳》云「無善事則異之」，明從異事之文，小變繼事之例也。七年《傳》云「不使夷狄之民加乎中國之君」，語意亦同也。諸侯遂救許、諸侯遂圍許，間有他事，文不相接，無妨為繼事。「甲午遂滅傅陽」，文相接，而加「日」乃轉為異事，即此見《春秋》辭句離合之間，皆文章之極筆矣。據《左傳》「滅傅陽」無與於吳，汪克寬曰：「傅陽國及柎地皆在沛縣，乃吳人北方之要衝，會吳于柎，蓋謀滅傅陽而通吳也。」汪說甚合情事，是知吳、晉共滅無可疑者，《左氏》固時有疏失耳。「何」下

「也」字，各本脫，今依唐石經、余本、俞皋《集傳釋義》本補正。

公至自會。【補曰】會猶可致，滅則不可致，故與

後事小則以先事致者同。會夷狄不致，惡事不致，

夷狄不致，恥與同，惡事不致，恥有惡。【補曰】疏曰：「夷

狄不致，蜀之盟是；惡事不致，稷之會是。」文烝案：桓無致

會，引稷會，非也。當引侵宋及伐邾、取須句之屬。此其

致何也？會吳、會夷狄也。滅傅陽，惡事也，據不應

致。存中國也。以中國之君從夷狄之主，而滅人之邑

也。此即夷狄爾，是無中國也，故加甲午。使若改日，諸侯

自滅傅陽爾，不以諸侯從夷狄也。滅中國雖惡事，自諸侯

之一眚爾，從夷狄而滅人則中國不復存矣。【補曰】注「邑」

字當作「國」。所說不得《傳》意，《傳》謂既會夷狄，又是惡

事，而猶致者，特為存中國之文，使若未嘗會吳，未嘗滅傅

陽，此《經》之變例，致其所不當致以見義也。下文乃復論

遂事加日之義，又以鄭之言如會，陳之書逃，合此言之。

中國有善事則并焉，若中國有善事，則不復言會諸

侯，改日遂滅傅陽。如僖四年，諸侯侵蔡，蔡潰，遂伐楚，是

并焉。無善事則異之，存之也。諸侯會吳於柤，甲

午遂滅傅陽，是則若會與遂異人。【補曰】言上所書者，亦

是存中國。汲鄭伯，汲猶引也。鄭伯髡原為臣所弑而

不書弑，此引而致於善事。【補曰】引者，蓋謂未見而致其

志。王引之曰：「汲，疑當為『沒』，形相似而誤。沒者，終

也，古謂以壽終為得沒，不以壽終為不沒。鄭伯實弑，書

卒，使若令終得沒者然，故謂之沒鄭伯。沒鄭伯者，卒鄭伯

也。卒亦終也。《曲禮》曰「壽考曰卒」，卒猶沒也。」逃歸

陳侯，鄭之會，陳侯不會，以其為楚，故言逃歸。【補曰】

當云「陳侯在會」，「不」字誤。致柤之會，存中國也。

【補曰】言三事皆是存中國。疏曰：「《傳》於此見存中國之

文者，雞澤之會，諸侯失政，從此之後，日益陵遲，又會夷狄

之人以滅中國，惡事之甚，故書公至以存之。僖二十六年，

公至自伐齊，《傳》云「危之」，此云「存之」者，彼尚未陵遲，

故直云「危之」，公此時微弱之甚，故云「存中國也。」文烝

案：疏專論公至，不數遂事陳、鄭諸文，非也。又以諸侯失

政為說，不知諸侯失政與此各自為義，此論夷夏之故，非論

君臣之事，不須牽合也。悼公之時，楚既日強，吳復驟盛中

國，自此遂衰，故君子書《經》時有存中國之意，而《傳》明之

也。夷狄與中國交爭諸侯，則因而存中國，迨後晉、楚共率諸侯盟于宋，無侵伐八年，則又因而善之，足見聖人之情矣。《春秋》隨事而為義，《左傳》楚沈尹戌曰：「古者天子守在四夷，天子卑，守在諸侯。諸侯守在四鄰，諸侯卑，守在四竟。」當時晉主夏盟，安得四夷為守？但能弭兵息民，亦足多也。若不能則守在諸侯，中國固不可不存也，此經世之志，王道之要也。

### 楚公子貞、鄭公孫輒帥師伐宋。

### 晉師伐秦。

### 秋，莒人伐我東鄙。

公會晉侯、宋公、衛侯、曹伯、莒子、邾子、齊世子光、滕子、薛伯、杞伯、小邾子伐鄭。齊世子光序滕、薛之上，蓋驕蹇。【補曰】此本《公羊》，非也。《左傳》曰：「齊崔杼使大子光先至于師，故長於滕。」杜預曰：「先至為盟主所尊，故在滕上。」

### 冬，盜殺鄭公子斐、公子發、公孫輒。【補

曰】盜，賤也。義在昭二十年《傳》。諸書盜，蓋皆士也。

○【撰異曰】斐，《左氏》作「駢」。陸渚曰：「據字子駢，宜為

「駢」。案：《國語》稱駢駢。稱盜以殺大夫，弗以上下道，惡上也。兩下相殺，不志乎《春秋》，惡鄭伯不能脩政刑，致盜殺大夫也。以上下道，當言鄭人殺其大夫。【補曰】書大夫者，以上道之文也。書人為衆辭者，以下道之文也。稱盜以殺大夫，盜雖下，而別於凡下之文。大夫雖上，而無上文，明以至微賤之輩而禍及國體，事異凡常，是所以惡上。「惡上」之「上」當如范注以為君也。注首二句引《傳例》，非也，宜刪去。兩臣謂之兩下，如王札子殺召伯、毛伯是也。稱人稱盜則大夫為上，皆非兩下之文矣。疏曰：「於此發例者，盜殺大夫初起於此也。」文烝案：以哀四年《傳》校此《傳》，疑《傳》當疊一「道」字。「下道」謂稱道。○程子、胡安國以為失卿職，故不稱大夫。張洽又謂斐者從夷之人，弑君之賊，發輒惟斐是從，惡積而不可掩，鄭不能討而盜得殺之，所謂上慢下暴而致寇至盜之招也，故不稱殺大夫。王葆、胡銓等略同。文烝以為皆求之過當，《春秋》所未暇論。

### 戊鄭虎牢。不稱其人，則魯戌也，猶戌陳。【補

曰】亦文若魯獨戌耳，注非也。《左傳》以為脩其城而置戌，蓋亦以備楚。其曰鄭虎牢，決鄭乎虎牢也。二

年，鄭去楚而從中國，故城虎牢不言鄭，使與中國無異，自爾已來，數反覆，無從善之意，故繫之於鄭，決絕而棄外。

【補曰】注非也。決，猶決日、義決、不日而月之決，辨嫌之謂也。上城不繫鄭，嫌遂不得爲鄭地，故此決之，《傳》當云「決鄭地乎虎牢」，省一「地」字耳。必爲決文者，以後年兩伐鄭，終能得鄭，其地仍屬鄭也。《左傳》曰：「非鄭地也，言將歸焉。」《公羊》曰：「諸侯已取之矣，曷爲繫之鄭？諸侯莫之主有，故反繫之鄭。」戴祖啟曰：「邑已失而仍繫之其國者，宋彭城、鄭虎牢也，如但曰圍彭城，則爲君討臣之義隱矣，如但曰戍虎牢，則爲鄭拒楚之義隱矣。」

### 楚公子貞帥師救鄭。

公至自伐鄭。【補曰】許翰曰：「書楚救鄭而致公，知諸侯之避楚也。」

### 十有一年春王正月，作三軍。【補曰】何休

曰：「月者，重錄之。」作，爲也。【補曰】疏見成元年。

古者天子六師，諸侯一軍。《周禮》、《司馬法》曰：

「萬有二千五百人爲軍，王六軍，大國三軍，次國二軍，小國一軍。其將皆命卿。二千五百人爲師。」然則此言天子六

師，凡萬有五千，大國三軍，則三萬七千五百人，諸侯制踰天子，非義也。總云諸侯一軍，又非制也。昭五年《經》曰「舍中軍」，《傳》曰「貴復正也」。然則魯有二軍，今云作三軍，增置中軍爾。魯爲次國，於此爲明。【補曰】疏曰：

「魯本周公之後，地方七百里，而云次國者，據春秋時言之。」文烝案：《傳》與《周禮》非異也，師非二千五百人也，魯非次國也。諸侯一軍，「一」當爲「二」，此轉寫之誤。舍中軍，復爲二軍，《傳》以爲正，則「一」爲誤字明矣。《三略》曰：「諸侯二師，方伯三師。」此言最可據，二師即二軍，三師即三軍也。《國語》叔孫穆子之言曰：「天子作師，公帥之，以征不德。元侯作師，卿帥之，以承天子。諸侯有卿無軍，帥教衛以贊元侯，自伯、子、男有大夫無卿，帥賦以從諸侯。」韋昭解「諸侯無軍」曰「無三軍」，《傳》言「諸侯二軍」與《三略》同，即《國語》之「諸侯無軍」也。二軍之上有三軍，則《國語》之元侯、《三略》之方伯是也。二軍之下有一軍，則《國語》之伯、子、男是也。《左傳》曰：「成國不過半天子之軍，周爲六軍，諸侯之大者，三軍可也。」於大國云可者，言已過其制，此即元侯、方伯三軍之證。魯僖公之頌曰「公徒三萬」，三萬者，二軍之人數，此諸侯二軍之證。《左傳》又稱「王命曲沃伯以一軍爲晉侯」，此伯、子、男一軍之證。

依《公羊》大國稱侯，小國稱伯子男，是大國二軍，小國一軍也。《傳》既不言元侯、方伯之制，又不言小國一軍者，但言二軍，足見三軍之非，且切魯舊制以爲說，故略不具文也。若然，《周禮》所以與《傳》及《國語》、《三略》異者，《周禮》以元侯、方伯亦爲諸侯而謂之大國，故於大國二軍則謂之次國也。二千五百人爲師，五師爲軍，而下言二軍上言六師者，師有二千五百人之師，有通稱兵衆之師。通稱之師，師即是軍，互以成文，其義不異。惠棟曰：「《詩·瞻彼洛矣》『以作六師』，《棫樸》『六師及之』，《毛傳》並云『天子六軍』。《鄭志》趙商問《棫樸詩》及《常武詩》云：『整我六師，不稱六軍而稱六師，不達其意。』答曰：『師者，衆之通名，故人多云焉，欲著其大數，則乃稱軍耳。』又臨孝存引《詩》『六師』之文以難《周禮》，鄭答之云：『軍者，兵之大名，軍禮重言，軍爲其大悉，故春秋之兵雖有累萬之衆，皆稱師。』《詩》云『六師』即六軍也。」惠引鄭君之言以解此《傳》，最得其旨也。凡軍以乘爲數，天子六軍，兵車三千乘，故《詩·采芑》曰「其車三千」。三軍者千五百乘，二軍者千乘，一軍者五百乘。每一乘甲士十人，步卒十五人也。《魯頌》言「公徒三萬」者，又有重車二百乘，凡步卒五千人，故言三萬也。○或曰《白虎通》引《穀梁傳》曰「天子有六軍，諸侯上國三

軍，次國二軍，下國一軍」，與今本不同，其文亦可據邪？曰此文「上國」以下十字乃淺人依《周禮》妄增之，非《白虎》元文。觀其下文云「諸侯所以一軍者何？諸侯蕃屏之臣也，任兵革之重，距一方之難，故得有一軍」，是知東漢時相承《穀梁》之本實作「諸侯一軍」矣。曰然則《傳》云「一軍」非誤字，言諸侯一軍，明小國無軍也。諸侯一軍者，即《國語》所謂「諸侯有卿無軍，帥教衛以贊元侯也」；小國無軍者，即《國語》所謂「伯子男有大夫無卿，帥賦以從諸侯也」。韋昭以爲伯子男無天子之命卿，引《王制》小國二卿皆命於其君，明《王制》本無誤脫，鄭君注未允也。小國無軍，此曹、虞諸國所以無師也。小國無天子之命卿，此曹、莒諸國所以無大夫也。若此，豈不一以貫之邪？曰此說不可用也。諸侯裁一軍，何以舍中軍爲二軍，《傳》謂之復正乎？曹、莒不得有天子命大夫則不得有名姓，將謂魯及齊、晉、宋、衛、陳、蔡、鄭之書名姓者，皆爲天子命大夫，何以《傳》獨於內外書字各一人謂之天子命大夫乎？如依莊元年范注謂貢士京師受命者稱字，就其國命之者稱名，何以知當時必行貢士之制？又且單伯世卿，何以云貢士乎？反覆思之，「一軍」必爲誤字，《國語》必不可泥。《王制》上文小國有上中下三卿，必當依鄭注以爲二卿之文有誤脫。而小



國無師無大夫，還當如前卷之解也。作三軍，非正也。【補曰】此事當時蓋著爲令。不言初者，以後有舍文。不須加初，足知爲常令。

夏四月，四卜郊不從，乃不郊。夏四月，不時也。四卜，非禮也。【補曰】疏曰：「上三卜爲禮而非時，此卜違禮，非禮亦非時，故重發《傳》不行免牲之禮，與成十年同。」

### 鄭公孫舍之帥師侵宋。

公會晉侯、宋公、衛侯、曹伯、齊世子光、莒子、邾子、滕子、薛伯、杞伯、小邾子伐鄭。

【補曰】《左傳》曰：「齊大子光、宋向戌先至于鄭。」杜預曰：「光至復在莒子之先，故晉悼亦進之。」

### 秋七月己未，同盟于京城北。盟謀更共伐

鄭。京城北，鄭地。【補曰】此與戲異，與柯陵同，故注即用彼《傳》語。鄭雖受盟，猶不堅服，晉雖盟鄭，實謀共伐，故下復伐也。又《左傳》此盟載書祇言十二國，啖助據之謂鄭不與。○【撰異曰】京，《左氏》作「亳」，徐彥《公羊》疏曰：「《穀梁》與此同，《左氏》經作「亳城北」，服氏之經亦作「京

城北」，乃與此《傳》同文也。」案：「亳」字誤。

公至自伐鄭。不以後致，【補曰】據偶事，當致後。盟後復伐鄭也。《傳例》曰：「已伐而盟復伐者

則以伐致，盟不復伐者則以會致，此言不以後致，謂會在伐後。【補曰】注末二語可刪，引例在後十九年《傳》。疏曰：「成十七年夏，公會尹子云云伐鄭。乙酉，同盟于柯陵。與此正同。彼云「至自會」，此云「至自伐鄭」，致文不同者，案彼伐鄭同盟于柯陵，爲公不周於伐鄭，以會事爲大，故以會致。此時鄭從楚，楚彊，諸侯畏之，故以伐爲大事，又盟後重更伐鄭，故以伐致也。」文烝案：盟後復伐，則以伐致，此一例也；疏據僖四年、六年之屬，後事小則以先事致，又一例也。《傳》但言盟後復伐一例者，此以復伐而致伐，與下蕭魚以不復伐而致會相對爲義，此之致伐本不取大伐鄭之義也。疏說固可通，然非此《傳》解《經》之意。

### 楚子、鄭伯伐宋。

公會晉侯、宋公、衛侯、曹伯、齊世子光、莒子、邾子、滕子、薛伯、杞伯、小邾子伐鄭。

【補曰】杜預曰：「晉遂尊光。」

會于蕭魚。蕭魚，鄭地。【補曰】《公羊》曰：「此



伐鄭也，其言會于蕭魚何？蓋鄭與會爾。」何休曰：「中國以鄭故，三年之中五起兵，至是乃服，其後無干戈之患二十餘年，故喜而詳錄其會，起得鄭爲重。」劉敞曰：「鄭伯如會歟？宜以如會書。乞盟歟？宜以乞盟書。今一皆沒之，獨稱會何哉？」曰《春秋》嘉善矜不能而成人之美，悼公之服鄭也有道，其信義著於諸侯非一日之積，此善之可嘉者也。鄭伯之欲從中國也亦非一日之積，逼於楚之彊而未果，此不能之可矜者也。然則晉之取鄭、鄭之下晉，不始於會蕭魚之日，其信已在前矣。至其會也，諸侯以小息，中國以小安，是乃有貴乎約信者也。其義不言而論，不盟而壹，故略其文以見其實，蓋《春秋》成人之美之意也。」

### 公至自會。伐而後會，不以伐鄭致，【補

曰】疏曰：《傳例》曰二事偶則以後事致，此云公至自會，正是其常，而云不以伐鄭致者，以鄭從楚，伐之尤難，故當以伐爲大事。」得鄭伯之辭也。鄭與會而服中國，喜之，故以會致。【補曰】言得鄭伯者，明上會有鄭，自此遂不復伐，既是盟不復伐，則以會致之例，而後事不小於先事，又是偶事致後之例也。高閌曰：《春秋》以變文見義，屢書盟而不信則以不書盟爲誠，屢書伐而無功則以不致伐爲

美。」李廉曰：「厲公三伐，終以伐致，悼公三伐，終以會致，《春秋》之立文精矣。」文烝案：《公羊》得意致會，不得意致伐之例，於此則通。

### 楚人執鄭行人良霄。○【撰異曰】霄，十行本

獨此作「宵」。張洽、程端學所見同。

### 行人者，挈國之

辭也。行人是傳國之辭命者。【補曰】疏曰：「舊解挈猶傳也，行人傳國使命，故云挈國之辭。或以挈爲舉，謂傳舉國命之辭，理亦通耳。」文烝案：注、疏皆非也。辭者《經》之辭，挈者舉也。舉而直言之，若祝吁之挈遂之挈是也。舉又訓盡，若所謂以國與之是也。凡言行人，皆施於執，而外曰某行人，內亦曰我行人，與齊人執單伯諸文不同，是行人者舉國之辭也。《左傳》曰「行人」，言使人也，行人爲使人之稱，使事至重，一國安危所繫，故使能造命，可爲大夫，使不辱命，則可謂士，舉國之辭，此其義也。疏又曰：「行人之文有六，發《傳》者三：此曰「挈國之辭也」，晉人執衛行人石買，《傳》曰「稱行人，怨接於上也」；楚人執陳行人干徵師，《傳》曰「稱人以執大夫，執有罪也。稱行人，怨接於上也」；是其文互相通也。《傳》舉三者，則晉人執我行人叔孫婁、晉人執宋行人樂祁犁、齊人執衛行人北

官結亦然也。然則稱人以執，執有罪，稱行人怨接於上，

明君與臣兩失之也。執大夫稱人，又有二義：齊人執鄭

詹，《傳》曰「人者，衆辭也。以人執，與之辭也」；宋人執鄭

祭仲，《傳》曰「宋人者，宋公也。貶之也」；齊人執陳袁濤

塗，《傳》曰「齊人者，齊侯也。不正其踰國而執也」；是有

二也。凡執大夫，惟齊慶封、陳公子招特爲變文，餘皆稱

人，未有稱公侯以執者。若被執者有罪，則稱人以見罪，若

執人者有罪，亦稱人以見惡。《經》辭雖有常例，《傳》則分

而別之，所謂善惡不嫌同辭，不可以一概求之矣。」文烝又

案：黃道周說：「自北至三十年殺良霄，二十年中，鄭大夫

皆特書名氏，蓋深喜鄭之一意中國，而鄭大夫之得會於諸

侯也。」此說極合《經》旨。鄭之絕楚，自執良霄始，故終良

霄之身，皆特文以見義。《傳》於諸鄭事曰內鄭，曰恥不能

據鄭，曰決鄭，最後曰得鄭伯，明君子於晉、鄭之故，深致其

意，則黃氏此義可推而知也。若然，稱人、稱行人，鄭君臣

仍爲有罪者，鄭既一意中國，而復使人往楚，則是自取執

辱，故當罪鄭而不當罪楚，非謂鄭從晉有罪也。

冬，秦人伐晉。【補曰】何休曰：「爲楚救鄭。」

案：《左傳》曰「秦庶長鮑、庶長武帥師伐晉以救鄭」，不言救者，晉伐鄭而終得鄭，故與晉得伐，不以善辭施秦，與上

年書楚救異義。

十有二年春王三月，莒人伐我東鄙，圍

郕。蓋攻守之害深，故以危錄其月。○【撰異曰】三月，板

本、《公羊》或作「正月」，誤也。郕，本又作「台」。陸渚《纂

例》曰：「《左氏》皆作「台」。」案：今《公羊》并下亦皆作

「台」。伐國不言圍邑，舉重也。伐國重，圍邑輕，

舉重可以包輕。取邑不書，圍安足書也。不足書

而今書，蓋爲下事起。

季孫宿帥師救郕，遂入郕。郕，莒邑。遂，

繼事也。【補曰】疏曰：「重發《傳》者，此不受命，嫌與常

例不同也。」受命而救郕，不受命而入郕，【補曰】

大夫之事皆君命，言季孫宿帥師救郕，是受命之常文也，若

入郕亦受命，則其事非如京師、如晉之比，當依盟衡雍、盟

暴之例，各爲一事。再出季孫宿帥師，不當爲繼事辭，明此

實不受命矣。《公羊》大夫無遂事之說，蓋因此《經》之義推

之。惡季孫宿也。【補曰】惡其不受命，言「遂」即是惡

之也。入本是惡事，與救相反，但此處未暇論之。《公羊》

莊十九年《傳》曰：「聘禮，大夫受命不受辭，出竟有可以安社稷利國家者，則專之可也。」胡安國引其文以爲郤在邦域之中而專行之，非有無君之心者不敢爲也。趙儀吉曰：「漢律有矯詔害矯詔不害，故劉向曰國有危而不專救者不忠，國無危而擅生事者不臣。」

夏，晉侯使士魴來聘。○【撰異曰】《公羊》此處徐彥疏曰：「考諸正本，皆作「士魴」字，若作「士彭」者，誤矣。」

秋九月，吳子乘卒。【補曰】吳壽夢也。吳始書卒，少進之也。吳卒皆不日皆不葬，義亦見成十四年注。《左傳》服虔注曰：「壽夢，發聲，吳蠻夷言多發聲，數語共成一言，壽夢一言也。《經》言乘，《傳》言壽夢，欲使學者知之也。」錢大昕曰：「壽，讀如疇，與乘爲雙聲。夢，古音莫登切，與乘爲疊韻。孫炎制反切，蓋萌芽於此。」案：錢氏此說本顧炎武《音論》，因沈括、鄭樵說，備考二聲合一之字，信矣。但《傳》稱名從主人，而《經》書「乘」不書「壽夢」，則知「壽夢」者吳之本言，其赴上國乃改言「乘」，故史承而書之也。

冬，楚公子貞帥師侵宋。

公如晉。

十有三年春，公至自晉。

夏，取郛。【補曰】疏曰：「當從《左氏》爲國。」案：《左傳》未必是也，此當是取郛，故時齊有郛，見《左氏》十八年《傳》。○【撰異曰】郛，《公羊》作「詩」。徐彥曰：「正本皆作「郛」字，有作「詩」字者，誤。」

秋九月庚辰，楚子審卒。共王。【補曰】《國語》共王名作箴字，箴、審聲近通用。《周禮》「十羽爲審」，《爾雅》作「箴」。

冬，城防。【補曰】防，即隱九年會地，臧氏邑。

十有四年春王正月，季孫宿、叔老會晉士匄、齊人、宋人、衛人、鄭公孫蠆、曹人、莒人、邾人、滕人、薛人、杞人、小邾人會吳于向。向，鄭地。【補曰】叔老，公孫嬰齊子子叔齊子也。晉以外獨鄭書名氏者，喜其得列中國之會，特顯之也。《左傳》齊、宋、衛之大夫爲崔杼、華閱、北宮括，不沒其名氏，則

無以顯鄭，故序鄭上稱人也。此及伐秦之公孫蠆、會澶淵之良霄、城杞之公孫段最爲難通。前引黃道周說獨得之，愚因以知蕭魚得鄭伯之義，直至終良霄之身方盡其意，蓋晉悼濟河而復霸，楚不能爭，鄭得所庇，《春秋》深美之也。

《左傳》以齊、宋、衛之不書爲情，以衛之書於伐秦爲攝，趙匡既明其不然，張大亨則謂非卿而列於卿上，其誤甚矣。向者，《左傳》十一年諸侯伐鄭師于向，即此地。黃汝成以爲此《漢志》沛國之向，今鳳陽府懷遠縣地。中國會吳，往往就之於淮上也，與江永說同。疏曰：「何休云：『月者，危刺諸侯委任大夫，交會彊夷，臣日以強，三年之後，君若贅流然。』」范雖不注，或以二卿遠會蠻夷，危之故月。從何說，理亦通耳。○【撰異曰】蠆，《公羊》作「噓」，下皆同。

二月乙未朔，日有食之。

夏四月，叔孫豹會晉荀偃、齊人、宋人、衛北宮括、鄭公孫蠆、曹人、莒人、邾人、滕人、薛人、杞人、小邾人伐秦。【補曰】《左傳》齊、宋、衛之將皆上會人也，不書齊、宋之將以顯鄭將，與上會同義。衛於上會亦書人，此從常文者，蓋與前衛甯殖侵鄭相對見義。衛侵鄭獨出名氏，故衛與鄭同伐秦亦並出名

氏，明以報怨之師爲協力之舉，深爲鄭喜也。《傳》前獨解衛甯殖之文，則此義亦足見矣。月者，爲下奔日。○【撰異曰】徐彥《公羊》疏曰：「舊本作『荀偃』，若作『荀偃』者，誤。括，《公羊》作『結』。」

己未，衛侯出奔齊。諸侯出奔例月，衍結怨於民，自棄於位，君弑而歸，與知逆謀，故出入皆日，以著其惡。【補曰】疏曰：「九月乙亥公孫于齊，亦日者，亦是明公之惡，或是內事詳錄，不可以外例準之。衛侯以惡甚而書日，所以不名者，以其不失國也。出不名，以見得國，歸書名，以明其惡。一解衛侯出奔不名者，既書日以見罪惡甚，故不復名也。理亦通耳。」文烝案：舊史大國君奔皆書日，君子皆略之從月例。《左傳》二十年甯惠子曰「吾得罪於君，名藏在諸侯之策，曰『孫林父、甯殖出其君』」，是列國史文也。魯史之法，以爲臣逐其君不可以訓，苟獲免於見弑，皆以婉辭書奔，於內之奔則曰孫焉，及至弑君大變，則外直言而內諱焉。此蓋皆周公舊制，闢盛衰以垂法，蓋曰可言者言之，不可言則諱，於諸侯之事可諱則諱，而魯史悉準其制也。記言魯有王禮，《傳》言魯《春秋》有周禮，其事不可備知。而內無弑君，外無逐君，異於諸國所記則較然著明，劉敞以此二者爲夫子新意，斯不然矣。○【撰異曰】《公羊》

作「衛侯衎」，陸淳《纂例》唯云「《左氏》無「衎」字」。

莒人侵我東鄙。

秋，楚公子貞帥師伐吳。

冬，季孫宿會晉士句、宋華閱、衛孫林

父、鄭公孫蠆、莒人、邾人于戚。【補曰】《左傳》

曰：「謀定衛也。」春會夏伐，特顯鄭大夫，則冬會從常文。

二十六年會澶淵，特顯鄭大夫，則二十七年會宋從常文。

戴溪曰：「一年之間，大夫三會，習見其事，以為當然，遂踵

而行之，不以為怪。」

十有五年春，宋公使向戌來聘。

二月己亥，及向戌盟于劉。【補曰】案：何休

通不說地名，杜預於此亦無注，而《釋例》魯地名有之。孔

穎達曰：「蓋魯城外之近地。」○高閔以為「于劉」二字因下

有「劉夏」誤增。鑿空甚矣。薛伯卒築臺于薛，亦將致疑

乎？趙與權則又牽合之。

劉夏逆王后于齊。劉，采地。夏，名。書名則

非卿也。天子無外，所命則成，故不言逆女。【補曰】此皆

本杜預。劉者，王季子之采地。夏以名書，與石尚同，則是

天子之士蓋劉氏之支子也。《左傳》謂劉夏為官師，與上年

《傳》之劉定公自是異人，杜預合為一人，不足據。《公羊》

見後有劉子，而不知其委曲，遂以劉夏為天子之大夫，其稱

劉為以邑氏，非也。天子之中下大夫亦不名，而《注》但云

非卿，又失之。不言逆女，亦當兼略之及無外二義，以其過

我而已，故略之也。《左傳》「官師從單靖公逆王后于齊」，

杜預曰：「劉夏獨過魯告昏，故不書單子。」《傳》又曰：「卿

不行，非禮也。」杜曰：「天子不親昏，使上卿逆而公監之，

故曰卿不行，非禮。」過我，故志之也。【補曰】此猶外

相如，王姬歸，皆以過我志。《公羊》亦同。以過我志，可以

略文，《傳》并見此意。何休曰：「明魯當共送迎之禮。」孔

廣森曰：「外逆女見《左傳》者，莊十八年原莊公逆王后于

陳，宣六年召桓公逆王后于齊，並不書。」

夏，齊侯伐我北鄙，圍成。【補曰】圍成書者，

亦為下事起。成，孟氏邑。

公救成，至遇。至遇而齊師已退也。遇，魯地。

【補曰】《公羊》以為不敢進，杜預從之，范不取。崔子方

曰：「若畏齊不敢進，當書次，不當書至。」案：崔氏以郎，成

之例推之是也。不致者，竟內兵也。

季孫宿、叔孫豹帥師城成郭。郭，郭。【補

曰】此杜預《傳》下注。○【撰異曰】陸渚《纂例》曰：「成，

《公羊》作「郕」。案：今《公羊》不作「郕」。

秋八月丁巳，日有食之。

邾人伐我南鄙。

冬十有一月癸亥，晉侯周卒。【補曰】周者，

襄公之曾孫，其父祖皆不爲君，書日則周亦正也。以《左傳》晉事推論之，蓋厲被弑無嗣，成、景之族皆先散處他國，又不宜迎爲君，惟周雖出在京師而獨宜爲君，故得爲正耳。樂書譜郤至於厲公已有奉孫周之言，是其宜立明矣。周有兄，不可立，《左氏》又明言之。○【撰異曰】周，《公羊》一本作「雕」。

十有六年春王正月，葬晉悼公。【補曰】前

此晉襄三月而葬，悼以後皆三月。

三月，公會晉侯、宋公、衛侯、鄭伯、曹伯、莒子、邾子、薛伯、杞伯、小邾子于湟梁。

湟梁，地。【補曰】晉地也。湟水有大隄梁，《爾雅》所謂「梁莫大於湟梁」。月者，爲下盟日。○【撰異曰】湟，《公羊》或作「晃」。

戊寅，大夫盟。【補曰】下執二君不去盟。日者，

於執言以歸，晉惡不嫌不顯，故此可不去日，與戚盟同也。蒲、祝柯下執無變文，故去盟日以見惡。湟梁之會，諸

侯失正矣。【補曰】亦「政」字也。此承雞澤《傳》言，至

此遂失政也。雞澤、邢丘、湟梁三《傳》文相貫。諸侯會

而曰大夫盟，正在大夫也。【補曰】亦「政」字。此

句包雞澤言之。《公羊》言「信在大夫」，獨據此《經》，與

《傳》微異。諸侯在而不曰諸侯之大夫，大夫不

臣也。【補曰】不臣，故不繫於君，此專解本《經》也。若

書諸侯之大夫，則當書魯卿名氏而言及矣。政既在大夫，

大夫又不臣，以見諸侯遂失政。盧仝曰：「三桓逐魯，六卿

分晉，其所由來者漸。」項安世曰：「書公會諸侯，晉大夫盟

于扈，猶有諸侯也。書大夫盟，言自是無諸侯也。」○《左

傳》曰：「晉侯與諸侯宴于溫，使諸大夫舞，曰：『歌詩必

類！』齊高厚之詩不類。荀偃怒，且曰：『諸侯有異志

矣！」使諸大夫盟高厚，高厚逃歸。於是，叔孫豹、晉荀偃、宋向戌、衛甯殖、鄭公孫蠆、小邾之大夫盟曰：「同討不庭。」杜預「會」下注曰：「不書高厚，逃歸故也。」「盟」下注曰：「諸大夫本欲盟高厚，高厚逃歸，故遂自共盟。」案：左、杜所言，當得事實。杜又曰：「雞澤會重序諸侯，今此閒無異事，即上諸侯大夫可知。」杜以賈服用《穀梁》、《公羊》，乃為此說以改之，殊為未允。君目臣凡之文，魯卿仍見名氏，非苟從簡略者，若無他義，何為省文乎？

晉人執莒子、邾子以歸。【補曰】疏曰：「諸

侯不得私相治，執之以歸，非禮明矣。」文烝案：何休曰：「錄以歸者，甚惡晉。以者，不以者也。言執又言以，惡之可知。惡晉不斥晉侯者，明莒、邾有罪。」

齊侯伐我北鄙。

夏，公至自會。【補曰】王貫道曰：「書至於齊伐

後，見諸侯之會未散而齊已抗矣。」

五月甲子，地震。【補曰】孔廣森曰：「自是迄

哀公，地比四動，皆季氏專強之象。」

叔老會鄭伯、晉荀偃、衛甯殖、宋人伐

許。【補曰】許翰曰：「晉卿主兵，而先鄭伯者，臣不可過

君也。」張洽曰：「垂斂之後晉士穀，伐許之後晉荀偃，當時名分尚明，皆因其事實而書之爾。」○【撰異曰】徐彥《公羊疏》曰：「正本作『荀偃』，若有作『荀營』者，誤矣。」

秋，齊侯伐我北鄙，圍成。【補曰】此年圍成，

下年圍桃、圍防，亦業書者，疏曰：「為十八年諸侯同圍之地。」○【撰異曰】陸淳《纂例》曰：「成，《公羊》作『郕』。」案：今唯《左氏》作「郕」，音成。

大雩。

冬，叔孫豹如晉。

十有七年春王二月庚午，邾子貍卒。【補

曰】邾宣公也。以後葬矣。○【撰異曰】二月，唐石經《公羊》初刻作「三月」。眊，《左氏》作「棼」。案：从閒从肩及从开从至之字聲轉得通。《孟子》注：「眊，視也。」《士昏禮》注引「眊良人」作「見」，或作「覲」。「齊成覲」或作「成覲」，又作「成荆」。《考工記》「顧脰」，注：「故書『顧』，或作『棼』。」鄭司農云：「棼，讀為『鬚頭無髮』之鬚。」

宋人伐陳。

夏，衛石買帥師伐曹。

秋，齊侯伐我北鄙，圍桃。○【撰異曰】桃，  
《公羊》作「洮」。

齊高厚帥師伐我北鄙，圍防。○【撰異曰】  
《左氏》直云「高厚」，無「齊」字。段玉裁曰：「以《傳》考之，  
此與上「齊侯伐我北鄙，圍桃」，非有二事，唐石經不誤。」  
案：段從《左氏》，恐非《經》例。

九月，大雩。

宋華臣出奔陳。

冬，邾人伐我南鄙。



# 春秋襄公經傳第八補注第二十

穀梁 范氏集解 鍾文烝詳補

十有八年春，白狄來。不言朝，不能行朝禮。

【補曰】此本《公羊》、杜預，與介葛盧同。直言白狄，更劣於介，白狄子不得以名通。

夏，晉人執衛行人石買。稱行人，怨接

於上也。怨其君而執其使，稱行人，明使人爾，罪在上也。【補曰】怨接於上者，《公羊》云「以其事執」是也。疏曰：「稱人以執，是執有罪。范云使人者，明罪在君上，非謂罪晉也。」文烝案：范用《左傳》也。稱人執有罪，昭八年《傳》文也。此發行人例，與襄十一年《傳》互相備。疏云「嫌晉與楚異，故重發」，非也。

秋，齊侯伐我北鄙。【補曰】許翰曰：「齊人四

年之間五伐鄙而四圍邑，又從邾、莒以助其虐，諸侯之陵暴，未有若是者也。」胡安國曰：「齊環背盟棄好，陵虐神

主，肆其暴橫，數伐鄰國，觀加兵於魯則可見矣。」○【撰異曰】《左氏》、《公羊》皆作「齊師」，《左傳》曰「齊侯」。

冬十月，公會晉侯、宋公、衛侯、鄭伯、曹

伯、莒子、邾子、滕子、薛伯、杞伯、小邾子，同圍齊。【補曰】月者，為下卒起，或順病文而盈之。非圍

而曰圍，據實伐。【補曰】疏曰：「知非圍者，以下十九年致伐不致圍。」文烝案：《公羊》釋「致伐」曰「未圍齊也」，注以「曰圍」斷句，非也，當讀至下「齊」字為句。齊有大

焉，亦有病焉。齊若無罪，諸侯豈得同病之乎？【補

曰】注非也。「齊」字當上屬。「有大焉」者，謂有大齊之辭；「有病焉」者，謂有病齊之辭，皆謂《經》之立文也。言所以非圍而謂之圍齊者，是所以大齊，其實亦所以病齊也。非大而足同與？齊非大國，諸侯豈足同共圍之與？

【補曰】注又非也。此申上「有大」意也。言若非以大齊之辭稱圍，則何足言同歟？方欲言同為特文，故大之言圍也。若言同伐齊，則不可矣。《傳》「與」字各本誤作「焉」，涉上二句而誤，今依《音義》、楊疏、唐石經、余本改正。諸侯同罪之也，亦病矣。諸侯同罪大國，是不量力，必

爲大國所讐，則亦病矣。【補曰】注又非也。此申上「有病」意也。如上所云，所以大齊者，爲欲言同故耳，非實欲大齊也。言同者，以明諸侯同罪之，許翰曰「言得罪於天下也」是也。夫齊亦一國，今乃爲天下所同罪，則齊亦病矣，故曰有大齊之辭，亦有病齊之辭也。《經》之此文，專以書同見義，伐齊而書同，猶外楚而書同，皆爲特筆。既書同以見其義，則宜書圍以盈其辭，此《傳》六句，曲盡《經》旨，特以文義深奧，故自注疏以來，莫能通其說，惟王引之說此大概近是，今取其說而增改焉。王氏又引僖六年《傳》「病鄭也，著鄭伯之罪也」，以爲文義略與此同，亦足匡范之失。《公羊》曰：「未圍齊則其言圍齊何？抑齊也。曷爲抑齊？爲其亟伐也。」與《傳》意亦相近。

曹伯負芻卒于師。閔之也。【補曰】重發例，故省「傳曰」之文。

楚公子午帥師伐鄭。

十有九年春王正月，諸侯盟于祝柯。前年同圍齊之諸侯也。祝柯，齊地。【補曰】注上句本杜預。齊不與盟，與諸鄭事異也。下年盟澶淵始有齊。《左傳》又謂是年

十一月，齊、晉盟于大隧。○【撰異曰】柯，《公羊》作「阿」。

晉人執邾子。【補曰】晉侯稱人者，邾有罪。

公至自伐齊。《春秋》之義，已伐而盟復伐者，則以伐致。京城北之類是。盟不復伐者，則以會致。會于蕭魚之類是。祝柯之盟，盟復伐齊與？怪不以會致。【補曰】常例二事偶亦當以後事致，《傳》不言者，伐齊自是大事，不嫌當致會，故據京城北、蕭魚之例以問。曰非也。不復伐齊。【補曰】下文獨衛伐齊耳。士勾還師，又不成伐。然則何爲以伐致也？曰與人同事，或執其君，或取其地。同與邾圍齊而晉執其君，魯取其地，此與盟後復伐無異。【補曰】明以有執君取地之事，故雖盟後實不復伐，而從盟復伐則以伐致之例，乃又合於後事小則以先事致之例也。此與柯陵致會適相反，彼當致伐而致會，此當致會而致伐也。疏曰：「據此《傳》文，事實在邾，不關於齊，而以伐齊致者，以明既盟之後，執君取地，與盟後復伐無異，故託事以見意，罪晉執君，惡魯取地也。」劉敞曰：「晉人之君而制其國，介人之威而私其利，晉、魯之惡甚焉，交譏之。」謝湜

曰：「以義討齊之暴，復以不義侵邾之疆，以亂繼亂而已。」黃震曰：「晉救魯可也，動天下之兵以執邾子，而取邾田以歸魯，不可也，未足以服齊也。」文烝案：諸執諸侯稱人以執者，較稱爵斥執爲愈，其實亦非全與之，《傳》於此見之矣。惟晉文執衛侯爲合義，則別有善文。

**取邾田，自漚水。**以漚水爲界。【補曰】此本杜

預也。哀篇直言漚，此加言「水」者，文無所連，單言自漚則意未足，與梁山相似。《書·禹貢》或言澧，或言澧水，史文之常也。軋辭也。軋，委曲。隨漚水，言取邾田之多。

【補曰】疏曰：「《公羊》以爲漚水移入邾界，魯隨而有之。今云軋辭者，謂《經》言自漚水者，委曲之辭也。一解言取邾田委曲隨漚水爲界之辭，言其多也。」其不日，惡盟也。【補曰】盟不日者，惡之也。疏曰：「謂執君取地。」文

烝案：平丘之會曰「其日」，善是盟也，與此文相對。此於執君取地後追論盟之不日以見惡，彼於陳、蔡歸國後又追論盟之謹日以明善，其意一也。惡之則不日，猶淪盟不日。

季孫宿如晉。

葬曹成公。

夏，衛孫林父帥師伐齊。【補曰】衛之舊君在

齊，而伐齊非爲舊君也，猶衛之亡父在戚，而圍戚非爲亡父也。父子之變大矣，故別取義，君臣之變多矣，故爲平文。

《穀梁》、《公羊》皆無說焉，孰謂二家之學鑿空哉？

秋七月辛卯，齊侯環卒。○【撰異曰】環，《公

羊》作「環」。徐彥曰：「《左氏》、《穀梁》作「環」字也。」

晉士匄帥師侵齊至穀，聞齊侯卒，乃還。

還者，事未畢之辭也。【補曰】疏曰：「重發《傳》者，

嫌外內異也。」受命而誅，生死無所加其怒，不伐喪，善之也。【補曰】受君命而誅其人，於我無所加其

怒，生則誅之，死則已，此正禮也。不伐齊喪，合禮，詳錄之，乃以善之。善之則何爲未畢也？君不尸小

事，臣不專大名，善則稱君，過則稱己，則民作讓矣。【補曰】《坊記》云：「善則稱君，過則稱己，則

民作忠。」董仲舒曰：「《春秋》君不名惡，臣不名善。」士匄

外專君命，故非之也。【補曰】專命，即專大名，失善

則稱君之義，故以未畢之辭責之。疏曰：「何休《廢疾》

云：「君子不求備於一人，士匄不伐喪，純善矣。」何以復責

其專大功也。鄭君釋之曰：「士句不伐喪則善矣，然於善則稱君，禮仍未備，故言乃還，不言乃復，作未畢之辭。還者致辭，復者反命。」案如鄭意，以乃還爲惡，乃復爲善，則公子遂至黃乃復又爲惡之者。彼以遂違君命而反，故加畢事之文，欲見臣不專君命，與此意少異。此既善不伐喪，又爲事畢之辭，則是純善士句，故以未畢之辭言之。」文烝案：鄭以還爲致辭，不可曉。還者將至國而未至也，乃者亡乎人之辭，說見僖三十一年。然則爲士句者宜柰何？宜墀帷而歸命乎介。除地爲墀，於墀張帷，反命於介，介歸告君，君命乃還，不敢專也。【補曰】《聘禮》說聘使習儀事云，爲墀壇畫階，帷其北，無宮。公孫歸父至墀，聞君薨，家遣，《左氏》、《公羊》皆言墀帷復命於介。劉敞曰：「止師而請之，君曰可，而後止，不可，則復之，期可而後止。」劉以爲未入齊地宜如此，至穀入齊地宜還。今案：至穀入齊地則宜退至晉竟而請焉。還者，反而在路也，即含斯義。

八月丙辰，仲孫蔑卒。

齊殺其大夫高厚。

鄭殺其大夫公子嘉。○【撰異曰】嘉，《公羊》

作「喜」。徐彥曰：《左氏》、《穀梁》作「公子嘉」也。」

冬，葬齊靈公。【補曰】晉士句不成侵，齊之臣子免於危懼，故從時葬正例，善晉而幸齊也。

城西郭。【補曰】杜預曰：「魯西郭。」《左傳》：「懼齊也。」

叔孫豹會晉士句于柯。柯，地。【補曰】此柯當云衛地。

城武城。【補曰】《左傳》：「穆叔歸曰：『齊猶未也，不可以不懼。』」乃城武城。杜預曰：「泰山南武城縣。」

案：此即《論語》子游爲武城宰，得澹臺滅明，《孟子》稱曾子居武城者也。又謂之南武城，《史記·仲尼弟子傳》：「曾參，南武城人。澹臺滅明，武城人，實一地，文有詳略也。其後謂之南城，《田齊世家》：「齊威王曰：『吾臣有檀子者，使守南城，則楚人不敢爲寇』」是也。《漢書·地理志》作「南成」，屬東海郡，《續漢志》作「南城」，屬泰山郡，至《晉志》乃復作「南武城」，與杜氏此《注》同。《羊祜傳》及宋、齊、隋《志》仍作「南城」，又與哀十四年《傳》注同，未知何者爲正也。武城即南武城，亦即南城，顧炎武考之甚詳，其故城在今沂州府費縣西南八十里石門山下。《大戴禮》盧辯注以

曾子爲魯之南武城人，子羽爲魯之東武城人，不足據。《史記·平原君傳》「封於東武城」，非魯地也。

二十年春王正月辛亥，仲孫速會莒人盟于向。向，莒邑。【補曰】速，蔑之子孟莊子。○【撰異曰】速，《公羊》作「邀」，後同。

夏六月庚申，公會晉侯、齊侯、宋公、衛侯、鄭伯、曹伯、莒子、邾子、滕子、薛伯、杞伯、小邾子盟于澶淵。澶淵，衛地。【補曰】下魯伐邾渝盟，非晉意，故從書日常例。魯渝邾盟太速者皆曰，此亦從例。

秋，公至自會。

仲孫速帥師伐邾。

蔡殺其大夫公子濕。○【撰異曰】濕，又作「隰」，《左氏》、《公羊》作「燮」。

蔡公子履出奔楚。

陳侯之弟光出奔楚。○【撰異曰】光，《左氏》作「黃」，後同。案：《說文》：「光，从火在人上，古文作𡩺。」

「黃，从芡聲。」古書「光」與「廣」通，又與「枕」、「橫」通。「廣」、「橫」皆黃聲。諸侯之尊，弟兄不得以屬通。

【補曰】重發《傳》者，奔而稱弟，辭同義異，故重舉不以屬通之例。其弟云者，親之也，親而奔之，惡也。顯書弟，明其親也。親而奔逐之，所以惡惡侯。【補曰】疏曰：「《鄭釋廢疾》亦云「惡陳侯」。」

叔老如齊。

冬十月丙辰朔，日有食之。

季孫宿如宋。

二十有一年春王正月，公如晉。【補曰】孔廣森曰：「月者，正月也。」

邾庶其以漆、閭丘來奔。【補曰】黃震曰：

「襄如晉而庶其以漆、閭丘來，昭如晉而牟夷以牟婁、防、茲來，昭在乾侯而黑肱以濫來，三叛皆季孫受之，爲逋逃淵藪者也。」呂大圭曰：「非公命不書，自宣、成以來書之，政在大夫也。」○【撰異曰】漆，《左氏》或作「涑」。以者，不以者也。凱曰：「人臣無專祿以邑叛之道。」【補曰】疏曰：

「重發《傳》者，此非用兵之以故。」來奔者不言出，舉其接我者也。【補曰】重發《傳》者，此以地來，嫌有異

也。漆、閭丘不言及，小大敵也。【補曰】君子於

言無所苟，此與昭五年言「及」者相對也。昭五年《傳》解「以」、解「來奔」、解「及」又稱莒無大夫，重地而目其人，此亦應與彼同。《傳》不於此言之者，以邾畀我，邾快之來奔，直奔不以地來，亦日而書之，故不於此言重地。所以容彼二文，亦緣邾小於莒，盟會皆在莒下。言莒無大夫，則邾可知也。《公羊》曰「邾婁無大夫」，《左傳》於莒挈邾庶其、莒牟夷、邾黑肱皆曰非卿，曰賤。賈、服諸儒解之以爲邾、莒無命卿，並合《傳》旨矣。若然，莒之來奔，以重地而目之，邾之來奔，有地無地皆得目者，邾與魯最爲密邇，魯視之不與莒同。史書邾事較莒宜詳，《經》皆因其舊也。《公羊》說畀我、快之奔曰「以近書」，蓋謂邾近魯。嚴顏舊說，未可用也，此叛也，說在昭三十一年《傳》。

夏，公至自晉。

秋，晉欒盈出奔楚。

九月庚戌朔，日有食之。

冬十月庚辰朔，日有食之。【補曰】疏曰：

「此年與二十四年皆頻月日食，據今曆法，無頻食之理，但古或有之，故《漢書·高祖本紀》亦有頻食。」文烝案：《漢書·高帝紀》三年冬十月甲戌晦，日有食之，十一月癸卯晦，日有食之；《文帝紀》三年冬十月丁酉晦，日有食之；十一月丁卯晦，日有食之。《五行志》同。劉炫以來，疑此事者多矣。求諸日月交會之術，則自漢至今，諸曆家皆以百七十三日有奇爲限，必不得頻月食，若謂古篆隸之遞變，簡繅紙之迭代，傳寫致誤，則不應二十四年及漢初其誤不約而同，且古書何一非傳寫者，辭亦遁矣。若謂如陳侯鮑卒，一事兩日，而疑以《傳》疑，則又不類。夫甲戌己丑，史本從赴，日有食之，乃據所見，於《經》或可兩存，於史不容一誤，即或誤視氣珥，豈得遂筆諸書？又不應似食真食，頻月爲常，而襄公及漢初之史，同歸誤視，且古之治曆者，合朔之差，則由平朔，交食之道，無容不知，史必不以不食爲食，而君子脩《春秋》，既正其朔，亦必不於不食之食而不之正也。石介曰：「天道至遠，不可得知，後世執推步之術，案交會之度而求之難矣，予以斯言爲信。」○謂後月之食爲氣珥相侵，此王夫之說，猶金履祥以尹氏卒爲鄭尹氏。卓爾康謂桓公甲戌年正月己丑，史偶倒其文，皆穿鑿無稽之言也。

汪曰楨語予，日食於古爲災變，無推算之術，故有誤視者，愚以爲不然。《漢書·天文志》以日食爲大變，月食星逆爲小變，言曆紀推月食，與熒惑、太白之逆亡異，足知曆所可推者，不害其爲變也。《通典》載鄭小同議所稱《春秋》昭三十二年十二月辛亥朔日蝕，晉史墨以庚午之日始有謫，自庚午至辛亥四十二日，日蝕之兆形於前，此爲古有明法，是確據也。小同答以黃帝、顓頊、夏、殷、周、魯六曆皆無推日蝕法，但有考課疏密，是則沈約《宋曆志》所謂六家曆皆六國及秦時人所造，孔穎達《書正義》所謂古真曆遭戰國及秦而亡，六曆皆秦、漢之際假託者也。《曾子問》論諸侯旅見天子諸侯相見人門廢禮之事，日食居一，又有當祭而日食之文，是則劉、邵所謂聖人垂制，不爲變豫廢者也。《曾子問》又云「日有食之，不知其已之遲數」，又云「安知其不見星也」，是又聖人慎重之意，雖有其術而弗論，亦所謂知其不可知也。

### 曹伯來朝。

公會晉侯、齊侯、宋公、衛侯、鄭伯、曹伯、莒子、邾子于商任。商任，某地。【補曰】當云

「地闕」。《左傳》曰：「錮樂氏也。」

庚子，孔子生。【補曰】《左氏》無此文。今本《公

羊》多「十有一月」四字。唐石經以下皆然。據陸氏《音義》，知《公羊》亦無「十有一月」，其有者，乃別本之誤也。上有十月庚辰朔，則庚子者十月二十一日。疏曰：「《史記·世家》云襄公二十二年生者，馬遷之言與經典不同者非一也。」疏又以此文爲《傳》所錄，唐石經《穀梁》、《公羊》經傳不可分。段玉裁曰：「要爲作《傳》者所記非《經》語，馬端臨以爲《經》，非是。」文烝案：《傳》始本與《經》別行，豈得於「小大敵也」之下突接此句，不爲《傳》體而爲《經》體乎？又豈得無月有日乎？《公羊》之《傳》亦不得爾。此蓋弟子既受《經》於聖人，退而教授，附記於《經》，以標顯一家之制作。穀梁子作《傳》時，所據《經》已有此句。《公羊》之《經》，出於口授，即是此本，惟《左氏》別有傳授，故其《經》無此句，而獲麟後則有續經三年事也。續經終孔丘卒，稱名，恒稱也。此附記孔子生，稱子，貴稱也。凡王朝列國之臣，自列士大夫以上通以子爲貴稱，大夫以上又稱夫子，故《書·雜誥》曰「予以多子越御事」，《士相見禮》曰「某也夫子之賤私」，春秋列國所稱，見於內外傳，《論語》、《曲禮》、《檀弓》、《孟子》者，皆如此。而魯、衛、齊、晉、鄭之上下大夫，其生既以子連氏，其沒則多以子配氏謚。

【眉批】：「自樂共子、石祁子始見。」孔子以魯司寇而稱子，又稱夫子，猶此例也。孔門弟子面稱其師，或曰子，或曰夫子，其私論之或言自生民以來未有夫子，或言未有盛於孔子，其追記師言，或稱子，或稱孔子，皆從大夫之貴稱。此與《聘禮》之某子爲他國大夫之稱，《鄉飲禮》、《射禮》、《大射儀》之某子爲作酬及比耦之稱，《士相見禮》之某子爲述命之稱，《聘禮記》、《士昏禮》、《特牲禮》之某子爲告神之稱，并諸稱吾子稱子者，皆不同而同也。唯《論語》、《檀弓》稱二三子、稱三子者，本是君稱群臣、群臣相稱之辭，而師稱群弟子、平敵相稱，皆用之。【眉批】：「此與稱小子不同。」又陳亢於伯魚、子貢，桀溺於子路，子路於丈人，平敵皆面稱子，此等通學士以下並爲例之小變，於是七十子以來，學者所師，皆稱某子，學者亦稱某子。【眉批】：「如穀梁子、尸子、沈子皆是。」於是孟子以來，專以夫子爲尊敬之稱，而平敵以下面稱通曰子，幾與爾女無別，世遂以子爲男子之通稱，而馬融因誤注《論語》首句矣。○何休曰：「時歲在己卯。」徐彥曰：「何氏自有長曆，不得以《左氏》難之。」王引之曰：「何氏精於讖緯，讖緯多用殷曆甲寅元。漢世說《春秋》獲麟至漢興年數有謂二百七十五歲者，後漢虞恭等所謂歲在乙未，則漢興元年又上二百七十五歲，歲在庚申，則孔子獲麟

是也。有謂百六十二歲者，則後漢馮光、陳晃之說也。由虞恭等庚申之說上推之七十一歲，至襄二十一年，歲在己酉，據太初元年丙子，殷曆以爲甲寅，則庚申爲戊戌，己酉爲丁亥，與此注不合。由馮光、陳晃獲麟至漢興百六十二歲之說推之，漢興元年，《漢志》以爲甲午，殷曆爲壬申，上百六十二歲至獲麟，歲在壬子，爲庚寅。又上七十一歲至襄二十一年，歲在辛丑，則爲己卯，故此《注》曰歲在己卯也。」孔廣森曰：「周十月，夏八月，日在壽星之次，與斗柄同位。先儒言夫子生時，帝車南指，此日加午之驗也，於今祿命術得己卯、癸酉、庚子、壬午，應四極之位。」文彞謹案：《孟子》曰由文王至於孔子五百有餘歲，證以鄭君緯候之學，文王以西伯受命，入戊午部二十九年，其明年改元，數至魯惠公末年，三百六十歲，又加以隱元年，至此百七十一歲，則自文王受命至孔子生，凡五百三十一歲也。《左傳》稱禽父事康王，而《史記·魯世家》伯禽以下有年數，考公四年、煬公六年、幽公十四年、魏公五十年、厲公三十七年、獻公三十二年、真公三十年、武公九年、懿公九年、伯御十一年、孝公二十七年、惠公四十六年，《十二諸侯年表》起共和元年，以爲即真公之十五年，而武公凡十年，劉歆《三統曆》乃謂伯禽四十六年。成王元年命伯禽，至春秋三百



八十六年，其引《世家》，則煬公六十年、獻公五十年、武公二年，此張衡等所謂欲欲以合《春秋》，橫斷年數，損夏益周。考之《表》、《紀》，差謬數百者矣。

二十有二年春王正月，公至自會。【補曰】孔廣森曰：「月者，正月也。」

夏四月。

秋七月辛酉，叔老卒。

冬，公會晉侯、齊侯、宋公、衛侯、鄭伯、曹伯、莒子、邾子、滕子、薛伯、杞伯、小邾子于沙隨。【補曰】《左傳》曰：「復錮樂氏也。」時樂盈在齊。○【撰異曰】《左氏》無「滕子」。

公至自會。

楚殺其大夫公子追舒。

二十有三年春王二月癸酉朔，日有食之。

三月己巳，杞伯勾卒。

夏，邾畀我來奔。【補曰】賈逵、杜預以為庶其之黨。○【撰異曰】畀，《公羊》作「鼻」。案：《說文》：「鼻，引氣自畀也。從自畀。」

葬杞孝公。

陳殺其大夫慶虎及慶寅。稱國以殺，罪累上也。【補曰】重發《傳》者，無訟君之事，而亦有及文，嫌異故也。及慶寅，慶寅累也。【補曰】重發《傳》者，二慶同族，嫌又與箕鄭父異也。

陳侯之弟光自楚歸于陳。光反稱弟，言歸無罪明矣。【補曰】不言復者，弟者親貴之稱，苟有位，無絕理。

晉樂盈復入于晉，入于曲沃。曲沃，晉地。

【補曰】疏曰：「樂盈先入曲沃，後復入晉，故云復入也。後入曲沃，不云復入者，兵敗奔曲沃已有復入文，故直云入曲沃，不再言復入。」文烝案：《左傳》稱「樂盈帥曲沃之甲，因魏獻子以晝入絳」，《公羊》謂「樂盈將入晉，晉人不納，由乎曲沃而入」，此《疏》所據也。其實盈由曲沃入晉，《經》但記入晉耳，其先之人於曲沃，《經》所不論也。以復中國之辭

言之者，盈帥甲入絳，篡大夫位，與復其位者同，下殺著「弗有」之文，非晉復其位可知，故不嫌也。不言自楚自齊者，二國無奉，盈潛至，啖，趙是也。兵敗奔曲沃，直言人于曲沃，不言以叛者，亦以下殺著「弗有」之文，則叛可知。《春秋》謹嚴，語無贅設。何休曰：「篡大夫位例時。」

### 秋，齊侯伐衛，遂伐晉。

八月，叔孫豹帥師救晉，次于雍渝。雍渝，晉地。【補曰】月者，爲下卒日。○【撰異曰】陸渚《纂例》本作「雍俞」，云《左氏》作「榆」，《穀梁》作「渝」。案：今《公羊》亦作「渝」，《國語》亦同。或作「離俞」。言救後次，非救也。惡其不遂君命而專止次，故先通君命而後

言次，尊君抑臣之義。鄭嗣曰：「次，止也。凡先書救而後言次，皆非救也。僖元年，齊師、宋師、曹師次于聶北救邢，此師本欲止聶北，遙爲之援爾。隨其本意而書，故先言次而後言救。豹本受君命救晉，中道不能，故先言救而後言次。若鄭伯未見諸侯而曰如會，致其本意。【補曰】非救重發《傳》者，聶北先言次，此後言次，嫌異也。鄭嗣以聶北爲本欲遙爲之援，又以此文亦爲遂其意，皆非也。《公羊》曰：「曷爲先言救而後言次？先通君命也。」此解最明白。

此文本當從莊三年次郎、三十年次成之例，特以郎、成是君將，故直言次而不言救，明不得與聶北遂其意者同。此是臣將，臣受命救晉而不能救，不可以其不能救而廢所受之命，故先言救以明公命，後言次以明豹之不能救也。《傳》於聶北既言非救，又言遂齊侯之意，此直言非救，不言遂其意，明與《公羊》義同也。曹伯襄之言復，《傳》曰通王命，公孫敖之言如，言復，《傳》曰不廢君命、不專君命，公子遂之言復，《傳》曰不專公命，彼數《傳》屢言之，則此可知也。何休曰：「惡其不遂君命而專止次，故先通君命言救。」范注本之。救爲通君命，則次爲惡豹自明。

### 己卯，仲孫速卒。

冬十月乙亥，臧孫紇出奔邾。【補曰】紇，許

之子臧武仲。《左氏》二十二年《傳》「臧武仲如晉」，服虔曰：「武仲非卿，故不書。」然則書奔不必皆卿也，非卿書氏者，紇本有氏，而史書臧孫，非例所卒，則書氏無所嫌，故仍史文也。其日，正臧孫紇之出也。正其有罪。蘧伯玉曰：【補曰】蘧伯玉，衛大夫，名瑗，諡成子。當夫子脩《春秋》時，年近百歲，《論語》記其使人來。蔡邕所謂蘧瑗保生也。「不以道事其君者，其出乎？」必不

見容。【補曰】臧武仲不善處季孟之間，至於出奔，故伯玉爲推本之論，以爲武仲不能以道事君，斯其所以出乎。《左傳》載仲尼曰：「知之難也。有臧武仲之知，而不容於魯國，抑有由也。作不順而施不恕也。」夫子論其事，伯玉論其理，皆以武仲之知，一時推重，至目之爲聖人，故聖賢互有評論也。《論語》又曰：「臧武仲以防求爲後於魯，雖曰不要君，吾不信也。」則又論其奔後事也。或謂伯玉平日汎論不指武仲，如《禮器》引君子之人達耳，此殆不然。案：《論語》稱所謂大臣者，以道事君，不可則止，言止則有去國之義，故夫子嘗去魯矣，伯玉亦再從近關出矣。專之去則合乎《春秋》矣，出奔亦何害於道哉？

晉人殺欒盈。惡之，弗有也。不言殺其大夫，是不有之以爲大夫。【補曰】《經》惡之爲弗有辭也。稱人者，衆辭例。

齊侯襲莒。輕行掩其不備曰襲。【補曰】《左傳》

例，輕曰襲。《傳》稱齊侯還自晉不入，遂襲莒。孔穎達曰：「《經》不言遂者，間有他事故也。僖六年遂救許，二十八年遂圍許亦間有他事。而言遂者，公皆親在，事不待告，故遠承上事言遂。此書齊事，雖告稱遂襲莒，亦不可書遂，

爲間有數事，與前文隔絕故也。」文烝案：隔絕既多，又伐晉已言遂，不可復書遂也。

二十有四年春，叔孫豹如晉。

仲孫羯帥師侵齊。【補曰】羯，速之子孟孝伯。

○【撰異曰】羯，《公羊》作「偁」，又作「謁」，亦或作「羯」。後同。

夏，楚子伐吳。

秋七月甲子朔，日有食之，既。

齊崔杼帥師伐莒。

大水。【補曰】案：大水例時，此及上伐皆不蒙月

也。水災成於七月，故在七月下八月上，以此知夏秋書大水者，不必四月至六月、七月至九月矣。若大旱則必至六月、九月零不得雨而後書，與水異也。

八月癸巳朔，日有食之。

公會晉侯、宋公、衛侯、鄭伯、曹伯、莒子、邾子、滕子、薛伯、杞伯、小邾子于夷儀。

【補曰】夷儀，衛地。《左傳》曰：「將以伐齊，水，不克。」許

翰曰：「知水災非特魯也。」○【撰異曰】夷，《公羊》作「陳」。後同。徐彥曰：「《左氏》與《穀梁》作「夷儀」。」

冬，楚子、蔡侯、陳侯、許男伐鄭。

公至自會。

陳鍼宜咎出奔楚。○【撰異曰】鍼，《公羊》作「威」，亦或作「鍼」。唐石經作「鍼」。

叔孫豹如京師。【補曰】《左傳》曰：「齊人城郊。

穆叔如周聘，且賀城。」齊城郊者，《國語》云：「穀、雒鬪，將毀王宮。」是城之由也。蓋此年水患特甚。

大饑。【補曰】大饑，由七月大水。五穀不升

爲大饑，升，成也。【補曰】明此大饑之文與有年、大有年相反，即莊二十八年之大無麥禾也。彼有諱文耳。一穀

不升謂之嗛，嗛，不足貌。【補曰】《韓詩外傳》作「謙」，

《廣雅》作「歉」。《文選注》引劉兆注曰：「嗛，不足也。」二

穀不升謂之饑，三穀不升謂之饑，【補曰】《爾

雅》、《毛詩》傳並云：「穀不熟爲饑，蔬不熟爲饑。」蔬不熟者，既無穀又無蔬也。雖與此異，亦謂饑深於饑。四穀

不升謂之康，康，虛。【補曰】《廣雅》作「歉」，《韓詩外

傳》作「荒」。《爾雅》云「果不熟爲荒」，亦謂轉益深。《管子》有「比歲歉」、「比歲飢」、「比歲荒」之語。五穀不升

謂之大侵。侵，傷。【補曰】疏曰：「大侵者，大饑之異

名也。」文烝案：《傳》首一語，正解本文已足，復舉一穀以上，次第言之，嗛則《公羊》所云：「一災不書，以其不足書也。」饑與康甚於饑，而愈於大饑，《經》以饑包之，非不書也。《傳》以《經》書凶年之事終於此，故明其統例。何休云

「有死傷曰大饑，無死傷曰饑」，義得兼通。疏引徐邈云「有死者曰大饑，無死者曰大饑」，則不足據也。《墨子》「不升」並作「不收」，其名饑也，旱也，凶也，餓也，饑也，文更乖異。

旱不得爲一名，饑不得淺於饑。大侵之禮，【補曰】此下

於《經》外記舊典。君食不兼味，【補曰】君，謂天子諸

侯也。《曲禮》曰：「歲凶年穀不登，君膳不祭肺。」鄭君

曰：「禮：食殺牲則祭先，有虞氏以首，夏后氏以心，殷人以肝，周人以肺。不祭肺則不殺也。天子食日少牢，朔月大牢，諸侯食日特牲，朔月少牢。」《白虎通》曰：「一穀不升徹

鶉鷄，二穀不升徹鳧鴈，三穀不升徹雉兔，四穀不升損圉獸，五穀不升不備三牲。」臺榭不塗，塗，聖飾。【補曰】

《爾雅》：「閭者，謂之臺。」李巡曰：「積土爲之，有木者謂之

樹。」李曰臺上有屋，此樹與堂堦不同。《韓外傳》「塗」作「飾」。弛侯，弛，廢也。侯，射侯也。廢侯，不燕射。【補曰】疏曰：「注獨舉燕射，其實大射、賓射亦不行也。或以爲燕射一侯，禮最省，故舉之以明餘者亦不爲耳。」案：《韓外傳》無此句。廷道不除，廷內道路不脩除。【補曰】《韓外傳》「廷道」作「道路」。《曲禮》曰：「馳道不除。」鄭君曰：「除，治也。不治道爲妨民取蔬食也。」百官布而不制，官職脩列，不可闕廢，不更有造作。【補曰】《韓外傳》「布」作「補」。鬼神禱而不祀，《周書》曰：「大荒有禱無祀。」【補曰】《韓外傳》「祀」作「祠」。《曲禮》曰：「祭事不縣。」《雜記》孔子曰：「凶年祀以下牲。」此皆禱禮，通名爲祭祀耳。注所引《糴匡》文，「祀」今作「祭」。此大侵之禮也。【補曰】《毛詩傳》曰：「歲凶年穀不登則趣馬不秣，師氏弛其兵，馳道不除，祭祀不縣，膳夫徹膳，左右布而不脩，大夫不食粱，士飲酒不樂。」賈子曰：「歲凶穀不登，臺扉不塗，樹徹干侯，馬不食穀，馳道不除，食減膳，饗祭有闕。」二文與《傳》及《曲禮》、《韓詩外傳》皆略同。

二十有五年春，齊崔杼帥師伐我北鄙。

夏五月乙亥，齊崔杼弑其君光。【補曰】齊

莊公。莊公失言，淫于崔氏。放言將淫崔氏，爲此

見弑也。邵曰：「淫，過也。言莊公言語失漏，有過於崔

子，而崔子弑之，故《傳》載其致弑之由，以明崔杼之罪甚。」

【補曰】邵所云「有過」，猶言得罪也。案：《左傳》崔杼娶東

郭姜，莊公通焉，驟如崔氏，以崔子之冠賜人。曰：「不爲

崔子，其無冠乎？」注前說據通姜事，邵說據賜冠事，其實

當兼取爲說。失言於崔杼，一事也，淫通崔杼之妻，又一事

也，《傳》以莊之無道，《經》歷書之，惟此兩事，其惡未著，故

特發《傳》，成十七年論之詳矣。莊不從甚惡例稱國者，禍

不從殺大夫而起，非莒、吳、薛、夷狄小國，則治大夫者從詳。

公會晉侯、宋公、衛侯、鄭伯、曹伯、莒子、邾子、滕子、薛伯、杞伯、小邾子于夷儀。

【補曰】案：《左傳》曰：「伐齊，以報朝歌之役。齊人以莊公說，使隰鉏請成。慶封如師，男女以班。賂晉侯以宗器、樂器。晉侯許之。」此與文十五年盟扈相似，不從散辭之例略之者，初爲會時，但謀報怨，未聞弑君，事實與扈盟不同，故

從常文也。至於既聞弑後，不能討賊，晉與諸侯之罪固無可辭，但此等之義，文外自見，文中所未暇論。晉本非以討賊徵會，則無爲於會而譏之，故會夷儀以報怨，不譏不討。齊會澶淵以救災，不譏不討。蔡會郭以尋盟，不譏不討。莒皆以弑事與會事本不相涉，得與常會一例也。澶淵以善事而有變文加文，明其若非善事則與夷儀、郭同也。文十五年盟扈則本以討齊出，十七年會扈則定宋新君於伐後，其伐亦本以討宋出，故皆略之爲散辭。桓二年會稷則又直爲成宋亂出，故深誅其心，加言以成宋亂也。程端學嘗曰：「《春秋》者，即此事而論此事之義者也，未嘗因此事而論他事之善惡也。」此言大概是也。此不書伐齊者，杜預曰：「齊人逆服，兵不加。」杜是也。或又以言伐則嫌予晉討賊，故沒其文也。

六月壬子，鄭公孫舍之帥師入陳。

秋八月己巳，諸侯同盟于重丘。會夷儀之

諸侯也。重丘，齊地。【補曰】此本杜預。杜以爲齊亦同盟。孔穎達引二十八年《傳》齊陳文子曰：「重丘之盟，未可忘也。」文烝案：上既不言伐齊，則此并没之矣。

公至自會。

衛侯入于夷儀。夷儀，本邢地，衛滅邢而爲衛

邑。【補曰】此本杜預也。孔穎達曰：「邢還于夷儀，衛滅邢，還名夷儀。」文烝案：十六年以來書衛侯皆爲剽，此則衍也，從其故稱而書入，則無所嫌。不名者，後復歸名，故此略之。未得國都，故不言復也。此事蒙上月，與人櫟同。

楚屈建帥師滅舒鳩。【補曰】此在時例。徐取

舒、楚滅舒鄆、舒庸、舒鳩，皆偃姓夷國。

冬，鄭公孫夏帥師伐陳。【補曰】此亦一歲再

伐，與成三年伐許同。彼既狄之，故此從平文矣。若齊之侵伐我，則一從平文，內伐亦然。○【撰異曰】夏，《公羊》作「囂」。徐彥曰：「公孫囂云云，亦有一本作「公孫薑」字者。」

十有二月，吳子謁伐楚，門于巢，卒。【補

曰】吳諸樊也。○【撰異曰】謁，《左氏》作「遏」。徐彥《公羊疏》曰：「吳子遏者，亦有一本作「謁」字者。」以伐楚之事，門于巢卒也。所以攻巢之門者，爲其伐楚之事故也，然則伐楚經巢。【補曰】攻門曰門。于巢者，外乎楚也。若但言伐楚卒而不言于巢者，則卒在楚也，言于

巢則不在楚。門于巢，乃伐楚也。先攻巢，然後楚乃可得伐。【補曰】《疏》曰：「舊解，巢，楚竟上之小國，有表裏之援，故先攻之然後楚可得伐。或以爲楚邑，非也。徐邈亦云『巢，偃姓之國』是也。」文烝案：巢即文十二年楚所圍者。諸侯不生名，取卒之名加之伐楚之上者，見以伐楚卒也。【補曰】明由伐楚至死。其見以伐楚卒何也？據伐楚惡事，無緣致本意。【補曰】此非致其志，注非也。問此者，疑伐楚亦不至死。古者大國過小邑，【補曰】謂以師過狀，若侵伐者。小邑必飾城而請罪，禮也。飾城者，脩守備，請罪，問所以爲闕致師之意。【補曰】飾城請罪則無攻門之事。吳子謁伐楚，至巢，入其門，【補曰】《左傳》曰「門焉」，《公羊》曰「入門乎巢」，皆謂攻之。《公羊》又申之曰「入巢之門」，則謂攻人之，《傳》意亦同也。言巢不飾城請罪。門人射吳子，有矢創，反舍而卒。【補曰】舍，止息之處，是所謂以伐楚卒。蘇轍曰：「言卒不言滅者，死而非獲也。」即《左傳》杜預說。古者雖有文事，必有武備，【補曰】言古者諸侯相見，軍衛不徹，況以伐楚之

事，攻巢之門本非文事，可無備乎？君親爲飛矢所中，是其無備明矣。非巢之不飾城而請罪，非吳子之自輕也。非，責。【補曰】自輕，謂攻門無備也。《經》意責巢，尤責吳子。

二十有六年春王二月辛卯，衛甯喜弑其君剽。【補曰】《史記》謂之「殤公」，《漢書·古今人表》有「衛殤公森」。剽，森聲相近，作「森」者誤。此不正，【補曰】疏曰：「剽元年稱公孫，知不正。」其曰何也？殖也立之，喜也君之，正也。父立以爲君，則子宜君之，以明正也。【補曰】此解書「日」義，非解「君」字。里克殺卓亦曰「弑君」，明不必父之所立始當奉以爲君，但父立而奉爲君者，雖不正亦正，故不去日，別於凡弑不正者，君臣之義父子之道備矣。劉歆言微言大義，而程子曰：「《春秋》大義數十，炳如日星，乃易見也。唯其微辭隱義，時措從宜者，爲難知也。」今案：此條稱君爲大義，書日爲微文，下二條書叛爲大義，書日又爲微文，非《傳》何以知之？

衛孫林父入于戚以叛。【補曰】非自外人，無

所謂復也。以者，不以者也，義在昭二十一年《傳》。凡言叛者，皆據有邑土，猶後世之言反。孔穎達論之甚明。又與「潰」略同。《公羊》曰：「潰者何？下叛上也。國曰潰，邑曰叛。」是也。此處無《傳》。不言叛直叛者，非直叛也。《左傳》曰「以威如晉」，是以威出奔晉。胡銓曰：「書叛者，叛衍也。書弑君者，君剽也。《春秋》原情定罪，故兩君之也。」張自超曰：「書叛於剽甫弑衍未歸之間，則林父向日逐君之罪并著。」何休曰：「叛例時。」

甲午，衛侯衍復歸于衛。○【撰異曰】衍，本

亦作「衍」。日歸，見知弑也。書喜弑君，衍可言歸，衍實與弑，故錄日以見之。書日所以知其與弑者，言辛卯弑君，甲午便歸，是待弑而入，故得速也。【補曰】王符《潛夫論》曰：「《春秋》之義，責知誅率。」此類是也。此《傳》及上《傳》專發日義，聖門相承說也。舊史大國君奔歸人者皆書日，《左氏》載續經「哀十六年春王正月己卯，衛世子蒯聵自戚入于衛」亦其類也。疏曰：「《傳》例歸為善，復歸則居其兩端，今喜既弑君，衍可言歸，但以與弑，故從平文云復歸。書名，因以見惡耳。不言人，以明歸罪於甯喜也。」文烝案：《左傳》曰「甲午，衛侯入」，疑舊史本言「人」，《春

秋》改言「復歸」者，與突歸于鄭同義。歸者易辭，彼則祭仲易其事，此則甯喜易其事也。但突歸之非善辭易明，衛侯衍之復歸則嫌與善辭相亂，無以見其知弑，故與出奔皆仍史文，存日所以明其非善也。彼言歸而此言復歸者，突本未有國，衛侯則舊有國也。書衍者，失國常文也。疏多誤解，引善辭之例是一誤，謂復歸小劣於歸，乃同《公羊》，是二誤，專以書名為見惡，而不知謹日為正義，違戾本《傳》，是三誤。

夏，晉侯使荀吳來聘。

公會晉人、鄭良霄、宋人、曹人于澶淵。

【補曰】依《左傳》，晉人者，趙武也。宋人者，向戌也。公不會大夫，《經》例宜稱人以會，鄭良霄獨仍舊史稱名氏者，明欲為異文特顯之。序向戌上者，蓋時以其先至於會，進班在上，《左傳》以為向戌後至也。又或謂宋人非卿，非卿故稱人，序鄭下，此說與蜀盟齊人同，亦可通也。不致者，時晉助孫氏以討衛，本是惡事，又外皆無君，故沒至文，與翟泉、蜀之盟同。

秋，宋公殺其世子座。○【撰異曰】座，《左

氏》、《公羊》作「痤」。程端學曰：「《公羊》作「座」。案：今



《公羊》不作「座」。呂本中曰：「《穀》作「座」，程蓋誤。」

**晉人執衛甯喜。**【補曰】《左傳》曰：「於是衛侯會之，晉人執甯喜，北宮遺，使女齊以先歸。」《公羊》曰：「不以其罪執之。」

**八月壬午，許男甯卒于楚。**宣九年九月辛

酉，晉侯黑臀卒于扈，《傳》曰「其日，未踰竟也」。此乃在楚，何以日邪？隱三年八月庚辰，宋公和卒，《傳》曰「日卒，正也」。許男卒于楚，則在外已顯，日卒，明其正。【補曰】此因朝于楚而卒也。疏曰：「案：《薄氏駁》云，此自發例於大國，不關於小國，其小國或詳或略，許男書日，未必正也。范答云，《春秋》稱世子，固有非正，周之襄王、晉之恭子、曹伯射姑亦是其例。纓且之卒，連於日食之下，何以知其不日？然則范之此答，據何文得知？又周之襄王與恭子何以爲別？又薄氏之《駁》，不問射姑，而范答探意太過者，案《左氏》，襄王是惠后之子，明襄王是嫡也，故文八年書八月戊申天王崩。恭世子是獻公烝父妾而生，僖五年被殺不日，故知雖世子仍非嫡也。薄氏之意，見射姑稱世子而卒不書日，故《駁》云「發例於大國」，小國自從詳略，故范以射姑非正答之。據陳侯款，僖七年寧母之會亦言世

子，至僖二十八年書卒之上亦不日，明稱世子亦有非正也。捷菑既貶則纓且是正，故知纓且之卒蒙上日食之文可知。襄王正，恭子不正，而亦引以爲例者，欲明襄王正而稱世子，申生不正亦稱世子，據此言之，明有不正而稱世子者。」文烝案：申生、款稱世子，皆正也，申生自在殺例，款當在惡之之例，惟射姑似非正。

**冬，楚子、蔡侯、陳侯伐鄭。**

**葬許靈公。**

二十有七年春，齊侯使慶封來聘。

**夏，叔孫豹會晉趙武、楚屈建、蔡公孫歸生、衛石惡、陳孔奐、鄭良霄、許人、曹人于宋。**【補曰】晉、楚弭兵，會盟之善者，義在後《傳》。杜預

曰：「案《傳》會者十四國，齊、秦不交相見，邾、滕爲私屬，皆不與盟。宋爲主人，地於宋，則與盟可知，故《經》唯序九國大夫。楚先晉敵，而書先晉，貴信也。陳於晉會，常在衛上，孔奐非上卿，故在石惡下。」孔穎達曰：「爲盟而爲此會，故不盟者會亦不序。」文烝案：晉先楚者，史文之常，不

論其信否，君子仍史之舊。○【撰異曰】免，《公羊》作「環」。

衛殺其大夫甯喜。稱國以殺，罪累上也。【補曰】重發《傳》者，與里克同，與元咺、陽處父等不同，將發其義，故備其文。

甯喜弑君，其以累上之辭言之何也？嘗爲大夫，與之涉公事矣。

鄭嗣曰：「若獻公以喜有弑君之罪而殺之，則不宜既人以爲大夫而復殺之，明以他故。」【補曰】疏曰：「徐邈云：『涉，猶歷也。』」文烝案：公事，公家事也。此亦所謂殺之不以其罪。甯喜由君弑君，而不以弑君之罪罪之者，惡獻公也。獻公即衍也。鄭嗣曰：「書甯喜弑其君，則喜之罪不嫌不明，今若不言喜之無罪而死，則獻公之惡不彰。」【補曰】由君弑君，謂由衍弑剽。

衛侯之弟專出奔晉。○【撰異曰】專，《左氏》

《公羊》作「鱄」。專，喜之徒也。專之爲喜之徒何也？己雖急納其兄，與人之臣謀弑其君，是亦弑君者也。【補曰】故曰喜之徒。專其曰弟何也？據稱弟，則無罪。專有是信者，【補曰】言專之奔，乃有信者也，故稱弟。君賂不入乎喜而殺

喜，是君不直乎喜也，故出奔晉，言君本使專與喜爲約納君，許以寵賂，今反殺之，獻公使專失信，故稱弟見獻公之惡也。【補曰】直，亦信也。古書於尾生直躬，或稱直，或稱信，是信、直同義也。專承君命，以賂約喜，君賂不入而反殺之，是君使專失信乎喜，故出奔晉也。三句申上專有是信之意，范注末二句似是而非。織絢邯鄲，

【補曰】邯鄲，晉地。疏引麋信云：「絢者，著屨爲之頭，即《儀禮》『絢纁純』是也。」文烝案：鄭君曰：「絢之言拘也，以爲行戒，狀如刀衣鼻，在屨頭。」郝懿行曰：「織絲爲之。」終身不言衛。恥失信。【補曰】二句并言其奔後事以足文意。專之去，合乎《春秋》。何休曰：「甯喜本弑君之家，獻公過而殺之，小負也。專以君之小負自絕，非大義也，何以合乎《春秋》？」鄭君釋之曰：「甯喜雖弑君之家，本專與約納獻公爾，公由喜得人，已與喜以君臣從事矣。《春秋》撥亂重盟約，今獻公背之而殺忠于己者，是獻公惡而難親也。獻公既惡而難親，專又與喜爲黨，懼禍將及，君子見幾而作，不俟終日。微子去紂，孔子以爲三仁，專之去衛，其心若此，合于《春秋》，不亦宜乎？」【補曰】案：上言專以守信而奔，故得稱弟，正解《經》文已畢。此又言其去

國之深得事宜，合乎《春秋》之義也。專雖守信，終為喜徒，嫌其雖著弟文，不得以去為善，故明專之去實是善也。但較叔肸則不如之，故一兼稱字，一直稱名，一云取貴，一云合也。鄭君比之微子，李廉以為過美，而其說大概近是。宣十七年疏云「專之去，使君無殺臣之惡，兄無害弟之愆」，斯言不易矣。陳光出奔，《傳》曰：「其弟云者，親之也。親而奔之，惡也。」此不言者，言專有信，言專合乎《春秋》，則舉親以惡衛侯可知。上《傳》已云惡獻公，故此不言也。

### 秋七月辛巳，豹及諸侯之大夫盟于宋。

【補曰】《左傳》曰：「盟于宋西門之外。」溴梁之會，諸侯在而不曰諸侯之大夫，大夫不臣也，晉趙武恥之。【補曰】疏曰：「趙武恥大夫不臣。」豹云者，恭也。不舉氏姓。【補曰】從大夫書至，由上見挈之例，明其恭於君。諸侯不在而曰諸侯之大夫，大夫臣也，【補曰】若不欲為大夫臣之辭，則當不言諸侯而不出豹。凡《春秋》之義，多以兩文相對而見，《傳》合溴梁言之，特顯此意。其臣恭也，【補曰】當云「臣且恭」，省一「且」字耳。溴梁不臣，不復論其恭不恭。晉趙武為之

會也。【補曰】之會，是會也。是會主於弭兵，趙武實倡其議，臣恭之美，職是之故，觀後會澶淵《傳》，見此《傳》言外不盡之意。朱子之說《大學》，所謂「咏歎淫液，其味深長」者也。案：《左傳》宋向戌欲弭諸侯之兵以為名，而前二十五年趙文子語穆叔先有此意，足與傳相證也。葉夢得謂《穀梁》知其義而不知其事，未為善讀《傳》者。又謂《左氏》得其事而不盡其義，《公羊》既不知事，又不知義，則皆信也。趙鵬飛曰：「夷夏交歡，諸侯用寧，其功大矣，不可謂權出大夫而卑之也。權正不並用，仁義不兩立。權足以濟時，君子捨其正，仁足以安天下，君子不責其義。」文烝案：書及者，以內及外之文。不嫌是內為志者，上言會，明晉為主可知。○《國語》曰：「是行也，以藩為軍，攀輦即利而舍，候遮扞衛不行。」韋昭曰：「藩，籬落也。言不設壘壁。攀，引也。輦，輦車也。即，就也。言人引車就水草便利之地而舍之。候，候望。遮，遮罔。晝則候遮，夜則扞衛。扞衛謂羅闐，①狗附也。張羅闐，去壘五十步而陳，周軍之前後左右，彊弩注矢以誰何，謂之羅闐。又二十人為

①「扞衛」，原脫，據《四部叢刊》影印明刻公序本《國語·晉語八》韋昭注補。

曹輩，去壘三百步，畜犬其中，或視前後，或視左右，<sup>①</sup>謂之狗附。皆昏而設，明而罷。候遮二十人居狗附處，以視聽候望，明而設，昏而罷。不行者，不設之。」文烝案：《晉語》記此，以明晉之有信，楚不敢謀，蓋亦齊桓不以兵車之意，又可見他會盟之大概。

冬十有二月乙亥朔，日有食之。

二十有八年春，無冰。【補曰】何休曰：「豹、

羯爲政之所致。」

夏，衛石惡出奔晉。

邾子來朝。

秋八月，大雩。

仲孫羯如晉。

冬，齊慶封來奔。

十有一月，公如楚。【補曰】何休曰：「如楚皆月者，危公朝夷狄也。」

十有二月甲寅，天王崩。靈王。【補曰】《史

記》名泄心。簡王子。泄，蓋當作「世」，故《國語》注作「大

心」，猶「樂大心」作「樂世心」，彼「世」亦或作「泄」也。案：《左傳》記葬靈王在「公至」後，《傳》言「鄭上卿有事，使印段如周」，又昭三十年《傳》鄭游吉對晉人曰：「靈王之喪，我先君簡公在楚，我先大夫印段實往，敝邑之少卿也。」是時鄭有卿往會葬，則魯亦必有會者，魯既會葬，則知《傳》及《公羊》謂以不志葬爲正者信矣。公孫敖弔喪，若不奔莒，或當不書。《毛詩序》稱季孫行父請命于周在僖公時，《左傳》成二年稱臧宣叔如晉乞師，而《經》無行父如京師，許如晉之文，似卿出竟亦或有不書者，以此知平、桓、惠、定、靈五王之葬，雖有卿往，亦不得以不書爲疑也。至五王之獨得以不志葬示義者，《傳》無明文，以其時考之，平、桓之崩則春秋之初也，惠之崩則齊霸之盛也，定之崩則春秋之中也，靈之崩則夷夏之弭兵也，不志葬之義，獨在五王，其以此歟？

乙未，楚子昭卒。【補曰】楚康王也。《史記》、

《論衡》康王名作「招」字。何休曰：「乙未與甲寅相去四十二日，蓋閏月也。」文烝案：「下年五月有庚午，《左傳》有二

①「或視」二字，據《四部叢刊》本《國語·晉語八》「韋昭注補」。

月癸卯，若此有閏則不得合，故陳厚耀、顧棟高皆疑之，今姑從何氏。

## 二十有九年春王正月，公在楚。閔公

也。閔公爲楚所制，故存錄。【補曰】《傳例》曰：「存公故也，在昭三十年《傳》。」《公羊》曰：「正月以存君也。」何休曰：「正月歲終而復始，臣子喜其君父與歲終而復始，執贊存之，故言在。在晉不書，在楚書者，惡襄公久在夷狄，爲臣子危錄之。」疏以爲成、襄、昭適晉並踰年，不言在，親倚之情，比之國內。孫復曰：「公在中國猶可，在夷狄則甚矣。」文烝案：《左傳》公於是有親禴之事，四月又有送葬之事，陳侯、鄭伯、許男皆與焉。

## 夏五月，公至自楚。【補曰】案：至自楚亦皆

月，亦危之，又皆危其久，此往月致月有懼之例。喜之也。凱曰：「遠之蠻國，喜得全歸。」致君者，殆其往而喜其反，殆，危。此致君之意義也。【補曰】疏曰：「於此發之者，以公遠之荆蠻，故《傳》特發之，明中國亦同也。」

## 庚午，衛侯衎卒。

閻弑吳子餘祭。【補曰】即戴吳也。不日者，卒

例也。吳與莒弑各二，皆不日，其例皆同。○【撰異曰】弑，

《左氏音義》作「殺」，申志反。閻，門者也，寺人也。

【補曰】門者，守門者也。《易·說卦傳》曰：「艮爲闔寺。」

疏曰：「以主門晨昏開閉謂之閻，以是奄豎之屬，故又謂之寺人也。」文烝案：《祭統》曰：「閻者，守門之賤者也，古者

不使刑人守門。」鄭君曰：「古者，謂夏、殷時，明周制守門

以刑人。」《音義》曰：「寺，本又作『侍』。」不稱名姓，閻

不得齊於人。【補曰】疏曰：「人稟二儀之氣，須五常之

性備然後爲人，閻者虧形絕嗣，無陰陽之會，故不復齊於人

也。」不稱其君，閻不得君其君也。【補曰】何休

曰：「不言其君者，公家不畜，士庶不友，放之遠地，欲去聽

所之，故不繫國。不繫國，故不言其君。」禮：君不使

無恥，無恥，不知臧否。不近刑人，【補曰】《公羊》同。

《曲禮》曰：「刑人不在君側。」不狎敵，不邇怨，【補曰】

疏曰：「言爲人君之道，外不得狎敵，內不得近怨，何者？

吳謁以狎敵蒙禍，餘祭以邇怨害身，故不可狎敵邇怨也。」

文烝案：《傳》意重在不近刑人，不邇怨。賤人非所貴也，【補曰】疏曰：「卑賤之人無高德者，不可猝貴。」貴人非所刑也，【補曰】《曲禮》曰：「刑不上大夫。」鄭君曰：「不與賢者犯法，其犯法則在八議，輕重不在刑書。」刑人非所近也。【補曰】《公羊》曰：「近刑人則輕死之道。」鄭君《曲禮》注曰：「爲怨恨爲害也。」舉至賤而加之吳子，吳子近刑人也。【補曰】疏曰：「謂《經》舉而加之，譏其近刑人也。」文烝案：不近則何由得弑，故知吳子近之。劉賁對策曰：「《春秋》譏其疏遠賢士，昵近刑人是也。」閻弑吳子餘祭，仇之也。怨仇餘祭，故弑之。【補曰】疏曰：「范以國君不仇匹夫，犯罪則誅之，故知是閻怨。」文烝案：此言吳子邇怨也，近刑人與邇怨一也。

仲孫羯會晉荀盈、齊高止、宋華定、衛世叔儀、鄭公孫段、曹人、莒人、邾人、滕人、薛人、小邾人城杞。【補曰】據《左傳》公孫段於良霄死後乃命爲卿，此不言鄭人，又不直言鄭段，明是特顯之。杜預曰：「蓋以攝卿行。」或未然也。昭元年《左傳》言「城渚于」，明非緣陵故都，蓋遷而後城之，故直言城杞也。不言

遷者，略之也。杜預謂渚于本州國都，州公亡國，杞并之。○【撰異曰】儀，《公羊》作「齊」。徐彥曰：「《左氏》經作「大叔儀」。段玉裁曰：「今《左經》作「世叔儀」。昭三十二年有「世叔申」，哀十一年有「世叔齊」，則此作「世叔」無疑，《左傳》乃皆作「大叔」耳。齊者，儀之曾孫，申之子，《公羊》誤也。《左氏》無邾人。古者天子封諸侯，其地足

以容其民，【補曰】地，謂四竟之內。《王制》曰：「量地以制邑，度地以居民，地邑民居必參相得也。」鄭君曰：「得，猶足也。」其民足以滿城，【補曰】城，謂都城，始封必城其國都。以自守也。【補曰】言守，明宜稍稍補完之。杞危而不能自守，【補曰】謂時遷國渚于，脩其城而有所益，亦自守之事，杞不能也。故諸侯之大夫相帥以城之，此變之正也。諸侯微弱，政由大夫，大夫能同恤災危，故曰變之正。【補曰】盟首戴時，政在諸侯，故變之正指諸侯。城杞時，政在大夫，故變之正又指大夫。觀《傳》所言，知《春秋》之義，因時而殊矣。《左傳》曰：「晉平公，杞出也，故治杞。」

晉侯使士鞅來聘。

杞子來盟。杞復稱子，蓋時王所黜。

吳子使札來聘。杜預曰：「吳子：餘祭。既遣

札聘上國而後死。札以六月到魯，未聞喪也。不稱公子，其禮未同於上國。」【補曰】杜以爲不蒙上月，據《左傳》閻弑在五月，城杞在六月也，然則聘例書時明矣。高澍然申杜曰：「書來，據已至魯言：書使，據在彼國言也。」賈逵、服虔皆以爲夷末新即位，使來通聘，與杜異。杜謂「禮未同上國」，故不稱公子，非也。此與楚蒍、秦術並是夷狄，得有大夫之文，非有異例。《傳》所云「成尊於上也」，稱吳子與楚、秦義異，稱札與楚、秦義同。吳其稱子何也？善使延陵季子，故進之也。【補曰】《檀弓》孔子曰：

「延陵季子，吳之習於禮者也。」吳所使得其人，故進稱子。家鉉翁曰：「荆人來聘，楚人使宜申來獻捷，《春秋》皆從君臣同辭之例，久而後書。楚子使蒍，君臣俱見，今吳使始至，書君書大夫，爲其能使賢，故貴之。」家氏說是。此聘與荆人文相當，若非善其所使，當書吳人來聘也。秦伯使術，楚子使蒍，不爲善所使者，秦稱伯，自是常文，楚於文公時本進稱子，故與此異也。如《傳》說，吳子即實夷末，此子必非喪稱，當與齊頃公同例矣。札者，壽夢之少子，其長子諸

樊，次戴吳，次句餘，次札，故曰季子。謂之延陵季子者，《公羊》以爲季子讓國於闔廬，去之延陵。《史記》曰：「季札封於延陵，故號曰延陵季子。」《左傳》載札讓國事在諸樊時，稱之爲延州來季子，鄭君以爲延陵即延州來。服虔以爲延者，延陵；州來，邑名。季子讓王位，居延陵爲大夫，食邑州來。杜預曰：「延州來，季札邑。」又曰：「本封延陵，後復封州來。」《釋例》又以「延州來」三字共爲一邑，不知其處。司馬貞疑《釋例》誤也。身賢，賢也，使賢，亦賢也。【補曰】能使賢則亦賢矣，故有可進之理，所謂欲

知其君，視其所使。延陵季子之賢，尊君也。以季

札之賢，吳子得進稱子，是尊君也。【補曰】又緣札之賢，有尊君之心，故如其意而進稱子，此別爲一義。其名，成

尊於上也。《春秋》賢者不名，而札名者，許夷狄不一而

足，唯成吳之尊稱，直稱吳，則不得有大夫。【補曰】疏曰：

「上，謂君上。」文烝案：《傳》言略名札者，爲欲成吳子之尊稱，略名之，取足稱使耳。札自從蒍、術之例，無爲再進稱氏也。范用《公羊》，未得其解。○《公羊》謂季子讓國，故賢之，獨孤及譏其以讓階禍。劉絢、胡安國、張洽遂謂《春秋》貶之，皆非《經》義。

秋七月，葬衛獻公。【補曰】不如成公去葬者，

剽弑而入，前有明文故。○【撰異曰】《左氏》、《公羊》作「秋九月」。

齊高止出奔北燕。其曰北燕，從史文

也。南燕，姁姓，在鄭、衛之間。北燕，姬姓，在晉之北，史

曰北燕，據時然，故不改也。《傳》所言解，時但有言燕者。

【補曰】疏曰：「《傳》言從史文者，明時有直言燕者，而仲尼從史文也。」文系案：《經》例國名皆從主人，此書齊事，則

齊爲主人，但當時齊之稱燕，實直稱燕，不稱北燕，《經》以

北燕書，不在名從主人之例，乃在從史文之例，故《傳》特明

之也。史所以書北燕者，蓋別於南燕之直言燕，或以詳錄

加「北」，無義例。《左氏》載續經「哀十五年，齊高無丕出奔

北燕」，是北燕從史文之證也。名從主人，亦是史文，既有

從主人之義，不須言從史文，故於不從主人者言之也。《孟

子》論《春秋》曰「其文則史」，《傳》曰「從史文」，語意相似，

明穀梁子與孟子其學同出聖門也。《傳》之釋《經》，皆直述

所受於師語，北燕從史文，聖門相承之說如此。《公羊》經

師，習聞其說，而不得其解，遂於齊高偃納北燕伯之《傳》謬

爲怪說，以附合夫子信史之言，此其展轉失真，最爲乖刺，

而劉知幾遂肆筆議《經》矣。

冬，仲孫羯如晉。

三十年春王正月，楚子使薳罷來聘。聘

例時，此聘月之何也？泰曰：「桓二年，宋督弑其君與夷，

《傳》曰書王以「正與夷之卒」，然則義有所明，皆須王以正

之。書王必上繫於春，下統于月，此書王，以治蔡般弑父之

罪爾，非以錄遠罷之聘。【補曰】泰說稱王最得之，以弑與

夷爲比則小誤也。稱王治魯桓，足知諸弑君者並準此義，

無須一一備文。與夷之弑，特以其爲春月第一事故耳。至

於弑父自立，尤爲莫大之變，應須復顯王文，故特存王月於

聘，以表斯旨。《孟子》曰：「世衰道微，子弑其父者有之，

《春秋》天子之事，成《春秋》而賊子懼，此之謂也。」因此又

知舊史於諸聘或皆具月矣。楚商臣弑父，其年本有王月，

許止書弑，而無王月，明其實不弑，所以別之。○【撰異曰】

罷，《公羊》作「頗」，一作「跛」。後同。

夏四月，蔡世子般弑其君固。【補曰】固之

被弑，爲其淫而不父。○【撰異曰】般，本或作「班」，《左氏》

亦同。其不日，子奪父政，是謂夷之。比之夷



狄，故不日也。丁未，楚世子商臣弑其君，《傳》曰「日髡之卒」，所以謹商臣之弑也。楚公子比弑其君，《傳》曰「不日」，比不弑，般弑不日，而曰夷之何也？徐乾曰：「凡中國君正卒，皆書日以錄之，夷狄君卒，皆不日以略之，所以別中國與夷狄。夷狄弑君而日者，閔其爲惡之甚，謹而錄之。中國君卒例日，不以弑與不弑也。至于卒而不日者，乃所以略之，與夷狄同例。」補曰「夷之」者，《孟子》稱「父子相夷」，趙岐注載一說釋爲夷狄，是當時常語也。疏引鄭君《釋廢疾》曰：「商臣弑父，日之，嫌夷狄無禮，罪輕也。今蔡中國而又弑父，故不日之，若夷狄不足責然。」《公羊》云「若不疾，乃疾之」，推以況此，則無怪然。」文烝案：鄭說即徐注所本，於理可通。今思之，楚世子商臣與公子比兩文相對爲義，商臣弑日則爲謹之，比弑不日則不弑也。蔡世子般與許世子止兩文相對爲義，般弑不日則爲夷之，止弑日則不弑也，其義互相易。

### 五月甲午，宋災。伯姬卒。【補曰】此災董

仲舒、何休以爲伯姬守節憂傷之所生。案：齊災以甚志則書大災。《左傳》曰：「宋大災。」《經》不書大者，下有伯姬卒，則大可知，故省文也。服虔曰：「不書大，非災大及人，伯姬坐而待之耳。」非也。○【撰異曰】《左氏》作「宋伯姬」。

陸渚曰：「衍文也。」取卒之日加之災上者，見以災卒也。【補曰】明死災也。疏曰：「外災例時，今因伯姬災卒，進日在上。」其見以災卒奈何？【補曰】疑君母不宜死災。伯姬之舍失火，【補曰】夜失火。左右曰：「夫人少辟火乎？」伯姬曰：「婦人之義，傅母不在，宵不下堂。」宵，夜。【補曰】傅母，蓋所以傳相其德行。《漢書音義》曰：「婦人年五十無子者爲傅。」左右又曰：「夫人少辟火乎？」【補曰】固請。

伯姬曰：「婦人之義，保母不在，宵不下堂。」

【補曰】保母，蓋所以保安其身體。古者后夫人有傅姆，則保母即姆也。鄭君《昏禮》注曰：「姆者，婦人年五十無子，出而不復嫁，能以婦道教人者也。」案：傅母、保母，皆女未嫁時所置，女嫁隨女同行。伯姬時年六十左右，傅母、保母當已九十多，皆未必存。何休說《公羊》「婦人夜出」句爲有事宗廟，亦與避火無涉，然則伯姬言此者，蓋自以身爲寡婦，昏夜之時，不欲下堂出門，又不欲明言其故，因時傅母、保母皆已前沒，故假廟中之禮以拒左右。推其心，則胡瑗、孫覺謂之婦人之伯夷，劉敞以爲求仁得仁者也。論其理，

則即程子所謂餓死事極小，失節事極大者也。《左傳》說此事以爲待姆，《公羊》以爲傳至母未至，當皆傳聞之誤，所謂道聽塗說者歟？《公羊》之「傳」即傳母也，《公羊》之「母」即《左傳》「姆」字，即保母也。何休注誤。遂逮乎火而死。

【補曰】卒不下堂也，是所謂以災卒。婦人以貞爲行者也，【補曰】劉向《列女傳·宋鮑女宗》曰：「婦人以專一爲貞。」班昭《女誡》引《女憲》曰：「得意一人，是謂永畢；失意一人，是謂永訖。」伯姬之婦道盡矣。【補

曰】疏曰：「共公卒雖日久，伯姬能守夫在之貞，故曰婦道盡。」文烝案：伯姬遇災，猶能守義，平時有貞行可知矣。行貞則婦道盡。○予妻沈印齡論此《傳》曰：「婦人雖無外事，然亦有百行，雖有百行，而貞爲之本，故《列女傳》有《母儀》、《賢明》、《仁智》、《貞順》、《節義》、《辯通》六目，而道則盡於貞矣。以敬姜之賢也，聖人直曰季氏之婦不淫矣，亦此義也。」予甚善是言，謂能通《穀梁》、《國語》、《列女傳》、《詩箋》之意。夫自劉向作《傳》，孽壁外分六目，後漢書

因有《列女》之篇，其《序》云「但搜次才行尤高秀者，不必專在一操」，史體固應爾，要其立言爲有弊矣。詳其事，賢伯姬也。【補曰】詳者，謂以卒日加災上也，賢其死正以

賢其平時。孫覺曰：「伯夷之賢不見稱於孔子，則西山之餓夫耳，共姬之行不見列於《春秋》，則宋國之愚婦耳；爲伯夷、共姬，又何恨哉？亦信其志而已矣。」

天王殺其弟佖夫。【補曰】王弟亦王子，故名也，爲大夫則字，王季子是也。大夫雖殺亦字，召伯、毛伯是也。○【撰異曰】佖，《公羊》作「年」。案：「年」與「佖」聲近。佖，仁聲。季，从禾千聲。《說文》「仁」古文作「忝」，亦千聲。千，古讀若「仁」也。又《說文》「郛」讀若「寧」。傳

曰：諸侯且不首惡，況於天子乎？【補曰】首惡，猶主惡，謂目君也，諸侯猶不爲首惡之文，況在天子？《曲禮》曰「君子不親惡」，蓋亦此意。疏曰：「嫌天子之殺弟異於諸侯，故以輕沉重，舉重以明輕，是輕重之道並見矣。」君無忍親之義，天子諸侯所親者，唯長子母弟耳。【補曰】君兼天子，諸侯言之，天子、諸侯皆無忍

於其親之義而親之。專以今王今公錄者，獨此二人，何得無罪見殺乎？僖五年何休注曰：「《春秋》公子貫於先君，唯世子與母弟以今君錄，親親也。」何不論王子、王世子、王母弟者，何注宣十年、十五年以爲天子不言子弟故也。準諸此《傳》，則天子、諸侯皆同。天王殺其弟佖夫，甚

春秋襄公經傳第八補注第二十

之也。【補曰】甚之者，甚其忍親，故直稱天王以首惡。

王子瑕奔晉。不言出，周無外。【補曰】此本杜

預，即《傳》例所謂周有人無出。上下既一見出文，以後皆從正例。

秋七月，叔弓如宋。【補曰】叔弓，叔老子子

叔，敬叔，亦稱敬子。月者，爲葬。

葬共姬。共姬從夫之謚。【補曰】此本杜預。杜

又曰：「卿共葬事，禮過厚。」「傷伯姬之遇災，故使卿共葬。」鄭君說《左傳》曰：「夫人之喪，士弔下大夫會葬，禮之正。」鄭意此是古制，晉文、襄之霸，因而不改也。內君夫人葬例日，外諸侯葬以時爲正，以此差之，則內女爲外夫人書葬者宜以月爲正。恩錄之文，輕重不爽。○【撰異曰】「葬」下當有「宋」字，此脫也。《左氏》、《公羊》皆有「宋」字。外

夫人不書葬，此其言葬何也？吾女也，卒災，故隱而葬之也。【補曰】失國卒災，《傳》各備文

者，月卒日葬，日卒月葬，事情各異也。《春秋》於宋共姬盡其事者五，詳其事者二，特崇之者一，隱之者一，一人之身，錄之甚悉，《經》辭之繁而不殺無若此者，良以家人之義，利

在女貞，夫婦之道，人倫所始，深著其賢，爲後世勸也。

《詩》始《周南》、《召南》，《春秋》錄伯姬，其意不異。

鄭良霄出奔許。自許入于鄭。【補曰】不

復出鄭良霄者，略之。良霄亦篡大夫位。不言復入者，初奔位未絕。

鄭人殺良霄。【補曰】趙汭曰：「獲麟後史書陳

宗豎自楚復入于陳，陳人殺之。不言殺宗豎者，省文也。鄭良霄事與陳宗豎同，而《經》書曰「鄭良霄出奔許，自許入于鄭，鄭人殺良霄」，文不省者，以大夫自外入國，與國人討而殺之各是一義，於《經》不得相蒙也。」劉侍讀嘗發此義，計夫子改正舊史若此者多。不言大夫，惡之也。【補曰】疏曰：「樂盈已發《傳》，重發之者，嫌與復人異故也。」

冬十月，葬蔡景公。不日卒而月葬，不葬者也。【補曰】案：中國諸侯若本非正嗣，而其葬有

故，則亦不日卒而月葬矣。今云不日卒而月葬，是不葬者，《傳》專對許悼公爲說也。許悼日卒而時葬，明其本非弑，當書葬者也。蔡景不日卒而月葬，明其實是弑，所謂君弑賊不討不書葬者也。不得以他卒葬常例爲疑。卒而葬

之，不忍使父失民於子也。鄭嗣曰：「夫葬者，臣子之事也，景公無子，不可謂無民，無民則景公有失於民，有民則罪歸於子，若不書葬，則嫌亦失民，故曰不忍使父失民於子。」【補曰】《春秋》變史例而又自變其例者，皆義之精也，於魯閔之不葬、蔡景之葬見之。

晉人、齊人、宋人、衛人、鄭人、曹人、莒人、邾人、滕人、薛人、杞人、小邾人會于澶淵，宋災故。【補曰】此澶淵，王夫之、洪亮吉以爲宋地，

洪引《說文》「澶淵水在宋」。○【撰異曰】鄂本、《公羊》無「莒人」，脫也。會不言其所爲，【補曰】史之通例。

其曰宋災故何也？【補曰】問《經》何以特增史文，與稷成宋亂相似。不言災故則無以見其善也。【補

曰】明與成宋亂各不同也。不言以救宋災者，以者內爲志之文，此會文無內大夫，故不言以。其曰人何也？

救災以衆。【補曰】案：《左傳》晉趙武、齊公孫董、宋向戌、衛北宮佗、鄭罕虎皆以大夫稱人，明救災義主用衆，故爲衆辭也。救災大事，特著善文，無嫌於爲卑者，亦無嫌於略而貶之，故稱人即足顯其爲衆辭，因以示義也。《左傳》

稱魯叔豹孫在會，以情事度之，魯必有大夫聽命，《經》不書者，方欲以衆辭一切稱人，而於文不得言魯人，又不得言叔孫豹會某人某人，同於人諸侯以人公之例。又不得直言會某人某人，同於盟齊內外皆卑者之文。以共姬本魯女，叔弓新往會葬，魯大夫與於救災，義在不疑，故遂移會文於下，全沒魯文也。何救焉？更宋之所喪財也。

償其所喪財，故雖不及災時而猶曰救災。【補曰】何休曰：

「更，復也，如今俗名解浣衣復之爲更衣。」文烝案：《周禮》

注：「更，償也。」即《檀弓》「庚」字。《國語》、《漢書》注：

「更，續也。」《周禮》·大行人「致檜以補諸侯之裁」，《大戴

禮》同。《左傳》曰：「侯伯分災，禮也。」澶淵之會，中

國不侵伐夷狄，夷狄不入中國，無侵伐八年，

善之也，晉趙武、楚屈建之力也。【補曰】疏引徐

邈云：「晉趙武、楚屈建感伯姬之節，故爲之息兵。」文烝

案：伯姬事至葬已畢，《公羊》以此亦爲錄伯姬，不可通於

《傳》，息兵不相侵伐亦不得以澶淵之會爲指實。又此會無

楚人，徐說非也。楊氏以「澶淵之會」句讀斷，謂《傳》特連

言之，似得其解，而牽合《左傳》主相晉國於今八年之文，從

二十五年爲始，亦非也。此《傳》八年，謂宋盟後八年也。

言所以得優游暇豫爲此澶淵之會者，以此八年中，乃中國、夷狄息兵不用時也。但言中國不侵伐夷狄，夷狄不入中國，而中國、夷狄各不自相侵伐亦包之也。但言無侵伐，而滅人圍戰之事俱無尤可見也。全《經》十一卷，從未有三年之外不見中國夷狄滅人圍戰侵伐之事者，獨襄二十七年盟宋，以訖昭三年，絕無滅人圍戰侵伐之事。昭元年雖有取鄆、敗狄二事，而鄰近之爭，曠遠之役，固與諸滅人圍戰侵伐者異例。君子作《春秋》，愛民重衆而惡戰，習亂既久，則好始治，故於澶淵特見善者，乃善其不事兵戎，同恤災患，其事其時，前後僅見也，要之皆趙武、屈建弭兵通好之力。如《論語》「管仲之力」，《周禮》所謂「治功曰力」者。用是又可知宋盟乃《春秋》所貴，灼然著明。劉敞說彼《經》云：「宋之盟，中國不出，夷狄不入，玉帛之使，交乎天下，以尊周室，晉趙武、楚屈建之力也。」皆用《傳》語，甚卓識也。漢有孔氏聘辭之書，乃是會宋之時，宋以折俎享趙武之禮，孔子以其多文辭，特舉而用之，亦足見宋盟之事，夫子平日所致意也。《左傳》載宋子罕之言以宋盟去兵爲誣道，又引《詩》美子罕，非《經》義也。《傳》特發此數語者，以明君子書《經》，用意深遠，有文中之義，又有文外之文，前後相屬，彼此相明者也。齊召南解「無侵伐八年」得之，而

謂此《傳》是二十七年錯簡，澶淵之會當爲宋之會，失其旨矣。董仲舒曰：「《春秋》論十二世之事法，布二百四十二年之中，相爲左右，以成文采，其居參錯，非襲古也。是故論《春秋》者，合而通之，緣而求之，伍其比，偶其類，覽其緒，著其贅，是以人道浹而王法立。」又曰：「不在《經》與在《經》無以異，有所見而《經》安受其贅也。」如董生之言，則知盟宋不言所爲，而會澶淵言所爲，誠聖者之文也。○劉敞以來說宋災，故牽合蔡事，似是而非。說見上二十五年。

三十有一年春王正月。

夏六月辛巳，公薨于楚宮。楚宮，非正

也。楚宮，別宮名，非路寢。【補曰】與臺下又異，故重發

之。何休曰：「公朝楚，好其宮，歸而作之，故名之云爾。」

案：此即《左氏》說。

秋九月癸巳，子野卒。襄公太子。【補曰】

案：《左傳》胡女敬歸之子毀也。子卒日，正也。【補

曰】疏曰：「嫌與子般同，故《傳》發之，以明昭之繼正。」

己亥，仲孫羯卒。

冬十月，滕子來會葬。書非禮。【補曰】杜預

曰：「諸侯會葬，非禮。」文烝案：《左傳》稱先王之制，諸侯之喪士弔，下大夫送葬。自晉文、襄改制，君薨，下大夫弔，卿共葬事，夫人薨，士弔，下大夫送葬。所言當得其實也。《公羊》於此無《傳》。文元年叔服會葬，《傳》曰：「其言來會葬何？會葬禮也。」何休於此注曰：「與叔服同義。」又於文六年注曰：「禮：諸侯薨，使大夫弔，自會葬。」又於定十五年注曰：「禮：諸侯薨，有服者奔喪，無服者會葬。」《五經異義》許慎謹案：「《公羊》說，同盟諸侯薨，君會葬，其夫人薨，君又會葬，是其不遑國政而常在路。《周禮》無諸侯會葬義，知不相會葬，從《左氏》義。」文烝案：此月者，蓋為下葬日。

癸酉，葬我君襄公。

十月一月，莒人弑其君密州。【補曰】莒犁

比公。段玉裁曰：「《左傳》云『書曰』，莒人弑其君買朱鉏」，於雙聲疊韻相合，疑《左》以莒語訓中國語也。」案：段說即本服虔論乘壽夢之說，其說是也。莒言買朱鉏，赴魯改言密州。

# 春秋昭公經傳第九補注第二十一 昭公

襄公子公子稠也。母齊歸，敬歸之娣也。以景王四年即位，時年二十。

穀梁 范氏集解 鍾文烝詳補

元年春王正月，公即位。繼正即位，正也。【補曰】疏見閔元年。

叔孫豹會晉趙武、楚公子圍、齊國弱、宋向戌、衛齊惡、陳公子招、蔡公孫歸生、鄭罕虎、許人、曹人于郭。【補曰】杜預曰：「《傳》稱讀舊書，則楚當先晉，而先書趙武者，亦取宋盟貴武之信，故尚之也。衛在陳、蔡上，先至於會。」文烝案：晉先楚者，史之舊，與宋同也。招是陳侯之弟，稱公子者，出會與諸國大夫列序，不可獨出弟文。崔子方得之，且因與八年稱弟合以見義，如彼《傳》所云也。盟折曰蔡叔，此曰陳公子招，文各異者，後有季則前有叔，後稱弟則前稱公子，各有所當，疑

亦因史之舊也。郭，即《左氏》「號」字，古通用。杜預曰：「鄭地。」本東號國也。《左傳》曰「三月甲辰盟」，《經》不書盟者，《傳》稱「讀舊書，加于牲上而已」。杜預曰：「不敵血，故不書盟也。」○【撰異曰】弱，《公羊》作「酌」。徐彥曰：「亦有作『國弱』者。」齊惡，《公羊》作「石惡」。陸渙曰：「誤也。」罕，《公羊》作「軒」。郭，《左氏》作「號」，《公羊》作「灋」。

三月，取鄆。鄆，魯邑。言取者，叛戾不服。【補曰】此當依《左傳》為莒邑。鄆本魯邑，後乃屬莒，莒、魯爭鄆已久，季武子救邠人鄆，未能得之，至是始取之。《公羊》曰：「運者何？內之邑也。其言取之何？不聽也。」「不聽」之文與圍棘同，皆謂其叛，此范所本。但《公羊》於下疆田云「與莒為竟」，則亦謂其本是內邑，而叛屬莒耳，與《左氏》不異也。不書伐莒者，李廉曰：「書伐莒，是以討賊予魯也。」文烝案：月者，交爭已久，幸而得取，故危錄之。取為易辭，月為危錄，此自無相妨。○【撰異曰】三月，各本誤作「二月」，今依唐石經改正。

夏，秦伯之弟鍼出奔晉。諸侯之尊，弟兄不得以屬通，其弟云者，親之也。親而奔

之，惡也。【補曰】疏曰：「重發《傳》者，陳侯之弟稱歸爲無罪，鍼後無歸文，則罪之輕重不可知，故重發義，明與陳光同。」文烝案：《傳》或又以秦有狄文，嫌與諸夏異，故重發以明同也。

六月丁巳，邾子華卒。

晉荀吳帥師敗狄于大原。大原，地。【補曰】

即定十三年之晉陽，爲唐叔始封地，舊說皆如此。據《左傳》鄭子產稱「臺駘能業其官，宣汾、洸，障大澤，以處大原，帝用嘉之，封諸汾川」，明晉陽亦名大原，故秦莊襄王置爲大原郡，即今山西大原府是也。而宋翔鳳作《小爾雅注》，據《小爾雅》，高平謂之太原，及《春秋說》題辭云：「高平曰太原。原，端也，平而有度。」《書大傳》釋「東原底平」云「大而高平者謂之太原」，以爲凡高平之地，皆得蒙大原之稱，不必專在晉陽。其論《春秋》「大原」及《書·禹貢》「既修大原」，《詩·小雅》「薄伐玁狁至于大原」，《國語》「宣王料民于大原」，以爲此諸文皆非秦、漢大原郡，皆當是《漢志》之安定郡高平縣等處，爲今甘肅平涼府固原等州。漢縣稱高平者，取高平曰大原之義也。文烝案：《小雅》、《國語》之大原，當是平涼，非晉陽，顧炎武已言之。《春秋》及《禹貢》

之大原亦非晉陽，乃宋氏新說。宋以《漢志》、《說文》並稱安定有鹵縣，可證大原爲大鹵之說。而《左傳》稱「敗無終及群狄」，無終爲今直隸遵化州玉田縣，由玉田至平涼就戰，視晉陽尤遠，是則可疑。若《禹貢》「大原」之文，上承梁岐、梁岐、大原皆雍州地，明壺口以西之功既畢，乃從壺口東治岳陽。宋說蓋是也。此不如箕、交剛言晉人者，蓋以群狄勢盛，進而詳之，從正例也。然則此事宜蒙上月，亦不與箕、交剛同。○【撰異曰】原，《左氏》作「鹵」，蓋傳聞夷狄曰大鹵之說，因誤「原」爲「鹵」也。《左傳》亦曰「原」。徐彥《公羊疏》曰：「案：《左氏》作「大鹵」字，《穀梁》與此同。」傳曰：中國曰大原，夷狄曰大鹵，【補曰】此中國對夷狄言則不專指魯。《公羊》亦曰「此大鹵也」，又曰「原者何？上平曰原，下平曰隰」。《說文》釋安定鹵縣之「鹵」曰「東方謂之原，西方謂之鹵」，此「原」與「鹵」之義也。號從中國，名從主人。襄五年注詳矣。【補曰】此通說《經》例，中國對主人言則專指魯也。重釋例者，前是吳，今是狄，嫌異也。

秋，莒去疾自齊入于莒。【補曰】時者，例也。

莒展出奔吳。【補曰】疏曰：「展篡踰年，不稱爵



者，徐邈云不爲內外所與也，不成君，故但書名。」文烝案：疏以展爲纂，依《左傳》也，實未必然。○【撰異曰】《左氏》作「莒展與」，亦或無「與」字。《左傳》曰：「莒展之不立。」

### 叔弓帥師疆鄆田。疆之爲言，猶竟也。

爲之竟界。【補曰】亦義相近也。古讀「竟」亦如「疆」，《毛詩傳》曰：「疆，竟也。」是以「竟」爲本訓。《公羊》曰：「疆，運田者何？與莒爲竟也。與莒爲竟則曷爲帥師而往？畏莒也。」劉敞曰：「疆之者何？溝封之也。」

### 葬邾悼公。【補曰】邾至此始書葬者，魯始會葬

也。或前是史略小國，以爲常例。

### 冬十有一月己酉，楚子卷卒。【補曰】楚邾

敖也。卷實弑，見下四年。書卒者，史從赴書卒，不可改也。孔廣森以爲《春秋》爲內諱也。楚，夷狄之國，公子圍親弑君之賊，而昭公屈節往朝，內恥之大者，故略其實，沒其文。文烝案：先儒劉、葉、胡、陳、張等各有說孔氏改之，較爲近理，而亦失之鑿。深其文辭者固《春秋》也，書王法而不誅其人者亦《春秋》也，差若豪釐，繆以千里，朝夷狄即爲恥，①遑計楚君何人哉？○【撰異曰】卷，《左氏》作「麋」。徐彥《公羊疏》曰：「《左氏》作『麋』字。」二小傳本亦

有作「麋」字者。

### 楚公子比出奔晉。

二年春，晉侯使韓起來聘。

夏，叔弓如晉。

秋，鄭殺其大夫公孫黑。

冬，公如晉，至河乃復。乃者，亡乎人之辭，

刺公弱劣，受制疆臣。【補曰】注以君弱臣強解「亡乎人」，非也，說見僖三十一年。言至河，不舉所至地。名者，亦所以大公，別於至黃乃復、至穀乃還等文。恥如晉，故著有疾也。公凡四如晉，季氏訴公於晉侯，使不見公，公懼不利于己，故公托至河有疾而反，以殺恥也。十二年《傳》曰「季氏不使遂乎晉」，與此《傳》互文以見義，然則十三年、二十一年如晉，與此義同。二十三年《經》曰：「至河，有疾，乃復。」是微有疾而反，嫌與上四如晉同，故明之。【補曰】恥如晉者，恥如晉不得人也。所以不得人，則季孫氏不

①「狄」，原訛作「秋」，逕改。

使遂乎晉也，此下《傳》及十二年《傳》之文明，二十一年亦

同，唯十三年季孫執於晉或小異也。范注言殺恥，殺恥乃

二十三年之義，此及後三文但有恥義，無殺義也。恥者，

《經》恥之；著者，《經》著之。范言公託有疾，又非也。言

乃復所以得為著有疾者，乃者，在天不在人之辭，故公子遂

如齊，有疾而反，書至黃乃復，若非有疾則不得言乃。今此

言至河乃復，與遂同文，是足著其有疾也。此《傳》及下十

二年《傳》與《左氏》皆不合。《左傳》此年晉人辭公，為公親

弔少姜，十二年辭公，為莒愬取郟，將治魯，十三年辭公，

為季孫既執，失舊好，二十一年辭公，為將伐鮮虞。辭公

之說，蓋實有之，所為之事，或未可據。又五年公如晉，《左

傳》以為莒愬受牟夷，晉欲止公，十五年公如晉，十六年公

至，《左傳》云「晉人止公」，統觀《左氏》諸文，亦足見晉之有

憾，其始終無季氏訴公事，則由魯國雜史書為季氏掩罪耳，

大氏《左傳》記季氏事多不以實也。《公羊》曰「不敢進也」，

何休曰：「時聞晉欲執之，不敢往。」孔廣森引《穀梁》下

《傳》為說。

季孫宿如晉。公如晉而不得人，季孫宿

如晉而得人，惡季孫宿也。明晉之不見公，季孫宿

之所為。

三年春王正月丁未，滕子原卒。【補曰】自

此滕皆有名著，諸君皆不正，或後舍狄道，正者亦以名通。

○【撰異曰】原，《公羊》作「泉」。陸淳所見唐石經磨改及板

本皆同。徐彥曰：「《左氏》、《穀梁》作「原」字。」案：《說文》

「泉，水原也」，「原，水泉本也」。泉本作「𠂔」，象形字。原，

从泉出厂，古猶从三「泉」。

夏，叔弓如滕。

五月，葬滕成公。【補曰】滕至此始書葬，蓋亦

所謂少進。杜預曰：「卿共小國之葬，禮過厚。葬襄公，滕

子來會，故魯厚報之。」

秋，小邾子來朝。

八月，大雩。

冬，大雨雹。

北燕伯款出奔齊。【補曰】稱名，蓋有罪。其

曰北燕，從史文也。【補曰】疏曰：「前高止之奔，欲

明從史文，今北燕伯出奔，嫌自名之，故重曰從史文，舉此

二者以明例，故於後不釋。」文烝案：前事自齊言之，此事自燕言之，燕自稱其國亦直稱燕，不稱北燕，故復明之也。

### 四年春王正月，大雨雪。雪，或爲「雹」。

【補】以大志，非是不時，無取於月。此月，知以月爲例也。僖十年冬無月，當是歷月矣。大雨雹皆不月，知亦非例。○【撰異曰】雪，《左氏》作「雹」，與《穀梁》或本同，今本《公羊》作「雪」，自《音義》、唐石經以下皆同。徐彥《公羊疏》曰：「案正本皆作「雹」字，《左氏》經亦作「雹」字，故賈氏云《穀梁》作「大雨雪」，今此若有作「雪」字者，誤也。」據徐說則《公羊》作「雹」，陸德明所見已誤矣。

夏，楚子、蔡侯、陳侯、鄭伯、許男、徐子、滕子、頓子、胡子、沈子、小邾子、宋世子佐、淮夷會于申。楚靈王始合諸侯也。【補曰】此本杜預。

申，楚地，本申國。孔穎達曰：「《釋例》班序譜稱：「齊桓既沒，宋、楚爭盟，起僖十八年，盡二十七年。陳與蔡凡三會，在蔡上。楚合諸侯，蔡與陳凡六會，其五在陳上。」莊十六年注云陳國小，每盟會皆在衛下，齊桓進之，遂班在衛上。然則陳實小於蔡、衛，桓公進陳班耳。楚以大小爲序，不進

陳班，故蔡多在陳上。」文烝案：淮夷不殊會，又下伐吳不言及，異於穀者，何休以爲楚子主會，不殊其類，所以順楚而病中國。

### 楚人執徐子。稱人以執，執有罪。【補曰】疏

曰：「僖二十一年零之會執宋公不言楚，此言楚人執徐子者，彼不與夷狄執中國，此時楚彊，徐又夷也。不言歸者，蓋在會而執，尋亦釋之，故不言所歸也。」○【撰異曰】楚人，板本、《公羊》或作「楚子」，誤。唐石經、鄂本、十行本亦作「人」。

### 秋七月，楚子、蔡侯、陳侯、許男、頓子、

胡子、沈子、淮夷伐吳。衆國之君，傾衆悉力，以伐彊敵，內外之害重，故謹而月之。定四年侵楚亦月，此其例也。【補曰】疏曰：「舊解凡日月之例多施於內，不加於外，而云謹而月之者，以四夷之盛，吳、楚最甚，從此以後，中國微弱，禍害既重，書亦宜詳，故注并引定四年三月侵楚爲證，猶莊六年子突王者之師挫於諸侯，僖十五年齊桓霸者之兵屈於伐厲，故亦書月，是其義也。徐邈云「伐不月而書月者，爲滅厲書」，理亦通也。內外之害者，內謂吳，外謂衆國。」文烝案：杜預曰：「因申會以伐吳。不言諸侯者，鄭、

徐、滕、小邾、宋不在故也。」張大亨曰：「諸侯畏楚之強，守宋之盟而從楚，然猶不能致魯、衛、曹、邾，至伐吳，則諸侯皆去，所從惟楚之屬耳，人心向背可知。」執齊慶封殺之。【補曰】依常例，當如上執徐子，再出楚人。此人而殺，其不言人何也？慶封封乎吳鍾離。言時殺慶封，自于鍾離，實不入吳。【補曰】《左傳》以爲朱方，《公羊》以爲防。慶封自魯奔吳，不書者，何休曰：「已絕於齊，在魯不復爲大夫，賤故不復錄之。」文烝謂史所本無。其不言伐鍾離何也？不與吳封也。慶封其以齊氏何也？據已絕于齊。【補曰】吳封之，當言吳慶封。爲齊討也。【補曰】楚本爲齊討，故繫之齊，明其實有弑君之罪。靈王使人以慶封令於軍中曰：「有若齊慶封弑其君者乎？」謂與崔杼共弑莊公光。慶封曰：「子一息，我亦且一言，」【補曰】息，休止也。曰有若楚公子圍弑其兄之子而代之爲君者乎？【補曰】楚靈蓋已改名虔，此舉其本名也。疏曰：「元年卷卒不云弑者，蓋密弑之，託以疾卒。楚無良史，告不以實，故《春秋》從而書之。《傳》因慶封之對以起

其事，則篡弑之罪亦足以見也。」洪咨夔論《左傳》曰：「學者固當信《經》《舍》《傳》，而竟以《傳》爲誣，亦未敢斷。《穀梁》楚圍弑君，與《左傳》同，則其事自在人耳目，蓋楚諱其事，以疾卒赴，魯史無從而改，《春秋》無從而革也。」文烝案：此等皆《穀梁》密於《公羊》之處，劉知幾於卷卒一《經》譏短《公羊》，無所發明也。軍人粲然皆笑。粲然，盛笑貌。慶封弑其君而不以弑君之罪罪之者，慶封不爲靈王服也，《傳例》曰：「稱人以殺大夫，爲殺有罪，今殺慶封，《經》不稱人，故曰不以弑君之罪罪之。」【補曰】依宣十一年例，既當出楚人，又當直言殺齊慶封也。葉西以爲慶封被執後楚始有殺之之意，若不書執，但曰殺齊慶封，則語勢直急，似真爲討慶封伐吳矣。不與楚討也。【補曰】不足服人，故不與討。《春秋》之義，用貴治賤，用賢治不肖，不以亂治亂也。【補曰】貴且賢則人服矣，特稱《春秋》之義，所以是非二百四十二年之中者也。賈誼上疏曰：「古者聖王，制爲等列，內有公卿大夫士，外有公侯伯子男，然後有官師小吏，延及庶人，等級分明，而天子加焉，故其尊不可及也。」此貴賤之說也。《論語》曰：中人以上，中人以下，又言上知下愚，又上下之間

有次有又次，《漢書·人表》以聖人、仁人、智人、愚人分九等，此賢不肖之說也。《說文》曰：「不似其先，故曰不肖也。」《方言》：「肖，法也。」《廣雅》：「肖，類也。」貴治賤以位，賢治不肖以德，以亂治亂，則以暴易暴之謂，猶孟子言以燕伐燕也。夫以燕伐燕而猶可以行仁政，此不得已之辭耳，豈所以爲治？

孔子曰：「懷惡而討，雖死不

服，其斯之謂與？」【補曰】懷惡而討，即上以亂治亂也。《公羊》十一年《傳》曰：「懷惡而討不義，君子不予。」

何休以爲內懷利國之心而外託討賊，與此《傳》意異。此

《傳》曰以亂曰懷惡，皆指靈有弑君之罪而言耳。疏曰：

「上云《春秋》之義，足以見罪。又稱孔子曰者，靈王，夷狄

之君，欲行伯者之事，嫌於得善，故引《春秋》以明之，復言

孔子以正之。」

遂滅厲。○【撰異曰】厲，《左氏》作「賴」。徐彥

《公羊疏》曰：「有作「賴」字者。」孔廣森曰：「古字厲、賴通，

《論語》「厲己」，鄭讀爲「賴」。《漢武紀》「祖厲河」，李斐

曰：「音嗟賴。」《左氏》僖十五年作「厲」，此作「賴」。又桓

十三年《傳》有「賴人」，皆寫者異耳。杜預云「義陽隨縣北

有厲鄉」，《水經注》曰「亦云賴鄉」。遂，繼事也。【補

曰】重發《傳》者，楚莊得鄭而已，今靈王兼統七國，夷狄之盛，儕於霸主，嫌稱遂別有義例，故復明之。

九月，取繒。【補曰】疏曰：「襄六年，莒人滅繒，

以繒立莒公子爲後，故以滅言之。其實非滅，故今魯得取之。不云滅而云取者，徐邈云諱，故以易言之。」文烝案：

徐本《公羊》，得之。或諱言人則是變例。

冬十有二月乙卯，叔孫豹卒。

五年春王正月，舍中軍。【補曰】舍，去也。

何休曰：「月者，善錄之。」案：此與丘甲三軍並是謹月而意

異。貴復正也。魯次國，舊二軍，襄十一年立三軍，今

毀之，故曰復正。【補曰】凡諸侯非受命爲伯者，大國二軍，

小國一軍，魯大國，故二軍。《左氏》哀十一年《傳》季氏稱

左師，孟氏稱右師，是知罷中軍爲左右二軍也。對作爲文，

故亦不言初，皆省文也。此事亦著爲令。孔廣森說《公羊》

曰：「季氏專魯國，然後舍中軍，陽虎專季氏，然後從祀先

公。而《春秋》書之壹若國之典制者，稱其美，不稱其惡，臣

子之義也，重其禮，不重其事，制作之意也。」文烝案：《穀

梁》兩《傳》全同，明皆不須細論其事，孔氏得之。抑凡魯國

禮樂刑法政俗之變，《春秋》書之，直其文而仍婉也，諱其義而不盡也，蓋多有因史法之舊者。《明堂位》曰：「魯王禮也，禮樂刑法政俗未嘗相變也。」言史法則然也。

### 楚殺其大王屈申。

#### 公如晉。

夏，莒牟夷以牟婁及防茲來奔。以者，不以者也。來奔者，不言出。以其方向內也。

【補曰】注足《傳》意，即接我之謂以與來奔。重發《傳》者，疏曰：「庶其以邑來而不言及，此言及，故各發《傳》也。」及

防，茲，以大及小也。【補曰】重發《傳》者，嫌與內城

異也。杜預以防、茲爲二邑。莒無大夫，其曰牟夷

何也？以地來也。【補曰】以下各本衍「其」字，今依

唐石經刪正。以地來則何以書也？重地也。

竊地之罪重，故不得不錄其人。【補曰】重地者，兼重魯得

地，胡安國、高閔所謂接我以利而我人其利，兩譏之也。疏

曰：「此《傳》獨言重地者，舉其中以包上下。」文烝案：邾庶

其，黑肱不言重地，所以顧畀我，快之文，莒牟夷獨言重地，

又以包邾庶其，黑肱之文，此等皆《穀梁》簡於《左氏》，《公

羊》之處。蕭穎士欲爲編年之書，於《穀梁》師其簡，而不知者乃謂其大體寂寥也。

### 秋七月，公至自晉。【補曰】月者，蓋滿二時也。

如晉未知何月，若是二月末，則未滿，當爲下敗師日，故月。

### 戊辰，叔弓帥師敗莒師于賁泉。賁泉，魯

地。○撰異曰賁，《左氏》作「蚡」，《公羊》作「潰」。徐彥

曰：「《左氏》作「蚡」字，《穀梁》作「賁泉」字。」狄人謂賁

泉失台，【補曰】狄即莒也。段玉裁曰：「據楊疏字，則

「失台」當本作「矢胎」，謂賁爲矢者，即今俗語謂糞爲矢

也。」號從中國，名從主人。【補曰】重釋例者，前是

狄，今是莒，嫌異也。

### 秦伯卒。

### 冬，楚子、蔡侯、陳侯、許男、頓子、沈子、

徐人、越人伐吳。【補曰】徐得稱人者，楚主兵，從其

類而人之。越與徐略同，故亦稱人。楚也、徐也、越也，皆

夷且僭也，楚子爲主，則彼皆小國，不論其夷與僭。若論其

夷與僭而不稱人，則當殊之。殊爲外文，外徐、越，則內楚

之文而可乎？上會淮夷不殊不稱人者，淮夷又非徐、越比

矣。不稱於越人者，自越言之曰於越，自楚言之曰越，皆所謂名從主人。

六年春王正月，杞伯益姑卒。【補曰】疏曰：「不日者，蓋非正。」

葬秦景公。【補曰】秦至此始書葬，亦所謂少進歟？

夏，季孫宿如晉。

葬杞文公。

宋華合比出奔衛。

秋九月，大雩。

楚薳罷帥師伐吳。○【撰異曰】徐彥《公羊》疏曰：「薳頗，《左氏》、《穀梁》作「薳罷」字。」

冬，叔弓如楚。○【撰異曰】徐彥《公羊》疏曰：「亦有一本云「叔弓如齊」者，誤。」

齊侯伐北燕。

七年春王正月，暨齊平。平者，成也。

【補曰】重發《傳》者，此言暨，嫌有異也。暨，猶暨暨也。【補曰】《公羊》同。《公羊》、《爾雅》又曰：「及、暨，與也。」以疊字釋單字，《毛詩傳》多有此例。疊字者，物之貌。

孔穎達《詩正義》引《爾雅序》篇云：「《釋詁》、《釋言》通古今之字，古與今異言也。《釋訓》言形貌也。」暨者不得已也。【補曰】申上句。《公羊》亦同。《爾雅》又曰：「暨，不及也。」以外及內曰暨。【補曰】又申上。以外及內，不可立文，故變文言暨。陸渙聞於師者得之。黃仲炎引《書》「女義暨和」、「及高宗」、「及祖甲」、「及我周文王」，以為暨，猶及也。豈足論《春秋》之文乎？《傳》三語發《經》通例，此是齊求魯而及魯，《左傳》以為齊求燕，誤矣。《傳例》平稱衆，暨某平及某平云者，猶言魯人暨某人平。魯人及某人平也，文不得稱魯人，故外亦不稱人。趙鵬飛得之。

三月，公如楚。

叔孫婍如齊莅盟。【補曰】婍，豹之子叔孫昭子。○【撰異曰】婍，《公羊》作「舍」。後同。莅，位也。

內之前定之辭謂之莅，外之前定之辭謂之來。【補曰】疏曰：「重發《傳》者，嫌公如楚，恐婍非是君來。」

命，故發之，明嫗亦受命。」

夏四月甲辰朔，日有食之。

秋八月戊辰，衛侯惡卒。鄉曰衛齊惡，

在元年。【補曰】鄉，亦作「鄉」。八年同。今日衛侯

惡，此何爲君臣同名也？【補曰】疑臣當辟君名。

君子不奪人名，不奪人親之所名，重其所以

來也，王父名子也。不奪人名，謂親之所名，明臣雖

欲改，君不當聽也。君不聽臣易名者，欲使人重父命也。

父受名于王父，王父卒則稱王父之命名之。【補曰】劉敞

曰：「《穀梁》蓋言臣之子不敢與世子同名，有生在世子前，

王父名之者則亦不改也。以言衛齊惡，蓋王父名之爾，說

者不曉，乃謂唯王父名子，王父卒，則稱王父命名之，是則

不可。」文烝案：此特發《傳》者，蓋夫子嘗論其義，相承說

之。鄭君《曲禮》注曰：「《春秋》不非也。」唐石經初刻「君

子不奪人名。不奪人名者，不奪人親之所名也」，較今本多

六字。嚴可均曰：「尋范意，當從初刻爲是。」

九月，公至自楚。

冬十有一月癸未，季孫宿卒。

十有二月癸亥，葬衛襄公。【補曰】危之者，

何休曰：「世子輒有惡疾，不早廢之，臨死乃命臣下廢之。

自下廢上，鮮不爲亂，故危錄之。」

八年春，陳侯之弟招殺陳世子偃師。鄉

曰陳公子招，在元年。今日陳侯之弟招何

也？曰盡其親，所以惡招也。盡其親，謂既稱公

子，又稱弟招。先君之子，今君之母弟。兩下相殺，不

志乎《春秋》，此其志何也？【補曰】重發例者，彼

重王命，此重世子，故並舉以發端。世子云者，唯君

之貳也，云可以重之，存焉，志之也。【補曰】重

發《傳》者，前明會王世子特尊之文，此明殺諸侯世子得志

之義也。疏曰：「楚公子棄疾殺公子比，比不繫楚，此世子

偃師繫陳者，體國重，故繫國言之。公子繫君，故不繫國

也。」文烝案：言陳世子不言其者，非君殺，不得爲緩辭。

諸侯之尊，弟兄不得以屬通，其弟云者，親之

也。【補曰】重發《傳》者，前是奔，此是殺世子，事不同也。

弟兄，各本誤作「兄弟」，今依唐石經、余本、呂本中《集解》



本乙正。親而殺之，惡也。惡招。【補曰】若解爲惡陳侯，以其寵任而不能制，說亦可通，然文義不順，當是申上惡招也。

夏四月辛丑，陳侯溺卒。【補曰】案：《左傳》

「陳哀公元妃生世子偃師，二妃生公子留，下妃生公子勝。二妃嬖，留有寵，屬諸司徒招與公子過。哀公有廢疾，招、過殺偃師而立留。哀公縊。」杜預曰：「憂恚自殺也。」

叔弓如晉。

楚人執陳行人干徵師殺之。干，姓。徵師，

名。稱人以執大夫，執有罪也。【補曰】所謂以衆辭與之，其例亦通於執諸侯。稱行人，怨接於上也。

【補曰】疏曰：「重發《傳》者，嫌楚殺爲甚，恐其無罪，故發《傳》以同之。」

陳公子留奔鄭。【補曰】案：《左傳》：「干徵

師赴于楚，且告有立君，公子勝愬之于楚，楚人執徵師殺之。留奔鄭。」不曰陳留者，杜預、蘇轍、張大亨曰：「未成爲君。」葉夢得曰：「不與其得成君。」高閔曰：「曰世子、曰公子，別嫡庶也。」李光地曰：「目世子殺於上，則著公子奔

於下也。」高澍然曰：「三公子《經》書各異，招目弟，過目大夫，則知留爲奪嫡之公子矣。留奔於殺徵師後，又知留之奔懼楚，非懼招，招之殺世子立留，非自立矣。」

秋，蒐于紅。紅，魯地。【補曰】《疏》曰：「蒐狩書

時，其例有八：狩有三，狩郎、狩郤、西狩也；蒐有五：蒐紅、大蒐比蒲者三，大蒐昌間也。狩言公，此不云公者，狩則主爲游戲，故言公，蒐是國家常禮，故例不言公也。」文烝案：楊《疏》元文并王守河陽亦入狩例，誤同《左氏》、《公羊》說，非也，今刪去。四時之田，秋曰蒐，冬曰狩，皆因田獵習武事，而狩以田爲主，非公亦得言狩，故須言公。蒐與大蒐之志於史者，以習兵爲主，國之常禮，不嫌其非公，故不須言公也。大閱不言公，亦與蒐同。○【撰異曰】蒐，《公羊》或作「廋」。正也。常事不書，而此書者，以後比年大蒐失禮，因此以見正。【補曰】《疏》曰：「范例云，凡蒐狩書者，皆譏也。蒐紅正而書者，明比年大蒐失禮，故因此正見不正，是范意以秋蒐得禮，欲見以正刺不正，故書之。范例又云，器械有常，故不云大，言大者，則器械過常。」文烝案：蒐與狩，同而異者也。其同於狩者，蓋每歲行之，下《傳》云云是也。其異於狩者，蓋當略如何休說，以爲比年

蒐、五年大蒐也。言大者，下十一年《注》謂「人衆器械，有踰常禮」是也。此以正見不正者，謂以此秋時之正，明後失秋時之爲不正，非謂言大不正也。但正文至此始見，而後又不見正文者，竊意魯自舍中軍後，季氏專國，兵事益重，史始志蒐志大蒐，君子因存其最始之正者，而於後唯譏不正也。因蒐狩以習用武事，禮之大者也。【補曰】《書大傳》曰：「戰鬪不可不習，故於蒐狩以閑之也。閑之者，貫之也，貫之者，習之也。」《傳》先言禮之大，以起下言舊典。《公羊》桓六年《傳》曰「大閱者何？簡車也」，此年《傳》曰「蒐者何？簡徒也」，下十一年《傳》曰「大蒐者何？簡車徒也」。簡徒者，何休所謂比年簡徒，謂之蒐也。簡車者，所謂三年簡車，謂之大閱也。簡車徒者，所謂五年大簡車徒，謂之大蒐也。今本《公羊》桓六年及此年《傳》各衍一字，王引之考正之如此也。《公羊》三處又皆曰「何以書？蓋以罕書也」，然則《公羊》之意，以爲《經》書蒐與大蒐非蒐狩之蒐歟？今案：《傳》於大閱曰平而脩戎事，非正也。謂大閱之禮，當因四時田獵行之，明蒐與大蒐之禮必於秋蒐行之矣。彼《傳》以平而脩戎事爲非正，此《傳》曰「因蒐狩以習用武事，禮之大者」，其意正互相發。但彼則解爲閱兵車，此下云云則專論其與狩同者，而簡徒、大簡車

徒之義有所未備耳。何氏比年、三年、五年之說雖無明證，而大概近是。《左傳》說此以爲大蒐，且云「自根牟至于商、衛，革車千乘」，明是大簡車徒，而非簡徒，疑是他年事誤在此矣。呂祖謙謂春秋時之蒐有二：有因時而蒐，有因事而蒐。因事者如晉蒐于被廬之類。文烝以爲因事者亦當因時。艾蘭以爲防，蘭，香草也。防，爲田之大限。【補

曰】艾，即「刈」字。置旃以爲轅門，旃，旌旗之名。《周禮》：「通帛爲旃。」轅門，印車以其轅表門。【補曰】立旃竿爲門之兩旁，其門蓋南開，並爲二門，用四旃，說見《詩》正義。謂之轅門者，陳奐曰：「立旃竿爲門，如設轅在兩旁，非謂更以轅表門。」以葛覆質以爲塾，質，椹也。塾，門中臬。葛，或爲褐。【補曰】疏曰：「褐毛布。徐邈亦云：「恐傷馬足，故以毛布覆之。」」文烝案：臬即「闕」字也。陳奐曰：「質者，侯中的，即正也。正方二尺，四邊以木爲椹，是謂之椹質。今以椹質爲門中闕，則闕高二尺。」流旁握，御輦者不得入，流旁握，謂車兩轆頭各去門邊容握。握，四寸也。輦，挂也。挂則不得入門。【補曰】疏曰：「徐邈云：「流，至也。門之廣狹，足令車通。至車兩軸，去門之旁邊四寸。或以流爲旒。」」陳奐曰：「流，行也。謂車

輪行也。旁，門旁也。車行至門，兩輪之軹去門旁四寸。」《音義》及《詩音義》引劉兆注曰：「擊，絰也。」與范同。《音義》又曰：「本或作『擊』。」車軌塵，塵不出轍。【補曰】王念孫曰：「軌者，循也。謂後車循前車之塵，不得旁出也。賈子曰：『緣法循理謂之軌。』《史記·天官書》言：『軌道謂循道也。』」文烝案：《曲禮》明言塵不出軌，王說非也。馬候蹄，發足相應，遲疾相投。【補曰】疏曰：「舊解四蹄皆發，後足躡前足而相伺候。」齊召南以爲四馬步驟如一，即《詩》所謂「我馬既同」，《毛傳》言「田獵齊足」是也。拚禽旅，拚取衆禽。【補曰】疏曰：「《禮》云不掩群者，謂不得不分別大小，一群盡取之。今雖掩衆禽在田，則簡其麋卵之流而放之，射訖則釋，其面傷之徒不獻。」御者不失其馳，然後射者能中。不失馳騁之節。【補曰】姚鼐曰：「不失其馳者，五馭之逐禽左也。古者取禽，必引車右旋，逐其後，自左射，若御者詭遇則所獲禽必面傷踐毛，謂之不能中。」文烝案：姚說是也。《詩·秦風》「公曰左之，舍拔則獲」，鄭君以爲從禽之左射之。賈公彥《周禮·保氏》疏曰：「逐禽左者，謂御驅逆之車，逆驅禽獸，使左當人

君以射之，人君自左射，故《毛傳》云「自左膘而射之，達於右隅爲上殺」是也。」又《詩·小雅》曰「不失其馳，舍矢如破」，王引之曰：「如破，而破也。舍矢而破，言中之速，正與舍拔則獲同意。」過防弗逐，不從奔之道也。戰不逐奔之義。面傷不獻，嫌誅降。不成禽不獻。惡虐幼少。禽雖多，天子取三十焉，其餘與士衆，以習射於射宮，取三十以共乾豆、賓客、君之庖射宮、澤宮。【補曰】鄭君《詩箋》曰：「三十者，每禽三十也。」《射義》曰：「天子將祭，必先習射於澤。澤者，所以擇士也。已射於澤，而後射於射宮。」射而中，田不得禽，則得禽，田得禽而射不中，則不得禽，【補曰】疏曰：「舊解以爲射宮之內，還射死禽，中則取之，故以重傷爲難。《論語》稱射不主皮，則射皮不射禽也。」是以知古之貴仁義而賤勇力也。射以不爭爲仁，揖讓爲義。【補曰】《墨子·經》曰：「勇志之所以敢也，力形之所以奮也。」案：此對文爲訓也。《毛詩傳》曰：「田者，大艾草以爲防，或舍其中，褐纏旃以爲門，裘纏質以爲櫛，間容握，驅而入，擊則不得人，左者之左，右者之右，然後焚而射

焉。天子發然後諸侯發，諸侯發然後大夫士發。天子發，抗大綏，諸侯發，抗小綏，獻禽於其下，故戰不出頃，田不出防，不逐奔走，古之道也。」又曰：「一曰乾豆，二曰賓客，三曰充君之庖。故自左膘而射之，達于右膊爲上殺，射右耳本次之，射左髀達于右髀爲下殺。面傷不獻，踐毛不獻，不成禽不獻。禽雖多，擇取三十焉，其餘以與大夫士，以習射於澤宮。田雖得禽，射不中，不得取禽。田雖不得禽，射中則得取禽。古者以辭讓取，不以勇力取。」

陳人殺其大夫公子過。【補曰】案：《左傳》招歸罪於過而殺之。

大雩。

冬十月壬午，楚師滅陳。執陳公子招，放之于越。殺陳孔奐。【補曰】楚放殺他國之人，故招、奐並繫國。疏論奐亦然。孔穎達曰：「不言殺陳大夫者，殺他國之臣例不書爵。宣十一年殺夏徵舒是其類。」○【撰異曰】奐，《公羊》作「瑗」。徐彥曰：「《左傳》、《穀梁》作「奐」。惡楚子也。惡其滅人之國，放有罪之人，反殺無辜之臣，故實是楚子而言師。【補曰】疏曰：「九年叔弓會楚子于陳，知滅陳亦是楚子，但爲惡之，故貶稱師也。不

貶稱人而言師者，以楚恃彊滅國，著其用大衆。」劉敞曰：「此楚子也，乘人之亂，滅人之國，執人之賊，殺人之臣，稱爵則疑於伯，稱人則疑於討，滅重矣，故壹見之於師也。」

葬陳哀公。不與楚滅，閔之也。滅國不葬，閔楚夷狄以無道滅之，故書葬，以存陳。【補曰】此注不葬，不與楚滅與閔之二者，皆釋書葬義，既以不與楚滅而變滅國不葬之例，又閔哀公身死國亡，徒爲楚所葬，故志葬也。此葬是楚子葬之，義無可疑，《公羊》及《左氏》賈服說皆以爲楚葬哀公。杜預曰：「魯往會，故書。」非也。史本以楚葬書，上滅陳本稱楚子，執放殺葬，皆承楚子文，君子改言楚師，執放殺葬皆承楚師文也。此與齊侯葬紀伯姬有異。彼上文改史沒齊侯滅紀之文，并不言齊師齊人，故於葬言齊侯。黎錞、齊履謙等已論之矣。閔之，各本誤作「閔公」，今依唐石經、余本、劉敞《權衡》、孫覺《經解》、呂本中《集解》本、張治《集註》改正。

九年春，叔弓會楚子于陳。

許遷于夷。以自遷爲文，而地者，許復見也。夷，許地。徐邈曰：「許十八年又遷于白羽，許比遷徙，所都無

常，居處淺薄。如一邑之移，故略而不月，不得從國遷常例。【補曰】夷，楚地。

夏四月，陳火。【補曰】劉敞以爲是時楚子在陳，

彼告而我弔，故書。劉以諸書外災皆爲弔。○【撰異曰】

火，《左氏》作「災」。徐彥《公羊》疏曰：「《左氏》作「災」字，

《穀梁》與此同。」國曰災，【補曰】謂內外諸災。邑曰

火。【補曰】謂此陳火，災與火一也，別事大小耳。火不

志，此何以志？【補曰】不志者，《經》例因史例也。

閔陳而存之也。陳已滅矣，猶書火者，不與楚滅也，不

可以方全國，故不云災。何休曰：「月者，閔之。」【補曰】范

引上「不與楚滅」本《漢書·五行志》劉向說，其實未當。閔

陳者，閔陳之亡，與上閔之同，而所從言之則異。閔哀公，

故書葬，閔陳而欲存之，故書火。書葬者，變滅國不葬之

例，兼有不與楚滅之意。書火者，變邑火不志之例，專是閔

陳而存之也。閔陳與閔紀同義，存陳與存遂同文。不去月

者，亦是閔而存之，又與紀伯姬、叔姬日葬相似。《公羊》曰

「存陳」，亦與《傳》同。何休解爲天意欲存之。劉敞曰：

「此自聖人欲存之，故錄爾，安知天意？」

秋，仲孫矍如齊。【補曰】矍，孟僖子也。《左傳》

曰：「如齊殷聘。」郝懿行曰：「七年叔孫蒍盟，蓋以聘往，至是間一年，合於殷相聘之制。」

冬，築郎囿。

十年春王正月。

夏，齊樂施來奔。○【撰異曰】齊，《公羊》作

「晉」，王葆曰：「誤。」張洽亦曰：「非也。」

秋七月，季孫意如、叔弓、仲孫矍帥師伐

莒。【補曰】意如，宿之孫季平子也。意如父悼子，名紇。

《左傳》曰：「平子伐莒取郕。」陳傅良曰：「舍中軍矣，曷爲

書三卿帥師？四分公室，叔弓爲意如貳也。」文彞案：月

者，爲下卒日。○【撰異曰】意，《公羊》作「隱」，後同。案：

《少儀》注：「隱，意也。」聲轉字通。《史記》「蘇意」，《漢紀》

作「蘇隱」。

戊子，晉侯彪卒。

九月，叔孫婁如晉。月者，爲葬晉平公起。

葬晉平公。

十有二月甲子，宋公成卒。不書冬，甯所未

詳。【補曰】昭之世不得爲遠，此自與夏五《傳》疑異，以壬申失其所繫之義推之，蓋必有說矣。何休曰：「去冬者，蓋昭公取吳孟子之年，故貶之。」孔廣森曰：「《坊記》云『魯春秋』去夫人之姓曰吳，謂書夫人至自吳，不書姬氏是不脩《春秋》文如是，君子脩而削之矣。蓋事在是冬十月或十一月，不存其事，故亦不存其月。若移冬於十有二月之上，則諱意不顯，故去冬也。此《公羊》師說相承，必有所受。」

○【撰異曰】成，《公羊》作「戌」。案：何休元年下注：「戌，惡，皆與君同名。」《音義》曰：「讀《左傳》者音城，何云向戌與君同名，則宜音恤。」

十有一年春王二月，叔弓如宋。【補曰】月者，爲葬。○【撰異曰】二月，《公羊》作「正月」。

葬宋平公。晉獻公以殺世子申生，故不書葬，宋平公殺世子座而書葬，何乎？何休曰：「座有罪故也。」座之罪甯所未聞。鄭莊公殺弟而書葬，以段不弟也，何氏將以理例推之。然則段不弟也故不書弟，座若不子，亦不應書世子，書世子則座之罪非不子明矣。【補曰】疏曰：「申生賢孝，遇讒而死，故黜獻公之葬。座雖無不子之文，微有

小罪，故不黜平公之葬。若然，范云未聞者，不直取何休之說故也。何氏直謂座有罪，如鄭段之比。」

夏四月丁巳，楚子虔誘蔡侯般殺之于

申。【補曰】《說文》曰：「羞，相誅呼也。从△羞。誘，或从言秀。」《左傳》曰：「曲沃伯誘晉小子侯殺之。」又曰：「誘祭仲而執之。」何休曰：「使不自知而死，故加誘。」○【撰異曰】虔，本或作「乾」。陸渚所見作「乾」。何爲名之也？據諸侯不生名。【補曰】謂虔。夷狄之君誘中國之君而殺之，故謹而名之也。稱時、稱月、稱日、稱地，謹之也。蔡侯般，弑父之賊，此人倫之所不容，王誅之所必加。禮：凡在官者殺無赦，豈得惡楚子殺般乎？若謂夷狄之君不得行禮于中國者，理既不通，事又不然。宣十一年楚人殺陳夏徵舒，不言人，《傳》曰「明楚之討有罪也」，似若上下違反，不兩立之說。嘗試論之曰：夫罰不及嗣，先王之令典，懷惡而討，丈夫之醜行，楚虔滅人之國，殺人之子，伐不以罪亦已明矣，莊王之討徵舒則異於是矣。凡罰當其理，雖夷必申，苟違斯道，雖華必抑，故莊王得爲伯討，齊侯不得滅紀，趙盾救陳則稱師以大之，靈王誘蔡則書名以惡之，所以情理俱暢，善惡兩顯，豈

直惡夷狄之君討中國之亂哉？夫楚靈王之殺蔡般亦猶晉惠之戮里克，雖伐弑逆之國，誅有罪之人，不獲討賊之美而有累謹之名者，良有以也。【補曰】疏曰：「兩立之說，謂兩理皆立之說。又解謂兩事立說。或以爲「不」字下讀，云不兩立之說，謂事不得兩立，恐非也。伐弑逆之國，謂蔡；誅有罪之人，謂里克；累，謂晉惠，彼《傳》罪累上是也；謹，謂楚靈，此《傳》謹之是也。」文烝案：楚靈內懷利心而外託討賊，已於「誘」字見義，不待煩言也。至於謹名以爲特文，又謹時、謹月、謹日、謹地以盈其文，則全以夷狄之誘殺中國起義，不專以誘殺起義，若中國誘殺中國，無爲謹之又謹如是也。中國誘殺夷狄更可知也，夷狄誘殺夷狄則戎蠻子尤有明文也。《傳》之釋《經》，平淡精審，注意欲亂華夷之別，謬矣。莊王入陳，《傳》亦曰「不使夷狄爲中國」，注不知引彼《傳》以明同，反引殺徵舒《傳》以明異，何邪？誘殺雖託討名，其實既謂之誘，不得復謂之討。《公羊》言「誘討」，而《傳》不言討，與殺徵舒、殺慶封《傳》不同，此《傳》義所以爲密也。殺慶封《傳》言「不與楚討」，謂其以賊討賊，此處在所不論也。

楚公子棄疾帥師圍蔡。○【撰異曰】棄，《左氏》或作「弁」。後同。

五月甲申，夫人歸氏薨。昭公母胡女。歸姓。【補曰】襄公姜敬歸之娣也。孔廣森曰：「《左傳》會于沙隨之歲，襄公始生，《公羊》於成十六年《傳》猶言公幼。襄之娶定在即位以後，而襄夫人《經》絕不見者，似本未有正嫡云。」文烝案：此即孔穎達之意。

大蒐于比蒲。夏而言蒐，蓋用秋蒐之禮。八年秋蒐于紅，《傳》曰「正也」。此月大蒐，人衆器械有踰常禮，時有小君之喪，不譏喪蒐者，重守國之衛，安不忘危？【補曰】比蒲，魯地。疏曰：「注引《傳》者，引正以譏不正。」文烝案：據《左傳》晉叔向之言則喪蒐又非禮，《經》意亦足兼見，范何以決其不譏乎？齊履謙曰：「《穀梁》於毀泉臺曰「喪不貳事」，貳事，緩喪也。《左氏》於大蒐比蒲曰「君有大喪，國不廢蒐。有三年之喪，而無一日之感」，二《傳》相發明。」汪克寬曰：「君有喪，既葬卒哭，而服王事，大夫士有喪，既葬卒哭，弁經帶，從金革之事，惡有小君之喪未葬而不廢講武常事乎？」

仲孫纁會邾子盟于侵祥。侵祥，地也。【補曰】當云地闕。不日者，或與虛杙同歟？何休曰：「蓋諱喪盟。」○【撰異曰】侵祥，《公羊》作「侵羊」。徐彥曰：「《穀

梁傳「作『侵祥』字。服氏注引者直作『詳』字，無『侵』字，皆是所見異也。」段玉裁曰：「據《音義》，《穀》同《左》作『侵祥』，而徐彥引《穀》上字作『侵』，服引《穀》但有『詳』一字，可見古本不同至多，《音義》不能盡載也。」文烝案：杜預《釋例》：「侵祥、祥，二名。」意《左氏》經爲「侵祥」，《傳》爲「祥」歟？

秋，季孫意如會晉韓起、齊國弱、宋華亥、衛北宮佗、鄭罕虎、曹人、杞人于厥慙。

厥慙，地也。【補曰】亦當云地闕。○【撰異曰】弱，《公羊》作「酌」。罕，作「軒」。厥慙，作「屈銀」。徐彥曰：「齊國酌者，賈氏作「酌」字，與此同。服氏及《穀梁》皆作「齊國弱」字也。屈銀，《左氏》、《穀梁》作「厥慙」字。」

九月己亥，葬我小君齊歸。齊，謚。

冬十有一月丁酉，楚師滅蔡，執蔡世子友以歸，用之。僖十九年「邾人執繒子用之」，《傳》曰

「用之者，叩其鼻以衄社」，惡之故，謹而日之。【補曰】注引「衄社」之文，非也。《左傳》曰：「用隱太子于岡山。」杜預曰：「殺以祭山。」《公羊》曰：「用之防。」又申之曰：「蓋以築防。」何休曰：「持其足以頭築防，皆不以爲祭社。」疏

曰：「滅中國當日，用人亦當日，皆《傳》例也。注嫌用之，不得蒙日，故特言之。」○【撰異曰】友，《左氏》、《公羊》作「有」。案：《荀子》曰：「友者，所以相有也。」此子也，諸侯在喪稱子。其曰世子何也？【補曰】見以又見用，宜稱蔡子友。不與楚殺也。一事注乎志，所以

惡楚子也。一事輒注而志之也。何休曰：「即不與楚殺，當貶楚爾，何故反貶蔡稱世子邪？」鄭君釋之曰：「滅蔡者，楚子也，而稱師，固已貶矣。楚子思啟封疆而貪蔡，誘殺蔡侯般，冬而滅蔡殺友，惡其淫放其志，殺一國二君，以取其國，故變子言世子，使若不得其君終。」【補曰】三句相屬爲義，下二句倒文，猶曰所以惡楚子一事注乎志也，一事猶一役也。楚有事於蔡，由誘殺而圍而滅，非再舉也。注，屬也。范云「注而志之」即鄭云「淫放其志」是也。疏曰：《經》稱棄疾圍蔡、鄭，知是楚子者以棄疾若貶，當云楚人，不當稱師。又《傳》云「惡楚子」，明非棄疾矣。然則惡楚子變文云世子者，以楚四年之中滅兩國，殺二君，自謂得志，若遂其凶暴，是表中國之衰，申夷狄之彊，故抑之，使若不得其君也。世子父沒仍得稱世子，母弟兄死不得稱弟者，世子繼體之名，父雖沒，若意有所見則亦得稱之。弟者



對兄，兄沒則寵名棄矣，故不得稱弟也。」文烝案：凡言以其君歸者，《傳》云猶愈乎執，此以「以歸」連文，又加執者，稱世子不稱子，因以別之，兼見囚繫之，如啖助說也。《公羊》以爲「未踰年君稱世子」者，誅君之子不立，不君靈公，故不成其子，與《傳》異也。師協曰：《春秋》書滅國多矣，未有如此其暴者，詳其始末而記之。書誘、書殺、書圍、書執、書用，深惡之也。」師氏說有合《經》旨。王引之乃以爲《傳》之「注」當爲「詳」，「詳」字左旁草書與「𠂔」相似，右旁與「主」相似，故「詳」誤爲「注」。志者，記也。文烝案：《傳》論稱世子之義，不得以詳記爲說，王氏改字不可從。《傳》「注」字，依《音義》張具、之住二音爲是。

十有二年春，齊高偃帥師納北燕伯于陽。三年所奔齊者。高偃，僂玄孫，齊大夫也。陽，燕別邑。不言于燕，未得國都也。【補曰】此皆本杜預。言玄孫者，據《世本》也。《左傳》曰：「敬仲之曾孫鄒。」○【撰異曰】陸渚《纂例》曰：「《左氏》作『北燕伯款』。」案：今《左氏》無「款」字，蓋陸誤記《傳》文也。《傳》又以「陽」爲「唐」，《說文》：「陽，古文唐，从口易。」疑《左氏經》本作「陽」。納

者，內不受也。【補曰】重發《傳》者，此稱帥師，嫌不同也。納稱帥師，義在哀二年《傳》。燕伯之不名何也？據義不可受，則應名以絕之。不以高偃挈燕伯也。邵曰：「公子遂以去公子爲挈，燕伯以書名爲挈者，臣宜書名，故須去公子乃爲挈。君不可名，而以臣名君者，不待去燕伯則爲挈也。是以目燕伯而不書名，所以不與高偃挈之。」【補曰】疏曰：「楚人圍陳納頓子，稱納而不名，衛侯入于夷儀亦不名，則不名乃是常事。而《傳》怪燕伯不名者，衛侯朔入于衛，《傳》曰「朔之名，惡也」，則諸侯有惡，出入皆名。北燕伯亦出入宜名，但不以高偃挈之，故直出書名而已。頓子不名者，爲楚微者所納，故亦不名。衛侯入于夷儀不名者，以復歸有名，故未入國，略而不名也。鄭伯突亦未入國書名者，以後不書復歸，故人機書名也。」文烝案：疏言「爲楚微者所納」，非也，當改云以楚人爲文。

三月壬申，鄭伯嘉卒。

夏，宋公使華定來聘。

公如晉，至河乃復。季孫氏不使遂乎晉

也。【補曰】疏曰：「二年《傳》曰『惡季孫宿』，今此譖君之季孫是意如，故重明之。云季孫氏者，欲見其累世同惡。」

### 五月，葬鄭簡公。

楚殺其大夫成虎。○【撰異曰】虎，《左氏》作

「熊」，《公羊》作「然」。徐彥曰：「《左氏》作『成熊』，《穀梁》作『成虔』字。」案：今《穀梁》作「虎」，《左氏經》作「熊」。而《傳》中「成虎」字四見，與今《穀梁》合，徐疏「虔」字當由寫者避諱而誤耳。段玉裁以爲「然」與「熊」字之誤，「虔」與「然」聲之轉。楚靈王名虔，君臣同名，是以作「然」爲正，而「熊」、「虎」皆誤字。失之矣。

### 秋七月。

冬十月，公子慙出奔齊。【補曰】公子慙，子

仲也。慙非卿，書奔，與臧孫紇同。紇日此不日，蓋史略之。○【撰異曰】慙，《公羊》作「整」。張洽曰：「字之誤也。」《公羊》亦或作「慙」。段玉裁曰：「《左氏音義》云『慙，一讀爲整』，非也。慙無整音。」

### 楚子伐徐。

晉伐鮮虞。其曰晉，狄之也。其狄之何

也？【補曰】據霸國，非秦、鄭比。不正其與夷狄交

伐中國，故狄稱之也。鮮虞，姬姓，白狄別種也。地

居中山，故曰中國。夷狄，謂楚也。何休曰：「《春秋》多與

夷狄並伐者何？以不狄也。」鄭君釋之曰：「晉不見因會

以綏諸夏而伐同姓，貶之可也。狄之大重，晉爲厥慙之會，

實謀救蔡，以八國之師而不能救，楚終滅蔡，今又伐徐，晉

不糾合諸侯以遂前志，舍而伐鮮虞，是楚而不如也，故狄稱

之焉。」厥慙之會，《穀梁》無《傳》，鄭君之說，似依《左氏》，

甯所未詳，是《穀梁》意非。【補曰】注解鮮虞，本杜預，杜惟

不言姬姓耳。疏曰：「麋信云『與夷狄交伐謂楚伐徐、晉伐

鮮虞』是也。范意與麋信同。范云『甯所未詳，是《穀梁》意

非』者，疑鄭以厥慙之會謀救蔡者作《穀梁》意也。若然，范

《答薄氏》亦言楚滅陳、蔡，而晉不能救。棄盟背好，交相伐

攻者，范意以晉不能救陳、蔡者，不據厥慙之會故也。」文烝

案：范謂如鄭所言，則《穀梁》意非矣。以《傳》指楚伐徐，

而鄭乃指楚圍蔡滅蔡，疑未可用，與《答薄氏》意自是不同，

疏誤會范意而范又誤會鄭意也。鄭意亦謂《傳》指伐徐，特

連圍蔡滅蔡言之以盡其義。晉合諸侯，不能救蔡，致爲楚

滅，今楚又伐徐，晉并不能合諸侯，乃伐鮮虞，《春秋》不正

其交伐，故上書楚子而此則狄晉，以明晉不如楚也。會厥慙不能救蔡，既據《左傳》文，亦本何氏意。觀《公羊》注可知此條「晉不見因會」二句亦是何氏自爲說，以釋狄晉之義，不復取義於伐徐，故鄭駁之以爲狄之大重也。文系統觀何、鄭、麋、范諸說，鄭最爲近之，而亦終有未盡。今案：襄二十七年盟于宋，晉、楚弭兵，而三十年《傳》曰「無侵伐八年」，則明昭元年晉荀吳敗狄一事，《經》所不論，以其絕遼遠也。自後楚三伐吳、滅厲、滅陳、圍蔡、滅蔡、殺蔡二君，至此又伐徐，背盟用兵，暴橫不道者皆楚也。晉未嘗一用兵，用兵於此焉始，舍楚不問，乃伐鮮虞，非有特文不足著義。以其與夷狄交伐，則亦夷狄而已矣，故曰不正其與夷狄交伐中國，故狄稱之也。中國兼陳、蔡、徐、鮮虞言之，成九年《傳》曰「莒雖夷狄，猶中國也」，徐亦其比也。鮮虞則地近而同姓也。《傳》連陳、蔡通謂之中國，要以晉不能伐楚而反與楚共伐人，大概言之也。弭兵則善之，用兵則狄之，取義之相因也。楚則生名之，晉則狄之，立文之相稱也。《經》既深微，《傳》亦簡淡，自來遂失其解，實則前後貫通。

### 十有三年春，叔弓帥師圍費。【補曰】趙匡

曰：「凡內自圍者，皆叛邑。」陳傅良因之曰：「內不言叛，言

圍皆叛也。」文烝案：是年圍費，《左傳》稱南蒯以費叛如齊；定十年圍郕，《左傳》稱侯犯以郕叛；而續經哀十五年春王正月，成叛，明是魯史書叛之文，則圍費、圍郕必先言叛可知矣。二十九年書鄆潰，以昭公居之，故變言潰，其實亦是叛。君子脩《經》，以鄆潰事關君身，不可不書。費、郕皆私邑，其叛由家臣，可爲魯諱。又以鄆不言潰，無以見其事，費、郕雖不言叛，猶存圍文，則未嘗無以見之，故鄆潰書，費叛郕叛不書。至若成三年圍棘，定六年圍鄆，則疑史本無叛文，昭、定兩圍成亦皆非叛。○馮景曰：「孔子不言禮樂征伐自陪臣出，而曰執國命者，禮樂征伐之事，必交乎四鄰，而國命不出竟。南蒯之徒，皆以家臣執國命者也，《春秋》賤而略之。故南蒯以費叛不書，書圍費，陽虎人于讎，陽關以叛不書，書盜竊；侯犯以郕叛不書，書圍郕；公山不狃帥費人以襲魯不書，書墮費；所謂微而顯。」

夏四月，楚公子比自晉歸于楚，弑其君虔于乾溪。乾溪，楚地。【補曰】虔，靈王也。疏曰：

「《左氏》以爲楚子次于乾谿，《公羊》以爲作乾谿之臺，范從《左氏》也。」杜預說《左氏》曰：「靈王死在五月，又不在乾谿，楚人生失靈王，故本其始禍以赴之。」杜是也。史從赴

書四月，書乾溪，不可改也。哀六年，不以陽生君荼，度立比奔。得以比君虔者，胡銓以爲虔於比爲兄，居君位已十二年，雖使聲罪討之而代立，猶不免爲爭國。胡安國以爲晉人以羈待比，固楚之亡公子也，楚又未嘗錮之，君臣之分猶在。二說皆是歸不言復者，被脅立不復大夫位。○【撰異曰】溪，《左氏》、《公羊》作「谿」。自晉，晉有奉焉爾。【補曰】疏曰：「重發《傳》者，楚比之歸，實歸非弑，嫌自亦非晉力，故復明之。」案：惠士奇據《左傳》叔向曰「去晉而不送」，以爲晉無有奉，非也。比久仕晉，安得無奉？不必送者多人始爲奉也。《左氏》賈逵說「諸稱自者，所自之國有力」，正用《傳》例。杜預據叔向語駁之，惠氏所本。歸而弑，不言歸，言歸，非弑也。《傳例》曰：「歸爲善，自某歸次之，然則弑君不得言歸，比不弑之一驗也。」【補曰】此下皆論比弑之非弑，而以不弑有四總結之。此先釋言歸義也。《傳例》曰：「以好曰歸，以惡曰人，齊陽生歸而弑其君，言人是也。」注未了。歸一事也，弑一事也，而遂言之，以比之歸弑，比不弑也。歸弑其事各異，自宜別書之，而今連言之，是比之歸遇君弑爾，比不弑之二驗也。【補曰】疏曰：「齊小白入于齊，齊人取

子糾殺之，齊陽生入于齊，齊陳乞弑其君荼。彼各異書，明知此亦宜別書之。」文烝案：五句釋言歸、言弑之義，《經》之正旨也。其歸也于楚，一事也；其弑也于乾溪，又一事也。《經》不再出「楚公子比」四字而連文言之，有似遂事之辭，與圍陳納頓之文同例，明以比之歸于楚而遙弑其君于乾溪也。注云比之歸遇君弑，其於遙弑之意未切，如注說則《經》宜於「弑」上加言楚人，故知非也。比歸遙弑，則不弑明矣，故曰比不弑也。時楚諸謀亂者召比歸楚，脅立爲王，靈王身在乾溪，衆叛於內，師潰於外，徬徨無歸，終於縊死。楚人之赴，本其始禍，故以比主弑而史因書之。或即以遙弑爲文，而君子因之，或本再出楚公子比，而君子損其文，未敢定焉。《公羊》以爲比之義宜乎放死而不立，故加弑，其說亦得之。《傳》言不弑，明爲王非比本心，但不若放死不立之爲善耳。「放死」句見殷敬順《列子釋文》，又引劉兆注曰：「放，至也。」今本《公羊》作「效死」，與《繁露》同。弑君者曰，不日，比不弑也。據文元年丁未楚世子商臣弑其君髡日，此不日，比不弑之三驗也。

楚公子棄疾殺公子比。○【撰異曰】殺，《公羊》作「弑」。程端學曰：「案：《經》但書公子，不曰其君，不

可言弑。」汪克寬亦云。段玉裁曰：「譌字也。」文彙案：《公羊》經傳凡下殺上之字皆用「弑」字，而此《經》弑公子比則師讀之譌也，二十五年《傳》昭公將弑季氏則轉寫之譌也。當上之辭也。當上之辭者，謂不稱人以殺，乃以君殺之也。稱人以殺，謂若衛人殺祝吁于濮是也。今比實不弑，故以君殺大夫之辭言之。【補曰】疏曰：「謂不稱人以殺，而云楚公子棄疾殺公子比，如王札子殺召伯、毛伯也。」討賊以當上之辭，殺非弑也。實有弑君之罪，則人人皆欲殺，宜稱人以殺之，今言楚公子棄疾殺公子比，明棄疾所殺，非弑君之人，比之不弑四驗也。比之不弑有四。上四事。取國者稱國以弑，若比欲取國而弑君者，當直云楚比弑其君虔，不應言公子也，若衛祝吁弑其君完，齊無知弑其君諸兒之類是也。【補曰】當直稱國而不直稱國，又於四事外見其不弑，《傳》意并下句專以明其不嫌也。楚公子棄疾殺公子比，比不嫌也。今棄疾殺之，又言殺公子比，不言弑其君，是比無欲為君之嫌。【補曰】疏曰：「齊公子商人弑其君舍，雖未踰年稱君，是有言弑其君之理，故范決之。」《春秋》不以

嫌代嫌，不以亂治亂之義。棄疾主其事，故嫌也。比實無弑君之罪，而主殺之者，是棄疾欲為君之嫌。

【補曰】疏曰：「《春秋》不以嫌代嫌者，謂比歸而遇弑，雖則無嫌，棄疾之意亦以比欲為君之嫌而殺之，是棄疾以比為嫌，棄疾殺比而自立亦是嫌也。今棄疾不以國氏者，不以嫌代嫌故也，若以嫌代嫌，當云楚棄疾殺公子比也，但由不以嫌代嫌，故存棄疾之氏耳。《傳》言棄疾主其事，故嫌也者，棄疾殺比，理實有嫌，但為不以嫌代嫌，故《經》無其事。《傳》以棄疾，《經》無嫌文，故云棄疾主其事，故嫌也。主其事者，主殺比之事也。」

秋，公會劉子、晉侯、齊侯、宋公、衛侯、鄭伯、曹伯、莒子、邾子、滕子、薛伯、杞伯、小邾子于平丘。平丘，地也。【補曰】當云衛地。

八月甲戌，同盟于平丘。公不與盟。【補曰】與，即豫、預字。○【撰異曰】陸淳《纂例》曰：「甲戌，《穀梁》作「庚戌」。」案：今不作「庚戌」。同者，有同也，同外楚也。【補曰】疏曰：「又重發《傳》者，平丘以下，中國微弱，外楚之事，盡於平丘，從此以後，不復能外，

故發《傳》以終之。」程子曰：「楚棄疾立，諸侯懼之。」公不

與盟者，可以與而不與，譏在公也。公以再如

晉不得人，故不肯與盟。【補曰】注非也。既曰「不肯」，何

云「不與」？鄭伯逃歸不盟，直言不盟，爲不肯盟之文，此

言不與盟，明其不得與於盟，非不肯也。據《左傳》，既會之

後，邾、莒愬於晉，晉侯不見，公使叔向辭魯，毋與盟，與沙

隨不見公略相似。《公羊》釋「弗遇」曰「公不見要也」，釋

「齊侯弗及盟」曰「不見與盟也」，釋「不見公」曰「公不見見

也」，釋「公不與盟」曰「公不見與盟也」，明數者之事皆略相

似。今此不書不見公者，公既列會，則盟有可與之理，乃因

不能治國，啟釁邾、莒，致爲所愬，屏不得與，故以公主其

文，而書不與盟。不譏諸侯，獨譏公也。其日，善是盟

也。公不與盟，當從外盟不日，今日之，善其會盟，因楚有

難，而反陳、蔡之君。【補曰】劉敞以爲是盟請命於天子，與

滅繼絕，得與宋盟，俱比葵丘。葉夢得亦云。文烝案：上

年狄晉矣，若依常例不日，無以見其善，故特日之。

晉人執季孫意如以歸。以公不與盟故。【補

曰】依《左傳》，當言爲邾、莒執之。

公至自會。【補曰】吳澂曰：「公雖不與盟，已與會

矣，故致。」

蔡侯廬歸于蔡。陳侯吳歸于陳。八年楚

滅陳，十一年楚滅蔡，諸侯會而復之，故言歸。【補曰】《傳》

例歸者，歸其所，此《傳》所謂，如失國辭然也。《左傳》例曰

「復其位曰復歸」，與《傳》同。又曰「諸侯納之曰歸」，與

《傳》異。范依《左氏》爲說，非也。《傳》以爲因會而歸，論

其事耳，非釋歸也。此事在時例。○【撰異曰】廬，《左氏》

蓋當作「廬」，依二十年《音義》知之。善其成之會而

歸之，故謹而日之。二國獲復，此盟之功也，故於其

歸，追述前盟。謹日之，意以美諸侯存亡繼絕，非謹陳、蔡

歸國之日也。於盟則發謹日之美，於歸則論致美之義。

【補曰】之會，是會也。何休曰：「時諸侯將征棄疾，棄疾乃

封陳、蔡之君。」何氏說此事大概得之。《左傳》載平丘之

會，晉甲車四千乘，其言或涉浮誇，而用衆當爲實事。意當

日因楚有難，聲言伐楚，楚畏晉衆，遂封二國，以示公義，故

上《經》有同外楚之文。而《傳》言成，是會而歸之也。《左

傳》於楚封陳、蔡，惟美平王，蓋專據楚國史書而又失之浮誇

也。何氏言征棄疾，亦非也。《公羊》於上《經》比之弑虔，

「歸罪棄疾殺比」之《經》，又誤作「弑」，以棄疾爲賊，以上會

爲遂亂反陳、蔡。何氏以爲諸侯從陳、蔡之君言，還反不復討楚，楚亂遂成，其說皆不可用也。此未嘗有國也，使如失國辭然者，不與楚滅也。【補曰】稱爵稱名而言歸，是諸侯失國之辭。以失國辭言之，若其本有國，明不與夷狄滅中國，苟可以寄其意者即寄之也。言歸不言復者，未嘗有國，不沒其實。疏曰：「雖同失國之辭，實未嘗有國，故不得言復歸也。」文烝案：蔡稱侯在葬前，而其葬非他例可比，與夷陵、陳稱侯略同。

冬十月，葬蔡靈公。變之不葬有三：變之，謂改常禮。《春秋》之常，小國、夷狄不葬。【補曰】疏曰：「彼不赴，我不會，及小國與夷狄不書葬，舊史之常也。變之不葬，謂舊合書葬而仲尼改之。」文烝案：隱三年徐注及此注合之，義乃備。疏是也。失德不葬，無君道。弑君不葬，謂不討賊，如無臣子。滅國不葬，無臣子也。然且葬之，【補曰】《孟子》曰「然且至」、「然且不可」、「然且仁者不爲」，是當時文體。不與楚滅，且成諸侯之事也。蔡靈公弑逆無道，以致身死國滅，不宜書葬。書葬者，不令夷狄加乎中國，且成諸侯興滅繼絕之善，

故葬之。【補曰】滅國復封，無危文者，文相接，從可知，與鄭莊公同也。隱天子乃未踰年君，故不志葬。廬者，隱天子之子也，然則《公羊》所云「有子則廟，廟則書葬」者，殆不然矣。

公如晉，至河乃復。

吳滅州來。【補曰】疏曰：「虞、虢之滅，由於夏陽之亡。州來，楚之大都，而吳滅之，令楚國稍弱，入郢之兆，由滅州來所致，故並書滅。」

十有四年春，意如至自晉。【補曰】大夫致例時。大夫執則致，致則名，【補曰】疏曰：「重發《傳》者，單伯書字，意如則書名，嫌異故也。」文烝案：此不言由上致之者，省文。意如惡，【補曰】前譖訴君，後逐君，知其本惡。然而致見，君臣之禮也。大夫有罪則宜廢之，既不能廢，不得不盡爲君臣之恩，故曰見君臣之禮。【補曰】敬大臣，體群臣，是之謂禮。上《傳》曰「失德不葬。然且葬之」，此《傳》曰「意如惡，然而致」，所謂《春秋》書王法，不誅其人身，至明至著。胡安國據《左傳》說之曰：「其始執之，爲乏邾、莒之供，其終歸之，爲土地猶大，所命能具。晉惟以利，故平丘之後，諸侯不合二十餘年，至



於召陵又以賄敗。「高閔略同。黃震曰：「平丘之會，以威始之，以利終之。」文烝案：《春秋》善是會，不論此等之事，以其有益於論史，姑記之。

三月，曹伯滕卒。

夏四月。

秋，葬曹武公。

八月，莒子去疾卒。【補曰】莒著丘公。疏

曰：「不正前已見，可以書日。今月者，莒行夷禮，本無嫡庶日不日之例。」文烝案：莒、吳卒皆月而已。

冬，莒殺其公子意恢。言公子而不言大

夫，莒無大夫也。莒無大夫而曰公子意恢，

【補曰】傳曰「公子之重視大夫」，言公子，是猶有大夫。意恢賢也。【補曰】賢之，故舉其貴者。曹、莒皆無

大夫，其所以無大夫者，其義異也。曹叔振鐸，

文王之子。武王封之于曹，在甸服之內，後削小爾。莒，已姓東夷，本微國。【補曰】疏曰：「總而言之則小國無大夫，

就事而釋則曹、莒有異。」文烝案：《傳》意指莊二十六年曹殺其大夫言之，一則明言大夫而以不稱名姓，微見其無大

夫，一則不言大夫，明見其無大夫。同是崇賢，書之各別，由其所以無大夫者其義有異，如注所云也。盟會之序，許、曹、莒、邾相次，君卒葬則曹與許爲類，大夫奔則莒與邾爲類，二國不同亦明矣。

十有五年春王正月，吳子夷末卒。【補

曰】吳句餘也。服虔以句餘爲餘祭，非也。○【撰異曰】末，《公羊》作「昧」，音末。亦或作「末」。

二月癸酉，有事于武宮。籥人，叔弓卒，

去樂卒事。【補曰】《左傳》曰「禘于武公」。案：魯禘無

常月，此不行春祠植祭之禮而行禘，言武宮，則明大廟及群廟皆禘矣。事在武宮，故言武宮，爲下變禮張本，故略之言有事也。言籥人不言萬者，陳旃以爲但有羽籥，不用干戚，祭群廟異於大廟也，唯大廟得用天子禮。文烝案：《左傳》

禘襄公有萬，又稱考仲子之宮，將萬焉，公問羽數。彼兩言萬，蓋專指羽籥舞耳。孔穎達曰：「去樂者，鍾鼓管磬悉皆去之，非獨去籥舞。」何休曰：「日者，爲卒日。」君在祭樂之中，聞大夫之喪則去樂卒事，禮也。祭樂者，君在廟中祭作樂。【補曰】何休曰：「卒事，畢竟祭事。」孔



廣森曰：「去樂者，哀也。卒事者，君事重也。」文烝案：《傳》明以得禮書也，以爲籥人而聞叔弓卒，皆與《公羊》同，與《左傳》言叔弓泣事異。君在祭樂之中，大夫有變，以聞可乎？變，謂死喪。【補曰】疏曰：「復問言禮意。」大夫，國體也，君之卿佐，是謂股肱，故曰國體。古之人重死，君命無所不通。死者不可復生，重莫大焉，是以君雖在祭樂之中，大夫死，以聞可也。【補曰】疏曰：「命，告也。」孔廣森曰：「非卿喪則不得以聞。《檀弓》：『衛有大史曰柳莊，寢疾，公曰：『若疾革，雖當祭必告。』明非有命則不敢告正，以大史非卿故也。』孔說視啖助、劉絢爲勝。」

夏，蔡朝吳出奔鄭。朝吳，蔡大夫。○【撰異曰】朝，《公羊》作「昭」，無「出」字。徐彥曰：「《左氏》、《穀梁》皆言「朝吳出奔鄭」，今此作「昭吳」字，又不言「出」者，所見之文異。」

六月丁巳朔，日有食之。

秋，晉荀吳帥師伐鮮虞。

冬，公如晉。

十有六年春，齊侯伐徐。【補曰】李廉曰：「此齊景公爭伯之始事。」

楚子誘戎蠻子殺之。楚子不名，戎蠻子非中國故。【補曰】即《公羊》所云「若不疾乃疾之也」。孔穎達曰：「戎是種號，蠻是國名，子爵也。」文烝案：言戎蠻猶言赤狄潞氏也。戎蠻子例不得名，楚亦不名，又不月、不日、不地者，略戎以別於蔡也。《春秋》詳略之例，如公之追齊、追戎，楚之誘蔡、誘戎，其最著者也。○【撰異曰】蠻，《公羊》作「曼」。

夏，公至自晉。【補曰】以《左傳》推之，上如晉蓋十一月末，此至蓋四月初，實未滿二時，故不月。

秋八月己亥，晉侯夷卒。○【撰異曰】陸渚《纂例》曰：「亥，《公羊》作「丑」。案：今《公羊》不作「丑」。

九月，大雩。

季孫意如如晉。

冬十月，葬晉昭公。○【撰異曰】陸渚《纂例》曰：「《公羊》作十有一月。」案：今《公羊》亦作「十月」。

十有七年春，小邾子來朝。

夏六月甲戌朔，日有食之。

秋，邾子來朝。

八月，晉荀吳帥師滅陸渾戎。滅夷狄時，潞

子嬰兒賢則日。此月者，蓋亦有殊于常戎。【補曰】或當以陸渾戎處於伊川，在雒西南畿甸之地。重而詳之，故進從卑國例。案：《左傳》周本有伊、雒之戎，至僖二十二年，秦、晉又遷陸渾之戎於伊川也。洪咨夔以《左傳》事論之曰：「荀吳在春秋最善兵，敗狄則舍車崇卒，伐鮮虞則僞會而假道，滅陸渾則先用牲於雒，乘其不虞而從之，戰國孫、吳、廉、白之先導也。」○【撰異曰】《左氏》作「陸渾之戎」，《公羊》作「賁渾戎」。

冬，有星孛于大辰。【補曰】《左傳》載申須、梓

慎、裨竈語，為四國俱災之應，梓慎之占最詳，而申須言「彗所以除舊布新也，天事恒象」，其說近正。劉向以為《星傳》曰：「心，大火，①天王也。其前星，太子；後星，庶子也。」字星加心，象天子適庶將分爭也。其在諸侯，角、亢、氐、陳、鄭也；房、心，宋也。」文烝案：不月者，歷月也。一有

一亡曰有。【補曰】前發字義，此發有義，嫌星與蟲不同

類也。于大辰者，濫于大辰也。劉向曰：「大辰者，大火也。」不曰孛于大火而曰大辰者，謂濫于蒼龍之體，不獨加大火。【補曰】《爾雅》曰：「大辰，房、心、尾也。大火謂之大辰。」大火謂心也，又次名也。自氐五度，至尾九度，濫也。東官、蒼龍、心三星，房四星，角二星，亢四星，氐四星，尾九星，箕四星。《左傳》曰「有星孛于大辰，西及漢」，杜預曰：「夏之八月，辰星見在天漢西。今孛星出辰西，光芒東及天漢。」顧炎武曰：「有星孛入于北斗，不言所起，重在北斗也。有星孛于大辰，不言及漢，重在漢也。」

楚人及吳戰于長岸。長岸，楚地。【補曰】《左

傳》楚司馬子魚曰「我得下流」，杜預以為「順江而下」，是吳以舟師泝江伐楚也。姜炳璋曰：「此大江水戰之始。」文烝案：何休曰：「不月者，略兩夷。」兩夷狄曰敗，夷狄不能結日成陳，故曰敗，於越敗吳于檣李是也。【補曰】凡戰以結日列陳為常，夷狄不知結日列陳，不言日亦不言戰也，婁林、檣李是也。中國與夷狄亦曰敗。晉荀吳敗狄

①「大火」，《漢書·五行志下》作「大星」。

于大原是也。【補曰】中國之敗夷狄，舉其大者，言敗而已。既不言戰，又略舉其勝者言之，不爲結日列陳，成敗之文，悉同之於疑戰，箕交剛，大原是也。楚人及吳戰于

長岸，進楚子，故曰戰。【補曰】疏曰：「郟之戰，楚

言及在下，直在楚。今楚稱及而在上，與郟戰義反，嫌惡楚而善吳，故明之。吳以伯舉有辭，序上稱及以罪楚，彼時有蔡在也。今兩夷言戰，有違常例，二國曲直得失未分，故須起例以明之。」文烝案：疏失《傳》旨。依《左傳》，是役楚敗吳，獲餘皇，而吳旋敗楚，取餘皇，終是吳敗楚也。楚爲吳所敗，非有獻武髡盈之事，若書吳敗楚師于長岸，是兩夷相敗之常文也。今欲進楚子，故變文言戰，以其序上言及，則得爲進，明外吳甚於外楚也。《春秋》外戰言及者皆是以主及客，而其例亦有變通，內晉而外秦，必以晉及秦；內晉而外楚，必以晉及楚；外楚而尤外吳，必以楚及吳；雖以客及主，亦無不可，此義蓋因由內及外之例而起《春秋》之權衡也。長岸本是楚主吳客，而楚之序上稱及，不以主客論，故既變敗言戰，則無以吳及楚之理，及得申其進楚之意。若以伯舉相例則大不然，彼時吳爲蔡以，乃是以蔡及楚，吳又初進稱子也。楚之有師，久同中國，言戰不稱師，又不加言

楚師敗績者，兩夷相戰，事在時例，故略不具文也。疏以曲直得失爲言，所舉皆《公羊》義例，何以通乎？

十有八年春王三月，曹伯須卒。

夏五月壬午，宋、衛、陳、鄭災。其志，以同日也。其日，亦以同日也。【補曰】《公羊》曰：

「記異也。異其同日而俱災也。」若非同日，當專志宋災，略其月日。《公羊》諸書災者皆云記災，唯此爲記異，疏引：

「劉向以爲宋、陳王者之後，衛、鄭、周之同姓。時景王老，劉子、單子事王猛，<sup>①</sup>召氏、尹氏事王子朝。朝，楚之出也。宋、衛、陳、鄭皆南附於楚，無尊周室之心。後三年崩，王室亂，故天災四國。若曰不救周，反從楚，廢世子，立不正，以害王室，明皆同罪。」<sup>②</sup>文烝案：劉說似有理，觀下《傳》所言，則天意未易知也。劉敞曰：「其序宋、衛、陳、鄭，《春秋》之正也。同德則尚爵，同爵則尚親，同親則尚齒。」或曰人有謂鄭子產曰：「某日有災。」【補曰】某日，

① 「王猛」，《漢書·五行志上》作「王子猛」。

② 「辜」，原作「辜」，據《漢書·五行志上》改。

即指壬午日，人言壬午之日四國皆當有災，蓋以占侯之術知之。據《左傳》，其人是鄭裨竈，其言在上冬星孛時。言宋、衛、陳、鄭將同日火，若我用瓊璽玉瓚，鄭必不火。子產曰：「天者神，子惡知之？是人也。同日爲四國災也。」【補曰】四句皆子產語，非子產答辭，乃既災之後，子產告此人之辭。言陰陽不測之謂神，天者神道，子之術何足知之？今是之變，皆由人事不臧，以致同日爲四國災耳。據《左傳》，上冬裨竈欲用瓊璽玉瓚懷火，子產弗與，今此災後，裨竈曰：「不用吾言，鄭又將火。」子大叔請用之。子產曰：「天道遠，人道邇，非所及也，何以知之。竈焉知天道？是亦多言矣，豈不或信？」遂不與，亦不復火。《左氏》所載與此《傳》雖有出入，而意則大同，其言在既災後亦可互證也。夫子產之言至矣，天猶人也，人者血脈流行而心在焉，天者大氣運轉而神在焉，人藏其心，不可測度，況之於天？陰陽不測，非神而何也？《莊子》言季真之莫爲，接子之或使，或使則實，莫爲則虛。今子產言神不可知是莫爲之說也，以人召災是或使之說也。既莫之爲，又或之使，天人相與，非實非虛，與晉輦者之告伯尊若合一契，而意尤著明。《書》稱「洺水警余，念用庶

徵」，而《荀子》曰「唯聖人爲不求知天」，又論聖人之明於人事曰「夫是之謂知天」。楊子《法言》曰「史以天占人，聖人以人占天」，皆可發明斯理，《春秋》記災異，正是意耳。《傳》以公孫僑名氏不見於《經》，而師述他說有此數語，故特記之，明其知道，猶僖篇特稱管仲語矣。○唐德宗言：「建中之亂，術士豫請城奉天，此蓋天命。」李泌曰：「天命者，他人皆可言之，唯君相不可言，君相所以造命也。紂曰『我生不有命在天』，此商所以亡也。」夫以子產之博物也，李長源之好神也，而其言如此，謀國者可以思矣。張巡謂令狐潮未識人倫，焉知天道？則此義豈獨在君相哉？

六月，邾人人郕。

秋，葬曹平公。

冬，許遷于白羽。白羽，許地。【補曰】當云楚地。

# 春秋昭公經傳第九補注第二十二

穀梁 范氏注解 鍾文烝詳補

十有九年春，宋公伐邾。

夏五月戊辰，許世子止弑其君買。日

弑，正卒也。蔡世子般實弑父，故以比夷狄而不書日。

止弑而日，知其不弑，止不弑則買正卒也。【補曰】注倒下

《傳》文以明意。正卒則止不弑也，不弑而曰弑，

責止也。責止不嘗藥。止曰：「我與夫弑者。」

不立乎其位，以與其弟虺。止自責曰：「我與弑君

之人同罪。」於是致君位於弟。【補曰】與夫弑，與聞乎弑。

何休以爲許男斯代立，此云虺，未聞。哭泣，【補曰】有聲

曰哭，無聲曰泣。歔飭粥，嗑不容粒。嗑，喉也。

【補曰】厚曰飭，希曰粥。禮：親喪三日後食飭飲粥。歔，

飲也，食亦飲耳。嗑，咽也。咽、嗑雙聲，《說文》互相訓。

喉亦訓咽也。哭泣過則哽而痛，故不容粒矣。《孟子》曰：

「諸侯之禮，吾未之學也，雖然，吾嘗聞之矣。三年之喪，齋

疏之服，飭粥之食，自天子達於庶人，三代共之。」又引孔子

曰：「君薨，聽於冢宰，歔粥面深墨，即位而哭。」未踰年

而死。【補曰】傷腎乾肝焦肺，毀甚以至死也。言未踰

年，或死在葬前矣。劉敞說下葬謂以止之自討爲討之，亦

得兼通。故君子即止自責而責之也。就其有自

責心，故以備禮責之。【補曰】《傳》述其事，以申上責止之

義。嘗論之，止自言與夫弑，於是當時謂之弑，而史亦書

弑，書弑即其實矣。事實之文，不可革其義，則即止自責

而責之也。加損之文存乎辭，其義則上云「正卒」，下云「不

使止爲弑父」是也。《春秋》屬辭比事，微而顯，志而晦，即

日弑時葬兩文可得其概。家鉉翁謂《春秋》多因舊史，此事

則舊史得之傳聞，而夫子因以垂法，又書葬以別於趙盾。

其言傳聞未是，而大致得之。歐陽脩乃謂盾、止並是真弑，

以加弑爲過，三《傳》所同，而一概不信。趙鵬飛且以闕楊、

墨比之，固哉不亦妄乎？

己卯，地震。

秋，齊高發帥師伐莒。

冬，葬許悼公。日卒時葬，不使止爲弑

父也。【補曰】既正卒矣，葬而又正葬，以蔡般相較，則不

弑自明。春下不特書王月，亦以異之於般，《傳》略之耳。

曰：子既生，不免乎水火，母之罪也。【補曰】

曰者，目《經》意也，通下二十一。唐石經初刻「母」上有

「父」字。案：《韓子》祭女孥女文曰：「不免水火，父母之

罪。」孫汝聽注引《傳》亦有「父」字。羈貫成童，不就

師傅，父之罪也。羈貫，謂交午剪髮以爲飾。成童，

八歲以上。【補曰】《內則》曰：「三月之末，擇日剪髮爲髻，

男角女羈。」鄭君曰：「髻，所遺髮也。夾凶曰角，午達曰

羈。《傳》言羈不言角者，對文，男女異，散文，通也。《詩》

曰「總角丱兮」，《毛傳》曰：「總角，聚兩髦。丱，幼穉也。」

丱，當依唐石經作「升」，《說文》以爲古「卯」字。《傳》之

「貫」即《詩》及《說文》之「升」也。成童者，《內則》指十五以

上，此亦當同。言自三月羈貫，至十五也。晉胥臣曰：「文

益其質，故人生而學，非學不入，是故先王爲之節，八歲教

小學，十五教大學。貴師重傳，事鈞所生，藥食先嘗，亦教

所及矣。《內則》云「十年出就外傳，學書記幼儀」，①即教

小學之傳。下云「成童舞象，學射御」，承上就傳而省其文，

范氏未悟，故解成童爲八歲以上也。《傳》以後包前，《記》以前見後，各有當也。言師傅者，疊言之，單言則或曰傳，或曰師。《孟子》論君子不教子，朱子《或問》用徐氏說，引據此《傳》。就師學問無方，心志不通，身之罪也。【補曰】學以聚之，問以辯之，《中庸》明善擇善之教，

《大學》致知格物之義也。格，量度也。【眉批】：「格」訓「量度」本《蒼頡篇》。物有本末，量度之乃能知本，乃爲知之至，知之至

則知止矣。致至言乎明也，格言乎擇也。車若水說是學問無方，

三十時也。《內則》「二十博學，三十博學無方」，鄭君曰：

「方，猶常也。至此學無常，在志所好也。」文烝案：學有正

業，二十學禮而始備，正業之外謂之博學，博而又博謂之無

方，《傳》以學則必問，故兼言問。張洽《集註》引此作問。

《學記》兩言「博學」，《傳》亦以後包前，謂自十五就師至三

十也。《學記》曰教必有正業，謂《詩》、《禮》、《樂》也。《毛

詩傳》曰「古者教以《詩》、《樂》，誦之、歌之、弦之、舞之」，即

《內則》云「十三學《樂》、誦《詩》、舞《勺》」是也。《昏義》

①「記」，原作「計」，據中華書局影印清阮元重刻《十三經注疏》本《禮記正義》改。

曰：「夫禮始於冠，本於昏，重於喪祭，尊於朝聘，和於射鄉。」《王制》曰：「六禮：冠、昏、喪、祭、鄉、相見。」皆即今《儀禮》十七篇，教學者所執以爲容，即《內則》云「二十而冠，始學禮」是也。三者爲正業矣。心，思心也。《今文尚書·洪範》曰「思心曰容」。志，意也。字从心之，心所之也。單言曰志，疊言曰心志。《春秋說題辭》曰：「恬澹爲心，思慮爲志，恬澹之心，不思而得。」此乃《管子》所謂「心以藏心」，心之中又有心，非《傳》所指也，通謂由之而知其道也。《論語》曰：「吾十有五而志乎學，」【眉批】：「乎」，今本誤「子」。三十而立，四十而不惑，五十而知天命。此則所謂下學而上達，聖人之通也。志乎學即是志於道，志於道而後適道，適道而後立，立而後不惑焉，知天命焉，謂之聞道。夫道之大小，隨人者也，自聖人而下，七十達者及諸賢士大夫各有所立，則各有所聞之道，無論中行狂狷，皆謂之通矣。○辛酉歲，邵懿辰論書言高堂生所傳禮即夫子所述，別無闕逸，予韙其說。子入大廟，每事問，諸侯喪禮，孟子未學，通在學問無方中也。讀書謂之學，聞道謂之通。楊雄以通天地爲伎，通天地人爲儒，【眉批】：「李之才教邵子義理之外有物理之學，又有性命之學。邵子則曰『學以人事爲大』，即楊子之意。」周子則曰誠立賢也，明通聖也。朱子以《論語》說

之，故通即不惑，而不惑由於立，故《論語》又曰「古之學者爲己，今之學者爲人」。《新序》、《墨子》對齊王解此二句曰「古之學者，得一善言，附於其身，今之學者，得一善言，務以悅人，言過而行不及」，此論學之大要也。《論語》又曰「六十而耳順，七十而從心所欲，不踰矩」，此心謂恬澹之心也，五十以學猶學也，至是則化而神焉。心志既通，而名譽不聞，友之罪也。【補曰】名，聲名也。譽，稱美也，單言曰譽，疊言曰名譽。《論語》曰「四十、五十而無聞焉」，【眉批】：「依魯《論語》『五十以學』四字爲句。言無可聞也。此則有可聞而不聞，故罪在友矣。《荀子》稱孔子曰：『入而行不脩，身之罪也；出而名不章，友之過也。』《曲禮》曰：『僚友稱其弟也，執友稱其仁也，交遊稱其信也。』《中庸》、《孟子》並言『信乎朋友，然後獲乎上』。朋友者，同師同志，其情親於相見相問相揖相趨，言友以該朋。名譽既聞，有司不舉，有司之罪也。【補曰】古者選舉之法，依《王制》，鄉論秀士，升之司徒，曰選士，司徒又論其秀者，升之學，曰俊士，又免其征徭，曰造士，大樂正又論其秀者告於王，升諸司馬，曰進士，司馬又論其賢者告於王，而定其論。自造士以下皆鄉人也，造士以上則王太子。

王子，群后之太子，卿大夫元士之適子，國之俊選皆與焉。《周禮·鄉大夫》：「三年則大比，興賢者能者，鄉老及鄉大夫以禮禮賓之。獻書于王。」《射義》及《書大傳》：「諸侯三年貢士於天子。」有司舉之，王者不用，王者之過也。不敢罪上，故言過。【補曰】自「子既生」至此，當是古書成文，皆以爲士者言也。天子之元子猶士也。許世子止不知嘗藥，累及許君也。許君不授子以師傅，使不識嘗藥之義，故累及之。【補曰】《傳》言《經》意如此，師說相承云云也。古者以嘗藥爲教，賈子稱湯之言曰「藥食嘗於卑，然後至於貴，教也」。是其義也。上《傳》但述止之自責，未顯不嘗藥之文，此特顯之。《左傳》以爲飲止之藥。古者藥皆由醫，未有不爲醫而用藥製方是《左》之者誤也。《公羊》言「止進藥而藥殺」，而董仲舒說《公羊》以爲不嘗藥，《繁露》言之甚明，則知《公羊》所云「進藥」者謂其不嘗而遽進之，與此《傳》同，與《左氏》異也。凡金、玉、土、石、草、木、菜、果、蟲、魚、鳥、獸之類可以祛邪養正者，總謂之藥，見王冰《素問》注。子事父所以必嘗藥者，《曲禮》曰「君有疾飲藥，臣先嘗之；親有疾飲藥，子先嘗之」，鄭君曰：「嘗，度其所堪。」《文王世子》載世子之記曰「疾之藥，必親

嘗之」，鄭君曰：「試毒味也。」此二注正義無說。案：《素問·五常政大論》岐伯曰：「能毒者以厚藥，不勝毒者以薄藥。」王冰曰：「謂氣味厚薄者也。」鄭解《周禮》「毒藥」以爲藥之辛苦者。林億等校正《素問》引《甲乙經》：「胃厚色黑大骨肉肥者皆勝毒，其瘦而薄胃者皆不勝毒。」凡此即《禮記》注意也。《五常政大論》下文論：「病有久新，方有大小，有毒無毒，服之皆有約。下品大毒，治病十去其六；中品常毒，治病十去其七；上品小毒，治病十去其八；上中下品無毒，治病十去其九，皆至約而止。以五穀、五肉、五果、五菜，隨五藏宜者食養，以盡其餘病，餘病不盡，復如前四約治之，必無使過。」觀岐伯此論，足明醫之用藥亦於毒者爲尤慎也。夫治療之道，物齊之宜，官有專書，事參祕術，常人所不習，聖人有不知。至於醫既定方則不得以未達不嘗爲說，藥之氣味與夫人之體質固較然易明矣。臣子之於君父，無所不盡其心。《禮》有爲君嘗羞之文，有火孰先君子之說，況藥者扁、倉之所難言也，是故先王重焉。許君之疾，《左傳》以爲瘡，未知是否。張洽曰：「姑以瘡言之，今之治瘡，以砒燬而餌之多愈，然燬不得法則反殺人，悼公之死必此類。」張說大概近是。今以爲許君體不勝毒，醫用厚藥，止不嘗而遽進之，遂以藥卒也。卒由飲藥，故傳



聞之誤則以爲止之藥也。止初不知此禮，後乃知之而哀痛自責。推原其事，許君不得無咎，此《春秋》文外之意也。《傳》「止」字各本脫，今依唐石經、胡安國《傳》、呂本中《集解》本、張治《集註》、家鉉翁《詳說》、李廉《會通》本補正。

## 二十年春王正月。

夏，曹公孫會自夢出奔宋。【補曰】夢，曹

邑。○【撰異曰】夢，本或作「蔑」，《左氏》、《公羊》作「鄆」。

趙坦曰：「《說文》無「鄆」字。」自夢者，專乎夢也。能

專制夢。曹無大夫，【補曰】重發《傳》者，前是戰，今是

奔也。其曰公孫何也？【補曰】略名之常言曹會。

言其以貴取之而不以叛也。會以公孫之貴而得

夢，既而不以之叛，明曹君無道，致令其奔，非會之罪，故書

公孫以善之。【補曰】《傳》文「以叛」即謂人于戚以叛之屬，

若書「人于夢以叛」則不言出奔矣。書自夢者，著其能以而

不以，《傳》釋公孫兼見此意。劉敞曰：「《春秋》之時，臣能

專其邑，無不畔其國者，能使其衆，無不要其君者，臧武仲

之智可謂智矣。然猶據防以求爲後於魯，是以孔子譏之，

以爲其罪當與不孝非聖者均也。不孝則無親，非聖則無

法，要君則無上，三者皆大亂之道也，故深察公孫歸父之至

禮奔齊，公孫會之自夢奔宋也，其賢於臧武仲遠矣。」

秋，盜殺衛侯之兄輒。○【撰異曰】輒，《左氏》

作「縶」。《音義》「輒」如字，或云音近「縶」。陸淳曰：「衛

侯之孫名輒，故宜爲縶。」盜，賤也。【補曰】卿爲大夫，

非卿爲卑者，曰盜者，賤辭，又下於卑者，蓋士也。《春秋》

有三盜，此發通例也。《左傳》謂齊豹爲衛司寇，則豹非士，

《傳》又言奪之，明是時已奪官。陳傳良說是。其曰兄，

母兄也。【補曰】與弟同。目衛侯，衛侯累也。凱

曰：「諸侯之尊，弟兄不得以屬通，《經》不書衛公子而斥言

衛侯之兄者，惡其不能保護其兄，乃爲盜所殺，故稱至賤殺

至貴。【補曰】若不欲累衛侯，當書盜殺衛公子輒。然則

何爲不爲君也？嫡兄宜爲君。曰有天疾者不

得人乎宗廟。【補曰】天疾，惡疾。何休說惡疾者謂

瘡、聾、盲、癘、禿、跛、偃，不逮人倫之屬也。《左傳》曰：

「孟非人也，將不列於宗。」孔廣森說《公羊》曰：「《春秋》記

事，皆爲後王示法，常辭立適以長，而有衛侯之兄，所以起

其問，發其義，即知適長子有惡疾，亦有廢道。苟非惡疾亦

必無廢道，《經》變之制，靡不包舉矣。「輒者何也？」曰

兩足不能相過，【補曰】以其疾爲名。臧琳曰：「玉

篇》、《廣韻》、《五經文字》、《類篇》皆無「能」字，疑「能」字

衍。」齊謂之綦，【補曰】《音義》引劉兆云：「綦，連併

也。」文系案：《廣雅》曰：「綦，蹇也。」《書大傳》曰：「禹其

跳，湯扁。其跳者，蹇也。」王念孫以爲「其」即「綦」字。《廣

雅》「蹇」亦訓「蹇」。楚謂之蹇，【補曰】《音義》：「蹇，女

輒反。」劉兆云：「聚合不解也。」臧琳曰：「此字當作「蹇」，

从足从取，故劉以聚合訓之。《玉篇》、《廣韻》、《五經文字》

皆从取，與《音義》同。《集韻》从取，遵須切，《類篇》亦从

取，皆與《音義》異。」文系案：《廣雅》曰：「聚，蹇也。」王念

孫以爲「聚」者「蹇」之誤，或「輒」之誤。文系以爲「蹇」从取

而訓聚，《廣雅》直作「聚」字，即「蹇」字也。《禮》「升階足不

相過謂之聚足」，意相似。衛謂之輒。【補曰】《音義》：

「輒，本亦作「繫」。劉兆云：「如見絆繫也。」

冬十月，宋華亥、向寧、華定出奔陳。徐

邈曰：「月者，蓋三卿同出，爲禍害重也。君以臣爲體，民

以君爲命，凡爲憂者大，害民處甚，《春秋》皆變常文而示所

謹，非徒足以見時事之實，亦知安危監戒云耳。」【補曰】疏

曰：「宋萬以一人而謹月者，見宋不討賊，致令得奔。弟辰以五大夫而不月者，辰爲仲佗所彊，元無去意，爲患輕也。」

○【撰異曰】寧，《公羊》作「甯」，後同。

十有一月辛卯，蔡侯廬卒。○【撰異曰】廬，

《左氏》作「盧」，亦或作「廬」。

二十有一年春王三月，葬蔡平公。○【撰

異曰】三月，板本，《公羊》或作「二月」，誤。唐石經、鄂本、

十行本亦作「三月」。呂本中曰：「《穀梁》作「正月」。案：

呂蓋誤。

夏，晉侯使士鞅來聘。【補曰】自此後無書來

聘者。

宋華亥、向寧、華定自陳入于宋南里以

叛。○【撰異曰】叛，《公羊》作「畔」。自陳，陳有奉

焉爾。【補曰】疏曰：「叛而加自，自實有力，嫌其言叛不

由外納力，故復發《傳》。」人者，內弗受也。【補曰】疏

曰：「嫌與人邑異例，故明同弗受。」文系案：自外人言叛，

位不復可知。其曰宋南里，宋之南鄙也。【補曰】

宋之南鄙，謂宋南鄙之里也，里者，邑居之名。《爾雅》曰：「里，邑也。」《毛詩傳》、《廣雅》曰：「里，居也。」《周禮》「五家爲鄰，五鄰爲里」，以五鄰必同居，故亦取其名，此南里，汎指南鄙之里，非一地之專名，故「南」上復言「宋」，非若凡地名不須繫國也。高澍然曰：「不繫國，疑於據邑，而華向逼君都城之罪不著；不書南里，疑得全宋，而宋分國以守之，勢亦不著。」徐彥《公羊》疏曰：「《左氏》、《穀梁》皆作「南里」字，而賈氏云《穀梁》曰「南鄙」，蓋所見異也。」案：此疏不足據。南鄙既是《傳》文，《經》必不得作「鄙」字，賈逵爲《左氏》經作注，或但引《穀梁》經字，或并引用《傳》義，此當是引用南鄙之義，而徐彥誤以爲引《經》字也。《左傳》稱「華氏居廬門，以南里畔」，孔廣森據《呂氏春秋》楚莊王圍宋九月，宋公告病，爲却四十里而舍於廬門之闔。以爲廬門去宋城四十里。以者，不以者也。【補曰】疏曰：「嫌異於竊地，故復發例同之。」叛，直叛也。言不作亂。【補曰】疏曰：「作亂若樂盈、良霄。」文烝案：注、疏皆非也。叛與作亂何以異乎？良霄本不據邑，故無叛文，樂盈亦不言以叛者，其文別有所見也。《傳》言「叛，直叛」者，謂此之書叛，直是叛耳，不出奔他國，宋辰、晉趙鞅皆云

直叛，亦此意也。若衛孫林父之書叛，則《左傳》以爲出奔晉矣。邾庶其、莒牟夷、邾黑肱之叛，則以來奔書矣。

秋七月壬午朔，日有食之。

八月乙亥，叔輒卒。叔弓之子。【補曰】子叔

伯張。○【撰異曰】輒，《公羊》作「痊」。徐彥曰：「《左氏》、《穀梁》作「叔輒」。」

冬，蔡侯東出奔楚。【補曰】何休曰：「大國奔例

月，此時者，惡背中國而與楚，故略之。」案：《公羊》經雖是「朱」字，然何說亦可通於此。○【撰異曰】東，《左氏》、《公羊》作「朱」。徐彥《公羊疏》曰：「《左氏》與此同。《穀梁》作「蔡侯東」。杜譌引《集義》及呂大圭並謂朱無歸入卒葬之文，奔卒當爲一人。顧棟高曰：「《史記·十二諸侯年表》是年書「東國奔楚」。東者，東國也。【補曰】言此之東即後二十三年之東國也。聖門傳此《經》本闕一字，雖知其別無義例，而莫敢增益其字，故因就釋之，是師說如此也。此既釋東爲東國，明後定、哀之篇仲孫忌即仲孫何忌，魏多即魏曼多，皆與此同，故不復發《傳》也。《左傳》衛祝佗述踐土載書稱晉重耳爲晉重，《國語》曹僖負羈稱叔振鐸爲先君叔振，是古人二字作名，或時但稱其一，知《經》無此

例者。《經》例名從主人，言無所苟，前後不得異也。且晉重、叔振之文亦殊可疑。夫子之母名徵在，言在不稱徵則非名矣，言徵不稱在則非名矣。何爲謂之東也？

【補曰】上既言東即東國，故遂以東言之，猶莊二十四年言「何爲名也」，上十一年言「何爲名之也」，非問何以去「國」字。王父誘而殺焉，楚子虔誘蔡侯般殺之于申。父執而用焉，執蔡世子友以歸用之是也。【補曰】杜預說《左氏》東國者，友之子，廬之弟。若作朱，則廬之子矣。奔而又奔之。曰東，惡之而貶之也。奔既罪矣，又奔讐國，惡莫大焉。【補曰】惡其奔而又奔之，故貶而書名，猶桓十一年云曰「突，賤之也」。凡諸侯出奔名者，皆惡其有罪而貶之。鄭伯突、衛侯朔、北燕伯款、莒子庚輿、邾子益五者，皆貶也，非以去國字爲貶。嘗謂蔡之於楚平猶魯之於齊桓也，魯與齊桓盟會可也，娶仇人子弟則不可矣；蔡從楚可也，奔而又奔之則不可矣。楚雖封蔡，猶爲讐國，宋襄雖立齊孝，猶以伐喪而謂之惡，意亦相類。

## 公如晉，至河乃復。

二十有二年春，齊侯伐莒。

宋華亥、向寧、華定自宋南里出奔楚。

自宋南里者，專也。專制南里。【補曰】專辭與公孫會同，不嫌者，前有以文，故《傳》亦不具言，但重發自例。高澍然曰：《左傳》有赭丘之戰，南里之圍，不書而書三叛之奔，其義與彭城書圍不書實魚石互證自明。彼義繫於扼楚，故重在圍，而魚石之究竟可略也。此義繫於失賊，故重在奔，而諸侯之圍戰可略也。」

大蒐于昌間。【補曰】昌間，魯地。○【撰異曰】

蒐，《公羊》或作「廋」。間，《公羊》作「姦」。《穀梁音義》「一音簡」。秋而曰蒐，此春也，其曰蒐何也？以

蒐事也。【補曰】疏曰：「蒐紅見正，譏不正，比蒲蒐在夏，近秋之初，尚可以蒐，此春蒐不可之甚，故發《傳》。」文烝疑《周禮》、《左傳》、《爾雅》之春蒐，周之末失也。春事蒐，秋乃獮矣。

夏四月乙丑，天王崩。【補曰】《史記》名貴。

靈王子。

六月，叔鞅如京師。叔鞅，叔弓子。月者，亦為葬景王起。【補曰】鞅，穆伯也。

葬景王。天子志崩不志葬，志葬，危不得以禮葬也。【補曰】《左傳》「丁巳葬」。疏曰：「不書日者，《傳》言日之甚矣，其不葬之辭也，恐其甚之不明，故日以起之。今下言「王室亂」，則甚之可知，故省文也。」

王室亂。【補曰】室者，家之通稱，三王家天下，故言家。董仲舒言「立為天子者天子是家」，此其義。王室，猶周家也。《詩》曰「王室如燬」，亦謂殷家。《騶虞》箴曰「用不恢于夏家」。①洪咨夔引《書·大誥》曰：「亦惟在王官邦君室。」亂之為言，事未有所成也。尹氏立子朝，劉氏、單氏立王猛，俱未定也。【補曰】王猛事自在下文，與此無涉。《左傳》是年載子朝事，於尹氏無與，注皆非也。《傳》為「亂」字作訓，是明《經》之通例。事未有所成，即桓二年《傳》云「不成事之辭也」。以此《經》言之，時子朝欲篡王猛之位而未成事者，子朝之事如《左傳》所載是也。是年事未成，至下年而成，故此言亂而彼言立，文相對也。猛之謚曰悼王，知是時周人立猛為王，猛已定位矣。其位雖定，實亦不正，故名而以國氏。究以已踐王位，其事不可

不書，故備書居人也。○《左傳》曰：「叔鞅至自京師，言王室之亂也。」而胡安國、趙汭等遂推之陳火、梁亡以為皆不由告命，今未敢從。

劉子、單子以王猛居于皇。皇，地。【補曰】當云周地。《左傳》劉獻公摯以上四月戊辰卒，單穆公旗立其庶子伯益即此劉子，則亦在喪，與定三年邾子同例矣。伯益即卷，《左傳》又謂之劉狄。以者，不以者也。

【補曰】疏曰：「復發《傳》者，劉、單，王之重卿，猛，王之庶子，以貴制庶，嫌其義別，起例以詳之也。」王猛，嫌也。直言王猛不言王子，是有當國之嫌。【補曰】疏曰：《春秋》以王為國，若言齊、晉。劉炫曰：「以王當國，如莒展以名繫國也。」文彙案：二說是也。《經》多以「王」字代周，王人，王師之屬皆是。《國風》「有王」，與衛、鄭等並為國名，知是史文之舊。言居者，不正已明，不嫌是居其所。

秋，劉子、單子以王猛入于王城。【補曰】《公羊》曰：「王城者何？西周也。成周者何？東周也。」

①「騶」，原作「周」，據中華書局影印清阮元重刻《十三經注疏》本《毛詩正義》改。

《漢書·地理志》曰：「河南，故邾、鄆地，是爲王城。雒陽，周公遷殷民，是爲成周。」不月者，疏以爲王猛雖則非正，事異諸侯，故不月。以者，不以者也。【補曰】重發《傳》者，嫌居人異也。人者，內弗受也。猛非正也。【補曰】重發《傳》者，嫌與諸侯異例也。此與後文天王入于成周不同，雖並以人爲文，而一稱天王，一以國氏，則其義自足見。王城即京師，是時王城爲京師，至敬王入于成周以後，成周爲京師。皆不言入于京師者，孫復曰：「周自天子言之則曰王城、成周，諸侯言之則曰京師。」趙汸曰：「凡王者之都，自諸侯言，曰京師，不敢斥其地也。自王者言，則以地舉，曰王城，曰成周，王者不自稱京師也。諸侯城王都，亦以地舉，曰城成周，王者有遷都之義，故城築當以地舉也。」趙意此等皆從史例，其說並得之。自諸侯言，自王者言異其稱，史亦用名從主人之例也。

冬十月，王子猛卒。【補曰】不日者，未成君。

此不卒者也，未成君也。【補曰】此非魯之子，又嫌不當書卒者。其曰卒，失嫌也。猛本有當國之嫌，其卒則失嫌，故錄之。【補曰】注非也。以猛繫國者，嫌文也；稱王子猛者，失嫌之文也。既卒則得爲失文，今欲見失嫌

之文，故特錄卒也。祝吁、無知以挈爲失嫌，此於文不可直挈，故加王子，從其常稱，其爲失嫌一也。胡瑗、孫復等皆以此王子爲在喪稱子之子，是不然，若使猛非嫌而稱子，則當在上居皇時，又宜從既葬不名之例，又不宜稱卒。

十有二月癸酉朔，日有食之。【補曰】江永曰：「居皇書六月，而《左傳》在秋七月戊寅，入王城書秋，而《傳》在冬十月丁巳，猛卒書冬十月，而《傳》在十一月乙酉。又此年末有閏，明年春王正月爲壬寅朔，則《經》之十二月癸酉朔日食即《傳》之閏月，是周曆、魯曆置閏有不同矣。續經哀十六年春王正月己卯，衛世子蒯聵自戚人于衛，推之是二十九日。夏四月己丑孔子卒，推之是十日。而《傳》載蒯聵事在上年末之閏月，蓋衛曆也。」文烝案：《左傳》月日參差者甚多，江氏此論明確，他處則難盡通矣。杜預所見《汲冢紀年》記晉事起自殤叔，皆用夏正建寅月爲歲首，以其說推《左傳》晉事之差，亦或合或否。宋取長葛，《經》冬《傳》秋，齊弑舍差兩月，齊靈公卒差兩月一日，凡此類，今概不論。

二十有三年春王正月，叔孫婁如晉。【補

曰【月者，爲下卒日。○【撰異曰】徐彥《公羊》疏曰：「叔孫舍者，《左氏》、《穀梁》作「媼」字。」

癸丑，叔鞅卒。

晉人執我行人叔孫媼。【補曰】案：《左傳》武城人取邾師，邾愬晉也。

晉人圍郊。郊，周邑也。【補曰】杜預曰：「討子朝也。」劉敞曰：「稱晉人，惡其微也。」葉夢得曰：「籍談、荀躒書人，貶也。」

夏六月，蔡侯東國卒于楚。不日，在外也。

以罪出奔，又奔讐國，故不葬。【補曰】蔡悼侯也。奔君得言卒者，蓋二三年間蔡不別立君歟？不日者，蓋以其不正，文言卒于楚，則在外已明矣。疏曰：《傳》例諸侯時卒，惡之，今東國奔讐得書月者，書其卒于楚，則惡已明矣。諸侯之奔，例不書卒，今東國上書奔楚，下書卒于楚，見其奔讐國而死，惡之可知，故不如蔡侯胥書時也。又諸侯不卒，則已卒宜有葬，故注復論不葬之義。」

秋七月，莒子庚輿來奔。【補曰】莒共公也。稱名，蓋亦有罪。月者，爲下敗師日。

戊辰，吳敗頓、胡、沈、蔡、陳、許之師于

雞甫。胡子髡、沈子盈滅。雞甫，楚地。國雖存，君死曰滅。【補曰】此本杜預也。頓、胡、沈，序蔡上者，孔穎達謂皆其君自將，君在臣上，各自以大小序也。何休曰：「不稱國國出師者，賤略之。言之師者，辟許獨稱師上五國稱國之嫌。」案：此即所謂緩辭也。胡子、沈子例不記卒，與繒子同。繒被用被戕不名，義主於用之戕之者耳。見滅則不可不名，以其君歸非夷狄，亦不可不名，故髡也、盈也、嘉也、牂也、豹也皆名也。以歸名者，《傳》云絕之，則見滅名當爲賢之矣。各本此《經》下衍「獲陳夏齧」四字，今依唐石經，十行本刪正。○【撰異曰】甫，《左氏》、《公羊》作「父」。盈，本亦作「逞」，《左氏》作「逞」。案：《史記》「樂盈」亦作「樂逞」也。《公羊》作「楹」。中國不言敗，此其言敗何也？據宣十二年晉荀林父及楚子戰于郟，晉師敗績，不言楚敗晉師。【補曰】此注贅。中國不敗，胡子髡、沈子盈其滅乎？其言敗，釋其滅也。若師不敗，則君無由滅也，賢胡、沈之君死社稷。【補曰】此義與荆敗蔡全同。《傳》備文者，一獲一滅也。注言「若師不敗，則君無由滅」，非《傳》意也。《傳》言若不直言敗而言戰，則當先言胡子、沈子及吳戰，而後言師敗績，以

中國之君親與夷狄，戰何以見滅乎？是其恥深，於文不可也。注言「死社稷」，又非也。國未亡，不得言死社稷，當依《公羊》言「死於位」也。以爲賢而釋之，又非也。此亦爲中國殺恥，故釋之，賢意自在文外。

### 獲陳夏齧。獲者，非與之辭也，賢夏齧雖

獲不病，以其得衆也，義與華元同。【補曰】疏曰：「此與華元文雖不同，明賢之義不別，故重發《傳》。齊國書文同義同，故無《傳》也。」上下之稱也。君死曰滅，臣得曰獲，君臣之稱。【補曰】《左傳》曰：「君臣之辭也。」《公羊》曰：「其言滅獲何？別君臣也。君死於位曰滅，生得曰獲，大夫死皆曰獲。」胡安國曰：「書其敗，不以國分而以君大夫爲序，書其死，不以事同而以君臣爲別，皆所以辨上下，定民志。」

### 天王居于狄泉。敬王辟子朝。狄泉，周地。

【補曰】注首句本杜預，即下所書是也。《史記》曰「敬王居澤」，《左傳》亦曰「王師在澤邑」，賈逵曰：「即狄泉也。」始王也，其曰天王，因其居而王之也。天子踰年即位稱王，敬王踰年而出，故曰始王。雖不在國行即位之禮，王者以天下爲家，故居于狄泉稱王。【補曰】注皆非也。

《傳》言始王者，據《左傳》，猛卒後，「敬王即位，館于子旅氏」，則敬王之定位爲王前此矣。但前此《經》未有王文，至此始王之也。又言其曰天王，因其居而王之者，申上意也。前此朝雖與王爭王，不辟朝，無事可記，故無王文。至此尹氏立朝，王居狄泉以辟之，其事當書於策，本以辟朝而書，故因對朝而王之，所以至此始王之也。《公羊》以未三年稱天王爲著有天子，其言稱王著有天子，亦謂對朝而正其王稱，其以未三年爲義則不可通於《傳》。許翰、葉夢得並以爲《春秋》之法，踰年書王，豈有三年然後稱王者？其說近是，文九年論之矣。敬王者，《史記》名句，《漢書》古今人表以爲悼王兄，此說是也。《左傳》稱景王太子壽早卒，下文子朝書立爲不正，《傳》及《公羊》並言猛不正，不言敬王不正，又未聞周別有正當立者，則敬王乃當時正嗣，以兄繼弟者也。《史記》以猛爲長子，賈逵、韋昭、杜預並以敬王爲猛之母弟，殆皆失之。夫使敬王亦不正，則《春秋》必有異文，雖以其終爲天下共主，不可斥言其名，書爲王勾，亦必不遽成其爲王也。

### 尹氏立王子朝。隱四年，衛人立晉。《傳》曰：

「稱人以立，得衆也。」此言尹氏立，明唯尹氏欲立之。【補曰】不稱尹子者，蓋其後尹氏奔楚，天王因削其爵，絕其位，



故不得以爵稱，又不得稱名，則稱尹氏而已。立者，不宜立者也。【補曰】疏曰：「重發《傳》者，衛、晉得衆，子朝失衆，不同故也。」朝之不名何也？據晉之名惡，今朝亦惡，怪不直名而言王子。別嫌乎尹氏之朝也。若但言尹氏立朝，則嫌朝是尹氏之子，故言王子以別之。【補曰】疏曰：「衰亂之世，何所不爲？繒立異姓，周亦致疑，疑而須別，故不曰立朝。」文烝案：注疏皆非也。《傳》意以爲衛人立晉人者衆辭，故晉直名無所嫌，今以尹氏爲文，若言尹氏立朝，則嫌以朝繫尹氏，故加言王子以別之。別嫌乎尹氏之朝，猶曰不以尹氏挈朝也。北燕伯辟挈文而不名，此書名猶不爲挈者，立自宜以名錄，不直名則非挈也。《傳》言別嫌，猶《公羊》所謂辟嫌。特發義者，明朝實惡，例當直名，《經》本當書立朝，與晉同也。後文尹氏等以朝奔楚，亦言王子，亦別嫌也。別嫌必言王子者，繫於先王之稱也，若然，前文劉、單以猛不正，國氏以明其嫌，朝亦不正，不言王朝者，土無二王，上已有天王，不得復有嫌也。其實上言天王之居，下言尹氏所立，非二王而何？未嘗沒其事也。至此言立者，前年欲篡立而未立，今則定立爲王以敵王，當時謂子朝爲西王，敬王爲東王，《春秋》所不忍言

也。張自超曰：「書曰『天王居于狄泉，尹氏立王子朝』，則天位既定，而朝之爲篡分明可知，居狄泉爲朝之黨所逐亦分明可知。」

### 八月乙未，地震。

冬，公如晉，至河，公有疾，乃復。【補曰】

何休曰：「舉公者，重疾也，子之所慎。齊戰疾。」文烝案：

《墨子》曰：「聖人惡疾病，不惡危難。」言有，亦有一亡之

例，易以疾愈爲有喜。○【撰異曰】《左氏》直云「有疾」，無

「公」字。疾不志，此其志何也？【補曰】四如晉，

著有疾，皆不言疾，故據以問。釋不得入乎晉也。

【補曰】前此無疾而著有疾，恥之也；今此實有疾而志之，

則釋之也。《公羊》曰：「殺恥也。」殺亦釋也。《左傳》但言

「爲叔孫故如晉，有疾而復」，不言諸文同異之義，彼書往往

然矣。董仲舒曰：「晉惡而不可親，公往而不敢至，人情

耳。君子何恥而稱公有疾也？」曰：「惡無故自來。君子

不恥，內省不疚，何憂何懼？」是已。今《春秋》恥之者，昭

公有以取之也。臣凌其君始於文，而甚於昭公。受亂陵

夷，而無懼惕之心，囂囂然輕計妄討，犯大禮而取同姓，接

不義而重自輕也。人之言曰：「國家治則四鄰賀，國家亂

則四鄰散。」是故季孫專其位而大國莫之正，出走八年，死乃得歸，身亡子危，困之至也。君子不恥其困而恥其所以窮。」董言「子危」謂定公也，《公羊》家說如此。

二十有四年春王二月丙戌，仲孫貜卒。

媾至自晉。○【撰異曰】《公羊》作「叔孫舍」。徐

疏有說而何氏無注，疑何本傳寫誤多二字。劉敞以來，多誤從之。呂本中以爲原父能知他人之鑿而不自知其鑿也。

大夫執則致，致則挈，由上致之也。上，謂宗廟

也。致臣于廟則直名而已，所謂君前臣名。【補曰】疏曰：

「重發《傳》者，單伯、意如有罪，媾無罪，故各發之。」《傳》釋

與意如有異辭者，亦以意如訴公於晉而媾無罪也。宣元年

注「上謂宣公」，此云宗廟者，釋有二家：一云：禮：夫人三

月始見宗廟，遂與僑如之致，由君而已，故知上爲宣公，成

公。意如與媾被執而反，理當告廟，故知上謂宗廟也。又

一釋：二者互文相通，見廟之時，君稱臣名以告，則二者皆

當書名，此云宗廟，亦是昭公告之。彼云宣公，亦是宣、成

告宗廟明矣。

夏五月乙未朔，日有食之。

秋八月，大雩。

丁酉，杞伯郁釐卒。○【撰異曰】郁，《公羊》作

「鬱」。徐彥曰：「《左氏》、《穀梁》作「郁釐」字。」今正本亦

有作「郁」字者。

冬，吳滅巢。

葬杞平公。

二十有五年春，叔孫婼如宋。

夏，叔倪會晉趙鞅、宋樂大心、衛北宮

喜、鄭游吉、曹人、邾人、滕人、薛人、小邾人

于黃父。【補曰】叔倪，叔鞅子。黃父，晉地。一名黑壤。

○【撰異曰】倪，《左氏》作「詣」，後同。大心，《公羊》作「世

心」，後同。徐彥《公羊疏》曰：「叔倪者，《穀梁》與此同。

《左氏》經賈注者作「叔詣」字。」

有鸛鵒來巢。劉向曰：「去穴而巢，此陰居陽

位，臣逐君之象也。」【補曰】《漢書·五行志》：「劉以爲有

蜚有蜚不言來者，氣所生，所謂眚也，有鸛鵒言來者，氣所

致，所謂祥也。」劉又謂：「鸛鵒白羽，旱之祥也。穴居而好

水，黑色，爲主急之應也。」何休曰：「鸛鵒猶權欲。」趙汭曰：「今鸛鵒在處有之，實自《春秋》所書始，乃地氣推遷使然，中國治亂之候也。宋治平間，邵子居洛陽，聞杜鵑聲，曰：『洛陽舊無杜鵑，今始至矣。』或問何也？曰：『天下將治，地氣自北而南，將亂，自南而北。今南方地氣至矣，禽鳥飛類得氣之先者也。』《春秋》書六鵒退飛，鸛鵒來巢，氣使之也，蓋先王所以觀天下之妖祥者非一端。周禮在魯，故時史於鸛鵒始至猶能謹而書之，說者多弗察也。」○【撰異曰】鸛，本又作「鵒」，音「權」。《公羊》作「鵒」。《左氏》或作「鵒」，與《說文》同。《說文》「鵒」之或字作「雉」。一有一亡曰有。【補曰】疏曰：「重發《傳》者，飛鳥與蜚蜚異也。」來者，來中國也。鸛鵒不渡濟，非中國之禽，故曰來。【補曰】《五經異義》載《穀梁》、《公羊》家舊說，皆以爲鸛鵒夷狄之鳥，今來中國。鄭君駁之，以爲《春秋》言來者甚多，非皆從狄夷來也。從魯疆外而至則言來，鸛鵒本濟西穴處，今踰濟而東耳。孔廣森說《公羊》曰：「中國，國中也。」文烝案：如孔氏說則鄭義得通於二《傳》。鄭據《考工記》，故云爾。疏曰：「蜚蜚不言來者，不見所從也。」鸛鵒穴者而曰巢，或曰增之也。加「增」言巢爾，其

實不巢也。雍曰：「凡《春秋》記災異未有妄加之文，或說非也。」【補曰】《爾雅》曰：「增，益也。」鸛鵒實來巢，而史不言巢，君子增益史文，以著其異，故穴者而曰巢也。言或曰者，師疑之，不直言也。所以得增益者，據《運斗樞》言，鸛鵒來，巢于榆，榆木之上不爲穴而爲巢，衆人所見，聖人所知，故足成之也。注既不得其解，而惠士奇引鳥以山爲卑而曾巢其上之說。曾巢，即「槽巢」，其字亦或作「增」，要非《傳》所謂「增」矣。《公羊》曰：「宜穴又巢。」文烝妻沈印齡在郡城東恒見鸛鵒穴於薺莢木，其近地多榆。顏師古乃謂此鳥不皆穴處。童品又以爲假鵒巢以生子，能飛即群棲於木，未聞穴居於地。是並不知「穴」字之義，所宜訂正。鵒也，鸛鵒也，皆書。海鳥曰爰居，止於魯東門之外三日，不書者，蓋因展禽言不記於策。李廉謂魯以爲瑞。非也。

秋七月上辛，大雩，季辛，又雩。【補曰】疏曰：「凡八月、九月雩則書月，以見正；七月雩者皆書時，以見非正。此亦書月者，以一月再雩故。」案：疏得之，於文不得云秋上辛也。雩得雨曰雩，前雩不得雨言雩者，以有「又雩」之文無所嫌，又雩則雨。季者，有中之辭也。不言中辛，中辛無事。【補曰】雩例本不日，故以上季

爲文，舉日不舉辰也。雩小於郊，亦以別之。郊用上辛而卜日，例當錄日，不與雩同。又，有繼之辭也。緣有上辛大雩，故言「又」也。【補曰】言又，故省「大」文。重發《傳》者，嫌與又食角異例也。

九月乙亥，公孫于齊。【補曰】伐季氏而敗，遂

出奔也。夫人奔月，公日者，詳略之差。○【撰異曰】乙亥，《左氏》、《公羊》作「己亥」。孫之爲言猶孫也，諱奔也。【補曰】疏曰：「復發《傳》者，前發例於夫人，今發例於公，明其同義，以別尊卑之辭詳略也。」

次于陽州。【補曰】此《經》各本誤跳在《傳》「孫」

之上，今依唐石經、十行本移正。○【撰異曰】陽，《公羊》作

「揚」，亦作「楊」。次，止也。陽州，齊竟上之地，未敢直

前，故止竟也。【補曰】重發《傳》者，此非用兵之次，嫌異故也。注本杜預。杜云「齊、魯竟上邑」，范刪「魯」字。案：

《左傳》襄三十一年，齊聞丘嬰帥師伐陽州，則彼時地屬魯，定八年，公侵齊，門于陽州，則其後屬齊。疑是時已爲齊竟矣。

齊侯唁公于野井。弔失國曰唁。【補曰】

何休曰：「弔亡國曰唁，弔死曰弔，弔喪主曰傷，弔所執縛曰纒。」文烝案：「唁」與「言」古同聲。《爾雅》曰：「訊，言也。」《廣雅》曰：「言，訊問也。」唁公不得入於魯也。

野井，齊地。齊侯來唁公，公逆之，往至野井。【補曰】注亦本杜預，依《左傳》也。《傳》曰：「齊侯將唁公于平陰，公先至于野井。」唁辭，《公羊》詳之。又稱「以遇禮相見」。

冬十月戊辰，叔孫婁卒。【補曰】昭公出後，

季孫不別立君，惟以上卿攝行公事。卿卒禮數，列國會葬之屬，皆如公在國時，史亦據舊所應書者書於策，蓋魯無情而有名，於是可見，而史法亦不與他國同矣。若其涉公者，容有君子加損之辭，而大體亦因史文。家鉉翁、趙汭之論，殆未可用。

十有一月己亥，宋公佐卒于曲棘。曲棘，

宋地。【補曰】《公羊》曰：「曲棘者何？宋之邑也。」與操

扈同。邠公也。邠，當爲「訪」。訪，謀也。言宋公所以

卒于曲棘者，欲謀納公。【補曰】《左傳》曰：「爲公故如晉」，《公羊》曰「憂內也」。注：「訪，謀。」《爾雅》文。

十有二月，齊侯取鄆。取鄆以居公。【補曰】

此本杜預，即《傳》及《公羊》所云「爲公取之」。鄆者，汶陽

田也。何休曰：「月者，善錄齊侯。」取，易辭也。內不言取，以其爲公取之，故易言之也。【補曰】疏曰：「昭公，失國之君，忠臣喜公得邑，故以易辭言之。宣元年齊人取濟西田，《傳》曰：『內不言取，言取，授之也，以是爲賂齊也。』不言易辭者，魯人不得已而賂之，取雖易而我難之，故直云授之，其實亦易辭也。」

二十有六年春王正月，葬宋元公。

三月，公至自齊，居于鄆。【補曰】何休曰：

「月者，閔公失國居運，後不復月者，始錄可知。」公次于陽州。其曰至自齊何也？據公但至陽州，未至齊。以齊侯之見公，可以言至自齊也。齊侯唁公于野井，以親見齊侯爲重，故可言至自齊。【補曰】疏曰：「并明後乾侯之致不見晉侯。」居于鄆者，公在外也。若但言公至自齊而不言居于鄆，則嫌公得歸國，欲明公實在外，故言居于鄆。【補曰】《左傳》於下年亦曰「言在外也」。鄆言居者，鄆屬公，爲竟內地。《左傳》曰：「言魯地也。」《傳例》曰：「居者，居其所也。」二十年，衛侯避亂如

死鳥，齊侯曰：「猶在竟內，則衛君也。」鄭伯入櫟，衛侯人夷儀皆言人，此言居者，汪克寬以爲內辭。文烝案：鄭、衛別有君，魯無二君也。至自齊，道義不外公也。至自齊者，臣子喜君父得反致宗廟之辭爾。今君雖在外，猶以在國之禮錄之，是崇君之道。【補曰】道義，謂《春秋》之義。襄二十九年言「意義」，此言「道義」，皆疊言以足句也。居鄆本魯史舊文，書至，蓋《春秋》新意，《傳》上文先釋至自齊，次釋居于鄆。以「至」文乃君子所加，《經》意所重，故復論之。高澍然說近是。

夏，公圍成。成，孟氏邑。○【撰異曰】陸渚《纂

例》曰：「成，《公羊》作『郕』。」案：今《公羊》不作「郕」。非國不言圍，【補曰】此據常例。定十二年《傳》同。所以言圍者，以大公也。崇大其事。【補曰】言《經》所以言圍者，著其以一邑之細而親自合圍大公之事也。大公之事，則公爲甚病，而《經》之病公亦見，是君子所取義也。定十二年《傳》直言「圍成，大公也」，猶隱二年《傳》曰「會戎，危公也」，其文意甚相似，皆明君子之取義如此也。圍棘、圍費、圍鄆、圍郕皆不發《傳》，明從伐於餘丘推例可知。公親圍成，事尤異常，故特發《傳》。病不待言，言大則病可

知，故特言大也。《左傳》稱「齊侯使公子鉏帥師從公。齊師圍成，師及齊師戰于炊鼻」，則此與定公圍成截然不同。所以得與彼同文且同義者，公之以齊師，推校上下，自是可知。至於君臣交兵，不可得書，祇可書公圍。既書公圍，則義之所取亦如此而止也。若然，《傳》不發不言戰之義者，成九年，晉樂書以鄭伯伐鄭，鄭與晉戰。《傳》曰「不言戰，以鄭伯也」，又發例曰「爲親者諱疾」，彼有明文，此可從略也。不致者，猶從竟內兵例，亦所謂不外公。

### 秋，公會齊侯、莒子、邾子、杞伯盟于鄆

陵。鄆陵，某地。【補曰】當云地闕。不日者，齊謀納公而不果，從淪盟例也。既不日又不月者，蓋以公在外異之。○【撰異曰】鄆，板本，《公羊》或作「剡」。唐石經、蜀大字本亦不誤。

### 公至自會，居于鄆。公在外也，【補曰】復

發《傳》者，此至自會而言居也。至自會，道義不外公也。【補曰】疏曰：「復發《傳》者，自齊爲虛，至自會爲實，文嫌有異，故發之。」文烝案：書「至」，皆新增之文，嫌與至自齊異，故復發之。後不論書至義者，從可知。

### 九月庚申，楚子居卒。【補曰】楚平王也。圍

改名虔，棄疾改名居，四名並書，所謂名從主人。《五經異義·公羊說》譏二名，謂二字作名，若魏曼多。《左氏說》二名者，楚公子棄疾即位之後改爲熊居，是爲二名。文烝案：楚昭王名軫，而《左傳》稱大子壬，則亦改名也。《穀梁》之意當與《左氏說》同。七年《傳》言「王父名子，重其所以來」，明改名非禮矣。《曲禮》曰：「君子已孤不更名。」是《春秋》之義。

### 冬十月，天王入于成周。【補曰】何休曰：

「月者，爲天下喜錄王者反正位。」周有人無出也。始即位，非其所，今得還復，據宗廟是內，故可言入。若即位，在廟，則王者無外，不言出。【補曰】疏曰：「重發《傳》者，彼明上下一見出文，此明天王之身入也。」文烝案：此人非是內弗受常例，與王猛異，《傳》欲見此意，故發之。《公羊》曰：「其言入何？不嫌也。」以文稱天王，與凡人不同明矣。杜預曰：「子朝餘黨多在王城，敬王畏之，徙都成周。」此三十二年《左傳》注也。《左傳》是年十一月癸酉，王入于成周。甲戌，盟于襄宮。十二月癸未，王入于莊宮。杜預曰：「莊宮在王城。」汪克寬曰：「蓋敬王畏子朝黨入王城而弗居，遂定都成周也。」李廉以爲三十二年城成周乃徙都。

案：杜預但云「成周狹小，故請城之」，似非彼時始徙都。

### 尹氏、召伯、毛伯以王子朝奔楚。○【撰異

曰】徐彥《公羊》疏曰：「尹氏、召伯，《穀梁》與此同。《左氏》『召伯』作『召氏』。」案：《左氏》經亦作「召伯」，《傳》則云「召氏之族」。杜注「召伯當言召氏」，以爲《經》誤。徐氏所見，豈當時有依杜以改《經》者邪？遠矣，非也。雍

曰：「奔篡君之賊，其責遠矣。」【補曰】疏以爲刺諸侯。文烝案：注疏皆不了。此因子朝終事之文以明《春秋》文外之意，謂自此後，諸侯無桓、文之君，《春秋》責之，其意遠也。前此，莊、僖不志崩，有失天下之道，而齊桓興焉，襄言出，有失天下之道，而晉文興焉，卒賴其力，王室卑而復尊。至於頃不志崩，周公言出，晉霸未替，猶有所望。今者猛、朝爭篡，澤邑寄居，弱類莊、僖，禍侔子帶，一人一奔，皆非晉力。大亂既定，霸者不興，於是周遂陵夷，故所責爲遠也。《國語》曰：「景王崩，王室大亂。及定王，王室遂卑。」

定王者，貞王也。【眉批】：「《世本》：敬王後爲貞王、元王。《史記》先元王，後定王。」義通於此。奔，直奔也。【補曰】言

書奔者，直是奔耳。朝已立爲王，《春秋》始終不以爲王，故發《傳》以明之。若襄王之奔鄭則書曰出居矣，昭公之出奔

齊則書曰孫矣。孫覺曰：「子朝之惡當誅絕，猶不曰出者，周無出，不以子朝之惡而亂《春秋》之大義也。」

二十有七年春，公如齊。自鄆行。【補曰】此本杜預。

公至自齊，居于鄆。公在外也。【補曰】疏曰：「重起例者，前會而至，今如而至，至而亦言居，嫌異義，故重言之。」

夏四月，吳弑其君僚。【補曰】吳州于。

楚殺其大夫郈宛。○【撰異曰】郈，當作「郈」，《左氏》、《公羊》作「郈」。

秋，晉士鞅、宋樂祁犁、衛北宮喜、曹人、邾人、滕人會于扈。【補曰】《左傳》曰：「令戌周，且謀納公也。」

冬十月，曹伯午卒。

邾快來奔。徐邈曰：「自此已前，邾庶其、畀我並來奔，今邾快又至，三叛之人俱以魯爲主。邾、魯鄰國，而聚其逋逃，爲過之甚，故悉書之，以示譏也。小國無大夫，

故但舉名而略其氏。【補曰】注末二語贅。界我、快無邑，非叛，注數之爲三叛，非也。

公如齊。

公至自齊，居于鄆。

二十有八年春王三月，葬曹悼公。【補

曰】何休曰：「月者，爲下出也。」

公如晉，次于乾侯。不得入于晉。乾侯，晉

地。【補曰】孫齊下言所次，內事詳也。言如又言所次，亦詳之也。何休曰：「月者，閔公內爲強臣所逐，外如晉不見答。後不月者，錄始可知。」公在外也。【補曰】重發

《傳》者，前謂至下言居，此謂如下言次也，次亦是止，省文可知。至而言居者，魯地故也。孫而言次，如而言次者，非魯地故也。

夏四月丙戌，鄭伯寧卒。○【撰異曰】寧，《公

羊》作「甯」。

六月，葬鄭定公。

秋七月癸巳，滕子寧卒。○【撰異曰】寧，《公

羊》作「甯」。

冬，葬滕悼公。

二十有九年春，公至自乾侯，居于鄆。

以乾侯致，不得見晉侯故。【補曰】此本杜預也。何休曰：「不致以晉者，不見容于晉，未至晉。」

齊侯使高張來唁公。【補曰】何休曰：「言來

者，居運從國內辭。不月者：例時也。」唁公不得入於魯也。【補曰】疏曰：「復發《傳》者，前齊侯唁公于野井，野井，齊地。今高張唁公于鄆，鄆是魯地。唁有遠近，人有尊卑，君臣同文，故重發例。魯地而言唁不得入魯者，謂不得入魯國都。」

公如晉，次于乾侯。

夏四月庚子，叔倪卒。季孫意如曰：

「叔倪無病而死，此皆無公也，是天命也，非我罪也。」言叔倪欲納公，無病而死，此皆天命使魯無君

爾，魯公之出，非我罪。【補曰】皆者，皆宋公佐，疏引前《傳》邢公是也。《左傳》齊梁丘據曰：「宋元公爲魯君如



晉卒於曲棘，叔孫昭子求納其君，無疾而死。」與此文正同，但以叔倪爲叔孫婍耳。《左傳》固非無據，而觀婍之家臣助季氏逐公，婍不罪焉，以是推之，豈有無病祈死之事？當以《穀梁》爲正矣。《注》以上言「無病死」，下言「無公」，故加「欲納公」三字，以顯《傳》意，此最得解。而王引之欲改讀「無公」爲「譙公」，與前「邢公」爲一意。據《集韻》，「譙」古作「譙」，以爲「無」者「譙」之借字。《爾雅》：「譙，謀也。」其說於文義殊滯。○叔倪納公事不知若何，今無可考。凡古書事有相類者皆當時記載之異，鄭毀游氏廟一事也，而或以爲葬，或以爲蒐，晉城成周一事也，而或以爲冬，或以爲春，《左傳》兼采之；晉獻公寢不寐一事也，而或以爲伐翟桓，《國語》據之，或以爲伐虞郭，《公羊》據之；魯大夫欲納君暴死一事也，而或以爲叔孫氏，《左傳》據之，或以爲叔氏，《穀梁》據之。

## 秋七月。

冬十月，鄆潰。【補曰】《公羊》曰：「邑不言潰？

此其言潰何？郭之也。曷爲郭之？君存焉爾。」何休曰：「昭公居之，故從國言潰。不言國之言郭之者，公失國也。」孔穎達曰：「公既如晉，必留人守鄆，鄆人潰散而叛

公，使公不得更來。」潰之爲言，上下不相得也。

【補曰】疏曰：「重發起例者，上下不相得之罪。邑與國同，故詳之。一解：鄆不伐而自潰，與常例異，故重發之。」文烝案：邑叛而從國文，爲變例，故重發《傳》以明同。上下

不相得則惡矣，亦譏公也。公既出奔，不能改德脩

行，居鄆小邑，復使潰亂，德之不建，如此之甚。【補曰】言亦者，諸書國潰，皆見其國之惡，爲譏文。疏曰：「嫌自潰，不責公也。」汪克寬曰：「或謂意如誘其民使潰，然亦由昭失民既久，故若是也。」昭公出奔，民如釋重負。《傳》明昭公有過，非但季氏之罪。【補曰】言昭素不得於民，出則民喜之，若負擔重物者初得息肩然。此申上譏公意，蓋師說云爾。或共公、康公、景公、平公之時，魯人相傳有是言矣。

三十年春王正月，公在乾侯。【補曰】言在

者，皆承上。在楚承如，此承次，後儒有謂帝在房州，宜書居。不宜書在者，不知此義也。葉夢得又引《易·文言傳》居上位而不驕，在下位而不憂。亦無足取。中國不存

公，存公故也。中國，猶國中。也。【補曰】《爾雅》曰：

「在，存也。」疏曰：「范例云，在有四，言在，非所在也。」文  
烝案：《傳》明《經》通例也。國中不存公者，凡居竟內則無  
存文，二十七年、二十八年不言在鄆是也。二十六年不言  
在齊，鄆已屬公也。二十九年不言在乾侯，猶有鄆也。成、  
襄、昭如晉，皆不書在，晉亦從國中例也。存公故也者，歲  
首既有存文，則知其有變，故異於平時。書在乾侯，明其失  
鄆而寄於他國，無所歸也。書在楚，明其遠朝夷狄，不得歸  
也。若專就此《經》言，則國中謂鄆，故謂鄆潰不得入。○  
後世唐中宗之事書帝在房州者，非也。昭公雖出，猶公也，  
故每歲存之也。中宗既廢，王也，非帝也。非帝言帝，無年  
而爲有年，非實也。皇后武氏稱帝紀年，紀帝而存王，又非  
名也。竊謂脩唐史者，宜於帝周之中每寓存唐之意。四月  
陳火，正堪取法，公在乾侯，不可同條，明乎此，可以言《春  
秋》名實之際矣。

夏六月庚辰，晉侯去疾卒。

秋八月，葬晉頃公。【補曰】汪克寬曰：「是時

公在晉地，不弔其喪不送其葬者，晉不受公，公亦淹恤在  
外，不能備其禮也。」

冬十有二月，吳滅徐。滅夷狄時，月者，爲下

奔起。【補曰】疏曰：「案：滅中國日，出奔月，輕於滅。滅  
夷狄時，奔何得更月？范《答薄氏》云，國不滅而出，以月  
爲例，國滅而出，出重於滅，滅夷狄雖時，猶加以月。然則  
溫子國滅而出奔，何以不月？有義而然。弦子之奔，文承  
八月之下，溫子奔在正月之後，何知不月？《傳》於弦子滅  
言不日微國，微國則例月，例月則不關於君出，君出之重不  
大於滅國。范云出重於滅者，言既滅其國，君不死難，比之  
常奔恒滅則爲重矣。滅在月例者，君出不復加日，明滅重  
矣。」文烝案：此注蓋合《經》意。疏云云者，多不明白，以  
弦滅爲在月例亦誤。凡滅在月例者，以其君歸則日之，沈、  
許、頓、胡是也。君奔則併於月文，譚是也。溫蒙上月，與  
譚同也。滅在時例者，以其君歸則無加文，夔是也。君奔  
則月之，此文是也。弦滅不得蒙上月，奔則得蒙之也。國  
滅君不能死，以歸者尤重於奔。夔所以無加文者，蓋以奔  
既錄月，則獲宜謹日，而其事本在時例，不欲苟爲特筆之  
文，故自從其常例也。潞子書日，《傳》以爲賢明，不從獲起  
義，乃是特爲變文矣。徐子章羽奔楚。奔而名者，有  
罪惡也。【補曰】疏曰：「注於譚子云『蓋無罪』。蓋者，疑

辭。今此章羽不疑者，名義多見《傳》，故從正例而不疑也。」啖助曰：「徐子名者，初已自服吳子，吳子唁而送之，非能自奔也。」劉綯曰：「力不能勝而奔者，義未絕也。章羽已服吳，而後奔楚，則既降矣，故名以著其絕。」○【撰異曰】羽，《公羊》作「禹」。唐石經、《左氏》與此同。岳本則作「禹」。《左傳》皆作「禹」。

三十有一年春王正月，公在乾侯。

季孫意如會晉荀欒于適歷。適歷，晉地。

○【撰異曰】欒，舊作「躒」。《左氏》作「躒」，下同。《公羊》又作「躒」，作「躒」。

夏四月丁巳，薛伯穀卒。【補曰】莊三十一年

書薛伯卒，至此復來赴。書名則同盟情親也，書日則正也，書葬而時則亦正也，皆與大國同例，終於《春秋》。

晉侯使荀欒唁公于乾侯。唁公不得入

於魯也。【補曰】疏曰：「復發《傳》者，今在晉地，晉將納公，公有可入之理，故重明之。」曰既為君言之矣。不可者，意如也。言己已告魯求納君，唯意如不肯。

【補曰】上言意如會欒，此言欒唁，知是意如不肯納君明矣。意如逐君，未有見文，於此微見之，《傳》即以唁辭明之。《左傳》所載，似曲為意如解免者，蓋魯人護季氏之辭，非實錄也。

秋，葬薛獻公。

冬，黑肱以濫來奔。○【撰異曰】肱，《公羊》作「弓」。案：《鄉射禮》注今文「弓」為「肱」。《易》家有野臂子弓。亦「肱」也。其不言邾黑肱何也？據襄二十

一年邾庶其以漆、間丘來奔言邾。【補曰】當依何休云「據讀言邾」。孔廣森以為：「《春秋》口授，恐久而失實，故文雖無邾，師法自連邾讀之，因以起其義也。」別乎邾也。

邾以濫邑封黑肱，故別之若國。【補曰】《公羊》以為黑肱之先人叔術讓國不受，惟受五分之一，即濫是也。服虔《長義》曰：「邾本附庸三十里耳，而言五分之，為六里國也。」孔廣森曰：「建國制地，要取開方，方三十者，其積九百，五分之一猶有百八十里，何言六里乎？」文烝案：百八十里之積為方十三里而有餘，設稱三十分之一為方五里而有餘，可謂之方一里乎？其不言濫子何也？據既別之為國，則應書其爵。非天子所封也。【補曰】雖是

邾之別封，終不得爵命於天子，明非濫子也，猶夫邾大夫也。來奔，內不言叛也。【補曰】此言凡竊邑來奔者

皆叛也，若奔他國，即當云黑肱入于濫以叛，邾庶其亦當云入于漆以叛，莒牟夷亦當云入于牟婁以叛。今有以文無叛文者，爲其來奔內，書其以地接我爲重，兼爲內諱也。不發《傳》於庶其、牟夷者，彼處一人據二邑、三邑，此惟一邑，彼若書叛，亦當但書一邑，故就此一邑者明之，以包前二文也。杜預曰：「以邑出書叛，適魯而言來奔，內外之辭。」劉歆、賈逵說「三叛人以地來奔，不書叛謂不能專也」。《釋例》駁之。杜氏頗合《傳》義，亦以襄二十六年衛孫林父入于戚以叛。《左傳》云「以戚如晉」，足明竊邑而奔他國者皆書叛矣。書叛則不書出奔，書來奔則不書叛，而書以之文則同，是《春秋》之義也。疏不得《傳》旨，以爲黑肱不繫邾，嫌其專地，不責叛罪，故重發《傳》以明例。此《傳》是初發，何云重乎？

十有二月辛亥朔，日有食之。

三十有二年春王正月，公在乾侯。【補

曰】趙鵬飛曰：「三年之間，歲首皆書公在，存公所以誅季

氏也。而《左氏》各爲之說，鑿矣。謂《左氏》專信國史而不附會，殆不然也。」案：葉夢得亦謂《左氏》妄。

取闕。【補曰】據《左氏》定元年《傳》，則闕者魯群

公墓所在。賈逵曰：「昭公得闕，季氏奪之。」杜預曰：「公別居乾侯，遣人誘闕而取之。」文烝案：此蓋不蒙上月，或如齊侯取郕，不可以常例準。

夏，吳伐越。【補曰】不稱於越者，自吳言之也。

與楚同。

秋七月。

冬，仲孫何忌會晉韓不信、齊高張、宋仲

幾、衛大叔申、鄭國參、曹人、莒人、邾人、薛

人、杞人、小邾人城成周。【補曰】何忌，纘之子孟

懿子。二十七年戍周，此罷戍而城之。書城不書戍，僖十四年論之備矣。不言城京師，說亦見前。○【撰異曰】大，

《左氏》、《公羊》作「世」。準之前後，文宜從「世」。《左氏》

無「邾人」。天子微，諸侯不享覲。享，獻也。覲，見

也。言天子微弱，四方諸侯不復貢獻，又無朝見之禮。天

子之在者，惟祭與號，祭，謂郊上帝。號，謂稱王。

【補曰】《傳》言此者，明時既以下都爲京師，而微弱之至不能增脩其城，亦所謂危而不能自守。故諸侯之大夫相帥以城之，此變之正也。【補曰】疏曰：「變之正，重復起《傳》者。平、桓之世，雖復禮樂出自諸侯，諸侯猶有享覲之心。襄王雖復出居，猶賴晉文之力，札子雖云矯殺，王威未甚屈辱。至於景王之崩，嫡庶交爭，宋、衛外附，楚亦內侮，天子獨立成周，政教不行天下，諸侯無桓、文之伯，不能致力於京師，權柄委於臣手，故大夫相率而城之，比之正禮，而《傳》與城杞釋不異辭也。」文烝案：《經》與城杞同文，《傳》嫌其事迥別，故重顯此二句。謝湜曰：「當王室危弱之時，乃能從王命以安王室，善之大者。」呂本中曰：「周室雖微，諸侯猶勤之，先王之德澤猶有存焉者也。」

十有二月己未，公薨于乾侯。

## 春秋定公經傳第十補注第二十三 定公

亦襄公子，昭公弟公子宋也。以敬王十一年即位。

穀梁 范氏集解 鍾文烝詳補

元年春王三月。徐邈曰：「案《傳》定元年不書

正月，言定無正也。然則改元即位在于此年，故不可以不書王，書王必有月以承之，故因其執月以表年首爾，不以謹仲幾也。」【補曰】凡執史皆書月，而此之仍史文書月者，其義不從執起，徐注是也。或疑執仲幾若適在正月，又此年或竟春無事，豈得無正？此皆文外巧辯，非所疑也。舊本「三月」二字退在下「晉人」上，以「王」字斷句，與桓元年同誤。今改正之，并移下條徐注於此。《公羊》此年亦以「王」字斷句。孔廣森本改正。不言正月，定無正也。【補曰】言十二公惟定無正，隱雖十年無正，元年猶有之。定之無正何也？【補曰】據莊公有正月。昭公之終，非正終也；死在外故。定之始，非正始也。

【補曰】始，謂即位。即位者，一國之始。定即位不在正月，

是非正始，故無正。凡元年之正月，為即位書也，莊雖不書即位，而正月實即位，故桓非正終而莊猶正始，是以有正月。昭無正終，故定無正始。【補曰】上言非，此言

無，則此謂《春秋》之立文也。言《春秋》於昭、定終始之際因事見義。昭無正終之文，故定亦無正始之文，明後君當念先君，不得安然自正其位也。凡非繼正為君者，有正月則以不書即位為義，言不忍即位也；無正月則以不書正月為義，言不敢同於正始也。不言即位，喪在外也。

【補曰】此又承上「定之始，非正始」言之。正月所以不即位者，緣喪在外未殯也，明定實不即位，故不言即位，與莊、閔、僖不同，非謂此處有言即位之理也。《傳》申言此者，因以見即位之文，史所本無，君子更為去正月以著義。

晉人執宋仲幾于京師。晉執人於尊者之側

而不以歸京師，故但言其執，不書所歸。【補曰】此本杜預也。疏曰：《薄氏駁》云，仲幾之罪，自當委之王吏，非晉人所執，故《傳》云「不正其執人於尊者之所也」，譏執不讎無所歸。晉執曹、衛在他處，並可言歸，若晉人執仲幾于京師，復何得言歸于京師？若如此論，何以通乎？范答云，

晉城成周，宋不即役，晉爲監功之主，因而執之。此自晉人之事，安得委之王吏？《傳》當以執人於尊者之所而不以歸於王之有司，故譏之，非言其不可以執晉執曹、衛之君。各於其國而並不書國者，以其歸于京師故也。今執仲幾，不書所歸，唯舉其地者，此晉自治之效，若使歸于京師，與執諸侯同，是君臣無別也。今直以執在京師，不可言歸，此義猶自未通。上言城成周，序仲幾於會，此言歸于京師，其言足證天王居于狄泉，在畿內而別處。若上言城成周，下稱晉人執宋仲幾歸于京師，具見執之異處而歸天子。今晉人於尊者之側而執人以歸，自治於國，故《春秋》不與其專執地於京師。」文彙案：此條《左傳》與《經》違異，杜作注又自異其傳而語殊不安，范用杜而力申之，皆飾說也。今備錄以見其失，當以薄叔玄《義》爲長。○【撰異曰】此「幾」，《公羊》或作「機」。此大夫，【補曰】文承上城，足明其爲晉大夫。「此」字下各本衍「其」字，今依唐石經、呂本中《集解》本、張治《集註》、俞皋《集傳釋義》本刪正。其曰人何也？微之也。【補曰】疏曰：「大夫當稱名，而大夫相執無稱名之例，因此見義，明大夫相執不書，書則微之，見伯討失所，故《傳》云云，非謂大夫相執得見於《經》。」何

爲微之？不正其執人於尊者之所也，【補曰】疏曰：「仲幾雖逆命，當歸王之有司，今晉大夫執人於尊者之側，故地于京師以見尊，稱人以見微。」不與大夫之伯討也。【補曰】疏曰：「諸侯執人，稱侯以執者非伯討，稱人以執者爲伯討，今此稱人，非伯討者，伯討宜施諸侯，若大夫則不得也。」李廉曰：「此條以事言之則以王事討有罪，以義言之則大夫專執人於王側而不歸之王吏，故《春秋》亦不與以伯討。」文彙案：《公羊》謂仲幾不衰城，與《左傳》同。衰，謂差次受功。

夏六月癸亥，公之喪至自乾侯。戊辰，

公即位。【補曰】《左傳》曰：「夏，叔孫成子逆公之喪于乾侯。喪及壞隕，公子宋先入，從公者皆自壞隕反。六月癸亥」云云。殯然後即位也。周人殯于西階之上。【補曰】丁卯殯，然後戊辰即位。此句解《經》已了，下文反覆申明之。定無正，見無以正也。【補曰】無以正者，正月不即位，是無以正。踰年不言即位，是有故公也，謂昭公在外故。【補曰】故，猶舊也。正月不即位則不言公即位，而公之稱猶屬故公，故書曰「公之喪」也。此解

上「公」字。蘇轍得其意。言即位，是無故公也。

【補曰】文公、成公等正月言公即位，所謂公者，非復故公矣。此戊辰之文與彼相當，解下「公」字也。即位，授受

之道也，先君見授，後君乃受，故須棺在殯乃言即位。

【補曰】位者，先君所授，後君所受，起下四句意也。注非也。此自通凡即位者言。先君無正終則後君無正

始也，【補曰】申上「踰年不言即位」二句。先君有正

終則後君有正始也。【補曰】申上言「即位」二句。

戊辰，公即位，謹之也。【補曰】謂謹日。《公羊》

曰：「即位不日，此何以日？錄乎內也。」定之即位，不

可不察也。【補曰】疏曰：「即位雖同時義有別，理有

所見，見必有意，故曰不可不察。」公即位何以日也？

據未有日者。戊辰之日，然後即位也。【補曰】言

其遲緩，失正月即位時。癸亥，公之喪至自乾侯，

何爲戊辰之日然後即位也？癸亥去戊辰六日，

怪不即位。正君乎國然後即位也。諸侯五日而

殯，今以君始死之禮治之，故須殯而後言即位。【補曰】君，

先君也。「正君乎國」即下引沈子「正棺楹間」語，是事也，以明即位必於殯。沈子曰：「正棺乎兩楹之

間然後即位也。」兩楹之間，南面之君聽治之處。【補

曰】何休曰：「正棺者，象既小斂夷于堂。昭公死於外，不得以君臣禮治其喪，故示盡始死之禮。禮：始死于北墉

下，浴於中霤，飯含於牖下，小斂於戶內，夷於兩楹之間，大斂於阼階，殯於西階之上，祖於庭，葬於墓。奪孝子之恩，

動以遠也。禮：天子五日小斂，七日大斂。諸侯三日小

斂，五日大斂。卿大夫二日小斂，三日大斂。夷而經，殯而

成服，故戊辰然後即位。」文烝案：上《傳》言殯然後即位，

謂五日殯而成服也，而此言正棺兩楹之間，以三日夷而經

爲節者，蓋沈子大概言之耳。鄭君以爲正棺即殯，故《雜

記》注曰：「凡柩自外來者，正棺於兩楹之間，尸亦俛之於

此，皆因殯焉。殯必於兩楹之間者，以其死不於室而自外

來，留之於中，不忍遠也。」孔廣森曰：「周人殯於西階之

上，殷人殯於兩楹之間，魯有王禮，辟時天子，故多雜殷法。

《檀弓》曰「殷朝而殯於祖」，而《左氏》說「魯喪殯廟」，即殷

法也。《鄭禮》注及孔說俱有理，故並述焉。《書·顧命》成

王以四月乙丑崩于路寢，大保逆子釗，不言逆王。至大斂



之明日癸酉，布設既畢，將授冊命，始稱「王麻冕黼裳，由賓階墮」。及受冊命畢，乃稱「王出在應門之內」。《白虎通》以爲既殯而即繼體之位也。然則殯而即位者，天子亦然，明魯他公皆然。但他公既有殯後即位之禮，又有元年正月即位之事，定公值事之變，葉夢得謂「以喪次之嗣位，遂正朝廟之君位」，是其異也。杜預《釋例》曰：「昭公喪在外，踰年乃入，故因五日改殯之節，國史用元年即位之禮，因此年爲元年。」其說是也。《公羊》曰：「癸亥公之喪至自乾侯，則曷爲以戊辰之日然後即位？」正棺於兩楹之間，然後即位。子沈子曰：「定君乎國，然後即位。」與此文互異。俞樾語予，彼「定」字亦當讀爲「正」，《書·堯典》「定四時」，《史記》作「正」。《國語》「正卒伍」，《漢書》作「定」，二字古多通用也。《公羊》與《穀梁》文雖互異，義實相同。古《經》師口授，但求大旨之無乖，不斤斤於字句間。如此何休既失「定」字之讀，孔廣森尤不然矣。內之大事，曰。【補曰】如公夫人薨葬之屬。即位，君之大事也，其不日何也？【補曰】問凡正月即位者何以不謹？以年決者不以日決也。【補曰】元年即位，必在三朝月正元日，著自帝典。言正月，足明其爲朔矣。本非日事，不須

遇朔言朔。此則其日何也？【補曰】怪獨謹此。著之也。欲有所見。何著焉？踰年即位，厲也。厲，危也。公喪在外，踰年六月，乃得即位，危，故日之。【補曰】不謹日則無以見其危。於厲之中又有義焉，先君未殯則後君不得即位。【補曰】於此危文，又因見義義者，下文所云是。焉，或作「也」。未殯，雖有天子之命猶不敢，況臨諸臣乎？以輕喻重也。雖爲天子所召，不敢背殯而往，況君喪未殯而行即位之禮以臨諸臣乎？周人有喪，魯人有喪，【補曰】疏曰：「並有喪。」周人弔，魯人不弔。周人曰：「固吾臣也，使人可也。」魯人曰：「吾君也，親之者也，使大夫則不可也。」故周人弔，魯人不弔。【補曰】弔周喪必諸侯自親之，以有父喪未殯，故不弔。《疏》曰：「既殯君，乃奔喪也。先殯其父，後奔天子喪者，亦是不奪人之親，門外之治義斷恩，門內之治恩掩義。至如伯禽越紼赴金革之重，不拘此例。」文烝案：《傳》以魯人述魯事，不知其當何王何公，觀此《傳》，則知《經》所書大夫弔者非禮，又因知會葬亦當親往。而《經》所書葬，或大夫，

或卑者，皆非禮矣。《五經異義·公羊說》：「天王喪，赴者至，諸侯哭，雖有父母之喪，越紼而行事，葬畢乃還。」《左氏說》：「王喪，赴者至，諸侯既哭，問故，遂服斬衰，使上卿弔，上卿會葬。」《經》書叔孫得臣如京師葬襄王以爲得禮，許慎謹案，易下邳待其容說。諸侯在千里內皆奔喪，千里外不奔喪，若同姓，千里外猶奔喪，親親也。容說爲近禮。以其下成、康爲未久也。周道尚明，無愧于不往。

【補曰】鄭君《詩箋》曰：「下，猶後也。」成、康，周道之盛，《左傳》曰：「成王靖四方，康王息民。」君，至尊也，去父之殯而往弔猶不敢，況未殯而臨諸臣乎？

【補曰】定公爲昭公弟，以弟繼兄，猶以子繼父，其義不異也。自「周人有喪」至此，又申上「未殯」四句意，前篇言《春秋》之義不以親親害尊尊，義斷恩也。此言君雖至尊，不敢去父殯而往弔，恩掩義也。○考諸《喪服傳》，於父、於天子、於君、妻於夫、妾於君，皆曰至尊也，於祖父母、於曾祖父母亦曰至尊也。於母對至尊言，曰私尊也，於妻曰至親也。凡尊親之理，以是而推。

### 秋七月癸巳，葬我君昭公。【補曰】《左傳》

「季孫葬昭公於墓道南。孔子之爲司寇也，溝而合諸墓」。

方苞以爲昭亦書葬，則隱、閔之不葬非舊，史以葬不成禮而不書明矣。

### 九月，大雩。雩，月，雩之正也。【補曰】重

釋例者，將詳論雩道，故重釋以發端。秋大雩，非正

也。冬大雩，非正也。秋大雩之爲非正何

也？冬，禾稼既成，猶雩，則非禮可知。秋，禾稼始苗，嫌

當須雨，故問也。【補曰】「雩」字下「之」字上各本又衍「雩」

字，今依唐石經、余本、張洽《集注》、俞樾《集傳釋義》本刪

正。毛澤未盡，人力未竭，未可以雩也。邵

曰：「凡地之所生謂之毛。」《公羊傳》曰「錫之不毛之地」是

也。言秋百穀之潤澤未盡也，人力未盡謂耕耘之功未畢。

【補曰】明凡書秋者，皆七月。雩，月，雩之正也。月

之爲雩之正何也？其時窮，人力盡，然後

雩，雩之正也。何謂其時窮人力盡？是月

不雨則無及矣，是年不艾則無食矣，是謂其

時窮人力盡也。【補曰】艾，穫也。疏曰：「是月不雨

則無及者，謂八月求雨，雩而得之，則書雩，明有所及故也。

是月雩，不必有雨，而曰無及者，人情之意，欲其有得，故以

兩月請。是年不艾則無食者，指謂九月之雩，雩而得雨。是年有食，雩不得雨則書旱，旱則一歲無食，故曰是年。《傳》於仲秋言月，季秋言年，年月之情，以表遠近，深淺之辭也。雩之必待其時窮人力盡何也？雩者爲旱求者也，求者請也，古之人重請。何重乎請？人之所以爲人者，讓也，【補曰】人無禮，無以立，禮之行，以辭讓也。請道去讓也，則是舍其所以爲人也，是以重之。【補曰】舍，釋也，去也，除也，置也。案：此與乞爲重辭，求爲得不得未可知之辭，義皆相貫。程子不爲妻求封，或問今人陳乞恩例以爲本分，曰：「只爲而今道慣乞字。」因問陳乞封父祖如何？曰：「此事體又別讀，《傳》宜知此意。」焉請哉？請乎應上公。【補曰】疏曰：「魯與天子同雩上帝，上帝既雩，及百辟卿士，有益於民者，故言請乎應上公。天尊不敢指斥，故請其屬神也。」古之神人有應上公者，通乎陰陽，【補曰】生通陰陽，歿而爲神，謂之神人也。物曰怪，人曰神，相似而異。《風俗通》引《傳》曰：「神者，申也。怪者，疑也。」「申」即「信」字，明無可疑。君親帥諸大

夫，道之而以請焉。道之，謂君必爲先也。其禱辭曰：「方今大旱，野無生稼，寡人當死，百姓何謗。不敢煩民請命，願撫萬民，以身塞無狀，禱亦請也。」此即請辭也。【補曰】案：成七年疏曰：「鄭《釋廢疾》去冬及春夏。案：《春秋說》、《考異郵》三時唯有禱禮，無雩祭之事，唯四月龍星見始有常雩耳，故因載其禱請山川辭」云云。與此注七句同。唯「大旱」作「天旱」，「何謗」作「何依」。此疏曰：「《考異郵》說僖公三時不雨，禱于山川，以六過自責。」又曰：「方今大旱，野無生稼。」此注所云，其禱辭或亦用之，故引以明之耳。夫請者非可詒託而往也，必親之者也，是以重之。詒託，猶假寄。【補曰】再言是以重之者，前通論請道之重，此專指君親請禱之重。案：《傳》惟言八月、九月爲雩之正，不言孟夏之雩者，龍見常祀，非是旱雩。《經》無書六月雩者，故《傳》亦不及也。疏曰：「聖人重請，請必爲民。民之本務，在於春夏。春夏祈穀，必先嚴其犧牲，具其器物，謹脩其禮，冀精誠有感，故一時盡力，專心求請。求請不得失時，時在孟夏之節，是月有雨，先種得成茂實，後種更生，故重其時。時過以往，至於八月、九月，乃是脩雩之節也。」

立煬宮。煬宮，伯禽子廟。毀已久。【補曰】案：

《史記》魯公伯禽子考公酋，考公弟煬公熙。立者，不宜立者也。【補曰】疏曰：「重發《傳》者，此不日，與武宮

異，故發之。范例宮廟有五，文有詳略，見功有輕重，丹楹功少，故書時，刻桷功重，故錄月。范《答薄氏》云，考宮書月，比丹楹爲重。武宮書日者，范云始築之事，煬宮不日，比武宮爲輕。此例以宮言之也，立廟之例以立言之，在不立中，不宜立例有四。」文烝案：《左傳》：「昭公出，故季平子禱于煬公。」九月，立煬宮。」

冬十月，損霜殺菽。建酉之月，損霜殺菽，非

常之災。【補曰】此本杜預也。何休曰：「菽，大豆。汜勝之種植書曰『大豆保歲易爲宜』。《廣雅》『小豆別名荅也』。劉向以爲周十月，今八月，消卦爲觀，陰氣未至，君位而殺，誅罰不由君出，在臣下之象也。」○【撰異曰】菽，《左氏》又作「叔」。陸渚《纂例》本作「叔」，云《公羊》作「菽」。未可以殺而殺，舉重；舉殺豆則殺草可知。可殺而不殺，舉輕；不殺草則不殺菽亦顯，僖三十三年隕霜不殺草是也。【補曰】重發《傳》者，各有所主也。其曰菽，舉

重也。【補曰】申言以結之。疏曰：「隕霜二文不同，故范特爲一例。」文烝案：《傳》釋二文甚明，《公羊》皆謂之記異。此是災菽，而以異書，以爲異大乎災，何休遂以爲獨殺菽，不殺他物。杜譌引《集義》曰「誤也」。

二年春王正月。

夏五月壬辰，雉門及兩觀災。雉門，公宮之

南門。兩觀，闕也。【補曰】此本杜預也。《明堂位》說魯制曰「庫門，天子皋門，雉門，天子應門」。鄭君曰：「言如天子之制也。天子五門：皋、庫、雉、應、路，魯有庫、雉、路，則諸侯三門與？」此《經》「雉門」即桓三年《傳》之「闕門」，謂之闕門者，以此門兩旁有兩觀故也。《爾雅》曰：「觀，謂之闕。」孫炎曰：「宮門雙闕。」雙闕即兩觀也，兩觀亦即《周禮》、《左傳》之「象魏」，以其中中央闕然爲道，而其上縣法象，狀巍巍然高大，使萬民觀之，故曰闕，曰象魏，曰觀也。亦即《禮記》之「臺門」，《左傳》之「門臺」，蓋兩邊築闕爲基，基上起屋謂之臺門，亦曰門臺也。《公羊》載子家駒對昭公，以魯兩觀爲僭天子禮。何休曰：「禮：天子諸侯臺門，天子外闕兩觀，諸侯內闕一觀。準此言之，魯雉門既如天子制，

而兩觀又直僭天子也。」何氏說此《經》以爲雉門兩觀皆天子之制，定公不去其失，故天災之。疏引劉向云：「雉門，天子之門，今魯過制，故致天災。」說與何同。劉雖不言兩觀爲僭，當亦不異《公羊》也。○劉敞以爲天子亦三門，戴震申之謂天子有皋、應、路，諸侯有庫、雉、路。皋門，天子之外門；庫門，諸侯之外門；應門，天子之中門；雉門，諸侯之中門。異其名，殊其等，門數則同，皆三朝，皆三門也。其不曰雉門災及兩觀何也？據先書雉門，則應言雉門災及兩觀。鄭嗣曰：「據災實從雉門起，應言雉門災及兩觀。」災自兩觀始也，不以尊者親災也。始災者，兩觀也。鄭嗣曰：「今以災在兩觀下，使若兩觀始災者，不以雉門親災。」【補曰】《公羊》曰：「主災者，兩觀也。」何休曰：「時災從兩觀起。」又曰：「兩觀微也，不以微及大也。」何休曰：「門爲其主，觀爲其飾，故微也。」先言雉門，尊尊也。欲言兩觀災及雉門，則卑不可以及尊，災不從雉門起，故不得言雉門災及兩觀。兩觀始災，故災在兩觀下也。鄭嗣曰：「欲以兩觀親災，則《經》宜言兩觀災及雉門。雉門尊，兩觀卑，卑不可以及尊，故不得不先言雉門而後言兩觀。欲令兩觀始災，故災在兩觀下爾。」【補

曰】注三引鄭嗣，以存異說，范意則與何休同也。劉總曰：「《春秋》辯理，一字見義，五石六鵠，以詳略成文，雉門兩觀，以先後顯旨，其婉章志晦，諒以邃矣。《尚書》則覽文如詭而尋理即暢，《春秋》則觀辭立曉而訪義方隱，此聖人之殊致，表裏之異體者也。」

### 秋，楚人伐吳。

冬十月，新作雉門及兩觀。【補曰】月者，重其作。何休曰：「月者，久也。當即脩之，如諸侯禮。」言新，有舊也。作，爲也，有加其度也。【補曰】疏曰：「重發《傳》者，此災而更脩，嫌與作南門異，故發《傳》以同之。」此不正，其以尊者親之何也？不正，謂更廣大之，不合法度也。據當諱，而以雉門親新作之下，雖不正也，於美猶可也。改舊雖不合正，脩飾美好之事，差可以雉門親之。

### 三年春王正月，公如晉，至河乃復。【補

曰】《左氏》賈逵注曰：「刺緩朝見辭失所，不諱，罪己。」劉炫謂：「公以六月即位，此年便往，於事未爲緩，晉何以辭

之？此後更無謝罪之處，明年會次依常，乃復之意，不可縣知。」劉說是也。但其事不可知，其義則亦當以恥之爲義，從著有疾之例也。孔廣森曰：「月者，正月也。」疏曰：「昭公四如晉，并有疾爲五，皆不月，公不入晉則無危也。昭即位二年而脩朝禮，乃爲季氏所譖，使不得入，公無危懼之意，猶數數脩朝於晉，晉雖不受朝，公無危懼之理。今定立三年，始朝於晉，晉責其緩慢，不受其朝，公懼而反，非必季氏所譖，公有負於晉而心內畏懼，故危錄之。」文烝案：昭既無危文，何以危定乎？疏說紆蔓而鑿，孔說爲允。

三月辛卯，邾子穿卒。○【撰異曰】三月，《左氏》及唐石經《公羊》磨改作「二月」。徐彥曰：「《公羊》、《穀梁》皆作「三月」，《左氏》作「二月」，未知孰正。」

夏四月。

秋，葬邾莊公。

冬，仲孫何忌及邾子盟于拔。拔，地名。

【補曰】當云地闕。邾本子爵，而喪未踰年亦稱子，辭窮則同也。不日者，哀元年何忌伐邾渝盟，與昧同義也。既不日又不月者，蓋以昧是公盟，此是大夫盟，故特異之。

○【撰異曰】拔，《公羊》作「枝」。

四年春王二月癸巳，陳侯吳卒。

三月，公會劉子、晉侯、宋公、蔡侯、衛侯、陳子、鄭伯、許男、曹伯、莒子、邾子、頓子、胡子、滕子、薛伯、杞伯、小邾子、齊國夏于召陵，侵楚。【補曰】地而後侵，疑辭也，與襄同。滕班在頓、胡下，與昭四年異。月者，義見昭四年注。

夏四月庚辰，蔡公孫姓帥師滅沈，以沈子嘉歸，殺之。【補曰】凡書以歸者，不殺之也，殺則書殺。若君死於其位則但書滅國，舉滅爲重也。滅卑國例月，此日者，爲以其君歸，後文許、頓、胡三國亦同也。曹、邾書入，故或日或不日。○【撰異曰】姓，《左氏》又作「生」。

《公羊》「姓」上有「歸」字，後並同。段玉裁曰：「歸姓即歸生也。」《音義》「三姓」字皆音「生」，一音如字。

五月，公及諸侯盟于皋鼬。召陵會劉子諸

侯，總言之也。皋鼬，地名。不日者，後楚伐蔡不能救故。【補曰】此當云鄭地。注首二句本杜預。齊國夏亦包在內。

陸渚、劉敞說非也。○【撰異曰】皋融，《公羊》作「浩油」。陸渚《纂例》：「《公羊》作「浩油」。」案：《鹽鐵論》作「誥融」。一事而再會，公志於後會也。後，志疑也。

公畏強楚，疑於侵之，故復者更謀也。【補曰】疏曰：「案：《傳》例地而伐，疑辭。今《經》言會于召陵，侵楚。則疑於前會，不關於後。而云「志於後會」。後，志疑者，楚當時爲吳所困，削弱易可得志。今一會之中，十有九國，衆力之彊，足以服楚，不敢深入，淺侵郊竟，則責諸侯之疑居然可曉。公疑於楚強，是謂無勇，故會盟二文並見，魯公外內之疑兩顯。」文烝案：《傳》解《經》加言公及也，凡前目後凡之文，言諸侯之大夫則內別出大夫名氏，言諸侯則內不別出公，此通例也。僖之篇盟薄、盟宋皆言公會諸侯，其上無公，是後至之文。今此上既言公會，又言公及，一事也而再出公，與後至書會之文不異，是明公志於後會矣。公實不後而志於後者，其志有所疑，謂楚不可侵也。上地而後侵，見晉之疑，此復出公，見公之疑，內外互見，明會盟皆不足善。其後晉不救蔡，致使請救於吳，晉無能甚矣。以王臣之重十八國之衆而從淪盟不日之例，則《春秋》之意不可見乎？書及者，上言公會，明外爲主，故此從以內及外常文也。陳則通曰：「自幽以後，伯主之大盟皆書會，天下有伯

而諸侯始合也。至皋融書及，天下無伯而諸侯始散也。」陳說亦得兼通。《鹽鐵論》曰：「《春秋》存君在楚，誥融之會書公，殆夷狄也。」彼意謂侵楚有危，爲公危錄，蓋用《公羊》家舊說，與《傳》異也。《傳》「一事」二字各本誤作「後」一字，涉下二句而誤，義不可通。今依唐石經、余本、俞皋《集傳釋義》本改正。

杞伯成卒于會。○【撰異曰】成，《公羊》作「戊」，或又作「戌」。音恤。

六月，葬陳惠公。

許遷于容城。【補曰】容城，楚地。

秋七月，公至自會。【補曰】此二事偶則以後事致之例，實亦未滿二時。月者，何休曰：「爲下劉卷卒。」

劉卷卒。劉，采地。【補曰】此注贅。劉敞曰：「何以不言爵？畿內之君也。不世爵，故不與爵稱也。王者之制，內諸侯祿，外諸侯嗣，於《經》未有以言之，觀乎劉卷卒則可信矣，故生稱爵，其祿也。卒稱名，從正也。葬稱公，主人之事也。」文烝案：劉云大夫不世爵，內諸侯祿，外諸侯嗣，皆《王制》文，與《公羊》言「大夫不得世，世卿非禮」合。《左氏》說卿大夫皆世父祿，賢則世位。官有世功，則



有官族。《左氏》義爲備。《傳》云「寰內諸侯也，非列土諸侯」，故卒不言爵，所以相別。趙匡得之。此不卒而卒者，賢之也。寰內諸侯也，非列土諸侯，此何以卒也？天子畿內大夫有采地者謂之寰內諸侯，非列土之諸侯，雖賢猶不當卒。【補曰】書·禹貢《說虞夏之制》「五百里侯服，百里采，二百里男邦，三百里諸侯」。胡渭曰：「男始言邦，則王官唯得以本爵，自君其采邑，而不敢稱邦可知。」天王崩，爲諸侯主也。昭二十二年景王崩嘗以賓主之禮相接，能爲諸侯主，所以爲賢。【補曰】疏曰：「《傳》又云『爲諸侯主，故書卒，則書卒不關其賢』，而范例云『非列土諸侯而書卒者，賢之也』。賢之一文而義當兩用，上言不卒而得書卒之意，下言賢猶不當卒，以其爲諸侯主，明賢之義，故得書卒。反覆二事，皆是爲賢，故例復云賢之。」文烝案：史書卒者，彼來赴也，彼來赴者，以其嘗爲我主也，故君子取其義而《傳》明之也。王崩爲主者，前此多有，其卒皆不赴魯，今此會盟相接，近在本年，情尤親，故赴也。不日者，卒之已是加錄，不復須日，故略去舊文，與王子虎同也。尹氏亦爲主而日者，甫爲主而即卒，恩痛尤深，故不去日也。《傳》於尹氏曰「於天子之崩，爲魯主」，

於此曰「天王崩，爲諸侯主」，互文而同義。《公羊》於尹氏曰「天王崩，諸侯之主」，於此曰「我主之」，亦互文而同義。《公羊》於此不言王崩者，省文也。何休、孔廣森遂滋異解。

### 葬杞悼公。

### 楚人圍蔡。

晉士鞅、衛孔圉帥師伐鮮虞。【補曰】昭十

二年狄晉，此承楚圍蔡，從平文，猶襄二十五年鄭公孫夏伐陳，亦是狄鄭之後爲平文也。蘇轍曰：「晉雖棄諸侯而蔡未有國滅之禍，輕重異也。」文烝案：前篇狄晉，其義深遠，但以滅不滅較輕重，非《經》意。○【撰異曰】圍，《公羊》作「圍」。虞，《公羊》或作「吳」。案：古讀「虞」若「吳」。

葬劉文公。【補曰】疏曰：「葬之者，明亦爲賢之，

有采地，比之畿外諸侯，故書葬。」文烝案：以賢錄葬，異之於尹氏、王子虎，或尹氏、王子虎魯不會，史所本無。

冬十有一月庚午，蔡侯以吳子及楚人戰

于伯舉，楚師敗績。【補曰】吳、楚交兵，楚主吳客，反

以吳及楚者，吳爲蔡，以順蔡侯之文。吳初進稱子，又順進文也。此戰楚囊瓦帕師，不稱及楚囊瓦帥師戰，又不稱及楚師戰，但略稱楚人。敗乃稱師，下出奔乃見囊瓦名氏，皆



從城濮例者，皆順及文也。順之者，盈之也。後有存楚文，則此不嫌抑楚，或謂長岸以來，楚復以書人爲例，非也。伯舉，楚地。○【撰異曰】伯，《左氏》作「柏」，古通用。舉，《公羊》作「莒」。陸渚《纂例》唯云：「《公羊》作「伯莒」。」吳其稱子何也？【補曰】何休曰：「據滅徐稱國。」以蔡侯之以之，舉其貴者也。貴，謂子也。【補曰】李廉曰：「宋以四國，公以楚師，《傳》皆曰以者不以云云。此曰舉其貴，則又變不以之例，蓋所以雖同而事則異。觀於吳進書爵，則無譏矣。《春秋》所以不可一概論也。」案：此說與家鉉翁同。蔡侯之以之則其舉貴者何也？【補曰】據公會吳伐齊不舉貴者。吳信中國而攘夷狄，吳進矣。【補曰】攘，卻也。能憂中國，善行可進，故因蔡侯之以之則舉其貴。其信中國而攘夷狄柰何？子胥父誅于楚也。子胥父，伍奢也，爲楚平王所殺。【補曰】子胥伍員誅討也。責讓殺戮皆言誅。挾弓持矢而干闔廬，見不以禮曰干，欲因闔廬復父之讐。【補曰】注本何休。何又曰：「挾弓者，懷格意也。」闔廬即光。闔廬曰：「大之甚，勇之甚，子胥匹夫，

乃欲復讐於國君，其孝甚大，其心甚勇。爲是欲興師而伐楚。」子胥諫曰：「臣聞之，君不爲匹夫興師，【補曰】何休曰：「必須因事者，其義可得，因公託私，若以匹夫興師討諸侯，則不免爲亂。」且事君猶事父也，虧君之義，復父之讐，臣弗爲也。」【補曰】君爲匹夫興師，是虧君義，言輕君而重父也。於是止。蔡昭公朝於楚，有美裘，正是日，囊瓦求之，正是日，謂昭公始朝楚之日。【補曰】正，當也。昭公不與。爲是拘昭公於南郢。南郢，楚都。數年然後得歸，歸乃用事乎漢。用事者，禱漢水神。【補曰】《公羊》曰：「用事乎河。」傳聞誤。曰：「苟諸侯有欲伐楚者，寡人請爲前列焉。」【補曰】《老子》曰：「侯王自謂孤寡不穀，此其以賤爲本邪非乎？」又曰：「人之所惡，惟孤寡不穀，而王公以爲稱。」楚人聞之而怒，爲是興師而伐蔡，蔡請救于吳。子胥曰：「蔡非有罪，楚無道也，君若有憂中國之心則若此時可矣。」【補曰】何休曰：「猶曰若是時可

興師矣。激發初欲興師意。」爲是興師而伐楚。【補

曰】何休曰：「不書與子胥俱者，舉君爲重。」文烝案：《公羊》曰：「父不受誅，子復讐可也。」疏曰：「《傳》稱子胥云『虧君之義，復父之讐』，未論子胥是非。《公羊》、《左氏》論難紛然，賈逵、服虔共相教授，戴宏、何休亦有脣齒。其於此《傳》開端，似同《公羊》，及其結終，不言子胥之善，夫資父事君，尊之非異，重服之情，理宜共均，既以天性之重降於義合之輕，故忠臣出自孝子，孝子必稱忠臣。今子胥因一體之重，忽元首之分，以父被誅，而痛纏骨髓，得耿介之孝，失忠義之道，而忠孝不得並存。《傳》『不善子胥者，兩端之間，論忠臣則傷孝子之恩，論孝子則失忠臣之義，《春秋》科量至理，尊君卑臣，子胥有罪明矣。君者臣之天，天無二日，土無二王，子胥藉吳國之兵，戮楚王之尸，可謂失矣。雖得壯士之偏節，失純臣之大道。《傳》舉見其爲，不言其義，蓋吳子爲蔡討楚，申中國，屈夷狄，非直申子胥之情，不嫌子胥得善也。何以不言救也？據實救蔡。【補曰】伐楚所以救蔡也。救，大也。夷狄漸進，未同於中國。【補曰】疏曰：「案：狄救齊亦是善事，而得書救者，狄雖書救，未得稱人，許夷狄不使頓備也。今吳既進稱子，復

書曰救，便與中國齊蹤，故不與救。若書救，當言吳子救蔡，蔡侯以吳子及楚人戰于伯舉。」文烝案：不書其救而書蔡侯之以，仍不沒其救之實也。舉其貴以進之，又不言救以抑之，猶宣十一年明楚之討有罪，又不使夷狄爲中國，皆《經》世之深意也。

楚囊瓦出奔鄭。知見伐由己，故懼而出奔。

【補曰】輟戰而奔，見其逃軍，與先蔑同義。言出者，從伯舉去，猶楚竟也。杜預、京相璠輿地之學，自當別爲一家，而某地屬某國，則治《經》者宜知。

庚辰，吳人楚。○【撰異曰】楚，《左氏》作「郢」。

案：凡人國皆書國，獨此以楚都地名書。劉知幾曰：「豈《左氏》之本獨爲謬歟？」陸淳曰：「誤也。」汪克寬曰：「恐因昭三十一年《傳》『吳其人郢』之文而誤也。《左傳》於後十五年亦曰『吳之人楚』也，則當作『楚』。」日人，易無楚也。【補曰】《傳》例日人，惡人者也。此文去子從狄稱，惡人可知。不假具日，故知日人，易無楚也。易無楚者，壞宗廟，徙陳器，撻平王之墓。鄭嗣曰：「陳器，樂縣也。《禮》『諸侯軒縣』，言吳人壞楚宗廟，徙其樂器，鞭其君之尸，楚無能亢御之者，若曰無人也。【補曰】

《周禮·小胥》鄭衆注曰：「軒縣三面，其形曲。」鄭君曰：「去南面，辟王也。」何以不言滅也？據宗廟既毀，樂器已徙，則是滅也。欲存楚也。【補曰】書人見其滅，但書人又欲見其不滅。其欲存楚奈何？昭王之軍敗而逃，【補曰】昭王自郢西涉睢也。父老送之。曰：「寡人不肖，亡先君之邑。」【補曰】邑，國也，散文通。《左傳》楚鬬廉曰：「日虞四邑之至。」杜預曰：「四邑，隨、絞、州、蓼也。邑，亦國也。」父老反矣，何憂無君？寡人且用此人海矣。【補曰】且，將也。司馬彪《莊子》注曰：「凡言人者，皆居於州島之上與其曲隈中也。」案：此陸贄所謂楚昭以善言復國也，故勸德宗不吝改過，以言謝天下，卒使遠近感奮，用定唐之多難。父老曰：「有君如此，其賢也。」【補曰】此者，指上語。以衆不如吳，以必死不如楚，雍曰：「吳勝而驕，楚敗而奮。」【補曰】案：吳闔廬時，孫武典兵，仁義機權，其法詳備。而楚父老二語足以勝之，可以識用兵之本，故《淮南子》曰「百人之必死，賢於萬人之必北」，又曰「兵之所以強者必死也，民之所以必死者義也」。相與擊之，一

夜而三敗吳人，復立。楚復立也。【補曰】因楚能存，故欲存楚。賈子曰：「楚昭王當房而立，愀然有寒色，曰：『寡人朝飢時，酒二醢，』」【眉批】王念孫曰：「醢與鮠同。《說文》：『鮠，小鮠也。《廣雅》：『危也。』重裘而立，猶惛然有寒氣，將奈我元元之百姓何？」是日也，出府之裘以衣寒者，出倉之粟以振飢者。居二年，闔閭襲郢，昭王奔隋，諸當房之賜者請還致死於寇。闔閭一夕而五徙卧，不能賴楚，曳師而去。昭王乃復。」何以謂之吳也？據戰稱子。狄之也。何謂狄之也？君居其君之寢而妻其君之妻，大夫居其大夫之寢而妻其大夫之妻，蓋有欲妻楚王之母者，【補曰】王母，伯嬴也。闔閭盡妻後宮，次至伯嬴，伯嬴持刃拒之。劉向《列女傳》載其事。蓋者，承上語辭。不正。乘敗人之績而深爲利，居人之國，故反其狄道也。【補曰】《公羊》同。《左傳》亦有其事。秦穆爲晉所敗，亂人子女之教，無男女之別，秦所以爲狄也。吳人楚，君妻君妻，大夫妻大夫妻，吳所以反狄也。《白虎通》論周代五霸，秦穆、吳闔閭並列，【眉批】：《白虎》此說無宋樊。《春秋》於二君但有狄文，何霸之足云？

五年春王三月辛亥朔，日有食之。○【撰

異曰】三月，《公羊》作「正月」。段玉裁曰：「蓋誤字。」案：

陸渙《纂例》所據已誤。

夏，歸粟于蔡。蔡侯比年在楚，又爲楚所圍饑，

故諸侯歸之粟。【補曰】此本杜預。杜無「侯比」以下六字，

當刪之。末句杜作「魯歸」，杜誤也。粟者，禾實也，粟實曰

米。諸侯無粟，諸侯相歸粟，正也。【補曰】《周

禮·大司徒》：「大荒大札，則令邦國移民通財。」鄭君曰：

「移民辟災就賤，其有守不可移者則輸之穀，《春秋》歸粟于

蔡是也。」孰歸之？諸侯也。【補曰】蓋魯亦在內。

不言歸之者，專辭也。不言歸之者，主名若獨是魯

也。【補曰】雖魯不在亦然。義邇也。言此是邇近之

事，故不足具列諸侯。【補曰】注非也。義，謂公義。邇者，

引而近之。言此是諸侯公義之舉，《春秋》引而近之，比諸

內事，猶次陘內桓師，深美之也。此申上句并通前篇三專

辭言之。

於越人吳。舊說：於越，夷言也。《春秋》即其所

以自稱者書之，見其不能慕中國，故以本俗名自通。【補

曰】此記越事也。《逸周書》王會有於越，明其國本自稱於

越，與楚、吳稱之異。前自楚、吳言之，故曰越，此自越言

之，故曰於越，皆從主人也。陳岳、劉敞、戴溪、李廉、汪克

寬說近是。越人皆無月日，皆略之。

六月丙申，季孫意如卒。《傳例》曰：「大夫

不日卒，惡也。」意如逐昭公而日卒者，明定之得立，由于意

如，《春秋》因定之不惡而書日以示譏，亦猶公子翬非桓之

罪人，故於桓不貶。【補曰】此本鄭君《釋廢疾》，見隱元年

疏，其說非也。定固不以意如爲罪人，而書日以卒，非欲見

此意也。翬不去公子，固明桓不以爲罪人。而翬弑君，意

如逐君，翬不書卒，意如書日以卒，非所以爲比也。如其

說，則叔孫得臣，宣亦不以爲罪人，何以不書日？明書日

之意，不論其君之以爲罪否也。書日自是常例，所以從常

例者，前書意如會苟櫟，苟櫟唁公，則逐君事已有所見，不

嫌得無惡，故此得仍史文，從常例也。叔孫得臣與聞弑

君，而其惡未有所見，故須去日以著之。公子益師、俠之惡

亦無所見，無俠之惡又不止入極，恐其不明，故皆去日。公

子牙之惡亦無所見，而從常例書日者，彼順下諱文，其諱

還，未至。丙申，卒于房。」不書于房從狸蜃例者，行東野非公家之事，史本不地也。

秋七月壬子，叔孫不敢卒。【補曰】不敢，嬖之子叔孫成子。

冬，晉士鞅帥師圍鮮虞。

六年春王正月癸亥，鄭游速帥師滅許，

以許男斯歸。【補曰】陳則通曰：「紀恃魯而誤於魯，黃恃齊而誤於齊，許恃楚而誤於楚，可爲恃人而人不足恃者之戒。」○【撰異曰】速，《公羊》作「遯」。後同。

二月，公侵鄭。【補曰】陳傅良曰：「自宣之季年，凡伐不言公，魯無君將者八十年矣。至是而書侵鄭，則以公山不狃、侯犯、陽虎之專也，故曰政逮於大夫四世矣，故夫三桓之子孫微矣。」趙鵬飛曰：「魯自舍中軍後，軍皆隸三家，公無一旅之衆。今意如死，定公復自將侵鄭。其後侵齊、會晉師、圍成皆以師行。」黃仲炎曰：「蓋三家之謀使其君親將也。」文烝案：月者，危之。危之者，以晉初失鄭也。

公至自侵鄭。

夏，季孫斯、仲孫何忌如晉。【補曰】斯，意如子季桓子。

秋，晉人執宋行人樂祁犂。

冬，城中城。城中城者，三家張也。大夫稱家。三家，季孫、叔孫、仲孫也。三家侈張，故公懼而脩內城，譏公不務德政，恃城以自固。或曰非外民也。

【補曰】或說謂與成九年同義。

季孫斯、仲孫忌帥師圍郕。仲孫何忌而曰

仲孫忌，甯所未詳。《公羊傳》曰：「譏二名。」【補曰】此注舊在上「如晉」下，其首句之文云仲孫忌，而曰仲孫何忌，轉寫錯誤，妄改耳。今移正之。范引《公羊》非也。唐虞有咎繇，許慎言文、武賢臣有散宜生、蘇忿生，《經》必不譏二名，又必不於一人一事譏之。或謂如「夏五」《傳》疑之例，又非也。地名、人名不得假以示闕疑之義，且同時之人，非隱、桓遠日比也。此蓋聖門相傳二尺四寸之策本少一字，莫敢增益，與蔡侯東正同，前已論之矣。杜預曰：「郕貳於齊。」○【撰異曰】徐彥《公羊疏》曰：「仲孫忌，古本無「何」字，有者誤也。《穀梁》及賈《經》皆無「何」字。又哀十三年《經》云「晉魏多率師侵衛」，《傳》亦云「譏二名」，以此言之，則此

《經》無「何」明矣。而賈氏云《公羊》曰「仲孫何忌」者，蓋誤。」段玉裁曰：「定六年夏曰仲孫何忌，冬則曰仲孫忌。哀七年曰魏曼多，十三年則曰魏多，故《公羊》釋之。今本《左》、《穀經》定六年冬仲孫忌皆不誤，哀十三年皆有「曼」字，蓋誤衍也。」文烝案：唐石經《穀梁》此處又衍「何」字，猶《音義》載桓十四年夏五有衍「月」字者，皆寫者之不慎。

七年春王正月。

夏四月。

秋，齊侯、鄭伯盟于鹹。【補曰】鹹，衛地。陳

傅良曰：「石門志諸侯之合也，鹹志諸侯之判也。」文烝案：外盟不日，此又不月者，自此而沙、曲濮凡三盟，皆諸侯叛晉之事，故皆略之甚，從邢、鹿上、夷陵、衛人及狄盟之例也。

齊人執衛行人北宮結以侵衛。以，重辭

也。【補曰】重發《傳》者，嫌君臣異也。衛人，重北宮

結。齊以衛重結，故執以侵之，若楚執宋公以伐宋。凡言以，皆非所宜以。

齊侯、衛侯盟于沙。沙，地。【補曰】當云衛

地。○撰異曰《公羊》作「沙澤」，與成十二年同。《左氏》彼《經》《傳》皆曰「瑣澤」，此《傳》曰「瑣」。

大雩。【補曰】下有「九月，大雩」，雖言雩，不嫌已得雨。

齊國夏帥師伐我西鄙。

九月，大雩。【補曰】明至此乃得雨也。若此雩

猶不得雨，則兩大雩皆不書，當如宣七年書「秋大旱」矣。

冬十月。

八年春王正月，公侵齊。

公至自侵齊。

二月，公侵齊。未得志故。【補曰】此本杜預。

三月，公至自侵齊。公如，往時致月，危致也。往月致時，危往也。往月致月，惡之

也。【補曰】此發往月致時之通例，因重明往時致月，往月

致月之例也，知是特發往月致時例者。案：《左氏》賈逵注曰：「還至不月，爲曹伯卒月。」賈明於《穀梁》，必用《穀梁》

家之義，明此年兩侵兩致皆是往月致時之例，而《傳》特發之。凡公如、某公至在正月者，例皆書月，苟非危之，則書月猶書時。此正月一侵一致，侵自以月為義，致自以時為義，不足疑也。莊二十三年通說往時致月、往月致月之例，未著往月致時之文，則此《傳》之為往月致時特發例，尤足明也。《傳》以此二侵在一時之間，往致四文，皆相承接，有異凡常，故特發以明例。莊二十三年《傳》曰「致月，故也。往月致月，有懼焉爾」，危致即故，惡之即有懼，重說之以見一《經》全例。又錯其文於上下者，危往甚於危致，惡之又甚於危往，故次第言之。二侵皆為危者，以晉初失齊也。

### 曹伯露卒。

夏，齊國夏帥師伐我西鄙。【補曰】許翰曰：「宣以後，用兵則侵多而伐少，被兵則伐多而侵少。」文烝案：自此後不言某鄙矣。

### 公會晉師于瓦。瓦，衛地也。【補曰】此晉士鞅

救我之師，公逆會之也。不以善辭書救我者，杜預以為齊師已去，未人竟也。不言公會晉士鞅者，公不會大夫，又不如嬰齊後有屈文也，不從包來之例。言公會晉人者，兵會非好會也，此與趙盾稱師同而不同。杜譔曰：「若言晉士

鞅，則無以見其帥師。」高澍然曰：「使書晉救，似齊師因救而解，使書會晉士鞅，似期會而非因救我。必如是而後見事實也。」宣元年趙盾救陳亦未逮救而書者，不書則不知隸林之晉師為救陳而至，以四國同會，無適主也。此言公會，則知為救我，雖不言救而救已明也。彼書四國會于隸林，雖言救而未逮救亦明也。

公至自瓦。【補曰】凡會大夫皆不致，此致者，兵會非好會，重其事，故從離會危致之例，以地致也。危之者，晉新失諸侯，是其事危。

### 秋七月戊辰，陳侯柳卒。

晉士鞅帥師侵鄭，遂侵衛。【補曰】兩事蓋

並受命，直為繼事辭，不從公子遂盟暴之例，轉與季孫宿人鄆同文，明外與內異例也。沈棻曰：「定、哀之間，晉不足以主盟，征伐四起，交亂天下，國君弱於大夫，齊、晉夷於魯、衛。」○【撰異曰】《公羊》作「趙鞅」。

葬曹靖公。○【撰異曰】靖，《公羊》作「靖」，亦或

作「靖」。案：《說文》：「靖，亭安也。」靖，立靖也。」

### 九月，葬陳懷公。

季孫斯、仲孫何忌帥師侵衛。

冬，衛侯、鄭伯盟于曲濮。曲濮，衛地。

從祀先公。貴復正也。文公逆祀，今還順。

【補曰】《公羊》曰：「從祀者何？順祀也。」葉夢得曰：「古者謂從爲順，橫爲逆。」何休曰：「不書禘者，後祫亦順，非獨禘也。言祀者，無已長久之辭。不言僖公者，閔公亦得其順。」何氏訓「祀」與《說文》同。以先公專屬閔，僖未是。先公者，統辭也。服虔曰：「自躋僖公以來，昭穆皆逆。」賈公彥《周禮·家人》疏以爲兄弟別昭穆。既躋僖，則於後諸公昭穆皆亂也。趙汸曰：「前言躋則後爲降，後言從則前爲逆，互文見義。」文彞案：《左傳》曰：「冬十月，順祀先公而祈焉。辛卯，禘于僖公。」杜預謂於僖廟行順祀。此於《傳》文不合，又無其理也。順祀者，禘於大廟，正閔、僖之昭穆，時僖廟雖不毀，實在毀數，故閔從穆班，則僖在昭而文在穆矣。大廟之外又禘於宣、成、襄、昭四親廟，各更其昭穆，而世室及煬宮、武宮、桓宮、僖宮當皆各禘焉，《傳》獨舉僖公，又似與順祀異日，皆所未喻。杜以辛卯爲十月二日，若順祀在前，不應魯祭乃用剛日。又此事在曲濮盟後，或《左傳》月日都未可據也。○凡祭宗廟，筮日爲重，而《春秋》或月或時焉，則謂《春秋》不以時月日爲例者，妄矣。當

定之世而不日不月焉，則謂策書久遠遺落，不與近同者，又妄矣。「從祀」下連「盜」文，明陽虎爲之，此陳師道、王沿、杜譔等說。

盜竊寶玉大弓。【補曰】季氏之宰陽虎竊於季

氏家，見下《傳》。寶玉者，封圭也。始封之圭。【補

曰】《詩》言宣王命申伯曰：「錫爾介圭，以作爾寶。」《毛傳》

曰：「寶，瑞也。」案：《周禮》有六瑞：「王執鎮圭，公執桓

圭，侯執信圭，伯執躬圭，子執穀璧，男執蒲璧。」六者皆爲

瑞，皆當謂之寶玉。此寶玉爲魯封圭，其是信圭與否，無以

言之。或成王褒大魯國，特用桓圭，或魯得用天子禮亦爲

鎮圭也。鄭君《詩》箋云：「圭長尺二寸謂之介。非諸侯之

圭，故以爲寶。」其解「寶」字與毛異義。鄭以《爾雅》云：

「珪大尺二寸謂之玠，即《詩》「介」字，乃是王之鎮圭，《韓

奕》之介圭，爲韓之所貢，故改毛義。如鄭言，則惟鎮圭稱

寶玉矣。凡瑞玉，鎮圭長尺二寸，桓圭九寸，信圭、躬圭皆

七寸，穀璧、蒲璧皆五寸。鄭君《周禮》注曰：「瑞，符信

也。」何休說《公羊》曰：「謂之寶者，世世保用之辭。」大弓

者，武王之戎弓也。是武王征伐之弓。【補曰】《明堂

位》曰：「越棘、大弓，天子之戎器也。」何休曰：言大者，力



千斤。」杜預曰：「寶玉，夏后氏之璜。大弓，封父之繁弱。」案：此本劉歆以來《左氏》說。據衛祝佗言魯分器也。周公受賜，藏之魯。周公受賜於周，藏之魯者，欲世世子孫無忘周德也。【補曰】鄭君說周公居攝五年，營雒作《召誥》，大保以庶邦冢君出取幣，復入錫周公。其時以王命賜寶玉大弓。非其所以與人而與人謂之亡，亡，失也。【補曰】疏曰：《經》言饑，大饑，而康饑無例應之，今因盜而發亡例，《經》亦無應之。或說非其所以與人謂之亡，梁伯可以應其義。」文烝案：如疏前解，當以有或二言贈賄二事爲比也。非其所取而取之謂之盜。【補曰】案：何休曰：「不言取而言竊者，正名也。定公從季孫，假馬。孔子曰『君之於臣，有取無假』，而君臣之義立。」疑此謂之盜當爲謂之竊，涉後哀四年《傳》而誤。假馬事見《韓詩外傳》、《新序》。○家鉉翁曰：「此一事自常情而觀，必以家臣執大夫、賤人謀國，爲事之最重而當書矣。」

九年春王正月。

夏四月戊申，鄭伯蠆卒。○【撰異曰】蠆，《公

羊》作「蠆」。

得寶玉大弓。杜預曰：「弓、玉，國之分器也。

得之足以爲榮，失之足以爲辱，故重而書之。」【補曰】杜意本《公羊》也。《左傳》例獲器用曰得。劉敞曰：「向日竊者，失之也。失得相對，言得所以見失也。」其不地何也？【補曰】疏曰：「據獲宋華元等皆蒙上戰地。」寶玉

大弓，在家則羞，不目，羞也。國之大寶，在家則羞也，況陪臣專之乎？恥甚而不目其地。【補曰】注非也。

家者，季氏之家，季氏專魯，取寶玉大弓藏於家，陽虎從而竊之，《經》以國寶在季氏家爲羞，故不目言所從竊之地也。

上問不地，本謂文無可蒙，此三句乃論上竊不地之意，非論得之地。下文云「堤下」者，又別自起義也。何休說《公

羊》謂季氏逐昭公後，取寶玉藏於其家，虎拘季孫，奪其寶玉。其事與《左傳》不同。惡得之？惡，於何也。【補

曰】《小爾雅》曰：「惡乎，於何也。」《公羊》、《檀弓》注並同。

宋翔鳳曰：「於何合言爲惡，或言惡，或言惡乎，言有長短緩急。」得之堤下。【補曰】《玉篇》引劉兆注曰：「堤，緣

邊也。」文烝案：「堤」本作「隄」。《說文》：「防，隄也。」「隄，唐也。」《玉篇》：「隄，塘也，橋也。」《爾雅》曰：「隄謂之梁。」

李巡曰：「隄，防也，障也。然則隄者，積土高爲之，以障外

水，其名亦通於橋梁也。言得之堤下，則非陽虎所歸矣。」或曰陽虎以解衆也。【補曰】疏曰：「或曰之義，以爲得非魯力也。陽虎竊國重寶，非其所用，畏衆之討，送納歸君，故書而記之。」文烝案：如疏說，「解」當爲「解說」之義，或是解散衆人之追。又或承「堤下」說讀爲「解墮」之「解」，謂虎置之堤下以息追者也。依《左傳》，虎歸弓玉後魯乃討虎。孫復曰：「不曰盜歸者，盜微賤，不可再見也。」

### 六月，葬鄭獻公。

秋，齊侯、衛侯次于五氏。五氏，晉地。【補曰】畏晉也。

秦伯卒。【補曰】上無月，則時卒也，疑康公、共公、桓公、景公亦皆在時卒例，與楚及莒、吳皆不同。

### 冬，葬秦哀公。

十年春王三月，及齊平。平前八年再侵齊之怨。【補曰】此本杜預。

夏，公會齊侯于頰谷。【補曰】頰谷，蓋齊地。

○【撰異曰】頰，《左氏》作「夾」。下同。

公至自頰谷。離會不致，雍曰：「二國會曰

離。各是其所是，非其所非。然則所是之是未必是，所非之非未必非。未必非者不能非人之真非，未必是者不能是人之真是，是非紛錯則未有是，是非不同故曰離，離則善惡無在，善惡無在則不致之于宗廟。【補曰】史本書至，君子以爲不足致。何爲致也？危之也。【補曰】例當致者，以謹月爲危，例不致者，以致爲危。危之則以地致何也？【補曰】據猶當言會。爲危之也。【補曰】危之，若其不成會。其危柰何？曰頰谷之會，孔子相焉。【補曰】相，相會儀。時重孔子知禮，蓋使攝卿以行。如《論語》「賓退復命」亦是攝上擯，賈公彥謂與此同。知者，慮義者行，《春秋》之會，此爲最善。案：《史記·世家》孔子由中都宰爲司空，又爲司寇。而《戰國策》奉陽君云「陽虎之難，孔子逃於衛」，明上年虎亂既平，乃反魯而仕也。《左傳》、《孟子》、《檀弓》皆言孔子爲司寇。兩君就壇，兩相相揖，將欲行盟會之禮。【補曰】《公羊》莊十三年何休注曰：「土基三尺，土階三等曰壇。會必有壇者，爲升降揖讓，稱先君以相接，所以長其敬。揖者，推

手。齊人鼓譟而起，欲以執魯君，群呼曰譟。孔子歷階而上，不盡一等，而視歸乎齊侯，階，會壇之階。【補曰】歷階，謂左右足相過，不連步，急於上也。《檀弓》曰：「杜黃人寢，歷階而升。」《燕禮記》作「栗」字，云「凡栗階不過二等」，謂惟上二等，足各一發，其下猶連步。此會壇之階未知同異。曰：「兩君合好，夷狄之民何爲來爲？」命司馬止之。兩君合會，以結親好，而齊人欲執魯君，此無禮之甚，故謂之夷狄之民。司馬，主兵之官，使禦止之。【補曰】夷狄之民，據《左傳》謂萊人也。上文鼓譟者即萊兵。下「爲」字，語辭。司馬，掌軍大夫也。《周禮·小司馬》之下有軍司馬、輿司馬、行司馬。晉之中軍司馬曰元司馬，上軍司馬曰輿司馬。齊侯逡巡而謝曰：「寡人之過也。」【補曰】《廣雅》曰：「逡巡，卻退也。」退而屬其二三大夫曰：「夫人率其君與之行古人之道，二三子獨率我而人夷狄之俗，何爲？」屬，語也。夫人謂孔子也。齊人欲執魯君，是夷狄之行。【補曰】王念孫曰：「屬，會也，聚也。」《孟子》曰「乃屬其耆老而告之」，《呂氏春秋》曰「於是屬諸大夫而

告之」，趙岐、高誘注並曰：「屬，會也。」屬而後語，「屬」非語也。【文系案】《爾雅》曰：「率，自也。」自者，從也。又《說文》：「達，先道也。」《玉篇》：「衛，導也。」字並通。行古道，謂動必以禮。人夷狄之俗，謂以裔謀夏，以夷亂華也。罷會。齊人使優施舞於魯君之幕下。優，俳施，其名也。幕，帳。欲嗤笑魯君。【補曰】《國語》晉獻公之優曰施，此同名也。《左傳》號、齊並有史闕、鄭、衛並有行人子羽，又衛有祝佗，《晏子春秋》齊亦有之，復有行人子羽，蓋古人官職同者，名字或相因矣。陸賈《新語》載此事作「優旃」，亦與《史記》楚優同名也。《周禮》注曰：「在旁曰帷，在上曰幕，皆以布爲之。」四合象宮室曰幄幕，幄中坐上承塵曰帟，皆以繒爲之。《新語》又曰：「傲戲欲候魯君之隙以執定公。」孔子曰：「笑君者，罪當死。」【補曰】《急就篇》曰：「倡優俳笑，笑者戲謔。」使司馬行法焉，首足異門而出。【補曰】後人或疑此事，謂爲已甚。非也。魯爲齊弱已久，時見萊兵既卻，復使優施害公，戲笑而舞，意不在舞。與《史記》項莊舞劍相似，陸生所謂候隙也。夫子先事誅之，隱折強鄰奸惡之謀，明正匹夫癸惑之罪，不如是則先王無刑罰而聖人將率其君爲宋襄公

矣。張九成嘗謂孔子卻萊人，戮侏儒，比之大禹，周公盛矣哉。文烝以爲聖人之事，固非一端，故曰焉用殺，又曰刑罰中，曰軍旅未學，又曰我戰則克。齊人來歸鄆、讙、龜陰之田者，蓋爲此也。何休曰：「齊侯自賴谷歸，謂晏子曰：『寡人獲過於魯侯，如之何？』」晏子曰：「君子謝過以質，小人謝過以文，齊嘗侵魯四邑，請皆還之。」【補曰】杜預曰：「三邑皆汶陽田。」文烝案：鄆、讙，二邑名。「田」字專繫龜陰，龜山北之田也，三者皆在汶水北。徐彥以賈服意分別田邑是也，其曲解何注「四邑」非也。徐以爲注出《晏子春秋》及《家語》、《孔子世家》，今檢《新語》亦云「四邑」，殆諸書誤耳。蓋者，辜較之辭。胡安國本劉敞說，謂仲尼一言威重於三軍，亦順於理而已矣，故天下莫大於理，而強衆不與焉。因是以見雖有文事，必有武備，孔子於賴谷之會見之矣。【補曰】古者武備之設，不以文事而廢，《傳》言因是，可以見古者之法，而孔子之有備亦於此會見之也。案：此會雖危，因孔子而無危。還從危文，與唐、穀、瓦、黃不別者，下有歸田文，則此之危而獲安昭然可見，不嫌與唐、穀、瓦、黃相同，故可書至也。○此《傳》與《左氏》有同有異，而文事武備之說正所謂行古

人之道者，其陳義甚大，其述事獨真也。文王以文治，武王以武功，夫子學文、武之道曰「如有用我者，吾其爲東周乎」。【眉批】：《論語》東周謂東方之周。鄭注以爲據時成周非其義，而俗儒增飾爲王魯之說，又失之。此楊子《法言》所謂「魯作東周」，即《莊子》所謂「行周於魯」。

### 晉趙鞅帥師圍衛。

齊人來歸鄆、讙、龜陰之田。○【撰異曰】

《說文·邑部》引《春秋傳》「齊人來歸鄆」，此「之」字衍文，涉上《傳》誤衍也。《左氏》、《公羊》皆無「之」。

叔孫州仇、仲孫何忌帥師圍郕。郕，叔孫

氏邑。【補曰】州仇，不敢子叔孫武叔。

秋，叔孫州仇、仲孫何忌帥師圍郕。

○【撰異曰】此郕，《公羊》作「費」。徐彥曰：「《左氏》、《穀梁》此「費」字皆爲「郕」。但《公羊》正本作「費」字，與二家異。賈氏不云「《公羊》曰費者」，蓋文不備，或所見異也。」陸淳曰：「《公羊》誤也。」

宋樂大心出奔曹。○【撰異曰】《公羊》此「世

心」，徐彥疏曰：「世」字亦有作「泄」字者，故賈氏言焉。《左氏》、《穀梁》作「大」字。」

宋公子地出奔陳。○【撰異曰】地，《公羊》作「池」，下同。

冬，齊侯、衛侯、鄭游速會于安甫。安甫，

地名。【補曰】當云地闕。○【撰異曰】《公羊》作「會于鞏」。

徐彥曰：「《左氏》、《穀梁》作「安甫」，賈氏不云「《公羊》曰鞏者」，亦是文不備。《穀梁經》「甫」亦有作「浦」字者。」陸淳《纂例》曰：「《公羊》作「鞏父」。」

叔孫州仇如齊。

宋公之弟辰暨宋仲佗、石彊出奔陳。辰

爲佗所強，故曰暨。【補曰】《傳例》曰：「以外及內曰暨。」言暨則以佗、彊爲主，故仲佗上復加宋。○【撰異曰】《左氏》直作「暨仲佗」。

十有一年春，宋公之弟辰，【補曰】各本此

《經》下衍「及仲佗、石彊、公子地自陳入于蕭以叛」十五字，《傳》文又衍「宋公之弟辰」五字，今並依唐石經、十行本刪正。未失其弟也。言辰未有失其爲弟之道，故書弟以罪宋公。【補曰】未失其弟，故爲親之之辭，并解上也。

及仲佗、石彊、公子地以尊及卑也。【補曰】上言暨，明非辰志，故此仍從以尊及卑之常例，不嫌也。重發《傳》者，上言暨故也。

自陳。陳有奉焉爾。

入于蕭以叛。蕭，宋邑。【補曰】本蕭國，楚所滅。人者，內弗受也。以者，不以者也。叛，

直叛也。【補曰】疏曰：「案：辰以前年出奔，離骨肉之

義。今歲入邑，有叛國之罪，失弟之道，彰於《經》文。而曰

未失何也？公不能制御彊臣，以撫其弟，而使二卿脅以外

奔，故著暨以表彊辭。稱弟以見無罪，罪在仲、石亦可知

矣。今而入國，兩子之情，非辰之意，書及以辨尊卑，言弟

以顯無失。然則自陳之力，力由二卿，入蕭之叛，專歸仲、

石，故重發例以明無罪。」文烝案：疏說非也。辰固未失弟

道，而入邑以叛，安得無罪？辰及佗、彊，地無優劣也。

《傳》以辰未失弟道，嫌言自、言人、言以、言叛，與他處有

異，故皆重發例以同之。劉敞引《表記》「事君可貴可賤，可

富可貧，可生可殺，而不可使爲亂」，此得其旨。叛則位不

復可知，故不言復人也。「不以」下各本脫「者」字，今依呂

本中《集解》本、張洽《集註》補正。

夏四月。

秋，宋樂大心自曹入于蕭。入蕭從叛人，叛可知，故不書叛。【補曰】此本杜預注，亦即何休注說也。《春秋》謹嚴，此類最著。

冬，及鄭平。

平六年侵鄭之怨。《傳例》曰：「盟

不日者，渝盟惡之也，取夫詳略之義。」則平不月者，亦有惡矣，蓋不能相結以信。【補曰】注首句本杜預，其說不月義非也。平者，以道成也，且下有「莅盟」，豈不能結信乎？

此與上年「及齊平」相承相對。彼平而公會，既從正例月，此平而大夫盟，不可無以別之，故特略之矣。昭七年「暨齊平」亦大夫莅盟，而月，足明不月爲變例。若《左氏》載續經哀十五年「及齊平」，文承「冬」下，則史以齊、魯事屢見，故略之耳。《鹽鐵論》曰：「孔子仕於魯，前仕三月，及齊平，後仕三月，及鄭平，務以德安近而綏遠。當此之時，魯無敵國之難、鄰境之患。」案：桓寬言前仕三月、後仕三月，猶《公羊》於歸田、墮費兩《傳》兩言「行乎季孫，三月不違也」。齊既服義，魯復無患，所謂齊一變至於魯，魯一變至於道，蓋此時之言也。國家閒暇則專意內治，故又曰「聽訟吾猶人也，必也使無訟乎」，此自說司寇之官，亦足知《春秋》之

志也。○凡不和而訟，無施而可，故事大比小，親仁善鄰，亦無訟之道也。兒善訟，飲食必訟，訟者亂之所起，外內無訟則大平功成矣。此所謂定、哀之間著治大平者也。《春秋》以平二國書而內治可推焉，《論語》以治一言言而王道可見焉。

叔還如鄭莅盟。

【補曰】叔還，叔弓曾孫成子

也。前定之盟不日，此與會頗谷文相當，會不月，故盟亦不月。又或與平同月。

十有二年春，薛伯定卒。【補曰】時卒者，

惡之。

夏，葬薛襄公。

叔孫州仇帥師墮郕。

【補曰】墮，壞也。啖助

曰：「毀，全除之也。墮，但損之，令不周爾。」蕭楚曰：「壞而撤之曰毀，夷其險阻曰墮。」墮，猶取也。陪臣專強，違背公室，恃城爲固，是以叔孫墮其城，若新得之，故云墮猶取也。墮非訓取，言今但毀其城，則郕永屬己，若更取邑於他然。【補曰】疏曰：「《傳》言墮猶取也，即其訓矣。而注曰非者，何休難云，實取當言取，不言墮，墮實壞耳，無取

於訓詁。鄭君如此釋之。」文烝案：范依《釋廢疾》為注，非《傳》意也。《傳》專釋「墮郕」，乃承上十年兩圍郕言之。十年圍其邑而此年墮其城，明至此始取之也。《左傳》稱侯犯以郕叛，一再圍之，而駟赤設謀，納魯圍師，侯犯奔齊，齊人致郕。其事並在十年秋，依此《傳》則彼時魯雖克郕，齊雖致郕，而郕猶兩屬，不專屬魯。今此墮壞其城，魯乃取之，故曰墮猶取也。言猶者，以事釋義，比之他言猶者則小異也。墮之本訓為壞，世所共知，故不煩釋。至下墮費圍成，又因墮郕及之，其理易見，故不復發《傳》也。魯所以墮郕、費者，自為城固數叛而起，注首四句可用，亦可依《左氏》、《公羊》以為夫子、子路之謀也。

### 衛公孟彊帥師伐曹。

季孫斯、仲孫何忌帥師墮費。【補曰】王葆

曰：「墮郕以一卿，墮費以二卿者，費強於郕也。」文烝案：季氏有費，猶衛孫氏之戚，晉趙氏之晉陽矣。

### 秋，大雩。

冬十月癸亥，公會齊侯盟于黃。【補曰】

黃，齊地。○【撰異曰】齊，《公羊》作「晉」。張洽曰：「誤也。」

十有一月丙寅朔，日有食之。

公至自黃。【補曰】離會致者，齊景無信，猶危之。

十有二月，公圍成。【補曰】月者，危錄之，異

於昭。非國不言圍，圍成，大公也。以公之重而

伐小邑則為恥深矣，故大公之事而言圍，使若成是國然。

【補曰】《傳》義已於昭篇論之，注非也。公實圍成，非伐成。

成而言圍，即為大，非強使成同於國也。重發《傳》者，月與

不月，致與不致，嫌有異也。《左傳》稱孟孫不肯墮成，公圍

成，弗克。何休曰：「天子不親征下土，諸侯不親征叛邑。」

《傳》「不」字各本脫，今依唐石經、余本、俞皋《集傳釋義》本

補正。

公至自圍成。何以致？【補曰】據竟內兵不

致，昭公圍成猶不致也。危之也。【補曰】時特告廟，危

而書至，《經》因其危而危之。諸公唯定之行皆致。何危

爾？邊乎齊也。邊，謂相接。【補曰】《爾雅》：「邊，

垂也。」與疆界衛圍同訓。《說文》曰：「平，遠邊也。」《國

語》曰：「思邊垂之小怨。」《玉藻》：「邊邑。」鄭君曰：「謂九

州之外。」是邊之言遠也。遠乎此則近乎彼，故轉其義而為

近。《史記·高祖本紀》「齊邊楚」，文穎曰：「邊，近也。」是即范注「相接」之訓，猶言瀕河傍海也。成在魯北境，爲魯之遠垂，而接近乎齊，與竟外兵不異，故危之矣。

十有三年春，齊侯次于垂葭。【補曰】垂葭，

衛地。亦畏晉。○【撰異曰】「齊侯」下當有「衛侯」，此脫

也。《左氏》、《公羊》皆有「衛侯」。葭，《公羊》作「瑕」。

夏，築蛇淵囿。蛇淵，地名。

大蒐于比蒲。【補曰】李光地以爲是年春郊後夫

子去魯，築囿大蒐，皆夫子去後事。胡宏已有此義，李廉、季本皆以爲然。又論於後。○【撰異曰】蒐，《公羊》或

作「廋」。

衛公孟彊帥師伐曹。

秋，晉趙鞅入于晉陽以叛。以者，不以

者也。叛，直叛也。【補曰】重發《傳》者，非自外人，

嫌異也。或又以其非自外人，故不釋人。疏曰：「趙鞅自入己邑，以其無君命，同于內弗受之文耳。」文烝案：孫林父亦同矣。

冬，晉荀寅、士吉射入于朝歌以叛。【補

曰】朝歌，晉人謂之舊衛。胡安國以爲晉至是諸侯叛於外，大夫叛於內。又以《左傳》事論之曰：「晉卿始禍，緣衛貢也。」樂祁見執，獻楊楯也；蔡侯從吳，荀寅貨也；昭公弗納，范鞅賂也。晉自是不復能主盟矣，故爲國以義不以利。○【撰異曰】《公羊》作「及士吉射」。

晉趙鞅歸于晉。此叛也，其以歸言之何

也？據叛惡而歸善。貴其以地反也。【補曰】以地

反則非叛矣，叛則惡之，故上言入。非叛則貴之，故此言歸。若言入于晉，是仍叛也。呂本中曰：「不言人，不以叛人。」此說是。貴其以地反則是大利也。【補曰】疑

若大其利。非大利也，許悔過也。【補曰】過而能

改，善莫大焉，於是許之，故貴之矣。不言復歸者，非自外歸，位未絕。許悔過則何以言叛也？【補曰】能悔

過者似不宜有叛君之事。以地正國也。地，謂晉陽

也，蓋以晉陽之兵還正國也。《公羊傳》曰：「逐君側之惡人。」【補曰】鞅爲荀寅、士吉射所伐，奔保晉陽，其意欲以晉陽之兵還正國也。正國者，謂逐寅、吉射。《公羊》言以地



正國，而說之如此。以地正國則何以言叛？據是善事。其人無君命也。凱曰：「專入晉陽，以興甲兵，故不得不言叛，實以驅惡而安君，則釋兵不得不言歸，《春秋》善惡必著之義。」【補曰】《公羊》亦云「無君命也」。聖人之論人亦多術矣，其粗者，趙鞅之惡亦善其可善；其精者，則士匄爲非而管仲猶有憾，所謂無可無不可者歟？可而有不可焉故無可，不可而有可焉故無不可，或嚴或寬，誰毀誰譽，裁自聖心，唯變所適。

薛弒其君比。【補曰】疏曰：「《傳》於剽弒發不正書日之間，則庶子爲君而被弒者當書月矣。於例時卒惡之，則薛比亦惡也。」

十有四年春，衛公叔戌來奔。【補曰】段玉裁曰：「《春秋》宋公戌、向戌皆十二辰之「戌」也，衛公叔戌則「戌守」字，傷遇切。《世本》作「朱」，「朱」與「戌」音相近。」

晉趙陽出奔宋。○【撰異曰】晉，《左氏》作「衛」。徐彥《公羊疏》曰：「《穀梁》與此同。《左氏》作「衛趙陽」字也。」陸淳《纂例》唯云《公羊》作「晉」。汲古閣《公

羊》誤作「晉趙鞅」。

二月辛巳，楚公子結、陳公孫佗人帥師滅頓，以頓子牂歸。【補曰】葉夢得曰：「不別以歸何國者，楚強且主兵可知。」○【撰異曰】二月，《公羊》、唐石經初刻及板本作「三月」。陳公孫，《公羊》作「陳公子」。牂，作「牂」，鄂本《公羊》作「搶」，蜀大字本作「愴」，皆誤也。徐彥曰：「《左氏》、《穀梁》皆作「頓子牂」字，賈氏不注，文不備。」

夏，衛北宮結來奔。

五月，於越敗吳于檣李。檣李，吳地。【補曰】當云越地。賈逵、杜預同。杜曰：「吳郡嘉興縣南醉李城。」《國語》曰：「句踐之地。北至于檣兒。」韋昭曰：「今嘉興檣兒鄉是也。」何休曰：「月者，爲下卒出。」○【撰異曰】檣，《公羊》作「醉」，又作「雋」。《國語》注或作「鄣」。

吳子光卒。【補曰】吳闔廬也。案：《左傳》：「靈姑浮以戈擊闔廬，闔廬傷將指，取其一履。還卒於陘，去檣李七里。」杜預曰：「釋《經》所以不書滅。」趙汭曰：「吳、楚之君，雖卒於外不地，略夷狄。」案：哀六年《左傳》楚昭王救陳卒于城父亦不地也。

公會齊侯、衛侯于牽。牽，地。【補曰】當云衛地。○【撰異曰】牽，《公羊》作「堅」，又作「擊」。

公至自會。

秋，齊侯、宋公會于洮。【補曰】洮，曹地。

天王使石尚來歸脤。脤，祭肉。天子祭畢，以

之賜同姓諸侯，親兄弟之國，與之共福。【補曰】注後三句本杜預，依《周禮》也。謝湜曰：「王受神福，賴諸侯所致，則宜與諸侯共之，故不曰賜而謂之歸。」黃道周曰：「歸脤而不舉月日何也？其來者遠矣。紀受者則不尊，紀賜者則不親，爲之紀時焉。」脤者何也？俎實也，祭肉也。【補曰】《說文》：「俎，從半肉，在且上。」《禮》所謂房俎也。俎實即祭肉。生曰脤，熟曰膾。【補曰】《公

羊》與此同。《左氏》說宜社之肉曰脤，爲其盛以蜃器。祭

宗廟之肉曰膾。《音義》曰：「膾，本或作『燔』。」其辭石

尚，士也。辭，猶書也。【補曰】上士或中士也。何休以

爲上士。案：上士亦有采，則石亦以采氏矣。石尚者，石速、石張之後。石速爲惠王膳夫。《周禮》膳夫上士二人，中士四人，下士八人。何以知其士也？【補曰】問

《經》文何以見之？天子之大夫不名，【補曰】大夫通

上、中、下大夫言之。案：《曲禮》曰：「列國之大夫入天子

之國曰某士。」《左傳》晉韓宣子聘周曰「晉士起」是也，故

《春秋》天子之士則與列國之大夫皆名。石尚欲書《春

秋》，欲著名于《春秋》。【補曰】《春秋》者，魯史記也，此即

《左傳》晉韓起所見之《魯春秋》，《公羊》所謂不脩《春秋》。

石尚所以欲書者，蓋以其承周公典策之制，備有王禮，所謂

天下資禮樂而周禮盡在魯者也。嘗竊論之，此《傳》言石尚

欲書《春秋》，《左傳》言韓起見《魯春秋》，《坊記》、《孟子》皆

言《魯春秋》，是夫子據魯史記脩《經》之明文也。《公羊》引

不脩《春秋》，亦似謂魯史記也。而漢世諸《公羊》家及諸讖

緯及何休說，並以爲夫子廣采諸國史記，特造此《經》，非因

魯史記之舊。以爲使子夏等十四人求周史記，得百二十國

寶書，刊而脩之，託新王受命於魯。司馬遷作《史記》亦言

孔子西觀周室，論史記舊聞，興於魯而次《春秋》，約其辭

文，去其煩重。又言因史記作《春秋》十二公，據魯親周故

殷【眉批】：「親周」即「新周」，董仲舒書亦作「親」字。蓋皆秦、

漢間齊、趙俗師之夸辭，而胡毋子都、董仲舒輩沿用之，斯

王充所謂語增者歟？諫曰：「久矣，周之不行禮

於魯也，請行脈。」【補曰】請王使己歸魯。貴復正也。【補曰】《經》貴王能復正，與志會葬同，與聘異。疏

曰：「自此以前，無失正之文，而曰貴復正者，天王不行禮於魯即是失正，今由石尚而歸服美之，故曰貴復正也。」王樵曰：「書天王止此，所謂天子之在者惟祭與號。」

衛世子蒯聵出奔宋。

衛公孟彊出奔鄭。

宋公之弟辰自蕭來奔。稱弟猶未失為弟之行。【補曰】前有以文，亦不嫌與自夢同言自不言以，非邾庶其等比也。

大蒐于比蒲。【補曰】疏曰：「此年無冬，蒐文承

秋下，秋蒐則常事也。常事而書者，上年夏蒐失正，書正以明前不正，與書蒐紅意同。」文烝案：此年無冬，此蒐或在冬，亦未可知。《左傳》載蒯聵、彊事在秋辰奔以下，俱無《傳》。何休以為五年大簡車徒謂之大蒐，故其注此云「譏亟也」。

邾子來會公。會公于比蒲。【補曰】此本杜預

也。在魯地，與蕭叔朝穀異，故言來，實非公會，故言會公，

從沓、棐之例。不地者，文承蒐下可知。

城莒父及霄。無冬，甯所未詳。【補曰】杜預

曰：「公叛晉助范氏，故懼而城二邑。」《論語》子夏為莒父宰，閭若璩以為莒父，魯之西鄙。子夏，衛人，去其家近，蓋或然矣。定之世不得援「夏五」《傳》疑之例。去冬者，時孔子去魯，已將二年，兆足以行而不行，傷定公季孫之不能有終也。《廣韻》引《尸子》、《漢書·律曆志》並云：「冬，終也。」《說文》：「冬，从公夊聲。夊，古文終也。」隱十年無正而元年有正，正隱之始也。定十三年有冬而末年無冬，惡定之不終也。壬申失其所繫，其取義亦猶是也。不於明年去冬者，定薨在夏故也。何休以為是歲齊饋女樂，以間孔子，定公聽季桓子受之，三日不朝，當坐淫，故貶之。歸女樂不書者，本以淫受之，故深諱其本。又三日不朝，孔子行，魯人皆知孔子所以去，附嫌近害，雖可書猶不書。孔廣森曰：《史記·孔子世家》，定公十四年，季桓子受齊女樂。子路曰：「夫子可以行矣。」孔子曰：「魯今且郊，如致膾乎大夫，則吾猶可以止。」云且郊者，謂明年春當郊，明女樂事實在是在冬也。」文烝案：受女樂之後即郊，郊膾不至，孔子即行，事皆相接。而明年郊在五月，知女樂事不在是冬矣。《史記·十二諸侯年表》、《魯世家》皆於定十二年書

女樂去魯事，《年表》、《衛世家》皆於靈公三十八年書孔子來，當定之十三年。又《孔子世家》云「孔子之去魯凡十四歲而反乎魯」，江永據此諸文以爲女樂事在十二、十三冬春之間，去魯在十三年春郊時，最得其實也。女樂事史本無之，何氏說皆不可用。而此年無冬，就孔子去魯事生義，則其來古矣。

十有五年春王正月，邾子來朝。【補曰】月者，爲下牲變起。

饾鼠食郊牛，牛死，改卜牛。不言所食，食非一處，以至死。【補曰】《公羊》曰：「漫也。」何休曰：「徧食其身。」俞樾以爲「漫」即「曼」字。唐石經元本作「曼」。曼者，延也。初食雖止一處，而其傷曼延，不能知其初食處也。趙匡曰：「常怪饾鼠食郊牛致死。上元二年，因避兵旅於會稽，時有水旱疫癘之苦，至明年而牛災，有小鼠能噬牛，纔傷皮膚，無有不死者。」不敬莫大焉。定公不敬最大，故天災最甚。【補曰】注不達《傳》意。下年「食角」，《傳》曰「志不敬也」；成七年「食角」，《傳》曰「過有司」，亦是志不敬也。不敬，謂備災之道不盡，此以其偏食，故曰不

敬莫大。牛災也，廟壞也，烝也，嘗也，諸言不敬，皆同義，並指實事，不涉空言。

二月辛丑，楚子滅胡，以胡子豹歸。

夏五月辛亥，郊。譏不時也。【補曰】正月改卜牛，不可知其某日，若使正月上辛，本不當郊。而上辛前或其後，至下辛前，忽有改卜牛事，或正月上辛本當郊，而上辛前有改卜牛事，於是而卜郊，則除前年十二月下辛之卜不計，正月下辛爲初卜，二月下辛二卜，三月下辛三卜，四月下辛四卜，而後從也。若改卜牛在正月下辛後，則無正月一卜，凡三卜而後從也。《傳》言夏始，猶可承春，此五月不可明矣。

壬申，公薨于高寢。高寢，非正也。高寢，宮名。【補曰】此本杜預也。疏曰：「重發《傳》者，高者大名，嫌是路寢之流，故明之。」文烝案：劉向《說苑》以爲諸侯正寢有三：曰高寢，曰左路寢，曰右路寢。高寢在中，但高寢專爲始封君之寢，繼體君世世不可居之，繼體君惟居二路寢耳。路寢有二者，子不居父寢故也。此論寢制頗有理，張尚瑗取之，或《穀梁》家相傳說歟？

鄭罕達帥師伐宋。○【撰異曰】罕，《公羊》作

「軒」。後同。

齊侯、衛侯次于渠蔭。渠蔭，地也。【補曰】當

云地闕。《左傳》曰：「謀救宋也。」杜預曰：「不果救，故書

次。」○【撰異曰】渠蔭，《公羊》作「籛蔭」。板本或作「籛

籛」。徐彥曰：「《左氏》作「籛挈」字。賈氏無說，文不備

也。」陸淳《纂例》曰：「渠，《左氏》作「籛」。案：今《左氏》經

與《穀梁》同，《左傳》作「籛挈」。

邾子來奔喪。【補曰】杜預曰：「諸侯奔喪，非

禮。《公羊》曰：「其言來奔喪何？奔喪非禮也。」何休以

爲邾、婁與魯無服，故以非禮書。何氏非也。諸侯相弔，當

使士或下大夫，從《左氏》說爲允。此蓋在時例，不蒙月。

喪急，故以奔言之。【補曰】疏曰：「奔喪之制，日行

百里，故《傳》言急，所以申匍匐之情也。」文烝案：《經》諸

言奔者，皆是逃避而去，奔訓走，是急辭。喪事以急遽爲

主，故謂之奔。《檀弓》曰：「喪事欲其縱縱爾。」縱縱者，趨

事急遽貌。《奔喪禮》曰：「日行百里，不以夜行，唯父母之

喪見星而行，見星而舍。」夫古者師日行三十里，吉行五十

里，而奔五服之喪者皆行百里，是喪事貴急之一端。以其

事急，故禮謂之奔。而策書因之，君子取之，此與解乞師義

正同也。《傳》曰：「古之人重死，故譏弔含襚贈不及事。」又書奔喪，皆明喪事尚急，其意一也。

秋七月壬申，弋氏卒。○【撰異曰】弋，《左

氏》、《公羊》作「姒」，下同。徐彥曰：「《穀梁》作「弋氏」

字。」案：襄公母，《左》、《穀》作「姒」，《公》作「弋」。哀公

母，《左》、《公》作「姒」，《穀》作「弋」。妾辭也，不言夫人

薨。【補曰】既得書，明非妾矣，而其辭猶爲妾辭。哀公

之母也。【補曰】哀母，定公妾也。成風以來，妾子爲君

母，皆爲夫人。弋氏是哀之母，其歿不可不書，特以未葬，

未踰年稱子，未稱公，故不言薨，又不言夫人。《公羊》

是矣。

八月庚辰朔，日有食之。

九月，滕子來會葬。邾、滕，魯之屬國。近則

來奔喪，遠則來會葬，於長帥之喪同之王者，書非禮。【補

曰】疏曰：「范《答薄氏》云屬國非私屬，五國爲屬，屬有長，

曹、滕、二邾世屬服事我，故謂之屬。」文烝案：此月者，蓋

亦爲下葬日。

丁巳，葬我君定公，雨，不克葬。葬既有

日，不爲雨止，禮也。雨不克葬，喪不以制也。宣八年注詳矣。【補曰】疏曰：「重發《傳》者，頃熊夫人，今此人君，嫌禮異，故明之。」

戊午，日下稷，乃克葬。稷，昃也。下昃，謂

晡時。【補曰】何休曰：「昃，日西也。下昃，蓋晡時。」文烝案：稷，即「昃」字，於六書爲假借。《易·彖傳》孟喜本「日中則昃」，諸家皆作「昃」。《書中候握河紀》、《漢碑》、《太玄》有「日稷」「大稷」語。晡時者，時加申也。《史記·天官書》曰：「日跌至鋪，鋪至下鋪。」鋪，即「晡」字。《漢書·天文志》皆作「晡」。《五行志》有「晡時」、「日下晡時」，《素問》亦有「下晡」，然則下昃者，下晡，申時末也。又疑日跌謂之日中昃，晡時謂之日下昃。○【撰異曰】稷，《左氏》、《公羊》作「昃」。

乃，急辭也，【補曰】錢儀吉引《夏小正傳》說乃瓜曰乃者急瓜之辭。不足乎日之辭也。【補曰】時加於申，是不足乎日，故爲急辭，所謂乃難乎而也。疏曰：「范例云克例有六，克段弗克納。不克葬者二，而克葬乃克葬也。」

辛巳，葬定弋。【補曰】君母錄葬，明是小君，猶

未踰年，故亦爲妾辭也。此皆史文之舊也。陳壽祺曰：「不夫人不小君者，哀未君，不及尊其母也。且定之適夫人不見於《經》，容其時尚存，故尊不加於妾母也。」孔廣森曰：「辛巳距戊午二十三日，蓋定公七虞卒哭既畢，然後啟禮也。」文烝案：上書八月庚辰朔，而九月有辛巳，蓋與襄二十八年乙未同例。不如葬齊景公著其不正者，蓋喪服以年計者不數閏，以月計者兼數閏，故依常例立文歟？數閏不數閏之說，見《鄭志·答趙商》。

冬，城漆。【補曰】杜預曰：「邾庶其邑。」

## 春秋哀公經傳第十一補注第二十四

哀公，定公子。《史記》名將，《世本》名蔣。母定弋。以敬王二十六年即位。閻若璩曰：「哀公見存，焉得有謚？必後人以例改繫也。」《汲冢紀年》稱魏哀王爲今王，《史記》紀武帝題今上《本紀》，孔子當日必稱今公。」

穀梁 范氏集解 鍾文烝詳補

元年春王正月，公即位。

楚子、陳侯、隨侯、許男圍蔡。隨久不見者，

衰微也。稱侯者，本爵俱侯，土地見侵削，故微爾。定六年鄭滅許，今復見者，自復也。【補曰】疏曰：「隨自僖二十年以來更不見《經》，衰微不能自通於盟會也。」文烝案：杜預曰：「隨世服於楚，不通中國。吳之人楚，昭王奔隨，隨人免之，卒復楚國。楚人德之，使列於諸侯，故得見《經》。」定六年，鄭滅許，此復見者，蓋楚封之。」杜說最可據，范本何休非也。

驪鼠食郊牛角，改卜牛。○【撰異曰】《左

氏》、《公羊》無「角」字。案：疏引范例云書郊有九，其所數九事，則遺去成十年五卜不數，又以定十五年及此年之食牛合爲一事。云定公、哀公並有牲變，不言所食處，不敬莫大，二罪不異，并爲一物。又分出上年、今年之辛亥郊，辛巳郊各爲一事，兩年爲三事，舛誤實甚。後人據此疏遂疑此年《穀梁》之《經》亦無「角」字矣。孫志祖曰：「范誤據《左》、《公羊》也。」

夏四月辛巳，郊。【補曰】高閌曰：「兩年連書，

知魯郊歲一行之。」此該郊之變而道之也。該，備也。《春秋》書郊終於此，故於此備說郊之變。變，謂郊非其時，或牲被災害。【補曰】此，此《經》文也。食牛角，四月郊，備郊之變也。《傳》「郊」字各本脫，今依唐石經、余本、呂本中《集解》本、俞皋《集傳釋義》本、李廉《會通》本補正。於變之中又有言焉。於災變之中又有可善而言者。

【補曰】《春秋》書郊事皆郊之變也，而惟此最爲可言。食角愈於偏食，食角得郊，愈於口傷。及成七年之食角，四月郊愈於五月、九月，又愈於四月免牲不郊，此三句爲一《傳》綱領。驪鼠食郊牛角，改卜牛，志不敬也。郊牛日展，觚角而知，傷展道盡矣。展道雖盡，所

以備災之道不盡，譏哀公不敬，故致天變。【補曰】先出《經》上二句也。志不敬，猶成七年《傳》云「過有司」，謂所以備災之道不盡也。成七年言「展道盡」，又言「備災之道不盡」，此但直言「展道盡」者，此處欲明變中有可言之義，故省其文，乃文章之體也。注皆失之。郊，自正月至于三月，郊之時也。夏四月郊，不時也。【補曰】次出《經》下二句也。僖三十一年，成十年，襄七年，十一年四月並廢郊，不與此同。此郊或三卜而從，或二卜而從，皆未可知。五月郊，不時也。【補曰】謂定十五年。夏之始可以承春，【補曰】雖不時而猶可。以秋之末承春之始，蓋不可矣。凱曰：「不時之中，有差劇也。夏始承春，方秋之末，猶爲可也。」【補曰】五月以後俱不可，而成十七年之九月爲甚。《傳》「矣」字或作「也」。九月用郊。用者，不宜用者也。在成十七年。【補曰】以其甚不可，故加「用」文，申上意也。郊三卜，禮也。以十二月下辛卜正月上辛，如不從，則以正月下辛卜二月上辛，如不從，則以二月下辛卜三月上辛，所謂三卜也。鄭嗣曰：「謂卜一辛而三也，求吉之道三，故

曰禮也。【補曰】此三卜，謂襄七年四月三卜也。范言正禮，直用下文語。鄭嗣非也，卜一辛而三，顯與《傳》背。求吉之道三，《公羊》文。四卜，非禮也。僖三十一年，襄十一年皆四卜。五卜，強也。成十年五卜。【補曰】「強」或作「彊」。卜免牲者，吉則免之，【補曰】僖三十一年，襄七年是也。不吉則否。【補曰】成十年，襄十一年皆直言不郊，不言免牲，是也。牛傷不言傷之者，傷自牛作也，故其辭緩。宣三年，郊牛之口傷，以牛自傷，故加之，言緩辭。【補曰】此明傷不自牛作則宜爲急辭矣。此年及成七年言郊牛角，皆不加言之，是急辭也。全曰牲，傷曰牛，未牲曰牛，其牛一也，其所以爲牛者異。已卜日成牲而傷之曰牛，未卜日未成牲之牛，二者不同。【補曰】卜牛既定既稱牲，注依《左傳》卜日始稱牲，非也。此通解言牲，言牛十三文。有變而不郊，故卜免牛也。【補曰】免牛者，成七年是也，時因後牛又有變。已牛矣，其尚卜免之何也？災傷不復以郊，怪復卜免之。【補曰】已以傷而稱牛，疑不若牲，須卜免。禮與其亡也寧有，於禮有卜之與



無卜，寧當有卜。嘗置之上帝矣，故卜而後免之，不敢專也。嘗置之滌宮，名之爲上帝牲矣，故不敢擅施也。【補曰】《呂氏春秋》注、《荀子》注並云：「置，猶委也。」《左傳》注云：「委，屬也。」俞樾取其訓，以爲范解增字太多。上帝，天也。王曰天王，以天稱君也。天曰上帝，以君稱天也。此言牛與牲，名異而實同，故皆須卜。卜之不吉則如之何？不免。【補曰】《經》無不免牛事，故特明之，言與不吉不免牲同。安置之？繫而待六月上甲始庀牲，然後左右之。庀，具也。待具後牲，然後左右前牛，在我用之，不復須卜，已有新牲故也。《周禮》曰：「司門掌授管鍵，以啟閉國門。」祭祀之牛牲繫焉，然則未左右時監門者養之。【補曰】此承不免牛言之，亦兼說不免牲。子之所言者，牲之變也，而曰我一該郊之變而道之何也？【補曰】疏曰：「子者，弟子問穀梁子之辭。」文烝案：言子、言我，設言弟子問夫子也。《論語》弟子稱夫子皆曰子我者，弟子述夫子自我之意。我以六月上甲始庀牲，十月上甲始繫牲，【補曰】疏曰：「我以六月者，穀梁子答辭。」文烝案：我

者，我魯，亦夫子自我也。具牲者先取牛於牧，擇其毛而卜之，吉則養之。十月而繫諸滌宮，芻之三月，至正月而郊，是爲在滌三月。《春秋緯》謂滌爲三牢，牢各主一月也。其牲、帝牲、稷牲各一，帝牲有變則易稷牲爲帝牲。說見宣三年。十一月、十二月牲雖有變，不道也。牲有變則改卜牛，以不妨郊事，故不言其變。【補曰】十二月不道牲變者，《經》既無其事，《傳》亦大概言之。若十二月下辛已卜郊，而下辛後正月前有牲變，又不得以二月、三月郊，又不以三月免牲，則亦當道之，從正月牲變例矣。待正月然後言牲之變，此乃所以該郊。至郊時然後言其變，重其妨郊也。十一、二月不道，自前可知也。至正月然後道，則二月、三月亦可知也。此所以該郊，言其變道盡。【補曰】牲變在正月，雖在下辛前，已無十二月一卜，假令卜不遽從，至於三卜，卜尚合禮，郊則踰春，我當以其不時記郊，然後言其牲變。言牲變爲言郊而起，是所以該郊也。以此觀之，襄七年必有牲變，以其不郊，故不言明矣。定十五年與此同例，宣三年、成七年則在再有牲變之例，與此異也。注言二月、三月可知者，謂若二月、三月有牲變，踰春而郊，記其郊必言其變，以《經》既無其事，故

《傳》亦不言也。《傳》論正月牲變，但據初時帝牲，若十二月下辛卜郊之前帝牲已有變，改卜稷牲爲帝牲，而正月上辛之前後又有牲變，則不得又有牛，不須又卜郊，《經》當書之，從再有牲變之例，此亦可推而知也。郊，享道也，貴其時，大其禮。其養牲雖小，不備可也。享者，飲食之道。牲有變則改卜牛，郊日已逼，庀繫之禮，雖小不備，合時得禮，用之可也。【補曰】此上說《春秋》所記郊之變，其義已盡，此復論郊道之正也。享謂飲食，飲食者，禮之所始，人之所以相接，聖人推生以事死，又推祖以至天，一以人道接之，從而爲之差等，故曰「郊，享道也」。時，春時也。禮者，前篇云「薦其敬，薦其美」是也。注言「郊日已逼」，謂猶及二月、三月郊者，牲變在二月下辛前，皆得有其事矣。「庀繫」釋「養」字，非上文之「庀繫」也。劉向說上宜興禮樂曰：「爲其俎豆管弦之間小不備，因是絕而不爲，是去小不備而就大不備，惑莫甚焉。」其言本此《傳》，可以推明《傳》旨。子不志三月卜郊何也？三月，謂十二月、正月、二月也。【補曰】此下復論春月郊否不志之義。三月卜郊謂所卜正月、二月、三月之郊，或從或不從，或郊或不郊也。問春月郊否，何以悉不志？志，各

本誤作「忘」，今依唐石經、余本、呂本中《集解》本、張洽《集註》、俞皋《集傳釋義》本改正。郊，自正月至于三月，郊之時也。有變乃志，常事不書。【補曰】覆說前文，明春郊得時，故不志。或三月免牲而不郊，因亦不志。若正月、二月有牲變，而二月、三月得郊，亦不志。又不言牲變，同於常年，其以三月免牲亦如之。我以十二月下辛卜正月上辛，如不從，則以正月下辛卜二月上辛，如不從，則以二月下辛卜三月上辛，如不從，則不郊矣。意欲郊而卜不吉，故曰不從。郊必用上辛者，取其新潔莫先也。【補曰】言下甸卜者，亦大概言之，若使中甸末爲辛而下甸無辛，則以中甸末卜矣。卜必皆前期十日者，《周禮》大宰職曰：「祀五帝，前期十日帥執事而卜日。」鄭君曰：「十日，容散齊七日，致齊三日。」是其義也。其卜辭當依《曲禮》，甸之外，曰遠某日。以今月下辛卜來月上辛，實爲甸有一日，是甸之外日也。卜至三而止者，《公羊》曰「求吉之道三」，《曲禮》亦曰「卜筮不過三」。王肅謂禮以三爲成也。必以春三月卜者，子月有報本之義，寅月有祈穀之義，丑月在其間，郊非春不可，故因以爲三卜之節。何偃不達禮意，乃以三春皆郊之

說證成晉詔膚淺之譏，其誣《傳》甚焉。何休說《公羊》以爲正月者歲首，上辛猶始新，皆取其首先之意。范略本之。三卜不從則不郊，謂三月免牲也。《傳》以祭期卜法，上皆未言，故具述之，申足上意。○嘗論《春秋》書郊九事而已，錯綜而不可紊，簡質而多所包，所謂化工之文也。其中脈絡盡在於《傳》，要須悉心推之耳。若《左氏》、《公羊》及其注、疏，或有可相補備者，文烝既盡取之矣。今更記其異說於此：左氏、杜、孔之意，禮不卜常祀而卜其牲與日，牛卜日曰牲，謂卜牛既吉未稱牲，卜得吉日乃稱爲牲，但當卜牲與日，不當卜可祀與否。魯諸卜郊書於《經》者，皆卜可祀與否，故皆爲非禮。四月四卜者，三月每旬一卜，四月上旬更一卜。四月五卜者，三月三卜，四月又二卜。四月三卜者，三月二卜，四月又一卜。郊日用辛，不必上辛，其月以三月爲正，若四月猶在啟蟄中氣內，未過春分，則亦可郊。襄之三卜，春分既耕而後卜郊，故孟獻子譏之。正月牛再有變，猶當更卜牛，郊不可廢，不郊爲非禮。《公羊》之意，書卜皆是卜日，天子之郊不卜，魯郊非禮故卜，卜吉則郊，不吉則止。求吉之道三，三卜爲禮，四卜爲非禮。定之五月郊爲三卜之運。運，轉也。郊之正禮用正月上辛，徐彥以爲襄之三卜在四月，亦是不時。何休以爲魯郊轉卜春三

正，三王之郊一用夏正，《春秋》之義，當用周正。三卜吉凶必有相奇者，可以決疑，故求吉必三卜。定五月郊者，已卜春三正不吉，復轉卜夏三月、周五月，得二吉。【眉批】：「二吉」或作「一吉」。文烝以爲禮莫重於祭，祭莫大於郊，廣采異聞，可資博物。至於圜丘一祭，用冬至不用辛日，《周官》以外，不見他書，而考《大司馬》章，與漢孝文時寶公所獻書同。寶公本魏文侯樂人，其來已古。自《史記·封禪書》約引其文，以爲南郊，而鄭君則分郊丘爲二。【眉批】：《史記》引《周官》：「冬至，祀天於南郊。夏至，祭地祇。」又似以丘爲郊，今姑從鄭說。彌縫群經，世所依用，此不復論焉。

秋，齊侯、衛侯伐晉。【補曰】許翰曰：「楚得專封，王道盡矣。晉受衆伐，霸統亡矣。春秋之變，至是而窮。」陳傅良曰：「春秋之初，諸侯無王者，齊、鄭、宋、魯、衛爲之也。春秋之季，諸侯無伯者，亦齊、鄭、宋、魯、衛爲之也。」

冬，仲孫何忌帥師伐邾。【補曰】趙鵬飛曰：「定公之世，撫邾爲厚，邾亦事魯爲勤。哀即位而即伐邾，七年之間，虐之無所不至，諸大夫之意也。」

二年春王二月，季孫斯、叔孫州仇、仲孫何忌帥師伐邾，取鄆東田。【補曰】月者，爲下盟日。各本此經《下衍》及沂西田四字，《傳》文又衍「取鄆東田」四字，今並依唐石經、十行本刪正。鄆東，未盡也。

及沂西田。沂西，未盡也。鄆、沂，皆水名。

邵曰：「以其言東、西，則知其未盡也。」【補曰】於此兩言未盡，明前文濟西、汶陽及龜陰亦同也。此與襄十九年「自鄆水」爲軋辭正相對，故於此發《傳》。

癸巳，叔孫州仇、仲孫何忌及邾子盟于

句繹。句繹，邾地。【補曰】據《左氏》續經十四年，則小

邾地也。後三年州仇、何忌圍邾，六年何忌伐邾，七年公入邾渝盟，肆虐莫此爲甚。不去盟日者，事近且著，無待去日而見，故還依常例，不與昧、拔同也。上取二邑亦從時例，與文七年異文，即此意。三人伐而二人盟，何也？

各盟其得也。季孫不得田，故不與盟。胡安國曰：「莫强乎季孫，何獨無得？季氏四分公室有其二。昭公伐意

如，叔孫氏救意如，而昭公孫陽虎囚桓子，孟孫氏救桓子而陽虎奔，今得邾田，蓋季氏以歸二家而不取也。」胡本王沿說。

夏四月丙子，衛侯元卒。

滕子來朝。

晉趙鞅帥師納衛世子蒯聵于戚。鄭君

曰：「蒯聵欲殺母，靈公廢之。」是也。若君薨有反國之道，當稱子某，如齊子糾也。今稱世子如君存，是《春秋》不與蒯聵得反立明矣。江熙曰：「鄭世子忽反正有明文，子糾但於公子爲貴，非世子也。」【補曰】鄭說固非，江亦失之。鄭昭公前稱鄭忽，後稱鄭世子忽，相對爲義，與蒯聵不同。蒯聵稱世子，自是策書常文。納者，內弗受也。【補

曰】重發《傳》者，納父於子之邑，嫌無弗受之義也。帥師

而後納者，有伐也。【補曰】納稱帥師，明有伐事，君

將言伐，大夫則以帥師當伐文，《經》辭簡省從可知。何

用弗受也？以輒不受也。甯不達此義。江熙

曰：「齊景公廢世子，世子還國書纂。若靈公廢蒯聵立輒，則蒯聵不得復稱曩日世子也。稱蒯聵爲世子，則靈公不命

輒審矣。此矛盾之喻也。然則從王父之言，《傳》似失矣。《經》云納衛世子，鄭世子忽復歸于鄭，稱世子，明正也，明正則拒之者非邪？【補曰】此連下作注皆非也。齊陽生與子糾同皆正，皆非世子。陽生取國于荼，故以國氏，其與荼又非父子也。靈公自命輒，蒯聵自可稱世子，何相妨乎？《傳》謂輒有不受父之義，故內弗受之例，同於常文，注誤會《傳》意，謂輒有不受父之事，而《經》因明其可以拒父，不思甚矣。晉伐衛喪，蒯聵以詐謀人戚，不聞輒用師相禦，觀《左傳》所載，固不得云拒父也。《公羊》下年《傳》始有「距」字，其事即指圍戚，亦不指此年也。拒父之非，人皆知之，乃因《公羊》曼姑可拒之謬說，而云拒之者非邪？依違其辭，又可哂也。以輒不受父之命，受之王父也。

【補曰】此申上也。兩「受」字與上下文「受」字異。《左傳》夫人因公子郢言立輒，蓋稱靈公之命以令於國，是受命王父也。《公羊》曼姑受靈公命之說，臆測不可用。信父而

辭王父，則是不尊王父也。其弗受，以尊王父也。【補曰】又申上也。若辭王父之命，避不為君，志在申父，則以親親害尊尊，非重本尊統之義，故《春秋》弗受者，明有尊也。《傳》以子不受父，其事異常，故反覆申言

之。《公羊》下年《傳》曰：「輒之義可以立乎？」曰：可。不以父命辭王父命，以王父命辭父命。」何休以為輒不可以拒父而可以立，但非義之高者，其說當矣。○《孟子》論瞽瞍殺人一章，朱子據以斷蒯聵事，竊謂義隨事變，有異有同，輒可以為舜，而衛之諸臣不得為皋陶，輒而能逃，義之盡也，衛之諸臣而擅以甲兵伐蒯聵則大罪也，是故衛之諸臣，其義至立輒而止。

### 秋八月甲戌，晉趙鞅帥師及鄭罕達帥師

戰于鐵，鄭師敗績。鐵，衛地。【補曰】杜預曰：「在戚城南。」案：此文全似大棘戰。李廉曰：「夷晉於列國矣。」○【撰異曰】鐵，《公羊》作「栗」，亦作「秩」。徐彥曰：「及鄭軒達戰于鐵者，諸家之《經》『軒達』之下皆有『帥師』，唯服引《經》者無，與諸家異。于鐵者，三家同。有作『栗』字者，誤也。今定本作『栗』字。」

### 冬十月，葬衛靈公。七月葬，蒯聵之亂故也。

【補曰】上下有爭國事，無危文者，從鄭莊公例。

十有一月，蔡遷于州來。【補曰】《爾雅》、《淮南》有州黎丘，即州來也，《鹽鐵論》云「孔子飢於黎丘」。案《論語》「在陳絕糧」，孔安國曰：「吳伐陳，陳亂，故乏食。」

是後六年事也。其地與故蔡都接，故曰從我於陳、蔡。《孟子》亦曰「戾於陳、蔡之間」，後人遂以黎丘目蔡矣。

### 蔡殺其大夫公子駟。

三年春，齊國夏、衛石曼姑帥師圍戚。

此衛事也。【補曰】戚不繫衛者，主衛之辭，足見其爲衛事。此《經》文首尾相明，自然之妙。李光地嘗發此義。

其先國夏何也？子不圍父也。不繫戚於衛

者，子不有父也。江熙曰：「子圍父者，爲人倫之道

絕，故以齊首之。國夏首兵，則應言衛戚，今不言者，辟子有父也。子有父者，戚繫衛則爲大夫屬於衛。」【補曰】《公

羊》以爲曼姑之義可以爲輒距蒯聵，此拒父之說也，謂可拒非也。子不可圍父，故不從邾人、鄭人、宋人、齊人之例，子

不可有父，故不從宋彭城之例，此《論語》不爲衛君之意也。

兄弟交讓，無怨則以爲賢且仁，子與父爭國則爲之深正其義。明父雖不父，子不可不子，父雖以戚事晉，子終當以衛

事父，既不能舍國而逃，以從其父則亦已矣。奈何以兵圍之哉？《公羊》亦謂父有子，子不得有父，乃發其義於上文

納世子之《經》，而與衛侯入于夷儀並以不言人于衛爲說，

足知其流傳之誤。而《左氏》於此但曰「齊、衛圍戚，求援于中山」，絕不一言其義，則《論語》爲何說乎？明《左氏》有

考史之功，無受《經》之事矣。○案：《左氏》考史之功，自

僖、文以後尤爲該備詳密，如此文「齊、衛圍戚，求援于中

山」，自足見當時情事。時晉之荀寅、士吉射與趙鞅爲敵，

搆兵不已，齊、衛及魯、宋、鄭、鮮虞皆助士氏、荀氏，而齊、

衛救之尤力。《左氏》詳載其事始於定十四年會牽之謀，終

於哀五年荀、士之奔齊，本末具備。此年圍戚亦其事也，趙

鞅居蒯聵於戚，以爲晉援則戚已屬晉矣，齊、衛圍戚乃是伐

晉以救其叛人，因鮮虞嘗與伐晉，故仍求其爲援，論其本

謀，固非衛圍父而齊助之。《左氏》序事，實有條理，但蒯聵

實在戚，齊視之則晉之援也爲我寇者也，衛視之則父也。

齊圍戚則可曰我以敵晉，衛圍戚則是圍父而已矣。君子作

《春秋》，正名定分，論其義之大，不論其事之細。策書舊文

本書曰「齊國夏、衛石曼姑帥師圍戚」，以其事而論，則是

救晉之叛人以敵晉也，齊主兵而衛從焉者也；以其義而

論，則是以子圍父也，衛主兵而齊從焉者也。衛主齊從則

此事乃爲衛事，以齊首兵之義由此而生，戚不繫衛之義由

此而起，文仍舊史之文而義非舊史之義矣。此所謂其義則

丘竊取之者，固不必奮筆改易而後謂之竊取也。《左傳》此

條何嘗不信而有徵？而要非《經》義所在，故惠士奇力辯圍戚之爲救范氏，以駁二千年相傳拒父之說。於《左傳》之理，上下皆貫，而不知其不可也。何休《公羊》注引《論語》文，而鄭君《論語》注亦引此《經》，《論語》不爲衛君之義，正是此《經》之義，學者明乎《春秋》事與義之分則可與言《春秋》矣。

### 夏四月甲午，地震。

### 五月辛卯，桓宮、僖宮災。【補曰】《左傳》：

「孔子在陳，聞火，曰：『其桓、僖乎？』」杜預曰：「言桓、僖親盡而廟不毀，宜爲天所災。」服虔曰：「季氏出桓公，又爲僖公所立，故不毀其廟。」服說與《漢書·五行志》同。《公羊》謂毀而復立。案：毀而復立，謂之不毀亦可也。桓、僖並災，廟必相接，疑其別立廟矣。言及則祖有尊卑，解《經》不言及僖。由我言之則一也。遠祖恩無差降如一，故不言及。【補曰】《公羊》亦曰：「何以不言及？敵也。」孔廣森曰：「自義率祖則大廟而外其尊同，自仁率親則高祖而上其疏等。」服虔說《左氏》曰：「俱在迭毀，故不言及也。」

### 季孫斯、叔孫州仇帥師城啟陽。稱帥師，

有難。【補曰】此注贅。啟陽，魯邑，本邾國也。杜預曰：「魯黨范氏，故懼晉，比年四城。」許翰曰：「鼠食、地震、廟災，變異之弗圖而取田城邑，兵役相繼，可謂不畏天命矣。中失而外鍵，本亡而末務，此魯之季世也。」○【撰異曰】啟，《公羊》作「開」。案：《公羊》經傳，孝景時始著竹帛，故辟諱改之。《傳》所謂「恒事不志」，《公羊》則曰「常事」，又曰「常之母」，是辟孝文諱。

### 宋樂髡帥師伐曹。

### 秋七月丙子，季孫斯卒。【補曰】《曾子問》載

夫子之言，衛靈公適魯，遭季桓子之喪，弔焉。哀公爲主，康子立於門右北面云云。案：是時靈公已卒，夫子又不得稱輒爲某公，又不得稱哀公、康子謚，《春秋》又不應不志衛侯來，蓋禮家於《春秋》事傳聞不審者，多又往往託諸夫子，不可不察。

### 蔡人放其大夫公孫獵于吳。宣元年，晉放

其大夫胥甲父于衛。《傳》曰：「稱國以放，放無罪也。」然則稱人以放，放有罪也。【補曰】注是也。人者，衆辭。

### 冬十月癸卯，秦伯卒。【補曰】秦卒至此始書

日者，從少進之例，非以正不正論也。敗殽後，秦爲夷狄，



少進卒之，先於楚、莒、吳，又少進日之，同於楚，異於莒、吳，以此見羸、芊爲兩雄也。觀於春秋之末，可得戰國大勢，屢書於越，知越將強也。屢書鮮虞，知中山將盛也。書趙鞅歸晉，則三家分晉之局也。書陳乞弑君，則田氏盜齊之形也。書癸卯秦伯卒，則秦、楚從橫角勝之漸也。

### 叔孫州仇、仲孫何忌帥師圍邾。

四年春王二月庚戌，盜弑蔡侯申。○【撰

異曰】二月，《公羊》作「三月」。弑，《左氏》、《公羊音義》皆作「殺」。《左氏》申志反，《公羊》音試。申，與宣十七年文侯名同，陸德明、孔穎達皆疑高祖玄孫不容同名。段玉裁曰：「此當從史記作「甲」字。」稱盜以弑君，不以上下道道也。以上下道道者，若衛祝吁弑其君完之類，是直稱盜不在人倫之序。【補曰】書其君者，以上道道之文也。或書衛祝吁、宋督，或書宋人、齊人，或書莒、晉者，皆以下道道之文也。稱盜以弑君，不得繫國，不得君其君，乃與刑人同文，不以上下道道。內其君而外弑者，不以弑道道也。襄七年，鄭伯將會中國，其臣欲從楚，不勝其臣，弑而死，不使夷狄之民加乎中國之君，故曰鄭伯髡

原如會，未見諸侯。丙戌卒于操，是不以弑道道也。《春秋》有三盜：【補曰】並是士，爲賤辭，而其類有三。微殺大夫謂之盜，十三年冬，盜殺陳夏區夫是。【補曰】當云如盜殺鄭公子斐之屬是。非所取而取之謂之盜，定八年，陽貨取寶玉大弓是。【補曰】《左傳》周公作《誓命》曰：「竊賄爲盜，盜器爲姦。」辟中國之正道以襲利謂之盜。即殺蔡侯申者是，非微者也。【補曰】疏曰：「辟中國之正道，行同夷狄，不以禮義爲主，而徼幸以求名利，若齊豹殺公孟縶之類，故抑而書盜也。襲，掩也，謂求利之心不以禮義爲意。」文烝案：疏與注異說，然齊豹亦是微殺大夫，則疏非是而注得之。但注謂非微者則亦誤也。時蔡已遷于吳之州來，據《左傳》，是年蔡昭侯將朝于吳，諸大夫恐其又遷，公孫翩逐而射殺之。《史記·蔡世家》以爲諸大夫令賊利殺之。《傳》云辟中國之正道以襲利，則此弑蓋吳意也。中國者，對吳之稱，事或然歟？

### 蔡公孫辰出奔吳。

### 葬秦惠公。

宋人執小邾子。【補曰】宋公稱人者，小邾



有罪。

夏，蔡殺其大夫公孫姓、公孫霍。

晉人執戎蠻子赤歸于楚。【補曰】此執據《左

傳》是士蔑請於趙鞅而執之，則晉人非是晉侯。以蠻子非中國，不入諸執例，故略稱人，與君執有罪同辭也。蠻子名者，有歸于楚文，若不名，則與凡歸于京師文全同。以蠻子非中國，無嫌於生名，故名以別其文也。《公羊》引子北宮子曰：「辟伯晉而京師楚也。」何休以爲此解稱名之意，深得旨，但又加以迂曲漫衍之說則非也。張自超曰：「晉執曹伯曰畀宋人者，曹伯，晉之所欲得，非宋之所欲得也。執戎蠻子曰歸于楚者，戎蠻子，楚之所欲得，非晉之所欲得也。」高澍然曰：「不曰畀而曰歸，爲楚執也。且畀對人言，歸對國言也。」○【撰異曰】蠻，《公羊》作「曼」。徐彥曰：「《左氏》作「戎蠻子」也。」

城西郭。郭，郭也。【補曰】杜預曰：「魯西郭。」

六月辛丑，亳社災。殷都于亳，武王克紂而班

列其社于諸侯，以爲亡國之戒。劉向曰：「災亳社，戒人君縱恣不能警戒之象。」○【撰異曰】亳，公羊作「蒲」。徐彥曰：「賈氏云《公羊》曰「薄社也」者，蓋所見異。」文烝案：

「薄」即「亳」字，與僖二十一年盟薄同也。何氏所據本作「蒲」者，蓋「薄」字右旁脫其下半，遂誤爲「蒲」，而何注乃以爲先世亡國在魯竟，其說殊妄。亳社者，亳之社也。亳，亡國也，亳即殷也，殷都于亳，故因謂之亳社。亡

國之社以爲廟屏，戒也。立亳之社於廟之外以爲屏，蔽取其不得通天，人君瞻之而致戒心。【補曰】廟在雉門內之東，明亳社亦在東矣。周社則在西，所謂左宗廟右社稷。《左傳》說季氏執政曰「問于兩社」，謂周社、亳社。《呂氏春秋》狐援曰：「殷之鼎陳於周之廷，其社蓋於周之屏。」其屋亡國之社，不得達上也。必爲之作屋，不使上通天也。緣有屋，故言災。【補曰】《郊特牲》曰：

「喪國之社屋之，不受天陽也，薄社北牖，使陰明也。」《公羊》以爲揜其上而柴其下。汪克寬曰：「七年《左傳》云「以邾子益來獻于亳社」，則新脩亳社之屋可知。」文烝案：達上，十行本作「上達」，蓋誤倒。

秋八月甲寅，滕子結卒。

冬十有二月，葬蔡昭公。不書殺弑君之賊而

昭公書葬，既謂之盜，若殺微賤小人，不足錄之。【補曰】據《左傳》，翊弑後即見殺，不書殺者，書葬則殺之可知，盜賤

不足言殺也。

葬滕頃公。

五年春，城毗。【補曰】高士奇引《汲冢紀年》：

「殷祖乙二年自耿遷于庇，八年城庇，至南庚三年遷于奄。」

○【撰異曰】毗，《公羊》作「比」，又作「茈」，或作「庇」。

夏，齊侯伐宋。

晉趙鞅帥師伐衛。

秋九月癸酉，齊侯杵臼卒。○【撰異曰】杵，

《公羊》作「處」。

冬，叔還如齊。

閏月，葬齊景公。不正其閏也。閏月，附

月之餘日，喪事不數。【補曰】不正其數閏，故明言閏月，不

如書楚子昭卒依常例。《傳》省一數字，《注》所用，文六年

《傳》文也。洪咨夔曰：「三年之喪，二十五月再替，若於再

替之中以閏數，則替不再矣，是不能三年也。列國喪娶、喪

會、喪師不能通喪者皆是，獨於此託閏月以著喪期之縮，禮

壞不可盡紀，因事以正之。」文烝案：下有陽生、茶事，無危

文者，亦從鄭莊公例。

六年春，城邾瑕。【補曰】邾瑕，魯邑。何休以

爲取邾婁之蔑邑，蓋失之。○【撰異曰】《公羊》作「邾婁

蔑」。

晉趙鞅帥師伐鮮虞。

吳伐陳。

夏，齊國夏及高張來奔。【補曰】言及者，以

尊及卑，或是累也。國、高奔而茶弑，於是陳氏有齊，見國  
家不可一日無世臣。此許翰、洪咨夔、楊于庭說。

叔還會吳于柎。

秋七月庚寅，楚子軫卒。【補曰】楚昭王也。

不地，說見定十四年。

齊陽生入于齊。

齊陳乞弑其君荼。不日，荼不正也。【補曰】此

二事蓋蒙上月。茶，安孺子。○【撰異曰】茶，《公羊》作

「舍」，音舒。案：古讀「舍」皆如此，予聲、余聲之字通。陸

淳曰：「誤也。」陽生入而弑其君，以陳乞主之何

也？【補曰】陽生不入則乞不弑，入而後乞弑焉，宜以陽生主之。不以陽生君荼也。【補曰】既用史文，則取此義。其不以陽生君荼何也？陽生正，荼不正。【補曰】新人者正，新立者不正，故不宜君之也。《公羊》亦曰「廢正而立不正」。《晏子春秋》曰：「湑于人納女于景公，生孺子荼，景公愛之。諸臣謀欲廢公子陽生而立荼，公以告晏子，晏子曰：『不可。夫以賤匹貴，國之害也；置子立少，亂之本也。夫陽生長而國人戴之，君其勿易。』」不正則其曰君何也？荼雖不正，已受命矣。已受命于景公而立，故可言君。【補曰】自非亡公子之本正者，皆有君臣之義。入者內不受也，【補曰】重發《傳》者，以正奪不正，嫌異故也。不，各本作「弗」，今依唐石經改。荼不正何用不受？以其受命，可以言不受也。先君已命立之，於義可以拒之。【補曰】「二不受」亦依唐石經改。陽生其以國氏何也？【補曰】據正。取國于荼也。何休曰：「即不使陽生以荼爲君，不當去公子，見當國也。」又《穀梁》以爲國氏者，取國于荼，齊小白又不取國于子糾，無乃近自相反乎？鄭君

釋之曰：「陽生篡國，故不言公子。不使君荼，謂書陳乞弑君爾。荼與小白，其事相似，荼弑乃後立，小白立乃後殺。雖然，俱篡國而受國焉爾。《傳》曰齊小白入于齊，惡之也；陽生其以國氏何？取國于荼也；義適互相足，又何自反乎？子糾宜立而小白篡之，非受國于子糾則將誰乎？」【補曰】何既失之，鄭又非也。此與上不以陽生君荼各自爲義。荼以不正新立，故正者不宜君之。荼已受命，國實其國，故謂之取國于荼。不君之可，取其國不可，此《經》義之精而《傳》發之也。陽生事與小白不同，小白以不正殺正，正者實未有國，陽生以正弑不正，不正者實已有國。齊小白、齊陽生文同事異，其義亦異。《傳》一曰惡之，一曰取國，各順《經》意爲說，非自相反，亦不得以爲互相足。《穀梁》之文，圓轉無窮，鄭君猶惑焉，何怪劉敞、葉夢得之倫矣。王皙曰：「鄭氏經傳洽熟，獨出時輩，然其於《春秋》之意多不知聖人微旨，又性好《穀梁》，往往回護。」文烝以爲《穀梁》何事回護？鄭君於《穀梁》正患其不精耳，乃以回護爲病乎？

冬，仲孫何忌帥師伐邾。

宋向巢帥師伐曹。

七年春，宋皇瑗帥師侵鄭。

晉魏曼多帥師侵衛。

夏，公會吳于繒。【補曰】繒本繒國，魯所取。

《左傳》曰：「盟于鄆衍。」不書盟者，杜預以爲「禮儀不典」。今以爲諱也。不致者，會夷狄又離會。○【撰異曰】繒，《左氏》、《公羊》作「鄆」。

秋，公伐邾。八月己酉，入邾。【補曰】人

不言伐，並舉之惡內也，《公羊》失之。薛季宣曰：「伐邾本三家之謀，而公親之，不得已也。」文烝案：《傳例》曰：「日人，惡人者也。」以邾子益來。以者，不以者也。夫諸侯有罪，伯者雖執，猶以歸于京師，魯非霸主而擅相執獲，故日人以表惡之。【補曰】注末句當改云「故曰以者不以者也」。《傳》發例於此者，因內以見外。益之名，惡也。惡其不能死社稷。【補曰】荆以獻武歸。《傳》曰：

「何爲絕之？獲也。」此曰惡也，互以見義。《春秋》有

臨天下之言焉，徐乾曰：「臨者，撫有之也。王者無外，以天下爲家，盡其有也。」【補曰】疏曰：「謂若守于河陽，是內辭也，出居于鄭則爲外辭。」有臨一國之言

焉，諸侯之臨國亦得有之，如王於天下。【補曰】謂若公居

于鄆，地屬公，爲竟內。不言次鄆，未潰不言所在，公觀魚于棠，竟內不言如；晉侯卒于扈，未踰竟不言會，宋公見釋于薄，不言歸，明不當言公來也。疏但引卒于扈而曰以內外顯地，說不了。有臨一家之言焉。大夫臨家，猶諸

侯臨國。【補曰】謂若天子之三公以下氏采爲家也。疏但舉毛伯、劉卷，亦漏略。其言來者，有外魯之辭焉。非己內有從外來者曰來。今魯侯身自以歸而曰來，是外之也。【補曰】言來，非臨一國之辭，是外之也。外之

者，所以惡之，如不欲爲外辭，當如徐彥說云「以邾子益至自某」，或云還。○案：《春秋》於魯君臣未有外之如此者，時異事異而文異也。趙鵬飛曰：「說者曰定、哀多微辭，吾讀《春秋》，未見其微辭也，於此尤足證說者之謬。」趙說愚深取焉。杜預駁《公羊》曰：「制作之文，所以章往考來，情見乎辭。言高則旨遠，辭約則義微，此理之常，非隱之也。聖人包周身之防，既作之後，方復隱諱以避患，非所聞也。」

宋人圍曹。

冬，鄭駟弘帥師救曹。

## 八年春王正月，宋公入曹，以曹伯陽歸。

【補曰】《公羊》曰：「曷為不言其滅？諱同姓之滅也。何諱乎同姓之滅？力能救之而不救也。」何休曰：「不日者，深諱之。」文烝案：《春秋》之文，多殷勤致意於魯，哀篇尤甚焉。以諱為說，當得《經》旨。鄭玉曰：「或謂滅者亡國之善辭，上下之同力。曹亡與虞同，故不書滅，言自滅也。」案：曹之與虞事既不同，書法亦異，難以例觀。或又以為曹亡於春秋之終，夫子興滅繼絕之心不忍言滅，義失之巧。

## 吳伐我。

【補曰】據《左傳》，吳師直造城下。雖造

城下，猶應先言某鄙，再為加文，從不以難邇國之例。今直言伐者，內無政事，外召兵戎，將不能守其國，故直文同魯於諸侯也。吳伐本為前年人邾，前年有外魯之辭，此亦相因見義。《傳》發外辭義，則此可知也。董仲舒論哀篇事曰：「微國之君，卒葬之禮，錄而辭繁。遠夷之君，內而不外。當此之時，魯無鄙疆，諸侯之伐哀者皆言我。」《繁露》之言，足明變文之義矣。何休曰：「不言鄙者，起圍魯也。不言圍者，諱使若伐而去。」文烝案：何說失之。言伐為平文，非諱圍也。不言鄙為直文，為變文，非起其圍也。《左傳》亦不言圍，但以內外之文相準。伐衛、侵宋之等則當彼

言鄙之文，人許、圍邾之等則當此不言鄙之文耳。《左傳》曰：「吳人盟而還。」不書盟，亦諱也。杜預所謂「恥吳夷」。

## 夏，齊人取謹及闡。

宣元年《傳》曰：「內不言取，言取，授之也。以是為賂齊。」此言取，蓋亦賂也。魯前年伐邾，以邾子益來。益，齊之甥也，畏齊，故賂之。【補曰】注皆是也。為邾故賂齊，本《公羊》。益為齊甥，依《左傳》。○撰異曰：謹，《漢書·地理志》應劭注引作「鄆」。闡，《公羊》作「憚」。下同。《玉篇·阜部》作「憚」，《字林》、《廣韻》並同。徐彥曰：「《左氏》、《穀梁》作「謹」、「闡」字。」惡內也。【補曰】疏曰：「此《傳》與齊人取濟西田、齊侯取鄆不同者，以哀公犯齊陵邾而反喪邑，故言惡內。取是易辭，已有明文，而惡內之理未顯，故此特言之。」

## 歸邾子益于邾。

畏齊故也。【補曰】不言邾子益歸，言歸之者，以魯主其事，內外異辭。張大亨以為「畏強國而歸之，故變文書之」。非也。益之名，失國也。於王法當絕故。【補曰】重發《傳》者，以內歸之為文，嫌與衛侯、鄭等異也。

## 秋七月。

冬十有二月癸亥，杞伯過卒。

齊人歸護及闡。凱曰：「歸邾子，故亦還其賂。」

【補曰】杜預曰：「不言來，命歸之，無旨使也。」文烝案：此亦無專使接公。

九年春王二月，葬杞僖公。

宋皇瑗帥師取鄭師于雍丘。雍丘，地也。

【補曰】雍丘，宋地。《左傳》有明文。十三年取師不月，知此不蒙上月。何休曰：「疾略之。」○【撰異曰】陸淳《纂例》第十七篇《用兵例》引趙子曰：「不言帥師，闕文也。」而第三十六篇《脫繆略》、三十七篇《三傳經文差繆略》並無此條。今三家皆有「帥師」。取，易辭也。【補曰】與諸取同例。以師而易取，鄭病矣。以師之重而宋以易得

之辭言之，則鄭師將劣矣。【補曰】以鄭師之重而令宋得以易辭言取，《經》以為病，病其不戒備也。蕭楚、謝湜、高閌等說是。《公羊》曰：「其言取之何？易也。其易奈何？詐之也。」《左傳》例曰覆而敗之曰取某師，趙匡用《左氏》之意，又用啖助說。取以得為義，謂凡悉俘之曰取，不但敗之。劉敞則謂覆而敗之，不遺一人之辭。戴溪又因謂取師獨哀篇兩見，蓋春秋末年，用師無復節制，以至大敗，見世

變之愈下。文烝案：《穀梁》但言易辭，此是《春秋》著例，以易見病，明非取義於詐之、覆之。詐之、覆之《經》皆通言敗，故乘丘疑戰之等皆言敗；晉敗秦于穀，匹馬倚輪不反，亦言敗也。言敗者，易與不易皆得包之，故前此無取師文，今以宋、鄭互喪其師，近在五年內，特變敗而言取，別為一例。其辭皆易辭，其義以病鄭病宋相對，故唯哀篇兩見也。戴氏節制之說，失其本旨，而考之又不詳。《左傳》昭二十三年，邾人城翼，還過武城，武城人取邾師。此《左氏》言取師之明文，若以鄭莊取載為取三師，則固解《經》之誤耳。

夏，楚人伐陳。

秋，宋公伐鄭。

冬十月。

十年春王二月，邾子益來奔。【補曰】書名

者有罪，亦所謂奔而又奔之也。何休曰：「月者，魯前獲而歸之，今來奔，明當尤加禮厚遇之。」文烝案：何氏非也。月者，以邾最近魯，故仍史文錄月也。邾、邾皆月，皆別於他小國。

公會吳伐齊。

三月戊戌，齊侯陽生卒。【補曰】陽生雖正，然篡也。書曰，蓋與小白同。據《左傳》，是弑也。不書弑，與楚子卷同。

夏，宋人伐鄭。

晉趙鞅帥師侵齊。

五月，公至自伐齊。《傳例》曰：「惡事不致，公會夷狄、伐齊之喪而致之何也？莊六年，公至自伐衛，《傳》曰不致，則無用見公之惡事之成也。將宜從此之例。」【補曰】伐時齊侯未卒，注當言會夷狄伐鄰近大國，又當引僖二十六年《傳》「危之」之例，無取於見惡事之成。月者，為下葬。

葬齊悼公。【補曰】不去葬，蓋從鄭厲公例。

衛公孟彊自齊歸于衛。【補曰】言自齊者，

《左氏》定十四年《傳》云「自鄭奔齊也」。史例不志，故《經》無文。不言復歸者，蓋雖歸不復其前日在國之位。

薛伯夷卒。○【撰異曰】夷，《公羊》作「寅」。

秋，葬薛惠公。

冬，楚公子結帥師伐陳。

吳救陳。【補曰】凡書救，皆善也。伯舉戰稱吳子，故不言救。今還稱吳，從其常文，不嫌同中國也。狄救齊後有進文，此但以書救為善者，事各異也。據《左傳》，此救是延州來季子主之，不交兵而退。不書人，不書大夫名，例之常也。延州來季子，杜預謂是季札，蓋年九十餘。孫毓謂是札之子與孫也。趙汭曰：「救晉、救曹、救陳，春秋末世書救三事，可觀世變。其始伯主不能自立而諸侯救之，其繼中國無伯主可控告而諸侯自相救，其終中國不足以為中國而夷狄救諸夏矣。」

十有一年春，齊國書帥師伐我。【補曰】據

《左傳》，伐我及清、戰于郊、涉泗，是未造都城也。直言伐不言其鄙，明以魯之不國，特為變文，足知吳伐我不言鄙者非為圍矣。是役也，再求帥左師，樊須為右，實入齊軍。許翰論之曰：「以魯之微，搆怨大國，郊之戰，非其風俗禮義正勝則國幾亡，此仲尼之化也。」

夏，陳轅頗出奔鄭。○【撰異曰】轅，《公羊》作「袁」。

五月，公會吳伐齊。甲戌，齊國書帥師

及吳戰于艾陵，齊師敗績，獲齊國書。與華元同義。艾陵，齊地。【補曰】常例戰不言伐，爲不欲以吳及齊，故戰上復言伐。若但書戰，則當言五月甲戌公會吳及齊國書云云，是雖從由內及之之常文，終是以吳及齊，於文不可也。伐戰兩舉，準諸例則爲惡吳而并惡內，此役固可惡也。但雖伐戰兩舉，若使由內及之，猶當直言及齊國書戰，無由辟以吳及齊之文，故沒公而以齊及吳。既從以華及夷，以主及客之常例，又無以外及內之嫌也。戰所以可沒公者，內兵屬於吳，舉吳則公在可知。上書公會，不嫌戰無公。何休、杜預皆以爲魯與伐而不與戰，非也。趙汭謂以齊主之，從外辭。葉酉謂沒魯不書者，窮於辭。其說皆得之。若然，伯舉，吳爲蔡以，而不言伐楚，不以楚及吳者，楚非齊比，彼時又進吳稱子，故不同耳。不致者，會夷狄以伐鄰國，大惡也。前年從僖二十六年之例，再見自從常例。

### 秋七月辛酉，滕子虞母卒。

### 冬十有一月，葬滕隱公。

### 衛世叔齊出奔宋。【補曰】高閌曰：「《春秋》書

內外大夫出奔五十有八，蓋君之股肱，治亂所寄，故重而書之。然春秋之末，何出奔之多也？是時政在大夫，各欲自

專，始則相猜相忌，終乃相逐也。」○於是孔子以魯召，自衛反魯。《論語識》曰：「自衛反魯，刪《詩》、《書》，脩《春秋》。」

### 十有二年春，用田賦。古者九夫爲井，十六井

爲丘。丘賦之法，因其田財，通共出馬一匹、牛三頭，今別其田及家財，各爲一賦。言用者，非所宜用。【補曰】注「丘賦」六句，杜預語也。賈逵曰：「田，一井也。周制：十六井賦戎馬一疋、牛三頭。一井之田而出十六井之賦也。」文烝案：賦與稅異。賦者，賦其馬牛，賈，杜所同也。但杜意田爲一丘之田。田者，對乎家財之辭，既計一丘民之家資，令出一馬三牛，又計田之所收，更令出一馬三牛也。賈意田爲一井之田，田者對乎丘之辭，以一井之田而令出一丘一馬三牛之賦也。《左傳》孔子云「以丘亦足矣」，似賈得之。杜以昭四年《傳》鄭子產作丘賦，亦是於一丘家資之外別賦其田。在鄭謂之丘賦，在魯謂之田賦，其事不異，故既改服虔丘賦復古之說，又改賈逵田賦之說也，凡此皆《左傳》之學也。《國語》載孔子之言曰：「先王制土，藉田以力而砥其遠邇，賦里以入而量其有無，任力以夫而議其老幼。於是乎有鰥、寡、孤、疾，有軍旅之出則徵之，無則已。其歲，收田一井，出稷禾、秉芻、缶米，不是過也。」趙汭曰：「此與



《左傳》自不同。」孔廣森解《魯語》，據《異義》、《周禮說》有軍旅之歲，一井九夫，百畝之賦，出禾二百四十斛，芻秉二百四十斤，釜米十六斗，以爲即此田賦。昔伯禽征淮夷，徐戎，芻焚餼糧，郊遂峙之，田賦之法也。今魯用田賦者，是無軍旅之歲亦一切取之。此說《國語》之可通者也。《公羊》何休注曰：「田，謂一井之田。賦者，斂取其財物也。言用田賦者，若今漢家斂民錢以田爲率矣。」洪咨夔亦曰《禹貢》「厥賦」、「厥田」不同。《周禮》九賦，斂財賄非出於田，魯既有諸賦，復使出於田，是三農九穀之地亦斂其財賄也。此又於《左傳》、《國語》之外其說可通者也。古事無徵，群言舛亂，今姑並記之。用田賦大惡，甚於丘甲三軍，故略不錄月，與稅畝同意。《左傳》曰「春王正月用田賦」，知舊史當有月。古者公田什一，用田賦，非正也。古者五口之家，受田百畝，爲官田十畝，是爲私得其什，而官稅其一，故曰什一。周謂之徹，殷謂之助，夏謂之貢，其實一也，皆通法也。今乃棄中平之法而田財並賦，言其賦民甚矣。【補曰】宣十五年《傳》云「古者什一，藉而不稅」，此言「古者公田什一」，公田即藉也。異其文者，彼論稅，此論賦。彼當言不稅，此不可言不賦也。言非正者，明

用田賦爲什二也。用者，不宜用也。此不言初者，蓋亦不以爲常令。《左氏》七年、十三年《傳》稱魯賦於吳八百乘，此足明用田賦之故。何休所謂哀公外慕彊吳，空盡國儲。○嘗謂魯於是時匱乏極矣，而《傳》釋《經》義以什一爲說，《左傳》記孔子之言云「以丘亦足」。又《論語》：「哀公問於有若曰：『年饑，用不足，如之何？』」有若對曰：「盍徹乎？」曰：「二，吾猶不足，如之何其徹也？」對曰：「百姓足，君孰與不足？百姓不足，君孰與足？」此三文者，其意若一。呂本中以爲君子爲政，民力屈，財用竭，則反其本。譬諸療病者，先實元氣，乃攻其病也。《左氏》載續經十四年冬饑，則《論語》所記，蓋在其時歟？

夏五月甲辰，孟子卒。孟子者何也？

昭公夫人也。【補曰】昭公夫人，吳之女，當時謂之孟子也。《論語》陳司敗曰：「君取於吳，爲同姓，謂之吳孟子。」賈逵曰：「言孟子，若言吳之長女。」杜預曰：「謂之孟子，若宋女。」孔廣森曰：「孟子者，貴母姊妹之稱。《詩》曰『齊子由歸』可證也。」文烝案：《禮·雜記》曰：「夫人之命於天子，自魯昭公始也。」其不言夫人何也？諱取同姓也。葬當書姓，諱故亦不書葬。【補曰】疏曰：

「范據弋氏書葬也。范例夫人薨者十，卒者二，而書葬者十。」文烝案：《傳》以「諱取同姓」解「不言夫人」者，謂言夫人則當言某氏，不得諱言孟子，故不言夫人某氏，非謂有言夫人孟子之理也。既不言夫人某氏，故亦不得言薨，此與弋氏異。何休曰：「禮不娶同姓，買妾不知其姓則卜之，爲同宗共祖，亂人倫，與禽獸無別。」案：《國語》又曰：「懼不殖也，務和同也。」和者，以他平他也。《左傳》：「孔子與弔，適季氏，季氏不纔，放絰而拜。」

公會吳于橐皋。橐皋，某地。【補曰】當云楚地。《左傳》公使子貢辭盟。不致，與繒同。

秋公會衛侯、宋皇瑗于鄆。鄆，某地。【補

曰】當云吳地。《左傳》曰：「衛侯會吳于鄆。公及衛侯，宋皇瑗盟，而卒辭吳盟。」不書三國盟者，孔穎達曰：「魯自不書，仲尼亦從而不可書之耳。」文烝案：不致者，宋公不在從離會例，與洮、向同。○【撰異曰】鄆，《公羊》作「運」。

宋向巢帥師伐鄭。

冬十有二月，螽。【補曰】劉向以爲春用田賦，冬而螽。十三年九月螽，十二月螽，比三螽，虐取於民之效也。文烝案：宣十五年螽生，《傳》稱非稅畝之災，劉取彼

意也。比三螽猶不饑，至十四年冬，續經書饑，《公羊》解此曰「記異也」，《左傳》載夫子言「司曆過也」，蓋魯人所託。○【撰異曰】《公羊》此亦一作「螽」。

十有三年春，鄭罕達帥師取宋師于岳。

【補曰】岳，鄭地。取，易辭也。以師而易取，宋病矣。【補曰】疏曰：「與上九年事正反，嫌宋爲人所報，

非宋之病，故重發以同之。」家鉉翁以爲：「先責宋，今責鄭，責在取師則兵端有不論矣。」文烝案：《公羊》曰：「其易奈何？詐反也。」言詐未盡其義，言反得之。天道好還，出爾反爾，與隱二年人向、人極同義也。春秋後，百有餘年而爲戰國，君子蓋豫見焉，故宋、鄭之特文與莒、魯之變例相爲終始，其戒明，其坊遠也。天下大亂，孔道不絕，自獲麟之明年，凡三百有一年而有文、景之盛，【眉批】：「依馮光，陳晁說則止百八十九年。」則兵禍盡而儒道興矣。

夏，許男成卒。【補曰】時卒，亦惡之。○【撰異

曰】成，《左氏》或作「戌」。《公羊》作「戌」，亦或作「成」。案：戌，音恤。

公會晉侯及吳子于黃池。及者，書尊及卑

也。黃池，某地。【補曰】當云鄭地。此地近濟水。疏曰：「凡言會者，皆外爲主，今言公會晉侯則晉侯爲主矣。會無二尊，故言及，以卑吳。」文烝案：疏說未盡。凡公會諸國，晉侯下皆無及文，豈會有二尊乎？爲吳以夷狄進稱子不可，遂從列數之文，與中國同例，故加及文，而注明其爲書尊及卑也。書尊及卑，亦進於前之殊會矣。黎錞曰：「《經》書及，皆內及外，尊及卑，中國及夷狄，此亦中國及夷狄也。」黃池之會，吳子進乎哉？遂子矣。進遂稱子。吳，夷狄之國也，祝髮文身，祝，斷也。文身，刻畫其身以爲文也。必自殘毀者，以辟蛟龍之害。【補曰】《左傳》曰：「吳髮短。」又曰：「大伯端委以治周禮，仲雍嗣之，斷髮文身，贏以爲飾。」杜預以爲仲雍效吳俗，權時制宜，以辟災害。孔穎達引《漢書·地理志》「越人文身斷髮，以辟蛟龍之害」。應劭曰：「常在水中，以象龍子，故不見傷害。」欲因魯之禮，因晉之權，【補曰】魯秉周禮，晉爲伯，吳欲冠必因之者。疏曰：「恐臣子不肯變從，以魯禮天下共依，晉權諸侯所服故也。」而請冠端而襲，襲，衣。冠端，玄端。【補曰】疏曰：「吳俗祝髮文身，皮衣卉服，今請加冠於首，身服玄端，則衣冠上下共相掩

襲。」文烝案：冠者，委貌冠。俞樾讀「端」字絕句，「而襲」下屬，以爲襲之言人也，如《國語》「使晉襲於爾門，小國襲焉，大國襲焉」之「襲」。其藉于成周以尊天王，藉，謂貢獻。【補曰】疏曰：「貢獻之物，著於藉錄，以爲常職。」吳進矣。【補曰】申美之。吳，東方之大國也，累累致小國以會諸侯，以合乎中國，累累，猶數數也。【補曰】謂次序積之。吳能爲之，則不臣乎？吳進矣。言其臣也。【補曰】又申美之。自「吳夷狄之國」至此，皆申上「進乎哉」句。王，尊稱也。子，卑稱也。辭尊稱而居卑稱，以會乎諸侯，以尊天王。【補曰】子者，四夷之本爵。《曲禮》曰：「其在東夷、北狄、西戎、南蠻，雖大曰子。」楚子，其大者也。徐子、吳子、越子之等，其次也。弦子、夔子、舒子、宗子、蠻子、萊子、潞子、陸渾子、白狄子、戎子、肥子、鼓子、無終子之等，又其次也。《左傳》有驪戎男，《國語》亦謂之驪子。越范蠡曰「吾先君固周室之不成子」，既言不成子，則子爲爵稱甚明。《史記·孔子世家》曰：「吳、楚之君自稱王，而《春秋》貶之曰子。」是前文諸所書楚子、吳子，皆貶從其本爵也。

此《傳》云辭尊稱居卑稱，是吳於此會自稱本爵也。《國語》晉董褐對吳曰：「命圭有命，固曰吳伯，不曰吳王。」韋昭以爲：「《周禮》『伯執躬圭』，吳本稱伯，故曰吳太伯。」又曰：「後武王追封爲吳伯，故曰吳太伯。」據此似吳爵是伯非子，但「太伯」之「伯」自當爲字，與仲雍、季歷同，不得爲爵也。《國語》董褐又言：「君若無卑天子，而曰吳公，孤敢不順從君命。」吳王許諾。乃退就幕而會。吳公先歆，晉侯亞之。又似此會吳稱公，不稱子。《左傳》此盟，吳、晉爭先，卒先晉人。《外傳》又與之異，似皆未可據耳。自「王尊稱」至此，皆申上「遂子矣」句。吳王夫差曰：「好冠來。」【補曰】謂所新請得冠。夫差，光子。孔子曰：「大矣哉！夫差未能言冠而欲冠也。」不知冠有差等，唯欲好冠。【補曰】注非也。謂之好冠，是未能言此冠名，必請之，是欲冠。夫差慕中國，故大之也。五句又以足上「吳進」之意。《戰國策》謂夫差爲黃池之遇，以會爲遇，不足據。《左傳》曰「秋七月辛丑盟」，陳傅良曰：「盟不書者，吳、晉之盟，《春秋》終諱之，雖兩伯之辭，終不以吳、晉同主盟也。」又《左傳》會有單子，陳氏曰：「不書，不忍書也。」《公羊》解「稱子」曰「吳主會」，解「先晉」曰「不與夷狄主中國」，解「言及」曰「會

兩伯之辭。重吳也」。又曰「吳在是則天下諸侯莫敢不至」。何休曰：「時吳敗齊臨菑，乘勝大會中國，齊、晉前驅，魯、衛驂乘，滕、薛俠轂而趨。」程端學曰：「晉主中國會盟百有餘年，自伯舉之戰，晉侯不見者二十四年，至此遂與吳會而魯從之，中國之衰，蠻夷之強極矣。」程略本孫復說。

### 楚公子申帥師伐陳。

於越入吳。【補曰】薛季宣曰：「吳子忘不共戴天之讐，爭中國諸侯於外，而越卒入吳，所謂無遠慮有近憂矣。」胡安國曰：「夫以力勝人者，人亦以力勝之矣，吳嘗破越，遂有輕楚之心，及其破楚，又有驕齊之志，既勝齊師，復與晉人爭長，自謂莫之敵也，而越已入其國都矣。吳侵中國而越滅之，越又不監而楚滅之，楚又不監而秦滅之，秦又不監而漢滅之。」曾子曰：「戒之戒之！出乎爾者，反乎

爾。」老氏曰：「佳兵不祥之器。其事好還，其言豈欺也哉？」《春秋》初書於越人吳於伯舉之後，再書於越人吳於黃池之後，皆因事屬辭，垂戒後世，深切著明之義也。黃仲炎引魏李克對文侯：「吳所以亡者，數戰數勝，民疲主驕也。」文烝案：伯舉、黃池皆有「進吳」文，而皆書「越人」於下，文少事備，辭約指明，百代史家以是爲楷。○又案：

《春秋》於楚，先州之後乃人之，後乃有君、有大夫、有師，猶以夷狄視之。於吳，皆國之，最後乃爵之。於於越，始終國之。以三國皆夷俗，不可治以周禮，雖有賢君大夫，猶夷也。觀於屈原之書，不言孔子，而《孟子》稱陳良北學於中國，荀子以干、越、夷貉並言，【眉批】：「干即吳。」蓋終周之世，南人隔絕華風焉。

秋，公至自會。吳進稱子，又會晉侯，故致也。【補

曰】疏曰：《傳》例會夷狄不致，致者，一以吳進稱子，二又為公會晉侯。文烝案：注雖兼言之，其意主於吳稱子也。若吳無進文，雖晉侯在不致。此致公，明越人時吳子未歸矣。

晉魏曼多帥師侵衛。○【撰異曰】《公羊》無

「曼」字。段玉裁曰：「二《經》亦當然。」

葬許元公。

九月，螽。

冬十有一月，有星孛于東方。不書所孛之

星而曰東方者，旦方見字，衆星皆沒故。【補曰】此《公羊》、杜預意也。《公羊》曰：「其言于東方何？見于旦也。」何休曰：「旦者，日方出時，宿不復見，故言東方，知爲旦。」董仲舒、劉向以爲不言宿名者，不加宿也。以辰乘日而出，亂

氣蔽君明也。王應麟曰：「星孛東方在於越人吳之後，彗見西方在衛鞅入秦之前，天之示人著矣。」文烝案：王氏不言其占而言其理，最爲得之。三字文各不同。又《左氏》載續經明年冬「有星孛」，不言所在，杜預曰：「史失之也。」今人惑於荒外新法，改九重之稱，增四七之宿，謂彗孛亦可以術推，實蕩且妄。張衡能作器械地震，而今不能，則術亦不精矣。夫日食之道甚著，聖人猶不憑術，況其他乎？堯言洚水警余，以災爲警，卒致太平，受嘉瑞，斯聖人之志事也。《大戴禮·誥志》：「子曰：『古之治天下者必聖人。聖人有國則日月不食，星辰不隕，①勃海不運，②河不滿溢，川澤不竭，山不崩解，陵不施谷，③川浴不處，④深淵不涸。於時龍至不閃，⑤【眉批】：「閃」即「淦」字。』鳳降忘翼，螽獸忘攫，⑥爪鳥忘距，螻蟻不螫嬰兒，蜚蠊不食天駒，雉出服，河

①「隕」，原脫，據《大戴禮記·誥志》補。

②「勃」，原作「孛」，據《大戴禮記·誥志》改。

③「谷」，原脫，據《大戴禮記·誥志》補。

④「浴」，原作「谷」，據《大戴禮記·誥志》改。

⑤「閃」，《大戴禮記·誥志》作「閉」，疑作「閉」是。

⑥「螽」，原作「螽」，據《大戴禮記·誥志》改。

出圖。」

盜殺陳夏區夫。《傳例》曰：「微殺大夫謂之

盜。」○【撰異曰】夏，《公羊》一本作「廉」。王引之曰：「廉，蓋「廉」字之誤。古聲夏、廉相近。《檀弓》注以夏屋爲門廡。隸書「廉」作「廡」，與「廉」相似，故「廉」誤爲「廡」耳。」區，《公羊》作「彊」，一作「嫗」。

十有二月，螽。【補曰】許翰曰：「《春秋》書魯人

事至用田賦，書魯天災至比年三螽，見其重賦害民，傷和致異，民力已窮，天命已去，君子之心於魯已矣。」洪咨夔曰：「星字在衆星皆沒，大明將升之旦，未有烈於此時者也。螽於十三月之間爲害者三，未有數於此時者也。」

十有四年春，西狩獲麟。杜預曰：「孔子

曰：「文王既沒，文不在茲乎？」此制作之本旨。又曰：「鳳鳥不至，河不出圖，吾已矣夫！」斯不王之明文矣。」夫《關雎》之化，王者之風，《麟之趾》、《關雎》之應也。然則斯麟之來歸於王德者矣。《春秋》之文，廣大悉備，義始於隱公，道終於獲麟。【補曰】疏曰：「聖人受命則有鳳鳥河圖之瑞，孔子言已無瑞應，道終不王。歸於王德者，謂由孔子有

王德也。」文烝案：杜語見《左傳序》，「斯不王」以下皆無之，范用己意而失於分別也。麟者，太平之嘉應，帝王之極瑞，故以王德言之。麟實爲孔子至，《傳》下詳其說。《爾雅》曰：「麟，麋身，牛尾，一角。」何休曰：「一角而戴肉。」京房《易傳》曰：「麋身，牛尾，狼額，馬蹄。有五采，腹下黃，高丈二。」李光地曰：「石鵲猶書月日，此止書時，蓋欲始於春，終於春。」案：王應麟嘗言《易》始乾初九，終未濟上九，終始皆陽。此等姑存其說。○【撰異曰】《論衡》引《公羊》說稱《春秋》曰「西狩獲死麟」。案：何注亦曰「時得麟而死」。引取之也。言引取之，解《經》言獲也。《傳例》

曰：「諸獲者皆不與也，今言獲麟，自爲孔子來魯，引而取之，亦不與魯之辭也。」【補曰】疏曰：「必使魯引取之者，天意若曰以夫子因魯史記而脩《春秋》故也。」文烝案：注、疏言魯引而取之，言不與魯，皆非也。麟瑞爲夫子脩《春秋》至，非爲魯至。今言魯獲麟，則是《經》之文辭，引而歸之於魯，以爲魯取之，如言「引其君以當道，引而進之」是也。此獲爲引取之之辭，則非不與之辭。其事既與他言獲者異，明其義亦不同也。引取之者，謙不敢當麟爲己出，乃善則稱君之愷，正以與魯不得云不與也。《書》稱鳳皇來儀，《汲冢紀年》言有麟，此《經》如下《傳》所云不可言麟來，

不可言有麟，依《左傳》「少皞摯立，鳳鳥適至」及《論語》「鳳鳥不至」之文，或當直言麟至，為欲引諸魯而取之，故不言至而言獲。獲者，通生死之稱，《公羊》家謂獲死麟，相傳以為折其前左足而死也。注言麟自為孔子來，疏言以夫子脩《春秋》故，此皆《穀梁》家舊說。《五經異義》載石渠議奏、尹更始、劉向、周慶、丁姓、王亥諸《穀梁》家皆以為麟應孔子至。劉向《說苑》曰：「夫子行說七十諸侯，無定處，意欲使天下之民各得其所。而道不行，退而脩《春秋》，采豪毛之善，貶纖介之惡。人事浹，王道備，精和聖制，上通於天，而麟至，此天之知夫子也。」《左氏》諸家亦同此說。《異義》載《左氏說》以為麟生於火而游於土，中央軒轅大角之獸。孔子作《春秋》，《春秋》者，禮也，脩火德以致其子，故麟來而為孔子瑞。鄭衆、賈逵、服虔、穎容等皆以為孔子自衛反魯，考正《禮》、《樂》，脩《春秋》，約以周禮。三年文成致麟，脩母致子之應。獨《公羊》諸家及諸讖緯并何休說以為獲麟而作《春秋》，《春秋》乃因麟作。《史記·孔子世家》、杜預注並依用之。而孔穎達引孔衍《公羊傳》本云：「今麟非常之獸，其為非常之獸奈何？有王者則至，無王者則不至。然則孰為而至？為孔子之作《春秋》。」與何氏本絕異，是亦與《穀梁》、《左氏》諸家同矣。【眉批】：《毛詩傳》亦

云「麟信而應」，《禮》、《公羊》則云「仁獸」。今以為母子信禮之說，瑣碎未足深據，而麟鳳河圖之屬，實為古聖嘉瑞。《傳》言引諸魯而取之，則明麟不為魯來，不為魯來則明為孔子至。《穀梁》之微言簡語每多如此。《左傳》曰：「仲尼觀之，曰：『麟也。』」然後取之。《公羊》曰：「有以告者曰：『有麀而角者。』」孔子曰：「孰為來哉！孰為來哉！」是皆謂因孔子言乃知其為麟，故《韓子》曰：「麟為聖人出，聖人者必知麟。」張洽深取之，此不易之論也。夫麟既為聖人出，而適出於脩《春秋》三年之後，遂以絕筆焉，於是七十之徒因以為《春秋》文成所致。自後學者，相承用之。竊嘗推究而信其必然，未可任意哆口，以相訾議，而亦不必如胡安國之說也。狩地不地，不狩也。且實狩當言冬，不當言春。【補曰】注當云實狩當書月，以見非正。又當言公也。《傳》但略言之。非狩而曰狩，大獲麟，故大其適也。適，猶如也，之也。非狩而言狩，大得麟，故以大所如者名之也。【補曰】大所如而言西狩，言狩為大，大由於實非狩，非狩由於言西，言西從濟西、河陽之例，又足見大也。《公羊》曰：「孰狩之？薪采者也。薪采者則微者也，曷為以狩言之？大之也。曷為大之？為獲麟大之



也。《左傳》曰：「西狩于大野，叔孫氏之車子鉏商獲麟。」《左氏》直記事，亦言狩，言獲，順《經》言之耳。其不言來，不外麟於中國也。其不言有，不使麟不恒於中國也。雍曰：「中國者，蓋禮義之鄉，聖賢之宅。軌儀表於遐荒，道風扇於不朽。麒麟步郊，不為暫有，鸞鳳栖林，非為權來。雖時道喪，猶若不喪。雖麟一降，猶若有恒。鸛鵒非魯之常禽，蜚蜮非祥瑞之嘉蟲，故《經》書其有，以非常有，此所以取貴于中國，《春秋》之意義也。」【補曰】《左氏》賈穎注曰：「《書》稱『鳳皇來儀』，今麟不言來，非外麟也。」穎本於賈，賈兼通五家《穀梁》說，故據以為注。又引《虞書》文，明《春秋》之辭不同他《經》也。此中國不專指魯，《公羊》謂鸛鵒非中國之禽，麟非中國之獸。孔廣森並以中國為國中。彼是此非也。夫不外者，實外也，不使不恒者，實不恒也。在中國之外而不恒，故《公羊》謂之「記異」，要是以極遠之物而為中國之瑞也。大氏麒麟、鳳皇、龍圖、龜書，於物為靈，於聖人為瑞。是故麟鳳之德也靈也，為聖人至則瑞矣；圖書之神也靈也，為聖人出則瑞矣。麟鳳生而在遠，猶圖書成而未出，不可以言瑞，言瑞必自聖人，而聖人必在中國。中國者，五政之所加，七賦之所養，

以夏別裔，以華殊夷，自天下之生未之有改也，是故《春秋》貴焉。○王通《中說》曰：「《春秋》其以天道終乎？故止於獲麟。」案：此說與文成致麟之義足相發明。夫春秋之世，天道之變也；《春秋》之書，人道之至也；書成而麟至，則明天道變中有常，而天人之意合也。魯隱讓國而被弑無後，桓弑之而位定。文姜弑夫淫兄而令終，且子孫世國，季氏以盛。紀侯得民而滅，楚商臣弑父而強，衛宣姜以淫長世，宋共姬以貞燔死，此皆衰周運數，適丁極變而然。夫子無位，顏子短命，亦由是也。《春秋》撥亂世反諸正，以仁施人，以義治我，以智辯理，以禮正名，皆所以立人道而卒之精和聖制，遂致麟祥，與包犧之河圖、舜、文之鳳鳥如出一軌，隱然有垂法百世之象，謂非天道可乎？【眉批】：「曹大家以百葉一體之義說《左傳》三樂，李士謙引千變萬化之句證佛書五道，蓋亦有理。」南宮适問羿，羿不得其死，禹稷有天下而夫子不答，朱子以為即罕言命之意。竊謂胡安國引《孟子》「志壹則動氣，氣壹則動志」，天人感應，大略固如此矣。



## 律句四十韻

紀世當秦孝，談文妙柳州，其評爲峻厲，

《柳集·報袁君陳秀才避師名書》、《答韋中立論師道書》。於《傳》最殊尤。若究精微蘊，還須反覆求。

《柳集·答元饒州論春秋書》云：「反覆甚喜。」謂陸伯沖書也。善經經獨合，《六藝論》云：「穀梁善於經。」南宋

鄭綺有《穀梁合經論》。辯理理何幽？《法言》云：

「說理者莫辯乎《春秋》。」《文心雕龍》云：「《春秋》辯理。」

聖代風蒸蔚，愚儒志紹搜。字難徵《七錄》，

阮孝緒《七錄》云：「穀梁子，名俶，字元始。」他書則云名

赤，名真，名喜，而不記其字。道未喪千秋。體正辭

逾切，三家之論，《穀梁》最正，所謂善於《經》。文清旨

自稠。荀崧謂「《穀梁》文清義約」，其實彌約彌密。孟

荀符梗概，孟子同時，荀則弟子也。書多合。恒鄭證

源流。觀桓譚《新論》、鄭君《釋廢疾》，知《穀梁》出《公

羊》前。乘記奔陳克，《史通》引《汲冢瑣語》、《晉春秋》

書「鄭棄其師」，《晉乘》文也。明魯史舊文亦然，可與《傳》相證。論箴仕衛由。《論語·正名》章末二句與「隕

石」《傳》同。《內儲》韓子述，《韓非子·內儲說上》載

夫子解《春秋》「隕霜」語即《傳》所本。《新語》陸生

修。陸賈爲漢儒開先，《新語》中兩引《傳》文，又說宋襄、

晉厲及頰谷事，並合《傳》義。又《論衡》引其說性道語。

歷歷都相印，孜孜不暫休。專精終日夜，一

覘廿涂陬。夙昔粗闕豹，蒐羅積汗牛。楊烏

初受指，子年九歲，十歲受《春秋》三《傳》、《國語》等書於

先君子。高鳳慣埋頭。東晉遺箋注，西京舊

校讐。議宗甘露代，漢甘露元年，召五經名儒太子

太傅蕭望之等大議殿中，平《公羊》、《穀梁》同異，各以經處

是非。時《公羊》博士嚴彭祖、侍郎申輓、伊推、宋顯、許廣，

《穀梁》議郎尹更始、待詔劉向、周慶、丁姓、中郎王亥，各五

人，議三十餘事。蕭望之等十一人各以經義對，多從《穀

梁》。名誌皓星儔。江公弟子榮廣、皓星公。梅福

陳謨碩，梅明《穀梁春秋》，上書引《傳》，明夫子爲殷後。

劉蕡對策優。策多引《傳》。旁推何杜冠，近莫澤沅侔。百籍皆葑菲，群疑幾盾矛。直從明越宋，上溯夏偕游。或者譏膚淺，晉元帝太興初詔語。宋大明二年，何偃議郊猶述之。茲焉定豫猶。墨原輸可發，鄭君《發公羊墨守》。歆實向之羞。劉向受《穀梁春秋》，其子歆治《左氏》，數以難向。五例三科競，杜預說《左氏》有三體、五例，何休著《公羊文謚例》有五始、三科、九旨、七等、六輔、二類、七缺。單詞隻義紬。真傳歸魯國，《穀梁》、魯學。先路導瑕丘。自瑕丘江公遞傳榮廣、蔡千秋、尹更始等。竊比崧扶墜，荀崧請立《公羊》、《穀梁》博士，而元帝但許立《公羊》。非同兆釋仇。晉劉兆以三《傳》互爲讐敵，著《春秋調人》七萬餘言，又兼解三《傳》。憑將孤詣苦，息彼衆人咻。口誦期詳熟，心通異矯揉。章分兼句解，隱索又深鉤。幡布時時拭，甌醪疊疊投。殺青功甫竟，明白語無廋。勿使瑕藏璧，徐看粹集裘。意言書畢貫，《摘》、《駁》、

《弼》全收。吳程兼有《周易摘》、《尚書駁》、《論語弼》。曲說芟燕郢，俄空歎夾鄒。浦陽懷渺渺，宋浦江鄭綺著《穀梁合經論》三萬言，康熙中，朱檢討彝尊於書賈舟中見一鈔本，未之買，深悔之。溧水悵悠悠。溧水王芝藻者，順治甲午舉人，著《春秋類義折衷》十六卷，專主《穀梁》，見《四庫》附存目。後來說《穀梁》者則有如鎮江柳氏等書，予俱未得見。周禘殘編檢，閔二年《注》謂禘祫通於諸侯，文二年《注》謂禘大祖不及親廟主，皆癸亥所定稟，未知有劉向《五經通義》語，乙丑秋乃檢得。唐郊贈簡誄。隱九年注，《大唐郊祀錄》、《太平御覽》引《傳》云云。今年庚午秋，烏程汪教諭曰楨詣書見眎，尤侯幽部《韻會》以上皆有「誄」字。多聞終有愧，絕學庶長留。老大無生計，窮愁甚拙謀。惟勤思問辨，曷閒疾貧憂？信矣《公羊》俗，本序。誠哉《左氏》浮。《韓集·進學解》。未應嫌黨護，《柳集·陸文通先生墓表》云「黨枯竹，護朽骨」，謂說三《傳》諸家也。是用作歌謳。

同治癸亥三月初稟，庚午臘月改定，將

使同志之士知予爲此書之難也，加注附末，以當後序。嘉善鍾文烝伯燾甫。

翼日又以前詩未盡之意率成二首：

萬派千枝異，茲編自日星。墨朱塗乙編，兵火苦辛經。取善弘高密，鄭君兼取三家，無專注。傳疑慎考亭。朱子於《春秋》未爲書。兩賢不可作，誰踞竈觚聽。

詰《傳》焉知《傳》，河汾漫品題。三家須主一，魯學實先齊。驗決章條備，精詳歲月稽。參驗稽決，擇精語詳，予書要處。謂超文字相，亦妄聽之奚。門人沈善登讀予書，輒謂合於妙有空無之旨，語殊駭俗而會意深矣。

後二年，正副本俱成。予妻言曰：「書末殿以韻語，《法言》、《漢書》、《說文》自序例也。」竊亦爲四言體，仿《金石錄後序》之意。

二十八年，積此篇帙，二百卅部，《四庫》春秋類著錄及附存目二百三十三部。遜此詳密。君子用心，終始若一。病起促書，宵興呵筆。惟我能知，非我弗悉。我學幼昭，陳傅良妻張令

人，葉適銘墓謂與夫同志。我懷與弼。《吳康齋集》言與妻皆夢見孔子。志歟夢歟？亦勿深詰。惟記艱勤，以俟來日。

秀水沈印齡瑒華附記。時壬申三月既望也。



